

Ex libris REV. BARDOUT

ELENCHUS
AUCTORUM ET OPERUM
QUI IN HOCCE NONO VOLUMINE CONTINENTUR.

LUDOVICUS LEGRAND,
Tractatus de incarnatione Verbi divini.

CARDINALIS GERDILIUS,
De adorandâ humanitate Christi.

IDEM,
De cultu sacri cordis Jesu.

INDEX RERUM.

ELENCHUS

ALFREDI ET OPERUM

ALFREDI ET OPERUM

ALFREDI ET OPERUM

ALFREDI ET OPERUM

ALFREDI ET OPERUM

ALFREDI ET OPERUM

IDEM

IDEM

INDEX

THEOLOGIAE
CURSUS COMPLETUS,

EX TRACTATIBUS OMNIUM PERFECTISSIMIS UBIQUE HABITIS,

ET A MAGNA PARTE EPISCOPORUM NECNON THEOLOGORUM

EUROPE CATHOLICÆ,

UNIVERSIM AD HOC INTERROGATORUM, DESIGNATIS,

UNICÈ CONFLATUS,

*Plurimis annotantibus presbyteris
ad docendos levitas pascendosve populos altè positis.*

ANNOTARUNT VERO SIMUL ET EDIDERUNT

FR. J. P. ET V. S. M****.

TOMUS NONUS.

De incarnatione Verbi divini

et de cultu sacri cordis Jesu.

PARISIIS,

APUD EDITORES,

IN VIA GALLICÆ DICTA :

RUE DES MAÇONS-SORBONNE, N° 7.

—
1837.



JUL 27 1933

6319

LUDOVICI LE GRAND VITA.

Le Grand (Ludovicus) in Burgundiâ natus est, loco dicto Lusigny, anno 1711, die junii duodecimâ. Augustoduni Clericus factus 1728, parisiense petiit Sancti-Sulpicii seminarium. Ibi illustrissimos inter condiscipulos tantâ emicuit rerum theologicarum philosophicarumque peritiâ, ut dignus habitus sit, qui è scholaribus recens scamnis, in Claramontii cathedrâ philosophiæ professor institueretur. Parisios reversus licentiæ ingreditur stadium, magnamque scientiæ suæ opinionem omnium animis injicit. Conscriptus deindè S. Sulpicii sodalitus, Cameracum primùm ac postea Aurelianos mittitur sacram doctrinam professurus. Crescente verò in dies nominis famâ, Parisios revocatur, lauream consequitur doctoralem, mirâque adeò disciplinarum ecclesiasticarum laude fulget, ut defuncti in locum Montagni(1), votis omnium invitantibus, S. Sulpicii studiis magister præpositus sit. Dùm munus hoc obiret, ut par est, strenuè, elaboratissimum de *Incarnatione Verbi divini* exaravit opus, quod secundis curis impressum auctumque non mediocriter, tribus tomis comprehensum 1754 in lucem prodiit. Non ità multò post prælectiones theologicas de *Deo ac divinis attributis* ab antepenultimo in studiorum præfecturâ prædecessore suo, Lafosse, novis additamentis ex-

(1) Theologus de quo hic agitur verus est auctor libri *De notis theologicis*, quem in Prolegomenis nostris alteri Montagno, tùm ob nominis, tùm ob ordinis religiosi, tùm ob tituli similitudinem, adscripsimus.

ornavit locupletavitque. Litteris sacris tractatum etiam *De Ecclesiâ* parabat; opus autem illud pretiosum, morte interceptus, haud potuit absolvere. Volumen unum superest, septuagintaque voluminis secundi paginæ, quæ omnia claro theologo minimè profectò indigna sunt. Varia prætereà animo intendebat, vel aggressus est, quæ, deficiente tempore, interrupta pependerunt.

In sacrâ facultate parisiensi quàm laboris amans judicii que maturitate commendandus esset, non semel ostendit. Quippè ibi negotium nullum theologicum erat aliquantuli momenti, cujus non ipse pars magna foret, cùm potissimum ageretur de censurâ librorum conficiendâ, qui tunc temporis adversus sanctissimam Religionem denso agmine in vulgus spangebantur. Quoties auctor noster doctorum parisiensium, jure quodam suo conspicuus, et manus et lingua extitit! Narrant D. Riballiero facultatis tùm syndico, familiare fuisse, ut inconsulto Le Grand nihil quidquam de theologiâ responsionibus elucidandum sibi esse putaret.

Dùm Buffonii commenta geologica facultatis judicio subjicerentur, ferveretque inter deputatos disputatio, Le Grand pro suâ sententiâ nimium forsitan incaluit; postridiè enim morbo gravi correptus est, quo paululùm decrescere viso, Issiacum rus petiit; sed ibi tertiâ die, cùm jam spes aliqua amicis elucesseret, sexaginta et novem natus annos, 1780, fato pie functus est.

PRÆFATIO.

Quanti intersit fidei christianæ accurata de Incarnatione Verbi Divini tractatio, nemo non videt. Agitur enim de magno, ut ait Apostolus Tim. 3, 16, *pietatis Sacramento, quod manifestatum est in carne*, (seu ut græca ferunt, *quod Deus manifestatus est in carne*) *justificatum est in Spiritu, apparuit Angelis, prædicatum est*

Gentibus, creditum est in mundo, assumptum est in gloriâ. Et non est, inquit Apostolorum Princeps (Act. 4, 12, in alio aliquo salus quam in Jesu-Christo Filio Dei propter nos incarnato. Nec enim aliud nomen est sub Cælo datum hominibus, in quo oporteat nos salvos fieri.

Qui igitur de re tanti momenti disserere ag-

greditur, is in eam pertractandam omni curâ et studio incumbat; ac sanè de maximâ à se adhibitâ diligentîâ, vel ipsâ libri sui editione lectoribus spondere censendus est. At quo exitu?

Doctorum et intelligentium existimatorum judicium sit, quorum sententiæ, multa præfando, antevertere inane videretur, neque satis decorum.

TRACTATUS DE INCARNATIONE VERBI DIVINI.

Quæcumque ad tractationem de Incarnatione Verbi Divini pertinent, duodecim dissertationibus concludentur. Prima erit de nomine, definitione et cognitione mysterii Incarnationis. Secunda, de ejus existentîâ adversus Judæos astruendâ. Tertia, de ejusdem existentîâ adversus gentiles. Quarta, de existentîâ ejusdem adversus hæreticos. Quinta, de ejus necessitate. Sexta, de ejus naturâ. Septima, de ejus causis. Octava, de satisfactione Christi. Nona, de aliis Incarnationis proprietatibus. Decima, de Christi titulis et officiis. Undecima, de novâ Filiatione divinâ ab Harduino et Berruyero invectâ, et sanctissimæ Christi humanitati, Verbo unitæ, ab iis in recto attributâ. Duodecima, de cultu qui Christo debetur.

Dissertatio prima.

DE NOMINE, DEFINITIONE ET COGNITIONE INCARNATIONIS.

Dissertationem illam in tria capita dividemus. Agemus 1^o, de nomine et definitione Incarnationis. Inquiremus 2^o, quomodo dignoscatur ejus possibilitas; 3^o, quibusnam illud mysterium seu peragendum, seu peractum innotuerit.

CAPUT PRIMUM.

De Nomine et Definitione Incarnationis.

Incarnatio, græcè *Σαρκωσις* juxta vim nominis unionem cum carne significat; si verò rem ipsam et Ecclesiæ usum spectes, summum

illud est mysterium in Christo Domino adimpletum, quo Verbum divinum sibi totam humanitatem, prout mente et corpore constituitur, copulavit.

Vox *Incarnationis* in Scripturis expressa quidem non reperitur; sed in iis habetur æquivalenter. Illud enim Joannis 1, v. 14: *Verbum Caro factum est*, idem sonat, ac *Verbum incarnatum*. Ubi advertendum carnem eò loci accipi per synecdochen pro humanitate integrâ, quod in sacris litteris non est infrequens, uti observat S. Augustinus lib 14 de Civitate Dei, cap. 2. Sic Geneseos 6, v. 12, legitur: *Omnis caro corruperat viam suam*, id est, omnis homo; et Luc. 3, v. 6: *Videbit omnis caro salutare Dei*.

Nomine *Filii incarnati* utitur synodus Nicæna generalis prima in Symbolo Fidei. *Incarnationis* vocabulum jam antea usurpaverat S. Irenæus, qui seculo secundo floruit, lib. 3 de Hæres., cap. 19, aliàs 21, ex quibus colligere est hujusce vocis acceptionem ad exprimendum illud mysterium esse antiquissimam.

De aliis nominibus, quibus Incarnatio à Patribus græcis et Latinis designata est, consuli potest doctiss. Petavius, qui lib. 2 dogmatum theolog. de Incarnatione, cap. 1, et lib. 3, cap. 1 et 2, illa omnia recenset, ac fusè et eruditè, more suo, explicat. Ex eo pauca quædam excerpisse satis erit.

Igitur ratione sui, effectum et finis, Incarnatio præsertim à Græcis sæpissimè vocatur *Œconomia*, eò quod Deus illo mysterio benignè nobiscum egerit, ad usum captumque infirmitatis humanæ sese accommodaverit, sapientissimèque et suavissimè salutem nostram providerit,

Eandem ob causam nominibus *dispensationis* et *attemperationis* donata fuit.

Dicta est etiam *exinanitio*, *abbreviatio*, *demissio*, habitâ ratione simul tum supremæ Majestatis Personæ Verbi Divini, tum tenuitatis naturæ humanæ, quam assumpsit. Ejusmodi appellationi prævit Apostolus Philipp. 2, v. 7, ubi de Filio Divino loquens : *Semetipsum exinanivit, inquit, formam servi accipiens.... et habitu inventus ut homo.*

Præterea, nuncupata est ἐπιφάνεια seu *apparitio*, et θεοφάνεια, id est, *Dei manifestatio* et *declaratio*, quia per illud mysterium Dei Filius sensibiliter in carne apparuit, et manifestatus est, juxta illud Baruch 3, v. 38 : *In terris visus est, et cum hominibus conversatus est.*

Denique unionis duarum naturam, in quâ illius mysterii essentia continetur, exprimendæ causâ, Incarnatio appellata est *unio*, *unitio*, *adunatio*, *unitas*, *commixtio* (quâ voce abusos esse Eutychianos postea notabimus), *incorporatio*, *inhumanatio*, *assumptio* et *apprehensio* naturæ scilicet humanæ, etc., quarum denominationum vis et sensus ex dicendis in tractatûs decursu facillè intelligentur.

Cæterum, inter varias voces quibus illud mysterium significatum est, nulla aptior *Incarnationis* nomine, quod præ cæteris ejusmodi appellationibus, jam dudum in universâ Ecclesiâ obtinet.

Definiri potest *Incarnationis* mysterium : *Unio naturæ duplicis, divinæ scilicet, et humanæ, in unicâ Verbi divini Persona, ex quâ unus Christus.*

Dicitur 1^o : *Unio*, græcè ἕνωσις, id est, conjunctio distinctorum, seu forma quâ unum fit ex pluribus.

Dicitur 2^o : *Naturæ duplicis, divinæ scilicet et humanæ*, quia juxta fidem catholicam in Scripturis sæpè expressam, et in conciliis præsertim adversus Eutychianos et Monothelitas declaratam, Christus Dominus naturâ divinâ et naturâ humanâ constat; ita ut nihil desit duabus illis naturis, nulla facta fuerit illarum permixtio aut confusio, neutra in alteram conversa fuerit, nec divina humanam absorpserit. « Sequentes igitur sanctos Patres, » inquit concilium Chalcedonense generale IV, quo errores Eutychetis anno 451 proscripti sunt, act. 5, « unum eundemque confiteri filium et Dominum nostrum J. C. consonanter omnes docemus, eundem perfectum in Deitate, et eundem perfectum in humanitate, Deum verum, et hominem verum, eundem ex

« animâ rationali et corpore; consubstantialem Patri secundum deitatem, consubstantialem nobis eundem secundum humanitatem : ... « unum eundemque Christum, Filium, Dominum, Unigenitum, in duabus naturis inconfusè, immutabiliter, indivisè, inseparabiliter agnoscendum; nusquàm sublatâ differentiâ naturarum propter unionem, magisque salvâ proprietate utriusque naturæ. » Et Symbolum quod sancto Athanasio tribui solet : « Perfectus Deus (Christus) perfectus homo ex animâ rationali et humanâ carne subsistens ... Unus non conversione Divinitatis in carnem, sed assumptione humanitatis in Deum; unus omninò non confusione substantiæ, sed unitate personæ. »

Dicitur 3 : *In unicâ personâ*, nam pariter de fide est, atque adversus Nestorium in concilio Ephesino generali III, anno 431, definitum, etsi sint duæ in Christo naturæ, divina et humana, esse tamen in eo personam unicam; adeoque unionem duplicis ejusmodi naturæ in Christo non esse duntaxat localem, quam præsentia eodem in loco constitueret, nec esse metaphoricam, aut moralem, in gratiæ donis singularibus naturæ humanæ concessis, aut adoptione divinâ solummodò prositam, vel ex prædestinatione ortam; sed esse veram, realem ac physicam, atque, ut aiunt, hypostaticam, seu personalem, id est, ejusmodi, ut duæ naturæ in unâ eâdemque coadunentur personâ. « Si quis in uno Christo, aiebat S. Cyrillus Alex. in suis contra Nestorium Anathematismis ab Ecclesiâ approbatis, post unionem dividit hypostases... anathema sit. » Et synodus Chalcedonensis loco mox citato : « Confitemur... « unum eundemque Christum.... in duabus naturis.... agnoscendum; nusquàm sublatâ differentiâ naturarum propter unionem, magisque salvâ proprietate utriusque naturæ, et in unam personam atque subsistentiam concurrente; non in duas personas partitum aut divisum, sed unum eundemque Filium et unigenitum Dei Verbum. »

Observatum porrò sæpè à SS. Patribus homini in hoc statu concessum non esse, ut mente assequatur ac verbis disertè explicet quæ sit natura et ratio ejusmodi nexûs, in quo summa mysterii altissimi potissimùm consistit. Rem verò illustant auctor Symboli Athanasiani et iidem passim SS. doctores exemplo hominis, in quo duæ naturæ prorsus diversæ, nempe anima et corpus ita conjunguntur, ut ex his unica persona exurgat. Eodem enim

ferè modo, etsi in Incarnatione duæ sint naturæ, divina et humana, nihilominus tamen unica est persona, unus Christus. Dixi *eodem ferè modo*, namque urgenda non est in omnibus illa comparatio, ut modo videbitur.

Dicitur 4^o : *In unicâ Verbi Divini Personâ*, siquidem de fide est illam unicam personam, duplici naturâ in Christo constantem, esse ipsammet personam Verbi divini, quæ eadem semper manens immutabilis perficit humanitatem, ejusque personalitatem supplet. Atque in eo deficit exemplum mox allatum ex homine desumptum; nam cum anima et corpus sint substantiæ finitæ, et sese mutuò perficiant, personalitas hominis utrique communis est, ut docent philosophi; at verò juxta fidem persona integra Christi Domini ipsa est persona Verbi divini summè perfecta, quæ, dum humanitatem assumere, et sibi physicè unire dignatur, illi perfectiones addit, ac proinde eam ultimò complet, non verò ipsa perficitur nec ultimò completur.

Dicitur 5^o : *ex quâ unus Christus*, quia Christus illa est persona, quæ constat duabus naturis divinâ et humanâ, hypostaticè unitis in unâ personâ Verbi.

Operæ pretium fuit ut unio istius tractatûs quædam mysterii de quo agimus, notio delinearetur. Hæc omnia deinceps declarabuntur uberius.

CAPUT II.

De cognitione possibilitatis mysterii Incarnationis.

Majoris momenti est ista quæstio quàm fortè primo intuitu videatur.

Possibilitas rei nihil aliud est, quàm attributorum ejus consensio; id enim possibile, quod nullam contradictionem involvit.

Possibilem esse Incarnationem invictè probant theologi, dum adversus Judæos, Gentiles, Socinianos, aliosque hujusce dogmatis impugnatores diverso momentorum genere evincunt mysterium illud esse revelatum, ac proinde verum et possibile; sed de Incarnationis possibilitate hocce modo astruendâ nondum agitur. Quæstio movetur triplex de usu rationis in eâ possibilitate investigandâ. Prima, an possibilitas Incarnationis demonstretur, ut aiunt, positivè. Secunda, utrum saltem demonstretur negativè, seu an ostendatur eam demonstrationibus non impugnari. Tertia, utrum homo cui Incarnatio proponitur credenda, jure inquirat prius juxta methodum So-

cinianam, an rationi illud mysterium repugnet, quàm an revelatum sit.

Quod autem primo loco quæritur, an scilicet Incarnatio verè demonstretur possibilis, considerari potest duplici modo, nempe vel priusquàm mysterium illud esse revelatum cognoscatur, vel suppositâ illius revelationis cognitione, id est, vel antecederet ad fidem, vel suppositâ fide. Enimverò dari possunt à Deo revelata quæ demonstrantur, de quibus fortè nisi præluxisset revelatio, nequidem cogitatum fuisset.

Tota autem agitur controversia de ratione solâ, id est, in seipsâ sistente, nec, in medium demonstrationis, revelationem motivis credibilitatis quantumvis stabilitam ullatenus assumente.

Sed, ut primæ quæstionis, et maxime secundæ status innotescat, præcipuè observandum quid vulgari illâ distinctione intelligatur, rem demonstrari posse, vel positivè, vel negativè.

Possibilitas rei dicitur positivè demonstrari, ubi ex medio evidenter cognito, cum ipsâ re intrinsecè connexo, ritè deducitur eam non repugnare. 1^o Medium sit evidenter cognitum, id est, præmissæ argumentorum, quibus demonstratio constat, debent esse de se evidentes, aut evidenter probatæ. 2^o Ex eo medio rei possibilitas ritè deducatur, seu ad legitimas dialectices regulas exigendum est argumentum demonstrativum. 3^o Medium quod assumitur sit cum ipsâ re intrinsecè connexum, id est, ex naturâ suâ ad rem demonstrandam dicat connexionis habitudinem. Quo ultimo differt demonstratio quæ fit ratione solâ, et quæ parit, ut aiunt, evidentiam intrinsecam, evidentiam veritatis; ab eâ quæ ex motivis credibilitatis petitur ad adstruendam revelationem mysteriorum religionis, et dicitur ingenerare evidentiam extrinsecam et credibilitatis. De istâ posteriori demonstrationis specie jam diximus impræsentiarum non agi; prioris autem exempla omnes scientiæ subministrant; sic v. g. Deum existere demonstramus ex creaturis; ipsum esse æternum, immutabilem, quia est ens necessarium; ejus attributa nullam contradictionem involvere, quia cum sit perfectissimus, quidquid in eo est dicit *ens*, nihil habet quod dicat *non ens*.

Rei possibilitas demonstratur negativè, quando solvuntur argumenta adversus illam proposita, seu, quod idem est, cum ostenditur objectiones quibus rei possibilitas impugnatur, non esse veras demonstrationes.

Cum igitur omnis veræ demonstrationis ratio in duobus sita sit, nempe in præmissarum evidentiâ, et in legitimâ regularum dialectices observatione, planum est ad negativam demonstrationem sufficere, quod, objectione in syllogismum redactâ, ostendatur vel alterutram præmissam non esse evidentem, aut sufficienter probatam, vel occurrere aliquid vitiosum in formâ.

Itaque ad demonstrandam negativè possibilitatem mysterii, non requiritur 1^o, ita solvi objectiones, ut earum falsitas solâ ratione demonstraretur: nam aliud est argumentum esse falsum, aliud non esse demonstrativum. Ut falsum evincatur, unius saltem è præmissis falsitas, aut vitium formæ manifestè innotescant necesse est, ut demonstrativum illud non esse pateat, satis est quod meritò iudicetur, vel formam argumenti posse esse vitiosam, vel unam è præmissis, esto verisimilis appareat, nec esse evidentem de se, nec certò demonstratam. Atque inter illa duo, nempe ostendere ratione solâ argumentum esse falsum, et ostendere illud non esse demonstrativum, tantum discrimen intercedit, ut sæpè argumentum quod demonstrativum non esse constat, reipsâ valdè sit probabile, imò in se verum esse possit, licet ejus veritas non sit liquidò ac perspicuè nota.

Non requiritur 2^o, ut ratione solâ duce certum sit nullam dari posse veram et propriè dictam demonstrationem, quâ impugnetur rei possibilitas. Si enim agatur de mysterio fidei, certissimè quidem per revelationem cognoscimus; illud nullâ demonstratione posse impugnari. Sed ad demonstrationem negativam necesse non est ut ratio sibi relicta id probet, sufficit si quidquid reipsâ objicitur, illud, ratione iudice, genuinæ demonstrationis non mereatur nomen.

Tanti verò interfuit hæc duo annotare, ut si quis, iis non satis intellectis, mysteriorum possibilitatem adversus incredulos defendere ratione suscipiens, omnes, quæ fieri possunt, objectiones ita solvendas arbitraretur, ut earum demonstraretur falsitas, ultra metas progressus, non modò plus quàm satis est conaretur, sed et opus aggrediretur, ut mox patebit, planè impossibile, quippe quod demonstrationi positivæ æquivaleret. Expediit quidem, quod solent non omittere theologi, ut, quando id fieri potest, objectionis in mysterii possibilitatem propositæ falsitas perspicuè monstraretur; sed cum aliquando id fieri nequeat, observan-

dum fuit ad ejusmodi objectiones solvendas id non esse requisitum, quia scilicet adversus mysteria verisimilitudines opponi posse profitemur, nec scopum hic attingunt increduli, nisi in medium veras demonstrationes proferant.

Ex his porrò sequitur demonstrationem negativam possibilitatis rei, veluti medium quoddam tenere inter demonstrationem positivam ejusmodi possibilitatis, et demonstrationem oppositi. Ubi possibilitas verè demonstraretur, certò iudicaretur rem esse possibilem; ubi demonstraretur oppositum, rem repugnare pariter absque erroris formidine affirmarem; ubi verò tantum negativè demonstratur possibilitas rei, nobis non licet solâ ratione duce quidquam certò pronuntiare. Quod si quæstio agitur de mysterio revelato, ejus veritati et possibilitati assensum quidem securi præbemus, sed revelatione, non ratione ducti.

In ejusmodi notionibus exponendis fortè videbimur plus æquo immorati. Sed occurrendum fuit innumeris paralogismis in quos eâ de re incidit auctor infeliciter celebris Dictionarii critici, cujus placita modò referemus.

Unum superest addendum quo demonstrationis negativæ natura, ubi de possibilitate rei agitur, plenissimè innotescat; nempe distinguendum esse inter veritates físicas, et veritates metaphysicas; nomine veritatum physicarum eæ intelliguntur quæ rerum naturalium ordine instituto innituntur, quæ proindè possunt ex potentiâ Dei absolutâ aliquam exceptionem pati. Veritates metaphysicæ sunt eæ quæ ipsâ rerum essentiâ immutabili fundantur, adeò ut nullam patiantur exceptionem, ac necessariò falsum sit, et contradictionem involvat quidquid iis reverà opponitur. Planum est multa esse vera physicè quibus veritas metaphysica non competit, et vice versâ; sic, v. g., miracula non repugnant in se, quamvis veritatibus physicis non sint consentanea; sic nunquàm demonstrabitur metaphysicè esse falsum, seu implicare quod de Christo et B. Virgine Deiparâ fides docet, nempe filium illæsâ suæ Matris virginitate posse concipi et nasci; id tamen ordini naturæ instituto ac semper observato non est conforme: pariter ubi omnes sensus perpetuò, constanter, et uniformiter referunt esse panem, ibi panem adesse perfectò verum est physicè; sed non ideò concipimus repugnare Deum in signum reconditi alicujus mysterii, ut fit in Eucharistiâ, dato erroris cognoscendi medio, voluisse absente pane, easdem ac si adesset panis, sensationes in nobis exci-

tari. Patet porrò genuinā demonstratione non impeti possibilitatem mysterii alicujus, putā Incarnationis, si illud veritatibus physicis adversari duntaxat demonstretur; id quippe non agitur, fatenturque ultrò omnes Christiani mysterium illud esse supra naturam longè positum; proindeque ad demonstrandam negativè illam possibilitatem sufficit si ostendatur nullam ejusmodi mysterii cum veritatibus metaphysicis realem pugnam demonstrari.

Jam verò quod ad tertiam quæstionem spectat nihil eò loci de eā specialiter annotandum. Accurata enim erroris Sociniani ac doctrinæ circā eam catholicæ inferiùs tradenda expositio, ad statum illius liquidò aperiendum sufficiet.

His generatim præmissis, de triplici quæstione propositā triplici articulo agendum est.

ARTICULUS PRIMUS.

Ostenditur Incarnationis possibilitatem non demonstrari positivè.

Confutandi eò loci veniunt nonnulli, qui philosophicis subtilitatibus immodicè confisi, fidei mysteria sibi visi sunt ratione attingere ac positivè demonstrare.

Conclusio. Etiam suppositā fide, mysterii Incarnationis possibilitas ratione solā non potest demonstrari positivè.

Prob. 1^o ex Scripturis; ad Corinth. 2, v. 7, de Incarnatione verba faciens Apostolus: *Loquimur, inquit, Dei sapientiam in mysterio, quæ abscondita est.* Ephes. 3, v. 8 et Coloss. 1, v. 26, illud idem mysterium appellatur *Sacramentum absconditum à seculis et generationibus.* Ex quibus sic arguitur: Mysterium quod in Scripturis appellatur sapientia abscondita, Sacramentum absconditum, non potest ratione ita investigari ut demonstretur positivè ejus possibilitas; atqui locis modò citatis mysterium Incarnationis appellatur *sapientia abscondita, Sacramentum absconditum*; ergo, etc.

Prob. 2^o ex sanctis Patribus quorum multa testimonia afferri possent. Omnium sensum exhibet sanctus Augustinus, epistola 137, aliàs 3, ad Volusianum, ubi de istā quæstione ex professo disserens, temeritatemque hæreticorum illud mysterium ratione impugnantium reprimens, expressè tradit illud esse rationi impervium. « Hic si ratio quæritur, inquit cap. 2, n. 8, non erit mirabile; si exemplum poscitur non erit singulare. Demus Deum aliquid posse, quod nos fateamur investigare non posse; in talibus rebus tota ratio facti est potentia facientis. » Censet igitur sanctus doctor, mysterium

Incarnationis esse mirabile, singulare, rationi impervium et investigabile; ergo, etiam suppositā fide, etc.

Prob. 3^o ratione theologicā; nam quidquid ratione solā demonstratur positivè, vel demonstratur à priori, vel demonstratur à posteriori: atqui etiam suppositā fide possibilitas mysterii Incarnationis, etc. 4^o Non demonstratur à priori, seu per causam; non enim per causam physicam, siquidem causa physica Incarnationis est voluntas, et omnipotentia Dei; atqui ex ideā voluntatis et omnipotentiae Dei non potest colligi Incarnationis possibilitas, cum voluntas Dei circa illud mysterium peragendum liberima fuerit, ejus verò omnipotentia rerum possibilitatem, seu attributorum consensionem supponat, non producat in objectis. Neque etiam per causam, ut aiunt, formalem potest demonstrari Incarnationis possibilitas; nam nomine causæ rei formalis intelligitur ipsa rei essentia; sed ex ideā essentiae Incarnationis demonstrari nequit hanc esse possibilem. Enimverò id unum novimus de Incarnationis naturā, nempe eam esse unionem ita arctam naturæ divinæ et naturæ humanæ in unicā personā Verbi, ut verè et propriè dici possit, *Deus-homo* et *Homo-Deus*; atqui tantum abest ut ex illā definitione evidenter colligatur illud mysterium esse possibile, ut potius qui solā ratione duceretur, in eā posset sibi videri deprehendere contradictiones apparentes; ergo.

Præterea possibilitas rei non potest demonstrari positivè ex ideā ejus analogicā tantum: atqui non datur idea Incarnationis, nisi analogica, neque enim alio modo quam per analogiam quamdam ad humana concipimus quid fides doceat de unicā in Christo personā, de unionem hypostaticā; ergo, etc.

2^o Incarnationis possibilitas pariter non demonstratur à posteriori, id est, neque per effectus formales, neque per effectus physicos; non per effectus formales, seu non per aliquam Incarnationis proprietatem, siquidem nulla assignari potest Incarnationis aut ejus possibilitatis proprietas ratione cognita, quā in notitiam perspicuam ejusmodi possibilitatis certò duamur. Non per effectus physicos, sive naturales, sive supernaturales; nam effectus naturales, nempe opera Christi, quæ dicuntur naturalia, ut incessus, locutio, mors, etc., nullam profectò habent naturaliter cognitam connexionem cum unionem illius humanitatis; et naturæ divinæ in personā verbi. Ipsi verò effectus supernaturales, nempe opera superioris ordinis, ut

miracula, etc., arguebant quidem Christum esse à Deo missum, sed cum incarnatione non erant intrinsecè connexa, non demonstrabant ex se et independenter à revelatione Christum ea patrantem esse hominem-Deum. Nonne majora et plura numero, juxta Christi promissum, ab ejus discipulis edita fuerunt? ergo, etc.

Dices 1° : Miracula Christi sensibus, ac proinde naturaliter innotescebant, ex ipsis ratio evidenter deducit missionem Christi fuisse à Deo, proindeque de mysterio Incarnationis et aliis ejus doctrinæ capitibus non esse dubitandum; ergo saltem ex operibus Christi supernaturalibus demonstratur Incarnationis veritas.

Distinguo antecedens : ex Christi miraculis ratio mediante revelatione evidenter deducit de Incarnationis veritate non dubitandum, concedo; ratio sola sibi relicta, nec in medium demonstrationis revelationem miraculis cognitam assumens, nego; itaque miracula Christi eatenus probabant Incarnationis veritatem, quatenus ejus doctrinam esse à Deo revelatam evincebant. Nulla ipsis inerat connexio specialis cum ejusmodi mysterio, nec ad illud magis quàm ad alia doctrinæ Christi capita habitudinem ex naturâ suâ dicebant; porro jam monuimus quæstionem moveri de ratione solâ in seipsâ sistente, ex principiis cum re demonstrandâ intrinsecè seu ex naturâ suâ connexis procedente. Ultrò ac libentissimè concedimus, quod indubitatum est, rationem ex motivis credibilitatis manifestè ostendere mysterium Incarnationis esse revelatum, ac proinde verum et possibile; sed de istâ probationis specie non agitur.

Objicies 2° : Verè et positivè demonstrat veritatem mysteriorum religionis christianæ, qui eam esse à Deo evincit; atqui religionem christianam esse à Deo planè evincitur; ergo, etc.

Distinguo majorem : demonstrat veritatem mysteriorum ex principiis extrinsecis mediante revelatione, seu quatenus mysteria ostendit esse à Deo revelata, concedo; demonstrat ex principiis intrinsecis ratione solâ in se sistente, nec in medium demonstrationis revelationem assumente, nego.

Jam dictum est Incarnationis sicut et aliorum mysteriorum veritatem demonstrari quidem quatenus ex variis characteribus divinitatis quibus religio christiana insignitur, quæcumque fides docet, revelata esse ac proinde vera, cer-

tissimè colligitur; sed demonstratio illa, 1° non est ex principiis intrinsecis, ut aiunt, sed tantum ex principiis extrinsecis; id est, miracula, prophetiæ, et alia credibilitatis motiva ex quibus petitur, habent quidem ex naturâ suâ vim probandi doctrinam cui suadendæ applicantur ita liberrimè disponente providentiâ : verum eorum natura non exigit ut uni potius quàm alteri dogmati applicentur, nec potius cum Incarnatione quàm cum alio quovis dogmate quod Deus revelare, et ejusmodi characteribus confirmare potuisset, ullam ex naturâ suâ connexionem habent. 2°. Hinc illa demonstratio non fit ratione solâ, quæ in se tantum sistat; in ejusmodi enim demonstrationis genere, revelatio divina in medium assumitur, nec aliter dogmatis astruitur veritas, nisi quia illud evincitur esse à Deo revelatum : atqui, ubi expositus est quæstionis status, dictum est totam controversiam moveri de demonstratione ex principiis intrinsecis petitâ, in quâ in medium non assumeretur revelatio motivis credibilitatis quantumvis stabilita; ergo, etc.

Instabis. Non minùs certa est demonstratio ejusmodi dogmatum religionis, quàm quælibet demonstratio metaphysica : ergo, etc.

Nego consequentiam; quia agitur non de certitudine cognitionis possibilitatis mysterii, sed de modo ac ratione ejusmodi possibilitatis cognoscendæ; an scilicet illa possibilitas innotescat independenter à revelatione, per rationem solam, demonstratione ex principiis intrinsecis petitâ, quæ evidentiam, ut aiunt, veritatis pariat.

Objicies 3°. Cum Deus sit summum bonum ac proinde suū maximè diffusivum, sequitur illum diffundi posse modo perfectissimo : atqui non potest perfectius diffundi quàm productione mysterii Incarnationis; ergo.

Distinguo minorem : sed ratione naturali sibi relicta non cognoscitur an possit hocce modo diffundi; concedo : cognoscitur naturaliter huncce modum esse possibilem, nego.

ARTICULUS II.

Ostenditur mysterium Incarnationis demonstrari negativè, seu demonstrationibus non impugnari.

Triplex error hic notandus; qui enim sentiunt adversùs Incarnationem aut alia quævis mysteria fidei, argumenta evidentia, quæ solvi nequeant, opponi posse, in tres classes dividuntur pro triplici modo, quo erroneum illud principium propugnârunt.

Alii quippe duplici distinctâ veritate oppositâ, alterâ fidei, alterâ rationis, docuerunt illud quod juxta fidem est verum, posse esse falsum secundum rationem, et vice versâ, ac proinde Incarnationem, etsi rationi repugnet, divinâ tamen fide tenendam esse; quem errorem disertè expressit Lutherus in disputatione theologicâ, quæ tota circa hanc materiam versatur anno 1539 (1) vel 1541 (2) die 11 Januarii habitâ, ubi sic loquitur sententiâ II: « In theologia verum est Verbum esse carnem factum, in philosophiâ simpliciter impossibile et absurdum. » Sent. IV et V: « Sorbona, mater errorum, pessimè definit idem esse verum in philosophiâ et theologiâ, impièque damnavit eos qui contrarium disputaverunt. » Sent. XV: « Impingit quidem theologia in philosophiæ regulas, seu ipsa vicissim magis in theologiæ regulas. » Et Sent. XIX: « Præmissæ sunt veræ, et conclusio falsa. Et verum vero hic prorsus non consonat. » Illud Lutheri placitum à quo ipse recessit cum apologiam Augustanæ confessionis approbavit, ejus discipuli non tuentur, imò ipsum benignè conantur interpretari. Cumque è suis quidam duce Daniele Hofmanno Helmstadiensi professore illam veritatis theologicæ, et veritatis philosophicæ distinctionem labente seculo 16 propugnâssent, dogma illud absurdum jubente Julio Henrico de Brunswick retractare coacti sunt; testis est Graverus de unicâ veritate, et alii.

Ejusmodi autem figmentum primus non excogitavit Lutherus, quippe duplicis veritatis distinctionem jam in Averroistis damnârat concilium Lateranense sub Leone X. Alii ex adverso unicâ veritate admissâ perversius tamen errant, nempe propter argumenta quibus ratio impetit Incarnationis possibilitatem, judicant illud dogma contradictionem involvere, ideòque illius veritatem et revelationem negant. Ita quotquot Incarnationis fidem respuentes in illam argumenta ex ratione congerunt, inprimis verò Sociniani omnium hæreticorum perniciosissimi. Alii denique, etsi rationis axiomata quædam mysteriis, v. g. Incarnationi, planè opposita existiment, neque tamen admittunt duplicis veritatis distinctionem, neque rejiciendam putant Incarnationis, aut cujusvis alterius mysterii fidem, rati veritatem quæ una est et simplex, posse evidentibus quibusdam rationibus adversari. Ita Baylius; is enim objectiones in præci-

pua fidei capita Trinitatem, Incarnationem, (art. *Pyrrhon.*) Providentiam præsertim ac bonitatem Dei; etc. (art. *Manich.* et alibi), ex ratione ductas, quæ valet ingenii subtilitate, et eloquii facilitate exultas, dum, in Dictionario historico critico, ut totidem evidentia et insolubilia argumenta, velut historicè quidem, et quasi aliud agens, sed nihilominus efficaciter lectoribus exhibet; hæc tantum responsionis loco adjicit, rationi humanæ non confidendum, adhærendum fidei, auctoritatem Scripturarum esse rationibus evidentissimis anteponendam, fidem christianam esse supernaturalem, eamque esse ejus naturam ut de rationis evidentia triumphare debeat.

Propter hæc verò scriptis publicis de irreligione et Pyrrhonismo à pluribus postulatus (1), in apologeticis operibus suis, rejectâ iterum quam jam in Dictionario improbaverat Lutheri et Hofmanni mox expositâ distinctione, seseque defendendi specie, in difficultatibus adversus religionem proponendis sibi constans, contendit mysteria religionis esse simul et vera in se, et argumentis evidentibus contraria (2); non ideò tamen Pyrrhonismum universalem inducendum; evidentiam quidem, ut characterem veritatis certissimum (3) esse agnoscendam, sed omnia non esse perinde evidentia; distinctisque variis evidentiae gradibus adversariorum objectiones irritas (4) fieri; denique pugnam hanc fidei et rationis vult intelligi de quibusdam tantum rationis ef-

(1) Præter abbatem Renaudot quem de Dict. Crit. consuluerat D. Boucherat gall. cancell. et quo auctore illius operis Parisiis edendi facultas denegata, et Jurisæum qui ejusdem operis causam ad consistorium Rotterod. detulit; in Baylium, dum viveret, scripserunt, eumque irreligionis et Pyrrhonismi accusarunt Joan. Le Clerc, *Bibliot. chois.* T. 9, a. 3, et 10, versùs finem; item T. 10, art. 8; Jac. Bernard, *Nouvel. de la rép. des lettres* 1706, art. 4, et a. 2; Jaquelot, *Conformité de la foi et de la raison, ou défense de la Relig.*, etc.

(2) *Eclairciss. sur les Manich.* ad calcem Dict. crit. edit. Amst. (Trivoltii) 1734, pag. 722 et 724. *Rép. au Prov.* part. 2, cap. 128, pag. 761 et 762, edit. Hag. 1727, tomo 3. Ibid. cap. 153, versùs fin. pag. 771; item cap. 159 et 160, pag. 853, 854, etc. *Rép. à M. Le Clerc*, § 5, 4. *Rép. au Prov.* part. 4, cap. 24 et 25, pag. 1071 et seq. *Entr. de Max. et de Them.* part. 1, c. 5, edit. Hag. 1731, pag. 15, et cap. 7, pag. 25 et alib.

(3) *Rép. au Prov.* part. 4, cap. 24, pag. 1070 et 1071.

(4) Ibid. pag. 1071, et cap. 25, pag. 1074; item *Entret. de Max. et de Them.* cap. 5, pag. 15 et alibi.

(1) Tomo 1^o operum Luth. edit. Jen. an. 1612, fol. 466.

(2) Juxta edit. Vit. an. 1582, fol. 413. v.

fatis, non de omnibus, de ratione particulari quæ in nobis est, non de ratione universali (1); ita ut juxta ipsum mens evidentia quædam luminis naturalis principia deserens, ut revelationi se submittat, rationis ductum deserere dici non possit, quia scilicet dum anteposit revelationem divinam rationi, ducitur certissimis aliis id præscribentibus naturalis luminis principiis (2).

Summa hæc est systematis quo Baylius in se collatam irreligionis accusationem diluere conatur; quam accusationem hic à nobis expendi non sinit institutum operis. Equidem non diffiterer quamvis ejusmodi principia quâ parte evidentiae certitudinem labefactant, perniciose sunt, eum tamen impietatis non insinuat, qui ad objectiones hæreticorum propulsandas similia imprudenter proferret. At verò diversa omnino causa Baylii; quisquis oculatus inspexerit tum inexactam ejus quâlibet occasione datâ in fidem argumentandi libidinem, et in amplificandis, ut dictum est, objectionibus studium, tum levitatem (3) momentorum quibus fidei adeò novicam agendi rationem, etiam à tolerantissimis (4) condemnatam excusat, tum denique ejus operum indolem, in quibus omnes Pyrrhonismi doctrinae characteresprehenduntur (5); is sanè intelliget, systema ejusmodi, quo integrum Pyrrhonismi virus continetur, ejus defensionem minimè sufficere.

Mirum autem quot cavillationibus, argutiis, comparationibus captiosis utatur in defendendâ tam desperatâ causâ. Notiones diversas quas suprâ distinximus, plerumque confundere amat; eam objectionem esse evidentem et insolubilem usque supponit, cujus falsitas clarè non demonstratur; non rarò emollire videtur sententiam, nihil tamen retractat; totque nubibus rem integram obvolvitur et obscurat, ut

(1) *Rép. au Prov.* part. 2, cap. 158 et 159, pag. 832 et 833. *Entr. de Max. et de Th.* part. 2, cap. 31, pag. 91.

(2) *Rép. au Prov.* part. 2, cap. 133, pag. 769 et seq. cap. 158, pag. 832. *Ibid.* part. 4, cap. 25. *Entr. de Max. et de Them.* part. 1, cap. 5, 7, etc. *Ibid.* part. 2, cap. 5, 6, 8, 10, etc.

(3) Prætexit inprimis historici munus; rationis deprimendæ, ne in fidem rebellet, necessitatem; ejusmodi objectionibus doctorum studium ad eas difficultates solvendas, excitari; et alia quæ profectò ab altero in defensionem similis causæ non sivisset afferri.

(4) Leibnitz, *Essai de Théod. Conf. de la foi avec la rais.* edit. Brux. 1734, n. 40, pag. 47; Beausobre, *Hist. des Manich. disc. prélim.* pag. 3, Amst. 1734, etc.

(5) Vid. Crouzaz. *Examen du Pyrrhonisme.* Hag. 1733.

theologorum ex quâcumque communione auctoritatem in suæ causæ patrocinium advocare persæpè non dubitet.

Adversus triplex illud errorum genus sit.

CONCLUSIO. Mysteriorum Incarnationis possibilitas demonstrari potest negativè.

Probatur: Illud potest negativè demonstrari possibile, cujus possibilitas nullâ objectione evidenti et insolubili, seu nullâ verâ demonstratione impugnatur; atqui nullâ objectione evidenti et insolubili, seu nullâ verâ demonstratione impugnatur possibilitas Incarnationis.

Nam 1º, ex solutione objectionum quæ adversus Incarnationis possibilitatem proponuntur, eas non esse demonstrationes mox patebit.

2º Vel dicendum cum Socinianis, quòd horrendum est, mysterium Incarnationis esse rejiciendum; vel distinguenda hic cum Luthero et Hofmanno duplex veritas opposita, alia theologiæ, alia rationis; vel contendendum cum Baylio, verum evidentibus et invincibilibus argumentis, et principiis manifestis posse aliquando adversari; vel denique fatendum erit mysterium Incarnationis, etsi ratione attingi et explicari nequeat, insolubilibus tamen argumentis, seu veris demonstrationibus non impugnari. Atqui primum impium est, nam mysterium Incarnationis inferius demonstrabitur revelatum à Deo, ac proinde fide divinâ tenendum. Secundum ita absurdum est, ut nihil absurdius excogitari possit; nam manifestissimum est veritatem esse quid simplex, quia fieri non potest ut attributum propositionis cujuslibet simul conveniat et non conveniat subjecto; fieri nequit ut attributa ejusdem rei simul consentiant inter se et repugnent; idem non potest esse simul et non esse; duo contradictoria non sunt simul vera; bis duo non possunt simul dare et non dare quatuor; ergo nihil absurdius distinctione duplicis veritatis oppositæ.

Præterea, positâ duplicis veritatis distinctione, quæcumque doctrinam, quantumlibet religioni ac moribus oppositam, philosophicè propugnare liceret; quippe si id in crimen impietatis philosopho verteretur, respondere posset hæc à se dicta esse philosophicè tantum, non verò theologicè; sed hæc quàm absurda sint nemo non videt; ergo.

Denique, si duplex distinguatur veritas de mysterio Incarnationis, altera relativè ad fidem, juxta quam possibile sit, altera relativè ad rationem juxta quam illud repugnet; sequetur nihil esse verum in se et absolutè ac im-

mutabiliter, sed omnem veritatem pendere à dispositionibus mentis nostræ, quales sunt fides et philosophia, et ad eas esse relativam. Atqui id falsum est; nam 1^o, revelatio et fides, ratio et philosophia, objectorum, circa quæ versantur, naturam supponunt, non producunt, non constituunt, non immutant; 2^o veritates quæ spectant possibilitatem rerum, fundantur in rerum essentiis, immutabiles sunt, non ergo pendent à dispositionibus mutabilibus mentis humanæ; 3^o, hæc veri à mentis nostræ dispositionibus dependentia, si semel poneretur, quâ tandem regulâ intra certos limites cohiberetur? nullâ sanè. Unum idemque pro variâ dispositione, eidem menti successivè, aut diversis mentibus simul referre dici posset modò saporis veri, modò saporis falsi; sic quævis insulsa opinio tutò defenderetur; quemadmodum de saporibus et aliis qualitatibus sensibilibus, utpote ad organorum variam dispositionem relativis, nemini lis movetur; ita nec veritas suaderi posset in eâ hypothesi, nec falsitas vel absurdissima revinci; ergo, etc.

Tertium inducit Pyrrhonismus universalem, et rationabile obsequium fidei, de quo Apostolus Rom. 12, v. 1, in cæcum Intusiastarum impetum convertit. Pyrrhonismus inducit; nam quod impugnatur evidentibus principiis, insolubilibus et evidentibus argumentis, profectò impugnatur veris et genuinis demonstrationibus, id est, argumentis in formâ quorum præmissæ sint evidentes vel in se, vel in suis principiis. Frustra enim Baylius (*Rép. au Prov.*, part. 4, cap. 24 et alibi) varios distinguit evidentiae gradus. Quandiu habetur evidentia, tandiu id omne percipitur quod judicatur; ergo argumentum evidens et insolubile quodcumque necessariò constat præmissis quæ non latius patent perceptione, et versatur in formâ quæ percipitur legitima, seu ad regulas genuinas dialectices exacta, proindeque vera est et genuina demonstratio. Frustra etiam observat (*Entret. de Max. et de Them.*, part. 1, cap. 1), nunquàm à se dictum objectiones in dogmata fidei esse demonstrationes mathematicas; planum est enim demonstrationes mathematicas ideò tantum esse certissimas, quia sunt evidentes, id est, quia procedunt mathematici juxta præscriptam formam, nec in medium demonstrationis assumunt ullam propositionem nisi aut evidentem de se, aut jam demonstratam. Maneat igitur fixum et inconcussum, illud veris et genuinis demonstrationibus impugnari, quod evidentibus princi-

piis, insolubilibus et evidentibus argumentis impugnatur; atqui supponi nequit verum genuinis demonstrationibus aliquando impugnari, quin Pyrrhonismus universalis inducatur; enimverò si, quod veris et genuinis demonstrationibus impugnatur, verum esse possit, pari jure, quod genuinis demonstrationibus astruitur, poterit esse falsum; si autem quod genuinis demonstrationibus astruitur possit esse falsum, seu, quod idem est, si conclusiones ex principiis evidentibus formâ evidenter legitimâ deductæ possint esse falsæ, profectò nutabit et ipsa primorum principiorum certitudo; ergo verum supponi nequit evidentibus principiis, insolubilibus et manifestis argumentis impugnari, quin Pyrrhonismus universalis inducatur, id est, quin invehatur status impossibilis, naturæ hominis planè repugnans, et omnis religionis eversivus.

Sed et illo systemate in cæcum impetum convertitur obsequium rationale fidei, Christianique ut Intusiastæ exhibentur. Equidem non diffiteor Baylium de impietate insimulatum quòd christianæ fidei extollendæ specie, ejus naturam in Dictionario critico ita repræsentasset, ut Intusiastarum impulsui perfectè similis videretur, non semel docuisse suas esse rationi partes in fidei negotio, atque hæc tria ratione evinci 1^o, Deum esse summè veracem; 2^o, dogmata fidei esse revelata; 3^o, auctoritatem Dei revelantis esse cuilibet alteri motivo anteponendam; quæ tria, omnibus theologis christianis communia, assensum fidei esse rationi consentaneum planè demonstrant. Sed hæc omnia destruit ipse Baylius (1), dum contendit, ac pro virili probare enititur, fidem evidentibus et insolubilibus argumentis impugnari, perspicuisque notionibus esse adversam. Sic enim argumentari licet: Si adversus veræ fidei dogmata fierent objectiones evidentes et insolubiles, Pyrrhonismus universalis induceretur, ut modò ostensum est; inducto Pyrrhonismo universali, nullum haberent Christiani motivum fidei suæ sufficienter cognitum et applicatum; christianâ fide omni motivo sufficienter cognito et applicato destitutâ, firmitas adhæSIONIS Christianorum rebus fidei tota ex impulsu interiori esset repetenda, qui impulsus eadem in hypothesi Pyrrhonismi universalis probari non posset esse à Deo; denique firma ejusmodi adhæSIO rebus religionis tota

(1) *Rép. au Prov.* part. 2, cap. 155, p. 769 et 770; item cap. 158, p. 852. *Entr. de Max. et de Them.*

ex impulsu interiori qui à Deo esse non probatur, repetenda, ipse est cæcus impetus Intusiastarum; ergo si adversus fidei dogmata objectiones evidentes et insolubiles fierent, obsequium fidei in cæcum Intusiastarum impetum converteretur.

Neque ex illo poterit sese nodo extricare Baylius variis distinctis evidentiae gradibus (1): si enim in evidentiâ seu perceptione evidenti varios gradus liceret distinguere, vel spectaretur actus percipiendi in se, quasi perceptio magis vel minus intensa ac vivida dici posset, quemadmodum actus amoris appetitiâ summus majorem vel minorem intensionem seu vehementiam suscipere dicitur; vel spectaretur perceptio evidens in ordine ad objecta de quibus judicium fertur, ita ut illa evidentia diceretur major, quâ plures rei, de quâ judicatur, respectus attingerentur. Atqui hoc posteriori sensu varii evidentiae gradus distinguere nequeunt; quia scilicet nomine evidentiae intelligitur perceptio tam latè patens quàm judicium quod illâ innitur. V. g., ideò judicium illud: Bis duo dant quatuor, dicitur fultum evidentiâ, quia percipitur quidquid illo judicio exprimitur; nempe affirmatur tantum respectus æqualitatis inter bis duo, et quatuor; ille verò æqualitatis respectus percipitur. Proindeque ubi pauciores, quàm necesse sit ad judicandum, respectus percipiuntur, ubi latius perceptione judicium extenditur; ibi dici nequit adesse evidentiam in gradu remisso, seu remissiores evidentiae gradus; sed tunc dicendum planè abesse evidentiam.

Quòd si quis contenderet perceptionem, v. g. convenientiae in multis inter attributum et subjectum, ubi affirmatur convenientia omnimoda utriusque, posse appellari evidentiam in gradu remisso, is evidentiae notionem ab omnibus receptam desereret, ac meram de nomine agigaret quæstionem, quàm libentissimè prætermitteremus, si in eâ tantum Baylius ludere voluisset. Porro admittine potest distinctio variorum evidentiae graduum priori sensu intellecta, nempe de intensione ipsiusmet percipiendi actûs in se spectati? multi sine dubio hanc rejicerent philosophi. Quidquid sit, planum est firmitatem evidentiae remissioris, si detur, non posse labefactari, quin omnis evidentiae certitudo penitus evertatur. Nam tota evidentiae et judicii eâ innixi certitudo, non ex in-

tensioribus evidentiae gradibus oritur, sed ex eo quòd 1º, perceptionis ea sit natura, ut res alio modo, quàm percipitur, se habere non possit; 2º, quòd evidentia sit perceptio tam latè extensa, seu ad tot respectus objecti se extendens, quàm judicium ei innixum; ergò quidquid habet evidentia intensior, si detur, quo connectatur veritati, illud est commune etiam evidentiae minùs intensæ; ac proinde, istius firmitate destructâ, alterius etiam certitudo penitus everteretur. Deindè, quis unquàm philosophus dixerit evidentiam esse quidem certum veri characterem, sed eam tantum quæ certos habeat gradus intensionis; adeò ut judicium quod totum perceptione nititur, nec eâ latius patet, falsum esse possit, nisi ejusmodi perceptio eadem manens in ordine ad objectum, certos quosdam ratione sui acquirat intensionis gradus, qui determinari non possunt? Ad hæc figendi essent limites graduum evidentiae, quos nisi excederet, ipsi posset subesse falsum; quos verò ubi excederet, certus esset veritatis character; qui limites certè non cognoscuntur. Tandem, præscribendæ essent etiam regulæ quibus de variis illis evidentiae gradibus tutò judicari posset. Non desunt quidem regulæ quibus certò cognosci queat utrum adsit evidentia, necne; nempe expendatur utrum præmissæ demonstrationum sint prima principia, aut in eâ resolvantur, et an juxta syllogismorum regulas argumenta procedant; at verò cùm de variis probabilitatum gradibus judicandi nulla, ut omnes nôrunt, sat firma regula hactenùs habeatur; quantò minùs assignari poterit certa regula discernendi inter varios evidentiae gradus quorum diversitas (si qua sit) ita insensibiliter afficit mentem, ut plerisque philosophis nulla videatur.

Frustrà igitur Baylius varios evidentiae gradus distinxit, ut crimen in se collatum de Pyrrhonismo suis principiis inducto, ac fide christianâ in Intusiasmum conversâ declinaret.

Ab aliis observari poterit tam sæpè à Baylo Pyrrhonismum inculcari, tam sæpè christianam fidem coloribus cæco Intusiastarum impetui propriis, præsertim in Dictionario representari, ut ex suis principiis illa sequi procul dubio viderit, nec nisi fucum faciendi causâ, cùm impietatis accusaretur, ad varia quæ præclusimus diverticula confugisse dici possit. Ut ut est fatendum superest mysterium Incarnationis, etsi ratione attingi et positivè demonstrari nequeat, evidentibus tamen et insolubilibus argumentis, seu genuinis demonstrationibus non

(1) *Rép. au Prov.* par. 4, cap. 24. *Entret. de Max. et de Them.*, part. 1, ch. 5, p. 15.

impugnari; proindeque ejus possibilitatem demonstrari negativè.

SOLVUNTUR OBJECTIONES. — Objectiones solvendæ aliæ sunt generales quæ illas rationes complectuntur, quibus Baylius suadere conatus est, non Incarnationem modò, sed et alia pleraque fidei mysteria, evidentibus et insolubilibus argumenti impugnari; aliæ à Socinianis et aliis incredulis, nec non aliquandò à Baylio in mysterium nostrum, speciatim diriguntur; imò nonnullæ à scholæ theologis spontè excogitatæ sunt, et fidei illustrandæ causâ, adjectâ solutione, propositæ. Omnes verò objectiones illæ speciales ad tria potissimum capita revocantur. Cùm enim in Incarnatione tria consideranda veniant, nempe verbum Divinum, natura humana, et unio utriusque, ex triplici illâ parte repugnare Incarnationem objicitur. Ab objectionibus generalibus incipiendum.

Objicies 1^o cum Baylio. Fieri possunt adversus mysteria fidei, v. g. Incarnationem Verbi divini, argumenta evidentia et insolubilia. Nam ratio non solvit argumenta quorum falsitatem non demonstrat; atqui falsitatem argumentorum quæ in Incarnationem et in alia mysteria proponuntur, ratio non demonstrat, omnibus fatentibus; ergò, etc. (*Eclairciss. sur les Manich. ad calcem Diction. crit. Edit. 1734, pag. 721 et 722.*)

Nego antecedens. Ad probationem dist. maj.: ratio non solvit, etc., si agatur de rerum veritate aut possibilitate ex solo lumine naturali certò astruendâ, concedo; si de iis tantum confutandis, qui rei possibilitatem demonstrationibus metaphysicis evertere aggrediuntur, nego. Itaque cùm incredulus mysterium Incarnationis adversus rationem pugnare contendit, scopum non assequitur si solas probabilitates et verisimilitudines quascumque objiciat. Sufficit ad solvenda ejus argumenta, si ostendatur ea non esse demonstrationes metaphysicas; atqui ut ostendatur argumentum non esse demonstrativum, illius falsitatem demonstrari necesse non est, uti suprâ observatum fuit. Satis est quod deprehendatur præmissarum alteram in se, aut in suis principiis non esse planè evidentem, vel quoddam in formâ argumenti, vitium esse posse.

Obj. 2^o cum eodem, loco mox cit. et alibi. Ubi objectio ex principiis claris eruitur in mysterium aliquod, solutio etiam clara sit necesse est, alioqui nulla censetur; atqui cùm de mysteriis agitur, puta de Incarnatione, nulla ex-

pectari potest solutio clara, siquidem docent theologi mysteria fidei esse suprâ rationem, esse impervia rationi, eorum nullam haberi ideam; ergò, etc.

1^o Distinguendum est suppositum majoris, nempe objectiones in mysteria fidei posse peti ex principiis claris; si enim id intelligatur, de oppositione verisimili quorundam mysteriorum cum adagiis quibusdam rationis, quæ oppositio solius rationis ope, nulla demonstrari nequeat; vel de oppositione cum veritatibus physicis tantum, id est, ut suprâ exposuimus, cum veritatibus naturali rerum ordine innixis, quæ proindè exceptiones patiuntur; suppositum concedi debet. Sin autem supponatur oppositionem ejusmodi esse evidentem, et perspicuè cognitam cum veritatibus metaphysicis, id prorsus negandum propter rationes adductas.

2^o Distinguendum quoque alterum majoris membrum: solutio clara sit, id est, ostendat objectionem non esse argumentum demonstrativum, concedo; clara sit, id est, evidenter probetur objectionis falsitas, nego. Et similiter distinguenda est minor. Itaque, ut solutio argumenti in dogma quoddam fidei propositi clara sit, satis est quòd, eâ intellectâ, clarè cognoscatur objectionem non esse demonstrativam, sicut non semel dictum est; non verò necesse est ut illâ solutione evidenter ejus falsitas demonstraretur. Quod autem additur in probationem minoris, nempe juxtâ theologos mysteria fidei esse suprâ rationem, impervia rationi, eorum proindè nullam haberi ideam; intelligi debet de ideâ, ut aiunt, adæquatâ, quâ scilicet ità percipiatur res et modus quo se habet, ut ejus attributorum consensio evidenter innotescat; non verò de ideâ quâcumque, de ideâ aliquali et imperfectâ, de ideâ analogicâ, quâ terminis quibusdam generalibus et analogicis mysterium exhibeatur, et ab alio quolibet distinguatur, etsi ejus ratio nec mente attingi, nex explicari queat; neque id diffilteretur Baylius.

Reverà porro fatendum quasdam in mysteria proponi posse objectiones, quarum falsitas ope ejusmodi ideæ imperfectæ evidenter non demonstraretur; sed, ut sæpè monuimus, illud minimè requiritur. At verò idea, quâ modus et ratio mysterii perspicuè innotescant, sanè non est necessaria, ut objectionibus in illud vibratis rationem demonstrationis deesse deprehendatur. Enimverò qui Incarnationis possibilitatem ratione impugnat, quid contendit? Hoc unum, in ideâ quam habemus Incarnationis aliquid contineri quod repugnet; de hac ideâ tantum

agit, in eam duntaxat potest arguere, nec ullus unquam eò absurditatis devenire potuit, ut aliam methodum sequeretur. Quemadmodum igitur in ideam mysterii imperfectam, quam ex fide hausimus, diriguntur omnes incredulorum objectiones; ita et ad ostendendum eas demonstrativas non esse, non aliâ opus est ejusmodi mysterii ideâ, quàm illâ imperfectâ. Et verò quidquid ejusmodi objectionibus continetur, ad principia objecta, et principiorum applicationem revocatur. De principiis, utrum scilicet evidentia sint, inquiri potest absque ullo ad mysterium respectu; cùm verò principia illa, nonnisi ideæ, quam de mysterio habemus, ab incredulis applicari queant; ergo, ut de illâ applicatione judicium feratur, sufficit hæc eadem idea, proindeque ad solvendas clarè objectiones, eo sensu quòd ostendatur eas demonstrativas non esse, non clariori indigemus mysterii ideâ, quàm quæ ad illas ipsas objectiones proponendas requiritur.

Objicies 3°. Nonne et in scientiis naturalibus aliquando circa eandem thesim occurrunt utrinque rationes planè evidentes, v. g., ubi agitur de divisibilitate continui? ergo immeritò illud crimini vertitur, quòd dictum sit in mysteria fidei objectiones evidentes et insolubiles fieri posse (*Rép. au Prov. cap. 133, pag. 771. Entret. de Max. et de Them. part. 1, c. 5, p. 15 et seq. et alibi.*)

Nego ant. Reipsâ quidem in scientiis naturalibus, ubi præsertim de aliquâ infiniti ideâ rebus finitis applicandâ agitur, quandoque occurrunt ex partibus oppositis difficultates maximæ; sed illas difficultates esse utrinque argumenta planè evidentia et insolubilia gratis asserit Baylius, neque id probat sive auctoritate philosophorum, quos laudat, sive exemplis quæ affert. Non auctoritate philosophorum; nam dùm in varias, v. g. circa divisibilitatem continui, sententias oppositas philosophi abeunt, sponte quidem fatentur singuli opinionem suam gravissimis esse difficultatibus obnoxiam, atque ejusmodi objectionum falsitatem solutione directa ostendere sæpè non suscipiunt; sed conantur profectò eas sufficienter solvere, nec ullus inter eos dixerit sententiam quam propugnat, evidentibus objectionibus, seu genuinis demonstrationibus impugnari. Scilicet hic accidit quod sæpè in quæstionibus intricatissimis, in quibus non negant dogmatici aliquando philosophum posse, re non satis expensâ, sine legitimo fundamento judicare sibi adesse evidentiam, cùm abest; sed

non ideò sentiunt evidentiam posse veritati esse adversam; ergo philosophorum testimonio non probatur planè evidentia et insolubilia argumenta in utramque partem circa unum et idem aliquando fieri. Neque illud evincitur exemplis à Baylio allatis. Difficultates enim quibus philosophorum ingenia circa divisibilitatem continui, loci naturam, corporum motus, etc., hinc et inde exercentur, quantæcumque sint, plerumque tamen oriuntur ex suppositionibus verisimillimis quidem, sed non demonstratis, de rerum, ac præsertim infiniti naturâ; atque si reducantur illæ in syllogismos, quorum præmissæ et forma diligenter discutiantur, non ægrè agnosci poterit eas sæpè neutrâ ex parte oppositâ, nunquam ex utrâque esse genuinas demonstrationes. Difficultates ejusmodi sigillatim expendit Crousaz in opere adversus Baylium, Hagæ an. 1733 edito, cui titulus, *Examen du Pyrrhonisme*. De iis etiam consuli possunt alii insignes philosophi; nec enim operis institutum nos sinit de variis illis quæstionibus in particulari disserere.

Obj. 4° Reipsâ non aliud est dicere mysteria nostra esse rationi impervia, et dicere notiones evidentes iis esse oppositas; istud posterius rationem et causam prioris enuntiat. Ita expressis verbis Baylius, *Rép. au Prov. part. 4, cap. 24 citatæ edit. pag. 1071*, et alibi passim occurrunt quoad substantiam similia. Pari-ter illa duo, fidem esse supra rationem et fidem esse contra rationem nostram particularem, seu contra quædam rationis evidentia principia, videntur unum et fidem significare. *Rép. au (Prov. part. 2, pag. 883.)* Deindè, qui modum et naturam mysteriorum nos latere fatetur, ille objectiones, quibus ea impetuntur, non posse ratione solvi cogitur agnoscere. (*Eclairciss. sur les Manich. ad calcem Dict. pag. 721 et 722, edit. 1734, jam cit., et aliis in locis passim.*) Denique, quamdiu distinctè non percipitur modus quo fides et ratio inter se consentiunt, tamdiu dicendum est unam in alteram pugnare. Ita quoad substantiam sæpè. (*Vide Rép. au Prov. part. 2, cap. 133, pag. 770.*) Atqui evidens est, et ab omnibus quarumlibet communionum theologis concessum, mysteria religionis esse impervia rationi, esse supra rationem, eorum modum ac naturam nos latere, atque quomodò fides et ratio inter se consentiant, ignorari; ergo, etc.

Nego omnes partes majoris propositionis, cujus singula principia philosopho adeò indigna sunt, et in regulas logices ita peccant, ut

ea fuisse à Baylio sæpiùs obtrusa vix concipi possit.

1° Igitur falsum est hæc duo idem significare, mysteria esse impervia rationi, et notiones evidentes iis esse reipsâ oppositas. Primum denotat à nobis non satis cognosci rationem formalem ac modum mysterii, v. g. Incarnationis, ut ejus possibilitas ratione delegatur, et ejusdem convenientia cum effatis quibusdam evidentibus clarè percipiatur. Alterum verò significat mente percipi repugnantiam et oppositionem mysterii Incarnationis cum effatis ejusmodi; quæ duo maximè differunt. Aliud est enim non percipi convenientiam inter duo, aliud est inter illa percipi repugnantiam. Qui convenientiam non percipit, non ideò repugnantiam videt; datur enim medium, nempe quòd neutrum percipiatur, utrumque solâ ratione duce ignoretur. Mirum sanè quòd Baylius adeo distincta confundere toties studuerit. 2° Pariter toto cœlo distant hæc duo in mente theologorum, mysterium fidei esse supra rationem, et illud esse contra rationis quædam evidentia principia; quia aliud est mente percipi mysterium aliquod axiomatibus evidentibus esse oppositum, ac proinde contradictionem involvere; aliud verò ejus possibilitatem, seu attributorum illius convenientiam, et cum ratione consensionem non percipere, quia ejus modum et rationem integram Deus nobis revelare noluit. 3° Luditur in æquivoco, dùm dicitur, modi et rationis formalis mysteriorum notitiam requiri ad solvendas objectiones, quibus impetuntur. Sæpiùs jam dictum est objectiones solvi posse duplici modo, nempe vel ita ut falsæ demonstrantur, vel ita ut tantum ostendantur non esse demonstrativæ. Priori modo fatentur theologi objectiones, quibus impetitur, v. g. Incarnatio, non posse solvi, quia ejus modus et ratio clarè non cognoscuntur; sed de altero modo earum solvendarum hic agitur; ad eum verò non requiri notitiam claræ modi ac rationis mysteriorum, omnes theologi docent, moxque à nobis probatum est. 4° Eadem semper, etsi diversissima, confunduntur, dùm ignorantia modi, quo fides et ratio conciliari possunt, idem sonare supponitur ac perceptio pugnæ et oppositionis inter utramque; quasi verò ubi è duobus contradictoriis ignoratur unum, ideò alterum perciperetur, nec posset simul utrumque non percipi. Etenim quo jure dici potest fidem et rationem in se invicem pugnare, si ratio nihil demonstret, quod fidei adversetur? Quid evi-

dentius tam sæpè à nobis inculcatâ distinctione inter vitium prætensæ in fidem demonstrationis ostendendum, et modum mysteria cum ratione conciliandi disertè explicandum?

Objicies 5°. Omnium Christianorum, exceptis Socinianis ac regidioribus Rationalistis, doctrina hæc est, sensum obvium ac naturalem textûs Scripturæ sacræ nunquàm rejiciendum, quantumlibet videatur rationi minùs consentaneus; ergo opinantur fidei dogmata argumentis evidentibus et insolubilibus posse esse contraria.

Nego consequentiam. Nam simul docent Catholici theologi, et impium esse in sensum Scripturæ naturalem rationum momenta opponere, quia, statim atque loquitur ens supremum, eo ipso in obsequium fidei captivandus intellectus; et tamen nullâ demonstratione verâ et genuinâ Socinianos ostendere mysteria fidei ullam involvere contradictionem; quia licet, quæ Deus revelat, altitudine suâ rationis perspicaciam ac omnem verisimilitudinem, atque ordinem consuetum, superare possint, non tamen evenit, nec evenire potest, ut quæ Deus loquitur evidentiæ reipsâ adversentur.

Hactenùs de præcipuis rationibus generalibus, quibus passim Baylius tuetur sibi injustè vitio tribui, quòd dixerit in bonitatem et sanctitatem Dei, in Trinitatem, Incarnationem, etc., fieri posse evidentia et insolubilia argumenta. Exempla addit ejusmodi difficultatum plurima, præsertim in bonitatem et sanctitatem Dei, sed illæ difficultates aliis in tractatibus refelluntur; quas circa Incarnationem proponit modò referemus et solvemus.

Objectiones ex parte Verbi divini. — Objicies 1°. Evidens est Verbum divinum esse immutabile; atqui non minùs manifestum est ipsum incarnari non posse quin mutetur; evidens est enim Verbum divinum absque sui mutatione non posse ex non homine fieri hominem; atqui in eo stat Incarnatio Verbi, quòd ipsum ex non homine fiat homo; ergo etc.

Nego minorem. Ad probationem distingo majorem; evidens est Verbum divinum, etc., si dicatur fieri homo per quamdam conversionem, confusionem, receptionem, acquisitionem, aut amissionem, concedo majorem; si dicatur fieri homo per simplicem terminationem seu assumptionem naturæ humanæ in unitatem personæ, nego majorem. Similiter distinctâ minore, nego consequentiam. — Verbum fieret homo per conversionem, si ejus natura et personalitas in humanitatem converterentur,

aut si in ipsum converteretur humanitas. Fieret homo per confusionem, si natura divina Verbi et natura humana dicerentur confundi, et essentialium ac proprietatum non remanente distinctione, permisceri. Fieret homo per receptionem, si reciperet in se humanitatem tanquam in subjecto, ita ut natura humana conciperetur modus aut forma Verbi divini. Denique fieret homo per acquisitionem aut amissionem, si in Incarnatione quamdam perfectionem aut acquireret aut amitteret. Fatendum est Verbum illæsâ suâ immutabilitate non posse dici hisce modis Incarnatum. Sed 1°, fides christiana de Incarnatione ab omnibus hisce pravis sensibus valdè aliena est. 2° Ratio non demonstrat doctrinam fidei sibi contradicere, dum exclusis ejusmodi sensibus, dogma Incarnationis retinet; proindeque non demonstratur illud dogma immutabilitati Verbi repugnare.

1° Quidem perversos illos sensus expressè respuit fides, et ab iis est aliena. Enimverò in Incarnatione, juxta fidem, nulla fit naturarum conversio, nulla absorptio, nulla permixtio et confusio, atque mysterii illius natura ita essentialiter postulat ut in Christo natura divina et natura humana, et quidquid ad utramque pertinet, distincta realiter ac diversa maneant, ut earum confusio, aut in se invicem conversio illius notionem funditus destruerent. « Unus » (Christus), ait auctor Symboli Athanasiani, « non conversione divinitatis in carnem..... » « non confusione substantiæ. » Et sanctus Leo, epistolâ 24, aliàs 10, cap. 3: « Salvâ » « proprietate utriusque naturæ et in unam » « coeunte personam suscepta est à majestate » « humilitas, à virtute infirmitas, ab æternitate » « mortalitas. »

Pariter juxta fidem Verbum divinum non fit subjectum humanitatis; natura enim humana unita Verbo non desinit esse substantia, neque incompleta fit ratione naturæ. « Perfectus » « Deus, perfectus homo (Christus), ait sym- » « bolum mox laudatum, ex animâ rationali et » « humanâ carne subsistens. » Uno verbo natura humana hæc unione essentialiter non mutatur, non fit modus nec forma, proindeque non recipitur in Verbo ut in subjecto.

Denique docet fides nullam à Verbo divino, dum homo factum est, perfectionem acquisitam, nullam amissam. Christus ex symbolo jam non semel laudato, « perfectus Deus, per- » « fectus homo..... æqualis Patri secundum di- » « vinitatem. »

Quomodò igitur juxta fidem [Verbum homo factum est? assumendo ac sibi copulando naturam humanam in personæ unitatem. Sublato illo nexu, ex animâ et corpore Christi coalesceret persona humana; illo stante, eadem Christi humanitas à Verbo divino perinde distincta manens et diversa, ad ipsum tamen tam arctæ unionis relationem dicit, ut humanâ personalitate careat; eoque sublimitatis extollitur, ut in ratione personæ ipsâ Verbi divini infinitâ personalitate compleatur ac terminetur. Unionis igitur illius extrema seu termini sunt natura humana et persona Verbi, atque ejusdem essentia in eo posita est, quòd illa duo, Verbum et humanitas, salvis suis proprietatibus ita copulentur, ut Christus verè et propriè dicendus sit una persona Verbi divini constans naturâ divinâ et naturâ humanâ, ac in eo veræ sint illæ propositiones: Deus est homo, et homo est Deus. Ergo omnes perversos sensus quibus Verbo divino, dum incarnatum est, vel minima mutatio tribueretur, fides respuit.

2° Ratio non demonstrat doctrinam fidei de incarnatione, rejectis pravis iis sensibus, contradictionem involvere; ut ex hac inductione et analysi perspicere est. Enimverò non demonstrabitur unionem personalem duplicis naturæ, stante utriusque distinctione, et sine unius in alteram conversione esse impossibilem. Siquidem anima et corpus in homine ita uniuntur, ut unam constituent personam, tametsi realiter distinguuntur, nec in se invicem convertuntur.

Neque demonstrabitur Incarnationem eo saltem sensu repugnare, quòd ex utrâque naturâ una quædam communis coalescere deberet, quemadmodum ex animâ et corpore unitis una coalescit natura humana; immensum namque inter illa discrimen. Corpus et anima sunt entia finita et naturæ incompletæ, ut aiunt Philosophi, quæ ad unionem ejusmodi ex se habitudinem dicunt, quippe, nisi uniantur, facultatum sibi naturalium exercitio et functionibus privantur; hinc sese, ubi copulantur, mutuò perficiunt. At verò tum natura divina quæ infinita est, tum natura humana Christi, sunt naturæ completæ, habentque independentem ab unione quidquid sibi naturaliter competit, nullum proinde ad illam dicunt naturalem respectum, solaque humanitas illâ unione mutatur, ac perficitur, nullatenus divinitas. Posito itaque Incarnationis mysterio Christus dicendus est duplici naturâ constare, divinâ et hu-

manâ, non verò unicâ ex duabus illis coalescente; nec ulla contradictio, etc. Non demonstrabitur quoque Incarnationem non posse admitti, nisi natura humana concipiatur ut modificatio aut forma in Verbo recepta, ac proinde nisi Verbum mutetur. Scilicet alius est conceptus unionis et nexûs, alius est conceptus receptionis modi aut formæ in subjecto. Uniuntur quidem modificationes et formæ subjectis suis, sed nemo dixerit non dari alias unionum species. Non demonstrabitur tandem positâ Incarnatione Verbi, auctas vel imminutas concipi ejus perfectiones. Quippe illâ unionem non supponitur quidquam Verbo detrabi, vel quidquam in eo tanquam in subjecto recipi.

Itaque fateamur quod res est, naturam unionis hypostaticæ reverâ clarè non cognoscimus; nec mirum, cum de altissimo mysterio agatur, quod fidei credendum, non rationi explicandum à Deo proponitur. Nonne et plerique ipsius naturæ effectus oculis subjecti explicari nequeunt, inprimis verò unio animæ et corporis, quæ, ut observat sanctus Augustinus, epist. 137, aliàs 3, ad Volusianum, nisi ratione et experimento innotesceret, impossibilis videretur? At verò si concedendum sit Incarnationis modum et naturam explicari non posse; detur etiam minimè demonstrari Verbum illæsâ suâ immutabilitate non potuisse in personæ unitatem sibi humanitatem conjungere, seu, quod eodem incidit, fieri unum ex extremis unionis inter ipsum et humanam naturam, quam assumpsit, secundum fidem admittendæ.

Instabis 1°. Verbum absque ullâ suâ mutatione non potuit naturam humanam sibi in unitatem personæ copulare. Nam ejusmodi unio Verbi cum humanitate nec necessaria nec æterna supponitur; cœpisset ergo Verbum aliquando uniri humanitati, ac proinde mutatum esset.

Nego subsumptum, et consequentiam probationis; quia secundum fidem illâ unionem nihil additur Verbo divino, quod in ipso recipiatur tanquam in subjecto, nihil ipsi detrahatur; ejus natura, perfectiones et personalitas eadem manent in se. Quemadmodum igitur Deus, cum ex non creante factus est creans, non ideo ipse mutatus est; quia tunc nihil in ipso intrinsecè receptum, nihil ipsi ablatum; ita Verbum cum uniri cœpit humanitati Christi, ideo mutatum dici nequit, quia hæc unio, etsi ætissima, nullatenus demonstrari potest ul-

lius intrinseci receptionem aut privationem secum in Verbo importare.

Ut verò plenius intelligatur quàm longè à demonstrandâ Incarnationis Verbi cum ejusdem immutabilitate repugnantia distent increduli, non abs re erit de variis theologorum suppositionibus circa hypostaticam unionem quidquam referre. Illorum systemata ad duo generatim revocari possunt. Prioris summa hæc est. Supponunt 1° illius defensores nullam fieri posse unionem inter duo extrema prius non unita, nisi vel utrumque vel saltem eorum unum actu mutetur, alioqui extrema semper manerent ad unionem indifferentia. Supponunt 2°, ad ejusmodi unionem essentialiter non requiri ut duo extrema mutantur; quia nempe si unum ex iis jam sit ad unionem accommodatum, sufficeret alterum ad eam mutari et accommodari. Cum autem verbum sit persona infinita, supponunt 3°, ipsi inesse vim perfectissimam terminandi ac complendi in ratione personæ naturam rationalem à se distinctam, ac proinde ejus personam non indigere ut accommodetur hypostatici unioni. Tandem ex his concludunt ad unionem hypostaticam constituendam satis esse, quòd speciali quodam modo mutetur et unioni cum Verbo accommodetur humanitas: atque id unum proinde ad hanc unionem esse supponendum, nempe in humanitate Christi quamdam à Deo esse productam perfectionem seu formam supernaturalis ordinis, quâ positâ hæc humanitas sit sub speciali regimine ac directione Verbi, seu cujus ea sit natura, ut dicat relationem unionis naturæ humanæ ad personam Verbi. Porro in quo consistat illa perfectio cujus humanitas Christi sit subjectum, et quâ uniatur Verbo, fatentur esse ignotum, nec nisi generalibus terminis posse exponi; sed illam perfectionem nihilominus admittendam contendunt, quia impossibilis non evincitur, et ad mysterium aliàs certò probatum requiritur, nec magis non latet quàm unio animæ et corporis et alia multa lumine naturali et experimentis, quoad existentiam, cognita, quorum natura à philosophis perspicuè et specialibus ideis explicari non potest. Ex ideâ tamen mysterii colligere est maximam hanc perfectionem seu formam non semper extitisse; alioqui semper extitisset mysterium incarnationis; hanc non esse substantiam quæ uniri indigeat, sed esse modificationem in naturâ humanâ Christi tanquam in subjecto inhæsionis receptam; ejus entitatem esse finitam, cum ejus subjectum finitum sit; hanc

perfectionem non esse necessariam humanitatis proprietatem; alioqui unio hypostatica gratia non esset, et quilibet homo necessariò eâ frueretur; denique totam ejus naturam in eo esse positam, quòd ex illâ actualis relatio unionis naturæ humanæ, sui inest, ad Verbum necessariò exurgat, ac proindè illà perfectione dici habitudinem ad Verbi personam, et ad naturam humanam, quæ sunt illius relationis termini, seu extrema. Itaque juxta hanc sententiam cum Verbum incarnatum est, nulla in eo facta est conversio, nulla mutatio, nulla ejus naturæ permixtio, nihil amisit Verbum divinum, nullam formam in se tanquàm in subjecto inhæSIONIS recepit. Id tantum novi accidit, nempe Verbum terminavit naturam humanam quam antea non terminabat; seu, ubi creata est natura humana Christi, simul in eâ producta est perfectio quædam specialis, ex quâ relatio unionis ejus cum naturâ divinâ in unitatem personæ Verbi divini exurgere debuit; sic Verbi persona facta est unum ex extremis illius unionis; quod quidem naturam humanam Christi maximè perfecit, ullam verò perfectionem Verbo addere vel detrudere non demonstratur.

In mente igitur defensorum illius systematis in hunc modum argumentari possumus: ut demonstrent adversarii Verbum divinum absque ullâ sui mutatione non potuisse incarnari, deberent evincere, vel repugnare hanc formam seu perfectionem, quam non satis concipimus, cujus essentia ea sit ut dicat relationem unionis naturæ humanæ ad Verbum; vel ejusmodi formam tam in Verbo quàm in naturâ humanâ tanquàm in subjecto inhæSIONIS esse recipiendam; vel Verbum absque verâ sui mutatione non posse esse unum ex extremis relationis ex ejusmodi perfectione seu formâ exurgentis: atqui nullum horum evidenter evincet. Non primum quia nec capacitas naturæ humanæ ad perfectiones recipiendas, nec formæ, de quâ agitur, natura satis innotescunt, ut de hujus repugnantia aut possibilitate, solâ evidentiâ duce certò judicetur. Non secundum, si quidem evidenter non probatur opus esse ut Verbum divinum unioni ejusmodi accommodetur, aut posse humanitatem illâ formâ instructam ad unionem hanc se habere indifferenter. Non tertium: quis enim dixerit rationem extremi alicujus novæ relationis formalem esse mutationem? Posito igitur isto systemate, quod falsum nunquàm demonstrabitur, Verbum absque ullâ sui mutatione incarnari potuit.

Aliorum theologorum jam porrò systema exponendum est; fatentur ii non sine insignibus ac maximè perfectivis naturæ assumptæ mutationibus peractam fuisse Incarnationem, sed ejusmodi mutationes et perfectiones contendunt esse solummodò illius mysterii appendices, nullam verò esse formaliter hoc ipsum mysterium. Formam igitur seu perfectionem, quam modò docuimus ab aliis admitti, ut inutilem respuunt, aiuntque Verbum immediatè per seipsum independenter ab ejusmodi formâ humanitatem in suppositi unitatem assumpsisse. Quod ut explicent, observant Deum absque ullâ sui mutatione potuisse aliud decernere quàm quod decreverit, aliud operari ad extrâ quàm quod operatur, proindeque actui Dei simplicissimo hanc inesse proprietatem, ut immutata suâ entitate, hunc effectum præ alio ad extrâ respiciat eumque sic inferat. Haud absimilem Verbi personalitati proprietatem tribuunt, in ordine ad ultimò terminandam et complendam, seu in unitatem suppositi assumendam hanc vel illam naturam rationalem. Itaque, inquiunt, ubi primum creata est natura humana Christi, eo ipso juxta æternum sanctissimæ Trinitatis decretum, Verbi divini personalitas eadem et nequaquam mutata manens, vi mox dictæ proprietatis ad hanc humanitatem unionis relationem dixit, illam sui juris specialiter fecit, uno verbo hanc sibi in unitatem personæ copulavit. Ubi planum est nec perfici, nec immutari Verbum, quemadmodum non immutatur Deus, cum virtute actûs divini quoad entitatem necessarii, hic mundus præ alio in tempore conditur. Jam verò quisquis illud systema planè intelliget, non facilè concedet demonstratum iri paritatem, cui totum innititur, inter operationes divinas ad extrâ, et Verbi Incarnationem, esse quoad id in quo instituitur comparatio, evidenter nullam. Ac proinde quantacumque sit difficultas in conciliando hoc mysterio cum immutabilitate Verbi, vix major videtur quàm in conciliandâ Dei libertate et operationibus ad extrâ cum immutabilitate divinâ; quarum perfectionum concordia, etsi difficulter explicetur, naturali tamen lumine omninò evincitur, nec sanè ullâ genuinâ demonstratione impugnatur.

En ergo duæ theologorum suppositiones, demonstrativis argumentis procul dubio non impetitæ, juxta quas mysterium Incarnationis in Verbo nullam mutationem secum importat. Quæ tamen suppositiones, quamvis secundum varios sensus quibus exponi possunt, demons-

trarentur falsæ non eo ipso vicissent increduli : nam præterea ab iis demonstrandum foret non potuisse aliis adhuc modis, salvâ Verbi immutabilitate, mysterium Incarnationis peragi.

Instabis 2°. Evidenter repugnat forma illa, seu perfectio juxta prius systema in humanitate Christi existens, illamque referens ad personam Verbi, quâ sustentetur, et ultimò in ratione personæ compleatur. Nam nulla habetur idea illius formæ, quid illa sit nullatenus concipi potest; ergo, etc.

Nego antecedens. Ad probationem distinguo : nulla habetur idea specialis et adæquata, concedo; generalis et imperfecta, nego. Idea specialis et adæquata ipsam rei naturam repræsentat; genus ejus proximum ac propriam differentiam exhibet; ex ejusmodi ideâ judicari potest de possibilitate, effectibus et proprietatibus rei; sic se habet, v. g., idea trianguli. Idea generalis et imperfecta ea est quæ tantum sub communibus et genericis rationibus rem exhibet, cui effectus et proprietates aliunde cognita tribuuntur. Sic, v. g., Neutroniani attractionem suam concipiunt; corpus unum ad aliud accedit, en effectus ipsâ experienciâ cognitus; hanc approximationem tribuunt attractioni, id est, vi cuidam corporum quâ fiat ut unum accedat ad aliud; en idea generalis et imperfecta, en rationes genericæ et communes, quibus, ut ipse monuit eximius hujusce systematis auctor, ipsa attractionis natura disertè non explicatur. Sic Leibnitiani vim monadum suarum definiunt : sic Cartesiani coguntur concipere causam gravitatis, quam hætenus latere novis in dies experimentis demonstratur; sic innumera, omnes cujuslibet nominis philosophi, quorum methodus in eo sanè vituperari nequit. Ergo, ubi quidquam in humanitate Christi productum admittitur sub ratione genericâ perfectionis et formæ, cui tribuitur proprietas ad mysterium propter Dei revelationem creditum necessaria, id vitio verti nequit; nec ejusmodi forma seu modificatio, ut repugnans et impossibilis ideò rejicienda est, quòd specialis ejus et adæquata idea non detur, quæ possit propriè dictâ definitione explicari.

Instabis 3°. Illa modificatio seu perfectio humanitatis Christi esset simul finita et infinita : esset finita, cum ex hypothese inhæreret naturæ humanæ Christi; esset infinita, cum respiceret Verbum divinum; ergo, etc.

Nego antecedens. Cum illa modificatio seu forma inhæreat humanitati Christi ut subjecto

inhæSIONIS, entitate finita sit necesse est; non probatur autem infinita eo quòd dicat rationem unionis naturæ humanæ cui infidet, ad Verbum divinum. Num infinitum est quidquid ad infinitum relationem dicit?

Instabis 4°. Illa forma esset partim spiritalis, partim corporea, cum humanitas corpore et mente constituitur; atqui id repugnat; ergo, etc. Nego maj. Supponi enim potest, et ad fidem sufficit, ejusmodi perfectionem seu formam, quâ tota humanitas refertur ad Verbi Divini hypostasim, in solâ animâ Christi, ut in subjecto inhæSIONIS, esse receptam, ac proinde esse merè spiritalem. Nihil amplius certè fides requirit, atque eò referri potest quod à SS. Patribus dictum, naturam Christi humanam mediante ejus mente fuisse unitam Verbo divino. Sed de hoc argumento ex professo inferiùs.

Instabis 5°. Illa perfectio tam in Verbo quàm in naturâ humanâ Christi recipi deberet, si quidem est unio; atqui unio in utroque extremo recipitur. Nego antecedens; nam si qua daretur ratio propter quam ejusmodi forma in Verbo tanquàm in subjecto inhæSIONIS recipienda esset, vel quia deberet Verbum reddi idoneum illi unioni, vel quia, nisi reciperetur in Verbo, utriusque termini ad unionem actualement indifferentia non tolleretur; atqui neutra ejusmodi ratio valida demonstratur. Non prior, nam persona Verbi, utpote perfectissima, supponi debet non indigere ut unioni sibi possibili idonea reddatur, ipsi inest vis terminandi et complendi infinita. Nec altera: nam esto, Verbum sit indifferens ut uniatur uni naturæ rationali potius quàm alteri; pariter natura humana quævis ex se quantumlibet indeterminata sit ad unionem hypostaticam sibi nullo modo naturalem; ut illa indifferentia tollatur, sufficit in naturâ quâdam individuali, puta in humanitate Christi, quiddam speciale produci, quo fiat ut Verbum hanc naturam præ aliis terminet ac dirigat, atque illa habeat ad Verbi personam, unionis de quâ agitur, relationem; ergo non demonstratur tam in Verbo quàm in naturâ humanâ Christi hanc formam esse recipiendam. Ad probationem, distinguo min. unio debet recipi in utroque extremo, id est, utrumque terminum respicere, ad utrumque dicere relationem, concedo; id est, perfectio illa seu formalitas ex quâ exurgit relatio unionis humanitatis Christi, debet recipi in utroque termino, ut in subjecto inhæSIONIS, nego propter rationes mox allatas, id demonstrari.

Instabis 6°. Atqui relationes saltem sunt modi qui recipiuntur in extremis, ergo, etc. Nego antecedens. Relationes respiciunt extrema, non in illis recipiuntur, ut in subjecto inhæsionis, nec enim ullam habent entitatem distinctam à fundamento et extremis; sed quidquid de earum naturâ statuatur, planum est rem non necessariò mutari, ubi sit terminus novæ relationis. Anne, v. g., Deus mutatur cùm existunt novæ creaturæ? An mutatur paries albus, cùm incipit novam habere similitudinis relationem cum altero pariete albo qui construitur?

Instabis 7°. Unio animæ et corporis, seu forma quâ uniuntur, recipitur tum in animâ tum in corpore; ergo à pari in mysterio Incarnationis, etc. Transeat antecedens. Nego consequentiam. Disparitas est quòd in homine natura spiritalis et natura corporea sint incompletæ, ad se invicem naturaliter ordinem dicant, et constituent simul junctæ naturam totalem ratione perfectionum, ita ut personalitas sit utrique communis. At verò in mysterio Incarnationis, ipsamet natura humana est completa in ratione naturæ, Verbum utpote infinitum totalitatem perfectionis etiam post unionem habere non desinit, atque tota personalitas Christi est ipsamet personalitas Verbi divini, seu illa ipsa est forma inhærens Verbo, quâ, in ratione personæ ab æterno constituitur. Dictum est, *transeat antecedens*; quia natura unionis animæ et corporis nimium fortè latet, quàm ut illud certò affirmari valeat.

Instabis 8°. Saltem planè repugnat illud systema propositum, juxta quod natura humana antecedenter ad omnem sui mutationem, nec quidquam habens speciale quo distinguatur à cæteris naturis humanis, et quod relationem unionis fundare possit, dicitur tamen eatenus uniri hypostaticè Verbo, quatenus Verbi personalitas eadem manens eam præ cæteris respicit, regitque, et sui juris specialiter facit. Nam dari non potest relatio actualis sine fundamento actuali; atqui daretur posito illo systemate; si quidem Verbum et natura humana antecedenter ad omnem utriusque mutationem unirentur. Ibi enim est relatio actualis sine fundamento actuali, ubi relatio ponitur antecedenter ad omnem utriusque extremi mutationem; atqui, etc.; antecedenter quidem ad mutationem Verbi, cùm non mutatum supponatur, et sit essentialiter immutabile; antecedenter etiam ad mutationem naturæ humanæ Christi, cùm in illo systemate omnes illius na-

turæ mutationes supponantur esse unionis hypostaticæ appendices; ergo, etc.

Nego antecedens. Ad probationem, nego minorem primisyllogismi et distingo majorem secundi; ibi est relatio actualissine fundamento aliquo actuali, ubi relatio ponitur antecedenter ad mutationem utriusque extremi, in hypothesis quòd unum ex illis absque ullâ sui mutatione non possit unam præ aliâ relationem fundare, concedo; si possit, nego. Itaque integrum, ut dictum est, systematis illius fundamentum in eo positum est, quòd Verbi personalitati, in ordine ad ultimò complendam in ratione personæ naturam rationalem, supponatur inesse proprietas similis perfectioni illi summæ, quâ actus Dei simplicissimus, non mutatus quoad entitatem manens, unum præ alio decernere, unum præ alio opus ad extrâ respicere et producere valet. Quemadmodum actus voluntatis divinæ summè perfectus, quoad entitatem immutabilis, hoc potius quàm illud decernit et operatur ad extrâ, ac proinde ad unum potius quàm ad aliud relationem actualem dicit, antecedenter tum ad omnem sui mutationem, nequit enim in se mutari, tum ad omnem termini seu operis mutationem, cùm non nisi vi illius specialis relationis et respectus illud opus existere concipiatur; ita et Verbum divinum absque ullâ sui mutatione, personaliter potest hanc potius quàm illam rationalem naturam complere et terminare. Variis quidem modis à philosophis et theologis explicatur immutabilitas illa voluntatis divinæ; verum quocumque sensu exponatur, eodem planè intelligitur Verbum divinum posse sine mutatione incarnari. Hinc ejusdem syllogismi minorem propositionem negarent fortè complures. Sed de variis Dei immutabilitatis cum ejus libertate conciliandæ modis hic non est disserendi locus.

Objicies 2°. Verbum in Incarnatione fit substantialiter homo, fit intrinsecè homo, denominatur intrinsecè homo; sed Verbum non potest fieri substantialiter, et intrinsecè homo, nec denominari homo intrinsecè, quin mutetur: ergo, etc. Distinguo singulas majoris propositionis partes: 1°, fit substantialiter homo, id est, unio in quâ mysterium Incarnationis consistit, non est metaphorica, externa, aut moralis tantum, sed est vera et realis substantiam seu naturam divinam inter et naturam humanam, inter subsistentiam, seu personam Verbi et humanitatem Christi, concedo; fit substantialiter homo, id est, mutatur in hominem, aut recipit humanitatem in se ut in sub-

jecto, nego. Hypostaticam unionem sancti Patres naturalem et substantialem appellavêre, ut dicitur inferiùs, eo sensu tantùm quòd sit vera et realis, quòd sit inter naturas, inter substantias, quòd sit naturæ humanæ ad subsistentiam, seu personam Verbi; quòd non sit metaphorica, et moralis duntaxat. Vide Petavium, lib. 4. Theolog. dog. de Inc. cap. 4; atqui ejusmodi sensu ullam in Verbo argui mutationem, jam sæpè diximus non demonstrari; ergo, etc.

2º Verbum fit intrinsecè, denominatur intrinsecè homo, propter humanitatem sibi personaliter unitam, concedo; propter eandem in se ut in subjecto acceptam, nego. Verbum neque fit, neque denominatur homo eo sensu, quòd humanitate in se receptâ informetur, sed quia ipsi unitur humanitas, quam unionem negamus divinæ immutabilitati evidenter repugnare.

Instabis. Si Verbum naturam humanam, in se ut in subjecto non receptam, sibi duntaxat uniret, ea ipsi esset solummodò extrinseca; ergo, etc. Nego antecedens, quia natura à Verbo in unitatem personæ assumpta ipsi extrinseca dici non potest; atqui juxta fidem naturæ humana etsi non recipiatur in Verbo ut in subjecto, assumitur tamen à Verbo in unitatem personæ; ergo etc.

Objicies 3º cum Wolsogeno Socini discipulo insigni in Præp. ad utilem lecturam novi testamenti cap. 15, et in Declaratione duarum contrariarum sententiarum de uno Deo Patre, cap. 11, etc. Etiam si natura humana posset Deo personaliter uniri absque Divinitatis mutatione, nihilominus absurdè diceretur Deum esse incarnatum et hominem factum. Nam Incarnatio seu *hominifactio*, si propriam vim ac significationem vocis spectes, *nihil aliud denotabit, quàm Deum desiisse esse Deum, et è Deo factum esse hominem*. Quippe, ubi res fit aliud; desinit esse quod priùs erat; aqua, quæ facta est vinum, desiit esse aqua; ergo, etc.

Nego ant. nam voces *Verbi incarnati, Verbi hominis facti*, ad exprimendam personalem naturæ humanæ cum Verbo divino unionem, maximè esse idoneas de se manifestum est, ac perspicuè ostenditur auctoritate S. Joannis, qui Evangelii sui cap. 1, v. 14, mysterium illud iisdem verbis expressit. Sed de his alibi.

Ad prob. nego pariter antec. falsum est enim id, quod dicitur fieri aliud, semper intelligendum desinere esse quod erat. Nimirum, ubi aliquid dicitur fieri aliud, sæpè quidem agitur de novo statu qui cum altero præcedenti com-

pati nequeat, ut in exemplo allato aquæ in vinum conversæ; verùm sæpè agitur etiam de novo statu, qui indui possit, nullatenus immutata rei naturâ et statu ejus præcedenti; ut si, v. g., rex dicatur factus alicujus prædii, quod acquisivit, dominus et possessor. Quando autem vox duplici sensu accipi potest, nonne ex subjectâ materiâ, et ex intentione cognitâ loquentium ad unum præ alio restringenda est? Ergo cùm naturæ divinæ immutabilitas ex Scripturis et ex ratione notissima sit, et ab omnibus Christianis, ut dogma fidei inconcussum Verbi Incarnatione nullatenus labefactatum, admittatur; nemo non intelligit voces, *Verbi incarnati, Verbi hominis facti*, quibus christiana fides utitur, esse citra omnem Verbi conversionem, intelligendas de ineffabili humanitatis assumptione divinam immutabilitatem non lædente.

Sed pulchrè profectò, ubi nihil periculi, metuunt Sociniani ne divinæ immutabilitati quidquam detrahatur, qui variis impiæ suæ doctrinæ capitibus de existentia Dei in cœlis tantùm, de scientiâ et decretis ejusdem, summam hanc perfectionem convellere non verentur.

Inst. cum eodem. Contendunt dogmatis de Incarnatione defensores Verbum factum esse essentialiter hominem illum qui ex Mariâ Virgine natus est; adeò ut non modò verissima, sed et propria sit ejusmodi locutio, Deus est homo, vel Deus est hic homo; ergo non agitur hic tantùm de unionem compatiibili, etc.

Dist. ant. contendunt Verbum factum esse essentialiter hominem, id est, essentialiter seu naturam humanam sibi in unitatem personæ conjunxisse, concedo; id est, essentialiter Verbi conversam esse in humanitatem, nego. Ut hæ locutiones, *Deus est homo, Deus est hic homo*, sint veræ et propriæ, sufficit juxta omnem sermonis proprietatem dici posse: Deus, seu Verbum est persona habens humanitatem, seu habens hanc humanitatem; ut autem id dicatur, sufficit naturam Christi humanam esse personaliter unitam Verbo.

Inst. iterùm ibid. Deus dici non potest factus homo etiam quoad externum statum ac conditionem hominis tantùm, quin significetur eum desiisse esse Deum; quemadmodùm si Cæsar diceretur factus subulcus, significaretur eum desiisse esse Cæsarem; ergo, etc. Dist. ant. Deus dici non potest factus homo etiam quoad externum statum ac conditionem hominis, eo sensu qui cum ejus summâ perfectione non potest compati. concedo: sensu proprio qui

cum ejus perfectione summâ compati possit, nego. Tota vis ac energia harumce vocum, *Deus factus est homo*, procul dubio redditur, si natura divina et natura humana in unâ Verbi personâ dicantur unitæ; atqui illam unionem compati non posse cum summâ Dei perfectione nullo modo demonstratur; imò illa duo ab Apostolo conjuncta agnoscere deberent Sociniani Philip. 2, v. 6 et 7, ubi de Christo loquens: *Qui cum in forma Dei esset, inquit, non rapinam arbitratus est esse se æqualem Deo; sed semetipsum exinanivit formam servi accipiens, in similitudinem hominum factus et habitu inventus ut homo*. Quoad exemplum allatum Cæsaris qui subulcus fieri non posset quin desineret esse Cæsar, illud ad rem non pertinet; quia status Cæsaris cum statu subulci, positis rebus ut sunt, incompatibilis est; at verò non probant Sociniani repugnare ut Filius Dei idem manens sibi humanam naturam in personæ unitatem devinciat.

Omnia igitur argumenta Wolsogeni mera sunt sophismata, in quibus supponitur vocis illius, *factum est*, propriam acceptionem ad significandum veram conversionem unius in aliud esse restrictam; dum tamen accipitur quoque ad novam quamlibet accessionem designandam, quâ rei ipsius natura non convertitur, nec statûs integritas ullomodo læditur.

Obj. 4°. Non potuit Filius incarnari quin Pater et Spiritus sanctus incarnarentur. Nam 1°, opera ad extra sunt communia toti Trinitati: atqui Incarnatio est opus ad extra; ergo, etc. Ita Wolsegenus ubi supra. 2° Incarnatio Filii in eo posita est, quòd divina ejus natura uniatur humanitati; sed divina natura Filii communis est Patri et Spiritui sancto; ergo, etc.; ita idem ibid. post Crellium lib. de uno Deo Patre, sect. 2, cap. 5; cum igitur Pater et Spiritus sanctus juxta fidem catholicam non sint incarnati, sequitur nec Filium, etc. Nego antedens. Nam persona Filii divini distinguitur realiter à Patre et Spiritu sancto, ut docet fides; ergo nihil obstande videtur quominus Patre et Spiritu sancto non incarnatis, ipse incarnetur Filius, seu ipsi personaliter uniatur humanitas. Ad primam probationem, distinguo majorem: opera ad extra sunt communia tribus Personis, id est, ab iis producuntur, concedo; ita ut quævis natura rationalis, iis decernentibus, non possit uniri personaliter uni personæ, quin eodem modo uniatur aliis, nego. Hæc duo valde diversa sunt: complere ultimò naturam rationalem à divinâ distinctam, in ra-

tionem personæ; et producere opus ad extra. Istud postremum ad voluntatem et omnipotentiam divinam toti sanctissimæ Trinitati communem pertinet; prius verè personalitatis est, quæ unicuique personæ divinæ est propria. Itaque unico actu omnipotenti et simplicissimo tribus personis communi omnia decernuntur, omnia efficiuntur ad extra; ac proinde natura humana Christi ipsa creatur, conservatur, et quidquid ad hypostaticam ejus cum Verbo unionem in ipsâ necessarium est producit à Patre, Filio et Spiritu sancto. Sed non ideò ejusmodi unio respicit tres Personas, non ideò adesse nequit inter humanitatem Christi et Verbi subsistentiam relatio quædam unionis, quid adsit etiam inter eandem humanitatem et alias Personas; ratio est quòd personalitas Verbi realiter distinguatur à personalitate Patris et Spiritûs sancti. Ad secundam probationem, distinguo etiam majorem: Incarnatio Filii in eo posita est quòd natura divina Verbi, prout terminatur ejus personalitate, uniatur naturæ humanæ Christi, concedo; quòd natura divina Verbi in se spectata, abstrahendo à Verbi personalitate, nego. Cum natura divina in se spectata, et abstrahendo à proprietatibus relativis quibus Personæ constituuntur, et à se invicem distinguuntur, communis sit tribus Personis, fieri sanè non potuisset in naturâ divinâ hocce modo spectatâ, unio de quâ agitur, quin tres Personæ incarnatæ essent. At verò natura humana, uti dicitur deinceps, unita est naturæ divinæ, ut terminatæ personalitate propriâ Verbi. Nimirum Filius divinus juxta fidem eatenus homo factus est, quatenus naturam humanam ultimò terminat et complet in ratione suppositi; atqui natura divina in se considerata et abstrahendo à personalitate, naturam humanam hocce modo complere ac terminare non potest, cum suppositum non sit; merum ergo sophisma est argumentum à Socinianis propositum, in cujus majore natura divina accipitur pro naturâ divinâ contracta per personalitatem verbi, in minore verò pro naturâ eadem absolutè spectatâ, prout communis est tribus Personis.

Instabis cum Crel. ibid. multis modis: 1° Nulla ratio afferri potest cur in subsistentiâ Verbi potius quàm in subsistentiâ Patris ac Spiritûs sancti, facta fuerit illa unio. « Diceres, » inquit, hos homines oculis ipsis illam Incarnationem vidisse, qui tam accuratè explicare nòrunt in quâ subsistentiâ terminata fuerit illa unio, licet subsistentiæ tres in eadem

« naturâ sint, realiter, ut loquuntur, ab illâ « non differentes. » 2^o Unita est natura humana toti naturæ divinæ; sed natura divina tota includit etiam tres subsistentias, quippe quæ ipsi infixæ sunt, ab eâ realiter indistinctæ; ergo, etc. 3^o Una subsistentia non magis distinguitur à naturâ divinâ, quàm altera; ergo si humanitas Divinitati conjungitur, tam uni subsistentiæ quàm alteri.

Respondeo ad singula. Ad primum, distinguo : nulla potest afferri ratio naturalis, concedo; id ex verbo Dei probari nequit, nego. Solum Dei Filium esse incarnatum fide novimus, lumine naturali probare non suscipimus. Scopum igitur Crellius non attingit, dum, loco demonstrationum quibus dogma nostrum impetere suscipit, Catholicis exprobrat mysterium quod profitentur esse impervium rationi. Ad secundum, distinguo majorem : humana Christi natura unita est toti naturæ divinæ, ut terminatæ et contractæ subsistentiâ Verbi, ut mox explicatum est, concedo; toti naturæ divinæ ut terminatæ trium Personarum subsistentiis, nego. Similiter distinctâ minore, nego consequentiam. Ad tertium, nego consequentiam. Ut uni potius quàm aliis subsistentiis divinis uniri possit natura humana, satis est eas à se invicem realiter, et ab essentiâ virtualiter, seu formaliter distingui; si quidem eo posito concipitur naturam humanam posse ad unam Personam præ aliâ dicere relationem.

Instabis iterum cum eodem Crellio. Unio naturæ humanæ cum divinâ, juxta Incarnationis assertores, est realis; ergo naturæ primariò sunt conjunctæ, et quæ naturas consequuntur, secundariò. Quemadmodum in homine anima et corpus primariò et immediatè, deinde quæ utriusque sunt conjunguntur; ergo cum subsistentia Verbi sit naturæ divinæ perfectio et complementum et existendi modus, sequitur, etc.

Distinguo 1^o consequens; ergo naturæ primariò, etc., sed natura divina accipienda est prout terminatur et ultimò completur personalitate Verbi, concedo; natura divina accipienda est abstrahendo à Personis seu tribus subsistentiis, nego. Cum unio naturæ humanæ Verbo divino sit personalis, ita ut illa natura personalitate Verbi divini ultimò in ratione personæ compleatur, sequitur unionem illam fieri primariò in personâ Verbi divini, non verò primariò in naturâ, deinde in personâ.

Manca autem est comparatio unionis illius cum unione animæ et corporis in homine; nam

1^o istæ duæ substantiæ sunt incompletæ, seu facultatum sibi naturalium exercitio privantur, nisi uniantur; 2^o, etsi completæ dicerentur, cum tamen entia finita ad constituendum suppositum copulata, quid perfectius substantialiter constituent, quàm ubi separantur; consequens est ex unione animæ et corporis et quorumlibet finitorum exurgere subsistentiam rebus unitis communem; hinc non potest finitum uniri alteri finito primùm in ejus personâ aut supposito. Sed neque Verbum divinum, neque natura humana ab eo assumpta uniri sibi invicem naturaliter postulant; ex illâ unione non exurgit personalitas communis utrique extremo, quippe perficitur quidem natura humana illâ unione, sed Verbum non perficitur. In Verbi proinde personâ eadem manente, natura humana divinæ conjungi potest, adeò ut ipsâ Verbi personalitate ultimò terminetur et compleatur.

Instabis ultimò cum eodem Crellio. Non potest quidquam realiter uniri cum modo rei, sed cum re ipsâ; ergo cum Incarnatio sit unio realis, et subsistentia Verbi insit naturæ divinæ, sequitur, etc.

Distinguo : cum modo rei, id est, cum ejus modificatione, concedo; cum modo rei, id est, cum ejus perfectione necessariâ, subdistinguo : si illa perfectio sit mera proprietas, concedo; si sit personalitas, et agatur de ente infinito, nego. Cum personalitas Verbi naturam divinam in ratione personæ Verbi divini contrahat, cum ipsam Verbi personam constituat, et à cæteris Personis divinis realiter distinguat, sequitur realem dicendam esse unionem quæ inter naturam humanam et ejusmodi personalitatem primariò constituitur. Nonne enim realis dicenda est unio quæ vera est, quæ inter naturam humanam Christi et naturam divinam in personalitate intercedit, quâ illa humanitas ita conjungitur personæ Verbi, ut ejus subsistentiâ ultimò compleatur et terminetur?

Objicies 5^o cum eodem Crellio, ibid cap. 6. Ex dogmate Incarnationis sequitur Verbum divinum desiisse esse personam; « nam evasit « pars Christi ex humanâ et divinâ naturâ « constituti. Est autem de essentiâ suppositi, ac « porrò etiam personæ, ne sit pars alterius, ut « apud omnes in confesso est; » ergo.

Probat autem Verbum esse partem Christi; 1^o quia manifestum est Christum esse totum constans naturâ divinâ et naturâ humanâ, utraque, esto, non separandâ, sed tamen ex se separabili; ergo cum Verbum non sit totus Christus, necesse est ut ejus sit pars; 2^o quia vel

natura humana esset pars personæ Christi, vel esset illius personæ accidens physicum; quippe quod inest Verbo, non ut pars, et ab eo abesse potest sine ejus destructione, nihil nisi ejus accidens esse potest; atqui natura humana, juxta fidem de Incarnatione, non est accidens Verbi; ergo est pars Christi; ergo Verbum est etiam ejus pars. 5° Sæpius comparatur Verbum homo factum ferro candenti, quod etsi ignem habeat adjunctum, ferrum tamen simpliciter appellatur; atqui ex illâ comparatione, etc. Nam vel ferro conjunctus ignis est accidens ferri, vel est substantia conjuncta ferro. Si prius dicatur, exemplum ad rem non est, quia natura humana supponitur non esse accidens Verbi. Si posterius, ignis ille substantialis erit conjunctus ferro ut pars suppositi, cujus tamen à ferro, ut à potiori, denominatio fiet; ergo, etc.

Nego antecedens. Ad probationem distinguo majorem: Verbum evasit pars Christi numerica et impropriè dicta, concedo: pars perfectionum Christi, pars propriè dicta, nego. Partes propriè dictæ sunt ex quæ sese mutuò perficiunt. Pars impropriè dicta ea est quæ perficit, sed non perficitur, vel quæ perficitur et non perficit. Pars impropriè dicta appellatur etiam pars numerica, quia ab aliis partibus impropriè dictis distinguitur et cum iis numerum constituit; eadem de causâ dicitur pars materialis. Pars autem propriè dicta, seu pars perfectionum, appellari solet pars formalis. Non modò anima et corpus quæ ad unionem mutuam naturaliter habitudinem dicunt, sunt partes propriè dictæ, sed nec ulla fortè datur res vel minima, quæ non perficiat aliquatenus quodcumque finitum, cui adjungitur quantumlibet perfectum sit. Quapropter fatendum videtur partium ejusmodi impropriè dictarum nullum in creatis exemplum satis idoneum reperiri; sed non ideò ejusmodi partium notio, ubi de divinis agitur, contradictionem involvit. Nam cum Verbum Divinum infinitè perfectum sit, ac proinde omnes naturæ humanæ perfectiones eminenter contineat, planum est naturæ humanæ accessione ipsi non auferri rationem totalitatis perfectionum, Christumque naturâ divinâ et naturâ humanâ constitutum, non esse quid perfectius personâ Verbi ratione solius divinitatis considerari.

Porro de essentiâ personæ est quidem ut sit totalis ratione perfectionum, seu ut alteri quo perficiatur non sit conjuncta; sed ratio partis duntaxat perficientis, ejusmodi totalitatem per-

fectionum proinde non adimens, personæ essentiam nullo modo destruit. Ita olim ratiocinabantur sancti Patres. « *Christus*, inquit S. Augustinus lib. 2 contra Maximium, cap. 10, « n. 2, una persona est geminæ substantiæ, « quia et Deus et homo est, nec tamen Deus « pars hujus personæ dici potest; alioquin Filius Dei Deus, antequàm susciperet formam « servi, non erat totus. » Et Maxentius, in dialogo 2 Nestoriano ante Crellium objicienti: « Omne compositum partibus constare nulli « dubium est, pars autem minus est quàm totum; est ergo Deus Verbum pars Christi.... « Et si Deus Verbum pars est Christi, et Deus « Verbum juxta vos minor Christo cujus et « pars est; quòd si pars Christi Deus est, quomòdò Deus, si imperfectus est? » Huic objectioni respondet: « Non esse imperfectum « Deum Verbum, quia non, ut perficeretur, « assumptione carnis indignit; sed ut caro « perficeretur in melius commutata, carni se « uniens, compositus factus est qui antè erat « sine dubio summè simplex, et incompositus, « perfectusque per omnia utpote Deus. »

Ad primam probationem ejusdem majoris ex his omnibus responsio clara est. Distingui potest antecedens: manifestum est Christum esse totum constans naturâ divinâ et humanâ, ita ut totalitas perfectionis se teneat integra ex parte naturæ divinæ, concedo; ita ut Christus duplici illâ naturâ constans, concipiatur quid melius ac perfectius solâ Verbi personâ, nego. Rerum numero et quantitate æstimanda non est perfectio ubi de naturâ spiritali agitur. *In iis quæ non mole magnâ sunt*, inquit sanctus Augustinus, lib. 6 de Trinitate cap. 8, *hoc est majus esse quod melius esse*. Et verò num major perfectio mundi et Dei, quàm perfectio solius Dei?

Ad secundam distinguo: natura humana est pars Christi impropriè dicta et numerica, concedo; est pars propriè dicta, est pars perficiens, nego: ideò diximus Verbo deesse rationem partis propriè dictæ in Christo, quia perficit, non perficitur; ex adverso se habet natura humana, perficitur, et non perficit. Verbum divinum post humanitatis assumptionem perfectius non est quàm antea, quia essentialiter perfectissimum est. Datur ergo medium inter illa duo, esse partem propriè dictam Christi, et esse accidens ejus personæ; istud scilicet, habere rationem partis numericæ, quæ perficiatur quidem, sed nihil perfectionis addat.

Ad tertiam, respondeo ejusmodi comparationes, quæ ex finitorum unionem desumuntur, satis aptas non esse, nec in omnibus urgendas. Comparatur Verbum incarnatum ferro ignito, quemadmodum comparatur substantiæ quæ accidentis est subjectum. « Accidens, inquit sanctus Thomas in compendio theologico, trahitur ad personalitatem subjecti, ut sit persona eadem hominis et albi, et similiter eadem hypostasis et idem suppositum. Sic igitur secundum similitudinem quamdam, persona, hypostasis et suppositum filii Dei, est persona, hypostasis et suppositum naturæ humanæ in Christo. » Notentur hæc verba, *Secundum similitudinem quamdam*, nempe in eo stat similitudo, quod natura humana Christi unita verbo, ejus personam compleatur, quemadmodum non aliud est suppositum accidentis, ac suppositum subjecti; at in aliis magnum adest discrimen: nempe accidens non est natura completa, non est substantia, recipitur in subjecto cui inhæret; Christi verò humanitas est completa in ratione naturæ, ita ut naturaliter unionem non exigat; est substantia; unitur quidem Verbo, sed non in eo recipitur. Sic explicari debet paritas ferri candentis, et aliæ similes quas utiliter adhibuere SS. Patres, non ut iis insistamus, quasi ad mysterii genuinam notitiam sufficerent; sed ut iis aliquo modo mens adjuncta facilius possit ad contemplationem altissimarum veritatum, quas fides proponit, assurgere.

Obicies 6°. Si Verbum sit homo, ergo 1° Verbum est habens humanitatem, ac proinde recipit in se ejus perfectiones; ergo. 2° perfectiones humanitatis adduntur Verbo, ac proinde fit perfectius; ergo. 3° Verbum supplet vices formæ creatæ, nempe substantiæ humanæ, quod imperfectionem involvit.

Distinguo singula. I. ergo Verbum est habens humanitatem sibi personaliter unitam, concedo; in se ut in subjecto receptam, nego. II. Perfectiones humanitatis Verbo adduntur eminenti modo, nego; formaliter sumptæ, subdistinguo: adduntur per unionem, concedo: per receptionem in Verbo, nego. Verbum abstrahendo à sui Incarnatione, omnes perfectiones humanitatis eminenter et essentialiter possidet, id est, ex ejus essentiæ necessitate ipsi insunt perfectiones summæ, quibus perfectionum humanitatis excellentius supplentur vices. Hinc 1°, in eo, ut in subjecto, recipi non potuerunt naturæ humanæ perfectiones formaliter acceptæ, quippe quæ in suo conceptu limitationem et imperfectionem involvunt. Hinc 2°,

ubi accessere ejusmodi perfectiones per unionem hypostaticam humanitatis, perfectius factum non est Verbum quam erat antea; quia finitum additum enti omni ratione infinito, quo eminenter continetur, non constituit totum perfectius, ut jam diximus et per se liquet.

III. Ergo Verbum supplet vices formæ creatæ, seu subsistentiæ humanæ, terminando ac ultimò complendo humanam Christi naturam, concedo; illi naturæ inhærendo, hanc informando, nego. Verbum fieri modificationem aut formam naturæ humanæ absurdum planè est, et impossibile. Quod autem terminet, ultimò compleat, ac in personæ unitatem sibi humanitatem devinciat, illud ipsum est quod evidentem contradictionem implicare non evincitur.

Obicies 7°. Quantacumque vis naturam in ratione personæ complendi personalitati Verbi inesse supponatur, tota perfectò exhauritur terminatione naturæ divinæ quæ infinita est; ergo Verbum non potest aliam naturam in unitatem personæ assumere.

1° Retorqueo argumentum, quantacumque sit vis intelligendi quæ inest Deo, tota exhauriri debet cognitione comprehensivâ entis infiniti, nempe Dei ipsius; ergo Deus contingentia non cognoscit. Rursus quantacumque sit vis amandi quæ inest voluntati divinæ, tota exhauriri debet amore entis summè perfecti, Dei scilicet; ergo Deus nihil amare potest à se distinctum, nec quidquam producere ad extra. Quis ejusmodi consecutiones admittet? 2° Distinguo antecedens: tota exhauritur quantum ad naturam infinitam ultimò complendam, concedo: quantum ad naturam finitam, nego. Quod exhauritur, ac totum, si ita loqui fas est, consumitur in uno genere, non ideò exhaustum dici potest in altero. Quod infinito commensatur, non ideò non potest ad aliquod finitum etiam extendi. Vis summa intelligendi quæ inest Deo, ipsius infinitâ naturâ major non est; atqui tamen entia contingentia attingit. Itaque cum naturam rationalem finitam inter et naturam divinam discrimen infinitum intercedat, ex eo quod personalitas Verbi major non sit naturâ divinâ quam terminat, non sequitur eam ad naturam rationalem finitam ultimò terminandam extendi non posse; imò ex eo ipso quo illa personalitas est infinita, videtur posse etiam extendi ad naturam ejusmodi finitam.

Objectiones ex parte naturæ humanæ. — Obicies 1° Repugnat Incarnatio ex parte naturæ

humanæ; nam posito mysterio Incarnationis, natura humana Christi personalitatem suam seu subsistentiam conservaret, vel amitteret. Si primum, duæ essent in Christo personæ, quod repugnat mysterio. Si secundum, natura humana in Christo non esset integra, quippe quæ careret propriâ subsistentiâ; ergo, etc.

Nego antecedens. Ad probationem, nego secundam partem assumpti. Namque natura illa est integra, quæ nullâ perfectione, aut proprietate essentiali, nullâ sui parte caret; atqui natura humana Christi, etsi propriâ subsistentiâ, seu personalitate destituatur, nullâ tamen perfectione, aut proprietate essentiali, nullâ sui parte caret; siquidem Christi humanitas, haud secus ac aliæ humanitates, mente et corpore constituitur. Atque tantum abest ut natura humana destruatur, aut imminuatur unione hypostaticâ, ut potius ad fastigium perfectionis provehatur. *Dei filius assumpsit formam servi*, inquit S. Leo in epistolâ ad Flavianum Constantinopolitanum... *humana augens, divina non minuens*.

Enimverò si subsistentia dicatur modus quidam totalitati perfectionum superadditus; ille modus, utpote accidentalis, deesse naturæ humanæ Christi, ac Verbo divino suppleri poterit, eâ naturâ non imminutâ, imò perfectione factâ. Si verò personalitas dicatur ipsâ ratione totalitatis perfectionum constitui, minor manebit difficultas. Ut enim rationem totalitatis aliqua natura amittat, ipsi quidquam detrahi non oportet; sufficit, si seorsim desinat existere et perficiatur unione cum altero. Numerus decimus rationem decimi amittit, si ipsi addantur unitates; gutta aquæ rationem totius non amplius habet, ubi in flumen projicitur; pariter natura humana Christi ideò totalis non est, et jure proprio non existit, uno verbo personalitate propriâ privatur, quia unitur hypostaticè Verbo divino; undè, ut observat S. Thomas in tertium Sent. dist. 5, quæst. 3 ad 4, Verbum magis propriè dicitur naturæ humanæ personalitatem impedivisse, quàm consumpsisse.

In his autem, quibus utimur, comparationibus unum annotandum est maximum discrimen. Nam illis in exemplis cum finita finitis uniantur, perfectionum totalitas ac proinde ratio suppositi conjunctis communis est. Sed, uti dictum est, Filius divinus, utpote in omni genere infinitus, rationem totalitatis perfectionum, ac proinde propriam personalitatem re-

tinet, in cujus consortium naturam humanam assumere dignatus est. Hinc pars assumpti negata distingui potuisset hoc modo: Natura Christi humana non esset integra, si amitteret personalitatem per solam additionem perfectionum, nego; per subductionem, subdistinguo: per subductionem alicujus perfectionis essentialis aut proprietatis, conc.; per subductionem duntaxat modi accidentalis ipsi naturæ, quem unio cum perfectione excluderet, nego.

Instabis 1°. Persona juxta celebrem Boetii definitionem, est *naturæ rationalis individua substantia*; atqui natura humana Christi est individua substantia; ergo est persona. Deinde, substantia est ens per se subsistens; ergo cum natura humana Christi sit substantia, habet propriam subsistentiam et personalitatem. Postremò, Verbum divinum dicitur hominem assumpsisse; sed homo est persona.

Ad primum, dist. substantia individua, id est totalis, et seorsim ab aliâ existens, concedo; individua, id est singularis tantum, nego. Ad secundum, etiam dist. omnis substantia est ens per se subsistens, id est, non inhærens alteri, ut subjecto inhæsionis, veluti accidens, concedo; est ens per se subsistens, id est, in se seorsim existens, nec unitum alteri ut supposito, nego. Corpus, v. g., Petri, junctum ipsius animæ; suppositum seorsim non constituit, quanquàm est substantia. Ad tertium, dist. hominem, id est, humanitatem, concreto, ut sæpè fit, in locum abstracti usurpato, concedo; id est, personam humanam, seu naturam cum personalitate, nego.

Instabis 2°. Non magis natura humana Christi potest terminari et ultimo compleri subsistentiâ, seu personalitate Verbi, quàm potest existere existentiâ alienâ, vel intelligere intellectione alterius; atqui, etc.; ergo, etc.

Nego majorem. Disparitas est quòd existentia, intellectio, et aliî quicumque status aut modi evidenter percipiuntur naturæ, cui competunt, ut subjecto inhærere. Cum ergo non possint simul inhærere et non inhærere, repugnat planè eos competere alicui naturæ et simul in aliâ realiter distinctâ solummodò recipi. At verò perinde evidens non est subsistentiam, seu personalitatem, quâ ultimò natura terminatur, in ejusmodi naturâ, ut in subjecto inhæsionis, semper recipiendam. Evidens non est metaphysicè repugnare, ut Verbum divinum propriâ suâ personalitate compleat,

ac ultimò terminet rationalem naturam, quam sibi conjungere dignatur. Et verò nonne ratio personalitatis hominis vulgò habetur, ut communis animæ et corpori conjunctis, licet tamen modi illius duplicis substantiæ, utrique simul non inhæreant, ut inhæSIONIS subjecto? Nempe intellectiones, volitiones, cogitationes immediatè inhærent menti; figuræ verò et configurationes partium, earum mensura, motus, quies, etc., insistent corpori. Quidni ergo poterit natura humana Christi subsistentiâ Verbi divini sustentari, et terminari, ac in ratione personæ compleri, quamvis eam subsistentiam in se, ut in subjecto, non recipiat?

Instabis 3°. Natura finita non potest subsistere, et ultimò in ratione personæ compleri subsistentiâ seu personalitate infinitâ; atqui natura humana finita est, personalitas Verbi infinita, ergo, etc.

Distinguo majorem: subsistentiâ infinitâ, quâ informetur, concedo; quâ simpliciter terminetur, seu cui uniatur tantum, nego. Natura finita non potest quidem informari personalitate infinitâ, id est, eam in se tanquam in subjecto recipere. Sed neque istud ad fidem requiritur. Hoc unum dicimus, naturam humanam Christi ad Verbi infinitam personam habere relationem unionis; adeò ut illi conjuncta sui juris esse desinat, seorsim non existat, illâ personaliter compleatur. Atqui id evidenter repugnare non probatur.

Instabis 4°. Natura finita aliarum perfectionum infinitarum, v. g. immensitatis divinæ particeps esse non potest; ergo à pari nec personalitatis infinitæ.

Nego consequentiam et paritatem. Nam plenum est alias perfectiones infinitas, v. g., omnipotentiam, immensitatem non posse participari nisi eâ naturâ, quam informant, seu cui insistant et inhæreant; sola igitur natura infinita earum potest esse particeps. Sed non demonstratur naturam Christi humanam subsistentiæ Verbi non posse esse participem, quin illius subsistentiæ fiat subjectum; ad participationem, de quâ agitur, sufficit unio multoties jam declarata.

Objicies 2° cum Crellio, lib. 2 de uno Deo Patre, sect. 2, cap. 8, pag. 401 et seq. Evidens est naturam humanam Christi esse personam, ac proinde si Christus sit summus Deus, esse duas in eo personas, ut sentit Nestorius. Probat antecedens Crellius triplici potissimum argumento. Primum deducitur ex definitione

personæ: omnis enim, inquit, substantia prima seu singularis, completa, intelligens, persona est; atqui natura humana in Christo est substantia singularis, completa, intelligens, ut omnes fatentur; ergo, etc. Secundum desumitur ex eo quòd natura humana Christi sit homo, quod patet, tum quia Christus in Scripturis appellatur homo, filius hominis, vir, etc.; tum quia, si ad naturam hominis constituendam non pertinet subsistentia, ut dictum est, non prohibebit ejus absentia quominus humana Christi natura homo propriè dicatur; tum denique quia illud est homo cui competit definitio hominis: atqui naturæ humanæ Christi competit definitio hominis; nempe illa natura est animal rationale; est enim rationalis, alioquin non esset natura humana; est etiam animal, cum nihil aliud nomine animalis intelligatur, ubi de genere hominis quæstio est, quàm corpus animâ sensitivâ præditum; ergo natura humana in Christo est homo: sed homo est persona; ergo, etc. Tertium desumitur ex actionibus et officiis naturæ humanæ Christi, et sic se habet: Quæ agit propriè loquendo, ac certa officia sustinet, persona est, cum actiones sint suppositorum; atqui natura humana Christi agit, officia sustinet, intelligit, vult, etc., nec enim ad agendum vires habet minores quàm quilibet homo, imò majoribus pollet, cum donis potioribus sit prædita; ergo, etc.

Nego antecedens, et distinguo majorem primi argumenti in probationem allati: Omnis substantia singularis intelligens et completa ultimò, non modò in ratione naturæ, sed et in ratione personæ, seu seorsim existens et alteri non unita, ejusmodi substantia, inquam, est persona, concedo; omnis substantia, etc., completa in ratione naturæ tantum, seorsim non existens, et alteri unita, nego. Similiter distinctâ minore, nego consequentiam. Illa substantia intelligens est completa in ratione naturæ, cui nihil deest eorum, quæ ad illius naturæ essentiam, proprietates ac perfectiones pertinent ita ut de se ad unionem cum altero non tendat. Hoc sensu anima, quæ, nisi uniatur corpori, aliquâ sibi naturaliter conveniente perfectione caret, non est natura completa, ut vulgò sentiunt. Substantia intelligens singularis est completa in ratione personæ, ubi non modò in ratione naturæ completa est, sed etiam seorsim existit, sui solius proinde juris est, quippe non unita alteri quo perficiatur. Sic, v. g., angelus. Sed et in corporeis habentur ejusmodi exempla: aqua in vase contenta est suppositum, quia

est quid completum quod seorsim existit, nec unitur alteri; at si ejusmodi aqua projiciatur in flumen, fit pars fluminis, desinit esse suppositum, quia unitur alteri, ac desinit existere seorsim. Scopum igitur non attingit Crellius dum probat naturam humanam in Christo esse substantiam singularem, intelligentem, ac completam eo sensu, quod nulla proprietas ac perfectio humanitatis ipsi desit, quod ultrò fateamur. Probet insuper eam esse ultimò completam, seu existere seorsim, ac Verbo non esse unitam. Et verò juxta Crellium ibidem, anima humana à corpore separata, est persona, quia contendit eam esse substantiam completam, intelligentem. Quidquid sit de illà opinione quam hic non expendimus, planum est, quod pariter idem Crellius asserit, animam corpori junctam non se solà constituere integram hominis personam, sed simul cum corpore. Substantia igitur intelligens, completa in ratione naturæ, desinit esse completa in ratione personæ, ubi seorsim non existit, seu cum unitur alteri; ergo, etsi natura humana Christi sit completa in ratione naturæ, non tamen debet esse persona, si unitur Verbo.

At, inquit Crellius ibidem, indè sequeretur naturam humanam in Christo non intelligere *ut quod*, sed *ut quo*: atqui, si non intelligat *ut quod*, non est natura intellectu prædicta, ut nos sumus, non est natura humana; ergo etc.

Nego assumptum. Solà terminorum expositione evanescit illa Crellii cavillatio. Illud dicitur intelligere *ut quod*, cui, ut supposito, seu personæ, tribuitur intellectio; natura autem, quā persona intelligit, dicitur intelligere *ut quo*. V. g., Petrus intelligit *ut quod*, quia est persona intelligens; mens verò ejus intelligit *ut quo*, seu illud est quo intelligit Petrus. Cum juxta fidem catholicam una sit in Christo Verbi divini persona, sequitur actiones ab humanitate Christi elicitas, tribuendas esse Verbo ut personæ, ac proinde ipsum esse per hanc humanitatem intelligens *ut quod*, naturam verò Christi humanam intelligere solummodò *ut quo*. Sed nihilominus illa natura constituitur mente et corpore, habet essentiam, proprietates, ac perfectiones naturæ humanæ. In quo igitur differt à cæteris naturis humanis? in eo tantum, quod seorsim non existat, quod uniatur Verbo, ac sic fiat ejus juris, quod careat personalitate propriā propter hanc suam cum Verbo personalem unionem. Dicere naturam humanam esse hocce modo unitam Verbo, et dicere eam non intelligere *ut quod*, sed *ut quo*, sunt

quid unum et idem; probetur ergo hanc unionem destrui naturæ humanæ Christi essentiam ac perfectionem, vel concedatur ejus essentiam eadem esse ac aliarum humanitatum, licet intelligat duntaxat *ut quo*, non *ut quod*. Et certè nemo dixerit essentiam animæ, ubi à corpore separatur, mutari; attamen si separata à corpore sit persona, ut sentiunt quidam, et ipse Crellius, tunc intelligit *ut quod*, quamvis unita corpori intelligat *ut quo*; ergo à fortiori unio naturæ Christi humanæ cum Verbo, etc.

Ad secundum argumentum, quod totum in meris æquivocationibus ac terminorum tricis positum est, respondeo naturam humanam Christi dici posse hominem minùs accuratè, quemadmodum abstracta nonnunquam sumuntur pro concretis; sed propriè et accuratè loquendo hominem notioni naturæ humanæ aliquid addere, nempe notionem personæ; homo enim est persona, seu ille qui habet naturam humanam. Hoc observato facilè solvuntur, quæ in probationem affert Crellius. Primò in iis, quæ sacris litteris objicit, nulla difficultas. Christus in Scripturis dicitur homo, filius hominis, vir; id ipsum et nos de Christo profiteamur; est enim persona habens humanam naturam. Sed quæ est illa persona? aiunt Sociniani hanc esse personam humanam; ex adverso cum Christianis omnium sæculorum juxta Scripturas dicimus hanc esse ipsammet personam Filii Dei qui caro factus est, id est, humanitatem sibi personaliter copulavit. Quæ deinde subtiliter videtur observare de appellatione hominis naturæ humanæ Christi propriè competente, si ad naturam hominis constituendam subsistentia non pertineat, magis solida non sunt. In homine duo spectari debent, ratio naturæ, et ratio personæ. Neque id homini peculiare est, nam in omnibus personis et suppositis alia est etiam ratio naturæ, alia suppositi. Sæpè natura eadem manet, dum suppositi ratio tollitur; si nempe naturam seorsim existere desinat, ac unionem cum altero evadat perfectior. Quod ergo constituit naturam hominis in ratione naturæ, non præcisè sufficit, ut constituta illa dicatur in ratione personæ, ac proinde cum homo propriè et accuratè significet personam, cui competit natura humana, sequitur naturam humanam Christi propriè et accuratè hominem dicendam non esse, etsi subsistentia ad constituendam naturam hominis non pertineat. Denique nihil levius ratiocinio Crellii ex definitione hominis deducto. Distinguo primam propositionem: illud est homo, cui competit

definitio hominis tum quoad naturam, tum quoad personam spectati, concedo; quoad naturam tantum, nego. Vox *homo*, cum propriè idem sit ac habens naturam humanam, complectitur proinde non modò rationem naturæ humanæ, sed etiam rationem personæ. Illud igitur cui competeret tantum definitio hominis quoad naturam spectati, non posset dici *homo* propriè et accuratè loquendo. Atqui naturæ humanæ in Christo competit tantum definitio hominis quoad naturam spectati, non verò quoad personam; quippe natura humana in Christo seorsim non existit, sed Verbo uniri supponitur.

Distinguo pariter hanc propositionem: natura humana est animal rationale; si voces illæ, *animal rationale*, sumantur in abstracto, quasi diceretur animalitas juncta rationalitati, seu corpus animæ sensitivæ ac rationali conjunctum, concedo; si sumantur in concreto, nempe pro personâ habente animalitatem et rationalitatem, nego. Scilicet ut abstracta nonnunquam pro concretis, ita concreta nonnunquam pro abstractis usurpantur. Liceat igitur dicere minùs accuratè naturam humanam Christi esse animal rationale, modò concretum ibi pro abstracto sumi advertatur, ita ut sensus sit naturam humanam esse animalitatem junctam rationalitati. Sed non probat Crellius naturam humanam Christi esse animal rationale in concreto, ut sonat, acceptum, id est, esse personam habentem animalitatem junctam rationalitati; quod unum tamen ipsi probandum incumberet.

Ad tertium argumentum responsio patet ex iis quæ circa primum dicta sunt. Agit quidem natura humana Christi, sed agit ut natura, non ut persona. Nempe ipsa actus diversos elicit, verum illi actus Verbo ut personæ cui unitur, quo sustentatur ac regitur, cujus est juris, tribuendi sunt, ut aliquando uberius explicabitur.

Instabis cum Wolsogeno (Declarat. duar. sentent. cap. 12, pag. 50). 1^o Non magis natura divina et natura humana possunt in unam Verbi personam coalescere, quàm persona divina et persona humana in unam essentiam. 2^o Cur natura divina in Christo potius pro personâ sumitur, quàm natura humana?

Ad primum, disparitas summa est, petita non tantum ex Scripturis, sed et ex ratione evidenti. Nam ut natura divina et natura humana in unam Verbi personam coalescant, sufficit naturam humanam uniri Verbo, quæ unio, ut dictum est, nullam confusionem naturarum,

nullam Verbi mutationem arguere demonstratur. Verum si Verbum et homo in unam essentiam coalescerent, eorum essentiæ confunderentur, aut una in alteram converteretur, quod cum immutabili naturâ Verbi Dei conciliari non potest; ergo. Ad secundum, natura divina, aut potius Verbum divinum dicitur una Christi persona, 1^o quia ex revelatione Dei id constat, ut infrâ ostendemus. 2^o Quia evidens est, positâ unione naturæ humanæ cum Verbo, totalitatem perfectionum, ac proinde rationem personæ integram esse ex parte Verbi divini, nullatenus ex parte naturæ humanæ, quæ eo ipso quo unitur, persona esse non potest.

Objicies 3^o. cum Pyrrhonio apud Baylium, Diction. crit. art. *Pyrrhon*. Evidens est ad constituendum hominem, qui sit vera et realis persona, animam corpori unitam sufficere; atqui juxta Incarnationis fidem id non sufficeret. Similia habet Wolsogenus in *Declaratione* pluries citatâ, cap. 13.

Distinguo majorem: evidens est, id est, evidenter conforme veritatibus physicis, concedo: evidenter conforme veritatibus metaphysicis, subdistinguo: si anima illa et corpus non uniantur alteri, seu seorsim ab altero existere supponantur, ut fit naturaliter, concedo; si supponantur uniri Personæ divinæ, quæ suppositio absolutam contradictionem involvere non demonstratur, nego. Cum juxta ordinem institutum ac constanter observatum, anima corpori conjuncta non uniatur alteri rei in personæ consortium, cumque natura humana Christi naturaliter et ex se unionem cum Verbo non postulet, ideò veritatibus physicis, id est, ordini physico planè consentaneum illud est, ut anima corpori conjuncta personam humanam constituat. Sed ordo rerum physicus exceptionem aliquam divinitus pati potest. Naturam porrò corpore et animâ constantem, si possit alteri uniri, seu seorsim non existere, posse etiam personalitate sibi propriâ spoliari nemo dilitebitur. Sed estne metaphysicè, seu sine exceptione verum ejusmodi naturam non posse uniri alteri, et sic personalitatem suam amittere? Certè quidem fides christiana docet id ipsum in Incarnatione, Deo extraordinariè operante, tam eximiè esse peractum, ut natura humana Christi personaliter conjuncta sit Verbo divino. Hæc unione evidentem pugnam cum veritatibus necessariis involvi nisi demonstret Baylius, nihil quidquam ex ejus veritate in gratiam Pyrrhonismi adversus evidentie certitudinem concludet.

Instabis cum eodem. Indè sequitur neminem posse esse certum se esse personam; nam si anima corpori conjuncta personam essentialiter non constituat, sequitur personalitatem esse modum accidentalem; atqui omne accidens potest à subjecto separari variis modis; potest ergò Deus variis modis impedire ne simus personæ, etsi mente et corpore constemus. Quis autem novit an non voluerit Deus aliquo modo nos propriâ personalitate spoliare.

Nego sequelam. Quidquid enim statuatur à philosophis de subsistentiâ ac personalitate; sive illa sit modus accidentalis superadditus naturæ, sive totalitate perfectionum constituatur; certissimum est naturam rationalem completam et seorsim existentem, seu non unitam alteri ejus juris fiat, aut quocum habeat jus commune; certissimum est, inquam, ejusmodi naturam esse personam. Atqui certus unusquisque esse potest naturam singularem, quâ constituitur, seorsim existere, non uniri alteri quo perficiatur, non esse juris alterius. Nam quemadmodum cognoscit anima se uniri corpori, et quemadmodum Verbo uniri non potuit humanitas Christi, quin se ad hujusce statûs sublimitatem, tot donorum sibi concessorum fontem, evectam cognosceret; itâ unio quælibet naturæ humanæ cum aliâ re in personæ consortium, insciâ mente, non fieret. Enimverò unio de quâ agimus non est unio quævis, sed ejus indolis esse deberet, ut eâ positâ humanitas perficeretur, aliâ ratione modificaretur, et desineret esse juris proprii. Uno verbo unio ejusmodi minùs arcta esse non posset ipsâ unione animæ et corporis.

Ex his, quid de argumento in probationem allato sentiendum sit liquet. Etenim personalitas, ut jam non semel observatum est, nequit amitti, nisi natura rationalis, cui inest, itâ uniatur alteri, ut fiat ejus juris, aut cum eo jus commune habere incipiat. Atqui cognoscere possumus nostram naturam non esse hocce modo unitam, si quidem nobis insciis, tam stricto nexu rei alteri non alligaretur; insulsè igitur quis dubitaret utrum sit persona, quia natura humana Christi Deo miraculosè operante, potuit non esse persona, supplente scilicet propriam ejus personalitatem Verbo divino, cui tam arcto nexu conjuncta est, ut statum hunc suum ignorare non potuerit.

Objectiones ex parte unionis hypostaticæ.

Objicies 1°. Nequeunt uniri extrema quæ nullam habent inter se proportionem; atqui Verbum quod infinitum est, et natura humana

quæ finita et limitata, nullam habent inter se proportionem, infinito intervallo distant; ergo, etc. Itâ Faustus Socinus in lib. de Christi naturâ, Wolsogenus, in Declaratione duarum sent., cap. 13, etc.

Distinguo majorem. Quæ nullam habent proportionem habitudinis, concedo; entitatis tantum, nego. Proportio entitatis est æqualitas perfectionum; proportio habitudinis est relatio potentiæ seu capacitatis unius ad aliud. Perspicuum est non esse proportionem entitatis inter Verbum et naturam humanam; sed non minùs liquidò constat, ibi sæpè dari proportionem habitudinis, ubi deest proportio entitatis. V. g., inter facultatem cognoscitivam hominis quæ finita est, et Deum cognoscendum, inter facultatem amandi quæ inest creaturæ rationali, et Deum super omnia diligendum, nemo negaverit adesse proportionem habitudinis, licet nulla sit proportio entitatis; ergò ex eo quòd Verbi divini perfectio infinita sit, et humanitas limitata, immeritò concluderetur istam non posse ad hunc evehi celsitudinis gradum, ut Verbo hypostaticè uniatur.

Objicies 2° cum Volkelio, lib. 5 de verâ rel. cap. 11, Crellio inprimis, ubi sup. cap. 7, Wolsogeno in Decl. cap. 13. Positâ unione hypostaticâ unus et idem Christus, una et eadem persona propriè diceretur Deus et homo; atqui una eademque persona sensu proprio dici non potest simul Deus et homo; nam Deus et homo sunt duo disparata ita opposita, ut in ratione generis remotissimi duntaxat conveniant, si tamen in eo conveniunt univocè; differentiæ verò eorum diversos habent conceptus formales ac sese mutuò excludunt; atqui ejusmodi disparata non possunt prædicari simul de eâdem personâ, alioqui possent de uno eodemque simul affirmari duo contradictoria.

Nego minorem. Nam positâ unione hypostaticâ, Christus, seu una eademque Verbi divini persona, est habens divinitatem et habens humanitatem; sed persona habens divinitatem est Deus, et persona habens humanitatem est homo; ergo, etc. Ad probationem, nego minorem. Sanè Deus in propriâ naturâ homo esse non potest, nec humanitas potest esse Deus; hoc unum objectione evincitur, sed à nemine illud negatur, nec de eo quæstio est. At repugnatne ut una et eadem Verbi divini persona, posito quod absque ullâ sui mutatione naturam humanam sibi hypostaticè conjunxerit, dicatur habens divinitatem et humanitatem, ac proindè Deus et homo? En quæstio. Jam verò dico ibi

nullam esse contradictionem. Nam ibi nulla contradictio, ubi nulla affirmatio et negatio simultanea ejusdem de eodem sub eodem respectu; atqui, etc. Nam Christus seu Verbum non dicitur sub eo respectu, sub quo dicitur Deus, nec Deus sub eo respectu sub quo dicitur homo; Verbum appellatur Deus, quia ipsi divinitas essentialis est; appellatur homo, quia humanitatem sibi personaliter copulavit. Neque ejusmodi ratio loquendi habenda est ut specialis mysterio nostro; in rebus aliis etiam communibus usitata est. V. g., nonne idem homo propriè dici debet rationalis et corporeus, moveri et cogitare? rationalis, quia habet animam rationalem, et corporeus, quia etiam corpore constat, etc. Illa tamen, motus et cogitatio, rationalitas et corporeitas, disparata sunt, et genericè duntaxat conveniunt, ergò, etc.

Instabis. Absurdè diceretur juxta propriam acceptionem eandem personam esse simul hominem et leonem; atqui magis disparata sunt Deus et homo, quàm homo et leo. Nam Deus et homo ad summum conveniunt in ratione generis remoti entis et substantiæ; at homo et leo habent etiam genus proximum commune, nempe animalitatem; ergo, etc.

Distinguo majorem; quia una eademque persona non habet simul hominis et leonis naturam, concedo; quia tantùm hæc duo disparata sunt, nego. Non negamus igitur Deum et hominem esse res disparatas, ac in infinitum distare. Sed quantumlibet ratione entitatis ac perfectionum differant, si tamen natura divina et natura humana in personæ unitatem copulentur, clarum est hanc personam esse simul Deum et hominem, uti explicatum est, nec in eo ullam contradictionem reperiri.

Objicies 3^o. Positâ unione hypostaticâ naturæ humanæ cum Verbo divino, sequeretur humiliatum ac exinanitum fuisse Deum altissimum, ipsum natum esse ex Virgine, esse mortuum, resurrexisse, in cœlos ascendisse et exaltatum fuisse, etc.; atqui hæc omnia evidenter repugnant; ergò. Ita Socinus passim in lib. de Christi naturâ, Jonas Schilictingius contra Meisnerum, Wolsog. in Decl. cap. 16, 18, 19, 20.

Nego minorem. Quia hæc omnia non prædicantur de Deo altissimo secundum naturam divinam, sed secundum naturam humanam, quam assumpsit, considerato. Nempe dicitur Filius Dei semetipsum exinanivisse; quia cum essentialiter naturâ infinitâ sit præditus, dignatus est tamen naturam humanam, naturam fi-

nitam, passibilem, quæ comparata naturæ suæ divinæ tanquàm nihilum se habet, assumere ac sibi personaliter unire. Dicitur humiliatus, natus, crucifixus, mortuus, resurrexisse, etc., secundum humanitatem. Scilicet omnes actiones et passiones naturarum tribuuntur suppositis, juxta axioma vulgare: Actiones sunt suppositorum. Homo dicendus est cogitare, intelligere, velle, comedere, deambulare, etc., licet cogitatio, intellectio, volitio, eliciantur à mente; actus verò deambulandi et comedendi exerceantur facultatibus corporis; ita pariter quæcumque passa est, quæcumque operata est humanitas Christi, hæc Verbo propter unionem personalem tribuenda. Sed de his et aliis ejusmodi Socinianorum argutiis in tractatûs decursu et explicatâ fidei doctrinâ de idiomatum communicatione, aptior erit dicendi locus.

ARTICULUS III.

Ostenditur mysterii Incarnationis veritatem ex revelationis sensu nativo indagandam, posthabitis circa ejus possibilitatem rationis difficultatibus.

Jam superiùs animadversum est istius quæstionis statum magis perspicuè aperiri non posse, quàm exactâ declaratione methodi cùm Socinianæ, tum catholicæ in inquirendo divinæ revelationis sensu. Istud in exponendis Scripturis principium statuunt Sociniani: Sensus textûs cujusvis proprium et litteralem, qui cum ratione naturali conciliari non potest, falsum esse nec Deotribuendum; ex quo concludunt statim expendendum an dogmata, quæ Christianis credenda proponuntur, sint consentanea rationi; atque cùm Incarnatio, et alia plurima christianæ fidei mysteria ipsis videantur rationi repugnare, contendunt ea sacris litteris contineri non posse. Supremum itaque Scripturarum judicem rationem suam constituunt, non tantùm eo sensu quòd, ipsâ solâ duce, velint eas interpretari, sed etiam quòd ad ejus normam dogmatum possibilitatem aut repugnantiam primùm expendant; ita ut quidquid impervium est rationi, ab ipsis absurdum et impossibile judicetur, ac tanquàm à Deo minimè revelatum respuatur. Hæc methodo eò adducti sunt ut non modò Incarnationem, sed et Verbi Divinitatem summam, Christi præexistentiam, ejus satisfactionem, Spiritûs sancti ipsam personalitatem, Dei immensitatem, præscientiam futurorum liberorum, æternitatem decretorum, creationem materiæ, peccatum originale, gratiæ necessitatem, pœnarum æternitatem, etc., è medio tollerent.

Observandum autem perniciosam illam methodum à Socinianis plerumque in praxim potius reduci, quàm verbis apertè declarari. De auctoritate, claritate ac sufficientiâ Scripturæ eodem modoloquuntur ac Protestantes. Sæpissimè profitentur se solis Scripturis adhærere, eas integras à se recipi, se tandem ex Scripturis solis pugnare, posthabitis omnium conciliorum, Patrum, doctorum, ac cujusvis Ecclesiæ interpretationibus; imò addunt mysteria Trinitatis, Incarnationis, etc., à se libenter admittenda, si iisdem verbis ac terminis, quibus à Christianis explicantur, in Scripturis haberentur expressa.

Quod verò ad eorum praxim attinet, omnia religionis dogmata supra rationem posita rejiciunt; Incarnationem et alia ejusmodi mysteria à Deo non potuisse revelari affirmant, quia rationi contraria; denique sensus metaphoricos, ad quos testimonia Scripturæ sibi objecta detorquent, variis quidem comparationibus ad alia Scripturæ loca, et observationibus grammaticalibus probare amant, sed et maximè istâ confirmant ratione, quòd, ut mysteriorum lumini naturali tam manifestè oppositorum fides exigeretur, hæc clariùs deberent in sacris Scripturis significata ostendi. Hactenùs dicta passim observari possunt in Fausti Socini, Crellii, Wolsogeni, aliorumque Socinianorum libris. Præ cæteris verò perversam, de quâ agimus, methodum profitetur auctor (1) libri cui titulus: *Philosophia sacræ Scripturæ interpres*, anno 1666 editi, in quem complurimi inter Protestantes scripsère.

Jam dudum Protestantibus exprobratum est in eorum sinu, et ex eorum principiis natam esse sectam ac methodum Socinianam; et re quidem ipsâ Sociniani simili prorsus ratione religionis christianæ fundamenta impetunt, quâ Protestantes, inprimis Sacramentarii, adversus Ecclesiæ doctrinam plerumque argumentantur; quod facilè comprobaretur, si ineundæ inter utramque methodum comparationis idoneus hic esset locus. Hinc à Protestantibus longè difficiliùs quàm à Catholicis Socinianismus confutatur; quia scilicet Sociniani adversus illos perpetuò urgent, eadem methodo sibi uti licere, quæ ab ipsis contra Catholicos adhibetur. Præter Socinianos alii apud Protestantes methodo expositæ, in Scripturis intelligendis adhærendum censent. Arminiani seu Remonstrantes illam non solum usurpare so-

lent adversus rigidiores Calvinistas synodi Dordracenæ defensores, sed etiam ad omnia dogmata transferunt et applicant. Unde theologi Rationalistæ appellati sunt, et sæpius de erroribus Socinianis graviter accusati. Ii tamen in tantam impietatis abyssum, quantam Sociniani, non videntur necessariò præcipites abire. Nimirum dogmata, quæ Sociniani propriis subtilitatibus implicati contradictionem involvere judicant, verè non demonstrantur, ut superiori articulo dictum est, veritatibus metaphysicis repugnare. Illa ergo potest theologus Rationalista spectare ut impervia solummodò rationi, non ut ipsi contraria; quâ distinctione intellectâ, nihil obstat quominus mysteria esse à Deo revelata agnoscat, optimis, quibus astruuntur, Scripturarum argumentis convictus.

Atque hanc esse suam doctrinam non semel reipsâ testati sunt insigniores Rationalistæ. Id ipsum de hoc argumento inter alios docuit Hermannus Alexander Roell in academiâ Franeker. theologiæ et philos. professor, in Oratione inaugurali de religione naturali, dictâ ibidem 15 cal. Julii 1686. Idem ut indubitatum supponitur, in scriptis quæ et ille et alii ejusdem academiæ Rationalistæ adversus alios Protestantes, in gratiam Rationalismi, præsertim circa S. Scripturæ canonicitatem cognoscendam, annis 1686 et 1687, ediderunt occasione disputationis de rectâ ratiocinatione ibidem defensæ 8 Octobr. 1686, cujus quidem thesæos articulus 8 doctrinam Rationalismi continens, tot concertationibus locum dedit, ut silentium utrique parti imponere coacti fuerint comitiorum provincialium Frisiæ deputati.

Non diffiteor tamen Rationalistas præsertim rigidiores Socinianismi esse maximè suspectos; tum propter tolerantiam universalem quam propugnant; tum propter methodi perversitatem, quâ ad Socinianos errores mens facilè ducitur; tum propter eorum in scrutandis divinis temeritatem, monente Spiritu sancto, ac ratione ipsâ dictante, scrutatores majestatis esse à gloriâ opprimendos.

In respuendâ perniciosâ illâ methodo ac doctrinâ consentiunt omnes Christiani. Docent inprimis Catholici, seu viâ disquisitionis et examinis, seu viâ præscriptionis et auctoritatis inquiratur veritas mysterii ad credendum propositi, v. g., Incarnationis, nativum verbi Dei sensum ante omnia investigandum, ad eum duntaxat mentem appellendam, ipsique certâ fide adhærendum posthabitis difficultatibus quas ratio objicit.

(1) Ludovicus Meyer, medicus Hagens.

Contendunt probantque, quod articulo præcedenti patefactum est, difficultates ejusmodi non esse demonstrativas. Sed nihilominus cum impiè agere arbitrantur, qui illarum examen fidei vult prægredi, et verba divina vel ad sensus proprios et naturales, vel ad sensus metaphoricos determinat arbitrio rationis de ejusmodi difficultatibus judicantis.

Non negant iidem suas esse rationi partes in discussione dogmatum. Ex motivis credibilitatis ratio demonstret revelationis existentiam : sanioris et accuratæ critices regulis utatur in dignoscendo verbi Dei sensu : textum cum antecedentibus et consequentibus conferat ; scopum auctoris sacri, circumstantias loci, temporis, personarum, et alia quæ ad genuinam interpretationem ex se conducunt, diligenter expendat ; usitatas Scripturarum locutiones observet ; textus primigenios adeat ; sanctorum Patrum ac conciliorum interpretationes in medium proferat ; hæc rationi permittuntur. At fines sibi præscriptos ipsa non excedat ; neque, donec rei possibilitatem expenderit, ac mysterium potuisse à Deo revelari censuerit, suspensam deniteat fidem, et verborum Dei nativam ac propriam significationem.

Uno verbo, ubi Deus loquitur, sileat ratio, solus ipse audiatur, ac verbis ejus sensu nativo intellectis, quæcumque contrariæ verisimilitudines ac rationis difficultates spernantur.

Doctrinâ catholicâ et errore Sociniano, quantum par erat, explicatis statuenda est.

Conclusio. Ubi de Incarnationis aut alterius cujusvis mysterii veritate agitur, verborum Dei sensui nativo adhærendum est, posthabito, circa ejusmodi mysterii possibilitatem, rationis examine ac judicio.

Probatur 1^o ex Scripturis, quas recipiunt Sociniani. Proverb. 1, v. 27 : *Scrutator majestatis opprimetur à gloriâ*. Apost., 2 ad Cor. 10, v. 4 : *Arma militiæ nostræ non carnalia sunt, sed potentia Deo..... in captivitatem redigentes omnem intellectum in obsequium Christi*. Ex quibus sic argui potest : Ubi de Incarnatione, aut alio quovis mysterio agitur, qui verborum Dei sensui nativo non vult adhærerere, nisi ejusmodi mysteriorum possibilitatem ratione expenderit, paratus aliorsum divertere revelationis sensum, si rem propositam impossibilem judicet ; ille scrutator majestatis divinæ dicendus est, in obsequium fidei intellectum non captivans. Scrutatur majestatem divinam, si quidem omnia fidei mysteria incomprehensibilem Dei naturam et altissimæ ejus operationes spectant. In

obsequium fidei intellectum non captivat, cum verbo Dei nolit adhærerere, donec dogmatum possibilitatem ad normam rationis expenderit. Atqui juxta Scripturas scrutator majestatis est à gloriâ opprimendus, et in obsequium fidei captivandus est intellectus ; ergo ubi de Incarnatione, etc. Et verò illa rejicienda methodus quam Christus et Apostoli praxi suâ condempnaverunt ; atqui Christus et Apostoli praxi suâ condempnaverunt Socinianam methodum ; enimverò tantum abest ut Christus et Apostoli ad normam rationis verba divina intelligenda doceant, ut potius ad solam revelationis divinæ auctoritatem, ubi de misteriis agitur, animos erigant et applicent. *Beatus es, Simon Barjona*, inquit Christus Matth. 16, v. 17, alloquens S. Petrum qui hoc ipsum, de quo disserimus, mysterium confessus erat, *quia caro et sanguis non revelavit tibi, sed Pater meus qui in cælis est*. Et sanctus Paulus, Epistolâ 1 ad Corinth. cap. 1, à versu 17 usque ad finem, et capite 2 integro, de modo quo mysteria Incarnationis et Redemptionis annuntiabat, verba faciens, humanam sapientiam reprobatur, *horumce mysteriorum apparentem stultitiam fatetur, totusque auctoritate revelationis divinæ prodigiis ac virtutibus manifestatæ innititur*. *Non enim*, inquit c. 1, v. 17, *misit me Christus baptizare, sed evangelizare : non in sapientiâ verbi, ut non evacuetur crux Christi, verbum enim crucis pereuntibus stultitia est, iis autem qui salvi fiunt, id est nobis, Dei virtus est ; scriptum est enim : Perdam sapientiam, etc. Nos autem prædicamus Christum crucifixum ; Judæis quidem scandalum, gentibus autem stultitiam, etc.* et cap. 2, v. 4 et seq. : *Sermo meus et prædicatio mea, non in persuasibilibus humanæ sapientiæ verbis, sed in ostensione Spiritus et virtutis, ut fides vestra non sit in sapientiâ hominum, sed in virtute Dei. Sapientiam autem loquimur inter perfectos ; sapientiam verò non hujus seculi... sed loquimur Dei sapientiam in mysterio, quæ abscondita est, etc.* Citata loca legantur integra.

Probatur 2^o ex sanctis Patribus, qui in infidelibus et hæreticis perversum ejusmodi rationis usum, quo variis adversus mysteriorum fidei possibilitatem ratiociniis, eorum veritas impugnatur, studiosè vituperaverunt ac gravissimè condempnaverunt tanquam impium, temerarium ac periculosum ; tum propter obsequium Dei loquentis auctoritati debitum, quâ ut motivo nititur fides ; tum propter infirmitatem rationis humanæ, quæ sæpè fallitur, et in rebus vel minimis cæcutit ; tum denique

propter altitudinem et incomprehensibilitatem mysteriorum nostrorum, in quibus de ipsâ Dei naturâ inscrutabili, de ejus attributis ac operationibus specialibus agitur. Nonnulla eorum testimonia, in quibus de Incarnatione loquuntur, exscribere sufficiet. S. Joannes Chrysostomus, homil. 24, aliàs 25, in Joan. n. 3, ad hæc verba Nicodemi : *Quomodo potest homo nasci*, etc. « Sic et hæretici, inquit, in suâ perstant hæresi, pari modo interrogantes; dicunt enim alii : Quomodò incarnatus est? alii : Quomodò natus? cogitationumque suarum infirmitatî immensam illam subjiunt substantiam. Quæ cum sciamus, intempestivam illam curiositatem vitare oportet. Neque enim quomodò hæc facta sint, scient unquam ii qui hasce movent quæstiones, et à rectâ fide excident... Hæc cum sciamus, ne ratiocinio divina scrutemur, neque ad naturalem rerum seriem illa referamus... sed piè omnia cogitemus, credentes Scripturæ dictis. Nam curiosus indagator, nihil lucratur, ac præterquàm quòd id quod quærit non inveniet, extremas etiam dabit pœnas. Audis Patrem genuisse? id quod audisti crede; quomodo autem? ne quæras; neque ideò generationem abneges, » etc. S. Aug. epist. 137, aliàs 3, ad Volusianum, postquàm n. 5 de ipsis corporis sensibus plura retulit, quæ mente percipi nequeant, addit n. 6 : « Hæc omnia mira sunt, nihil horum affirmari sine quâdam velut absurditate potest; et de sensu loquimur morticino... Et putamus nobis de omnipotentia Dei incredibile dici aliquid, cum dicitur verbum Dei, per quod omnia facta sunt, sic assumpsisse corpus ex Virgine, et sensibus apparuisse mortalibus, ut immortalitatem suam non corruerit, ut æternitatem non mutaverit? » etc. Tandemque n. 8 sic concludit. « Hic si ratio quæritur, non erit mirabile; si exemplum poscitur, non erit singulare. Demus Deum aliquid posse, quod nos fateamur investigare non posse. In talibus rebus tota ratio facti est potentia facientis. » Cassianus, lib. 4 de Incarnatione cap. 6 : « Rationem dicti quæris, inquit? Non reddo; interim Deus hoc dixit; Deus hoc locutus est mihi; verbum illius summa ratio est. Removeo argumenta, removeo disputationes; sola mihi ad credulitatem sufficit persona dicentis. Non licet mihi de fide dicti ambigere, non licet deliberare. Quid mihi quærere quomodo verum sit quod Deus dixerit, cum dubitare non de-

beam quin verum sit quod Deus dixerit? » Probatur 3^o ratione theologicâ : Illa rejicienda methodus, quæ plena impietatis et superbiæ, temeritatis ac periculi, quæ revelationis divinæ sensus dubios et incertos reddit, horumque dignoscendorum tutam, naturalem ac rationi maximè conformem viam præcludit : atqui 1^o methodus Sociniana plena est impietatis ac superbiæ. Qui enim eam methodum sequitur, de ratione suâ in rebus vel minimis juxta se positis cæcutiente ac sæpissimè errante ita præsumit, ut Dei ipsius de se suisque attributis et altissimis operationibus loquentis verba sensu nativo accipere vereatur, donec de reconditorum ejusmodi mysteriorum possibilitate ex solâ ratione judicaverit, ratus nativum verbi divini sensum tunc genuinum non esse, cum rationi adversatur. Supremo igitur numini de suâ naturâ ac operationibus homines per revelationem instruendi si Socinianis credamus, auris illicò non præbenda; antea videndum est an non rationi repugnet sensus litteralis verborum. Quòd si ille sensus, ratione judice, contradictionem involvat, spurius est, à Deo non intentus, alter inquirendus. Ergone timendum ne decipiamur à Deo semetipsum nobis per revelationem manifestante, nisi ipsi loquenti subveniat rationis judicium circa rei ab ipso enuntiatae possibilitatem? ergone humanæ rationi de essentiâ altissimi et operationibus divinis judicanti fidendum est magis, quàm nativo verborum divinorum sensui? Sanæ hæc impia sunt, et superbiæ plena, vel nihil impium et superbum poterit appellari. 2^o Eadem methodus plena est temeritatis et periculi. Cum enim mens humana maximè sit errori obnoxia, sæpè veri specie tanquàm evidentia ducatur; cum id in rebus vel minimis contingat, maximè verò, ubi agitur de infiniti naturâ, locum habeat; cum denique in misteriis religionis semper agatur de ente infinitè perfecto prout nobis naturaliter non innotescit spectato, fateanturque omnes Christiani mysteria fidei in se spectata esse rationi impervia et verisimilitudine destituta; evidentissimum est facile fieri posse, ut qui de eorum possibilitate solâ ratione duce judicare suscipit, in errorem incidat, multaue perperam statuatur certò esse impossibilia, solâ verisimilitudine deceptus. Jam verò Rationalista, qui hocce modo fallitur, methodo quam refellimus adhærens, propter falsum ejusmodi judicium, ne scilicet, quod credit impossibile, cogatur fateri revelatum, ad sensus improprios et à nativo alienos verba

divina detorquere conabitur; sicque genuinum revelationis divinæ sensum rejiciet. Plena ergo temeritatis et periculi methodus Sociniana.

3° Illa etiam methodus revelationis divinæ sensus omnes dubios et incertos reddit, atque in philosophiam disceptatricem, contra præceptum Apostoli ad Titum cap. 3, v. 9 et 10, fidem Christianam immutat. Nam sensus revelationis nativus proponatur, non statim ipsi adhærebit Rationalista; antea expendet num ille sensus sit conformis lumini naturali; quod si hunc censeat esse genuinum, alterum esse inquirendum contendet; ergo juxta hanc methodum primò quis sit sensus revelationis, ex ipsâ revelatione solâ non potest certò judicari; manet dubius ille sensus donec illi faverit de ipsius rei revelatæ naturâ rationis humanæ judicium, quod sæpius saltem de rebus adeò intricatis certum esse non potest. Secundò, ut sensus quivis genuinus suadeatur, probandum est illum veritatibus philosophicis non dissentire. Jam porrò quid istud est, nisi incertos reddere revelationis sensus, quatenus à rationis incerto judicio pendentes redduntur, ac in disceptationes et tricas philosophicas fidei christianæ simplicitatem convertere. 4° Methodus Sociniana tutam naturalem ac rationi maximè conformem veritates revelatas dignoscendi viam præcludit; nam illà methodo præcluditur via quam supra his verbis expressimus: Ubi loquitur Deus, sileat ratio, solus ipse audiatur, ac verbis ejus sensu nativo intellectis, quæcumque contrariæ verisimilitudines, ac rationis difficultates spernantur. Atqui tamen hanc viam esse tutam et naturalem facilè evincitur. Siquidem his duobus innititur manifestissimis principiis. Primum, revelationis divinæ sensu nativo nos non posse falli; quod evidentissimum est, quia Deus est summè verax. Alterum, mentem humanam altissima divinitatis mysteria rimari præsumentem, posse facilè decipi. Quippe finita est, et circa res naturales vel minimas sæpissimè errat; in misteriis autem agitur de infinito in omni sensu, nempe de naturâ Dei, ejusque viis et operationibus; et quidem de naturâ Dei, *ut inhabitantis lucem* menti sibi relictæ prorsus *inaccessibilem* Tit. 6, 16; de ejus viis ac judiciis *incomprehensibilibus*, ut verba Apostoli, ad Rom. 11, adhibeam, et *investigabilibus*, de ejus operationibus supra consuetum naturæ ordinem longè positis. Unde sequitur nihil esse mirum quòd mysteria concipi nequeant, quòd eorum habeatur idea tantùm imperfecta et

analogica, quòd rationi stuporem pariant, quòd ipsi in speciem pugnancia videri possint, quòd denique de eorundem possibilitate mens sibi relictâ curiosiùs inquirens facilè decipiat. Ergò tutum et naturale est, et rationi maximè consentaneum, ut, ubi Deus de se ipso loquitur, rationi imponatur silentium, divinaque verba sensu nativo intelligantur, independentè ab oppositis verisimilitudinibus ac rationis difficultatibus; ergo tutam, naturalem, ac rationi maximè conformem, dignoscendæ veritatis revelatæ viam præcludit methodus Sociniana, proindeque, etc.

SOLVENTUR OBJECTIONES. — Objicies 1°. Cum recta ratio, id est, vera et evidentiâ rationis judicia fidei adversari nequeant, ut articulo præcedenti dictum ac probatum est; cùmque à nobis pendeat rectus rationis usus, siquidem principium evidens ab inevidenti, genuinam demonstrationem à spuriâ secernere possumus; sequitur sensum genuinum verbi Dei nunquàm posse esse adversum rationis nostræ judiciis, ubi, ut eâ rectè utamur, omnes curas et industriam locamus. Ergo sacrarum Scripturarum sensus cognoscendi optima et facilis regula illa est: Statim expendendum num sensus, qui genuinus esse videtur, rectæ rationi consentaneus sit, ut si rationi judicetur repugnare alter possit inquire; non enim à Deo revelatum est, quod impossibile; id verò impossibile quòd recta ratio judicat impossibile. His similia habentur in scriptis Rationalistarum academiarum Franekerianæ superius memoratis, ex quibus ea tantùm eliciemus solvenda, quæ in Catholicos hoc loco objici possunt.

Nego consequentiam, 1° Quia etsi judicium rationis esset infallibile, non tamen liceret, cùm de veritate ac possibilitate rerum à Deo revelatarum agitur, eam consulere præ testimonio divino. Injuriosum enim est verbis divinis, ut, quæ iis continentur, quæ proinde propter auctoritatem Dei revelantis credenda proponuntur, rationis humanæ subjiciantur examini, ejusque adagiis ac notionibus antea conferantur, quàm existimentur credenda. 2° Quæ ab homine proferuntur, expendere liceat; falli potest aut fallere. At verò evidentissimum est Deum esse summè veracem; ergo ubi loquitur, circa sensum verborum ejus nativum suscipiendum deliberare non possumus, nec, priusquàm iis adhibeatur fides, explorare licet quid de dogmatis expressi possibilitate ratio statuatur; quippe de ejusmodi dogmatis veritate dubitare nefas est. 3° Etsi recta ratio

errorem excludat, nec nisi vitio nostro in veri inquisitione fallamur, attamen ea est humanæ mentis infirmitas, ut in rebus intricatis difficulter ab errore absteineat. Nempe in inquirendâ veritate fatigatur animus, præjudicia non facile deponit, insensibilia plerumque vix capit, quantò minùs res divinas et supernaturales! insuper falsum non rarò verisimillimum apparet. Uno verbo mens humana in rebus difficilissimis sæpè errat, ut ex variis et oppositis philosophorum opinionibus perspicuum est. Ergo cùm mysteria, quæ in Scripturis revelantur, spectent res divinas, et sint rationi impervia ac verisimilitudine destituta, maximè timendum esset, ne in eorum possibilitate investigandâ, ratio sibi relicta deciperetur, sicque sensus genuinus Scripturæ impiè rejiceretur. Hinc locis suprâ citatis Deus prohibet ne ejus majestatem curiosiùs scrutemur; monet ut intellectum in obsequium fidei captivemus, et sapientiam hujus mundi ab eo reprobaturum abjiciamus.

Instabis 1^o Tam licet dogmatum in Scripturis contentorum possibilitatem examini rationis permittere, quàm de earumdem divinitate ex ratione inquirere; atqui ratione expenditur ac probatur divinitas Scripturarum, ergo, etc.

Nego majorem. Nam ubi SS. Scripturarum divinitas adversùs incredulos discutitur et vindicatur, eas esse à Deo inspiratas minimè supponitur, neque ex eis ut divinitus inspiratis argumenta colliguntur, alioqui supponeretur quod esset in controversiâ positum. Nihil ergo piaculi, si ex ratione tunc expendantur varia momenta, varia testimonia et motiva credibilitatis, quibus evidens fit verba divina Scripturis contineri. At verò, ubi de mysteriorum veritate ex Scripturis investigandâ quæstio est, Deum per ejusmodi Scripturas esse locutum ut certum supponitur, et utrinque agnoscitur. Nonne ergo infideliter agit, qui earum sensum ex judicio rationis suæ circa divinorum dogmatum naturam ac possibilitatem pendere velit; qui de singulis Scripturarum sensibus dubitat, donec de mysteriis altissimis, quæ iis sensibus significantur, rationis suæ responsum acceperit; qui proinde veritatem dogmatum à Deo revelatorum ipsam Divinitatis incomprehensibilem naturam et inscrutabilia judicia spectantium, cæcutientis suæ rationis examini submittere non erubescit? Atqui ita se gerunt Sociniani et rigidiores Rationalistæ. Namque fatentur Scripturam sacram esse ipsum Dei verbum, sensum verò textuum Scripturæ non priùs amplectuntur

quàm cum principiis philosophicis dogma revelatum contulerint, ipsumque ejusmodi principiis non adversari ratio judicaverit; ergo, etc. Cæterùm, ut omnis vel minima ambiguitatis adimatur species, observari debet eos qui Scripturæ sacræ divinitatem fide tenent, posse quidem licitè variis de causis, sed secluso circa ipsum fidei objectum dubio effectivo, omnes rationes quibus sacræ Scripturæ divinitas astruitur, expendere; quod theologis adversùs incredulos disputantibus solitum. Pariter non desunt theologo legitima motiva, quibus ad mysteriorum fidei possibilitatem ratione, quantum fieri potest, discutiendam impellatur. Sed cum spuria Rationalistarum methodo, nihil commune habet duplex ille rationis usus. Quippe in utroque ratio ancillatur fidei, in ipsam non dominatur, nec sensum verborum divinorum arbitrio suo determinat.

Instabis 2^o Si ratio falli potest circa possibilitatem dogmatum revelatorum, falli etiam poterit in expendendâ Scripturæ sacræ divinitate; proindeque nihil certi esse poterit.

1^o Nego suppositum. Non enim ideò tantum contendimus dogmata in Scripturis expressa ad normam rationis illicitè expendi, quia ratio falli potest; sed inprimis quia summæ Dei revelantis auctoritati ac majestati injuriosum est, non antea dogmatibus ab eo revelatis fidem adhiberi, quàm de eorum possibilitate ratio humana judicium tulerit. 2^o Nego consequentiam. Negabuntne adversarii mentem humanam esse errori obnoxiam? Nonne ipsi plerumque philosophi in rebus difficilioribus, ubi præsertim de infinito agitur, v. g., circa divisibilitatem continui, in varias opiniones abeunt, se percelli evidentiâ arbitantes, dùm eorum saltem altera pars solâ verisimilitudine ducitur? Ergone omnia sunt incerta? minimè. In rebus facilioribus, ac minùs involutis, in pluribus etiam difficillimis, in factis præsertim compluribus certissimum est veritatem attingi; v. g., cùm agitur de primis principiis, de eorum primariis consecrariis, de veritatibus mathematicis, de factis ejus speciei, de quibus non nisi stultè dubitaretur, puta an Roma existat, an aliquando extiterit Julius Cæsar, etc. Porro saltem præcipuorum Scripturæ librorum divinitas ejusmodi factis comprobatur, quæ tot ac tantis momentis constant, quæ tot testium auctoritate firmantur, quibus ita unanimiter suffragantur quotquot in universo orbe Christi nomen hactenus professi sunt, ut antecedenter etiam ad Eccl. Catholicæ documenta, certò et facil-

linè doctis suaderi possit. Ex adverso possibilitas dogmatum revelatorum, ipsa est possibilitas rerum ad naturam Dei inscrutabilem pertinentium, est possibilitas consiliorum, judiciorum divinatorum, quibus consideratis Apostolus exclamat, Rom. 11, v. 33 : *O altitudo!* est possibilitas operationum Dei supra constitutum ab ipso naturæ ordinem positarum. Quis sine immodicâ sui fiduciâ sperare potest, se, in perscrutandis solâ ratione duce tam altis et absconditis rebus, nunquam à vero esse deviarum?

Instabis ultimò. Ut sensus Scripturæ sacræ genuinus detegatur, necessarius est usus rationis, nempe varia Scripturæ loca inter se conferenda, scopus loquentis, antecedentia, consequentia, expendi debent, etc., ergo.

Nego consequentiam. Duplici viâ dignoscitur legitimus Scripturæ sensus; prima est via discussionis et examinis proprii, quâ docti incedunt, cum expensis scopo loquentis, stylo Scripturæ, variis rei circumstantiis, terminorum propriâ virtute, etc., ostendunt talem esse nativam verborum ac contextûs significationem, quæ omnia fiunt rationis ope. Altera est via auctoritatis, cum, v. g., contendunt alienjus loci sensum hunc esse, quia semper illo modo ab Ecclesiâ ejusmodi textus intellectus est et etiamnum intelligitur. Istam posteriorem viam rejiciunt Protestantes, cui tamen soli possunt simplices insistere, ut in tractatu de Ecclesiâ ostenditur, et quâ rejectâ, longè difficilius Sociniani errores confutantur. Ut sit, utramque illam viam inter et Socinianam methodum perspicuum est nullam esse affinitatem. Qui viâ examinis procedit, id unum intendit, ut possit ex ipsismet Dei verbis genuinum revelationis eruere sensum cui sese subjiciat, et quem aliis credendum proponat; non verò mysterium divinâ revelatione expressum cum ratione conferendum censet, ut, prout illud videbitur rationi possibile vel repugnans, sensus verborum Dei confirmetur, ut aliorsum detorqueatur.

Objicies 2^o. Esto, dogmata quælibet expressis terminis in Scripturis contenta fide tenenda sint quantumlibet rationi repugnare videantur; non ita res se habet quoad Incarnationem et alia ejusmodi. Cum enim Incarnatio iisdem verbis ac terminis, quibus explicatur ac proponitur credenda, in sacris Scripturis non legatur, neque enim habentur in Scripturis, v. g., hæc verba, Christum habere naturam humanam, et tamen non esse personam humanam;

sequitur illud mysterium ad summum dici poss^e consequentiis ac ratiociniis ex verbo Dei inferri. Atqui quod hocce modo ex Scripturis Divinis erui dicitur, perfectò potest placitis rationis eâ mente conferri, ut si iis repugnare videatur, possit illatio ut illegitima rejici; siquidem in iis quæ sunt contra rationem, nulla formari potest certa et legitima consequentia; ergo, etc. Ita Wolsogenus in citatâ jam Declarat. duarum sentent. contradict. cap. 3, pag. 10, et cap. 12, pag. 50; Crellius de uno Deo Patre, lib. 1. cap. 16, pag. 88, etc.

1^o Distinguo majorem: dogma quod non iisdem verbis ac terminis, quibus credendum proponitur, nec æquivalentibus legitur in Scripturâ, ad summum dici potest consequentiis, etc., concedo; quod non iisdem terminis, sed æquivalentibus, nego. Itaque fatendum non modò iisdem quibus Scriptura utitur, sed et aliis terminis explicari ab Ecclesiâ catholicâ, et proponi credendum Incarnationis dogma. Verum non ideò meris consequentiis ac ratiociniis mysterium illud ex verbo Dei infertur; si quidem voces quibus fidem suam Ecclesia exprimit, reipsâ non diversum exhibent conceptum ab eo, quem voces sacræ Scripturæ representant. Istæ aliis planè æquivalent, nec perfectò alios ejusmodi terminos Ecclesia ad exprimendam suam fidem adhibuisset, nisi eam hæreticorum ad hoc coegisset perversitas, qui verborum Scripturæ naturalem sensum subvertere tentarunt. Et verò nonne juxta expressa Scripturæ verba Christus est *Deus super omnia*, itemque *homo*. Nonne est *Verbum caro factum*? Nonne habet *formam Dei*, cui est *æqualis*, et simul *formam servi et hominis*? Quæ omnia eundem sanè conceptum formalem exhibent, ac ista: Christus est unica Verbi divini Persona habens naturam divinam, et naturam humanam. Sed de his ubi de Incarnationis existentia. Porro, quod terminis æquivalentibus continetur in Scripturis, dici non potest ex iis tantum erui consequentiis et ratiocinationibus. Certè quidem verba illa esse æquivalentia cognosci nequit, sine aliquo rationis usu, quo inter se vocum ejusmodi acceptiones conferantur; sed ille usus rationis planè differt ab iis, de quibus objectio, consequentiis et ratiociniis; quorum ope scilicet ex S. Scripturâ deducerentur propositiones, juxta conceptum suum formalem et verbis æquivalentibus, in eâ non contentæ.

2^o Nego suppositum majoris, nempe supponitur in majore, quidquid non continetur formaliter in Scripturis, nec contineri formaliter in

verbo Dei; quod falsum est. Nam præter Verbum Dei scriptum, admittenda est traditio, quod alibi demonstrant theologi catholici; atque vel ipsa ratio docet spectandum esse ut à Deo revelatum, vivæque voce à Christo et Apostolis Ecclesiæ traditum, et usque ad nos incorruptè transmissum, quidquid semper in Ecclesiâ creditum ostendi potest, etiamsi non contineretur expressè aut æquivalenter in Scripturis. Totam verò traditionem suffragari mysterio Incarnationis deindè ostendetur.

3º Nego minorem. Nam, ubi ex principio quidquam formâ legitimâ deducitur, tanta est inter consequens et principium connexio, ut qui eam noverit, de consequente dubitare non possit, nisi et de principio dubitet. Si quis igitur dogma ex verbi Dei nativo sensu legitimè deductum, nolit priùs amplecti, quàm illud cum principiis rationis contulerit, ac iis conforme repererit, is certè vel nativos Scripturæ sensus, ante ejusmodi comparationes, non recipit, quod probavimus esse illicitum; vel admissis ejusmodi sensibus, de illatione seu consequentiâ dubitat utrùm legitima sit; quâ in hypothesi immeritò adhuc illam comparationem institueret. 1º Quia ad certissimè cognoscendum an illatio aliqua legitima sit, hæc una via est, ut exigatur ad strictas regulas logicæ. Si ejusmodi regulis conformis sit, ut legitima agnosci debet, ac proindè si antecedens revelatum sit, verum sit consequens, necesse est, independentè ab omni, de quâ agitur, collatione. 2º Quæcumque dicta sunt de sensu nativo Scripturæ huc applicari possunt. Summa enim erga Deum loquentem adhibenda reverentia, rationis humanæ tenuitas, ac mysteriorum natura et altitudo ex æquo præscribunt, ut quæcumque ad religionem attinentia ex verbo Dei expresso legitimè et certò inferuntur, non expectato, de eorum possibilitate, rationis examine et judicio, religiosè admittantur.

COROLLARIUM. — Ex dictis toto isto capite colligere est, quâ methodo ad suadendam Incarnationem procedendum sit. Mysteriorum illius existentiam et possibilitatem ex solâ revelatione divinâ astruat theologus. Quòd si argumenta ex ratione petita ipsi objiciantur, exponat 1º quanta sit, iudice ipsâ ratione, necessitas, ubi Deus loquitur, ejus auctoritatis submissè et sine morâ adhærendi, spretis audacioribus rationis plus æquo curiosæ elationibus et obmurmurationibus. Atque hoc primum regia via est, cordatis acceptissima, doctis indoctisque æ-

commodata et sufficiens, cunctis proponenda, ab omnibus necessariò tenenda.

Ostendat 2º, si animus ratiocinia illa opponentium id postulet, argumenta ejusmodi in quibus tantoperè confidunt, non esse veras et genuinas demonstrationes, nec proindè illis evinci posse rectam rationem esse ullo modo fidei Incarnationis adversam.

Cæterum incredulorum objectiones esse evidentes et planè insolubiles, seu veras et genuinas esse demonstrationes nunquàm concedat, quia id falsissimum est, et religioni perinde foret nocivum. Mysteriorum tamen naturam; aut modum quo illud cum ratione consentit, dilucidè explicare non suscipiat; quod impossibile, nec fidei necessarium.

CAPUT III.

Quibusnam mysterium Incarnationis seu futurum, seu peractum innotuerit?

Quæritur 1º, an mysterium Incarnationis seu futurum, seu peractum Angelis et Dæmonibus cognitum fuerit. 2º An Adamo, Patriarchis, Prophetis et nationi Judaicæ. 3º An Gentilibus. Quæ tribus articulis breviter expendenda.

ARTICULUS PRIMUS.

Utrum Incarnatio Angelis bonis et malis fuerit nota?

Observandum 1º, cum S. Ambrosio, lib. 4 de Fide, cap. 1, n. 2, necnon S. Thomâ, 1 parte, q. 57, art. 5, in corp., mysteria gratiæ non naturaliter cognosci ab Angelis, quocumque in statu versentur, ac proindè Incarnationem et alia ejusmodi naturæ vim superantia et liberè à Deo ad extrâ producta, Angelis etiam beatis, non necessariò innotescere, sed secundum quod Deus voluerit eis revelare, unde sequitur rem, de quâ quæstio est, à solâ Dei voluntate pendere, nec nisi argumentis ex revelatione ductis posse dignosci. Obs. 2º, cum eodem S. Thomâ, ibid ad 1, et aliis in locis, post S. Bernardum, epist. olim 77, nunc opusc. 10, cap. 3, n. 15, de mysterio Incarnationis duplici modo disseri posse, vel in communi, seu quantum ad substantiam, nempe prout est hypostatica unio naturæ humanæ cum Verbo; vel quantum ad speciales conditiones, seu modum mysteriorum, et diversas ejus circumstantias, quo loco scilicet, quo tempore, quâ ratione executioni mandanda Incarnatio, quæ sit præcisè natura unionis, quæ humanitas assumenda, an nova quædam creanda; an ex matre, et ex quâ, et quomodo Christus concipiendus et nas-

citurus; quibus mediis genus humanum esse redempturus; quæ illius redemptionis fructuum copia et universalitas, et alia ejusmodi infinita, quæ et ipsa variis et innumeris modis perfici possunt. Obs. 3^o, Angelos bonos tum in viâ, tum in termino, seu ante et post consecutam beatitudinem spectari posse; ac pariter malos ante lapsum, quo tempore aliis fuere statu similes, et post lapsum inflictamque iis damnationem æternum duraturam, posse considerari.

Ex his tria in controversiam vocari liquet, nimirum 1^o, an Angeli in viâ, 2^o, an boni Angeli assecutâ beatitudine, 3^o, an dæmones mysterium Incarnationis futurum et peractam cognoverint; et quomodò? An quantum ad substantiam solum, an etiam quantum ad modum, circumstantias, fines et effectus.

Circa singula variæ sunt opiniones. De Angelis in viâ Suarez, lib. 5 de Angel. cap. 6, Sylvius art. 5, q. 57 partis 1 div. Thomæ, et alii multi quos citant, verisimilius censent iis fuisse illo in statu concessam Incarnationis quantum ad substantiam spectatæ revelationem, ita ut Verbum esse aliquando carne induendum fide tenuerint, inscii tamen et modi, et circumstantiarum illius arcani, ac præsertim redemptionis hominum hoc mysterio perficiendæ. Divo Thomæ tribuitur eadem sententia, 1 p., q. 64, a 1 ad 4, ubi tamen potius videtur S. doctor quæstionem non expendisse, sed intactam relinquere voluisse. Alibi initium notitiæ illius mysterii Angelis concessæ repetit à principio eorum beatitudinis. Quidquid sit, Petavius ex adverso, lib. 3 de Angelis, cap. 2, n. 10, et alii complures, iisdem Suarez et Sylvio testibus, Incarnationem judicant tantò ante Angelis nullatenus fuisse patefactam.

Circa ejusdem mysterii notitiam bonis Angelis, assecutâ beatitudine, impertitam variè locuti sunt sancti Patres. 1^o A multis simpliciter dictum est filium Dei Angelis prius invisibilem, ab iisdem post suam Incarnationem visum fuisse. Ita S. Athanasius orat. 4 contra Arianos *olim* 5, n. 36; S. Chrysost. homil. 11, in 1 Epistolam ad Timoth. n. 1; Theodoretus in psal. 23, et alii quorum testimonia exhibet Petavius, lib. I, de Angelis, cap. 8, et lib. 7 de Deo et divinis attributis, cap. 6, ex quibus posset cuicumque videri colligendum, omnem futuræ Incarnationis cognitionem ab illis Patribus fuisse beatis Angelis denegatam; sed immeritò; neque enim iis in locis vel leviter at-

tingitur proposita quæstio. Id unum SS. doctores significant, appositè ad hæresim Anomeorum de comprehensibilitate Dei convellendam, Filium Dei cognitione objecto commensuratâ ac rei perspectæ assequente terminos, ab Angelis tunc cœpisse attingi, cum incarnatus est; et quemadmodum, ubi Deum ante Incarnationem invisibilem fuisse aiunt, iis omnem Dei non adimunt notitiam; ita et cum docent Deum post carnem assumptam ab Angelis visum esse, ipsos ex quâlibet futuræ Incarnationis cognitione ablegare non sunt censendi.

2^o Nonnulli existimasse videntur mysterium Incarnationis, etiam quantum ad substantiam, Angelis latuisse antequàm perageretur, peractum verò ad illorum notitiam non nisi per homines pervenisse. Vix alter sensus tribui potest Anastasio Sinaitæ lib. 1 anagogicarum Contemplationum in hexameron.

3^o S. Maximus martyr in scholiis ad cap. 4. lib. de cœlesti hierarchiâ, S. Dionysio Areopag. antiquitus attributi, expressè ait « non omnes Angelos certiores fuisse de mysterio Incarnationis. » Et rationem affert quia, « quando Dominus post passionem assumebatur, quidam Angeli petebant: Quis est rex gloriæ? Interrogatio enim, inquit, ignorantem innuit. »

4^o Juxta alios, beati Angeli futurum Incarnationis mysterium quantum ad substantiam, ita cognoverunt, ut, quando peractum est, et ab Apostolis prædicatum, ex ipso eventu rerum quæ in Ecclesiâ contingebant multò plenius ipsis innotuerit. Hæc est theologorum communis sententia post divum Thomam multis in locis (1) qui et ipse 2-2, q. 2, a 7 ad 1, textum S. Augustini, lib. 5 de Genesi ad litt. c. 19, eodem sensu interpretatur. Nec aliter intelligendi (2) S. Gregorius Nyss. homiliâ octavâ in Canticum canticorum, S. Chrysost. (3) homiliâ 1 in Joannem, n. 2, et homil 7 in cap. 3 Epist. ad Ephes., n. 1. S. (4) Hieronymus commentario ad idem caput illius Epistolæ (5), Theodoretus ad eundem locum (6),

(1) 1 p., q. 57, a. 7, ad 1, et q. 64, a. 1, ad 4, et 2-2, q. 2, a. 7 ad 1, In 2 sent. d. 11, a. 4, Lect 3, in cap. 3, Epist. ad Eph. et alibi.

(2) Tomo 1, paginâ 597, edit. Morelli Parisiis, 1638.

(3) Tomo 8, paginâ 3, et tomo 11, paginâ 46 et 47.

(4) T. 4, col. 352, Martianæi.

(5) T. 3, p. 304.

(6) Edit. Londin. 1639, p. 326.

Theophylactus (1), OEcumenius ibidem, S. Anselmus commentariis ad hanc Epistolam; de quibus legi possunt Suarez ubi supra, et Petavius jam laudato capite 8, lib. 1, de Angelis.

5° In definiendis circumstantiis particularibus, effectisque et fructibus hujus mysterii, quæ beatis Angelis subinde manifesta sunt, neque etiam omnes eodem modo loquuntur. S. Gregorius Nyssenus homiliâ laudatâ multa enumerat, quorum modum et rationem fuisse post Incarnationem peractam, Angelis patefacta pronuntiat. SS. Chrysost. et Hieron. necnon Theophylactus et OEcumenius, quibus Petavius cum aliis assentitur, conversionem Gentilium ad Christi fidem inter illa secreta Angelis ipso resecta eventu præcipuè connotant. Juxta S. Justinum in dialogo cum Tryphone, n. 36, Angeli Christum esse regem gloriæ, ipsumque pro hominibus redimendis pati et resurgere debuisse non prius agnoverunt, quam ascenderet in cœlos. Idem de plerisque saltem supernis Spiritibus docent S. Ambrosius pluribus in locis, præsertim lib. 4 de Fide, cap. 1, num. 5, 10, 13, 14, S. Hieronymus ad cap. 63 Isaïæ. Sæpius theologi de ejusmodi conditionibus ac specialibus circumstantiis generatim duntaxat loquuntur, nec quidquam particulariter determinant.

Quod ad dæmones attinet, duæ sunt theologorum sententiæ. Nam alii Angelis in viâ, ac proinde Angelis malis antequàm peccarent, substantiæ mysterii Incarnationis cognitionem tribuunt, alii adimunt. Priores existimant, quod consequens est, futuram Incarnationem Angelis malis post lapsum non fuisse penitus reconditam, licet ex ignorantia omnium illius mysterii circumstantiarum, Christum inter homines conversantem esse Deum certò cognoscere non potuerint. Vide Sylvium ubi suprâ, Suarem lib. 7 de Angelis cap. 13, et disput. 42 de Incarnatione, sect. 1. Qui autem Angelos in viâ prorsus insecios Incarnationis fuisse sentiunt, il seu futuram, seu peractam Incarnationem Angelis malis ante Christi mortem, Deo ita providente, non fuisse certò compertam arbitrantur. Quid de diversis illis quæstionibus ac sentiis verius ac probabilius appareat sequentes aperient conclusiones.

Conclusio I. Mysterium Incarnationis Angelis in viâ, quantum ad substantiam, revelatum sine fundamento diceretur. Illud enim sine

fundamento dicitur, quod, cum naturæ vim excedat, atque ex solo Dei beneplacito pendeat, nullo gravi momento ex Scripturis aut ex traditione deducto, sed conjecturis tantum et meris convenientiis probatur. Enim verò dogma stabilitum convenientiis illustretur; id licitum, et sæpè utile, sed solis ejusmodi convenientiis plerumque ex utrâque parte facilimè adinveniendis, profectò de divinis arcanis non agendum. Neque *vaticinari de re tantâ*, inquit graviter Petavius, lib. 3 de Angelis, cap. 2, n. 10, *fas esse arbitror*. Eò referri potest illud, adversus Origenem additis de rebus plus æquo disserentem, Antipatri Bostrensis dictum apud Damascenum in Eclogis, litt. a, tit. 75: « Quisnam, inquiebat, Moyses, aut Paulus, aut quivis alter Prophetarum, aut Apostolorum sic accuratè ea omnia, quæ ante mundum fuerunt, et supra cœlos sunt, cum omni certitudine disputare vel docere queat? »

Atqui cognitio Incarnationis 1° naturæ Angelorum in viâ vim et facultatem excidit nemine diffitente. 2° Pariter à solo Dei beneplacito illius cognitionis largitio tota pendeat. 3° Nullo gravi momento ex Scripturis et traditione deducto, cognitio ejusmodi Angelis in viâ probatur concessa, ut testatur Petavius loco cit., et expressè fatetur ipse Suarez, lib. 5 de Angelis cap. 6, ubi conjecturis solum indulget, ac in iis librandis totus versatur. Ergo sine fundamento, etc. Et verò, ut conjecturam conjecturis opponamus, cum Angeli non essent felicitatem æternam ex Christi meritis consecuturi, quid necesse fuit, ut, iis in viâ versantibus, mysterium Incarnationis in Christo adimplendum revelaretur?

Dices cum Sylvio: S. Augustinus, lib. 3. de Genesi ad litt. cap. 19, de Angelis, secundum quod primitus conditi sunt, scribens, ait mysterium regni cœlorum eos non latuisse, et deinde addit illud à sæculis innotuisse principatibus et potestatibus in cœlestibus; ergo, etc.

Nego consequ. De Angelis beatis sanctus doctor ibi manifestè loquitur, ac proinde textus objectus de bonis Angelis post assecutam beatitudinem consideratis intelligendus est. Quapropter Suarez, lib. 5. de Angelis, cap. 6, num. 10, in suæ causæ patrocinium non censet S. Augustinum afferri posse.

Conclusio II. Angeli beati mysterium Incarnationis non peractum modò, sed et peragendum cognoverunt; et peragendum quidem, ab

(1) Edit. Paris., 1631, t. 2, p. 27.

tia Dei in illius mysterii dispensatione ex iis quæ in Ecclesiâ eveniunt, usque ad mundi finem, magis ac magis in dies manifestabitur.

Dices 1°. Christo in cœlos ascendente, Angeli percunctati sunt quisnam ille esset, Psal. 23, v. 8 et 10. *Quis est, inquit, iste Rex gloriæ?* et Isaïæ 63, v. 1: *Quis est iste qui venit de Edom tinctis vestibus de Bosrâ?* Atqui ejusmodi interrogationes ignorationem innuunt; ergo vel omnes Angeli, vel saltem eorum magna pars, quis ille esset, tunc ignorabant.

Nego minorem. Figuratè accipiendæ sunt illæ interrogationes; iis sacra Scriptura accommodatè ad captum nostrum, quanta celestium mentium admiratio fuerit, nobis declarat.

Dices 2°. Matthæi 1, v. 21, Angelus Domini, qui S. Josepho apparuit, hæc dixit de Christo: *Salvum faciet populum suum à peccatis eorum*; ergo tunc nondùm noverat, etiam *in generali*, ille Angelus aliis populis Incarnationem profuturam.

Nego consequentiam. Dùm enim Angelus de populo Christi, seu de populo Judaico sermonem habet, ne unam adhibet vocem quâ alios populos excludat.

CONCLUSIO III. Mysterium Incarnationis nec futurum nec peractum, ante Christi mortem, certò dæmonibus innotuit. Probatur prima pars de mysterio futuro, quia neque iis innotuit antequàm peccarent, ut sequitur ex dictis conclusione primâ; neque etiam postquàm peccaverunt, cùm de eo sileant Scripturæ et traditio.

Probatur secunda pars, de mysterio peracto. Nam qui futuram Incarnationem, et Christi in terris conversantis Divinitatem certò non cognoverunt, iis procul dubio mysterium Incarnationis peractum certò non innotuit; atqui 1° dæmones futuram Incarnationem certò non cognoverunt; ex primâ istius conclusionis parte. 2° Christi in terris conversantis Divinitatem certò compertam non habuerunt, quod astruitur ex S. Paulo, 1 ad Cor. 2, v. 7 et 8: *Loquimur Dei sapientiam in mysterio..... quam nemo principum hujus seculi cognovit, si enim cognovissent nunquàm Dominum gloriæ crucifixissent.* Principes hujus seculi S. Thomas post plures sanctos doctores interpretatur malos Angelos. Deinde ex communi sententiâ SS. Patrum, qui unanimiter tradunt illud fuisse Dei cōsiliū, ut mysterium Incarnationis in Christo adimpletum dæmoni absconderetur. S. Ignatius in epistolâ ad Ephesios, n. 19, et ex ipso

Origenes homiliâ 6 in Lucam, S. Hieronymus, lib. 1. in Matth. cap. 1, et alii partum Christi ex virgine docent fuisse dæmoni celatum, *ut scilicet*, inquit S. Leo iis consentiens, sermone 2 de Nativitate Domini, cap. 3, *humano generi natam salutem diabolus ignoraret.* Sentiant SS. Ambrosius in caput 9 Lucæ, v. 22, et Cyrillus Alexandrinus lib. 9 in Joan. Christi discipulos ab eo jussos tacere, ne à principe seculi dignosceretur. S. Augustinus lib. 9 de Civitate Dei, cap. 21, ait *dubitasse de illo* (Christo) *dæmonum principem.* Secundùm S. Gregorium Papam lib. 2 moral. cap. 41, dæmon etiam dùm diceret, *Scimus quòd sis sanctus Dei*, Christum existimavit purum hominem: *Dùm passibilem considerat*, inquit, *purum hominem putat.*

Dictum est in conclusione *antè Christi mortem*, quia nemini dubium esse potest multa de Incarnatione post mortem Christi certò dæmonibus explorata fuisse. Quidquid autem de illo mysterio quocumque tempore cognoverunt, « innotuit eis, non sicut Angelis sanctis, « qui Verbi participatâ æternitate perfruuntur, « sed sicut eis terrendis innotescendum fuit... « per quædam temporalia suæ virtutis effecta « et.... signa. » Verba sunt sancti Augustini lib. 9 de Civ. Dei, cap. 21 de conjecturali, dùm Christus in terris versaretur, dæmonum circa Incarnationem scientiâ disserentis; quæ ad certiore illius mysterii ab eis subinde acquisitam notitiam debent etiam applicari.

Dices 1°. Marci 1, v. 24, dæmon ait, *Scimus qui sis sanctus Dei*; et v. 34, Christus dicitur non sivisse dæmonia loqui, *quia sciebant eum*; ergo, etc. Nego consequentiam. Hæc intelligenda sunt de scientiâ imperfectâ et conjecturali; Christum esse virum sanctum specialiter à Deo missum dæmones non ignorârunt, ne esset Dei Filius maximè veriti sunt, ejusque Divinitatem sunt aliquando suspicati, sed ea nunquàm fuit illis certò comperta.

Dices 2°. Quomodò fieri potuit ut mysterium à Prophetis prænuntiatum, à Christo ipso prædicatum, et miraculis confirmatum, dæmonum perspicaciam fugerit. Respondeo id esse factum Deo ita providente, et propter sibi prospectos fines, ne illi suâ perspicaciâ uterentur impediende. « Tantùm ait S. Augustinus ibidem eis innotuit (illud mysterium) « quantùm voluit; tantùm autem voluit, quantum oportuit. » Divinæ hujus dispositionis rationem hanc reddit S. Leo serm. 70, qui est 41 de passione, cap. 5, quòd « si crudelis et

« superbus inimicus consilium misericordiæ
 « Dei nōsse potuisset, Judæorum animos man-
 « suetudine potius temperare, quā in iustis
 « odiis studuisset accendere; ne omnium ca-
 « ptivorum amitteret servitutem, dūm nihil
 « sibi debentis persequitur libertatem. »

Dices 3°. Dæmon videndo Christi humanita-
 tem sine propriā subsistentiā inferre potuit
 eam divinā subsistentiā sustentari; ergo, etc.
 Nego quod gratis supponitur, nempe dæmo-
 nem cognovisse Christi humanitati deesse
 subsistentiam propriam. Eatenus cognoscitur
 naturæ singulari subsistentiam propriam de-
 esse, quatenus ejus unio cum altero habetur
 perspecta; atqui, etc.; ergo, etc.

ARTICULUS II.

*Utrum Adamo, Patriarchis, Prophetis et Judæis
 mysterium Incarnationis fuerit cognitum.*

CONCLUSIO I. Futurum Incarnationis myste-
 rium Adamo ante et post ejus lapsum innotuit.

Probatur prima pars de quā vulgò theologi
 consentiunt, nempe Adamo ante lapsum In-
 carnationem futuram innotuisse, 1° ex Scri-
 pturis. Geneseos 2, v. 23, Adamus post illum
 soporem extaticum, in quo ex ejus costā Deus
 Evam formavit, in hæc verba erumpit: *Hoc
 nunc os ex ossibus meis, et caro de carne meâ...
 relinquet homo patrem suum et matrem, et adhæ-
 rebit uxori suæ, et erunt duo in carne unâ.* His
 autem Incarnationis mysterium fuisse adum-
 bratum, ac præfiguratum ex S. Paulo colligi-
 tur, qui Ephes. 5, v. 32, relatis ejusmodi ver-
 bis continenter addit: *Sacramentum hoc
 magnum est, ego autem dico in Christo et in Ec-
 clesiâ.* Ex quibus sic conficitur argumentum:
 Qui prophetice loquens illa protulit quibus
 Incarnatio præfigurabatur et prænuntiabatur,
 ille novit mysterium Incarnationis; si quidem,
 ut dictum est articulo præcedenti, veri Pro-
 phetæ, quæ vaticinantur, intelligunt. Atqui
 prophetice hæc verba Adamus protulit, quod
 adeo verum est, ut Christus Matth. 19, v. 4, 5
 et 6. Deo illa tribuat. Deinde ejusmodi verbis,
 Apostolo auctore loco laudato. Incarnatio
 præsignatur; ergo, etc. 2° ex SS. Patribus
 qui allatum Apostoli textum Ephes. 5, eodem
 modo explicant. Ita Tertullianus, lib. 5 contra
 Marcionem, cap. 18; auctor commentarii in
 hanc epist. inter opera S. Ambr. ad hunc lo-
 cum; S. Chrysost., homil. 20 in eandem
 epist., num. 4; S. August. serm. 341, al. 4 de
 temp. cap. 10, n. 12, et tract. 9 in Joan. n. 10;
 S. Leo epist. 46, al. 23, c. 4; S. Anselmus ad

eundem locum; S. Bernardus serm. 6. in vi-
 giliâ natalis Domini, n. 3; S. Thomas 2-2, q. 2,
 a. 7 in corp. His adde 3°. Adamum propter
 verba à se post extasim prolata, Prophetam et
 vatem Christi à multis Patribus appellari,
 nempe à Tertulliano, lib. de Animâ, cap. 11
 et 21, et lib. 3 contra Marcionem, cap. 5; à
 S. Chrys. in Genesim homil. 15, n. 3; à
 S. Epiphano, hæresi 48; à S. Augustino, lib. 9
 de Genesi ad litt. cap. 19; à S. Hier. in cap. 5
 epistolæ ad Ephes. Unum S. Augustini testi-
 monium referemus: « Illa extasis, inquit loco
 « proximè citato, quam Deus immisit in
 « Adam.... rectè intelligitur ad hoc immissa,
 « ut et ipsius mens.... intelligeret in novis-
 « sima. Denique evigilans tanquā Prophetiæ
 « plenus.... eructavit continuò, quod magnum
 « Sacramentum commendat Apostolus... quæ
 « verba (*Hoc nunc os ex ossibus meis*, etc.) cum
 « primi hominis fuisse Scriptura ipsa testetur,
 « Dominus tūm in Evangelio (Matth. 19).
 « Deum dixisse declaravit.... ut hinc intelli-
 « geremus propter extasim quæ præcesserat
 « in Adam, hoc eum divinitus tanquā pro-
 « phetam dicere potuisse. »

Probatur secunda pars de tempore post la-
 psum, quæ adhuc certior, his Dei ad serpen-
 tem verbis Geneseos 3, v. 15: *Inimicitias po-
 nam inter te et mulierem et semen tuum, et
 semen illius, ipsa conteret caput tuum*, seu, ut le-
 gitur in Hebræis, in codice Samaritano, et
 apud SS. Irenæum, Cyprianum et Hieronymum,
ipse conteret, intelligendo Christum qui
 futurus erat secundum carnem Evæ filius.
 Jam verò illis verbis Deum Adamo et Evæ li-
 beratorem promisisse tradunt SS. Patres,
 proindeque post lapsum suum Adamus illud
 mysterium clariùs intellexit.

Objicies. Adamus juxta S. Augustini doctri-
 nam lib. 11 de Genesi ad litt. cap. 18, non fuit
 suæ culpæ præsciùs; atqui si novisset myste-
 rium Incarnationis fuisset, culpæ suæ præsciùs,
 si quidem humani generis reparandi causā
 illud adimpletum est. Nego minorem. « Nihil
 « prohibet, inquit S. Thomas parte 3, q. 1, a.
 « 3 ad 5, alicui revelari effectum, cui non re-
 « velatur causa. Potuit igitur primo homini
 « revelari Incarnationis mysterium sine hoc
 « quòd esset præsciùs sui casus. » Ex his col-
 liges dicendum cum S. Thomâ 2-2, q. 2, a. 7,
 quòd « ante statum peccati homo habuit expli-
 « citam fidem de Christi Incarnatione secun-
 « dūm quòd ordinabatur ad consummationem
 « gloriæ, non secundum quòd ordinabatur ad

« liberationem à peccato per passionem et resurrectionem, quia homo non fuit præsciens peccati futuri. »

CONCLUSIO II. Mysterium Incarnationis non latuit Patriarchas ac Prophetas.

Probatur prima pars, quæ Patriarchas spectat, 1° quia non semel Christus ipsis disertè à Deo promissus est. *Benedicentur*, inquit Deus, Abraham alloquens, Genes. 22, v. 18, et 26, v. 4, *in semine tuo omnes gentes*. Quod de Christo explicat S. Paulus ad Galatas 3, v. 16; unde nihil mirum quòd vir sanctus Job qui ex Esau posteris vulgò creditur, Redemptionis à se expectari divinitatem tam apertè prædicet, cap. 19, v. 11. 2° Jacob Christi tempora, familiam, dignitatem clarissimè vaticinatur Geneseos 49, v. 10, his verbis : *Non auferetur sceptrum de Judà et dux de femore ejus, donec veniat qui mittendus est, et ipse erit expectatio gentium*; v. 18 : *salutare tuum*, inquit, *expectabo, Domine*.

Probatur secunda pars, quæ ad Prophetas attinet, ex insignibus vaticiniis de Christo ab ipsis sæpissimè editis, in quibus ejus etiam Divinitas non semel (ut Isaïæ 7, v. 14, item 9, v. 6, etc.) manifestissimè exprimitur; quocirca Christus et Apostoli incredulitatis Judæorum revincendæ causâ ad scripta Prophetarum sæpè provocant. *Scrutamini Scripturas*, inquebat Christus Joannis 5, v. 39..... *illæ sunt, quæ testimonium perhibent de me*. Ibidem 46 : *Si crederetis Moysi, crederetis forsitan et mihi*. Adde Luc. 24, v. 27; Act. 2, v. 30 et seq. 3, v. 18, et seq. 19, v. 43, etc.

CONCLUSIO III. Legis peritiores apud Judæos mysterium Incarnationis non ignorârunt, de Judæorum vulgo aliter statuendum.

Probatur prima pars, nempe legis peritiores illud mysterium non ignorâsse. Iis enim ignotum non fuit mysterium, quod Patriarchis revelatum traditione conservari debuit, quod diversis successivè temporibus à Prophetis prænuntiatur, quod sacrificiis et cæremoniis legis fuit significatum; atqui mysterium Incarnationis fuerat Patriarchis revelatum, et à Prophetis prædictum, ut mox dictum est, prætereà sacrificiis et cæremoniis legis significabatur; undè Apostolus Rom. 10, v. 4, ait finem legis Christum, et Galat. 3, v. 24, tradit homines à lege, ut à pædagogo, ad Christum conductos; ergo, etc.

Probatur secunda pars, nempe tantum mysterium Judæorum vulgo non fuisse similiter cognitum. Enimverò Judæorum nationi compertum fuisse illud mysterium ideò præsertim

aliqui cum Estio sentiunt, quia ipsis videtur fidem Incarnationis explicitam ante Christum necessariam fuisse ad salutem; atqui licet ex Scripturis et ex Patribus constet sine aliquâ in Mediatorem fide salutem nunquàm potuisse obtineri; attamen non videtur fidem de Deo Incarnato et Redemptore *explicitam* ante Christi adventum de necessitate medii fuisse, vel etiam vulgus ad eam habendam præcepto divino fuisse obligatum. Imò implicitam ejusmodi articuli fidem plerisque tunc temporis suffecisse constanter docent theologi post divum Thomam 2 2, q. 2, articulis 7 et 8, in corpore. Et verò S. Augustinus, epistola 157, aliàs 89, cap. 3, n. 14, ait fidem tempore novi Testamenti revelatam, antea velatam fuisse, et epist. 177, aliàs 95, num. 12, eandem in occulto fuisse pronuntiat. Verùm de hoc argumento in tractatu de fide disserunt theologi, consuli potest Sylvius ad laudatos SS. Thomæ articulos. Porro, cum à mundi exordio, ut diximus, revelata fuerit Incarnatio futura, atque ante legem sacrificia Christum significantia oblata fuerint, sequitur de veri Dei cultoribus, priusquàm daretur lex, idem esse tenendum, quod de Judæis docuimus; aliis, nimirum, ut aiunt, *majoribus* intonuisse futuram Incarnationem, aliis ejus fidem implicitam solummodò concessam; illi tamen, inquit S. Thomas ibid. art. 7, « quæ ad mysteria Christi pertinent, tantò difficilius cognoverunt, quantò à Christo fuerunt remotiores. »

ARTICULUS III.

Utrum Incarnationem futuram gentiles perspectam habuerint.

Nec de ætate ante diluvium effluxâ, quâ nulum falsi numinis cultorem Scriptura commemorat, nec de tempore illud proximè subsecuto hic agitur. In quæstionem veniunt gentiles, cujusmodi extitère post Hebræi populi electionem. Quæritur utrum ab ejusmodi electione gentibus aliis, aut saltem quibusdam hominibus apud ipsas mysterium Incarnationis notum fuerit?

CONCLUSIO I. Ab electione populi Judaici, nulla alia gens dici potest Incarnationis mysterium cognovisse.

Probatur maximè, quia ex quo selectus est populus Hebræus, nulla alia natio, saltem per aliquod tempus insigne, Deum verà religionem coluit. Ita constat 1° ex Scripturis, quæ verum Dei cultum, ut specialem populi selecti characterem, alias verò nationes ut derelictas

et in tenebris ambulantes exhibent. Exodi 17, v. 5 : *Eritis mihi in peculium de cunctis populis.* Deuteron. cap. 13 : *Si tibi voluerit persuadere frater tuus clam dicens : Eamus et serviamus diis alienis cunctarum in circuitu gentium, quæ juxta vel procul sunt; ab initio usque ad finem terræ; non acquiescas ei.* Isaïæ 9, v. 2 . *Populus qui ambulat in tenebris vidit lucem magnam;* et 54, v. 1 : *Multi filii desertæ, magis quàm ejus quæ habet virum.* Amos 3, v. 2 : *Tantummodò vos cognovi ex omnibus cognationibus terræ.* Psalmo 75, v. 1 : *Notus in Judeâ Deus.* Psal. 95, v. 5 : *Omnes dii gentium dæmonia.* Actuum 14, v. 15 : *In præteritis generationibus dimisit (Deus) omnes gentes ingredi vias suas.*

2° Ex omnium Patrum traditione, qui illud sæpè docent, ac semper in suis scriptis supponunt. In re obviâ necesse non est multa testimonia congeri. Consuli possunt S. Justinus, Apologiâ 1 ad Antoninum pium *olim* 2; Lactantius, lib. 4. Institutionum cap. 2; Eusebius, lib. 1 præparationis evangelicæ, cap. 5 et 6; S. Chrys. in psal. 95; S. Augustinus, lib. 16 de Civit. Dei, cap. 10 et 12, et lib. 18, cap. 47; S. Cyrillus lib. 3, in Julianum; auctor lib. de vocat. Gentium, lib. 1, cap. 13, et alii.

Dices. Refert Eusebius, lib. 6 de præparatione evangelicâ fuisse suâ ætate apud Indos multa milia hominum qui simulacra non colebant, soli Deo attendentes; ergo, etc. Respondeo 1°. Bracmanes de quibus illo in loco loquitur Eusebius, non constituisse unam gentem, sed plurium gentium fuisse philosophos. 2° Ab illis colebantur astra, sol præsertim, luna, aut quid aliud sensibile; hæc autem colebant immediatè, et sine simulacris, quippe qui artem pingendi et sculpendi non noverant; atque eo sensu intelligendus Eusebius.

CONCLUSIO II. Nonnullis apud gentes futurum Incarnationis mysterium notum fuit.

Probatur 1° triplici exemplo quod nobis Scripturæ suppeditant. Primum est Melchisedech, qui temporibus Abrahæ rex simul et sacerdos Dei summi in urbe Salem, legitur, Geneseos 14, sacrificium obtulisse quod fuit typus sacrificii incruenti à Christo in ultimâ cœnâ oblatis. Alterum est Job ex Idumæis orti, qui cap. 19, v. 25, futuræ Incarnationis fidem magnificè profitetur. *Scio, inquit, quòd redemptor meus vivit, et in novissimo die de terrâ surrecturus sum, et rursùm circumdabor pelle meâ, et in carne meâ videbo Deum meum, quem visurus sum ego ipse, et oculi mei conspecturi sunt, et non alius.* Tertium est Balaam, Num. 24, v. 17, Chri-

stum prædicentis his verbis : *Orietur tella ex Jacob.*

Probatur 2° ex S. Augustino, lib. 18 de civitate Dei, cap. 47 : « Non incongruè creditur, » inquit, S. doctor, fuisse et in aliis gentibus « homines, quibus hoc mysterium revelatum « est, et qui hoc etiam prædicere impulsus « sunt. » Lege caput integrum.

Probatur 3° autoritate Richardi Victorini, S. Thomæ et theologorum. Richardus Victorinus, lib. de Incarnatione Verbi cap. 8, ad hæc verba Aggæi, *Veniet desideratus cunctis gentibus*, sic loquitur : « Non dicit desiderandus, sed desideratus, ut intelligas in omni gente aliquos « aliquandò ejus desiderio flagrâsse; erat igitur « adventus ejus à multis gentilium præcognitus, et ardentè desideratus. » S. Thomas, cui concinunt omnes scholæ theologi, 2-2, q. 2, a. 7 ad 3 : « Dicendum, inquit, quòd multis « gentilium facta fuit revelatio de Christo. » Addit ibidem S. doctor, quòd, « si qui salvati « fuerunt, quibus revelatio (nempe illa expressa de Christo) non fuit facta, non fuerunt « salvati absque fide Mediatoris; quia etsi non « habuerunt fidem explicitam, habuerunt tamen fidem implicitam in divinâ providentiâ, « credentes Deum esse liberatorem hominum « secundùm modos sibi placitos, et secundùm « quòd aliquibus veritatem cognoscentibus spiritus revelâset. »

Quæ isto articulo hactenùs et præcedenti dicta sunt, confirmantur ex doctrinâ indubitatâ, quam de fide in Christum omni ævo necessariâ inculcant episcopi Ecclesiæ Gallicanæ in explicationibus anni 1720, ubi sic loquuntur : « Hæc tanquàm fundamentum totius doctrinæ christianæ habenda est veritas, sci- « licet ab Adami lapsu, nos non posse justificari, « neque adipisci salutem nisi fide in redemptorem Christum; unus, ut Apostolus loquitur, « 1 ad Timot., 11, 5, *Mediator Dei et hominum « homo Christus Jesus. Et non est*, ait S. Petrus, « Act. 4, 12, *in alio aliquo salus. Nec enim aliud « nomen est sub cælo datum hominibus, in quo « oporteat nos salvos fieri.* Illa maximi momenti « veritas totâ serie Scripturarum designata, « ad omnia tempora ante legem, et vigente « lege elapsa respicit et attinet. » Nullum enim, ait S. Augustinus, epist. 102, quæstione 2, n. 12, doctrina christiana nobis relinquit locum dubitandi, sine fide in mediatorem, veteres justificari et à peccatis liberari non potuisse. « Omnes sancti, inquit S. Leo sermone 29 in Nativitate Domini, cap. 70, qui

« Salvatoris nostri tempora præcesserunt, per
 « hanc fidem justificati et per hoc sacramen-
 « tum Christi sunt corpus effecti, expectantes
 « universalem credentium redemptionem in
 « semine Abrahæ. Ita loquitur et docet uni-
 « versa traditio... Itaque fides in mediatorem
 « modò minùs distincta et clara, modò clarior
 « et distinctior esse potuit pro ratione variâ
 « personarum et temporum; verum illa fides
 « fundata in revelatione divinâ, non verò in
 « cognitione naturali providentiæ, semper fuit
 « necessaria ad salutem; atque id ipsum est
 « fundamentum quo nixi sancti Patres docue-
 « runt religionem semper eandem fuisse. »
 Nec quia temporum varietate, ait S. Augusti-
 nus ibidem, nunc factum annuntiatur, quod
 tum futurum prænuntiabatur, ideò fides ipsa
 variata, vel salus ipsa diversa est... proinde
 aliis tunc nominibus et signis, aliis autem nunc;
 et priùs à paucioribus, postea à pluribus, una
 tamen eademque Religio vera significatur et
 observatur. Semper ipsa constitit, « semper
 « pura, tum ratione cultûs, tum ratione do-
 « ctrinæ, semper ipsâ instituti sunt atque for-
 « mati veri adoratores Dei veri. » Sicut enim
 nos in eum (Filius Dei) credimus... et qui
 carne jam venerit; sic et credebant in eum
 antiqui et in carne venturum. « Atque hæc
 « fuit ratio cur aliqui è sanctis Patribus justos,
 « qui ante et post Moysen vixerunt, in ante-
 « cessum appellaverint Christianos. » Vide
 insuper quæ de hoc argumento adversus Ber-
 ruyerum constituta sunt in determinatione sa-
 cræ Facultatis Parisiensis parte I, sectione II,
 ad propositiones XXVII et XL, necnon sectione
 V, ad propositionem LXXVII.

Dissertatio ii.

DE EXISTENTIA MYSTERII INCARNATIONIS ADVERSUS
 JUDEOS ABSTRUENDA.

Incarnationis existentiam triplex hostium
 genus impugnât. 1° Judæi, qui plerorumque
 veteris Instrumenti librorum divinitatem agno-
 scentes, atque olim patribus suis à Deo pro-
 missum fuisse liberatorem quem hebraicè vo-
 cant, משיח, *Messiam*, profitentes, obfirmatis
 mentibus illum contemnunt, nondum adve-
 nisse. 2° Gentiles, quibus adjungi possunt,
 quotquot Scripturarum inspirationem reji-
 ciunt. 3° Complures hæretici.

Dissertatione istâ in Judæos agimus, sequen-

tibus aliis duabus contra gentiles primùm,
 deindè contra hæreticos dicturi.

Totius autem controversiæ cardo adversus
 Judæos in his duobus vertitur : 1° An *Messias*
 venerit ; 2° utrùm is sit *Jesus Christus* religio-
 nis christianæ auctor. Si enim Judæi eò addu-
 cerentur, ut *Jesum* tanquàm *Messiam* colerent,
 jam non possent ejus religionem non amplecti,
 nec dogma Incarnationis respuere, quod *Chri-*
stus ipse docuit, dùm se Dei Filium prædicavit.
 Jam verò, quæ illa duo spectant tribus pos-
 sunt capitibus absolvi ; in 1°, ex Prophetis de-
 monstrabitur *Messiam* jam venisse ; in 2°, ex
 iisdem oraculis evincetur *Messiam* esse *Chri-*
stum ; in 3° utrumque simul ex characteribus
Messiae et variis aliis monumentis suadebitur.

CAPUT PRIMUM.


*Messiam jamdudum advenisse contra Judæos ex
 Prophetarum oraculis demonstratur.*

Tempora adventûs *Messiae* olim Patriarchis
 promissi jamdudum esse præterita astruitur,
 1° ex insigni vaticinio Jacobi ; Geneseos 49 ;
 2° ex prophetiâ Danielis, c. 9 ; 3° Ex prophe-
 tiis Aggæi et Malachiæ ; 4° ex pluribus aliis sa-
 crorum vatum oraculis. Quatuor articulis de
 his omnibus disserendum.

ARTICULUS PRIMUS.

De vaticinio Jacobi.

Jacob morti proximus singulis filiis futura
 prænuntians, sic allocutus est Judam capite
 Genes. mox citato, v. 8 et seq. : *Juda, te lauda-*
bunt fratres tui ; manus tua in cervicibus inimico-
rum tuorum, adorabunt te filii patris tui. Catulus
leonis Juda ; ad prædam, fili mi, ascendisti ; re-
quiescens accubuisti ut leo, et quasi læna, quis su-
scitabit eum ? NON AUFERETUR SCEPTUM DE JUDA,
 ET DUX DE FEMORE EJUS, DONEC VENIAT QUI MIT-
 TENDUS EST, ET IPSE ERIT EXPLICATIO GENTIUM.
Ligans ad vineam pullum suum, et ad vitem, ô fili
mi, asinam suam, lavabit in vino stolam suam,
ut in sanguine uxæ pallium suum, pulchriores oculi
ejus vino, et dentes ejus lacte candidiores. Prima
 pars illius prophetiæ : *Juda, te laudabunt fra-*
tres tui, etc., juxta sensum litteralem intelli-
 genda est de numero, fortitudine, et præemi-
 nentiâ, ac victoriis tribus Judæ. Ultima pars :
ligans ad vineam, etc., de ubertate illius re-
 gionis quam in terrâ promissionis eadem tri-
 bus occupatura erat. Utramque autem et præ-
 sertim postremam de Christo *Messia*, ejusque
 mysteriis mysticè ac præcipuè intelligendam
 esse colligitur ex aliis quibusdam Scripturæ lo-



cis, et ex sanctis Patribus, quibus et de eo paraphrastæ consentiunt. Verùm de parte mediâ, quam majusculis litteris exscripsimus, et quæ soli Messiae manifestè competit, præsertim hic agimus, ac 1º, expenditur an juxta hanc Prophetiam Messias jamdudum venire debuerit; 2º nonnulla de illius oraculi exitu inter theologos controversa discutiuntur. Sit itaque.

§ 1. — *Utrum ex vaticinio Jacobi adversus Judæos astruatur jamdudum adventasse Messiam.*

Hebræum Prophetiæ textum, de quo sæpè vitiligant Judæi, et præcipuas ejus versiones statim oculis subjicio.

Hebræa sic habent : *Lo iasour schebet mihoudah, oumekokek mibben raglau, ad ki iabo schiloh, velo ikkeath amim.* Quæ ad verbum translata significant : *Non recedet virga, vel sceptrum, ex Judâ et legislator de inter pedes ejus, usquequò veniat Schiloh, id est, juxta diversas illius vocis radices et acceptiones mox exponendas, qui mittendus est, vel pacificus, vel, filius ejus, etc., et ei erit obedientia, sive congregatio populorum.* Textus hebræo samaritanus ad litteram redditus sic habet : *Non auferetur virga vel sceptrum, de Judâ, et dux de vexillis ejus, mibben daglau, donec veniat pacificus, et ad ipsum congregabuntur populi.* Samaritana versio omninò consonat. 70 Interpretes, quibus hic Theodotionem concordare refert Eusebius demonstrat. Evang. lib. 8 : *Non deficient princeps ἀρχων ex Judâ et dux ἡγούμενος de femoribus ejus, donec veniant quæ reposita, vel reservata sunt ei τὰ ἀποκείμενα αὐτῷ* (in aliis codicibus reperitur, *donec veniat cui repositum est ὃ ἀπόκειται, quam veram esse* 70 Seniorum lectionem, non autem τὰ ἀποκείμενα expressè asserit sanctus Justinus in dialogo cum Thryphone Judæo), *et ipse erit expectatio gentium.* Aquila : *non exurget sceptrum σκήπτρον à Judâ et legislator, vel peritus doctor legis ἀκριβὴς ὁμνος de inter pedes ejus, donec veniat cui repositum est, ὃ ἀπόκειται, et ipsi erit cætus populorum.* Symmachus : *Non auferetur potestas ἐξουσία à Judâ.* Cætera non supersunt, sed ipsum aliis consensisse ex mox citato Eusebio videtur colligendum. Versio Syriaca : *Non deficient sceptrum, vel virga de Judâ, et expositor de inter pedes ejus, donec veniat is cui illud est, et ipsum expectabunt gentes.*

Versio arabica : *Non præterebit virga de Judâ, et legislator de sub imperio ejus, donec veniat is ejus ipse est, et ad quam congregabantur populi.*

Versio persica : *Non recedet imperium à Judâ, et scribe è medio filiorum ejus, donec veniat Christus ejus, et ei congregabuntur gentes.* Targum seu Paraphrasis chaldaica Onkelos : *Non auferetur habens principatum à domo Judæ neque scribe à filiis filiorum ejus USQUE IN SECLUM, DONEC VENIAT MESSIAS, ad alma, ad deiete Meschihhah, cujus est regnum, et ei obedient populi.* Targum Jerosolymit. : *Non deficient reges de domo Judâ, neque periti doctores legis de filiis filiorum ejus, USQUE AD TEMPUS QUO VENIET REX MESSIAS, ad zeman deite Malcha Meschihhah, cujus est regnum, et ei subjicientur tandem omnia regna.* Targum Jonathanis : *Non cessabunt reges et præsidēs ex domo Judæ, et scribæ docentes legem ex semine ejus, USQUE AD TEMPUS QUO VENIET REX MESSIAS, ad zeman di iete malcha Meschihhah, minor filiorum ejus, et propter eum colliquescent populi.* Santes Pagninus, cujus versionem magni faciunt ipsi Judæi : *Non recedet virga ex Jehudah et legislator de pedibus ejus, donec veniat Siloh, et ei erit aggregatio populorum.*

Observandum hos omnes textus et versiones tum à vulgatâ latinâ, tum inter se quoad substantiam non differre, quod hâc inductione planè perspicui potest. 1º Quantum ad ista : *Lo iasour schebet, non auferetur sceptrum,* omnes illis textus consentiunt : Sceptrum enim, princeps, virga, potestas, reges, imperium, sunt totidem voces ad auctoritatem supremam, et principatum civilem designandum idoneæ. 2º In istis, *oumekokek mibben raglau, et dux de femore ejus,* nulla etiam rei substantiam spectans discrepantia. Hæ voces, *usquequò, seu, donec veniat,* eadem in omnibus textibus et versionibus occurrunt. 3º Neque in variis vocis *schiloh,* interpretationibus illum adest essentielle discrimen, si quidem ut modò probabimus, nulla est illius vocis acceptio, quæ Messiae apprimè non competat. 4º Deniquè illa verba *velo ikkeat amim, et ipse erit expectatio gentium,* quibus utuntur versiones 70 Interpretum, Vulgata et syriaca, eundem manifestè sensum exhibent, quem referunt ista textus samaritani et versionis arabicæ : *Ad ipsum congregabuntur populi;* aut ista textus hebræi et Targumistarum, *Ei obedierunt populi, seu, erit ei obedientia, vel aggregatio populorum;* quippè ex vaticinii serie manifestum est obedientiam voluntariam ac fructuosam, non verò coactam et gravem eò loci designari.

CONCLUSIO. Messiam jamdudum advenisse ex Jacobi vaticinio certò evincitur. Probatur isto argumento. Qui in vaticinio Jacobi prædicatur

venturus jamdudum venit; sed qui ibidem prædicitur venturus, est Messias; ergo Messias jamdudum venit. Utraque illius syllogismi præmissa sigillatim probanda est.

1° Qui in vaticinio Jacobi prædicitur venturus, jamdudum venit. — Nam jamdudum genti Judaicæ quælibet regiminis forma et auctoritas ejus insigne est virga seu sceptrum, quilibet principatus civilis, omnis jurisdictio seu jus vitæ et necis ablata sunt. Nemo enim nescit ab excidio Jerosolymitano, quod anno æræ vulgaris 70 contigit, Judæos non modo in terrâ promissionis quam directè Jacobi oraculum respicit, omni imperio destitutos, sed et per orbem esse dispersos, errabundos, nullius juris, nullius auctoritatis consortes, ubique durâ servitute oppressos. Summam hanc gentis suæ calamitatem celeberrimi Rabbini prænuntiatam agnoscunt his Oseæ verbis, c. 5, v. 4: « *Dies multos sedebunt filii Israel sine rege et sine principe, et sine sacrificio, et sine altari, et sine ephod, et sine teraphim.* » Hi ipsi sunt, inquit « Doctissimus et Christianis insensissimus Rabbinus David Kimchi in hæc Oseæ verba, dies captivitatis in quâ nos versamur hodiè, quando nobis neque rex est, neque princeps ex Israele.. Nam sub potestate gentium sumus, et regum, atque principum eorum; nullum nobis est neque Dei veri, neque idoli colendi instrumentum: ita nos hodiè in hoc exilio vivimus omnes filii Israelis. » Similia habet R. Manasse ad cap. 49 Geneseos.

Et verò quomodo aliqua regiminis forma ac jurisdictio auctoritas dici possent in eâ perseverasse tribu, quæ et ipsa desiit et evanuit: atqui ipsa desiit et evanuit tribus Juda. Evanuit respectu terræ promissionis. Id namque mirum quòd nulla sit regio in quâ pauciores occurrant Judæi quàm in Palæstina; nulli præsertim Jerosolymis ferè reperiuntur. Attamen vaticinium Jacobi, quo sceptrum Judæ promittitur usque ad tempora Schiloh perseveraturum, terram promissionis respicit et de eâ accipiendum est. Quæ enim in vaticinio præcedunt et sequuntur hæc verba *Non auferetur*, etc., ad terram promissam de verbo ad verbum esse referenda planum est. Evanuit etiam in se spectata. Supersunt quidem posterius Judæ, sed ab ejus fratrum filiis secerni nequeunt. Omnium tribuum reliquæ superstites permixtæ sunt, et earum geneologiæ confusæ. Urbs Jerusalem teste Josepho, de Bello judaico lib. 6. cap. 9, à Romanis tunc obsideri cœpit, cum innumera Hebræorum aliarum regionum, qui

venerant ad celebrandum Pascha, multitudo in ejus sinu continebatur. Ubi verò capta fuit, nulla distinctio familiarum facta est, nec fieri potuit. Alii ex Judæis in Ægyptum secessere, plerique per varias imperii partes disjecti, et servorum instar in foris venditi, paucissimis in patriâ remanere licuit. Hinc qui in eâ gente se ex Judâ ortos volunt, geneologiæ suæ nulla proferunt instrumenta, nec nisi maximè dubias traditiones obtendunt. Ut verbo absolvam, nusquam gentium tribus Juda unum corpus seorsim constituit. Imò nec aliæ tribus cum ipsâ commixtæ ullibi terrarum in alicujus reipublicæ formam coalescunt. Ergo jamdudum defecit et dissipata est tribus Juda, ac proinde in illâ tribu omnis jamdudum regiminis forma ac jurisdictio auctoritas desiit.

Atqui juxta vaticinium Jacobi omnis auctoritas et forma regiminis, omnis jurisdictio, seu jus vitæ et necis à Judâ non erant auferenda, usquequò, seu donec veniret ille qui in ejusmodi vaticinio prædicitur venturus. Etenim 1°, is est sensus naturalis et obvius textus samaritani, omnium versionum etiam antiquissimarum, et à Judæis maximè probatarum, omnium quoque paraphraseon chaldaicarum, quarum tanta apud eosdem auctoritas. Hujusce modi textus de verbo ad verbum modò exhibuimus. Juxta codicem samaritanum legendum est: *Non auferetur sceptrum ... et dux... donec veniat*, etc.; juxta 70: *Non deficiet princeps... et dux... donec*, etc.; juxta Interpretem syriacum: *Non deficiet sceptrum.... et expositor.... donec*, etc.; juxta arabicum: *Non præteribit virga.... et legislator.... donec*, etc.; juxta Onkelos: *Non auferetur habens principatum.... neque scriba.... donec*, etc.; juxta alios Paraphrastas: *Non desinent reges.... donec*, etc. Jam verò vel illa significant aliquam regiminis formam et auctoritatem, aliquem principatum civilem, jus vitæ et necis usque ad tempus illius qui venturus prædicitur, esse permansura in tribu Juda, vel nihil omninò significant.

1° Is etiam est sensus textus hebræi. Enimverò cum nullo pacto dici possit vocibus *sceptri et legislatoris*, non designari principatum civilem atque auctoritatem et formam quamdam regiminis et jurisdictiois, vel fateantur Judæi circa ætatem quâ eorum respublica penitus extincta est, illum venire debuisse, cujus adventum Jacob prænuntiat; aut propugnent necesse est malè à Christianis hebræa reddi. Atqui istud postremum propugnari non posse manifestum fit vel ex solâ levitate monumentorum

quibus Judæi recentiores non pauci interpretationem nostram impetunt. Tricas movent illi de vocibus *עד כי*, *ad ki*, quas vertimus *usquequò*, *donec*, *quoad usque*, et de voce *שבת* *Schebet*, quâ auctoritatem, principatum, imperium, jurisdictionem designari docuimus, Aiunt igitur plures Rabbinii particulas *ad ki*, dùm conjunctim leguntur atque ad eandem pericopen pertinent, significare quidem *usquequò*, *donec*, sed eas hic esse sejungendas; *ad* utpote affectam accentu *Jetib*, cui vis inest disjunctiva, ad priora verba referri, cum iis unum colon seu membrum constituere, ac verti debere *in æternum*, *perpetuò*; quo sensu adhibetur Exodi 15, v. 18, Isai. 26, v. 4, et alibi; *ki* verò cum sequentibus conjungi debere, ac significare *quandò*, seu *postquàm*, vel ut aliis placet, *quia*, seu *nam*; legitimum proinde prophetiæ sensum hunc esse: *Non recedet sceptrum de Judâ in æternum; quando seu postquàm venerit Messias* (1); vel istum: *Non deficiet sceptrum de Judâ in perpetuum, quia veniet Messias*, qui scilicet illud restauret perpetuò duraturum (2). Atque in ejusmodi argutiâ grammaticali multum confidere videntur Judæi recentiores.

Alii tamen nempe R. Maimonides, R. Mose ben Nachman, et R. Joel ben Sueb, et R. Isaac in glossis super Samuelem viâ prorsus oppositâ insistent. Non negant vocibus *ad ki* significari *donec*; sed cùm *Schebet* generatim virgam designet, alia autem sit virga imperii et auctoritatis, ut Psal. 44, v. 7, etc., alia tribulationis et castigationis, ut Isai. 44, v. 5, Proverb. 22, v. 15, etc., contendunt nihil ob stare quominus in vaticinio Jacobi, *Schebet* de virgâ tribulationis accipiatur. Quo posito, inveniunt, is erit Prophetiæ sensus: *Non recedet virga tribulationis et castigationis à Judæis, donec veniat Messias*. Sic itaque insignis vaticinii vim summam conantur eludere.

At duplex ejusmodi effugium non difficulter præcluditur non modò auctoritate paraphraseon et versionum omnium, præsertim antiquarum, quas jam laudavimus, non modò in-

terpretatione plerorumque Rabbinorum, sed etiam decretoriis circa linguam sacram observationibus.

Et ut incipiamus ab eo quod profertur circa syllabas *ad ki*, illarum sensus triplici solùm viâ determinari potest. Scilicet 1º, ex primigenio textu in se nudè spectato, et independentè à punctis et accidentibus Massorethicis, quæ recentioris esse usûs multi volunt, nec nisi seculo Ecclesiæ 5 aut 6 inventa censent post R. Eliam Levitam Lud. Capellus, Morinus, Simonius, etc., imò quorum initia nonnulli seculo demùm 9 vel 10 cum Masclefio collocant; 2º ope regularum grammatices Massorethicæ, quibus maximè confidendum arbitrantur non Judæi modò, sed et plures Christiani, ut post innumeros, Bartoloccius, Biblioth. Rabbin. tom. 1, p. 141, etc.; Guarinus in suâ grammaticâ hebraicâ, etc.; 3º ex textibus aliis versionibusque antiquis, ac Judæorum priscis interpretationibus. Atqui quamcumque ejusmodi viam teneamus, planè demonstratur *ad ki* significare *usquequò* seu *donec*.

Ac 1º quidem is sensus determinatur ex textu hebræo in se spectato posthabitis punctis et accentibus Massorethicis. Siquidem, etsi vox *עד* *ad*, ubi sola ponitur; aliquando sumi possit pro *עד לעד* *lad*, *in æternum*; attamen, ubi ponitur ante particulam *כי* *ki*, nihil quidquam seorsim sonat, sed utraque conjunctim semper significat *donec*, *usquequò*, ut patet ex aliis quatuor locis, Genes. 26, v. 43, item 41, v. 49, et 2 Reg. 23, v. 40, et 2 Paral. 26, v. 15, in quibus solis, ut in vaticinio nostro occurrit *ad ki* nec aliud quàm, *donec*, potest significare. 2º Idem sensus astruitur regulis Massorethicis accentuum, prout eas proponit ipse R. Elias Levita. libro de accent. cap. 2, et cum eo omnes grammatici. Nam non aliâ de causâ quos hic impugnamus voces *ad ki* divellunt, et *in æternum*, *postquàm*, seu *quia*, interpretantur; quàm quòd velint accentum *Jetib*, quo particula *ad*, eò loci afficitur, esse de se disjunctivum: atqui ea ratio falsa est. *Jetib* enim de se non esse disjunctivum liquet, vel ex ipso versiculo immediatè præcedenti, ubi [prima vox *גור* *gour*, *catulus*, afficitur illo accentu, nec tamen, ut est evidens, à sequentibus divelli potest. Pariter Gen. 51, v. 15, et Exod. 9, v. 25, *Jetib* pingitur sub syllabâ *אֶת* *eth*, quæ nota est accusativi casûs, nec proindè separari potest à sequenti vocabulo. Similia exempla suppeditant singulæ ferè paginae, vide Exod. 4, v. 26, et cap. 5, v. 2 et 4, et cap. 7, v. 24, et cap.

(1) Ità exponunt auctor veteris commentarii in Genesim *Beresith Rabba* inscripti, sect. 99; R. Bechaj in hunc locum, ubi sententiam hanc magistro suo Rabbi Salomoni, Jarchi acceptam refert; Rabbi Manasse in *Conciliatore*, quæst. 65 in Gen. tertiam Judæorum sententiam exponens.

(2) Ità quoque nonnulli Rabbinii quibus malè concinit Samuel Basnagius Flottemanvillæus in annalibus ecclesiastico-politicis ad ann. 40 ante Christum, n. 24.

9, v. 4, etc. Deinde vox רַגְלָא *raglau*, quæ in vaticinio nostro immediatè præcedit particulas *ad ki*, notatur majori distinctione, scilicet accentu *Athnach*; atqui *Jetib* post majorem distinctionem nihil separare apud omnes hebraisantes certum et inconcussum est, constatque ex omnibus exemplis quæ Biblia suppeditant, vide Exod. 4, v. 26, et cap. 5, v. 2, et cap. 9, v. 31; Jud. 2, v. 24, et cap. 4, v. 24; et 1 Reg. 22, v. 3; et Ruth. 1, v. 12, in quibus omnibus *Jetib* subsequitur vocem accentu *Athnach* notatam, neque ullus in contrarium afferri potest locus. Et verò cum *Athnach*, afficiens *raglau*, omnium accentuum, *Silluck* excepto, sit maximus, ac duobus punctis æquivalens colon seu membrum efficiat, sicut *Silluk* periodum; nonne post vocem *ad*, interpunctio aliqua absurdè collocaretur? Ergo ibi *Jetib* non est disjunctivus. Præterea, inter loca à nobis laudata plura sunt in quibus *Jetib* non reperitur nisi post *Zakeph-Katon*, ut Gen. 51, v. 13, etc. Exod. 5, v. 4, etc. cap. 9, v. 4, vel post *Rebia*, ut Exod. 9, v. 25, qui accentus sunt longè minoris virtutis quàm *Athnach*, nec efficiunt nisi semicolon aut comma; ergò, cum post eos accentus non distinguat *Jetib*, à fortiori nec post *Athnach* potest distinguere. Denique Gen. 41, v. 49, ubi eadem leguntur voces *ad ki* quas nunc expendimus, vox מְהוּלָּה *mehod multum*, immediatè antecedens, habet *Athnach*, sicut רַגְלָא *raglau* in vaticinio Jacobi; et *ad* notatur accentu *Tebir*, qui non minòris, imò majoris potentie eat, quàm *Jetib*. Atqui tamen accentus *Tebir* ibi non distinguit; ergo à fortiori nec *Jetib*, Gen. 49, v. 10, debet distinguere. Sed in hisce Judæorum næniis confutandis nimium immoramur.

3º Tandem hunc eundem sensum invictissimè confirmant, imò demonstrant tum Targumistæ, et veteres interpretes, 70 scilicet, Aquila, Theodotion, Syriacus, Arabs, Pers. Samar. Vulgatus, etc.; tum auctores Thalmudis Babylonicæ æqualis cum Scripturâ sacrâ apud Judæos auctoritatis, qui non uno in loco Jacobæum vaticinium ita explicant, ut vocibus *ad ki* nihil aliud quam *donec* ab iis intellectum fuisse liqueat (1); tum denique doctorum Judæorum multitudo, quorum plurimos nobiscum consentientes refert ipse Menasseh ben

Israel in *Conciliatore*; ad quæst. 65 super Genesim, in exposit. sententiarum 1, 2, 3, 4, 5, 6, 7, 8, 9, 10 et 11. Alios videre est apud Morlunum in Appendice de locis hebræi textus restitutis, cap. 1, 2 et 3. Horum sanè omnium tam unanimis eâ de re consensio peremptoria prorsus est. Cum enim li loco, tempore, moribus longè à sese invicem essent dissiti, atque alii ante ortam de eo textu controversiam scripserint, ut 70 et fortè Onkelos, etc., alii, ut Aquila et Theodotion Judæorum proselyti, auctores Thalmudis, nec non Rabbini Christianis infensissimi essent, non potuerunt in eandem sententiam conspirare, nisi cogente vi manifestissimæ veritatis. Ergo, sive hebræum textum nudè spectemus, sive regulas Massoretharum observemus, sive varias versiones et interpretationes consulamus, manifestum est *ad ki* nihil aliud quàm *donec*, *usquequo*, significare posse.

Hæc de primo quorundam Judæorum effugio. Jam verò quod alii contendunt in vaticinio Jacobi nomine שֶׁבֶט *schebet* posse significari virgam tribulationis, afflictionis, ac castigationis non minùs perspicuè confutatur. 1º Ex usu vocis *schebet*. Sextuplex illius vocabuli acceptio in Scripturis deprehenditur. Juxta primam, *schebet* significat solummodò virgam simplicem, seu baculum, cui innititur quis inter ambulandum, vel quo utitur ad greges in pascua deducendos, ad percutiendum, etc. Sic Exod. 21, v. 22, Levit. 27, v. 32, 2 Reg. 23, v. 21, 2 Paralip. 11, v. 25. Psal. 22 (hebr. 23), v. 4, Isai. 10, v. 15, etc.; atque hæc est primaria, propria, et naturalis illius vocis significatio; aliæ analogicæ tantùm sunt et metaphoricæ. Juxta secundam itaque acceptionem, *schebet* analogicè significat hastam, lanceam, telum, quæ nihil sunt aliud quàm baculus cuspide ferreâ armatus, ita 2 Reg. 18, v. 14, nec alibi hoc sensu ea vox usurpatur. Juxta tertiam ejusdem analogiæ sonat scriptoris calamum, stylum, qui olim erat baculus ex uno extremo acutus, ex altero planus et teres. Hoc sensu non legitur nisi Jud. 5, v. 14. Juxta quartam significat metaphoricè auctoritatem, principatum, imperium, jurisdictionem, dominationem, quorum virga seu sceptrum insignia sunt et symbola, ut Psal. 44 (hebr. 45); v. 7, Isai. 14, v. 5, Ezech. 19, v. 11 et 14, Amos. 4, v. 5 et 8, et Zach. 10, v. 11, et vix alibi reperitur. Juxta quintam metaphoricè pariter tribum vel etiam familiam designat, quæ acceptio in Scripturis frequens est, inde ducta, vel

(1) Vide imprimis *Midras Miste*, seu expositionem mysticam super proverbialia, folio 71, col. 5, et *Gemmarum* ad caput 11, tractatus *Sanhedrin*; verba inferius laudabuntur.

quòd unicuique tribui sua foret virga specialis, quâ distinguebatur, vel quòd tribus et familiæ in arbore genealogicâ sint veluti totidem rami ex eodem communi stipite orti. Juxta sextam denique acceptionem, *schebet* est tribulatio, afflictio, oppressio et castigatio, ejus instrumentum sæpius est virga vel fustis. Sic sumitur 2 Reg. 7, v. 14, Job. 9, v. 34, et cap. 21, v. 9, Psal. 2, v. 9, Psal. 88 (hebr. 89), v. 33, Prov. 22, v. 8, Isai 40, v. 5, Thren. 3, v. 1, et aliis fortè in locis. Maximè autem observandum est *schebet* significationem hanc postremam nunquàm induere, nisi quodam addito ad eam determinetur, ut *virga ferrea*, *virga iræ*, *furoris*, *virga Dei*, *visitare in virgâ*, etc.

Apud omnes constat in vaticinio Jacobi vocabulum *schebet* primo, secundo vel tertio sensu non adhiberi, quippe quos vel ipsa sola oraculi majestas manifestè excludit. Utrum verò quartæ, an quintæ acceptioni insistendum sit, jam non expendimus; quia, cùm et principatus ac imperium in tribu Juda, et ipsa ejusmodi tribus omnisque ejus regiminis forma jamdudum, ut dictum est, reipsâ defecerint; utrâque acceptione efficaciter revincuntur Judæi. Quartam tamen meritò veriore hactenus supposuimus, majorique rationum ac autoritatum pondere firmatam loco suo ostendimus. Unum duntaxat, ex illis circa usum vocis *schebet* observationibus, hic colligendum, nempè hoc vocabulum in Prophetiâ Jacobi secundum ultimam acceptionem, nimirum pro virgâ tribulationis, afflictionis et castigationis, non posse sumi. Quod sic conficitur: *schebet*, ut notandum est, afflictionem et castigationem nunquàm significat, nisi quodam addito ad sensum hunc determinetur ac restringatur; atqui in vaticinio nostro *schebet* legitur sine ejusmodi addito; ergo ex usu *schebet* manifestum est illo vocabulo hic non designari virgam castigationis.

2º Ex antecedentibus et consequentibus illud idem astruitur. Esto, vox *schebet*, non sceptrum et auctoritatem potiusquàm virgam tribulationis de se exhibeat, inde sequeretur illius vocabuli significationem ex antecedentium et consequentium inspectione determinandam esse. Atqui in vaticinio Jacobi nec antecedentia nec consequentia patiuntur vocem *schebet*, intelligi de virgâ castigationis et tribulationis. Non antecedentia; siquidem fausta Judæ prænuntiat Jacob, ipsumque præ cæteris fratribus extollendum ac laudandum prædicat, adductâque leonis, quem accubantem nemo suscitare

ausit, comparatione, victorias eum de hostibus reportaturum vaticinantur. *Juda*, inquit, *te laudabunt fratres tui, manus tua in cervicibus inimicorum tuorum.... Catulus leonis Juda.... requiescens accubuisti ut leo, et quasi læena, quis suscitabit eum? Non auferetur sceptrum de Judâ*. Quid ibi afflictionem, tribulationem et castigationem vel tantillum redolet? Neque consequentia: additur enim statim: *Et dux de femore ejus*, seu et *legislator de inter pedes ejus*. Versiculo sequenti sermo fit de feracitate regionis, quam in terrâ Chanaan inhabitaturi erant Judæ posterii. Num tribui Judæ calamitates maximas minari censendus est Jacob, dùm ejus inter cæteras tribus præminentiam extollit, dùm ipsi victorias de hostibus promittit? etc.

3º. Ex simili Scripturæ loquendi modo. Zach. 10, v. 11, habetur: *Veschebet Misraim iasour: Et sceptrum Ægypti recedet*, vel ut reddunt 70 Interpretes, καὶ σκῆπτρον Αἰγυπτίου περιαιρεθήσεται, *Et sceptrum Ægypti auferetur*. *Schebet* eò loci significat imperium ac potestatem regiminis; atqui eadem loquendi ratio deprehenditur in vaticinio Jacobi; ergo.

4º. Argumento ex Scripturis ducto. Auctor lib. 1. Paralip., cap. 28, v. 4. alludens procul dubio ad benedictionem Judæ datam à Jacobo, Davidem inducit sic loquentem: *Elegit Dominus Deus Israel me.... ut essem rex*, etc. DE JUDA ENIM ELEGIT PRINCIPES, (Hebr. chi bihouda bachar lenagghid: *nam in Juda elegit in principem vel Judam elegit in principem*); porro de domo Juda, domum patris mei, et de filiis patris mei placuit ei ut me eligeret regem, etc. Unde patet huic auctori *schebet* idem esse ac *nagghid*, quo princeps certò designatur. Hinc 70 vertunt, καὶ ἐν Ἰουδᾷ ἡρέτισε τὸ βασίλειον, *et in Juda elegit regnum*, et Josephus, lib. 8, Antiq. cap. 10, scribit Davidem expressis verbis pronuntiare, Judam Jacobi filium præ cæteris electum fuisse qui rex designaretur.

5º. Ex eventu. Nomine *schebet* in vaticinio Jacobi non potest intelligi virga castigationis et tribulationis, nisi tribus Juda peculiari modo castigetur, et præ cæteris tribubus affligatur, quippe cùm Prophetiæ verba solum Judam spectent, non cæteros Jacobi filios. Atqui tribus Juda speciali modò non fuit afflicta; omnibus Israelitis quarumlibet tribuum communis est virga tribulationis quâ percutiuntur; imò et diu floruit tribus Juda post aliarum dispersionem; ergo.

6º. Ex translatione 70 Seniorum, qui ἄρχων vertunt, item ex aliis versionibus, et ex para-

phrasibus chaldaicis; quam auctoritatem Judæi refugere nequeunt. Nam 70 vim vocum apprimè callebant. Aliarum versionum plurimæ à Judæis adornatæ sunt. Porro paraphrastæ chaldaici, qui et Judæi fuerunt, et doctissimi apud ipsos perhibentur, vel ante Christum natum et proinde ante exortam quæstionem (quod multis placet, et de Onkelos saltem valdè probabile est) scripserunt, vel ut aliis videtur, non nisi pluribus à Christo seculis. Si prius, summam hic esse eorum adversus Judæos auctoritatem nemo non videt. Si posterius, adhuc majorem obtinere debent, quia tunc solius veritatis perspicuæ lumini tribui possunt, quæcumque religioni christianæ faventia ab ipsis prolata sunt.

7°. Pauci tantum Rabbini, quam refellimus interpretationem sequuntur. Cæteri omnes plerumque nomine *schebet* fatentur principatum designari. (Vide Manassen in *Conciliatore*, pag. 89 et seq. Morinum *Append. de locis Hebr. textus restitutis*, cap. 1, 2 et 3, et alios.)

Itaque hebræa vaticinii à nobis accuratè red-dita; *ad ki* significat *donec, usquedum, quoadusque*; *schebet* denotat sceptrum, principatum, auctoritatem regiminis, jurisdictionem; ac proinde qui in vaticinio Jacobi prædicatur venturus, jamdudum venit.

2°. Qui in eadem Prophetiâ prædicatur venturus est *Messias*. — Secunda hæc nostra propositio triplici potissimum argumento evincitur. Primum petitur ex naturâ et propriâ vi ac significatione grammaticâ nominis *Schiloh*, à quâcumque radice Hebraicâ illud derivetur; nam qui venturus hic prædicatur, simpliciter et sine addito appellatur *Schiloh*; ergo si omnes hujus nominis simpliciter et sine addito sumpti significationes Messiae soli apprimè competunt, sequitur eum quem Jacob venturum prænuntiat esse Messiam. Atqui soli Messiae apprimè congruere varias illius vocis significationes grammaticas, brevi inductione liquet.

Itaque 1° vocabulum illud alii interpretantur *mittendus*, à Themate] שָׁלַח, *Scalach, misit* (1).

(1) Sive transumptoris vitio in codice suo שִׁלְיָה *Schiloh* scriptum repperint שִׁלְיָה *Schalouach*, quod est participium *pahul*, vel שִׁלְיָה *Schillouach*, quod est nomen verbale à radice שָׁלַח *Schalach misit*, sicut *Siloe* (hebraicè שִׁלְיָה *Schilouch*) Joan. 9, v. 7, exponitur *missus*, sive errante oculo et litterarum similitudine decepti הֵת *Heth* pro הֵה *He* in fine vocis legerint, sive litteras illas in se invicem mutari posse

Hanc interpretationem sequuntur ex veteribus Eusebius, demonstrationis evangelicæ lib. 7, et S. Hieronymus in Vulgatâ nostrâ latinâ, et inter recentiores Steuchus Eugubinus in veteris Testam. ad hebraicam verit. recognitione, Grotius in annotatione ad hunc locum, et alii. Ab eâ non revocatur Huetius *demonst. evang.*, nisi unius samaritani exemplaris auctoritate. Eamdem tribuunt Judæis quibusdam Galatinus, lib. 4 Arcan catholicæ veritatis, cap. 3, Lyra in glossâ ordinariâ, Huetius loco citato.

Alii 2°, cum codice samaritano ejusque versione *Schiloh* interpretantur *pacificum*, seu *pacificantem*, *pacis auctorem*, à verbo שָׁלַח, *Schala* quod est *quiescere* (1); ita Hieronymus Oleaster commentario in Pentateuchum, Huetius ubi supra, Vatablus in hunc locum, et ex Protestantibus Fagius et Castalio apud criticos Sacros, Amama et Cartwrightus in supplemento eorundem criticorum. Alii 3°, vocem hanc deducunt à nomine שְׁלִיָּה *Schilia*, quod est secunda, vel secundina, id est, pellicula illa, quâ partus involutus, ex utero prodit; unde fit, inquiunt, שִׁל *Schil*, quod semen vel filium sonat, ut docet Rabbi David Kimchi in libro Radicum. Istit igitur *Schilo*, idem est ac *filius ejus*, nempe Judæ (2). Illa Davidis Kimchi expositio Rabbi Bechai, Aben-Ezræ et aliis celebribus Rabbinis probatur apud Morinum, Hoornebeck, etc. Galatinus, pag. 158 et 144, Helvicius apud Crit. Sac. etc., eandem suam faciunt. Juxta plures 4°, vox *Schiloh* conflata est ex litterâ *Schin* contractè, ut sæpè fit, positâ loco relativi pronominis אֲשֶׁר *ascher*, et ex demonstrativo לוֹ vel לוֹה *Loh*, quasi scriptum esset שָׁלוֹ, vel שְׁלוֹה *Scheloh*, masculino affixo in fœmininum mutato. Unde vertunt, *donec veniat ille cui* (supple, *repositum est regnum*); vel *quod ei*, nempe Judæ, aut Messiae (supple *repositum est*); vel *qui ei* (supple *promissus est*); vel denique, *donec veniant quæ ei*, Judæ scilicet (supple *reposita seu reservata sunt*). Quæ omnia in idem quoad substantiam recidunt. Hæc est

crediderint. « Quid enim facilius, ait Grotius in hunc locum, quàm aut variante dialecto, aut scripturâ aberrante, mutari inter se litteras tam vicinas et soni et figuræ? »

(1) Vel ii vocem *Schiloh*, sine litterâ, *Jod*, ut habent codex et versio samarit. legerunt, vel cum litterâ illâ, ut jam in hebræo extat, legentes, putaverunt esse nomen formæ nominis קִיטֹר *Kitor*.

(2) Adeò ut affixum fœmininum הִ, fit loco masculini לִ, quod sæpè contingit, et bis hoc ipso in capite factum reperitur.

interpretatio 70 Seniorum, Arabis, Syr. Pers. Targum Onkelos et Jerosol. Rabbinorum Aben Ezrae, Jarchi, Aben Melech, etc., et cum iis Turretini, Simonii, Hist. crit. vet. Test. lib. 2, cap. 6, pag. 219, etc. Nonnulli tandem *Schiloh* dividunt in duas voces שִׁילֹחַ, vel שִׁלְחָה *Schaloh*, hoc est *munus* sive *donum ipsi*, nempe Judae promissum, cujus interpretationis mentionem facit ex antiquo Midrasch R. Salomo Jarchi apud Morin. vide etiam Manassen in *Conciliatore*, pag. 89.

Itaque haec vaticinii verba, *donec veniat Schiloh*, idem sonant ac si dictum fuisset sine addito et autonomasticè, *donec veniat qui MITTENDUS* est, vel *donec veniat PACIFICUS*, vel *donec veniat FILIUS* ille insignis promissus Judae, vel *donec veniat ILLE* CUJUS EST REGNUM, vel *donec veniant quae promissa sunt Judae*, aut *quae ei reposita sunt*, sive Filio ejus reservata, vel *donec veniat MUNUS EI* concedendum. Atqui singula illa hocce modo enuntiata soli Messiae competunt. 1°. Solus Messias dici potuit simpliciter et sine addito mittendus, Exodi 4, v. 5: *Mitte quem MISSURUS es* Isaiae 46, v. 1: *EMITTE agnum dominatorem terrae*. Et certè cum Messias esset liberator à Deo Patriarchis promissus, Geneseos 12, v. 3, cap. 18, v. 15, cap. 22, v. 18, cap. 26, v. 4, cap. 28, v. 14, num alter potuisset in vaticinio Jacobi simpliciter per excellentiam à Deo MITTENDUS appellari? 2°. Solus etiam Messias potuit nomine PACIFICI sine addito et per excellentiam in vaticinio designari, si quidem solus veræ pacis est auctor. Hinc Isaiae 9, v. 6 et 7, *vocabitur* inquit Propheta, *nomen ejus* (Messiae)... *princeps PACIS*. Ps. 71, v. 7: *Orietur in diebus ejus... abundantia PACIS*, et Micheae 5, v. 5, ipse pacis nomine adumbratur: *Et erit iste PAX*, ait sacer contextus. 3°. FILIUS Judae per antonomasiam dictus procul dubio est Messias, qui ex Judâ fuit oriundus fatentibus Judæis, et quo nullus inter posteros Judae illustrior sanè esse potuit. 4°. Manifestum est sive illo *cujus est regnum*, simpliciter et autonomasticè denominato, sive illo *qui Judae promissus* sine addito dicitur, sive eximiè *repositis ei et reservatis*, non alium quàm Messiam in oraculo Jacobæo designari. Enimverò regnum in Scripturis sæpè dicitur Messiae repositum: *POTESTAS EJUS*, inquit Daniel cap. 7, v. 14, *POTESTAS æterna quæ non auferetur, et REGNUM ejus, quod non corrumpetur*. Paria leguntur Psalmis 2 et 71, Isaiae 9, v. 6 et 7, Jerem. 23, v. 5. Secundum easdem Scripturas omnia illi filio Judae subjienda sunt, ipse futurus est cunc-

torum Dominus, atque in eo etiam omnes prophetiæ et promissiones, non inficiantibus Judæis adimplendæ. 5°. Solus Messias per excellentiam appellari potest *MUNUS EI* (Judæ) *concedendum*, quia scilicet ipse solus erat semen illud Patriarchis promissum in quo benedicendæ essent omnes gentes. Omnes igitur vocabuli *Schiloh* significationes soli Messiae congruunt, proindeque is est Messias quem venturum Jacob prænuntiavit.

Secundum argumentum desumitur ex characteribus, quibus Jacob designat quem venturum prædicit. Is enim juxta vaticinium tantum stirpi Judæ decus erat allaturus, ut futurus esset gentium expectatio, seu quod idem est, ad ipsum congregandi forent populi, et gentes ei libenter obedituræ. In hunc sensum conspirant textus hebræus et samaritanus, omnesque versiones ac paraphrases. Atqui ejusmodi character ita Messiae proprius est, ut nulli alteri competere possit. Quod certissimè probari potest: 1° ex Scripturis quæ multis in locis Messiam hisce proprietatibus manifestè designant; Genes. 22, v. 18 et alibi: *BENEDICENTUR IN SEMINE TUO OMNES GENTES terræ*. Psal. 71, v. 11: *OMNES GENTES SERVIENT EI*. Isaiae. 41, v. 10: *stat in signum populorum, ipsum GENTES DEPRECABUNTUR*, et cap. 49, v. 6: *Dedi te in lucem gentium ut sis salus mea usque ad extremum terræ*. Micheae 4, v. 1: *ET FLUENT AD EUM OMNES POPULI*; denique Aggæi 2, v. 8: *Veniet DESIDERATUS CUNCTIS GENTIBUS*. 2° Enumeratione eorum omnium de quibus Judæi explicare conati sunt illud vaticinium; facile enim ostenditur characteres de quibus agitur; iis nullo prorsus modo congruere, ut ex vitiligationum Rabbinicarum solutione patebit.

Tertium argumentum ducitur ex consensu Judæorum, præsertim veterum. 1° Paraphrastæ *Schiloh* expressè *Messiam* interpretantur. 2° Talmudistæ in Gemarâ capitis 11 tractatus Sanhedrin, ad questionem, *quod illi* (Messiae nomen)? sic respondent: *Familiares Rabbi Silæ aiebant: Schiloh nomen ejus, quia dicitur: Donec veniat Schiloh*. In Midras Misse fol. 71, col. 3, Israel dicitur (Isaiae 5, v. 7) vinea vocatus, comparatione factâ, *cum plantatione regni in tribu Judæ usque dum progerminet Rex Messias, quia scriptum est: Non recedet sceptrum de Judâ*, etc. Ibidem ex Rabbi Hunâ referuntur octo Messiae nomina quorum unus est *Schiloh*. 3° Idem tradunt Judæorum doctores, nam *Schiloh* esse *Messiam* sentiunt Rabbini

in *Beresith Rabba* seu magno commentario in Genesim jam laudato, auctor libri *Jalcuth* apud Judæos celeberrimi, RR. Salomo Jarchi. Bechai, Aben Meleck, Moses Alsich, Arama, Moses Ben Nacman, auctor libri *Arbaturim*, et alii apud Huetium demonstr. Evangel. prop. 9, cap. 4, n. 16; Helvicum, n. 6; Morinum, Append. sæpius citatâ, etc. His præverant veteres illi Judæi, de quibus Origenes, lib. Περὶ ἀρχῶν seu *de principiis*, cap. 1, qui non aliter vim Prophetiæ declinare conabantur, quam fingendo imperium quoddam tribus Judæ in locis remotioribus et incognitis. Sed et plerique Judæi hodierni vaticinium Jacobi de Messiâ intelligunt, adeò clara est et manifestata. Hinc in versione hebræo-germanicâ, quam in suorum usum adornari curârunt, habetur expressè: *Bis das er kommt Maschiach*, id est: *Donec veniat Messias*, ergo.

Hactenus demonstratæ sunt ambæ propositiones argumenti conclusionis istius initio propositi, nempe quem venturum prædixit Jacob jamdudum advenisse, atque hunc esse Messiam; ergo juxta Jacobi oraculum jamdudum Messias venit.

SOLVUNTUR OBJECTIONES. — Objicies 1°. Non constat voce *Schiloh* Messiam designari in vaticinio Jacobæo. 1° Enim illa vox potius designat Moysen, vox enim שִׁילֹה *Schiloh*, et vox מֹשֶׁה *Moses* litteris secundum valorem arithmeticum acceptis, numerum eundem, nempe 345, faciunt, ac proinde juxta cabalæ leges in se invicem possunt commutari; ergo. Hæc est una ex interpretationibus quas refert R. Manasse in Conciliatore, q. 65 in Gen., ubi eam tribuit Rabbi Bechai, qui tamen Moysen ut Messiae typum duntaxat habuit, adeò ut vaticinium utrique competere, et in utraque adimplendum censuerit. Probat autem in Moyse illud jam completum fuisse, tum ratione mox allatâ ex valore litterarum arithmetico desumptâ; tum quia Deut. 33, v. 5, Moyses rex dicitur, unde concludit sceptrum à tribu Juda ad tribum Levi fuisse translatum. 2°. *Schiloh* potest intelligi de Saûle, qui unctus est in Silo, et qui imperium à tribu Juda ad tribum Benjamin ex quâ erat oriundus transtulit. Sensus ergo vaticinii esse potest: *Non auferetur sceptrum de Juda, donec veniat unctura Siloensis, seu donec veniat Saûl rex unguendus in Silo.* 3° Eadem vox potest intelligi de Davide, nam *Schiloh* potest significare *filium*. David autem fuit insignis Judæ filius, sub cujus imperium multi venerunt. Ita RR. Aben Esra et Levi Ben

Guerson apud Manassen loco cit. Quod confirmant alii, quia cum vox שֹׁר *Sour* significet motum ad aliquem locum, ac proinde possit accipi pro *accedere*, Prophetia hoc modo reddi potest: *Non accedet sceptrum ad Judam, donec veniat David insignis filius Judæ.* 4° Vox *Schiloh* fortè designat urbem *Siloh*, seu tabernaculum in urbe Silo positum uti Massorethis visum est, nam vox *Sour* potest sumi pro *accedere*, ut mox dictum est. Verbum autem שָׁרַב *bo*, idem esse potest ac *occidere*, *occumbere*; nihil ergo vetat quominus Prophetiam hoc modo interpretemur: *Non accedet sceptrum ad Judam, donec occidat, seu desinat Silo*, id est, *tabernaculum in urbe Silo positum*. Atque hæc interpretatio comprobatur eventu, quippe destructum est tabernaculum Silo, cum regno potitus est David; unde dicitur Psal. 77, v. 60: *Repulit tabernaculum Silo*, et additur, v. 70: *Et elegit David servum suum*. Ita R. Bechai. (Vide etiam Manassen.) 5° Salomon rex fuit maximè pacificus; atqui vox *Schiloh* potest significare *pacificum*; ergo potest significare Salomonem. 6° Nihil vetat quominus eadem voce designari dicatur Jeroboam, qui decem tribus à Salomonis filio abductas sibi devinxit, earumque rex creatus est in Silo, vel saltem, ut R. Ezechias observat, *Siloh* esse potest Ahias Silonites qui Jeroboamo sceptrum prædixit, 3 Reg. 11. R. Manasses ubi supra. 7° Nominè *Schiloh* fortè intelligendus Nabuchodonosor, Babyloniorum rex; *Schiloh* enim idem est ac *mittendus*; atqui Nabuchodonosor missus à Deo templum evertit, et tunc temporis defecit auctoritas in Judâ. Ita Julianus Apostata apud S. Cyrill. Alex., libro octavo in ipsum. Eamdem sententiam nonnullis Judæis tribuunt Galatinus, Nicolaus de Lyra, etc. 8° Tandem *Schiloh* verisimillimè est Cyrus, rex Persarum, quem Deus apud Isaiam 45, v. 1, *Christum suum* appellat, populique à captivitate Babylonicâ liberatorem futurum esse prænuntiat.

Nego ant. et dico generatim, 1°, ex illâ opinionum oppositarum, à recentioribus quibusdam Rabbinis excogitarum, multitudine et diversitate manifestum fieri, nihil solidi ab eis posse Christianorum argumentis reponi. 2° Ejusmodi interpretationes arbitrarias penitus convelli auctoritate paraphrastarum, Talmudis, antiquorum nationis Judaicæ magistrorum, etc., juxta quos, ut diximus, *Schiloh* est *Messias*. Atque hoc unum sufficeret ad propositas opiniones refellendas. 3° Adeò esse perspicuum nomine *Schiloh* intelligendum esse *Mes-*

siam in vaticinio Jacobæo, ut illuc negare non audeant etiam plerique Rabbini à quibus variæ illæ expositiones objectæ proferuntur.

Ad singula in probationem antecedentis allata respondeo sigillatim. Ad primum, nego antecedens. Nam 1^o, juxta Prophetiam sceptrum à Juda auferendum erat versùs tempora illius qui venturus prædicatur : atqui sceptrum versùs Moysis tempora à Judâ dici nequit ablatum, quandoquidem ante Moysem Israelitæ vix in populum coaluerant, et sub durissimæ servitutis jugo semper vixerant oppressi. 2^o In Moysen non cadunt verba sequentia : *Et ipse erit expectatio gentium* ; seu ut habent hebræa : *Et erit ei obedientia*, aut *aggregatio populorum* ; cum Moyses gentilium dux et legislator non fuerit, sed solius populi Israelitici. 3^o Moyses ante ingressum in terram Chanaan obiit, nec tempore ab ætate Jacobi longè dissito vixit ; atqui filiis suis eventura in *novissimis diebus*, præsertim post ingressum in terram Chanaan Jacob Geneseos 49, vaticinatur, vers. 1, 13, 14, etc. ; ergo. Ad probationem, neg. conseq. Arte cabalisticâ quæ in numerandis et ponderandis litteris tota incumbit, nihil futilius. Methodo illâ, ut notat Huet. demonstr. Evang. prop. 9, cap. 4, n. 15, *ex hoc Jacobi oraculo, et ex quocumque Scripturæ loco sexcenta ejusmodi figmenta quivis queat extundere*. Hic autem se ipsâ revincitur ; nam auctor libri celeberrimi *Arba turim*, in notulis marginalibus ad *Biblia*, observat *יבא שילה* *veniet Schiloh*, idem esse ghematricè quod *משיח* *Messias*, utrumque enim numerum 358 componit. Quod addit Bechai Moysem assumpto sibi regno sceptrum à tribu Juda ad tribum Levi transtulisse, duplici momento evidenti refellitur. 1^o Falsum est ab ævo Jacobi ad Moysen scepro potitam esse tribum Juda, cum toto illo tempore et ipsa hujusmodi tribus, et tota gens Israelitica durissimâ apud Ægyptios servitute oppressa jacuerit. 2^o Pugnantia loquitur Bechai, dum Mosis tempore ablatum è Judâ statuit sceptrum, quod ipse in eâdem tribu usque ad adventum Messiae docet esse perseveraturum.

Ad secundum, nego pariter antecedens. Si quidem falsum est, 1^o Saûlem in urbe *Silo* regem unctum fuisse. Consecratus est in Ramataimsophim, ut manifestè colligitur ex I Reg. cap. 8, 9 et 10. Rex solemniter renunciatus fuit in Masphâ, et confirmatus in Galgalis. Falsum est 2^o Saûlis consecratione ablatum fuisse à Judâ sceptrum. Nam si sceptrum interprete-

mur regiminis et reipublicæ formam in tribu Juda usque ad *Schiloh* perseveraturam, profectò illud Saûl à Judâ non abstulit. Si verò auctoritatem supremam quâ Judæ posteri erant potituri, sceptrum nonnisi post Saûlem in Judâ esse cœpit ; nempè David fuit primus rex ex domo Judâ, proindèque, etc. Falsum est 3^o, imò absurdum, nomine urbis *Silo* potuisse appellari uncturam seu consecrationem regis in eâ celebrandam. Ejusmodi interpretationibus depravantur et corrumpuntur Scripturæ, non explicantur. Denique Saûl non fuit populorum expectatio, solus ipsi obedivit populus hebræus.

Ad tertium, nego antecedens. Ad probationem 1^o, esto vox *Schiloh* possit *filium* significare ; non ideò sequitur Davidem filium Judæ insignem illo nomine designari. Qui enim in vaticinio Jacobi antonomasticè et per excellentiam *filius Judæ* appellatur, clarissimus filiorum Judæ sit necesse est ; atqui inter Judæ filios clarissimus futurus erat *Messias*, non David ; ergo. 2^o David fuit quidem rex potens, attamen apud exteras nationes imperium ejus nunquam fuit ità diffusum, ut pronuntiari queat *ipsi fuisse populorum obedientiam*, seu *ad ipsum populos aggregatos*. 3^o *Schiloh* non potest de Davide intelligi, nisi vox *Sour* in vaticinio *accedere* significet : atqui voci illi nequit ejusmodi significatio tribui. Vis enim primaria et nativa verbi *Sour* est recedere, ut innumeris exemplis constat, neque unquam induit aliam significationem, quòd si aliquandò accessum subsidiariò designat, id ex eo oritur, quòd, cum recessus ab uno loco non peragatur, quin ad alterum fiat accessio, vox illa ad exprimendum transitum ab uno statu in alium possit accommodari ; tunc verò mentio fit termini *ad quem* fit transitus, quod in vaticinio Jacobæo non occurrat. Sed prætereà, vox *Sour* in illâ prophetiâ habet adjunctam præpositionem *בין* *min*, *לֹא יָסוּר שִׁבְטִי מִיְּהוּדָה* *lo iasour schebet mihoudah* ; quæ propositio nihil aliud quàm recessum, seu motum *ex* aliquo loco designare potest. Hinc antiquarum versionum, paraphraseon, etc., unanimis consensus in ejusmodi sensu voci *Sour* adscribendo.

Ad quartum, nego quoque ant. 1^o Quia urbs *Silo* non potest in Jacobi prophetiâ nomine *Schiloh* designari, nisi vox *iasour* ibidem significet *accedet* ; sed modò demonstratum est verbum *Sour* non posse illo sensu accipi ; 2^o, quia verbum *בֵּא* *bo* semper significat *ire*, *intrare*, *adire* ; nunquam autem *desinere*, *destrui*. Id-

circò usurpatur de solis occasu, quòd sol occidens terras subire videatur. Hinc non modò versiones et paraphrases nobis hic consentiunt, sed et omnes Rabbinì, uno aut altero excepto; 5°, quia si *Schiloh* in vaticinio Jacobæo intelligatur de urbe *Silo*, nullus erit ad quem verba sequentia, *Erit ei obedientia populorum*, referri possint. Adde falsò supponi Davidem fuisse regem creatum statim à translatione Arcæ ab urbe *Silo*: imò tunc temporis nondum Saul in regem unctus fuerat; vide Regum capitib. 7, 8 et seq.

Ad quintum, nego consequentiam, tùm quia qui antonomasticè et per excellentiam *pacificus* in vaticinio dicitur, is esse debet, cui maximè et præ cæteris competat illa appellatio; atqui Messia longè excellentiùs quàm Salomoni competit appellatio *pacifici*, ut patet ex locis Scripturæ suprà citatis in quibus nuncupatur *pax nostra*, etc., tùm quia versùs tempora Salomonis non ablatum est sceptrum à Judâ; tùm quia verba ultima vaticinii *et ipse erit expectatio gentium*, seu *erit ei obedientia*, aggregatio *populorum*, Salomonis imperio non congruunt.

Ad sextum, nego antecedens. 1° Jeroboam non in *Silo*, sed in Sichem rex creatus fuit, ut ex 5 Reg. 12, versibus 1 et 2, manifestè inferitur; 2°, abductis decem tribubus quæ secutæ sunt Jeroboam, non ablatum est sceptrum à Judâ, imò post hanc defectionem regum Judæ, imperantibus Roboam et aliis Davidis posteris per 492 annos floruit; 3° Jeroboam vir pessimus, Judæ infensissimus, nefandi schismatis auctor, qui decem tribus à veri Numinis cultu ad idolatricos ritus transtulit, fuitne *expectatio gentium*? atque isne esse potest, de quo intelligendus Jacob filio suo Judæ fausta et prospera prænuntians? Quod aditur de Ahià Silonite non minùs absurdum est; nec ipsi obediverunt populi, nec ejus ætate sceptrum in Judâ defecit, nec magis potuit *Silo* denominari, quòd fuerit *Silonites*, quàm posset *Romæ natus* Roma appellari.

Ad septimum, nego etiam antecedens. Nabuchodonosor à Deo ad plectendum populum missus, Dei flagellum cognominari potuisset, sed simpliciter et sine addito *mittendus* à Deo aut *missus* dici non potuit. Messias ab origine mundi promissus, à patriarchis expectatus, eximia hominibus dona allaturus, solus potuit in vaticinio Jacobæo, ut in aliis Scripturæ locis, tanto nomine insigniri. Præterea, qui à Jacobo *mittendus* appellatur, futurus erat gentium expectatio, ad ipsum aggregandi populi;

atqui hæc non competunt Nabuchodonosori, qui populos in irâ suâ percussisse, et in furore suo subegisse legitur in Scripturis, qui ipsis fuit horrori, et in eorum suppliciis et calamitatibus est lætatus. Ad hæc, Jacob, uti non semel observatum, prospera filio suo prænuntiat; non ergò respicit ejus prophetia Nabuchodonosorem, qui templum dextruxit, Jerusalem combussit, et posteros Judæ in captivitatem transtulit. Tandem falsum est captivitate Babylonica sceptrum à Judâ fuisse ablatum. Captivitas enim populi non diuturna, quâ durante captivorum animis certissima, Deo ipso auctore, injicitur spes in pristinum statum post breve tempus redeundi, est interruptio tantum, non defectio sceptri; sed de eo inferiùs.

Ad octavum, nego antecedens. Licet Cyrus *Christi* nomine apud Isaiam insignitus fuerit, seu quod futurus esset Christi liberatoris typus, seu quia erat auctoritate regiâ, quæ sacra est, decorandus; attamen variæ suprà annotatæ significationes vocis *Schiloh* ipsi antonomasticè nequaquam competunt. Deindè Cyrus non fuit *gentium expectatio*. Demùm tantum abest, ut ejus tempore sceptrum à Judâ reces-serit; ut potiùs Judæorum rempublicam in integrum restituerit, factâ captivis potestate in patriam revertendi.

Instabis. Non semel supposuimus sceptrum juxtâ Jacobi prophetiam auferendum à Judâ versùs tempora adventûs *Schiloh*; atqui gratis statuitur, vox enim *donec* non semper sumitur definitivè, aliquandò accipitur extensivè; id est, non semper cessationem rei de quâ agitur, indicat; ejus continuationem quandoque non excludit; v. g., cùm Genes. 8, v. 7, de corvo ex Arcâ emisso dicitur: *Et non revertetur donec siccarentur aquæ*: sensus non est siccatis aquis corvum hunc esse reversum; sed cùm non reverteretur, interea siccatas aquas. Aliud exemplum post Abèn Ezram refert Manasses ex Genes. 28, v. 15, ubi Deus Jacob alloquens, ait: *Non deseram te donec fecero quod locutus sum tibi*; id est, quamdiù fecero.

1° Respondeo id à nobis ita positum, ut aliis compluribus argumentis Judæorum evasiones occluserimus. *Donec* sumi possit extensivè, parvi refert. Messia tempora præterita sunt, cùm Sceptrum Judæ jamdudum desierit. 2° Nego minorem. Nam 1°, particula *ad ki*, quas vulgatus interpret voce *donec* reddidit, nunquam in textu hebræo quidquam aliud si-

gnificant quàm cessationem rei; 2º, ipsa vox *donec* nativâ suâ virtute eò tendit, ut cessationem indicet, præsertim ubi sermo fit de futuro. Quapropter si rarioribus quibusdam in exemplis continuationem rei non excludit, et idem sonat ac *interea* aut *quamdiu*, id fit quasi per vim, ac subjectâ cogente materiâ, tuncque plerumque agitur de præterito, aut de præsentem; atqui oraculum Jacobi futura respicit; res porro ipsa exigit, ut in eo *donec* accipiatur desitivè; si enim accipiatur extensivè, adventus *Schiloh* tempora indeterminata manerent, quod vaticinii scopo non esset consentaneum. Exempla etiam allata non sunt ad rem. Nulla Genes. 8, v. 7, negatio legitur in Hebræis, quæ ad litteram habent: *Ibat et revertebatur donec sicarentur aquæ*. Capite autem 28, v. 15, de notâ rei futuræ assignandâ non agitur, ac subjecta materia exigit vocem *donec* desitivè non sumi, cum ibi divinum auxilium promittatur. Adde quòd sermo sit de conditione in æternum adimplendâ, nempe de benedictione gentium in semine Jacobi, seu in Messiâ futuro.

Objicies 2º. Sceptrum non deficit in tribu Juda. Nam 1º, Talmud. in Gemarâ tractatus Sanhedrin, cap. 1, sic habet: *Traditur: Non recedet sceptrum à Judâ. Hi sunt æchmalotarchæ Babylonicæ, qui dominantur Israeli scepro*. Et Legislator de medio pedum ejus. *Hi sunt posterii Hillelis qui docent legem publicè*, ergo, etc. Confirmatur quia in Seder-olam-Zutta, seu in Chronico parvo Judæorum quod anno 1124 scriptum est, illorum æchmalotarcharum, seu captivitatis principum genealogia à Jechoniâ rege, quem Nabuchodonosor captivum abduxit, ad usque generationem 86 exhibetur. Benjamin Tudelensis qui seculo 12 fratres suos invisurus, cunctas Orientis partes peragravit, captivitatis principem Bagdadi sedem habere commemorat in itineris sui Historiâ. Nec dissimilia narrantur in peregrinatione R. Petachia, qui eodem seculo Ratisbonâ profectus, universas regiones ad fluvium usque Sabbathion circuevisse fertur; ergo, etc. 2º Rex Chosar, seculo 8, cum universis suis subditis à R. Sangari ad religionem Judaicam conversus est. Situm est autem potentissimum regnum Chosar versus mare Gargan. Multi orientales populi ejus sunt tributarii. Hæc constant ex Epistolâ quam ad Rabbi Cusai scripsit Joseph rex Chosar duodecimus ab illo qui ad legem Judæorum ductus fuerat. Rabbi Petachia in suâ Peregrinatione dicitur 8 diebus eo in regno commoratus. Ejusdem Josephus hebraicus, qui verus et ge-

nuinus est Joseph, mentionem facit in Historiis Judaicis. 3º Idem mox citati Benjamin et Petachies multa eximia à se conspecta narrant de potestate Judæorum, ac supremo eorum variis in regionibus dominio. 4º Abrahamus Petitsol, Judæus Ferrariensis, in *itineribus mundi*, seu *dictis Cosmographiæ*, anno 1525 editis, testatur multis in regionibus potestatem supremam esse penès Judæos, nempe inter regionem Sinarum et Gangem; in deserto Cabor, in desertis Arabiæ, juxta Gangis littora, in variis maris Indici insulis, etc. Flumen Sabbathion ultra Gangem collocat, et versus montes quibus iste fluvius terminatur, decem tribus deportatas esse, illarumque imperium ibi florentissimum esse asserit. 5º Saltem negari nequit summam rerum à Judæis in Abissiniâ occupari. Non pauci recentiores Rabbini eâ in parte Africæ flumen Sabbathion et sceptrum Judæ reperiri existimant. Denique vastum à Judæis possideri imperium in Americâ ponè montes altissimos quibus Chile versus occasum cingitur, refert Rabbi Manasse Ben Israel fratrum suorum spei erigendæ et fovendæ causâ, in Opere cui titulus, *Spes Israelis*, quod Amstel. anno 1650 edidit, et Cromwello dicavit.

Nego ant. Ad ea verò quæ in ejus probationem objecta sunt, respondeo generatim: 1º his confirmari sensum quo vaticinium Jacobæum Christiani explicant. Nisi enim hunc esse genuinum existimassent Rabbini, tot non excogitassent commenta, ut sceptri in tribu Judâ continuationem ostenderent; 2º ab eis tamen perperam supponi auctoritatem summam, quam Judæi è patriâ abducti in regionibus exteris possiderent, loco sceptri Judæ promissi esse posse, si quidem observatum jam fuit Jacobi oraculum de terrâ alienâ et captivitatis statu intelligi non posse, sed ad terram promissam manifestè referri. Vide Petavium lib. 16 de Incarnatione, cap. 6, n. 6. 3º Insignes Rabbinos non diffiteri ad populi solamen multa de Judæorum, diversis in locis, auctoritate conficta fuisse. Expressè id asserit Rabbi Akrisc; supponunt verò R. David Kimchi, cujus testimonium supra retulimus, Maimonides celebris 12 seculi Rabbini, juxta quem neque Babylone, neque alibi, sed in solâ terrâ Israel supremum mortis judicium exerceri potest, ac poena sanguinis infligi; Abravanel qui illius juris defectionem ab Isaia esse prædictam censet, R. David Ganz Judæorum historicus in *Tsemach David*, Rabbi Bechai, etc.

Deinde Respondeo ad singula. Ad primum

neganda sunt consequentia et antecedens : 1^o consequentia ; nam esto extiterint captivitatis principes in Babyloniâ et Assyriâ, atque ipsis et Hillelis posteris quodcumque jus tribuatur, tandem desierunt jamdudum ejusmodi æchmalotarchæ, posteritas Hillelis ignoratur, illorum principum auctoritas periit. Scilicet ex ipso Rabbiorum testimonio certum est 11 seculo versum annum 1039 æræ vulgaris, imperante Bagdadi Sultano Gelâ Ledoullta, Judæos gravissimâ vexatione exagitatos fuisse, celebres eorum academias destructas, professores expulsos, ipsumque captivitatis principem, et innumeros fratres occisos, atque exinde nullum in Oriente captivitatis principem à Judæis creatum fuisse. Ex quo adversum Judæos cum Bartoloccio tom. 2 Bibliot. Rabbin. pag. 385, argumento ad hominem colligere licet, debuisse igitur ex Talmude saltem à pluribus seculis Messiam advenire. Quod si Rabbinii urgeant, Benjamini Tudelensi, et Petachie seculo sequenti asserentibus à se repertos Bagdadi captivitatis principes, fidem esse adhibendam, nihil quidquam inde consequentur ; illorum namque peregrinatorum relationes erunt necessariò intelligendæ de ita obscuris ducibus, ut de iis tacendum censuerint ipsi Judæorum historici. Sed præterea Nasser Ledonillah, Bagdadi califa seculo 13, ita crudeliter in Judæorum perniciem incubuit, ut plerique Mahumetismum simulatè profiteri, vel ex illis regionibus exire compulsi fuerint. Testis est Abulpharag, dynastiâ 9, p. 532 ; quocirca non diffitentur se illis in terris, etsi non pauci sint, nullo tamen jamdudum loco videri. Idem ergo argumentum ad hominem adversum Talmudistas recurrit.

Negandum 2^o antecedens, nempe Judæis Babylone summos ex illorum gente præfuisse principes. Ii enim non sunt principes summi, qui jure vitæ et necis non fruuntur, nec nisi accersitam ab aliis auctoritatem precariò exercent ; atqui æchmalotarchis nullum erat jus vitæ et necis, nulla nisi ab aliis accersita auctoritas. Etenim illâ seculorum serie, quâ æchmalotarcharum in Assyriâ principatus collocatur, vastæ huic regioni successivè Romani partim, Parthique, Persæ et Califæ dominati sunt. Romani autem populis victis jus vitæ et necis semper adimebant. A Parthis verò et à Persis Judæos gravissima identidem perpassos fuisse narrant ipsimet Rabbinii qui suæ gentis

(1) Salomon ben Virgæ, in *Schebet Juda*, p. 307.

historiam scipserunt. Califæ tandem et Sultani auctoritatis suæ adagendæ et conservandæ fuerunt studiosissimi. Quòd igitur Judæi extra patriam detenti sub ejusmodi dominatorum jugo jure vitæ et necis ac supremâ auctoritate potiti essent, mira sanè ac stupenda res foret, quæ, ut fidem habeat, gravissimis saltem momenti indigeret astrui. Jam verò quâ auctoritate id prodigii suaderent Judæi ? Talmudis ? Sed præterquam quòd fabulis refertus est Talmud, ne illius quidem testimoniis summus æchmalotarcharum principatus fulcitur. Dicti sunt quidem dispersionis principes dominari Israelitis sceptro, sed nemo nescit solemnem Talmudistis et Rabbiniis morem eum esse, ut quotquot apud eos virtute, scientiâ, opibus aut quâvis auctoritate pollent, insignibus titulis decorentur, ac etiam *Melachim-reges* cognominentur. Certè quidem Synagogarum coriphæi in Germaniâ et in Italiâ, quamvis sæpè pauperes, ac omni auctoritate destituti, principes ac duces appellari solent ; nec rarò Synagogæ judex gestare sceptrum à Judæis dicitur. Itaque prægrandia illa, quibus delectantur Talmudistæ nomina, neminem in errorem inducant. Metaphorica illa sunt et hyperbolica, nec tituli plerumque nomenclationibus respondent.

Accedit etiam 1^o quòd potestas principum dispersionis à Beniamine Tudelensi coloribus auctoritati precariæ, et ab alio accersitæ propriis depingatur ; 2^o quòd jam à nobis laudati sint Maimonides, Kimchi aliique celeberrimi Rabbinii juri vitæ et necis principibus captivitatis concessio minimè suffragantes ; 3^o quòd Origenes, lib. 4 de principiis, S. Epiphanius in hæresim Ebionitarum, Theodoretus, Dialogo 1^o fabulam similem à Judæis primis Ecclesiæ seculis jam contextam olim deriserint. Vide Huetium demonstrationis Evangelicæ propositione 9, cap. 4, n. 12 et 14.

Nec dicas in Talmude extare leges quibus judicium Babylone sedentium judicia dirigebantur. Nam inde ad summum sequitur Judæis factam fuisse potestatem inter se juribus suis utendi quantum ad res civiles et ordinarias, quam nec ipsis denegant principes Christiani, à quibus tolerantur. Facultatem hanc populis bello partis concedi solitam Judæi speciali de causâ postulare potuerunt, nempe propter multa ad eorum religionem pertinentia, motis inter eos litibus sæpè admixta. Porro concessio ejusmodi nec jus vitæ et necis, nec ullum principatus characterem involvit.

Ad secundum, nusquam gentium reperitur Regnum Chosar, quod tamen ita describitur in Epistolâ laudatâ, ut, si alicubi extaret, non posset latere. Epistola illa Josephi Regis Chosar et quæ ad ipsum à R. Cusai scripta refertur, suppositæ sunt, quod et alia demonstrant, ut videre est apud Bartholoccium, tomo 2 bibliot. Rabbin. pag. 852 et seqq. Petachias autem de regno Chosar, ut et de aliis quàm plurimis, omnium viatorum testimonio falsi convincitur. Idem dicendum de Josepho Gorionis filio, cujus historia cum ex hac ipsâ regni Chosar mentione, tum ex innumeris quibus scatet fabulis, ac novitatis evidentibus signis manifestissimè fraudis agitur; quod à Scaligero, Drusio, Casaubono et aliis, ac præsertim à Joanne Gagnerio in præfatione ad editionem Londinensem Pseudo Josephi, et in Epistolâ ad Bretaupum tom. 25 Bibliot. Selectæ pag. 38, plenissimè demonstratum est.

Ad tertium, nego consequentiam. Quæcumque de supremâ Judæorum pluribus in regionibus potestate, necnon de aliis complurimis enarrant illi peregrinatores, falsissima sunt. Neque in toto orbe habitabili sæpius variis de eausis lustrato ulla unquam ejusmodi rerum comperta sunt vestigia.

Ad quartum, idem respondendum; eruditus ille Judæus multas finxit regiones et imperia, quæ, etsi eorum limites assignet, imò viam quâ ad illa tendatur, aliquando delineet, nullibi tamen possunt reperiri.

Ad quintum, nego antecedens. Judæi in montibus et rupibus latentes, ex quibus expelli facillè non poterant, quasdam provincias Abyssiniæ seculo 16 vastaverint, vel etiam per aliquod tempus occupaverint, quis ibi agnoverit sceptrum Judæ promissum donec veniat Messias? sed et citò evanuit illa sceptri umbra. Sultanus Æthiopiæ Saghedus ineunte seculo sequenti eos debellavit, et è montibus præruptisque rupibus expulsos per totum regnum dispersit. Circa Judæorum in Abyssinia, Æthiopiâ et Ægypto fortunam et conditionem consuli possunt historia æthiopica Ludolfi, et Comment. ad eandem.

Ad ultimum, hæc doctus Manasse conscripsit præpostero Montesini delirantis hominis testimonio deceptus. Vastum Judæis imperium in Andibus nullum extare jampridem extra controversiam positum est.

Instabis. Etiam si nullo in loco Judæi supremam potestatem exercerent, adhuc tamen apud eos reipsâ manet spes sceptri in Judâ aliquando

futuri, saltem cum venerit Messias; atqui ab eis sceptrum omninò ablatum non est apud quos manet spes ejus recuperandi; ergo, etc.

Dist. maj. spes inanis manet, etc., concedo; spes legitima, nego. Quid inanius spe, nulli divinæ promissioni innixâ, quæ à decem et octo fere seculis Judæos frustrata est? cujus nullus est fixus et determinatus exitus? Ergone irrita ejusmodi spes sceptri, diræ multorum seculorum captivitati conjuncta, idipsum est, quod Jacob nomine sceptri ante Messiæ adventum à Judâ non auferendi, intellexit? Interrumpiturne solummodò sceptrum, quod per tot annorum centurias desinit? Postremò etenim manet apud Judæos spes sceptri à Judâ aliquando recuperandi, quatenus ex Judâ nasciturum Messiam regem expectant; atqui inanis est illa expectatio, cum tribus et genealogiæ jamdudum confusæ sint, ut diximus; nec Judæ posterius ab aliorum Patriarcharum filiis possint certò discerni.

Objicies 3°. *Schebet* nomine intelligi potest tribus, siquidem non semel illa vox in scripturis tribum designat. Sensus ergo vaticinii esse potest. *Non tolletur tribus Juda..... donec veniat Messias*; atqui tribus Juda reipsâ sublata non est, seu *ex oculis et commerciis ac notitiâ hominum* non ablata; ergo. Ita quosdam censisse refert R. Manasse in Conciliatore, loco cit.

1°. Nego majorem; nam etsi *schebet* in hæbræo codice non semel ad tribum designandam usurpatur, attamen in vaticinio Jacobi de scepro, quod auctoritatis insigne sit, accipiendum est; tum quia illa acceptio magis propria est, ac proinde alteri anteponenda, ubi ad hanc alteram ex subjectâ materiâ non restringitur, tum ob auctoritatem versionis samaritanæ, 70 Interpretum, veterum paraphratarum, ac omnium versionum, ipsorumque ferè omnium Rabinorum, qui *schebet* eò loci principatûs notam interpretati sunt. Vide inferiùs de hoc argumento dicenda ubi de significatione vocis *sceptri*, concl. 1. 2°. Nego minorem, nempe Judæ tribum manere superstitem. Illa enim tribus defecisse dicenda est, quæ tribus benè constitutæ non ampliùs habet speciem et formam, quæ per totum orbem apud omnes dispersa nationes, earum juribus obedire cogitur, in unum reipublicæ corpus institutis et legibus propriis temperatum nusquam terrarum compacta; cujus genealogiarum series confusa et incerta est, nullo instrumento consignata: atqui hæc est Judæ tribus conditio, ut jam inter probationes dictum; ergo.

Objicies 4^o. Falsò supponitur Judæorum confusas esse genealogias et tribus. Nam in Talmude sic legitur : *Babylon sana est, Mæson est mortua, Media ægrotat, Persis expirat*, quibus significatur Judæos omnes Babylone commorantes ex puro Judæ sanguine esse ortos, nullos in Mæson, plures in Mediâ, paucissimos in Perside. Additur : *Cunctas regiones, si Judææ conferantur, massam esse impuram, sed Judæam ipsam Babyloni comparatam, corruptam esse et adulteratam*. Hæc Talmud. Babyl. tract. *Kiduschin*, fol. 71. Deinde, secundum R. Abravadelem, 50 millia familiarum ex tribu Judæ in Hispanias à Vespasiano deportatæ sunt, quarum due cæterarum duces ex domo Davidicâ erant. Idem ille Abravanel ex istarum unâ ortum trahabat. Alii ejusmodi familiarum Judæ 40 tantum millia computant. Reliqua decem millia ex Benjamine progenita fatentur, sed ea in Galliis collocant; ergo.

Nego antecedens. Ad probationem, nego consequentiam duplici de causâ. Prima est, quòd etiamsi hæc Talmudis et Rabbiorum dicta fidem mererentur, illa tamen utpote generatim prolata, ad generationes singulas in ipsâ Judæ tribu à se invicem distinguendas non sufficerent; neque, quod præcipuum est Judæ tribum à cæteris certò valeret discernere; siquidem, ex quo recitata Talmudis verba scripta sunt, tot effluxère secula, totque revolutiones in Oriente Judæi sunt perpassi, ut, dato olim Judæ posteros ab aliis Israelitis Babylone distinctos fuisse, jamdudum quæri possit ubinam illi sint Judæi Babylonii, de quibus Talmud tam præclare prædicat. Idem de Judæis Hispanis statuendum, quibus alii multi variis seculis subinde commixti sunt; ergo, quamvis vera forent quæ ex Talmude et ex Rabbini Hispanis objecta sunt, nulla tamen esset consequentia. Verùm illa falsa sunt, atque hæc est secunda negandæ consequentiæ causa; namque ad Talmudistas quod spectat, dùm Babyloniorum Judæorum genus ita extollunt, falsissimo nituntur fundamento, nempe aiunt solas plebis Judaicæ quisquilias et faeces in Palæstinam cum Esdrâ rediisse; nobiliores Babylone manere voluisse; verùm hæc non modò non sunt verisimilia, sed etiam ex libro Esdrâ, quem ut canonicum habent Hebræi, falsissima esse planè colliguntur. Deinde qui supponi potest quotquot Babylone manserunt ex Judæ posteris fuisse, nullos ex aliis tribubus? Quantum verò ad 50 millia familiarum Judæ in Hispanias à Vespasiano deportatarum, 1^o altum de prodi-

giosâ ejusmodi deportatione silentium cùm apud omnium gentium historicos, tum apud ipsum Josephum, qui rem tanti momenti certo certius non omisisset; 2^o non fortuitò, nec nisi editâ operâ tot familiarum millia ex unâ tantum tribu absque ullâ permixtione tam accuratè seligi potuissent. Nam, etsi Judæ tribus inter alias emineret, attamen multos ex tribu Benjamin et ex tribu Levi, non paucos ex aliis tribubus cum Judæ posteris in Palæstinâ et in urbe Jerusalem tunc temporis extitisse, nemini dubium est; atqui cùm Jerusalem capta est, nullus Judæorum adhibitus est delectus. Omnes quarumlibet tribuum eodem loco indiscriminatum Romanis habiti, omnes dispersi, sine discretionem in foris instar belluarum veno positi; ergo. Adde quòd Judæis Hispanis Talmud hic adversetur, et vice versâ; nam si sola Babylon pura fuerit, ut legitur in Talmude; ergo Judæi Hispani non possunt esse omnis corruptionis expertes. Pariter, si Judæi Hispani omnes ex Judâ oriundi; ergo non sola Babylon est pura. Exhibeant itaque genealogiæ suæ instrumenta Judæi, quotquot se ex Judâ progenitos contendunt, ipsis non sufficiat quòd v. g. Hispaniâ nati sint ex parentibus jamdudum in illâ regione commorantibus; aut potius cùm instrumenta ejusmodi ipsis nulla esse possint, fateantur ita confusas esse genealogias et tribus, ut nullo caractere distingui queant. Cæterum, etsi distinctionis familiarum et tribuum ordo servatus esset, argumento ex sceptri defectione petito, Messiam jam venisse nihil minùs efficaciter probaretur, ut ex dictis manifestum est.

Objicies 5^o. Oraculum Jacobi conditionatè accipiendum est; nempe propter frequentes populi Israelitici in legem Mosaicam prævaricationes, Deus promissionum suarum executionem distulit; ergo. Ita Talmud in Gemarâ capitis 11 tract. Sanhedrin, R. Salemo Jarchi in Glossâ ad locum mox citatum et Rabbini sæpè.

Nego antecedens. Nam 1^o ubi nullam Scripturæ conditionem indigitant, ibi nulla debet subintelligi. Si enim conditiones ubi voluerimus, apponere liceat, jam nullius prophetiæ eventus certò cognoscendus aut expectandus erit; à fingendis pro arbitrio conditionibus nemo impediri poterit. Atqui nusquàm Scripturæ ullam in vaticinio Jacobæo supplendam conditionem indigitant; ergo. 2^o Ibi saltem subaudiendum non est observationum legis esse conditionem tacitam, quâ non impletâ eventus prædictus differri debeat, ubi et ipsæ præva-

ricationes futuræ sæpius aliunde prædicuntur : atqui sæpius futuræ prævaricationes Judæorum in Scripturis prædicuntur ; imò prædicta sunt iniquitatis opera adversus ipsum Messiam à populo Judaico perpetranda, Danielis 9 et alibi ; ergo. 3^o Similis conditio minùs adhuc supplenda, cum vaticinii eventus iniquitates perpetratas supponit ; atqui eventus Jacobæi oraculi iniquitates perpetratas supponit ; illud enim vaticinium iniquitates perpetrandas supponit, quo liberatoris iniquitates deleturi, et prævaricationes consummaturo prænuntiatur adventus : atqui Messias, cujus adventus vaticinio Jacobæo prænuntiatur, futurus erat liberator, iniquitates deleturus, Isaïæ 63, Danielis 9, et totis passim in Scripturis ; ergo. 4^o Versiones antiquæ, textus, paraphrases, necnon prisci Judæorum doctores, nullam in Jacobi oraculo conditionem innuunt ; imò à plerisque recentioribus Rabbiniis absolutè accipitur. 5^o His consonat Talmud ; in gemarà mox citati tract. Sanhedrin cap. 11, hæc Dei verba Isaï 60, v. 22, de Messiâ loquentis, *tempore suo et accelerabo illud*, sic committuntur : *si mereantur (Judæi), accelerabo ; si non mereantur, tempore suo*. Unde liquet juxta Talmudistas accelerari potuisse Messiam adventum, sed non retardari.

Instabis. Propter peccata posterorum Davidis, sceptrum in domo Davidicâ post captivitatem solutam non remansit, etsi Deus illud in ejus familiâ perpetuò mansurum promississet ; ergo à pari ; etc.

1^o Nego paritatem, quia promissionis Davidi factæ conditio disertè à Deo non semel expressa est. 3 Reg. 8, v. 25 : *Non auferetur de te vir coram me qui sedeat super thronum Israel..... Ita tamen si custodierint filii tui viam suam, ut ambulent coram me, sicut tu ambulasti in conspectu meo*. Et Psalmo 131 : *Si custodierint filii tui testamentum meum, etc.* 2^o Prophetiæ ac promissiones de duratione æternâ solii Davidici, in Christo Jesu vero Messiâ, spirituali quidem, sed germano ac eximio sensu adimpletæ sunt. *Hic erit magnus*, inquit Angelus Gabriel, Lucæ 1, v. 32 et 33, *ejus conceptionem annuntians, et Filius Altissimi vocabitur, et dabit illi Dominus Deus sedem David patris ejus ; et regnabit in domo Jacob in æternum, et regni ejus non erit finis*.

Objicies 6^o. Si Messiam tempora adeò perspicuè determinat Jacobi oraculum, quare eo vaticinio Christus et Apostoli non usi sunt ad revincendos Judæos ?

Respondendum censet illustrissimus Huetius,

Demonst. evang. prop. 31 cap. 4, n. 25, Christo et Apostolis non fuisse in animo singula Prophetarum oracula in Christo adimpleta referre ; ipsis satis fuisse, quòd non pauca, pro datâ occasione, laudarent, Judæosque ad Scripturas et ad Moysen generatim provocarent. Quamvis hæc responsio, quam solam Huetius legitimam judicat, reverà sufficiat ;

Respondeo tamen 2^o, duplicem ob rationem à Christo et Apostolis vaticinium Jacobi adversus Judæos meritò non allatum : 1^o quia sceptrum in Judâ penitus defecisse nondum tunc temporis erat planè evidens ; 2^o quia ex illo vaticinio id unum Christi ætate colligi poterat, Messiam tempora instare, de quo eadem ætate non ambigebant Judæi.

At, inquit Huetius, scriptores sacri vaticinia varias vitæ Christi circumstantias spectantia quandoque ipsi applicant, quibus non magis, quàm oraculo Jacobi, ipsum esse Messiam evinci poterit ; v. g. istud Ose 11, 1 : *Ex Ægypto vocavi filium meum*.

Respondeo nullam esse paritatem. Namque id unum ex Jacobi oraculo poterat Christi ætale concludi, nempe Messiam tunc venturum ; atqui id Judæos non latebat, ut ex historiâ compertum est ; frustra ergo illud vaticinium ipsis fuisset objectum. At non omnes pariter cognoverant Messiam ex Ægypto vocandum, nec proinde incassum illa vitæ Christi circumstantia fuit ab Evangelistis observata.

Objicies 7^o. Ablatum est sceptrum à Judâ tempore captivitatis Babylonicæ, nec tamen tunc venit Messias ; ergo, etsi iterum ablatum fuerit, cum destructum est secundum templum, non sequitur Messiam jam advenisse.

Nego antecedens. Aliud est sceptri exitium et finis, aliud est interruptio ejus, ac veluti interregnum. Spatio 70 annorum, quibus duravit captivitas Babylonica, vel, ut accuratiùs loquar, illis 59 annis qui à deportatione regis Sedeciae usque ad libertatem restitutam effluxerunt, sceptrum Judæ interruptum est ; sed non desiit, neque potuit tunc ablatum dici ; tum quia breve illud fuit temporis intervallum habitâ ratione longæ seculorum seriei quâ stetit imperium Judæ ; tum quia de ejusmodi dierum captivitatis brevitate, ac proximo suo in patriam reditu, Judæi, testimonio Dei ipsius, certiores facti fuerant. Jeremiæ cap. 25, v. 11, et cap. 29, v. 10.

Instabis. Redintegratum non est sceptrum Judæ post captivitatem Babylonicam ; siquidem nec regia dignitas tunc temporis instaurata,

nec summa rerum Judæ tribulibus plerumque concredita; per multum tempus penes Assamonæos ex tribu Levi oriundos principatus extitit; ergo.

Nego antecedens. Nam Judæi in patriam reversi post captivitatem Babylonicam propriis legibus usi sunt, in unum reipublicæ corpus coaluerunt, jure vitæ et necis aliunde non accersito potiti sunt; quotquot apud eos usque ad Herodis tempora principatûs participes facti sunt, auctoritatem suam ex consensu et electione populi hausere primitus; quod de Assamonæis expressè legitur 1^o Machab. 9, v. 28, 29 et seqq., idque regiminis Aristocratici tum vigentis veluti consecrarium fuit. Jam porrò quidquid reipublicæ Judæorum post captivitatem restauratæ competit, illud verè et propriè de tribu Juda intelligendum, quippe cui tanquàm præstantiori, aliarum tribuum reliquæ superstites ita conjungebantur, ut ejus solius ratio tunc habita fuerit, ac etiam natio integra nomen suum ab eâ sit sortita; ergo statim à captivitate Babylonicâ restauratum est sceptrum Judæ; sed de eodem argumento mox uberius.

Ad probationem dico *Sceptrum* esse summæ auctoritatis insigne, ac proinde ibi sceptrum continuari, ubi sub quâcumque regiminis formâ perseverat summa potestas. Pariter ut stet alicujus nationis sceptrum, necesse non est omnes principatum tenentes esse ex illâ natione, satis est quòd ex spontaneâ ejus consensione origo eorum auctoritatis deducatur; atqui post captivitatem respublica Judæorum quæ tribu Judâ potissimum constituebatur, supremâ auctoritate fruita est, atque ex eâ auctoritatis suæ originem ducebant qui principatum apud eam tenebant; ergo. Cæterùm hæc ultima objectio controversiam adversus Judæos non spectat, quippe qui sceptrum in suâ gente post captivitatem stetisse confidentius affirmant quàm Christiani.

§ 2. *Nonnulla de Jacobæi oraculi exitu inter theologos controversa discutiuntur.* — Messiae adventu adversus Judæos ex prophetiâ Jacobi demonstrato, nonnulla investiganda supersunt ad exitum illius vaticinii pertinentia, quæ non uno modo ab eruditis explicantur.

Quæstio est quâ ratione cum multiplici regiminis formâ quam populus hebræus successivè induit, et cum variis, quibus obnoxius fuit, vicissitudinibus Jacobi oraculum cohæreat. Scilicet 1^o, Hebræi ex Ægypto egressi statim ducibus parvère, Moysi nimirum et Josue, quo-

rum prior ex tribu Levi, alter ex tribu Ephraim originem ducebat. Judices autem qui deinde trecentis vel quadringentis annis eorum reipublicæ præfuerunt, duobus exceptis Othoniele, et Abesane, nulli fuerunt ex Judâ progeniti. Nullam porrò tribum eorum ætate in alias auctoritatem exercuisse; judices quos Deus suscitabat, aut tribus eligebant, merè monarchicâ auctoritate potitos non fuisse; sed penes optimates summam rerum tunc extitisse, ex Josepho (1) habetur, et ex quibusdam Scripturæ locis inter se collatis (2) videtur colligendum. Deus tamen per illud tempus ita visus est omnia moderari, ut ipse tunc speciali modo regnâsse dictus fuerit, 1 Reg. 8, v. 7, unde, quod tunc floruit regimen, solet theocraticum appellari. 2^o Monarchica regiminis forma annis 508, in eâ gente postea obtinuit. Nam judicibus successère reges, quorum primus saûl ex tribu Benjamin, secundus David ex Judâ natus. Istius posterius per 428 annos, nempe ad Sedeciam usque à Nabuchodonosore Babylonem deportatum, regiâ auctoritate frui sunt. 3^o. Post 59 ab illâ deportatione annos, populus, duce Zorobabele Davidis nepote, è captivitate in patriam revertitur; tota gens à Judâ populus Judaicus appellatur, teste Josepho, lib. 11 Antiq. cap. 5, n. 7; non restauratur statim monarchica potestas; aristocratia diu viget democraticæ mixta (3): præcipui nationis duces fuere ex tribu Levi, inprimis Assamonæi, seu Machabæi, quibus, ut reipublicæ subvenirent, præcipua auctoritas concredita. II versùs annum 106 ante vulgarem æram, dignitatem regiam affectare orsi sunt. Interim ab omni servitutis jugo Judæi immunes non fuere. Persis tributaolvere coacti sunt, 2 Esdræ 9, v. 36 et 37. A Syris, Ægyptiisque (4) non semel fuerunt exagitati. Pompeius, anno ante æram christianam 63, Jerosolymâ expugnatâ, eos Romanorum vestigales fecit. Viginti tribus post annis Herodem alienigenam regem Judææ Romani constituunt. Post hæc, anno Christi 7, Judæa in provinciam Romani imperii redacta est, ac tandem anno 70, Jerusalem et templum à Tito funditus evertuntur, et respublica Judæorum penitus extinguitur.

(1) Antiq. lib. 6, c. 3, n. 3.

(2) Judic. c. 1, v. 1, c. 2, v. 7, c. 5, v. 9 et 10, c. 19, v. 36, c. 20, v. 1, 18; 1 Reg. 8, v. 4 et 5.

(3) Ibid. c. 4, n. 8, p. 559; Mach. cap. 4, v. 16, cap. 10, v. 46, c. 12, v. 6, c. 13, v. 8.

(4) Joseph. Antiq. lib. 11, cap. 2, lib. 12, cap. 13, lib. 14, cap. 13.

Cum ejusmodi fuerit Hebræorum et præsertim Judæ tribus varia conditio et fortuna, quomodò rerum eventus vaticinio respondeat inquiritur. Quapropter quatuor aperienda sunt: Primum, quid nomine *Judæ* in oraculo Jacobæo intelligendum sit, an omnes tribus Israelis, an sola Judæ tribus? Alterum, an *schebet* in eodem vaticinio regiam auctoritatem designet, an tribum, an supremam potestatem, quæcumque foret regiminis forma? Tertium spectat initium, continuationem, et sceptri finem in tribu Judæ. Quartum significationem horumce verborum, *et dux de femore ejus*. Antequàm hæc sigillatim pertractentur, diversæ referendæ sunt opiniones, nec enim illæ possunt commodè in partes resecari.

VARIE THEOLOGORUM OPINIONES. — Alii verba Jacobi: *Non auferetur sceptrum de Judâ*, ad solam Judæ tribum referunt; alii de totâ natione hebræâ prophetiam interpretantur, servatâ tamen tribui Judæ speciali aliquâ prærogativâ.

Istorum sententia, juxta quam *sceptrum est* suprema auctoritas, hoc potissimum fundamento nititur, quòd ab egressu ex Ægypto ad Davidem usque, et à captivitate ad Herodem, supremi reipublicæ Hæbræorum duces, judices scilicet, plerique ex aliis tribubus, non ex tribu Judæ extiterint. Quòd si quæras, quâ igitur de causâ Jacob solùm Judam nominet, et ad ipsum solùm verba Prophetiæ dirigat; respondent prophetico spiritu à Jacobo prævisum 1° sceptrum penès posteros Judæ per 500 annos et ampliùs continenter futurum; 2° fore ut aliquando, nempè statim à solutâ captivitate universus populus à Judâ nomen accipiens, Judaicus appellaretur; 3° futurum etiam per idem tempus ut, licet persona tenens sceptrum non esset ex Judæ tribu, attamen *ipsum regnum*, ut ait Pererius, *et ditio regni, civitas regni, et subditi ei regno ad tribum Judæ pertinerent*. Atque in his tribus specialem tribui Judæ promissam prærogativam constituunt. Non paucos habet illa opinio defensores. Illam tuentur mox laudatus Pererius ad caput 49 Geneseos in primâ suâ hujusce loci interpretatione, Tournely in prælection. de Incarn. quæst. 3, art. 1, Casaubonus inter Protestantes, exercitatione 4 in Baronium, etc.

Qui autem solam Judæ tribum vaticinio respici existimant, in sex classes distribuendi.

Prima eorum qui cum Eusebio Cæsariensi lib. 8, Demonstrationis evangelicæ, *sceptrum* explicant de præstantiâ honoris et dignitatis quâ cæteras tribus semper antecelluit tribus

Judæ, etiam cum penès illas imperium extitit; quasi dictum esset: Tribus Judæ cæteris tribubus præesse non desinet seu imperio et jurisdictione, seu honore et dignitate, donec veniat Messias. Lib. 9. Hist. Eccles. videtur Eusebius aliam tradidisse interpretationem, de quo infra.

Secunda est eorum qui *sceptrum* supremam potestatem, seu regiam, seu ducalem interpretantes, illud in Judâ usque ad Herodem eatenus perseverasse autumant, quatenus in Zorobabele Judæ et Davidis tribuli, et ejus successoribus permansit. Ita opinati sunt S. Cyrillus Alexandrinus lib. 8, in Julianum impreatorem, Genebrardus in Chronico, ubi de Machabæis Baronius in Apparatu. 4. Lyranus, Tostatus Carthusianus, Tirinus. Hæc verò opinio in duas tresve alias subdividitur. Nam 1°, Cyrillus de successoribus Zorobabelis generatim solùm loquitur neque expressis definiit verbis, num paterno, aut materno genere illi ex Davide orti fuerint. 2° Genebrardus ipsos etiam Machabæos ex Judæ tribu paterno genere fuisse asserere non dubitat. 3° Baronius et alii ex adverso Machabæos paterno genere fuisse ex tribu Leviſacerdotes fatentur, rati solummodò eos materno genere ex Judâ prognatos; quocirca opinantur Judæ sceptrum in lineâ fœmininâ per Assamonæos ad Herodem usque stetisse. Sensu isto Baronius S. Cyrillum videtur intelligere. Harumce opinionum fundamenta subinde referentur.

Tertia nonnullos complectitur qui cum cardinali Cajetano ad v. 10, cap. 49. Genes. Illustrissimo Huetio Demonstrat Evangel. propos. 9, cap. 4, n. 7, Melchiorre Cano lib. 2, de locis Theologicis, cap. 11, Juenino, instit. Theologicarum de Deo incarn. quæst. 2, cap. 1, art. 3, conclus. 6, inter usumfructum supremæ potestatis et ejusdem proprietatem, seu inter usum sceptri et jus ad sceptrum hic distinguendum putant; aiuntque idèò, in tribu Judæ usque ad Messiam supremam mansisse potestatem; quia, etsi illa tribus post captivitatem ab usu principatus diu impedita fuerit; jure tamen ad illum sibi ex Dei institutione concessio, ad certâ ejus recuperandi spe, quocumque casu, privari non potuit, quousque veniret Messias imperium spirituale in æternum instituturus.

Cæterum nonnihil inter se differunt illi auctores. Cajetanus vaticinium his reddit verbis: *Non auferetur penitus principatus, usquequid veniat Messias*. Quod exponens, et ablatum siquidem est, inquit, principatus ante (Messiæ

tempora), sed non **PENITUS**... quia semper remansit certitudo nascituri Messiae de Tribu Jehudæ. » Aliter loquitur Melchior Canus; nam instar depositi sceptrum tribui Judæ reddendum, concreditum Machabæis fuisse ait. Alii distinctionem inter usum sceptri et ejus proprietatem expressè adhibent, ut diximus. Illa porrò discrimina ad substantiam rei nihil attinent. Illustrissimus verò Huetius Cajetani sententiæ quam aliàs approbat, nonnulla existimat adjicienda. Quatuor ille partes in vaticinio distinguit; istis prophetiæ verbis: *Non auferetur sceptrum*, docet æternam sceptri possessionem Judæ sponderi, quod in Messia adimpletum; istis verbis, *et dux de femore ejus*, humanum quid et caducum præsignificari, nempe temporarium Judæ imperium, cujus ususfructus fuit aliquando penès sacerdotes, proprietas verò usque ad Messiam penès Judam solum. Istis, *donec veniat qui mittendus est*, temporarii regni finem et Messiae adventum prænuntiari; istis denique, *et ipse erit expectatio gentium*, denotari Messiae regnum non Chananææ terræ claudendum finibus, sed quaquaversus per orbem diffundendum, utpote quod spirituale futurum sit. Hæc doctissimus præsul. Ubi illud singulare occurrit advertendum, voci *donec* ab eo tribui simul duplicem significationem; nempe quatenus illa vox refertur ad temporale regnum Judæ ex illustrissimi auctoris mente indicat ejus finem, et significat *usquedum*; quatenus verò regnum Judæ non auferendum respicit, rei continuationem denotat, idemque sonat ac *interea*.

Irritum porrò fieri Cajetani interpretatione argumentum quod ex Jacobæâ prophetiâ in Judæos Christiani contorquent, non satis accuratè à quibusdam post Pererium videtur dictum. Enimverò, juxta hanc interpretationem, usquequò Messias esset venturus, remanere debuit in Judæ tribu jus ad sceptrum, et spes Messiae ex illâ tribu nascituri; atqui jamdudum nullo jus proprium sibi potest vindicare tribus Judæ, nec legitima remanet spes Messiae ex illâ nascituri. Quid ita? quia jamjudum tribus Juda ab aliis tribubus secerni nequit, cum nullus, ut suprâ probavimus, jampridem servetur, nec servari possit ordo distinctionis tribuum et familiarum. Proindeque in sententiâ etiam Cajetani ex oraculo Jacobæo comprobari potest præterita jam esse Messiae adventus tempora. Non tamen inficiabimur illâ opinione quædam causæ christianæ certissima argumenta eripi.

Quarta quorundam est qui penès Judæorum Sanhedrin seu senatum, quem ex solis Judæ tribulibus coalitum censent et à Moyse institutum Num. 11, sceptrum Judæ promissum opinantur permansisse usque ad Herodem, à quo omnes illius concilii judices, uno excepto interfecti sunt. Ita Galatinus, lib. 4 de Arcanis catholicæ veritatis, Paulus Burgensis, in Genesim, et alii.

Quinta aliorum est opinantium nomine *schebet*, non *sceptrum*, sed *tribum* designari, adeò ut sensus prophetiæ iste sit: *Non deficiet Tribus Juda, seu quæcumque ad tribum benè constituendam requiruntur, à Judâ non recedent donec veniat Messias*. Primus illam expositionem excogitasse videtur. Hieronymus Oleaster doctus hebraicè è Dominicorum familiâ theologus, et sacræ Scripturæ interpret, qui missus à Lusitanorum rege, concilio Tridentino interfuit. Hanc amplexi sunt aliqui Protestantes, nempe Junius et Tremellius in versione latinâ Bibliorum communi utriusque studio adornatâ; Joneurtius in secundâ è suis Criticis epistolis Amstelod. editis 1715; Sherlockius, episcopus Anglicanus in Dissertatione de benedictione à Jacobo datâ filio suo Judæ, Geneseos 49, et alii quidam. Eamdem opinionem Basnagius in Historiâ Judæorum lib. 5, cap. 4. n. 9, edit. Hag. 1716, proponit et lectoris ferè relinquit arbitrio. Sed prætermittendus non est modus specialis quo res à Sherlockio explicatur. Is contendit in singulis tribubus particularem aliquam viguisse auctoritatem uniuscujusque constitutivam. *Quid enim tribus, inquit, nisi multitudo hominum regimine aliquo coadunata*. Hanc auctoritatem in tribu Juda penès optimates, ut et in aliis tribubus, à Jacobo institutam probare nititur, atque de ejusmodi auctoritate non supremâ, ad cujusque tribus constitutionem pertinente, et in solâ Judæ tribu usque ad Messiam perseveraturâ, vaticinium esse intelligendum pronuntiat. Eòdem ferè recidunt quæ obiter et aliud agens egregius auctor libri cui titulus, *Histoire du ciel*, eâ de re annotavit.

Porrò præcipua defensorum illius sententiæ momenta ista sunt: sæpè in Scripturis nomine *schebet* tribum significari; hanc interpretationem mirum in modum eventui concinere; ejusque ope omnibus Judæorum vitiligationibus facillimè ut putant, obviam iri.

Sexta tamen majorem comprehendit theologorum partem, qui *Schebet* nomine supremam intelligunt potestatem, unicuique tribui non

essentialem; quam, rejectis modò relatis expositionibus, à Davide tamen ad Messiam usque non obstante brevi captivitatis tempore aut Assamonæorum regno, in tribu Juda vero sensu stetisse arbitrantur. Ita Petavius lib. 16 de Incarnat. capit. 6 et 7; Cornelius à Lapide ad hunc locum, Pererius in secundâ ejusdem loci interpretatione, pag. 345; Calmetus in suo Commentario, edit. Paris. in 4^o tom. 1, p. 813. Witassius in tract. de Incarn. quæst. 3, art. 1, sect. 1, cap. 2, et alii benè multi. Illa sententia cui adhæremus, plura continet de quibus sigillatim jam dicendum, variisque explicatur modis, ut statim etiam patebit.

Quid nomine Judæ in vaticinio Jacobæo designetur? — Conclusio. Nomine *Judæ* in vaticinio Jacobæo sola intelligenda est hujusce nominis tribus. Probatur 1^o ex vaticinii circumstantiis et contextu. Jacob enim iis in circumstantiis vaticinium illud emittit et ad Judam dirigit, in quibus singulos filios suos seorsim alloquens, eisque *benedictionibus propriis* (v. 28) benedicens, eorum posteris eventura sigillatim prænuntiat. Quemadmodum igitur verba à Jacobo ad alios filios suos ibidem directa, non universam gentem, sed singulas tantum tribus spectant, ita et quæ ad Judam eò loci diriguntur, ad eum solum ejusque posteros attinere dicenda sunt. Contextus prophetiæ illud idem non minus evidenter ostendit. Nam vaticinii initio et fine solam Judæ tribum respici omnes fatentur; atqui *Judæ* nomen alio sensu in medio prophetiæ, quàm ejus initio et fine accipi nequit, siquidem nihil quidquam sensum ejusmodi diversum indigitat; ergo.

Deinde his vocibus: *Et dux de femore ejus*, seu, *de inter pedes ejus*, designari ducem generatione ex Judâ ortum, manifestum fit ex Deut. 28, v. 57, ubi similia usurpantur verba; ergo et illa: *Non auferetur sceptrum de Judâ*, ad solum Judam, seu ad solos ejus posteros possunt referri.

Probatur 2^o ex SS. Patribus; S. Justino Apologâ 1, aliàs immeritò 2, edit. Paris. 1742, T. I, pag. 63; Origene, Homiliâ 17 in Genesim, n. 6, edit. Paris. 1733, T. II, p. 108; S. Cyrillo Hierosol. Cath. 12 de Christo Incarnato, n. 17, edit. Paris. 1720, p. 171; S. Epiphonio in hæresi Ebionitarum; S. Hieronymo, in cap. 1 Sophon. edit. Martionæi, T. III, col. 1649; S. Aug., lib. 12 contra Faustum, cap. 47, T. VIII, col. 247; S. Cyrillo Alex. lib. 8 contra Julianum, T. VI, edit. Par. 1636, p. 260; Rufino de benedictionibus Patriarch. Theodoreto

in Genesim, Isidoro Hispalensi, etc., qui omnes unanimiter tradunt à Davide usque ad Messiam sceptrum in Judæ tribu juxta Jacobi vaticinium permansisse. Nonnullorum testimonia referenda sunt. « Prædictum est à Spiritu prophetico per Mosem, inquit S. Justinus, non defecturum è Judæis principem, donec veniret ille cui repositum erat regnum; Judas enim auctor generis Judæorum extitit, à quo etiam ut Judæi vocarentur, habuerunt. » Origenes sic habet: « Constat usque ad nativitatem Christi non defecisse principes ex genere Judâ, nec duces de femoribus ejus, usque ad Herodem regem. Si habent (Judæi,) inquit S. Cyrillus Hieros. principem ex genere Judæ et Davidis, needum venit qui expectabatur, etc. » Similia alii proferunt, quibus adde quotquot (ii autem sunt multi) ex hoc loco colligunt Messiam è Judæ tribu esse debuisse.

Probatur 3^o, quia hæc est Judæorum traditio communis, ut videre est apud Helvicum; unde sententia quam amplectimur, præterquàm quòd ex Scripturis manifesta, et SS. Patrum auctoritate munita sit, id etiam habet commodi, quòd Judæis refellendis magis sit accomodata.

SOLVUNTUR OBJECTIONES. — Objicies 1^o. Interpretatio juxta quam Juda in vaticinio Jacobi totam nationem Israeliticam designant à pluribus Ecclesiæ Patribus adversus Judæos adhibetur. S. Justinus, in Dialogo cum Tryphone 52, totam Judæorum gentem alloquens, sic habet: « Illud etiam à Jacobo Patriarchâ prædictum est.... Postquàm advenerit (Christus) nec Prophetam, nec regem in vestro genere futurum.... porrò in genere vestro ex quo initium accepit, usque ad illud tempus, quò hic Jesus Christus natus ac passus est, Prophetam aut principem esse unquàm desiisse, nec imprudenter dicere audebitis, nec habetis demonstrare.... At postquàm Jesus-Christus noster in vestro genere apparuit, et morti traditus est, nusquàm extitit aut extat Propheta; sed et proprio regi parere desistis. » Eusebius, lib. 1 Hist. cap. 6 et 7, hanc explicationem datâ operâ confirmare nititur, unde à Moyse deducit initium sceptri. S. Anastasius, Orat. de Incarnatione Verbi divini, n. 40, ait, usque ad ipsum (Christum scilicet) permansurum esse Judæorum regnum his verbis à Jacobo prænuntiatum fuisse: *Non deficiet*, etc. Adde S. Ambrosium de Benedictionibus Patriarcharum, cap. 4, n. 21; S. Chrysost. in

Oratione quòd Christus sit Deus, n. 3, et Homiliâ 67 in Genesim, n. 2; S. Augustinum, lib. 18 de Civit. Dei, 45, n. 3, et alios quos Pererius et Casaubonius citant.

Nego antecedens; nam, si Eusebium excipias, cui Patrum mox laudatorum auctoritatem opponimus, cæteri diligenter expensi nostræ sententiæ adversi non reperientur. Duo enim duntaxat significant; primum in Judâ usque ad Christum stetisse sceptrum, quia ad illud usque tempus principes suos populus Judaicus habuit; alterum, tempore Christi omnem principatum fuisse in totâ natione extinctum. Atqui ex his duobus non sequitur vaticinium Jacobi de omni gente Israeliticâ juxta illos Patres intelligendum. Non ex priori, quippe iisdem et nos verbis uti possumus. Addimus quidem, de modo quo principes suos post captivitatem natio Judaica habuit, explicationem quam omittunt ii SS. doctores, sed hanc scopus eorum non postulabat. Cum enim ætate, quâ scribebant, nullum jam superesset in totâ gente hebræâ principatus vestigium, nec Judæi de sceptri usque ad Christum permanentiâ litigarent, illi SS. doctores, ad vaticinium illud applicandum Christo, quâ ratione ad ejus usque tempora sceptrum steterit, exponere præposterè et supervacaneè suscepissent. Jam verò multò minùs ex posteriori; qui enim docent sceptrum defecisse in totâ natione Judaicâ, simul docent illud in Judâ defecisse; cùm istud in alio includatur. Sceptri autem in universâ gente defectio ab eis eâdem de causâ observari potuit, propter quam à nobis et ab aliis annotatur, scilicet ob majorem vim argumenti, et ad Judæos efficacius urgendos et undequaque revincendos.

Summa responsionis est, triplici modo prophetiam Jacobæam posse applicari Christo, vel ita ut maximè id prematur, soli tribui Judæ hoc competere vaticinium, quâ methodo usi sunt SS. Patres inter probationes laudati, vel ita ut sermo Jacobi ad Judam de omnibus tribubus disertè explicetur, quo pacto illum Eusebius, quem deserimus, intellexit; vel verbis utendo generalibus, scopo specialiorem expositionem non exigente; ita arbitramur locutos plerosque in objectione citatos, qui ideò, quam agimus quæstionem, nobis non videntur attigisse.

Objicies 2°. Prophetia quævis eventui consentiat, et ex illo explicetur necesse est; atqui si omnis populus Israeliticus, servatâ tribui Judæ peculiari suâ prærogativâ, in vaticinio nomine Judæ designetur, eventus planè vaticinio respondet; sin verò prophetia de solâ Judæ

tribu intelligatur, illi non cohæret exitus: siquidem ab egressu de Ægypto usque ad Davidem, quâdam præeminentia tantum inter cæteras tribus, non sceptro potita est tribus Juda; à captivitate verò usque ad Christum, tenentes sceptrum plerique fuerunt ex tribu Levi.

Neg. min. Ex modò dicendis patebit, prophetiam, ut sonat, sensu naturali et obvio de solâ Judæ tribu intellectam cum historiâ planè conciliari. Cum enim sceptri Judæ initia vaticinio non figantur, manifestum est à Davide illud posse inchoari. A Davide porrò ad captivitatem Babylonicam, Davidis posteros Judæ tribules regnâsse, omnes nôrunt. De tempore captivitatis si quâ sit difficultas, illa utrique opinioni perindè communis. Demùm quantum ad tempora captivitatem subsecuta, Pererius opinionis quam refellimus præcipuus auctor Comment. in Genes. ad hunc locum, p. 244, ipse modum explicat approbatque, quo sceptrum tunc in Judâ perseverâsse propriè dici possit, sed de his mox ex professo.

Quid in vaticinio Jacobi significetur nomine Schebet. — CONCLUSIO I. Nomine *schebet* intelligi non potest ipsa hujus nominis tribus. Probatur. Illa rejicienda interpretatio vocis *schebet*, quæ omnibus antiquis versionibus et paraphrasibus, omnibus tum Judæorum, tum Christianorum interpretationibus adversatur, textui hebræo nequaquam innititur, Judæisque convincendis multum obesse potest, nullo modo prædesse; atqui sic se habet interpretatio de quâ agitur.

1° Ex supra dictis omnibus antiquis versionibus et paraphrasibus, priscis omnibus tum Judæorum, tum Christianorum interpretationibus adversatur; neque id diffitetur auctor Litt. criticarum, p. 151, 174 et seqq.

2° Textui hebræo non innititur eadem interpretatio; nam, etsi *schebet* sæpius in Scripturis tribum significet quàm sceptrum et auctoritatem supremam; attamen, ut ad hanc vel illam significationem in Jacobæo vaticinio determinetur, inspiciendum præsertim quæ acceptio ad propriam magis accedat, quæ loco explicando magis congruat, quæ sit hujusce loci cum aliis in quibus eadem vox legitur affinitas; atqui horumce trium accurata circumspectio, *schebet* in vaticinio Jacobi tribum significare non suadet. Nam primò acceptio *schebet* ad tribum designandam non magis quàm altera ad propriam hujusce nominis significationem accedit. *Schebet* enim sensu proprio significare baculum et virgam, tractatumque esse illud

nomen ad regimen auctoritatemque significandum, quia *schebet* utuntur qui imperant, omnes consentiunt hebraicè periti. Porro acceptionem *schebet* pro *tribu* esse pariter metaphoricam non ambigitur, sed de origine ejusmodi metaphoræ duæ sunt sententiæ. Alii cum Kircherò in Concordantiis, aiunt *schebet* esse *tribum*, quia tribus est ex patre, ut ramus, seu virga ex arbore. Alii ut Menochius, lib. 1 de Republ. Hebræorum, cap. 4, metaphoram inducunt quòd unicuique tribui, in signum auctoritatis sibi propriæ, sua esset peculiaris virga, quam principes tribum gestare consueverant, ut ex Numerorum 18, v. 2, colligere est. Ex his duabus sententiis utramlibet eligas, planum est acceptionem *schebet* ad significandam *tribum* non magis alterâ esse naturalem, nec minori intervallo à propriâ distare.

Eadem acceptio verbis vaticinii secundò minùs congruit. Nam si *schebet* interpreteris *tribum*, hæc tautologia admittenda erit: *Tribus non recedet à tribu Juda*. Non inficior in Hebræis frequentes esse redundantias quæ vocantur Hebraismi, sed fasne est ejusmodi redundantias in sacro contextu pro libito fingere, nullâ cogente necessitate, contradicentibus omnibus versionibus et Scripturæ interpretibus, seu Judæis, seu Christianis? Deinde sic argumentari licet: qui prædictis, Judæ fortitudine, numerositate ac victoriis, contextè ait *schebet* à Judâ non auferendum, neque ducem seu legislatorem usque ad Messiam, nonne *schebet* seu virgæ nomine censendus est *sceptrum* et auctoritatem, potiusquàm *tribum* intellexisse? atqui prædictis Judæ fortitudine, numerositate et victoriis, Jacob contextè ea protulit: *Non auferetur schebet à Judâ, nec dux*, etc., ergo. Denique loca in quibus *schebet* tribum designat cum vaticinio affinitatem non habet. Nam *schebet* in vaticinio pronuntiatur absolutè et in iis circumstantiis in quibus agitur de fortitudine et victoriis Judæ, et de duce ex femore ejus. Ubi verò *tribum* significat ad hunc sensum restringitur aliquo addito, præsertim verò adjectione appellationis propriæ tribuum, v. g. Genes. 49, v. 16 et 28; Num. 32, v. 33, et cap. 36, v. 3; Deuteron. 3, v. 13, item 10, v. 3, etc., 18, v. 1; Josue 4, v. 5, et 7, v. 18; lib. 1 Regum 10, v. 21, et lib. 3 cap. 12, v. 21; Paralip. 1, cap. 27, v. 16, et alibi sæpiùs. Itaque non innititur hebræo contextu, imò eo refellitur recens illa interpretatio vaticinii Jacobæi.

3° Judæis convincendis non prodest illa interpretatio. Mirum sanè illam haberi ab adver-

sariis tanquàm omnium adversùs Judæos controversiarum finem. Ergone ignorârunt de tribuum et familiarum omnimodâ confusione Judæos Christianis non consentire, atque hanc ipsam de quâ agimus, nominis *schebet* interpretationem inter excogitatas à recentioribus Rabbiniis numerari? «Dicere possumus, inquit Rabbi Manasse in Conciliatore, quæst. 65 in Genes., exponens undecimam sententiam, mentem Patriarchæ fuisse, quamvis decem tribus captivas abducturus esset Assyriorum rex in terras nobis incognitas, tribum Jehuda tamen nunquàm sublatam iri, hoc est, ablatam ex oculis et commerciis ac notitiâ hominum; sed semper fore ei legesatores in medio pedum, hoc est, sapientes à quibus doceatur usque ad Messie adventum, per quem imperium sit resurrecturum. Hæc si placet sententia, vertes: *Non tolletur tribus Juda, nec legislator è medio pedum ejus donec veniat Silo, et illi congregatio populorum*. » Reponunt nullum esse Rabbiorum effugium, neque id negabimus; verùm id effugium, quod cumque sit, num tantâ præcluditur facilitate, quantâ commonstratur sceptri Judæ defectio? num Judæi Hispani se ex Judâ non prognatos faciliùs concedent, quàm nullum posse à se orbis locum assignari, in quo Judæi summâ rerum potiantur? ergo convincendis Judæis non prodest illa expositio.

4° Imò plurimùm obest. Nam quisquis cum Rabbiniis de religione velitatus est, arbitrariis eorum textûs hebraici interpretationibus sese potissimùm expertus est retardari. Magnopere igitur ad eos convincendos interest ne versionum antiquarum, paraphraseon chaldaicarum, et interpretationum à veteribus eorum Rabbiniis traditarum rejiciatur auctoritas. Ergo cùm juxtâ ejusmodi versiones et interpretationes vox *schebet* in vaticinio Jacobæo tribum non designet, non potest ejusmodi vox pro tribu ibi accipi, quin controversiis adversùs Judæos finiendis magnum impedimentum afferatur.

SOLVUNTUR OBJECTIONES. — Objicies 1° (1). Auctoritas veterum translatorum, paraphrastarum, Rabbiorum, ipsorumque Ecclesiæ doctorum, hic nullius est momenti. Nam non agitur de facto quod hominum testimonio probari indigeat, nec de voce cujus sensus in dubium revocetur. Omnes consentiunt nomine *schebet* in Scripturis baculum designari quinquagies, tribum duodecies quindeciesve, sce-

(1) Joncourt, Lettres crit., p. 156 et suiv.

ptum ter aut quater; ergo auctoritate et testimoniis dirimenda non est quaestio quam tractamus, sed rationum numero et pondere.

Nego ant. Nam quomodo ad nos usque transmissæ sunt vis et potestas verborum quibus sermo hebræus à bis mille et amplius annis in solis Bibliis superstes constat? nonne traditione, ac imprimis ejusmodi translatorum ac veterum scriptorum? qui ergo eorum testimonii unanimis pondus hic sperneretur?

Ad probationem, respondeo misceri vera falsis in antecedente. Quærimus quid in Jacobi vaticinio voce *schebet* designetur, seu quamnam ideam illi voci, prout in hebræo legitur, alligaverint Hebræi? num tribum eo nomine intellexerit Jacob, num sceptrum et auctoritatem supremam? atqui idipsum est quaestio facti de quâ sane ratio suadet audiendos antiquos translatore et paraphrastas unanimiter sentientes, ipsisque suffragantes Rabbinos veteres, necnon doctores Ecclesiæ præsertim hebraicè peritos. Non nego tamen suas etiam esse rationi partes in ejusmodi quaestionibus de facto dirimendis. Ad eam pertinet inter varia loca in quibus vox eadem legitur, et quorum sensus aliunde notus est, instituenda comparatio. Ipsius est expendere undenam vox originem ducat, quot exprimendis nata sit, quis ejus sensus loco exponendo magis congruat. Verùm hæc non semper in hebræis, uti in aliis idiomatibus, locum habere possunt; quia scilicet genuina hebræi idiomatis vocabula solis Bibliis suppeditantur, in quibus plurimæ voces semel tantum occurrunt, vel saltem non eodem sensu repetuntur; v. g., vox *Schiloh* quam in eodem Jacobi vaticinio legimus, nullo alio in loco Scripturæ eodem sensu deprehenditur. Vox *schebet* ibidem usurpatur absolute, ut diximus, et eâ ratione quæ cum iis textibus in quibus tribum designat, nullam similitudinem refert. Ergo hic præsertim non licet solis velle ratiociniis certare, spreto omnium versionum antiquarum, omnium paraphratarum et veterum Rabbiorum, omnium denique Ecclesiæ doctorum testimonio.

Inst. Quod attinet ad 70 Interpretes, 1º agitur de vaticinio eorum ætate nondum completo, ac proinde de re obscurâ, ipsisque non comperatâ. Deinde illi interpretes erant Judæi; Judæi autem nationi suæ maximè student; potuerunt igitur 70 Seniores *schebet* interpretari *principatum*, ut populi Judaici gloriæ apud nationes exterarum consulerent. Tandem paraphraseos potius, quàm versionis accuratæ eo loci secuti

leges, nomen *schebet* voce *principis* videntur astutius reddidisse, quia natio, quo scripserunt tempore, principibus ex genere sacerdotali, non regibus parebat; ergo 1º 70 Interpretum hic posthabenda auctoritas. 2º Ex veteribus Judæis alii 70 Interpretum vestigia tenuerunt, re maturius non expensâ, et nomine *sceptri*, loco vocis *principis*, duntaxat adhibito, textûs ad litteram reddendi causâ; alii eandem interpretationem libenter amplexi sunt, quia Christianis non minorem ferè quàm sibi difficultatem parit; alii denique *schebet* exposuerunt virgam tribulationis, ut illud vaticinium Christianis eriperent. Veterum igitur paraphratarum, translatorum et Rabbiorum non etiam velat auctoritas quominus nomine *schebet* intelligamus tribum. 3º Ecclesiæ Patres, si Origenem, S. Hieronymum, et alios quosdam excipias, non fuerunt hebraicè periti; doctissimi verò Judæos in addiscendo hebræo sermone magistros habuerunt, et ab illis ejusmodi interpretationem acceperunt.

Respondeo ad singula paucis. Ad primum, imò maximi ponderis cò loci esse debet 70 Seniorum testificatio, quippe quibus ad cognoscendam vocum hebræarum potestatem multa procul dubio adfuere instrumenta quæ hodiè desunt. Quæ verò opponuntur ad eorum infirmandum fidem nullius sunt momenti. Frustrâ 1º objicitur actum de re obscurâ. Tum quia falsum est omnem prophetiam ante eventum esse obscuram; imprimis vaticinium Jacobi olim à Judæis intellectum fuisse ex eo colligitur, quòd deficiente eorum republicâ, Messiae promissi tempora instare crediderint. Tum quia sequeretur alia sacrorum vatum oracula, 70 Seniorum ætate nondum completa, non potuisse ab iis accuratè verti. Tum quia aliud est sensum verbis expressum reddere, aliud est sensum hunc aperire et explicare. Hoc posterius fieri nequit, cum de rebus nondum comperitis sermo sit. Ad prius autem satis est, si interpres vim verborum ac linguæ indolem percalleat.

Frustrâ 2º objicitur 70 Interpretes gloriæ nationis suæ fortè magis quàm veritati providisse, dum *schebet*, *principatum* interpretati sunt. Ergone licet absque teste, absque ullo fundamento, in gravi ejusmodi suspitione illustres ac conspicuos viros ponere? Si famæ populi Judaici tantoperè 70 studuerunt, qui igitur quæcumque in Pentateucho et in aliis sacræ Scripturæ libris de ingrato animo, duritiæ cordis, et aliis nationis suæ vitiis, graphicè

describuntur, gentium idiomate publici juris fecissent? Quod additur de calliditate 70 Virorum in usurpandâ voce *principis* loco *sceptri*, non contumeliarum minùs nec plus soliditatis habet. Num fidus interpres de verbo ad verbum reddere semper tenetur? Nonne vox *princeps* eo in loco æquivalet *sceptro* principatum seu auctoritatem supremam designanti?

Ad secundum, 1^o gratis supponitur plurimos è veteribus Judæis 70 Interpretum solâ auctoritate ductos nomine *schebet* sceptrum intellexisse. 2^o Saltem auctores Paraphraseon chaldaicarum de hoc plagio accusari non possunt. 3^o Consultò exaggerantur difficultates, quæ in defendendâ sententiâ vulgari circa *sceptri* initia et continuationem occurrunt. Has esse nullas non contendo; sed, si non sine negotio, attamen dilucidè et accuratè solvuntur. Cæterum ejusmodi difficultates à Judæis urgeri non possunt, quippe qui supremam auctoritatem, tum post captivitatem Babylonicam et regnantibus Assamonæis, tum durante illâ ipsâ captivitate penès Judam permansisse unanimiter arbitrantur. Consule Helvicum apud Criticos sacros T. 8, p. 127. 4^o Sensu vaticinii semel fixo et determinato, difficultates illæ ad defendendam Judæorum causam usui esse non possunt, quia Judæo jam solvendæ sunt, et iis prætermisissis ab illo inquiri potest, ubinam extet Judæ sceptrum quod ex vaticinio usque ad Messiam erat permansurum? 5^o Quis dixerit tam esse manifestum auctoritatem supremam nullo vero sensu in Judâ usque ad Christi tempora permansisse, quàm liquidò constat nullibi jam extare Judæos in unum reipublicæ aut imperii nomen coadunatos? eò tamen propè recidunt quæ in objectione dicuntur, acceptione *schebet* ad designandum principatum, non minorem ferè Christianis quàm Judæis difficultatem pari. 6^o Acceptio vocis *schebet* pro virgâ tribulationis, Rabbiorum recentiorum commentum est.

Inst. iterùm. Nomen *schebet* in prophetiâ Jacobi pro *tribu* esse accipiendum, suadent tum Scripturæ usus, tum abyssus difficultatum in quas alterius interpretationis defensores coguntur præcipites abire; ergo, etc.

Nego antecedens, in quo falsum supponi ex dictis facilè colligere est.

Objicies 2^o Fatendum est *schebet* in vaticinio Jacobæo significare *sceptrum* et auctoritatem; verùm hæc auctoritas illa ipsa est quæ secundum Jacobi institutionem, et ex nativâ rei conditione unicuique tribui propria fuit. Nimirum

spectari debent duodecim filii Jacob, ut totidem tribuum Principes ab illo Patriarchâ constituti; proindeque, cùm Judæ promittitur *sceptri* continuatio usque ad Messiam, *sceptrum* explicandum est de illâ auctoritate tunc Judæ in suam tribum concessâ. Auctoritas ejusmodi, quâ tribus Juda in ratione tribus constituebatur, in eâ usque ad Messiæ tempora, uti prædictum fuerat, permansit, aliis tribubus simili potestate, quam pariter acceperant, jam longè antea spoliatis. Ita Scherlock in Dissertatione sup. citatâ ad calcem operis, cui titulus: *De usu et scopo Prophetiæ*, etc., qui ipse observat hanc suam opinionem, quantum ad substantiam, non differre ab eâ quam expendimus.

Nego antecedens. Nam auctoritas singulis tribubus propria, quâ unaquæque in ratione tribus constituebatur, non erat potestas suprema. Num enim potestate supremâ fruitæ sunt tribus singulæ sub durâ Ægyptiorum servitute, sub regimine Moysis, Josue, et plurimorum judicum, sub absoluto regum imperio? Auctoritas igitur unicuique tribui propria, erat supremæ inferior, atque postestati summæ quâ variis temporibus diversâ regiminis formâ rectus est integer Hebræorum populus, subordinata; neque id inficiantur, quorum hic expendimus interpretationem.

Atqui nomine *schebet* in Jacobi oraculo non designari potestatem tribuum constitutivam supremæ inferiorem, iis ferè omnibus argumentis probatur, quibus conclusionem confirmavimus. 1^o Enim exiguum ejusmodi imperium, ac inferiorem potestatem nomine *schebet* in vaticinio Jacobæo intelligi, non modò Paraphrases chaldaicæ ac veteres Judæorum Christianorumque interpretationes, non patiuntur, sed neque etiam versiones antiquæ. Nam vox ἄρχων, *princeps*, quâ utuntur septuaginta Interpretes, et voces *virga*, *sceptrum*, quas aliæ versiones adhibent, sine addito prolatae auctoritatem supremam designant, non verò potestatem supremæ inferiorem. 2^o Cùm *schebet* in hebræo codice hic legatur absolutè et sine addito; cùmque ubi tribum, vel auctoritatem tribui specialem designat, ad hunc sensum aliquo restringatur addito, ut diximus; sequitur interpretationem, de quâ agimus, hebræo non consentire. 3^o Eadem interpretatio contra Judæ os nulli usui esse potest; si quidem tribum Juda non omni imperio spoliata contendunt Judæi; nempe *schebet* de jurisdictione quâdam exiguâ nonnulli insignes Rabbini recentiores spontè explicant: Abravaneles ex Davide ortos

in captivitate Hispaniæ Galliæque Israelis capita fuisse tradunt; ac tandem aiunt etiamnum conspici multis in locis quamdam jurisdictionem habere tribu Juda ortos, et reliquorum capita esse: « quod exiguum imperium, inquit Manasse, Conciliatoris pag. 92, usque ad tempora Messiae duraturum tunc augebitur; nam illi parebunt nationes. » Jam verò non me latet hæc nec solida esse, nec opinioni quam expendimus, in omnibus consona. Sed id unum observare animus est, responsiones, quas, positâ ejusmodi sententiâ, ex illis Rabbiorum suorum dictis Judæi possunt depromere, non tantâ facilitate iis eripi, quantâ adversus eos evidentiâ commonstratur verum Judæ *sceptrum* et imperium nullibi terrarum existere. Proinde, etc. 4° Causæ Christianorum nocere potest. Quia cum repugnet Paraphrasibus, ac Judæorum veterum interpretationibus, imò et versionibus, ut dictum est et amplius mox patebit; arbitrariis Judæorum recentiorum expositionibus ansam præbet.

Inst. 1°. Non adversatur illa interpretatio versioni 70 Interpretum, vox enim ἄρχων ab iis solet usurpari ubi de principibus tribuum agitur. Numer. capitibus 2 et 4, etc.; ergo.

Dist. Solet ab iis usurpari cum addito, concedo; sine addito, nego. Aliud significat *princeps* sine addito, aliud significat *princeps tribus*. Non aiunt 70 Seniores *principem tribus* non defuturum in Judâ usque ad Messiam, sed simpliciter *principem* non defuturum. Iis autem in locis in quibus ἄρχοντες nomine *principem tribus* designant, semper vox ipsa *tribus*, aut aliquid æquivalens adjungitur; proindeque, etc.

Inst. 2°. Jacob filios suos Genes. cap. 48 et 49, principes tribuum constituit. Nam 1° illius institutionis nullum aliis in locis Scripturæ vestigium deprehenditur. Num Moyses fundamentalem regiminis Israelitici constitutionem silentio prætermisisset? 2° Vel auctoritas Jacobi post ejus mortem ad singulos ipsius filios tacitè transmissa est, vel ii ab ipso principes tribuum singularum sunt constituti. Atqui non prius, alioqui duo filii Joseph non fuissent duarum tribuum capita, sed unicam tantum tribum, duce suo patre Josepho adhuc vivente, efformassent; ergo. Hinc Jacob, Genes. 48, expressè Josepho duplicem assignat portionem, aitque v. 5: *Ephraim et Manasses sicut Ruben et Simeo reputabuntur mihi*. 3° Duodecim filios suos, ut totidem referentes ac repræsentantes tribus, Jacob alloquitur Genesios 49, quod et Moyses, v. 28, ipse annotavit, 4° Ibid. v. 16,

Jacob ait: *Dan judicabit populum suum sicut et alia tribus in Israel*. Unde colligere est quæ fuerit potestas à Jacob principibus tribuum collata. Nempe unumquodque earum caput tribui suæ peculiari jus dicebat. Hæc autem auctoritate statim à morte Jacobi principes tribuum fungi cœperunt; ad seniores Israel, quibus commissa rerum administratio, jussa Dei per tulit Moyses Exodi cap. 5, v. 15, cap. 12, v. 21, cap. 19, v. 7; populusque, Exodi 34, v. 31 et 32, à suis ducibus manifestè distinguitur. Porro, si Jacob duodecim filios suos totidem tribuum principes constituit, nonne asserere pronum est *sceptro*, quod in Judâ continuandum sanctus Patriarcha vaticinatur, hanc ipsam auctoritatem Judæ in proprios tribules concessam adumbrari? ergo.

Nego antecedens, nempe Jacob filios suos constituisse principes propriè dictos tribuum suorum; neque id probant quæcumque in probationem afferuntur. Enimverò, si filii Jacob tribuum principes veri, et judices constituti fuissent, si ejusmodi auctoritate penes se consistente statim à morte patris fungi cœpissent, si seniores, ad quos Moyses et Aaron verba direxisse referuntur in Exodo, hoc principatu essent potiti; num Moyses Jethro socero suo auctore Exodi 28, ejusmodi regiminis ac judiciorum formam, quæ in populo Israelitico deinceps servata est, instituisse legeretur? Ipsa sacri contextûs verba audiamus loco mox laudato v. 24 et seqq.: *Moses fecit omnia quæ ille (socer ejus) suggererat, et electis viris strenuis de cuncto Israel constituit eos principes populi, tribunos, et centuriones, et quadragenarios, et decanos qui judicabant plebem omni tempore; quidquid autem gravius erat referebant ad eum, faciliora tantummodò judicantes*. Itaque 1° Moyses omnem auctoritatem, omne iudicium penes se primùm retinuerat, et quidem nemine obmurmurante. 2° Potestatis judicialis, suggerente socero suo, alios participes fecit. 3° Quibus hujus auctoritatis partem conferat, ipse *elegit de cuncto Israel, constituitque principes populi, etc., qui judicarent populum omni tempore*. 4° Electis ejusmodi, pro arbitrio, de illâ potestate impertit: *Quidquid autem gravius erat referebant ad eum, faciliora tantummodò judicantes*. Ergo cum egressus est populus ex Ægypto, et ante ejusmodi egressum, complures ex cuncto Israel cæteris præerant quidem, virtute, sapientiâ, ætate, necnon auctoritate paternâ; at verò judiciali potestate, ac propriè dicto principatu nemo præter Moysen.

Ad primum, loco Exodi mox citato et Deuter. 16, v. 18, item 17, v. 8 et 9, et alibi, constitutio regiminis quod in populo Israelifico observari debuit, enarratur. Ad secundum, Jacob, Gen. 48, id solum instituit, futurum ut Ephraim et Manasses filii Joseph haberentur ut duarum tribuum capita, quibus singulis proinde portio propria terræ promissæ esset tribuenda. Hæc imaginem referunt ultimæ Jacobi voluntatis, qui terræ patribus suis sibique, in hæreditatem à filiis suis possidendam à Deo concessæ, duplicem partem Joseph charissimo filio suo assignat. Adduntur prophetiæ de populis ex utroque fratre nascituris. Verum nihil quidquam illa habent commune cum institutione filiorum Jacob in veros ac propriè dictos tribuum principes. Joseph ac deinde Ephraim et Manasses, quemadmodum et alii filii Jacob in terrâ alienâ peregrini eandem in suos post patris sui mortem, auctoritatem habuere, quam in illos omnes sanctus Patriarcha, dum viveret, exercuerat.

Ad tertium, si filii Jacob, Geneseos 49, tribus suas singuli referebant, ergo verba quæ ad ipsos Jacob dirigit, intelligenda sunt de eorum futurâ posteritate, nec ullo pacto cogimur *sceptrum* in vaticinio commemoratum de principatu jam tum Judæ collato explicare.

Ad quartum, hæc verba, *Dan judicabit populum suum*, etc., significant, ut Vatablus observat, futuros judices ex tribu Dan, ex quibus Samson; illa verò, *sicut et alia tribus in Israel*, intelligenda sunt, annotante eodem, quasi dictum esset: *Si quæ alia sit quæ judicet, et illa judicabit.*

Quæ adduntur de seniorum administratione et principatu, dum servitute durissimâ in Ægypto populus premebatur, miror prolata fuisse. Si quis de magni momenti negotio totam, v. g. Metensium Judæorum Synagogam spectante, cum iis colloqui vellet, num ad plebem eorum, infantes, mulieres, idiotas verba faceret? nonne seniores, ac majoris ponderis viros adiret? ergone illi Judæorum Metensium coryphæi principatu propterea potiuntur? Itaque, etiamsi Moyses ad seniores Israel jussa Dei pertulerit, nullo pacto sequitur, etc.

Instabis 3°. Omnes versiones in hunc sensum conspirant: *Non deficiet*, seu, *Non auferetur sceptrum de Judâ*; atqui illa verba sceptrum penes Judam jam existens supponunt. Etenim dicine potest non auferendum, quod nondum possidetur? Ac hæc, oraculum Jacobi nullam sceptri concessionem sonat, ejus confirmatio-

nem solummodò continet; atqui confirmatio privilegii non existentis nulla esse potest; ergo.

Nego minorem. Illa verba, *Non deficiet, non auferetur sceptrum*, propheticè dicta, supponunt duntaxat sceptrum penes Judam aut existens aut exiturum, non verò illud jam extitisse necessariò arguunt.

Ad primam probationem, distingo: non auferendum dici nequit quod nec possidetur, nec possidendum est, concedo; quod actu non possessum, aliquando possidendum est, nego. Jacob eventura novissimis diebus (Genes. 49, v. 1) filiis suis prænuntiat. Judæ numerosas posteritatem futuram, ejus fortitudinem, victorias vaticinatur; deinde addit sceptrum ab eo non auferendum, donec Messias veniat; planum est ejusmodi Prophetiâ supponi ac prædici sceptro Judam aliquando potiturum; sed eum, dum vates divinus loquebatur, in sceptri possessionem jam venisse quo pacto ex oraculi verbis colligi queat, hoc me fugit.

Ad secundam probationem, negari potest major. Nam sceptrum à Judâ aliquando possidendum manifestè supponit Jacob, ac proinde sceptri promissio et concessio verbis prophetiæ implicitè comprehenditur; propriè dictam verò ullius prærogativæ confirmationem, seu ratihabitionem, et iteratam approbationem oraculum non continet; illo tantum enuntiatur futurum ut Judas sceptro quondam donandus, eo nunquam ante Messiae tempora excideret.

Hinc minor sic potest distingui: confirmatio, id est, ratihabitio et iterata approbatio privilegii non existentis nulla est, concedo; confirmatio, id est, assertio continuationis privilegii prædicti et aliquando habendi, seu diuturnitas privilegii quondam exituri divinitus pronuntiata, nulla est, nisi antea privilegium possideatur, nego. Quis unquam dixerit sceptri olim penes Judam futuri continuationem ad usque tempus Messiae, non posse prædici, nisi expressis verbis observet Propheta se de sceptro futuro sermonem habere? Quasi verò res ipsa ejusmodi animadversionem postulare, vel conditio Judæ in terrâ alienâ tunc existentis, vaticiniorum indoles, ac verba Patriarchæ se de novissimis diebus loqui advertentis, non satis admonerent initia sceptri cujus duratio prædicatur, ad tempus futurum referri.

Cæterum, cur tanta hic fiat in privilegii notione commoratio, non facilè perspicitur. Juxta opinionem quam refellimus, nullo potuit Judas privilegio frui, dum eum Jacob allocutus est. Dicitur quidem potitus sceptro, at eo pariter

fruebantur alii Jacob filii. Privilegium speciale Judæ non in sceptro sibi concessoprecisè, sed in ejus diuturnitate singulari usque ad Messiam, totum repositum est. Nullum ergo privilegium sibi vaticinio confirmatum possidebat Judas, dùm Jacob vaticinatus est.

Inst. 4^o Ad Jacobæi oraculi explicationem satis est *sceptro* auctoritatem ejusmodi designatam fuisse, quâ reges et principes Jacobi ætate pollebant; atqui regibus illis procul dubio auctoritate pares erant principes tribuum. Neque enim horumce regum auctoritas supremæ potestati, quâ majestatem regiam hodiè potiri conspicimus, æquiparanda; Abraham legitur Genes. 44, v. 14, cum 318 servis suis, ac amicorum suorum quibusdam auxiliariis copiis quatuor reges vicisse; terra quam inter se tribus partitæ sunt, triginta duobus regibus parebat; num istis regibus potestate inferiores fuerunt tribuum principes? Ergo, etc.

Nego minorem. Fatendum multos eâ ætate reges extitisse quorum imperia arcetissimis finibus erant conclusa. Sed illorum potestatem supremam fuisse ex antiquis monumentis colligitur, et præsertim ex Scripturâ sacrâ quæ iisdem verbis ejusmodi principum dignitatem designat, quibus regnum Ægypti et aliorum potentissimorum conditionem exprimit. Nempe eos perinde *reges* vocat, eorum ditiones *regna* appellat, pares eos facit dominatione in subditos. Igitur cùm detur et planum sit ex dictis auctoritatem principum tribuum fuisse inferiorem supremæ, sequitur, etc.

Ad probationem, solutio ex dictis patet: supremam regum auctoritatem in iisdem, in quibus nunc sita est, olim quoad substantiam constituisse, Scripturis et veteribus antiquæ historiæ instrumentis edocemur; quamvis non eodem semper apparatu emicuerit, nec eadem semper fuerint tum ditionum amplitudo, tum numerus opesque subditorum.

Conclusio 2. Nec præstantia tribus Judæsupra cæteras tribus, nec Synedrii auctoritas, nec jus et proprietas sceptri ab ejus usu separata, nec æterna potestas à Messîâ possidenda, nec regiadignitas in vaticinio Jacobæo nomine *sceptri* designantur; benè verò potestas suprema, quæcumque futura esset forma regiminis.

Sex sunt conclusionis partes. Probatum prima pars, nempe præstantiam Judæsupra cæteras tribus in Jacobi prophetiâ *sceptro* non designari. Nam vox hebræa *schebet* prout hic adhibetur, voces *virga*, *sceptrum*, quas usurpant aliæ versiones, vox *princeps* quâ utuntur sep-

tuaginta Viri, quidquam amplius merâ honoris præstantiâ significant, nec nisi de supremâ potestate explicandæ videntur. Hinc paraphrastæ et veteres Judæi, nec non ferè omnes christiani interpretes summum principatum eò loci designatum intellexerunt; ergo.

Probatum secunda pars, nempe auctoritatem Synedrii in Jacobi vaticinio *sceptro* non adumbratam. Nam 1^o senatus ille 70 Seniorum à Moyse Num. 41 institutus, nullo titulo ad tribum Judæ magis quàm ad alias tribus pertinuit. Quippe ex omnibus tribubus eos elegit Moyses, à quibus in regimine totius populi Israelitici adjuvaretur. Manifestissimè id sacro contextu expressum est: *Congrega mihi*, inquit Deus, v. 16, *septuaginta viros de SENIBUS ISRAEL, quos tu nôsti quòd SENES POPULI sint.* et v. 24. Moyses refertur congregasse *septuaginta viros de SENIBUS ISRAEL.* Audis illos 70 fuisse de *senibus Israel*, de *senibus populi*; sed ante separationem ducem tribuum constat nomine *Israel* omnes tribus fuisse designatas; idem etiam nomine *populi* tunc significatum, innumera exempla indubitatum reddunt; ergo non magis ex tribu Juda quàm ex aliis tribubus constituit concilium 70 Seniorum. Hoc confirmatur ex praxi Moysis, qui quotiescumque ad negotia quævis pertractanda certum aliquem prudentum voluit numerum assumere, toties eos selegit ex cuncto populo, sapienter sanè, ut scilicet unicuique tribui satisfaceret. Sic Exodi 18, principes et judices elegit *de omni plebe, de cuncto Israel.* Sic Numer. 13, duodecim exploratores in terram Chanaan missurus, ex singulis tribubus Israel singulos deligere curavit. Atque hanc œconomiam deinde à Judaico populo observatam ex historiâ novimus; referunt enim Aristæus, Josephus et Eusebius Sapientes 72, quos ad Philadelphum Ægypti regem ut in græcum sermonem sacra Biblia converterent, misit Eleazarus, magnus Judæorum Pontifex, senos ex singulis tribubus assumptos fuisse.

2^o Factane fuit à Moyse in perpetuum ejusmodi cœtûs institutio? magnus ille Judæorum senatus cujus cunctos judices, uno excepto, Herodes interfecit, ab istâ Moysis constitutione sumpsitne exordium? de his maximè controvertitur.

Fatendum quidem plerosque tum ex Catholicis, tum ex Protestantibus de magni Judæorum Synedrii antiquitate, auctoritate, continuâque saltem usque ad Herodem duratione nullos dubitasse quos inter præsertim notandi, præter Galatinum supra laudatum, Tostatus,

quæst. 31 et 32 in cap. 11 Numer. : Cornelius à Lapide ibid. Grotius in commentariis passim, et lib. 1, de jure belli et pacis, cap. 3, art. 20. Seldenus de Synedriis; Sigonius, de Republ. Hebræorum lib. 6, cap. 7. Verùm stant ex adverso insignes etiam eruditi. Doctissimo Petavio, lib. 2 de doctrinâ temporum, cap. 26, Synedrii origo « à Gabinio manasse videtur, qui Pompeii legatus Hircano restituto, ut auctor est Josephus lib. 14 Antiq., cap. 10, populum in quinque partes distribuit, totidemque συνέδρια constituit. » Pererius ad caput 49 Geneseos, pag. 340, de Synedrio Jacobæum vaticinium intelligi non posse probans, ait neque ex Scripturis neque ex probatis fidei historicis ostendi « talem fuisse unquam in populo hebræo Senatum qualem ipsi depingunt, et permansisse eum usque ad Herodem. » Calmetius in Dissertatione de politiâ Hebræorum initio commentarii in librum Num. pag. 11 et 19 post Basnagium lib. 6 Hist. Judæorum, cap. 1, art. 13 edit. 1716, Judæ Machabæi, vel Jonathanis fratris ejus principatui initia Synedrii alligat.

Isti porrò his præcipuè rationibus pugnant. 1° Synedrii defensores meris indulgere conjecturis, solâque Rabbiorum auctoritate ferè inniti, quorum tamen eâ de re narrationes tot absurdis ac figmentis scatent, ut in multis ac præcipuis circumstantiis debeant emendari. 2° Josephum, Philonem, Origenem, Eusebium et S. Hieronymum, rerum Judaicarum peritissimos, de illo Synedrio prorsus silere. 3° Sub judicium, regum, ducumve post captivitatem imperio, seu de pace, seu de bello, seu de civilibus, seu de religione, seu de abusibus tollendis, seu de novis ordinationibus constituendis actum fuerit, Senatum ejusmodi ante Machabæorum tempora semper siluisse; aut saltem tam diuturno tempore, totque indiversis circumstantiis, nullam septuaginta Seniorum concilii, tantâ, ut putant, auctoritate præditi, expressam in Scripturis reperiri mentionem. Addi potest Moysen, Deuter. 16 et 17, ordinem judiciorum in terrâ promissâ reddendorum instituentem, non ad 70 viros de tribu Juda, aut de omnibus tribubus selectos, causas majores ac difficillimas ultimò cognoscendas referre, sed, c. 17, v. 1, ad sacerdotes levitici generis et judicem, seu summum sacerdotem, ut Vatablus ex Judæis explicat, vel judicem supremum aut regem, ut aliis placet, qui fuerit illo tempore; nolens obedire sacerdotis imperio, inquit v. 12.... et decreto judicis, morietur homo ille. Multis ergo incertum Numer. 11, in perpetuum instituerit.

3° A Moyse ad Herodem Synedrium steterit, sanè ejus auctoritas non fuit suprema. Volunt Rabbini ipsosmet reges senatûs ejusmodi judiciis fuisse subjectos; vel unum igitur regem Juda appellent, qui ad ejus disquisitionem fuerit vocatus. Peccavère Saul, David, Salomon; complures regum Judæ in crimina gravissima lapsi sunt; seu poenitentiam egerint, seu illos non poenituerit, nullus eorum coram Synedrio ad vadimonium venisse legitur. Imò magistratus et Judices etiam supremos, ubi opus fuit, à Regibus Judæ sunt constituti; non semel Judices, ipsique summi nationis Pontifices dignitate suâ nullo intercedente senatorum concilio, à Regibus dispoliati; bella gessère, ac fœdera pacis inivère illi principes, nullo Senatu convocato; uno verbo reges Judæ more aliorum regum omnia moderati sunt; nec Synedrium, nimiam eorum potestatem reprimere, vel effusam populorum vivendi licentiam coercere, aut pravas in imperio inductas consuetudines præcidere unquam, auctoritate suâ interpositâ conari visum est. Itaque, si Judæorum Sanhedrin perpetuò extiterit, ejus auctoritas supremæ potestati longè inferior fuit, proindeque nomine sceptri in vaticinio Jacobi designari non potuit.

Probatur tertia pars, nempè proprietatem sceptri ab ejus usu separatam nomine *sceptri* à Jacobo non præsignificari, quia si nullus fuerit in Judâ sceptri usus à captivitate Babylonica usque ad Christum, nulla etiam per id temporis spatium, sceptri proprietas Judæ competit. Nam jus ad sceptrum, seu sceptri proprietas à quocumque ejus usu separata nulla esse potest, ubi nulla spes legitima in hujusce usûs possessionem aliquandò redeundi; quocirca Cajetanus alique sententiæ, de quâ agimus, defensores existimant Judæ certò affuisse ejusmodi spem usûs sceptri per Messiam olim recuperandi. Atqui nulla spes ejusmodi legitima Judæ esse potuit. Ut enim aliqua ejusmodi spes Judæ manere potuisset, vel principatus in Judâ usque ad Messiam ex Vaticinio permansurus, debuisset non esse temporalis, vel in Christo quoddam temporale sceptrum Judæ redditum dicendum esset. Atqui primò sceptrum quod usque ad tempora Messiae in Judâ permansurum Jacob vaticinatus est, de principatu temporali duntaxat intelligendum esse liquet ex ipso vaticinii contextu, et modò probatur. Secundò, Christus nullum sceptri temporalis usum tribui Judæ reddidit, cum regnum ejus sit mere spiritale, ipseque mo-

nuerit illud non esse de hoc mundo; ergo nulla spes legitima Judæ esse potuit sceptri à Jacobo sibi promissi usum per Messiam recuperandi; proindeque si omni ejus usu privata est tribus Juda à captivitate, omni jure ad illud etiam caruerit necesse est; ergo.

2º Juxta omnium populorum loquendi morem et æstimationem, *sceptrum* auferri censetur, cum auferatur ejus usus, solo jure ad illud relicto, maximè verò si ille usus per plures seculorum revolutiones ablatus maneat, nec unquam recuperetur; ergo cum sentiant adversarii omnem sceptri usum per annos plusquam 500 ante Christi nativitatem Judæ ereptum fuisse; imò nec in Christo recuperatus sit, nec aliâ ratione unquam sit recuperandus; nonne sequitur absolutè pronuntiandum esse, longè antè Chrisum natum, defecisse *sceptrum* Judæ, in hypothesi quòd manserit sola proprietas ab ejus usu separata. Frustra observat Jueninus nullam adversus decreta ac constitutiones Dei quibus jus an *sceptrum* tribui Judæ collatum fuerat; præscriptionem dari posse. Id fatendum: sed primò illa responsio supponit aliquandò principatum Judæ per Messiam fuisse recuperandum, quod jam falsum esse diximus. Secundò verba vaticinii, quo possessio ac permanentia sceptri prænuntiatur, accipi nequeunt sensu ab omnium populorum usu et acceptione alieno; atqui hæc verba, *Non auferetur sceptrum de Judâ... usque ad Messiam*, de nudâ sceptri proprietate, à quovis ejus usu pluribus seculis sejunctâ intelligi ab omnium usu et acceptione alienum est; ergò.

3º Positâ eâ, quàm refellimus, opinione, eatenus contra udæos probatur Messiam advenisse, quatenus confusis eorum genealogiis, nulla ipsos tenet spes legitima Messiae ex Davide aliquandò nascituri, ac principatum Judæ restitutori; atqui licet illud argumentum, uti jam notatum est, peremptorium sit; attamen 1º argumento ejusmodi, in nostrâ sententiâ, aliud splendidius adjungitur desumptum ex defectione *sceptri*, quo Judæos è patriâ exules, ac toto orbe sparsos non potiri ita perspicuum est, ut de eo Rabbini facilius, quàm de tribuum et genealogiarum suarum permixtione convincantur. 2º Tempora adventus Messiae insigni quodam eventu tanquam caractere proprio Jacob signasse dicendus est; id autem locum habet si *sceptrum* accipiatur de principatu Judaico, quem versùs Christi tempora reverà defecisse notum est; character verò ille evanescit, si de proprietate sceptri ab ejus usu separata, de jure

insensibili, de spe in animis legitimè infixâ, prophetiâ explicetur; quid ita? quia horumce omnium defectio sensus animumque minus commovet, nec nisi post aliquod à destructâ Judæorum republicâ temporis intervallum, tribus et genealogiæ ita commisceri potuerunt, ut jam nihil certi prorsus de iis haberi compertum foret. Igitur hæc etiam de causâ negandum est *sceptrum* in vaticinio Jacobæo esse merum jus ad *sceptrum* sine ullo ejus usu, quòd hæc sententia causæ christianæ, certissima argumenta eripiat.

Probatur quarta pars, nempe æternam potestatem à Messiâ possidendam nomine *sceptri* in prophetiâ Jacobæâ non designari. Nam ab hæc doctissimi et illustrissimi Huetii singulari opinione tria mentem avocant, 1º auctoritas veterum seu Judæorum, seu Christianorum, qui omnes *sceptrum* eò loci principatum temporalem interpretati sunt, non potestatem spiritualem Messiae æternum permansuram; 2º, contextus vaticinii; nam antecedentia Judæ posterorum numerositatem, regionis ab eis incolendæ ubertatem, eorum fortitudinem et triumphos spectantia, nihil nisi caducum et temporale sonant. Pariter consequentia, nempe, *Et dux de femore ejus*, annotante illustrissimo auctore, de temporaneo imperio Judæ explicanda; ergo illa intermedia, *Non auferetur sceptrum*, de æternâ et spiritali potestate non possunt intelligi; 3º, duplex significatio quàm voci *donec*, hic alligat doctissimus præsul: nempe quatenus *donec* refertur ad illud prophetiæ membrum, *Non auferetur sceptrum de Judâ*, hanc particulam vult sumi extensivè, et significare *interea*; quatenus ad istud, *Et dux de femore ejus*, relationem dicit, eandem vocem desitivè accipit, ac cessationem principatus temporalis Judæ indicare arbitratur. Atqui præterquàm quòd vox *donec*, ut suprâ dictum est, nativâ suâ virtute ad rei cessationem significandam tendat, adeò ut nunquam extensivè accipiatur, nisi materiâ subjectâ cogente, quod rarum est, neque hic habet locum; fatendum insuper nullum reperiri exemplum unius ejusmodi vocis quæ semel tantum posita duplici simul donetur sensu, cujus alter alterum excludat. Ergo æterna Messiae potestas in vaticinio Jacobæo nomine *sceptri* non adumbratur.

Probatur quinta pars, nempe nec dignitatem regiam illo *sceptro* designari. Quippe sensui prophetiæ respondere debet eventus; cum ergo non permanserit dignitas regia in Judâ usque ad Messiam, si quidem post captivitatem aris-

ocraticum regimen democratico temperatum pluribus seculis apud Judæos viguit; sequitur regiam dignitatem *sceptro* in Judâ usque ad Messiam perseveraturo designatam non fuisse.

Probatur ultima pars, nempe Jacobum *sceptro* significasse potestatem supremam, quæcumque futura esset forma regiminis. Nam illa genuina est *sceptri* interpretatio, quæ non modò illius vocis significationi planè respondet, sed et veterum expositionibus consentanea est, ac cohæret cum eventu. Atqui 1º, interpretatio juxta quam *sceptrum* in vaticinio Jacobæo est suprema potestas, sub quâcumque regiminis formâ, significationi *sceptri* planè respondet; etenim *sceptrum* sine addito, ut in vaticinio legitur, auctoritatis regiæ, aut potestatis regali æqualis, id est, supremæ juxta omnes insigne est. 2º Veterum interpretationibus consentanea est; quippe cùm veteres interpretes tùm Judæi, tùm Christiani, ut ex dictis passim liquet, nomine *sceptri* hic intellexerint potestatem, quæ regibus ac principibus summis propria est, id est potestatem supremam. 3º Eadem interpretatio cum eventu cohæret; mox enim ostendimus potestatem supremam ex quo penès tribum Judæ esse coepit, ad Messiam usque in eâ propriè et accuratè loquendo perseverasse.

De initio, continuatione ac cessatione sceptri in tribu Judâ. — Conclusio I. Tunc *sceptrum* coepit esse in tribu Judâ, cùm regno potitus est David.

Duas partes complectitur propositio. Probatur prima pars, nempe antequàm David regnaret, *sceptrum* in Judâ non fuisse. Nam ex modo dictis, *sceptrum* quod prænuntiavit Jacob, est suprema potestas; atqui ante Davidem suprema potestas non fuit in tribu Judâ. Priusquàm enim populus egrederetur ex Ægypto durâ captivitate oppressus nullo potiebatur principatu. Nec Moyses Israelis dux et liberator, nec ejus successor Josue fuerunt ex tribu Judâ. Ætate judicum, qui ex aliis tribubus plerique ortum duxerunt, penès Israelis optimates summa rerum præcipuè extitit; nec proinde magis ad tribum Juda, quàm ad alias tribus auctoritas suprema pertinuit. Saül erat tribulis Benjamin. Ante Davidis regnum, tribus Juda, etsi tribubus singulis numero, fortitudine, atque etiam aliquâ honoris prærogativâ superior, pars tamen duntaxat, ac veluti provincia fuit imperii Israelitici. Intra eam urbs sedes regni et sanctuarium religionis non consistebant. Ergo nulla ratione dici potest tribum

Juda ante Davidem supremâ potitam esse auctoritate, nec proinde *sceptrum* in eâ tunc fuisse.

Probatur secunda pars, nempe à regno Davidico ducenda esse *sceptri* Judæ initia. Enimverò non modò *sceptrum* tenens cunctaque in regno Israelitico regiâ auctoritate moderans tunc fuit tribulis Judæ, sed præterea Jerusalem urbs Judæ facta est civitas regia, sedes regni, ac totius religionis centrum. In hanc civitatem arca translata fuit, et à Deo præceptum est templum in eâ ædificari.

Dices. Illud verbis ac scopo vaticinii consonare non videtur, quòd tandiù, nempe usque ad Davidem, Juda *sceptro* caruerit; ergò, etc.

Nego antecedens. Vaticinii verbis exprimitur *sceptrum* à Judâ non auferendum usquequò veniat Messias. Ex quo patet eum fuisse vatis sacri scopum, ut spectatori quodam eventu, nempe cessatione *sceptri* temporalis Judæ, Messiae tempora signarentur. Prophetiâ igitur *sceptrum* in Judâ exoriturum, nec modicam ejus futuram durationem præsignificat; sed ejusdem initia non præfinit, statimque ab oraculo emisso ea figi nullo pacto postulat. Imò cùm expressè adverterit Jacob se ea prædicere quæ *novissimis diebus* erant filiis suis *eventura*, Juda non debuit *sceptri* possessionem illicò sibi concedendam expectare. Undenam igitur *sceptri* Judæ initia dignoscere poterimus? non ex vaticinio, sed ex eventu; proindeque, etc.

Conclusio II. Captivitas Babylonica non fuit cessatio et abolitio *sceptri* Judæ, sed tantum ejus intermissio, et veluti interregnum.

Probatur. *Sceptrum* deficit et aboletur, cùm spe ejus recuperandi natio destituta per tempus diuturnum illo spoliata manet, et alienis legibus obtemperat. Tunc verò solùm interrumpitur, cùm respublica seu vi et potestate exterorum, seu bellis intestinis oppressa, pristini statûs recuperandi spem conservans, illum, datâ occasione, post breve tempus reverâ consequitur. Itaque, si post captivitatem Babyloniam tribus Juda in patriam reversa *sceptro* iterum potita sit; si illud captivitatis tempus habitâ ratione durationis imperii Judaici, diuturnum non fuerit; si durante illâ captivitate, spem certam habuerint Judæi in statum pristinum præfixo ac brevi elapso tempore redeundi; si denique, quantum sibi licuit, quantumque opus erat ut possent in hunc statum reverti, propriis legibus interea vixerint; fatendum erit illam captivitatem fuisse tantum intermissio-

nem *sceptri* Judaici, non ejus cessationem et abolitionem.

Atqui 1^o, post captivitatem Babylonicam tribus Juda, duce Zorobabele Davidis postero in patriam reversa, iterum *sceptro* potita est; siquidem ut probabitur sequenti conclusione in veri nominis rempublicam coaluit. 2^o Habitâ ratione durationis imperii tribus Juda, diuturnum non fuit captivitatis tempus. Nam à Davidici regni initio usque ad Herodem à Romanis regem declaratum effluxere plusquam mille anni; ad quam seculorum seriem anni captivitatis Babylonicæ comparati (juxtâ consuetum loquendi morem ubi de imperiorum duratione agitur) ut mera intermissio habendi sunt. V. g., etsi Lusitania annis circiter sexaginta nempe ab anno 1580 usque ad 1640 regum Hispaniæ ditioni adjuncta fuerit et eorum legibus coacta parere; nemo tamen initia regni Lusitaniæ ab anno millesimo sexcentesimo quadragesimo ducenda censuerit. Quid ita? quia, ut imperium illud quod ab anno 1159, coëptum est, et etiamnum floret, olim desiisse et penitus abolitum fuisse meritò diceretur, non sufficit sexaginta annis Lusitaniam legibus alienis subditam fuisse; ergo pariter Babylonica desolatio comparata ad durationem *sceptri* Judaici, tamquam brevi intervallo temporis conclusa censenda est. 3^o Judæis captivis certissima, Deo ipso auctore, spes affulsit de proximo suo in pristinum statum reditu. Nempe ejusmodi reditum Prophetæ vaticinati fuerant; inprimis Jeremias, c. 25, v. 12, et c. 29, v. 10, expressis verbis asseruerat futurum ut post septuaginta annos (ab anno 4 Joachim computandos) captivi liberarentur. Hinc Daniel, cap. 29, v. 2, exhibetur attendens ad *numerorum annorum de quo factus fuerat sermo Domini ad Jereniâam Prophetam, ut complerentur desolationis Jerusalem septuaginta anni*. Et lib. 1 Esdræ, cap. 1, dicitur liberatio populi facta à Cyro Persarum rege *juxta sermonem Jeremiæ*. Ergo de proximo suo in statum pristinum reditu, etc. 4^o Judæi quantum sibi licuit, et quantum opus erat ut possent in pristinum statum reverti, propriis legibus durante captivitate vixerunt. Nam 1^o, in decreto Artaxerxis, Esther, cap. 16, v. 15; Judæi dicuntur *justis utentes legibus*. Quisquis autem fuerit ille Artaxerxes seu Assuerus, planum est inde colligendum Judæos durante captivitate legibus suis esse usos. 2^o Ex historiâ Susannæ, Daniel, 13, v. 5, 34, 41, 50 et 62, manifestum fit aliquam in suos jurisdictionem, ipsâque mortis

pœnâ plectendi auctoritatem Judæis Babylone captivis relictam fuisse. 3^o Denique, quod maximè necessarium fuit, genealogiis suis accuratè conservandis, iisque in acta referendis cautissimè invigilârunt, ut ex libris Esdræ et Paralip. perspicuum est; ergo legibus suis usi sunt, etc., proindeque tempore captivitatis solummodò intermissum est *sceptrum* Judæ. Adde quòd regem Joachin, cujus caput anno 37 transmigrationis sublevâsse Evilmerodach rex Babylonis refertur 4 Reg. 25, v. 27 et 28, etsi captivum, Judæi ut verum regem suum habuerint. Adde etiam meritò conjici posse Judæos Babylonem instar coloniæ fuisse deportatos, quibus urbs hæc recens ædificata frequentaretur. Certè apparet ex Scripturis eos, ut cives potiusquam ut servos in terrâ alienâ habitos fuisse. Jeremias cap. 29, v. 5 et 6, à captivis domos ædificari, hortos plantari, ac civitatis pacem inquiri præcipit, quæ conditionem servilem videntur excludere.

Cæterum, neque ex his, neque ex aliis quæ Rabbini fabulantur, fas est subtiliùs contendere Judam durante captivitate usu *sceptri* non caruisse. Nam 1^o, quæ retulimus à *sceptri* usu valdè differunt; 2^o Rabbistorum historiis plus æquo non fidendum; 3^o, etsi Judæi è patriâ exules aliquo *sceptri* usu potiti essent, illud tamen non fuisset *sceptrum* de quo Jacob vaticinatus est; quippe vaticinium, ut non semel advertimus, terram promissam totum respicit.

CONCLUSIO III. Post captivitatem Babylonicam judaica natio in unam veri nominis rempublicam coaluit; populi Judaici cognomen à Judâ meritò tunc sortita; ab ejusmodi republicâ auctoritatem suam habuere quotquot in eâ usque ad Herodem principatu usi sunt; atque ex his redintegratio *sceptri* Judæ post captivitatem, et ejus permanentia explicandæ.

Probatur prima pars, scilicet populum Judaicum post captivitatem in unam veri nominis rempublicam coaluisse: 1^o ex Prophetarum oraculis; nam juxta vaticinia Jeremiæ cap. 25 et 29, captivitas populi 70 tantum annis erat duratura; atqui, nisi populus Judaicus post 70 annos in patriam reversus veri nominis rempublicam efformâset, ejus captivitas verè et propriè non potuisset dici soluta; ergo.

2^o Ex decreto Artaxerxis apud Esdram cap. 7, ubi sic habetur: *Tu autem, Esdra, secundum sapientiam Dei tui, quæ est in manu tuâ, constitue judices et præsides, ut judicent omni populo, qui est trans flumen; et omnis, qui non fecerit legem Dei, et legem regis* (id est constitutum

istud) *diligenter, judicium de eo erit, sive in condemnationem substantiæ ejus, vel certè in carcerem.* Ubi tria annotanda sunt : primum, quæcumque ad rempublicam administrandam requiruntur, nempe facultatem suis vivendi legibus, auctoritatem juris dicendi, pœnisque capitalibus in contumaces animadvertendi nationi Judaicæ illâ regis Persarum constitutione esse concessam ; alterum, hanc potestatem Judæis non fuisse factam precariò et ad tempus, siquidem nulla hujusce generis limitatio in eo regio diplomate deprehenditur ; tertium, gentem Judaicam, ut sibi præficeret principes, et in unum reipublicæ corpus coadunaretur, non expectâsse donec laudato Artaxerxis edicto id sibi fieret licitum. Jurium sibi à Deo concessorum non inscia natio in patriam redux, Zorobabelem ducem, et alios agnoscebat principes ; atque illud ipsum permisisse censendus est Cyrus, dùm captivitatem solvit. Remansit quidem, uti præceperat Deus, addicta Persarum regibus respublica Judæorum iisque vectigalia pependit, sed ita tamen eorum imperii sese judicabat reipsâ immunem, ut intermissam ex illorum regum jussu extructionem templi, ante impetratam ab eis novam facultatem, suadentibus Prophetis Aggæo et Zachariâ denuò adoriri non dubitaverit, ut refertur lib. 1 Esdræ cap. 5.

3° Ex Machabæorum libris, in quibus Judæi in unum florentissimæ reipublicæ nomen coagmentati exhibentur.

4° Ex Josepho, qui lib. 11. Antiq. cap. 4, n. 8, ait Judæos ex captivitate reversos « Jerusolyma incoluisse, institutâ eâ reipublicæ formâ quæ optimatum est paucorum potestate mixta ; nam pontifices summæ rerum præfuerunt donec Assamonæorum genus regnum obtinuit. » Et lib. 20, cap. 19, olim 8, addit hanc reipublicæ formam fuisse democratiâ aliquâ temperatam.

5° Ex SS. Patribus. S. Hieronymus lib. 1. in Isaiam cap. 1, ad hæc verba v. 6 : *A plantâ pedis, usque ad verticem*, etc., ait : « Post Babyloniam captivitatem sub Zorobabel et Esdrâ ab Nehemiâ Israel reversum esse in Judæam, et antiquum recepisse statum. » Eadem est aliorum Patrum sententia, ut ex eorum locis supra laudatis manifestum est.

6° Ex Judæorum testimonio. Observat. S. Hieronymus loco mox cicato voluisse Judæos « post captivitatem Babyloniam Zorobabelem, Esdram et Nehemiam et cæteros principes usque ad Hyrcanum populo præfuisse. »

Thalmudici in Gemarâ Jerosol. ad titulum Mergilla, cap. 3, folio 74, col. 3, in Gemarâ Babylonica ad tit. *Joma*, cap. 7, fol. 69, verso, et in libro Juchasin, fol. 13, *Israelis magnificentiam, legis coronam in pristinum statum* ab Esdrâ et viris Synagogæ magnæ redintegratam tradunt, apud Seldenum de Synedriis lib. 2, cap. 16, n. 6, edit. Amst. 1679, pag. 441.

Probatur secunda pars, nimirum nationem Judaicam cognomen Judaici populi à Judâ tunc meritò sortitam fuisse. Ac primò quidem quòd illud sortita sit, testis locupletissimus est Josephus lib. 11 Antiq. cap. 5. n. 7. satisque colligitur ex libris Esdræ in quibus nomine *Judæorum et Judæa*, populus è captivitate redux, ac regio quam incolebat, passim (1) designantur.

Quòd autem meritò illud sortita sit cognomen, sic ostenditur. Natio ex insigni et numerosâ Judæ tribu ferè tota constans, cujus nonnisi veluti accessiones erant parva tribus Benjamin et quædam aliarum tribuum reliquæ, jure cognominata fuit *Judaica*, id est, ex Judæ tribulibus potissimum consistens. Et enim præterquàm, quòd res de se manifesta est, Scripturarum etiam confirmatur usu. « Cum enim, ut egregiè disserit Petavius lib. 16, de Incar. cap. 6, n. 8, de tribubus decem ab Assyriorum rege Salmanasaro longè extra fines Judææ deportatis loquitur Scriptura, 4 Reg. 17, v. 18, sic illud expressit : *Iratusque est Dominus vehementer Israeli, et abstulit eos à conspectu suo, et non remansit nisi tribus Juda tantummodò.* Atqui in hac tribu regnoque Ezechiae sacerdotes et levitæ remanserant, necnon Benjaminitæ, tum ex aliis tribubus complures ibidem hæserunt. » Similiter ergo ; etc.

Atqui populus qui è captivitate reversus est, ex insigni et numerosâ tribu Judæ ferè integer constitit. Nam ex libris Esdræ et Nehemiæ apparet ferè solam Judæ tribum, cum parte aliquâ exiguâ tribus Benjamin, paucissimos ex aliis tribubus in Judæam è captivitate rediisse.

Idem testatur Josephus, Antiquit. lib. 11, cap. 1, n. 3 : « Ista Cyrus cùm Israelitis dixisset, inquit, *duarum tribuum principes Judæ et Benjaminis*, simulque levitæ et sacerdotes properè se Jerusolyma transtulerunt. Multi verò apud Babylonem manserunt. » Et cap. 3, postquàm, n. 9, dixit, delectos fuisse ad profectionem Jerusolymitanam patriarum tri-

(1) Lib. 1, Esdr. cap. 5, v. 5 ; cap. 6, v. 7 et 14 ; Lib. 2, cap. 6, v. 18 ; cap. 12, v. 31 et 43 ; cap. 13, v. 12, 15 et 16.

« buum principes cum suis uxoribus, et liberis, et jumentis, » addit, n. 10 : « Atque isti quidem ita profecti sunt è singulis congregationibus numerus certus et definitus... ex tribu Judæ et Benjaminis... myriades 462 et millia octo. Porro levitæ erant 74 ; promis uæ verò multitudinis puerorum ac mulierum numerus erat 40742, » etc. Tandem cap. 5, n. 2 : « Cùm Esdras has litteras accepisset... omnis multitudo Israelitarum in eâ regione mansit. Quapropter duæ tantum tribus, per Asiam atque Europam sub Romano degunt imperio ; decem autem reliquæ tribus usque in hodiernum diem loca trans Euphratem colunt, infinita hominum millia nec numero comprehendenda. »

Probatur tertia pars, nempe ab illâ republicâ auctoritatem suam esse mutuatos quotquot in eâ à captivitate usque ad Herodem principatu usi sunt. Namque 1^o in Machabæorum libris tria de reipublicæ Judæorum regimine observare est, quibus constat ipsosmet Assamonæos à natione auctoritatem suam accepisse. Scilicet primò à Judâ Machabæo et Jonathâ ejus fratre ac successore, sacerdotibus summis et belli ducibus res maximæ, bella gerenda, fœdera ineunda ad populi judicium delata fuerunt, lib. 1 Mach. 5, v. 16, et c. 10, v. 7 et 46. Secundò nomine sacerdotis summi, senatûs nationis, sacerdotum, et reliqui populi negotia publica fuerunt administrata. Quippe illorum omnium nomine scripta est Epistola ad Spartiatas quæ ibidem legitur cap. 12, v. 6 et seqq. Item consociantur etiam eodem libro, cap. 14, v. 20, in Epistolâ Spartianorum ; tum v. 27 et 28, in Epistolâ Judæorum ad Romanos ; denique 2 Machab. 1, v. 10, in Epistolâ eorundem ad Aristobulum. Tertiò Simon ab universo populo Judaico electus est, qui Judæ et Jonathæ fratribus suis succederet. « Respondunt voce magnâ, inquit divinus contextus, 1 Mach. 13, 8, 9, tu es dux noster loco Judæ et Jonathæ fratris tui ; pugna prælium nostrum, et omnia quæcumque dixeris nobis faciemus. » Ipse verò Jonathan ab amicis Judæ Machabæi, vigente post ejus obitum tribulatione magnâ in Israel, in principem belli assumptus fuerat. « Congregati sunt, » ait auctor sacer Ibid. cap. 9, v. 50 et 51, « omnes amici Judæ, et dixerunt Jonathæ... « Te hodiè eligimus esse pro eo (Judâ) nobis in principem et ducem ad bellandum bellum nostrum. Et suscepit Jonathan tempore illo principatum, et surrexit loco Judæ fratris

« sui. » Assamonæi igitur electionis viâ assumpti sunt in principes, atque à natione Judaicâ suam mutuati sunt auctoritatem. Porro ex eo quod de illis habetur expressum, judicare licet quid de aliis Judaicæ gentis ducibus sentiendum sit, nempe eos vel electionis viâ, vel nationis accedente consensu esse principatu potitos.

2^o Ejusdem rei fidejussor est Josephus lib. 12 Antiq. cap. 6, n. 2 : « Multi è speluncis evaserunt et cùm Mathathîæ se se adjunxissent, eum sibi ducem constituerunt. » Et n. 4 : « Postquàm autem à populo universo planctu magno deploratus est, rerum administrationem in se suscepit filius ejus Judas cognomine Machabæus. » Et lib. 13, cap. 1, n. 1 : « Qui reliqui erant ex Judæ (Machabæi) sociis... Jonathâ ejus fratre addito, eum rogabant ut fratrem suum sibi in exemplum poneret, ejusque de popularibus suis curam et providentiam... imitaretur... Tum Jonathan, cùm dixisset se pro illis mortem obitum esse, atque existimaretur nihilo inferior esse quàm frater, Judæorum dux declaratur. » Lib. 20 Antiq. cap. 10, aliàs 8 : « Posterius filiorum Assamonæi, postquàm illis mandata esset gentis præfectura et bellum contra Macedones gessissent, Jonathan pontificem creant, qui septem annis præfuit. » Tandem lib. 1 De Bello judaico, c. 1, n. 3 : « Mathathias Assamonæi filius, unus è sacerdotibus... ad magnam potentiam provocatus, suisque volentibus principatum nactus, quòd ab alienigenis eos liberâisset, post hæc mortur imperio Judæ relicto filiorum natu maximus. »

3^o Hoc ipsum suadet etiam, quia ea est regiminis aristocratici et democratici indoles, ut, ubi illud viget, quotquot principatûs fiunt participes à republicâ id consequantur ; atqui habetur ex Josepho, ut dictum est, et ex Machabæorum historiâ, Regimen populi Judaici post captivitatem aristocratico-democraticum fuisse ; ergo, etc.

Probatur ultima pars, scilicet ex modò probatis redintegrationem *sceptri* Judæ post captivitatem, et ejus permanentiam explicandas. Illa enim exponendæ *sceptri* continuationis via plana est et facilis ; aliæ difficultatibus interclusæ videntur et obstructæ. 1^o Quam amplectimur viam plana est et facilis ; si quidem positus, quæ modò probavimus, tribus Judæ à captivitate ad Herodem supremâ auctoritate, ac proinde *sceptro*, potita verè et propriè di-

cenda est. Namque ad id satis est, quod redux natio Judaica in rempublicam coalita manserit; quòd illa respublica, illud imperium, pluribus de causis supra allatis, tribùs Judæ verè fuerit; quòd ab illà auctoritatem suam hauserint qui apud ipsam, per id tempus, principatum tenuère; quæ tria ex mox probatis constant; ergo, etc. Accedit quòd non modò ratione personarum rempublicam hanc constituentium, sed etiam ratione loci et ditioris, sedis regni, sitùs templi, cultùs religionis, legum denique seu moralium et ceremonialium, seu judicialium, intercesse-rit omniùmmoda convenientia Rempublicam Judæorum à captivitate restitutam inter et regnum Judæ, quod ante captivitatem floruerat. Enim verò ubi de *sceptrorum*, seu coronarum ac regnorum continuatione ac permanentià agitur, ad illa modò enumerata magis attendi solet, quàm ad originem et genus gerentis principatum. Sic, v. g., potens Polonia regnum semper idem florere censetur licet ipsi sæpè imperent reges ex nationibus exteris accersiti et electi. Sic plures meritò computantur seculorum periodi, ex quibus immota stat corona Hispanica, licet hunc dudum gestaverint principes Austriaci, atque etiamnum gerat ex regio Borboniorum sanguine rex prògnatus. Ergo si principatum tenens in Judæorum republica, auctoritatem suam ex eà habuerit, sequitur, etc., modò tamen ejusmodi princeps ex Israeliticà stirpe fuerit; specialis enim illius populi constitutio à Deo stabilita Deuteron. 17, v. 15, omnem alienigenam à principatu excludebat.

2º Quævis alia explicandæ *sceptri* continuationis via difficultatibus interclusa videtur et obstructa. Nam ex variis superius expositis sententiis duæ tantum supersunt quas nondum attigimus. Juxta primam ponitur Machabæos paterno genere ex Judà ortos esse. Atqui id falsum est. Nam constat eos fuisse ex tribu Levi, tum quia Mathathias, Assamonæorum parens, 1 Mach. 2, v. 1, dicitur *sacerdos ex filiis Joarib*, cujus familiam fuisse leviticam, ex 1 Paralip. 24, v. 7, indubitatum est. Tum quia Assamonæi sacerdotii summi muneribus functi sunt. Atqui Num. 16, v. 39 et 40, Deus gravissimè prohibet, *ne quis accedat, qui non est de semine Aaron, ad offerendum incensum Domino*. Tum quia Josephus (1) Machabæos

(1) Joseph. Antiq. lib. 12, cap. 6, n. 1, T. 1, p. 611, et de bello Jud. lib. 1, cap. 1, n. 3, T. 2, p. 52.

fuisse pontifices non semel asserit. Tum denique, quia ex Josepho lib. 20 Antiq. cap. 10, olim 8, T. 1, p. 979; Eusebio lib. 8 Demonstr. evang. p. 361, edit. 1618; S. Ambrosio, lib. 2 in Lucam n. 40, T. 1, col. 1329, et ex Judæis apud Huetium Demonstr. evang. prop. 9, n. 2, præcipui Judæorum duces post captivitatem plerique fuerunt sacerdotes ex tribu Levi; ergo prior hæc sententia quâ statuitur Machabæos paterno genere ex Judà ortos fuisse nullo pacto defendi potest.

Hinc Baronius, qui in Apparatu ad annales Ecclesiasticos primæ edit. n. 5, *aliquando senserat ex paterno etiam genere Mach. ex tribu Judà descendere*, in posterioribus tamen editionibus hanc suam emendavit opinionem, ut ipse testatur ad calcem tomi 1 Annal. post indices, edit. Rom. 1593.

Dices. Lib. 1 Mach. 15, v. 63, dicuntur *viri Juda magnificati valdè*; sed ii erant Machabæi; ergo; etc.

Nego cons. Fratres et socii Judæ Machabæi, ibi appellantur *viri Juda*, quòd essent ejus comites, non quòd ex tribu Juda essent progeniti. Jam verò juxta opinionem alteram Machabæi materno genere ex Judà prògnati supponuntur. Sed 1º, hoc incertissimum est, si quidem de eo altè silet tota retrò antiquitas; profertur quidem Exod. 6, v. 23, et 4 Reg. 11, v. 4, unum aut alterum matrimonii à sacerdotibus cum filiabus Juda inniti exemplum. At inde non sequitur ejusmodi connubia fuisse frequentia, et à patribus Machabæorum contracta. Proferuntur quoque nonnulla Rabbiorum testimonia, quæ diserta non sunt, et aliunde non magni ponderis; ergo incertissimum est, etc. 2º Etsi illud concederetur, nulli tamen usui esse posset ad explicandam continuationem *sceptri*; si quidem constat apud Judæos maternum genus nullo loco habitum. *Matris familia non est familia*, aiunt Thalmudici in *Bavà bathrà* cap. 8, quod et confitentur Rabbini omnes. Et verò num filii Herodis ex ejus conjuge Mariamne Assamonæorum filii nati, ab adversariis dicerentur ex sacerdotali familiâ fuisse, vel etiam ex tribu Juda duxisse originem, quòd Mariamnes, ut ipsi putant, ex illà tribu maternum genus duceret? Num Christus dici potuit ex tribu Levi, ex quâ Beata Virgo maternum genus traxit?

Perperam objicitur, inquit Petavius de hoc argumento disserens lib. de Inc. cap. 7, n. 2, « Christum solo materno genere Judæ continere. Hoc enim inusitati et extraordinarii

« est exempli ; quod ad ordinariam legem et
« institutum trahi non debet. Uti dicenti cui-
« piam, neminem mortalium nisi ex utroque
« parente nasci ; Adamum ex neutro , vel
« Christum ex matre solâ progenitum oppo-
« neret. »

Objicies adversus primam conclusionis par-
tem : Tempore quod effluxit à captivitate
usque ad Herodem primum Persis tributum
solvit natio Judaica, ut refertur lib. 1 Esdræ
7, v. 24, et lib. 2, c. 9, v. 37. Deinde à Græ-
cis, Syris et Ægyptiis gravissimè exagitata, iis
etiam referente (1) Josepho vectigalia pepen-
dit, ut se ab eorum vexationibus redimeret.
Tandem anno ante æram vulgarem 63, Pom-
peius captâ Jerosolymorum urbe, ac Judæâ
integrâ armis subactâ, Hyrcanum regem resti-
tuit quidem, sed simul eum Romanorum vecti-
galem fecit ; ergo natio Judaica veri nominis
republicam supremâ auctoritate potentem
per id tempus non constituit.

Nego consequentiam. Aliud est nationem ab
omni jugo alieno esse undequâque liberam,
aliud est eam supremâ auctoritate frui. Res-
publica cui inest vis propria, seu aliunde non
accersita, suis utendi legibus, lites privatorum
dirimendi, negotia publica administrandi,
constitutionumque suarum infractorum poenâ
etiam capitali puniendi, supremâ potestate
frui dicenda est. Hæ porrò cum tributo ab
aliis populis seu jure, seu injuriâ imperato
consistere posse res ipsa loquitur, et ex histo-
riâ compertum est.

Inst. Artaxerxes, Persarum rex, solemnî de-
creto, quod lib. 1 Esdræ cap. 7 refertur,
statuit futurum ut Judæi legibus suis viverent,
ducemque populi Esdram constituit, qui judi-
ces ac magistratus institueret, legem obser-
vari curaret, etc., ab eodem pariter concessa
Nehemiæ potestas muros Jerusalem suscitandi ;
ergo.

Respondeo ex his duntaxat sequi Judæos
præsidio regum Persarum indiguissse, atque
ad illud non semel confugisse quò magis ac
magis eorum respublica constabiliretur, et à
vi hostium imminentium, quorum mentio fit
in libris Esdræ, tuta redderetur. Nec sanè
mirum quòd summi nationis Israeliticæ viri
Esdras et Nehemias, litteris regiis in gratiam
Judæorum concessis muniti, et reipublicæ sa-
luti solummodò consulentes, Judæis acceptis-

(1) Joseph. Antiq. lib. 12, cap. 8, n. 3, et
lib. 12, cap. 3, n. 3, et cap. 4, n. 4 ; edit. Ha-
verc. T. 4, pag. 579, 580, 589, 602, etc.

simi fuerint, ac inter præcipuos gentis duces
libentissimè computati.

CONCLUSIO IV. Herode alienigenâ summam
rerum occupante, *sceptrum* à Judâ ablatum
est.

Tria conclusionem continentur de quibus non
una est eruditorum sententia. Primum est,
ante Herodis regni tempora *sceptrum in Judâ*
non defecisse. Alterum est, ubi Herodes sum-
mam rerum occupavit, defecisse illud *sceptrum*.
Tertium est, Herodem fuisse alienigenam.

Circa primum duplex opinio. Nam initia de-
fectionis *sceptri* Casaubonus et alii repetunt
ab anno 63 ante æram vulgarem, quo Pom-
peius in Aristobulum iratus, Judæam ingres-
sus est, urbeque et templo captis Judæos Ro-
manis tributarios fecit. Plurimi contra sen-
tiant ante Herodis regnum *sceptrum* propriè
non cœptum deficere, quæ opinio probabilior
videtur. Cum enim Pompeius Hyrcano, quem
è solio Aristobulus deturbaverat, pontificatum
simul et principatum gentis restituerit, ac
proinde principes Assamonæi ad Herodem us-
que populo Judaico præfuerint ; ad propriè
dictam defectionem et abolitionem *sceptri* per-
tinere non videntur, quæ à Romanis tunc
temporis passa est respublica Judæorum.

Circâ secundum, in duas etiam abeunt eru-
diti oppositas sententias. Non pauci gradatim
et per partes *sceptrum* concidisse arbitrantur,
adeò ut nonnisi in ultimo Jerosolymorum ex-
cidio penitus defecerit. Ita Petavius lib. 16 de
Incarn. cap. 6, n. 15 ; Huetius Demonstr.
evang. prop. 9, n. 5 et 8 ; Tournely quæst. 5,
art. 1, p. 146 ; Witsasse quæst. 3, art. 1, sect.
1, p. 219, et ex Protestantibus Grotius in
Math. ad v. 22, cap. 5 ; Casaubonus in Baro-
nium, etc., qui tamen initia et varios ejus-
modi graduum casus non omnes eodem modo
explicant.

Docent ex adverso cum plerisque Ecclesiæ
doctoribus Pererius in caput 49 Genes. n. 105,
versus finem, Baronius in Apparatu, Pagi, Cri-
ticâ in Annal. Baronii, n. 80, Appar. Galatinus,
lib. 4 de Arcanis catholicæ veritatis, Helvicus
de Vaticinio Jacobi, membro, 3, n. 4, apud Crit.
sac. et alii, *sceptrum* à Judâ semel fuisse abla-
tum, simul atque regno Herodes potitus est.

Ad vaticinii consensionem cum eventu pa-
rùm interest, utra ex his duabus opinionibus
eligatur. Juxta priorem advenit Christus Do-
minus, verus Messias, post cœptam defectionem
sceptri, et paulò antequàm penitus extingue-
retur. Juxta posteriorem statim ab illâ defec-

tionem natus est, eo scilicet regnante ad quem sceptrum è tribu Juda primò translatus fuit. Utrumque autem vaticinio perinde cohæret; moraliter enim, non mathematicè res ejusmodi perpendi debent.

Posteriorem porrò sententiam alteri anteponendam ducimus, 1º quia illa fuit omnium Patrum (1); 2º hoc argumento nixi: tunc sceptrum in Judâ defecit, cum ad alienigenam, quem leges reipublicæ Judæorum fundamentales à regno excludebant, potestas suprema ab extraneis, invitâ natione, ita translata est, ut genti Judaicæ nunquàm restituta sit; quippè *sceptrum*, ut diximus suprâ, nihil aliud est, quàm suprema potestas.

Atqui 1º Herodem fuisse alienigenam mox ostenditur. 2º. Omnem alienigenam fundamentalibus reipublicæ Judæorum constitutionibus à regno exclusum fuisse planum est ex verbis Moysis Deuter. 17, v. 14 et 15: « Cum ingressus fueris terram, inquiebat is sapientissimus legislator, ... et dixeris: Constituam super me regem, sicut habent omnes per circuitum nationes; eum constitues, quem Dominus Deus tuus elegerit de numero fratrum tuorum. Non poteris alterius gentis hominem facere regem, qui non sit frater tuus. » 3º Potestas suprema ad Herodem ab extraneis translata est nempe à Romanis, uti refert Josephus lib. 14 Ant. cap. 14, aliàs 26, n. 4, et lib. 20, cap. 10, olim 8, cui concinunt Judæorum doctores, ut R. David Ganz. in *Tzemach David* ad an. 724, millenarii 4: « Istum (Herodem) inquit, creârunt regem senatores romani, loco Hyrcani Domini sui anno 724. » 4º Herodes regnum adeptus est, invitâ natione, quod ex iis manifestè apparet, quæ ipse molitus est, ut regnum sibi à Romanis concessum adipisceretur, et armis partum conservaret. Namque adversus Antigonum ultimum ex Assamonæorum familiâ Judæorum regem bellum non sine magno discrimine per triennium gessit; Jerosolymam expugnavit; infelicem eundem Antigonum jussu Antonii Antiochiam securi percuti erogatis pecuniis effecit;

(1) Ita S. Just. in Dialogo cum Tryph. n. 52, p. 148, edit. Paris. 1742; Origenes, Hom. 17 in Genes. n. 2, T. 2, p. 108, edit. Paris. 1755; Eusebius lib. 1 Hist. Eccles. cap. 6; S. Hieron. in cap. 3 Osee edit. Martianæi, T. 3, col. 1257; S. Aug. lib. 18. de Civit. cap. 45, n. 3, edit. Benedictin. T. 7, col. 529; S. Cyril. Alex. lib. 7. Glaphyrorum in Genesim ad v. 9. capitis 49, edit. Paris. 1638, T. 1, part. 2, p. 223; et Commentario in Oseam. T. 3 ejusdem. edit. p. 22, et alii plurimi.

magni Judæorum concilii senatoribus, quorum judicium olim cædis accusatus vix effugerat, uno excepto, interemptis viros ex fœce plebis substituit; veritus ne quis insignium ad summum sacerdotium eveheretur, Hananelem obscuri generis sacerdotem, quem pontificatu decoraret, Babylone arcessivit; Aristobulum fratrem Mariamnes uxoris suæ interfecit; et alia complurima facinora edidit subditos dominationis suæ impatientes præsentiens, et regnandi cupidine compulsus.

Dissimulandum non est, quod Josephus narrat lib. 17 Antiq. cap. 3, n. 3, universam Judæorum nationem, exceptis Pharisæis, sub finem vitæ Herodis jurasse se ejus partes esse futuros. Verùm solâ vi et metu imperata fuit illa fidelitatis promissio, quâ erga Cæsarem simul et Herodem sese Judæi obstrinxerunt.

5º. Suprema auctoritas deinceps non fuit Judæis restituta; nam post Herodis mortem Archelaus alique ejus filii eodem jure quo pater principatum adepti sunt. Archelao ob tyrannidem de quâ ab optimatibus Judæorum accusatus fuerat, Viennam Galliæ anno 7 æræ vulgaris in exilium amandato, Judæa in provinciam imperii romani ab Augusto redacta est. Atque versùs id tempus jus gladii genti Judaicæ ademptum; quod enim Lingfoot in caput 26 Matth. v. 3, in caput 18 Joan. v. 31, et alii nonnulli sentiunt, jus illud penès magnum senatum nationis usque ad excidium Jerosolymitanum stetisse, ita tamen ut præ nimia judicium facilitate et reorum multitudine non exerceretur; quod pariter conjicit Pater Lami (1) facultatem eo jure utendi fuisse à præfecto romano impetrandam; hæc, inquam, non levibus momentis refelluntur, quæ à Grotio (2) Drusio et aliis collecta sunt. Primum petitur ex Pilati et Judæorum verbis Joan. cap. 18, v. 31: *Accipite, eum (Christum) vos, inquiebat Pilatus, et secundum legem vestram judicate.* Quæ verba jure gladii in occasione utendi facultatem sonarent, si ejusmodi facultatis postulandæ et impetrandæ sola lex senatui Judæorum fuisset imposita. Pergit tamen sacer contextus: *Dixerunt ergo ei Judæi: Nobis non licet interficere quemquam;* ergo nullum jus gladii tunc Judæorum concilio à Romanis relictum. Secundum desumitur ex his Christi verbis Matth. 10, v. 17: *Tradent enim vos in conciliis, et in Synagogis suis flagellabunt vos, et ad præsides et ad re-*

(1) Concord. evang. appar. ad chron. part. 2, c. 3.

(2) Grot. in Matth. 5, 22, et in Joan. 18, 31,

ges ducemini, in testimonium illis et gentibus. Igitur hoc unum in Christi discipulos potuerunt, scilicet flagelli poenam in synagogis suis iis infligere, et eos ad reges et ad præsidēs ducere; jure gladii proinde non potiebantur. Tertium eruitur ex iis quæ Actuum capit. 21, 22, 23 et 24, in motū adversus S. Paulum concitatione gesta narrantur. Nam tribunus cohortis ante interpositam à Paulo appellationem ad Cæsarem, de manu Judæorum illum eripuit, easque in toto hoc negotio sustinuit partes quæ potestatem gladii penes Judæos tunc non existisse planè ostendunt.

Quantum subministrat Talmud Jerosolymitanum quod Tractatu Sanhedrin in capite Dine Mammoth apud Raym. Martinum Pugionis fidei parte secundā cap. 4, n. 6, sic habet : « Tradiderunt Rabbini nostri, quod cum adhuc templum destructum non esset, per 40 annos ablata sunt judicia animarum, (id est, judicia mortis) ex Israel. » Item docuerunt auctor Juchasin apud Drusium, Maimonides, etc., propter Talmudis auctoritatem. Non contemnetur autem illa Rabbiorum veterum traditio, si, quā curā gloriæ Synedrii et nationis suæ cæteroqui consulant, attendatur.

Quintum desumitur ex Romanorum politiā et praxi, quos constat populis vietis antiquum religionis cultum duntaxat permisisse, omni de rebus civilibus sibi potestate reservatā. Atque hinc conjicimus jus vitæ et necis tunc Judæis ereptum fuisse, ubi, Archelao in exilium misso, ejus ditio in formam provinciæ versa est. Cum enim potestas gladii ante Christi mortem adempta comprobetur, nec ejusmodi abolitionis initia aliās determinari possint, proum sanè est ut ad hanc referantur epocham. Neque obstat quòd paulò seriùs collocari deberent, si Talmudistis fides; nemo enim nescit quā parū Rabbini in temporum præsertim calculis accuratiprehendantur.

Dices 1°. Act. cap. 7, v. 57, Stephanus lapidatus est à Judæis; ergo, etc.

Dist. ant. A Judæis *impetum facientibus unanimitè in eum*, ut habet auctor sacer, concedo; lapidatus est à Judæis, post observatas judiciorum formas ac pronuntiatam à concilio sententiam mortis, nego. Mors inflictā S. Stephano in exemplum hic afferri non potest. Nam auditā ejus in concilio Judæorum oratione æmulatores legis ita commoti sunt, ut non expectatā judicium sententiā, quippe de quā in Actibus nulla mentio, magno in eum irruerint impetu, atque extra civitatem educentes tumultuosè

interfecerint. Haud secus ac S. Paulum Act. 21, v. 31 et 32 occidissent, nisi ex eorum manibus illum Tribunus cohortis eduxisset.

Dices 2°. S. Jacobus frater Domini occisus fuit à Judæis anno 65 æræ vulgaris christianæ; ergo.

R. Duplici modo illud factum narrari, aliter ab Hegesippo apud Eusebium lib. 2 Hist. eccles. cap. 24, aliter à Josepho. Si Hegesippo fides, nulla difficultas, cum ex ipso tumultuosè, et nullo concilii præcedente judicio, S. Jacobus à fullone occisus sit; si Josephum, lib. antiq. 20, cap. 9, sequamur, aliquam judiciorum observatam formam reperiemus, sed simul advertemus pontificem Ananum qui præfecto romano absente illam Jacobi cladem meditatus et executus fuerat, ab eodem reduce de eā fuisse vituperatum, et ob eandem ab Agrippā pontificatu privatum.

Circa tertium quod conclusione contineri notavimus, nempe Herodem fuisse alienigenam, non una etiam eruditorum sententia.

Torniellus in Annalibus sacris ad annum mundi 4018, n. 7 et 8, Nicolai Damasceni testimonio nixus censet Herodem à primatibus Judæorum, qui ex captivitate redierant, genus suum duxisse. Alii cum Scaligero (1), Henrico Valesio (2), Huetio (3), Casaubono (4), Herodem ex Idumæis proselytis prognatum statuunt, ac simul tamen hunc definiunt verè Judæum fuisse, quia proselyti, aut saltem ex proselytis nati Judæoram numero erant; ac ante annos centum circiter Idumæi ab Hircano Simonis Machabæi filio debellati circumcisionem aliosque ritus Judaicos acceperant. Plerique theologi et ecclesiastici scriptores Herodem, seu Idumæus, seu Ascalonita fuerit (quod hic nunc expendimus), alienigenam pronuntiant, licet eum proselytum fuisse, aut ex proselytis originem traxisse non dissimulent. Ita post Judæos et veteres Ecclesiæ doctores Galatinus lib. 4 De Arcan. cathol. verit. cap. 6. edit. Basil. 1561. pag. 140; Baronius in Apparatu n. 5, T. 1, p. 5, edit. Rom. 1593; Serarius in Herode T. 1 opuscul. theolog. edit. Moguntiae 1611, pag. 229 et seq.; Natalis Alexander, Hist. Ecclesiast. veteris Test. T. 2, p. 408, edit. 1699; Tournely, Witass. etc. Ut hanc, cui adhæremus, postremam probemus

(1) In Animadv. ad Chronicon Euseb.

(2) In Annotat. ad lib. 1 Hist. Eccles. Euseb. cap. 6.

(3) Demonstr. Evang. prop. 9, cap. 4, n. 4.

(4) Exercit. ad Apparat. Baronii, n. 3.

sententiam, ostendendum est 1° Herodem non fuisse Judæum genere et origine; 2° cum proinde, etsi religionis Mosaicæ proselytum aut ex proselytis ortum, fuisse tamen populo Judaico alienigenam.

Probatur itaque adversus Torniellum Herodem non fuisse Judæum genere et origine 1° ex Josepho qui lib. 14 *Antiq.* cap. 15, olim 27, n. 2, Antigonum de Herode, quocum de regno contendebat, inducit « dicentem Siloni « et Romanorum exercitui, præter ipsorum « justitiam facturos, si Herodi regnum dede- « rint, homini privato et Idumæo, hoc est semi- « Judæo, cum id regii generis hominibus præ- « heri deberet, ut est eorum consuetudo. »

Ibidem. cap. 1, aliàs 2, n. 2 : « Erat Hircano « amicus quidam Idumæus, nomine Antipater, « homo quidem multâ abundans pecuniâ, « quamvis Nicolaus Damascenus hujus genus à « primoribus Judæorum, qui in Judæam vene- « runt Babylone, deducat. Verum hoc dicit in « gratiam Herodis ejus filii quem fortuna ad « Judæorum regnum evexit. » Cap. 16, aliàs 28, n. 4 : « Principatum amiserunt (Assamonæi), « isque ad Herodem translatus est Antipatri « filium hominem Plebeie familie, et generis « privati, et regibus subjecti. » Cap. 7, olim 12, n. 3 : « Uxorem duxit (Antipater) ex nobili « Arabie familia, nomine Cypron, ex quâ li- « quæ quatuor sustulit, Phasælum et Herodem « eum qui postea rex erat, etc. » Et lib. de bello Judaico cap. 6, aliàs 5, n. 2 : « Erat An- « tipater genere Idumæus, et nobilitate et opi- « bus et aliâ potestate gentis princeps. » Ex quibus sic arguitur : Is non fuit Judæus genere qui fuit Idumæus, hoc est, semi-Judæus, cujus pater Idumæus à primoribus Judæorum originem duxisse à Nicolao Damasceno falsò dicitur, cujus denique mater Arabs, et pater genere Idumæus; atqui ex Antigono apud Josephum Herodes fuit Idumæus, hoc est semi-Judæus, ex Josepho pater ejus Idumæus, etc.; ergo.

2° Ex veteribus doctoribus Ecclesiæ et aliis scriptoribus ecclesiasticis quorum eâ de re testimonia triplicis generis proferuntur. Nam plurimi Herodem fuisse extraneum et alienigenam generatim tantum affirmant. Ita Origenes, *Homiliâ 17 in Genesim de Benedict. Patriarch.* n. 2 : « Constat, inquit ... non defecisse prin- « cipes ... usque ad Herodem regem, qui se- « cundum historiæ fidem, quam Josephus scri- « bit, alienigena fuisse et per ambitionem « in regnum Judæorum dicitur irrepsisse. »

S. Hieronymus in caput 3. Oseæ, sic ait : « Postquàm defecit princeps ex Judâ, et dux « de femoribus ejus, et Herodes alienigena et « proselytus suscepit imperium, intelligimus « venisse cui regnum repositum est. » Similia habent S. Aug. lib. 18 *de Civit. Dei*, cap. 43, n. 3, et alii. Nonnulli, ut Hegesippus junior, de *Excidio urbis Jerosol.* lib. 1, cap. 14, Bib. PP. Lugd. T. 5, p. 1127, cap. 29; Theophylactus in *Matth.* cap. 2, edit. Paris. 1635, pag. 11; Photius in *Bibliothecâ* cod. 258, edit. Rothom. 1653, col. 967 et seqq.; Rupertus lib. 9 in *Genesim*, edit. Paris. 1638, T. 1, pag. 145, et alii, Herodem fuisse Idumæum pronuntiant. « He- « rodes, inquit Theophylactus, non erat Judæus, « sed Idumæus Antipatri filius, ex uxore « Arabe; » et Photius : « Hic Herodes filius « fuit Antipatri Idumæi, et Arabysse cui no- « men Cypris; » et infra : « Herodis hujus qui « primus externorum Judæis imperavit, pater « fuit Idumæus natione et Ascalone, filius An- « tipæ, etiam Antipas prius vocatus, deinceps « Antipater. » Alii tradunt eum fuisse origine Ascalonitam, nativitate Idumæum. Narrat scilicet Africanus, vetustissimus ac diligens scrip- tor, in *Epistolâ ad Aristidem* apud Eusebium, lib. 1 *Hist. ecclesiasticæ*, cap. 7, à cognatis Salvatoris nostri traditum, « latrones scilicet « Idumæos cum Ascaloni Palestinæ civitati « supervenissent, ex delubro quodam Apolli- « nis ... Antipatrum Herodis cujusdam Hiero- « duli filium simul eum reliquâ sacrâ prædâ « captivum duxisse. Cum verò pro redemptione « filii minister templi pretium solvere non va- « leret, Antipater Idumæorum more instituto- « que educatus, postmodum Hircani summi « Judæorum pontificis amicus effectus est. » Africanum secuti sunt Eusebius (1) sanctus Epiphanius (2) sanctus Cyrillus Alexand. (3), sanctus Ambrosius (4), etc.

Jam verò circa tot Patrum, ac veterum scrip- torum testimonia, quibus alia multa addi pos- sent, advertendum 1°, nullum posse auctorem ecclesiasticum proferri, qui Herodem genere Judæum fuisse tradiderit; 2° Josepho prorsus consentire quotquot Herodem fuisse alienige-

(1) Lib. 1 *Hist. Eccles.* cap. 6, edit. Valesii, p. 13, et lib. 8, *Demonst. Evang.* edit. Paris. 1628, p. 374.

(2) In *Hæresi Herodianorum*, edit. Paris. 1622, T. 1, p. 45.

(3) *Comment. in Oseam* T. 5, edit. Paris. 1638, p. 22, et lib. 7 *Glaphyrorum in Gen.* T. 1, part. 2, p. 223.

(4) Lib. 3 in *Lucem*, edit. Paris. 1686, T. 1, col. 1329.

nam, vel Idumæum duntaxat pronuntiant; 3° quod attinet ad relationem Africani quam nonnulli recentiores (1) ut Josepho adversam rejiciunt, singularem, de quâ agimus, Tornielli opinionem ejusmodi pugnâ non juvari. Quippe Africanus, et quotquot ei adhærent, saltem in eo quod præcipuum est, Josepho et aliis Patribus consentiunt, nempe Antipatrum Herodis Patrem, seu Idumæus genere fuerit, seu Idumæorum duntaxat more educatus, Judæum origine non fuisse. Cæterum iis (2) libenter assentimur, qui Josephum cum Africano, quibusdam immutatis, quantum ad rei substantiam conciliant. Josephus quidem de Antipatro Herodis patre duo scribit: 1° eum fuisse genere Idumæum et opibus potentem; 2° ejus patrem Antipam, seu Antipatrum ab Alexandro Januæo creatum fuisse Idumææ præfectum. Juxta Africanum ex adverso Antipater fuit filius Herodis cujusdam Ascalonitæ pauperis, et ex numero servorum templi Apollinis, isque à latronibus Idumæis captus, more Idumæo institutus fuit. Quas narrationes inter se maximè opponi nullus inficiabitur. Verùm liceat quæ de Antipatro ab Africano narrantur, ea ad Herodis avum Antipam transferre, jam omnia cohærent. Antipas filius servi Sacerdotum Apollinis in Idumæam puer deportatus ac more Idumæorum enutritus, inter eos animi fortitudine, et aliis dotibus illustris factus (cujus rei non pauca exempla historiis subministrantur), ab Alexandro Januæo genti Idumææ armis Judæorum recens subactæ præficitur. Ex eo nascitur Herodis genitor Antipater, à Josepho Idumæus appellatus quòd ex patre institutis Idumæorum addicto, et apud eos jura indigenarum assecuto natus esset. Leve porrò est quod observatur, avum Herodis à Josepho Antipam, ab Africano Herodem appellatum fuisse. Quemadmodum enim Herodis filius Galilææ tetrarcha ad quem Christus missus est, Herodes Antipas vocatur, ita et ejusdem Herodis avus potuit utroquesimul nomine donari. Sic itaque, unius à nobis explicatæ suppositionis ope, Josephus et Africanus concordēs fieri possunt. Hanc autem ineundæ inter eos concordie viam libenter amplectimur multis rationibus ducti.

(1) Scaliger in animadvers. ad Euseb. chron. Valesius in annotat. ad Hist. Eccles. Euseb. Natal. Alex. Hist. vet. Test. T. 2 PP. Benedictini in notâ ad locum S. Ambrosii citatum.

(2) Lancelot in Append. ad Chronolog. sacram, ad calcem Bibliorum Vitreæan. p. 91, Basnag. Hist. des Juifs, lib. 1, cap. 2, edit. 1715, p. 47 et seqq. Witasse de Incarn. T. 1, p. 227.

1° Quia tum Josephi nationis suæ historiam ex professo scribentis, tum Africani testes magnâ veneratione dignos laudantis tanta hic auctoritas, ut neutrius relatio quantum ad substantiam rejici posse videatur. 2° Quia sæpè contingit ut factum quoad substantiam verissimum, in nonnullis tamen circumstantiis eodem ferè modo emendandum sit, quo à nobis relatio Africani castigatur. 3° Quia veteres Judæi apud S. Justinum in dialogo cum Tryphone n. 52, Herodem Ascalonitam fuisse dicunt. 4° Quia in Ascalonitas maximè propensum Herodem fuisse constat. 5° Quia juxta Josephum Antiq. lib. 14, cap. 16, olim 28, n. 4, Herodes fuit plebeie familie et generis privati et regibus subjecti, eodemque teste lib. 15, cap. 7, olim 14, n. 4, vilitatem generis ac ignobilitatem exprobravit ipsi uxor ejus Mariamnes. Hæc saltem refellunt quas de Herodis generis claritate Scaliger obtrudit conjecturas. 6° Quia Eusebius lib. 1 Hist. eccles., cap. 6, Josephum et Africanum laudans neutri fidem detrahit. S. verò Epiphanius, hæresi 20, quæ est Herodianorum, utriusque conciliandi viam, quâ incedimus, videtur aperuisse. Verba Eusebii ejusmodi sunt: « Primus ex alienigenis Herodes regnum Judææ à Romanis adeptus est, « cum, ut à Josepho quidem traditum est « paterno genere Idumæus, Arabs materno « esset. Ut autem scribit Africanus non ignobilis et ipse scriptor, qui de illo accuratius « scripserunt, Antipatri filium fuisse tradunt; « huic verò Herodem quemdam Ascalonitam « unum ex numero servorum templi Apollinis, etc. » Ex quibus manifestum est relationem Africani ab Eusebio plurimi factam, ita tamen ut quod à Josepho traditum non prorsus rejecerit.

Atque hæc sunt præcipua momenta propter quæ emendandam aliquantisper, non è medio tollendam Africani narrationem judicamus, Herodemque origine Ascalonitam, nativitate Idumæum fuisse statuimus. Quæ obiter perstrinxisse sufficiat.

3° Herodem origine Judæum non fuisse Gorionides, Talmudici et Rabbini consentiunt, nec in re adeò manifestâ necesse est eorum testimonia congeri. (Consule Serarium in Herode cap. 9 et 15.) Omni igitur testium genere ostensum est Herodem non fuisse naturâ et origine Judæum.

Probatur alterum adversus Scaligerum et alios, scilicet Herodem etsi proselytis ortum, fuisse tamen alienigenam. Is enim alienigena

fuit qui, utpote extraneus genere, Judæorum juribus quantum ad civilia et dignitates non potiebatur. Nec enim quæstio est de religione et sacris; in quibus non modò proselytorum posteri, sed etiam primùm circumcisi à Judæis natis non discriminabantur, uti præscriptum fuerat Num. 15. De civilibus tantùm controvertitur. Atqui Herodes seu proselytus fuerit, seu ex proselytis oriundus, attamen utpote extraneus genere, juribus Judæorum quantum ad civilia et dignitates non potiebatur; cunctorum quippe ejusmodi jurium participes non erant extranei seu proselyti, seu ex proselytis oriundi. Enimverò quod attinet ad recens controversos et primùm circumcisos, quos solos Scaliger proselytos appellat, illorum aliam, ac Judæorum, fuisse conditionem constat ex lib. 1 Paralip. 22, v. 2, ubi refertur Davidem « præcepisse ut congregarentur omnes proselyti de terrâ Israel, et constituisset ex eis latomos ad cædendos lapides et poliendos, ut ædificaretur domus Dei, » et ex lib. 2, cap. 2, v. 17, 18 in quibus sic habetur: « Numeravit igitur Salomon omnes viros proselytos qui erant in terrâ Israel, post dinumerationem quam dinumeravit David pater ejus, et inventi sunt centum quinquaginta millia et tria millia sexcenti. Fecitque ex eis septuaginta millia qui humeris onera portarent et octoginta millia, qui lapides in montibus cederent; tria autem millia et sexcentos præpositos operum populi. » Jam verò an proselyti à Davide et Salomone hocce modo censiti fuissent, et ad onera portanda, aliaque graviora opera omnes destinari, si par eorum fuisset, ac Judæorum natorum conditio? Constat præterea ex Act. 1, v. 11, ubi proselyti distinguuntur à Judæis. Constat denique ex modò afferendis argumentis. Sed in re à Scaligero concessâ diutiùs immoramur.

Porro eos etiam qui ex proselytis erant nati, cunctis juribus Judæorum civilibus potitos non esse, multa suadent, nulla momenta impugnant. Multa quidem id suadent, nam 1º, Salomon, ut modò relatum est, sexcentos supra centum quinquaginta tria millia recensuit proselytos. Atqui hoc numero multos proselytorum nepotes, abnepotes, etc., comprehensos fuisse probabilissimum est. Num enim verisimile esse potest tot millia gentilium intra unam generationem Judaicos ritus recepisse? Proselyti igitur et proselytorum posteri eodem nomine designantur in Scripturis, et conditione æquales perhibentur. 2º « Si proselyti filius, inquit Serarius

pag. 238, eo ipso quòd proselyti filius erat, nullo ampliùs modo vel proselytus, vel alienigena fuit, adquam è duodecim tribubus, tribum spectabat? » 3º Institutæ à Scaligero distinctionis proselytos inter et filios proselytorum, nullum nec in Scripturis, nec apud Judæos, nec apud veteres Ecclesiæ scriptores vestigium reperire est. Imò Herodem et ab ipso prosatos Herodiadas à Judæis proselytos denominari ostendit idem Serarius ibidem. 4º Antigonus apud Josephum jam citato cap. 15, aliàs 27, lib. 14. Antiquit. Herodem vocat *Idumæum*, hoc est *Semi-Judæum*, unde colligit non nisi injustè ad ipsum à Romanis posse regnum transferri; additque: « Quod si nunc sibi (Antigono scilicet) succensent (Romani) et à se regnum auferre... statuerunt, esse quidem multos sui generis in regnum jure successuros, qui cum neque quicquam contra Romanos peccassent, et sacerdotes essent, indignè paterentur honore isto privari. » 5º Antiqui Ecclesiæ doctores, imprimis Origenes et S. Hieronymus, rerum Judaicarum peritissimi, quos Herodis conditio profectò non latuit, unanimiter tradunt Herodem extraneum fuisse. Origenes ex iis quæ de illo rege Josephus scribit, ipsum fuisse alienigenam colligit. S. verò Hieronymus illum proselytum fuisse observat, et simul dicit *alienigenam*, ut suprâ vidimus. Ergo multis non levibus momentis suadetur eos qui ex proselytis nati erant, ac proinde Herodem, cunctis Judæorum juribus civilibus ascitos non fuisse.

Jam verò, quàm parum solidis adversùs tot momenta et testimonia conjecturis certent adversarii, ex solutione objectionum patebit.

Solvuntur objectiones. — Objicies adversùs primam conclusionis partem cum Casaubono Exercit. 1 ad apparatus Baronii n. 3, « falsum esse et dictu absurdum alienigenæ imperium Judæos in Herode primùm esse expertos. Romani enim (pergit idem) indigenæ credo, non erant. » Resp. à Pompeio graviora expertum non esse rempublicam Judæorum, quàm à regibus syris olim passa fuerat. Imò Pompeius cum eâ multò leniùs egit, cultûs proprii ac legum usu relicto, ac statim legitimo principe Judæis restituto. Non negamus Judæos ante Herodis tempora à Romanis victos ipsis paruisse, sed cum illicò ac sine morâ victores à jugo ipsos exsolverint, contendimus initia propriè dictæ desitionis *sceptri* ad aliam epocham referenda.

Instabis cum aliis. Pompeius Judæis tributum imperavit; id verò oneris reipublicæ

undequaque liberæ non imponitur; ergo.

Nego consequentiam. Aliud est rempublicam ad solvendum tributum cogi, aliud est supremam potestatem ipsi cœptam auferri. Jam observavimus Judæos, etsi post captivitatem fuerint Persarum, Græcorum, Syrorum, necnon Ægyptiorum tributarii, nihilominus in veri nominis rempublicam tunc coalitos fuisse.

Objicies adversus secundam partem. Cum Herodes regnum adeptus est, Judæorum respublica non statim penitus labefactata fuit. Stabat ejus regni initio Judæorum senatus, cujus judices ille tyrannus interfecit, jus vitæ et necis non nisi post Archelai exilium nationi ademptum; denique Judæi in unum corpus coadunati terram promissam incoluerunt, ritibusque suis ac legibus usi sunt usque ad excidium urbis et templi. Præterea, ut observat Petavius, lib. 16 de Incarn. cap. 6, n. 15, inchoationes et initia desitionum suarum, necnon progressus et terminos habere solent prophetiæ; ergo.

Resp. Quod attinet ad possessionem sceptri seu auctoritatis supremæ, rempublicam Judæorum fuisse penitus labefactatam, ubi primum Herodes regno fuit potitus. Siquidem tunc tenens sceptrum nec fuit natione Judæus, nec à Judæis ullomodo suam auctoritatem hausit; prætereaque, quod notandum maximè, nunquam exinde suprema auctoritas penes Judæos rediit; ergo, licet, etc. Cæterum non inficiamur ratione circumstantiarum mentem sensusque commoventium, defectionem sceptri gradatim, si ita loqui fas est, auctam fuisse. Ante ultimam consumptionem regni reparatio fortè adhuc poterat in desperatis non omnino haberi; sed nihilominus verum est, à quo tempore Herodes solium est consecutus, Judaicam nationem imperio alieno esse subjectam, nec in possessionem supremæ potestatis unquam reversam fuisse.

Objicies adversus tertiam conclusionis partem cum Torniello. Nicolaus Damascenus Herodi familiaris, eo adhuc vivente, scripsit ipsum è primatibus Judæorum qui è captivitate Babylonica redierant, genus suum duxisse; ergo, etc.

Nego consequentiam. Hæc mendaciter et assentationis causâ à Nicolao Damasceno dicta fuisse observat Josephus jam citato cap. 1, alias 2, lib. 14. Antiq. n. 2. Nec sanè id creditu difficile videbitur, si ex unâ parte, quantâ Herodes regnandi cupiditate molitus sit, perpendatur; et ex alterâ, quanti Judæorum regis interesset, ut ex Judâ satus crederetur.

Instabis. Josephus ex regiâ Assamonæorum familiâ quam Herodes extinxerat, maternum genus ducens, privatis odiis indulgere potuit, dum circa Herodis originem Nicolao Damasceno auctori cœtaneo contradixit; ergo.

Nego ant. In cæteris quæ de Herode Josephus narrat nullum ejusmodi odii vestigium. Quid ergo ille historicus privatis odiis indulsisse conjicitur cum tradidit Herodem Judæum genere non fuisse? Dum scripsit Nicolaus Damascenus, Herodes ægrè tulisset sibi genus ascribi quod rebellandi ansam Judæis potuisset præbere. Dum scripsit Josephus, vera Herodidum originis declaratio nihil quidquam poterat ejusmodi principibus prodesse aut nocere; ergo.

Objicies iterum cum eodem 1^o si Herodes Idumæus fuisset, ad præscam Idumæorum religionem voluisset Judæos trahere; 2^o, Herodes templum amplificavit et mirum in modum decoravit, ac religionis Judaicæ zelatorem sese exhibuit æcerrimum; ergo.

Nego consequentiam. Religioni Judaicæ addictus necne fuerit Herodes, regnum tot laboribus partum conservare cupidus planè concipitur hisce modis sese gerere debuissè.

Obj. 3^o cum eodem. 1^o Alexander Jannæus Antipæ, seu Antipatro Herodis avo, Idumæo totam non credidisset Idumæam regendam. 2^o Hircanus rex simul et pontifex Herodi Mariamnem neptem suam in uxorem dedit; atqui hanc non tradidisset alienigenæ. 3^o Inter Judæos fuere qui Herodem ut Messiam agnoverunt; unde nomén *Herodianorum* sortiti; ergo eum spectabant ut Judæa tribulem; noverant enim Messiam ex Judâ oriundum.

Ad primum nego suppositum. Antipas, ut diximus, non fuit Idumæus nisi moribus et institutione. Ascalonita porro Idumæis moribus informatus, et apud eos jam potens, nonne maximè fuit idoneus, qui Idumææ bello partæ præficeretur? Hæc agendi ratione suis commodis consulebat Alexander, ac Idumæorum simul sibi conciliabat animos. Ad secundum nego min. Leges quibus, ne matrimonia cum alienigenis contraherentur præscriptum fuerat, sæpè violatas fuisse extra controversiam positum est. Nihil ergo mirum quòd Mariamnes Hircani neptis in uxorem data fuerit Herodi, cujus pater summam rerum sub Hircano administraverat, quique ipse pariter illi principi ferè solam regiæ dignitatis speciem reliquerat. Ad tertium, dato antecedente, quod tamen incertum est, à multis enim alia Herodiano-

rum assignatur origo; nego consequentiam. Nonne errantes quæcumque perspicua suis erroribus adversa solent nubibus obtegere? Num Josephus arbitratus est Vespasianum esse Judææ tribulem, cum eum ut Messiam habuit?

Obj. 4^o cum eodem. Cum Judæi de civitatis jure apud Cæsarem cum Syris contenderent, illud præcipue urserunt, Herodem conditorem urbis Judæum fuisse, quod non inficiati sunt Syri. Testis est Josephus lib. 20 Antiq. cap. 8, olim 6, n. 7; ergo.

Nego conseq. Nam 1^o, id à Josepho tantum recitatur, non approbatur. 2^o Ut Judæi in suæ causæ momentum afferre possent Herodem fuisse Judæum, satis erat illum ratione religionis, et latiori sensu hanc meruisse appellationem. In ejusmodi negotiis peragendis cuncta exiliter ad calculos non revocantur. 5^o Herodem esse Judæum Syri non inficiati sunt, seu quod Herodis genus, legesque Judæorum de alienigenis haud satis ipsis essent perspecta; seu quia simul ut constabat Herodem fuisse ex Judæorum republicâ, eorumque legibus et ritibus addictum, parum ad causam referebat, an esset origine Judæus, cunctisque Judæorum natorum juribus frueretur.

Objicies 5^o Quemadmodum Act. 2, v. 9, plures ratione habitationis appellantur Parthi, Medii, et Ælamitæ, et Cretes et Arabes, etc. quos tamen fuisse Judæos v. 5. indicatur; ita Herodis pater et avus, etc., appellari potuerunt Idumæi, ratione scilicet commorationis in Idumæâ. Nego conseq. Nam cap. 2 Act. occurrit ratio specialis cur omnes ii Judæi, nomine regionum quas incolere solebant, designarentur, scilicet ut explicaretur miraculum insigne de dono linguarum Apostolis concessio. Quæ verò ratio Herodem vocari Idumæum coegisset, si fuisset natione Judæus? Sed appellatur Antipater genere Idumæus à Josepho, appellatur Herodes apud eundem Idumæus, hoc est Semi-Judæus, appellatur à Patribus alienigena; ergo.

Obj. 6^o cum eodem, 1^o Nemo ex Patribus difficultatem hanc ex proposito discutiendam suscepit. 2^o In his quæstiunculis ab iis dissentire possumus; ergo. Ad primum, nego ant. Quantum opus erat, ab ipsis inquisitum est de Herodis origine. Josephi testimonium ab Origene, Eusebio et aliis multis laudatur; pariter Africani narratio eos non latuit; quâ ratione Herodes Idumæus simul et Ascalonita potuerit appellari S. Epiphanius explicat; quid suâ ætate de Herodiadum stirpe Judæi sentirent,

perspectum habuerunt. Ex his omnibus ab ipsis deductum est Herodem alienigenam fuisse. Ad secundum, fatemur perinde sacram non esse sanctorum Patrum auctoritatem ubi de ejusmodi quæstionibus agitur. ac circa res fidei. Quæ ab ipsis credita sunt fide divinâ, hæc eadem fide teneamus necesse est. Quidquid verò de quæstiunculis ad historiam spectantibus tradiderunt, id sapientis critici judicio obnoxium. Verum, ut in rebus fidei ab eorum unanimiter sentientium auctoritate ne latum unguem recedere unquam licet; ita sine graviori momento posse eorum testimonium, in rebus etiam merè historicis deserui, nemo sapienter dixerit. Sed quæ hic exaggerat momenta Torniiellus, nulla sunt; ergo.

Obj. cum Scaligero in *Animadv. ad Eusebii chronicon*. Herodes, etsi Idumæus genere, verè tamen indigena censendus est: « Ex quo enim, « tempore, inquit Hircanus Idumæos subegit, « non amplius Idumæi, sed Judæi vocati sunt, « et pro veris Judæis habiti. Ergo Herodes, « qui patre et avo Idumæis ac proinde Judæis « prognatus erat, » verus Judæus fuit, non alienigena. Idumæos autem pro veris Judæis habitos probat Scaliger, 1^o allatis in testimonium Josepho, lib. 13 Antiq. cap. 17; Strabone, Ammonio grammatico, et Stephano. 2^o Quia nemo « vetustissimos προσηλύτους unquam « legit alienigenas vocari. »

Nego antecedens. Ad probationem dist. Judæi vocati sunt, et pro veris Judæis habiti, religione, concedo; genere, et quantum ad omnia jura civilia, nego. Cæterum negari potuisset antecedens; quippe nullum laudabit Scaliger veterem scriptorem qui Idumæos appellaverit veros Judæos. Imò Antigonus apud Josephum loco citato Idumæum hominem interpretatur *Semi-Judæum*, id est, Judæum religionem, advenam in multis aliis. Nego præterea ex testibus à Scaligero adductis id confici quod ipse intendit. Hoc unum testatur Josephus lib. 13 Antiq. Idumæos ab Hircano debellatos circumcisionem et ritus Judæorum accipere compulso. Strabo pariter eosdem tradit ad ejusmodi ritus accessisse; quod si Herodem *virum indigenam* vocet lib. 16 Geographiæ, verba ejus ad litteram urgenda non sunt. Cæteroque Strabo vir exoticus circa genus Herodis tam facile potuit falli, quam manifestè deceptus est dum ei summum sacerdotium ascribit. Stephanus porro nihil habet quod ad rem attineat. Tandem Ammonius disertè exprimit Idumæos cognomen Judæorum sortitos esse

undequaque liberæ non imponitur; ergo.

Nego consequentiam. Aliud est rempublicam ad solvendum tributum cogi, aliud est supremam potestatem ipsi cœptam auferri. Jam observavimus Judæos, etsi post captivitatem fuerint Persarum, Græcorum, Syrorum, necnon Ægyptiorum tributarii, nihilominus in veri nominis rempublicam tunc coalitos fuisse.

Objicies adversus secundam partem. Cum Herodes regnum adeptus est, Judæorum respublica non statim penitus labefactata fuit. Stabat ejus regni initio Judæorum senatus, cujus judices ille tyrannus interfecit, jus vitæ et necis non nisi post Archelai exilium nationi ademptum; denique Judæi in unum corpus coadunati terram promissam incoluerunt, ritibusque suis ac legibus usi sunt usque ad excidium urbis et templi. Præterea, ut observat Petavius, lib. 16 de Incarn. cap. 6, n. 15, inchoationes et initia desitionum suarum, necnon progressus et terminos habere solent prophetiæ; ergo.

Resp. Quod attinet ad possessionem *sceptri* seu auctoritatis supremæ, rempublicam Judæorum fuisse penitus labefactatam, ubi primum Herodes regno fuit potitus. Siquidem tunc tenens sceptrum nec fuit natione Judæus, nec à Judæis ullomodo suam auctoritatem hausit; prætereaque, quod notandum maximè, nunquam exinde suprema auctoritas penès Judæos rediit; ergo, licet, etc. Cæterum non incipiamur ratione circumstantiarum mentem sensusque commoventium, defectionem sceptri gradatim, si ita loqui fas est, auctam fuisse. Ante ultimam consumptionem regni reparatio fortè adhuc poterat in desperatis non omninò haberi; sed nihilominus verum est, à quo tempore Herodes solium est consecutus, Judaicam nationem imperio alieno esse subjectam, nec in possessionem supremæ potestatis unquam reversam fuisse.

Objicies adversus tertiam conclusionis partem cum Torniello. Nicolaus Damascenus Herodi familiaris, eo adhuc vivente, scripsit ipsum è primatibus Judæorum qui è captivitate Babylonica redierant, genus suum duxisse; ergo, etc.

Nego consequentiam. Hæc mendaciter et assentationis causâ à Nicolao Damasceno dicta fuisse observat Josephus jam citato cap. 1, alias 2, lib. 14. Antiq. n. 2. Nec sanè id creditu difficile videbitur, si ex unâ parte, quantâ Herodes regnandi cupiditate molitus sit, perpendatur; et ex alterâ, quanti Judæorum regis interesset, ut ex Judâ satus crederetur.

Instabis. Josephus ex regiâ Assamonæorum familiâ quam Herodes extinxerat, maternum genus ducens, privatis odiis indulgere potuit, dum circa Herodis originem Nicolao Damasceno auctori coætaneo contradixit; ergo.

Nego ant. In cæteris quæ de Herode Josephus narrat nullum ejusmodi odii vestigium. Quid ergo ille historicus privatis odiis indulsisse conjicitur cum tradidit Herodem Judæum genere non fuisse? Dum scripsit Nicolaus Damascenus, Herodes ægrè tulisset sibi genus ascribi quod rebellandi ansam Judæis potuisset præbere. Dum scripsit Josephus, vera Herodidum originis declaratio nihil quidquam poterat ejusmodi principibus prodesse aut nocere; ergo.

Objicies iterum cum eodem 1^o si Herodes Idumæus fuisset, ad præscam Idumæorum religionem voluisset Judæos trahere; 2^o, Herodes templum amplificavit et mirum in modum decoravit, ac religionis Judaicæ zelatorem sese exhibuit acerrimum; ergo.

Nego consequentiam. Religioni Judaicæ addictus necne fuerit Herodes, regnum tot laboribus partum conservare cupidus planè concipitur hisce modis sese gerere debuissè.

Obj. 3^o cum eodem. 1^o Alexander Jannæus Antipæ, seu Antipatro Herodis avo, Idumæo totam non credidisset Idumæam regendam. 2^o Hircanus rex simul et pontifex Herodi Mariamnem neptem suam in uxorem dedit; atqui hanc non tradidisset alienigenæ. 3^o Inter Judæos fuere qui Herodem ut Messiam agnoverunt; unde nomen *Herodianorum* sortiti; ergo eum spectabant ut Judæi tribulem; noverant enim Messiam ex Judâ oriundum.

Ad primum nego suppositum. Antipas, ut diximus, non fuit Idumæus nisi moribus et institutione. Ascalonita porro Idumæis moribus informatus, et apud eos jam potens, nonne maximè fuit idoneus, qui Idumææ bello partæ præficeretur? Hæc agendi ratione suis commodis consulebat Alexander, ac Idumæorum simul sibi conciliabat animos. Ad secundum nego min. Leges quibus, ne matrimonia cum alienigenis contraherentur præscriptum fuerat, sæpè violatas fuisse extra controversiam positum est. Nihil ergo mirum quod Mariamnes Hircani neptis in uxorem data fuerit Herodi, cujus pater summam rerum sub Hircano administraverat, quique ipse pariter illi principi ferè solam regiæ dignitatis speciem reliquerat. Ad tertium, dato antecedente, quod tamen incertum est, à multis enim alia Herodiano-

rum assignatur origo; nego consequentiam. Nonne errantes quaecumque perspicua suis erroribus adversa solent nubibus obtegere? Num Josephus arbitratus est Vespasianum esse Judæa tribulem, cum eum ut Messiam habuit?

Obj. 4^o cum eodem. Cum Judæi de civitatis jure apud Cæsarem cum Syris contenderent, illud præcipue urserunt, Herodem conditorem urbis Judæum fuisse, quod non inficiati sunt Syri. Testis est Josephus lib. 20 Antiq. cap. 8, olim 6, n. 7; ergo.

Nego conseq. Nam 1^o, id à Josepho tantum recitatur, non approbatur. 2^o Ut Judæi in suæ causæ momentum afferre possent Herodem fuisse Judæum, satis erat illum ratione religionis, et latiori sensu hanc meruisse appellationem. In ejusmodi negotiis peragendis cuncta exiliter ad calculos non revocantur. 3^o Herodem esse Judæum Syri non inficiati sunt, seu quod Herodis genus, legesque Judæorum de alienigenis haud satis ipsis essent perspecta; seu quia simul ut constabat Herodem fuisse ex Judæorum republicâ, eorumque legibus et ritibus addictum, parum ad causam referebat, an esset origine Judæus, cunctisque Judæorum natorum juribus frueretur.

Objicies 5^o Quemadmodum Act. 2, v. 9, plures ratione habitationis appellantur Parthi, Medii, et Ælamitæ, et Cretes et Arabes, etc. quos tamen fuisse Judæos v. 5. indicatur; ita Herodis pater et avus, etc., appellari potuerunt Idumæi, ratione scilicet commorationis in Idumæâ. Nego conseq. Nam cap. 2 Act. occurrit ratio specialis cur omnes ii Judæi, nomine regionum quas incolere solebant, designarentur, scilicet ut explicaretur miraculum insigne de dono linguarum Apostolis concessio. Quæ verò ratio Herodem vocari Idumæum coegisset, si fuisset natione Judæus? Sed appellatur Antipater genere Idumæus à Josepho, appellatur Herodes apud eundem Idumæus, hoc est Semi-Judæus, appellatur à Patribus alienigena; ergo.

Obj. 6^o cum eodem, 1^o Nemo ex Patribus difficultatem hanc ex proposito discutiendam suscepit. 2^o In his quæstiunculis ab iis dissentire possumus; ergo. Ad primum, nego ant. Quantum opus erat, ab ipsis inquisitum est de Herodis origine. Josephi testimonium ab Origene, Eusebio et aliis multis laudatur; pariter Africani narratio eos non latuit; quâ ratione Herodes Idumæus simul et Ascalonita potuerit appellari S. Epiphanius explicat; quid suâ ætate de Herodiadum stirpe Judæi sentirent,

perspectum habuerunt. Ex his omnibus ab ipsis deductum est Herodem alienigenam fuisse. Ad secundum, fatemur perinde sacram non esse sanctorum Patrum auctoritatem ubi de ejusmodi quæstiunculis agitur, ac circa res fidei. Quæ ab ipsis credita sunt fide divinâ, hæc eadem fide teneamus necesse est. Quidquid verò de quæstiunculis ad historiam spectantibus tradiderunt, id sapientis critici judicio obnoxium. Verum, ut in rebus fidei ab eorum unanimiter sentientium auctoritate ne latum unguem recedere unquam licet; ita sine graviore momento posse eorum testimonium, in rebus etiam merè historicis deserui, nemo sapienter dixerit. Sed quæ hic exaggerat momenta Torniiellus, nulla sunt; ergo.

Obj. cum Scaligero in *Animadv. ad Eusebii chronicon*. Herodes, etsi Idumæus genere, verè tamen indigena censendus est: « Ex quo enim, « tempore, inquit Hircanus Idumæos subegit, « non amplius Idumæi, sed Judæi vocati sunt, « et pro veris Judæis habiti. Ergo Herodes, « qui patre et avo Idumæis ac proinde Judæis « prognatus erat, » verus Judæus fuit, non alienigena. Idumæos autem pro veris Judæis habitos probat Scaliger, 1^o allatis in testimonium Josepho, lib. 13 Antiq. cap. 17; Strabone, Ammonio grammatico, et Stephanò. 2^o Quia nemo « vetustissimos προσηλύτους unquam « legit alienigenas vocari. »

Nego antecedens. Ad probationem dist. Judæi vocati sunt, et pro veris Judæis habitii, religione, concedo; genere, et quantum ad omnia jura civilia, nego. Cæterum negari potuisset antecedens; quippe nullum laudabit Scaliger veterem scriptorem qui Idumæos appellaverit veros Judæos. Imò Antigonus apud Josephum loco citato Idumæum hominem interpretatur *Semi-Judæum*, id est, Judæum religione, advenam in multis aliis. Nego præterea ex testibus à Scaligero adductis id confici quod ipse intendit. Hoc unum testatur Josephus lib. 13 Antiq. Idumæos ab Hircano debellatos circumcisionem et ritus Judæorum accipere compulsos. Strabo pariter eosdem tradit ad ejusmodi ritus accessisse; quod si Herodem *virum indigenam* vocet lib. 16 Geographiæ, verba ejus ad litteram urgenda non sunt. Cæteroquin Strabo vir exoticus circa genus Herodis tam facile potuit falli, quam manifestè deceptus est dum ei summum sacerdotium ascribit. Stephanus porro nihil habet quod ad rem atlineat. Tandem Ammonius disertè exprimit Idumæos cognomen Judæorum sortitos esse

tantum propter religionem Judaicam à se receptam. « Idumæi, inquit, origine non sunt « Judæi, sed Phœnices ac Syri. Victi autem à « Judæis et ad circumcisionem compulsi, et « eidem regno contributi, eademque sacra amplexi, Judæi quoque cognominati sunt. » Nego denique vetustissimos proselytos non fuisse vocatos alienigenas. Nam 1° ostendimus proselytorum, seu peregrinorum et advenarum, à Salomone, lib. 2 Paralip. censitorum, plurimos procul dubio fuisse proselytorum nepotes et abnepotes, ac proinde *vetustissimos* προσήλυτους. 2° Judæi cunctos Herodiadas proselytos appellant, et in *Pirke avoth* sermo fit de proselyto usque ad decimam generationem. 3° Inquiro ego, ubinam legatur vetustissimos proselytos desivisse esse proselytos, seu peregrinos et advenas? Sanè qui ex gentibus ad ritus Judaicos accedebant, non appellabantur peregrini, advenæ, et alienigenæ, nisi propter genus à genere Israelitico diversum, quo à pluribus Judæorum natorum juribus prohibebantur. Cum igitur lege nullà cautum esset, futurum ut post aliquod tempus haberentur ut indigenæ, et tribubus insererentur; cum ex adverso tribuum et familiarum populi Israelitici genealogiæ maximâ diligentia conservandæ essent, ne generis Abrahæ ulla fieret cum alieno genere commixtio; sequitur ex speciali populi Israelitici constitutione proselytos etiam vetustissimos debuisse semper manere proselytos, seu advenas, peregrinos et alienigenas. 4° Origenes, Eusebius et multi Patres suprâ laudati ex ipsâ Josephi Historiâ, ac Herodem ex patre et avo Idumæis prognatum supponentes, ipsum nihilominus alienigenam fuisse scribunt; ergo, etc.

Inst. 1° Cum eodem, Josephus non vocavit Herodem ἀλλόφυλον, ut Eusebius. Dist. ant. non vocavit expressè, concedo; non significavit æquivalenter, nego. Josephus planè declaravit Herodem alienigenam fuisse dum ex patre Idumæo et matre Arabe illum progenitum scripsit. Atque in hunc sensum Origenes, Eusebius, S. Hieronymus, Photius, et alii veteres scriptores ecclesiastici historiarum Judaicarum peritissimi Josephum interpretati sunt.

Inst. 2° cum eodem. Proselyti filius nunquam vocatus est proselytus. « Quemadmodum « libertini filius nomen est libertinus, ita nec « proselyti nepos rectè proselytus vocatur. « Quantò minùs pronepos aut abnepos proselyti! » Ergo Idumæi ab Hircano ad Circum-

debuerunt, sed eorum posteri non fuerunt proselyti.

Nego ant. propter rationes jam adductas. Proselyti porrò libertinis absque fundamento comparantur; nam hæc sunt juris positivi, diversæque sunt de iis diversorum populorum consuetudines. Prætereà particulares à Deo Israelitis datæ constitutiones de distinctione tribuum et familiarum, de rebus civilibus, de rege eligendo, etc., eis interdicebant de multis usibus apud alias nationes observatis; ergo, etc.

Obj. cum Casaubono: « Quemadmodum hoc diè Judæum, aut Turcam, aut Tartarum, « postquam sacro lavacro fuerit tinctus, Christianum et esse et dici rectè ac vel maximè « nemo sanæ mentis negaverit, sic olim alienigenæ, postquam erant circumcisi... veri « Judæi esse censebantur; » ergo cum Herodes, etc. Nego anteced. et paritatem. Dispar ratio est, quia nomen Christiani, nomen est religionis duntaxat, non originis; Christianus siquidem fit, non nascitur. *Omnes, inquit Apostolus Gal. 3, v. 6, filii Dei estis per fidem..... non est Judæus neque Græcus, non est servus neque liber*, etc. At verò Judæi appellatio erat tum religionis, tum generis et originis; Judæi quippe nascebantur et fiebant. Hinc Act. 2, v. 11, Judæi veri seu nati à factis distinguuntur, istique proselyti, seu advenæ et peregrini sæpè cognominantur. Advertas obiter Casaubonum hic ipso Scaligero longius esse progressum; quippe non tantum proselytorum filios, ut Scaliger; sed etiam primùm judaicis ritibus adscitos pronuntiat indigenas fuisse.

Objicies 3° cum eodem. Scribit Philo in Monarchiâ, « Mosem..... æquabilitatem juris « omnibus advenis, sive proselytis tribuisse, « eademque omnia ipsis concessisse quæ indigenis; » ergo. Resp. Philonem explicandum esse de juribus ad sacra et religionem pertinentibus.

Objicies denique. Josephus, lib. 14 Antiquit. cap. 14, refert Antipatrum Judæos in Ægypto degentes facillè ad Cæsaris partes traxisse, quòd esset *ex eadem gente*. Idem lib. 15, c. 14, Herodem inducit Judæos appellantes *viros contribules*. Ad primùm, distingo ex eadem gente ac Judæi, id est, ex eadem republicâ et religione, concedo; ex eodem genere, nego. Antipatrum fuisse genere Idumæum expressis verbis Josephus tradit. Cum autem Judæorum ritus ac religionem amplexus esset, atque eorum regno et reipublicæ esset subjectus, faci-

lius potuit à Judæis in Ægypto degentibus secundis auribus accipi, eosque ad suscipiendas Cæsaris partes adducere. Ad secundum eadem est responsio. Herodes Judæos sibi devincire studens, quam cum iis habebat societatem verbis amplificabat, et in majus extollebat. Eamdem ob causam sese religionis Judaicæ cultorem observantissimum exhibuit. Unde Augustus, cum filium Herodis à patre morti traditum accepisset, fertur dixisse : *Melius est Herodis esse porcum quàm filium*; apud Macrob. Saturnal. cap. 4.

Quid alterà vaticinii parte : Et dux de femore ejus, *significetur*. — Sceptri à Jacobo prænuntiati significatione assignatâ, ejusque initio, duratione, ac fine explicatis, facilè intelligi potest ista prophetiæ pars : *Et dux de femore ejus*.

1^o Nomen מֶכֶּכֶּק *Mekokek*, quod ducem vertit Vulgatus Interpres, alii verò *legislatores* interpretantur, non significat legislatorem propriè ac strictè dictum. Si quidem solus hoc sensu legislator Israelitarum fuit Moyses, ad cujus legem res civiles et ecclesiasticæ perpetuò et religiosè exigendæ fuerunt et disponendæ. 2^o Idem vocabulum non significat quemvis judicia exercentem, quemlibet judicem infimum ac legis interpretem; voces enim *ducis*, *dominatoris*, *legislatoris*, quibus illud nomen redditur, necnon ejus affinitas cum primâ prophetiæ parte et voce sceptri, magnificentius quid sonant, et altiore sensum ingerunt. 3^o Nec recipienda videtur sententia Pererii in cap. 49. Genes. n. 10, versùs finem. hâc voce opinantis designari principes ex Judâ satos, penès quos extitit supremæ auctoritatis usus. Quippe *dux* seu *legislator*, ex vaticinio Jacobi, haud secùs ac sceptrum, usque ad Messiam erat perseveraturus; sed post captivitatem Babyloniam, non principes ex Judâ sati, sed sacerdotes ex Levi tribu præcipuæ auctoritatis usu potiti sunt; ergo.

At, inquit eruditus interpres, « hoc ita solvitur; illud, *donec veniat qui mittendus est*, refertur ad illud prius : *Non auferetur sceptrum de Judâ*, non autem ad illud posterius : *Et dux de femore ejus*; » ergo. Nego antecedens quia vox *lo iasour*, *non auferetur*, ad illa duo *sceptrum* et *ducem* ex æquo refertur; fieri ergo nequit, ut illa vox semel tantum posita sceptrum usque ad Messiam esse permansurum significet, et simul ducem non tamdiu permansurum designet.

Instabis. « Solet Scriptura, cum plura con-

« junctè præmisit, extremo loco ponere aliquid
« quod non ad omnia illa præcedentia, sed ad
« unum aliquod eorum tantum referatur; cu-
« jus rei exemplum in promptu cap. 15 Gene-
« sis; *Dixit Deus Abraham : Peregrinum erit
« semen tuum in terrâ non suâ et subjicient illud
« quadringentis annis*. Hoc extremum, *quadrin-
« gentis annis*, tantum refertur ad illud pri-
« mum : *Peregrinum erit*, » etc. Nego consequentiam et paritatem. Ubi, loco in exemplum allato, aut in alio quovis extremum aliquod non ad immediatè præcedentia, sed ad aliud refertur; non ideò cogimur uni et eidem voci semel tantum positæ duas simul tribuere significationes oppositas; quod in opinione Pererii occurrit.

4^o Doctissimi Petavii sententia lib. 15 de Incarn. cap. 6, n. 13 et 14, juxtâ quam legislatoris nomine verisimilius est sacros et ecclesiasticos magistratus hic intelligi, ita ut Jacob prædicere voluerit utramque potestatem, civilem et ecclesiasticam, quâ Judæ regnum administrabatur, illi tribui non auferendam ante Messiae adventum; hæc, inquam, sententia, etsi dictis superius de significatione, continuatione et fine sceptri, necnon eventui maximè cohæreat; attamen minùs probabilis videtur. Nam ut hanc tueatur opinionem, dicere cogitur post R. Aben Eram, his verbis, *de inter pedes ejus*, naturalem à Judâ propagationem non significari, sed iis alludi ad leonem prædâ potentem, cui paulò ante Judas fuerat comparatus; quasi dictum esset : Quemadmodum leo captam à se prædam inter pedes constringens, hanc sibi eripi non patitur; ita constantius ac pertinacius cæteris, et usque ad Messiae adventum, tribus Juda civilem et sacerdotalem, quibus regetur, jurisdictionem conservabit. Atqui probabilius videtur his verbis, *De inter pedes ejus*, designari duces ex Judâ naturali propagatione orituros. Nam 1^o Deuter. 28, v. 57, vocibus iisdem naturalis propagatio exprimitur, quod jam alicubi annotavimus; 2^o versio septuaginta Seniorum, tresque Paraphrases chaldaicæ, ac veteres doctores interpretationi illi suffragantur; 3^o sensum hunc Vulgata nostra etiam refert; nam, etsi vocabula *de femore*, in se spectata, mox explicatæ metaphoriæ leonis accommodari queant, attamen quominus id fiat, prohibet usus Vulgati interpretis simili locutione aliis in locis propagationem naturalem exprimentis, Genes. 46, v. 26; Exod. 1, v. 5; Judic. 8, v. 30; ergo probabilius, etc.

5^o. Qui eidem interpretationi Aben Esdræ

adhærentes, *ducem* simili modo explicant, quo *sceptrum* exposuimus, quasi dictum esset : Suprema auctoritas semper manebit in Judâ, atque proprios sibi principes seu ex se, seu ex fratribus suis progenitos, auctoritatem ejusmodi exercentes, constanter ac pertinaciter retinebit Judæ tribus, donec Messias veniat ; ii à superiùs stabilitis etiam non dissonant, sed probabiliori vocum *de inter pedes ejus* expositione mox traditâ etiam refelluntur.

6°. Denique illud, *Et dux de femore ejus*, videtur significare semper futuros in republicâ Judaicâ usque ad Messiam, duces seu iudices ex Judâ prosatos, in aliquod usûs potestatis supremæ consortium vocatos. Illa enim dictæ vaticinii partis interpretatio videtur præ cæteris eligenda, quæ probabiliori versioni simul et eventui consonat; atqui allata interpretatio, etc. Consonat quidem probabiliori versioni, juxta quam, ut diximus, verba *de inter pedes ejus*, naturalem propagationem significant. Consonat etiam eventui; nam ante captivitatem Babylonicam reges fuere tribules Judæ. Post captivitatem porrò, usque ad Judæ Aristobuli tempora, qui anno ante æram vulgarem sexto suprâ centesimum Assamonæorum primus, referente Josepho, regium diadema nomenque sibi imposuit, aristocraticum regimen oligarchiâ mixtum, et democratiâ aliquâ temperatum apud Judæos obtinuit, ut ex Machabæorum libris, Josephique expressis testimoniis superiùs probatum est. Itaque per id tempus summa rerum administrabatur, supremæque exercebatur auctoritas præsertim ab optimatibus; etsi non omninò æqualitèr à singulis; quippe nonnullis illorum, scilicet summis sacerdotibus primæ deferri solebant. Adeoque, cum dubitari nequeat quin ex illis optimatibus plurimi semper fuerint ex tribu Juda, quæ ferè sola redierat; sequitur post captivitatem, ad usque Judæ Aristobuli tempora, perpetuò extitisse duces ex Judâ prosatos, in quoddam usûs supremæ potestatis consortium vocatos.

A quo tempore autem principatus in formam regni ab Aristobulo translatus est, non ideò defuere ejusmodi duces ex Judâ orti. Etenim magnam sibi in judiciis ferendis auctoritatem retinere optimates regnantibus Assamonæis. Senatus Judæorum, de quo non semel sermo fit in Machabæorum libris, ab eorum stirpis regibus non fuit abolitus; tantæque illius concilii iudices auctoritate valuerunt, ut Herodes ipse, Galilææ tunc præfectus, atque Antipatri illo tempore cuncta sub Hircano moderantis filius,

quòd Ezechiam Judæum cum latronum agmine Syriæ fines infestantem, nullâ ab Hyrcano acceptâ potestate interfecisset, in iudiciuin vocatus ac venire coactus, nonnisi fugâ sententiam potuerit declinare. Ex quibus patet potestatem summam judiciorum ferendorum penès illum senatum constitisse; proindeque per id temporis fuisse etiam duces seu iudices tribules Judæ, atque usûs supremæ auctoritatis aliquâ ratione consortes. Confirmatur ex testimoniis doctissimorum Judæorum, quos laudat Helvicius membro 3, n. 4. « In templo secundo, inquit R. Abraham in chronico *Cabalâ*, hæc fuit consuetudo, ut rex è familiâ Assamonæorum et servis eorum filiis Herodis, educeret ac reduceret exercitum, curaretque omnia quæ ad regnum pertinent; verum quæ ad legem spectabant statuta ac judicia, ad os principis de domo David fuere facta, et juxta mandatum pontificis Synedrii. » Et R. David Ganz Judæorum historicus in *Germine David* : « Is mos erat Hierosolymis, inquit, quandiu esset regnum ex familiâ Assamonæorum, et post eos familiâ Herodis; ecce semper fuit princeps de domo David. Nam rex curabat exercitum et res bellicas; verum quæ ad legem pertinebant, statutaque ac judicia, ad nutum pontificis et principis è familiâ David administrabantur. »

Dices. Jeremiæ cap. 22, v. 30, de Jechoniâ hæc leguntur : *Scribe virum istum sterilem ... nec enim erit de semine ejus vir, qui sedeat super solium David, et potestatem habeat ultra ex Judâ*; ergo post captivitatem Babylonicam nullus erat futurus princeps è tribu Judâ. Nego consequentiam : 1° quia familia Jechoniæ erat tantum una ex tribu Juda; non ergo sequitur nullos esse potuisse principes ex illâ tribu, quòd nulli esse debuerint ex Jechoniæ posteris; 2° quia verba Domini apud Jeremiam intelligenda sunt in ordine ad dignitatem regiam, quasi dictum esset, nullos Jechoniæ filios regno ampliùs potituros, quod reipsâ evenit. Cæterum Jechoniæ filios Scriptura commemorat I Paralip. 3, v. 17, ac Zorobabel, quo duce populus è captivitate rediit, fuit Jechoniæ nepos.

Quæres utrum *duces* seu *legislatores* è femore *Judæ*, simul ac *sceptrum*, cessaverint? Respondet, etsi defecissent paulò seriùs sceptro, quod à Judâ tempore Herodis ablatum fuisse docuimus, ejusmodi discrimen, quod ad vaticinii exitum spectat, nullius esse momenti. Quippe ejusmodi res, ut jam notavimus, et apud omnes in confesso est, ad rigorem mathematicum

non exiguntur, sed ad prudentem æstimationem conferuntur; etsi ergo iudices summi et interpretes legis à femore Judæ non desiissent, priusquam Judæis versùs annum septimum æræ vulgaris, ut diximus, jus gladii fuerit à Romanis ademptum; vel, etiamsi eorum totalis defectio usque ad urbis et templi ultimam consumptionem esset differenda; istud perinde staret, versùs Messiae tempora, tum sceptrum, tum duces ex femore Judæ penitus esse extinctos. Quod si quis minorum calculorum rationem habere velit, nihil obest quominus duces illos seu legislatores tunc defecisse dicat, cum Herodes cunctos concilii Judæorum senatores, uno excepto, neci tradidit, eisque suffecit plebeios, ut scilicet omnem auctoritatem ad se unum raperet.

Superest ut Jacobæi vaticinii genuinam expositionem ex dictis hactenus colligamus. Sensus illius est: Ubi primum Juda auctoritate supremâ potietur, ab illâ non excidet, vel quia tēnentes sceptrum erunt ejus tribules; vel quia, quotquot in ejus tribum summo principatu utentur, si non ex illâ nati, saltem ex eâ suam haurient auctoritatem. Pariter duces ex ejus sanguine orti aut summam rerum soli administrabunt, ut tempore regum; aut minimum, potestatis supremæ in judiciis exercendis erunt participes, uti post captivitatem contigit. Hæc ratione, inquam, permanebit summa auctoritas in Judâ, et dux de femore ejus, usque ad tempora Messiae, qui est expectatio Gentium.

ARTICULUS II.

De insigni vaticinio Danielis, 9, v. 24 et seqq.

Cum Daniel ex Jeremiæ prophetiâ captivitatem Babylonicam brevi desituram esse intelligens, Dominum deprecaretur, ne promissam populo suo libertatem differret; ipsi sub specie viri Angelus Gabriel apparuit, indicaturus post solutam captivitatem eventura. *Ego veni, inquit Angelus, ut indicarem tibi, quia vir desideriorum es. Tu ergo animadverte sermonem, et intellige visionem. Septuaginta hebdomades abbreviatæ sunt, super populum tuum et super urbem sanctam tuam, ut consummetur prævaricatio, et finem accipiat peccatum, et deleatur iniquitas et adducatur justitia sempiterna, et impleatur visio et prophetia, et ungatur Sanctus sanctorum. Scito ergo et animadverte, ab exitu sermonis ut iterum ædificetur Jerusalem, usque ad Christum ducem, hebdomades septem, et hebdomades sexaginta duæ erunt, et rursum ædificabitur platea et muri in*

angustiâ temporum. Et post hebdomades sexaginta duas occidetur Christus, et non erit ejus populus qui cum negaturus est. Et civitatem et Sanctuarium dissipabit populus cum duce venturo, et finis ejus vastitas, et post finem belli statuta desolatio. Confirmabit autem pactum multis hebdomadâ unâ, et in dimidio hebdomadis deficiet hostia et sacrificium; et erit in templo abominatio desolationis, et usque ad consumptionem et finem perseverabit desolatio.

Quæritur 1^o, utrum ex illâ prophetiâ adversus Judæos demonstrari possit Messiam jamdudum advenisse. 2^o Undenam ducendum sit initium septuaginta hebdomadum de quibus eo in oraculo sermo fit. Istud posterius multa circa chronologiam difficillima, variasque in partes ab interpretibus et theologis agitatâ, continet; sed à quibus prioris nequaquam pendet disquisitio. Utrumque paragrapho duplici complectemur.

Antequam autem in rem ipsam ingrediamur, ut dicendis major lux affulgeat operæ pretium ducimus brevi commentario insigne illud vaticinium illustrare.

Septuaginta hebdomades; hebraicè *Schabukhm Schibhim*, hebdomas duplicis generis apud Hebræos, nempe annorum et dierum, utraqûe usitatissima. Septimanæ dierum memorantur Levitici cap. 23, v. 15 et 16: *Numerabitis ergo ab altero die Sabbati, in quo obtulistis manipulum primitiarum, septem hebdomadas plenas, usque ad alteram diem expletionis hebdomadæ septimæ, id est, quinquaginta dies.* De annorum verò hebdomadis sermo fit ibid. 23, v. 3: *Sex annis serēs agrum tuum, et sex annis putabis vineam tuam, colligesque fructus ejus, septimo autem anno sabbatum erit terræ requietionis Domini.* Et v. 8: *Numerabis quoque tibi septem hebdomadas annorum, id est, septies septem, quæ simul faciunt annos quadraginta novem.* Vidē etiam Genes. 29, v. 27. Apud ipsos auctores profanos, Aristotel. Politic. lib. 7, versùs finem, et Varronem in Gellio, Noct. Attic. 3, 10, ejusmodi hebdomadum annorum mentio reperitur. Itaque cum Danielis hebdomadas de septimanis dierum intelligi subjecta non ferat materia, eas consequens est de annorum hebdomadis esse accipiendas. Conficiunt proinde summam annorum nonaginta supra quadragintos. Porro consentiunt etiam omnes Rabbini vaticinium de dierum hebdomadis non esse explicandum. Quas autem eorum quidam ad eludendam oraculi vim commenti esse referuntur hebdomadas decadum, aut seculorum, inferiùs explōde-

mus. — *Abbreviatæ sunt* : hebraicè *nechtach*; quæ vox est græcæ versioni, συνετμήθησαν, *concisæ sunt* : Buxtorfio in Lexico Hebraico et Chaldaico, *decisæ*; nonnullis *determinatæ, definitæ*. Quibus omnibus una et eadem hic subjicienda notio. Sensus est, tempus fuisse *decisum, abbreviatum, decurtatum*, atque ad septuaginta hebdomadas redactum; vel, quod eodem redit, illud tempus fuisse constitutum, fixum ac definitum; vel denique, ante hebdomadas 70 omninò elapsas eventurum, quod prædicitur. Itaque perperàm in Vulgatum interpretem invehuntur Protestantes (1) aliqui, quòd verterit *abbreviatæ sunt*, non *definitæ*. Græcæ versioni et Buxtorfio Vulgata eò loci consona, quod ad rem ab aliâ interpretatione non differt. Cùmque, ut omnes concedunt, hebræum *nechtach*, illà tantum vice occurrat in Bibliis, nec ullum in iis aliud extet verbum ex eadem ductum radice, cùmque Paraphrasis chaldaica in Esther. 4, v. 5, quâ *nechtach*, pro *definitum* accipitur, ab omnibus habeatur in levi; nullus sanè hic locus erat litis Vulgato interpreti intentandæ.

Ut consummetur prævaricatio; hebraicè *lecalle happescha*, id est, ut Christum occidendo Judæi iniquitates suas cumulent. — *Et deleatur iniquitas*; hebraicè *oulecapper haon*; et ad expiandum iniquitatem. Ista cum præcedentibus non pugnant, Christus enim mortem subiit ut iniquitates deleret. — *Et adducatur justitia sempiterna*: *oulehabhi tsedek olamim*; id est, religio sanctificans, veram justitiam conferens ac semper duratura, neque, instar legis Mosaicæ, aliquando abroganda. Alii, *justitiam sempiternam* interpretantur Christum ipsum, victimam jugem et perpetuam, qui essentialiter justus est, et nomine *justi* ac *justitiæ* non rarò in Scripturis designatur. — *Ut impleatur visio et prophetia*: *velachtom hhazon venabhi*, ad sigillandum visionem et prophetam: hoc est, ut omnia Prophetarum vaticinia adimpleantur, quæ, cùm spectent Christum, non potuerunt ante ejus adventum ad exitum perducì. — *Et ungatur Sanctus sanctorum*; hebraicè *kodesch cadaschim*: *sanctitas sanctitatum*. Hebræi neutro carent, et ejus loco usurpant fœmininum. Potuissent proinde hebræa de verbo ad verbum reddi: *Et ungatur Sanctum sanctorum*; id est, verum templum, vera Arca, scilicet Christi humanitas, quæ unione cum Personâ Verbi

ungitur et sanctificatur, quamque Arca et templum præsagiebant et figurabant. Neque enim his verbis, *Sanctum sanctorum*, Judæis licet ipsummet templum intelligere, quippe quod, non ungendum, et consecrandum, sed polluendum et funditùs destruendum ab Angelo prædicitur versib. 26 et 27. Ex quo colligere est accuratum esse Vulgatum interpretem, dùm vertit, *Sanctus sanctorum*. — *Ab exitu sermonis ut iterum ædificetur Jerusalem*. Vox illa *min motza dabar*, *ab exitu sermonis*, duplici præsertim modo accipitur. Plerique sentiunt illà significari patefactionem et egressum sermonis, quasi dictum esset à *sermone edito*; quia scilicet vox *exire* sæpè in Scripturis promulgationem et declarationem significat. Isaïæ 11, v. 4: *Attendite, quia lex à me exiet*. Danielis 6, v. 7: *Decretum imperatorium exeat*. 2 Machab. 6, v. 18: *Decretum autem exiit in proximas gentilium civitates*. Lucæ 2, v. 1: *Exiit edictum à Cæsare Augusto*. Attamen Turneminiùs è Societate Jesu, presbyter, magni, dùm viveret, in litteris nominis, Dissertatione 16, Menochii suppletii anno 1719, à se editi, vult hebraicas voces *min motza debar*, esse reddendas, à *completo et perfecto sermone*; ac proinde falli eos « qui 70 hebdomadam initium aliunde « ducunt quàm à perfecto muro Jerusalem; « quippe, inquit, tunc solùm effectum habuit « sermo sive Dei, sive regis Persarum de Jerusalem reædificandâ. » Estius Annotat. in difficill. Script. loca, ad caput 9. Danielis eamdem interpretationem indicat. — *Ut iterum ædificetur Jerusalem*: hebræa *lehaschid velibnoth*, de verbo ad verbum: *Ad reverti faciendum, et ædificandum*; quæ juxta hebraici sermonis indolem idem valent ac ista: *Ad iterum ædificandum*. — *Jerusalem*: *Ierouschalaim*. Igitur non solummodò templum, aut ædiculæ et domus circum constructæ, sed urbs Jerusalem, ac proinde mœnia ejus. — *Usque ad Christum ducem*: *ad Maschiach naghid*. His verbis Messias designatur, ut aliquando ostendemus. — *Hebdomades septem et hebdomades sexaginta duæ erunt*: *schobuhim schibah veschabuhim schischim ouschnaim*; id est, 69, hebdomades annorum erunt, quorum summa 483, annis constat. Quæritur quid causæ sit, cur hebdomades sexaginta novem ita computentur divisim, ut primò ponantur septem, ac deinceps sexaginta duæ. Alii quoddam ibi latens arcanum suspicantur, quod sedulò investigandum censent; alii rectius videntur existimare, nihil forsitan in eo mysterii inesse, atque hanc Hebræis esse

(1) Pridæus T. 2, lib. 5. *Hist. Jud.* edit. Paris. 1742, p. 199 et seq., et alii.

potuisse non insolitam rationem computandi; haud secus ac numerus brevior à latinis loco priori collocatur. In exemplum usus Hebræorum assertur illud Ezech. 45, v. 12 : *Viginti sicli et viginti quinque sicli, et quindecim sicli mnam faciunt.* — *Et rursùm ædificabitur platea et muri in angustia temporum.* Hebraicè, ut suprà, *taschoub venibnetha, reddibit et ædificabitur*, etc. Ait Turneminius in citatâ Dissertatione, verba, *in angustia temporum*, idem esse ac, *in tempore angusto*, seu, *brevi*; hæcque ad 7 hebdomadas antea memoratas refert, atque *plateas* et *muros* explicat de ædificiis ad urbis ornatum et defensionem conducentibus. Istud proinde vaticinii membrum sic ex ipso exponendum est; iterùm platea ædificabitur, muri propugnaculis munientur, urbsque ornatum suum recipiet in tempore angusto, id est, septem hebdomadarum spatio, quod est pars angustior temporis in duo ab Angelo distracti. Hæc explicatione rationem reddit cur 69 septimanæ bipartitò secatæ sint, ac primùm positæ fuerint septem, et postea sexaginta duæ. Sed cùm is decor intra annos 49 Jerosolymis restitutus, mera sit conjectura, quam nulla firmat auctoritas, satius videtur *angustias temporum* interpretari vel breve tempus quo muri urbis extracti sunt, 2 Esdræ 6, v. 15, vel angustias et ærumnas quibus interea Judæi fuere coarctati, ibid. cap. 4. — *Et post hebdomades sexaginta duas*: quæ nimirum fluent post alias septem, cum quibus in unam summam conflatae sunt. — *Occidetur* (hebraicè *exscindetur*) *Christus, ikkareth Maschiach*, nempe Messias, ut deinde probabitur. Eundem sensum, sed imperfectiùs exprimit græca visio, quàm S. Hieronymus præfatione Comment. in Daniele Theodotioni tribuit. In eâ non legitur, *χριστος*, *Unctus*, sed *χρισμα*, *Unctio*. Symmachus et Aquila apud Euseb. Demonst. Evangel. pag. 397, meliùs legunt, ut Vulgata, *Unctus*, seu *Christus*. Nam hic occurrit eadem vox hebræa *maschiach*, ac versiculo præcedenti; cùm igitur illo in versiculo, sumatur adjectivè, *Christum ducem*; in isto adjectivè etiam, non substantivè sumenda est. — *Et non erit ejus populus qui eum negaturus est.* Hebræum *veen loh* his respondens, tria significare potest. 1º *Non sibi*, quasi diceretur: *Christus non sibi*, non propter sua peccata et propriam utilitatem occidetur, sed pro aliis. 2º *Non ei*, supple *judicium*, alioqui manca esset oratio. Id quoque competit Christo, qui injustè damnatus est. Postremò, *et non ejus*, ubi Vulgatæ auctor supplendum censuit, *erit populus, qui eum negaturus*

est; quod etiam in Christo Domino adimpletum. Quævis igitur adhibeatur versio, sensus eò loci expressus in Christum quadrat aptissimè. — *Et civitatem et sanctuarium dissipabit populus cum duce venturo.* Hebræa *ham naghid habba*, reddi possunt *populus ducis venturi*; perinde est. Hæc ad ultimam Jerosolymorum consumptionem planè referenda. Observa vocem *jachchit*, *dissipabit*, hic ab Angelo adhibitam eandem esse quàm Moyses Genes. cap. 13, v. 10, cap. 18, v. 28 et 31, et cap. 19, v. 14, Sodomæ et Gomorrhæ excidium expressit. — *Et finis ejus vastitas*: hebraicè, *bascheteph, in dihivio*, id est, universitate malorum ingruentium obruetur civitas et natio Judaica. — *Et post finem belli statuta desolatio*; in hebræo habetur, *vead ketz milchamach*, et usque ad finem belli. — *Confirmabit autem pactum multis hebdomada una*: *vehigbir berith larabbim schabouah hechad*. Illud pactum est ipsum fœdus novum à Deo olim Patriarchis promissum et à Prophetis prænuntiatum. Hebdomada autem quæ illud *confirmatura* dicitur, septuagesima est ex iis quas Angelus initio vaticinii dixerat super populum *abbreviata* et *definita*. Intra eam Christus munere *ducis* functus est, Evangelium promulgavit, religionem justificantem ac usque ad mundi finem duraturam instituit, mortemque pro redimendis hominibus oppetens legis Mosaicæ sacrificia et cæremonias abrogavit. — *Et in dimidio hebdomadis*: hebræum *hhatsi haschaboua*, significare potest *dimidiatam* seu *divisam* hebdomadam, hoc est, aliquam ejus partem. — *Deficiet hostia et sacrificium, iaschbith zebach ouminchah*: nempe necessitas, utilitas et valor sacrificiorum evanescet morte Christi, quam illa sacrificia adumbrabant. — *Et erit in templo abominatio desolationis*: hebraicè *veal kenaph schikhoutsim meschomen*; et *super alam* *abominationum desolans*. Ista ad ultimi excidii tempus spectant. — *Et usque ad consummationem et finem perseverabit desolatio.* Versio Vulgata à nonnullis immeritò hic redarguitur. Hebræa enim *vead kelah venecharatsah tittak al schomem*; re idem sonant. Sic habent de verbo ad verbum: *et usque ad consummationem determinatum, effundetur* (ira Dei) *super desolatum*.

His de celeberrimi vaticinii intellectu in antecessum missis, sit:

§ 1. *Ex Danielis vaticinio demonstratur Messiam jamdudum advenisse.*

Non modò cum Judæis nobis hic res est, sed etiam cum quibusdam Christianis; qui tametsi Messiam venisse confitentur, Danielis tamen

oraculum vel nullo pacto, vel non nisi typicè ad Messiam referunt; sicque argumentum ex illà prophetià in Judæos depromptum, tollunt è medio aut saltem plurimùm labefactant. Contra Judæos sit.

CONCLUSIO. Ex Danielis oraculo planè astruitur Messiam jamdudùm advenisse. Probatur 1°. Ex priori vaticinii parte, *Septuaginta hebdomades abbreviatæ sunt*, inquit Angelus, *ut consummetur prævaricatio, et finem accipiat peccatum, et deleatur iniquitas, et adducatur justitia sempiterna, et ungatur Sanctus sanctorum*. Unde sic argumentari licet: Ex illo oraculo jamdudùm Messias venit, juxta quod septuaginta hebdomades, quæ plus quàm sexdecim seculis præterierunt, olim constitutæ, et definitæ fuerant ut veniret Messias. Enimverò, ubi certa hebdomadum periodus, ut aliquid fiat, dicitur constituta; nonne manifestum est significari, autem paulò post elapsas ejusmodi hebdomadas, rem eventuram esse? quidve absurdius, quàm velle in longissimas et indeterminatas seculorum series rem ejusmodi procrastinandam? Atqui ex Danielis oraculo septuaginta hebdomades quæ à plus quàm sexdecim seculis præterierunt, olim constitutæ et definitæ fuerant, ut veniret Messias.

1° Septuaginta hebdomades Danielis à plus quàm sexdecim seculis præteritæ sunt. Non possunt enim esse hebdomades annorum diuturniores, cùm apud Hebræos non aliæ quàm dierum aut annorum hebdomades usu venerint. Hebdomades igitur septuaginta faciunt 490 annos. Porro *exitus sermonis ut iterùm ædificetur Jerusalem*, à quo earum initium Angelus ducit, tardius centesimo post solutam captivitatem anno collocari non potest, siquidem intra illud tempus Jerusalem iterùm ædificata fuit. Itaque, cùm ab illà Jerosolymorum restauratione usque ad hodiernum diem effluerint anni plus quàm bis mille et ducenti, liquet septuaginta septimanas à plus quàm sexdecim seculis esse præteritas. Deinde à plus quàm sexdecim seculis urbs Jerusalem et templum dissipata sunt et funditus destructa; sed ultra ultimum ejusmodi excidium septuaginta hebdomadas protendi non sinunt vaticinii verba, ut modò dicemus; ergo à plus quàm sexdecim seculis elapsæ sunt septimanæ Danielis.

2° Juxta vaticinium illæ hebdomades constitutæ et definitæ sunt ut veniret Messias, siquidem de solo Messia intelligi possunt quæ in illà priore vaticinii parte recitantur. Quis enim, nisi Messias solus, ex Scripturis iniquitates de-

leturus est? quis præter ipsum justitiam sempiternam adducturus, seu religionem sanctificantem ac perenniter duraturam instituturus? quis alter nomine *Sancti sanctorum* designari potuit? Sanè vel Messias, vel templum hoc nomine insigniuntur; non templum, tum quia secundum templum ex Rabbinis ipsis unctione caruit; tum maximè quia tantùm abest ut Danielis oraculo templum ungendum præsignificetur, ut potius diruendum et dissipandum prænuntietur; ergo his vaticinii verbis, *Ut ungatur Sanctus sanctorum*, necesse est intelligatur Messias, qui sanctitate speciali ac sibi propriâ unctus, latentibus Rabbinis, non semel in Scripturis dicitur. Psal. 45: *Unxit te Deus, Deus tuus*; ubi habet Targum: *Et tu, rex Messia, èd quòd amasti justitiam, etc., propterea unxit te Deus, etc.*, et Isaia 61: *Eò quòd unxit Dominus me*; ad quæ verba Rabbi David Kimchi in lib. Radicum ad radicem *Maschach*, ait locutum esse Prophetam in personâ Messiae, quasi Messias dixerit ipse: *Ideòque Deus unxit me*. Itaque prior, de quâ agimus, vaticinii pars ad Messiam tota debet referri. Atque id quidem adeò evidens est, ut à Rabbinis non negetur, etsi vaticinii vim, quæsitis undequaque diverticulis, ipsi contentur eludere. In *Bereschith Rabbâ* ad versic. 18, cap. 14. Genes. illud Isaia 56, v. 1: *Proxima est sanatio mea ad veniendum, et justitia mea ad salvandum*; dicitur designare regem Messiam, de quo scriptum est: *Et ad adducendam justitiam seculorum vel sempiternam*. Sed ista nullibi scripta sunt nisi in oraculo Danielis. Rabbi Moseh ben Nachman Gerundensis, Commentario in Daniele: *SANCTUARIUM SANCTUARIORUM*, inquit, *est Messias sanctificatus de filiis David*. Rabbi Salomo Jarchi in suâ celebri apud Judæos Expositione, accommodat quidem nomen *sancti sanctorum* templo quod à Messia aliquando restaurandum et cum vasis esse sanctificandum comminiscitur; sed etsi vaticinium Commentario suo adulteret, primum tamen illius membrum ad alium quàm ad Messiam non audet transferre. Nec porro illa eadem pars ab Aben Ezrà, Orobio, etc., aliò detorquetur.

Igitur ex se et ex Rabbiorum consensu certissimum est, hæc vaticinii verba: *Ut deleatur iniquitas, et adducatur justitia sempiterna, etc.*, ad Messiam et ejus tempora referri. Proindeque cùm à sexdecim et ampliùs seculis præteritæ sint hebdomades, ut hæc omnia contingerent, abbreviatæ et constitutæ, consequens est jamdudùm advenisse Messiam.

Probatur 2°. Hoc argumento quod reliqua prophetia subministrat : *Christus dux* qui apud Daniele venturus prædicitur, jamdudum venit; atqui is est Messias; ergo ex Danielis vaticinio jamdudum Messias venit.

Major et minor sigillatim demonstrandæ sunt, Ac major quidem triplici momento evidenter astruitur; nam 1°, ille *Christus dux* ante elapsas, quas Angelus memorat, hebdomades septuaginta, venire debuit. *Scito ergo et animadvertite*, inquit Angelus : *Ab exitu sermonis ut iterum ædificetur Jerusalem, usque ad Christum ducem hebdomades septem et hebdomades sexaginta dux erunt*, etc.; sed modò ostendimus hebdomades septuaginta ante secula sexdecim jam esse elapsas; ergo. 2° *Christus* ille *dux* venire debuit prius quàm Jerusalem et templum destruerentur et dissiparentur, et ante maximam populi Judaici cladem, statutamque calamitatem et desolationem. *Post hebdomades sexaginta duas*, pergit Angelus, *occidetur Christus...*, *et civitatem et sanctuarium dissipabit populus cum duce venturo, et finis ejus vastitas, et post finem belli statuta desolatio*. Atqui jamdudum templum incensum est, et penitus destructum à Romanis; jamdudum urbs dissipata, Judæorum tanta clades peracta, quanta nusquàm legitur alteri populo contigisse, ac tandem super eis desolatio statuta; tempus ergo adventus *Christi ducis* jamdudum præterit. 3° *Christus dux* venire debuit antequàm cessarent sacrificia mosaica; antequàm videretur abominatio desolationis in templo; antequàm eveniret desolatio in consummationem et finem permansura : *Et in dimidio hebdomadis*, ait Daniel, v. 27, *deficiet hostia et sacrificium, et erit in templo abominatio desolationis, et usque ad consummationem et finem perseverabit desolatio*. Sacrificia autem non modò quoad valorem et necessitatem à multis seculis defecerunt, sed etiam quantum ad usum; quippe cum extra templum, anno 70 aeræ communis destructum, non possint offerri. A multis pariter seculis abominatio desolationis visa est, et desolatio in consummationem inchoata; ergo *Christus dux* à multis seculis venit.

Jam verò minor propositio, hunc nempe *Christum ducem* esse Messiam, probatur 1° ex illo ipso *Christi ducis* nomine. Nam etsi sacerdotes in Scripturis, ipseque Cyrus rex Persarum, Isaïæ 55, nomine *Christi* insigniti fuerint, attamen non sine addito. Solus Messias potuit antonomasticè, et per excellentiam *Christus dux* in Scripturis nominari; solus potuit illius nominis solitariè sumpti appellatione designari,

quia hunc solum populus hebræus ducem et legislatorem sanctissimum, et liberatorem potentissimum expectabat. 2° Ex voce hebræâ *Naghid*, quam vulgata versio interpretatur *ducem*. Nihil quippe significat illa vox, quod in Messiam aptissimè non quadret. Significat 1° præcipuum principem; 2° idem ac com-monstratum, manifestatum; 3° redarguentem, posito ex adverso, obviam factum; 4° annuntiantem, evangelizantem; atqui illa omnia Messiae competunt ex scripturis. 5°. Ille *Christus dux* in vaticinio etiam appellatur simpliciter *Christus*. Nam nominis identitas, ac contextus series ad illum exigunt referri hæc Angeli verba : *Et post hebdomadas sexaginta duas occidetur Christus*, Is itaque de quo ibi Angelus vaticinatur, antonomasticè *Christus* est, ita ut sola Christi appellatio eum satis designet : sed quem sola *Christi* appellatio satis designat, is alius esse non potest quàm Messias, qui præ cæteris unctus est, sanctificatus et Deo consecratus; ergo. 4°. *Christus*, de quo Propheta, characteribus juxta Scripturas propriis Messiae insignitur; nam prædicitur *occidendus*, seu *excindendus*, *et non ei*, vel *non sibi*. Prænuntiatur etiam pactum confirmaturus multis. Cum enim hebdomas quæ juxta prophetiam pactum multis confirmatura erat, ex numeratis ab Angelo septuagesima sit, *Christus* intra eam, necesse est, munere *ducis* functus fuerit, *et non sibi occisus*; proindeque primum est ut ad eum confirmatio pacti referatur. Denique intra eandem hanc hebdomadam, quæ Christus occidi, et ducis munus sustinere debuit, sacrificia fuerunt abolenda : *Et in dimidio hebdomadis*, ait sacer contextus, *deficiet hostia et sacrificium*. Atqui hæc tria sunt ex Scripturis totidem Messiae characteres manifesti. Morti enim tradendus prædicitur, non propter se, sed propter iniquitates delendas, Isaïæ 53 : *Vulneratus est propter iniquitates nostras, attritus est propter scelera nostra*, etc., et apud Jeremiam lamentat. 4, v. 3.

Pactum, non qualecumque, sed novum illud insigne foedus à Deo Patriarchis promissum confirmaturus asseritur Jerem. 31, v. 31 : *Ecce dies venient, dicit Dominus; et feriam domui Israel et domui Judæ foedus novum, non secundum pactum quod pepigi cum patribus eorum*, etc.

Demum vetera sacrificia aboliturus significatur Malachiæ 1 v. 10 : *Non est mihi voluntas in vobis, dicit Dominus exercituum, et munus non suscipiam de manu vestrà; ab ortu enim solis, usque ad occasum magnum est nomen meum in*

gentibus, dicit Dominus exercituum. Et Psalmo 39, v. 8: *Holocaustum et pro peccato non postulasti; tunc dixi: Ecce venio; ergo.*

5° Tanta est inter duas, quas methodi causâ sigillatim consideravimus, vaticinii partes, habitudo et affinitas, ut posterior nihil aliud videatur quàm major declaratio prioris; nempe, quas statim enumeraverat Angelus hebdomadas septuaginta, deinde ait ab exitu sermonis de reædificanda Jerusalem inchoandas. His verbis primæ Vaticinii partis: *Ut ungatur Sanctus sanctorum*, respondet in posteriori: *Christus dux* qui post 69 hebdomadas annuntiatur venturus. Illis: *Et adducatur justitia sempiterna* respondent ista: *Confirmabit autem pactum multis hebdomadâ unâ, et in dimidio hebdomadis deficiet hostia et sacrificium.* His tandem: *Ut consummetur prævaricatio, et finem accipiat peccatum, et deleatur iniquitas;* respondet injusta Christi occisio quâ iniquitates delendæ, quâ sacrificia ejus figurativa abolenda; cujusque fons et auctor populus Judaicus tantum facinus luiturus prædicatur templi et urbis dissipatione, malorum inundatione, atque in finem perseveraturâ desolatione. Cùm igitur pars prior vaticinii à Rabbiniis ipsis de Messia explicetur, planum est et alteram ad ipsum referendam; ergo.

Solvuntur objectiones Judæorum. — Objicies 1°. Nihil vetat quominus septuaginta hebdomades Danielis ex annorum decadibus ponantur coalescere; ita fertur fabulatos esse Judæos quosdam, quibus consentit Origenes, tractatu 29 in Matth. Alii apud Galat. lib. 4, et Nicolaum de Lyra, perhibentur censuisse ex quinquagenis annis, vel etiam ex annorum centuriis illas hebdomadas conflare; ergo nondum præterit tempus, intra quod, juxta vaticinium, venturus est Messias.

Nego antecedens: 1° Hebdomades ex annorum decadibus, sive ex quinquagenariis, aut ex centuriis conflatas nusquam ulla gens usurpavit, nec earum vel minima in Scripturis mentio; atqui de septimanis aliquando usurpatis intelligendum oraculum. 2° Is fuit vaticinii scopus, ut certum definiretur tempus intra quod res prædictæ contingere deberent; sed, si ex annorum decadibus illas septimanas componere liceret, jam nihil fixum et determinatum in iis haberetur. Nam quo jure de annorum decadibus eas qui acciperet, eodem alter has ex seculis, aut ex decadibus seculorum vellet et constitui. 3° Post hebdomadam finem civitas et templum ex vaticinio erant dis-

sipanda, atque in loco sancto futura erat abominatio desolationis statutæ et usque in finem et consummationem perseveraturæ conjuncta. Atqui à seculis septemdecim urbs et templum eversa sunt, abominatio in loco sancto visa est, et ex quo hæc contigerunt, jugiter perseverat desolatio populi judaici; ergo. Quod ad Origenem attinet, septuaginta hebdomades loco citato Christi temporibus terminat; nec nisi ut earum initium à mundo condito repetere posset, has ex annorum decadibus composuit.

Obj. 2° Argumentum quod ex Danielis oraculo eruimus, totum subvertitur interpretatione R. Salomonis Jarchi celeberrimi Judæorum, 12 seculo, Lunæ in Occitaniâ doctoris. Is censet 70 hebdomadibus concludis tempus universum, quod à diruto primo templo ad usque secundi destructionem effluxit. Has voces, *min motza dabar* contendit malè reddi *ab exitu sermonis;* vertendum putat, de exitu, seu, *circa exitum sermonis;* quasi dixisset Angelus: *Animadvertite quæ tibi indico circa sermonem de reædificandâ Jerusalem;* seu *scito quid de urbis Jerusalem restoratione à Deo sancitum sit.* Uno verbo non initium hebdomadam, sed sermonis prophetici materiam ibi ab Angelo designari statuit. Deinde hebdomadas sexaginta duas, quas cum hebdomadis septem græcus et vulgatus interpretes in summam colligunt, ipse à septem illis separat interpunctione, ac in casu diverso positas sequentibus connectit; adeò ut sensus sit: *Usque ad Christum ducem hebdomades septem erunt. Et hebdomadis sexaginta duabus revertetur populus è captivitate et ædificabitur platea etc.*

Jam verò quæ in primâ vaticinii parte, de fine peccati, de justitiâ sempiternâ adducendâ, de visione et prophetiâ adimplendis, de unguendo Sancto sanctorum Angelus præsignificat, hæc ad Messiaë tempus refert R. Salomo, et post elapsas hebdomades septuaginta ab Angelo prænuntiari eventura existimat. Sic verò illa interpretatur: Judaica natio tot vexata calamitatibus aliquando peccatis imponet finem, justitiæ perpetuò addicta erit; in Messia tunc exitum suum consequentur omnes Prophetiæ, templumque et vasa ab eo restaurabuntur et sanctificabuntur. His autem verbis: *Usque ad Christum ducem hebdomades septem;* opinatur designari Cyrum quem Deus ipse Isaia 45, v. 4, Christum suum appellavit; atque significari, septem hebdomades ab excidio templi per Nabuchodonosorem, usque ad Cyrum liberatorem numerandas esse. Quæ se-

quuntur porrò, ut dictum est, reddit: *Et hebdomadibus sexaginta duabus revertetur*, etc., vultque his exprimi populum per 62 septimanas è captivitate reversurum, seu successivè perrecturum reverti, et Jerusalem tempore adverso extruendam. Ista: *Et post hebdomadas sexaginta duas occidetur Christus*; ad regem Agrippam juniorem transfert, quem in ultimo Jerosolymorum excidio periisse ponit. Bello Romanorum adversùs Judæos, Jerosolymorum subversioni, ac Adriani statuæ, in eodem loco in quo Arca, stante templo, existebat collocatæ, reliquam prophetiam accommodat, his exceptis tamen: *Et finis ejus vastitas, et post finem belli statuta desolatio*, quibus ait prædici populum Romanum à Messîa aliquando vincendum et profligandum, et desolationem populi Judaici tunc desituram. Hactenùs Rabbi Salomo cujus interpretationem Judæi hodierni libenter amplectuntur; ergo.

Nego ant. Nam ut præcipua tantùm illius interpretationis vitia perstringam, 1º à veris calculis chronologicis enormiter aberrat centum septuaginta annis iutegris. Nam computat R. Salomo solùm annos 490, ab excidio primi templi usque ad secundi subversionem; atqui 660 numerandos esse certissimum est; ergo annis septuaginta supra centum à vero deviat, proindeque, etc. Cæterùm hæc R. Salomonis aberratio omnibus Judæis communis est, atque ex eo oritur quòd monarchiam Persarum à Cyro sub quatuor regibus non ampliùs 52 annis stetisse sentiant; dùm tamen ex historiâ veteri indubitatissimum est hanc sub regibus 13 per annos plus quàm ducentos floruisse. 2º Voces hebreæ, *min motza dabar*, malè redduntur *circa exitum sermonis*, quasi rem de quâ verba faciebat, non initium hebdomadum Angelus indicare voluisset. Enimverò præpositio *min*, terminum, à quo proceditur, semper exprimere nata est; nunquàm accipitur pro *circa*; nunquàm rem de quâ oratio instituitur, indigitat. Et certè supponi non potest hebdomadibus nullum ab Angelo esse assignatum initium? Vulgatæ versioni concinit græca ἀπὸ δεξιῶν λέγειν, *ab exitu sermonis*. Concinunt et cæteræ versiones, nec non alii Rabbini. 3º. Hebdomades sexaginta duæ ab hebdomadibus septem nequeunt divelli, ac diverso casu poni. Si enim illæ sexaginta duæ hebdomades præcedentibus septem adjungantur, tunc quòd pertineant perspicuum est, ac cuncta inter se connexa sunt. Sin autem ab iis separentur, nihil, ad quod possint referri, apparet. Non enim ad

ista: *Et revertetur et ædificabitur platea et muri in angustia temporum*. Nam in Jerosolymorum reædificatione non tot annorum septimanæ consumptæ sunt. Perperàm supplet Rabbi Salomo, revertetur *populus è captivitate*. Ducibus quidem Zorobabele, Esdrâ et Nehemiâ successivè rediit populus. Quòd autem alii dein reverti perrexerint nullibi habetur. Sed quid necesse est aliqua suppleri, ubi omnia apertè enuntiantur? Nonne ibi agitur de Jerusalem reædificandâ? Nonne istud: *Et redibit et ædificabitur*; juxta sermonis hebræi indolem quo verbum prius, hoc modo sæpè loco adverbii ponitur, ad secundam exstructionem significandam maximè idoneum est? Nonne verbum *redibit*, cùm ejusdem ibi sit generis fœminini ac verbum ædificabitur, sicque in omnibus cum voce *rechob*, *platea* conveniat, ad eam potius referri debet, quàm ad *populum* ibi nec expressum, nec indicatum? ergo.

Frustra observat Rabbi Salomo *hebdomadas septem* ab hebdomadis sexaginta duabus accentu *Atnach* voci *schibah*, *septem*, affixo sejungendas ostendi. Nam puncta Massorethica recentius inventa sunt quàm ut ab iis magis quàm à nativâ verborum vi et connexione sensus sacre Scripturæ pendeat. Deinde etsi *Atnach* duobus punctis æquivalet, juxta Massorethicæ grammatices regulas, attamen certum est hunc accentum aliquando ibi collocari, ubi ne commatis quidem vim habet, v. g. Geneseos versu 1: *In principiis creavit Deus cælum et terram*; nomen *Elohim*, *Deus*, accentu *Atnach* afficitur, nec tamen à subsequentibus verbis vel minimo commate divellitur.

4º. Illud nos juvat R. Salomonem rei evidentiâ victum ad Messîæ tempora revocare iniquitatem delendam, justitiam sempiternam adducendam, visionem et prophetiam implendam, Sanctum sanctorum ungendum, et alia quæ in illâ priori parte vaticinii continentur; tametsi commentario suo illa non parùm adulterat. Sed inquiri quid causæ sit cur in tempus longissimum et indeterminatum illa velit differri, quæ ut contingerent, abbreviatis ac constitutas esse septuaginta hebdomadas, à seculis septemdecim jam præteritas, Angelus annuntiat?

Nec moras injiciant Rabbini quòd Templum à Messîa nondùm fuerit restauratum. Quippe tertiam templi redintegrationem à Messîa peragendam gratis et falsò comminiscuntur, imò sacrificiorum terminus ac consummatio futurus est Messias ex Scripturis. Nec quidquam aliud,

quàm ipse Messias, ut jam observavimus, hic nomine *Sancti sanctorum ungenti* intelligendum venit.

5°. Nomen *Christi ducis*, Cyro Persarum regi non congruit. Nam aliud est Cyrum appellatum esse *Christum* cum addito ab Isaiâ: aliud est ipsum designari potuisse nomine *Christi*, aut *Christi ducis* simpliciter et antonomasticè dicto, pro ut in Danielis prophetiâ reperitur. Vide superius dicta.

6°. *Christus* post hebdomadas 62, ex vaticinio *occidendus*, præposterè à *Christo duce* antea memorato distinguitur, cum in toto vaticinio nullum ejusmodi distinctionis indicium reperire sit. Et verò quemadmodum nomen *Christi ducis*, sine addito ipsum est Messiae nomen, ita et vox *Christus* eodem modo posita ad neminem alium, quàm ad Messiam potest detorqueri.

7°. Sed Christum hunc interficiendum post 62 hebdomadas interpretari de rege Agrippâ juniorem, tam absonum est quàm quod maxime; nec enim junior Agrippa ullo pacto *Christus* seu *unctio* fuit respectu Judæorum, nec post 62 hebdomadas interemptus. Quâ enim ratione ille Agrippa diceretur unctus Judæorum respectu? Non propter unctionem corporalem, quæ ipsi etiam templo secundo, Judæis fatentibus, impertita non fuit. Non propter auctoritatem; quippe Chalcidis (1) quidem tum (2) Trachonitidis rex extitit, sed non Judææ, quæ post Agrippæ senioris obitum in provinciæ formam (3) denuò à Romanis versa fuerat. Templi custodia Agrippæ juniore à Romanis credita est; pontificum eligendorum destituendorumque facultas eidem concessa; nihil ampliùs in Judæos potuit. Postremò non propter auxilium, quod Judæis Dei nutu præstiterit, siquidem cum Judæos à bello in Romanos gerendo deterrere non potuisset, ipse se Romanis adjunxit, ac Tito copias auxiliares subministravit, uti refertur à Tacito, lib. 5 Hist.

Jam porrò, ut Rabbini Agrippam juniorem post 62 hebdomadas occisum dicant, supponere coguntur ipsum in ultimâ subversione interemptum fuisse. Atqui id esse falsum testis locuples est Josephus lib. de vitâ suâ. n. 65, et lib. 4 contra Appionem, n. 6. Is narrat in hoc posteriori loco historiam de bello Judaico à se

scriptam illi regi probatam fuisse. Eundem Agrippam urbis excidio superfuisse ex nummis antiquis ostendit etiam Harduinus p. 332 et 334, de nummis Herodiadum, edit. Amstelod. oper. Harduini 1709. Quæ de reliquo vaticinio R. Salomo adjicit necesse non est ut expendamus. Mala Judæis ingruentia prædici his verbis, *et finis ejus vastitas*, jam diximus, et ex contextus serie manifestum est. Horumce verborum: *Et post finem belli statuta desolatio*, genuinus sensus etiam declaratus fuit.

Instabis. R. Salomonis interpretatio facilè defendi poterit, si in quibusdam ad mentem Aben Ezræ corrigatur. Inchoentur hebdomades septem ab anno primo Darii Medi, seu à sermone quem Angelus protulit; perducantur ad annum Artaxerxis vicesimum, quo Nehemias Susis profectus est, ac Judæis præesse cœpit et urbem ædificavit; nomine *Christi ducis* is Nehemias intelligatur; ab eodem Artaxerxis anno ducantur 62 hebdomades cum dimidio in ultima templi et civitatis conflagratione terminandæ; *Christus* post illas hebdomades 62 excindendus significet regiam potestatem quæ Judæis periit simul atque urbs et templum deleta sunt. Hæc omnia cohærent prophetiæ. Atqui his positis ruit argumentum quo Messiae adventus ex vaticinio astruitur; ergo.

Nego anteccedens. Ad probationem, 1° nego majorem; nempe ea vaticinia consentire, quæ à docto Aben Ezra supponuntur. Nam 1°, in calculis insigniter fallitur Aben Ezrâ. Hebdomades 70, id est, 490 annos à primo Darii Medi anno ad ultimam conflagrationem ducit: atqui certissimum est inter utrumque hunc terminum plus quàm 600 annos effluxisse; à primo anno Darii Medi ad vicesimum Artaxerxis numerandi sunt plus quàm 80 anni; et à vigesimo Artaxerxis usque ad ultimam subversionem, plus quàm 520; ergo, etc. 2° Ante ultimam cladem Jerosolymitanam potestas regia Judæis perierat. Agrippa junior, ut modò dictum fuit, regali auctoritate in Judæos nunquàm est potitus. Prius quàm bellum sub Nerone inciperet, Judæa jam facta fuerat iterùm Romani imperii provincia. Imò, ut olim diximus, à quo tempore Herodem alienigenam Romani regem Judæorum constituerant, sceptrum defecerat in tribu Juda. 3° Momenta, quibus tum inter probationes, tum adversùs R. Salomonis interpretationem, evidenter ostendimus unicum Christum in vaticinio designari, huncque esse Messiam, in propositam Aben Ezræ hypothesim etiam militant, illamque penitus subver-

(1) Confer. Joseph. lib. 20. Antiq. cap. 4, n. 5, cum cap. 5, n. 2, T. 1, edit. Haverc. p. 957 et 965.

(2) Ibid. cap. 7, n. 1, p. 969.

(3) Ibid. lib. 19, cap. 9, n. 2, p. 952.

tunt. 2° Nego minorem. Nam, etsi quæcumque de duorum Christorum distinctione et interpretatione, de hebdomadarum separatione et fine fingere amant Rabbini ipsis concederentur; attamen quamdiù id quod evidentissimum est fatebuntur, priori nempe vaticinii parte Messiam respici, tamdiù in illos stabit certum et inconcussum argumentum quo ex hâc eâdem parte evincitur Messiae tempora jamdudum esse præterita.

Instabis iterum. Non desunt aliæ Rabbino- rum interpretationes, ad quarum normam hypothesis R. Salomonis modus adhiberi potest. R. Saadias posteriorem Christum de sacerdotio in ultimâ consumptione extincto exponit. Juxta R. Josephum Ben Jachiaë idem Christus designat ipsummet templum Jerosolymitanum. Abra- vanelli prior Christus est Zorobabel. R. Levi Ben Gerson posteriorem Christum, ut R. Saadias, de Sacerdotio interpretatur; priorem verò putat esse Josue, seu Jesum filium Josedek, sacerdotem magnum 1, Esdræ 3, et Zachariaë capitib. 3 et 4 memoratum, qui è captivitate unâ cum Zorobabele reversus est.

Respondeo has omnes expositiones iisdem convelli argumentis, quibus antea expositæ confutantur. Nempe in illis hypothesibus calculi non sunt accuratiores. Nomine Christi ducis simpliciter et sine addito, non magis Josue filius Josedek, aut Zorobabel, quàm Cyrus, vel Nehemias potuerunt designari. Pariter nomen Christi per antonomasiam, neque sacerdotio, neque templo Jerosolymitano competit. Non sacerdotio, nam Christorum seu unctorum nomine simpliciter et sine addito nunquàm sacerdotes appellantur; nec templo, tum propter eandem rationem, tum etiam quia templum secundum unctione caruit, fatentibus Rabbiniis.

Objicies 3° cum Ishac Orobio Judæo Hispano, qui diù in Hispaniâ, ac dein Tolosæ simulatâ professione christianâ, tandem Amstelodami circumcisis, in collatione cum Philippo à Limborch (1) Arminianorum professore, in hunc modum subtiliter disputat : « Daniel « non ibi (cap. 9) agit de Messiâ filio David; sed « clarè et apertè de primo summo sacerdote, « qui cum et post Nehemiam regnavit, utrum- « que jus et ecclesiasticum et quasi regium in « populum exercens. Hoc fuit in fine septem « hebdomadam, quo sacerdotum mixto regi-

« mine populus per sexaginta duas septimanas, « variis cum fortunis, perseveravit. Tandem in « medio septuagesimæ ultimo sacerdote occiso « Ananeo, et non ei, id est, non ampliùs suc- « cessor aliquis fuit : qui jam ab Angelo non « appellatur princeps unctus, sed simpliciter « unctus; quippè regiam potestatem ab ali- « quibus annis Herodiana domus usurpaverat... « Nihil aliud ab Angelo prædicatur, nisi quòd « totum id tempus Israeli concedebatur ut re- « sipisceret, ut peccato finem imponeret, ut « prævaricatio finiretur, et sic Scriptura pro- « phetica de universali populi redemptione « adimpleretur. Prædixit etiam quòd, cum po- « pulus aliter facturus est ac Deus exigebat, « aliter etiam ei debebat contingere, quod per « capitis seriem usque ad extremam ruinam « depinxit; » ergo, etc.

Nego antecedens. Tota hæc interpretatio ad tria capita revocatur. Primum spectat chronologiam circa quam à vero in immensum Orobio discedit. Etsi enim acutus ille Judæus initium septuaginta hebdomadam non definiat expressè, cum tamem eas interpretetur tempus concessum populo, ut resipisceret, necesse est ut eas à sermone Angeli, ut saltem à regressu ex captivitate oriri statuatur. Ultimam autem Jerosolymorum cladem medio septuagesimæ alligat; proindeque, juxta non semel annotata, à genuinis calculis distat annis circiter decem supra centum. Diximus etiam ab anno vigesimo Artaxerxis seu à Nehemiâ usque ad extremum excidium computandos esse 519 annos; sed Orobio inter utrumque terminum numerat duntaxat 62 hebdomadas cum dimidio, id est, 437 annos et sex menses; ergo. Alterum ea complectitur quæ de duobus Christis et eorum significatione tradit; in quibus refellendis non immorabimur. Huc enim redeunt momenta quibus adversus alios Judæos jam usi sumus. Addam tantum planè colligi ex Josepho lib. 11 Antiquit. cap. 4, nullum summum pontificem ante Machabæos potestate quasi regiâ esse fruitum. Imò ex lib. 1 Mach. cap. 14, n. 41 et seq., manifestum est in Simonem Machabæum à Judæis et sacerdotibus primum collatam fuisse hanc quasi regiam auctoritatem, anno ante æram vulgarem 141, plus quàm seculis tribus post Nehemiæ tempora; ergo.

Tertium ad ista attinet quæ subtiliter ab Orobio sunt adjuncta, nempe septuaginta hebdomades annorum initio prophetiæ annuntiari constitutas, ut populus resipisceret, sicque impleretur Scriptura de Messiae adventu; simul

(1) Limborch. De verit. Relig. Christ. amica collatio cum erudito Judæo. edit. Basil. 1740, pag. 161 et 162.

verò prædictum etiam ad meliores fruges sese populum non recepturum, et ideò calamitatibus summis et ultimâ clade puniendum. Quæ nihil aliud sonant, nisi prophetiam Danielis quatenus Messiam respicit, esse conditionatam, ita ut ejus sensus sit : Messiam post 70 hebdomades venire debuisse, si peccare desivisset populus Judaicus, sed propter peccatorum continuationem adventum ejus esse differendum, et Jerasalem destruendam. Atqui nulla ejusmodi conditio in vaticinio Danielis subintelligenda.

Nam 1^o, si prophetia hocce modo foret conditionata, grande illud scelus in cujus poenam Messiae tempora tot seculis procrastinata vult Orobio, esset illud idem quod Judæis ultimam cladem et usque in finem perseveraturam desolationem peperit. Proindeque maximum esse debuisse illud facinus, nec ex hominum memoriâ delendum. Enimverò crimen, quod populus selectus tot horrendis calamitatibus luit, nec privatum esse potuit, nec idololatriâ minus. Populus namque Judaicus quem Deus præ cæteris elegerat, nunquàm ab extraneis oppressus, aut in captivitatem abductus est, nisi ob insigne aliquod idololatriæ crimen. Quoties verò ad unius Dei cultum revertebatur, toties Deus misso Liberatore eum ab hostibus eripuit. Hæc ex sacrâ judicum et regum historiâ liquidò constant. Nec ampliùs 70 annis duravit captivitas, cui propter abominandos gentilium ritus sub impiis regibus effrænate frequentatos gens Judæa tradita est. Itaque si velint Judæi vaticinium Danielis de futuro post 70 hebdomades Messiae adventu conditionatum fuisse, ita ut ob eorum iniquitates is adventus usque modò retardatus fuerit; dicant ergo quòd nationis suæ crimen tot ipsis mala horribilia creaverit. Atqui ejusmodi malorum causam afferre nequeunt. Sanè in idololatricis abominationibus id criminis positum non fuit, quippe ab omni idololatriæ specie ætate Christi, et longè ante Christum Judæi maximè abhorrebant, ut ab eâ etiamnum abhorrent; ergo, etc.

2^o Si prophetia sumatur absolutè, jam facilè deprehenditur quid Judæis hæc mala pepere-rit : in ipso enim vaticinio perspicuè indigitatur tot infortuniorum causa et origo, scilicet occisio Christi post hebdomadas sexaginta novem; quo crimine effectum est, juxta Christi Domini verba Matth. 23, ut, cùm essent *filii eorum qui Prophetas occiderunt*, impleant *mensuram patrum suorum*, et veniret *super eos*

omnis sanguis justus qui effusus est super terram.

3^o Patet ex contextùs serie duas vaticinii partes ad se invicem referri, atque jam perspicuè ostensum est posteriorem esse meram prioris explicationem. Ergo de rebus plane oppositis eas perperam Orobio explicat; cùmque secunda pars absolutè accipienda sit, ut liquet ex eventu, prima etiam, quæ nullam perinde conditionem sonat, debet absolutè sumi.

4^o In hypothesi Orobii sic exponenda esset prima vaticinii pars : Septuaginta hebdomades præstitutæ sunt, ut si populus resipuerit et desierit peccare, unguatur Sanctus sanctorum, et impleatur visio et prophetia de adventu Messiae. Atqui hæc interpretatio vaticinio repugnat. Etenim sacer vaticinii contextus uno tenore, et sine ullâ modi diversitate sic de verbo ad verbum reddendus est : *Ut consummetur, seu obsignetur prævaricatio, et finem accipiat peccatum et deleatur iniquitas, et adducatur justitia sempiterna, et impleatur visio et prophetia, ut unguatur sanctitas sanctitatum.* Ubi jugis ejusdem modi continuatio in singulis periodi partibus, eas diversimodè accipi, et in unam propositionem conditionatam conflari non patitur; ergo vaticinii textu omnis excluditur conditio.

5^o Si in vaticiniis, quibus res fixo ac statuto tempore annuntiantur eventuræ, liceret pro arbitrio apponere ejusmodi conditiones, nonne omnis illorum eo ipso evanesceret fides? Atqui gratis et pro mero arbitratu contendit Orobio in primâ vaticinii parte subintelligendam conditionem de fine peccatis imposito à Judæis. Neque enim vaticinii textu, neque aliis Scripturæ locis ejusmodi conditio hic supplenda indicatur; nullam quoque indigitat ipsa rei natura et indoles; quippe agitur de Liberatore à Natione expectato, ac Judæis eò magis necessario, quò ipsi ad peccatum promiores.

6^o Ex ipso Danielis vaticinio Messias iniquitates erat deleturus; et apud Isaiam cap. 53, v. 5, livore suo nos sanaturus, iniquitates nostras portaturus, ac scelera expiaturus prædicatur; similia habent alii prophetæ.

Ergo antequàm Messias adveniret, scelera, ex Prophetarum oraculis, erant perpetranda, et iniquitatibus homines contaminandi; ergo præposterè contenditur vaticinium Danielis de Messia intra septuaginta hebdomades venturo, tacitam hanc involvere conditionem, si Judæi à peccato interea abstinerint.

Objicies 4^o cum eodem Orobio : « Caput hoc (Danielis) ita difficile intellectu est, ut Hieronymus id explicare non ausit ; aliorum sententias recenset, sed suum sensum omnino declinat exprimere, suamque etiam de aliorum sententiis censuram. Augustinus, epistolâ 80 ad Hesychium (nunc 199, tom. 2), nullatenus sibi persuadere ab aliquibus passus est, ut hoc Danielis caput explicaret, rei difficultate deterritus ; quod sit ut vulgò intelligendum esset, satis clarè ibi et mors et passionis Christi tempus depicta jacent. Reinoldus, Scaliger, Junius, et plurimi non credunt has hebdomadas in morte Christi finiri, sed in destructione templi per Titum. Eusebius de Christo in his hebdomadis tractari haudquaquàm concedit, oppositum mor dicus sustinet, et in ultimo ex Machabæis pontifice penultimam hebdomadam claudire constanter asseverat, ultimam ad captam Jerusalem per Pompeium extendit, annis centum ante Christi adventum. Videat ergo doctissimus vir quomodo Judæi possent ex hoc capite Messiae mortem prænoscere, cum à Christianis doctoribus plurimis nec nunc ibi contineri credatur. » Hæc Orobio.

Addi potest non modò Marshamum, sed etiam Sixtum Senensem lib. 8 Biblioth. hæresi 12, pag. 644, Estium in cap. 24 Matth. Calmetum in Dissert. de 70 hebdomadis Danielis, ad Antiochi tempora vaticinium Danielis referre ; ac Harduinum illud idem de ætate Antiochi Epiphanis et Judæ Machabæi atque de morte Oniæ litteraliter esse interpretatum ; nonnisi verò typicè de morte Christi.

Respondeo 1^o, generatim, duo in vaticinio Danielis esse distinguenda, nempe ejus substantiam, et modum quo circumstantiæ ejusdem exponuntur. Substantiam vaticinii intelligo, quòd ad Messiam intra 70 hebdomades, seu certo tempore jamdudum effluxo venturum absolutè referatur. Ad modum verò quo circumstantiæ ejus exponuntur, pertinent quæcumque de 70 hebdomadam initio ex exitu, ad amussim minutiorum chronologiæ calculorum inquiri solent. Jam verò constat 1^o, illud prius certò posse ab eo cognosci, qui posterius ignorat, aut minùs accuratè explicat. Quid ita ? tum quia, sepositâ temporum ratione, characteribus soli Messiae propriis, quosque in Christo deprehendere est, Angelus eum designat, quem venturum prædicat ; tum quia simul stupendis ac manifestis eventibus jamdudum præteritis finem 70 hebdomadam

insignit. Eò applicari possunt nervosa hæc illustriss. Bossueti verba, Discours sur l'Hist. univers. c. 9 : « Dieu a tranché la difficulté, s'il y en avait, par une décision qui ne souffre aucune réplique. Un événement manifeste nous met au-dessus de tous les raffinements des chronologistes ; et la ruine totale des Juifs, qui a suivi de si près la mort de Notre-Seigneur, fait entendre au moins clairvoyant l'accomplissement de la prophétie. »

Constat 2^o, cunctos interpretes christianos, si paucissimos excipias, circa vaticinii substantiam omni ævo consensisse, quod ipse Orobio non diffitetur. Proinde, saltem quantum satis est ad Judæos invictè refellendos, vaticinium Danielis perspicuum non esse, propositâ objectione nequaquàm evincitur. Opinionum autem de nonnullis ejusdem prophetiæ circumstantiis explicandis varietas, non tam ex ipsius vaticinii verbis, quæ clara sunt, oritur, quàm ex eo quòd alii accuratâ historiæ profanæ et chronologiæ notitiâ caruerint ; alii ejusdem historiæ difficultatibus irretiti et impediti fuerint, pugnantibus scilicet non rarò secum invicem scriptoribus profanis ; alii tandem conjecturis plus æquo indulgere amaverint. Cæterum is nodus inextricabilis non est. Quò magis historia regum Persarum elucidatur, eò clariùs perspicitur 70 hebdomadam finem Christi temporibus accommodari ; atque in eum locum provecta res est, ut de sex octove annis tantum tota jam consistat hæc inter plerosque eruditos controversia quam varii diversis modis dirimunt. Nec sanè mirum si quædam in Chronologiâ ejusmodi regum extet ambiguitas ; annorumque tam paucorum discrimen, ubi de annis 490 agitur, aliquam magni momenti quæstionem non constituit.

Constat 3^o, singularem quorundam Christianorum opinionem ad alium quàm ad Messiam, seu irreligiosè, seu imprudenter Danielis verba detorquentium, nullum causæ christianæ præjudicium afferre posse. Nam 1^o, singulares illæ opiniones facillimè ac evidenter refelluntur. Deinde, cum tot apud Christianos extiterint scriptores, mirum esse non debet, quòd eorum unus aut alter absonam insignis vaticinii interpretationem protulerint. Mirum potius tantam de re ipsâ inter variarum communionum interpretes consensionem hic reperiri ; atque is universalis consensus ad vaticinii perspicuitatem maximo argumento esse debet.

Respondeo 2^o ad singula. Ad sanctum Hie-

ronymum, dùm suam in commentario super Daniele non vult sanctus doctor sententiam de 70 hebdomadis expromere, intelligendus est de modo quo illius oraculi circumstantiæ exponendæ sunt, de initio et fine septuaginta hebdomadum accuratè figendo; cæterum, in præfatione ejusdem Commentarii expressè monet « nullum Prophetam tam apertè dixisse « de Christo. Non enim, inquit, solùm scribit « eum esse venturum quod est commune cum « cæteris; sed etiam quo tempore venturus sit « docet, et reges per ordinem digerit, et annos « enumerat, ac manifestissima signa prænuntiat. » Ad sanctum Augustinum, docet conceptis verbis sanctus doctor in Epistolâ ad Hesyrium laudatâ vaticinium Danielis de Christo Domino accipiendum esse, ac in eo manifestè impletum, nec posse hanc prophetiam *contra tot expositores* ac sensum sacri contextûs, ad ultimum Christi adventum referri. Ad Eusebium, falsum est ipsum *mordicùs sustinere* in vaticinio *de Christo non tractari*. Namque primam vaticinii partem integram de solo Messia explicat. Ad eundem refert istud secundæ patris *Confirmabit autem pactum, multis hebdomadâ unâ*; ac morte Christi *hostiam et sacrificium defecisse* asserit; ex iis tandem efficaciter et confidenter probat Messiam jam venisse, eumque esse Christum Jesum. Vide lib. 8 Demonstr. evangel. edit. Paris. 1628, pag. 385 et seqq., item pag. 400, 401, 402, 403, 404.

Fatendum tamen ab eodem Eusebio ibidem conjici *Christum ducem*, et *Christum excidentum*, in secundâ vaticinii parte memoratos debere exponi de sacerdotio. Nimirum præter Africani interpretationem duas affert conjecturas. Juxta primam, 7 hebdomades à Cyro cœptæ ad annum Darii sextum quo sacerdotium, templo reædificato, restauratum est, perducuntur; sexaginta duæ autem morte Alexandri Jannæi terminantur, cujus filius Hircanus Assamonæorum ultimus, ipso regni sui initio exagitatus, ab Herode interfectus est. Juxta alteram, anno 2 Darii Hystaspidis Olympiade 66, urbs Jerusalem ædificata ponitur; inde fluunt septem et sexaginta duæ hebdomades ad *Christum ducem*, id est, per illas 69 hebdomadas principatu potiti sunt sacerdotes; iisdem verò elapsis excissa est unctio, seu sacerdotium Judæis periit, Hircano jussu Herodis interfecto. Hanc posteriorem interpretationem Eusebius iterum probat Hist. lib. 4, cap. 6, et in Chronico, pag. 41, edit. Amstel. 1658.

At verò utraque hæc conjectura, cum apertè

falsa sit, Judæorum causæ nullo pacto prodesse potest. 1º Inde orta videtur quòd Eusebius, minùs accuratâ versione usus, legerit, *peribit unctio*, ubi legendum fuisset *peribit*, seu *occidetur unctus*; uti ipse observat Aquilam et Symmachum transtulisse. Quanquàm, ut suprà animadversum est, hoc ipsum, *peribit unctio*, de Messia debuisset explicari. 2º Falsum est nece Hircani sacerdotium fuisse extinctum: ejus quidem splendor maximè tunc obscuratus et imminutus; sed postea tamen veros fuisse sacerdotes Judæi tradunt, ac ex ipso Evangelio videtur colligendum (1). 3º Quam in posteriore suâ conjecturâ tradit Eusebius expositionem horumce verborum: *Usque ad Christum Ducem hebdomades septem et hebdomades sexaginta duæ*; rejiciendam esse apertum videtur. Hæc enim ejus interpretatio est, 69 hebdomadibus principatu potituros sacerdotes; ergone voces *usque ad Christum Ducem*, idem sonant, ac *usque ad finem Christi Ducis*? 4º Quæcumque ad evincendum nomine *Christi* et *Christi Ducis* solum Messiam in vaticinio designari inter probationes attulimus, Eusebii conjectationem subvertunt.

Itaque immeritò hic opponitur Eusebii auctoritas, qui magnâ suæ commentationis parte Judæos validè expugnat, alterâ autem quâ ipsis favere videri posset, apertissimè fallitur.

Ad Scaligerum, Reinoldum, Junium, singularis eorum sententia suo loco expendenda, substantiam vaticinii de quâ solum impræsentiarum disputamus non spectat.

Ad cæteros, Marshamo hic contigit, quod et alibi sæpè. Doctus, sed audacior interpret, genuino Scripturarum sensui levissimas conjecturas opponere assolet. Harduinus conjectationem suam ipse damnavit teste Turneminio in Menoch. suppl. pag. 943. Calmetus novæ suæ, ut habet, hypothesi parùm confidit.

Sed, ne ejusmodi scriptorum opiniones ad Judæorum causam usui esse posse videantur, necesse est ut Marshami, Harduini et Calmeti systemata eo loci expendamus et confutemus.

DE SYSTEMATE MARSHAMI. — Joannes Marshamus, eques Anglus, historiæ veteris et rerum chronologicarum peritissimus, in Chronico Ægyptiaco ad seculum 18, oraculum Danielis de iis explicat, quæ partim sub Cyro Persarum rege, partim sub Antiocho Épiphane Judæis contigerunt.

(1) Vid. Joan. 11, v. 49, et cap. 18, v. 14, etc.

Ponit itaque sermonem propheticum Angeli, anno primo Darii Medi, simulque anno 21, captivitatis Babylonicæ alligandum. Quod probat, quia initium Darii Medi « incidit procul dubio, » inquit, in tempus hujus visionis. Visio autem « hæc obtigit Danieli *post orationem et jejunium.* » « Orationis atque jejunii sui diuturnitatem » testatur ipse Daniel (cap. 10, v. 3). *Lugebat Daniel dies trium hebdomadarum*, id est, orare « et jejunare solebat à desolatione Jerosolymorum usque ad diem hujus visionis, per tres » integras annorum hebdomadas, sive per annos 21, ab anno scilicet Nabonassari 141, « quo conflagravit templum, ad annum Nab. » 162, quo Angelus Danieli apparuit, quo etiam « Darius Medus Susiano Chaldæorum territorio » potitus est. »

Ponit præterea à templi primi per Nabuchodonosorem eversione quam Babylonicæ captivitatis exordio alligat, usque ad initium regni Antiochi Illustris effluxisse sexaginta duas annorum septimanas, hoc est, annos triginta quatuor supra quadragintos, quod sic conficit: « Templum excisum est anno Nabon. 141, » sive periodi Julianæ 4107... Regnavit Antiochus Epiphanes anno Græcorum 137, (lib. 1 Machab. cap. 1, v. 11)... annus Græcorum 137 est periodi Julianæ 4540. » Porro ab anno per. Jul. 4107, ad annum ejusdem periodi 4540, sunt anni 434

Statuit etiam hunc Antiochum, *non statim regno inito, profanasse templum*, et fœdera pacis cum Judæis fregisse, *sed post annos penè septem*; tribus verò annis sequentibus et mensibus sex, eosdem vexasse, altare diruisse, ac cætera egisse quæ ab auctore lib. 1 Mach. cap. 1, et à Josepho lib. 12 Antiq., cap. 5, n. 4, narrantur.

Observat denique loqui Prophetam de hebdomadibus septem, de sexaginta duabus, et de unâ dimidiatâ, quæ in summam collectæ septuaginta hebdomades cum unius dimidio constituunt; etsi, inquit, primum Angelus hebdomades septuaginta *rotundè dicit, omisso hebdomadis dimidio.* Totum istud temporis intervallum in duas partes secant Marshamus. Prior septem hebdomades continet seu annos 49; altera reliquas complectitur, id est, annos 444 cum dimidio anni.

Jam verò facile prænoscere est quâ ratione totam Prophetiam Marshamus interpretetur. Istud: *Ab exitu sermonis, ut iterum ædificetur Jerusalem, usque ad Christum ducem, hebdomades septem, etc.*, ita exponit: scilicet has se-

ptem hebdomadas seorsim accipit, et à sexaginta duabus divellit. Deinde ait *sermonem ut iterum ædificetur Jerusalem*, hunc ipsum esse sermonem, quem tunc proferebat Angelus; septem proinde hebdomades ab illo sermone angelico, hoc est, juxta dicta superius, ab anno 21 captivitatis Babylonicæ incipiendas pronuntiat. Demùm *Christus dux*, de quo Propheta, Marshamo est Cyrus rex Persarum, à quo populus à captivitate liberatus est. Atque hæc calculis chronologicis consonant. Nam septuaginta annis duravit captivitas, proindeque, à 21 captivitatis anno usque ad ejus finem, hebdomades septem elapsæ sunt, id est, 49 anni.

Hanc verò oraculi partem: *Et post hebdomades sexaginta duas occidetur Christus*, vel ut ipse legit cum versione græcâ, *peribit unctio*, etc., referendam censet ad Antiochi Illustris in Judæos desævientis tempora, quibus sacerdotes amoti sunt, sacrificia intermissa, altare destructum, sanctuarium profanatum, idolum Jovis Olympii in templo erectum. Ut autem constent calculi; non à Cyro, seu non à septem aliarum hebdomadum fine; sed ab anno 1 captivitatis Babylonicæ, quocum eversionem templi connectit, duarum supra sexaginta hebdomadum repetit initia. Ex ipso igitur tres ex illis sexaginta duabus hebdomadis jam elapsæ erant, cum aliæ septem cœptæ sunt effluere.

Hæc porro: *Confirmabit pactum multis hebdomada una*; intelligit Marshamus de septennio, quo primum regnavit Antiochus pacis fœdera cum Judæis, ut putat, non disrumpens.

Ista tandem: *Et in dimidio hebdomadis deficiet hostia et sacrificium*, etc., de iis explicat quæ idem Antiochus adversus Judæos et Judaicam religionem, tam immaniter quàm impiè, trium annorum, sexque mensium, et aliquot dierum spatio, juxta Daniel. 12, v. 11, molitus est.

Huc usque opinionem Marshami, auctoris sui nomine apud Anglos celebrem, exposuimus; quid de eâ sentiendum sit, aperiendum.

CONCLUSIO. Marshami interpretatio plurimis gratuitò positis nixa; ipsi vaticinio et chronologiæ repugnat.

Ac 1º quidem plura gratis statuit Marshamus. Nam gratuitò ponit 1º, tres hebdomadas, quibus cap. 10, v. 2, Propheta jejunasse dicitur, fuisse septimanas annorum. Imò additio vocis *diebus*, subjecta materia, et versus 12 et

13, ejusdem capitis satis admonent illas hebdomadas diebus duntaxat, non annis constituisse. Hinc Pagninus vertit eo loci, *tribus hebdomadibus dierum*, et græca pariter, τρεῖς ἑβδομαδάς ἡμερῶν. Gratis ponit 2°, jejunium Prophetæ capite 9 nemoratum ab initio captivitatis incœpisse: non enim ipsa præcisè captivitas fuit illius jejunii causa et occasio juxta sacrum contextum. Sed, cùm attentè considerasset Daniel liberationis tempus à Jeremiâ præfixum instare, ac metueret vehementer ne propter peccata populi promissio illa retardaretur, ideò sese ad orationem et jejunium convertit. Vid. v. 2 et 3, cap. 9. Gratis ponit 3°, jejunium Danielis cap. 9, idem esse quod memoratur cap. 10. Confer utrumque caput: nullam rerum similitudinem referunt. Quæ gesta narrantur capite 9 contigère anno Darii Medi Babylone Chaldæis imperantis; quæ cap. 10 ad annum tertium Cyri regis Persarum Babylone regnantis attinent; ergo. Gratis ponit 4°, anno 21 captivitatis Danieli apparuisse Angelum cap. 9 futura indicantem. Nam ex versu illius capitis patet *anno primo regni Darii filii Assueri de semine Medorum, qui imperavit super regnum Chaldæorum*, hanc visionem obtigisse; atqui annus ille non potest esse captivitatis vigesimus primus. Anno à captivitate 21, Chaldæorum regnum occupabat Nabuchodonosor, cujus anno 19 eversum est templum, et quem annis 43 à morte Patris regnâsse ex Josepho (1), ex Beroso (2) apud eundem Josephum et Eusebium, et ex canone Ptolemaico compertum est; quod ex Scripturis etiam, Jerem. 52 et 4 Reg. 25, planè colligitur. Gratis ponit 5°, sermonem à quo 7 hebdomades inchoandæ sunt, esse ipsum sermonem, quem tunc Angelus emittebat. Nam tantum abest, ut illa Angeli verba: *Ab exitu sermonis, ut iterum ædificetur Jerusalem*, etc., designent ab his eisdem verbis hebdomadas esse ineundas, ut potius ad alium de urbe instaurandâ sermonem vel prolutum, vel proferendum, vi suâ nativâ mentem convertant. Gratis ponit 6°, in hoc vaticinii membro: *Ab exitu sermonis.... usque ad Christum ducem, hebdomades septem, et hebdomades sexaginta duæ erunt*: sexaginta duas hebdomadas ab hebdomadis septem esse dissociandas. Quippe, ut jam diximus, si jungantur, omnia secum

cohærent; si separentur nihil invenire est ad quod possint illæ 62 hebdomades referri. Gratis ponit 7°, ducendas esse 62 septimanas à templi primi eversione, seu quod idem est apud ipsum, ab initio Babylonicæ captivitatis. Ipsi enim concessis etiam cæteris, nullum ejusmodi epochæ fundamentum afferret.

Hoc primum itaque certum maneat, Marshami interpretationem pluribus gratis et falsò positis niti.

2° Eadem interpretatio ipsi vaticinio repugnat. Namque 1°, ex dictis superius adversus Judæos, *Christus dux* quem Angelus ait post certam hebdomadum revolutionem venturum, ipse est *Messias*; ergo vaticinio repugnat interpretatio juxta quam nomine *Christi ducis* intelligitur Cyrus. 2° Ubi habet Vulgata: *Et post hebdomades sexaginta duas occidetur Christus*, legit Marshamus cum versione græcâ, quæ Theodotionis est, *peribit unctio*. Sed illam versionem ibi esse imperfectam jam probavimus. 3° Etsi legendum esset: *Peribit* seu *excindetur unctio*: adhuc vaticinio repugnaret Marshamus. Is enim *unctionem* interpretatur sacerdotium, huncque locum exponit de Antiochi tempore quo amoti sunt sacerdotes. Atqui aliud est sacerdotium *perire* et *excindi*; aliud est sacerdotes duobus tribusve annis tantum amoveri et à suis functionibus impediri, quod unum, furente in Judæos Antiocho, contigit. Nemo nescit post breve illud tempus à Judâ Machabæo repurgatum fuisse templum, atque exinde sacerdotium maximè floruisse, et plus quàm duobus seculis permansisse; ergo. 4° Prænuntiantur post hebdomades elapsas; dissipatio urbis et templi, vastitas et desolatio statuta; quæ eversionem templi et civitatis, ac perennem desolationem sonant. Pariter ista: *Deficiet hostia et sacrificium, et erit in templo abominatio desolationis, et usque ad consummationem et finem perseverabit desolatio*; significant etiam defectionem sacrificiorum perpetuam, et abominationem desolationi non desituræ conjunctam; atqui hæc intelligit Marshamus de cessatione sacrificiorum per aliquod tempus, de persecutione et desolatione temporaneâ, de violatione templi post breve tempus expurgandi; non ergo consentit vaticinio interpretatio Marshami.

5° Repugnat chronologiæ. Nam in chronologicis si quid certum est, istud maximè, tempora, quæ sibi invicem in summam adjiciuntur, distincta esse debere. Nimirum non ineptè quidem duas, v. g., annorum diversas periodos ab eadem epochâ deducis, sed ejusmodi duæ

(1) Joseph. lib. 20 Antiq. cap. 11, n. 1, edit. Haverc. T. I, pag. 556.

(2) Joseph. lib. 1, contra App. n° 20, edit. Haverc. T. II, p. 444; Euseb. lib. 9, Præpar. Evang. cap. 40, edit. Paris. 1628, p. 455.

annorum periodi ab eâdem deductæ epochâ, absurdè omninò in unum ita conflarentur, ut eorundem annorum in summâ bis haberetur ratio; aliàs, eosdem annos addendo iisdem annis, quodlibet breve tempus in ingentem summam annorum excresceret. Atqui tamen hanc portentosam annos computandi rationem lectoribus exhibet Marshamus. Ex ipso enim sexaginta duæ hebdomades fluunt ab initio captivitatis Babylonicæ usque ad Antiochum Epiphanem: ex eodem 7 hebdomades fluere incipiunt à 21 captivitatis anno, ac proinde intra 62 includuntur. Attamen juxta ipsum et ex vaticinio, illæ hebdomades septem cum sexaginta duabus, et alterâ pactum confirmaturâ, conficiunt 70 hebdomades. Ergo in summam colligit Marshamus tempora à se invicem non distincta, quod chronologicis principiis repugnat. Ut verbo dicam, 70 hebdomades post Danielelem enumerat Marshamus, ubi revera ex ejus systemate sexaginta tres solùm deprehenduntur; ergo. Sed et alio modo à verâ temporum ratione hic aberrat Marshamus. Nam a quo templum à Nabuchodonosore eversum est, quod, anno 607 ante æram vulgarem, juxta ipsum contigit, usque ad primum Antiochi regnantis annum, Marshamus numerat 62 hebdomadas, id est, annos triginta quatuor supra quadragintos. Igitur juxta ipsum, Antiochi regnantis initia anno ante æram vulgarem 173 alliganda sunt. Atqui saltem duobus antea annis regnare incepit Antiochus Illustris. Nam, lib. 1 Mach. cap. 1, v. 11: *Regnavit (Antiochus) in anno centesimo trigesimo septimo anni Græcorum*; porrò incepit æra Græcorum sive Seleucidarum juxta omnes chronologos anno 312 ante æram vulgarem; ergo duobus ut minimùm annis tardiùs quàm par est, Marshamus regnantis Antiochi initium collocat. Circa ipsam porrò eversionis templi epocham, in graviorem errorem lapsus est; nam anno 607 ante æram vulgarem hæc eversio templi ab eo ponitur, quæ tamen nonnisi viginti post annis potuit contingere. Enimverò, cùm annus primus Evilmerodach, qui Nabuchodonosori successit, connectatur (4 Reg. 25, v. 27, et Jerem. 52, v. 31) anno 37 transmigrationis regis Joachim; templum verò à Nabuchodonosore eversum sit anno 11 post ejusdem Joachim transportationem, seu quod idem est anno 11 Sedecix in ejus locum successi; sequitur eversionem templi esse collocandam anno ante Evilmerodachum 27. Atqui primus annus Evilmerodachi ipse est annus 560 vel 561 ante æram vulgarem. Si quidem Na-

bopolassar, Nabuchodonosoris pater, ex canone Ptolemaico regnare desiit anno æræ Nabonassari 144, qui cum anno ante æram vulgarem 604 à doctis chronologis copulatur; ex eodem canone aliisque momentis suprâ relatis Nabuchodonosor regnavit 43 annis à morte Nabopolassaris patris sui. Annus igitur primus Evilmerodach fuit 560 ante æram vulgarem; proindeque eversum est templum anno 587 vel 588 ante eandem æram, non verò 607, ut voluit Marshamus.

Nota obiter Nabuchodonosorem, biennio ante obitum patris, fuisse consortem regni factum, atque ab illâ coronatione computandum esse decimum nonum ejus regni annum, quo Jerusalem et templum diruta dicuntur, 4 Reg. 25, v. 8.

Argumentis in Marshani opinionem hactenus propositis manifestum fit, frustra Judæos et incredulos in eâ desperatæ suæ causæ presidium quærere. Sed duo adhuc supersunt adversus eam momenta, quibus ab eâ tenendâ homo christianus maximè deterreri debet. Primum est, quòd illâ opinione positâ evanescat argumentum quod in Judæos hæc prophetia subministrat. Nam licet alia non desint quàm plurima momenta, ad suadendam Judæis et aliis infidelibus religionem christianam aptissima; attamen Danielis oraculo ita urgentur fidei hostes, atque, ad eos impugnandos, singulis seculis Ecclesia adeò constanter illud adhibuit, ut non leve piaculum videri debeat, contortâ interpretatione, eniti causæ christianæ id præsidii eripere. Alterum est, Christum Dominum ad se ipsum hanc Prophetiam applicasse, dùm Matth. 24, v. 15, de futurâ Judæorum clade, urbisque et templi eversione discipulos præmonens dixit: *Cùm ergo videritis abominationem desolationis, quæ dicta est à Daniele Propheta, stantem in loco sancto, qui legit intelligat: tunc qui in Judæâ sunt fugiant ad montes... erit enim tunc tribulatio magna, qualis non fuit ab initio mundi, neque fiet.* Quæ ut pleniùs intelligantur, advertendum, Danielelem triplici in loco prædixisse futuram in templo abominationem desolationis, nempe cap. 9, de quo agimus, capite 11, v. 31, et cap. 12, v. 11. *Abominatio autem desolationis*, cujus mentio fit capitibus 11 et 12, brevi tantùm tempore, quod Propheta determinat, prænuntiatur duratura, et ad Antiochi tempus manifestè refertur. Ab illâ verò planum est prorsus differre *abominationem desolationis*, quæ usque ad consummationem et finem perseveratura cap. 9, prædicatur, et de quâ contendi-

mus exponenda esse verba Christi mox laudata. Unde consequens est ad Christi tempora pertinere cætera omnia ante hanc desolationem ex vaticinio eventura. Sic igitur licet argumentari: Juxta Christum prædicta est à Daniele Prophetâ *abominatio desolationis in loco sancto* tempore Antiochi non completa, quippe quæ necdum ætate Christi contigerat. E contrario vult Marshamus *abominationem desolationis* à Daniele prædictam seu capite 9, seu capitibus 11 et 12, eandem esse, et ad tempora Antiochi pertinere, nec aliam ab illo Prophetâ memorari post Christi tempora eventuram; ergo Christi verbis repugnat Marshami interpretatio.

Respondet Marshamus, pag. 618, Danielis verba ad ultimam Jerosolymorum excidium à Christo applicata fuisse sensu typico, non historico, *cujusmodi allusiones apud Matthæum occurrunt plurimæ*. Sed 1°, sensus is typicus fuitne à Daniele intentus? id Marshamus non asserit, imò ibidem sic habet: *An ultrâ Epiphanem prospexerit Daniel viderint alii*. 2° Tam evidens est, quàm quod maximè, sensum vaticinii historicum quadrare optimè in res ad quas illud refert Christus. Ergò historicè non typicè Christi verba sunt accipienda. 3° Comparatio à Marshamo instituta cum aliis allusionibus apud Matth. frequentibus nulla est. Nam ejusmodi allusiones occurrunt in verbis Scripturæ historicis, seu rem præteritam aut præsentem exprimentibus, à Matthæo ad varias vitæ Christi circumstantias applicatis. Ubi sanè soli typico sensui locus esse potest. At, quando verborum propheticorum sensus immediatus et naturalis eventibus, ad quos à Christo referuntur, perfectè congruit, nonne illud religioni ducendum foret, ut aliorum non detorquerentur?

Quæ cum ita sint, mirandum subit, Calmeto visum esse in Dissertatione de 70 hebdomadis Danielis, ipsum auctorem lib. 1 Mach. ad persecutiones Antiochi Illustris in Judæos 70 hebdomadam finem transtulisse. Dicitur quidem 1 Machab. 1, v. 57, *Antiochum idolum abominationis desolationis* super altare ædificasse. Sed undenam habet Calmetus ibi alludi ad abominationem cap. 9 Danielis memoratam et cum desolatione totali et perenni conjunctam; non verò potius ad eam tantum quæ capitib. 11 et 12 prædicitur, et cui Antiochi tempora planè respondent? Hæc eò minùs cautè scripta sunt, quòd auctorem librorum Machab. esse canonicum vir catholicus existimet, ac simul systema Marshami graviter notet, fideique adversum supponat.

De conjecturâ Harduini. — Inter opiniones singulares, quas variis in scriptis protulit eruditissimus Joannes Harduinus, non infimum ea locum obtinet, quam de 70 hebdomadis Danielis (1) excogitavit. Sermonem à *cujus exitu* hebdomadæ putandæ sunt, definit cum esse qui, Jerem. capitib. 25 et 29, anno 4 Joachim regis Juda, à Deo egressus est de populo è captivitate in patriam reducendo. Ab illo igitur anno 4 Joachim antè æram vulgarem 606, ducit vir doctissimus initium tum hebdomadam 7, tum 62, quas Marshamum imitatus separat. Hebdomades 7 ad annum perducit antè æram vulgarem 557, quo statuit Cyrum Medis imperare cœpisse; quippè Cyrum in Mediâ regnare incipientem nomine *Christi ducis* in Danielis vaticinio designari conjicit. Septimanas autem sexaginta duas numerat ab eodem anno 4 Joachim ad usque annum antè æram vulgarem 172, quo alterum *Christum ducem*, nempe Judam Machabæum, exortum esse ponit. *Christum* porrò quem post 62 hebdomadas occidendum Angelus annuntiat, interpretatur ipsum *Messiam*. Itaque statuit, illis 62 hebdomadis elapsis, *Christum* verum *Messiam occisum* fuisse, non in se quidem et reipsâ, sed in typo, nempe in Oniâ summo sacerdote, quem vult interfectum anno antè æram vulgarem 171, hebdomade 63, quæ Harduino est etiam 70. Deindè intrâ hanc ultimam hebdomadam collocat templi et civitatis per Antiochum desolationem, sacrificiorumque tribus annis cum dimidio cessationem, etc., quibus existimat futurum sub Tito excidium præsignificatum fuisse et figuratum.

Ex his liquet Harduini opinionem, si substantia vaticinii consideretur, in eo potissimum à Marshami sententiâ differre, quod iste Prophetiam Danielis de Antiochi temporibus historicè seu litteraliter explicans, non curet an ullo modo Christus eâ significetur; ille verò præter significationem vaticinii litteralem, agnoscat quoque in eo sensum typicum, à Spiritu sancto directè et primariò intentum, qui ad Christum et subsecutam sub Tito consumptionem referatur. Cæterum in utrâque hypothesis eadem ferè vitia occurrunt. Sit itaque.

CONCLUSIO. Harduini hypothesis tota in levis et falsis conjecturis posita, nec cum verbis

(1) In Chronol. veteris Testamenti, p. 553, 558, 589, 592 et seqq. et in defensione Hard. de 70 hebdom. adversus Bernardum Lami, p. 880 et seqq. edit. operum Harduini in-fº Amst. 1709.

vaticinii, nec cum calculis chronologicis consonat.

Probantur sigillatim propositionis partes. 1^o Exposita hypothesis Harduini, tota in levibus et falsis conjecturis posita est. Leviter enim et falsò conjicit 1^o vir eruditus sermonem Dei ad Jeremiam capitib. 25 et 29 fuisse sermonem de quo Angelus. Nam sermo, in quo nihil habetur expressum *de reædificandâ Jerusalem*, falsò conjicitur esse sermo *de iterum Jerusalem ædificandâ*, præsertim si alter sermo in promptu sit, in quo facultas ejusmodi urbis denuò extruendæ expressè habeatur; atqui capitibus Jeremiæ 25, 29, nulla deprehenditur mentio expressa Jerosolymorum reædificandorum; facultas verò civitatis Jerosolymitanæ denuò extruendæ expressè habetur in sermone egresso ab Artaxerxe Longimano ad Nchemiam lib. 2 Esdræ, cap. 2; ergo.

Leviter et falsò conjicit 2^o, ad Cyrum in Mediâ primùm regnantem, partem vaticinii referendam; nam regnum Cyri, Medis aut Persis, antè occupatam Babylonem imperantis, Judæos nihil contingebat. Præterea Danielis vaticinium versùs finem captivitatis meritò censet emissum Harduinus, atque anno 25 Cyri in Mediâ regnantis annectit; ergòne his verbis: SCITO ERGO ET ANIMADVERTE: *Ab exitu sermonis... usque ad Christum ducem, hebdomades septem*; Angelus solummodò voluit Danieli rem à 25 annis præteritam declarare, quasi verò ipse Daniel nescivisset Cyrum non Medis solum, sed et Persis, jam tum dominatum fuisse?

Leviter et falsò conjicit 3^o, hunc vaticinii fuisse scopum, ut Oniæ nece, urbisque et templi per Antiochum vastatione ab Angelo prædictis, mors Christi, et eam subsequuta desolatio totalis adumbrarentur et figurarentur, enimvero auctoritate non nititur hæc conjectura, cum nec SS. Patres, nec ullus Scripturæ interpretes Oniam, ut Christi typum habuerit; nec etiam ipsa rerum analogia ac similitudo ad sensum hunc typicum ducit, nulla siquidem mortem Oniæ inter et mortem Christi, quantum ad præcipuos characteres, convenientia. Onias in terrâ gentilium ab Andronico pagano invitus neci datur; Christus verò, pro hominibus redimendis, sese in victimam morti spontè objecit, et in Terrâ promissâ interfectus est. Solus ex Judæis mortem Oniæ promovit pseudo pontifex Menelaus: at pontifices ac natio universa Judæorum, suo et posterorum suorum nomine, neci Christi non modò consenserunt, sed etiam ejus auctores fuerunt.

non sanè Deus Judæos permisit tot mala ab Antiocho pati propter illatam Oniæ mortem, cujus rei non erant, quamque æquè ac gentiles detestati sunt; ex adverso urbs et templum funditùs à Tito deleta sunt, et tota gens excisa in pœnam criminis à natione in Christum commissi. Ergò sanctissimus inter Judæos Onias fuerit, et injustè interemptus; non ideò, ut insignis typus Christi morientis vaticinio Danielis prænuntiatus spectandus est. In levibus igitur et falsis conjectationibus posita est hypothesis Harduini.

2^o Cum verbis vaticinii non consonat eadem hypothesis. Nam 1^o, Angelus 70 hebdomadas computat; atqui in hypothesis Harduini ab eadem epochâ hebdomades *septem*, et hebdomades *sexaginta duas* deducunt, sexaginta tres duntaxat, non septuaginta essent computandæ. Hùc recurrunt superiùs in Marshamum dicta. Frustrà autem observat Harduinus 70 hebdomadas ab Angelo dici *abbreviatas*; quasi illà voce significaretur è 70 hebdomadis demptas esse *septem*, ut superessent tantùm sexaginta tres. Sed nemo hactenùs illud versionis Vulgatæ vocabulum hoc modo intellexerat; nec quidquam sanè hanc longiùs accersitam expositionem postulat. Et verò si 70 hebdomades redactæ fuerint ad sexaginta tres; quare ergò subindè Angelus uno contextu enumerat hebdomadas septem, tum sexaginta duas, ac indè unam, quarum summa sit septuaginta? Ergò cum vaticinii verbis quantum ad illam partem non convenit hypothesis Harduini.

Non convenit etiam quantum ad duos *Christos duces*, quos distinguit, et ad quorum unum hebdomades septem, ad alterum 62 perducit. Nam unius tantùm *Christi ducis* mentio fit in vaticinio. *Ab exitu sermonis, ut iterum ædificetur Jerusalem*, inquit Angelus, *usque ad Christum DUCEM hebdomades septem et hebdomades sexaginta duæ erunt*; ergo. Deinde nomine *Christi ducis* Cyrus Medorum rex et Judas Machabæus ex Harduino significantur. Atqui nomen illud sine addito, prout in vaticinio reperitur, Messiam designare adversùs Judæos probatum est; cùmque, voce *Christi* versiculo sequenti simpliciter positâ Messiam exprimi Harduinus contendat, quidni appellationi *Christi ducis* sine addito eadem vis tribueretur? nomen enim ducis, quod ab Isaiâ Messiæ disertè tribuitur, Christi appellationem non restringit. Ad hæc, tam illa verba: *Et post hebdomades 62 occidetur Christus*, denotant veram occisionem, quàm verum Christum; nec magis typica occisio Messiæ ibi indicatur, quàm

Christus seu Messias typicus. Ut vox *Christus* simpliciter posita exprimit verum Christum, ita verbum *occidetur*, ibi veram occisionem exprimat, necesse est. Præterea, civitatem et sanctuarium dissipanda esse, id est, penitus subvertenda Angelus prænuntiat. Futura *vastitas*, *desolatio* usque in consummationem et finem perseveratura, sacrificiorum quæ in solo templo offerri poterant abolitio perpetua eodem vaticinio prædicuntur. Hæc arduinus explicat immediatè et litteraliter de spoliatione solum templi et civitatis, de vastatione eorum per aliquod tempus, de sacrificiorum intermissione tribus annis et quibusdam mensibus, de brevi quorundam annorum desolatione, cujus finem ipse Daniel alio in loco determinat. Atqui hæc non respondent verbis vaticinii; ergò à vaticinii verbis prorsus dissonat Harduini interpretatio. Denique Danieli annuntiat Angelus futurum ut intra hebdomades 70 *consummetur prævaricatio, et finem accipiat peccatum, et deleatur iniquitas, et impleatur visio et prophetia, et ungatur Sanctus sanctorum*. Quæ Harduinus sic interpretari cogitur: « Intra has abbreviatis hebdomades septuaginta, complebitur prævaricationis antiquæ pœna, finem accipiet pœna peccati, delebitur prisca iniquitas; inducetur cultus religionis longo tempore duraturus; implebitur visio et prophetia ob lata Jeremiæ de ædificandâ iterum civitate, de ungendo sacerdote, de sanctuario restituendo. » Et alibi typicam horumce significationem evolvens: « Eo temporum intervallo ætas Messiae adumbrabitur; delineatio quædam erit justitiæ sempiternæ, quæ sub Christo futura est, ac prophetiæ item omnis in Christo implendæ. » Observes velim, quantum à litterâ distet doctissimi viri contorta et longè petita interpretatio. Ait Angelus iniquitatem delendam, peccatum finem habiturum, justitiam sempiternam, seu religionem justificantem semper duraturam, instituendam. Hæc tanta, quæ Christus ad litteram implevit, de temporali pœnâ peccati, de religione Judæorum quibusdam adhuc seculis duraturâ, de delineatione quâdam justitiæ sempiternæ sub Christo futuræ solummodò Harduinus intelligit. In vaticinio habetur simpliciter: *visionem et prophetiam implendas*; hæc dicta generatim restringit Harduinus ad prophetiam Jeremiæ cap. 25 et 29, et ad delineationem quamdam prophetiæ omnis in Christo implendæ. Istud denique, *Et ungatur Sanctus sanctorum*; ut adversus Judæos ostendimus, et ipsa res loquitur, solum accipi

potest de Christo, qui Spiritu Sancto unctus, et unione humanitatis suæ ad Verbi personam sanctus naturâ constitutus, tanto solus potuit præconio significari. Sed id ipsum, ex Harduino, sacerdotales functiones restitutas, templumque à Judâ Machabæo repurgatum, cum adumbratione quâdam ætatis Messiae solummodò significat; ergò vaticinii verbis non consonat hypothesis Harduini.

3° Non consonat chronologiæ. Nam Judas Machabæus illo systemate statuitur *Christus dux* anno 144 æræ Græcorum, antè æram communem 172, quippè quo 62 hebdomades ex Harduino pag. 589 et 884 desinunt; sed ex eodem, pag. 592, nonnisi anno abhinc quinto Judas post obitum Mathathiæ constitutus est dux Judæorum et militiæ princeps, nempe anno Græcorum 146 antè ær. vulg. 167, quod ex lib. 1 Mach. cap. 2, v. 70, et cap. 3, v. 1, liquidò constat; ergo.

Quæres utrùm Danielis oraculo vis aliqua in Judæos superesset, positâ Harduini interpretatione? Respondeo negativè; quia si semel concedatur, Judam Machabæum, Oniæ mortem persecutionem Antiochi ac templi repurgationem immediatè hoc vaticinio respici; frustrâ contendetur alterum etiam esse ejusdem oraculi sensum, quo Christi mors et ultima urbis templique conflagratio præsagiantur. Reponent enim Judæi duplicem ejusmodi significationem verborum Danielis adversum se non evinci; sibi que satis esse sensum aliquem prophetiæ litteralem causæ suæ non aversum agnosci: hunc denique sensum à se teneri, et rejici alterum donec admittendus comprobetur. Quid porrò, interpretatione Harduini positâ, contrâ hanc Judæi exceptionem opponi queat, non videtur. Diceturne duplicem sensum satis probari, cum *Christus*, qui post 62 hebdomadas prædicatur in typo *occidendus*, sit ipse Messias? Sed urgebit Judæus, 1° non magis Christo significari Messiam, quàm *Christo duce*, qui tametsi in vaticinio simpliciter legitur, Messiam tamen ex Harduino non significat; 2°, si verbum *occidetur* ibidem de typicâ occisione accipiendum sit, cur vox *Christus* propriè sumi debeat non perspicui; 3° præposterè poni Oniam typum Christi fuisse, cum nec Scriptura, nec rerum convenientia id astruant. Atqui, positâ Harduini interpretatione, quâ ratione hæc solvi possint non apparet; ergo.

Dices cum Harduino, pag. 596, col. 1: « Qui CHRISTUM DUCEM de Salvatore intelligunt, à veterum plerorumque opinione faciunt

« divortium. » Nego antecedens. Contra nemo ex veteribus, si Eusebium excipias, nomine *Christi ducis* Messiam intelligendum non esse tradiderit. Observat Origenes, tract. 29 in Matth. utrisque nominibus simul, *Christum ducem*, Daniele esse usum ut *Christus* intelligeretur.

Instabis cum eodem in Dissertatione adversus Bernardum Lami, pag. 894, col. 2, Petrus Blesensis lib. contra perfidiam Judæorum, cap. 13, hæc verba, *usque ad Christum ducem*, istis reddidit, *usque ad Cyrum ducem*.

Nego antecedens. Sic habet Petrus Blesensis : *Ab exitu hujus sermonis usque ad Cyrum fuerunt septem hebdomades, sexaginta verò duæ à Cyro usque ad Titum, et una hebdomada obsidionis.* Aliud porro est septem hebdomadam finem in Cyro constituere, aliud est velle Cyrum esse *Christum ducem* vaticinio prænuntiatum. Quod adeò verum est ut reipsa Petrus Blesensis loco citato totum vaticinium ad Christum Dominum immediatè applicet, ac speciatim *Christum ducem* conceptis verbis de eo uno interpretetur. Cæterum, qui fieri potuit ut eruditus Harduinus in sui defensionem unicum proferret è veteribus Petrum Blesensem seculi 12 scriptorem, nisi quòd reipsa nulli eà de re ipsi consentiant?

Instabis iterum cum eodem, pag. 592, 593 et 885 : De vaticinio Danielis maxima apud veteres interpretationum varietas. Patres complures legerunt juxta versionem quâ utebantur, *Excindetur unctio*, non, *unctus*; proindeque nec istud ipsum quod de Messia solo intelligi potest, *Occidetur Christus*, ad Christum Dominum retulerunt.

Respondeo distinguendum ut suprâ, substantiam vaticinii inter et quasdam ejus circumstantias. Circa primum omnes ferè veteres consentiunt, et Harduino adversantur; circa secundum variis de causis suprâ enumeratis diversimodè opinantur ac conjectantur, quod etiamnum eruditis Ecclesia permittit. Quod autem attinet ad versionem græcam, *Peribit unctio*, falsum est quotquot illâ versione usi sunt, hæc verba ad Christum non retulisse. Sanè Tertullianus, lib. adversus Judæos cap. 8, legit : *Unctio exterminabitur*; attamen ibi designatam Christi passionem intelligit. Item dicendum de græcis Patribus qui mortem Christi hoc vaticinio prædictam intellexerunt, ii verò sunt multi; nec fortè (exceptis Eusebio et Theodoro) ullum alium reperire est qui has voces de *Christo* accipiendas esse negaverit.

Nec mirum; nam cum verba præcedentia : *Ungatur sanctus sanctorum*; et : *Usque ad Christum ducem*; de Christo Domino intelligerentur, proclive erat ista, *Peribit unctio*, de eodem exponi, tum propter rerum affinitatem, ac contextus seriem; tum propter eventus convenientiam et consensionem; tum etiam quia post sexaginta novem hebdomadas sacerdotium adhuc aliquandiu perseveravit, vel si quantum ad valorem et necessitatem perierit, non nisi morte Christi extinctum est.

Instabis denique. Sixto Senensi lib. 8 Bibl., hæresi 12, Estio in Annotat. ad Matth. 24, licuit vaticinium Danielis de Antiochi temporibus explicare; ergo nihil vetat, etc. Respondeo hos tantum è catholicis scriptoribus à doctissimo viro citari potuisse qui hanc sententiam tenebant. Sixtus autem Senensis nec ex professo, nec de toto vaticinio disserit, idque unum obiter habet loco citato; abominationem à Daniele prævisam in Machabæorum libris legi completam tempore Antiochi, *qui abominandum idolum desolationis posuit super altare Dei*. Ubi sanè agi de abominatione prædictâ cap. 9 Danielis, non de alterâ quæ cap. 11 et 12 prænuntiata est nullus esset suspicandi locus, nisi hoc ipsum caput Danielis 9 è regione imprudenter citatum fuisset.

Quantum ad Estium, fatendum est prædictam Dan. 9 abominationem desolationis ad Antiochi persecutionem, ad ultimam conflagrationem et ad ætatem Anti-Christi ab eo diversimodè loco objecto referri : at in Annotationibus ad caput 9 Danielis, vaticinium reliquum, ipsasque 70 hebdomadas ad solius *Christi* tempora disertis verbis accommodat.

DE HYPOTHESI CALMETI. — Calmetus in jam citatâ de 70 hebdomadis dissertatione commentario ejus in Daniele præfixâ, rejectis Marshami et Harduini hypothesebus, istam proponit, ut minoribus difficultatibus obnoxiam. Sermonem à quo 70 inchoandæ hebdomades, statuit esse prophetiam Jeremiæ de populi reditu, non eam quæ cap. 25 et 29 extat, sed alteram quæ cap. 50, v. 18, 19 et 20, legitur, quamque supponit emissam fuisse anno, quo Jerusalem à Chaldæis eversa est. *Christum ducem* interpretatur Cyrum Babylone regnantem, et in patriam revertendi facultatem Judæis solemniter edicto concedentem; ad eumque septem hebdomadas perducit. Septimanas autem *sexaginta duas* à fine illarum *septem*, seu à captivitate solutâ enumerat, illasque terminat morte Oniæ, quem conjectatur *Christo* occidendo designa-

tum. Post hebdomadas septem elapsas collocat quæ de peccati consummatione, de iniquitate delendâ, de justitiâ sempiternâ adducendâ, et de Sancto sanctorum ungendo in primâ vaticinii parte continentur. Tunc enim, inquit, iniquitatum populi sui Dominus est oblitus; cultus idolorum à Judâ et Israel eliminatus fuit; templum rursus consecratum est, et sacrificia iterum oblata sunt. Reliquum oraculum de Antiochi Epiphanis temporibus explicat Calmetus, censetque *pleno effectu* illud donatum tunc fuisse, cum à Judâ Machabæo repurgatum est templum. Atque generatim pronuntiare non dubitat *hunc unum vaticiniorum Danielis* capit. 7, 8, 9, 10, 11, 12, *INSIGNEM ESSE SCOPUM* (N'ONT QU'UN SEUL GRAND OBJET), *ut illi Prophetæ ostenderetur quid nationi Judaicæ ac totius Orientis populis, à regno Cyri usque ad Antiochum Epiphanem, contingere deberet.*

CONCLUSIO. Calmeti hypothesis à Marshami systemate, quantum ad substantiam, non diversa, gravioribus adhuc vitiis laborat, ac ipsi Calmeto adversatur. 1° A Marshami systemate, quantum ad vaticinii substantiam, diversa non est hypothesis Calmeti; cum Calmetus, æquè ac Marshamus nullam vaticinii partem, nec ullum ejus sensum ad Christi tempora referat. Hinc præcipuis argumentis quibus non modò Harduinum, sed et Marshamum ipsosque Judæos confutavimus, hæc nova hypothesis subvertitur. 2° Hypothesis Calmeti gravioribus adhuc vitiis laborat, quàm Marshami systema. Nam quæ in Marshamo emendare sibi visus est Calmetus, hæc æqualibus, aut etiam majoribus vitiis compensavit. Non statuit quidem, ut Marshamus, septem hebdomades ab ipso Angeli sermone incipere, sed dum eas inchoat à prophetiâ Jeremiæ cap. 50, duplici ratione fallitur. Primò enim vaticinium Jeremiæ cap. 50, nullam Jerosolymorum reædificationis expressam et specialem continet mentionem; proindeque non potest esse *sermo*, de quo Angelus; præsertim, cum plures aliæ apud Jeremiam et Isaiam de futuro populi reditu, similes prophetiæ occurrant. Secundò idem Jeremiæ oraculum anno quo Jerusalem à Chaldæis subversa est, non potest alligari. Etenim ex ipso Jeremiæ cap. 51, v. 59, colligitur hoc vaticinium emissum fuisse anno quarto Sedeciæ, ante illam civitatis subversionem octavo. Unde sequitur à prolata ejusmodi prophetiâ, usque ad Cyrum Babylone regnantem computandos esse annos solidos septem supra quinquaginta, non verò novem et quadraginta tantum. Non

statuit etiam, quod in Marshamo et Harduino refutavimus, *septem hebdomadas* simul cum *sexaginta duabus* effluere; imò singularem hanc conjecturæ eorum partem ignoravit Calmetus, qui non semel ait, utrumque à captivitatis fine sexaginta duas deducere hebdomadas. Tritis itaque Marshami et Harduini vestigiis se insistere falsò arbitratus, atque ideò rationum chronologicarum expendendarum onus hic in sese non suscipiens, à Cyro populum liberante, ad Oniæ mortem computat sexaginta duas hebdomadas, seu annos 434. Atqui juxta omnes accuratos chronologos, ipsisque judicibus Marshamo et Harduino, Oniæ mors anno ante æram vulgarem 170 vel 171 alliganda est, proindeque, cum anno ante eandem æram 536 aut 537 soluta sit captivitas, octo et sexaginta annis hic aberrat Calmetus. Saltem annis septem et quinquaginta falli se fateatur necesse est, cum ipse in tabulâ suâ chronologicâ captivitatem solutam ponat anno ante æram communem 543, mortem verò Oniæ ad annum ante eandem æram 166 revocet.

Sed gravius est quod fingit, statim à solutâ captivitate, seu post hebdomadas septem, primam vaticinii partem completam fuisse. Nam, præterquàm quòd eventus rerum à vaticinii verbis, positâ illâ interpretatione, tam dissonet, quàm in jam subversis Harduini et Marshami hypothesibus; 70 hebdomades ait Angelus constitutas, ut ea eveniant quæ hoc vaticinii membro significantur. Porro ubi 70 hebdomades dicuntur à Deo constitutæ ut aliquid fiat, licetne interpretari id post septem hebdomades eventurum? ergo.

3° Hypothesis Calmeti ipsi Calmeto adversatur: 1° enim suam ipse Calmetus hypothesim refellit, ac gravissimâ notat censurâ, dum Marshamum confutat, ac erroris in fide et temeritatis accusat, quòd *Jesum Christum* esse Danielis oraculi finem non statuerit; 2° fatetur versùs disputationis finem, tutius et satius esse septuaginta hebdomadas ad Christi mortem referre, quia *nativâ* suâ vi eò ducunt vaticinii verba; ergo hypothesis quam refellimus, nativo verborum prophetiæ sensui, fatente Calmeto, non consentit; proindeque, etc.

§ 2. De initio septuaginta hebdomadum Danielis.

Quæstio integra eò tota reducitur, quis sit ille *sermo*, de quo loquitur Angelus v. 25, et à cujus exitu *usque ad Christum* ducem hebdomades septem et hebdomades sexaginta duas computat.

Is autem sermo non aliud quidquam esse potest, quàm aut Prophetia aliqua de iterum ædificandâ Jerusalem, aut decretum quoddam vel litteræ regis Persarum, quibus illa Jerosolymorum extractio imperata sit aut permissa.

Novem porrò extant in Prophetarum libris vaticinia, quibus iterum extruenda Jerusalem, seu conceptis verbis, seu implicite prædicitur. Hoc enim vaticinati sunt bis Isaias, nempe capitibus 44 et 45, ter Jeremias, cap. 27, 29 et 50, Baruch bis nempe cap. 2 et 4, semel Habacuc in Cantico, et semel Angelus apud Danielelem his ipsis de quibus agimus verbis: *Ab exitu sermonis ut iterum ædificetur Jerusalem,.... et rursùm ædificabitur platea et muri*. Quatuor verò à Persarum regibus data sunt edicta seu rescripta circa templi urbisve restorationem. Primum est Cyri, qui anno primo quo Babylone regnavit, ante æram vulgarem 536, vel juxta alios 538, Judæis fecit potestatem in patriam revertendi et templi reædificandi. Legitur hoc diploma 1 Esdr. cap. 1, v. 2 et seqq. In eo mentio expressa non habetur restaurandæ urbis Jerusalem, sed tantum extruendi templi. Secundum edidit Darius Hystaspis filius, post repertum Ecbatanis in tabulario regio edictum Cyri. Extat illud decretum. 1 Esdr. 6, v. 1, et seqq. Eo confirmatur duntaxat edictum Cyri de templi reædificatione. Tertium decretum ab Artaxerxe Longimano anno regni sui septimo, Esdræ sacerdoti inscriptum est. Exhibetur 1 Esdr. 7, vers. 11, 12 etc. Cultum Deo in templo adhibendum, politiam populi Judaici, et vectigalia ab eo Persis solvenda spectat; de restauratione mœnium urbis nihil expressè continet. Quartum denique edictum seu potius rescriptum, nec enim publici diplomatis videtur habuisse formam, ipsæ sunt litteræ regiæ, quas idem Artaxerxes anno imperii sui 20, mense Nisan, Nehemiæ concessit, ut narratur 2. Esdr. 2. Patet ex eodem Esdræ loco restorationem mœnium Jerusalem illo sermone regio non modò disertè permissam, sed et approbatam et confirmatam fuisse; atque ad id exequendum, missum à rege eundem Nehemiam, qui, cum hoc ipso anno Jerusalem venisset, tantâ diligentia operi institit, ut intra dies 52 muri fuerint reparati, 2 Esdræ 6, v. 15.

Hæc porrò enumerando decreta supposuimus Darium de quo sermo fit 1 Esdræ 6, esse Hystaspidem, et pariter Artaxerxem capitis 7, esse Longimanum. Aliter censuit Scaliger. Priorem esse Darium Nothum opinatur, et ab ejus anno

2 septimanas Danielis inchoat; alterum esse Artaxerxem Memoriosum definit. Quæ unà cum singulari ejus de septuaginta hebdomadibus opinione expendemus.

Itaque quæstio est à quo ex illis sermonibus initium septuaginta hebdomadum sumendum sit, an ab aliquâ Prophetiâ; an ab edicto Cyri; an à decreto Darii Hystaspidis, etc.; an ab eventu ipso, seu ab iterum ædificatâ Jerusalem? cujus quidem quæstionis partes singulæ jam discutiendæ sunt. Ut autem dicendis major lux affulgeat, præmittendam ducimus tabulam chronologicam variis circa hebdomadum initium opinionibus expendendis concinnatam, circa quam duo annotari volumus. 1° Quæcumque minùs certa in eo indice occurrunt, aut ad expositionem variorum systematum spectant, ea litteris italicis exhibemus. Cætera ad Usserii aut Petavii, ac sæpe ad utriusque et accuratissimorum chronologorum probatissimos calculos exacta sunt. 2° Omittimus in hac tabulâ calculos Periodi Julianæ ut inutiles et superfluos, quod demonstravit Salianus. Hoc ferè unum de hujusmodi periodo scire interest, nempe anno ejus 4714 alligari annum primum æræ vulgaris christianæ. Id enim satis est, ut facilè intelligi queant eruditorum scripta qui potest Scaligerum hujusce periodi annos adhibent. Prætermittimus quoque annos mundi, ut incertos. Solis utimur annis ante et post æram vulgarem, quippe ad quos alii calculi referuntur. Æras tamen apud omnes chronologos indubitatas, atque historiæ tum sacræ tum profanæ explicandæ necessarias, obiter notavimus. Scilicet operæ pretium visum est, ut illæ, ubi opus esset, in promptu haberentur.

INDEX CHRONOLOGICUS.

Variis circa Danielis septimanas exponendis systematibus accommodatus.

	Anni ante Æram vulgarem.
Initium Olympiadum.	776
Annus primus Romæ Varronianus.	753
Æra Nabonassari incipit mense Februario.	747
Captivitati Babylonicæ septuaginta annorum dat initium Nabuchodonozor anno 4 Joachim.	606
Templum à Chaldæis conerematur.	588
Cyrus Babylone regnare incipit, et captivitatem solvit. <i>Inde quidam arcessunt 70 hebdomades.</i>	556
Cambyzes Cyro patri succedit.	529
Pseudo-Smerdis thronum occupat, re-	

gnatque mensibus septem. 522
 Darius Hystaspis occiso Smerdi imperium
 auspicatur. 521
 Edit decretum de templo perficiendo. *Ab
 hoc Decreto S. Clemens Alex. Euseb. etc.
 septimanas ducunt.* 519
 Templum absolvitur anno Darii sexto. 515
 Exercitus Darii in Marathoniis campis pro-
 fligatur mense Septembri. 490
 Annis quatuor à Marathoniâ pugnâ exple-
 tis, moritur Darius. Succedit Xerxes. 485
 Anno imperii sui quinto Xerxes exerci-
 tum Susis ducere incipit. 481
*Hunc annum 481 Xerxis esse septimum con-
 tendit Turneminius in Menoch. suppl. p.
 401 et 428, vultque hoc eodem anno, vere
 ineunte, Xerxem trajecisse in Græciam,
 post consortem regni factum filium Artaxerxem.*
 Eodem anno quinto regni sui, primo ve-
 re, Xerxes Sardibus, ubi hyemaverat,
 proficiscitur et in Græciam trajicit. 480
*Hoc anno Xerxis 5 comitem regni electum
 Artaxerxem conjectantur Abramus, Tiri-
 nus, etc.*
 Anno regni sui 6, ad Salaminam Xerxes
 vincitur die 23 septembris. 480
*Xerxes anno 12 regni sui novam in Græcos
 expeditionem parat juxta Petavium, et
 Artaxerxem in regiam potestatem coo-
 ptat.* 473
*Xerxem ex adverso tunc ab Artabano nece-
 tum ponunt Usseus, Lancelotus, Bossue-
 tius.*
*Artaxerxes Longimanus secundum Petavium
 simul cum patre jam à septem annis re-
 gnans, concedit Esdræ decretum quod 11
 Esdr. 7, exhibetur.* 466
*Xerxes post viginti annos regni completos
 ab Artabano jugulatur.* 465
 Annus 7 Artaxerxis Longimani à morte pa-
 tris juxta Turneminiu concurrens cum
 anno ejus vigesimo à primâ coronatione. 460
*Hoc anno Esdras et Nehemias, ex illo au-
 ctore, mense Nisan Jerosolyma adveniunt,
 murorumque ædificatio completur die 25
 mensis Elul, à quo die currunt 70 hebdo-
 mades.*
*Tirinus, Abramus, etc., Nehemiæ adventum
 eidem anno attribuant, duobus scilicet an-
 nis, ex eorum opinione, antequàm veniret
 Esdras.*
 Artaxerxis Longimani annus à morte pa-
 tris verè septimus, 458

*Capellus uterque, Pridæus, Agrolus, Cor-
 nelius à Lapide, etc., hoc anno 7 Artaxerxis censent decretum Esdræ concessum,
 atque ab hoc decreto septimanas accersunt.*
*Incipit annus Artaxerxis Longimani à morte
 Xerxi illata vigesimus juxta Usseus. Lan-
 cel. Bossuet. qui inde ducunt 70 hebdo-
 mades.* 454
*Annus Artaxerxis Longimani ab ejus primâ
 coronatione juxta Petavium vigesimus de-
 finit. Hoc anno secundum eundem Petavium
 facultas muros suscitandi Nehemiæ
 concessa et hebdomades fluere incipiunt.* 453
 Annus verè vigesimus Artaxerxis Longi-
 mani à morte patris. 445
*Isto anno Artaxerxis vigesimo desinente Se-
 ptimanæ annorum lunarium ex Africano
 inchoantur, Nehemiæ factâ mœnium eri-
 gendorum potestate.* 444
*Ejusdem anni vigesimi finem, et rescriptum
 Nehemiæ datum alligat Huetius eidem anno
 quo etiam hebdomadibus initium assignat.*
 Bellum Peloponnesiacum incipit 7 anno
 ante Artaxerxis obitum. 431
 Moritur Artaxerxes Longimanus, succedit
 Xerxes secundus. 425
 Xerxes II cùm uno anno regnâset, interfici-
 citur à Sogdiano. Hic imperium tenet 7
 mensibus. 424
 Interempto Sogdiano, regnum auspicatur
 Darius Nothus quem Scaliger interpreta-
 tur Dariu libri 1 Esdr. cap. 5 et 6. 423
 Darius Nothus moritur post annos re-
 gni 19 succedit Artaxerxes Memoriosus,
 qui Scaligero fuit Artaxerxes Nehemiæ. 404
 Artaxerxi Mnemoni succedit Ochus. 360
 Ochus à Bagoâ occiditur; succedit Arsēs. 358
 Arsen idem Bagoas interficit, ac ipsi Da-
 rium Codomannu substituit. 356
 Jaddus Judæorum pontifex Alexandrum
 Magnum excipit. 352
 Darius ab Alexandro ad Arbella vincitur
 mense Septembri. Definit imperium Per-
 sicum. 331
 Initium Æræ Græcorum seu Seleucida-
 rum, quam scriptor primi libri Macha-
 bæorum à Nisan, posterioris verò au-
 ctor à Tisri præcedente inchoant. 312
 Antiochus Epiphanes regnare incipit;
 Oniam summum pontificem exauctorat,
 et impium Jasonem ejus loco sufficit. 175
 Oniæ mors. 171
 Anno quinto regni sui Antiochus Jerusa-
 lem ingressus templum violat ac effun-

dit furorem in Judæos.	170
Apollonius in Judæam ab Antiocho mittitur, legi addictos confodit, ac civitatem incendit. Matathias in montes secedit,	168
Anno regni sui 8, Antiochus gentes sibi subjectas jubet eosdem cum Græcis cultus adhibere.	167
Matathias moritur; succedit Judas Machabæus.	166
Templum repurgatur die 25 mensis Casleu.	165
Antiochus moritur.	164
<i>Ad impii hujus regis tempora septimanas et vaticinium Danielis temerè à quibusdam Christianis referri, suprâ declaratum est.</i>	
Initia Hircani Assamonæorum ultimi.	70
Pompeius obsidione Jerusalem capit.	63
Annus primus correctionis Julianæ.	45
Herodes, à Romanis rex Judæorum jam tribus annis antea renuntiatus, Jerosolymas armis occupat.	37
Pugna Actiaca.	31
Primus Augusti monarchiæ annus. Herodes occidit Hircanum.	30
Christus dominus nascitur die 25 mensis Decembris.	5
Moritur Herodes.	4

Anni Æræ vulgaris.

Æræ vulgaris initium mense Januario.	1
Baptizatur Christus die 6 Januarii.	30
Patitur juxta Usserium, Pridæum, etc., atque accuratiores, ut videtur, calculos.	33
Annus Neronis 12, quo cœptum est bellum Judaicum.	66
Jerusalem et templum à Tito dissipantur.	70
Judæos duce Barchohebâ rebelles Adrianus exterminat.	131

Utrum ab aliquâ Prophetiâ ducendum sit septimanarum Danielis initium. — Qui ex recentioribus (ii autem paucissimi sunt) septuaginta hebdomadum exordia alicui Prophetiæ annectunt, ad aliud quàm ad Messiam, uti paragrafo præcedenti dictum est, vaticinium Danielis præposterè detorquent; de his proinde impræsentiarum non agimus. Ex veteribus autem Hippolytus senior septimanas videtur ab aliquâ Prophetiâ deduxisse, quippe cùm, referente S. Hier. in caput 9 Danielis, « Septem hebdomadas ante populi reditum supputaverit, et sexaginta duas post reditum usque ad nativitatem Christi. Quarum tempora non congruunt, » pergit S. doctor. Hebdomadas septem Cyro etiam terminat Petrus Blesensis loco suprâ citato pag. 307; Tertullianus autem

adversus Judæos cap. 8, gravius adhuc in chronologiam peccat. Ab anno Darii 1°, seu ab ipsâ, de quâ agimus, Danielis Prophetiâ hebdomadas auspicatur: eas in ultimo Jerosolymorum excidio desinere statuit; 62 cum dimidiâ, Christi nativitate terminat; reliquas septem cum dimidiâ alterâ à Christo nato ad ultimam subversionem computat. Ubi inter varia contra temporum rationem errata, illud præcipuum est, quòd Darius Medus qui ante Cyrum Babylone regnavit, et cujus anno 1°, visio Danielis alliganda est, Tertulliano fuerit Darius Nothus, plus quàm annis centum posterior Cyro.

CONCLUSIO. Septuaginta hebdomadum initium ab aliquâ Prophetiâ non potest repeti. Probatur 1°, quia de restaurandâ Jerusalem, novem, ut supra dicebamus, Prophetiæ variis temporibus editæ sunt. Atqui nulla earum ad hanc reædificationem præ cæteris habet specialem respectum. Non magis ergo ab unâ quàm ab alterâ, ac proinde à nullâ sumi potest initium septimanarum Danielis. Nisi enim ab aliquo fixo et determinato illud initium repetatur jam non obscura tantùm, sed ambigua omninò et incerta erunt verba Angeli; ergo.

Probatur 2°, quia à quâcumque ejusmodi Prophetiâ ducantur 70 hebdomades, non constabunt calculi. Etenim ejusmodi vaticiniorum ultimum emissum, est oraculum Danielis. Atqui ab oraculo Danielis usque ad Christum, quo illas terminari septimanas parag. præcedenti ostendimus, certum est longè plures quàm 70 hebdomades effluxisse. Nam visio, de quâ agimus, Danieli obtigit anno 1° Darii Medi, ac proinde saltem annis duobus antequàm Cyrus Babylone regnaret. Atqui annus 1 Cyri Babylone imperantis, ut modò ostendemus, alligandus est anno 536 ante æram vulgarem. Obtigit igitur Danieli visio anno 538 ante eandem æram, cui si addantur ad minimum 29 anni illius æræ usque ad Christi mortem, summa erit 567 annorum; proindeque, etc.

An ab edicto Cyri septuaginta hebdomades computandæ sint? — In Cyri edicto septimanarum Danielis initium ponit Eusebius Cæsariensis in secundâ, quam affert lib. 8 Demonstr. evang., harumce hebdomadum interpretatione. Juxta ejusmodi expositionem, quam suprâ jam rejecimus, quamque Eusebius videtur minùs probabilem judicasse, 69 hebdomades initiis Hircani Assamonæorum ultimi desinunt; septuagesima verò à cæteris avulsa ad Christi mortem et prædicationem refertur. Idem septuaginta

hebdomadibus principium aliquando etiam assignant Judæi. Quidam Catholici, atque inter Protestantes Calvinus, Prælect. in Daniele, Lightfoot in Chronico, et alii, de 70 hebdomadam exordio similia statuunt, etsi de Christo utramque vaticinii partem interpretentur; nonnullique eorum, ut huic suo systemati temporum rationes adaptent, doctis omnibus probatam certisque innixam argumentis chronologiam subvertunt.

Conclusio. A Cyri edicto non inchoandæ 70 hebdomades. Probatur 1° ex vaticinii verbis. Nam septuaginta hebdomadam initium repetendum non est ab edicto, in quo Jerosolymorum extruendorum nulla mentio fit, quo obtento Judæi solum templum ædificare aggressi sunt; maximè si præsto sit alter sermo expressus de restaurandis Jerusalem mœnibus. Enimverò Angelus initium septimanarum præstituit sermonem de Jerusalem denuò ædificandâ ac cingendâ mœnibus. Scito ergo, inquit Angelus, et animadvertite : *Ab exitu sermonis ut iterum ædificetur Jerusalem, etc.* Quæ statim pse interpretans, addit : *Et rursùm ædificabitur platea et muri in angustia temporum.* Atqui 1° in edicto Cyri nulla fit mentio Jerusalem reædificandæ. Quod constat ex ipsis edicti verbis Esdr. cap. 1 et 6; scilicet domum Dei Jerosolymis extrui Cyrus præcipit, ædificii magnitudinem et materiam præscribit; sumptus de domo regis ad id operis administrari jubet; at de Jerusalem iterum extruendâ, ne verbum quidem. 2° Obtento Cyri edicto Judæi solum templum ædificare aggressi sunt. Id patet ex lib. 1 Esdr. Nam cap. 1, v. 5, cap. 2, v. 68 et cap. 3 integro, à Judæis ex Cyri facultate gesta commemorans Esdras solius templi facit mentionem. Pariter cap. 4, v. 24, de solâ domo Dei loquitur, dum narrat opus, quod Cyrus permiserat, adversariorum malitiâ intermissum fuisse. Et cap. 5, v. 2, ait Judæos vaticiniis Aggæi et Zachariæ excitatos cœpisse *ædificare templum Dei*. Versu autem 3, Judæorum adversarii sic eos alloquuntur : *Quis dedit vobis consilium, ut domum hanc ædificaretis et muros ejus instauraretis?* Nihil habent de restauratione mœnium; ergo. Idem colligitur ex Aggæo Prophetâ, qui cap. 1, v. 4, redarguens desidiam Judæorum, de solo templo verba facit. Denique illud liquet, quia cap. 1 et 2 libri 2 Esdræ, mœnia Jerusalem anno 20 Artaxerxis Longimani adhuc Jacobant diruta; ea verò fuisse à Judæis ex Cyri edicto ante erecta, et deinde ab eorum adversariis denuò combusta et eversa, gratis et falso

fingeretur, non modò silentibus Scripturis et Josepho, sed et multa referentibus quæ cum illâ suppositione nullo pacto stare possunt. Confer quæ de urbis eversione leguntur lib. 4 Reg. cap. 25, et Jerem. cap. 39 et 52, cum iis quæ de mœnium statu referuntur cap. 1, 2 et 4 libri 2 Esdræ, planè intelliges ruinam eandem à Nabuzardam effectam, usque ad Nehemiam perseverasse. Adde Eccli. 49, v. 15, hanc laudem Nehemiæ tribui, quòd muros Jerusalem eversos erexerit; et Africanum, referentibus Eusebio Demonstr. evang. lib. 8, et S. Hieronymo in cap. 45 Isaiæ, testari, ante annum 20 Artaxerxis Longimani non fuisse factam Judæis à Persarum regibus, facultatem muros Jerusalem suscitandi. Quid causæ fuerit cur è tot Persarum regibus nullus ante Longimanum urbis extruendæ potestatem Judæis concesserit, conjici potest ex his apud Esdram lib. 4, verbis Artaxerxis, qui Cambyses vel Smerdis dicendus est : « Accusatio, inquit ad Syriæ satrapas Judæorum hostes respondens, v. 18 et seq., quam misistis ad nos, manifestè lecta est coram me, et à me præceptum est, et recensuerunt, inveneruntque quoniam civitas illa (Jerusalem) à diebus antiquis adversus reges rebellat, et seditione et prælia concitantur in eâ. Nam et reges fortissimi fuerunt in Jerusalem, qui et dominati sunt omni regioni, quæ trans fluvium est, » etc. 3° Præsto est sermo expressus de urbe et mœnibus Jerosolymorum instaurandis, nempe litteræ ab Artaxerxe Longimano datæ Nehemiæ, ut refer. 2 Esdr. 2 à quibus 70 hebdomadas posse inchoari, inferius ostendetur; ergo.

Probatur 2°, quia accurata temporum ratio non sinit à Cyri edicto incipere septuaginta hebdomades. Etenim qui in vaticinio nomine *Christi ducis et Christi occidendi* designatur, ipse est Christus Dominus, ut paragr. 1 ostensum est; proindeque ab initio hebdomadam ad tempus quo Christus ducis munere fungicœpit, id est, usque ad ejus baptismum, computandæ sunt 69 hebdomades, seu anni 483. Sed constat decretum Cyri tardiùs anno ante æram vulgarem 536 datum non fuisse. Scribit enim Africanus apud Eusebium lib. 10 Præpar. Evang. cap. 10, multorumque historicorum testimonio confirmat Cyri regnum in Perside cœptum anno 1 Olympiadis 55; certum est pariter Cyrum 50 annis regnasse. Porro canon Ptolemaicus Cyrum inter Babylonios reges recensens, annos ei dat novem, numeratis scilicet duobus annis quibus regnavit Darius Medus,

ut ex eo conjicitur quòd hunc Darium non nominet, et quòd septem annis tantum Cyrus Babylone regnaverit ex Xenophonte. Itaque si ex 50 annis quibus totum tempus regni Cyri continetur, detrahantur septem, primus annus Cyri Babylone imperantis, quo edictum illud latum est, incidet in 24 à primi sui regni initio numeratum, ac proinde in primum Olympiadis 61, qui ante æram vulgarem est 536. Jam verò baptismus Christi ante annum 27 æræ vulgaris collocari non potest. Ergo ab edicto Cyri usque ad Christi baptismum ejusque prædicationis initium effluxere saltem 563 anni. Deviant igitur 80 annis à verâ temporum ratione qui à Cyro Danielis septimanas ducunt. Nec omnem in calculis chronologicis aberrationem vitat Eusebius, dum 69 hebdomadas longè ante Christum terminat, et septuagesimam à cæteris avelit, plurimumque interapedine annorum separat. Ne fiat enim ejusmodi separatio istud obstat, hebdomadas scilicet in summam unam ab Angelo colligi; partes verò temporis quæ in summam colliguntur, deinceps fluant necesse est, nec à se invicem separatæ et dissitæ poni possunt.

Dices. Isaias, cap. 44, v. 28, Jerusalem à Cyro ædificandam prædicit, his verbis: « Qui dico Cyro: Pastor meus es, et omnem voluntatem meam complebis. Qui dico Jerusalem: ædificaberis. » Et cap. sequenti, v. 13: « Ego suscitavi eum (Cyrum) ad justitiam, et omnes vias ejus dirigam; ipse ædificabit civitatem meam, et captivitatem meam dimittet. » Josephus autem lib. 11 Antiq. cap. 1, n. 2 et 3, conceptis verbis affirmat facultatem reædificandorum templi et urbis à Cyro Judæis datam fuisse. His testimoniis nixus doctissimus Petavius existimavit ejusmodi facultatem in decreto Cyri fuisse implicite inclusam; etsi tamen ab anno 20 Artaxerxis 70 hebdomades computet.

Resp. 1º ad loca Scripturæ, S. Hieronymum ad citatum v. 13, cap. 45, Isaiæ, observare sub Nehemiâ, non sub Cyro, Jerusalem ædificatam fuisse; atque ex eo hunc locum non de Cyro exponendum esse, sed nobiliori sensu ad Christum, qui ibid. v. 46, *Verè Deus absconditus* dicitur, esse litteraliter applicandum.

Resp. 2º Si ad litteram de Cyro ea explicari placeat, non ipsa materialis urbis extructio quantum ad mœnia, propugnacula et plateas his vaticiniis præsignificabitur; civilis tantum iis designatur in ejusdem civitatis nomen et politiam cœadunatio, una cum domorum privatorum ædificatione; quæ duo à Cyro permissa

censenda sunt dum populum liberum dimisit, nec enim eos coegit sub dio habitare, aut à propriis legibus abstinere. Eodem sensu exponendus est Josephus.

Darius ille, qui 1 Esdr. 4 templum perfici edixit, estne Darius Nothus à cujus anno 2 septimanae putandæ sint?— Sulpitius Severus, lib. 2 Hist. Eccles. ab anno 2 Darii Nothi, qui tertius post Artaxerxem Longimanum regnavit, septuaginta hebdomadas auspicatur, ratus Darium, à quo 1 Esdr. 4 statutum est ut domus Domini absolveretur, esse Darium Nothum; Artaxerxem verò qui anno regni sui 7 decretum Esdræ dedit, quique postea mœnium erigendorum facultatem tribuit Nehemiæ, non esse Longimanum, sed Memoriosum, Darii Nothi successorem. Idem censuere Julius Scaliger in Prolegom. et lib. 6 de emend. temporum, Drusius in Sulpitium, et alii. Hanc autem sententiam præ cæteris excoluit Julius Scaliger, cujus opinio nunc ferè obsoleta quidem, sed multis olim probata et auctoris sui nomine etiamnum celebris, sic se habet (1). Tria existimat data fuisse edicta de Jerusalem instaurandâ, primum Cyri, quo soluta captivitas, secundum Darii Nothi anno 2 ejus regni, tertium Artaxerxis Memoriosi anno ipsius 5; vult enim à quo tempore decretum istud concessum fuit Esdræ, usque ad ejus profectionem cum sociis anno regis septimo (1 Esdr. 7, v. 7) elapsum esse plus quàm annum integrum. Septuaginta hebdomadibus ab Angelo, initio Vaticinii numeratis censet addendum illud hebdomadis dimidium quo v. 27 sacrificium abolendum prædicitur; non enim patitur illud dimidium referri ad hebdomadam singularem, cujus proximè mentio facta est. Observat igitur hanc esse hebdomadam Danielis partitionem: *dimidia, una septem, sexaginta duæ*, quarum summa anno 495 1/2.

Jam verò his verbis Angeli: *Septuaginta hebdomades abbreviatæ sunt super populum tuum*, etc., opinatur manifestissimè indicari septuaginta hebdomadas in ultimo excidio Jerosolymitano desinere. Quapropter, ut calculi constent, eas auspicatur ab anno 2 Darii Nothi, quem, ut diximus, tulisse putat edictum de Jerusalem ædificandâ, perducitque ad annum Neronis 12, quo Judæi bellum crepare et à Romanis apertè desciscere cœperunt.

Deinde hebdomadam partitionem resumit. Hebdomadam dimidiatam, quæ juxta ipsum

(1) Scal. lib. 6 de emend. temp. in Epilogismo hebdom. Danielis pag. 904 et seq. edit. Colon. Allobr. 1629.

excurrit supra summam annorum 490, ab hoc duodecimo anno Neroniano ad excidium templi computat. Hebdomada autem *illa quæ confirmabit fœdus*, et dupliciter, inquit, accipi potest; et aut enim integra, aut divisa, non quidem et tempore, sed causâ. Integra, post passionem, et divisa, dimidium ante, alterum dimidium, post et passionem. Hebdomadas septem ab eadem epochâ ac 70 hebdomadas, nempe ab anno 2 Darii Nothi inchoat, atque ad annum 54 Artaxerxis Mnemonis eas ducit; cæterum quo illæ pertineant, fassus à se nesciri. Tandem sexaginta duas septimanas à Passione Domini, quâ terminantur, ad annum 5 ejusdem Artaxerxis Memoriosi retextit, atque ideo edictum Esdræ datum 1 Esdr. 7, huic ipsi anno 5 annectendum judicat.

CONCLUSIO. Scaligeri interpretatio falsis fundamentis nititur, textumque Vaticinii obscurat et perturbat. 1° Falsis fundamentis nititur. Nam duo sunt Scaligeriani systematis fundamenta. Primum, decreta Darii et Artaxerxis, quæ lib. 1 Esdræ cap. 6 et 7 leguntur, esse de iterum ædificandâ Jerusalem; quod iisdem argumentum falsum commonstratur, quibus mox ostensum est, edictum Cyri ad solius templi extructionem spectasse. Alterum Scaligeri fundamentum est Darium et Artaxerxem Darii successorem, è quibus eadem decreta edita sunt, esse Darium Nothum et Artaxerxem Mnemona. Atqui istud falsum est. (1) Nam præterquam quòd Josepho, S. Clementi Alexandrino, Eusebio, S. Hieronymo, cunctisque veteribus, si Sulpitium excipias, necnon doctissimis inter recentiores chronologis, quibus et Judæi concinunt, illi Darius et Artaxerxes sunt Hystaspides et Longimanus; conjectura Scaligeri argumentis ex S. Scripturâ ductis apertè refellitur. Esdras, lib. 1, cap. 4 et 5, describens quo in statu fuerit templum Jerosolymitanum sub Persarum regibus, ab eo tempore quo ipsius extruendi facultas à Cyro data est, usque ad illud quo absolutum fuit, quatuor tantum reges continuâ recenset serie, scilicet Cyrum, sub quo jacta sunt fundamenta templi, Assuerum et Artaxerxem, sub quibus duobus opus intermissum est, et Darium, quo regnante resumptum est et absolutum; proindeque Darius ille quartus est à Cyro Persarum rex. Sed rex Persarum quartus à Cyro est Darius Hystaspides, non Darius Nothus, qui nonnisi nonum inter Persarum reges locum obtinet. Ergo Darius quo regnante templum absolutum est, non

(1) Vide Natal. Alexandrum. Dissert. 5 in sextam mundi ætatem.

est Darius Nothus, nec proinde Artaxerxes, qui ipsi successit; potest esse Artaxerxes Mnemon.

Deinde, sub eo Dario vivebant adhuc et populo præerant Zorobabel et Josue sacerdos summus, 1 Esdr. 5, v. 1, 2, etc. At sub Dario Notho superstites esse non poterant Zorobabel et Josue. Namque iidem sub Cyro Judæorum in patriam remeantium duces fuerant, 1 Esdr. 2, v. 2. Porro inter annum primum Cyri, et secundum Darii Nothi intercedunt juxta accuratissimos calculos anni 114, quibus si addantur anni quos jam excesserant, cum tanti negotii duces facti sunt, et anni quibus edicto Darii superfuerunt, conficitur eos vivendo plus quàm 150 annos explevisse. Quis verò existimet utrumque simul tamdiu imperasse et vixisse eâ ætate, quâ hominum vita jam pridem imminuta erat?

Præterea, si libri 2 Esdræ caput 10, in quo recensentur qui, urbe instauratâ, fœdus cum Domino sanxerunt, conferatur cum cap. 12 ejusdem libri, ubi eorum, qui cum Zorobabele erant reversi, nomina appellantur,prehenduntur plus quàm 20 homines, ex iis qui cum Zorobabele redierant, post annum 20 artaxerxis fœderi subscripsisse. Atqui istud impossibile esset, si ille Artaxerxes esset Memoriosus. Nam ab anno 1° Cyri ad vigesimum Artaxerxis Mnemonis sunt anni 152, proindeque omnes illi ad 180 circiter annos vitam perduxissent.

Denique cum templum, Dario de quo agimus imperante, construeretur, nonnulli, teste Aggæo Prophetâ, cap. 2, v. 4, tunc superstites existebant, à quibus conspectum fuerat templum prius quod Nabuchodonosor combusserat. Ergo Darius ille non est Darius Nothus. Nam priorem templi ruinam inter et 2 Darii Nothi annum intercedunt anni circiter 166, proindeque si de Dario Notho ibi sermo fieret, illi plus quàm annos circiter 180 vixissent, quod nemo sibi persuadeat. Reponit Scaliger Aggæi verba posse in hunc sensum exponi: *O si quis vestram prioris domus gloriam vidisset, eam cum istâ contendens, quàm nihili hanc faceret!* vel id prodigii in populi gratiam factum à Deo tunc fuisse. At priorem explicationem non ferunt verba textûs primigenii, neque omnium versionum. Sermonem dirigit Aggæus ad eos qui prius templum conspexerant, quique secundum illi longè inferius futurum præsentientes in magno dolore versabantur. Eandem ob causam tempore Cyri jam multos acriter doluisse narrat Esdras lib. 1, cap. 13, v. 12. Quantum ad miraculum ad quod

Scaliger confugit, bellè, ait Huetius Demonstr. evang. prop. 9, cap. 8, n. 7, ipsum, *cum*..... *imaginariis miraculis causam suam fulcire conatur, tum verò maximè ejus infirmitatem prodere.*

Addunt aliqui Esdram natum fuisse ante ever-sam à Nabuchodonosore Jerosolymam; dicitur enim 1 Esdr. 7, v. 1, filius Saraïæ pontificis; occisus est autem in Reblatâ pontifex Saraïas, 4 Reg. 25, v. 18, et seq., *cum* capta est Jerusalem. Atqui à primâ Jerosolymorum clade ad annum 7 Artaxerxis Memoriosi plus quàm 190 anni elapsi sunt; in vivis autem adhuc superstes erat Esdras post annum Artaxerxis 20, lib. 2, Esdr. 8, v. 4 et seq.; vixisset ergo Esdras (quod incredibile est) plus quàm 200 annis, posito Scaligeri systemate. Sed dissimulandum non est posse non improbabiler responderi Esdram dictum esse Saraïæ filium, *cum* esset tantum ejus nepos, juxta non insolitam apud Hebræos vocis *filii* acceptionem.

2°. Vaticinii textum perturbat Scaligeri hypothesis. Nam 1°, *cum* Propheta initio vaticinii constitutas dicat 70 hebdomadas, et postea de septem, de sexaginta duabus, et de unâ loquatur, quarum summa sit 70, nonne patet statim in summam unam esse collectas easdem septimanas quæ deinde in partes distribuuntur? Si igitur partes alio modo disponantur quàm summa, ita ut non fluant continenter, uti Scaliger contendit, vaticinium non exponitur, sed perturbatur. 2° Dicitur in Prophetiâ: *Ab exitu sermonis,.... hebdomades septem et hebdomades sexaginta duæ erunt*; ergo à sermonis exitu ad Christum usque putandæ sunt hebdomades novem et sexaginta, nec fas est septem hebdomades ab anno 2 Darii Nothi, sexaginta duas verò ab anno 5 Artaxerxis Mnemonis computare, ita ut nondum effluxâ parte mediâ septem hebdomadum jam sexaginta duæ aliæ elabi incœperint. 3° Eadem verba non possunt habere hunc sensum: *Ab exitu sermonis, etc.*, usque ad Christum ducem, sexaginta duæ erunt hebdomades. Nam quò pertinerent, quidve significarent hebdomades septem? Atqui tamen in sententiâ Scaligeri, à sermonis exitu ad Christum septimanas duntaxat 62 computantis, illa Prophetiæ pars hocce sensu esset reddenda; ergo, etc.

SOLVUNTUR OBJECTIONES. — Objicies 1°, cum Scaligero. Ex cap. 4 et 6, lib. 1 Esd. colligere est Darium sub quo templum absolutum est, esse Darium Nothum. Nam cap. 4, v. 5 et seq., sic habetur: *Conduxerunt autem adversus eos (Judæos) conciliatores, ut destruerent*

consilium eorum omnibus diebus Cyri regis Persarum, et usque ad regnum Darii regis Persarum. In regno autem Assueri, in principio regni ejus, scripserunt accusationem adversus habitatores Judæ et Jerusalem. Et in diebus Artaxerxis scripsit Beslam Mithridates et Tabeel et reliqui qui erant in consilio eorum, ad Artaxerxem regem Persarum. » Et v. 24, versùs finem capitis: *Tunc intermissum est opus Domini in Jerusalem, et non fiebat usque ad annum secundum Darii regis Persarum.* » Denique cap. 6, v. 14 et 15: *Seniores autem Judæorum ædificabant et prosperabantur, juxta prophetiam Aggæi Prophetæ et Zachariæ filii Addo, et ædificaverunt et construxerunt jubente Deo Israel, et jubente Cyro et Dario, et Artaxerxe, regibus Persarum, et compleverunt domum Dei istam, usque ad diem tertium mensis Adar, qui est annus 6 regni Darii regis.* » Ibi vult Scaliger recenseri Persarum reges ordine suo, nempe Cyrum, Darium, Assuerum, Artaxerxem, Darium, Artaxerxem, atque concludit Darium hunc secundum, cujus imperii anno 6 absolutum est templum, esse Darium Nothum.

Nego locis allatis totidem Persarum reges ordine suo recenseri, quot nomina repetuntur et exprimuntur. Nam 1°, juxta Scaligerum Cyro successit Cambyses, qui tamen, si ejus interpretationem sequamur, ab Esdrâ erit prætermisus; 2° Darius bis terve iis in locis nominatus, unus idemque est Darius Hystaspis. Assuerus, quem tertio loco ponit Scaliger, est Cyrus vel filius ejus Cambyses. Artaxerxes quarto loco positus, est aut Cambyses, aut magus Oropastes, qui usurpato Smerdis nomine, septem mensibus, mortuo Cambyse regnavit. Denique Artaxerxes qui ultimò collocatur, est Xerxes filius Darii Hystaspidis, vel potius Artaxerxes Longimanus, ibi per occupationem nominatus; adeò ut is sit ordo regum: Cyrus, Cambyses, Smerdis, Darius Hystaspis, et, omisso Xerxe, qui de templo nihil statuit, Artaxerxes Longimanus; quo reverà ordine reges Persarum apud auctores profanos numerantur. Atque hanc interpretationem Esdras apertè insinuat. Dùm enim dicitur citato cap. 4: *Conduxerunt autem adversus eos consiliatores, ut destruerent consilium eorum omnibus diebus Cyri regis Persarum, et usque ad regnum Darii regis Persarum*; nonne ex ipsâ omissione Cambysis et Smerdis regum intermediarum, patet certum quoddam tempus de-

finiri, intra quod adversarii Judæorum conati sunt eorum consilium destruere? Cùm ergo Darius ille sit Hystaspides, juxta ipsum Scaligerum, consequens est durasse tempus integrum tribulationis omnibus diebus Cyri, Cambysis, Smerdis, et usque ad annum secundum Darii Hystaspidis. Quocirca cùm auctor sacer subdit continuò: *In regno autem Assueri*, etc., planè intelligendus est gestorum toto illo tempore à Judæorum hostibus narrationem resumere. Ubi observa particulam hebræam quæ voce *autem* hic redditur, æqualiter reddi posse per *nam*, *etenim*, etc., ut nemo in illo vocabulo difficultatem quærat. Sensus ergo is est: A Cyro ad Darium usque Hystaspidem, Judæorum hostes ædificationem templi impedire moliti sunt; nam scripserunt ad Assuerum, id est Cyrum, vel potius Cambysem, et deinde ad Artaxerxem, seu Cambysem, aut Smerdim, etc., quæ expositio maximè confirmatur his verbis, quæ objecta sunt, et quibus narratio versùs capitis finem clauditur: *Tunc intermissum est opus Domini Jerusalem, et non fiebat usque ad annum 2 Darii regis Persarum*. Cœcutiat enim oportet, qui non viderit hæc præcedentibus modò relatis: *Conduxerunt*, etc., *ut destruerent consilium eorum omnibus diebus Cyri... usque ad regnum Darii*, consonare, eundemque in utroque loco Darium regem Persarum designari. In nostrâ itaque sententiâ cuncta planè cohærent; Scriptura, ut sonat, exponitur, atque cum historiâ et chronologiâ profanâ eximiè conciliatur; ergo.

At, inquit Scaliger, si Darius qui anno secundo regni sui fecit templi ædificandi potestatem, sit Hystaspidis filius, quis est igitur ille Artaxerxes Darii successor, quo jubente templum constructum dicitur v. 14 jam cit. cap. 6, lib. 1 Esdræ?

Respondeo eum esse Artaxerxem Longimanum, ibi ab Esdrâ per occupationem nominatum propter decretum quod capite sequenti refertur anno regni sui septimo dedisse, quodque in templi gloriam et ornamentum maximè conduxit. Nempe Persarum reges de Judæis benè meritos templique extructionis ac splendoris studiosos recensens Esdras, noluit Artaxerxem, à quo tot tantaque beneficia impetrârat, omittere. Neque obstat quòd Longimanus Dario immediatè non successerit; cùm eò loci nominentur tantùm reges erga templum benefici; unde ibidem statim post Cyrum, omisso Cambyse et Smerdi, nominatur Darius.

Urget Scaliger. Darius cap. 6, lib. 1, Esdræ jussit ut in scriniis publicis inquiretur edictum ibid. p. 564 à Cyro latum in Judæorum gratiam; sed Darius Hystaspis illâ non indigisset inquisitione. Nam ab edicto Cyri ad annum secundum Darii Hystaspidis anni solummodò 16 computantur: illius ergo edicti haud dubiè meminisset Darius Hystaspis; meminissent etiam quàm plurimi ejus ministri et aulici; ergo.

Respondeo, potuisse inquiri ejusmodi edictum, non præcisè ut aliquod à Cyro in Judæorum gratiam latum cognosceretur, sed ut factæ ab illo rege concessionis conditiones, cunctaque edicti ad quod Judæi provocabant capita innotescerent, nec ullus Chutæis disputandi relinqueretur locus. Cæterùm, teste Herodoto, lib. 1 cap. 209, annos tantùm viginti Darius natus erat, cùm fato functus est Cyrus; proinde annum 14 non excesserat Darius cùm edictum latum est; Cambyses autem Cyri successor juxta eundem Herodotum lib. 3, cap. 35, plurimos patris ministros crudeliter interfecerat. Nihil ergo mirum si anno secundo Darii Hystaspidis accurata non superfuerit memoria hujuscemodi Cyri edicti, quod plerique non curabant.

Instat ultimò. Darius inter duos Artaxerxes positus, alius esse non potest quàm Darius Nothus, qui successit Artaxerxi Longimano, et ante Artaxerxem Memoriosum regnavit. Atqui Darius quo regnante templum ad culmen perductum est, inter duos Artaxerxes ab Esdrâ collocatur. Confer secum invicem lib. 1 Esdræ cap. 4, à v. 7 usque ad finem, et cap. 5 et 6 integra, et cap. 7, v. 1; ergo.

1º Nego majorem. Nam Artaxerxi Longimano successit Xerxes secundus, Xerxi Sogdianus quem Darius Nothus excepit. Ita Diod. lib. 12. Paucis quidem mensibus regnavère Sogdianus et Xerxes; sed ut falsi redarguatur major, eos sufficit regnasse. 2º Distinguo minorem. Ponitur ab Esdrâ inter duos Artaxerxes; sed vox *Artaxerxes* ibi est nomen commune omnibus Persarum regibus, concedo; est nomen proprium antecessoris et successoris Darii, nego. Nomen *Artaxerxes*, etsi quibusdam Persarum regibus specialiter attributum, ut et nomen *Assueri*, communes videntur fuisse omnibus Persarum regibus appellationes; haud secus ac *Pharao*, et postea *Ptolomæus*, apud Ægyptios, et *Cæsar* apud Romanos. *Artaxerxes* persicum nomen est, quod ex Herodoto lib. 5, cap. 98, magnum bellatorem sonat; *Assuerus*

verò est appellatio chaldaica, et significat *magnum caput*. Hinc apud Esdram locis objectis mentio fit *Assueri*, cum tamen apud scriptores profanos nullus rex Persarum hoc modo nuncupetur. Hinc qui in Vulgatâ libri Esther versione *Assuerus* nominatur, in versione græcâ et apud Josephum appellatur Artaxerxes? Nec mirum videatur in sacris scripturis aliquando non eodem nomine reges externos donari, quo apud historiam profanam designantur. Nam neque in ejusmodi appellationibus tribuendis unanimes sunt ipsi auctores profani. Scilicet multitudo nominum quibus reges Orientis solebant insigniri, ac præsertim mos unicuique populo sollemnis, ut proprii idiomatis indoli nuncupationes exterorum accommodaret, hanc confusionem et varietatem necessariò parere debuerunt.

Obj. 2^o cum eodem. Zach. 1, v. 12, hæc leguntur: « Respondit Angelus Domini, et dixit: Domine exercituum, usquequò non miserereberis Jerusalem, et urbium Juda, quibus iratus es? iste jam septuagesimus annus est. » Ex quibus sic argumentari licet: Septuagesimus ille annus est annus secundus Darii qui edictum Cyri confirmavit, ut ex eodem Zach. 1, v. 1, manifestum est. Atqui ille annus septuagesimus non potest esse secundus Darii Hystaspidis. Vel enim anni 70 ducerentur ab initio captivitatis Babylonicæ, vel ab eâ solutâ, vel ab insigni alio aliquò eventu. At ab initio captivitatis ad secundum Darii Hystaspidis annum plures fluxerunt quàm 70 anni; à solutâ verò captivitate pauciores, nempe 17 tantum; tandem ante hunc annum secundum Darii Hystaspidis nullus alius occurrit insignis eventus, à quo ejusmodi anni 70 duci possint; ergo Darius ille non est Hystaspides, sed Nothus, ad quem usque lapsi sunt anni 70 à tempore Xerxis, qui est Assuerus libri 1 Esdr. cap. 4, v. 6, et quò regnante Judæi accusari et vexari cœperunt. Neque illos 70 annos de annis captivitatis exponendos quis dicat. Nam Zacharias cap. 7, v. 5, ejusdem Darii anno 4, Dominum sic loquentem inducit: « Loquere ad omnem populum terræ, et ad sacerdotes, dicens: Cum jejunaretis et plangeretis in quinto et septimo per hos septuaginta annos, numquid jejunium jejunastis mihi? et cum comedistis et bibistis, » etc. Ubi 70 anni iidem sunt de quibus v. 12, cap. 1, sermo fit. Hic scilicet onissi sunt duo ob numeri rotunditatem. Cum igitur captivitatis tempore non celebrarentur jejunia, quippe quæ non potuissent à Judæo-

rum Ecclesiâ indici; cumque tunc intermissæ fuerint omnes solemnitates, ut de Scenopegiâ patet, cujus cultus erat oblivioni traditus, 2 Esdr. 8, v. 15, planum est 70 illos annos, quibus mense quinto et septimo jejunatum est, et festi dies celebrati, non esse annos captivitatis, sed post solutam captivitatem numerandos; proindeque in Dario Hystaspide non desinere; ergo.

Respondent Petavius et alii, Zachariam cap. 1, v. 12, esse intelligendum de 70 annis captivitatis jam præteritis, quasi dictum esset: Num, Domine, istud tempus est, quo promiseras omnia restauranda? nonne præterierunt 70 anni, quibus elapsis templum erat rursus ædificandum? attamen etiamnum opus intermissum manet. Enimverò 1^o, in hebræo et apud 70 Interpretes legitur *septuaginta anni*, non *septuagesimus annus*. Hæc autem numeri æqualitas et similitudo cum annis quibus captivitas perseveravit, de istis suadet sermonem haberi. Nimirum 70 anni captivitatis sæpè à Prophætis memorantur, atque apud populum recens erat ac altè infixâ horumce annorum recordatio; ubi igitur ejusdem annorum numeri Zacharias meminit, primum est tempus captivitatis intelligi. 2^o Zacharias cap. 1, vaticinabatur anno 2 Darii, et cap. 5, anno 4 ejusdem. In utroque tamen loco perinde computantur 70 anni, quamvis in posteriori numerandi fuissent 72, positâ Scaligeri hypothese. Neque id dicas factum propter numeri rotunditatem. Nam in iisdem cap. annus, menses et dies accuratè enumerat Propheta; quid ergo duos annos prætermisisset? 3^o Ab initio Xerxis à quo hos 70 annos Scaliger init, usque ad annum 2 Darii Nothi, computari nequeunt anni 70, sed ad summum 64 vel 65.

Ad confirm. reponit idem Petavius, apud Zachariam locis citatis nihil haberi de majorum solemnitatum celebratione, nec de jejuniis quæ juxta omnes ritus à lege præscriptos observarentur; nonnullas quidem majores solemnitates, Paschæ scilicet, Pentecostes, Scenopegiæ, extra Jerusalem celebrari non potuisse ob sacrificia in iis præscripta; verum aliter judicandum de aliis festis quæ certo loco non erant adstricta, ut et de jejuniis propter templi et urbis desolationem voluntariè assumptis. Certè quidem jejunavit in captivitate Daniel, jejunaverunt Mardocheus et Esther; quin et isti non modò festa et jejunia in Perside celebrârunt, sed Judæos omnes ad sollemnitate sortium *per singulas generationes in*

toto orbe celebrandam, Esther. 9, 28, astrinxerunt. Cæterum, ex v. 15, cap. 8, lib. 2 Esdræ perperam infert Scaliger Scenopægiæ cultum seu solemnem Tabernaculorum diem oblivioni captivitatis tempore traditum fuisse. Nihil hujusmodi eò loci expressum. Festum autem illud ac cæteras solemnitates lege præscriptas à populo in patriam reverso statim celebratas fuisse, disertè traditur lib. 1 Esdr. cap. 3, v. 4 et seq.

Respondeo insuper cum SS. Hier. et Aug. annum septuagesimum de quo Zach. cap. 1, v. 1, esse computandum ab obsidione Jerosolymorum quam urbis templique desolatio post duos annos subsequuta est; septuaginta autem annos quorum ibid. cap. 5, v. 7, mentio fit, duci debere ab ipsâ eversione urbis et templi. Nam jejunium mensis quinti et septimi, de quo sermo fit citato versu 7, cap. 5 Zachariæ, videtur observatum fuisse propter eversum templum mense quintâ, et propter reliquiarum populi dispersionem post interemptum Godoliam mense septimo; atque judæi etiamnum duplex illud jejunium iis de causis celebrant, ut et jejunium mensis quarti ob captam eo mense civitatem, et jejunium mensis decimi, quòd mense 10, Nabuchodonosor vallaverit Jerusalem, biennio ante destructionem templi. Itaque, cum jejunia in captivitate, ut modò ex Petavio dictum est, potuerint observari, cumque ejusmodi jejuniarum à Zachariâ memoratorum tempora in eventus illos aptissimè quadrent, naturaliter eò ducimur, ut ab illis eventibus ejusmodi annos 70 incipiamus. Ac reipsâ calculi planè his conveniunt. Nam templum destructum est mense 5 anni 11, Sedeciae, id est ante æram vulgarem 588. Eodem anno, mense 7, Godolias occisus est. Atqui ab anno 588 ante æram communem ad annum ante eandem æram 517, cui annus 4 Darii Hystaspidis respondet, computantur 70 anni; pariter annus 2 ejusdem Darii est septuagesimus ab anno Sedeciae nono quo Jerusalem à chaldæis vallari et obsideri cœpit. Ex quo patet locis Zachariæ objectis non infirmari, sed maxime stabiliri quæ de Dario Hystaspide statuimus.

Objicies 3°. Nehemias qui est auctor libri 2 Esdræ, loquitur cap. 12, v. 11 et 22, de Jeddoâ seu Jadduâ aut Jaddo, quem ait sub Dario Persarum reges sacerdotio functum; atqui Darius eò loci memoratus alius esse non potest quàm Darius Codomannus quem Alexander Magnus profligavit. Quippe refert Josephus, lib. 11 Antiq. cap. 8, n. 5, summum Judæorum sacerdotem Jaddum seu Jedduam Alexan-

dro Jerosolymas ingredienti obviam ivisse in pontificio ornatu. Nehemiam igitur ad Alexandri tempora pervenisse indubitatum est. Porro, si Artaxerxes cujus anno 20 muri Jerusalem suscitati sunt, esset Longimanus, Nehemias ætatem Alexandri non attigisset. Annum enim Artaxerxis Longimani vicesimum inter et Alexandrum Magnum intercedunt anni plus quàm 120. Nehemias verò non potuit saltem ante annum ætatis suæ 20 ad excitanda Jerusalem mœnia mitti; ergo.

2° Refert idem Nehemias lib. 2 Esdr. cap. 4, v. 1 et 7, Sanaballatem sibi muros construenti acriter restitisse. Is autem Sanaballat, Josepho teste loco mox citato, cum octo armatorum millibus suppetias tulit Alexandro Magno Tyrum obsidenti anno 4 Darii Codomanni, et deinde ab eodem Alexandro templi in monte Garizim ædificandi facultatem obtinuit. Sed ab anno 20 Artaxerxis Longimani ad 4 Darii Codomanni numerantur anni 115, ex canone Ptolemaico, quibus si addas annos quos, Nehemiâ muros ædificante, jam erat natus Sanaballat, deprehendes illum ad annum circiter 150 vitam protrahere debuisse, si Artaxerxes qui Nehemiam misit, sit Longimanus; proindeque, etc.

3° Nehemias, cap. 13 ejusdem lib. v. 28, meminit unius è filiis Joiadæ pontificis, qui ejusdem Sanaballatis erat gener; ille autem filius Joiadæ ex Josepho erat Manasse, Jaddi seu Jedduæ filius. Cum ergo Sanaballat et Jaddus ætate Alexandri magni extiterint, sequitur Nehemiam ad eandem ætatem pervenisse, proindeque, etc.

Ad primum respondeo 1°, non parvam de Nehemiæ ætate et conditione apud eruditos difficultatem moveri, quam Scaliger non solvit: nempe fueritne ille idem qui sub Cyro ex captivitate rediit lib. 1 Esdr. cap. 2, v. 2, et lib. 2, cap. 7, v. 7; fueritne sacerdos ut 2 Esdr. 10, v. 1 et 8 legitur, et ex 2 Mach. 1, v. 21, nonnulli colligunt, vel de tribu Juda, ut sentiunt Eusebius et Cedrenus? Si ejusmodi nodos expedire è re suâ duxisset Scaliger, dubio procul argumentis à se hic propositis quid sit respondendum indicasset.

Respondeo 2°, videri doctissimo Petavio ea quæ de Jeddoâ leguntur 2 Esdr. 12, non ab ipso Nehemiâ scripta fuisse, sed ab alio sacro auctore esse incerta, ut levitarum catalogus longius produceretur; quod et alibi factum viri docti existimant, nempe in fine Deuteronomii, in libris Josue, Tobiae, Jeremiæ. Hæc respon-

sione datâ, nihil obstat quominus unicus Nehemias admittatur, qui redierit sub Cyro, et deinde extruendorum mœnium facultatem impetraverit ab Artaxerxe Longimano.

Respondeo 3°, cum illustriss. Huetio, nihil repugnare Nehemiam qui ab Artaxerxe anno regni, 20 in Judæam missus est, vixisse usque ad tempora Darii Codomanni aut etiam Alexandri Magni. Nam inter annum 20 Artaxerxis Longimani et initium Alexandri intercedunt solummodò anni 115; at junior admodum missus est ab Artaxerxe Nehemias; quippè qui ejus erat pincerna, ad quod munus juvenes assumuntur. Quidni autem vivere potuerit annos 151, ut ab illustrissimo auctore ponitur; aut etiam 140, vel paulò plures, si Artaxerxes regni particeps à patre dicatur factus, et à primâ ejus coronatione computetur annus ille vicesimus, quo Nehemiæ litteras concessit? Certè non multò ante pontifex Joiada 150 annos vixerat, 2 Paral. 24, v. 15, quin et fuere subsequentibus temporibus qui tot annos vixerint. Vide Scalig. lib. 6 de emend. temp. Usserium ad calcem Annalium, Tillemonium in Vespasiano, etc.

Nec dicas hanc responsionem recidere in incommoda quæ Scaligeriano systemati objecimus. Aliud enim est uni aliquando homini 140 vitæ annos tribuisse; aliud complures cum Scaligero admittere qui ad hanc ætatem, imò et ad majorem, simul et quasi ex condicto pervenerint. Quod enim de uno aut altero credi potest, absurdè ad plures extenditur.

Respondeo 4°, etsi Nehemias ponatur scripsisse quæ de Jedduâ leguntur cap. 12 lib. 2 Esdræ, necesse tamen non esse ut is tempora Alexandri Magni attigerit. Quid enim obstat quominus Darius de quo eò loci sermo fit, intelligatur cum Usserio Darius Nothus, qui anno ante Darii Codomanni initia sexagesimo nono, post annum verò Artaxerxis Longimani vicesimum, juxta varias supputationes, circiter 41 vel 50 regnare desiit? Etenim supponi potest Nehemiam quæ de Jedduâ refert, scripsisse versus finem regni Darii Nothi, Jedduamque seu Jaddum sapientiâ maturiorem quàm ætate, tum etiam cœpisse pontificatu decorari. Positis autem his duobus, Nehemias potuit ultima Darii Nothi tempora videre, quin septuagesimum octogesimumve vivendo annum excederet. Potuit etiam Jaddus annos natus circiter 100, quarto Darii Codomanni anno ante æram vulgarem 332, Alexandro Magno obviam occurrere; ergo.

Postulat tum ista, tum altera quæ Huetii est responsio, ut Nehemias qui lib. 1 Esdr. cap. 2, v. 2, et lib. 2, cap. 7, v. 7, recensetur inter populi duces qui à captivitate cum Zorobabele Cyri temporibus redierunt, distinguatur ab eo qui muros Jerusalem erexit. Et reverâ duplicem Nehemiam admittere ipse Scaliger cogitur, quippe qui restauratorem mœnium ad Alexandri tempus pervenisse existimat. Sed et ejusmodi distinctionis ratiosatis aperta ex Scripturis aliunde colligitur. Nam quis fuerit ille Nehemias qui sub Cyro rediit, non exprimitur locis citatis; nec alius fortè is fuit quàm *Nehemias*, 2 Mach. 1, memoratus, de quo infra. Quibusdam fortasse videbitur ille *Nehemias filius Azboc, princeps dimidiæ partis vici Bethsur*, qui H. 2 Esdr. 3, v. 16, ædificavit partem murorum urbis. At Nehemias qui ab Artaxerxe mœnium excitandorum facultatem obtinuit, 2 Esdr. 1, y. 1, dicitur filius Helchiæ, et cap. 10, v. 1, filius Hachelai, quæ duo nomina unum designant; nam utroque in loco idem est hebraicè nomen. Ibidem cap. 10, v. 1 et 8 sacerdos appellatus videtur.

Frustra opponeres lib. 1 Esdr. cap. 2, v. 63, mentionem fieri Athersatæ, quo nomine lib. 2 Esdr. cap. 2, Nehemias non semel designatur. Nam Athersata non est nomen proprium personæ, sed muneris, ducemque seu gubernatorem significat. Quapropter Zorobabel, qui lib. 1 Esdr. ut dux è captivitate redeuntium exhibetur, ibid. cap. 2, solus potuit hoc nomine appellari, ut accuratè a Scaligero fuit annotatum.

Ad secundum et tertium respondeo cum doctissimo Petavio duos esse admittendos Sannaballates, Josephumque ad posteriorem transtulisse quæ de priori sancta Scriptura tradit. Neque hæc conjectatio in levi videbitur ponenda, si duo maximè attendantur. Primum, Josephum lib. 11 Antiq. ex quo objectio desumitur, cuncta mirum in modum confundere, ejusque narrationem Scripturis et historiæ, imò rationi sæpè opponi. De quo consule Petavium. Alterum est, eandem quam proponit Scaliger, esse quoque ipsi solvendam objectionem, si Josepho stare ille velit. Nam anno 28, Xerxis alligat Josephus absolutam murorum reædificationem. Cùm autem Xerxes viginti tantum annis regnaverit, ejus annus 28 accipiendus est de anno 8 Artaxerxis Longimani; à quo ad Alexandrum Magnum Tyrum obsidentem fluxere plus quàm 150 anni; proindeque Sannaballat, si unicus tantum fuerit hujusce appellationis homo, plus quàm 150 annis ex Josepho vixerit necesse est; ergo.

Utrum ad annum secundum Darii hystaspidis referendum sit initium septimanarum Danielis? — Ab anno 2 Darii Hystaspidis, seu à decreto quo edictum Cyri (1 Esdr. 6) Darius ille confirmavit, 70 hebdomadam exordium repetunt duo antiquissimi et doctissimi scriptores ecclesiastici, sanctus Clemens Alexandrinus lib 1 Stromatum, et Eusebius Cæsariensis tum lib 8 Demonstr. Evang. in tertiâ quam magis probat harumce hebdomadam consideratione, tum in Chronico, parte 1. Idem principium 70 hebdomadibus assignant Cornelius Jansenius cap. 122 Concord. Evang. Joannes Driedo lib. 3 de sacris Scripturis cap. 5, part. 4, etc.

CONCLUSIO. Initium septimanarum Danielis sumi non potest ab anno 2 Darii Hystaspidis. Probatur 1^o, quia iisdem argumentis quibus superius ostendimus decretum Cyri non esse sermonem ad iterum ædificandam Jerusalem, evincitur etiam decretum quod tulit Darius Hystaspidis anno 2 regni sui, non esse pariter ejusmodi sermonem. Quippe in hoc decreto perinde ac in edicto Cyri, nulla fit mentio extructionis mœnium Jerusalem.

Probatur 2^o, ut à decreto Darii Hystaspidis 70 hebdomades inchoari possent, necesse esset eo contineri quidquam peculiare ratione ædificationis Jerusalem, quo ab edicto Cyri discrimineretur; alioqui non magis illud quàm alterum, ac proinde neutrum esse posset fixum ac determinatum septimanarum initium. Atqui decretum Darii nihil circa Jerosolymorum extructionem peculiare continet, quo ab edicto Cyri discriminetur, sed eo decretum Cyri circa templum restaurandum solummodò confirmatur; ergo, etc.

Probatur 3^o, quia calculis chronologicis non consonat illa opinio. Nam annus secundus Darii Hystaspidis, ut Eusebius observat, primus est Olympiadis 66 ante æram vulgarem 516, Annis igitur 516 adde annos æræ vulgaris usque ad Baptismum Christi, summa erit non 69 hebdomadam tantum seu annorum 483, sed plus quàm 546; ergo, etc.

Decretum ab Artaxerxe Longimano Esdræ concessum sermone, est à cujus exitu hebdomades ducendæ? — Statuunt non pauci sermonem à quo ex Angeli verbis hebdomades Danielis incipiunt, esse decretum quod Artaxerxes Longimanus Esdræ sacerdoti dedit, quodque 1 Esdr. cap. 7 ex integro exhibetur; quapropter annum illius Artaxerxis septimum, quod post obtentum ejusmodi decretum Esdras in Judæam venit, septimanarum esse initium arbitrantur.

Ita Jacobus Capellus in Historiâ sacrâ, Lud. Capellus in Chron. sacr. not. ad tabul. 11, ubi accuratam legere est eâ de re dissertationem, Pridæus in Historiâ Judæorum, lib. 5, tom. 2, etc., et ex Catholicis Cornelius à Lapide in cap. 9 Danielis, Jacobus Maria Ayrolus à Societate Jesu in libro 70 hebdomadam resignato cap. 28, 29, etc., apud Menoch. supp. p. 482 et seq., et alii.

Fatendum est illam expositionem hebdomadam calculis chronologicis apprimè consentire. Cum enim Xerxes post viginti annos regni, juxta veriorum sententiam, anno 464 ante æram communem fato functus sit, atque annus septimus imperii Artaxerxis Longimanus ejus successoris in annum ante eandem æram 457 incidat, manifestum est septuaginta hebdomades ab illâ epochâ ductas anno æræ vulgaris 33 terminari. Igitur si anno illo 33 hujus æræ Passionem Christi cum utroque Capello et Pridæo alliges, dicenda erit obtigisse in secundo dimidio ultimæ hebdomadis, quem sensum olim observavimus hebræo posse tribui. Ayrolus et Cornelius à Lapide Christum ponunt anno æræ communis 30 mortuum, ut scilicet in medio septuagesimæ hebdomadis occisus dici possit.

CONCLUSIO. Decretum, quod Artaxerxes Longimanus, anno imperii sui septimo, Esdræ Sacerdoti concessit, non est sermo à cujus exitu 70 hebdomades computandæ.

Probatur 1^o. Sermo à cujus exitu ineundæ hebdomades Danielis, est sermo ut iterum ædificentur mœnia Jerusalem; ut enim suprâ jam observavimus, verba hæc sua: *Ut iterum ædificetur Jerusalem*, de murorum extructione esse intelligenda ostendit Angelus statim addens: *Et rursum ædificabitur platea et muri*. Et verò, ubi agitur de civitate solo æquatâ, nonne vox *reædificare*, mœnium sonat erectionem? Atqui decretum datum Esdræ ab Artaxerxe non est sermo ut iterum ædificentur mœnia Jerusalem. 1^o Habetur illud decretum 1 Esdr. 7; Artaxerxes Longimanus concessionem Esdræ à se factas fusè et accuratè in hoc diplomate enumerat; de templo et de sacrificiis in eo offerendis, de sacerdotibus à tributo eximendis, de legibus propriis à populo observandis, de pœnis in transgressores infligendis multa habet; reædificationis Jerusalem et mœnium ejus ne minimam quidem mentionem facit. 2^o Nehemias cum audisset murum Jerusalem dissipatum adhuc jacere, vix nec sine maximo timore ausus est causam doloris indicare Artaxerxi.

xerxi, atque ab ipso facultatem murorum extruendorum postulare 2 Esdræ 2. Sed unde tantus timor, si ejusdem operis peragendi facultas jam antea fuisset Esdræ sacerdoti ab eodem Artaxerxe concessa? 3^o Ibid cap. 2, v. 17 et 18, narratur Nehemiam magistratibus indicasse manum Dei *quod esset bona cum eo*, et verba regis, ac dixisse: *Surgamus et ædificemus, et confortatas fuisse manus eorum in bonum*. Agebatur itaque de novo quodam negotio, de datâ tum primùm potestate ædificandi. 4^o Si Esdræ facta fuisset facultas mœnia suscitandi, cur per 13 annos, qui juxta adversarios inter decretum illud Artaxerxis et litteras Nehemiæ ab eodem datas intercesserunt, operi tam necessario ac desiderato manus imposita non fuit? Cur muri Jerusalem ita dissipati reperti sunt à Nehemiâ, ut ipso teste 2 Esdr. 2, v. 14, ne locus quidem esset quâ transire posset jumentum cui ipse insidebat? Cur denique usque ad Nehemiam eodem in statu mœnia remanserunt in quem fuerant à Chaldæis resoluta? confer cap. 1 et 2 lib. 2 Esdr, et v. 2 capitis 4 cum v. 19 cap. 36 libri 2 Paral et 4 Reg. 23, v. 9 et 10. Itaque Artaxerxes Longimanus Esdræ non concessit licentiam murorum Jerusalem ædificandorum, proindeque, etc.

Probatur 2^o. Planum est characteres sermonis *ut iterùm ædificetur Jerusalem*, vel non competere decreto quod Esdras ab Artaxerxe obtinuit, vel æqualiter, imò meliùs competere decreto Cyri. 1^o Non poterunt competere decreto Esdræ dato, si concedatur ex unâ parte sermonem *ut iterùm ædificetur Jerusalem*, de mœnibus intelligendum esse; et ex alterâ, nec explicitè nec implicitè murorum erigendorum licentiam illo decreto contineri; quæ quidem duo esse simul statuenda, modò ostendebamus. 2^o Competerent autem illi characteres edicto Cyri, si cum Ayrolo poneretur idcirco Artaxerxis decretum esse sermonem ad ædificandum Jerusalem, quia ἀποκαμία seu facultas propriis utendi legibus hoc decreto Judæis impertita, est quid in civitate præcipuum et fundamentale, quo cætera concluduntur. Enimverò Cyrus edicto suo populum è captivitate liberavit, et in propriam civitatem unumquemque ire permisit, 1 Esdr. 2, v. 1; domos proinde sibi construendi facultatem eis concessit, ne sub dño morari cogerentur, unde et ab Aggæo cap. 1, v. 4, reprehensi sunt, quòd templo Dei nondùm absoluto, in domibus laqueatis habitarent; denique templum Deo suo à Judæis ædificari Jerosolymis voluit Cyrus,

scilicet ut religionis suæ possent leges omnes et cæremonias observare. Hæc perpendantur attentius, ac simul inspiciatur tum libertas legibus suis parendi captivitatis etiam tempore Judæis ferè relicta; tum populi reducis agendi ratio, prout ab Esdrâ et Josepho exhibetur; certum profectò videbitur à Cyro Judæis concessum fuisse jus institutis suis vivendi, non sine aliquâ tamen à regibus Persarum dependentiâ, à quâ eos Artaxerxes decreto de quo agimus, non exemit. Ergo positâ Ayroli interpretatione, characteres sermonis *ut iterùm ædificetur Jerusalem*, unde 70 computandæ hebdomades, tam competenter edicto Cyri quàm Artaxerxis decreto. 3^o Potiori jure illi characteres eadem admissâ expositione edicto Cyri adscriberentur. Etenim Cyri edictum primum est quod in Judæorum gratiam sit latum; quæ illo edicto, seu conceptis verbis, seu æquivalenter Judæis concessa mox diximus, multò majora sunt quàm quæ concessit Artaxerxes; demùm Artaxerxis decretum fuit duntaxat veluti accessio quædam edicti Cyri; ergo. Jam verò si characteres sermonis à cujus exitu ducentæ hebdomades, tam competant edicto Cyri quàm decreto Artaxerxis, non magis unum quàm alterum, ac proinde neutrum esse poterit septimanarum principium. Quid ita? Quia ab aliquo fixo et determinato septimanæ putentur necesse est. Imò in ejusmodi hypothesi à solo edicto Cyri hebdomades essent numerandæ, siquidem cum sit primum, eo ipso habet quid speciale ac magis determinatum; ergo.

Probatur 3^o, quia Capellus uterque et Pridæus mortem Christi coguntur anno ultimo hebdomadis septuagesimæ alligare; atqui vaticinii verbis consentaneum magis videtur Christum occisum poni in medio ultimæ hebdomadis. Etsi enim voces hebrææ quas Vulgata sic reddit: *Et in dimidio hebdomadis deficiet*, etc., possint significare partem hebdomadis dimidiatam; sensus tamen quem Vulgata exhibet contextûs seriei meliùs congruit. Sic enim habet Angelus loquens de ultimâ hebdomadâ: *Confirmabit autem pactum multis hebdomadâ unâ, et in dimidio hebdomadis deficiet*, etc., ubi hæ voces, *in dimidio*, seu, *in medio hebdomadis*, aperiunt cur bifariam secta sit ultima hebdomas, nempe ad exprimendum in ejus medio sacrificia morte Christi abolendâ. At si vertatur: In parte hebdomadis dimidiatâ, seu in unâ medietate illius hebdomadis, etc., jam nullo modo divinare licet hujusmodi parti-

tionis causam. Etenim non exprimit Angelus de quâ parte dimidiâ intelligendus ipse sit; quodcumque autem intra hebdomadam evenit, si non in medio ejus, certè in alterutrâ parte dimidiâ contingat necesse est; ut quid ergo dimidiatam hebdomadis partem Angelus expressisset? Porro Ayrolus, Cornelius à Lapide et alii ut illam difficultatem declinent, in aliam majorem incidunt; nempe Christum statuunt esse mortuum anno æræ vulgaris 50 vel 29, quod minùs esse probabile aliquando dicemus.

SOLVUNTUR OBJECTIONES. — Obj. 1^o cum Ayrolo, qui lib. supra citato à cap. 10 ad 55, quæcumque verisimiliora in gratiam illius systematis dicta fuerant colligit, novisque firmat conjecturis et argumentis. Tria sunt regum Persarum edicta in gratiam Judæorum data: primum est Cyri, secundum Darii, tertium Artaxerxis anno regni sui septimo. Nam quod à pluribus additur, quartum decretum anno Artaxerxis 20 datum, illud commentitium vocat Ayrolus, censetque Artaxerxis litteris *solum abeundi in Jerusalem Nehemiæ roganti tribui facultatem*, quæ potestatem reædificandi jam antea factam supposebat. Atqui ex illis decretis solum edictum anni 7 Artaxerxis habet characteres *sermonis* de quo loquitur Angelus apud Danielelem. Nam hebræa hoc modo reddi possunt: *Ab exitu sermonis ad redire faciendum (Populum) et ædificandum Jerusalem*, etc., proindeque duo sunt characteres sermonis à quo 70 hebdomades ducendæ: 1^o ut sit *sermo ad redire faciendum*; 2^o, ut sit *sermo ad ædificandum*. Sed in solum Artaxerxis decretum quadrant illi duo characteres.

1^o In illud quadrant. Et de priori quidem caractere nulla difficultas. *A me decretum est*, inquit Artaxerxes, Esdræ 7, v. 15, *ut cuicumque placuerit in regno meo de populo Israel et de sacerdotibus ejus, et de levitis ire in Jerusalem, tecum (Esdrâ) vadat*; ergo. Quod ad alterum attinet, omnes nervos contendit Ayrolus, ut hunc etiam illi decreto convenire ostendat. Vis tota ejus argumentorum eò reducitur. Si decretum Artaxerxis non modò civium, sed et legum omnium restitutionem contineat, et jus gladii conceptis verbis tribuat; si qui tanta concedit, quod in urbis instauratione præcipuum est faciat; si denique Judæi his impetratis, jure potuerint, imò debuerint urbis mœnia construere; profectò decretum illud Artaxerxis fuit *sermo ad ædificandum Jerusalem*. Atqui 1^o Artaxerxis decreto *αὐτενομία* et jus gladii tribuuntur, ut ex ejus lectione patet; 2^o civium et

legum restitutio pars est potior reædificationis urbis; si quidem propter cives et leges extruuntur mœnia; nec diceretur urbs destructa, cujus servatis civibus, mœnia casu quodam corruerent. Vide plura cap. 10, 11, 12 et 13. Atque hoc unum opinatur Ayrolus cap. 22 et 26 sufficere, ut decretum Artaxerxis dicatur propriè *sermo ad ædificandum Jerusalem*; quia scilicet id quod in urbe præcipuum est eo decreto conceditur; 3^o Tandem Judæos, hoc diplomate impetrato, potuisse jure divino, naturali, civili et gentium, mœnia Jerusalem instaurare, contendit jure quidem naturali, quo licet ea quærere quæ homini necessaria sunt, *ut se, vitam, corpusque tueatur, declinare ea, quæ nocitura videantur*. Cùm ergo ædificatio urbis esset redeuntibus necessaria, etc. Jure pariter gentium, cujus, *est sedium occupatio, ædificatio, munitio*, etc., ad quod etiam pertinet postliminium, seu *Jus quo restituitur alicui res quam per captivitatem amiserat*. Præterea jure civili, juxta quod *non debet cui plus licet, quod minus est non licere*; unde, cùm facultas redeundi et propriis utendi legibus, sit quid majus mœnium extructione, sequitur, etc. Postremò jure divino. Quippe Num. 35, v. 50, præceperat Deus ab Israelitis terram Chanaan incolî, atque cæteros illius terræ habitatores disperdi. Necesse ergo erat ut urbem ædificarent. Ex his concludit Ayrolus decretum anni septimi Artaxerxis esse *sermonem ad ædificandum Jerusalem*.

2^o Aliis decretis non conveniunt prædicti characteres. Nam nec decretum Darii, nec decretum commentitium anni 20 Artaxerxis fuere *ad redire faciendum* populum. Superest decretum Cyri. Fatetur Ayrolus illud datum fuisse ad populum reducendum, atque implicitè eo fuisse contentam facultatem ædificandæ urbis; sed advertit nullam restitutionis legum jurisque vitæ ac necis in Cyri edicto fieri mentionem, quod cùm præcipuum sit, ac conceptis verbis in decreto Artaxerxis exprimatur, vel hoc ipso satis ab edicto Cyri discriminatur illud decretum; ergo.

1^o Nego majorem quantum ad hanc partem, quòd nimirum litteræ quas Nehemiæ Artaxerxes concessit, mera fuerint licentia in patriam revertendi; de quo infra. 2^o Nego minorem, characteres scilicet *sermonis* de quo Angelus loquitur, soli competere Artaxerxis decreto anni septimi.

Ad probat. nego hebræa sic reddenda, *Ad redire faciendum*, etc. Sed rationes quibus Ay-

rolus hanc suam versionem nititur confirmare, loco aptiori postea referentur et expenduntur. Hic enim tota controversia est de secundâ parte minoris propositionis argumenti quod in probationem fuit allatum. Nego verò secundam illam minoris partem, solum nempe decretum Esdræ datum ab Artaxerxe, caractere isto insigniri, quòd sit *sermo ad ædificandum Jerusalem*. Contra probavimus hic agi de mœnibus circa quæ nihil tunc sancivit Artaxerxes; ac Cyrum potiori jure quàm Artaxerxem dici debere Jerosolymorum restauratorem, atque ad eorum reædificationem multò magis contulisse. Neque momenta, quibus hæc evicimus, Ayrolus labefactat. Esto, quosdam Jerosolymis cives Artaxerxes decreto anni sui septimi restituerit. Esto *αὐτονομίαν* jam à Cyro concessam solemniter confirmaverit. Esto, hæc potiore restaurationis urbis partem constituent. Non inde sequitur mœnium civitatis extruendorum potestatem hoc decreto Esdræ factam fuisse, de quâ tamen hic præsertim agi monstratum est. Quæ enim de jure naturali, divino, civili et gentium affert Ayrolus, spontè concidunt. Num ergo captivos libertate donare non potuerunt Persarum reges, quin ipsis mœnium suscitandorum facultatem impertirentur? Quasi verò hæc facultas quæ speciali ratione politicâ potuit non concedi, quæque populo edomito et ad rebellionem prono sæpiùs denegatur, ex ipso relaxationis captivorum decreto religata pendeat, debueritque necessariò consequi! Igitur non probat Ayrolus decretum Artaxerxis anni 7 esse *sermonem ad ædificandum Jerusalem*, de quo Angelus loquitur.

Non probat quoque eundem characterem, eo sensu quo Artaxerxis diplomati tribui potest, non competere decreto Cyri; quippè cum ipse fateatur Ayrolus eadem à Cyro Judæis concessa quæ ab Artaxerxe, nec infirmet argumenta quibus multò majora evicimus fuisse collata.

Inst. cum Ludovico Capello: « Cur institutionem murorum vel prohibuisset, vel non concessisset Artaxerxes ille, qui se usque adeò benevolum erga Judæos edicto (anni scilicet septimi) præbet? » *Dedit ei* (Esdræ), inquit sacer contextus, 1 Esdr. 7, v. 6, *rex, secundum manum Domini Dei ejus super eum, omnem petitionem ejus*.

Respondet Huetius Dem. evang. prop. 9, cap. 8, n. 6, Artaxerxem id non concessisse eandem ob causam quæ Cyrum erga Judæos eundem benevolum, quæ Darium absterruit, quominùs id iis permitterent; experta nimi-

rum gentis pervicacia et mobilitas, et cupidus rerum novarum animus. » Etverò, addit paulò post illustriss. præsul totam Capelli interpretationem convellens, « veri profectò simile non est hoc Artaxerxis decretum, cum res alias momenti minoris sigillatim exprimat, sumptusque ad templi cultum confectos minutatim percenseat, concessam murorum et urbis extruendæ facultatem, sic tanquàm rem nihili, silentio prætermis-
sisse. Crederemus fortasse, si rem in edicto prætermis-
sam opere ipso Esdras comple-
visset; verùm nec ex edicti verbis, nec ex gestis ab esdrâ rebus ulla sumi possunt opinionis hujus argumenta. »

Inst. cum Ayrolo cap. 29 : « Mœnia atque domos Jerusalem, ab anno Artaxerxis septimo usque ad vigesimum, quoquo modo fuisse instaurata, clarè colligitur ex lib. 2 Esdr. cap. 2, ubi legitur Nehemiam, cum ex Hanani relatione accepisset murum Jerusalem dissipatum, portasque ejus esse igni consumptas, dolori se tradidisse ac flevisse diebus multis. » Atqui si de subversione et conflagratione à Chaldæis olim factâ Hanani relatio intelligenda foret, novo Nehemiæ dolori ac luctui nullus fuisset locus; ergo. Simile argumentum in sui systematis gratiam proposuerat Scaliger, et post ipsum Salianus, Sanctius, Pererius, Cornelius à Lapide, etc.

Nego antecedens et minorem syllogismi in probationem adducti. Ut enim dolori insolito ac fletibus sese traderet Nehemias, satis erat ipsi exhiberi imaginem calamitatum populi sui præteritarum ac etiamnum durantium; quemadmodùm dolor noster ingravescere solet, si charorum infortunia, quæ jam noveramus, nostris iterùm oculis subjiciantur.

Inst. cum eodem. Sermo à quo 70 hebdomades incipiunt, vel est decretum anni 7 Artaxerxis, vel est decretum quod idem princeps anno regni sui 20 Nehemiæ concessisse fingitur. Atqui decretum istud commentitium anni 20 non potest esse sermo, etc.; ergo. Respondeo majore falsum supponi. Nempe constat, si non decretum, saltem litteras regias à Nehemiâ impetratas fuisse, quibus facultas ædificandorum mœnium continebatur. De minore autem inferrius dicemus.

Obj. 2º cum Ayrolo. Septimanæ Danielis videntur esse hebdomades annis sabbaticis terminatæ, quarum usus lege erat Judæis præscriptus. Atqui hebdomades Danielis, si à decreto anni septimi Artaxerxis incipiant, clau-

dentur annis sabbaticis. Nam ex tribus annis sabbaticis, quorum calculos libri Machabæorum et Josephus suppeditant, perspicuum fit annum 33 æræ vulgaris à mense septembris fuisse sabbaticum; inde ducantur ascendendo 70 hebdomades seu anni 490; patebit annum ante æram vulgarem 458, quo decretum Esdræ datum est, pariter à mense septembre sabbaticum fuisse. Hic autem annus non numerandus, utpote ad hebdomadam præcedentem attingens. Igitur hebdomades Danielis à decreto anni septimi Artaxerxis accersitæ terminantur annis sabbaticis, quod in alio quovis systemate locum habere nequit; ergo.

Nego majorem. Possent quidem septimanæ Danielis de ejusmodi hebdomadis annorum sabbaticorum accipi, si hæc interpretatio aliunde vaticinio et eventui congrueret. Sed 1º, nihil in vaticinio indicat ad illas annis sabbaticis clausas hebdomades Angelum respexisse; contra verò ex prophetiæ verbis liquet decretum quod anno regni sui septimo Artaxerxes edidit, non esse sermonem ad ædificandum Jerusalem, à quo sumi queat septimanarum initium; 2º Positâ illâ interpretatione, Christus in dimidio ultimæ hebdomadis mortem non subiisset; 3º Non videtur Ayrolo permittendum ut anni ante æram vulgarem 458 integri, quo decretum emissum confitetur, nullam habeat rationem; quippe cum agatur de vaticinio in quo hebdomades et hebdomadam partes accuratissimè supputantur.

Obj. 3º cum Pridæo, Hist. Jud. lib. 5 : septuaginta hebdomades duci debent ab exitu illius sermonis, cui duo maximè competunt characteres : 1º ut sit sermo ad reverti faciendum Jerusalem, et eam ædificandam; 2º ut eo emissus fuerit anno, à quo ad mortem usque Christi Domini effluxerint 70 hebdomades, seu anni 490. Cum enim 70 hebdomades dicantur initio vaticinii constitutæ et definitæ, ut consummetur prævaricatio, et finem accipiat peccatum, et deleatur iniquitas, et adducatur justitia sempiterna, et impleatur visio et prophetia, et ungatur Sanctus sanctorum; hæc verò sex in ipsâ Christi morte plenum habuerint exitum; consequens est in illâ morte 70 desinere hebdomadas. Atqui 1º, si à morte Christi, quæ anno 33 æræ vulgaris mense Nisan obtigit, retexamus annos 490, incidemus in mensem Nisan anni 457 ante vulgarem æram, quo præcisè datum est decretum quod ab Artaxerxe Esdras obtinuit; 2º decretum illud vero sensu dici potest ad reædificationem Jerusalem, cum restituerit

cives et leges, quibus magis quàm muris et domibus civitas constituitur.

Confirmatur, quia si sermonem ad ædificandum Jerusalem, de quo in prophetiâ agitur, interpretemur sermonem ad construendos urbis illius muros, jam ab edicto Cyri potius quàm ab alio quolibet septuaginta hebdomadam initia essent sumenda; Cyrus enim permisit mœnium Jerusalem ædificationem, quod conatur evincere Pridæus argumentis suprâ allatis et expensis.

Confirm. 2º, quia soli epochæ anni septimi Artaxerxis accurata 70 hebdomadam computatio congruit. Respondeo hæc omnia jam in antecessum refutata fuisse. Nam 1º, probatum est *sermonem ut iterum ædificetur Jerusalem*, in vaticinio Danielis de murorum ac plateæ extruptione esse intelligendum. 2º Ostensum est etiam septuagesimæ hebdomadis medio mortem Christi verosimilius alligandam. 3º Mœnium ædificationem à Cyro non fuisse permissam pariter evicimus. Quod si ejus edicto permissa fuisset, inde non sequeretur decretum anni septimi Artaxerxis posse esse sermonem de quo Angelus loquitur, sed hunc potius ad solum Cyri edictum referri debere. Unde patet responsio ad primam confirmationem. Ad secundum respondeo, accuratioribus adhuc calculis, ut infrâ videbitur, 70 hebdomades duci posse à sermone quo Artaxerxes idem Nehemiæ fecit potestatem muros suscitandi.

Arcessendumne sit septimanarum Danielis initium à litteris-regiis, seu à rescripto quod Artaxerxes Longimanus Nehemiæ concessit? — Refert Nehemias, lib. 2 Esdr. cap. 2, se ab Artaxerxe Longimano anno 20 regni ejus facultatem mœnium Jerusalem extruendorum litteris consignatam impetrasse, atque ejusmodi rescriptum, seu litteras plerique post Julium Africanum vetustissimum et doctissimum scriptorum, interpretantur *sermonem ut iterum ædificetur, etc.* cui septuaginta hebdomadam initium Angelus apud Danielelem alligit.

In eâ opinione, cæteroqui facili et expeditâ, occurrit de temporum ratione magna difficultas, quâ chronologorum ingenia non parùm exercentur. Scilicet annus Artaxerxis vigesimus, quo Nehemias hanc sibi factam potestatem narrat, videtur incidere in annum 445, ante æram vulgarem; siquidem ex Herodoto (Hist. lib. 7 initio) colligitur quatuor annis integris vixisse Darium Hystaspidem post Marathoniam pugnam, quam mense Septembre anno ante eandem æram 490 commissam fuisse apud

omnes certum est. Initia ergo Xerxis, qui Dario successit, alliganda sunt anno post hanc pugnam quinto; cumque annis 20 completis regnasse Xerxem statuatur, consequens est annum vigesimum ejus successoris Artaxerxis esse ipsum annum ante æram vulgarem 445. Porro si ab hoc anno ducas 70 hebdomadas seu annos 490, incidet annus postremus hebdomadis ultimæ in 45 æræ vulgaris, cum tamen Christi mors, ejusdem hebdomadis medio connectenda, non possit ultra annum 33 æræ illius, doctis omnibus fatentibus, differri. Temporis igitur intervallum, quod rescriptum illud inter et mortem Christi interjacet, octo circiter annis brevius esse videtur, quam ut accurato hebdomadam calculo conveniat. Quod si Christi Passio anno 31 vel 29 vulgaris æræ collocetur, aut pars vigesimi anni Artaxerxis intra quam Nehemias missus est, anno 444 vel 445 ante hanc æram, ut quibusdam placet, adscribatur, majus adhuc habebitur discrimen.

Ad hanc diluendam difficultatem varia in medium prolata sunt systemata. Multi annum Artaxerxis vigesimum de quo Nehemias loquitur, à morte Xerxis ducendum existimant. Complures verò opinantur Artaxerxem fuisse à Patre socium regni factum, et ab hac primâ illius coronatione annum ejus vigesimum, quo Nehemias profectus est, computandum esse docent. Utrinque autem in varias adhuc opiniones itur.

Ac priores quidem, nimirum qui à Xerxis morte annum Artaxerxis vigesimum accersunt, planè diversis insistunt viis, ut ad rationes temporum hebdomadas accommodent. 1º Africanus, lib. 5 de Temporibus (1), Daniele de annis lunaribus explicat. Nempe rescriptum Artaxerxis anno quarto olympiadis 83, id est initio anni ante æram vulgarem 444 alligat, mortem verò Christi in quâ ex ipso septimanæ desinunt, putat contigisse 202 olympiadis anno secundo, qui est trigesimus æræ vulgaris; atque ad hebdomadas 70 inter utrumque illud extremum concludendas, statuit eas annis duntaxat lunaribus constare; quippe hac ratione anni solares ferè quindecim de summâ septimanarum deducuntur. Annus enim solaris undecim diebus lunarem annum superat, adeoque 70 hebdomades annorum lunarium conficiunt solum annos solares 475 cum aliquot mensibus.

(1) Apud Euseb. lib. 8 Demonstr. evang. p. 389 et 390; et S. Hier. in Daniel. cap. 9. T. 3, col. 1110.

Cur autem hebdomades Danielis ita sint accipiendæ, rationem affert Africanus, quod (1) *Judæi ad cursum lunæ annos computare consueverint*. Unde *ternos intercalares*, inquit, *octavo cuique anno adjiciunt*. Cæterum, dum ejusmodi hebdomadam anno ultimo Passionem Christi assignat, anno uno fallitur: namque ab anno 4 olympiadis 83 exeunte, ad secundum olympiadis 202, itidem exeuntem, non numerantur 475 anni, sed 474 tantum. Post Africanum ex annis lunaribus hebdomadas Danielis compingunt Theodoretus in cap. 9 Danielis, Zonaras Annal. lib. 3, Rupertus lib. 1 in Daniele, cap. 1, Pererius Comment. in Daniel parte 2, Salius et Tornielus in Annalibus, Huetius Demonstr. ev. prop. 9, cap. 8, num. 9. Plerique tamen isti et ab Africano, et à sese invicem in quibusdam non nihil dissentiunt. Huetius præsertim finem hebdomadam aliter constituit. Ex ipso rescriptum Artaxerxis datum est anno primo ineunte olympiadis 84, id est, initio anni ante æram vulgarem 444, quem annum computat, non, ut alii solent, à mense Julio, quo ludi olympici coeperunt, sed ad faciliorem calculum à Januarii præcedentis initio; quapropter is annus ipse est ante æram vulgarem 444, cui initium hebdomadam Africanus quoque alligat. Septimanæ inde fluentes anno 1 olympiadis 203 æræ vulgaris 33, terminantur. Demum mortem Christi anno 18 Tiberii 202 olympiadis 3, id est, æræ vulgaris 31, annequit, ita ut anno 5 septuagesimæ hebdomadis Christus pro nostrâ salute sit passus.

2º Galatinus, Usserius et alii, solutionem Africani non probantes, volunt septimanas de annis solaribus, seu quod eodem recidit, de lunaribus quidem, sed ope mensium intercalarium cursui solis exæquatis esse intelligendas. Ut autem, quantum opus est, protendatur tempus, quod ab anno Artaxerxis vigesimo ad Christi mortem elapsum est, Galatinus lib. 4. de Arcanis cathol. verit. cap. 14, regibus Persarum Artaxerxem subsequentibus plures, quam fides historiæ patitur, annos imperii tribuit, novamque eorum finxit arbitrato suo chronologiam. Quem in scopulum Joannes Lucidus quoque impegit.

3º. Ad idem producendum tempus, Xerxi octo annos Usserius (2), Lancelotus (3), et

(1) Apud Euseb., ibid. p. 390.

(2) Annal. vet. Test. ad an. ante ær. vulg. 474 et 454.

(3) Chronol. sac. Bibliis Vitæanis suffixâ, cap. 20.

Bossuetius (1) detrahunt, eosque addunt annis 40 quibus regni Artaxerxis duratio solet definiri. Scilicet ex testimoniis Thucydidis, Charontis Lampsaceni, Annalium Persicarum, Cornelii Nepotis et Eusebii colligi arbitrantur ad Xerxis filium confugisse Themistoclem Athenis ostrascismo pulsum, ac proinde Artaxerxem Longimanum pluribus annis ante vigesimum Xerxis annum imperâsse. Quapropter existimant Lancelotus et Bossuetius Xerxem ab Artabano jugulatum anno regni sui 12 ante æram vulgarem 473 (Usserius ait 474), tuncque Artaxerxem regno frui cœptum, postea dedisse mense Nisan anno abhinc vigesimo, ante æram vulgarem 454, rescriptum de muris Jerusalem extruendis; à quo 70 hebdomades exortæ ad annum æræ vulgaris 36 protrahuntur, ita ut mors Christi, quam anno illius æræ 33 assignant, in dimidio hebdomadis ultimæ contigerit.

4° Eundem nodum ope annorum sabbaticorum, de quibus suprâ disseruimus, expedire molitus est D. Romigni celeberrimus non ita pridem in scholis Sorbonicis theologiæ professor regius in tractatu de Incarnatione, quem anno 1731 dictavit; ratus 1°, ad computandum seriem hebdomadarum annorum, quæ claudantur anno sabbatico, necesse non esse ut extremæ integræ sint; 2° hebdomadam in cujus dimidio deficiet hostia et sacrificium, ad tempus belli Judaici ac Jerosolymorum subversionis referendam. Jam porrò, quos diximus statuere, ad quæstionem dirimendam, Artaxerxem in societatem regni à Xerxe assumptum fuisse, ii in diversas etiam discedunt partes, tum circa annum et occasionem illius erectionis, tum circa modum quo rem exponunt, ac momenta quibus eam singuli stabiliunt. Petavius (2), Possinus (3), et alii multi arbitrantur scriptorum profanorum auctoritate evinci Xerxem 21 annis inchoatis regnâsse. Censent etiam ex plurimorum historicorum testimonio erui Artaxerxem ante annum Xerxis vicesimum sceptro esse potitum. Quas auctoritates inter se ut componant, Xerxem anno regni sui 12 ad novam, ut scribit Justinus Hist. lib. 11, sub finem, in Græcos expeditionem se accinxisse ponunt, ac tum ex more persico in regni consortium assumpsisse

filium suum Artaxerxem. Atque ex hac Artaxerxis coronatione computant tum annum ejus septimum, quo Esdræ decretum concessum est, tum vicesimum, quo Nehemias murorum restaurandorum obtinuit potestatem, et à quo septimanæ currere incipiunt. Cæterùm, de illarum exitu cum Usserio Petavius et Possinus conveniunt; sed hic insuper singularem aliam tradit de septuagesimâ hebdomadâ conjecturam, quam lege, si vacat, loco citato. Alii, ut Tirinus in Chronico sacro cap. 38, Abramus apud Turneminium in Menoch. Suppl. pag. 496, etc., aiunt Artaxerxem anno imperii Xerxis quinto, ante æram vulgarem 480, socium regni factum. Cùm enim ejusmodi cooptationes idcirco maximè admittere liceat, quia ab Herodoto lib. 7 Hist. traditum est hunc fuisse Persarum morem, ut reges tunc successorem eligerent, quando ad bellum in longinquas regiones proficiscebantur, satius esse sentiunt ad annum Xerxis quintum quàm ad duodecimum primam Artaxerxis coronationem referre. Quippe anno imperii sui quinto Xerxem in Græciam trajecisse certum est; nulla verò anno ejusdem 12 expeditio locum habuit. Itaque annum vigesimum, quo Nehemias missus est, supputant Tirinus et Abramus à primâ illâ Artaxerxis coronatione, illumque alligant anno ante æram vulgarem 460. Septimanarum verò ad tempora facilius aptandarum causâ conjectatus est Tirinus 1° tres annos in mœnibus et propugnaculis perficiendis et absolvendis fuisse consumptos, quod firmat ex Josepho illius operis finem et exitum ad annum 28 Xerxis referente lib. Antiq. 11, cap. 5; 2° verba Angeli, *Ab exitu sermonis*, esse accipienda de sermone ad exitum perducto, seu de absolutâ Jerosolymorum ædificatione. Ex ipso igitur, ab anno 25 Artaxerxis, ante æram vulgarem 457 hebdomadæ fluunt. Unum superest de hac opinione advertendum; nempe ejus defensores à morte Xerxis numerare annum Artaxerxis septimum, quo Esdras decretum obtinuit, ac proinde Esdram nonnisi duobus post Nehemiam annis Jerosolymam adventâsse.

Tirini Abramique systema sibi corrigere visus est Turneminus in Menoch. supp. Dissert. 16. Idem cum illis sentit de occasione primæ Artaxerxis coronationis, ambos verò in eo deserit, quòd anno Xerxis septimo, non quinto hanc coronationem alliget, nixus testimonio Herodoti lib. 7, ex quo adstruere conatur Xerxis in Græciam transitum ad annum ejus septimum pertinere. Secundam Artaxerxis coronationem collocat post necem Xerxis, cui annos regni 21

(1) Hist. Universal. part. 1. epoch. 8 versùs initium.

(2) Lib. 10, de Doctr. temp. cap. 25, et lib. 12, cap. 32, Ration. temp. part. 2, lib. 3, cap. 10, de Incarnat. lib. 16.

(3) In Dissertatione Menochii suppl. insertâ, p. 468.

inchoatos tribuit. A priori Artaxerxis cooptatione ducit annum ejus 20, quo Nehemias Sus missus est; ab alterâ coronatione annum septimum, quo Babylone profectus est Esdras; adeò ut annus vigesimus de quo loquitur Nehemias, et annus septimus cujus mentionem facit Esdras, unus et idem annus sit *diversâ ratione* numeratus; atque eodem anno, mense, et die Esdras et Nehemias Jerosolymas advenerint. Is annus ex Turneminio est 460 ante æram vulgarem. Porrò à completâ murorem extructione die 25 mensis Elul ejusdem anni septuaginta computat hebdomadas, easque perducit ad mensem eundem Augusto respondentem anni 31 æræ vulgaris, quo opinatur Christum mense Nisan cruci affixum fuisse.

Quod Tirinus, Abramus et Turneminus conjiciunt de diversâ ratione computandi annum 7, et annum 20, Artaxerxis in libris Esdræ memoratos, ad modò expositam Petavii sententiam, servatâ ejus substantiâ, non absurdè aptari potest. Scilicet nihil fortè mirum Nehemiam Artaxerxis pincernam ipsique specialiter additum, regni ejus initia ad primam ejus coronationem referre solitum fuisse, et propterea annum ejusdem vigesimum ab hâc primâ coronatione numerâsse. Sed nulla similis ratio nos cogit ad Esdras hoc singulari modo explicandum. In systemate Petavii ad hanc conjecturam immutato, Esdras Jerusalem venisset anno ante æram vulgarem 458, post Xerxis mortem septimo, quinquennio integro antequàm veniret Nehemias. Atque hâc unâ mutatione, præcipuè quibus illud systema impetitur, evanescerent objectiones, quod inferiùs planum fiet.

Quid de diversis hactenùs explicatis opinionibus sentiendum videatur, aperient sequentes conclusiones.

CONCLUSIO I. Facultas extruendorum mœnium Jerusalem ab Artaxerxe Longimano Nehemiæ concessa, ipse est *sermo ut iterùm ædificetur Jerusalem*, à cujus exitu 70 hebdomades ducendæ. Probatur. Quia facultati ejusmodi insunt characteres omnes *sermonis ut iterùm ædificetur Jerusalem*, de quo loquitur Angelus. Nam 1º, est sermo expressus de iterùm ædificandâ Jerusalem cum plateâ et muris, ut ex cap. 2. libri 2 Esdræ manifestum est. 2º Vi ejusdem facultatis reipsâ ædificata est civitas Jerusalem, murique ejus erecti, 2 Esdræ cap. 3, 4, etc. 3º Hinc distinguitur is sermo à quolibet alio decreto in gratiam Judæorum à regibus Persarum concessio. Nam Cyrus et Darius decretis suis solius templi ædificandi mentionem

faciunt, nihil de mœnibus erigendis permittunt. Decretum Artaxerxis Longimani Esdræ datum ad cultum Dei, gentisque politiam totum attinet. 4º Facultatem sibi concessam voce hebræâ *Dabar* expressit Nehemias cap. 2, v. 18 et 20, quâ etiam usus est Angelus apud Danielelem, *Min motza dabar, ab exitu sermonis*. 5º Tempora illi hypothese congruunt. Nam de octo tantùm annis controvertitur. Quòd si attendatur hic agi de annorum ferè quingentorum serie, de plurimorum imperiorum successione, de annis tot regum qui per id tempus floruerunt, de rebus ab ævo nostro longissimè dissitis, quas pauci tractârunt antiqui scriptores, iique inter se non concordēs; nonne mirum videbitur nonnisi de octo annorum differentiâ disputari, ubi etiam ad exiliores litigiosæ chronologiæ calculos omnia perpenduntur? Num propter difficultatem ex ejusmodi discrimine ortam deseretur quod adeò perpicuè apparet, nempe litteris Nehemiæ concessis inesse characteres sermonis ab Angelo indicati? Sed præterea exponetur deinceps quâ ratione etiam illud leve discrimen evanescat.

Dices cum Ayrolo in libro 70 hebdomadum resignato, cap. 14: Ubi vulgatus Interpres legit, *Ut iterùm ædificetur Jerusalem*, cum Hebræis legendum est: *Ad redire faciendum* (populum è captivitate) *et ædificandum Jerusalem*. Favent multæ versiones, Syr. Arab. Pagnin. R. Saadia Gaon; apud 70 Interpretes habetur: *Ab exitu sermonis ut respondeatur* (precibus populi redire cupientis) *et ædificetur Jerusalem*. Duo igitur sunt præcipui characteres sermonis à quo Angelus indicat duci debere septimanas: 1º debuit esse sermo ad reducendum è captivitate populum; 2º ad ædificandum Jerusalem. Atqui facultas concessa Nehemiæ non fuit ad reverti faciendum populum è captivitate; ergo.

1º Nego major. Hebræa malè ab Ayrolo redduntur: 1º quia regulis grammatices hebraicæ cautum est ut quotiescumque duo verba consequenter leguntur, puta, *addidit loqui, addidit et locutus est, addidit ad loquendum*, etc., priùs verbum reddatur per adverbium congruens, v. g.: in exemplis mox allatis vertendum est, *rursus locutus est*; ergo verba Angeli pariter vertenda sunt, *Ut iterùm ædificetur*, etc., quod hebræi idiomatis indoli non dissentaneum judicat ipse Ayrolus ibid. 2º Etsi hebræa de verbo reddenda essent: *Ad redire faciendum et ædificandum*, non ideò ibi significaretur populus è captivitate reducendus, quem nec nominat quidem Angelus, sed verbum *leaschib, ad redire faciendum*

eodem sentu hîc accipi debet, ac in fine versiculi, ubi legitur *taschoub venibnetha rechob, redibit et ædificabitur platea*, etc. Atqui isto in loco verbum *taschoub*, utpote ejusdem generis ac *rechob, platea*, ad eam contingere dicendum est, non ad *populum* qui ibi penitus reticetur; proindeque et in priori versiculi parte verbum *leaschib*, ad Jerusalem spectat. Neque in hac interpretatione ulla occurrit difficultas: quippe urbs sensu metaphorico redire ac reverti dicitur ab Hebræis, cum iterum ædificatur. 3^o Non alium ingerunt sensum translationes syriaca, arabica et pagniniana, quæ textum hebræum totidem verbis exprimunt. 4^o Græca versio quæ legit, *Ut respondeatur et ædificetur*, Ayroloetiam non favet. Namque positâ hac translatione, istud, *Ut respondeatur*, referendum esset ad vota populi ædificationem mœnium cupientis. Proindeque non magis ex versione græcâ quàm ex hebræo textu conficitur unum è characteribus sermonis ab Angelo indicati hunc fuisse, *Ut populus è captivitate reduceretur*.

2^o Nego minorem. Artaxerxes Nehemiam ad ædificandum Jerusalem mittens, censendus est populi è captivitate reditum implicite permisisse. Saltem hoc ipso quo Jerusalem iterum ædificari edixit, hanc civibus frequentari ac Judæis oppleri sanè voluit; istud enim ex altero consequi planum est et eventus probavit. Vide 2 Esdr. 7, v. 4, et cap. 11, v. 2 et seq.

CONCLUSIO II. Hebdomades Danielis videntur annis solaribus conflatae; ac proinde anno Artaxerxis Longimani 20, à morte Xerxis computato initium septimanarum affigi nequit.

Probatur prima pars, nempe annis solaribus hebdomades Danielis constare. Nam septimanæ Danielis intelligendæ sânt de hebdomadibus apud Judæos usitatis, et à Scripturâ memoratis; aliàs nihil fixi in illis haberetur. Atqui hebdomades annorum apud Judæos usurpatæ et in Scripturis memoratæ, annis solaribus constant, seu, quod idem est, annis lunaribus per embolismos ad solarem cursum aptatis. Ex Scripturis enim manifestè colligitur eos ejusmodi solum annis usos esse; lege Moysis erat præscriptum (1), ut die decimâ quartâ mensis Nisan exeunte, versus æquinoxium vernalum et tempore novarum frugum (2), quotannis Pascha celebraretur. Atqui nisi usi essent Judæi annis solaribus, aut embolismo-

rum ope ad solares redactis, istud non observassent præceptum; quippe cum anni lunares sint diebus undecim breviores quàm solares anni, dies decima quarta mensis Nisan, eâ in hypothesi, singulas anni tempestates successivè decurrisset, raròque ad æquinoctium vernalum accessisset. Ex aliis Judæorum festis (1) similia deduci possunt argumenta, quibus res planè demonstratur: neque id inficiatur quisquam. Hinc R. Maimonides in Hilchoth Kidusch Ha-chodesch, cap. 4, parag. 1: « Menses anni, inquit, sunt menses lunæ, ... anni verò, quibus computamus, solis sunt. » Similia habet Aben Ezra.

Dices 1^o. Annos lunares cum solaribus exæquabant quidem Judæi, tribus embolismis mensibus octavo cuique anno adjectis; sed idipsum ostendit lunares annos illis fuisse usitatos, ac proinde de iis annis posse vaticinium exponi. Ita Africanus apud Euseb. et S. Hieronymum locis suprâ laudatis. Nego sequelam. Nam si annos lunares ope embolismorum annis solaribus Judæi exæquârunt; ergo ubi Scriptura loquitur de annorum hebdomadâ, intelligendi veniunt septem anni solaribus pares, non verò anni septem lunares tantum.

Dices 2^o cum Huetio (2) 1^o: Solent prophetici sermones nebulis quibusdam involvi, et ut à ab intuendâ nudâ veritate profani vulgi oculis prohibeatur. 2^o Probabile est in annorum designandis intervallis ad eam anni formam spectasse Angelum, quæ popularis et per vulgata iis erat gentibus inter quas versabatur Daniel, ad quem tum verba faciebat. Itaque de annis chaldaicis, vel medicis, vel persicis debet Angelus intelligi. Qui anni solaresne fuerint, an lunares, incertum planè est, neque de iis quidquam à veteribus scriptoribus traditum. Ergo Africanus chronologicæ consultissimus artis, et antiquorum commentariis, quibus nunc caremus, instructus, reprehendendus non est, dum anni lunaris formam ab Angelo et Daniele usurpatam pronuntiat. 3^o Etsi anni lunares ope intercalationum solaribus æquales facti adhiberentur à Judæis ad determinandos dies festos, attamen populus ad usum civilem, præsertim post captivitatem Babylonicam, annos lunares vagos fortè usurpavit; quem admodum existimavit Scaliger apud Ægyptios et Arabes, plebem annis lunaribus incertis uti solitam, dum fixis sacerdotes; ergo, etc.

(1) Exod. 12, v. 18; Levit. 23, v. 5; Num. 28, v. 16.

(2) Exod. 13, v. 4, et cap. 23, v. 15; Deut. 16, v. 4.

(1) Exod. 23, v. 16; Levit. 23, v. 34; Num. 29, v. 12; Deut. 16, v. 9.

(2) Demonstr. Evang. prop. 9, cap. 8, n. 10.

Respondeo has omnes conjecturas haud satis solidis inniti fundamentis. Ostendit Petavius (1) annos chaldaicos, persicos, etc., pares nostris fuisse, et diebus 365 conflatos. Certè æra Nabonassari annis merè lunaribus non compingebatur. Africanus scribit tribus embolismis octavo cuique anno additis, lunares annos à Judæis factos fuisse pares solaribus. Fatetur ipse Huetius *in describendis annalibus solaris anni rationem fuisse adhibitam*, ac annum popularem Hebræorum, si ab ecclesiastico diversus fuerit, debuisse *certis temporibus ad easdem metas revocari, ad determinandos nimirum annos Schemitah sive remissionis, hoc est, sabbaticos, tum et Jubilæos*. Sed anno lunari usi sint populi quidam, parùm interest; Danielis hebdomades juxta morem loquendi Scripturis usitatum intelligendæ, ut non semel dictum est; atqui in Scripturis sacris nulla occurrit mentio hebdomadam annorum lunarium; hæc verba Levit. 25, v. 8: *Numerabis tibi septem hebdomadas annorum*, etc., de annis solaribus necessariò explicanda sunt; ergo, etc. Et verò cum Daniel initio capitis 9 loquitur de 70 annis desolationis Jerusalem, cum variis in locis annos regum Chaldæorum aut Persarum computat, de meris annis lunaribus à nemine explicatur. Ut quid ergo, ubi hebdomades annorum 70 constitutas et determinatas vaticinatur, de meris annis lunaribus esset accipiendus? ergo, etc.

Probatur secunda pars, nempe, si hebdomades annis solaribus constent, annum Artaxerxis vigesimum à morte patris computatum, illarum initium esse non posse. Nam si annis solaribus hebdomades constes, et simul anno Artaxerxis post mortem Xerxis vigesimo illarum initia adscribas, vel ut calculi constent, regum Persarum Artaxerxem subsequentium tempus cum Galatino produces, vel Xerxi octo annos cum Usserio, etc., detrahes, vel annis sabbaticis nodum solvere conaberis; atqui nullum horum dici potest. Et ut ab ultimo incipiam, 1º is nodus solvi nequit ope annorum sabbaticorum. Sic se habet illud systema. 1º Septimanæ Danielis in eo dicuntur annis sabbaticis singulæ terminari, et annus 33 æræ vulgaris, quo Christus mortuus est, ponitur sabbaticus; 2º annus 20 Artaxerxis cadit in annum quartum primæ hebdomadis, quæ tamen computatur, quia ut ratio haberi possit hebdomadis alicujus extremæ; hanc esse integram non oportet; 3º cum hæc ad diluendam

difficultatem non satis sint, additur in fine hebdomadis 69 mortuum esse Christum, hebdomadem verò septuagesimam ab aliis separandam et ad tempus belli Judaici esse referendam ita ut in ejus dimidio excidium Jerosolymitanum contigerit. Atqui hujusmodi systema propugnari non potest.

Nam 1º Angelus ita accuratè hebdomades computat, ut utriusque partis septimanæ ultimæ, quam in duas medietates dividit, rationem habeat; ergo hebdomas prima ab eo ut integra posita non fuisset, si ipsi tres quatuorve defuissent anni. 2º Tempora quæ ab Angelo in summam unam collecta sunt, non possunt ullo intervallo à se invicem separari; ergo septuaginta hebdomada ab aliis non avellenda, ut ad tempus belli Judaici transferatur. 3º Ait Angelus 70 hebdomadas constitutas *ut consummetur prævaricatio, et finem accipiat peccatum, et deleatur iniquitas*, etc., quæ omnia tum præsertim facta sunt, cum Christus mortem oppetiit, nec ad excidium Jerosolymitanum spectant. 4º Ex vaticinio post hebdomades 69 occidi debuit Christus, ac proinde intra septuagesimam. 5º Quid in illo systemate significant verba ista: *Confirmabit autem pactum multis*, etc., intelligi non potest. Nullum pactum confirmavit multis hebdomadâ illâ, quâ à Tito excisa sunt urbs et templum. 6º Cum annus æræ vulgaris 66, quo cœpit bellum Judaicum, non sit initium hebdomadis anno sabbatico terminatæ, nec proinde ejusmodi hebdomadis dimidium sit annus 70 æræ vulgaris, quo Jerusalem et templum conflagrârunt, cogitur illius systematis auctor initium belli Judaici biennio differre, atque Jerosolymorum excidium anno æræ vulgaris 72 alligare; quod accuratæ temporum rationes minimè patiuntur. Vide Petav. de Doct. Temp. lib. 11, cap. 17, Tillemontium, etc.

2º Regum Persarum Artaxerxem subsequentium tempora malè producit Galatinus. V. g., Dario Notho annos 29 regni tribuit, quem ex canone Ptolomæi, et ex aliis indubitatis monumentis constat non ampliùs quàm 19 annis imperio esse potitum. Præterea certissimum est anno ante æram vulgarem 451, esse alligandum initium belli Peloponnesiaci. Scribit autem Thucydides lib. 4 anno post illud bellum inceptum septimo Artaxerxem obiisse. Ergo anno ante æram vulgarem 425, Artaxerxis mors assignanda. Sed ab anno 425 ante æram vulgarem, usque ad annum ante eandem æram 331, quo constat commissum esse Arbëlicum certamen, et persicum imperium desiisse,

(1) De Doctr. Temp. lib. 3, cap. 4 et seqq.

fluxerunt tantum anni 94, ubi tamen ex Galatino sex ferè supra centum essent numerandi.

3° Anni octo Xerxi detrahi nequeunt, seu anno regni sui 21 inchoato, non 12 Xerxes ab Artabano fuit interemptus. Nam tot monumentis adstruitur Xerxem viginti annis integris imperio potitum, ut id negari posse non videatur. Pleraque his verbis complexus est Possinus in dissertat. quæ extat in Menoch. Supp. de Danielis hebdom. n. 18 : « Ne id (nempe Xerxem 12 tantum annis regnasse) admittam, inquit, deterret 1° chronologorum veterum (Ptolomæi in canone, Diodori Siculi, Eusebii, etc.) ac recentiorum unanimis consensus in assignandis regno Xerxis annis saltem viginti. ... Deterret 2° scriptorum gravissimorum, Dionis, Clitarchi, Heraclidis, Josephi Hebræi, Diodori Siculi, Plutarchi, aliorumque multorum concursus affirmatio aientium Themistoclem (qui ex Usser. Lancel. Bossuet. Artaxerxem adiit) ad regem Persarum illum ipsum, quem ad Salaminam vicerat et ex Græciâ expulerat, transfugisse. Non alius is, ut patet, quàm Xerxes fuit, quem etiam plerique illorum nominant, clarè affirmantes, Xerxis adhuc viventis et regnantis, fugatum Athenis Themistoclem, patrocinium quæsivisse. Adstruunt fidem istorum asserta quædam ab auctoribus antiquissimis vitæ historiæque Themistoclis, ex publicâ memoriâ notata, ut quod Diodorus lib. 11, fusè ac sigillatim refert, quemdam Lysithidem Asiaticum, hominem ditissimum, qui gratiam sibi magnam apud Xerxem comparaverat, epulis ei et universo ejus exercitus copiosissimis præbendis, quando is movens in Græciam Hellespontum transiit, hospitio et amicitia veteri junctum, Themistocli ab Atheniensibus expulso, huic impensè tum favisse suffragatione benevolâ, multumque ad hoc contulisse, ut audientiam illi facilem rex magnus daret. Non igitur is fuit Artaxerxes nunquàm à Lysithide exceptus ; sed Xerxes Artaxerxis pater, ejus usus insigni beneficio, tum infestus Græciam peteret. Itemque quòd Plutarchus narrat in vitâ Themistoclis, hujus admissionis ad Xerxem magnâ ex parte ministrum fuisse Artabanum prætorianorum Xerxis ducem, qui proditione deinde impiâ Xerxem ipsum obtruncavit, ac statim post, dum Artaxerxem quoque conaretur occidere, strenuè ad hoc præoccupatus et peremptus sit. Unde est evidentissimum non potuisse Artabanum talem operam The-

« mistocli præstare, nisi Xerxe adhuc regnante. » Adde quod Xerxis mors anno regni ejus 12 non potuerit alligari, quin annis 48 imperâsse filium ejus Artaxerxem statueretur. Etenim ut modò ex Thucydide collegimus, Artaxerxes obiit anno ante æram vulgarem 423, à quo si retexueris annos 48, occurreret annus ante eandem æram 473, qui est 12 Xerxis. Atqui Artaxerxes regnavit tantum 40, ut tradunt Diodorus Siculus lib. 12, Eusebius in Chronico latino, et alii plerique, vel ad summam 41, ut scribunt Ptolomæus in canone, S. Clemens Alexandr. lib. 1 Strom. et idem Eusebius in Chronico græco; ergo.

Dices. Narrat Thucydides (1), lib. 1, Themistoclem Athenis profugum in Persidem trajecisse, quo tempore Athenienses Naxum obsidebant, additque ipsum ad Artaxerxem Xerxis filium, *qui nuper regnare incæperat*, νεωστὶ βασιλεύοντα, litteras tum dedisse. Themistoclem ad Artaxerxem confugisse tradunt etiam Charon Lampsacenus et annales Persici apud (2) Plutarchum in Themistocle, necnon Cornelius Nepos (3). Atqui fuga Themistoclis in annum 12 Xerxis ante æram vulgarem 473 conjici debet : 1° enim Eusebius in Chronico ait eum in Persas fugisse olympiadis 76, anno 4, qui est ipsis annus 12 Xerxis. 2° Diodorus (4) Siculus ad annum 2 olympiadis 77 Themistoclis fugam lib. 11 referens, parum ab Eusebio discrepat, imò potest facilè cum eo conciliari. Quippe Themistocles fertur anno integro in Perside vixisse antequàm regem compellaret, quòd persicè vellet illum affari; possumus igitur Eusebium interpretari de Themistoclis in Persidem transitu; Diodorum verò de tempore quo post annum integrum idem Themistocles Artaxerxem adiit. 3° Naxii obsidebantur juxta Thucydidem cum Themistocles ad Persas se recepit; expugnati sunt porrò illi ante victoriam ad Eurymedontem de Persis ab Atheniensibus reportatam, quam olympiadis 77 anno 3 (ante æram vulgarem 470) adscribit Diodorus lib. 11. Ergo Xerxes anno imperii sui 12 ante æram communem 473 vitâ excessit, tuncque regnare orsus est Artaxerxes Longimanus, à cujus anno vigesimo currunt 70 hebdomades. Hæc sunt opinionis Usserii, Lancel. et Bossuetii fundamenta.

Nego consequentiam. Vel nihil evincit ob-

(1) Thucyd. p. 89 et 90, edit. Francof. 1594.

(2) Plutarch. edit. Paris. 1624, t. 1, p. 125.

(3) Corn. Nepos in Themist. cap. 2.

(4) Diodor. Sicul. edit. Hanov. 1604, part. 2, p. 44 et seqq.

jectio, vel id unum evincit, Artaxerxem scilicet anno Xerxis 12 fuisse à patre socium regni factum. Nam tota vis argumenti nititur auctoritate Eusebii et Diodori, ex quibus solis habetur quo anno Themistocles ad Persas appulerit. Atqui si ex illis arguere velis Xerxem anno regni sui 12 necatum, et Artaxerxem sine comite tum regnare orsum, nihil efficies. Quid ita? quia Eusebius (1) et Diodorus (2) Siculus annos regni unum et viginti inchoatos Xerxi dissertissimè tribuunt, pluribus annis hunc post Themistoclis fugam regnasse scribunt, atque Themistoclem ad Xerxem illum ipsum quem Salaminæ vicerat, confugisse conceptis verbis testatur Diodorus. Quanquàm igitur, sicut Eusebius, ita et Diodorus apertè traderet, quæ ipsi in objectione adscribuntur, non posset ex eorum testimonio stabiliri, Themistoclis in Persidem transitum, si Xerxem antea mortuum supponas, anno illius regis 12 affigendum. Etenim, in eâ hypothesi non sibi constarent illi testes, et incertum maneret an de Themistoclis fugæ anno magis quàm de annis imperii Xerxis iis esset credendum. Ergo non evincit objectio Artaxerxem post mortem Xerxis, anno regni ejus 12 solum regnasse; quòd si illa quidquam probet, hoc unum, Artaxerxem nimirum anno Xerxis 12 fuisse in consortium supremæ auctoritatis à patre cooptatum; de quo inferiùs disseremus.

CONCLUSIO III. Nec quinto, nec septimo regni sui anno Xerxes socium sceptri Artaxerxem fecit; ruunt proinde Tirini, Abrami et Turneminii conjectationes de Septimanarum initio. Probatur prima pars, Xerxem videlicet anno imperii sui quinto in regni auctoritatis consortium Artaxerxem non cooptasse. Si enim ut Tirinus et Abramus conjectantur, anno 5 regni Xerxis Artaxerxes factus esset consors potestatis supremæ, ita ut ab hac primâ coronatione annus ejus vigesimus, quo Nehemias missus est, computandus sit; vel annus Artaxerxis 7, quo Esdras Babylone profectus est, 1 Esd. 7, ab illâ cooptatione etiam numerabitur, vel ducetur à morte Xerxis, cum nempe Artaxerxem solus potiri rebus incœpit. Atqui neutrum dici potest. Non primum; quia Artaxerxes, ut deinde dicemus et à Tirino Abramoque probatur, vivente Xerxe non tulisset decretum 1

Esdræ 7 relatum, in quo ipse solus loquitur et rex regum appellatur. Non secundum: quia Artaxerxis annus septimus quo Esdras Jerosolymas advenit, ab initio Artaxerxis post patris necem sine socio regnantis desumatur, annus verò ejusdem vigesimus profectioni Nehemiæ adscriptus ab anno 5 Xerxis putandus sit, tenendum erit cum Tirino et Abramo Esdras nonnisi duobus post Nehemiam annis Jerosolymas advenisse; quippe cum Xerxes viginti annis completis regnaverit. Atqui Esdras Jerosolymis aderat eodem anno quo Nehemias ad hanc urbem accessit; quod ex cap. 8 lib. 2 Esdræ manifestè colligitur. Nam postquàm cap. 2, v. 1, dictum fuerat Nehemiam *mense primo* Susis esse profectum, ei cap. 6, v. 15. *completum esse murum vigesimo quinto die mensis Elul* (id est, mensis 6), *quinquaginta duobus diebus*; cap. 8, v. 1 et 2, sic pergitur: « Venerat autem mensis septimus; filii autem Israel erant in civitatibus suis. Congregatusque est omnis populus quasi vir unus, ad plateam quæ est ante portam aquarum; et dixerunt ESDRÆ SCRIBÆ ut afferret librum Legis Moysi, quam præceperat Dominus Israeli. Attulit ergo ESDRAS SACERDOS legem coram multitudine virorum et mulierum cunctisque qui poterant intelligere, in primâ die mensis septimi. » Ex quibus hoc argumentum conficitur: Ex ejusmodi locorum serie et contextu liquet mensem septimum cap. 8 lib. 2 Esdræ memoratum ad eum annum pertinere quo Nehemias Jerusalem advenit; atqui hoc mense septimo Esdras Jerosolymis jam aderat; ergo, etc.

Probatur secunda pars, nimirum Xerxem anno imperii sui 7 in socium regni Artaxerxem non assumpsisse. Namque non adhibenda conjectatio quæ historiâ sacrâ non nititur, et profanæ repugnat; atqui sic se habet conjectura Turneminii de quâ disputamus. Historiæ profanæ repugnat; siquidem in eo tota innititur, transitum Xerxis in Græciam cujus occasione Artaxerxes regni particeps est effectus anno imperii Xerxis septimo, non quinto, esse annectendum; at id certissimis historiæ profanæ monumentis refellitur. Enimverò si constet initium Xerxis mortuo Dario Hystaspide imperantis, anno ante æram vulg. 485 esse alligandum; si constet etiam ipsum à Græcis Salaminæ superatum fuisse anno ante eandem æram 480, mense septembre; id liquidò consequetur, Xerxem, cum primo vere istius posterioris anni Sardibus in Græciam trajecit, annum regni sui quintum nondum explevisse. Atqui

(1) Chron. Lat. lib. 1 et 2, edit. Amstelod. 1638, p. 150 et 151, et Chron. Græc. ibid. p. 53, et 166, 167.

(2) Lib. II, pag. 43, 44, 53, etc., edit. Hanov. 1604.

utrumque constat. Ac 1° quidem Xerxem, mortuo patre, non nisi anno ante æram vulgarem 485, regnare coeptum, triplici invicto argumento adstruitur. Primum ex anno quo Marathonè pugnatam est, ducitur. Probat evidenter Petavius (1), consentiuntque insignes quique chronologi, pugnam Marathoniam anno 490 ante æram vulgarem mense septembre commissam fuisse, atque errare Dionysium Halycarnasseum qui hanc ad annum præcedentem lib. 5 refert. Porro scribit Herodotus lib. 7 initio, Darium post hanc pugnam triennio toto majorem adversus Græcos apparatus instruxisse; quarto verò anno defecisse Ægyptum, sequente autem anno à defectione Ægypti mortuum esse Darium; quibus efficitur mortem Darii anno à pugna Marathonîâ quinto, ante æram vulgarem 485 esse adscribendam, ac proinde Xerxem hoc anno coronatum fuisse.

Alterum argumentum pariter ex annis quibus Darius imperio fruitus est. Is Quandonam regnare incœperit occiso pseudo-Smerdi, tribus eclipsibus Petavius determinat lib. 10, cap. 16 et 18 partis 2 operis de Doctr. temp. Prima contigit die 16. Julii anno 7 Cambysis ante æram vulgarem 525. Secunda visa est die 19 Novembris anno 20 Darii, ante æram vulgarem 502. Tertia denique, die 25 Aprilis anno ejusdem Darii 31 ante æram vulg. 491. Quibus Darii Hystaspidis initium figitur inter 19 diem Novembris anni 522 ante æram vulgarem, et diem 25 Aprilis anni proximè subsequentis, ante æram 521. Nam si ante mensem Novembrem anni 522 regnare cœpisset Darius; ergo mense Novembre anni 502, non vigesimum sed vigesimum primum egisset regni annum. Si autem post mensem Aprilem anni ante æram vulgarem 521 ejus regni initium differretur; ergo mense Aprili anni 491 ante illam æram nondum attigisset 31 regni sui annum. Exploratum itaque habemus initium regni Darii Hystaspidis circa finem anni ante æram vulgarem 522, aut circa principium anni sequentis 521. Rerum autem series ac temporum ratio aliunde postulat ut in annum ante æram vulgarem 521 incuntem potius quàm in 522 desinentem, illud conjiciatur Darii initium. Regnavit porro Darius ex Herodoto lib. 7, cap. 4, Ptolomæo in canone et aliis, annos 36 completos. Igitur ex annis ante æram vulgarem 521, detrahe annos regni Darii 36 integros, occurret principium anni ante æram vulgarem 485, mortui Darii simul et ini-

(1) De Doctr. temp. parte 2, lib. 10, cap. 22, et Ration. temp. part. 2, cap. 11.

tio Xerxis assignandum. Quòd si ad finem anni ante Christum 522 initia Darii cum Turneminio referas, nihil in gratiam ejus opinionis consequeris. In hâc hypothesi mors Darii non ante Decembrem anni ante æram vulgarem 486 contingere potuisset; ac proinde nullum ibi, quod ad rem ipsam contingit, discrimen deprehendetur.

Tertium momentum desumitur ex anno quo Artaxerxes Longimanus è medio excessit. Auctor est Thucydides lib. 4 eum mortuum esse anno 7 post incœptum bellum Peloponnesiacum; atqui bellum istud anno 451 ante æram vulgarem verno tempore inchoatum est, nemine dissidente; ergo post vernum tempus anni ante æram vulgarem 425, vitam finivit Artaxerxes. Regnavit porro à morte patris, ut supra probatum est, fateturque Turneminus, 40 annis; Xerxes verò annis 20. Hos igitur annos, quorum summa est 60, adjice annis 425 ante æram vulgarem, deprehendes initia regni Xerxis anno ante illam æram vulgarem 485 esse affigenda. Ergo triplici invicto momento constabatur Xerxem nonnisi anno ante æram vulgarem 485, post mortem Darii rebus potitum.

2°. Non minùs certum est Xerxem regem à Græcis ad Salaminam victum fuisse anno ante Christum 480, die 25 Septembris. Thucydides enim lib. 1 affirmat Persas Salaminæ cæsos decennio exacto post Marathoniam pugnam, quam anno 490 commissam fuisse jam diximus. Præterea quo anno Xerxes ad Salaminam prælio decertavit, celebrati sunt ludi olympici; unde conficitur anno 1 ineunte olympiadis 75 actum fuisse illud certamen. Hic autem annus est 480 ante æram vulgarem. Postremò, tunc visa est eclipsis quæ non nisi ad hunc annum 480 potest referri. Ergo clades Salaminia contigit anno 480 ante æram vulgarem. Cum igitur Xerxes, ut modò ostendimus, anno ante eandem æram 485 regnari orsus sit, annum regni sui quintum non excesserat, sextum non attigerat quando in Græciam Sardibus profectus est. Non igitur anno regni sui 7 Xerxes in Græciam trajecit, uti Turneminus opinatus est.

Atque hæc quidem genuinis temporum rationibus adeo congruunt, ut ad certiores ipsius Turneminii calculos quadrent. Is pugnas Marathoniam et Salaminiam, quod mirum videri potest, in tabulis chronologicis silet. Verùm in illis tabulis Xerxi annos regni 20 cum uno duplicive mense tribuit; Artaxerxi autem à morte patris regnanti annos unum et quadraginta inchoatos; qui anni, si compingantur in

summam, efficient annos 60 cum aliquot mensibus. Jam verò Artaxerxis mortem alligat Turneminius anno 424 (meliùs dixisset 425) ante æram vulgarem. Itaque si annis ante æram vulgarem 424 adjiciamus illos Xerxis et Artaxerxis 60 annos cum aliquot mensibus, in verum initii Xerxis annum incidere debemus. Atqui hoc calculo perducimur ad ipsum annum ante æram vulgarem 485 desinentem, à cujus principio regni Xerxis initia esse accersenda dicimus. Cum porrò vir doctissimus Xerxis transitum anno ante eandem æram 484 annectat, ex ejus calculis quid amplius efficitur quàm quod adversus eum contendimus, nempe Xerxem non jam quinto regni sui anno, sed quarto, in Græciam trajecisse?

Similia repetit in suâ Dissertatione de 70 Danielis hebdomadibus, et quidem in eo ipso argumento quod affert ad vaticinii *fidem chronologicis rationibus adstruendam*. Scilicet Artaxerxem Longimanum mortuo patre quadraginta integros annos regnasse ex Thucydide statuit, ejusque mortem alligat anno septimo belli Peloponnesiaci, quem ait esse *quartum octogesimæ octavæ olympiadis* (ante æram vulgarem 424). Hinc bene colligit « Artaxerxem patre mortuo « solum regnare cœpisse anno Nabonassaris « CCLXXXIII juxta canonem Chronicum, olympiadis septuagesimæ octavæ quarto anno. » Verùm mendosè interpretatur hunc eundem annum *Artaxerxis primum*, esse *quadragentesimum sexagesimum septimum ante Christum*; debuisset dicere quadragentesimum sexagesimum quartum. Nam annus ducentesimus octogesimus tertius æræ Nabonassaris, olympiadis septuagesimæ octavæ quartus, et ante annum quartum olympiadis septuagesimæ octavæ quadragessimus, non est 467 ante æram vulgarem, sed 464, ut facili et certissimo calculo cuique perspicere est. Sed ab hoc anno ante Christum 464, si retexantur unus et viginti anni inchoati quibus Xerxes imperii claves tenuit, incurremus iterùm in annum ante æram vulgarem 485, Xerxis initio ut docui mus, adscribendum.

Cæterùm, illa non habenda sunt tanquàm meræ in calculis aberrationes, quæ ut facilè excidunt, ita nullo negotio emendantur. Ex supra dictis liquet doctissimum virum ipsâ historiæ fide eo ductum ut annis 60 Xerxis et Artaxerxis regna complecteretur, istiusque mortem affligere anno belli Peloponnesiaci septimo, qui omnibus latentibus verno tempore anni ante æram vulgarem 425 inœcepit. Quibus ita constitutis, nec licet initia Xerxis priùs anno ante

æram vulgarem 485 ponere, nec ejus in Græciam transitum ad annum ejusdem septimum conjicere. Ergo Turnemini conjectura historiæ profanæ adversatur.

Jam verò eadem hypothesis in sacrâ historiâ non innititur. Hanc firmare conatur Turneminius pluribus Esdræ locis ex quibus id sibi videtur efficere, Esdram et Nehemiam eodem die, mense, et anno Jerosolymas advenisse. Atque fatendum quidem eodem mense et die, si eodem anno. De anno igitur tota concertatio est. Quæ autem sibi et Abramo communia Turneminius in hanc rem profert, aptius discutientur ubi objectiones solvemus. Hic satis erit ostendere duo momenta, quæ ut ibi propria et evidentissima præ cæteris urget, minùs firma esse. Primum his verbis explicat in laudatâ Dissert. « Postquam, inquit, advenère (Jerosolymam. « Esdras et Nehemias) ad Esdram deferitur « delictum eorum qui matrimonia cum uxori- « bus alienigenis, spretâ Dei lege, contraxe- « rant. Confer capita nonum et decimum libri « primi (Esdre) cum capite nono libri secundi, « et fatebere de eadem separatione ab uxoribus « alienigenis, de eadem renovatione pacti cum « Deo, in utroque agi. » Alterum momentum continenter sic exponit: « Præterea lege at- « tentius caput octavum libri secundi, et vul- « garem opinionem quæ Esdram tredecim an- « nos ante adventum Nehemiæ Jerusalem com- « moratum statuit, repugnare Scripturæ li- « quidò cognosces. Num totis tredecim annis « nulla Esdræ se obtulisset occasio legis expli- « candæ et erudiendi populi? an sui muneris « partem adeò necessariam et præcipuam omi- « sisset? Manifestè apparet octavum hoc caput « perlegenti, populum legis lectione tanquàm « re novâ et incognitâ perculsum. Igitur.... « demonstratum est ex sacrâ profanâque his- « toriâ, quantum eventus historici demonstrari « possunt, Nehemiam Esdramque Jerusalem « venisse eodem anno, qui Artaxerxis et septi- « mus et vigesimus diversâ ratione numeraba- « tur. » Hæc vir doctissimus. Atqui utrumque illud argumentum nullum est. Atque ut à postremo incipiam, nego ex cap. 8 libri 2 Esdræ inferri tum primum Esdram de instructione populi sategisse; nego *populum legis lectione tanquàm re novâ perculsum* ibi videri. Ex eo capite apparet quidem Judæos ab hostibus lutos mœnibus reffectis, festum Tabernaculorum eo ritu coluisse, quo ab ætate Josue filii Nun, etiam sub piissimis regibus celebratum non fuerat. Apparet quoque populum ad solemnitatem con-

gregatum, diebus septem speciali apparatu ac singulari studio ab Esdrâ et à levitis fuisse institutum. Apparet denique hunc ad legis lectionem additasque ab Esdrâ expositiones auribus attentis adhibitis, quæ dicebantur intellexisse, in insolitos pietatis sensus exarsisse, præ contritione cordis flevisse. An verò ut illa contingerent necessum fuit ut legis lectio in se spectata populo visa fuerit tanquàm res nova et incognita?

Quod attinet ad pactum cum Deo, et separationem ab uxoribus alienigenis, apud Esdram et Nehemiam memorata, et quibus primum argumentum desumitur, hæc valdè nocent, non prosunt systemati quod refellimus. Namque si, ut fert sententia communis interpretum, separatio et pactum de quibus Esdras, non sint quid idem cum pacto cujus Nehemias meminit, profectò Esdras et Nehemias eodem die, mense, et anno Jerosolymas non adveniunt; uterque enim eo ipso, quo venit, anno, pactum cum Deo curavit iniri. Atqui separatio et pactum quorum mentio fit cap. 9 et 10 libri 1 Esdr., non sunt quid idem cum pacto de quo Nehemias, 2 Esdr. 9, mentionem habet. Illa quippe in unum confundenda non esse arguunt circumstantiæ utrinque insigniter dissimiles. 1° In libro Nehemiæ uxores alienigenæ non separantur, procul dubio quia non ita pridem ab Esdrâ ejusmodi separatio facta fuerat. 2° Subsignatores pacti apud Nehemiam sunt Nehemias Athersata et alii multi ab iis qui nominantur cap. 10 Esdræ plerumque diversi. Num inprimis Nehemias Athersata et mœnium erector ab Esdrâ prætermisus fuisset? 3° Hæc pacta eodem tempore sancita non sunt. Fœdus enim de quo Nehemias loquitur, initum est die 24 mensis septimi, festo Tabernaculorum celebrato, ut ex v. 1, cap. 8, et ex v. 1, cap. 9 inter se collatis manifestum est. Contra verò vigesimâ die mensis 9 acta sunt quæ Esdras commemorat. Lege versiculum 9 cap. 10 Esdræ. 4° Apud Esdram cap. 10, v. 2 et 3, Sechenias filius Jehiel de filiis Elam proponit fœdus nec quisquam eum loquentem comitatur; apud Nehemiam nihil de Secheniâ, loquuntur alii v. 5. 5° Denique in libro Esdræ, cum fœdus ineundum primò propositum est, non aderat tota gens Judaica, convocata in hunc finem cap. 10, v. 7: *Convenit tribus diebus mense nono*; at apud Nehemiam, cum de pacto primum actum est, cunctus populus jam erat congregatus, nempe mox celebrata fuerat festivitas tabernaculorum, ad quam convenerant

universi. Ergo separatio et pactum, quæ Esdras refert, non sunt quid idem cum fœdere quod apud Nehemiam legitur; proindeque magis refellitur sacrâ historiâ quàm adstruitur hypothesis Turneminii.

Probatur tertia pars conclusionis, rueret scilicet Tirini, Abrami, Turneminiique hypotheses de 70 hebdomadam initio. Namque, uti ex ejusmodi systematum solâ expositione liquet, hypothesis Tirini et Abrami hæc conjecturâ potissimum fulcitur, Xerxem anno imperii sui quinto Artaxerxem filium suum in regni comitem assumpsisse; fundamentum verò hypothesis Turneminii istud est, cooptationem illam Artaxerxis factam fuisse anno Xerxis septimo. Ergo, si nec quinto, nec septimo regni Xerxis anno Artaxerxes consortium supremæ potestatis electus est, uti hactenùs evicimus, ruunt, quod consequens est, hypotheses prædictæ de initio septimanarum Danielis.

Sed præterea à verâ temporum ratione in quibusdam nonnihil eadem systemata defleunt. 1° Cum Artaxerxes positus illis systematibus, primum coronatus fuerit antequàm Xerxes in Græciam Sardibus proficisceretur, quod anno 480 ante æram vulgarem primo vere contigit: sequitur annum vigesimum Artaxerxis ab illâ coronatione computatum desinere ante vernum tempus anni ante æram vulgarem 460. Neque enim referre licet solemnem hanc Artaxerxis ex more persico cooptationem ad illud ipsum momentum, quo Xerxes Sardibus egressus est ut moveret Abydum versùs. Ergo mensis Nisan, quo sermonem ad ædificandum, seu facultatem mœnium erigendorum 2 Esdr. 2, Nehemias obtinuit, ad initium anni Artaxerxis à primâ coronatione vigesimi, seu ad annum ante æram vulgarem 461, pertinet; unde si ducas septuaginta hebdomadas seu 490 annos, incidet in mensem Nisan anni 30 æræ vulgaris ita ut Christus uno anno integro post elapsam ultimam hebdomadam mortuus esset, si eum crucifixum fuisse anno illius æræ 31, die 23 Martii cum Turneminio statuas. Quòd si mensem Nisan, quo Nehemias missus est, ad finem anni ejusdem vigesimi Artaxerxis referre malueris, ita ut sermo ad ædificandum et Nehemiæ profectio ad mensem Nisan anni ante æram vulgarem 460 contingat, uti Turneminio in tabulis chronologicis, et Tirino placet; adhuc timendum erit ne fortè post clausas hebdomadas Christi mors obtigerit. Quapropter voces hebræas *min motza dabar*, ab exitu sermonis, Turneminii interpretatur à completo ser-

mone, statuitque à reffectis muris die 25 mensis Elul, Augusto respondentis, hebdomadas currere. Sed hæc ejus interpretatio, quam nullâ ratione stabilire satagit, constanti vocum hebræarum significationi repugnat, ut præ cæteris locis videre est Genes. 23, v. 50, Esther. 1, v. 1 et 19, et cap. 7, v. 8, etc., ubi exitus verbi nihil aliud esse potest quàm sermonis prolatio. Propositæ difficultati occurrit Tiranus aliâ conjecturâ quam modò expendemus.

Omitto in tabulis chronologicis Turnemini coherenter ad ea quæ in Dissert. suâ tradit, Xerxis transitum anno 481 ante æram vulgarem, ineunte vere, affigi; ex quo sequeretur finem anni vigesimi Artaxerxis à primâ ejus coronatione in annum ante æram vulgarem 461 incidere, proindeque hebdomadas claudi anno vulgaris æræ 30. Omitto, inquam, id errati, quippe quod ejus systematis non est necessaria appendix.

2° Positis iisdem systematibus Christi mors ad medium septuagesimæ hebdomadis, seu ad annum ejus quartum non alligatur; quod vaticinii verbis minùs esse consentaneum jam observavimus; ergo.

Reponit 1° Turneminius, hebræa posse reddi, *in dimidiatâ hebdomade*, seu in unâ hebdomadis medietate. Quod verum est, si ad solam vim vocum spectes; sed aliud exigit sententiarum series et contextus, ut loco mox citato dictum est. Reponit 2° per ipsum licere ut Tirini utamur conjecturâ, qui perfectæ Jerosolymorum ædificationi tres annos esse insumptos ex Josepho *Antiq.* lib. 2, cap. 5, colligit, et ab opere completo 70 hebdomadas computat. At 1° hæc conjectura hebræas voces *min motza dabar*, significare à completo seu ad exitum perducto sermone, gratis et falsò ponit, ut vidimus. 2°. Testis est Nehemias tantâ diligentia populum operi incubuisse, ut intra 52 dies muri et platea fuerint absoluta. Vide 2 Esdr., cap. 6, v. 15, et cap. 8, v. 1. Insumpti igitur non sunt tres anni ad extruendum quidquid ad civitatem præcipuè spectabat, atque illud inprimis quod in vaticinio v. 25, disertè fuerat memoratum. 3° Locus Josephi quo Tiranus conjectationem suam firmat, tot nævis scatet, ut nulli usui esse posse videatur. Ait Josephus anno 25 regni Xerxis Jerusalem rursus à Nehemiâ ædificari cœptam atque opus vigesimo octavo ejusdem anno absolutum fuisse. Atqui tamen certum est non ampliùs viginti et uno annis inchoatis Xerxem rebus potitum; ergo.

3° Eadem systemata postulant Christi mor-

tem seriùs anno vulgaris æræ 31 non poni; atqui probabilius est Christum anno æræ illius 33 mortem oppetiisse, ut modò dicemus; ergo.

SOLVUNTUR OBJECTIONES. — Objicies 1° cum Abramo: lib. 2 Esdr. cap. 7, v. 65, sic habetur: *Et dixit Athersata eis, ut non manducarent de Sancto sanctorum, donec staret sacerdos doctus et eruditus*. Atqui Athersata ibi est Nehemias; ergo priùs quàm Esdras sacerdos adveniret, Nehemias jam aderat Jerosolymis. Si enim advenerat Esdras, *quis expectandus fuit doctior, eruditior, omni denique laudis genere perfectior*, etc? Nego minorem. Ibi recenset Nehemias quæ ad reditum sub Zorobabele spectant, ac nomine *Athersata* seu gubernatoris Zorobabelem ipsum designat. Confer hunc locum cum versu 63 cap. 2 lib. 1 Esdræ, in quo jam diximus pag. 343 Zorobabelem illo nomine donari.

Objicies 2° cum eodem: Lib. 1 Esdræ cap. 6, v. 14, dicitur: *Ædificaverunt et construxerunt jubente Deo Israel, et jubente Cyro, et Dario, et Artaxerxe regibus Persarum*. Et cap. sequenti v. 1 et 6, additur: *Post hæc autem verba in regno Artaxerxis... ipse Esdras ascendit de Babilone*. Ergo, concludit Abramus, non priùs ascendit Esdras quàm sub Artaxerxe Jerusalem ædificaretur. *Restat igitur ut Nehemiam priorem in Judæam venisse fateamur*.

Nego conseq. Eò loci manifestum est agi de templi solius extructione, non verò de ædificatione mœnium Jerusalem; quisquis igitur sit ille Artaxerxes, de quo alibi diximus, nihil hîc favet opinioni Abrami.

Objicies 3° cum eodem. Quæ lib. 2 Machab. cap. 1, de Sacrificiis à Nehemiâ post templi altarisque extructionem oblatis, de ignis sacri inquisitione et miraculo, de donis et muneribus sacerdotibus ob illud prodigium à Persarum rege concessis, enarrantur, cum dedicatione templi et decreto Artaxerxis de quibus disserit Esdras cap. 6 et 7, valdè congruunt. Nehemias adjectis quibusdam templo ædificiis illam, cujus Esdras meminit, dedicationem peregit; sed Esdras nonnisi post hanc dedicationem venit, ut pater ex cap. 7; ergo, etc.

Respondeo Nehemiam qui muros erexit, illam de quâ Esdras loquitur dedicationem, certo certiùs non peregisse. Enimverò hæc sunt verba Esdræ, cap. 6, v. 15: *Et compleverunt domum Dei istam (seniores Judæorum), usque ad diem tertium mensis Adar, qui est annus sextus regni Darii regis*. Et uno tenore additur v. 16 et seq.: *Fecerunt autem filii Israel sacerdotes et levitæ et reliqui filiorum transmigrationis, dedi-*

cationem domûs Dei in gaudio, et obtulerunt in dedicationem domûs Dei vitulos centum, etc. Ex quorum connexionione et contextu liquidum fit dedicationem hanc templi anno 6 Darii Hystaspidis celebratam fuisse. Unde sequitur 1° decretum Artaxerxis memoratum cap. sequenti, datum fuisse Esdræ plus quàm 57 ab illâ dedicatione annis, ac proinde ad ejusmodi decretum simul et ad hoc festum referri non posse quæ lib. 2 Machab. cap. 1, edisseruntur. Sequitur 2°, eandem dedicationem esse actam longè ante adventum non solum Esdræ, sed etiam Nehemiæ ab Artaxerxe missi; cùm Darius regnaverit 56 annis, Xerxes filius ejus viginti, cui Artaxerxes successit. Sequitur 3°, vel Nehemiam libri 2 Machab. eum non esse qui mœnia erexit, vel sacrificia quæ templo et altari ædificatis ille Nehemias obtulit, et miraculum ignis sacri è cœno erumpentis, ad tempus dedicationis ab Esdrâ memoratæ referri non posse. Quis porrò sit is Nehemias? quo spectent illa sacrificia, an ad festum aliud à Nehemiâ murorum instauratore celebratum? quo tempore ignis sacer conquisitus, et è luto eruperit? hæc conjectationibus interpretum relicta sunt. Verisimile non videtur sacerdotes post templum ædificatum, de investigando igne sacro tot annos non sategisse, donec adesset Nehemias ab Artaxerxe missus. Referantur ergo ad dedicationem templi anno Darii sexto celebratam, tum illa disquisitio, tum alia quæ in citato cap. 1 libri 2 Machab. enarrantur. Nehemiam qui ibid. memoratur, eum esse conjicimus, qui lib. 1 Esdr. cap. 2, v. 2, inter eos qui eum Zorobabele populum è captivitate reduxerant, secundus à Josue filio Josedeck tunc summo pontifice recensetur.

Objicies cum Abramo et Turneminio. Esdras ante Nehemiam Jerosolymas non advenit. Nam poni nequit Esdram virum summum, legis peritissimum, ut ex Scripturis patet, ad auctoritatem maximam ab Artaxerxe (1 Esdr. 7) provectum, festâ lege præscripta annis tredecim prætermitti passum esse, abususque portentosos non emendasse, aut ne emendati recrudescerent non obstitisse. Atqui si Esdras ante Nehemiam venisset, etc. 1° Enim festum lege præscriptum à populo omitti passus esset, sollemnes scilicet Tabernaculorum dies, ut ex cap. 8, libr. 2 Esdræ; v. 17, perspicuum est: *Habitaverunt in Tabernaculis, non enim fecerant à diebus Josue filii Nun taliter filii Israel usque ad diem illum.* 2° Abusus portentosos legi maxime contrarios non emendasset, aut emendatos

rursus obtinere sivilisset, quotquot nempe Nehemiæ superfuerunt resecandi. Ii autem maximi erant et nequaquàm ferendi, præsertim de fœnore, à quo Deus, Deut. 23, v. 19 et 20, Judæos cum fratribus suis abstinere jusserat. Etenim usuræ apud Judæos Nehemiæ tempore adeò acerbè exigebantur, ut plebs Judaica ad extremam paupertatem redacta, cogeretur, omnibus sibi per fœnatores ereptis, filios suos et filias divitibus vendere, ut acciperent *pro pretio eorum frumentum*, 2 Esdr. 5, v. 2; ergo.

Distinguo majorem. Poni nequit Esdram nullos omninò abusus emendasse, etc., concedo; poni nequit aliquos ab eo non correctos, nego, ac pariter distingo min. Itaque contendimus Esdram multa emendasse antequàm Nehemias adveniret: v. g. ante adventum separavit à filiis Israel uxores alienigenas, ut supra probatum est. Hinc sub Nehemiâ renovatum quidem est pactum cum Domino; promiserunt Judæi futurum ut non darent filias suas populo terræ, et filias eorum non acciperent filiis suis. Sed opus non fuit ut ulla separatio ab uxoribus alienigenis tunc injungeretur, quippe quæ non ita pridem Esdræ curis peraeta fuerat. Dubitandum non est quin aliâ multa ipse emendaverit, de rebus præsertim ad cultum divinum pertinentibus. Quòd si non omnes pravæ consuetudines inductas resecuerit, si quædam superfuerint Nehemiæ emendanda, nihil sanè mirum. Summi etiam viri qui auctoritate potiuntur, cunctos subditorum perversos usus non semper possunt cognoscere; multa, quæ vellent recidere, sæpè ex sapienti dispensatione tolerare coguntur; plurium quoque emendationem in opportunum magis tempus prudenter differunt; tandem quot vitia felici exitu resecata paulatim repullulant et reviviscunt? Ea in Judæis argumento proposito supponi videtur docilitas, æquanimitas, et in bono constantia, à quâ ipsi longè semper abfuerunt, et quæ nullius unquàm gentis esse potuit. Adde Esdram quinque annis tantum, non tredecim, ut deinceps docebimus, ante Nehemiam Jerusalem advenisse.

Ad primam probationem minoris, nego loco ibi citato agi de ipsâ festi Tabernaculorum substantiâ. In illo textu notanda vox *taliter*, quâ admodum et apparatus quo actum fuerat, animus appellitur. Etverò quis credat à diebus Josue filii Nun, id est toto tempore Judicium et Regum, festum illud fuisse omissum? Quid? quòd populus è captivitate redux, anno ipso quo rediit sacros tabernaculorum dies coluisse

legitur 1 Esdr. 3, v. 4. Atque in posterum quotannis celebratas fuisse tum illam, tum alias solemnitates lege præscriptas, ex eodem cap. 3, v. 5 et 6, liquidò colligitur.

Ad secundam minoris probationem, nego etiam suppositum antecedentis, nempe inhumanas fœnerationes 2 Esdr. 5, v. 7 et seq. à Nehemiâ abolitas, dudum ante ejus adventum usitatas fuisse, ac proinde Esdram, si ante Nehemiam venerit, de iis non adeptis fore culpandum. Etenim toto illo in capite 5 nihil habetur quod immanes ejusmodi usuras dudum ante Nehemiam obtinuisse ostendat. Ad Nehemiæ tempora refertur consilium, quod populus fame pressus capit, filios et filias fratribus suis vendendi, agros et vineas oppignerandi, pecuniamque à divitibus fœnerandi, ne ipse fame consumeretur, et ut vectigal regi Persarum posset solvere. Ubi notandum 1º Nehemiam non ex optimatum magistratumque, ut par fuisset, delatione, sed ex populi clamoribus de tanto malo certiorum factum fuisse. Nempe crimen fœnoris, cujus erant fontes, tacebant principes et magistratus; 2º hæc non statim ab adventu Nehemiæ gesta fuisse, sed fortè diu post refectos muros, et occasione famis, v. 3, memoratæ quam Vatablus famem quamdam insignem interpretatur; vix ergo ex laudato capite infertur aliquas illicitas fœnerationes ante Nehemiæ adventum usurpatas fuisse. Num verò Esdras vituperandus, quòd non reciderit vexationes ejusmodi clandestinas, ad se à magistratibus et optimatibus non delatas?

Objicies iterum cum utroque. Esdras occasione matrimoniorum cum alienigenis contractorum peccata populi confitens, paucis post adventum suum diebus, muri Jerusalem jam extructi manifestam mentionem facit. *Inclinavit* (Deus), inquit cap. 9, v. 9, *misericordiam coram rege Persarum, ut... daret nobis septem* (hebr. גָּדַר geder) *in Judâ et in Jerusalem.* Ergo Esdras prius Nehemiâ Jerusalem non venit. Nego antecedens. In loco allato nulla fit aperta mentio mœnium extructorum. Vox *geder* propriè ac longè frequentius septa ovium, ac sepes quibus feræ ab agris arcentur, *quàm urbium muros et propugnacula significat*, ut fatentur Abramus et Turneminius. Non inficiamur illud vocabulum ad mœnia et munimenta exprimenda per metaphoram posse applicari; sed fatendum est quoque per aliam metaphoram eâdem voce significari posse præsidium divinum, quo populus redurè captivitate munitus fuerat et ab hostium molitionibus tutus.

Objicies cum Turneminio post Jungmannum in Daniel. Ex Herodoto historiæ veteris principe omninò conficitur Xerxem anno 7 regni sui in Græciam trajecisse, non anno 5. Ergo socius regni factus Artaxerxes anno patris sui 7, proindeque, etc. Probatur antecedens. Tradit Herodotus Hist. lib. 7, cap. 7, Xerxem ALTERO ANNO δευτέρῳ μὲν ἔτει post mortem Darii primam expeditionem fecisse contra Ægyptios rebelles. Quod juxtà Herodoti solitum loquendi mortem significat hanc expeditionem actam fuisse anno sequente Darii mortem. Multis verò interjectis sic habet cap. 20 : *Xerxes.... ab expugnatione Ægypti PER QUATUOR ANNOS SOLIDOS comparabat exercitum et ea quæ erant commoda expeditioni, QUINTO AUTEM ANNO EXACTO, ἀνομένῳ, in expeditionem ibat cum magnâ manu multitudinis.* A morte igitur Darii usque ad profectionem Xerxis effluxère sex anni integri; nempe unus annus Ægyptiis subigendis impensus, tum quatuor anni solidi quibus exercitum et omnem ejus apparatus instruxit, postremo unus annus, quo exacto ἀνομένῳ in expeditionem ibat; quorum summa anni sex completi. Ergò non nisi anno regni sui septimo Xerxes in Græciam trajecit. Confirmatur, quia nullâ evasione eludi potest vis hujusce argumenti. Etenim reponeturne 1º voces πέμπτῳ δὲ ἔτει ἀνομένῳ malè reddi *quinto autem anno, EX ACTO*, sed reddendas esse cum Laurentio Vallâ, *quinto autem anno EUNTE seu INEUNTE*? At obstat notio participii ἀνομένως. Illud enim derivatur à verbo ἀνομαι, quod est passivum verbi ἀνύω, quod indubiè idem valet quod *perficio, absolvo, perago*; passivum igitur ejus ἀνομαι significat *perficior, absolvor*, et ἀνομένως idem est ac *perfectus, absolutus, peractus*; proindeque voces πέμπτῳ δὲ ἔτει ἀνομένῳ, accuratè redduntur *quinto autem anno exacto*, quod Roberti Stephani et Scapulæ auctoritate etiam firmatur. Reponeturne 2º hæc eadem verba, *quinto autem anno exacto*, non referri ad tempus expugnatae Ægypti, sed ad initia regni Xerxis, quasi dictum esset : *Quinto autem anno regni sui exacto in expeditionem ibat Xerxes*, etc.? Verum tum contextus series, cum maximè ratio tempora computandi apud Herodotum usitata postulant, ut ab expugnatione Ægypti, à quâ anni quatuor mox ducti fuerant, quintus ille annus quoque deducatur. Ergo.

Nego antecedens. Imò ex Herodoto eodem lib. cap. 1 et 4, efficitur, ut suprâ diximus, Darium anno etiam quinto ante Xerxis in Græciam transitum obiisse; ergo.

Ad probationem, nego à morte Darii ad

profectionem Xerxis effluxisse sex annos integros. 1^o Gratis supponitur Ægyptiis ad obsequium reducendis annum solidum fuisse impensum. Id ab Herodoto non traditur. Contra ex eo apparet hanc expeditionem, quam Darius ante obitum apparaverat, brevi confectam fuisse; nec nisi aliquot mensibus fortè perduravit. 2^o Improbabilis prorsus est sensus qui Herodoto in objectione affingitur. Num verisimile est Xerxem Græciæ invadendæ cupidissimum, exercitu omnibusque ad expeditionem necessariis per quatuor annos solidos comparatis, non statim anno sequente in expeditionem ire cœpisse? Quis crediderit moras anno integro sine causâ ab eo interpositas, nec nisi hoc anno exacto exercitum ejus Sardes tetendisse, ut ibi hieme toleratâ, in Græciam incunte vere subinde trajiceret? Remne ejusmodi jejeunè narrâset Herodotus, prætermisâ adeò singularis cunctationis occasione? Ergo hujusce loci Herodoti interpretatio probabilior quærenda est, atque dicendum vel græcum cum Laurentio vallâ hic reddendum, *quinto autem anno incunte*; vel hunc annum quintum ab initio regni Xerxis, non ab expugnatione Ægypti computandum.

Ad primam confirm. respondeo participium ἀνομένοσ ἀνομαι a verbo quidem ἀνομαι derivari; at ἀνομαι non solum est passivum verbi ἀνύω sed etiam medium. Hinc observat Scapula ἀνομαι aliquando pro ἀνύω usurpari. Atqui si participium ἀνομένοσ spectetur ut derivatum à medio ἀνομαι, sumi poterit pro *festinante, eunte, properante*, cùm verbum ἀνύω etiam *propero, festino* significet. Si autem illud participium hoc sensu accipi queat, ex modò dictis patet subjectâ exigi materiâ ut in textu Herodoti allato ita intelligatur. Huic responsioni ex genio et indole græci idiomatis petitæ, aliam habemus adhuc firmiorem et generaliore ex ipso usu verbi ἀνομαι apud auctores græcos desumptam, quam vir clarissimus D. Caperonnier linguæ græcæ in collegio regio doctissimus professor nobis suppeditavit. Hanc ipsis ejus verbis latinè versis exponam. Arbitror, inquit, illud Herodoti πέμπτῳ δὲ ἔπει ἀνομένῳ reddendum esse, *quinto autem anno vertente*. (Notum est annum vertentem Latinis esse id tempus quod percurrentis Zodiaci signis sol impendit.) Contendo igitur participio ἀνομένῳ non magis initium quam finem aut medium anni designari, atque eo apud Herodotum id duntaxat exprimi quod *anni cursum* appellare solemus. Quod quidem ostenditur, quia, ubi ad partem alicujus rei

designandam græci scriptores verbo ἀνομαι utuntur, aliquid ei adjungunt quo ejus significatio restringatur. Sic in iis Apollonii Rhodiensis versibus, *Argonautic. lib. 5, v. 495 et 496*:

ὧσα δὲ κεκλόμενοι παντῶν Ἀπόλλωνα,
ῥέζον ἐπ' ἐσχαρίῳ, νέον ἥρατος ἀνομένῳ,

Id est:

Illicò verò invocantes fatidicum Apollinem,
Sacra fecerunt in foco, die recens incœpto.

ἀνομένῳ ad initium diei significandum adverbio νέον determinatur. Quapropter Apollonii scholiastes quem eruditi magni faciunt et meritò, vocem hanc verbis istis exponit: ὑπὸ τὴν πρὶν ἂν' αὐξῆσιν τῆς ἡμέρας λαμβανόμενος. (Id est, *sub tempus matutinum, die incrementum capiente*.)

In his Homeri *Illiad. lib. X, v. 251 et seq.*:

Ἀλλ' ἔρμεν μάλα γὰρ νύξ ἀνεται, ἐγγύθι δ' ἠώς.
Ἀστρα δὲ δὴ προβέβηκε, παρώχμεν δὲ κλέων νύξ
Τῶν δὲ μαιράων, τρίτῃ δ' ἔτι μῶρα λήλειπται.

Id est:

Sed eamus; valdè enim nox perficitur, prope autem est aurora;

Astra verò jam processerunt, præteritque plurima nox,

Duabus scilicet partibus, tertia autem adhuc pars reliqua est.

Verbum ἀνεται propter adjunctas voces μάλα et ἐγγύθι δ' ἠώς finem noctis significat; ergo verbum ἀνομαι vox est generica cujus species necessariâ quâdam circumstantiarum adjectione determinantur. Hactenùs vir eruditus.

Itaque quocumque modo participium ἀνομένῳ apud Herodotum accipiat, seu ad passivum, seu ad medium verbi ἀνύω attineat, planum est vocem hanc anno currenti designandam esse idoneam, proindeque nullam esse difficultatem à Jungmanno propositam.

Auctoritati Stephani et Scapulæ et aliorum plerorumque lexicographorum quos Jungmannus objicere potuisset, opponimus translatore qui rem propiùs inspexerunt, ac vertunt *quinto autem anno eunte, vel ineunte*. Conjecit Usseus Laurentium Vallam legisse ἀρχομένῳ incipiente, sed nullum ejusmodi lectionis vestigium ullibi deprehenditur. Constantinus in *Lexico* verba Herodoti etiam vertit *quinto anno ineunte*.

Ad secundam confirmationem, non necesse est ullum speciale adhiberi responsum, quippe quæ priore confutata, jam nihil roboris habere potest.

CONCLUSIO IV. Artaxerxes Longimanus anno

regni patris sui duodecimo consors regiae dignitatis factus est. Inde annus vigesimus, à quo 70 hebdomades arcessendæ, computandus est; annus verò ejusdem 7, de quo Esdras loquitur, à morte Xerxis ducendus.

Probatur prima pars, videlicet Artaxerxem Longimanum anno imperii Xerxis duodecimo, consortem regiae dignitatis factum fuisse. Si enim Xerxes 20 annis completis regnaverit, si simul appareat Artaxerxem, ante annum Xerxis vigesimum, jam regem fuisse; si is fuerit mos Persarum regum, ut, quando ii ad bellum sese accingebant successorem sibi cooptarent; si denique Xerxes anno duodecimo regni sui videatur ejusmodi occasionem esse nactus; si inquam, singula hæc probentur, profectò probatum erit Artaxerxem Longimanum anno Xerxis duodecimo in regni comitem fuisse ab eo electum. Atqui 1° Xerxes viginti annis completis regnavit, ut jam adversus Usserium, etc., ostensum est conclusione 3. 2° Artaxerxem Longimanum ante vigesimum annum Xerxis, fuisse regem colligitur ex supra memoratis auctoritatibus Thucydidis, Charontis Lampsaceni; annalium Persicorum, et Cornelii Nepotis, atque etiam Tullii Epistolarum lib. 10, epist. ad Atticum, ac Philostratis in vitâ Apollonii, lib. 1, cap. 19, testantium Themistoclem ad Artaxerxem nuper regnantem confugisse. Quæ quidem fuga non modò juxta Eusebium et Diodorum Siculum ibidem laudatos, sed et secundum alios scriptores Dinonem, Ephorum, Clitarchum et Heraclidem apud Plutarchum in Themistocle, Xerxe adhuc regnante, contigit. Ex collatis igitur inter se veterum historiae profanæ scriptorum testimoniis id efficitur, Artaxerxem et Xerxem aliquot annis regnasse simul. 3° Is fuit mos persicus, ut rex ad bellum proficiscens successorem sibi cooptaret, cujus rei testis est locupletissimus Herodotus lib. 7, cap. 2, ita scribens: « Dùm autem (Darius) hæc comparat (expeditionem scilicet in Athenienses et Ægyptios), interea ingens inter ejus liberos de principatu exorta dissensio est, quoniam ex instituto Persarum oportebat ita demùm ire in expeditionem, cùm regni successorem declarasset. » Et cap. 4: « Declarato Darius Xerxe rege, cùm conaretur, etc. » 4° Xerxes occasionem Artaxerxis in regnum cooptandi opportunam nactus esset anno regni sui duodecimo. Si quidem, ut notat Petavius *de Doctr. temp.* part 2, lib. 10, cap. 25, « Justinus, lib. 2, sub finem, auctor est, cùm per Pausaniam Lacedæmo-

niorum regem Græciam iterùm subjugare conatus esset, detectâ conspiratione, et interfecto Pausaniâ (cujus necem anno Xerxis 12 contigisse colligitur ex Diodoro), Xerxem de integro bellum instituisse. Potuit hæc intercedere causa, cur successorem Artaxerxem ex veteri Persarum more designaret. Non legitur quidem Græcos à Persis eo anno reipsâ petitos, sed ut Artaxerxes tunc temporis rex fuerit designatus, necesse non est Xerxem ad eam expeditionem ivisse; satis fuit si ad illam proficiscendi consilium ab eo sit susceptum, licet id consilii variis, quæ nos latent, de causis, ad exitum perductum non fuerit. Enimverò antequàm ad bellum gerendum rex proficisceretur, successorem ex instituto Persarum designabat ex Herodoto, ac Darius regem declaravit Xerxem occasione expeditionis quam morte præventus ipse non peregit.

Confirmant porrò hanc conjecturam tum Eusebius quem suprâ diximus in annum septuagesimæ sextæ olympiadis quartum, Xerxis duodecimum, fugam Themistoclis conjicere; tum Diodorus Siculus, qui, ut etiam explicatum est, cum Eusebio consentit. Itaque verisimillimum est Artaxerxem anno Xerxis 12, in regni socium assumptum fuisse.

Probatur secunda pars, nimirum annum Artaxerxis vigesimum, de quo loquitur Nehemias, esse ab hac primâ hujus regis coronatione computandum. Proclive enim est Nehemiam de eâ Artaxerxis annorum computandorum ratione explicari ad quam ipse assuetus esse debuit, quæ usui Scripturæ non repugnat, nec principiis chronologiæ. Atqui 1° Nehemias solebat procul dubio annos Artaxerxis Longimani ab ejus coronatione primâ putare. Erat enim hujusce regis pincerna, 2, Esdr. 1, v. 11: assolent autem quotquot è principium familiâ sunt, ea sectari, quæ principibus suis grata et honorifica magis fore judicaverint. 2° Is modus computandi usui Scripturæ non repugnat, quippè interpretes consentiunt quandoque in Scripturis ejusmodi cooptationes regum supponi. 3° Nec etiam adversatur principiis chronologiæ. Quid ita? quia Nehemias non texit chronologiam regum Persarum; solius Artaxerxis annorum mentionem facit, proindeque, etc.

Probatur tertia pars, ab hoc scilicet anno Artaxerxis 20 eâ ratione computato accersendas esse hebdomadas. Etenim initium hebdomadum huic affigendum anno, quo exiit sermo ad iterum ædificandam Jerusalem, et à quo

ductæ illæ hebdomades calculis temporum aptissimè congruunt. Atqui 1º, sermo ut iterum ædificetur Jerusalem, exiit anno Artaxerxis 20, juxta Nehemiæ computandi rationem, ut ex primâ conclusione perspicuum est. 2º Hebdomades ab hoc anno ductæ calculis chronologicis congruunt aptissimè. Nam evicimus Xerxem regnare cœpisse anno 485 antè æram vulgarem; annus igitur ejus 12 incidit in annum 473 antè hanc æram, ac proinde annus 20 à primâ Artaxerxis ejus filii eo anno duodecimo celebratâ coronatione ductus incidit in annum ante vulgarem æram 454. Itaque à mense Nisan anni ante æram vulgarem 454 computata 69 hebdomadas seu annos 483, occurret annus æræ vulgaris 30, quo Christus juxtâ probabiliores calculos baptizatus est, die scilicet sextâ januarii, ut fert constans SS. Patrum sententia, ac ducis munere fungi cœpit, præsertim post celebratum cum discipulis suis primum Pascha. Deinde fuit septuagesima septimana mense Nisan anni æræ vulgaris 37 claudenda. Christus intra eam confirmavit pactum multis seu per se, seu per Apostolos, et in dimidio ejusdem, seu anno ipsius quarto ineunte, æræ vulgaris 33, ut infra probabitur, mortem pro hominum salute obiens, *hostiam et sacrificium* veteris legis abolevit; ergò.

Probatur ultima pars, nempe annum 7 Artaxerxis, de quo Esdras loquitur, esse à morte Xerxis computandum. Namque 1º sit hæc regula generalis, annos cujusvis regis in auctoribus censendos esse ab ejus antecessoris morte computatos, ubi nulla ratio specialis occurrit seu sacrum, seu profanum scriptorem aliter interpretandi. Cum ergo Esdras non fuerit ex Artaxerxis familiâ ut Nehemias, nec alia ratio occurrat ipsum eo peculiari modo, quo Nehemiam, interpretandi, sequitur, etc.

Præterea, si Esdram exponas de anno 7 ab Artaxerxis cooptatione, dicendum erit Esdram vivente adhuc Xerxe, anno regni ejus 18 obtinuisse ab Artaxerxe decretum, quod ipse refert cap. 7. Atqui id dici nequit. Nam Artaxerxes in hoc decreto appellatur rex regum; solus cuncta decernit; de patre ne verbum quidem habet, quod sanè Xerxe adhuc regnante non fuisset factum; ergo.

Dices 1º cum Huetio: Non evincitur ex Herodoto reges Persarum sibi consortes supremæ potestatis aliquandò cooptare consuevisse. « Nam aliud est regni designare successorem, « aliud regni socium adsciscere. Prius hoc « Persis solenne fuisse fateor; at Artaxerxem

« ad successionem regni à Patre fuisse desti-
« natum si concessero, nihil inde causæ suæ
« opportunum Petavius eliciet. » Posterius autem ab Herodoto non traditur; ergò. Resp. hæc verba Herodoti, *declarato Darius Xerxe rege*, ἀποδείξας Δαρίῳ τὸν ἑξῆς quid ampliùs sonare quàm meram successoris designationem. Saltem inde colligere est successorem designatum eo ipso ut regem declaratum habitum fuisse; quod unum ad nostram sententiam sufficit; rex enim hocce modo declaratus, debuit à familiaribus suis et ministris, et proinde à Nehemiâ, tanquàm rex salutari et considerari.

Dices 2º. Meliùs ad annum Xerxis quintum, quo ille rex in Græciam indubiè trajecit, quàm ad annum ejusdem duodecimum alligaretur prima Artaxerxis coronatio; ergo, etc. Nego antecedens. Ne enim Artaxerxis cooptatio ad annum quintum Xerxis referatur, deterrent quæcumque adversùs illam Tirini Abramique sententiam præcedenti conclusione dicta sunt. Deterret 2º auctoritas Thucydidis gravissimi et coætanei scriptoris, juxtâ quem Artaxerxes *nuper* νεωστὶ regnare incœperat, cùm Themistocles ad ipsum confugit. Quæcumque autem latitudo vocis *nuper* hic tribuatur, profectò non potest ad septem annos extendi. 3º Cur Xerxes anno regni sui 5 filium suum Artaxerxem regem non declaraverit, ratio ista reddi potest, quòd Artaxerxes nunc fortè junior foret quàm ut ad solium eveheretur. Id probabilius conjecturis stabilit Petavius lib. 10, de doctr. Temp. cap. 25, ex eoque sit verisimile, quòd et Saliminæ pugnæ 55 annis supervixerit, quippè cùm annos 40 à nece Xerxis regnaverit, atque eum ipso Xerxis mortis anno adolescentem adhuc fuisse testetur Justinus lib. 3, cap. 1.

Dices 3º Frustra cooptatione Artaxerxis conamur in concordiam advocare profanos historicos, qui inter se conciliari nullo modo possunt. Thucydides, Plutarcho interprete, censuit, Artaxerxem mortuo jam patre regnasse, cùm ad eum Themistocles confugit. Eodem modo Plutarchus Charontem Lampsacenum et annales Persicos interpretatur. Ergo, etc. Nego antecedens. Ad probationem, nego consequens. Ità quidem Plutarchus hos scriptores intellexit, at eum in hoc errasse certum videtur. Verba enim hæc: *Defuncto jam Xerxe*, quibus utitur Plutarchus, apud Thucydidem nullibi comparent. Unde concludere primum est nec apud Charontem Lampsacenum, cujus

opera perierunt, nec apud annales Persicos qui jamdudum non supersunt, ea extitisse; tam enim de iis falli potuit Plutarchus, quam de Thucydide; scilicet rerum Persicarum non satis gnarus is scriptor, nec de cooptationibus in Perside usurpatis cogitans, quæ illi auctores de Artaxerxe rege scripserant, hæc ipse putavit nonnisi mortuo Xerxe potuisse contingere, quia solent scriptores principum regnum ex decessoris tantum morte arcessere. Atque eadem ratio est cur Cornelius Nepos et alii varias auctorum sententias afferant, nec iis conciliandis allaborent.

Quæres quomodo adstrui possint quæ vaticinii exitum exponentes modo asserebamus, nempe Christum die 6 Januarii, anno æræ vulgaris 30 à Joanne baptizatum fuisse, et anno ejusdem æræ 33 mortem subiisse?

Respondeo tria quæstione propositâ includi sigillatim attingenda. Ad primum dico baptismum Christi diei sextæ Januarii à nobis ideò annexi, quia id ex pervetustâ ac constanti SS. Patrum sententiâ habetur. Ad secundum respondeo hæc ratione confici Christum anno 30 vulgaris æræ baptizatum fuisse. Nimirum Luc. 3, v. 1 et 2, refertur Joannem Baptistam anno quinto decimo imperii Tiberii Cæsaris cepisse baptismum pœnitentiæ prædicare. Constat autem ex historiâ profanâ Tiberium rebus potiri orsum esse anno 14 æræ vulgaris mense Augusto, siquidem hoc ipso anno, die illius mensis 19, Augustus Cæsar Nolæ obiit. Etenim quod quidam fingunt, antè Augusti mortem jam principatu potitum Tiberium, atque de hæc primâ ejus imperii epochâ Evangelistam exponendum, omni verisimilitudine destituitur et historiæ repugnat. Fatendum quidem plurimos principatûs honores in Tiberium viventem adhuc Augusto fuisse collatos. At supremâ eum et absolutâ potestate ante patris mortem donatum, supponi non sinunt innumera quæ à Tacito præsertim lib. 1 Annalium, Vell. Patercul. lib. 2, et Suetonio narrantur, inprimis quod is videri voluerit principatum invitus suscipere. Hinc in lapidum et nummorum inscriptionibus nomine Augusti non insignitur ante diem quo Augustus obiit. Hinc Spartianus tradit M. Aurelium et L. Verum primos fuisse qui pariter et rempublicam administraverint, et Augusti appellati sint. Hinc Tiberii initium à morte Augusti huc usque ab omnibus semper computatum est; adeo ut si de aliâ epochâ Evangelistam interpretari liceat, jam de chronologiâ actum sit, nihilque certi de eâ ex pro-

batissimis auctoribus possit deduci. Itaque statuendum est annum imperii Tiberii quintum decimum quem S. Lucas memorat, à die 9 mensis Augusti, anni æræ vulgaris 28 ceptum effluere. Jam verò Scriptura quidem disertè non assignat quâ præcisè parte hujusce anni 15 principatûs Tiberii Joannes initium prædicandi fecerit, neque quanto tempore Præcursoris ministerio sit functus antequàm Christum tingeret; verum meritò conjicitur à die 10 mensis septimi (diei 19 octobris nostri respondente), ejusmodi prædicationis arcessendum esse principium. Is quippe dies utpote pœnitentialis et expiatorius, atque apud Judæos valdè sollemnis ad annuntiandum pœnitentiæ baptismum maxime erat idoneus. Pariter, cum Joannes debuerit Christo præparare *plebem perfectam*, dicaturque Act. 13, v. 25, *implevisse cursum suum* ante baptismum et prædicationem Christi, proclive est inter exordia prædicationis Præcursoris Domini et baptismum Christi saltem annum integrum intercessisse. Ergo die 6 Januarii anni æræ vulgaris 29 baptismus Christi collocari non potest. Ergo ad diem 6 Januarii anni illius æræ 30 est referendus.

Dices. Luc. 3, post narratum Christi baptismi, additur v. 23: *Et ipse Jesus erat incipiens quasi annorum triginta*. Ergo anno ætatis suæ trigesimo Christus à Joanne tinctus est. Atqui tamen anno demum ætatis suæ 33 completo baptizatus erit, si ad annum æræ vulgaris 30 ineuntem ejus baptismum referatur; quippe cum natus ponatur die 25 decembris anni juxta probabiliores calculos antè æram vulg. quinti, ergo, etc. Nego sequelam. Vox *incipiens*, in textu allato, ad verba *quasi triginta annorum*, non attinet, ut ex græco textu manifestum sit, in quo legitur ἦν ὁ Ἰησοῦς ὥσπερ ἑτῶν τριάκοντα ἀρχόμενος, *Erat Jesus quasi annorum triginta incipiens*; non verò ἀρχετο εἶναι ὥσπερ ἑτῶν τριάκοντα, *incipiebat esse quasi annorum triginta*. Spectat illud vocabulum ad ministerium Christi, quasi dictum esset: *Erat Jesus quasi triginta annos natus, quandò, baptismate suscepto, cepit ministerium adimplere*. Christum autem anno vitæ suæ 33 completo, dici potuisse *quasi triginta annorum*, probatur 1º quia vox ὥσπερ *quasi*, quamdam latitudinem de se permittit, alioqui frustra adhiberetur. Hinc S. Lucas cap. 9, v. 28, à sermone Christi ad transfigurationem ejus, ferè, seu *quasi dies octo* numerat, ὥσπερ ἡμέραι ὀκτὼ ubi sex tantum apud Matth. 17, v. 1, et Marc. 9, v. 1, leguntur. Nec dicas vocem *quasi* sumi posse pro *caph veritatis* Hebræorum, sicut

Joan. 1, v. 14, *gloriam quasi unigeniti à Patre*, nec proinde ullam immunitatem aut additionem sonare. Namque illud *caph* hebraicum per ω; à Græcis exprimitur; in loco verò Lucæ objecto habetur ωσεῖ quod, dùm in numeris usurpatur, aliquam latitudinem patitur. 2^o Quia, ut observat S. Augustinus quæst. 47, in Exod. « Scriptura solet tempora ità nuncupare, ut « quod de summâ paulatim aut excrescit, aut « infra est, non computetur. » 3^o Quia is est mos usitatissimus, ut numero rotundo adhibito quædam unitates omittantur; v. g. 70 numerantur Christi discipuli, etsi fuerint 72; ità dicuntur 70 interpretes, cùm 72 etiam extiterint, atque alia innumera ejusmodi habentur exempla.

Ad tertium resp. sex esse præcipuas eruditum opinionum de anno mortis Christi. Cornelius à Lapide, Ayrolus et alii mortem Christi conjiciunt in annum æræ vulgaris vigesimum nonum; alii post Africanum in annum ejusdem æræ trigesimum; Petavius, Huetius, Turneminius, etc., in trigesimum primum; nonnulli in trigesimum secundum; Pererius, Scaliger, Tostatus, Usserius, Lancelotus, Pridæus et alii plurimi in trigesimum tertium; Beda denique cum aliis in trigesimum quartum.

Porrò anno 33 Passionem Christi esse adscribendam ducimus, quia characteribus anni quo Christus passus est, solus ille annus 33 insigniri videtur. Tres enim sunt ejusmodi characteres.

Primus desumitur ab eclipsi solis prodigiosâ, quæ tempore mortis Christi contigit, quam à scriptoribus etiam ethnicis annotatam testantur Julius Africanus à quo Thallus de eâ meminisse refertur. Chronicon Alexandr. Origenes lib. 2 contra Celsum, Eusebius in Chronico, S. Hier. in Chronico suo Eusebiano, etc., qui Phlegontis eâ de re testimonium laudant; quamque in gentium etiam Annales relata assertunt ac paganis objiciunt S. Lucianus Martyr in Actibus suis apud Rufin. et Tertullianum in Apologetic. cap. 21. Secundus character ex annis ministerii Christi petitur. Tribus enim annis integris à Baptismo suo Christus videtur prædicasse, adeò ut anno ministerii sui quarto inchoato cruci fuerit affixus. Quod colligitur tum ex Eusebio in Chronico græco, et lib. 1 Hist. cap. 40, atque ex Chronico Alex. cùm etiam ex Evangelio, quo verissimum fit Christum dùm prædicationis muneri institit, quatuor Paschata peregrisse.

Primum describitur Joan. 2, v. 12, et in eo vendentes de templo ejecti sunt. Alterum, in quo 38 annorum languidus sanatus est, solo nomine *diei festi* Joan. 5, v. 7, designatur. Sed collatis cum illo loco et inter se Matth. 22, v. 1, Marc. 74, v. 1, et cap. 15, v. 6, Luc. 22, v. 17, et Joan. 6, v. 4, apparet ejusmodi *diem festum* ipsam fuisse solemnitatem Paschalem. Atque de hac solemnitatem illum locum interpretati sunt S. Iren. lib. 2 adversus hæres. cap. 29, Euseb. Demonstr. evang. lib. 8. S. Hier. et Theodoret. in caput 9 Danielis, quos sequuntur complures insignes chronologi et Scripturæ interpretes. De tertio paschate sermo fit Joan. 6, v. 4, tuncque miraculum quinque panum effectum est. Quartum denique Pascha est illud in quo Christus pridie mortis suæ sacramentum corporis ac sanguinis sui instituit Matth. 26, v. 2, Marc. 14, v. 1, Luc. 22, v. 1, Joan. 13, v. 1, et ad Cor. 11, v. 23. Tertius denique et ad quæstionem dirimendam præcipuus character in eo consistit, quòd anno Dominicæ Passionis, dies decima quarta lunæ mensis Nisan in feriam quintam incidere debuerit. Nam ex Evangelio et ex antiquâ certâque traditione constat Christum feriâ quintâ manducato agno Paschali Eucharistiam instituisse, ac die sequenti, nimirum feriâ sextâ, sanguinem suum pro hominibus fudisse. Hanc autem feriam quintam, quâ Pascha ultimum à Christo comestum est, fuisse lunam decimam quartam mensis Nisan, planè liquet ex Luc. 22, v. 7, ubi Christus dicitur Pascha illud egisse ipsâ *die azimorum*, in quâ necesse erat *occidi Pascha*. Nam Judæi unâ cum Christo, vel uno die seriùs Pascha celebraverint, hic nihil interest. Clarè ex illo loco habetur Christum, legis, quam solvere non venerat, sed adimplere, observantissimum, juxta præscriptum Moysis Exod. 12, Pascha ultimum celebrasse ad vesperam diei decimæ quartæ primi mensis, id est, juxta putandi rationem apud Judæos testibus Josepho (1) et Philone (2) ac totâ antiquitate tunc usurpatam, ipsâ desinente die decimâ quartâ lunæ Nisan, sole in ariete constituto. Sit igitur is tertius character anni quo Christus passus est; nempe eo anno decimam quartam diem lunæ novorum frugum fuisse feriam quintam, ac proinde diem ejusdem lunæ 15 fuisse feriam sextam.

(1) Joseph. antiq. lib. 3, cap. 10, n. 5, edit. Haverc. T. 4, p. 177.

(2) Philo lib. 3, de vitâ Moysis, edit. Paris, 1640, p. 686.

Atqui tres ii characteres anno tantum trigesimo tertio æræ vulgaris competunt. Ac 7º quidem signatus est annus 33 portentosa solis eclipsi. Nam Chronicon Alexandr. hanc eclipsim refert ad annum 19 Tiberii. Phlegon autem, imperatoris Adriani libertus, in opere quo olympiadas concinnavit, ab eodem Chronico refertur ita scripsisse: « Quarto anno olympiadis ducesimæ secundæ facta est solis defectio maxima, quanta nunquam contigisse legitur, noxque horâ diei sextâ tantâ fuit, ut etiam astra in cœlo apparerent, terræque motus circa Bithyniam, magnam Nicææ urbis partem evertit. » Hæc Phlegon, cuius verba extant etiam apud Eusebium in Chronico græco, et S. Hier. in suo Chronico Eusebiano. Jam porrò annus quartus olympiadis 202, ipse est annus 33 æræ vulgaris; ergo.

Frustra opponeres eclipsim Phlegonteam à S. Hier. alligari anno Tiberii 18, qui cum 32 æræ vulgaris concurrit, ac proinde incertum esse huiusce defectionis tempus. Nam cum S. doctor de anno Olympiadis consentiat, necessario dicendum est ibi de anno Tiberii mendum irrepsisse legendumque annum 19, uti reipsâ legit Anastasius Bibliothecarius in suâ chronologiâ, et ut se in manuscriptis quibusdam reperisse testatur Pontacus Vasatensis episcopus in suo Eusebio. Et verò ab anno secundo olympiadis 198 (scilicet ineunte), unde Eusebius initium Tiberii desumit, ad annum 4 (nempe exeuntem) olymp. 202, computantur anni 19. Incertum igitur non est tempus Phlegontæe eclipsi, sed ea anno 33 æræ vulgaris necessario assignanda. Proindeque, etc.

2º Annus 33 æræ vulgaris quartus est inchoatus à Christi baptismo. Si quidem, ut modò diximus, anno 30 illius æræ, die 6 Januarii baptizatus est Dominus. Inprimis verò observandum ex annis qui à Christi Baptismate ad ejus mortem elapsi sunt, eos saltem evidenter refelli, qui anno 29 aut 30 Dominicam passionem assignant. Tria enim minimùm Paschata à Christo celebrata fuisse, ex evangelicâ historiâ certissimum est. Cum ergo, ex dictis supra, duas imperii Tiberii epochas distinguere non liceat nec proinde Christus ante finem anni 28 æræ vulgaris potuerit baptizari; sequitur evidenter unicum Pascha eum celebrasse, si anno 29 mortem oppetierit, aut duo tantum, si anno 30. Ergo.

5º Solo anno 33, luna 14 mensis Nisan in feriam quintam incidit. Nam vel fateberis Judæos post captivitatem non omninò astrono-

miæ rudes fuisse, ac Hipparchi calculis, ut aliquando sensit Scaliger et ex eorum commentariis infertur, in computandis mensibus lunaribus versùs Christi tempora usos esse; vel eo sensibus solis novilunia, seu potius primas lunæ phases sive aspectus observasse, uti habetur ex Philone qui ætate Christi vixit, ex Petri cujusdam vetustissimâ concione apud. S. Clement. Alexandr. lib. 6 Strom. necnon ex Mischæ consarcinatore qui secundo seculo scripsisse creditur, ex Thalmude, et ex Rabini Maimonide, Aben Ezrà, etc. Si primum seligas, cum Hipparchi methodus ab accuratissimis calculis vix quartâ unius horæ parte intra 600 annos deficiat, facile dirimetur quæstio. Nempe ex tabulis astronomicis constat anno 33 novilunium Nisan Jerosolymis contigisse die 19 Martii, horâ post meridiem circiter primâ, et quidem feriâ quintâ: ex quo sequitur diem decimam quartam hujus lunæ desiisse in die 2 Aprilis, feriâ etiam quintâ, ad vesperam; proindeque juxta hanc computandi rationem, anno 33 lunam decimam quartam incidisse in vesperam feriæ quintæ, atque ita ejusmodi anno competere characterem de quo inquiremus. At verò aliis annis in quæstionem adductis is character deerit, si ad eandem regulam res exigatur, uti compertum fit solâ inspectione sequentis noviluniorum tabulæ, quam ex Cassinianis calculis, ad Jerosolymitanum meridianum, adjectione horarum 2, minutorum 12, accommodavimus.

ANNI ÆRÆ vulgaris.	MENSES ET DIES veter. st.	MENSES ET DIES styl. Gregor.	Feriæ.	HORÆ		
				post. med. noctem.		
XXIX.	April. 2.	art. 31.	7.	12.	34'.	7".
XXX.	Mart. 22.	Mart. 20.	4.	21.	42'.	3".
XXXI.	Mart. 12.	Mart. 10.	2.	6.	31'.	22".
XXXII.	Mart. 30.	Mart. 28.	1.	4.	4'.	3".
XXXIII.	Mart. 19.	Mart. 17.	3.	12.	32'.	40".
XXXIV.	Mart. 8.	Mart. 6.	2.	21.	41'.	18".

Quòd si alteri methodo insistas, ac velis Judæos primas lunæ phases testibus electis et probatis occupasse, ut menses suos lunares componerent, cuncta in solum annum 33 quadrare iterum deprehendes. Sentiunt Rabini lunam in terrâ Israeliticâ horâ post conjunctionem sextâ conspici, quod etiam docet Beda de rat. temp. cap. 441, *maximè*, inquit, *cum ea* (luna) *posita est in ariete*. Quidquid sit, certum est primam lunæ phasim dari horâ saltem

27 et dimidiâ post conjunctionem. Cum igitur anno 33, uti dictum est, luna, Jerosolymorum respectu nova fuerit feriâ 5, die 19 Martii paulò post meridiem, sequitur eam apparuisse die 20 Martii feriâ 6, ac proinde illam diem 20 Martio fuisse Judæis primam lunæ illius diem. Ergo anno 33, dies 14 Lunæ Nisan, desivit iterum in diem secundam Aprilis et feriam adhuc quintam: adeoque juxta hanc secundam methodum doctis maximè probatam, character de quo agimus, huic quoque anno aptissimè congruit. Jam verò, si juxta eandem methodum, de aliis annis controversis inquiras, invenies, ut ex tabulâ superiori patet, lunam decimam quartam mensis Nisan anno æræ vulgaris 29 desiisse in feriam 7, seu sabbatum, anno 30, in feriam 4, annis 31 et 34 in feriam 2, et anno 32, in feriam 1. Ubi observandum, in quo discrimen hic levius, vel etiam fortè nullum à quibusdam deprehenditur, characterem secundo ex annis ministerii Christi desumpto tam evidenter carere, ut in eo mortem Christi collocari non posse certum omnino videatur. Maneat igitur probatum soli anno 33 æræ vulgaris et quidem diei 3 Aprilis (veteristylò) Passionem Christi esse affigendam.

Dices. Ex rationibus astronomicis nihil quidquam definiri potest. Nam 1º, circa calculos astronomicos nonnihil à se invicem ipsimet astronomi dissentiunt. Ergo. 2º Ad rationem motus medii lunæ componunt astronomi menses lunares; unde fit ut eos inter se æquales constituent. At res ita non se habet; perigea et apogea solis et lunæ magnas varietates producunt. Ergo. 3º Si tamdiu in Ecclesiâ de figendis limitibus Paschatis disputatum est, ac nonnunquam cycli quo utimur à computo astronomico discrepet; quantò magis Judæi à veris temporum supputationibus potuerunt deviare; proindeque, etc. 4º Judæi, teste S. Epiphonio, hæres. 51, cyclum 84 annorum corruptum adhibuerunt; ergo.

Nego antecedens. Imò nullus est inter chronologos, qui calculis ejusmodi in variorum eventuum temporibus determinandis cum fructu non utatur. Ergo.


Ad primam Probationem, resp. discrimina quæ in calculis astronomorum hic occurrunt, ita esse levia, et quod ad rem attinet, omnino nulla, ut intra mille annos ne unius quidem horæ differentiam parere queant; ergo. Ad secundam. Habent etiam astronomi rationem motus veri, ejusque à motu medio discriminis. Cæterum, 1º discrimen inter mensem longio-

rem lunæ et breviorum, dum sol cum ipsâ in eodem signo, v. g. in ariete constituitur, nunquam potest novem horas excedere. Quæstio autem hic spectat mediam tantum partem mensis lunaris; illa igitur diversitas quatuor ad summam aut quinque horarum errorem posset creare; qui hic nullius esse debet momenti, cum de die integro investigando, non de unâ aut alterâ horâ agatur. 2º Accuratè supputatum est quâ præcisè horâ ac momento verum contigerit novilunium Nisan annis de quibus agitur, eoque calculo perinde nostra fulcitur opinio, aliæ refelluntur. Consule Cassinianas tabulas, in quibus reperies anno, v. g., æræ vulgaris 33, novilunium verum nonnisi minutis 11 et secundis 4 seriùs novilunio medio contigisse. Ad tertiam, nego paritatem. In Ecclesiâ non de solo Paschate determinando, sed de aliis multis simul iisque gravissimis fuit disputatum, uti ex historiâ ecclesiasticâ notum est. Judæis verò de tempore paschali satis erat investigare lunam decimam quartam mensis Nisan, quâ exeunte ad vesperam Pascha ipsis erat immolandum. Quod quidem ope cycli ad primorum lunæ aspectuum observationes jugiter exacti, ita securè cognoscebant, ut ad summum diei unius error posset iis aliquando excidere, nec unquam mensis unius aberratio in alterum mensem refunderetur.

Ad quartum, nego ex loco S. Epiphonii ellici cyclo corrupto usos esse Judæos. Is S. Epiphonii locus ita perturbatus est ut ejus sensus vix queat perspicui; et aliunde in prologo cycli sui paschalis auctor est S. Cyrillus Alexandr. cyclum 84 annorum de quo S. Epiphanius loquitur, malè adversus Judæos concinnatum fuisse, non proinde ab iis usurpatum.

Dices iterum: Christus vixit 33 annis, juxta PP. traditionem; sed si anno 33 æræ vulgaris mortuus sit, annos vitæ triginta excesserit necesse est, cum anno 3 ante æram vulgarem die 25 Decembris sit natus; ergo. Nego majorem. Tot diversæ sunt apud Patres sententiæ de annis quibus Christus vixerit, ut ex eorum dictis hæc quæstio nullo pacto dirimi possit. Alii, et quidem doctissimi, Christo annos triginta, alii triginta et unum, alii triginta duos, alii 33, alii 40, alii 50 tribuunt. Monet S. Aug. lib. 2 de Doctr. christianâ cap. 28, « ut de « historiâ gentium collatâ cum Evangelio, quo- « tuplici anno Christus vixerit, » colligatur. Quibus sapienter dictissi morem gerere voluerimus, annos Christo 57 inchoatos adscribere cogemur.

Plura lege apud Lancelotum, qui de hoc ar-



gumento fusè et accuratè disseruit in chronol. sacrâ, ad calcem Bibl. Vitrean.

ARTICULUS III.

De vaticiniis Aggæi et Malachiæ.

Judæi anno Darii Hystaspidis secundo, ob templi, quod duce Zorobabele extruebant, tenuitatem, mœrori se dabant effusiùs. Quorum animos erigendi causâ, quantus hujusce posterioris templi, Messiae præsentia decorandi, splendor futurus esset, ore Aggæi Prophetæ Deus in hunc modum magnificè prænuntiat: *Adhuc unum modicum est, et ego commovebo cælum et terram et mare et aridam, et movebo omnes gentes, et veniet* DESIDERATUS CUNCTIS GENTIBUS, (hebraicè, *venient desiderium cunctarum gentium*, plurali numero per emphasim usurpato pro singulari); *et implebo domum istam gloriâ, dicit Dominus exercituum. Meum est aurum, et meum est argentum, dicit Dominus exercituum. Magna erit gloria domus istius novissimæ plus quàm primæ, dicit Dominus exercituum; et in loco isto dabo pacem, dicit Dominus exercituum.* (Agg. 2, 7 et seqq.)

Non absimile habetur quoque vaticinium apud Malach. cap. 3, v. 1: *Ecce ego, inquit Dominus, mitto Angelum meum, et præparabit viam ante faciem meam. Et statim veniet ad Templum suum Dominator quem vos quæritis, et Angelus testamenti quem vos vultis. Ecce venit, dicit Dominus exercituum.*

Duo illa oracula, quæ ideò conjungi voluimus, quia sese invicem mirificè illustrant, perspicuum adversus Judæos suppeditant argumentum, quod nunc exponendum est.

CONCLUSIO. Ex Prophetiis Aggæi et Malachiæ efficaciter astruitur tempora adventus Messiae jamdudum esse præterita. Prob. Illius adventus jam pridem præteritè tempora, qui juxta vaticinia Aggæi et Malachiæ, stante secundo templo venire debuit; siquidem ab annis sexcentis septuaginta et octo suprâ mille templum illud à Tito combustum et funditus eversum est. Atqui ex laudatis Aggæi et Malachiæ vaticiniis Messias venire debuit secundo templo stante. Ac istud quidem conficitur ex vaticinio Aggæi. Is enim à quo Aggæus prædicit gloriam templi secundi esse orituram, profectò venit, si Aggæo fides, hoc templo stante; atqui gloriam templi secundi à Messia esse orituram Aggæus prædixit. Namque. 1º in Aggæi vaticinio de templo secundo agi demonstrant tum circumstantiæ temporis; quippe ædificabatur templum secundum, cùm illud Aggæi vaticinium editum est; tum series contextus et sco-

pus vaticinii; scilicet mox dixerat Propheta, v. 4, templum ejus extructioni Zorobabel instabat, *tanquàm non esset* visum esse oculis eorum qui templi Salomonici gloriam conspexerant; quocirca ad solandos Judæos vaticinium de quo disserimus continuò subjicitur; tum pronomen demonstrativum *istius, istam, isto*, non aliâ de causâ ibi multoties adhibitum, nisi ut illud quod tunc condebant Judæi templum indicaretur. Ergo de templo secundo agitur in vaticinio Aggæi. Atque id confitentur (1) Judæi. 2º Is à quo Aggæus ejusmodi templi gloriam vaticinatur orituram, ipse est Messias. Quatuor quippe characteribus soli Messiae propriis ille designatur, de quo in hac Prophetiâ sermo est. Nimirum 1º, quo tempore is est venturus, magna rerum immutatio eventura prænuntiatur ab Aggæo his verbis: *Adhuc unum modicum est, et ego commovebo cælum et terram, et mare et aridam, et movebo omnes gentes, et veniet*, etc. 2º. *Desideratus cunctis gentibus*, ille idem nuncupatur: *et veniet desideratus cunctis gentibus*, seu, ut hebræa habent, *venient desiderium cunctarum gentium*, id est, ille qui maximè exoptandus est gentibus, *et implebo domum istam gloriâ*, etc. 3º Nomine pacis etiam indicatur: *Et in loco isto dabo pacem dicit Dominus exercituum*; 4º ab ejusdem præsentia templum secundum prædicitur sortiturum gloriam templi Salomonis magnificentiae longè superiorem; *meum est aurum et meum est argentum, dicit Dominus exercituum*; id est, si vellem auró et argento templum illud exornare, id facillè exequerer; sed aliâ ratione longè excellentiori illud decorare intendo, præsentia videlicet illius qui pacem perfectam allaturus est: *Magna erit gloria domus istius novissimæ plus quàm primæ, dicit Dominus exercituum; et in loco isto dabo pacem, dicit Dominus exercituum.*

Atqui solus Messias quatuor illis characteribus designari potuit. Enimverò nonne in tempora Messiae per se et per discipulos tot prodigia ex Scripturis edituri, totque nationes religioni suæ addieturi, aptissimè quadrat maxima illa rerum immutatio gentiumque omnium commotio, quam Deus splendidis verbis jam citatis describit: *Commovebo cælum et terram, et mare et aridam, et movebo omnes gentes*? Certè quoties

(1) In Midrasch schir haschirim seu expositione Cantici canticorum. In Bereschit rabba ad v. 26, cap. 9. Genes. in Talmudè lib. Baba batra, et lib. Joma. R. Salomo Jarchi in glossis ad cap. 4 et 2, Agg. et alii apud Raym. Martin. in Pugione fidei, part. 2, cap. 9, edit. Paris. 1651, p. 305, 306.

in Scripturis adhibetur ejusmodi loquendi modus, ut Ps. 17, v. 8, Isa. 24, v. 19, Jerem 49, v. 21, Ezech. 38, v. 19, Aggæi ejusdem 2, v. 22, et alibi sæpè, toties de prodigiis insignibus ac nobilissimis verba fiunt. Pariter, nomine *Desiderati cunctis gentibus*, quis alius significari potuit præter Messiam aliis in locis (1) Scripturæ eâdem notâ insignitum, tantorumque bonorum hominibus collatorum aactorem? Ad hæc, an non etiam pacis nomen maximè convenit Messiae, qui et alibi (2) appellatur *Pax* et *Princeps pacis*, quique ut verè pacis largitor (3) ubique exhibetur? Nec sanè pacem secundo templo eò loci promissam, interpretari queunt Rabbini temporaneam pacem templo Zorobabelico præ Salomonico concedendam. Nemo enim nescit templum Zorobabelicum à Seleuco, ab Antiocho, à Pompeio violatum fuisse, ac à Tito dirutum et solo æquatum; dùmque illud stetit, dissensiones diras inter Judæos exortas esse, et eorum rempublicam gravissimis bellis fuisse exagitata, quibus tandem penitùs extincta est; ergo. Denique an ab alio quàm à Messia templum secundum valuit tantum decus consequi, ut templi Salomonici gloriam superaret? Etenim non modò templum posterius longè minori quàm prius magnificentia enituit, sed præterea, ut ipsimet Rabbini (4) tradunt, rebus sanctissimis ac maximis ornamentis caruit, quibus templum prius decorabatur, Urim et Tummim videlicet, Arcâ et tabulis fœderis, virgâ Aaron, igne cœlesti, oleo divinæ unctionis, præsentia Divinitatis, et Spiritu prophetiæ, quæ tanta profectò re nullâ compensari ac suppleri potuerunt, nisi Messias templum secundum adierit. Quam ex his rebus templum prius præ posteriori dignitatem consecutum est, hanc inæstimabilem R. Azarias appellat; atque earundem habitâ ratione doctus Menasseh ben Israel pronuntiat templum Salmonicum tantò excellentius fuisse Zorobabelico, quantò sol est lunâ præstantior. Ergo ex vaticinio Aggæi Messiam stante secundo templo venire debuisse omninò conficitur.

(1) Gen. 49, v. 10; Isai. 11, v. 10; Mich. 4, v. 2, etc.

(2) Mich. 5, v. 5; Isai. 9, v. 6 et 7.

(3) Psalm. 71, v. 7; Isai. 2, v. 4, et cap. 9, v. 7, et cap. 44, v. 1 et seq., et cap. 52, v. 7; Jerem. 33, v. 6 et 9; Ezech., 34, v. 25 et 29; Mich. 4, v. 2 et seq.; Nab. 1, v. 15; Zach. 9, v. 9 et 10.

(4) Bereschit rabba ad v. 26, cap. 9, Genes. Midrasch schir hashirim ad v. 8, cap. 8. Cantici cantic. Thalmud. in lib. Jomâ, etc., apud Raym. Martin. loco citato.

Jam verò idem quoque ex vaticinio Malachiae evincitur. Nam *Dominator*, quem Malachias ait à Judæis quæsitum, et *Angelus* seu legatus fœderis ab iis exoptatus, ipse est procul dubio Messias et Liberator illis promissus, et ab iisdem tantoperè expetitus, ut agnoscunt ipsi Judæi cum R. Maimonide in Hilchoth melachim, seu Tract. de Regibus, et R. David Kimchi in hunc Malachiae locum. *Dominator*, inquit Kimchius, *ipse est rex Messias, idemque Angelus fœderis*. Templum autem quod is *Dominator et Legatus* præsignificatur ingressurus, non aliud esse quàm Zorobabelicum monstratur 1^o quia eodem nomine donatur quo Templum à Judæis solebat designari. Scilicet Judæi consueverant templum appellare *Templum Domini*. Atqui Malachias Templum de quo vaticinatur æquivalenti indigitat appellatione, nempe illud vocat *templum Dominatoris quem Judæi quærebant*, id est Messiae qui Dominus in sacris litteris non semel nuncupatur; ergo. 2^o Quia Templo secundo extante, aut saltem dum illud absolvebatur, vaticinatus est Malachias; proclive igitur est, ut de ejusmodi templo intelligatur ejus Prophetia, utpote intra *tempus modicum* adimplenda. 3^o Quia Malachiae oraculum de templo secundo explicari exigit affinitas quæ vaticinium illud inter et Prophetiam Aggæi intercedit. Quemadmodum qui gentes omnes commoturus, gentibus desideratus, pacemque ipsis allaturus dicitur ab Aggæo, idem ipse est ac *Dominator et Legatus* fœderis à Judæis expetitus, cujus meminit Malachias; ita templum de quo apud Malachiam agitur, censendum planè est quid unum cum domo Dei in Aggæi vaticinio memoratâ. 4^o Quia vel de templo secundo loquitur Malachias, vel de tertio quodam olim extruendo. Atqui tertium templum quod Rabbini quidam restaurandum fingunt, commentitium est; spem enim illius non modò nullus Scripturæ locus firmat, ut deinde ostendetur, sed contra Daniel cap. 9 templum à Tito evertendum prædicens, eâdem, ut jam notavimus, voce utitur, quâ Moyses Sodomæ et Gomorrhæ dissipationem expressit; additque futurum ut abolitis sacrificiis, et visâ in loco sancto abominatione, desolatio in consummationem et finem perseveret. Aggæus etiam in mox adducto vaticinio satis apertè indicat templum Zorobabelicum futurum esse ultimum, dùm ejus gloriam tam splendidè exprimit, tum Desiderabilem gentibus ad illud venturum esse, et pacem in eo concedendam, docet, tuncque cælum et terram, mare et aridam à Deo

agitanda, ac gentes omnes movendas prænu-
tial. Et verò, ut quid templum tertium extrue-
retur cùm juxta Prophetarum oracula, ut po-
stea dicetur, ritualia legis Mosaicæ et sacrificia
abolita nunquàm debeant in posterum obti-
nere? Hinc frustra tentârunt non semel Judæi
templum suum denuò suscitare, atque flammis
è terrâ erumpentibus aliisque prodigiis sub
Juliano Apostatâ deterriti sunt, ne factâ sibi ab
illo imperatore in odium christianæ fidei, tem-
pli Jerosolymis extruendi facultate uterentur.
Cujus rei testes sunt non solùm SS. Patres qui
tunc temporis vixere, sed etiam Ammianus
Marcellinus scriptor ethnicus et coætaneus.
Ergo intelligendus Malachias de Templo se-
cundo, proindeque, etc.

SOLVUNTUR OBJECTIONES. — Objicies 1^o Etsi
templum secundum præsentiam Messiae non fuis-
set illustratum, vicisset tamen prioris gloriam
1^o, ratione durationis; nam decennio ampliùs
duravit quàm templum à Salomone extractum;
2^o ratione celebritatis; si quidem templum
secundum exteris nationibus magis innotuit,
atque ab earum regibus Dario, Artaxerxe, etc.,
donis splendidissimis exornatum est; 3^o ratione
decoris et magnificentiae, postquàm scilicet ab
Herode in majus auctum et amplificatum fuit;
ergo. Ita R. Salomo Jarchi, R. Kimchi, R. Me-
nasseh, etc. Adde Josephum, lib. 15 *Antiq.*,
cap. 11, aliàs 14, n. 3, testari majoribus sum-
ptibus templum ab Herode quàm ab alio quovis
fuisse exornatum.

1^o Nego antecedens, præsertim quantum ad
tertiam partem, quæ præcipua est. Fatemur
itaque templum secundum non modò annis
decem, ut Judæi putant, sed reverà annis 169,
juxta accuratiores calculos, diuturnitatem tem-
pli prioris excessisse. Quod tamen levioris est
momenti; ubi namque de ædificiorum ad se
invicem collatorum splendore quæstio est, illa
potissimum in se spectantur, et ad durationem
eorum majorem minoremve parùm attendi so-
let, nisi quatenùs ea majoris aut minoris ædi-
ficiorum, quæ vetustate pereunt, soliditatis in-
dicium esse potest; utrumque autem templum
vi et flammis, non vetustate destructum est.
Quanquàm posterius etiam postquàm ab Hero-
de est instauratum, priori minùs solidum fuit,
si Josepho fides (1), qui, lib. 15 *Antiq.* c. 11, vi-
ginti cubitos, id est pedes 30 ex ejus altitu-
dine, pressis nimia mole fundamentis, retro-

cessisse auctor est. Fatemur etiam donis eximiis
à Dario Hystaspide, ab Artaxerxe Longimano,
et ab aliis gentilibus, templum Zorobabelicum
locupletatum fuisse. Verum constat 1^o, ipso
durante Judæos ab exteris gentibus fuisse op-
pressos et vexatos; 2^o hoc ipsum templum non
semel violatum fuisse et spoliatum, quod priori
non contigerat; 3^o idem templum, ut ipse
Abravanel in *Aggæum* observat, nullo pacto,
etiam ubi ab Herode auctum est, accessisse ad
magnificentiam templi quod Salomon regum
ditissimus et sapientissimus immenso apparatu
stupendisque impensis ac structurâ supra mo-
dum mirabili ædificaverat; in quo *nihil erat*,
Scripturâ teste, 3 Reg. 6, v. 22, *quod auro non*
tegeretur; cujusque ibid. cap. 7, sumptuosis-
sima ac tota aurea supellex. Vide etiam 1 Pa-
ralip. 22, et 2 Paralip. 2, 3 et 4, et confer quæ à
Josepho ibidem referuntur de utroque templo.
Enimverò ex Josepho, cui concinunt Josephus
ben Gorion, Hegesippus, S. Hier., etc., ha-
bemus mille carros ad vehendos lapides ab
Herode comparatos, et decem peritissimorum
opificum millia ad opus perficiendum electa,
cuncta verò octo annis ædificata; qui appa-
tus quidem etsi immensus in se, attamen si
comparetur iis quæ idem Josephus *Antiq.* lib.
8, cap. 2 et 3, de templo Salomonico post
Scripturas refert, nihil magni continere vide-
bitur. Nam 1 Paral. 22, v. 14, David legitur
auri talenta centum millia, et argenti mille mil-
lia talentorum, æs verò et ferrum cujus non erat
pondus....., ligna et lapides ad universa impen-
dia, etc. ad templum ædificandum præparasse;
Salomon autem 3 Reg. 5, v. 13, 14, 15 et 16,
2 Paral. 2, adhibuit *operarios de omni Israel*
triginta millia virorum, mittebatque eos in Liba-
num, decem millia per menses singulos vicissim,
etc.; insuper verò *septuaginta millia eorum qui*
onera portabant, et octoginta millia latomorum in
monte; absque præpositis qui præerant singulis
operibus, numero trium millium, etc. Nec tamen
domum Dei ad culmen perduxit ante annum
ab ejus fundatione septimum, 3 Reg. 6, v. 38;
ergo. Quod de Josepho objicitur, nullum nego-
tium facescit. Non ibi comparatur templum
Herodianum cum Salomonico, sed Herodes cum

« tantam molem tanto motu agitari, ut ejus
« altitudinis sexta pars sepulta dehiscat, quin
« tota moles aut corruat, aut ita vitiosa super-
« sit et rimosa, ut destruenda potiùs quàm in-
« habitanda videatur. » Assentimur Tornicello
hunc Josepho sensum tribuendi ad an. mundi
1032, confidentibus fundamentis, viginti illos
cubitos templo adjectos non fuisse.

(1) Omnem Josepho fidem hîc abjudicat Vil-
lalpandus in Ezechiel. T. 2, part. 2, p. 577, et
alii cum ipso, rati scilicet « impossibile esse

iis confertur qui antea ad templi secundi decorem adjumento fuerant.

2° Nego conseq. 1° Evidentissimum est quæcumque templo secundo deerant, nempe Arcam fœderis, tabulas legis, et alia modò enumerata, nullâ duratione, celebritate et magnificentiâ compensari et suppleri potuisse. Ergo. 2° Series horumce verborum: *Meum est aurum, et meum est argentum..... Magna erit gloria Domus istius novissimæ plus quam primæ..... et in loco isto dabo pacem*, manifestum faciunt non de gloriâ caducâ ab auro et argento donisque gentium profectâ vaticinium explicandum, sed de gloriâ veriori et præstantiori, quæ exoritura esset à pace in templo isto dandâ, id est, à Messîa pacis auctore ad templum illud offerendo. 3° Non minùs perspicuum est ex vaticinii contextu eandem templi secundi gloriam, ut dictum est, ab adventu *Desiderati cunctis gentibus*, seu Messîæ repetendam, ac proinde Messîæ ejusdem in hocce templo coram Domino sistendi, maximè hic habendam esse rationem. Potuerit ergo, quod falsum est, templum posterius priori quantum ad famam et magnificentiam æquiparari, nihilominùs ex vaticinio Aggæi evincitur Messiam jamdudùm advenisse.

Inst. Ubi habet Vulgata nostra: *Veniet desideratus cunctis gentibus*, hebræa legunt: *Ventent desiderium cunctarum gentium*, quæ juxtâ R. David Kimchi in hunc sensum explicanda sunt, *Venient cunctæ gentes cum desiderabilibus*, id est cum donis; supplendo nempe præpositionem ante vocem *chemedath*, *desiderium*, et legendo *bechemedath*, *cum desiderabilibus*. Et certè dici nequit *desiderium* seu *desiderabilia gentium venire*, benè verò *gentes venire cum desiderabilibus* ac donis; ergo. Nego antecedens, nempe hanc Kimchii expositionem adhibendam. Etenim malè hic supplet Kimchius præpositionem quæ in hebræo non legitur, et quâ emphasis illius loci et sublimitas penitus evanescit. Ad id quod adjicitur, dici non posse *desiderium gentium venire*; id fateor, si nomine *desiderii* significarentur opes et munera gentium; at nihil in sacro contextu sensum hunc Rabbiorum recentiorum sapit. Num autem Messias bona summa populis allaturus, ipsisque ideò maximè desiderabilis, *desiderium cunctarum gentium* simpliciter nuncupari nequit? Aut potius, ubi Propheta magnificè exprimit futurum ut aliquando veniat *desiderium cunctarum gentium*, quidquamne aliud intelligere licet, præter Messiam, qui in Scripturis ut populo-

rum salus et gentium expectatio semper exhibetur? Quòd si de muneribus gentium, de auro et argento ad templum afferendis, Aggæum interpreteris, quomodò ista expones, quæ in vaticinio præmittuntur: *Adhuc unum modicum est, et ego commovebo cælum et terram, et mare et aridam, et movebo omnes gentes*? An commotio illa insignis quæ hâc magniloquentiâ à Deo præsignificatur, ad munera quædam, ad aliquod argenti et auri pondus à gentilibus offerenda referri et accommodari potest? Postremò, nec patiuntur hæc verba: *Et in loco isto dabo pacem*, ut Aggæi oraculum de muneribus gentilium explicetur; nec ejusmodi donis effici potuit ut templum Zorobabelicum gloriam Salomonici superaret; ergo.

Instabis iterùm. Ille non potuit appellari *desideratus cunctis Gentibus*, seu *desiderium Gentium*, quem gentes ignorabant; atqui gentes ignorabant Messiam; ergo. Nego majorem, et dico Messiam potuisse dici *desiderium gentium*, etsi illum explicite non cognoscerent gentes; nam ad hoc satis est quòd ipse futurus esset gentium spes et salus maximè desideranda.

Objicies 2° Ex circumstantiis in quibus Aggæus de gloriâ templi secundi vaticinatus est, patet eam in ubertate ac copiâ bonorum esse collocandam. Cùm enim Judæi ob suam in construendo templo negligentiam, agrorum sterilitatem essent experti, ut ex v. 13 perspicuum est, Propheta, ut eos simul extimularet ac solaretur, prædicit cælum terramque commovenda, frugesque uberes templo absoluto concedendas; ergo. Nego antecedens. Nec ad fruges terræ possunt aptari splendida hæc Dei verba: *Adhuc unum modicum est, et ego commovebo cælum*, etc., *movebo omnes gentes*; nec ubertas terræ major fuit stante secundo templo, quàm fuerat primo existente; ac tandem evidens est, ut diximus, sermonem in hoc vaticinio de Messîa institui, templique posterioris, comparatè ad Salomonicum, ferè nullam fuisse gloriam, nisi Messîæ ratio habeatur.

Objicies 3° Nihil obstat quominùs Aggæus explicetur de edicto regis Persarum, nempe Darii Hystaspidis, quo pax data est Judæis, et facta templi ædificandi facultas; ergo. Nego antecedens. Nunquàm in Scripturis, uti jam observatum est, Deus cælum terramque commoturus dicitur, nisi ubi de stupendis et maximis prodigiis sermo sit. Quid autem apparet prodigii in decreto quo Darius edictum à Cyro jam concessum confirmavit? Præterea, illud decretum Darii ad *desideratum cunctis genti-*

bus nihil contingit, nec eo data est eximia illa pax juxta vaticinium in templo secundo concedenda, quâ effici debeat ut gloria hujus templi gloriam alterius longè superaret; ergo.

ARTICULUS IV.

De aliis vaticiniis quibus Messiam venisse ostenditur.

CONCLUSIO. Præter adductas hactenùs in Judæos Prophetias, aliæ multæ sunt certum præteriti adventûs Messiae argumentum. Prob. Nam 1º, illustre ejusmodi oraculum habetur Dan. 2. Viderat in somnis Nabuchodonosor rex Babylonis statuam unam grandem et sublimem, cujus caput ex auro optimo erat, pectus autem et brachia de argento; porrò venter et femora ex ære; tibiæ autem ferreæ; pedum quædam pars erat ferrea, quædam autem fictilis. Videbat ita Nabuchodonosor, donec abscissus est lapis de monte sine manibus, et percussit statuam in pedibus ejus ferreis et fictilibus, et comminuit eos. Tunc contrita sunt pariter ferrum, testa, æs, argentum et aurum.... lapis autem qui percusserat statuam, factus est mons magnus, et implevit universam terram. Daniel, somnio illo quod regi exciderat, in ejus memoriam revocato, de quatuor imperiis sibi invicem successuris partes varias statuæ interpretatur; lapidem verò de Messiae regno exponit. Hoc est somnium, inquit, v. 36 et seq.; interpretationem quoque ejus dicemus coram te, rex. Tu rex regum es, et Deus cæli regnum, et fortitudinem, et imperium, et gloriam dedit tibi.... tu es ergo caput aureum. Et post te consurget regnum aliud minus te, argenteum; et regnum tertium aliud æreum; quod imperabit universæ terræ, et regnum quartum erit velut ferrum; quomodò ferrum comminuit, et domat omnia, sic comminuet et conteret omnia hæc. Porrò quia vidisti.... digitos pedum ex parte ferreos, et ex parte fictiles, ex parte regnum erit solidum, et ex parte contritum... In diebus autem regnorum illorum suscitabit Deus cæli regnum quod in æternum non dissipabitur, et regnum ejus alteri populo non tradetur; comminuet autem et dissipabit universa hæc, et ipsum stabit in æternum, secundum quod vidisti, quòd de monte abscissus est lapis sine manibus, etc.

Ex quo vaticinio sic argumentari licet. Ibi prænuntiatur futurum ut in diebus regnorum illorum quæ Propheta commemorat, id est ultimo eorum adhuc existente, suscitetur Deus regnum quod in æternum non dissipabitur, quod alteri populo non tradetur, et quod stabit in æternum; quibus sanè verbis solùm Messiae regnum desi-

gnari nullus diffitebitur, atque de isto consentiunt Rabbini, ut probat Huetius in Demonstr. Evang., prop. 7, n. 20, et prop. 9, cap. 8. Jam verò imperia illa quatuor de quibus Daniel, à longo tempore defecerunt et dissipata sunt. Nemini enim dubium esse potest quin primum ejusmodi regnum sit illud ipsum cui Nabuchodonosor præerat, nempe Babylonicum, ut patet ex istis Prophetæ verbis ad hunc regem: Tu es caput aureum; post te consurget regnum aliud minus te, argenteum. Secundum igitur regnum est persicum, quod constat babylonico successisse, quodque idcirco minus illo dicitur, quia et posterius tempore, et nec duratione nec extensione cum babylonico seu chaldæo comparandum. Tertium est macedonicum seu Græcorum, quod persicam monarchiam destruxit, ipsâ longè latiùs patuit, et propter magnam sui diffusionem dicitur universo orbi imperâsse. Quartum est romanum, quo Alexandri Magni successorum potestas penitus comminuta est, et in quo quæcumque de quarto regno, ac de parte statuæ infimâ Daniel protulit, facile deprehenduntur. Ergo cum jamdudum cuncta hæc imperia eversa sint et desierint, fatendum superest Messiae regnum jampridem suscitatum fuisse à Deo.

Dices. Imperium romanum etiamnum existit: scilicet in Germaniâ regnat imperator Romanorum; Constantinopoli verò summam rerum obtinet Turca, romanorum imperatorum ex parte successor. Ergo Messiam advenisse ex cap. 2 Danielis non probatur.

Nego antecedens. Imperium germanicum nomine tenus romanum appellatur, quippe quod Romani non fundârunt, et in quo nec rebus potiuntur, nec unquàm potiti sunt. Idem à fortiori dicendum de turcico imperio, quo Romanorum ditio in Oriente penitus extincta est; ergo.

Dices iterum cum Grotio, Annot. ad cap. 2 Danielis: « Regnum quartum de quo hic vaticinatur Daniel, est regnum Seleucidarum et « Lagidarum, Alexandri magni successorum. « Lapis abscissus de monte sine manibus, est « exercitus populi qui suæ esset spontis, nulli- « que regi pareret: cujus populi origo à monte, « nempe Palatino. Tandem regnum quod in « æternum non dissipabitur, est imperium ro- « manum perpetuò mansurum; ergo. Resp. Hanc Grotii opinionem, etsi ibi agnoscat ille eximium Messiae typum, nullo pacto defendi posse. Nam regnum illud quartum de quo agitur, ponitur esse unum et à cæteris distinc-

tum, eo ipso quòd quartum à Prophetà dicitur. Atqui regna quibus potiti sunt Alexandri successores Seleucidæ et Lagidæ, dici non possent in sententiâ Grotii regnum unum à cæteris distinctum. Vel enim ea spectantur in se, vel ratione originis. Si in se considerentur, nequeunt dici regnum unum, sed plura regna, quippe quæ à se invicem nullo modo dependentia, bellis sævissimis ac odiis perpetuis inter se decertarunt. Si spectentur ratione originis, possunt quidem dici unum regnum, quatenus scilicet unum erant Alexandri Magni imperium, in plures, juxta ejus ultimam voluntatem, divisum sectiones, quarum duæ Seleucidis et Lagidis propriæ cæteris prævaluerunt, ac superstites manserunt. Verùm si hocce modo inspiciantur illa regna, jam ab ipso Alexandri magni regno non erunt distincta; ergo. Deinde principes hæcce regna moderantes non modò iis imperabant gentibus quas domuerat et imperio suo acquisiverat Alexander, sed et ab eo auctoritatem suam hauriebant, quippe quibus *diviserat regnum suum, cum adhuc viveret*, verba sunt proximè citati auctoris Machab. ergo ab Alexandri regno propriè distinguenda non sunt regna illa; proindeque, etc.

2º Plurima exant vaticinia de Gentibus ad veri Dei cultum tempore Messix vocandis. *Erit in novissimis diebus*, inquit Isaias cap. 2, v. 2 et seq. *præparatus mons Domini in vertice montium.... et fluent ad eum omnes gentes, et ibunt populi multi, et dicent: Venite et ascendamus ad montem Domini..... et docebit nos vias suas, et ambulabimus in semitis ejus; quia de Sion exhibit lex, et verbum Domini de Jerusalem. Et judicabit gentes, et arguet populos multos.... Et incurvabitur sublimitas hominum, et elevabitur Dominus solus in die illà et idola penitus conterentur... In die illà projiciet homo idola argenti sui, et simulcra auri sui quæ fecerat sibi ut adoraret.* Idem Isaias aliis adhuc in locis, Jeremias, Ezechiel, Sophonias, Osee, Joel, Amos, Zacharias, Malachias cæterique (1) passim scriptores sacri illud quoque declarant, nempe futurum ut Messias ad unius Dei cultum nationes revocaret, ac discrimen illud summum, Judæos inter et alios populos olim intercedens, aliquando tolleret, nec de eo Judæi à nobis dissentiant. Atqui jamdiu est ex quo illud fuit impletum; si quidem jamdudum idola eversa sunt, ac nationes de veri numinis cultu, et de morum integritate servandâ institutæ sunt;

(1) Vid. Huetium, propos. 9, cap. 150.

jamdudum non solum in Israel, sed *ab ortu solis usque ad occasum, magnum est nomen Domini in gentibus*; jamdudum, secundum Malachiæ Prophetiam, *in omni loco sacrificatur et offertur nomini Domini oblatio munda*, quæ quidem litatio parti Judæorum Christo addictæ simul cum gentibus est communis; dum ex adverso Judæi in Christum rebelles, per orbem disjecti, omni sacerdotii potestate, omni sacrificio destituuntur; ergo.

Quædam objiciunt Judæi inferius solvenda.

3º Vaticinia, ad ostendendum Christum Dominum esse Messiam à Prophetis prædictum, capite sequenti proferenda, simul demonstrant Messiam jam venisse; ergo.

CAPUT II.

Ex Prophetarum oraculis contra Judæos evincitur Christum Jesum esse Messiam.

Hoc alterum in Judæos disputationis caput ab isto exordiemur argumento: Ille est Messias in quo adimpleta sunt quæ de Messiâ vaticinati sunt Prophetæ, seu cui competunt characteres quibus Messiam Prophetæ expresserunt; atqui in Christo Jesu adimpleta sunt, etc., ergo, etc.

Minorem propositionem, de quâ solum controversia esse potest, duplici demonstrabimus articulo. In primo ostendemus vaticinia Jacobi, Danielis, Aggæi, etc., præcedenti capite adducta et explicata, in Christo Domino exitum habuisse. In altero illud ideam de aliis Prophetiis exequemur. Cum verò Jesum sacris oraculis designatum ac præsignificatum fuisse, ex collatione et consensu textuum utriusque Testamenti, ut plurimum efficiatur, præmonendum ducimus vim argumenti, quod ex hac Evangelii et veteris Instrumenti concordia eruitur, non posse idcirco eludi à Judæis, quòd historiam evangelicam, ac fidei christianæ dogmata non recipiant. Etenim, quantum ad fidei dogmata quæ Christi dotes et naturam divinam, pretium mortis ejus, regnum ejusdem spirituale, et alia hujusmodi benè multa per se insensibilia et merè spiritualia spectant, sufficit ad præsens institutum 1º ostendi genuinam Christi et Apostolorum de ejusmodi dogmatibus doctrinam cum oraculis Prophetarum ad Messiam attinentibus concordare; quæ quidem concordia per se multum probat, et prodigii loco esse potest. Sufficit 2º eadem fidei christianæ dogmata connecti multis eventibus certis ad Christum contingentibus et de Messiâ prædictis. Nimirum, si ea quæ de nativitate, prædicatione, passione,

morte, resurrectione, etc., Christi Domini, et variis ejusmodi rerum circumstantiis Evangelistæ edisserunt, vera sint, et Prophetiis Messiam spectantibus cohæreant, ac præterea doctrina de Christi dotibus et aliis spiritualibus in Evangelio expressa, eisdem vaticiniis legitimo sensu intellectis consentanea sit; planum est Christum esse Messiam à Prophetis prædictum.

Quantum autem ad facta, 1^o plura Messiae insignia indicia Jesu Christo competere manifesti eventus comprobant, quos historiae omnes testantur, ac etiamnum oculis conspiciamus; cujusmodi sunt, v. g., Judæorum reipublicæ extinctio, quæ circa Messiae tempus juxta Prophetias obtingere debuit, eorundem desolatio et dispersio, templi destructio, idolorum eversio, gentium conversio ad unius Dei cultum, etc. 2^o Facta quæ in Evangelio narrantur, iisdem Judæo suadentur argumentis, quibus in gentilem demonstrantur. Ejusmodi argumenta inferrius exponemus. Patebit tam Judæos quam quoslibet infideles his premi, perindeque adigi ad fatendum Apostolos nec illusos nec illusores fuisse eorumque scripta ad nos usque incorrupta pervenisse.

3^o Ad eandem historiae Evangelicæ veritatem agnoscendam, valentiùs adhuc Judæus urgebitur, si comparisonem instituas scripta Evangelistarum inter et Pentateuchum Moysis. Scilicet quærat à judæo quibusnam momentis in gentiles astruere valeat Moysen sincerè et Deo inspirantescripsisse, ejusque libros nec incuriâ, nec perversitate hominum adulteratos. Tum ostendatur veritatem historiae evangelicæ pluribus adhuc et majoribus argumentis firmari. Istud facillimè confici, colligere erit ex dicendis postea adversus gentiles et incredulos de certitudine factorum evangelicorum. Interim verò, ut appareat quâ ratione possint ea, quæ ibi statuenda sunt, hùc referri, simulque causæ christianæ contra Judæos æquitas ampliùs innotescat, non abs re erit præcipua hujus negotii capita paucis hîc perstringere. Itaque non distitemur optimè demonstrari Hebræorum legislatorem ipsis non illuisse; ea est enim prodigiorum in Pentateucho relatorum indoles, ut, nisi vera fuissent, à gente hebræâ quæ testis eorum ponitur, non potuissent credi. At fatendum quoque est facta quæ in Evangelio narrantur sæpè magis splendida, nec minùs publica fuisse; ac proinde Apostolos, qui se ut ejusmodi eventuum testes oculatos exhibent, de illis non potuisse decipi. Quod autem noluerint

fallere, evidentissimum est. Ii enim fuerunt viri simplices quos nulla spes temporalis ad fallendum impulit; nullus labor, nullus periculorum ac mortis metus ab ejusmodi factorum testificandâ veritate deterruit. Omni auctoritate et favore, omnibus fallendi mediis destituti, in unâ Evangelii virtute adeò confidebant, ut ejus tantum ope omnes populos à superstitioso idolorum cultu avertere et ad fidem cultumque et imitationem Crucifixi adducere susceperint. Quod quidem consilium, renitente licet humanâ potentiâ, feliciter sunt executi. Jam verò quis negaverit, his aliisque aliquando referendis sinceritatis Apostolorum argumentis, momenta quibus Moysis fides astruitur (humano more rem spectamus), quanta quanta sint, plurimum superari?

Idem dicendum de integritate librorum ab Evangelistis conscriptorum, comparatè ad libros Moysis. Enimverò quò magis divulgatur ac statim disseminatur liber, eò minùs potest datâ operâ et sine sensu vitiari. Atqui Pentateuchus Moysis solis Judæis concreditus, penès eos solos per plura secula extitit. Ex adverso libri Evangelici per orbem illicò disseminati, in varia populorum idiomata translati, in omnibus Ecclesiis lecti assiduè et explicati, à Christianis diversarum regionum, imò et ab hæreticis frequenter triti, in concionibus publicis, in scriptis quibuslibet, in operibus polemicis adversus paganos, Judæos, et heterodoxos ab Ecclesiæ Patribus indesinenter et uniformiter adhibiti fuerunt; nec tamen tot inter exemplaria, versiones et citationes ejusmodi librorum, ullum quod ad substantiam spectet, deprehenditur discrimen. Ergo, etc.

Tandem, si miraculis et prophetiis in Pentateucho contentis, illum esse à Deo inspiratum Judæus stabiliat, non ibimus inficias; sed inde à fortiori concludemus Evangelia Deo dictante fuisse exarata; quippe in quibus longè plura numero et multà majora miracula, pluresque prophetiæ eventu comprobatæ, quam in libris Moysis enarrantur. Quæcumque igitur ad veritatem, integritatem, et divinitatem librorum Moysis confirmandam Judæus afferre possit, ejusmodi dotes libris Evangelicis propter graviora adhuc momenta adjudicandæ.

Accessit, varias ab incredulis de quibusdam Pentateucho subinde factis, ut putant, additionibus, et de fortunis quas tempore captivitatis Baylonicæ et sub Esdrâ expertus est, proponi difficultates, quæ etsi ipsius auctoritatem minimè labefactent, nonnihil tamen involvunt in-

commodi, quod in scriptis Evangelicis locum non habet. Atque de toto hoc argumento plura legi possunt apud Philippum à Limbroch, in opere cui titulus, *De veritate Religionis Christianæ amica collatio cum erudito Judæo*, resp. ad 2 scriptum Judæi cap. 6, et resp. ad 3 scriptum cap. 3. Qui quidem liber cautè legendus, utpote qui inter multa quæ in Judæos eximia continet, nonnunquam Episcopii et Arminianorum interpretationibus conspergitur.

Cæterum tametsi pro librorum Evangelicorum auctoritate tot momenta militent, nondum tamen postulamus à Judæis ut ejusmodi librorum divinitatem agnoscant. Impræsentiarum satis est eam Evangelistis tribui fidem, quæ quibusvis non infimæ notæ scriptoribus debetur. Sanè, vel nihil certi in historiâ esse potest, vel simplex Evangelistarum et ingenuus scripendi modus, disciplinæ quam tradunt sanctitas, uniformis eorundem consensus, ei tamen conjunctus dissimilitudini, quâ eos communicatis consiliis non scripsisse apertum sit, tum rerum quas exponunt natura et indoles; quippe de publicè gestis plerumque agunt, nec non temporis quo sua scripta divulgârunt circumstantiæ, ac demùm eventus Evangelii promulgationem subsecuti; hæc, inquam, historiam evangelicam à nemine cordato temni et posthaberi sinunt. Verùm ista suo loco uberius declarabuntur. Præmonuisse sufficiat totam in Judæos controversiam ad istud unum hic revocari, an videlicet fides christiana de Jesu, ac facta quæ ad eum attinent seu ex Evangeliiis, seu ex diversis certisque historiæ monumentis accepta, antiquis Prophetarum de Messiâ vaticinationibus respondeant.

ARTICULUS PRIMUS.

Vaticinia Jacobi, Danielis, Aggæi, etc., ante adducta, in Christo Domino completa ostenduntur.

Conclusio I. In Christo adimpletum est vaticinium Jacobi superius explicatum. Probatur. Tempora Messiæ adventûs in hoc vaticinio duobus magnis eventibus ac rerum immutationibus præsignantur. Prima immutatio in eo posita est, quod versùs hæc tempora imperium Judæ ac totius populi Judaici evertendum fuerit; altera verò in hoc consistit, quod novum regnum, non jam ex uno populo constitutum, sed ex omnibus populis, sub principe Messia tunc stabiliri debuerit. Primum exprimitur his Prophetiæ verbis, Genes. 49, v. 10: *Non auferetur sceptrum de Judâ, etc., donec veniat schi-*

loh, etc. Aliud istis significatur: *Et ipse erit expectatio gentium*; vel ut habet textus hebræus: *Et ei erit obedientia populorum*; eu ut Samaritanus legit: *Et ad ipsum congregabuntur populi*. Atqui hæc duo Christi temporibus perfectè congruunt. 1º Enim venit Christus sub Herode qui primus ex alienigenis regnum apud Judæos obtinuit. Ætate Christi Judæa in provinciam romani imperii versa est, ac paulò post ejus mortem, anno scilicet æræ vulgaris 70, Jerusalem templumque funditus eversa sunt, et Judæorum respublica penitus absoluta et dissipata. 2º Regnum non quidem terrenum, sed spirituale, in quo non caducis, sed cœlestibus bonis cumulamur, ex omnibus gentibus quas sinu suo complectitur Ecclesia, conflatum, Christo duce laboribus Apostolorum et discipulorum ejus partum et stabilitum est quod in æternum permanebit; ergo. Adde quòd omnes enumeratæ vocis *Schiloh* significationes Christo, juxta fidem christianam, aptissimè conveniant. Si enim vocem *Schiloh* interpreteris, *Qui mittendus est*, agnoscas necesse est eâ Christum signari, quippe qui ad homines salvandos à Deo missus est, ac missionem suam omni miraculorum genere probavit. Si autem *Schiloh* tibi sit *Pacificus*, quis illo nomine sine addito, meretur insigniri, nisi Christus Jesus, qui doctrinâ suâ et exemplo (Matth. 11, v. 29 et 30, et alibi) homines ad pacem et concordiam invitat: qui *Pax nostra* dicitur Ephes. 2, v. 13 et 14, quòd *in sanguine* ejus Deo fuimus reconciliati: à quo *pax* cœlestis *exuperans omnem sensum* Judæis et gentibus est allata; cujus regnum, Rom. 14, v. 17, *est justitia et pax, et gaudium in Spiritu sancto*? Si eadem vox sonet *filium Judæ*, quis inter filios Judæ ad expectationem sancti illius Patriarchæ implendam magis Christo idoneus? Demùm, si *Schiloh* accipiatur pro *repositis et reservatis* Judæ, aut pro illo *cui repositum est regnum*, quis non videt quæcumque potuerunt Judæ esse reposita et reservata, in Christo Jesu omnium donorum auctore ultra spem esse impleta; regnumque illud eximium ac præcellens filii Judæ non posse esse quid majus regno spirituali Christi, cui *data est omnis potestas in cælo et in terrâ*, Matth. ult. v. 18, et *cujus regni non erit finis*, Luc 1 v. 33? Ergo.

Conclusio II. Prophetia Danielis cap. 9 in Christo Domino exitum consecuta est. Prob. Quem enim Daniel ibi venturum significat, is juxta prophetiam futurus est *Sanctus sanctorum, Christus, Christus dux; justitiam sempiternam*

adducturus est, et iniquitates deleturus; in ipso implenda est visio et prophetia; ejus ætate consummandum peccatum; elapsis ab exitu sermonis de reædificandâ Jerusalem 60 annorum, occidendus est, et non sibi; pactum multis confirmaturus est, et sacrificia vetera aboliturus; post ejus necem, et in pœnam ejus necis, civitas et sanctuarium dissipanda sunt, abominatio desolationis in templo conspicienda, et desolatio in consummationem super populum Judaicum effundenda. Hæc sunt totidem Messiae criteria juxta vaticinium Danielis ut ex supra dictis liquidum est. Atqui illa omnia in Christo Jesu ad eventum fuere perducta.

1° Sæpè Jesus in Novo Testamento appellatur *Christus, Unctus Domini, Sanctus*. Et sanè quid sanctius excogitari potest humanitate Christi, quæ suî ipsius arctissimâ unione cum Verbo domino ungitur et sanctificatur? Joan. 1, v. 14; Philip. 2, v. 6 et 7, etc. 2° Ab ipso peccata mundi deleta sunt, Joan. 1, v. 29; testimonium ipsi perhibens Joannes Baptista ait: *Ecce qui tollit peccata mundi*. Matth. 26, v. 28 et alibi, sanguis ejus dicitur effusus *in remissionem peccatorum*. 3° Christus adduxit justitiam sempiternam, dum abominandos paganismi cultus extinxit, ac religionem sanctam et ritibus suis ex merito auctoris suî justificantem induxit, à plus quàm septemdecim seculis stantem, et ad mundi finem usque perseveraturam. 4° Impletæ sunt in Christo Jesu prophetiæ genuino sensu intellectæ. Hinc Apostolus, Rom. 10, v. 4, ait *finem legis esse Christum*; Et Cor. 1, cap. 10, v. 11, *omnia in figurâ Christi Domini contigisse* Israelitis; Christusque spiritum emitens, Joan. 19, v. 30, in hanc vocem erupit: *Consummatum est*. 5° Dux fuit Jesus, scilicet tum multorum Judæorum qui ejus legem amplexi sunt, tum universi populi christiani; nam juxta ejus leges et ejus nomine cuncta in Ecclesiâ disponuntur et peraguntur. Omitto ipsum etiam fuisse reipsâ ducem Judæorum, qui eum non receperunt, quippe in quos jus habuit, et qui illum respuendo gravissimè peccaverunt, Joan. 1. 6° Occisus est, et non sibi, sed ut sanguine suo satisfaceret pro peccatis, homines redimeret ac Deo reconciliaret, Matth. 26, v. 28; Rom. 5, v. 9; Ephes. 1, v. 7; Coloss. 1, v. 14 et 20, etc. Atque ejus nece injustâ effectum est ut veniret super Judæos et ab eis requiretur omnis sanguis justus qui effusus est super terram à sanguine Abel justî, usque ad sanguinem Zachariæ, qui periit inter altare et ædem, Luc. 11, v. 50 et 51; Matt. 23, v. 35. (Vide etiam

Matth. 27, v. 25, ubi Judæi exclamant: *Sanguis ejus super nos et super filios nostros!*)

Occisus est autem post 69 hebdomadas annorum ab exitu sermonis ad iterum ædificandam Jerusalem, videlicet in medio septuagesimæ hebdomadis, uti supra fusè exposuimus. Rursus porro advertas, quod non semel monuimus, nempe rem ejusmodi, etsi ad amussim chronologiæ litigiosæ exacta difficultatem patiatur, ita tamen se habere, ut evidentissimum sit, juxta moralem hominum æstimationem, eventum perfectè vaticinio cohærere. De octo enim ad summum annis, ut ex dictis liquet, disputari potest. Agitur verò de longâ annorum 490 serie, quæ solummodò texitur ad fidem historiæ profanæ, cujus scriptores inter se non semper consentiunt. 7° Christus confirmavit pactum multis; nimirum tum per se, dum ministerio suo functus est, tum per Apostolos, à quibus voluit Evangelium annuntiari primùm quidem Judæis, quorum multi illud amplexi sunt, et deinde *in mundo universo omni creaturæ*, Marc. 16, v. 15, vide et Act. 1 v. 8, etc. 8° Ejus morte valor et necessitas veterum sacrificiorum abolita sunt, Hebr. 9 et 10; nec multò post ejus mortem, templo everso, etiam sensibiliter et quoad exteriorem ritum hostia et sacrificium defecit. 9° Denique, anno ab ejus morte 37, civitas et sanctuarium dissipata sunt, ælæ abominationis in loco sancto visæ sunt, cœpitque desolatio et dispersio populi Judaici à decem et octo ferè seculis perseverans, et usque ad consummationem et finem duratura. Ergo indicia Messiae insignia, à Daniele prædicta, in Christo Jesu exitum habuerunt.

Conclusio III. Quæ adductis Aggæi et Malachiæ vaticiniis continentur, in Christo Domino evenère. Probatur. Nam 1°, juxta vaticinium Aggæi, tempore adventûs Messiae cælum et terra, mare et arida à Deo commovenda sunt, gentes et omnes agitandæ. Atqui id in Christo effectum est. Ipso enim nascente sidus novum in cœlo apparuit, Matth. 2, v. 2, et *facta est...*, *multitudo militiæ cælestis audantium Deum, et dicentium: Gloria in excelsis Deo*, etc. Luc. 2, v. 13. Dum baptizatus est à Joanne, *apertum est cælum, et descendit Spiritus sanctus corporali specie sicut columba in ipsum et vox de cœlo facta est: Tu es filius meus dilectus*, etc. Luc. 3, v. 21 et 22. Similiter cum transfiguratus est, *vox facta est de nube, dicens: Hic est filius meus dilectus, ipsum audite*. Luc. 9, v. 35, etc. Ipso prædicante, seu per se, seu per Apostolos, mi-

racula summa terrâ marique edita sunt. Ipso moriente, sol miraculosè obtenebratus est, *velum templi scissum est.... terra mota est, et petra scissæ sunt, et monumenta aperta sunt, et multa corpora sanctorum, qui dormierant, surrexerunt.* Matth. 27, v. 45, 51 et 52. Ad hæc, ipse resurrexit, Matth. ult. et alibi, et in cœlos ascendit, Marc 16, v. 19, etc. Tandem Christus nationum religionem immutavit, earum idola confregit, populosque omnes sibi devinxit. Ergo tempore Christi cœlum et terra, mare et arida, atque omnes gentes à Deo commotæ sunt.

2° Juxta Aggæum et Malachiam Messias templum secundum ingressurus erat, atque ita ex Aggæo 2, v. 8, futura erat *magna gloria domus istius novissimæ plus quàm primæ.* Quod Christus quoque adimplevit, quippe in templo præsentatus coram Domino, Luc 3, v. 22, et in eadem æde docuit, Matth. 26, v. 55, Marc. 12, v. 35, etc., atque ibi innumera miracula edidit.

3° Christus fuit pax quæ in templo secundo juxta Aggæum dari debuit; siquidem ad templum coram Domino se ut victimam sisti voluit, præludens sacrificio pleniori, quo Deus *pacificavit per sanguinem crucis ejus, sive quæ in terris, sive quæ in cœlis sunt,* Coloss. 1, v. 20; ergo, etc.

Dices 1° : Christus non intravit in secundum templum quod à Zorobabele exstructum fuerat, sed in Herodianum. Narrat enim Josephus lib. 15 Antiq., cap. 11, aliàs 14, n. 3, templum ab Herode fuisse de integro reædificatum, *sublatis nempe veteribus fundamentis, et jactis aliis;* ergo. Nego antecedens, et dico templum ab Herode restauratum idem cum Zorobabelico juxta omnium tunc existentium æstimationem habitum fuisse Rabbini in Talmude et in aliis operibus suis Herodianum templum à Zorobabelico nunquàm distinguunt, semper supponunt asseruntque templum secundum fuisse dirutum à Romanis; atque ubi agunt de templo quod à Messiâ ædificandum fingunt, illud non templum quartum appellant, sed tertium. Nec sanè his Josephus dissonat, quippe qui faciliè explicetur de maximæ tantum templi ac ejus fundamentorum partis instauratione atque reædificatione successivè intra octo annos ab Herode peractâ; adeò ut Herodes templum secundum non æquaverit solo ut novum extrueret, sed per partes illud reparaverit, jactisque novis fundamentis, ei ampliorem ambitum dederit, et in majorem altitudinem illud erexit, ac tandem *templo universo circumdederit porti-*

cus ingentes aliaque ornamenta adjecerit. Etverò si templum fuisset ab Herode ex integro dirutum, ut aliud ejus loco ædificaretur, cessasset igitur sacrificium perpetuum quod in solo templo offerri poterat: num autem ejusmodi defectionem passi essent Judæi? num illius nullam Josephus mentionem fecisset? Ergo, etc.

Dices 2° : Non potuit præsentia suâ Christus majorem templo secundo gloriam conferre, quàm quæ priori fuit. Nam 1°, quis dixerit majorem alicujus templi gloriam inde potissimum repeti quòd in illud semel aut iterum aliquis ingressus fuerit? 2° In templo priore semper aderat præsens Dei responsa dantis majestas; at Jesus aliquoties tantum in templum secundum introivit; ergo, etc. Nego antecedens. Christus in templo secundo docuit, miracula edidit, ut diximus, atque in eo stetit ut mediator, ut victima, ut pacem afferens, Deoque homines reconcilians; ergo. Pax illa firma et constans, hæc reconciliatio tempore Messia ac stante secundo templo futura significatur his Prophetia Aggæi verbis : *Et in loco isto dabo pacem.* Atque id procul dubio intellexerat auctor libri 2 Machab. de templo secundo hæc habens cap. 5, v. 20 : *In magni Domini reconciliatione cum summâ gloriâ exaltabitur.* Inde patet responsio ad utramque antecedentis probationem.

CONCLUSIO IV. Cætera vaticinia antè allata in Christo Domino adimpleta sunt. Prob. Nam 1°, in adductâ Prophetiâ Danielis 2, quatuor de Messiâ præsignificantur : 1° Messiam stante imperio romano venire debuisse; 2° ab ipso regnum aliud esse instituendum; 3° ejusmodi regnum quatuor aliis successurum, et ea comminuturum; 4° ejusdem regni nullum futurum esse finem. Atqui hæc quatuor in Christo exitum sortita sunt. Ac 1° quidem Christum esse natum imperio romano stante, nec ipsi Judæi negaverint. 2° A Christo regnum fuisse institutum jam diximus, regnum, inquam non temporale, sed spirituale, ipsomet Christo dicente Joan. 18, v. 36 : *Regnum suum non esse de hoc mundo;* quo in regno non temporalia, sed altiora et cœlestia bona impertiuntur, remissio videlicet peccatorum, gratia uberes, dona spiritus sancti, etc., quibus justificamur et ad salutem æternam perducimur. 3° Hoc regnum, quod nihil aliud est quàm ipsa Christi Ecclesia, aliis successit et etiamnum durat, destructo jamdudum imperio romano. Quod verò additur, ejusmodi regno comminuendum ac conteren-

dum romanum imperium, id non ad superficiem litteræ cum Judæis accipi debet, sed ad sententiæ veritatem et spirituali sensu. Nempe hæc intelligenda sunt, habitâ ratione indolis et naturæ hujusmodi regni. Temporale regnum alia destruit imperia, dum ad extraneos temporalem, eorum ditionem transfert. Regnum spirituale, intactis temporalibus possessionibus, suo tamen modo regna comminuit, dum illa, quantum ad res spirituales, cultum scilicet et religionem immutat. Cum ergo, ut deinceps docebimus, regnum Messiae à Prophetis descriptum, spirituale esse debuerit, ad vaticinii exitum satis est, si Christi domini regno seu Ecclesiâ imperium romanum, quantum ad sacra, destructum fuerit et comminutum. Atqui id reipsâ evenit. Jam dudum enim, Christi religione invalescente ac per imperium romanum obtinente, nefandi Deorum cultus ac idololatrica superstitio extincta sunt; ita ut ipsi imperatores Romani Christo nomen dederint, seseque sacris ejus legibus subjecerint, ac Roma imperii antea urbs princeps, simul et erroris sedes, regni Christi, id est, Ecclesiæ caput facta fuerit; ergo. 4^o Nullus regni Christi futurus est finis. Nam Ecclesia in terris militans, paganismi et hæresum victrix, hactenus stetit et stabit porro usque ad consummationem seculi (Matth. ult.); postmodum verò in cœlis triumphans, nunquam finem est habitura.

2^o Vaticinia, quæ spectant gentium conversionem ad unius veri Dei cultum tempore Messiae, in Christo etiam ad eventum perducta sunt. Siquidem Apostolorum ejus ac ministrorum Ecclesiæ laboribus effectum est ut idola extirparentur, gentes unum supremum venerarentur Numen, ac de puritate vitæ servandâ edocerentur; ergo.

ARTICULUS II.

De multis aliis oraculis in Christo ad eventum perductis.

Vaticinia de quibus hic agimus, alia spectant Messiae nativitatem et infantiam; alia ejus vitam, ministerium, et ministerii circumstantias, quod v. g. via illi à præcursore paranda, quod ipse discipulos selecturus, quod miracula certi generis editurus, etc.; alia ejus passionem et mortem; alia ejusdem resurrectionem, ascensionem, effusionem Spiritûs sancti in Apostolos; alia ejus dotes personales, scilicet quod Deus et homo, quod sacerdos, quod redemptor et mediator, quod victima, quod Propheta major Moyse, quod Rex et Dominator, etc.; alia vocationem gentium et Ecclesiæ institutio-

nem, etc. De quibus omnibus sigillatim disse-
rendum est. In plures igitur Paragraphos hunc articulum dividi necesse est.

§ 1. De Vaticiniis Messiae nativitatem et infantiam spectantibus.

Quæ circa hoc argumentum vaticinati sunt Prophetæ, ad quinque capita possunt revocari, nimirum ad ea quæ de genere Messiae, de matre ejus, de ejusdem nativitatis loco et tempore, ac de illius infantia à sacris vatibus prædicta sunt.

DE GENERE MESSIÆ. — Conclusio. Messias ex Patriarchis et ex Davidis familiâ originem ducere debuit secundum multa vaticinia quæ in Christo Domino impleta sunt.

Probatur prima pars, Messiam videlicet juxta Prophetas debuisse ex Patriarchis et ex Davide nasci. Namque 1^o, Genes. 22, v. 18, Messiam ex Abrahamo oriturum pollicetur illi Patriarchæ Deus is verbis: *Benedicentur in semine tuo omnes gentes terræ*, quibus similia leguntur Gen. 18, v. 18. Idem denuò promissum et prænuntiatum est Isaaco, Gen. 26, 4, et Jacobo ibid. 28, v. 14.

2^o De Messiae origine ex Jacobo ducendâ speciale habetur Balaami oraculum, Num. 24, v. 17, cujus hæc verba sunt: *Videbo eum, sed non modò, intuebor illum, sed non propè*: ORIETUR STELLA EX JACOB, et *consurget virga de Israel, et percutiet duces Moab, vastabitque omnes filios Seth, et erit Idumæa possessio ejus*, etc. Ibi agi de Messia minimè dubitandum. Nam hæc verba: *Videbo eum, sed non modò*, etc., indicant vaticinio respici ducem quemdam eximium seculis abhinc plurimis nasciturum. Dux verò ille appellatur *stella*, à munere prælucendi hominibus in salutis viâ; et *virga* (hebr. *Schebet*), propter supremam potestatem quâ erat potiturus in omnes gentes, quæ nomine *filiorum Seth*, ex quo originem duxit Noë, reparator generis humani, aptissimè designantur, unde accuratè vertit hic Onkelos: *Dominabitur omnium filiorum hominum*. Atqui patet hos characteres competere Messiae. Hinc nobilem ejusmodi Prophetiam de Messia interpretantur tres Targumistæ, Talmud Jerosolymit. (1) in libro Toanit; R. Haddarsan in Bereschit rabba; Maimonides, in Jad chazacha seu manu forti, tract. de Regibus, cap. 11; R. Joseph Albo in libro fundamentorum, Echa rabathi, sive expositio super Threnos, ad v. 2, capitis 2, et veteres omnes Judæi.

(1) Vide Pug. fidei, part. 3, dist. 3, c. 9; et Huet. prop. 9, cap. 3.

Quapropter ille impius, qui, imperante Adriano, se Messiam perhibere ausus est, nomen Bar kokkebæ, id est *filius stellæ*, sibi imposuerat.

3^o Messias in celebri oraculo Jacobi supra fusiùs exposito, ex Judâ nasciturus satis ex eo indicatur, quòd in ipsâ Judæ benedictione exprimitur venturus et promittatur.

4^o Origo Messiae ex Davide multis in locis exprimitur Isaie 11, v. 1 : *Egredietur virga de radice Jesse et flos de radice ejus* (hebr. *et surculus de radicibus ejus*) *ascendet, et requiescet super eum Spiritus Domini*. Et v. 10 : *In die illâ radix Jesse, qui stat in signum populorum, ipsum gentes deprecabuntur*. Jerem. 23, v. 25 : *Ecce dies veniunt, dicit Dominus, et suscitabo David germen justum, et regnabit Rex*, etc. Sed quid plura de ejusmodi argumento, in quo habemus consentientes Judæos, Paraphrastas scilicet, Talmudistas (1)? etc. Hinc Messiam nomine *filius David* designare assolent. Hinc Pharisei Matth. 22, v. 42, Christo Domino interroganti : *Cujus filius est Messias? dicunt ei David*. Et Joan. 7, v. 42, iidem sic loquuntur : *Nonne Scriptura dicit, quia ex semine David, et de Bethleem castello, ubi erat David, venit Christus?*

Probatur altera pars, ejusmodi nimirum de Messiae origine vaticinia in Christo Domino impleta fuisse. Etenim non modò Christus Jesus ab Abrahamo per Davidem prognatus fuit, ut constat ex duplici ejus genealogiâ Matth. 1, et Luc. 2, aliisque pluribus novi Testamenti testimoniis; verum præterea omnes eximii characteres in laudatis vaticiniis expressi, in ipsum aptissimè quadrant. Ac 1^o quidem, in illo gentes benedictionem Abrahamo prænuntiatam perceperunt, justitiam scilicet *ex fide*, uti explicat Apostolus galat. 3, v. 8, adducens promissionem Abrahamo factam quam modò protulimus. 2^o Jesus est *stella orta ex Jacob*, quam Balaam prædixit. Ipse enim est *via et veritas, et vita*, Joan. 14, v. 6; *Et lux vera quæ illuminat omnem hominem venientem in hunc mundum*, Joan. 1, v. 9. Quocirca Apocalyp. 22, v. 16, sic inducitur loquens Christus Dominus : *Ego sum radix et genus David, stella splendida et matutina*. Et verò nonne gentes omnes ab idolorum cultu revocavit, ad unius supremi Numinis religionem adduxit, lege sanctissimâ, miris conctarum virtutum exemplis, ministrorum suorum prædicatione, et gra-

(1) Apud Huet. prop. 7, n. 15, et Raym. Martin. pug. fidei, loco citato, cap. 8, n. 4 et 5, p. 595 et seqq. et cap. 9, p. 600.

tiis interioribus illustravit? Ergo dignus fuit qui *stella* illa eximia ex Jacob oritura nuncuparetur. Dicendus est etiam *percussisse duces Moab*, tum litteraliter acceptos, quippè cùm, ut mox dicemus, in omnes homines dominium habeat; tum mysticè sumptos; Moabitæ enim, à quibus populo Dei ad terram promissam properanti Num. 22, insidiæ struebantur, adumbrabant salutis nostræ hostes, de quibus hæc habet Apostolus Coloss. 2, v. 15 : *Et expolians* (Christus) *principatus et potestates, traduxit confidenter, palàm triumphans illos in semetipso*. Denique Christus *vastavit* subegitque omnes *filios Seth*, quatenus scilicet devictis salutis nostræ hostibus, in omnes homines quos sanguine suo redemit, omnem potestatem ac dominium obtinuit, Matth. ult. v. 18. Sicque ex eventu mirificè illustratum habemus Balaami oraculum; nempè is ejus sensus est : Frustrâ, ô Moabitæ, populum Israeliticum comminuere conamini; oriatur stella ex Jacob, et virga seu princeps nascetur ex Israel, qui non modò vobis, sed et universis hominibus imperabit. 3^o Jesus est *flos* ille, seu *surculus* ex radice Jesse ascendens seu ex Davide ortus, super quem, juxtâ Isaiam, *requieturus erat Spiritus Domini*. Quippè non solùm Spiritus sanctus eum omnibus cœlestibus donis cumulavit, sed etiam *corporali specie sicut columbæ in ipsum descendit*, Luc. 3, v. 22; Matth. 3, v. 16, etc. Præterea *stat ipse in signum populorum*, ut idem Isaias prædixit; seu quia, prout hunc locum explicat sanctus Paulus Rom. 15, v. 12, Christus *exsurrexit regere gentes*; seu quia, ut habetur Luc. 2, v. 34, *positus est hic in ruinam et in resurrectionem multorum in Israel, et in signum cui contradicetur*. Denique Christum gentes omnes deprecantur, seu ad eum aggregantur ac vota sua dirigunt; ergò.

SOLVUNTUR OBJECTIONES. — Object. 1^o Quod dicitur in Prophetiâ Balaam, *percutiet duces Moab... et erit idumæa possessio ejus*, Christo minimè congruit, sed manifestè designat Davidem, qui, ut habetur 2 Reg. 8, v. 2 et 14, Moabitas percussit, ac universam Idumæam sibi servire coegit. Nego antecedens. Enimverò David fuitne *stella ex Jacob orta*, quæ ibi prænuntiatur? num *vastavit*, seu ut Syrus habet, *subjugavit* ac prædatus est, dominioque suo acquisivit *filios Seth*, id est, ipsismet Judæis interpretibus, homines universos? Grotius, Annot. ad Num. 24, v. 17, ut vaticinium illud de Davide historicè, et de Messia typicè tantùm exponeret, fingere coactus est forte aliquem è

ducibus Moab Davidis tempore, nomine *Seth* appellatum fuisse. Sed gratis id commentus est vir doctissimus, qui typicorum sensuum nimis indagator, *pleraque*, ut scitè Huetius observat propos. 9, cap. 3, *Prophetarum de Christo oracula, eruditis quidem et acutis interpretationibus, ut non itidem veris, labefactavit*. Cæterum, ipsi Rabbini Maimonides et Joseph Albo, qui à cæteris Judæis dissidentes, objectis vaticinii verbis Davidem præsignari sentiunt, reliquam ejusdem Prophetiæ partem ad Messiam referunt, rei evidentia coacti.

Objicies 2^o cùm Orobio, in tertio suo scripto qu. 1, n. 18, apud Philip. à Limborch: Incertum est an Christus Jesus à Davide genus duxerit. Nam 1^o, consonæ non sunt ejus Genealogiæ quas Evangelistæ texunt. Si Matthæo, cap. 1, fides, Jacob à Davide per Salomonem ortus, *genuit Joseph, virum Mariæ, de quâ natus est Jesus qui vocatur Christus*. Si autem Lucam, cap. 3, audiamus, idem Joseph Mariæ sponsus, filius fuit Heli à Davide per Nathanem prosati; ergo, etc. 2^o Joseph in ejusmodi stemmatibus dicitur quidem ex Davidis familiâ fuisse, sed de Mariâ ejus uxore idem non legitur; potuit autem Joseph ex aliâ tribu uxorem ducere, sicut ipse David connubio junctus est cum filiâ Saulis Benjaminitide 1 Reg. 14, v. 17, et Joiada Pontifex cum filiâ Joram regis Juda, 2 Paralip. 22, v. 11. Ergo Christus qui sine viri consortio conceptus à Christianis creditur, non potest ex stemmatibus à Matthæo et Lucâ descriptis probari filius David. Nego antecedens. Non modò in stemmatibus laudatis, sed et tot aliis in locis Evangelistæ et Apostoli tradunt Christum fuisse Davidis filium, ut de eo dubitari nequeat. Vide Matth. 9, v. 27, cap. 12, v. 23, cap. 15, v. 22, cap. 21, v. 9 et 15; Marc. 10, v. 47 et 48; Luc. 1, v. 32, cap. 18, v. 28 et 29; Act. 2, v. 30, et cap. 13, v. 25; Rom. 1, v. 3; 2 Tim. 2, v. 8; Apoc. 5, v. 5, et cap. 22, v. 16. Nec dubitat Apostolus Hebr. 7, v. 14, asserere, *manifestum esse quòd ex Judâ ortus sit Dominus noster*. Quæ toties et tam asseveranter dicta, eo tempore quo de eorum veritate inquiri tam facilè poterat, rem apud Hebræos indubitatam olim fuisse ostendunt.

Ad primam probationem, nego inter se pugnare Christi genealogias à Matthæo et Lucâ exhibitas. Nec mirum quòd in iis conciliandis aliqua sit difficultas. Nemo enim nescit, sicut in chronologicis, ita et in genealogicis sæpè contingere, ut post longum temporis decursum multa explicatu difficilia occurrant, quæ dùm

scribebantur, nihil obscuritatis videbantur involvere, pluribus scilicet tum cognitis rerum circumstantiis quarum memoria ad posteros transmissa non fuit. Hinc libri Reg. cum libris Paralip. circa regum chronologiam in multis pugnare videntur, tametsi reipsâ non pugnent. Hinc ex pluribus Geneseos locis inter se collatis videtur effici Judam, quando in Ægyptum cum Jacob ingressus est, annos duntaxat 42 attigisse, cùm tamen de ejus liberis ea narrentur quæ ipsum annos longò plures tunc natum videntur arguere. Hinc ipsi lib. Paralip. non rarò apparent secum invicem non constare. Quapropter rectè admodum Grotius, Annot. in Luc. 3, v. 23, de hoc argumento disserens: « Qui gnari sunt morum populi Judæi, sciunt « multas esse posse γενεαλογίαι; quæ pugnare « videantur, nec tamen pugnent; idque non « uno modo accidere solere, ut ex iis libris « quos Judæi nobiscum agnoscunt, facile est « probatu. » Nullo itaque pacto dubitandum est de genealogiarum Christi ab Evangelistis exhibitarum concordia et sinceritate; præsertim si alienius suppositionis ope conciliari illæ queant. Atqui triplicipotissimum viâ possunt conciliari, quarum quæ sit optima, ut ejusdem Grotii verbis utar ibid. *post tot secula, amissis pridem tabulis omnique memoriâ, difficile dictu est*.

1^o. Ponamus apud Lucam has voces, *qui fuit Heli*, non referri ad Joseph, sed ad Jesum ipsum, adeò ut sensus sit Christum per Mariam fuisse filium Heli seu Heliacim, qui idem ac Joachim; hæc enim non tria, sed unum idemque nomen sunt apud Hæbræos. Hoc posito omnis contradictio evanescet, Matthæo videlicet genealogiam Josephi exhibente ut ostenderet Christum, habitâ Josephi qui pater ejus credebatur, ratione, ex regiâ Davidis familiâ fuisse; Lucâ verò stemma Mariæ texente, ut veram Christi qui Gen. 3, v. 13, semen mulieris appellatus est, originem et genealogiam haberemus. Quòd porro ista, *qui fuit Heli*, referri queant ad Jesum, probatur tum quia græca, τὸν ὁ Ἰησοῦς ὡς ἀντιφύλακτον τοῦ Ἰωσὴφ, τοῦ Ἡλὶ, τοῦ Ματθαίου, etc., ad litteram reddi possunt: *Erat Jesus... ut putabatur filius Joseph, Heli, Matthat, etc.* Gallicè, *filis de Joseph, d'Heli, de Matthat, etc.* adeò ut vox *filius* ad singula generationum capita suppleatur, quasi esset dictum: *Jesus... ut putabatur filius Joseph, filius; Heli, filius Matthat, etc.* Tum quia Judæi veteres tradidisse videntur in Talmude Jerosolymit. Mariam fuisse filiam Heli, ut annotat Lightfoot in *Hor. Heb.* ad hunc Lucæ locum.

Neque hunc loquendi modum qui Lucæ hic tribuitur, ab usu Hebræorum abhorre obiectas. Namque pariter exponi indiget versiculus 2 capitis 36 Geneseos, ubi hebræa *Haolibamah bath Anah bath Tsibeon*, non significant *Oolibamam filiam Anæ filiæ Sebeon*, sed *filiam Anæ filiam Sebeon*, siquidem ex v. 24 et 25. planum est *Anam* virum fuisse, filium *Sebeon*, et patrem *Oolibamæ*.

2°. Sin minùs illa interpretatio arrideat, alia est quam seligas, nempe Josephum dictum esse filium Heli, quòd esset ejus gener, seu quòd Mariam Heli filiam sibi matrimonio conjunxisset.

3°. Datur et tertia conciliationis via, ab Africano vetustissimo et accurato scriptore tradita (1), summoque ab omni antiquitate consensu probata (2), juxta quam ab utroque Evangelistâ describitur genealogia Josephi, sed diversâ ratione. Nempe statuunt illius systematis defensores Josephum fuisse genitum à Jacobo, uti Matthæus refert, et simul patrem ejus legalem fuisse Heli à Lucâ memoratum. Quod ut intelligatur, sciendum est Moysem Deut. 25, v. 5, præcepisse ut uxorem fratris sui defuncti frater duceret, et *suscitaret semen fratris sui*; quæ lex, ut ex Ruth 4 manifestum est, etiam in consanguineis, ac proinde à fortiori in fratribus uterinis, habuit locum. Cùm igitur poni possit Jacobum Josephi genitorem, et Heli ex eadem matre esse ortos, quæ scilicet, defuncto uno, alteri nupserit, nihil etiam vetat supponi Jacobum, mortuo Heli fratre suo uterino, ejus uxorem duxisse ut ipsi suscitaret semen, adeoque Josephum ex hoc posteriori natum connubio, fuisse filium Jacobi secundum carnem, et filium Heli secundum legem. Atque hæc suppositio quidem nihil habet quod non facillimè potuerit contingere juxta Judæorum ritus; proindeque etsi non nisi ejusmodi systematis ope tolli posset contradictio de quâ agitur, fatendum esset hanc omninò nullam esse. Nec dicas hæc Lucæ verba, *qui fuit Heli*, tam intelligenda esse de generatione secundum carnem, quàm ista, *qui fuit Matthat, qui fuit Levi*, etc. Hasce enim voces, pro subjectâ di-

versâ materiâ, varium eò loci sensum referre planè ostendit istud vers. ultimi, *qui fuit Dei*; ubi creationem significant eadem voces, *qui fuit*, quæ in anterioribus generationem sonant.

Ad secundam probationem, dist. ant. Non legitur conceptis verbis Mariam fuisse ex Davidis familiâ, concedo; non legitur æquivalenter, nego. Ubi enim legitur Christum ex Mariâ sine viri consortio fuisse genitum, et simul ille Davidis filius secundum carnem appellatur, ibi legitur æquivalenter Mariam ex Davide originem duxisse. Atqui utrumque istud ex novo Testamento habetur, Matthæus, qui cap. 1, v. 18, et seqq., disertissimè asserit Christum ex Virgine genitum et natum, eum ibid. v. 1 et alibi filium Davidis simpliciter appellat. Lucas cap. 1 inducit Angelum Mariæ Virgini annuntiantem, tum ex eâ nasciturum sine viri consortio filium, tum filium hunc possessurum esse *sedem David patris ejus*; et Act. 2, v. 30, Christus dicitur ex *lumbis* Davidis; cap. 13, v. 23, et 2 Timoth. 2, v. 8, *ex semine David*; Rom. 1, v. 3, *ex semine David secundum carnem*, etc.; ergo, etc.

Quòd si inquiras ut quid Evangelistæ solius Josephi, non Mariæ stemma describant? Resp. 1°, nullum illi quæstioni locum dari, si primam aut secundam hypothesim secuti, Lucam exponamus de genere Mariæ per Nathanem à Davide ortæ. Resp. 2°, si ab utroque Evangelistâ Josephi solius genealogiam diversâ ratione textam fuisse dicas, id ab iis esse factum tum ne recederent à more consueto exhibendi in stemmatibus paterni generis, cujus maximè habebatur ratio apud Judæos, apud quos *familia materna*, ut legitur in *Juchasin* fol. 55, *vocanda non est familia*; tum quia tanta fortè erat Josephum inter et Mariam propinquitas, ut unius stirpium descriptâ serie, alterius stemma non necessarium videretur. Etenim nihil poni prohibet, quod ex traditione habemus, Mariæ nullos fuisse fratres, hanc proinde ex lege Num. 27, v. 8, in parentum possessiones hæreditario jure successisse, atque ex eadem lege Num. 36, v. 7 et 8, non potuisse alteri quàm propinquissimo suo nubere. Quibus ita constitutis, manifestum fuisset utrique sancto conjugii eosdem fuisse avos, proindeque, etc. Quid sit, constat ex novo Testamento Beatam Virginem ex Davide prosatam, etsi hujusce facti circumstantias et modum Evangelistæ non expresserint.

Instit. Luc. 1, v. 5 et 36, Mariæ dicitur co-

(1) African. Epist. ad Aristidem, apud Euseb. Hist. Eccles. L. 1, cap. 7, edit. Valesii 1678, pag. 15, 16 et 17.

(2) Scilicet ut advertit Maldonatus Comment. in cap. 1 Matth. edit. Mussipont. 1596, col. 28, à S. Justino, ab Eusebio à SS. Hier. Ambr. Damascen. ab Eucherio, Bedâ, Theophylact. atque à S. August., nemoque, pergit idem, de eâ postea dubitavit.

gnata Elizabeth de filiabus Aaron. Ergo fuit de tribu Levi, non de tribu Juda et familiâ David. Dist. dicitur cognata Elizabeth materno genere, concedo; paterno, nego.

DE MESSIÆ NATIVITATE EX VIRGINE. — Conclusio. Messiam ex matre Virgine nasciturum Prophetæ expresserunt; quod in Christo Jesu est completum.

Prob. Prima pars ex illustri vaticinio Isaïæ cap. 7, v. 14: *Dabit Dominus ipse vobis signum: Ecce VIRGO (hebr. ha alma) concipiet et pariet filium, et vocabitur nomen ejus Emmanuel.* Unde sic arguitur: Si ibi agatur de Virgine, Messiasque ibidem nomine Emmanuelis designetur, clarum fit Messiam ab Isaïâ prædici ex Virgine nasciturum. Atqui 1^o ibi agitur de Virgine; quod triplici argumento evincitur. Primum petitur ex significatione vocis *alma* hîc usurpatæ, quæ, sive ad originem, sive ad usum ejus, sive ad particulum *he* illi præfixam attendas, virginem intactam et illibatam sonat. Nam si de origine inquiras, *alma* derivatur à radice עלם, *alam*, quæ nihil quidquam significat nisi *abscondere*, ut docet ipse R. David Kimchi in lib. Radicum; proindeque *alma* virgini absconditæ, quæ virorum aspectibus non patuerit, exprimendæ nata est. Si ad illius vocis usum spectes, ex tribus vocabulis quæ ad virginem designandam Hebræi usurpant, nempè *naara*, *bethula* et *alma*, primum videlicet נערה *naara*, virginem cujusvis ætatis sæpè quidem indicat, sed non semper: nam Deut. 22, v. 21, corruptam et Ruth. 4, v. 12, viduam significat. Alterum vocabulum, seu בתולה *bethula*, ad virginem etiam non semper certò attinere videtur, nimirum Joelis 1, v. 8, sumitur pro viduâ: observatque R. Salomon Jarchi Gen. 24, v. 16, Moysen, ut Rebeccam ostenderet esse virginem, voci *bethula* has addidisse, et *incognita viro*, quia voce *bethula* id non fuerat satis denotatum. Tandem vox עלמה *alma* virginem intactam et secretam, à virorum accessibus seclusam, jamque in adolescentiæ annis versantem et nubilem, propriè et maximè exprimit, nec unquam alio usurpatur sensu, adeò ut nomen *alma* nunquam vocibus *concupere* aut *parere* jungatur, nisi in hoc Isaïæ loco. Hinc mox laudatus R. Salomon Jarchi advertit citato cap. 24 Genes. v. 43, hanc vocem solam usurpari sat fuisse, ut virginitas Rebeccæ designaretur. Eumdem sensum illi vocabulo annectendum confirmabat S. Hier. ad cap. 7 Isaïæ, et in quæstionibus hebraicis quia in sermone punico, qui easdem cum hebraico servabat

origines, verbum *alma* ad significandam virginem propriè dictam adhibebatur.

Si vim particulæ *he*, quæ nomini *alma* hîc præfigitur, consideres, notum est ejusmodi particulam solere esse emphaticam, qualis apud Græcos est articulus ὁ, ἡ; adeoque eâ denotari sermonem esse de re singulari et eximiâ, de virgine videlicet insigni et præstantissimâ. Et verò, uti notat auctor *dissertationis* de hoc argumento editæ parisiis anno 1713, *alma* cum articulo emphatico *he*, non reperitur in Scripturis nisi Genes. 24, v. 43, ubi Rebecca *haalma* dicitur, et Exod. 2, v. 28, quo in loco Maria soror Moysis eâdem appellatione insignitur, ac denique in cap. 7 Isaïæ de quo agimus. Atqui Rebecca et Moysis soror eo nomine appellantur quòd essent virgines et *incognitæ viro*, ut verbis Scripturæ utar citato cap. Genes. v. 16. Ergo cùm *Emmanuelis* mater apud Isaïam dicitur *haalma*, hanc futuram esse virginem prænuntiatur.

Secundum momentum petitur ex auctoritate 70 interpretum, et chaldaicorum Paraphrastarum, qui de virgine hunc locum Isaïæ interpretantur, quibus consentiunt versiones syriaca et arabica. Adde quòd Messiam ex Virgine sine viri consortio nasciturum censuerunt (1) Rabbinii veteres. Ità R. Moses Hadarsan in Bereschith rabba, ad cap. 25 Genes., ubi Redemptori Judæis suscitando patrem non futurum probat adductis pluribus Scripturarum locis; cujus verba laudat R. Salomon Jarchi ad v. 8 cap. 35 Geneseos; idem R. Adarsan ad Genes. 41, v. 1, quo in loco testimoniis R. Hunæ et R. Josue ben Levi rem confirmat; R. Simeon ben Jochai in Genesim, et alii Judæi in Midrasch Echa, etc.

Tertium momentum desumitur ex vaticinii scopo. Nam prodigium quoddam insigne ibi prædicit Isaïas, ut ex contextu liquet. Nimirum prænuntiata Jerosolymorum à Syris et à rege Israel tunc obsessorum liberatione, ut fidem prædictionis suæ confirmaret, Achazum regem Juda in hunc modum affatur sacer Vates: *Pete tibi signum à Domino Deo tuo in profundum inferni, sive in excelsum suprâ*; ad quem rex impius cùm præ incredulitate respondisset: *Non petam et non tentabo Dominum*; subdit Propheta zelo Dei accensus: *Audite ergo, Do-*

(1) Vide Huet. Prop. 9, cap. 9, n. 4, Raymund. Martin, in Pugione fidei, part. 3, dist. 3, cap. 7 et 8, et Josephum de Voisin in observationibus ad proœmium Pugionis; fidei Porchetum.

minus David : Numquid parum vobis est molestos esse hominibus, quia molesti estis et Deo meo? Propter hoc dabit Dominus ipse vobis signum : Ecce Virgo concipiet, et pariet filium, et vocabitur, etc., perinde ac si dixisset : Audite, rex et procures Juda, qui Prophetas spernitis et de potentiâ Dei dubitatis ; longè majus prodigium aliquandò facturum est ipse Deus, quàm quod modò prædixi : *Ecce virgo concipiet, etc.,* ostentum igitur eximium et stupendum Isaias prænuntiat ; atqui tamen is locus nihil stupendi continet, nisi de virgine intactâ et illibatâ accipiat ; ergo in eo Isaiæ oraculo agitur de virgine.

2° Ibidem nomine *Emmanuelis* designatur Messias. Quis enim *Emmanuel*, seu *nobiscum Deus*, ex virgine nasciturus, nisi Messias? Deinde, vel ille *Emmanuel* est Messias, vel est Ezechias, filius Achaz, vel Jasub, filius Prophetæ hoc in cap. v. 3 memoratus, vel alter ejusdem Prophetæ filius de quo cap. 8 mentio fit. Atqui non filius Achaz ; nam loquitur Isaias de filio nascituro : *Dabit Dominus ipse vobis signum : Ecce Virgo, etc.* At Ezechias Achazi filius jam plures annos erat natus quandò istud emissum est vaticinium, ut ipse ostendit R. Salomon Jarchi ; hæc siquidem prophetabat Isaias regnante jam Achazo, ad quem verba diriguntur ; regnavit Achaz 16 annis, 4 Reg. 16, v. 2, et 2 Paral. 28, v. 1 ; Ezechias autem dum morienti Achazo successit, viginti quinque annorum erat, 4 Reg. 18, v. 2, et 2 Paral. 29, v. 1 ; ergo nonum annum jam attigerat Ezechias quando Achaz regnum auspicatus est ; proindeque, etc. *Emmanuel* non est etiam Jasub Isaiæ filius, tum propter eandem rationem, quippè Jasub jamdiu natum fuisse Isaiâ hæc prædicente, ex v. 3 hujusce capitis 7 planum fit ; tum quia cap. sequenti, v. 8, *Emmanuel* dicitur Dominus terræ Judæ, quod Messiae quidem competit, non Jasub Isaiæ filio. Pariter *Emmanuel* non est alter filius Prophetæ memoratus cap. 8, cum in terram Juda non magis quàm Jasub dominium habuerit posterior iste filius Isaiæ. Ergo *Emmanuel* est Messias. Denique nomine *Emmanuelis* Messiam ab Isaiâ designatum evidenter demonstrant splendida hæc ejusdem Prophetæ verba cap. 9, v. 6 : *Parvulus natus est nobis, et filius datus est nobis, et factus est principatus super humerum ejus ; et vocabitur nomen ejus, Admirabilis, Consiliarius, Deus, Fortis, Pater futuri seculi, Princeps pacis. Multiplicabitur ejus imperium, et pacis non erit finis ; super solium David et super regnum ejus*

sedebit, ut confirmet illud et corroboret in judicio et justitiâ, amodò et usque in sempiternum. Quæ quidem de solo Messia esse dicta, et evidentissimum est per se, et constat ex chaldaicâ Paraphrasi, atque ex veterum Judæorum consensu (1) in Echâ rabathi, et in Bereschit rabba. Quòd autem ad *Emmanuel* illa spectent, pariter liquet. Nam 1° de aliquo parvulo antea memorato hæc intelligenda esse, sermonis prophetici series necnon regnorum Syriæ et Israel dissipandorum continuata prædictio satis indicant. Cum igitur tam eximia encomia soli Messiae congruentia, nec in filium Achazi, nec in filios Isaiæ quadrare queant, sequitur illa ad *Emmanuel* referri. 2° Hæc de *Emmanuele* explicandasunt, si ipsi reverà convenient ; atqui *Emmanueli* ea competere quæ magnificis ejusmodi verbis Isaiæ continentur manifestum est. *Emmanuel* enim est parvulus *admirabilis*, utpote de virgine natus ; est *Deus, fortis, consiliarius, pater futuri seculi* seu æternitatis, *princeps pacis*, et quidem perpetuæ, quippè qui est *Deus nobiscum* ; ergo, etc. Proindè Messias ex Virgine nasciturus prædicatur ab Isaiâ.

Idem prodigium, sed minus apertè, Jeremias vaticinatus est cap. 31, v. 22, his verbis : *Creavit Dominus novum* (id est, portentum et miraculum) *super terram : Fœmina circumdabit virum.* Ubi non proles duntaxat, sed ipse conceptus dicitur nova creatio, ac proindè non de puero viâ ordinariâ concipiendo, sed de Messia miraculosè ex virgine nascituro intelligendus hic Jeremiæ locus, quo sensu eum explicat R. Hadarsan in Bereschit rabba ad v. 1, cap. 41 Geneseos, apud Galatinum et Raym. Martinum locis supra laudatis. Adde etiam insignes hujusce prodigii typos Ezech. 44, v. 2 et 3, Zach. cap. 3 et 6, etc.

Prob. Secunda pars, nempè vaticinia Prophetarum de Messia ex virgine nascituro, in Christo Domino esse completa. Nam Christum Jesum ex virgine esse natum testis est 1° S. Joseph, Mariæ conjux, qui Matth. 1, v. 18 et seqq. cum vellet occultè dimittere eam, quòd, antequàm convenirent, inventa illa fuisset in utero habens, ab Angelo admonitus à consilio abstinuit, eamque de Spiritu sancto concepisse agnovit. Testis est 2° Maria ipsa, quæ Luc. 1, v. 31 et seqq. futuram se Christi matrem nuntianti Angelo respondit : *Quomodo fiet istud, quoniam virum non cognosco?* Quapropter respondens An-

(1) Apud Galatin. 1. 3, cap. 19, et Raym. Martin in Pugione, part. 3, dist. 1, cap. 9.

gelus dixit ei: Spiritus sanctus superveniet in te, et virtus Altissimi obumbrabit tibi; ideòque et quod nascetur ex te Sanctum, vocabitur Filius Dei. Testis est 3^o Elisabeth, in cujus utero Joannes Baptista, quem ipsa licet sterilis et ætate provec̃ta miraculosè conceperat, præ gaudio exultavit; et quæ eam Luc. 1, v. 43, *matrem* appellat Domini sui; et *beatam* prædicat quòd credidisset perficienda illa esse quæ sibi fuerant dicta à Domino. Testantur denique omnia Christi et Apostolorum miracula, quibus christiana fides de Christi matris virginitate, ut et de aliis articulis firmatur; ergo, etc. Ubi advertendum Christi nativitatem ex Virgine adeò propriam ipsi ac singularem esse prærogativam, ut alteri nemini unquàm ab ullo probato auctore fuerit seriò adscripta.

SOLVUNTUR OBJECTIONES. — Objicies adversus primam conclusionis partem : 1^o Symmachus, Aquila et Theodotion vocem *alma* in allato Isaïæ textu reddunt *νεανίδα*, *juvenculam*; ergò. 2^o Adolescentulæ de quibus Cantic. 1, v. 2, et cap. 6, v. 7, in Hebræo vocantur *almoth*; atqui tamen ibi non agitur de virginibus, cùm istud Canticum sit epithalamium seu carmen nuptiale, quo sponsus et sponsa celebrantur; ergò. 3^o Vox *alma*, puellam corruptam designat Proverb. 30, v. 18, 19; ergò.

Ad primum, nego consequens. Symmachus homo Ebionitarum sectæ addictus, Theodotion et Aquila, Judæorum proselyti et Christo recentiores, hic suspectæ sunt fidei. Ut causæ Chistianorum nocerent, vocem adhibuere ambiguum; nec ullus negaverit potiorē esse in ejusmodi negotio auctoritatem paraphratarum, veterum Judæorum, ac præsertim septuaginta Seniorum qui ante exortam controversiam scripsere. Ad secundum, nego minorem. Nam apud veteres, ut adductis eorum testimoniis probat Huetius prop. 9, cap. 9, n. 2, is erat mos solemnis, ut virgines novam sponsam, et pueri innupti novum sponsum ad nuptias comitarentur, ac carminibus gratulatoriis prosequerentur; quam consuetudinem ex Hebræis ad alias gentes manasse tradit Origenes homil. 1 in Cantica. Quidquid sit, cap. 6 citato discernuntur *almoth*, *adolescentulæ*, à *reginis* et *concubinis*, ac proindè illa vox ibi virgines significat. Ad tertium, nego antecedens. Hæ enim voces : *Via viri virgine loco* Proverb. objecto, meliùs accipiuntur de occultis hominum corruptorum castæ virgini insidiantium machinationibus. Hosce versiculos 18 et 19 ad Messiam refert auctor Gale Razeia, cujus hæc verba

sunt apud Galatinum (1), omissis Scripturæ testimoniis quibus interpretationem suam tueretur : « Via aquilæ in coelis, est rex Messias, qui post passionem suam ascendet in cœlum... « Via navis in medio maris, hic itidem est rex Messias, cujus vita sicut navis in medio maris agitabitur... Via colubri super petram, hic est etiam Rex Messias qui se faciet ut colubrum quem Moyses super petram posuit ut duceret filios Israel in terram sanctam. R. autem Jodam dixit, et via colubri super petram, hic est rex Messias, qui transibit per petram postquàm sepultus erit, et ab ipsà egredietur nec videbitur quà transierit... et via ghever bealma, viri vel fortis in virgine, hic quoque est Deus amans filias Jerusalem, ut generetur Rex Messias ex unâ earum. Conci- piet autem et pariet, remanebitque Virgo, sicut dictum est. (Jeremia 31, v. 22.) Quia creavit Deus novum super terram, femina circumdabit ghever, virum. »

Objicies 2^o : Messias in textu Isaïæ adducto, Emmanuelis nomine non designatur. Nam 1^o Messiæ post plura secula venturi adventus in signum liberationis Judæorum mox futuræ dari non potuit; ergo. 2^o Propheta loquitur de puero *butyrum et mel comesturo, ut sciat*, inquit, *reprobare malum et eligere bonum*; quæ, utpote ignorantiam quamdam et profectum denotantia, ad Messiam, præsertim si Deus cum Christianis credatur, non possunt transferri; ergo. 3^o Rasin, rex Syriæ et Phacee, rex Israel dicuntur v. 16, è Judæâ pellendi antequàm puer, v. 14 promissus, sciat reprobare malum et eligere bonum, id est, antequàm ad annos discretionis pervenerit. Atqui hæc de Christo absurdissimè intelligerentur; quippe ii reges paulò post editum istud vaticinium è Judæâ recedere coacti sunt, Christus verò nonnisi 700 abhinc annis natus est; ergo, etc.

(1) Galatin. de Arcan. l. 7, cap. 15, edit. Basil. 1561, p. 301, qui frequentia hujus libelli Gale Razeia profert testimonia, ejusque auctorem facit eum ipsum R. Haccadosch qui ducentis circiter ante concilium Nicænum annis traditiones, seu *Misnajots* composuit; quas Judæi Scripturæ sacræ æquiparant. Sed librum, Gale Razeia, Judæi « ignorant, inquit Morinus « priore parte exercit. Biblic. Eundem Ray- « mundus seculo 13, et Porchetus 26, cum « omnibus Judæis ignoraverunt. Præterea « istius libelli pater, quicumque ille sit, de My- « sterio Trinitatis adeò dilucidè et distinctè « disserit ut sancto Athanasio verborum per- « spicuitate et expressione vix cedat. » Verba sunt Joannis Morini.

Ad primum, 1° nego antecedens. De essentiâ quidem signi est ut prius cognoscatur quàm id in cuius cognitionem ducit; at necesse non est ut prius existat. Quis negaverit promissionem certam et indubitam rei cuiusdam prodigiosæ et insignis aliquando concedendæ, posse esse signum et pignus minoris doni mox tribuendi? Non absurdè igitur Isaias, ut domus David est procerum Judæ fidem in verbum Domini de proximâ Jerusalem liberatione excitaret, eorum menti objicit insignem de *Emmanuele*, seu, *Deo nobiscum*, vero Messîâ ex Virgine nascituro Prophetiam. 2° Nego consequens. Isaias his verbis : *Ecce virgo concipiet*, etc., maximum quidem et prorsus singulare signum seu miraculum in gratiam Judæorum patrandum prænuntiat, remque adeò prodigiosam olim futuram Achazi et procerum Judæ oculis subjiciens eorum incredulitatem redarguit; at nihil ibi est quod indicet eventum hunc mirabilem in signum liberandæ Jerusalem ab ipso afferri.

Ad secundum, in eo genere scientiæ de quo ibi sermo est, nempe in scientiâ experimentalî, Christum ut hominem profecisse, omnes theologi docent, ut infra explicabimus, nec in eo ulla difficultas. Ad tertium, 1° nego majorem, nempe hæc verba vers. 16 : *Antequàm sciat puer reprobare malum et eligere bonum*, etc., intelligenda esse de puero v. 14 prænuntiato; subjecta enim materia exigit, nec contextus repugnat, ut hæc accipiantur absolutè, quasi dictum esset : *Antequàm elabatur tempus effluere solitum à pueri nativitate ad eam usque ætatem quâ primùm ille inter bonum et malum discernit*, Judæa à Tyrionum et regis Israel exercitibus, ut prædixi, liberabitur. Dixi contextum non repugnare; nam postquàm nobili Prophetiâ de Messîâ ex virgine nascituro incredulitatem impii regis increpavit Vates sacer, nonne debuit ad institutum redire, nempe ad prædictionem de Jerusalem et Judæâ liberandâ? nonne proclive fuit ut assignaret tempus intra quod hæc liberatio contingeret? hæc sanè connexa maximè sunt; ergo. Nec dicas in hebræo vocem *nahar*, *puer*, hic affici articulo demonstrativo *he*, ac proinde certum puerum ibi designari. Nam ejusmodi articulus nomini colectivo (quale Hebræis est *nahar*, ut videre est Num. 11, v. 27, Isai 3, v. 5, etc.) sæpè præfigitur, adeò ut non rem singularem, sed certam ejus dotem significet. Itaque sensus Isaïæ hic est : *Antequàm ille qui puer adhuc est sciat*, etc. Gallicè : *Avant qu'un enfant sache*,

etc. 2° Nego minorem. Nihil enim absurdi est verba illa ad Christum hoc modo referri : *Antequàm effluerit tempus simile brevi illi temporis intervallo quod inter Messîæ nativitatem et ejus primæ discretionis notitiam intercedet*, liberabitur terra Judæ.

Obj. 3° : Isaias loquitur quidem de Virgine, sed accipiendus est de Virgine quæ accedente viri consortio mater fiat; ergo, etc. Nego ant. Tum quia prositâ ejusmodi interpretatione omne prodigium evanescit; tum quia significatio vocis *alma*, quæ vocibus *concupere* et *parere* nunquàm alibi conjungitur, hanc explicationem excludit; tum denique quia uxor Isaïæ ex quâ ipse cap. 8 v. 3 suscepisse dicitur filium de quo Judæi explicant Prophetiam, virgo non erat, utpote quæ filium jam genuerat cap. 7, v. 3; ergo.

Inst. cum Kimchio et Salomone Jarchi. Filius Isaïæ è puellâ nondùm viro maturâ, Deo miraculosè operante, procreatus est, et in eo stat prodigium; ergo. Nego ant. Ex prophetissâ, seu ex uxore suâ ut ipse refert, habuit filium cap. 8 memoratum. Ergo non ex puellâ nondùm viro maturâ. Fingunt hic Judæi miraculum de quo ne verbum quidem Scriptura sonat, imò cui Scriptura adversatur, ne aliud à Prophetâ clarè prænuntiatum cogantur agnoscere.

Obj. ultimò. Si Christus ex virgine natus est, quare mira illa ex virgine nativitas non statim promulgata fuit? quare ex virgine desponsatâ viro natus est? Profecto qui nascitur ex muliere viro nuptâ, non debet censeri ex virgine natus. Ita ferè Orobio apud Limborch, et alii. Resp. Id ita factum, quia Deus noluit tantum prodigium hominibus manifestari, antequàm miraculis Christi et Apostolorum credibile evasisset. Deus qui prænuntiaverat rem ipsam, non revelaverat modum; debuit autem id mysterium ita peragi, ut matris Christi famæ, et nati Messîæ honori nihil detraberetur. Potuisset utrique Deus variis mediis consulere; sed quam viam selegit, hanc sapientissimam fuisse quis inficiabitur? Cæterum, præter Mariam et Josephum, apparet ex Lucâ alios etiam, Elizabetham, Joannem Baptistam, Simeonem, Annam Prophetissam, arcani divini fuisse consocios.

DE LOCO NATIVITATIS MESSIÆ.—Michæas cap. 5, prædictâ imminente à Chaldæis Jerosolymorum vastatione, quo loco Messias nasciturus sit his præsignificat verbis, v. 2 et seqq. : *Et tu Bethleem Ephrata, parvulus es* (supple locus)

in millibus Juda; ex te mihi egredietur qui sit Dominator in Israel, et egressus ejus ab initio à diebus æternitatis.... Et stabit, et pascet in fortitudine Domini, in sublimitate nominis Domini Dei sui; et convertentur, quia nunc magnificabitur usque ad terminos terræ. Et erit iste pax.

Omnes consentiunt in hoc vaticinio nomine Bethleem designari oppidum tribus Judæ, appellatum quoque Ephrath seu Ephrata, duobus circiter milliariis ab Jerusalem distans, juxta quod Rachel sepulta fuerat, et ex quo David erat oriundus, ab altero ejusdem nominis Bethleem oppido in tribu Zabulon sito valdè diversum. Hoc observato, sit.

CONCLUSIO. Prophetia Michææ de Messia Bethleemi nascituro in Christo est adimpleta.

Prob. prima pars, nempe Messiam eum esse qui Bethleemi nasciturus eo vaticinio prædicitur. Nam 1º, is appellatur *Dominator in Israel* (1) exoptandus, *cujus egressus ab initio, à diebus æternitatis*; quod soli Messia competit, quem alloquens Deus apud Psalterium Regium, jam dixerat Psal. 109, v. 4: *Ex utero ante luciferum genuite*. 2º Dicitur *pastor*, homines *in fortitudine Domini et in sublimitate nominis Domini Dei sui* recturus, eruditurus, *conversurus*, quibus graphicè describuntur fructus ex Messia adventu colligendi. 3º. Dicitur *magnificandus usque ad terminos terræ*, id est, nationibus universis imperaturus. 4º Dicitur *pax*, et quidem sine addito et antonomasticè, quam appellationem soli Messia competere jam non semel advertimus. Ergo nonnisi de Messia intelligi potest prophetia Michææ, proindeque, etc. Atque eam fuisse veterum Judæorum sententiam, constat ex paraphraste Jonatham, ex Talmude utroque, Jerosolimit. quidem, tract. Barachoth. fol. 5, Babylonico verò, tract. Sanhedrin, cap. ult. et tract. de Paschate, ex Bereschit rabbâ, et ex Midrasch thehillim; quibus concinunt R. Judas Haccadosch in Gale razia, R. Salomon Jarchi, Aben Ezra, David Kimchi (2), etc. Sanè Judæi ætate Christi non dubitabant Bethleem futurum esse Messia patriam. Matth. enim 2, v. 4, interrogati ab Herode principes sacerdotum et scribæ: *ubi Christus nasceretur*; respondent illi v. 5 et 6: *In Bethleem Judæ*,

idque probant adducto Michææ vaticinio quod tractamus. Et Joan. 7, v. 42, alii Judæi sic loquuntur: *Nonne Scriptura dicit: Quia ex semine David, et de Bethleem castello, ubi erat David, venit Christus?* hoc autem Scriptura non dicit nisi apud Michæam; ergo, etc.

Et verò, vel dominator ex Bethleem juxta Michæam egressurus Messias dicendus est, vel designat Zorobabelem, uti sentiunt Judæi recentiores, quibus hâc in parte malè accedit Grotius, Prophetiam de Christo mysticè tantum et spiritualiter exponens. Atqui is dominator non est Zorobabel. Nam 1º Zorobabel non Bethleem, sed Babylone natus est, atque indè nomen suum duxit; quippe *Zorobabel* idem est ac *semen Babylonicum*, ut observat Theophylact. in Matth. 2. Respondet quidem Grotius Zorobabelem censeri Bethleemo ortum, quòd ex Davidis Bethleemitæ familiâ esset oriundus. At, inquit Huetius prop. 7, n. 25, « id si accipimus, jam ergo multiplex « nobis patria erit, totque natales terras numerabimus, quot loci majoribus nostris ortum dederunt. Ergo et Zorobabel, præter « Babylonem in quâ natus est, Jerusalem quoque « patriam habebat, in quâ tot reges ipsius prædecessores sunt procreati; et Bethleemum, « in quâ David, et Booz, et Obed, et Jesse: et « Ægyptum, in quâ Aminadab et Nabasson; et « Haran Mesopotamiæ, in quâ Judas, etc..... « quod neque dici neque ferri potest. » 2º De Zorobabele nequaquàm dici potuit: *Egressus ejus ab initio, à diebus æternitatis*; sive ut habetur in hebræo, *ab olim, à diebus æternitatis*; quæ geminata ejusdem rei significatio aliquid procul dubio amplius designat, quàm diuturnitatem temporis à Davide ad Zorobabelem, uti Grotius explicat. 3º Michæas apertè significat propter ortum dominatoris quem prænuntiat, futurum ut Bethleemum, hactenùs exigui nominis locus, celeberrimum fieret. Ergo ab illius dominatoris ortu tantam sibi famam debuit conciliare, ut comparatè ad eam nulla ferè esset celebritas quam à Davide et regibus ab eo ad usque Michææ tempus prosatis consequi potuerat. Atqui tantum decus ipsi afferre par non fuit Zorobabel, qui Davidi nullo pacto æquiparari potuit, qui in gentem penè excisam ab exilio redeuntem auctoritate regiæ longe inferiori potitus est. Ergo. 4º Is quem Michæas prænuntiat, dicitur v. 4 et 5, *magnificandus usque ad terminos terræ*: et futurus *pax* per antonomasiam. Atqui Zorobabel non legitur *magnificatus usque ad terminos terræ*, neque

(1) *Mihi egredietur* id est, in utilitatem et Prophetæ, et totius gentis hebrææ.

(2) Vide Huet. prop. 7, n. 25; pug. fidei, part. 3, dist. 1, cap. 8, p. 422, et Observ. Jos. de Voisin in præmium p. 125. Galatin. l. 8, cap. 4, p. 317.

potuit singulari modo *pax* appellari. Quid? quòd ipse Chutæorum insidiis et criminationibus fuit obnoxius, Judæique post captivitatem à finitimis et extraneis populis multoties lacesiti fuerunt, multisque cladibus afflicti, donec eorum respublica penitus evanuerit; ergo. 5° *Regnum illud filiæ Jerusalem, potestas illa prima*, quæ tam splendidis verbis pinguntur cap. 4, quæque eòdem manifestè pertinent, ac prophetia capitis 5 ad Zorobabelem profectò non spectant, sed ad solum Messiam; ergo.

Probatur altera pars, Prophetiam videlicet Michææ in Christo ad eventum perductam. Nam Matth. 2, v. 1, expressè legitur, *natum esse Jesum in Bethleem Juda*. Et Luc. 2 exponitur quomodò Christus Dominus, licet Nazarethi in Galilæâ conceptus, Deo tamen sic providente Bethleemi natus sit. *Ascendit autem et Joseph, inquit Evangelista, v. 4 et seq. à Galilæâ de civitate Nazareth, in Judæam, in civitatem David quæ vocatur Bethleem, eò quòd esset de domo et familiâ David, ut profiteretur* (sicut ab Augusto fuerat imperatum) *cum Mariâ desponsatâ sibi uxore prægnante. Factum est autem, cum essent ibi, impleti sunt dies ut pareret, et peperit filium suum primogenitum*. Porro aliis omnibus quæ de Messîâ præcinit Michæas, cohæret quoque Evangelium. Istis enim: *Egressus ejus ab initio, à diebus æternitatis*, respondent v. 1 et 14, cap. 1 Joan.: *In principio erat Verbum... et Verbum caro factum est*, plurimæque alia novi Fœderis testimonia. Istis: *Magnificabitur usque ad terminos terræ*, cohæret potestas et imperium, quod, ut jam diximus et aliquando ampliùs exponemus, Christo datum est *in cælo et in terrâ*, Matth. ult. v. 18; Philip. 2, v. 10, etc. Denique Christus Dominus est *pax*. *Ipse est pax nostra*, inquit Apostolus Ephes. 2, v. 14 et seq.... *interficiens inimicitias in semetipso. Et veniens evangelizavit pacem vobis qui longè fuistis, et pacem iis qui propè; quoniam per ipsum habemus accessum in uno Spiritu ad Patrem*.

SOLVUNTUR OBJECTIONES. — Obj. Pluribus difficultatibus subjacet historia evangelica de Christo Bethleemi nato. Nam 1° nullam descriptionem orbis ab Augusto legimus imperatam anno quo Christus natus est. « Censum « populi, juxta Suetonium in Octavio, cap. 27, « ter egit (Augustus); primum ac tertium cum « collegâ, medium solus. » Ut autem colligitur ex Ancyrano monumento, prout à Jacobo Gronovio ad fidem utriusque exemplaris Busbequiani scilicet et Cossoniani restitutum est,

primum censum Augustus egit, in consulatu suo sexto collegâ M. Agrippâ, anno nempe Juliano 8, ante æram vulg. 30; secundum Censorino et Asinio Coss. anno Juliano 58, ante æram vulg. 8; tertium denique collegâ Tib. Cæsare fecit, Sex. Pompeio, et Sex. Apuleio Coss. anno imperii sui ultimo, correctionis Julianæ 59, æræ vulg. 15 finiente. Porro Christus, ut observavimus supra, natus est anno 5 ante æram vulg.; ergo. 2° Scribit S. Lucas, cap. 2, v. 2, *hanc descriptionem factam fuisse à Præside Syriæ Cyrino*. Tertullianus ex adverso, contra Marcion. lib. 4, cap. 19, eandem adscribit *Sentio Saturnino Syriæ Præsidi*. Atqui nec Sentius Saturninus, nec Cyrinus seu Quirinius Syriam gubernabant anno ante æram vulgarem 5, quo diximus Jesum esse natum; nam Quintilius Varus, qui Josepho teste, lib. 17 Antiq. cap. 5, aliàs 7, n. 2, in Syriam Saturnino successor missus est, Syriæ præfuit ante autumnum anni Juliani 40, id est 6 ante vulgarem æram, quod ex nummis pluribus probat invictè eminentiss. cardinalis Norisius in suis *Syro-Macedonum Epochis*. 3° Josephus silet hanc Judææ descriptionem sub Herode à Quirinio factam, quam Lucas commemorat Imò censum à Quirinio actum refert lib. 18 Antiq. cap. 2, n. 4, ad annum à pugnâ Actiacâ 37 æræ vulgaris 7, mortuo jam à decem annis Herode, et Archelao filio ejus in exilium amandato. Antiq. lib. 17. cap. ult. et lib. 18, cap. 1. Quid quòd illius censûs promulgatione populus commotus est, ac à Judâ Gaulonite seditio excitata, cujus mentio habetur etiam Act. 5, v. 37. Unde apparet nullum antea censum Judæis fuisse imperatum; ergo.

Resp. has difficultates inde tantum oriri, quòd nos multæ ejusmodi facti circumstantiæ lateant; at nihilominus factum ipsum ut constans tenendum est. Nam sepositâ etiam divinâ librorum sacrorum inspiratione, si liceat factum ita publicum et manifestum, à testibus idoneis et scriptoribus coætaneis memoriæ proditum, in dubium revocare, jam nihil certi in historiâ esse potest. Et verò adeò indubitatum erat tum Josephum, tum Mariam et Jesum ejus filium in tabulas censûs Bethleemi relatos fuisse, ut ad eas imperatorem Antoninum Pium ac proceres romanos provocare non dubitet S. Justinus Apolog. 1, olim 2: « Est « (Bethleem), inquit, vicus quidam in terrâ « Judæorum, stadiis 35 Jerosolymis distans, « ubi natus est Jesus-Christus, quemadmodum

« et ex descriptionibus censûs discere potestis, « quæ sub Cyrenio primo vestro in Judæâ præ- « side confectæ sunt. » Tertullianus, qui Romæ diu commoratus fuerat, lib. 4 *contra Marcion*, cap. 7 et 19, et lib. *Adversus Judæos*, cap. 9, in testimonium nativitatis et generis Domini appellat pariter romani imperii archiva.

Ad primam probationem, mirum non esset scriptores profanos de descriptione quam Lucas commemorat, siluisse. Dionis enim qui solus omnia Augusti gesta accuratè conscripsit, illa historiæ pars periit, in quâ descriptio ejusmodi debuisset contineri, nempe ab anno urbis conditæ 748 ad annum 758. Cæterum ex Tacito colligitur Augusto imperante factum fuisse accuratissimum orbis universi, id est, omnium imperii romani provinciarum ac regnorum sociorum descriptionem. Is enim *Annal.* lib. 1 Augustum auctor est « libellum confecisse, « in quo opes publicæ continebantur, quantum « civium, sociorumque in armis, quot classes, « regna, provinciæ, tributa aut vectigalia, et « necessitates ac largitiones; quæ cuncta manu « suâ præscripserat Augustus. » Idem brevium totius imperii memorant Suetonius in Octavio, cap. ult. in fine, et Dio Cassius lib. 56. Jam verò ejusmodi indiculus ab Augusto confici non potuit, nisi acto censu universali et accuratiore quàm fieri solebat.

Conjicit Petavius hunc censum fuisse insolitum et extraordinarium, nec referri ad eos tres quorum meminit Suetonius. Et reipsâ, prima recensio, quam, ante adeptum imperium, cum collegâ Marco Agrippâ Augustus edixit, ad illud brevium satis esse non potuit; tertii autem censûs, quem anno imperii ultimo mandaverat, non vidit exitum. Verùm nihil impedit quominus illa universi orbis, de quâ agimus, diligentior descriptio sit secundus census ab Augusto, ut dictum est, anno ante æram vulg. 8 præscriptus, et Suetonio memoratus. Nec obstat quòd nonnisi anno abhinc tertio Christus natus fuerit. Neque enim verisimile est, neque ullo probatur teste, censum illum anno eodem quo imperatus est, ubique incœptum fuisse, multò minùs absolvi potuisse. Rei tot dierum tamque operosæ difficultatem augebat maximè libertatis studium populis à naturâ insitum, ac odium servitutis. Populos enim recensionibus hujusmodi non assuetos illas impatienter tulisse, atque inde tumultus sæpè fuisse exortos, locupletissimus fidejussor est ipsemet Claudius imperator in oratione de civitate

romanâ Gallis concedendâ, cujus orationis æræ olim incisæ fragmentum exhibet Gruterus in *Inscription. Rom. Imperii*, pag. 502 : « Quod « opus, inquit Claudius de censu verba faciens, « quàm arduum sit nobis..... nimis magno ex- « perimento cognoscimus. » Et Dio, lib. 54, Germanos ait anno urbis 742, in Romanorum fines irrupisse, « quia videbant Gallos jugum « servitutis graviter ferre; » quodnam autem fuerit istud *servitutis jugum* à Gallis impatienter toleratum, novimus ex citato Claudianæ orationis fragmento, in quo census ab Augusto Gallis eo tempore impositus, appellatur *novum tum opus et inadsuetum Galliis*. Tantæ igitur molis negotium, qualis erat tot regionum et provinciarum, tot populorum seu subditorum seu sociorum accurata recensio, nonnisi aliquot annorum spatio perfici potuit, proindeque, etc.

Ad secundam probationem, quod ad Tertullianum attinet, recensionem de quâ S. Lucas loquitur Sentio Saturnino adscribentem, hunc deserendum censet Tillemontius (1) Annotat. 4 super Jesu-Christi historiâ, propter allatam Norisii observationem. Paghius, *Critic. in Annal. Baron.* in Apparatu num. 127 et 136, satius existimat annum nativitatis Christi citra retrahere, et anno ante æram vulgarem sexto alligare; quo difficultas augetur de annis quasi triginta, quos vixerat Christus, Luc. 3, v. 23, dùm à Joanne baptizatus est; quapropter annum imperii Tiberii decimum quintum, quo Christus baptismum suscepit, computare cogitur non à morte Augusti, sed ab ejusdem Tiberii cooptatione, *ibid.* ad an. Christi 59; quod à nullo scriptore veteri seu sacro seu profano esse usurpatum, jam supra notavimus. Turnemini, *Dissert.* de annis Christi, omnia sibi visus est conciliare, Christi nativitatem ad annum ante æram vulgarem 4 referendo. Scilicet Quirinium anno urbis conditæ 750, Quintilii Vari successorem et Syriæ præsidem ordinarium fuisse statuit, Josephum lib. 18, *Antiq. citatis* cap. 1 et 2 de Quirinio falli ratus, censumque post Agrippæ pulsionem actum Sentio Saturnino tribuens. Sed obstat maximè quòd teste non solum Josepho, lib. 17 *Antiq.* cap. 10, aliàs 12, n. 9, et lib. 2. De bello Jud. cap. 3, sed etiam Tacito. *Hist.* lib. 5, Quintilius Varus post Herodis mortem fuerit adhuc Syriæ præses ordinarius.

Censum à Saturnino inchoatum judicat Huë-

(1) Mémoires pour l'hist. eccl. tom. 2, p. 421.

tius prop. 7, cap. 10, n. 3, ob testimonium Tertulliani, perfectum verò sub Quintilio Varo, cujus nomen reipsà scriptum putat à S. Lucà, sed amanuensium vitio factum fuisse ut loco Κυντιλίου nunc in textu legamus Κυρηνίου, quod *facile patitur*, inquit, *similitudo nominum et characterum affinitas*. Ubi mendum in Lucà pervertustum supponitur; nam S. Justinus Martyr Apol. 1, mox laudatà, necnon et Syrus interpres legunt Cyrenium. Pezronius in Historià Evangelicà censet nascente Christo Quintilium Varum praeuisse Syriæ superiori, et Saturninum inferiori; quod cum Josepho Antiq. lib. 17, cap. 5, proximè citato non videtur posse conciliari.

Duæ supersunt responsiones, quibus omnis videtur tolli difficultas. Prima, quam non sine aliquà differentià exponunt Petavius de Doct. temp. lib. 12, cap. 8, Norisius in Cenotaphiis Pisan. Dissert. 2, et in Epoch. Syromaced. Dissert. 3, et alii, eò ferè recidit, Cyrenium seu Quirinium virum consularem tunc temporis in Oriente degentem, ac propter recentem de Homonadensibus victoriam totà Asià celebratum, cum extraordinarià potestate descriptioni, tum in Syrià, tum in Judæà gente socià et amicà, faciendæ, ab Augusto præpositum fuisse, quamvis tunc Syriam Saturninus ac deinde Varus administrarent. Enimverò certò constat à præsibus et magistratibus ordinariis non semper in provinciis, ac nunquàm Romæ censum fuisse actum. Vide Noris. in Cenotaph. Itaque Sentius Saturninus ejusque successor Quintilius Varus, Syriæ præsides ordinarii, fuerunt in descriptione exigendà Quirinio subordinati; nominavit autem Tertullianus præsidem ordinarium sub quo census fieri coëptus est. Vox porrò ἡγεμονεύοντος, quā S. Lucas utitur, et quam voce *præsidis* Vulgata reddit, nullo pacto restringitur ad significandum legatum proprætorem Syriæ, sed pro quocumque in Syrià potestatem et imperium obtinente debet accipi. Felix, Syriæ duntaxat procurator apud eundem Lucam, Act. 24, v. 1 et 10, ἡγεμὼν nuncupatur. Josephus pariter illi voci latiore sensum passim alligat, eaque solet seu supremo seu subordinato imperio potientes designare.

Alter responsio auctorem habet Joannem Georgium Herwartum Bavarie dùm viveret cancellarium, qui initio seculi proximè elapsi floruit. Is in suà Chronologià novā et verā ad calculum astronomicum revocatā, cap. 241, docet textu Lucæ de quo agitur non significari censum nascente Christo fuisse actum à Cyrino

præsidente Syriæ, sed tantum descriptionem quæ tunc facta est, præcessisse eam quæ deinde à Cyrino seu Quirinio jussa est. Scilicet contendit græca Αὐτῇ ἡ ἀπογραφὴ πρώτη ἐγένετο ἡγεμονεύοντος τῆς Συρίας Κυρηνίου, sic reddenda esse: *Hæc descriptio prior facta est, quàm illa præsidis Syriæ Cyrini*, seu ad litteram, *prior præsidente Syriæ Cyrino*, hoc est, antequàm Syriæ præesset Cyrenus. Quod probat quia nomen positivum πρῶτος, pro comparativo πρότερος sæpissimè à Græcis usurpatur. Joan. 1, v. 15 et 30, ubi latinè legimus, *quia prior me erat*, græcè habetur ὅτι πρῶτός μου ἦν. Idem loquendi modus extat in eodem Evangelio cap. 15, v. 18, atque ejusmodi exemplorum ex scriptoribus, seu Ecclesiasticis, seu profanis depromptorum ingentem acervum accumulat Herwartus. Hanc doctissimi viri expositionem suam fecit Keplerus in Chron. necnon clarissimi continuatores Bollandi Henschenius et Papebrochius in Diatribâ prælim. ad mensem Aprilem, exercit. 2, n. 9; Natalis Alexander Hist. Eccles. sec. 1, Dissert. 2, q. 1; Calmetus ad hunc locum, etc., et ex Protestantibus Schmid. in hunc locum, Le Clerc in Harm. etc. In eadem expositione emin. et eruditiss. Norisius id unum vitium deprehendit, quòd nimirum sit nova; quapropter hanc nec probat nec improbat loco citato Cenotaph. Pisan.

Ad tertiam probationem, jam ex dictis patet Josephum cum Lucà perfectè concordare. Nam Lucas his verbis: *Hæc descriptio prima*, seu, *prior*, etc., apertè indicat alteram Judæorum recensionem deinde exactam à Quirino, quam enarrat Josephus; dùmque scribit idem Act. 5, v. 37, *in diebus illius posterioris professionis* periisse Judam Galilæum, qui *averterat populum post se*, Josepho mirificè consonat.

At, inquires, descriptionem sub Herode factam silet Josephus, narratque censum post Archelai deturbationem à Quirinio imperatum Judæ Gaulonitis seditioni locum dedisse, quod supponere videtur tum primum censitos fuisse Judæos. Verum inter utramque illam recensionem maximum discrimen intercedit. Judæi vivente Herode eo modo censiti sunt, quo regna et nationes amicæ et sociæ Romanorum; nulla ab iis tum postulata sunt tributa, quippe ab hujusmodi regnis nullasolebat Augustus exigere, quem usum deinde ejus successores immutârunt. In primâ igitur illâ Judææ descriptione illud unum investigatum est, quantas Judæorum natio, ubi opus esset, auxiliares vires Romanis posset supeditare; nec dubium esse potest quin Herodes,

ut Romanis addictissimus videretur, illi peragendæ recensitioni impensissimè faverit. Cum itaque nulla pecuniarum exactio, nulla fortunarum imminutio, nulla reipublicæ statûs immutatio descriptioni ejusmodi annecteretur, nihil sanè mirum quòd nullos memoriâ dignos excitârit motus, quòdque à Josepho qui tot alia majoris momenti reticet, fuerit prætermissa. At census posterior non nuda fuit ejusmodi descriptio; Archelao in exilium amandato, Judæa in provinciam Romani imperii versa, ac Syriæ præsidibus parere jussa, ad instar aliarum imperii provinciarum censita fuit; atque ex Josephi locis in objectione citatis apertum est hanc recensitionem eo fine fuisse imperatam, ut Archelai bona in fiscum redigerentur, quantaque possent à populi solvi tributa cognosceretur.

Inst. cum Bodino apud Huet. prop. 9, cap. 10 : 1° Christus pluribus in locis apud Evangelistas cognominatur *Nazarenus*, nullibi Bethleemites; ergo Nazarethi, non Bethleemi natus dici debet. 2° Edictum Augusti mulieres non continebat; siquidem quotiescumque Livius numerum censitorum describit, toties hæc similia adjicit: *Præter mulieres, præter orbos et orbas*; ergo. 3° Josephus eodem edicto non tenebatur, quippe qui non erat civis romanus; solos enim cives romanos censitos fuisse colligitur ex enumeratione primi censûs ab Augusto imperati, prout ab Eusebio lib. 2 Chron. ad olymp. 188, exhibetur. 4° Saltem Josephus coactus non fuisset à loco propriæ habitationis discedere; nam auctor est Suetonius in Julio Cæsare cap. 41, à Julio Cæsare dictatore unumquemque in domicilio suo recensitum.

Resp. hæc omnia levissima esse et nullius momenti. Ad primum, ipse explicat S. Matthæus, cap. 2, v. 23, Christum vocatum fuisse Nazarenum, quia Nazarethi ab infantiâ cum Mariâ et Josepho commoratus fuerat. Ad secundum, Livius his verbis, *præter mulieres*, etc., significat tantum mulierum enumerationem à se omitti, non verò eas in censibus non fuisse comprehensas. Certè nomina uxorum, liberorum, etc., in censum romanum relata fuisse, testes sunt locupletissimi Dionysius Halicarnass. loquens de censibus à Servio Tullio institutis, et à T. Largio primo dictatore restitutis Antiq. romanarum lib. 4 et 5, necnon Cicero, lib. 3 de Legibus. Ad tertium, quis fuerit numerus romanorum civium describit Eusebius, non ait hos solos censitos fuisse. Cum illi agerentur census, ut innotesceret quantæ essent imperii vires, quid opibus et hominum numero

tum per se, tum ratione devinctarum sibi gentium illud valeret, et quæ possent provinciis tributa imponi, quis non videt absurdè statui solos cives romanos in censum venisse? Florus lib. 1, cap. 6, ait *omnia patrimonii dignitatis, ætatis, artium, officiorumque discrimina in tabulas referri consuevisse*. Ad quartum, monet Suetonius *nec more, nec loco solito* peractum fuisse hunc censum quem Julius Cæsar imperavit. Quod autem in censu romano sæpius locorum mutatio præciperetur, vel ex his Ulpiani lib. 3 de Censibus, quæ referuntur in Jure civili I. *Forma*, § 2, de censibus, perspicere est: *Is verò, inquit, qui agrum in aliâ civitate habet, in eâ civitate profiteri debet in quâ ager est*. Sed in Judæis recensendis mutationes ejusmodi in primis locum habere postulat tribuum familiarumque distinctio, quæ apud eos summâ semper diligentia juxta legis præscriptum custodita fuerat. Atque hinc census tempore Davidis legitur factus per tribus. De his omnibus plura vide apud Huetium loco citato.

DE TEMPORE [NATIVITATIS MESSIÆ. — Conclusio. Christus Jesus in iis natus est temporum circumstantiis in quibus Messiam nasciturum prædixerant Prophetæ.

Probatur. Nam 1° Messias nasci debuit secundum Prophetiam Daniel. 9, supra fusiùs expositam, nondum elapsis septuaginta hebdomadibus annorum, *ab exitu sermonis ut iterum ædificaretur Jerusalem* computandis, quod in Christo Domino impletum esse, ex dictis hic cap. 1, art. 2, et cap. 2, art. 1, manifestum est. 2° Messias, ut dictum est cap. 1, art. 3, nasci debuit juxta Aggæum et Malachiam stante secundo templo. Atqui constat Christum plus quàm 70 annis ante conflagrationem templi natum esse; ergo. 3° Nasci debuit Messias florente romano imperio, ut patet ex Prophetiâ Danielis 2, quam cap. 1, art. 4, exposuimus. Porro Christus natus est Augusto imperante et versùs finem vitæ Herodis Matth. 2 et Luc 2, quo tempore florentissimum fuisse romanum imperium nemo nescit. 4° Messiæ nativitatis tempus altâ pace temporali ubique obtinente debuisse insigniri, Prophetæ videntur indigitare. Isaïæ 2, v. 4: *Conflabunt (populi) gladios suos in vomeres, et lanceas suas in falces; non levabit gens contra gentem gladium, nec exercebuntur ultra ad prælium*. Zach. 3, v. 8 et 10: *Ecce ego adducam servum meum Orientem.... In die illâ, dicit Dominus exercituum, vocabit vir amicum suum subter vitem et subter ficum*. Multa alia in Prophetis loca occurrunt,

in quibus pax sub Messia futura et ab ipso danda promittitur.

Ubi observa 1^o, pleraque ejusmodi oracula intelligenda esse, ut aliquando ostendemus, de pace spirituali, quâ mentes humanæ tranquillantur, perturbationes animorum sedantur, homines areto charitatis vinculo uniuntur, atque ad perpetuam omnis commotionis expertem felicitatem perducuntur; quam quidem sibi pacem pariunt quotquot Christi legibus, ut par est, obtemperant. Observa 2^o, aliquas tamen ex iis Prophetiis Christum spectantibus occurrere de terrenâ pace intelligendas, nempe quas ad eam referri nihil vetat; quod exemplis explico. V. g., istud Isaïæ 9, v. 7: *Pacis n n erit finis*, et illud ejusdem cap. 54, v. 10: *Fœdus pacis meæ non movebitur*, et alia ejusmodi, ad pacem cœlestem et æternam apertè pertinent. Sed modò adductus ex Zach. 3 locus de pace terrenâ potest sumi, quamvis tamen in eo sensus sublimior pacem cœlestem spectans etiam latere videatur. Pariter allatus simul versiculus 4 capitis 1 Isaïæ ad pacem temporalem populorum potest inflecti. Non enim obstant hæc verba: *Nec exercebuntur ultra ad prælium*; namque, ut advertit Huetius, prov. 9, c. 8, n. 3, «dictio *ultra*, sive ut hebraicè « concepta est טוֹר (hoc), nonnunquam æternitatem, diuturnitatem aliquam nonnunquam « sæpè etiam brevitatem temporis significat. « Postremum hoc docet R. David Kimchi in « libro Radicum et exemplis probat. Aliquando « etiam particulæ neganti conjuncta aliquam « rei partem detrahit, non totam inficiatur; « sic 35 Geneseos capite (v. 10.) Jacobo dixit « Deus: *Non vocaberis ultra Jacob*; quamvis « sæpè deinceps, et hoc ipso capite aliquoties « vocatus sit Jacob. Plura ejusmodi exempla « sunt in promptu. » Itaque in hoc Isaïæ testimonio non modò pax spiritualis intelligenda venit, sed etiam pax temporalis, quæ nascente Messia florere debuit, et per aliquod tempus perseverare. Jam verò tempora nativitatis Christi pace eximiâ fuisse insignita indubitatum est. Nam 1^o, natus est Jesus toto orbe in pace composito; quod non modò ex constanti SS. Patrum traditione, sed ex scriptoribus profanis colligitur. Ut enim observat Norisius *Cenotaph* Dissert. 2, nullus scriptor meminit belli cujusquam à Romanis acti aut parati ab anno urbis 748 ad 751; cum ergo Christus anno urbis 749, die 25 Decembris, ante æram vulgarem 5, aut saltem versùs hunc annum natus sit, consequens est eum natum altà per orbem

universum vigente pace. Imò usque ad annum urbis 759, nullo gravi bello imperium romanum fuit agitaturn, ut modò dicemus; ergo, etc. 2^o Christus natus est Augusto imperante: atqui tempora quibus imperavit Augustus pace præsertim signata sunt. *Janum Quirinum*, inquit Suetonius in Augusto cap. 22, *semel atque iterum à conditâ urbe memoriam ante suam clausum, in multo breviori temporis spatio, TERRA MARIQUE PACE PARTA, ter clausit*. Ex Dione porrò, lib. 51 et 53, habemus quibus annis Jani templum bis clausum fuerit; nempe primum anno urbis 725, ante æram vulgarem 29, tuncque ad triennium potuit obserari; iterum anno urbis 729, ante æram vulgarem 25, quâ vice potuit annis novemdecimve clausum remanere.

Quo autem tempore tertiò occlusum illud fuerit, Dio vitæ Augusti accuratus scriptor annotaverat etiam procul dubio in eâ historiæ suæ parte quæ periit, et quâ Augusti gesta annis decem, nimirum ab anno urbis 748, ad annum 758, continebantur. Solus inter veteres Jani ab Augusto tertium clausi epocham assignat Orosius quinti seculi auctor. Is lib. 6, cap. 22, Jani portas anno urbis conditæ 752 clausas ad annos ferè duodecim fuisse asserit, quem Casaubonus in notis ad locum Suetonii citatum, Huetius, prop. 9, cap. 8, n. 3, et alii multi secuti sunt. At Norisius in *Cenotaph*. Pis. loco citato Orosium eâ de re non audiendum existimat, 1^o quia anno urbis 752, bellum adversùs Parthos gravissimum ab Augusto paratum est, ad quod gerendum Caius Cæsar, Augusti filius, in Orientem missus fuit; etsi autem bellum illud, Parthis pacem postulanti-bus, actum non fuerit, attamen is annus ad Janum claudendum minimè fuit opportunus. 2^o Quia anno abhinc septimo, seu anno urbis 759, difficillimum adversùs Dalmatas bellum cœpit, multisque aliis in locis rebelliones sunt exortæ, adeò ut planum sit Janum tunc clausum manere non potuisse. 3^o Quia tempus ab anno urbis 752 ad 759 elapsurn, à bellis vacuum non fuit. Tunc temporis bellum in Armeniâ gessit Caius Cæsar, et in Germaniâ anno 754 rebellatum est. Ex his aliisque magnâ eruditione, more suo, congestis colligit doctissimus cardinalis nec anno urbis 752 Janum tertiò obseratum fuisse, neque duodecim annis tunc clausum mansisse. Cùm autem *ab anno urbis 748, ad annum 751, nulla nobis à quoquam scriptore Romanorum bella prodantur*, ut jam notavimus, statuit eo triennio Jani fores tertiò ab Augusto clausas fuisse.

Tillemontius in suâ imperatorum Historiâ, tom. 1, in Augusto, art. 10, etc. Norisio consentit quantum ad epocham Jani ab Augusto tertium clausi citra retrahendam; hanc verò non anno urbis 748, sed 746, alligandam putat, hoc ductus argumento, Horatium, qui eo anno 746, die 27 novembris mortuus est, in ultimâ ode suâ, tum Sicambrorum eodem anno ab Augusto domitorum, tum Jani clausi mentionem facere. Præterea censet adversus Norisium ab hoc anno urbis 746, usque ad 759, Janum potuisse obserari; siquidem bello quod in Parthos Augustus anno urbis 752 paraverat, nullus fuit locus; grave non fuit bellum quod in Armeniâ Caius Cæsar gessit; idemque dicendum de rebellione Germanorum anno urbis 754. Propter leviora ejusmodi bella, quibus romani imperii toto orbe diffusi pax turbata non censebatur, Jani fores reserari non præcipiebat Augustus. Ex his concludit Tillemontius fortè in annos duodecim, ut Orosius tradit, templum Jani tertio clausum fuisse.

Porrò si explicatis doctissimorum virorum sententiis, nobis liceat aperire quid censeamus; 1^o infirmum videtur quod ex Horatii ode ultimâ argumentum eruit Tillemontius. Etenim in illâ ode Jani clausi meminit quidem Poeta, at de Sicambris ibi nihil habet, sed tantum in ode præcedenti; quapropter donec probaverit Tillemontius ex ejusmodi duabus odis, quæ reipsâ ejusdem metri sunt, unam tantum conflari, vel oden quæ in vulgaribus Horatii editionibus postrema reperitur, esse etiam tempore ultimam, tamdiu quod in eâ de Jano clauso legitur poterit ad Janum secundò clausum referri. 2^o Etsi victi sint Sicambri anno urbis 746, attamen non videtur statim Germania paccata, itaque cum Dio apud quem legimus accuratam anni urbis 746 ac fortè integri anni 747, historiam, Jani tertium ab Augusto clausi non meminerit, satius est anno demùm 748, vel ad finem anni 747, ante æram vulgarem 7, clausum tertio Janum statui, adeò ut is clausus fuerit cum natus est Christus. 3^o Quod attinet ad tempus quo pax ista nullo gravi bello turbata est, illud fuit annorum circiter duodecim; quapropter Tillemontio assentimur, Orosium, de Jano per annos ferè duodecim tertium clausum, vindicanti.

Cæterum eò insignior fuit pax illa quæ ad Messie tempora orbi universo sub imperio Augusti partita est, quòd bellis antea perpetuis, ac ferè ubique intestinis successerit, quòd æquis

legibus ab Augusto sancitis fuerit conjuncta, postremò quòd etiam post Augusti mortem per annos complures multis in locis vigerit.

DE NOMINE MESSIE IMPONENDO, ALIISQUE EJUS INFANTILE MYSTERIIS. — Tradunt Evangelistæ Christo nomen *Jesu* fuisse impositum, quod *Salvatore* sonat Matth. 1, v. 21 et 23, Luc. 1, v. 31, et cap. 2, v. 21. Tradit etiam S. Matthæus, cap. 2, Christum infantem à magis adoratum et muneribus donatum fuisse, tum in Ægyptum fugisse, ac ejus occasione cæsos ab Herode parvulos.

Atqui hæc à Prophetis de Messia prædicta fuerant. 1^o Nomen *Jesu* seu *Salvatoris*, Messie tribuendum non semel prænuntiat Isaias. *Haurietis*, inquit cap. 12, v. 3, *aquas in gaudio de fontibus Salvatoris*; et cap. 51, v. 5: *Prope est justus meus, egressus est Salvator meus*. Item cap. 62, v. 11: *Dicite filiæ Sion: Ecce Salvator tuus venit, ecce merces ejus cum eo, et opus ejus coram illo*; pariter Habacuc 3, v. 18: *Ego in Domino gaudebo. Et exultabo in Deo Jesu meo*. Denique Zach. 9, v. 9: *Exulta satis, filia Sion; jubila, filia Jerusalem: Ecce Rex tuus veniet tibi justus et Salvator*. Hæc Prophetia, ait R. Salomo Jarchi in hunc locum, non potest explicari nisi de Rege Messia. Similia traduntur in *Bereschit rabba* ad Gen. 49. 2^o Circa Magorum adorationem nota sunt hæc vaticinia. Psal. 71 (Hebr. 72) v. 9: *Reges Thursis et insulæ munera offerent; reges Arabum et Saba dona adducent.... et vivet et dabitur ei de auro Arabiæ*. Quæ de Messia esse exponenda fatentur Judæi in *Bereschit ketanna* ad Gen. 33. Imò totum hunc Psalmum de Messia exposuerunt, teste ipso Jarchio, quamvis ipse priores septem vesiculos de Salomone nitatur explicare. Isai. 60, v. 6: *Omnes de Sabâ venient, aurum et thus deferentes, et laudem Domino annuntiantes. Hic est Rex Messias*, aiunt Judæi in *Beresch. rabba* ad v. 6 capitis 25 Genes. 3^o Fugæ Christi in Ægyptum applicat S. Matthæus cap. 2, v. 13, istud Oseæ 2, v. 1: *Ex Ægypto vocavi filium meum*, quamvis ad Israelitas historicè illud pertineat; sicut et illis Psalmi 79 (hebr. 80) v. 9: *Vineam de Ægypto transtulisti*, Messiam allegoricè designari fatetur Aben-Ezra in hunc Psalmum. 4^o Infantium cædes graphicè à Jeremiâ pingitur cap. 31, v. 13: *Vox in excelsa audita est lamentationis, luctûs, et fletûs Rachel* (quæ sepulta est in viciniâ Bethleem Genes. 35, v. 19) *plorantis filios suos, et nolentis consolari super eis, quia non sunt*.

§ 2. *De vaticiniis ad Messiæ vitam, ministerium, miracula, aliasque ejus ministerii circumstantias attinentibus.*

CONCLUSIO. Quæ de Messiæ vitâ, ministerio, miraculis, aliisque ejus ministerii circumstantiis Prophetæ prædixerunt, in Christo Jesu impleta fuere.

Prob. Nam 1º, juxta Zachariam, 9, v. 9 et 10, debuit Messias pauperem et humilem vitam agere, et Jerosolymam, asinâ vectus, ut triumphator ingredi. *Exulta satis, filia Sion*, ait propheta; *jubila filia Jerusalem: Ecce Rex tuus veniet tibi justus et Salvator, ipse pauper* (Hebr. יְהוֹנִי, quæ vox propriè significat *pauperem*, licet possit etiam significare *mansuetum*) *et ascendens super asinam et super pullum filium asinæ... et loquetur pacem gentibus, et potestas ejus à mariusque ad mare, et à fluminibus usque ad terminos terræ.* Quæ de solo Messiâ accipi posse tradunt ipsi Judæi, ut mox vidimus, atque adeò evidens est, ut nihil frigidius interpretatione Grotii hæc historicè de Zorobabele Christi typo exponentis. Atqui illa prophetia exitum habuit in Christo. Pauperem enim ille vitam egit, Matth. 8, v. 20: *Vulpes foveas habent, inquit, et volucres cæli nidos; filius autem hominis non habet ubi caput reclinet.* Humilis fuit adventus ejus, et asinæ insidens Sionem triumphator ingressus est, quod narratur Matth. 21; ergo, etc. 2º Messiæ prægredi debuit Præcursor poenitentiam in deserto prædicans. Isaïæ 40, v. 3 et 4: *Vox clamantis in deserto: Parate viam Domini, rectas facite in solitudine semitas Dei nostri. Omnis vallis exaltabitur, etc. Et revelabitur gloria Domini, etc.* Et Malach. 3, v. 1: *Ecce ego mitto Angelum meum, et præparabit viam ante faciem meam: et statim veniet ad templum suum Dominator quem vos queritis, et Angelus testamenti quem vos vultis.* Posterius hoc vaticinium ad Messiam ejusque Præcursorem spectare, supra ostendimus; prius autem ad eosdem applicant ipsimet Judæi R. David Kimchi et R. Aben-Ezra in hunc locum. Porro eventum ejusmodi vaticiniis perfectè respondentem narrat S. Matthæus cap. 3: *Venit Joannes Baptista prædicans in deserto Judææ et dicens: Poenitentiam agite, appropinquavit enim regnum cælorum. Hic est enim qui dictus est per Isaïam Prophetam dicentem: Vox clamantis in deserto, etc.* Christus ipse Matth. 11, v. 10, Joannem laudato Zachariæ textu prædictum asserit. Tandem utriusque Prophetæ testimonia eidem Joanni ut Christi Præcursori accommodantur, Marc. 1. 3º Messias munia magistri hominum ac sacri præconis

obire debuit. Psal. 2, v. 6: *Ego autem constitutus sum rex.... prædicans præceptum ejus.* Psal. 23, v. 23: *Narrabo nomen tuum fratribus meis.* Isaï. 2, v. 3: *Docebit nos vias suas, et ambulabimus in semitis ejus.* Et cap. 30, v. 20: *Non faciet avolare à te ultra doctorem tuum, et erunt oculi tui videntes præceptorem tuum;* cap. 52, v. 7: *Quàm pulchri super montes pedes annuntiantis et prædicantis pacem, annuntiantis bonum, prædicantis salutem, dicentis Sion: Regnabit Deus tuus!* cap. 53, v. 4: *Ecce testem populis dedi eum, ducem ac præceptorem gentibus;* cap. 61, v. 1: *Spiritus Domini super me, eò quòd unxerit Dominus me; ad annuntiandum mansuetis misit me, ut mederer contritis corde, et prædicarem captivis indulgentiam, et clausis apertionem; ut prædicarem annum placabilem Domino, etc.* Joel 2, v. 23: *Filii Sion, exultate et lætamini in Domino Deo vestro, quia dedit vobis doctorem justitiæ.* Atquæ hæc et similia de Messiâ intelligunt vel ipsi Judæi, quorum testimonia refert Raym. Martinus.

Hæc autem in Christo ad exitum pervenisse tota clamat historia evangelica. Inprimis videre est Matth. 9, v. 35, ubi dicitur quòd *Jesus circuiret omnes civitates et castella, docens in Synagogis illorum, et prædicans Evangelium regni.* Hinc præceptoris et magistri nomen tam frequenter illi datum, Matth. 8, v. 19, cap. 12, v. 38; Luc. 5, v. 12, cap. 5, v. 5; Joan. 1, v. 38, etc., atque ipse Christus Matth. 23, v. 10: *Magister vester, inquit, unus est Christus;* et Joan. 13, v. 13: *Vos vocatis me Magister et Domine: et benè dicitis; sum etenim.*

4º Ex Prophetis Messias debuit esse pastor animarum eximius. Isaï. 40, v. 11: *Sicut pastor gregem suum pascet; in brachio suo congregabit agnos, et in sinu suo levabit, fætas ipse portabit.* Jerem. 31, v. 10: *Qui dispersit Israel, congregabit eum, et custodiet eum sicut pastor gregem suum.* Ezech. 34, v. 23: *Suscitabo super eas pastorem unum, qui pasceteas, servum meum David; ipse pascet eas servum meum David; ipse pascet eas, et ipse erit eis in pastorem.* Eadem fermè ad verbum habentur cap. 37, v. 24, ubi Messias David appellatur, sicut et Jerem. 30, v. 9, et Osee 3, v. 5, quòd et ipse futurus esset celeberrimus ex posteris Davidis, et David insignis ejus typus fuerit. Agi autem ibi de Messiâ et evidens est, et non inficiantur Judæi. Denique Zach. 13, v. 7: *Framæa suscitare super pastorem meum.... percutite pastorem et dispergentur oves.*

Jam verò Christum pastoris optimi partes implevisse, facillè astruitur. Joan. cap. 10 ferè

integro, ipse docet ac operum suorum testimonio invictè comprobatur se esse pastorem bonum, cujus vocem oves audiunt, qui ponit animam pro ovibus suis, etc. Quapropter Matth. 26, v. 31, meritò in se transfert proximè laudatam Zachariæ prophetiam; et S. Paulus Heb. 13, v. 20, sic habet: *Deus autem pacis, qui eduxit de mortuis pastorem magnum ovium, in sanguine testamenti æterni, Dominum nostrum Jesum Christum, aptet vos in omni bono*, etc. Vide etiam 1 Petr. 2, v. 25, et cap. 5, v. 4.

5º Variis Messiam designarunt Prophetæ nominibus ex ministerio docendi quod exercuit consequentibus; nempe appellatus est *Lux*, Psal. 35, v. 10; Isai 9, v. 2, et cap. 42, v. 6, et cap. 49, v. 6, et cap. 60, v. 1, etc.; Mich. 7, v. 8; *Sol*, Malach. 4, v. 2; *Stella*, Num. 24, v. 17; *Germen*, Isai. 4, v. 2; Jer. 23, v. 5, et cap. 35, v. 15; Ezech. 34, v. 29; *Flos*, Cant. 2, v. 1; Isai. 11, v. 1; *Oriens*, Zach. 3, v. 8, et cap. 6, v. 12; *Dux*, Isai. 55, v. 4; Jer. 30, v. 21; Dan. 9, v. 25; *Veritas*, Psal. 84, v. 12, etc., quæ ab ipsis Judæis ad Messiam applicantur. Eadem porrò Jesu Christo competunt juxta novum Instrumentum. Sed de his sigillatim disserere longius foret. Vide Huet. prop. 9, cap. 54, 57, 58, 59, 69, 72; et Raym. Martin. in Pug. fidei, p. 125, 126, 279, 325, 337, 381, 436, 598, etc.

6º Multa Messiae prædicationis adjuncta et circumstantias sacri Vates exprimunt. Debuit juxta Isai. 61, v. 1, Evangelium annuntiare mansuetis, seu pauperibus et humilibus, ad quem locum Kimchius in lib. Radicum, in radice מַשְׁחַח, *maschach*: *Locutus est*, inquit, *Propheta in personâ Messiae, ac si Messias dixerit: Unxit Dominus me*, etc. Similiter Saadias Gaon in lib. Hæmunot, cap. 8. Christus autem ad illud idem testimonium respiciens, Luc. 4, v. 21: *Hodie*, inquit, *impleta est hæc scriptura in auribus vestris*. Et Matth. 11, v. 5: *Pauperes evangelizantur*. 7º Debuit Messias auditorum contradictionibus et obloquutionibus exponi, ab iisque odio haberi. Isai 65, v. 2: *Expandi manus meas totâ die ad populum incredulum, qui graditur in viâ non bonâ post cogitationes suas*. Vide etiam Psal. 34 (hebr. 359), v. 16 et 19; Psal. 68 (hebr. 69), v. 8 et 9; Psal. 108 (hebr. 109), v. 5; Jerem. 32, v. 33; Thren. 3, v. 45. Atqui ex totâ passim historiâ evangelicâ constat Christum contradictiones esse expertum et odio habitum. Matth. 9, v. 14, cap. 13, v. 54 et seq.; Joan. 15, v. 18, et alibi sæpè. Debuit in Galilæâ Evangelium suum prædicare. Isaiæ 9, v. 1 et 2, factâ mentione terræ Zabulon et

Nephthali, et Galilææ gentium, continenter additur: *Populus qui sedebat in tenebris vidit lucem magnam; habitantibus in regione umbræ mortis, lux orta est eis*. Christus autem in Galilæâ ministerii sui muniis functus est. Matth. 4, v. 23: *Circuibat Jesus totam Galilæam, docens in Synagogis eorum, et prædicans Evangelium regni*; et v. 13: *Habitavit in Capharnaum maritimâ, in finibus Zabulon et Nephtholim; ut impleretur quod dictum est per Isaiam Prophetam: Terra Zabulon et terra Nephtholim, etc., populus qui sedebat in tenebris, etc.* Debuit ex Judæis adsciscere discipulos et adjutores, qui zelo Dei accensi et impulsivi doctrinam evangelicam toto orbe disseminarent et propagarent. Ii à Prophetis dicuntur *pauci, reliquiæ, semen Israel semen relictum*, et ad formandam Ecclesiam brevi tempore numerosissimam assumpti. De Jerusalem, inquit Isaias, cap. 37, v. 32, *exibunt reliquiæ et salvatio de monte Sion; zelus Domini exercituum faciet istud*. Et cap. 29, v. 23: *In medio sui sanctificantes nomen meum, et sanctificabunt sanctum Jacob, et Deum Israel prædicabunt, et scient errantes spiritu intellectum*. Jerem. 3, v. 14 et 15: *Assumam vos unum de civitate, et duos de cognatione, et introducam vos in Sion, et dabo vobis pastores secundum cor meum, et pascent vos scientiâ et doctrinâ; cùmque multiplicati fueritis, et creveritis in diebus illis, ait Dominus, non dicent ultra: Arca testamenti Domini, etc.* Vide et Isai. 65, v. 9; Mich. 5, v. 8, etc. Hæc verò in Apostolos et Discipulos Christi quadrant. Luc. 6, v. 12: *Vocavit discipulos suos et elegit duodecim ex ipsis quos et Apostolos nominavit*; Marc. 3, v. 14: *Fecit ut essent duodecim cum illo, et ut mitteret eos prædicare*; Luc. 10, v. 1: *Designavit Dominus et alios septuaginta duos, et misit illos binos, ante faciem suam, in omnem civitatem et locum, quod erat ipse venturus*; Marc. ult. v. 15: *Dicit eis (Apostolis): Euntes in mundum universum, prædicate Evangelium omni creaturæ*; et v. 20: *Illi autem profecti prædicaverunt ubique*; Matth. ult. v. 19: *Euntes docete omnes gentes baptizantes eos, etc.*; Act. 1, v. 8: *Eritis mihi testes in Jerusalem, et in omni Judæâ et Samariâ, et usque ad ultimum terræ*.

8º Tandem Messias inter prædicandum debuit miracula edere, et quidem miracula certi generis, benefica scilicet, si ita loqui fas est, et hominibus de se utilia Isaiæ 42, v. 6: *Dedit in fœdus populi, in lucem gentium, ut aperires oculos cæcorum, et educeres de conclusione vincitum, de domo carceris sedentes in tenebris*; quæ sensu sublimiori conversionem et spiritualem

esurrectionem significantia, ad miracula Messiae et peragendas ab eo mortuorum suscitationes simul inflectenda esse, Judaei non inficiabuntur. Idem dicendum de hoc ejusdem Isaiae testimonio, cap. 53, v. 4 : *Verè languores nostros ipse tulit, et dolores nostros ipse portavit*; quod ad morbos corporis à Messia miraculosè sanandos attinet, etsi vulnera mentibus per peccatum illata maximè respiciat. Apertiùs idem Isaias cap. 53, v. 4, 5 et 6, Messiae prodigia exprimit : *Deus ipse veniet, inquit, et salvabit vos. Tunc aperientur oculi cæcorum, et aures surdorum patebunt. Tunc saliet sicut cervus claudus, et aperta erit lingua mutorum. Atqui innumera miracula ejusmodi benefica à Christo Domino ejusque Apostolis patrata in Evangeliiis et in Act. Apost. referuntur. Hinc Matth. 11, v. 3, 4 et 5, sci- scitantibus Joannis Baptistæ discipulis : Tu es qui venturus es, an alium expectamus? Respondens Jesus, ait illis : Euntes remuntiate Joanni quæ audistis et vidistis : Cæci vident, claudi ambulant, leprosi mundantur, surdi audiunt, mortui resurgunt. Et Matth. 8, v. 16 et 17 : Obtulerunt ei multos daemonia habentes, et ejiciebat spiritus verbo; et omnes malè habentes curavit; ut adimpleretur quod dictum est per Isaiam Prophetam, dicentem : Ipse infirmates nostras accepit, et ægrotationes nostras portavit. Nec Judaei ipsi maxima à Christo facto esse prodigia, ipsasque mortuorum resurrectiones inficiantur. Hæc operatum Christum nec vos diffitemini, aiebat Tertull. L. Adversus Judæos, cap. 9. Similia de Judæis testatur Arnobius, lib. 4 contra gentes. Atque in Talmude lib. Avoda Zara, in Midrasch Coheleth, et in libris Toldoth Jesu, seu Generationes Jesu inscriptis apud Wagenseilum et Huldricum, mentio fit insignium miraculorum à Christo Domino editorum, adeò vehementer ejusmodi prodigiis tota natio commota et affecta fuerat. Commiscuntur quidem Judaei Christum hæc operatum fuisse virtute ineffabilis nominis Domini è Sancto sanctorum furtim et incantationibus erepti, de quo infra, cap. 3. Hic satis est ostendisse, Christum ipsis etiam fatentibus Judæis ea operatum esse miracula, quæ à Messia patranda Prophetæ prædixerant.*

§ 5. De Prophetarum et Evangelistarum circa Messiae passionem et mortem consensione.

CONCLUSIO. Quæ de Christi passione et morte ab Evangelistis narrantur, vaticiniis Prophetarum Messiam contingentibus planè respondent.

Prob. 1º ex vaticinio Isaiae, cap. 53, ubi Propheta postquam cap. præcedenti à v. 7 ad finem de Messia splendidissimis verbis locutus est, contextè sic habet : *Quis credidit auditui nostro? et brachium Domini cui revelatum est? Et ascendet sicut virgultum coram eo, et sicut radix de terrâ sitiendi; non est species ei, neque decor : et vidimus eum et non erat aspectus, et desideravimus eum; despectum et novissimum virorum, virum dolorum et scientem infirmitatem; et quasi absconditus vultus ejus et despectus, unde nec reputavimus eum. Verè languores nostros ipse tulit, et dolores nostros ipse portavit; et nos putavimus eum quasi leprosum et percussum à Deo et humiliatum. Ipse autem vulneratus est propter iniquitates nostras, attritus est propter scelera nostra; disciplina pacis nostræ super eum : et livore ejus sanati sumus. Omnes nos quasi oves erravimus, unusquisque in viam suam declinavit; et posuit Dominus in eo iniquitatem omnium nostram. Oblatus est quia ipse voluit, et non aperuit os suum; sicut ovis ad occisionem ducetur, et quasi agnus coram tondente se obmutescet, et non aperiet os suum. De angustia et de judicio sublatus est; generationem ejus quis enarrabit? quia abscissus est de terrâ viventium; propter scelus populi mei percussus eum. Et dabit impios pro sepulturâ et divitem pro morte suâ (hebr. clariùs, et dedit cum impiis sepulturam ejus, et cum divite in morte suâ); èd quòd iniquitatem non fecerit, neque dolus fuerit in ore ejus. Et Dominus voluit contere eum in infirmitate; si posuerit pro peccato animam suam, videbit semen longævum, et voluntas Domini in manu ejus dirigetur. Pro eo quòd laboravit anima ejus, videbit et saturabitur; in scientiâ suâ justificabit ipse justus servus meus multos, et iniquitates eorum ipse portabit. Ideò dispertiamus ei plurimos; et fortium dividet spolia, pro èd quòd tradidit in mortem animam suam, et cum sceleratis reputatus est; et ipse peccata multorum tulit, et pro transgressoribus rogavit.*

Perlongum hunc Prophetæ textum exscribere non piguit, cui tam accuratè conveniunt quæ de Christi passione et morte ab Evangelistis exponuntur ut eo præsertim loco non putes Isaiam de futuro vaticinari, sed de præteritis historiam texere, quemamodùm advertit S. Hieronymus Præfat. ad Isaiam, aliique SS. PP. passim. Et quidem Messiam doloribus traditum, propter hominum peccata in se libenter suscepta percussum à Deo et humiliatum, livoribus quibus nos sanavit deformem, despectum, opprobriis opertum, vitæ innocentia mirabilem, et in perferendis tot malis patientia et mansue-

tudine cum ove et agno obmutescente comparandum, ad aliorum iniquitates delendas seipsum in victimam ultrò neci objicientem, cum sceleratis reputatum, de terrâ viventium abscissum, cum impiis in sepulturâ positum, nempe in loco impiorum suppliciiis destinato, mortuum, et tamen *cum divite in morte suâ*, id est, in sepulcro divitis conditum, pro transgressoribus orantem, spontaneâ morte suâ multos justificantem, ejusdem mortis merito semen longævum, seu innumeros spirituales filios generantem, inde etiam in plurimos, id est, Judæos et gentiles dominium acquirentem, fortesque spoliantem ac vincentem describit isto in capite Vates sacer. Atqui is simillima sunt quæ de Christi Domini passione narrant Evangelistæ; ergo, etc.

Vim istius argumenti non alio modo elidere conantur Judæi recentiores, quàm adductum Isaiaë caput Messiaë abjudicando. At verò Messiam ibi immediatè designari, facillimè et manifestissimè adstruitur, tum ex Isaiaë contextu, tum paraphratarum et Judæorum veterum auctoritate, tum etiam quia ad nullum alium regem aut Prophetam vaticinium de quo agimus potest accommodari. Atque id astruitur quidem ex contextu Isaiaë. Nam allato cap. 53, evidens est de eodem agi, de quo cap. præcedenti v. 7 et seq. hæc leguntur: *Quàm pulchri super montes pedes annuntiantis et prædicantis pacem, annuntiantis bonum, prædicantis salutem, dicentis Sion: Regnabit Deus tuus! . . . Ecce intelliget servus meus, exaltabitur, et elevabitur, et sublimis erit valdè. Sicut obstupuerunt super te multi, sic inglorius erit inter viros aspectus ejus, etc.* Sic INGLORIUS ERIT INTER VIROS ASPECTUS EJUS, ET FORMA EJUS INTER FILIOS HOMINUM. *Iste asperget gentes multas, super ipsum continebunt reges os suum; quia quibus non est narratum de eo, viderunt; et qui non audierunt, contemplati sunt.* Cùm enim his prolatis, continenter pronuntiet Isaiaë quæ ex cap. 53 adduximus, cùmque præsertim hæc verba proximè laudata, *sic inglorius erit inter viros aspectus ejus, etc.*, istis capitis 53: *Non est species ei neque decor, et vidimus eum, et non erat aspectus*, et aliis ejusmodi omninò congruant; clarum est de unâ eademque personâ in utroque capite esse sermonem. Et verò, cui bono negarent Rabbini caput 53 ad Messiam attinere, si semel faterentur exponendum de eo laudatum capitis 52 versiculum 14: *Sicut obstupuerunt super te multi, sic inglorius erit inter viros aspectus ejus, etc.*, qui summam capitis 53 repræsentat? Atque illa duo capita eodem pertinere ita certum visum est

Hebræis veteribus, ut caput 52, à versu 7, cum integro capite 53 conjunctum, unica ipsis fuerit, numero trigesima, Isaiaë prophetia. Porro adducta verba capitis 52 de Messia accipienda sunt. Etenim ille Domini *servus* sapientiâ et prudentiâ eximius, qui citatis cap. 52 versibus 13 et 14 dicitur *exaltandus, elevandus, sublimis valdè* futurus, hominesque *obstupefacturus*, ille idem dicitur v. 7 etiam citato, *annuntians et prædicans pacem, annuntians bonum, prædicans salutem, dicens Sion: Regnabit Deus tuus*; dicitur v. 10, is in quo *paravit Dominus brachium sanctum suum in oculis omnium gentium: et videbunt omnes fines terræ salutare Dei nostri*: dicitur v. ultimo, *aspersurus*, seu in admirationem rapturus *gentes multas, et regum ora compressurus*. Atqui hæc totidem sunt Messiaë speciales ac maximè proprii characteres; ergo.

Adde, verba hæc quæ v. 1 capitis 53 Prophetiaë de quâ agimus præmittit Isaiaë: *Quis credidit auditui nostro? et brachium Domini cui revelatum est?* et ista v. 8: *Generationem ejus quis enarrabit?* illa denique v. 12: *Ideò disperdiam ei plurimos, et fortium dividet spolia*, indicare de re maximâ, de mysterio summo, de personâ eximiâ fieri sermonem, ac proindè ibi intelligendum Messiam. Et reipsâ adeò sublimia sunt, ac supra omnem humanam cogitationem posita, quæ de redemptione generis humani, de satisfactione pro peccatis Deo per unius oblationem et mortem impendendâ, de pretio tanti sacrificii, etc., eò loci ab Isaia proferuntur, ut in solum Messiam ea cadere posse nemini dubitandum sit. Soli igitur Messiaë competere quæ in hoc Isaiaë oraculo continentur, ex ipso Vatis sacri contextu adstruitur.

Idemetiam evincitur ex Paraphrasi Jonathannis, qui utrumque istud caput de Messia explicat, quem etiam expressè nominat v. 13 capitis 52, et cap. 53, v. 10, atque ex Judæis antiquis in Siphre, in Talmude Tract. Sanhedrin, in Bereschith rabba R. Mosis Hadarsan, etc., quos laudat Huetius prop. 7, n. 15, et quorum testimonia refert Raym. Martin. in Pugione fidei, part. 2, cap. 9, n. 25, et part. 3, dist. 1, cap. 10, n. 3 et 4, et dist. 3, cap. 8, n. 5, cap. 16, n. 20, etc.; et D. de Voisin ad Proœmium.

Jam porro quæ recentiores Rabbini fingunt, ut vaticinium aliorum detorqueant, apertè falsa et absurda sunt, ac facillimè refelluntur. Etenim 1º, nihil infelicius interpretatione R. Mosis Alschech, qui postquàm versiculos præ-

cedentes regi Messiae applicuit, genuinam eujuslibet justi imaginem v. 2 et seq. capitis 53 effingi, Moysemque nominatim v. 9 exprimi arbitratur. Num igitur ista : *Vulneratus est propter iniquitates nostras, attritus est propter scelera nostra.... et livore ejus sanati sumus.... oblatum est quia ipse voluit.... Generationem ejus qui enarrabit?* et alia ejusmodi, ad justum quemlibet et ad Moysen ipsum ullâ ratione accommodari queunt? Ultrò quidem fatemur *justum* aliquem ibi designari, sed *Justum* hunc præcellentem, qui simpliciter et antonomasticè *Justus* et *Justitia* à Prophetis appellatur, id est, ipsum Messiam. 2° Non magis feliciter R. Abravanel in secunda suâ hujus loci expositione, idem caput interpretatus est de pio rege Josiâ, qui in campis Mageddo pugnans adversus Nechaonem regem Aegypti, vulnus à sagittariis accepit, quo brevi confectus est, ut narratur 4 Reg. 23, v. 29, et fusiùs 2 Paral. 35, v. 20 et seq. Enimverò Josiæ mortuis causam imprudentia ejus attulit, non iniquitas populi. *Noluit Josias reverti*, ait auctor Paral. 2, cap. laudato, v. 22.... *nec acquievit sermonibus Nechao ex ore Dei; verum perrexit inconsultò ut dimicaret in campo Mageddo, ibique à sagittariis mortifero vulnere ictus est.* ubi primùm autem se sauciatus sensit, fugâ conatus est morti se subtrahere. *Vulneratus à sagittariis*, ait sacer contextus, v. 23, *dixit pueris suis: Educite me de prælio quia oppidò vulneratus sum. Qui.... asportaverunt eum in Jerusalem, mortuusque est*, etc. Itaque pius ille rex nullo pacto dici potest *propter scelus populi fuisse vulneratus, attritus* et à Deo *percutus*, atque ad delendas populi iniquitates voluntariè in victimam oblatum. Non *posuit pro peccato animam suam*, non *ductus est quasi ovis ad occisionem*, non *obmutuit*, non *reputatus est cum sceleratis, fortium spolia* non tulit nec partitus est; proindeque, etc.

3° Apertè etiam falsa est interpretatio quam plerique celeberrimi Judæorum recentiorum doctores, Lipmanus in veteri Nitzachon, Salomon Jarchi, Aben Ezra, Kimchius, nec non aliquando Abravanel, etc., tradiderunt. Hi vaticinium Isaie de populo Israelitico in præsentis captivitate afflicto exponendum censent, voluntque Judæos iis quibus efficiuntur calamitatibus Deo alioqui mundum destructuro pro peccatis gentium satisfacere. Verùm is de quo Isaias sermonem habet non est cœtus hominum, sed persona singularis; siquidem v. 3, appellatur *vir dolorum*; de eo dicitur v. 8 : *Generationem ejus quis enarrabit?* de morte et sepul-

turâ ejus, etc., verba facit Propheta; quæ omnia profectò ad personam singularem, non ad cœtum pertinent. Præterea de illo ibi agitur, qui, v. 9, *iniquitatem non fecit, neque dolus fuit in ore ejus*; sed hanc ab omni dolo et iniquitate immunitatem, nec Isaïas sanè, nec alii Prophetæ populo Israelitico adscribunt, quippe qui hujusce gentis obcæcationem et perfidiam sæpissimè coarguunt; ipsique non diffitentur Rabbini apud suos etiam multa vitia obtinere; ergò, etc. Deinde num populus Israeliticus dici potest victima et oblatio spontanea pro peccatis gentium? *Oblatus est*, inquit Propheta, v. 7, *quia ipse voluit, et non aperuit os suum, sicut ovis ad occisionem ducetur*, etc. An in præsentis captivitate voluntariè detinentur Judæi, nonne ex ipsorum historiâ constat eos sæpissimè variis locis rebellasse, et toties quidem quoties alicujus prosperi exitus sese obtulit occasio? Ad hæc, pro gentibus non orant Judæi, is autem de quo Isaïas, *pro transgressoribus rogavit*. Postremò ista v. 4 et seq. : *Languores nostros ipse tulit, et dolores nostros ipse portavit.... vulneratus est propter iniquitates nostras, attritus est propter scelera nostra.... livore ejus sanati sumus.... Posuit Dominus in eo iniquitatem omnium nostram... Justificabit ipse justus servus meus multos, et iniquitates eorum ipse portabit.... et ipse peccata multorum tulit*; ista, inquam significantne solum jejunam hanc Judæorum pro gentium peccatis satisfactionem nullum iis salutis medium afferentem quam comminiscuntur Rabbini?

4° Illorum pariter rejicienda veterum Rabbiorum expositio qui duplicem distinxerunt Messiam, alterum obscurum, doloribus affligentem et occidendum, alterum victoriis ac imperio conspicuum. Qui enim in adducto Isaie vaticinio vir dolorum pro peccatis nostris attendendus dicitur, ille idem characteribus soli Messiae glorioso propriis ibid. exprimitur. Scilicet cap. 52, v. 7, sic de eo legitur : *Quàm pulchri super montes pedes annuntiantis et prædicantis salutem*; v. 10 appellantur *Salutare Dei nostri*; v. 13 præsignificatur *exaltandus et elevandus et sublimis futurus valdè*; v. 15, *aspersurus gentes multas*, et reges in admirationem rapturus. Cap. 53, v. 12, dicitur imperium in plurimos accepturus, et *fortium divisurus spolia*; ergo, etc.

Confirmatur maximè istud argumentum centu aliorum vaticiniorum, in quibus dolores, opprobria et occisio Messiae prædicuntur. Nempe Psal. 21, omnes passionis Christi circumstan-

tiae describuntur, et simul ipse exhibetur gloria conspicuus, et gentes universas ad Dei cultum adducturus. Idem quoque Messias in Daniel 9 dicitur occidendus, ibidem prænuntiatur peccata deleturus, justitiam sempiternam adducturus, visionem et Prophetiam completurus, in Sanctum sanctorum ungendus, pactum multis confirmaturus; ergo. Accedit hanc duplicis Messiae distinctionem nonnisi ad eludenda Christianorum argumenta esse excogitatam, et ab eâ plerosque Rabbinos hodiè recedere.

5^o Tandem non minoribus laborat vitiis R. Saadia Gaonis sententia, juxta quam vaticinium de Jeremiâ intelligendum est, inanemque operam sumit Grotius, dùm in commentario suo in Isaiam ad sacrum Prophetiae contextum enititur hanc aptare opinionem, quam ex parte sequitur, cæteroqui tamen sensu sublimiori, sæpè et magis κατὰ λέξιν (ad verbum), Christum ibi significari observans. Enimverò nonne absonè vir doctissimus, v. 4, *linguores nostros ipse tulit*, etc., significari vult Jeremiam non talia meritum mala tulisse, quæ Judæi erant meriti? Supponit illa explicatio propter perpressos à Jeremiâ dolores et eorum causâ, populum calamitatibus, quas meruerat, immunem fuisse; atqui tamen constat Judæos ob iniquitates suas à Chaldæis fuisse obsessos et partim interfectos, partim in captivitatem abductos, paucissimis relictis iisque pauperrimis et itidem Chaldæorum servis; ergo. Istud pariter v. 5 : *Vulneratus est propter iniquitates nostras*, etc., malè interpretatur Grotius de peccato quo Judæi in Jeremiam desævierunt, perinde atque si esset dictum : *Malè tractatus est nostro crimine... attritus est per nostram culpam*. Namque præpositio hebraica ibi usurpata, idem sonat ac *propter*, *ob*, nec voce *per* reddi potest. Quòd si illud hebræum vocabulum duplicem haberet intellectum, ad eum quem defendimus contextu vaticinii evidenter determinaretur, et præsertim versu 6 : *Posuit Dominus in eo iniquitatem omnium nostrum*, et versu 10 : *Si posuerit pro peccato animam suam*, denique v. 12 : *Ipsè peccata multorum tulit*. Hinc Grotius ipse lib. 5, de Relig. christianâ, cap. 19, nobis consentiens sic verterat : *Ob nostra peccata vulneratus est, attritus ob nostra crimina*. Istud autem vers. 7 : *Non aperuit os suum.... quasi agnus.... obmutescet et non aperiet os suum*, quâ ratione ad Jeremiam accommodabitur? certè non modò non obmutuit Jeremias, sed contra in Phassurem, à quo in carcerem missus fuerat,

mala maxima vaticinatus est, ac coram Deo gemitibus sese dedit, dicique suo natali maledixit. Dandum quidem grotio iracundè nihili esse locutum Prophetam; sed quid inde? hunc non peccasse? fatemur; an verò sequitur illum ad occisionem ductum, quasi agnum obmutuisse, et os suum non aperuisse? ergo. Hæc deinde v. 8 : *Generationem ejus quis enarrabit?* quis sustinebit Grotium ita frigidè interpretantem : *Erit valdè longævus?* Denique, ut alia plura omittam, is de quo apud Isaiam agitur, *ad occisionem ductus est*, v. 7; *abscissus est de terrâ viventium*, v. 8; *posuit pro peccato animam suam*, v. 10; *tradidit in mortem animam suam*, v. 12. Hæc autem Jeremiæ non competunt, quippe quem Judæi neci non tradiderunt, sed tantum in carcerem et in coenosum lacum detruserunt, unde post breve tempus ereptus est. Consultius igitur ac veriùs in citato L. 5, cap. 19, de Relig. christ. Grotius totam hanc Prophetiam soli Christo applicans recitatis Isaiæ verbis sic habet : *Quis potest nominari aut regum, aut Prophetarum, in quem hæc congruunt? Nemo sanè.*

Dices cum Isaac Abravanel : Illud injustum esset, Christum pro peccatis nostris passum esse et satisfacisse; ergo, etc. Nego ant. hoc argumentum ex professo tractabitur ubi de satisfactione Christi. Interea sic adversus Judæos arguere licet : Si Christum pro nobis satisfacisse iniquum esset, maximè quia æquum non videtur ut pœnas sontibus debitas luat justus et innocens; atqui hæc ratio Judæis et Abravanelli nulla esse debet. Quid ita? quia hæc verba Isaiæ 53, v. 5 : *Vulneratus est propter iniquitates nostras*, et alia ejusmodi, ipsi explicare coguntur de satisfactione à justo pro peccatis alienis exhibitâ. Hinc Abravanel, cùm Prophetiam illam Isaiæ de Josiâ explicat, ut diximus, docet non propter sua, sed propter hominum sibi coetaneorum peccata pium hunc regem periisse. R. Alseech. ad eundem Isaiæ locum miratur Deo optimo satis fuisse pœnas à singulis peccatoribus debitas ab uno juxto solvi. Tandem mox diximus à plerisque recentioribus Rabbis statui Judæos in hac captivitate pro delictis gentium satisfacere. Christianam ergo doctrinam de Christi satisfactionibus criminari non possunt, quin sibi ipsis contradicant.

Dices cum Orobio in tertio suo scripto n. 4 : « Vix ulla in novo Testamento capitis hujus (53 Isaiæ) mentio facta fuit ad comprobandum Messiae mortem prædictam, cùm tamen nullum illustrius ex veteri Testamento po-

« tuisset adduci. » Ergo malè ad Christi passionem refertur. Resp. caput illud Isaïæ manifestè applicari Christo tum Marc. 15, v. 28, tum Act. 8, v. 32 et 33. Aliundè verò eùm totum (passionis Christi) negotium, prout in Evangelio describitur, fatente ibid. Orobio, hic graphice depingatur, tam accurata cohærentia planè ostenderet ad hanc passionem referendum esse illud vaticinium, etiamsi à Christi discipulis eò applicatum fuisse in novo Testamento non legeretur. Silemus alias Orobio evasiones, quas præoccupavimus.

Prob. 2º ex Psalmo 21, qui Hebræis est 22. Nam ad statuendum eo Psalmo esse prædicta quæ de Christi passione et morte Evangelistæ narrant, satis est mirabilem cohærentiam illum Psalmum inter et præcipuas passionis Christi circumstantias intercedere, atque eundem de solo Christo posse accipi; atqui illa duo facilè evincuntur.

Ac consensio quidem Psalmi illius et Evangeliorum circa præcipuas passionis Christi circumstantias, ex ejusmodi circumstantiarum enumeratione fit evidens. Namque 1º, mœstitia in quâ se mergi passus est; terrores quibus voluit conculci, Marc. 14, v. 33 et 34; derelictio quam anima ejus, prout corpus respicit, experta est, Marc. 15, v. 34, in pluribus hujusce Psalmi versiculis pinguntur. Nam vers. 2, sic legitur : *Deus, Deus meus, respice in me, quare me dereliquisti?* Quæ verba Christus in cruce pendens protulit; v. 3 : *Deus meus, clamabo per diem et non exaudies;* v. 15 et 16 : *Sicut aqua effusus sum, et dispersa sunt omnia ossa mea. Factum est cor meum tanquam cera liquescens in medio ventris mei.* 2º Contemptus, irrisiones, opprobria quibus Christus fuit obnoxius, imò et verba quibus in cruce irrisus est, ipsosque irridentium gestus, nempe motus capitis, in eodem Psalmo legimus ex vero expressa; v. 7, 8 et 9 : *Ego autem sum vermis et non homo, opprobrium hominum et abjectio plebis; omnes videntes me deriserunt me; locuti sunt labiis, et moverunt caput. Speravit in Domino, eripiat eum, saluum faciat eum quoniam vult eum.* Confer. Matth. 27, v. 39 et 43, et Marc. 15, v. 29. 3º Multitudo Judæorum à quibus Christo reclamatum est, principum hujus multitudinis adversus eandem furor, ac extraneorum quibus traditus fuit, præfecti videlicet et militum romanorum immanitas in illo Psalmo etiam describuntur, v. 13 et 14 : *Circumdederunt me vituli multi, tauri pingues obsederunt me. Aperuerunt super me os suum sicut leo*

rapens et rugiens; v. 17 : *Quoniam circumdederunt me canes multi; concilium malignantium obædit me.* 4º Sitim quâ Christus arsit, et ejus mortem significat versus 16 : *Aruit tanquam testa virtus mea* (seu succus vitalis), et *lingua mea adhæsit faucibus meis; et in pulverem mortis deduxisti me.* 5º Ipsum suppliciorum Christi genus, manus scilicet ejus et pedes transfigendi, atque ossa è suo loco movenda et dinumeranda exprimuntur v. 17 et 18 : *Foderunt manus meas et pedes meos* (hebraicè כַּאֲרִי יָדַי וְרַגְלַי *caari iadai veraglai*; vel potius כַּאֲרִי כַּאֲרִי *caarou aut carou*); *dinumeraverunt ossa mea.*

Advertendum autem circa vocem *foderunt*, duplicem esse Hebræis eò loci lectionem. Kimchius, Aben Ezra, Salomon Jarchi, qui duodecimo seculo floruerunt, et alii deinceps Rabbini legendum censent כַּאֲרִי *caari*, quam vocem interpretantur *sicut leo*, supplentes *circumdederunt*, aut aliud simile, juxta ac si dictum esset : Impii circumdederunt sicut leo manus meas et pedes meos. Annotat verò R. Jacob ben Chajim Massoræ restaurator, se in quorundam correctorum exemplarium textu legisse כַּאֲרִי *caarou*, id est *foderunt*, et in margine כַּאֲרִי *caari*. Massorethæ qui undecimo seculo videntur scripsisse, utriusque lectionis mentionem faciunt. Ili lectionem *caari* quam deinceps Rabbini secuti sunt, ut germanam approbant, etsi sensu diverso, ut deinceps dicemus. Nihilominus tamen in iis quibus utebantur exemplaribus scriptum fuisse כַּאֲרִי *caarou* ex eorum deserto testimonio compertum est. Scilicet in Massorâ marginali ad Num. 24, v. 9, ubi extat vox *caari*, observantes quater in Bibliis occurrere vocabulum illud *caari* atque in Massorâ textuali ibidem inter illa quatuor *caari* hoc ipsum de quo agimus recensentes, expressis verbis ac simpliciter tradunt esse scriptum כַּאֲרִי *caarou*. De hac voce variare exemplaria, non dissimulant etiam modò laudati Kimchius, Aben Ezra et Salomon Jarchi. Adde Rabbini Joannem Isaacum ad fidem christianam conversum, lib. 2 contra Lindan Andradium Defens. concil. Trid. lib. 4. Galatin. de Arcanis cathol. verit. lib. 8, cap. 17. Buxtorfium Vind. lib. 2, cap. 8. Martianæum in Defens. contra Simonium, et (1) alios testari se vidisse exemplaria in quibus habebatur *caarou*.

His observatis, dico 1º, hic legendum esse כַּאֲרִי *caarou*, *foderunt*. Nam qui fieri potuit ut

(1) Vide apud Calm. et in Dissert. circa hunc locum Psalmi 21.

Massorethæ in exemplaribus suis invenerint simpliciter scriptum *caarou* quæ vox Judæis adeò adversatur? quid causæ fuit cur deinde in quibusdam libris seculo duodecimo idem legerint RR. Kimchius, Aben Ezra et Jarchi? quomodo in nonnullis exemplaribus correctis vox Hebræis tam invisâ à R. Jacob ben Chajim et ab aliis modò citatis reperta est, nisi quia olim in textu primigenio sic legebatur? Is locus fuerit à Judæis de industriâ adulteratus neene, parùm interest. Non nescio potuisse amanpensium vitio in exemplaribus quibusdam unum vocabulum in aliud mutari, scribendo, *jod*, pro *vau*, quod propter litterarum similitudinem facile est, et aliis in locis contingit. At sanè ex adducto Massoretharum testimonio planum est ante eorum ætatem in textum non irrepsisse *caari*, nec temerè nobis suspicari videmur eos ad ejusmodi depravationem plurimum contulisse, dùm pro arbitrio statuerunt legendum esse *caari*, nec tametsi habebatur scriptum *caarou*. Quidquid sit, lectionem causæ suæ magis faventem tanto studio amplexi sunt Judæi, ut ad alteram in impressis Bibliis Rabbinicis omittendam ipsos bibliopolas christianos metu damni adegerint. Verùm quamdiu adducta Massoretharum aliorumque testimonia supererunt, tamdiu ex ipsis Judæorum monumentis æquus arbiter judicabit eos recentiori et vitiatæ lectioni adhærere.

Huic argumento quod ipsum subministrat Rabbiorum testimonium, tres alias adjicio rationes, quæ simul junctæ vim demonstrationis obtinent. Prima ex eo petitur, quòd si legas cum Rabbiniis *caari*, et interpreteris *sicut leo*, nullus ex hoc versiculo probabilis et idoneus sensus exculpi possit. Frustra enim cum Kimchio et Aben Ezra subaudiunt Rabbini, *circumdederunt*. Nusquàm leo dictus est circumdare manus et pedes alicujus, nec quidquam ridiculum magis fabulâ quàm ad reddendam absonæ hujusce locutionis rationem, fingit Kimchius. Is narrat leonem inter venandum solere caudâ suâ longum circulum describere, extra quem belluæ excurrere nequeunt; quapropter, inquit, terrore constrictæ acervatim conglomerantur, ac pedibus sub ventre collectis immotæ remanent leonisque præda fiunt. Sic, ut falsam lectionem defendat, adhuc absurdiora excogitare cogitur. Ergo absona est oratio à Rabbiniis prophetæ hîc afficta, *sicut leo manus meas et pedes meos circumdederunt*. Præterea, idcirco vocem *circumdederunt* subaudiendam illi docent, quia in versu præ-

cedenti, cui istum conjungunt, ea invenitur; at versu præcedenti habetur vocabulum *sebabouni*, *circumdederunt me*, quod proinde totum v. 18 suppleri deberet; unde ridicula isti exurgeret sententia: *Circumdederunt me, sicut leo, manus meas et pedes meos*. Nullum igitur sensum probabilem et congruum lectio Rabbiorum exhibet, proindeque, etc. Altera ratio est, apud SS. Patres qui cum Judæis disputârunt (ii autem sunt multi) aut qui textum hebræum accuratiùs recognoverunt, ut Origenes et S. Hieronymus, nullum deprehendi vestigium lectionis à Judæis nunc usurpatæ. Nempe non modò ab iis legitur *foderunt*, si Tertullianum excipias, qui aliquando *foderunt* (1), aliquando *exterminaverunt* (2), sensu eodem servato, legit; sed et nusquàm vel minimùm ab illis indigitatum est aliam Judæis hîc fuisse lectionem, quamvis non soleant ejusdem generis exceptiones à Judæis adhibitas silentio prætermittere, eosque non rarò falsi accusent (3). Tertia est, septuaginta Seniores qui diu ante natam quæstionem scripserunt, Syrum interpretem qui versùs tempora apostolica floruit, Aquilam ipsum qui in gratiam Judæorum versionem suam adornavit, Origenem rerum ejusmodi indagatorem peritissimum et studiosissimum, S. Hieronymum qui Judæo in addiscendis hebræis litteris magistro usus Biblia ad fidem hebræorum codicum summâ curâ transtulit, ipsumque Theodorum Mopsuestenum qui totum Psalmum de Davide explicat, legisse *caarou*, et vertisse *foderunt*, uno Aquilâ excepto qui eandem vocem reddidit per *ἡσυχῶναι*, *fœdârunt*. Adde Symmachum et Theodotionem procul dubio legisse similiter; si enim legissent *sicut leo*, Patres qui adversùs Judæos scripserunt tanti momenti discrepantiam non siluissent.

Immeritò opponeres à Paraphraste chaldæo lectum esse *caari* cum versiculum ita explicet: *Congregatio malignorum circumdedit me mordentes sicut leo manus meas*, etc. Præterquàm quòd enim in polyglottis Complutensibus et Antuerpiensibus omittuntur hæ voces *sicut leo*, neque aliundè compertum sit quo tempore scripserit is Targumista; ex illo textu videtur potius col-

(1) Lib. adversùs Jud. cap. 8, 10 et 15.

(2) Ibid. cap. 10, et L. 3 contra Marcion. cap. 19. Item L. de resur. carn. cap. 20.

(3) S. Justin. Dial. cum Tryph.; S. Iren. L. 3 de Hæres. cap. 24, et lib. 4, cap. 25; Orig. lib. 1 contra Cels. et homil. 12 in Jerem.; S. Epiphan. de ponder. et mensur. cap. 15 et 16 et alii.

ligi paraphrastem legisse *caarou* quod exposuerit *momorderunt*, vel *mordentes*; addidisse verò, *sicut leo*, furoris impiorum exprimendi causâ.

Certum ergo maneat in textu primogenito lectum fuisse *caarou* quod propriè reddendum est *foderunt*, nec nisi versùs undecim seculum lectionem alteram adhiberi cœpisse.

At fortè inquires, כָּאָרִי *caarou* nihil significat : nam ut esset præteritum verbi כָּרָה *cara fodere*, deberet scribi כָּרָר *carou* sine אַ *aleph*; ergo. Resp. in hoc difficultatem esse nullam; concedunt enim omnes litteram *aleph* epentheticè seu supra numerum additam deprehendi in pluribus Scripturæ locis, quorum longam enumerationem ipsi Judæi texunt in Massorâ magnâ.

Dico 2º, etiamsi hic legendum esset כָּאָרִי *caari*, non tamen hanc vocem ibi significaturam *sicut leo*, sed potius *fodientes* vel *fossore*s, quasi dictum esset *fodientes manus meas et pedes meos*, vel *fossore*s *manuum mearum*, etc (1). Hanc observationem ipsi Massorethæ indignant, dùm monent in Massorâ marginali ad hunc locum, כָּאָרִי *caari* cum punto *camets* duobus locis reperiri in duplici diversâ significatione, et in Massorâ textuali ad Num. 24, v. 9, addunt duo ejusmodi loca esse Isaïæ 38, v. 15, et Psalm. 22, v. 17. Itaque *caari* ex Massorethis aliter Psal. 22 (nobis 21), aliter Isaïæ 38, sumitur. Sed Isaï. 38 certissimum est illam vocem esse vertendam *sicut leo*; ergo Psalm. 21, juxtâ Massorethas, *caari* non significat *sicut leo*. Atque id quidem, positâ istâ lectione, non temerè à Massorethis esse dictum patet ex ipsâ rerum in hoc Psalmi versiculo expressarum naturâ; quæ ejus modi est, ut nullus, quod modo ostendimus, probabilis sensus ex interpretatione Rabbiorum erui possit.

Quam igitur, inquires, aliam posset *caari* induere significationem? Responsio impromptu est, quippè nòrunt hebraicè vel tantillum periti כָּאָרִים esse verbi כָּרָה *cara fodere*, participium præsens plurale, vel etiam esse nomen verbale ex hoc participio formatum; nòrunt quoque nomina hebræa pluralia quæ in *im* ם terminantur, in constructione seu syntaxi ם *mem* finale amittere. Nihil igitur vetat quominùs כָּאָרִי יָדֵי *caari iadai*, *caari*, dempto scilicet *mem* finali, hic interpretemur *fossore*s *manuum* seu *fodientes* manus. Imò tum ratio allata, tum Massoretharum auctoritas hanc

(1) Vide Morin in append. de locis Hebræi textus restitutis, cap. 4, et Augustum Pfeiffer in Dissert. de voce *Kari*, etc.

vocem alio sensu eò loci explicari non sinerent.

Cæterùm istud, quod secundo loco addidimus, ad cumulum dictum sit: nulli enim dubitamus quin legendum sit *caarou*, ut probatum est. Atque ex his liquidum fit laudato versu 18 Psalm. 21 præcipuam necis Christi circumstantiam, ipsumque mortis ejus genus perspicuè à Davide fuisse descripta.

6º Versu ejusdem Psalmi 19, Propheta exprimit Christum esse vestibus spoliandum, in cruce irridendum, ac vestimenta ejus, ut hominis extincti, dividenda inter milites, et super vestem ejus sortem mittendam. *Ipsi verò*, inquit Psaltes regius, in personâ Christi, *consideraverunt et inspexerunt me; diviserunt sibi vestimenta mea, et super vestem meam miserunt sortem*. Confer. Matth. 27, v. 35, et Jo an. 19, v. 23 et 24.

7º In reliquo Psalmo Christus *fratribus* suis nomen Domini *narraturus*, Deumque *in medio Ecclesiæ laudaturus*, ac proinde resurrecturus prænuntiatur, atque universos fines terræ ad Dominum conversurus. Sed de hoc argumento inferiùs. Hactenùs ostensum est insigniores Christi passionis circumstantias in Psalmo 21 descriptas haberi, quod primum susceperamus demonstrandum.

Alterum porrò, nempe eundem Psalmum de solo Christo posse intelligi, perinde evincitur. Nam si Psalmus ille de Christo, in quem tam benè quadrat, ad litteram non accipiatur, vel explicandus erit de Davide, ut Aben-Ezra, Jarchius et ante eos Theodorus Mopsuestenus seculi quinti hæreticus, alique nonnulli exponunt, vel de populo Israelitico in præsentī captivitate constituto, ut Kimchius censet, vel de Esthere et Israelitis ætate ejus in exilio versantibus, ut quidam opinati sunt Judæi apud Hieronymiastrum et eundem Kimchium. Atqui omnes illæ interpretationes falsæ sunt.

Et quidem expositio quæ Psalmum 21 transfert ad Davidem refellitur 1º ex versu 18 : *Foderunt manus meas et pedes meos, dinumeraverunt omnia ossa mea*; quæ profectò Davidi attribui non possunt siquidem David seu à Saùle, seu ab Absalomo exagitatus, nunquàm in potestate hostium fuit, nec talia passus est. At inquit subtiliter Theodorus Mopsuestenus in 4 collatione concilii V generalis relatus, hæc metaphoricè accipienda sunt, et sensus est : *Omnia perscrutabantur, et quæ agebam et quæ conabar.... Totius meæ fortitudinis et totius meæ substantiæ defensores facti sunt, ut etiam numero mea subicerent*. Verùm metaphoram ita duram, fodere

videlicet manus et pedes et dinumerare ossa idem esse ac inquirere de operibus alicujus et bona ejus calculo subjicere, Psalti Regio adscribi quis ferat? Nullum sanè seu in Bibliis, seu in quovis auctore, locutionis ejusmodi hyperbolicæ exemplum reperire est. Non diffitemur verbum *fodere* quandoque transferri ad idem quod *scrutari* et *inquirere* significandum (Job. 6, v. 7; Prov. 16, v. 27, etc.), sed tunc voces adjunctæ usu recepto intellectæ metaphoram indicant; contra Psal. 21, v. 18, omnia sensum proprium sonant, nihil nos ad metaphoram ducit; ergo, etc. Refellitur 2º ex versu 19: *Diviserunt sibi vestimenta mea et super vestem meam miserunt sortem*; ubi certè agitur de rebus quæ hyperbolem et metaphoram non sapiunt. Atqui Davidis hostes nec ejus vestimenta inter se diviserunt nec super vestem ejus miserunt sortem. Ipso tempore quo Absalom, Davide fugiente, Jerusalem ingressus res regias invasit, factas fuisse hujus modi partitionem et fortitionem nec legitur, nec ullo pacto verisimile est. Imò nolunt Rabbini (1) licuisse privato uti ullo eorum quibus rex usus fuerat, ergò, etc. Refellitur 3º ex vers. 20, 21, 22 et 23, in quibus is cujus passio et mors antea fuerant descriptæ, perspicuè significatur resurrexurus.

Refellitur 4º ex versibus 29, 30, 31, etc., ubi non ambiguè sermo fit de *universis finibus terræ* ad Deum convertendis, de *universis familiis gentium* eum adoraturis ejusque imperio sese subjecturis, de *generatione venturâ* Domino accensendâ, et *populo nascituro quem fecit Dominus*; quæ omnia Christo Domino egregiè competunt; nam nihil horum, inquit Theodoretus hic, *Davidi accidisse videmus..... Solus autem Dominus Christus, qui ex Davide formam servi accepit, omnem terram ac mare divinâ cognitione implevit.*

Dices. David, v. 1 et 2, sic habet: *Deus, Deus meus, respice in me, quare me dereliquisti? longè à salute meâ verba delictorum meorum. Deus meus, clamabo per diem, et non exaudies; et nocte, et non ad insipientiam mihi.* Atqui ista non conveniunt Christo, proindeque ostendunt totum Psalmum ipsi abjudicandum. Nam 1º, tanta derelictio in Christum prout à Christianis colitur, cadere non potuit. 2º Christus, utpotè ob omni noxâ immunis, dicere non potuit: *Longè à salute meâ verba delictorum*

meorum. 3º Si Christus est homo Deus, Dei et hominum et mediator, dici non potest clamare ad Deum et non exaudiri; ergo, etc.

Nego min. Ista enim in Christum secundum carnem spectatum quadrant aptissimè, atque ipsi in novo Testamento et secundum fidem christianam tribuuntur. Ad primam probat. minoris, nego antecedens. Deus dicendus est Christum pro parte carnis dereliquisse, quatenus eum pro nobis æterno supplicio aliàs addicendis, tot tormenta tolerare passus est, posthabitis ejus animæ ut sentientis affectibus. Ad secundam probat. Dist. Christus fuit ab omni noxâ propriâ immunis, concedo; Christus peccata aliena non habuit expianda, nego. Nullum quidem peccatum Christum commisit aut committere potuit, quod et hoc ipso Psalmo v. 2 satis indicare videtur istis verbis: *Et non ad insipientiam mihi*; quasi dictum esset: Clamo, et non exaudior, sed non propter iniquitates proprias, peccatum enim alibi insipientia appellatur. At verò Christo ut sponsori nostro aliena fuere peccata luenda, nimirum peccata hominum, quæ loco nostro expianda voluntariè suscepit. Hinc Isai. 53, v. 29, dicitur *peccata multorum tulisse*, Joan. 1, v. 29, nuncupatur *Agnus Dei qui tollit peccata mundi*. Hinc juxta Apost. 2, Cor. 5, v. 21: *Eum* (Christum) *qui non noverat peccatum, pro nobis* (Deus) *peccatum fecit, ut nos efficeremur justitia Dei in ipso*: et Gal. 3, v. 13: *Christus redemit nos de maledicto legis, factus pro nobis maledictum*. Ergo tantum abest ut in textu objecto quidquam nostræ in Christum fidei adversum contineatur, ut potius ibi fundamentalis articulus doctrinæ christianæ adumbretur. Cæterum verba objecta: *Longè à salute meâ verba delictorum meorum*, ex 70 Interpretibus, ad quorum fidem nostra Psalmorum vulgata versio edita est, desumuntur, hebræa ad litteram habent: *Longè à salute meâ verba rugitus seu clamoris mei*. Ad tertiam probat. distinguo etiam: non potest clamare ad Deum, desideriiis animæ suæ ut intelligentis et absolutis, concedo; desideriiis conditionalibus et affectibus animæ suæ ut sentientis, nego. Itaque anima Christi nostræ similis quantum ad essentiam, absque peccato, spectari potest vel ut intelligens, vel ut sentiens. Cum dicit: *Clamabo et non exaudies, intelligendus est*, inquit S. Thomas, 3, p., q. 4, art. 4, *quantum ad affectum sensualitatis* (seu animæ suæ ut sentientis), *quæ mortem refugiebat*. Nempè Christus ut nostras induceret infirmitates, voluit, cum passus est, terroribus et

(1) Maimon. in Halacâ Melakim, et Bechai in Parasch-Schoph. Vide Ferrant. in argum. Psalmi 21.

aliis affectibus sensibilibus, sine ullâ tamen deordinatione, concuti, quos affectus Deus non exaudivit. At verò, pergit ibid. S. doctor, *exauditur tamen quantum ad affectum rationis*, id est, quantum ad preces seu affectus ab animâ suâ ut intellectuali elicitos, ubi scilicet ejusmodi affectus absoluti sunt; sed ista alibi exponuntur uberius. Duplex illud affectuum et orationum Christi genus ipso quem expendimus Psalmo prænuntiatur. De affectibus namque et desideriis sensitivis agitur v. 2 objecto; de altero autem orationis genere sermo sit versibus 20 et seq. præsertim v. 25: *Nec avertit faciem suam à me, et cum clamarem ad eum exaudivit me*. Porro in Evangelio prædictioni eventus respondet. Luc. 22, v. 42, Christus orabat dicens: *Pater, si vis, transfer calicem istum à me*, quæ oratio ab affectu sensitivo procedebat, nec fuit exaudita; Joan. verò 11, v. 42, commemoratur orationis species quæ semper exauditur: *Pater.... sciebam quia semper me audis*, inquit Christus, et Apost. Hebr. 5, v. 7: *Exauditus est (Christus) pro suâ reverentiâ*; ergò, etc.

Probatur 3^o conclusio ex aliis compluribus vaticiniis quibus Christi passio et variæ illius circumstantiæ prædicuntur. Nam prædixerunt Prophetæ 1^o, futurum ut reges gentium, Judæorum principes, consilium adversus Christum inirent. Psal. 2, v. 2: *Astiterunt reges terræ et principes convenerunt in unum adversus Dominum et adversus Christum ejus*. Quæ non modò ad persecutiones contra Christi discipulos et Ecclesiam concitandas, sed etiam ad tempus ejus mortis ex parte referri debent. Et Psal. 34, v. 15: *Adversum me lætati sunt et convenerunt*. 2^o Prædixerunt Messiam ab amico et familiari inimicis suis tradendum. Psal. 40, v. 10: *Etenim*, inquit David figuram Christi gerens, *homo pacis meæ, in quo speravi, qui edebat panes meos, magnificavit super me supplantationem*. Psal. 54, v. 13: *Si inimicus meus maledixisset mihi, sustinuissem utique... Tu verò homo unanims, dux meus et notus meus*, etc. Ad hæc is Messiae proditor miserè periturus prænuntiatus est. Psal. 108, v. 5: *Fiant dies ejus pauci, et episcopatum ejus accipiat alter*, quem locum de Judâ proditore intelligit S. Petrus, Act. 1, v. 20. 3^o Prædictus est Messias vendendus, et quidem triginta argenteis Zachar. 11, v. 12: *Appenderunt mercedem meam triginta argenteos*. Ibid. v. 13, hæc pecunia in templum Domini ad statuarium, id est quâ emeretur ager figulli, referenda et projicienda præsignificatur.

Hæc porro in Christo evenisse testis est S. Matthæus cap. 26, v. 15, et cap. 27, ubi versibus 9 et 10 hæc applicantur laudata Zachariæ verba. 4^o Prædictus est comprehendendus ab inimicis. Psal. 58, v. 2: *Eripe me de operantibus iniquitatem; et de viris sanguinum salva me*. Quia ecce ceperunt animam meam, irruerunt in me fortes. Psal. 70, v. 10 et 11: *Concilium fecerunt in unum, dicentes: Deus dereliquit eum, persequimini et comprehendite eum, quia non est qui eripiat*. 5^o Et à discipulis deserendus. Psal. 68, v. 9: *Extraneus factus sum fratribus meis et peregrinus filiis matris meæ*; et v. 21: *Sustinui quid simul contristaretur, et non fuit; et qui consolaretur, et non inveni*. Similia habentur Psal. 87, v. 9 et 19, Psal. 141, v. 5; Isai. 63, v. 5 et Zach. 13, v. 7, ubi dicitur: *Framea suscitare super pastorem meum, et super virum cohærentem mihi, dicit Dominus exercituum; percutite Pastorem, et dispergentur oves*, etc. Quod de Messia R. Aben Ezra explicat, et ad seipsum Christus refert Matth. 26, v. 31. 6^o A falsis testibus accusandus. Psal. 26, v. 12: *Insurrexerunt in me testes iniqui, et mentita est iniquitas sibi*. Psal. 40, v. 9: *Verbum iniquum constituerunt adversum me*. Psal. 63, v. 5: *Exercuerunt ut gladium linguas suas.... firma-verunt sibi sermonem nequam*. Omitto similia Psal. 108, v. 1 et seqq., et Psal. 139, v. 3. 7^o Contumeliis afficiendus. Psal. 34, v. 16: *Tentaverunt me, subsannaverunt me subsannatione, frenduerunt super me dentibus suis*. Psal. 68, v. 8: *Quoniam propter te sustinui opprobrium, operuit confusio faciem meam*; et v. 13: *Adversum me loquebantur qui sedebant in porta, et in me psallebant qui bibebant vinum*. 8^o Conspuendus, cædendus, opprobriis saturandus. Isai. 50, v. 6: *Corpus meum dedi percutientibus, et genas meas vellentibus; faciem meam non averti ab increpantibus et conspuentibus in me*; cap. 52, v. 14: *Inglorius erit inter viros aspectus ejus, et forma ejus inter filios hominum*. Psal. 68, v. 27: *Quoniam quem tu percussisti, persecuti sunt; et super vulnera dolorum meorum addiderunt*. Thren. 3, v. 30: *Dabit percutienti maxillam, saturabitur opprobriis*. 9^o Inter contemptus et tormenta taciturus. Præter expressam antea adductam Prophetiam Isaiaë 55, v. 7, hæc ex Psalmo 37, v. 14 et 15 habemus: *Ego autem tanquam surdus non audiebam, et sicut mutus non aperiens os suum, et non habens in ore suo redargutiones*. 10^o Capitis damnandus. Psal. 95, v. 21: *Captabunt in animam justi, et sanguinem innocentem condemnabunt*. Jerem. insignis Christi typus

cap. 11, v. 19 : *Ego quasi agnus mansuetus, qui portatur ad victimam; et non cognovi quia cogitaverunt super me consilia, dicentes: Mittamus lignum in panem ejus, et credamus eum de terrâ viventium, et nomen ejus non nemoretur amplius.* Non omittendum est istud libri Sapientiæ fatentibus Judæis ante Christum exarati cap. 2, v. 18 : *Si est verus filius Dei, suscipiet illum et liberabit eum de manibus contrariorum. Contumeliâ et tormento interrogemus eum, ut sciamus reverentiam ejus et patientiam illius; mortē turpissimâ condemnemus eum.* 11° Pro persecutoribus et transgressoribus oraturus, etc. Psal. 103, v. 4 : *Detrahebant mihi, ego autem orabam* Isai. 53, v. ult. : *Et pro transgressoribus rogavit.* 12° Cruci inter iniquos affigendus. Præter versum 17 Psalmi 21 jam speciatim explicati : *Foderunt manus meas*, etc., legitur Zachar. 12, v. 10 : *Aspicient ad me quem confixerunt.* Jam laudavimus illud Isaïæ 53, v. 12 : *Tradidit in mortem animam suam, et cum sceleratis reputatus est.* Porro crux Messiae videtur insigniter adumbrata apud Ezech. cap. 9, v. 4 et seqq. eum Deus piorum frontes signari jubet litterâ *Thau*, atque interficiendos decernit quotquot illo signo carerent. Nempe littera *Thau* juxta veterem usum ad Ezechielem usque figuram crucis gerebat. Hâc igitur Ezechielis visione significatum est neminem salvari, nisi crucis Christi virtus ipsi applicetur. Vide Huet. propos. 9, cap. 127, n. 4, et rursus cap. 170, ubi varios refert typos huc pertinentes; nempe Isaaci, agni paschalis, serpentis ænæi, etc. Vaticiniis ad Christi crucifixionem attinentibus quidam annumerant versum 10 Psalmi 95, ubi juxta nonnullos veteres codices græcos et latinos legitur : *Dicitur in gentibus, quia Dominus regnavit à ligno.* Atque hunc locum ita exhibent vetustissimi Patres, S. Justinus, qui conqueritur has voces à ligno esse à Judæis deletas; Tertull. lib. adversus Judæos, cap. 11 et 13, et lib. 3 contra Marcionem, cap. 24; Arnobius, Lactantius, S. Augustinus, Cassiodorus, etc. Sed tamen, inquit Huetius cap. 127 mox citato n. 8 : « Cum tale nihil extet vel in exemplis plaribus hebraicis, vel in Targum, vel in interpretibus exoticis; neque ea agnoscant Symmachus, aut Theodoretus, aut alii, nolum in hoc testimonio causæ nostræ firmiter collocabimus. In quo quàm bonâ fide, quàm sincere agamus, adversarii nostri possunt agnoscere. » 13° Messias prædictus est felle et aceto potandus. Psal. 68, v. 22 : *Et dederunt in escam meam fel, et in siti meâ*

potaverunt me aceto. 14° Vates sacri Messiam necandum præsignificaverunt. Eò enim pertinent non tantum laudata jam Isaïæ (capite 53) et Davidis (Psalmô 21) testimonia, sed et alia multa, quæ apud Prophetas passim occurrunt. Psal. 7, David Messiae personam sustinens, ait : *Dolores inferni circumdederunt me, præoccupaverunt me laquei mortis.* Psal. 86, v. 5 et 6 : *Factus sum sicut homo sine adjutorio inter mortuos liber, sicut vulnerati dormientes in sepulchris.* Daniel. 9, v. 26 : *Et post hebdomades sexaginta duas occidetur Christus.* Zach. 12, v. 10 : *Et dolebunt super eum sicut dolore solet in mortē primogeniti.* Et cap. 13, v. 7 : *Framea suscitare super pastorem meum, et super virum coherentem mihi, dicit Dominus exercitum; percutite pastorem, etc.* Horum et similium oraculorum vim agnoscens R. Simeon ben Jochai magnæ apud Judæos auctoritatis scribit Deum propter hominum peccata missurum esse Filium suum humano corpore indutum, homines verò præceptis ejus rebelles hunc esse morti tradituros.

Accedunt varii typi et figuræ Christi, quibus mors ejus adumbrata est. Tales fuere 1° oblatio Isaaci et immolatio arietis in ejus locum suffecti Genes. 22, v. 9, 13. 2° Agni paschalis matetatio Exodi 12. 3° Mors pontificis, quam expectare tenebantur homicidæ involuntari, ut ipsis in terram suam redeundi potestas fieret; Num. 35, v. 25, de quâ figurâ Philo Judæus sermonem faciens in libro de Exulibus, ait : « hunc Pontificem non hominem esse, sed Verbum Dei, non spontanearum solum, sed et involuntariarum noxarum expers; patrem quidem habens Deum, matrem verò sapientiam; » 4° Occisio vaccæ rufæ, è ejus cineribus fiebat aqua expiationis juxta ritum cap. 19 Num. præscriptum; ad hunc typum S. Paulus Hebr. 13, v. 11 et seq. alludit. 5° Hircus emissarius, cujus capiti mala Sacerdotes imponebantur, quique Israelitarum noxis veluti onustus in desertum abigebatur. 6° Omnia denique veteris legis sacrificia, quæ totidem erant figuræ sacrificii cruenti à Messia in cruce offerendi.

15° Demum prænuntiatae sunt circumstantiæ necem Messiae juxta Evangelium subsequutæ. Nimirum quod non frangenda essent ejus crura; id enim præsagiebatur ipsâ lege de non frangendis ossibus agni paschalis Messiam figurantis institutâ, Exod. 12, v. 46, et Num. 9, v. 12. Quod latus ejus esset perfodendum, Zach. 12, v. 10. Quod sepulcrum ejus futurum esset gloriosum, Isai 53, v. 10. Hanc autem Christi

sepulcro gloriam peperit non modò ejus resurrectio de quâ inferius, sed et templum insigne quo illud cinxit Constantinus imperator, ut fusè ab Eusebio narratur in vitâ ejusdem Constantini. Quòd denique anima ejus descensura esset ad inferos, piorum animas solandi et inde educendi causâ : Psal. 67, v. 7 : *Qui educit victos in fortitudine, similiter eos qui exasperant, qui habitant in sepulcris.... Ascendisti in altum, cepisti captivitatem.* Osee. 6, v. 3 : *Vivificabit nos post duos dies, in die tertiâ suscitabit nos, et vivemus in conspectu ejus.* Et cap. 15, v. 14 : *De manu mortis liberabo eos, de morte redimam eos. Ero mors tua, ô mors, et morsus tuus, ô inferne.* Quem locum ad Messiam applicant Judæi in Bereschit Rabba, ubi doctrina de Messiae descensu ad inferos et captivorum liberatione, fidei nostræ consentanea traditur, ut videri potest apud Huetium, prop. 9, cap. 141, n. 3. De Messia quoque intelligunt Judæi caput 9 Zachariæ in quo liberatio de quâ loquimur non obscurè prænuntiatur his verbis, v. 11 : *Tu quoque in sanguine Testamenti tui emisisti victos tuos de lacu in quo non est aqua.*

Dices. Præcipuæ in hâc probatione tertiâ allatæ Prophetiæ ex Psal. 68, hebr. 69, et ex Zachariæ cap. 11, 12 et 15, excerptæ sunt; atqui nec in hoc Psalmo, nec in iis Zachariæ capitibus de Messia agitur. Etenim hæc ipsa verba Psal. 68 : *Dederunt in escam meam fel,* Christo non conveniunt, quippe cui non in escam, sed in potum fel datum est; congruunt verò ad Davidem, siquidem ut advertit Theodorus Mopsuest. in concilio generali V revelatus Davidi Absalomum fugienti cibus et potus instar aceti et fellis præ tristitiâ esse debuerunt. Imò et in Israelitas Babylone captivos integer ille Psalmus etiam quadrat, ut exponunt Targumista et Theodoretus. In laudatis autem cap. 11 et 12 Zachariæ ad ipsa hujus Prophetæ tempora, vel ad Machabæorum ætatem respicitur, et in 15 de falso Prophetâ sermo est; ergo, etc.

Nego minorem. Nam quod ad Psal. 68 attinet, perspicuum est in eo describi tum Christi passionem, tum calamitates quas ob necem Christo illatam passi sunt Judæi, tum legis novæ institutionem. (Vide eâ de re commentarium Ferrandi.) Nec obstat Christo non fuisse datum fel in cibum solidum; quippe *esca* nomen est generale quo potest designari quidquid in alendum et sustentandum sumitur. Præterea fel eatenus in escam dari potest, quatenus ejus succo possunt intici quæ ad alimoniam parata

sunt; ergo, etc. Theodoretus porrò partem Psalmi ad Christum transfert. Ad Judæos verò in Babyloniâ exules Davidem non respexisse probant versiculi complures, in quibus persona singularis propriè pingitur. Quantum ad Zachariam, plura in capitibus citatis occurrunt quæ ad tempora Christi, ad ultimam Jerosolymorum conflagrationem, ad rejectionem et dispersionem populi Judaici solummodò referri possunt, non ad tempora Zachariæ aut Machabæorum. Imò facillimè cuncta Christo Domino accommodantur, si Jerusalem de quâ nonnullis in versiculis ibi agitur, de Ecclesiâ Christi intelligamus, quod antecedentium et consequentium connexio et series exigere videntur. Volunt Rupertus et alii versus 3, 4, 5 et 6 capitis 15, in quibus Prophetam à patre suo et matre suâ confixum Zacharias describit esse intelligendos de Christo, quem populus Judaicus et Synagoga cruci affixerunt ut falsum prophetam. Sed potius ibi exprimitur pseudopropheta à Christi regno, nempe ex Ecclesiæ sinu ejiciendos. Quidquid sit, versus 7, quem adduximus : *Framea suscitare super Pastorem meum,* etc., necnon reliquum caput, manifestè ad Christum spectant.

Cæterum, etsi de Zachariæ aut Machabæorum ætate in ejusmodi capitibus sermo fieret, nihilo tamen minùs quæ ex illis excerpta Christo accommodavimus in ipsum ad litteram caderent. Scilicet cum Messias esset Prophetarum spes et expectatio, totâ lege prænuntiaretur cujus erat unicus finis, nullum ipsius exprimiendi locum sacri vates prætermittere debuerunt. *Is opportunè à Prophetis,* inquit Bossuetius, *semper exprimebatur, ad quem cuncta oracula et universa lex tendebant.* Hinc in sermonibus de aliquâ Christi figurâ institutis nonnulla immiscere solent Prophetæ, quæ ad ipsum Christum immediatè pertinent, orationem à typo, ut aiunt, ad veritatem transferentes quòd tunc fieri præsertim dignoscitur, ubi ea quæ exprimuntur, in rem, non in typum immediatè quadrant. Itaque cum versiculi Zachariæ in tertiâ probatione adducti ad alium quàm ad Christum juxta litteram referri nequeant, sequeretur illos esse de ipso intelligendos, etsi, quod nullo modo concedimus, capita ex quibus excerpti sunt ad eum majori ex parte directè non spectarent.

§ 4. De vaticiniis quibus resurrectio et ascensio Messiae, necnon Spiritus sancti diffusio praedictae sunt.

CONCLUSIO. Quæ de Christi resurrectione et ascensione, ac Spiritus sancti diffusionem in Evangelio et in Actibus Apostolorum narrantur, ea à Prophetis præsignificata fuerant.

Prob. Nam 1°, quod ad resurrectionem attinet, notissimus est ejus typus in mirâ Jonæ ab aquis post diem tertium liberatione. Prædicatur insuper resurrectio Christi Psal. 15, v. 9 et seq.: *Caro mea requiescet in spe, quoniam non derelinques animam in inferno, nec dabis sanctum tuum videre corruptionem. Notas mihi fecistis vias vitæ; adimplebis me lætitiâ cum vultu tuo, delectationes in dexterâ tuâ usque in finem.* Circa quem locum legenda est concio S. Petri Act. 2, v. 26 et seq., in quâ certò probat Apostolorum princeps istud vaticinium de Davide intelligi non posse, sed de uno Jesu Christo quem Deus suscitavit à mortuis. Idem argumentum urget S. Paulus Act. 13, v. 35 et seq.; et certè quisnam esse potest ille Sanctus Dei, corruptionem non visurus, nisi is ipse quem Daniel cap. 9, v. 24, *Sanctum sanctorum* appellavit? cuinam *delectationes in dexterâ Dei* promissas esse dicas, nisi cui Deus dicit Psal. 109, v. 1: *Sede à dextris meis?* Ipsi Judæi in Midrach Thehillim Messiam hic præsignatum agnoscunt, ut et auctor libri qui inscribitur *Anima sapientis*. Ad idem mysterium pertinet etiam laudatus jam versiculus 10 capitis 11 Isaïæ: *Ipsam gentes deprecabuntur et erit sepulcrum ejus gloriosum.*

2° Ascensum Christi in cælum, ejusque in Patris dexterâ sessionem multis in locis Psaltes Regius prænuntiat. Psal. 15, v. ult.: *Adimplebis me lætitiâ cum vultu tuo, delectationes in dexterâ tuâ usque in finem.* Psal. 23, v. 7: *Elevamini portæ æternales, et introibit rex gloriæ.* Psal. 46, v. 6: *Ascendit Deus in jubilo, et Dominus in voce tubæ.* Psal. 47, v. 19: *Ascendisti in altum, cepisti captivitatem;* et v. 34: *Psallite Deo, quia ascendit super cælum cæli ad orientem.* Psal. 109, v. 1: *Dixit Dominus Domino meo: Sede à dextris meis.* Succinit Daniel, cap. 7, v. 13 et 14: *Ecce cum nubibus cæli quasi filius hominis veniebat, et usque ad antiquum dierum pervenit; et in conspectu ejus obtulerunt eum, et dedit ei potestatem et honorem et regnum; et omnes populi, tribus et linguæ ipsi servient; potestas ejus, potestas æterna,* etc.

3° Spiritum sanctum Messiae beneficio diffundendum legimus apud Ezech. 36, v. 26 et 27: *Et dabo vobis cor novum, et spiritum novum*

ponam in medio vestri, et auferam cor lapideum de carne vestra, et dabo vobis cor carneum, et Spiritum meum ponam in medio vestri. Et apud Joel. 2, v. 28 et 29: *Effundam spiritum meum super omnem carnem, et prophetabunt filii vestri,* etc.; *sed et super servos meos et ancillas in diebus illis effundam Spiritum meum.* Quæ prophetia in die Pentecostes Act. 2, v. 16 et seq. effectum sortita est, eamque ad tempora Messiae referendam patet tum ex his verbis Joelis citato cap. v. 32: *In monte Sion et in Jerusalem erit salvatio;* tum quia ibi agitur de diffusionem Spiritus sancti mirum in modum singulari; tum quia consentientes habemus Rabbinos Saadium Gaonem in lib. fidei, Machir in Pulvere aromatico, aliosque celeberrimos. Eodem spectat Zacharias cap. 12, v. 10: *Effundam super domum David et super habitatores Jerusalem spiritum gratiæ, et precum, et aspicient ad me quem confixerunt. Et plangent eum,* etc. Similia videre est apud Isaïam cap. 44, v. 5, et cap. 59, v. 21, etc.

Quæ à Judæis in historiam evangelicam de resurrectione et ascensione Domini opponi possunt, eadem à gentilibus et ab incredulis obijciuntur, atque infra aptius diluentur, ubi ejusmodi historiæ demonstrabitur certitudo.

§ 5. De sacerdotio, meditatione, Prophetæ titulo, divinitate et variis dotibus personæ Christi secundum Prophetas et novum Testamentum competentibus.

CONCLUSIO. Messias ex utroque Instrumento sacerdos, hostia, Salvator et Redemptor hominum, Justus et Justitia, Sanctus Dei, Propheta major Moyse, Homo, Deus.

Probatur per partes. 1° Ex utroque Instrumento Messias est Sacerdos, et quidem novi et præcellentis ordinis Psal. 109, v. 4: *Juravit Dominus, et non pœnitebit eum: Tu es sacerdos in æternum, secundum ordinem Melchisedech.* Hunc autem Psalmum de solo Messia posse explicari evidentissimum est et à Judæis olim receptum. Vide Hue ium, prop. 7. n. 14, ubi crudité et accuratè de hoc argumento disserit. Observa autem cum Apost. Heb. 7, eò loci Christum 1° cum jurejurando institui sacerdotem; 2° sacerdotem in æternum; 3° sacerdotem non secundum ordinem Aaron, sed secundum ordinem Melchisedech, qui eximius fuit Christi Domini typus. Et verò, cum Christus juxta Prophetas ex tribu Juda et ex Davide esset nasciturus, non poterat esse sacerdos leviticus et secundum Aaronis ordinem. Novi igi-

tur et præcellentis instituti sacerdos in æternum debuit esse Messias juxta prophetiam Davidis. Id porro impletum est in Christo Jesu. *Hic*, inquit Apost. mox citato capite 7 Epist. ad Heb. v. 24 et seq., eò quod maneat in æternum, sempiternum habet sacerdotium..... Talis enim decebat ut nobis esset pontifex, sanctus, innocens,.... qui non habet necessitatem quotidie quemadmodum sacerdotes, prius pro suis delictis hostias offerre, deinde pro populi; hoc enim fecit semel seipsum offerendo. Lex enim homines constituit sacerdotes infirmitatem habentes; sermo autem jurisjurandi, qui post legem est; Filium in æternum perfectum; cap. 9, v. 12: *Per proprium sanguinem introivit semel in sanctu*; et cap. 10, v. 12: *Unam pro peccatis offerens hostiam, in sempiternum sedet in dexterâ Dei*. Similia habentur passim in hac Epistolâ. Ad sacerdotium Christi referri etiam potest istud Psalmi 54, quem de Messia Christiani et Judæi summâ consensione exponunt: *Unxit te, Deus, Deus tuus, oleo lætitiæ præ participibus tuis*. Nam apud Hebræos triplex personarum genus ungebatur, reges, sacerdotes, et prophetæ; quæ triplex unctio Christo Domino affrenda: siquidem sacerdos fuit, ut modò diximus, eum verò Prophetam et regem fuisse mox aperiemus.

2º. Messias juxta Prophetas et novum instrumentum est oblatio, victima, Redemptor hominum, Mediator, Salvator. Job. 49, v. 25: *Scio quòd redemptor meus vixit, et in novissimo die de terrâ surrecturus sum*. Isai. 45, v. 8: *Rorate, cæli desuper, et nubes pluant justum, aperiatur terra, et germinet salvatorem*. Quo in loco liquidum est Prophetam à Cyro, de quo versibus antecedentibus locutus fuerat, ad Messiam sermonem transtulisse. Ibid. cap. 49, v. 6: *Dedi te in lucem gentium, ut sit salus mea ad ultimum terræ*. cap. 53, v. 5 et seq.: *Attritus est propter scelera nostra..... et livore ejus sanati sumus..... Oblatus est quia ipse voluit..... et iniquitates eorum ipse portabit..... Peccata multorum tulit, et pro transgressoribus rogavit*. Adde alia innumera testimonia in quibus Messias ab Isaiâ dicitur Salvator, Redemptor, Liberator, etc. Zach. 9, v. 11. *Tu quoque in sanguine testamenti emisisti vinctos tuos de lacu in quo non est aqua*. Ubi Messiam significari tradunt Talmudistæ et R. Salomo Jarchi. His porro respondent quàm plurima novi Testamenti loca. Luc. 1, v. 68: *Fecit redemptionem plebis sue*. Matth. 26, v. 28: *Hic est sanguis meus novi Testamenti, qui pro multis effundetur in remissionem peccatorum*. Similia leguntur Marc. 14, v. 24; Luc. 22, v. 20;

et 1 Cor. 11, v. 25 et seq. S. Paulus Rom. 5, v. 9: *Christus, inquit, pro nobis mortuus est;... Justificati in sanguine ipsius, salvi erimus ab ira per ipsum*. Gal. 1, v. 4: *Dedit semetipsum pro peccatis nostris*. 1 Tim. 2, v. 5: *Unus et mediator Dei et hominum, homo Christus Jesus, qui dedit redemptionem semetipsum pro omnibus*. Heb. 10, v. 12, Christus sacerdos dicitur semetipsum pro peccatis obtulisse hostiam, etc.

3º. Messias est pariter justus et justitia, sanctus et electus Dei.

Justus quidem sine addito et *Justitia* nominatur. Isai. 45, v. 8: *Nubes pluant Justum*, cap. 51, v. 5: *Prope est Justus meus*. Jerem. 23, v. 5 et 6: *Suscitabo David germen justum..... et hoc est nomen quod vocabunt eum: Dominus Justus noster*, cap. 53, v. 15: *Germinare faciam David germen justitiæ*. Malach. 2, v. 2: *Orietur vobis timentibus nomen meum Sol justitiæ*. Vide et Isai. 53, v. 11; cap. 62, v. 1 et 2, Zach. 9, v. 9, etc. Jam verò Christus pluries etiam in novo Testamento nomine Justus designatur. Act. 3, v. 14: *Vos autem sanctum et Justum negastis*. Ibid. 7, v. 5: *Occiderunt eos qui prænuntiabant de adventu Justus*. cap. 22, v. 14: *Deus patrum nostrorum præordinavit, etc., ut... videres Justum*. Jacobi 5, v. 6: *Occidistis Justum*, etc. Dicitur etiam *factus justitia*, 1 Cor. 1, v. 3. Messias nuncupatur *Sanctus* per antonomasiam. Psal. 4, v. 4: *Scitote quoniam mirificavit Dominus Sanctum suum*. Psal. 15, v. 10: *Nec dabis Sanctum tuum videre corruptionem*. Isai. 12, v. 6: *Magnus in medio tui Sanctus Israel*. Daniel 9, v. 24: *Ut... ungatur Sanctus sanctorum*. Quibus in novo Testamento coheret ista, Luc. 1, v. 35: *Quod nascetur ex te Sanctum, vocabitur filius Dei*. Act. 3, v. 14: *Vos autem Sanctum et Justum negastis*; et cap. 4, v. 27: *Convenerunt verò in civitate istâ adversus sanctum puerum tuum Jesum quem unxisti, Herodes et Pontius Pilatus, etc.* Apocal. 3, v. 7: *Hæc dicit Sanctus et verus, qui habet clavem David*, etc. Denique Isaiæ 42, v. 1, Messiam Deus appellat *Electum suum* in quo ipse complacet. *Ecce servus meus*, inquit, *suscipiam eum; Electus meus, complacuit sibi in illo anima mea*; quod ad Christum congruit, qui Pater æternus; Matth. 3, v. 17, de cælo ait: *Hic est filius meus in quo mihi complacui*; et 1 Petr. 2, v. 4, Christus dicitur à Deo *electus*. Ergo.

4º. Prophetam non modò Moysi similem, sed etiam majorem Moyse Messiam esse debuisse, apparet ex collatis pluribus vaticiniis. Deut. 18, v. 15: *Prophetam, inquit Moyses, dæ*

gente tuâ, et de fratribus tuis, sicut me suscitabit tibi Dominus Deus; ipsum audies. Et v. 18, ipse Dominus ait: *Prophetam suscitabo eis de medio fratrum suorum similem tuû, et ponam verba mea in ore ejus, loqueturque ad eos quæcumque mandavero ei; qui autem verba ejus quæ loquetur in nomine meo audire noluerit, ego ultor existam*: quæ Act. 3, v. 22, et cap. 7, v. 37, ad Christum referunt SS. Petrus et Stephanus in concionibus ad Judæos publicè habitis; unde colligere est Judæis tum persuasum fuisse ista spectare ad Messiam. Hanc prædictionem de Messia quoque intellexit consarcinator libri *Midrasch Coheleth*, seu *Expositio mystica Ecclesiastæ*, ad v. 9 capitis 1, dùm scripsit *qualem primum redemptorem* (Moysen), *talem futurum redemptorem postremum* (hoc est Messiam). Res verò ipsa hanc interpretationem suadet. Nam neque Josue, neque Prophetarum ullus fuit Propheta similis Moysi; quod et Scriptura testatur Deuteron. 34, v. 10: *Non surrexit ultra Propheta in Israel sicut Moyses, quem nòsset Dominus facie ad faciem, in omnibus signis atque portentis*. Propheta igitur similis Moysi ab illo legislatore prænuntiatus, ipse est Messias. At non tantùm similis, sed et major esse debuit, tum ratione prædictionum et prodigiorum, tum ratione doctrinæ et fructuum, ut ex plurimis prophetiis jam allatis, et ex aliis paragrapho sèquenti, de vocatione gentium et novæ legis sanctione afferendis manifestum est. Messiae summam vim propheticam Talmudistæ quoque adscribunt, eundemque patratorum miraculorum potestate Moysi fore superiorem traditur etiam in Talmude et in *Midrasch Coheleth*; quin et mortuos ad vitam ab eo revocandos scripsit R. Levi ben Gerson. Denique affirmant Judæi gentes ipsius ministerii et doctrinæ efficaciam ab idololatriâ ad Dei cultum convertendas. Ergo ex scriptis prophetiis et ex Judæorum consensu Messias debuit esse Propheta non modò similis, sed et major Moysen.

Atqui Christus Jesus fuit is Propheta. Nam similis fuit Moysi, cùm legem novam instituerit et tradiderit, quemadmodùm veterem promulgaverat Moyses. Præterea dubitare non licet quin Moyses Christi typus insignis fuerit; de quâ similitudine Moysem inter et Christum intercedente plura lege apud Euseb., lib. 3 Demonstr. evang. Christum porrò fuisse prophetam Moysi superiorem facillè evincitur. Is enim fuit propheta major Moysen, qui plura et majora miracula patravit, plures et insigniores edidit prophetias, sublimiorem et perfectiorem tra-

didit doctrinam, eamque multò pluribus persuasit; atqui Christus, etc.

1°. Seu numerus, seu splendor, seu modus, etc., miraculorum attendatur, majora Christus patravit miracula quàm Moyses. Et quidem major numero. Nam Judæi miracula solummodò septuaginta sex Moysi tribuunt horumque ita difficulter explent numerum, ut nonnulla gratis in plura dividant, quædam naturalia ut supernaturales effectus venditent, aliqua etiam confingant, v. g., Moysem esse mortuum in ore Domini; atque ejusmodi conficiendis miraculis insumpti sunt à Moysen 40 anni, Christus verò trium quatuorve annorum spatio prodigiosum edidit miraculorum numerum, ut ex Evangelistis constat; ergo, etc. Majora etiam ratione splendoris et varietatis. Omne siquidem genus morborum Christus curavit; cæcis visum, surdis auditum, claudis gressum, leprosis munditiam, paralyticis sanitatem restituit; mortuos ad vitam revocavit; dæmonia è multorum corporibus ejecit; super aquas ambulavit; motus maris compescuit; panes multiplicavit; seipsum à mortuis suscitavit; in cælos videntibus discipulis ascendit, eosdemque discipulos misso Spiritu sancto, ut promiserat, *virtute ex alto*, roboravit. Quid quòd similem, imò aliquâ ratione majorum discipulis imperitus est miraculorum patratorum auctoritatem maximam, quâ ipsi frequentissimè usi sunt (1). Numquid in miraculis Moysis tantus splendor elucet? ergo, etc. Majora ratione modi quo patrata sunt. Moyses miracula operabatur per intervalla tantùm, non per virtutem sibi perpetuò inhabitantem: Christus verò ubicumque et quandocumque volebat, seu præsens, seu absens, solo nutu miracula patrabat, ut ex pluribus exemplis compertum est. Majora denique ratione effectuum subsecutorum. Hebræis legem dedit Moyses, at nullam aliam gentem suis miraculis ad veri Dei cultum adduxit; Christi verò miraculis idola eversa sunt, et orbis universus ad fidem conversus; ergo, etc.

2°. Plures Christus et insigniores edidit prophetias quàm Hebræorum legislator. Nam paucæ in Pentateucho leguntur prophetiæ: plurimæ verò in Evangeliiis edisseruntur, quas novimus esse completas. Christus enim non

(1) Matth. 10, v. 1, 5 et 8; Marc. 16, v. 15 et 17; Luc. 10, v. 17 et seq.; Joan. 4, v. 41 et 42; in Actibus Apost. sæpissimè; Rom. 15, v. 18 et 19; 1 Cor. 12, v. 12; Hebr. 2, v. 3, etc.

semel passionem suam et mortem prædixit, necnon utriusque circumstantias, Matth. 16, v. 21, et alibi sæpius. Prædixit se à Petro negandum, à discipulis deserendum, Matth. 26, v. 31 et seq. etc. Prædixit se vitæ post tres dies restituendum, Matth. 12, v. 39 et 40. Ibid. 16, v. 22 et aliis in locis. Prædixit Jerosolymorum cladem, templi conflagrationem, ac ejusmodi rerum adjuncta Matth. 24, v. 1, Luc. 19, v. 41 et seq., et alibi. Prædixit discipulos suos exagitandos, odio habendos, morti tradendos, Matth. 10, v. 16 et alibi. Prædixit quâ morte Petrus esset moriturus, Joan. 21, v. 17 et 18. Prædixit maxima miracula à discipulis suis edenda, Marc. 16, v. 17 et seq. et alibi. Prædixit discipulos suos futuros sibi *testes in Jerusalem, et in omni Judæâ, et Samaria, et usque ad ultimum terræ*, Act. 1, v. 8. Prædixit gentes Evangelium recepturas, Joan. 10, v. 16. Prædixit Ecclesiæ suæ caput visibile futurum S. Petrum et ejus successores, Matth. 16, v. 18. Prædixit portas inferi adversus Ecclesiam pugnaturas, sed non prævalituras, ibid. Prædixit ab Apostoliseorumque successoribus doctrinam evangelicam annuntiandam, et sacramenta administranda usque ad consummationem seculi, Matth. 28, v. 19 et 20, 1 Cor. 11, v. 36, etc.

3^o Doctrinam tradidit sublimiorem et sanctiorem. Nempe altissima ad Divinitatis essentiam pertinentia arcana hominibus revelavit; solâ bonorum æternorum spe homines sibi devinxit; inimicos etiam diligere, uxorem non dimitti, crucem ferri præcepit; præceptis decalogi consilia sanctissima addidit; cultum spiritualem, per se Deo placentem, homines edocuit; ergo, etc.

4^o Multò pluribus veram doctrinam suasit. Scilicet virtute fidei christianæ, gentes ad unius Dei cultum adductæ sunt; lex verò Moysis nec ab Ægyptiis, nec ab aliis populis, sed solum ab Israele et quibusdam proselytis recepta est; ergo, etc. Itaque Christus, ut de Messia prænuntiatum fuerat, Propheta fuit similis Moysi, et ipso major.

Quæ à Judæis Moysem inter et Christum comparisonem institui ægrè ferentibus moventur vituperationes, earum solutio patebit ex dicendis.

5^o Messias debuit esse homo ex Prophetis: Isai. 7, v. 14: *Ecce Virgo concipiet et pariet filium*. Cap. 9, v. 6: *Parvulus natus est nobis, et filius datus est nobis*. Cap. 52, v. 14, Messias computatur *inter viros, et inter filios hominum*. Cap. 53, v. 3, necnon Jerem. 32, v. 2, appel-

latur *vir*; et apud Danielelem, cap. 7, v. 13, *filius hominis*. Psal. 21, v. 23, et Psal. 68, v. 9, inducitur homines vocans fratres suos; ac tandem naturâ humanâ præditum fore Messiam arguunt pariter quæ de ejus paupertate, passione et morte Prophetæ edisserunt; neque id inficiantur Judæi. Atqui Christum fuisse hominem, habuisse homines ut fratres, appellatum fuisse filium hominis, etc. notum est ex Evangelistis; ergo.

6^o Messias secundum Prophetas futurus erat servus Dei, Isai. 42, v. 1, cap. 43, v. 10, cap. 49, v. 5, cap. 52, v. 13, cap. 53, v. 11. Idque ex eo etiam sequitur quòd et homo, et sanctus ac justus, ut diximus, esse debuerit. Porro docet S. Paulus, Philipp. 2, v. 7, Christum Jesum *formam servi accepisse*; ergo.

7^o Messias juxta Vates sacros est Deus, quod triplici argumento conficitur.

Primum petitur ex nomine et attributis Dei quæ Messia à Prophetis adscribuntur. Psal. 44, quem chaldæus Paraphrastes, Kimchius, Arama, et ferè omnes Rabbini de uno Messia interpretantur, quemque de eo solo, non de Salomone, explicari posse ex toto contextu manifestum est, sic habetur versibus 7 et 8: *Sedes tua, Deus, in seculum seculi, virga directionis, virga regni tui; dilexisti justitiam et odisti iniquitatem; propterea unxit te, Deus, Deus tuus, oleo lætitiæ præ consortibus tuis*. Audis Messiam, seu illum qui præcellenti oleo à Deo unctus est, vocari *Deum* sine addito, et *Deum* cujus *sedes in seculum seculi*. Psal. 109: *Dixit Dominus Domino meo: Sede à dextris meis*. Ubi Messiam de quo hunc Psalmum intelligi jam diximus, David appellat Dominum suum, sedentem à dextris Domini. Isai. 7, v. 14: *Ecce Virgo concipiet et pariet filium, et vocabitur nomen ejus Emmanuel*, id est, *nobiscum Deus*. Hic Messia divinitas simul et humanitas expressæ habentur. Isai. 9, v. 6: *Parvulus natus est nobis, et filius datus est nobis, et factus est principatus super humerum ejus, et vocabitur nomen ejus Admirabilis, Consiliarius, Deus, Fortis, Pater futuri seculi, Princeps pacis*. Iterum perspicuè exprimuntur eò loci natura divina et natura humana Messia. Absona enim Talmudistarum in lib. Sanhedrin, priscorum quorundam Judæorum apud SS. Hieron. et Cyrill. Alexandr. in cap. 7 Isaia, necnon Davidis Kimchi interpretatio, eò loci dicta ad Ezechiam filium Achasi referentium. Tot quippe dotes, tanta nomina in principem vulgarem, in purum hominem non cadunt.

At, inquit, vox אל *el*, quam reddimus *Deus*, hic significat *fortem*. Contra : hanc significationem excludit tum vox גבור *gibbor*, *fortis* quæ statim additur ; tum 70 Interpretum auctoritas, qui vertunt Θεός ; tum usus nominis *el*, quod in Scripturis, si excipias versum 11 capitis 31 Ezechielis, semper Deum designat, ut rectè annotavit Pagninus in Thesaurò linguæ sanctæ, quodque sequenti Isaïæ capite 21 junctum, ut in textu allato, voci *gibbor*, *fortis*, manifestè ad Deum refertur. Vide Huet. prop. 9, cap. 25, n. 1.

Deum hoc loco apertè significari perspicuus R. Salomo Jarchi aliam solutionem commentus est. Opponit in hebræo scribi וַיִּקְרָא *vajicra*, quod significat *et vocabit*, non verò, *et vocabitur*, vertendam proinde : *Et vocabit nomen ejus admirabilis, consiliarius, Deus, fortis, pater futuri seculi, principem pacis* ; ita ut sensus sit parvulum de quo sermo est, *principem pacis* esse nominandum à Deo admirabili, consiliario, forti, etc. Alii cuncta hæc nomina referunt ad Deum, ac si dictum esset : Admirabilis, consiliarius, Deus, fortis, etc., vocabit nomen ejus, seu nomen illi imponet. Sed 1º, 70 Interpretes, Symmachus, etc., legunt *vocabitur* ; Aquila vertit *vocatus est*, juxta Euseb. Demonstr. evang. lib. 7. Idem chaldæus Paraphrastes et Maimonides Epist. ad Afric. à quibus omnia hæc nomina Messiae soli tribuuntur. Eademque sequuntur lectionem Talmudistæ, Kimchius ut alii, quos modò diximus hunc locum de Ezechia esse interpretatos. 2º Vox hebræa quam Jarchius exponit *vocabit*, sæpissimè sumitur impersonaliter, et reddenda est *vocabitur*, gallicè, *on appellera*. 3º Neutra Rabbiorum recentiorum interpretatio defendi potest. Et ut à posteriori incipiam, quoties in Scripturis legimus, *vocabit nomen ejus*, vel *vocabitur nomen ejus*, vel *voca nomen ejus* (id autem sæpè contingit), toties nomen dandum in particulari appellatur ; ergo, etc. Priorem autem explicationem, quæ Kimchii et Jarchii est, abjiciendam fateantur Hebræi, vel assignent quam ob causam ex sex nominibus deinceps et sine ullâ distinctionis notâ in hebræo positis, quinque priora nominativo accipienda sint, et posterius accusativo casu ; etenim de iis ad arbitrium statuere non licet. Porro, ut Huetius observat prop. 9, cap. 25, n. 2 :

« Quo nobis approbabunt (Judæi) argumento,
« hoc potius modo intelligendum esse locum
« hunc : *Et admirabilis, consiliarius, Deus, for-*
« *tis, pater futuri seculi, vocabit eum principem*

*pacis, quàm isto : et admirabilis, consiliarius,
« Deus, fortis, vocabis eum Patrem futuri se-*
« *culi, principem pacis*; vel illo : *et admirabilis,
« consiliarius, vocabit eum Deum fortem, Patrem
« futuri seculi, principem pacis*; aut hoc denique :
« *et admirabilis vocabit eum consiliarium, Deum,
« etc.?* » ergo, etc.

Idem Isaïas cap. 35, v. 4, de Messia loquens : *Deus ipse veniet, inquit, et salvabit vos*. Item cap. 40, v. 3 : *Parate viam Domini, rectas facite in solitudine semitas Dei nostri*; et v. 9 : *Dic civitatibus Juda : Ecce Deus vester, ecce Dominus in fortitudine veniet*, etc. Jerem. 25, v. 5 et 6 : *Suscitabo David germen justum... et hoc est nomen quod vocabunt eum, Dominus justus noster*. Hebraicè est *Jehova*, quod est nomen Dei proprium. Eadem repetuntur cap. 35, v. 15 : *Geminare faciam David germen justitiæ... et hoc est nomen quod vocabunt eum, Dominus (Jehova) Justus noster*. Perspicua sunt ista ; unde hæc habet ipse auctor *Sepher Ikkarim* lib. 2, cap. 28 : *Vocat Scriptura nomen Messiae Deum justitiam nostram*. Messias igitur debuit esse germen Davidis, seu homo, et simul Dominus, Deus, *Jehova*. Zachar. 12, v. 10 : *Effundam super domum David et super habitatores Jerusalem spiritum gratiæ et precum ; et aspicient ad me quem confixerunt*. Ubi agi de Messia cruci affixo jam diximus. Is igitur est auctor gratiæ, ac proinde Deus. Frustra opponeres Rabbinos legere, *aspicient ad eum* ; tum quia idem est sensus, si quidem sæpè in Scripturis hebraismi similes occurrunt ; tum quia septuaginta Interpretes, versiones Syr. et Arab. Talmudistæ in lib. Sucah, Jonathan ben Uziel apud Jarchium, R. Hadarsan in Bereschith rabba, etc., non legunt *cum*, sed *me*, quos secutus est Aben Ezra. Mich. 5, v. 2 : *Egressus ejus ab initio, à diebus æternitatis*. Malach. 3, v. 1 : *Ecce ego mitto Angelum meum, et præparabit viam ante faciem meam, et statim veniet ad templum suum Dominator, quem vos quæritis*, etc., quo in loco Messiae adjudicantur characteres Dei summi, quod scilicet ipsi sit templum, quod Prophetarum sit inspirator, quod ut supremus Dominus mittat Angelum suum qui sibi viam paret.

Secundum argumentum iis suppetiatur locis in quibus Messias dicitur verus et proprius Dei filius ab æterno genitus. Psal. 2, v. 7 : *Dominus dixit ad me : Filius meus es tu, ego hodie genui te*. Quæ sanè verba non filium duntaxat adoptivum, sed proprium et naturalem, itemque æternum, significant. Nihil enim aptius et splendidius hoc loquendi modo : *Ego hodie ge-*

qui te, ac generationem æternam designandam; scilicet quod æternum est, ut observant non modò veteres Ecclesiæ doctores, sed et antiqui philosophi, ac Philo Judæus in Tract. de Immutabilitate Dei, semper idem est ac præsens, atque æternitas in uno *hodie* propriè est posita.

Negant recentiores Rabbini, Lipmannus in *Nitzachon*, Jarchius, etc., Psalmum hunc esse de Messiâ explicandum. Sed 1º, quæcumque in hoc Psalmo continentur, in Messiam aptissimè quadrare evidentissimum est, ipsique fatentur Kimchius et Crotius, licet de Davide ad litteram illum exponere conentur. 2º Ad alium quàm ad Messiam ille Psalmus transferri non potest; namque ut omittam versiculum 7 mox laudatum, quo pacto de Davide expones vers. 8: *Postula à me; et dabo tibi gentes hæreditatem tuam et possessionem tuam terminos terræ*, et alia quæ ibi leguntur? 3º Suffragantur veteres Judæi, Thalmudistæ in lib. *Sucab.* cap. 5, R. Moses Iladarsan in *Bereschith rabba* ad cap. 37, v. 22. Saadias Gaon ad v. 13 capitis 7 *Danielis*, R. Simeon in *Jaleut*, auctor libri inscripti *Animæ sapiens*, et *Midrasch Thèhillim*. Hanc veterum Magistrorum expositionem non dissimulat Jarchius in hunc Psalmum scribens, cujus verba maximè notanda sunt: « Majores nostri, inquit, ad Regem Messiam Psalmum hunc totum referebant: oportet tamen eum referre ad Davidem juxta apparentem sententiam sonumque verborum, propter hæreticos eos, id est, Christianos. En habes ex Jarchio quâ de causâ ipse et alii recentiores Rabbini Psalmum 2 de Messiâ explicare renuant, nempe ob odium quo in christianam religionem moventur.

Psal. 109, v. 1 et 4, Messiam ab æterno et ex substantiâ Dei genitum David iterum splendide exprimit his verbis: *Dixit Dominus Domino meo, sede à dextris meis.... ex utero ante luciferum genui te*. Ita habent septuaginta interpretes, Syrus, Arabs, Vulgatus. In hebræo ad litteram legitur: *Ex utero ab aurorâ tibi ros natiuitatis tue*. Eruditissimus Houbigantius Oratori Jesu presbyter in Psalterio suo hebraico, novæ et à punctis liberæ quam parat Bibliorum hebraicorum editionis cunctis rerum ejusmodi studiosis maximoperè expectatæ prænuntio, censet expungenda hæc vocabula *tibi ros*, et rejectis punctis vertendum cum Vulgatâ, *ex utero ante luciferum genui te*; quia voces illas omittunt mox citatæ versiones græca, syriaca, arabica, et codices manuscripti. Cæterum orationis contextu satis declaratur sen-

sum verborum à 70 Viris fuisse accuratè redditum. Eò referri debet illud Michææ 5, v. 2, ubi prædictâ Messiæ natiuitate Bethleemi, additur, *Et egressus ejus ab initio à diebus æternitatis*; et istud. Proverb. 8, v. 22 et seqq.: *Dominus possedit me* (sapientiam seu verbum) *in initio viarum suarum, antequàm quidquam faceret à principio. Ab æterno ordinata sum, et ex antiquis antequàm terra fieret. Nondùm erant abyssi, et ego jam concepta eram.... Cum eo eram cuncta componens*, etc. Ex quibus colligendum est præter natiuitatem temporalem quæ Messiæ ut homini competit, aliam juxta Prophetas ipsi ut Verbo Dei adscribendam, scilicet generationem æternam, quâ Dei est natura Filius, ac proinde Deus.

Tertium argumentum ex eo desumitur quòd peritiores è veteribus Judæis Messiam esse Deum non obscurè significaverint. In Judæos hîc afferre licet auctoritatem librorum Sapientiæ et Ecclesiastici, qui etsi canone non includantur, attamen ut genuini et longè ante Christum natum exarati, meritò ab ipsis spectantur, et inter agiographos computantur. His porrò in libris Verbum divinum exhibetur ut persona divina et distincta, Sap. 18, v. 15: *Omnipotens sermo tuus de cælo à regalibus sedibus durus debellator.... prosilivit*. Eccli. 1, v. 4 et seqq., Sapientia dicitur omnia præcedere, et à Deo omnipotente *prior omnium creata*, seu procedens. Iisdem in libris passim tribuuntur Verbo apparitiones Patriarchis factæ, maris Rubri transitus, colloquia cum Moyse, etc., quæ ad Deum Scriptura refert. Ergo auctores ejusmodi librorum Verbum ut personam divinam et distinctam à Patre, ac proindè Messiam ut Deum habuerunt. Adhuc manifestius loquuntur Targumistæ. In 1º sæpissimè Verbi mentionem faciunt, quod *memra Jehovæ verbum Dei* appellant, et distinguunt à Deo à quo procedit. 2º Verbum ut personam distinctam et divinam exprimunt, ipsum nomine Jehovæ in Scripturis designatum frequenter intelligentes, illudque Moysi et Patriarchis apparuisse statuentes. 3º Tradunt ab eo salvandos homines. Non minùs sublimia de Verbo tradit Philo Judæus Alexandrinus variis in operibus, quæ, paulò antequàm Christus ministerio suo fungeretur, videtur scripsisse. Doctissimus ille Judæorum Verbum Dei, quod non uno in loco distinguit à Deo, *primogenitum Dei Filium* vocat lib. de Somniis. Ibidem et in lib. de Agriculturâ, statuit ipsum esse Deum qui apparuit veteribus Patriarchis. Lib. de Confusione linguarum,

Verbum appellat æternam Dei imaginem. Lib. de Officio mundi, ait ab ipso mundum creatum fuisse. Et lib. de Exulibus, disserens de pontifice ante cujus mortem non poterant hominidæ involuntarii in patriam reverti, ait hunc pontificem esse Dei Verbum omnium noxarum expers, *habens Deum Patrem, matrem verb sapientiam*. Hanc autem doctrinam de Verbi divini excellentiâ undenam hauserant Philo et paraphrastæ, nisi ex libris sacris, et ex traditione ab oraculis divinis originem ducente quæ apud eruditiores Judæos vigerit? Ergo ex Prophetarum vaticiniis intellexerant veterum Judæorum peritiores Messiam futurum Deum.

Jam verò sacrorum oraculorum cum Novo Testamento hic consensum demonstrare operosum non est, siquidem Christus in Evangeliiis et in Apostolorum libris Dominus Deus, et Dei filius sæpissimè prædicatur. Vide Matth. 3, v. 3; Marc 1, v. 1; Luc 1, v. 76; Joan. cap. 1, v. 1; cap. 5, v. 18, cap. 10, v. 30 et seq., cap. 14, v. 1 et seq., cap. 16, v. 15, cap. 20, v. 27 et 28; Rom. 9, v. 5; Philipp. 2, v. 5 et 6, et alibi sæpius.

§ 6. *De rebus maximis seu ad Judæos, seu ad gentiles attinentibus ex adventu Messie juxta Prophetas nexis; ubi de Judæorum obsecratione, de gentium vocatione, de novâ lege à Messia sancienda, de donis per ipsum concessis, et de ejus regno spirituali agitur.*

Inquirimus 1º, an Prophetæ prædixerint Messiam eo loco à Judæis habendum, quo ab eis habitus est Christus. 2º An sacrorum Vatum oraculis respondeat gentium conversio quæ Christi adventum subsequuta est. 3º An nova lex, novum fœdus à Messia debuerit legi Mosaicæ substitui. 4º An regnum à Prophetis Messie adscriptum Christus possideat. Hæc quatuor sigillatim expendenda.

Quo loco Messiam à Judæis habendum Prophetæ prædixerint. — Messiam Judæi hodie arbitrantur à suâ natione non posse non recipi, atque efficacissimum adversus christianam fidem sibi videntur argumentum depromere, cum obijciunt Jesum Christum à magno Synedrio rejectum, ejusque miracula reprobata. Nos contra, Prophetias in Christo Domino exitum habuisse inde monstramus.

CONCLUSIO. Juxta Prophetarum oracula Messias Judæorum salvator à pluribus eorum recipiendus fuit, à natione verò abijciendus, imò

et occidendus; atque in hujusce Judæorum criminis pœnam templum et civitas dissipari, ipsi autem calamitatibus affici, è terrâ Chanaan ejici, captivique per gentes dispergi debuerunt; hæc porrò vaticinia in Christo sunt impleta.

Prob. Prima pars, nimirum Messiam ex Prophetis esse Judæorum Salvatorem, istudque Christo congruere. Isaïæ 62, v. 1 et seq.: «Propter Sion non tacebo, et propter Jerusalem non quiescam, donec egrediatur ut splendor Jussus ejus, et Salvator ejus ut lampas ascendantur.... Ecce Dominus auditum fecit in extremis terræ, dicite filiæ Sion: Ecce Salvator tuus venit, ecce merces ejus cum eo, et opus ejus coram illo.» Jerem. 23, v. 5 et 6. «Suscitabo David germen justum.... in diebus illis salvabitur Juda, et Israel habitabit confidenter.» Zach. 9, v. 9. «Exulta satis filia Sion; jubila, filia Jerusalem: Ecce rex tuus veniet tibi justus et Salvator, etc.» Quibus testimoniis alia plura addi possent. Iis verò non pauciora respondent de Christo dicta in novo Testamento. Matth. 1, 22: «Et vocabis nomen ejus Jesum; ipse enim salvum faciet populum suum à peccatis eorum.» Luc. 1, v. 69: «Erexit cornu salutis nobis in domo David pueri sui, sicut locutus est per os sanctorum;» et cap. 2, v. 11: «Natus est vobis hodie Salvator, qui est Christus Dominus, etc.»

Prob. Secunda pars, Prophetas videlicet vaticinatos esse alia duo quæ in Christo etiam exitum habuerunt, nempe Messiam esse à pluribus Judæis recipiendum, à natione verò ipsâ abijciendum. Utrumque simul ab Isaïa prædicitur c. 8, v. 14, ubi de Messia verba faciens: «Erit, inquit, vobis (credentibus nimirum) in sanctificationem. In lapidem autem offensivum et in petram scandali duabus domibus Israel, in laqueum et in ruinam habitantibus Jerusalem. Et offendent ex eis plurimi et cadent, etc.» Non poterat disertius exprimi Judæorum complures Messie obtemperaturos ac inde salutem consecuturos, nationem verò reliquam in ipsum rebellando ad perniciem et exitium ruituram. Idem Prophetæ cap. 6, v. 9 et seq., Judæorum futuram execrationem sic describit: «Audite audientes, et nolite intelligere, et videte visionem, et nolite cognoscere. Excæca cor populi hujus, et aures ejus aggrava, et oculos ejus clauda; ne forte videat oculis suis, et auribus suis audiat, et corde suo intelligat, et convertatur et

« sanem eum. Et dixi : Usquequò , Domine ?
 « Et dixit : Donec desolentur civitates absque
 « habitatore , et domus sine homine , et terra
 « relinquetur deserta. Et cap. 29, v. 14 : Ecce
 « ego addam ut admirationem faciam populo
 « huic miraculo grandi et stupendo ; peribit
 « enim sapientia à sapientibus ejus ; et intellec-
 « tus prudentium ejus abscondetur. » Psal. 68,
 v. 9 : « Extraneus factus sum fratribus meis ;
 « et peregrinus filiis matris meæ. » Innu-
 mera his familia reperire est in Scripturis sa-
 cris.

Atqui hæc vaticinia in Christo Domino ad
 eventum perducta sunt : nempe *positus est
 hic*, ut aiebat Simeon , Luc 2, v. 34, *in rui-
 nam et in resurrectionem multorum in Israel*. Ac
 1^o multi ex Judæis ei nomen dederunt. Nam
 præter 12 Apostolos , 72 discipulos , aliosque
 nonnullos in Evangeliiis memoratos ; dùm in
 terris conversatus est *ex principibus*, teste
 S. Joan. cap 12, v. 42, *multi crediderunt in
 eum ; sed propter Phariseos non confitebantur ,
 ut è Synagogâ non ejicerentur*. Petro autem Je-
 rosolymis in die Pentecostes prædicante, Act.
 2, v. 41 : *Qui receperunt sermonem ejus , bap-
 tizati sunt ; et appositæ sunt in die illâ animæ cir-
 citer tria millia*. Et cap. 4, v. 4 : « Multi eorum
 « qui audierant verbum , crediderunt , et fac-
 « tus est numerus virorum quinque millia. » De-
 inde Apostolorum ac discipulorum laboribus et
 miraculis auctus est maximè numerus fidelium.
 « Verbum Domini crescebat , ait auctor sacer
 « ibid. cap. 6, v. 7, et multiplicabatur nume-
 « rus discipulorum in Jerusalem ; multa etiam
 « turba sacerdotum obediebat fidei , cap. 9 ,
 « v. 31 : Ecclesia per totam Judæam et Gali-
 « læam et Samariam habebat pacem , et ædi-
 « ficabatur ambulans in timore Domini, etc. ; »
 et cap. 21, v. 20, S. Jacobus cum seniori-
 bus testis est *plura millia in Judæis credidisse*,
 idemque ex toto Actuum libro, ex epistolis S.
 Pauli et Apostolorum , atque ex omnibus his-
 toriæ ecclesiasticæ monumentis colligere est.

2^o A natione Judaicâ rejectus est Christus , ut
 nemo nescit , atque ad hanc eorum increduli-
 tatem et obsecrationem adductus mox ex Isaïæ
 cap. 6 locus refertur Matth. 13, v. 14 ; Marc.
 4, v. 12 ; Luc. 8, v. 10 ; Joan. 12, v. 40 ; Act.
 28, v. 26 ; et Rom. 11, v. 8.

Probatur tertia pars , scilicet sacris oraculis
 prædictum esse Judæos Messiam neci tradituro-
 ros, ideòque civitatem et templum dissipanda,
 ipsosque per orbem dispergendos. « Post heb-
 « domades sexaginta duas occidetur Christus,

« ait Daniel cap. 9, v. 26 et seq. , et non erit
 « ejus populus qui eum negaturus est (seu, ut
 « reddi potest hebræum, *et non sibi*). Et civi-
 « tatem et sanctuarium dissipabit populus cum
 « duce venturo ; et finis ejus vastitas, et post
 « finem belli statuta desolatio..... Deficiet ho-
 « stia et sacrificium..... et usque ad consum-
 « mationem et finem perseverabit desolatio. »
 Ibi mors Messiae, civitatis et sanctuarii dissipa-
 tio, ac populi usque in finem duratura desolatio
 ita nectuntur, ut dubitari nequeat quin pri-
 mum à Prophetâ tanquàm cæterorum causa
 assignetur. Huic autem vaticinationi planè
 cohærent, ut jam alibi diximus, historia Chris-
 ti, atque eventus manifesti à Judæis ipsis
 memoriæ traditi, et etiamnum oculis subjecti.

Eòdem pertinent plures aliæ Prophetiæ. Psal.
 68 (hebr. 69), v. 22 et seq. : « Dederunt in
 « escam meam fel, et in siti meâ potaverunt
 « me aceto. Fiat mensa eorum coram ipsis in
 « laqueum (verba sunt vaticinantis , non im-
 « precantis), et in retributiones, et in scanda-
 « lum. Obscurentur oculi eorum ne videant,
 « et dorsum eorum semper incurva. Effunde
 « super eos iram tuam, et furor iræ tuæ com-
 « prehendat eos. Fiat habitatio eorum deserta,
 « et in tabernaculis eorum non sit qui inhabi-
 « tet. Quoniam quem tu percussisti persecuti
 « sunt, et super dolorem vulnerum meorum
 « addiderunt. Appone iniquitatem super ini-
 « quitatem eorum, etc. » Isaïas 6, v. 10, cæci-
 tate Judæorum ad Christi tempora pertinente,
 de quâ modò diximus, prænuntiata, sic pergit
 v. 11 : « Usquequò Domine (duratura est cæ-
 « citas) ? Et dixit : Donec desolentur civitates
 « absque habitatore, et domus sine homine, et
 « terra relinquetur deserta. » Alia addi pos-
 sent.

SOLVUNTUR OBJECTIONES.—Obj. 1^o. Messias à
 Prophetis appellatur salus, Salvator populi Ju-
 daici, ut primâ conclusionis parte probavimus
 atqui Christus denominari non potest salvator
 et salus populi Judaici, quippe cùm, ut nos fa-
 temur, majori Judæorum parti occasio ruinæ
 fuerit ; ergo, etc. Nego min. Is enim salvatoris
 et salutis populi Judaici nominibus insigniri
 debuit, qui ad redimendum et salvandum Is-
 raelem venit, qui omnes salvatoris dotes pos-
 sidens multis Israelitis salutem re ipsâ contulit,
 et à quo Judæis omnibus salus æterna oblata
 est, ita ut ex eorum solâ perversitate ortum sit
 quòd salutem æternam per ipsum non fuerint
 consecuti. Atqui doctrinâ evangelicâ hæc om-
 nia Christo adscribuntur ; ergo. Ad probat,

distinguo : Fuit ruinæ occasio etc., ex vitio et pravitate populi Judaici, concedo ; ex defectu conditionum in Israelis salvatore desideratarum, nego. Christo fuere omnes salvatoris dotes, ut ex operibus ejus et miraculis, et ex doctrinâ christianâ liquet. Hinc vidimus multos ejus fidem amplexatos esse Judæos. Quod si eam recipere noluerit Judæorum natio, id eorum cæcitati et malitiæ tribuendum. Nec ideo Christus titulo salvatoris Israel nequit designari. Nam juxta Scripturæ usum Deus dicitur homines mundare et sanctificare, cor novum dare, etc., non tantum cum id reverâ præstat, sed etiam ubi media sanctificationis confert quæ ex humanâ improbitate effectum suo privantur. Ezech. 24, v. 13 : *Immunditia tua execrabilis*, ait Dominus ; *quia mundare te volui, et non es mundata à sordibus tuis*. Ita pariter cum Deus dicitur Judæos per Messiam liberaturus, salvaturus, intelligendus est daturus per Messiam uberrima salutis media quibus quotquot uti voluerint, salutem consequentur. Atque hunc prophetiis Messiam salvatorem Israel pollicentibus sensum manifestè affigunt alia quæ attulimus vaticinia, Judæorum in Messiam rebellionis prænuntia.

Obj. 2°. Ab omni humanâ fide abhorret liberatorem tantoperè Judæis expetitur, tam sæpè à Prophetis expressum, totâ lege figuratum, nationi Judaicæ acceptum non fuisse. Ergo si Christus fuisset verus Messias, populus Judaicus et Synedrii principes eum non rejecissent. Ita Judæi quibus hic increduli adstipulantur. 1° Dist. ant. Ab omni fide abhorret Messiam nationi Judaicæ non fuisse acceptum. si supponantur Judæi nunc temporis fuisse salutis suæ studiosi, non cupiditatibus et præjudiciis obcæcati, concedo ; si cupiditatibus irretiti et id pœnam peccatorum suorum excæcati fuerint, nego. Indubitatum est Messiae agnitionem justis ipsis apud Judæos et salutis suæ studiosissimis fuisse opus bonum et meritum, ac proinde liberum. Itaque quamvis ex operibus et miraculis Christi et discipulorum ejus constare debuerit ipsum esse Messiam Patriarchis promissum, attamen necesse non fuit ut ea esset hujusce rei evidentia, quæ perversum quemlibet et induratum ad fidem Messiae vel invitam raperet. Si igitur certum sit Judæos, Christi et Apostolorum ætate, fuisse prodigiôsè obcæcatos, in bona temporalia propensos, ac tenacissimos pravi, mirum non erit quod major eorum pars Messiam doctrinæ cœlestis præconem sanctissimum, men-

tes à terrenis avocantem et ad spiritualia erigentem noluerint recipere. Atqui stupendam fuisse Judæorum cæcitatem, eorumque animos in pravitate suâ summè obfirmatos, non modò Evangelistæ et Apostoli attestantur, sed et ipsi Judæi scriptores. Josephus inprimis in opere de Bello Judaico, quod annis circiter 37 post mortem Christi cœptum est, de Judæorum criminibus et flagitiis ea scribit (1) quæ horrorem omnibus concitant, et quæ ipse judicat meruisse, ut, si cunctati essent Romani, vel dehiscente terrâ absorberetur civitas, vel undis obrueretur, vel iisdem elideretur fulminibus quibus Sodomica regio olim obtrita fuit. In Talmude, de Festis, lib. 7. cap. 3, Israelitarum pervicacia proterviæ canis, galli, hirci et spinæ comparatur. Alias Judæorum eâ de re auctoritates laudat Huetius, prop. 9, cap. 161. 2° Nego conseq. Esto, omnem fidem superet eò provehi potuisse Judæorum cæcitatem et pervicaciam, ut liberatorem à Deo ad se missum respuerent. Quò magis id à fide humana abhorrebit, eò ampliùs inde confirmatur Christum esse Messiam. Quid ita ? quia scilicet hoc ipsum à Prophetis fuisse prænuntiatum, et ad exitum in Christo Jesu perductum esse constat, ut diximus. Quantò minùs igitur credibilis videri potest stupenda illa Judæorum incredulitas et perfidia, tantò majus erit prodigium hanc vaticiniis in Jesu adimpletis fuisse prædictam. Ergo, etc.

Inst. cum Orobio in suo scripto 2 apud Limborech, Amic. Collat. Cum venerit Messias, « Deus Israelis solus regnabit in suo mundo... » non quòd vim libero hominum arbitrio sit « illaturus ; sed quòd ex affluentia gratiæ « in bonum ferè semper dirigetur ; » ergo cum id nondum præstiterit, etc. Nego ant. Prænuntiârunt quidem Prophetæ gratias uberimas Israelitis et gentibus post Messiae adventum concedendas, maximosque ex ejusmodi auxiliis effectus secuturos, sed non prædixerunt futurum ut omnes etiam Israelitæ illis salutis mediis uterentur. Verum est Deo non deesse media quibus voluntatem quantumvis in malo obfirmatam, illæsâ ejus libertate, in bonum dirigat ; sed eum statuuisse ut, adveniente Messia, ex affluentia gratiæ in bonum semper dirigerentur Israelitarum voluntates, non modò à Prophetis non præsignificatum, sed contra, ut vidimus, declaravit Daniel Messiam à populo Judaico neci tradendum, Isaias verò summam

(1) Vide lib. 6, cap. 37 ; lib. 7, c. 8 et 30.

etate Messiae fore multorum Judæorum cæcitate, ideòque in ruinam pluribus Judæis adventum ejus futurum.

De novâ Lege, quæ veteri legi, juxta Prophetas, substitui debuit. — Legem Mosaicam in perpetuum institutam volunt Judæi, ejus observationem in captivitate quâ hodiè premuntur, solummodò intermissam et suspensam contendunt, ac templum tertium aliquando reedificandum atque in eo usum cæremoniarum lege Mosaicâ præscriptarum sub rege Messiâ instaurandum censent. Advertendum autem in Mosaicâ lege, quâ spectat cultum divinum, duplicis generis præcepta distingui, moralia nempe, et ritualia. Priora continentur tabulis Decalogi, spectantque officia hominis erga Deum et proximum ipsâ lege naturali injuncta. Præcepta ritualia complectuntur sacrificia diversa et varias cultûs exterioris cæremonias lege præscriptas, quæ nomine *ritualium* generatim exprimuntur.

Sacrificia autem illa et ritus considerari possunt quantum ad usum, et quantum ad res cæremoniis ejusmodi præsignatas. Ritualia enim legis Mosaicæ fuisse mysteriorum Christi ejusque Legis typos et figuras, dogma est quod S. Paulus pluribus in locis inculcat et explicat; vide præsertim Epistolam ad Hebr. Jam verò cum inquirimus de lege novâ quæ legi Mosaicæ juxta Prophetarum oracula à Messiâ substitui debuerit, non loquimur de præceptis moralibus, quæ abrogari non possunt, quæque legi Mosaicæ non propria, sed ipsâ lege æternâ imperata ad legem naturæ et christianam perinde atque ad Mosaicam, et ad quemeumque statum pertinent. Non loquimur etiam de rebus quas ritualia significabant; imò ejusmodi rerum significationem in Christo completam esse credimus; quapropter Christus, Matth. 5, v. 17, aiebat: *Non veni solvere (legem) sed adimplere.* Loquimur ergo de ritualium usu. Hunc lege christianâ abrogatum docet fides. Quæstio itaque est adversus Judæos utrum ejusmodi abolitionem ritualium et simul novam legem à Messiâ sancendam prænuntiaverint Prophetæ.

CONCLUSIO. Prædixerunt Prophetæ futurum ut lex Moysis quantum ad ritualium usum abrogaretur, et novum fœdus ejus loco à Messiâ sanciretur: quæ duo Christus executus est.

Probatur prima pars, nempe ex Prophetis, legem Mosaicam, quantum ad ritualium usum, abrogandam fuisse. Isai. 4, v. 41 et seqq.: « Quò mihi multitudinem victimarum vestra-

rum, arietum, et adipem pinguium, et sanguinem vitulorum, et agnorum, et hircorum nolui... Ne offeratis ultrà sacrificium frustrà; incensum abominatio est mihi. Neomeniam, et sabbatum, et festivitates alias non feram... Calendas vestras et solemnitates vestras odit anima mea. Jerem. 3, v. 16: in diebus illis, ait Dominus, non dicent ultrà: Arca Testamenti Domini; neque ascendet super eor, neque recordabuntur illius; nec vivificabitur, nec fiet ultrà. » Et cap. 7, v. 14: « Faciam domui huic, in quâ invocatum est nomen meum, et in quâ vos habetis fiduciam, et loco quem dedi vobis et patribus vestris, sicut feci Silo, et projiciam vos à facie meâ. » His sanè in locis, quibus similia addi possent, legis cæremonias et sacrificia aliquandò esse cessatura clarissimè significatur.

Respondent Rabbini illis oraculis solum exprimi cæremonias legis esse aliquandò intermittendas, donec Judæi emendarentur et à peccatis resipiscerent. Sed hæc evasio nulla est. Nam 1º Rabbiorum explicationem eventus rerum labefactat; siquidem à plus quàm septemdecim seculis, nempe ab anno 70 æræ vulgaris quo templum destructum est, ritualia nequeunt à Judæis observari, nullaque spes affulget futurum ut aliquandò observari possint. 2º Tantum abest ut verba Prophetarum adducta de intermissione observationis ritualium accipi queant, ut potius in locum ejusmodi ritualium, aliam à Messiâ legem esse dandam, et quidem perpetuò duraturam, Prophetæ vaticinati sint, ut modò dicemus.

Eandem conclusionis partem primam astruunt Prophetiæ in quibus templi Jerosolymitani versus Messiae tempora destructio, populi que à terrâ suâ transmigratio et dispersio, ac gentium ad verum Dei cultum vocatio prædicuntur. Etenim 1º certum est, nec inficiantur Rabbini, intrà solam terram promissionis et in solo templo sacrificia potuisse offerri. Hinc nulla hodiè Judæi sacrificia offerunt; et si quædam ab ipsis cæremoniæ observantur, eæ admodum jejunæ sunt, atque à multitudine, magnificentia et celebritate earum quæ sacrificiis annexæ in templo olim peragebantur, in immensum distant, quod Limborchius de verit. Relig. christ. (1) inductione planè demonstrat. Itaque iisdem Prophetiis quibus templum dissipandum, et populus Judaicus in gentes omnes dispergendus prædicuntur, legis quantum ad

(1) Ad 3 script. quæstio 4, cap. 5, edit. Basil. 1740, p. 654.

ritualia abolitio etiam præsignificatur. Ac mirum sanè à Judæis de ejusmodi negotio vitiligationes moveri. Nam diffiteri non possunt lege præscriptum esse ut soli ex stirpe Aaron sacerdotes sacrificia offerrent, solique levitæ functionibus sacris manciparentur. Cùm ergo negare nequeant nullo pacto hodiè dignosci posse qui ex tribu Levi, qui ex Aaronis familiâ ortum ducant, ut quid sperant futurum, ut aliquandò cultus cæremonialis lege præscriptus restauretur? 2º Gentes ad verum Dei cultum à Messiâ convertendas Prophetæ sæpiùs expresserunt, ut inferiùs probabitur, et agnoscunt Judæi; atqui conversio gentium ad verum Dei cultum, importat abolitionem legis Mosaicæ. Lex enim tum aboleri censetur, cùm fit impossibilis; atqui gentiles non potuissent legem implere; nemo quippe non videt, quàm absurdum sit quod Rabbini fingunt, gentiles ætates Messiæ quotannis Jerosolyma ac cunctis mundi partibus perrecturos ad festa celebranda, et sacrificia in templo offerenda; ergo, etc. Certè hæc legis abolitio veteres Judæos penitùs non latuit. Namque in *Schebahot*, cap. 2, et in *Jalcuth* ad fin. Esdræ disertè tradunt tempore Messiæ cessatura omnia sacrificia, excepto Eucharistico; et in *Vaicra'rabba*, *Omnia festa cessabunt*, inquit, *præter festum Purim* (seu Sortium Esther 9, v. 28, institutum) et diem expiationum.

Probatur secunda pars, scilicet ex Prophetis Messiam debuisse novam legem in antiquæ locum substituere. 1º Id significavit pluribus in locis Isaias, ac præsertim cap. 42, v. 6: « Dedi te in fœdus populi, in lucem gentium. Cap. 43, v. 18 et 19: Ne meminere priorum, et antiqua ne intueamini: Ecce ego facio nova, et nunc orientur... Populum istum formavi mihi, laudem meam narrabit. Non me invocasti Jacob, » etc., quæ verba in tract. Talmudico *Berachot* ad Messiam referuntur, ut et ab Apostolo, 2 Cor. 3, v. 17. Idem Isaias cap. 55, v. 3 et 4: « Feriam vobiscum pactum sempiternum, misericordias David fideles. Ecce testem populis dedi eum, ducem ac præceptorem gentibus. »

2º. Clariùs adhuc Jeremias, cap. 31, v. 31: « Ecce dies venient, dicit Dominus, et feriam domui Israel et domui Juda **Fœdus novum**; non secundum pactum, quod pepigi cum patribus eorum in die quâ apprehendi manum eorum... sed hoc erit pactum quod feriam cum domo Israel, post dies illos, dicit Dominus: « Dabo legem meam in visceribus eorum, et

« in corde eorum scribam eam; et ero eis in Deum, et ipsi erunt mihi in populum, » etc., quod vaticinium *Midrasch schir aschirim* ad v. 10, capitis 2 Cantici canticorum, R. Moses ben Nachman, et alii, ad Messiæ tempus referunt; hoc verò allato S. Paulus Heb. 8, v. 13, sic concludit: « Dicendo autem novum, veteravit prius. Quod autem antiquatur et senescit, prope interitum est. » Jeremiæ concinit Baruch ejus discipulus cap. 2, v. 5, Ezechiel cap. 16, v. 1, necnon veteres Judæi in *Jalcuth* ad Isai. 2, v. 7. et ad Psal. 2, v. 7.

At, inquit Kimchius, in illo Jeremiæ testimonio non agitur de aliquâ novâ lege instituendâ, sed de ipsâ lege Mosaicâ renovandâ et confirmandâ; nempe juxta ipsum vox hebræa *חֲדָשָׁה chadascha*, non innovationem, ut reddimus, sed confirmationem sonat; ergo. Nego ant. Commentum Khimchii ipso prophetiæ textu convellitur. Nam 1º, præterquàm quòd illa vocis hebrææ acceptio prorsùs insolita est, opponit Propheta fœdus novum de quo vaticinatur, fœderi veteri cum patribus Israelitarum inito. « Feriam, inquit Dominus... fœdus novum; non secundum pactum quod pepigi cum patribus eorum... sed hoc erit pactum quod feriam cum domo Israel, » etc. 2º Fœdus illud novum ex Jeremiâ futurum est solemnus et præstantius pacto veteri. « Hoc erit pactum quod feriam cum domo Israel, post dies illos dicit Dominus: Dabo legem meam in visceribus eorum, » etc. 3º Denique de eodem novo fœdere sermonem faciens Jeremias, cap. 32, v. 40, et cap. 50, v. 5, vocat illud *sempiternum*, perpetuò mansurum, *nullâ oblivione delendum*: qui tamen cap. 7, v. 14, dixerat Jerusalem et templum deserenda sicut antea derelicta fuerat urbs Silo. Ergo fœdus novum tempore Messiæ ex Jeremiâ feriendum, non est mera renovatio fœderis veteris cum antiquis patribus icti.

3º Novum fœdus à Messiâ sancendum prædixit quoque Daniel, 9, v. 27: « Confirmabit pactum multis hebdomadâ unâ, et in dimidio hebdomadis deficiet hostia et sacrificium... et usque ad consummationem et finem per severabit desolatio. » Antea significatum fuerat post elapsas à sermone de reædificandâ Jerusalem sexaginta novem hebdomadas, *Christum occidendum*; ex quorum serie colligendum est novum fœdus per Christi mortem fuisse perfectum, atque obsignatum, ut docet Apostolus Hebr. 9. Ad mortem Christi similiter alludit Zacharias, cap. 9, v. 11.

4° Tandem Malachias, Prophetarum ultimus, cap. 3, v. 1, sic habet : *Veniet ad templum suum Dominator quem vos quæritis, et Angelus testamenti quem vos vultis*; ubi de Messiâ sermonem esse jam alibi diximus. Messias igitur est *Angelus testamenti*, seu legatus fœderis; quæ nuncupatio ipsum missum esse ad novam legem, novum fœdus sanciendum profectò significat. Sed nihil expressius eâ de re desiderari potest ejusdem Malachiæ prophetiâ cap. 1, v. 10 et 11 : « Non est mihi voluntas in vobis, » dicit Dominus exercituum, et munus non « suspiciam de manu vestrà. Ab ortu enim solis usque ad occasum, magnum est nomen meum in gentibus, et in omni loco sacrificatur et offertur nomini meo oblatio munda : quia magnum est nomen meum in gentibus, dicit Dominus exercituum. » En habetur distinctè significata veterum sacrificiorum abrogatio, et unius immaculati et acceptissimi sacrificii in eorum locum substitutio. Atque hoc insigni vaticinio pressi omni ævo Judæi, nonnisi dissentanea et absurda ad illud elidendum commenti sunt.

Reponit Salomon Jarchi, et post eum Kimchius et Aben Ezra, sensum vaticinii hunc esse posse : licet gentes colant falsa numina, quia tamen unum supremum Deum venerantur, acceptiorem quam Judæi mihi oblationem offerunt. Sed contrà : gentes, dum vaticinabatur Malachias, soli idolorum cultui addictæ, verum Deum non colebant. Qui apud eas unius supremi numinis notitiam tunc erant assecuti, huic cultum et honorem Deo debitum vulgò non tribuebant. Non igitur tunc à gentibus offerebatur nomini Domini *oblatio munda*. Verùm esto, aliquem Deo summo cultum exhibuerint simul atque idolis immolabant, possuntne placere Deo qui ipsi simul et idolis serviunt? Nonne Deus Exod. 20, v. 3, declarat se solum adorandum esse? numquid ab ejusmodi falso- rum Deorum cultoribus offerri potest sacrificium quod à Deo *zelote*, ut oblatio munda suscipiatur? Reponit iterùm idem Jarchius populum Israeliticum inter gentes toto orbe dispersum orationes suas et preces Deo offerre, atque hanc esse oblationem mundam de quâ Malachias loquitur. Verùm obstat 1°, quòd gentes in illo Malachiæ loco opponuntur Judæis. Isti dicuntur non esse Deo grati, et munera eorum seu oblationes, Hebr. *mincha*, respuuntur; contra autem nomen Domini inter gentes magnum aliquando futurum enuntiatur, at simul adjicitur oblationem mundam in omni loco tunc

offerendam Deo. Sanè vel ista ad cultum Deo acceptum ipsi quondam à gentibus exhibendum pertinent, vel nihil omninò significant, proindeque, etc. Obstat 2°, quod in utroque versiculo 10 et 11, eadem vox hebræa legatur, *mincha*, id est, *munus, oblatio*. Quemadmodum igitur vox illa v. 10, ritus Judæorum et sacrificia, non nudas preces significat, ita et versiculo 11, proindeque is versus malè explicatur de precibus quas Judæi dispersi fundunt. Obstat 3°, quod Deus magnificè ibi prænuntiet magnum futurum esse nomen suum in gentibus. Quis autem tam splendida ejus verba ita exposuerit; Judæi supremi numinis cultores alii aliò quondam disparabuntur captivi per gentes religionis eorum contemptrices? atqui tamen Malachiæ verba id unum significarent positâ Jarchi interpretatione; ergo, etc.

Reponunt denique Kimchius et Aben Ezra verborum Dei hunc esse sensum: si à gentibus hostias mihi offerri vellem, mundas eas et selectas offerrent, non autem vitiosas et maculosas, quod vos facitis. Verùm interpretatio ejusmodi quid est aliud quàm Scripturarum corruptio manifesta? supponunt Rabbini conditionem, non modò ubi nulla est, sed et ubi nullam subjecta materia vel minimùm indicat; omnes sermonis regulas pessumdant, ac magnificis oraculis ex ore Dei prolatis exiles tantum ac tenues alligant sensus.

SOLVUNTUR OBJECTIONES. — Obj. 1°. Deuter. 30, v. 4 et seq., Moyses populum Israeliticum affatur : « Cum venerint super te omnes sermones isti... et ductus pœnitudine cordis tui in universis gentibus, in quas disperserit te Dominus Deus tuus, et reversus fueris ad um... reducet Dominus Deus tuus captivitatem tuam ac miserebitur tui, et rursùm congregabit te de cunctis populis, in quos te ante dispersit. Si ad cardines cœli fueris dissipatus, inde te retrahet Dominus Deus tuus, et assumet atque introducet in terram quam possederunt patres tui, et obtinebis eam.... faciesque universa mandata quæ ego præcipio tibi hodiè, » etc. Ex hoc loco colligere sibi videntur Judæi cæremonias legis durante hac captivitate solum intermissas, rati hic sibi promissum esse futurum ut aliquando, nempe tempore Messiæ, in terram patrum suorum revertantur; quorum argumentum ita proponi potest : Moyses eò loci vaticinatur Judæos, cum resipuerint, ex aliquâ captivitate in terram Chanaan à Domino reducendos; atqui captivitas de quâ ibi agitur est captivitas præ-

sens. Vel enim est captivitas præsens, vel Babylonica; atqui non Babylonica; siquidem in eâ Judæi non fuerunt dispersi usque *ad cardines cæli*, id est, per totum orbem; ergo, etc. Deinde captivitas è quâ Moyses populum reversurum cap. 30 prædicit, eadem est quam descripserat cap. 28; atqui captivitas descripta cap. 28 manifestè est captivitas præsens. Nam v. 64, designatur: *Disperget te Dominus in omnes populos à summitate terræ usque ad terminos ejus*; quod in captivitate Babylonicâ impletum non est, in præsenti autem adimpleri oculis nostris conspiciamus. Ibid. additur: *Et servies ibi diis alienis, quos et tu ignoras, et patres tui, lignis et lapidibus*. Sed, ait Orobio in scripto 3 apud Limbroch: « nunquàm Israel in Babylonicâ captivitate idololatriæ crimen commississe legitur, neque de eo ab Esdrâ aut Nehemiâ accusatur... maximè postea plurimi in Christianismum ingressi pristinâ idololatriâ infecti fuere... Hi sunt dii alieni quos majores non cognoverunt; quippe Chaldæorum et Persarum deos Israel et nostri majores haudquaquàm ignoraverant; maxime novos, recentes quos Christianismus sibi adinvenit... in quo deos ex ligno, ex lapide, » etc. (imagines scilicet et Eucharistiam) adorare coguntur Judæi in Hispaniâ. Ergo meritò sperant Judæi se aliquando è captivitate in quâ degunt, à Messiâ liberandos, in terram Chanaan reducendos, et in templo tertium ædificando cærimonias legis observaturos.

1^o Nego min., et dico captivitatem è quâ Moyses Deut. 30 populum vaticinatur eripiendum; non aliam esse quàm Babylonicam. Illud enim oraculum de captivitate Babylonicâ meritò explicatur, quod in reditum populi ex illâ captivitate aptè quadrat, quodque lib. 2 Esdr. 4, v. 8 et 9, ad hunc reditum refertur. Atqui 1^o, allatum Moysis vaticinium Nehemias loco citato de reditu è Babylonicâ captivitate interpretatur his verbis: « Memento (Domine) verbi quod mandâsti Moysi servo tuo, dicens: Cùm transgressi fueritis, ego dispergam vos in populos; et si revertamini ad me, et custoditis præcepta mea, et faciatis ea, etiamsi adducti fueritis ad extrema cæli, inde congregabo vos, et reducam in locum quem elegi, » etc. 2^o Idem vaticinium ad ejusmodi reditum aptè quadrat, ut maximè ex eo demonstratur, quòd duplex à Rabbiniis adducta in oppositum probatio nulla sit.

Ad primam probationem, nego suppositum, nempe hoc commate: *Si ad cardines cæli fueris*

dissipatus, inde te retrahet Dominus, etc., significari sermonem esse de captivitate in quâ per totum orbem dispersi fuerint Judæi. Nemo enim non videt hæc conditionatè et hyperbolicè, non absolutè esse dicta. Ad secundam probationem, nego min. Nam 1^o captivitas de quâ Moyses cap. 28, characteribus Babylonicæ captivitati propriis notatur. *Ducet te Dominus*, ait sapiens ille legislator v. 36, *et regem tuum quem constitueris super te, in gentem quam ignoras tu et patres tui; et servies ibi diis alienis, ligno et lapidi*. Hæc certè ad captivitatem præsentem non attinent, quæ tunc incœpit cùm jamdudum judæis nullus erat rex quem sibi constituissent; Babylonicæ verò captivitati omninò congruunt, in quam Joachin ac deinde Sedecias cum principibus et optimatibus, ac maximâ populi parte, translati sunt. Ergo, etc. 2^o Gentem in quam captivi abducendi prædicuntur Judæi Moyses iisdem coloribus depingit, quibus Prophetæ gentem Chaldæam. *Adducet Dominus super te*, inquit v. 9, *gentem de longinquo et de extremis terræ finibus, in similitudinem aliquæ volantis cum impetu, cujus linguam intelligere non possis*, etc., quæ non modò in Chaldæos quadrant, ut eventus docuit, sed et simillima sunt istis Jeremiæ 5, v. 15: *Adducam super vos gentem de longinquo,.... gentem robustam, gentem antiquam, gentem cujus ignorabis linguam*, etc. Ezechielis verò 17, v. 3 et 12, et Daniel 7, v. 4, gens eadem comparatur aquilæ. 3^o Quas cap. 28 recenset Moyses captivitatis circumstantias, eæ in Babylonicam aptè cadunt. V. g., istud singulare et horrendum v. 53: *Comedes fructum uteri tui, et carnes filiorum tuorum*, etc., quod in ultimâ Jerosolymorum obsidione sub Tito contigisse auctor est Josephus, contigit etiam dùm à Chaldæis Jerusalem fuit obsessa, testibus Jeremiâ, Thren. 4, v. 10, et Baruch 2, v. 3.

Nec obstat quod ex v. 64 objicitur, gentem Judaicam Moyse prænuntiante dispergendam esse *in omnes populos à summitate terræ usque ad terminos ejus*. Ut enim horum verborum impleatur significatio, sufficit Judæos post captam à Chaldæis Jerosolymam fuisse per multas gentes et magnâ orbis parte disjectos ac dissipatos; atqui rem ita se habere certum est. Nam toto Oriente, in Babyloniâ, in Perside, in Mediâ, etc., eos dispersos fuisse ex Lib. 4 Reg. cap. 25, 2 Paralip. 36, ex libris Esdræ, Estheris, etc., colligere est. Ex iisdem Reg. et Paral. locis constat quoque complures metu Nabuchodonosoris post Godoliæ mortem in Ægyptum fu-

gisse. Quid quòd ex eàdem captivitate secutum est ut in Græciam, in Italiam, imò et in Germaniam, si Judæis ipsis fides, diu ante Christum natum pervenerint? Non obstat etiam quòd in eodem versu legitur: *Servies ibi Diis alienis quos et tu ignoras*, etc.; imò istud potius argumento est hic de captivitate præsentis sermonem non esse; Judæi enim in istà captivitate vulgò {degunt apud gentes ab idololatriâ alienas, ipsique nunc ab idolorum cultu remotissimi sunt. Istud autem: *Quos et tu ignoras*, etc., idem est ac, *quos tu non coluisti*, juxta modum loquendi Scripturæ non insolitum. Sed præterea falsò ponitur Chaldæorum idola Judæis ante captivitatem Babylonicam cognita fuisse. Idololtricos quidem gentium vicinarum cultus sæpius imitati fuerant Hebræi; eos procul dubio latebat religio Chaldæorum, apud quos nondum vixerant; latebat religio Persarum, Medorum, etc. Num, v. g. audierant unquam de Belo et statuâ Nabuchodonosoris à Daniele memoratis, quam statuam adorare solus Daniel cum tribus sociis suis legitur renuisse? Ergo, etc. Porro ad rem non pertinent quæ de cultu in Ecclesiâ catholicâ imaginibus sanctorum et Eucharistiæ exhibito Orobio blaterat. Quippe solutio quæstionis ad hunc cultum spectantis, ubi res cum Judæo habetur, à solutione alterius de adventu Messie tota pendet, et antequàm de ejusmodi negotio inquiratur, satis Judæo esse debet in Ecclesiâ catholicâ unum Deum adorari, nec quidquam nisi in ordine ad ipsum et propter ipsum coli. Atque his omnibus manifestum est quæcumque Deut. 28 de captivitate Judæis in Deum rebellibus imminente Moyses prænuntiat, uni Babylonicæ accommodari.

Ad eandem secundam minoris probationem paulò aliter responderi posset. Nimirum, etsi plura ex iis quæ Moyses cap. 28 Deuter. profert, soli Babylonicæ captivitati convenient, cæteraque ad dispersionem ibi attinentia eidem captivitati possint accommodari; attamen fatendum est multa quoque ex istis quadrare tum in captivitatem decem tribuum à Salmanasare abductarum, quæ cum nunquam redierint, et nullibi reperiantur, gentibus permixtæ censendæ sunt; tum in dispersionem quæ sub Tito cœpit, et etiamnum perseverat. Atque istud reipsa Moysis scopo benè congruit, ut omnia mala populo contumaci eventura vaticinatus fuerit, et inter illa triplicem mox memoratam captivitatem. Jam verò hæc positâ expositione quæ apud interpretes vulgaris est, nihilominus

ruit objectio; nam statim atque captivitas Babylonica præcipuè notatur cap. 28, hoc ipso vaticinium capitis 30 de eâ splendidè exponi potest; quippe, his ita constitutis, habetur insignis eventus ejusmodi vaticinio respondens, videlicet populi è Babylonicâ 70 annorum captivitate in patriam reditus.

2º Nego consequentiam argumenti propositi. esto, non modò ad captivitatem Babylonicam, sed et ad præsentem respexerit Moyses citato capite 30 Deuteronomii; esto, ab istà etiam captivitate Judæos, cum resipuerint, reversuros præviderit; num ideò in solidam de restituendo quondam à Messia ritualium usu expectationem Judæi inducerentur? Minimè. Et enim, hæc in hypothesi, modum specialem quo Judæi ex istà captivitate reversuri sunt, utpote à Moyse non expressum, nobis liceret ex aliis Prophetis determinare, atque eatenus dicere-mus hunc Judæorum reditum esse complendum, quatenus ad fidem Messie reversuri sunt, ejus populo coadunandi et inserendi et legem christianam quâ lex Mosaica, ut dictum est, adimpletur, observaturi.

Obj. 2º. Osee 3, v. 4 et 5, ita legitur: « Dies multos sedebunt filii Israel sine rege, et sine principe, et sine sacrificio, et sine altari, et sine ephod, et sine teraphim; et post hæc revertentur filii Israel et quærent Dominum Deum suum, et David regem suum; et pavent ad Dominum et ad bonum ejus in novissimo dierum. » Volunt Judæi prioris hujus vaticinii parte designari captivitatem in quâ ii nunc affliguntur; posteriori verò significari filios Israel finitâ illâ captivitate convertendos ad Dominum, et duce Davide, rege suo, id est, Messia Davidis filio, esse in terram Chanaan reversuros, ibique legem observaturos. Ergo, inquiunt, à Messia lex Mosaica restaurabitur.

Nego totam hanc Judæorum interpretationem, et dico 1º, illud Osee oraculum ad captivitatem decem tribuum pertinere. Ii enim quos vaticinium hoc respicit, designantur nomine filiorum Israel. *Dies multos*, inquit Propheta, *sedebunt filii Israel*, etc.; *post hæc revertentur filii Israel*. Atqui eò loci nomen *filiorum Israel* non sumitur in significatione illâ communi omnibus Israelitis seu Hebræis, satis in Scripturis usitatâ, sed accipitur pro decem tribubus regnum Israel constituentibus, per oppositionem ad filios Juda. Enimverò versiculo 1 capitis sequentis, qui versus in objectionem allatos immediatè subsequitur, atque toto

eodem capite, vox illa hoc ipso usurpatur sensu, nempe pro decem tribubus; si quidem capite illo nihil aliud quidquam continetur quàm comminationes in filios Israel, et adhortationes ad filios Juda ut eos non imitentur. Lege integrum illud caput; lege et capita 1 et 2, quæ illud unde objectio desumitur præcedunt; in his deprehendes agi solùm de decem tribubus, easque nomine Israel, domus Israel, filiorum Israel ab Oseâ designari. Porro quæ in eo oraculo prædicuntur ad decem tribuum captivitatem optimè adaptantur. Nam decem illas tribus in captivitate fuisse sine rege, sine principe, etc., nemini dubium est; tum autem reversæ sunt et quæsierunt Dominum ac Davidem, seu Messiam, quando ad fidem vocatæ sunt simul cum gentibus quibus jamdudum permiscerentur et in unum confunduntur.

Dico 2º, etsi captivitas ab Oseâ prædicta ad præsentem Judæorum dispersionem et calamitatem attineret, cui reipsa congruit aptissimè, inde nullum causæ suæ emolumentum consequerentur Judæi. Etenim hoc posito, id unum Oseas expressisset, futurum aliquando ut Judæi reverterentur, seu ex hac captivitate liberarentur, ac quærerent Dominum et Davidem regem suum, id est Messiae fidem amplecterentur: sed non ideò prænotasset, quod Judæi sentiunt templum reædificandum, et cæremonias legis, finitâ hac captivitate, locum rursus sub duce Messia habituras. Nihil ergo prophetia Oseæ etiam ad captivitatem præsentem translata continet quod Judæorum causæ patrocinetur; sed ea tantum confirmat doctrinam Apostoli Rom. 11, docentis Judæos ad fidem Christi Domini veri Messiae aliquando convertendos.

Obj. 3º. Lex Mosaica in perpetuum duratura non semel in Scripturis significatur; ergo nunquàm abolenda est. 1º Dist. ant.: In perpetuum duratura, id est tempore diuturno, et tamdiu quamdiu legis illius indoles et natura exigit, concedo; id est sine fine, aut saltem usque ad mundi finem, subdist. Si spectetur quantum ad res cæremoniis et ritibus hujusce legis significatas, concedo: si spectetur quantum ad usum ejusmodi ritualium, nego. Hæ voces, *in æternum, in seculum*; et aliæ similes, juxta ipsos Rabbinos, in Scripturis intelligendæ sunt pro conditione rei de quâ sermo fit, adeò ut aliquando rem sine fine duraturam significant, aliquando diuturnum duntaxat tempus et durationem rerum indoli accommodatam. Cum igitur ritualia legis Mosaicæ mysteriis Christi adum-

brandis et figurandis instituta fuerint, manifestum est adveniente Christo ac legem suam instituyente, ea quantum ad usum inutilia facta fuisse, et cessare debuisse. Cæterum res ejusmodi ritualibus præsignificatæ nunquàm antiquari poterunt. Hinc, 2º Nego suppositum consequentis. Nempe supponitur legem Mosaicam, secundum fidem christianam, simpliciter à Christo abolitam fuisse; atqui id falsum est. Cessavit quidem, inutilis facta est, imò jure prohibita fuit quantum ad usum cæremoniarum et sacrificiorum; sed nihilominus verum est ejusmodi usum eatenus cessasse, quatenus accedente majori rerum perfectione, significationes illis annexæ ritibus impletæ sunt; ac proinde propriè dicendum legem Moysis non fuisse à Christo *solutam, sed adimpletam*.

Objicies 4º Falsò statuimus legem christianam esse Mosaicâ perfectionem. Etenim in quo posita est perfectio cultus divini, nisi in dilectione Dei et proximi quam lex Mosaica disertissimè imperat? ergo legi Mosaicæ non debuit alia substitui. Nego antecedens. Lex à Christo instituta, prout in novo Testamento explicatur, legi Mosaicæ omni ratione præstat. 1º Data est à Christo vero Dei Filio; legem veterem Angelorum ministerio divinitus acceptam tradidit Moyses, insignis quidem Propheta, sed tamen merus homo. 2º Fœdus novum sanguinis Christi effusione confirmatum est, atque hujus sanguinis pretio infinito omnes homines redempti sunt, adeò ut, etiam sub lege naturæ et sub lege Mosaicâ, solo meritorum Christi novæ legis auctoris intuitu collata sint gratiæ divinæ auxilia, nec nisi fide saltem implicitâ in ipsum venturum potuerint olim homines justificationem et salutem adipisci, quemadmodum non nisi per ipsum qui venit nobis Christianis salutem sperare licet. 3º Ritus et sacrificia veteris legis (onerosa præ multitudine populo quem à cæteris populis distinguebant) *infirmæ erant et egenæ elementa*, inquit Apost. Galat 4, v. 9, nempe sanctitatem solùm legalem per se conferebant, et salutem per Christum dandam duntaxat significabant. Nec sanè effusio sanguinis taurorum et vitulorum lege præscripta Deo per se placere poterat. At Christus in cruce *tradidit semetipsum pro nobis oblationem et hostiam Deo in odorem suavitatis*, ut ait sanctus Paulus Ephes. 5, v. 2, ac ministerio sacerdotum novæ legis se se incruentè in omni loco *oblationem mundam* et Deo dignam, juxta vaticinium Malachiæ cap. 1, v. 11, immolat. Ritus etiam paucos instituit, nempe sacramenta, quæ

nomine suo ministrari voluit, et sanctitatem veram ea, ut par est, suscipientibus conferre. 4^o Fidem præcipit lex nova magis evolutam et ad plura extensam. Christus scilicet multa altissima de Dei naturâ et mysteriis nos edocuit; plura sub umbris et figuris olim latitantia apertè revelavit. 5^o Demùm licet præcepta moralia in amore Dei et proximi lege Moysis sæpissimè inculcato contineantur; attamen quæ ad hunc amorem pertinent clariùs à Christo explicata sunt, v. g., inimicos esse diligendos, benefaciendum odientibus, orandum pro persecutoribus, etc.; sanctissima insuper et saluberrima ab eo consilia addita sunt, ut terrenorum et caducorum bonorum posthabendam esse rationem, quærenda verò cœlestia et æterna; ergo.

Ad probationem, non est antiquata, nec antiquari potuit lex Mosaica quantum ad dilectionem Dei et proximi; sed duntaxat quantum ad ritus figurativos, quorum loco substituta sunt 1^o sacrificium incruentum in quo Christus ipse victima Deo acceptissima pro nobis mysticè immolatur; 2^o ritus seu sacramenta nomine Christi ministranda, et ex passionis ejus meritis vim sanctificandi juxta ipsius institutionem consecuta.

At, inquires, fortè, tantam novæ legi perfectionem competere, undenam Judæo suadebis? Resp. hoc unum fuisse in objectione propositum, nempe legem novam prout à Christo instituta creditur, non posse esse Mosaicâ perfectiorem; proindeque mox dicta solvendæ objectioni sufficiunt. Cæterùm hæc tanta perfectio, etsi tota spiritualis sit et cœlestis, non temerè tamen à Christianis admittitur; nam Christo et Apostolis sublimem hanc ac divinam doctrinam tradentibus credendum evincunt tum insignia quæ ab eis patrata sunt miracula, tum Malachiæ vaticinium de *oblacione mundâ* in omni loco apud gentes Deo sacrificandâ, tum aliæ Prophetiæ in quibus lex nova describitur ut lex gratiæ et religio sanctificans, tum denique alia argumenta quæ religionem Christi evidenter credibilem reddunt.

De vocatione gentium ad fidem christianam. — Gentes ad veram religionem à Messiâ revocandas et adducendas, idque à Prophetis esse prænuntiatum, confitentur Judæi; verùm antea Messiam Gog et Magog cunctosque hostes suos bello domituros et regnum temporale Israel restitutum censent. Quapropter Prophetias gentium vocationem spectantes ad eventum hactenus perductas non fuisse obfirmatâ mente

asserunt. Regnum Messiæ futurum spirituale, non terrenum, ex Prophetis mox ostensuri, interim duo hic præstabimus: 1^o Plura de vocatione Gentium adducemus sacrarum Vatum oracula in quibus observare erit, legis, doctrinæ et prædicationis mentionem sæpè fieri, nullam belli et armorum aut regni temporalis. 2^o His vaticinationibus perfectè respondere conversionem gentium, à Christo Domino inchoatam, et Apostolorum eorundemque successorum laboribus et prædicatione peractam.

CONCLUSIO. Multis veteris Testamenti oraculis, quæ in Christo Jesu impleta sunt, gentium ad verum Dei cultum vocatio et conversio tanquam fructus adventus Messiæ prænuntiata fuit.

Probatur prima pars, scilicet vocationem gentium ad verum Dei cultum fructibus adventus Messiæ sæpissimè à Prophetis accenseri. 1^o Ex promissionibus Abrahamo, Isaaco et Jacobo factis à Deo, futurum ut *in eorum semine benedicerentur omnes gentes terræ*. Ibi enim de Messiâ agi fatentur Judæi in lib. R. Samuelis, *Chasidim* inscripto, et ex eo satis apparet quòd solus Messias esse possit eximia illa et præcellens Patriarcharum proles ex quâ in gentes universas manare debeat insignis benedictio; Messiæ namque soli ejusmodi character attribuitur in Scripturis. Porro benedictio insignis gentibus à Messiâ afferenda vocationem earum ad verum Dei cultum includat necesse est; ergo, etc.

2^o Ex Psalmis. Ps. 2, v. 8: « Postula à me, et dabo tibi gentes hæreditatem tuam. » Psal. 21, passione et resurrectione Christi enarratis, additur v. 28: « Convertentur ad Dominum universi fines terræ, et adorabunt in conspectu ejus universæ familiæ gentium. » Psal. 44, v. 17: « Constitues eos (Apostolos) principes super omnem terram... propterea populi confitebuntur tibi in æternum. » Psal. 71, v. 11: « Adorabunt eum omnes reges terræ, omnes gentes servient ei; et v. 17: Benedicentur in ipso omnes tribus terræ; omnes gentes magnificabunt eum. » Denique ut alia plurima omittam, Psal. 97, v. 2: « Notum fecit Dominus salutare suum (Christum); in conspectu gentium revelavit justitiam suam... Viderunt omnes termini terræ salutare Dei nostri. »

3^o Ex Isaiâ, apud quem vaticinia de hoc argumento frequentissima et evidentissima habentur. Cap. 2, v. 2: « Erit in novissimis diebus præparatus mons domus Domini in vertice montium, et elevabitur super colles, et

« fluent ad eum omnes gentes, et ibunt populi
 « multi, et dicent : Venite, et ascendamus ad
 « montem Domini, et ad domum Dei Jacob, et
 « docebit nos vias suas, et ambulabimus in se-
 « mitis ejus; quia de Sion exhibit lex, et ver-
 « bum Domini de Jerusalem : et judicabit gen-
 « tes et arguet populos multos, etc. » quibus
 simillima et ferè ad verbum repetit Michæas,
 cap. 4. Uterque autem Propheta significat
 Christum aliquando regnaturum et judicatu-
 rum gentes, doctrinamque illius de Sion exeun-
 tem seu Judæis primùm traditam, ad gentes
 postea perferendam esse, et ab eis recipiendam.
 Hunc textum de Messiâ intelligunt Kimchius,
 Aben Ezra, et alii Judæi. Eodem Isaïæ cap.,
 v. 17, 18 et 20 : « Elevabitur Dominus solus in
 « die illâ, et idola penitus conterentur... in
 « die illâ projiciet homo idola argenti sui, et
 « simulacra auri sui, quæ fecerat sibi ut ado-
 « raret, talpas et vespertiliones. » Paria legun-
 tur cap. 31, v. 7. Cap. 41, v. 9 et 10 : « Re-
 « pleta est terra scientiâ Domini, sicut aquæ
 « maris operientes. In die illâ, radix Jesse, qui
 « stat in signum populorum, ipsum gentes de-
 « precabuntur; » quæ ad Messiam pertinent
 juxta Targumistas, Talmud et Rabbinos. Cap.
 42, v. 1 et seqq. : « Ecce servus meus... judi-
 « cium gentibus proferet... legem ejus insulæ
 « expectabunt... Ego Dominus vocavi te in jus-
 « titiâ, et apprehendi manum tuam, et servavi
 « te, et dedi te in fœdus populi, in lucem gen-
 « tium... Cantate Domino canticum novum, laus
 « ejus ab extremis terræ; qui descenditis in
 « mare et plenitudo ejus, insulæ et habitatores
 « earum. » Cap. 49, v. 6 et seqq. : « Parùm est
 « ut sis mihi servus ad suscitandas tribus Jacob,
 « et feces Israel convertendas. Ecce dedi te in
 « lucem gentium, ut sis salus mea usque ad
 « extremum terræ... Reges videbunt, et con-
 « surgent principes, et adorabunt... Dedi te in
 « fœdus populi, ut suscitares terram, et possi-
 « deres hæreditates dissipatas... Ecce isti de
 « longè venient, et ecce illi ab aquilone et mari,
 « et isti de terrâ australi... et dices in corde
 « tuo : Quis genuit mihi istos?... hæc dicit Do-
 « minus Deus : Ecce levabo ad gentes manum
 « meam, et ad populos exaltabo signum meum.
 « Et afferent filios tuos in ulnis, etc. » Cap. 55,
 v. 4 et 5 : « Ecce testem populis dedi eum, du-
 « cem ac præceptorem gentibus. Ecce gentem,
 « quam nesciebas, vocabis, et gentes quæ te
 « non cognoverunt, ad te current. » Cap. 59,
 v. 19 : « Timebunt qui ab occidente nomen
 « Domini et qui ab ortu solis, gloriam ejus,

« cùm venerit... Sion redemptor »; id est
 Messias, interpretibus ipsis Judæis in lib. *San-
 hedrin*, et in *Echa rabbathi*. Messix quoque
 vindicatur in *Bereschith rabba* totum caput 60,
 in quo hæc leguntur v. 3, et seqq. : « Ambula-
 « bunt gentes in lumine tuo, et reges in splen-
 « dore ortus tui. Leva in circuitu oculos tuos,
 « et vide; omnes isti congregati sunt, venerunt
 « tibi. Filii tui de longè venient, et filix tuæ
 « de latere surgent. Tunc videbis et afflues, et
 « mirabitur et dilatabitur cor tuum, quando
 « conversa fuerit ad te multitudo maris, forti-
 « tudo gentium venerit tibi. »

4^o Ex aliis Prophetis. Jerem. 31, v. 17 : « In
 « tempore illo vocabunt Jerusalem solium Do-
 « mini et congregabuntur ad eam omnes gen-
 « tes in nomine Domini in Jerusalem, et non
 « ambulabunt post pravitatem cordis sui. »
 Ose. 2, v. 24 : « Dicam non populo meo :
 « Populus meus es tu, et ipse dicet : Deus
 « meus es tu. » Joel. 2, v. 28 : « Effundam
 « spiritum meum super omnem carnem. »
 Sophon. 2, v. 11 : « Adorabunt eum viri de
 « loco suo, omnes insulæ Gentium. Agg. 2,
 « v. 8 : Et movebo omnes gentes, et veniet
 « desideratus cunctis gentibus. » Zach. 9, v.
 10 : « Loquetur pacem gentibus, et potestas
 « ejus à mari usque ad mare, et à fluminibus
 « usque ad fines terræ. » Malach. 1, v. 11 :
 « Ab ortu solis usque ad occasum, magnum
 « est nomen meum in gentibus, et in omni
 « loco sacrificatur, etc. »

Ex tot testimoniorum sylvâ, quibus alia
 multa adjici possent, patet quàm meritò doc-
 tissimus Huetius prop. 9, cap. 158, n. 1, ob-
 servaverit, « rerum omnium quas prænuntiari
 « hominibus voluit Deus, nullam omninò esse,
 « in quam prædicendam majori consensu cre-
 « brioribusque Prophetiis conspirârint sacri
 « Vates, quàm gentium vocationem ad notitiam
 « veritatis. »

Probatur secunda pars, videlicet Evangelii
 prædicatione impletas fuisse has Prophetias.
 Ut enim ejusmodi vaticiniis prædicatio fidei
 Christianæ omninò cohæreat, quatuor requi-
 runtur et sufficiunt, 1^o Doctrinam Christi
 idolorum cultui summè adversam, in perfectâ
 et sincerâ unius supremi Numinis adoratione,
 in mysteriorum altissimorum fide, in sanctissi-
 mis morum præceptis esse positam; 2^o Hanc
 doctrinam à Christo et ab Apostolis primùm
 Jerosolymis, et in totâ Judæâ fuisse annuntia-
 tam; 3^o eandem ad alias nationes, ad populos
 Judæis olim ignotos, ad insulas et habitatores

earum, in idololatriæ ruinam, nec sine fructibus uberrimis, inde perlatam fuisse et hodiè adhuc perferri; 4^o etsi ex hominum vitio non tot ferat fructus Evangelii prædicatio quot producendis nata est, fidem tamen christianam, si morem loquendi usitatissimum et verissimum sequamur, dicendam esse toto orbe terrarum obtinere; atqui hæc certasunt. 1^o Idolorum abjectionem, vitæ sanctitatem, unius Dei in spiritu et veritate adorationem, mysteriorum divinorum et altissimorum fidem, lege christianâ præcipi nemo dubitaverit. Atque hinc Evangelii prædicatione, ut omnes nôrunt, idololatria extincta est. 2^o Evangelium Christi fuisse primùm à Christo et Apostolis in Judæâ et Jerosolymis prædicatum, constat pariter ex evangelicâ historiâ, ex Actibus Apostolorum, et ex omnium consensu. Notandum inprimis istud Christi Domini Act. 1, v. 8, Apostolos alloquentis: *Accipietis virtutem supervenientis Spiritûs sancti in vos; et eritis mihi testes in Jerusalem, et in omni Judæâ et Samariâ, et usque ad ultimum terræ.* Is prædicandi Evangelii ordo à Christo præscriptus, et ab Apostolis post receptum Jerosolymis Spiritum sanctum observatus (1), mirè coheret mox adductæ vaticinationi Isaïæ 2, v. 3: *De Sion exhibit lex, et verbum Domini de Jerusalem. Et judicabit gentes, etc.*, quibus et alia concinunt ex laudatis oraculis. 3^o Certum quoque est ex Judæâ ad alias nationes, ad varias orbis partes, ad insulas, ad populos antea Judæis incognitos manasse doctrinam evangelicam. Nam quòd à Judæâ manaverit, constat ex eo quòd, ut modò diximus, christiana fides Judæis primùm annuntiata fuerit. Vide capita 10 et 11 Actuum Apostolorum. Ibid. cap. 13, v. 46 et 47, hæc habentur: « Constanter Paulus et Barnabas « dixerunt: Vobis oportebat primùm loqui « verbum Dei; sed quoniam repellitis illud, et « indignos vos judicatis æternæ vitæ ecce con- « vertimur ad gentes; sic enim præcepit nobis « Dominus: Posui te in lucem gentium (Isai. « 49, v. 6), ut sis in salutem usque ad extre- « mum terræ. » Similia legere est Act. 28 v. 28, et Rom. cap. 11. Quòd autem ad multas nationes et per varias orbis partes ab ipsis Apostolis Evangelium prædicatum fuerit, testis est S. Paulus Rom. 1, v. 8: *Fides vestra, inquit, annuntiatur in universo mundo; et in Epist. ad Coloss. 1, v. 23: Prædicatum est (Evangelium) in universâ creaturâ quæ sub cælo*

(1) Act. cap. 2, v. 10, 11, cap. 13, v. 46 et 47, cap. 28, v. 28, et alibi.

est. Ipse Act. 9, v. 15, dicitur electus à Christo ad portandum nomen ipsius *coram gentibus, et regibus, et filiis Israel.* Mirum autem quot ab ipso, præconis Christi munus implente, regiones peragratae sunt, ut ex iisdem actibus Apost. et ex variis ejus Epistolis colligere est. De aliis Apost. dicitur Marci 16, v. 20: *Profecti prædicaverunt ubique, Domino cooperante, et sermonem confirmante sequentibus signis.* Et Rom. 10, v. 18: *Sed dico: Numquid non audierunt? Et quidem in omnem terram exivit sonus eorum, et in fines orbis terræ verba eorum.* Porro eorum successores eidem labori incubuerunt, atque etiamnum gentes remotissimas et recens detectas fide Christi imbui curant, ita ut nullæ sint nationes ad quas, saltem successivè, lux Evangelii non perveniat. Quòd denique in idololatriæ ruinam, nec sine fructibus uberrimis doctrina christiana ad gentes perlata sit, constat ex ipso eventu. Nemo nescit ante Christum cunctas gentes falsorum numinum et idolorum cultui addictas fuisse; nemo negaverit virtute prædicationis Evangelii idololatriam fuisse disperditam, et unius veri Dei inductam agnitionem; ergo. 4^o Licet fidem christianam multi nolint amplecti, quod ex eorum vitio et malitiâ; non ex defectu christianæ religionis oriri satis demonstrant vel ipsi eventus prædicationem evangelicam subsecuti; licet religio christiana totum orbem sensu physico non occupet; eumque non nisi successivè hoc sensu sit occupatura; dicendum tamen, si moraliter et juxta consuetum loquendi usum rem expendamus, hanc religionem ubique obtinere. Scilicet quâ ratione dici solet Alexandrum Magnum et postea Romanos orbi universo imperasse, quemadmodum ipse Daniel cap. 7, v. 23, et cap. 8, v. 5 et 8, eorundem imperia cunctis terrarum partibus diffundenda vaticinatur; eodem sensu, imò à fortiori christiana religio universum orbem invasisse dicenda est. Enimverò non tanta orbis pars in potestatem Alexandri et Romanorum redacta est quanta fidei christianæ subjicitur, et præterea apud nationes infideles, apud populos remotissimos, inter ipsosmet homines feros et barbaros ac in regionibus recens detectis Christiani multi sunt et præcones Evangelici; ergo, etc.

Obicies 1^o « Deus à majoribus mundi partibus ignoratur, gentibus in idololatriæ luto « hærentibus, » vel Mahumeticâ superstitione infectis. Quid quòd in Africâ et in Asiæ partibus quæ Turcis et Sarracenis parent, « Chris-

« tianismo penitus deleta, incolæ omnes ad « Mahumeticum cultum mutati fuerunt ? » 2° « Christianismus totus in varias sectas divisus est » de rebus fidei inter se dissidentes; quod argumento est non ita claram, ac volunt Christiani, fuisse adductam à Christo revelationem. 3° « Vitia in toto genere humano « non minus regnant, quàm ante Christi « adventum; » Christiani non obsequuntur Christi legibus, plerique quam verbis profitentur fidem operibus negant. 4° Christianorum maxima pars idololatriæ est dedita, colunt Eucharistiam et sanctorum imagines; atque in Hispaniâ et Lusitaniâ et alibi etiam ad hunc idololatricum cultum adiguntur Judæi; ergo, etc. Ita post cæteros Orobius in tertio suo scripto passim, præcipuè quæsito 1, n. 19; quæsit. 2, n. 3; quæs. 3, n. 4; et quæs 4, n. 4.

Ad primum, dist. Deus à majoribus mundi partibus ignoratur, etc., ex vitio et malitiâ hominum, et ita tamen ut vera Christi Ecclesia Evangelium infidelibus annuntiari etiamnum curet, et singulis Mahumetarum sectis aut idololatriâ superstitie multò sit diffusior, concedo; ex defectu legis evangelicæ, vel ita ut vera Christi Ecclesiâ præcones evangelicos non mittat, et minùs diffusa sit, quàm, etc., nego. Jam indicavimus principia quæ paucis hùc applicanda sunt, quæque à theologis, ubi de catholicitate Ecclesiæ disserunt, ex professo statuuntur et explicantur. 1° Cum ex fide et ex eventu compertum sit prædicationi legis evangelicæ uberrima gratiarum esse annexa auxilia, quibus ad fidem amplectendam auditores moveantur; cùmque Deus jusserit, Evangelii lumen ad omnes populos ferri, atque istius muneris obeundi ardens studium ipse multis in Ecclesiâ semper inspiraverit et etiamnum inspiret; sequitur non legis evangelicæ vitio, sed soli hominum malitiæ et improbitati illud tribuendum, quòd magnis obicibus christianæ religionis propogatio retardetur, quòdque multi hanc fidem sibi annuntiatam nolint amplecti. Proindeque hoc concedendum est, datam à Christo esse legem de se idoneam universo generi humano, nisi ipsum diversimodè obsisteret, ad salutem ducendo. Vera Christi Ecclesia, ea nempe societas quæ varias inter societates christianas ex ejus sinu egressas, unitate, antiquitate, et auctoritate eminet, qualis est sola Ecclesia romana; hæc, inquam, Ecclesia, ut omnes nôrunt, magnâ orbis parte splendide abhuc diffunditur, multòque diffusior est unâquâque Mahumetanorum sectâ, et idololatriâ

superstite. Quid quòd apud sectas à se separatas magnam sibi hominum multitudinem vindicat, nempe omnes infantes baptizatos, et quotquot ex adultis fidem præcipuorum articulorum servant, invincibilique ignorantia à schismate aut hæresi excusantur? Istud denique veræ Ecclesiæ est etiam proprium, quod studio verbi evangelici apud infideles divulgandi sola flagret, quòdque iis ipsis in locis quibus Mahumetismus aut idololatria dominantur, multos numeret veros filios, multos fidei suæ prædicatores. Ergo licèt idololatria et Mahumetismus magnam terrarum partem inficiant, vera nihilominus Christi Ecclesia sensu morali et usitato dicenda est etiamnum toto orbe diffusa. 3° Diffusio quantacumque seu Mahumetismi seu idololatriæ superstitis non impedit quominus christiana fides maximâ orbis terrarum parte successivè hactenùs floruerit, et ad extremos mundi fines, ad populos non ita pridem cognitos perferatur et annuntietur; proindeque Prophetiæ ad vocationem gentium attinentes, iis quæ à Christo et Apostolis eorumque successoribus patrata sunt, jam maximâ saltem ex parte evidentissimè completæ sunt, et adhuc pergunt compleri. 4° Nusquàm vaticinati sunt Prophetæ nullum fore populum qui idem à se susceptam adulteraret aut etiam abjiceret. imò in poenam abusùs fidei populis aliquando id donum subducitur, juxta istud Christi Judæos alloquentis Matth. 21, v. 43 : *Auferetur à vobis regnum Dei, et dabitur genti facienti fructus ejus.* Nihil itaque prophetiis adversi contigisset, etiamsi Mahumetana superstitio è locis in quibus illa nunc viget, christianam religionem penitus exturbâset; quod cæterà falsum est; nam præter Græcos schismaticos quorum plures materialiter tantum, ut aiunt, schismati adherent, ac proinde Ecclesiæ vindicantur, sunt et illis in regionibus complures Catholici.

Ad secundum, distingo : Christianismus in varias sectas divisus est ex hominum culpâ, et ita ut inter illas societates una præcæteris diffusionem suam, antiquitatem, et auctoritatem emineat, concedo; secùs, nego. Oriuntur hæreses non ex defectu [revelationis claræ et mediorum] ad verbi Dei intelligentiam necessariorum, sed ex hominum vitio, qui ubi cupiditatibus, superbiâ aut præjudiciis abripiuntur, de rebus etiam clarissimis disceptant, et sæpenumero in luce meridianâ perspiciuntur caligare. Non modò mysteria altissima, sensum veterum Prophetiarum, cultum sanctissimum et illibatam morum doctrinam Christus et Apostoli docuerunt

sed et revelationis custos et interpres instituta est à Christo Ecclesia, cujus pastoribus adfuturum se promisit *omnibus diebus usque ad consummationem seculi*, Matth. 28, v. 1. Nullæ fuissent hæreses si ejusmodi auctoritati tam disertè in novo Testamento expressæ, omnes, ut Christus jusserrat, morem gessissent. Brevi cessarent illæ si omnes filii Ecclesiæ rebelles ad ejus obsequium, pro eo ac deberent, reverterentur. Nec certè huic sponsæ Christi desunt notæ et characteres quorum ope à rectis corde agnosci possit. Ergo ex solo hominum vitio hæreses et schismata nascuntur. Cæterum rebellionibus hujusmodi, quæ adversus Ecclesiam excitantur, quasque Christus et Apostoli non semel prænuntiaverunt, Judæus à christianâ fine non avertatur; quin imò miretur Ecclesiam illam à quocumque hostium genere intus et foris perpetuò lacessitam, usque tamen, juxta Christi promissa, stabilem manere et incolumen.

Ad tertium, si Christiani multi legibus Christi non obtemperant, id ipsis vitio vertendum, non legi Christianæ quâ redarguuntur, et quam possent implere, si mediis sibi ad id concessis uterentur. Non ideò tamen dici possunt fidem christianam non profiteri; quemadmodum Judæi, qui non inficiantur se in præcepta legis moralia sæpe peccare, non ideò dicendi sunt legi Moysis nuntium misisse. Cæterum Ecclesiam malos bonis admixtos sinu suo esse complexuram Christus clarè prædixit pluribus in locis, idemque Prophetæ supponunt, dum terribilem malis judicem in fine mundi Dominum futurum vaticinantur. Vide Isaïæ 13, v. 9 et seq., et cap. 66, v. 15 et seq.; Joel. 1, v. 2 et seq.; Sophon. 3, v. 8, etc.

Ad ultimum, jam observatum est, Christianos omnes in eo inter se consentire quòd unum Deum adorandum esse profiteantur, et ad eum referant omnem cultum Religionis. Quòd verò hæc fides, hæc unius Dei oratio, cum adoratione Christi in Eucharistiâ et cultu inferiore exhibito sanctis, optimè stare possit, facile fateretur Judæus, si semel, quod caput est, Jesu Christi veri Messias fidem amplecteretur.

De Messias regno spirituali, ubi simul de ejus donis et officiis juxta Prophetas. — Observa 1º, tantò regnum spirituale, de quo nunc disserimus, terrenis præcellere imperiis, quantò cælestia et divina humanis ac caducis præstant. In regno terreno leges ad utilitatem corporum conducentes feruntur; bona temporalia, pax temporalis subditis accersuntur; ferro repelluntur hostes et subiguntur; præmiis tempo-

ralibus cives de republicâ benè meriti donantur, tur, pœnis temporalibus coercentur et puniuntur mali; omnia tandem certo tempore concluduntur. At ubi inquirimus an Messias ex Prophetis rex spiritualis esse debuerit, regem spiritualem intelligimus eum, qui sanctissimus legum lator instituta ad cultum Dei, et salutem commodumque animarum pertinentia tradit; qui potestatem animabus nostris infidantium domitor, peccatoris cum Deo idoneus reconciliator, et unicus mediator, omnisque in cælo et in terrâ creaturæ Dominus, offert, præbet hominibus media quibus sanctificentur, in gratiam Dei redeant, de hostibus salutis suæ invisibilibus triumphent, cupiditatibus suis frena injiciant, sicque pacem super omnia bona terrena desiderabilem sibi concilient; qui severus et æquissimus vindex, et magnificus munerum largitor, malos pœnis spiritualibus et suppliciis æternis plectit, bonos verò cælestibus præmiis remunerat, et regni sui in cælis æternum participes facit.

Observa 2º, nemini dubium esse posse quin Christus in novo Testamento ejusmodi rex spiritualis prædicetur. Ipse docuit se esse regem, Matth. 27, v. 11; Marc 15, v. 2, etc. et regnum suum non esse de hoc mundo, Joan. 18, v. 36. Dixit Matth. 28, v. 18, *datam sibi esse omnem potestatem in cælo et in terrâ*, atque ex hac suâ auctoritate, ibid. v. 19, Apostolos misit qui docerent quæcumque mandaverat, et baptismo sanctificarent omnes gentes, ipsis eorumque successoribus auxilium jube et perenne pollicitus. Alibi, nempe Matth. 18, v. 18, et Joan. 20, v. 23, potestatem ligandi et solvendi, retinendi et dimittendi peccata ipsis impertivit. Sacerdos novi ordinis, *tradidit semetipsum pro nobis oblationem et hostiam Deo*, Ephes. 5, v. 2, et sanguinis sui effusione homines redemit ac Deo reconciliavit *medium parietem maceris solvens, et interficiens inimicitias in semetipso*, Ephes. 2, v. 14 et 16. Legem instituit sanctissimam; Sacramentorum suorum usui vim sanctificandi annexit; media salutis uberrima largitur; arma præbet spiritualia quibus dæmones vincantur, mundi illecebræ superentur, cupiditates reprimantur, pax animæ acquiratur, regnum cælorum comparetur. Impios conscientis stimulis exagitat, bonorum spiritualium privatione in hac vitâ sæpè punit, et supplicio æterno afficit in alterâ; justos verò hic gratiæ suæ unctione solatur et reficit, et post mortem in consortium sempiternæ suæ felicitatis cooptat. Hæc et alia ejusmodi, quæ in libris novi

fœderis passim occurrunt, manifestè ostendunt characteres omnes regis spiritualis modò descriptos Jesu Christo secundùm doctrinam ab Evangelistis et Apostolis ad nos transmissam competere.

Observa 3^o, quæstionem non esse, an Messiam futurum esse regem Prophetæ prædixerint: de eo nobis Judæi consentiunt, Messiam soliti *Regem* cognominare. Sed controversia est, an regnum illud spirituale, quod Christo ut homini fides adjudicat, vaticiniis Prophetarum ad regnum Messiae attinentibus respondeat. Id Rabbini negant, rati dominationem Israelis in terrâ Chanaan à Messîa juxta Prophetas esse restituendam, Jerusalem ejus regni sedem futuram, ferro et armis gentes ab eo domandas regesque subigendos; tum pacem temporalem ubique obtenturam, ac populos universos legem Mosaicam amplexuros, et ad templum, quod tertio extruendum sperant, munera et hostias allaturos. Docent ex adverso Christiani divina sacrorum Vatum oracula Messiam spectantia, dùm ad terrenam et temporaneam dominationem applicantur, dignitate suâ spoliari, demonstrantque non nisi de regno spirituali hæc posse explicari ac proinde in Christo Domino adimpleta fuisse. His præmissis.

CONCLUSIO. Vaticinia regni Messiae prænuntia de regno spirituali intelligenda sunt.

Prob. Vaticinia in quibus characteres regni spiritualis imperio Messiae adscribuntur, et quæ eatenus aliis pluribus sacrorum Vatum oraculis concordant, quatenus de regno spirituali intelliguntur, ea, inquam, vaticinia de regno spirituali accipi necesse est. Quippe si Prophetis Messiae regni prænuntiis hæc duo congruere ostendantur, quis dubitaverit metaphoricè et figuratè sumenda esse illa loca in quibus terrenum Messiae regnum describi volunt Judæi?

Atqui ut à posteriori exordiar, 1^o eatenus vaticinia regni Messiae prænuntia aliis Prophetarum oraculis concordant, quatenus de regno spirituali intelliguntur. Enimverò in allatis superius, præsertim parag. 3 perspicuis vaticiniis Davidis, Isaïæ, Danielis, Zachariæ, etc., prædictus est Messias multa ab inimicis suis perpassurus, contemptui habendus, crucifigendus, necandus; et urbs Jerusalem templumque prænuntiata sunt versùs ejus ætatem destruenda; quibus omnibus evidentissimum est omninò concordare Prophetias regni Messiae prænuntias, si istas cum Evangelistis et Apostolis

de regno spirituali mox descripto interpretemur. Quid quòd ejusmodi interpretatione cuncta hæc vaticinia sese invicem mirificè illustrant, sensumque referunt sublimem, mysteriis altissimis plenum, in omnibus mirabiliter coherentem, quem solus Deus aperire potuerit. Sin autem regnum Messiae quod Prophetæ præsignârunt, velis esse terrenum, non minùs liquidum est omnem conciliandorum inter se vaticiniorum spem penitus adimi; Rabbiorum namque interpretationes de summâ et universali terrestri imperii Messiae gloriâ et felicitate, de victoriis ab eo reportandis, de cunctis gentibus et regibus potestati ejus submittendis, de pace temporali sub imperio ejusdem toto orbe obtenturâ, ejusmodi, inquam, interpretationes quomodò stabunt cum oraculis Messiam pauperem, derelictum, in manus hostium suorum traditum, opprobriis saturandum, cruci affligendum, occidendum exhibentibus? Quomodò urbs Jerusalem, regni Messiae futura sedes, quomodò ad templum munera et hostiæ à cunctis gentibus afferenda, quandoquidem tempora Messiae Jerosolymorum et templi dissipatione, populique in consummationem desolatione esse signanda prædixerunt Prophetæ? Ergo de regno spirituali interpretemur necesse est vaticinia regni Messiae prænuntia. Miserum Rabbiorum quorundam effugium, duos Messias, alterum obscurum et morti dandum, alterum victoriis et restauratione regni Israel insignem futurum distinguendum, jam antea præclusimus.

2^o Etsi non rarò Vates sacri sub imaginibus terrenorum regnorum imperium Messiae describant; attamen iis characteribus illud quoque sæpius exprimunt, quibus regnum spirituale designatur. Præsignificaverunt enim 1^o, regnum Messiae justitiâ, æquitate et sanctitate commendabile futurum. Psalm. 44, v. 7 et seq.: « Sedes tua, Deus in seculum seculi; virga directionis, virga regni tui. Dilexisti justitiam et odisti iniquitatem; propterea unxit te, Deus, Deus tuus, oleo lætitiæ, etc. » Daniel 9, v. 24 et 27: « Septuaginta hebdomades abbreviatæ sunt.... ut.... deleatur iniquitas, et adducatur justitia sempiterna, et impleatur visio et Prophetia, et ungatur Sanctus sanctorum.... Confirmabit autem pactum multis hebdomadâ unâ, etc. » In his regni Messiae descriptionibus commemorantur æquitas, sanctitas, peccati abolitio, *justitia* seu religio *sempiterna* adducenda, nihil verò de splendore terreno et opibus habetur, imò alibi legitur Messiam pau-

perem vitam acturum, humilem, abjectum, despectum futurum, etc. vide supra, parag. 3, passim.

2^o Tribuunt Messiae ea officia, eas dotes, quæ sunt regis spiritualis, nempè quòd legem sanctam, novum fœdus esset instituturus; quòd concionatoris, doctoris, magistri, pastoris, Prophetæ, sacerdotis, munia sustenturus et miracula editurus; quòd pacem eximiam et sempiternam allaturus, Isai 9, v. 6 et 7: « Vocabitur nomen ejus.... Pater futuri seculi, Princeps « pacis. Multiplicabitur ejus imperium, et pater « cis non erit finis, etc. Cap. 16, v. 1: « Emitte « agnum, Domine, dominatorem terræ. » Mich. 5, v. 5: « Et erit iste Pax. » Agg. 2, v. 10: « Et in loco isto dabo pacem, etc. » Quòd crimina esset expiaturus, pro peccatoribus rogaturus, homines sanguine suo redempturus; Quòd salutem æternam allaturus, Isaia 45, v. 17: « Israel salvatus est in Domino salute æternâ; « non confundemini et non erubescetis in seculum seculi. » et cap. 51, v. 6: « Salus « mea in sempiternum erit, etc. » Quòd esset potestates tenebrarum spoliaturus mortemque et inferos victurus, Oseæ 13, v. 14: « De manu « mortis liberabo eos, de morte redimam eos; « ero mors tua, ô mors, morsus tuus ero, inferne, etc. » Itaque cùm hæc omnia officia simul sumpta regi duntaxat spirituali competant, sequitur, etc.

3^o Durationem æternam regno Messiae Vates sacri assignant, inprimis verò Daniel, cap. 2, v. 44, his verbis: « In diebus regnorum illorum suscitabit Deus cœli regnum quod in æternum non dissipabitur.... Et ipsum stabit « in æternum » et cap. 7, v. 13 et 14: « Ecce « cum nubibus cœli quasi filius hominis veniebat.... et dedit ei (Antiquus dierum) potestatem, et honorem, et regnum; et omnes populi, tribus, et linguæ ipsi servient: potestas « ejus, potestas æterna quæ non auferetur, et « regnum ejus quod non corrumpetur. » Igitur caduca non est et temporalis potestas Messiae, sed æterna et nunquàm auferenda; atqui quod terrenum est, caducum sit et temporale necesse est, non æternum et nunquàm auferendum; ergo etc.

4^o Prophetæ præsignarunt dona spiritualia à rege Messia esse distribuenda. Prædixerunt scilicet peccatorum remissionem, et gratiam justificationis per ipsum concedendam, Psalm. 129, v. 7, 8: « Copiosa apud eum redemptio, et ipse « redimet Israel ex omnibus iniquitatibus ejus. » Isai 53, v. 11: « Justificabit ipse justus servus

« meus multos, et iniquitates eorum ipse portabit. » etc. 61, v. 1: « Spiritus Domini super me, eò quòd unxerit Dominus me, ad annuntiandum mansuetis misit me, ut mederer « contritis corde, et prædicarem captivis indulgentiam, et clausis apertionem; » quæ RR. Saadias Gaon, et David Kimchi in lib. Radicum ad Messiam referunt. Vide etiam Isai. 42, v. 6 et 7, et cap. 49, v. 8 et 9, etc. Zach. 3, v. 8 et 9: « Adducam servum meum Orientem.... « et auferam iniquitatem terræ illius in die unâ. » Prædixerunt Baptismi sanctificantis institutionem, Isai. 42, v. 3: « Haurietis aquas in gaudio « de fontibus Salvatoris. » Ezech. 36, v. 25: « Effundam super vos aquam mundam, et « mundabimini ab omnibus inquinamentis « vestris. » Zachar. 13, v. 1: « In die illâ « erit fons patens domui David et habitantibus Jerusalem in ablutionem peccatoris. » Prædixerunt legis divinæ cognitionem hominibus infundendam, ac uberrima ad eam implendam gratiarum auxilia regnante Messia esse impertienda. Jerem. 31; v. 33 et 34: « Hoc « erit pactum quod feriam cum domo Israel; « post dies illos, dicit Dominus: Dabo legem « meam in visceribus eorum, et in corde eorum « scribam eam... Omnes cognoscent me à minimo eorum usque ad maximum, ait Dominus » et loco mox citato Ezechielis: « Effundam super « vos aquam mundam.... et dabo vobis cor novum et spiritum ponam in medio vestri; et « auferam cor lapideum de carne vestrà, et « dabo vobis cor carneum, et spiritum meum « ponam in medio vestri (Hebr. *in interiore vestro*), et faciam ut in præceptis meis ambuletis, etc. » Similia ab eodem dicta fuerat, cap. 11, v. 19. Ergo imperio Messiae alligantur dona spiritualia, propriisque regno spirituali characteribus imperium illud describitur, proindeque, etc.

SOLVUNTUR OBJECTIONES. — Obj. 1^o: Clarè à Prophetis prædictum est Messiam futurum Dominum, Dominatorem, bellatorem, victorem, servatorem, ducem, regem, principem, etc. ergo, etc. Resp. 1^o, in pluribus hujusmodi Prophetiis Messiae gloriam exprimentibus agi de secundo Messiae adventu, quem cum splendore et majestate futurum Christus etiam nos docuit. R. 2^o, hæc omnia in Christum quadrare aptissimè, si intelligantur, non sensu terreno et materiali, prout accipiuntur à Judæis, sed sensu vero et spirituali quem Prophetiarum inter se collatarum connexio et series indicat, ut ostendimus, quem Apostoli exposuerunt, quemque eventus

manifestum facit. Etenim Christus, etiam ut homo, Dominus est et dominator, cum Matth. ult. v. 18, ipsi *data sit omnis potestas in cœlo et in terrâ*, et Philip. 2, v. 10, *in nomine Jesu omne genu flecti debeat, cœlestium, terrestrium, et infernorum*. Est bellator et victor, cum de potestatibus tenebrarum et de morte ipsâ triumphaverit, cum idololatriam destruxerit et dissipaverit; cum, eo duce et auspice ac vires suppetente, hostes suos Ecclesia usque superaverit, atque invitis idololatrarum furoribus, hæreticorum et schismaticorum machinationibus, malorum Christianorum scandalis, semper firma consistat et inconcussa, cum postremò ipse auctor sit victoriarum quas adversus dæmones, adversus mundi terrores, errores et amores, ac in proprias cupiditates plurimi quotidie referunt. Est salvator, cum sanguine suo nos redemerit et Deo reconciliaverit, nobisque media, quibus ad vitam et ad regnum æternum pervenire valeamus, meruerit. Tandem rex est, dux, princeps, quippe non modò rex est Ecclesiæ in cœlis triumphantis, sed et Ecclesia hîc militans eum regem suum et supremum principem agnoscit, ejus regitur legibus, ejusdem nutritur et sanctificatur donis, promissis reficitur, et per eum solum se æternæ salutis consortem futuram sperat. Quid quòd ejus imperio subduntur ipsi rebelles Ecclesiæ filii et ab eâ separati? hos quippe ad illam redire jubet, eisque, ni fecerint, judicium horrendum et poenas sempiternas minatur. Neque etiam ab ejus dominatione ipsimet eximuntur Judæi, qui eum non agnoscunt; ii siquidem tenentur Christum auscultare, dumque illi renunt fidem, rebellionis in ipsum se se reos constituunt. Rex denique est omnium infidelium, quippe ad quos voluit Evangelium nuntiari, et qui legi christianæ, ubi eis proponitur, amplectendæ ab eo adstringuntur.

Inst. 1^o cum Orobio in tertio scripto, quæst. 1, n. 4, et aliis Judæis: Illius regnum non est spirituale; sed terrenum, qui à Prophetis prædictus est super solium Davidis sessurus, ejusque regnum possessurus; solium quippe Davidis in terris fuit, non in cœlo, et regnum ejus terrenum fuit et temporale, non spirituale et cœleste. Atqui Messias à Prophetis prædictus est in solio Davidis sessurus, ejusque regnum possessurus; ergo, etc. Dist. maj. illius regnum est terrenum, qui prædictus est possessurus Davidis regnum in eadem formâ et specie quâ possessum est à Davide, concedo; qui prædictus est possessurus regnum Davidis in aliam

omninò formam et speciem immutatam, nego. Similiter dist. min. et nego consequ. Ea veteris Testamenti loca, in quibus Messias dicitur Davidis regnum obtenturus, nihil speciale continent quod in novo Testamento itidem non occurrat de Christo dictum. Quemadmodum Isai. 9, v. 7, de Messia dicitur: *Multiplicabitur ejus imperium, et pacis non erit finis; super solium David, et super regnum ejus sedebit, ut confirmet illud et corroboret in judicio et justitiâ amodò et usque in sempiternum*; ita et Angelus Mariam alloquens, Luc. 1, v. 32, de Christo hæc profert: *Dabit illi Dominus Deus sedem David patris ejus; et regnabit in domo Jacob in æternum, et regni ejus non erit finis*. At quando seu à Prophetis, seu in Evangelio solium et imperium Davidis Christo adscribuntur, sensus non est nullum esse regni ejus à Davidico discrimen. Certè dum ea Prophetæ docuerunt quæ de vitâ, passione, morte, etc., Messia adduximus, dum tot spiritualium donorum auctorem et largitorem illum exhibuerunt, satis significavere à se imperium Davidicum Messia attribui aliâ prorsus ratione et formâ possidendum, quàm à Davide possessum est. Atque hanc discriminis rationem accuratè explicârunt Evangelistæ et Apostoli, recensendo, ut diximus, varios regni spiritualis Christi characteres.

Quid ergo vaticiniis Prophetarum præsignatur, cum in iis regnum et solium Davidis asseruntur Messia? illud unum, quod in Christo ex novo Testamento impletum est, nempe Messiam Davidis filium à Deo, ut olim David, excellentiori tamen ratione, auctoritatem suam desumpturum, ipsumque populo Dei imperaturum, id est, populo quem Deus pro suo jam agnoscit, sicut in populum Dei ex Abrahamo satum David imperium olim obtinebat. Etenim Vates sacros 1^o nemo procul dubio dixerit eo sensu intelligendos quòd in eadem sede materiali voluerint sessurum Messiam, in quâ sedebat David; solium igitur Davidicum in iis de quibus agitur Prophetarum locis accipiendum est tantum præ imperio Davidico. 2^o Nec etiam prædixisse censendi sunt Prophetæ, sedem Messia in eodem loco collocandam ac sedem Davidis; siquidem regni sedem sæpè contingit immutari, regno eodem permanente; sic quando Constantinopolis facta est caput imperii romani, non ideò illud imperium desiit. Nihil ergo ad rem pertinet quòd Davidis sedes fuerit Jerosolymis, sedes verò Christi ut hominis, in cœlis existat. 3^o Pariter non præsignificârunt fore ut regnum Messia ratione

legum, honorum subditis distribuendorum, extensionis et finis, à regno Davidico non differret; imo, ut ex dictis patet, fœdus novum, legem sanctificantem à Messia instituentem, remissionem peccatorum, sanctitatem et gratias uberes ejus mortis pretio concedendas, gentes ad ejus fidem adducendas et conversis populi Judaici reliquiis inferendas vaticinati sunt; ergo, etc. 4° Oracula regnum Messiae spectantia non possumus interpretari de gloria humanâ et terrestri; quæ cum vitâ paupere, passione et morte Messiae multoties prædictis stare non possunt. Itaque istud solum superest, Messiam id circò dictum fuisse solo et regno Davidis potiturum, quia sicut David fuerat à Deo rex populi Dei constitutus, ita et Messias à Deo verum, etsi alterius generis, imperium erat in ejus populum obtenturus.

Et verò ille possidet regnum Davidis, qui eodem jure imperat quo David, et eundem populum regit. Atqui Christus 1° eodem jure regnat quo David; Christo enim ut homini (Matth. ult. v. 18) *data est à Deo omnis potestas in cælo et in terrâ*; et (Philipp. 2, v. 9 et 10) *Deus exaltavit illum, et donavit illi nomen quod est super omne nomen; ut in nomine Jesu omne genu flectatur, cælestium, terrestrium, et inferorum*, etc. Christus eundem, quem rexit David, populum regere dicendus est, tum quia Ecclesia successit Synagogæ, populus christianus Christum regem agnoscens, populo Judaico cui præfuit David; adeò ut quemadmodum populus Judaicus ex Abrahamo satus olim ut populus Dei proprius habebatur, ita Christiani soli populum vero Dei cultui addictum nunc constituent; tum quia Christus et Apostoli primum Jupæis, prout ejusmodi populi prærogativæ postulabant, Evangelium nuntiavere, quorum plurimi statim fidem amplexi sunt; unde contigit ut ex solis illis Judæis Christianis primum coaluerit Christi populus, eorumque solum ministerio Ecclesia Christi deinde per gentes dispersa fuerit, et fructus tulerit uberrimos, juxta illud Isaïæ 57, v. 31 : « Quod salvatum fuerit de domo Juda... faciet fructum; quia de Jerusalem exhibunt reliquiae, et salvatio de monte Sion; zelus Domini exercituum faciet istud. » Quapropter gentes ad Christum conversæ tanquam insertæ Christi populo ex Judæis primum coagmentato, ac veluti quædam ejusmodi populi accessiones habendæ sunt. Ergo quemadmodum David acceperat à Deo potestatem regendi ejus populi, ita et populum Dei, auctoritate à Deo acceptâ,

Christus ut homo regit; proindeque vero sensu dicendus est solium et imperium Davidis obtinere. Certè quidem, si Deus alicui Davidis filio eam in 12 tribus, et in nationes auctoritatem contulisset, quam reges in subditos exercent, restauratum esse sceptrum Davidis fateretur Judæus. Ergo, cum Christus Davidis filius jugi et perpetuâ fruatur in Judæos et in gentes potestate quæ solito regum imperio infinitè præstat, planum est in eo eximiè impleri vaticinia de semine Davidis æternum in domo Jacob regnatura. Accedit, quòd valdè premi posset, Christum esse hominem Deum, filium Davidis simul et naturâ Filium Dei, ipsique proinde supremam et omnimodam in temporalia ipsa auctoritatem competere.

Inst. iterum cum eodem ibid. : Messias ex Prophetis non tantum regnaturus est in Judæos sed « et hoc in terrâ Israelis, in terrâ quam Deus dederat patribus suis, ubi patres sui habitaverunt. » Ergo, etc. Dist. antecedens; Regnaturus est in terrâ Israelis, etc., id est, regnum spirituale ibi obtenturus, concedo; regnum terrenum et caducum, nego. Terram Israelis seu Palæstinam Messiae imperio adscribendam ultrò concedimus, et quidem non modò terram Israelis, sed et totum orbem et universas gentes ipsius dominio Prophetæ vindicant, Psal. 2, v. 6 et 8, Psal. 71, v. 8 et seqq., etc. Solummodò negamus ipsi imperium terrenum et caducum attribuendum esse : regnum Messiae interpretamur regnum longè excellentius, spirituale videlicet, prout explicatum est. Præcellens autem illud in ipsam Israelis terram imperium Christo competere indubitatum est. Ipse enim trium saltem annorum spatio regis spiritualis munere hæc in terrâ per sese fungi cœpit, Judæis Evangelium prædicans, et miraculis cujusvis generis se à Deo missum evidenter confirmans. Idem imperium post ascensionem suam per Apostolos ibidem exercuit, dum voluit ab ipsis primum in Jerusalem (Act. 1, v. 8), et in omni Judæâ et Samariâ fidem christianam annuntiari. Deinde nemo nescit per plura secula totius Israeliticæ regionis incolas Christi legibus paruisse. Multi etiamnum in Palæstinâ occurrunt Christiani. Nec porro jure imperii destituitur Christus in infideles populos qui has terras incolunt; quotquot enim de doctrinâ et lege ejus audierunt, ei sese subicere tenentur, supremam alioquin ejus potentiam ac justitiam vindicem in suppliciis æternum experturi.

Inst. 3° cum eodem : « Poterant Prophetæ

« prædicere Messiam obtenturum romani Cæsaris regnum. An postea posset dici id intelligendum de regno Cæsaris in cœlo? atqui « non magis fuit in cœlo regnum Davidis, quàm « Cæsaris, » non magis spiritualis fuit Palæstina quàm Italia; non magis fuit in cœlo populus Judæorum quàm Romanorum; ergo, etc. Respondeo: Non magis collocamus solium Davidis in cœlo, quàm solium Cæsaris. Fatemur insuper quòd si Prophetæ prædixissent Messiam potiturum esse Cæsaris imperio, absurdè id explicaretur de regno spirituali; quia scilicet cùm Cæsar in populum merè profanum dominationem exerceret, nulla esse posset convenientia inter regnum Cæsaris et regnum spirituale quod Messiæ adscribimus. At verò cùm David, Deo auctore, ejus populo imperaverit, is sanè dici potest Davidis regnum obtinere, qui à Deo constitutus est rex populi Dei, quocumque modo illud imperium se habeat, id est, seu spirituale, seu temporale sit; proindeque Christus meritò à nobis dicitur thronum Davidis occupare, nec ad rem pertinet quæ cum throno Cæsaris comparatio instituitur.

Inst. 4^o: Judæi non possunt Messiam regem spirituales agnoscere, nisi nobiscum admittant Israellem mysticum, Jerusalem mysticam, terram mysticam; atqui desiperent Judæi, si propter hujusmodi sensus mysticos à Christianis confictos, clara et aperta Prophetarum verba desererent, et nova gentium dogmata consecrarentur; ergo. Ad majorem, resp. à nobis non negari Christo competere imperium in veram terram Israeliticam, ut modò diximus, et in verum Israellem, id est, in Judæos omnes seu conversos et Ecclesiæ adscriptos, seu in alios, quos ad fidem Christi amplectendam teneri contendimus. Totius controversiæ cardo in hoc solùm vertitur, an terrenum et caducum sit illud Messiæ regnum, ut volunt Judæi, an verò spirituale, cœleste, et æternum, sicut à nobis explicatum est, et sentiunt Christiani. Ad minorem, falsò supponunt Judæi, clarè et apertè vaticinatos esse Prophetas Messiæ regnum futurum esse terrenum. Eos quidem non possumus de spirituali Messæ regno interpretari, quin pluribus in vaticiniis agnoscamus metaphoras, seu verba à regnis temporalibus designandis ad imperium spirituale significandum translata; sed sensus metaphoricos sæpè in Scripturis, ac præsertim in scriptis Prophetarum occurrere, quis negaverit? Cavendum novimus ne verba Dei sensu proprio accipienda ad metaphoras detorqueantur; at nihil me-

tuendum ubi ex ipsomet Dei verbo figuratam esse locutionem apparet. Atqui hîc ita se res habet. Nam 1^o, his ipsis in Prophetiis Messiæ regnum contingentibus, quas volumus metaphoricè accipi, plerumque Vates sacri aliqua immiscent ad regnum spirituale mentem appellantia. 2^o In benè multis aliis vaticiniis characteres regni spiritualis imperio Messiæ assignantur. 3^o De regno spirituali easdem explicari prophetias manifestè postulant, ut jam supra dictum est, insignia oracula Davidis, Isaïæ, Danielis, etc., vitam, passionem et mortem Messiæ spectantia; ergo, etc. Falsò etiam in adductâ minore supponitur, gratis à nobis fingi mysticos sensus, quos in probationem afferamus. Pluribus quidem vaticiniis Messiæ regni prænuntiis alligamus sensum metaphoricum et eâ ratione spirituales quòd spiritualia exhibeat, ac rebus terrenis et caducis, quas Judæi volunt iis Prophetiis designari, opponatur. At cùm is sensus verbis immediatè exprimitur, accuratè loquendo pertinet ad sensum litteralem, qui in proprium et metaphoricum solet dividi, non verò ad merè mysticum qui rebus expressis immediatè significatur, verbis non nisi mediatè designatur. Fatemur autem sensus mysticos ad probationem nihil conferre, nisi aliunde probentur à Deo revelati; atque ideò à sensibus merè mysticis nullo momento stabilitis argumentari hactenùs abstinuimus. Fatemur quoque Scripturas sensu proprio accipiendas, nisi ubi metaphoram esse adhibendam ex verbo Dei ostenditur. At quando vaticinia quædam sensu verborum proprio hîc non exponimus, iisque per translationem sensum metaphoricum ac sublimiorem affigimus, non nostro arbitratu hæc comminiscimur; sed nostras validè confirmamus expositiones tum ex ejusmodi vaticiniorum indole et adjunctis, tum ex eorundem accuratâ cum aliis multis vaticiniis in Christo manifestè impletis collatione, tum etiam ex perspicuo eventu, et ex interpretatione Apostolorum, quos à Deo missos et inspiratos fuisse ad explicandas sacrorum vatum Prophetias, innumera quæ ipsi ediderunt miracula evidentissimo argumento sunt. Ergo nec sensus mysticos gratis fictos in probationem adducimus, nec expositiones metaphoricæ pro arbitrio comminiscimur, nec proinde desiperent Judæi, imò saperent maximè, si nostras interpretationes et christiana dogmata consecrarentur.

Inst. 5^o: Nulla afferri potest ratio cur Prophetiæ ad regnum Messiæ attinentes, à nobis accipiantur metaphoricè ac spiritualiter, aliæ

verò sensu proprio et ad litteram; ergo, etc. Resp. rationem disparitatis in promptu esse, atque ex dictis facillè colligi. Scilicet ubi voces à Prophetis de Messiae regno adhibitas metaphoricè et spiritualiter intelligendas esse ducimus, metaphora obvia est et naturalis, et longè præcellentior Deoque dignior est sensus spiritualis seu metaphoricus, quàm proprius et litteræ superficie expressus. Deinde et rerum eventus manifestus, et aliorum vaticiniorum consideratio, et miracula Christi ac Apostolorum, sensum hunc metaphoricum exigunt, ut jam dictum est. At verò nonnisi absurdè assignaretur sensus spiritualis vaticiniis quæ nos ad litteram interpretamur, v. g., iis quæ Christi vitam pauperem, passionem, mortem, etc., contingunt. Et præterea, tantùm abest ut ejusmodi vaticinationum cum aliis quæ spiritualiter explicamus collatio officiat ne ad rigorem litteræ et sensu proprio accipiantur, ut potius quocumque illæ intelligantur sensu, necessariò designent eam futuram esse Messiae conditionem, quæ cum gloriâ et splendore regni terreni conciliari non possit. Postremò quæ vaticinia accipimus litteraliter, etsi innumera sint, ea tamen hoc modo accepta eventui, ut ostendimus, perfectè consentiunt et Apostolorum interpretationibus; ergo, etc.

Inst. 6^o : Priusquàm adveniret Jesus Nazarenus et ulla de regno Messiae lis moveretur, Judæi veteres existimabant Messiam fore regem terrenum; nec in Prophetiis de regno Messiae sensus metaphoricos ac spirituales agnoverunt; quod patet ex Judæorum et paganorum scriptis, ex agendi ratione Herodis, filiorum Zebedæi, et aliorum Judæorum tempore Christi viventium. Ergo nec nos ejusmodi sensus debemus agnoscere. Nego anteced. Nulla veterum Judæorum profertur certæ fidei traditio quæ nostris adversetur interpretationibus. Prisci Judæi Prophetis viciniore de Messiae regno temporali aut spirituali quidquam determinasse non leguntur, fortè quia, ante rei exitum, sacra oracula de hoc negotio non satis erant perspicua, ut quidquam circa illud expressè statui posset. Fatemur quidem versùs Jesu Christi ætatem Judæos in hanc abiisse sententiam, regnum Messiae futurum esse terrenum; sed contendimus et ex dictis liquet, id tribuendum esse præcipiti eorum judicio atque effuso in temporalia et terrena affectui, ex quo factum est ut Scripturas carnali sensu acciperent, et ab aliis prophetiis vitæ pauperis, afflictionum, dolorum, mortisque Christi prænuntiis mentem avocarent.

Inst. ultimò : « Regni cœlestis (Messiæ) nullo signum huc usque visum, neque in gentibus, neque in Israele, neque in Ecclesiâ christianâ. » Ita Orobio ibid. in ipso titulo numeri 19, in quo singula illa deinde probare nititur argumentis quæ jam præoccupavimus supra paragr. 6; ergo, etc. Nego ant. Nam Christum Dominum esse regem spiritualementem, regem cœlestem, probant 1^o cuncta illa oracula quæ in eo adimpleta esse hactenùs ostendimus; hæc enim planè evincunt Christum esse Messiam à Deo missum, ac proinde esse regem spiritualementem et cœlestem, cui *data sit omnis potestas in cœlo et in terrâ*, sicut ipse docuit Matth. ultimo, v. 18. Fatemur quidem aliquà de Messia ad litteram prædicta nondùm completa in Christo conspici; nec mirum, cum eorum implendorum nondùm tempus advenerit. Verùm oracula in Christo ad eventum perducta certam fidem faciunt cætera quoque suo tempore adimplenda esse, ubi videlicet gentium plenitudo introiverit, infidelitatieque Israel suæ finem imponens Christi Ecclesiæ insertus fuerit. Probant 2^o innumera à Christo et ab Apostolis ejus edita miracula, quæ, ut jam aliquando diximus, splendidiora adhuc sunt et certius constant quàm miracula Moysis, et quorum certitudinem inferius in gentiles demonstrabimus. His namque miraculis firmatur christiana fides, juxta quam Christus est rex spiritualis et immortalis. Probant 3^o fructus insignes et uberrimi ex Evangelii prædicatione consecuti. Olim in solâ Judæâ Deus Israel agnoscebatur; gentes reliquæ idolis serviebant: jam dudum idola sunt contrita, verus Deus à gentibus agnoscitur et colitur, et, ut supra dictum est, vera Christi Ecclesia per totum orbem diffusa cernitur. Probant denique mira religionis christianæ propagatio, et quæcumque alia in ejusdem gratiam argumenta proferuntur.

Obj. 2^o : « Si sensus litteralis nunquàm rejiciatur, sed religiosè observetur, quantumvis majora ibi latere credantur, templum illud ab Ezechiele (cap. 40, 41 et 42) depictum cum suis porticis et mensuris, aliquando realiter constructur, et bellum Gog et Magog (ibid. cap. 38 et 39 descriptum) verè continget; atque Israel carnalis, domus Jacob et Judæa in propriam patriam, quam habitaverunt patres sui, verè revertentur; venient ex omnibus regionibus, et ex Septentrione in propriam hæreditatem, et omnes gentes in nomine Adonai in Hierusalem. Sic adest clarissimè in litterâ hic sensus litteralis,

« tamen à vobis (Christianis) nunquam ad-
« mittendus, qui templum id mysticum, bellum
« id mysticum, Israellem illum mysticum, Hie-
« rusalem mysticam, terram mysticam inter-
« pretari, intelligere cogimini. » Ita post mul-
tos Rabbinos Orobio in secundo suo scripto
apud Limborch. Ergo regnum Messiae tale fu-
turum est quale à Judæis expectatur.

Resp. duas esse antecedentis partes sigillatim
considerandas. Quod ad primam partem atti-
net, dist. : Templum ab Ezechiele depictum ali-
quando realiter construetur, si nondum con-
structum fuerit, concedo ; si constructum jam
olim fuerit quantum ferebant circumstantiæ
temporum, et scopus vaticinii exigebat, nego.
Dico igitur nihil ob stare quominus templum
Ezechieli in visione repræsentatum ipsummet
fuerit templum Salomonicum, quale Jerosoly-
mis exstitit cum jussu Nabuchodonosoris ever-
sum et combustum est. Scilicet ubi Prophetiarum
Ezechielis series ac scopus attenduntur,
omninò apparet eo consilio templi imaginem
illi Prophetæ fuisse exhibitam et accuratè ab
ipso delineatam, ut ad ejus exemplar Judæi è
captivitate reduces, quantum angustiae tempo-
rum et facultatum paterentur, templum denuò
extruerent. Atque hoc fuisse Dei consilium
non obscurè indicatur cap. 43, v. 10, 11 et
seq. Nec certè ullo modo probabile est Eze-
chielem, qui de captivitate Babylonicâ et pro-
ximè futuro ab ipsâ reditu indesinenter va-
ticipatur, prorsus siluisse templum à Judæis
reducibus reædificandum, atque mentionem
tantum fecisse ac minutatim descripsisse omnes
mensuras alterius templi post tria demum an-
norum millia, ex sententiâ Judæorum, ex-
truendi. Ex adductis igitur Ezechielis capitibus
40, 41 et 42, etiam sensu proprio intellectis,
non possunt Judæi evincere templum tertium
à Messia, cujus ibi ne verbum quidem, ali-
quando ædificandum. Quam verò inani spe
circa templi illius tertii extructionem alantur,
non uno in loco jam ostensum est. Quòd si
observes templum illud, quale ipsum Ezechiel
describit, à templo Salomonico prout in libris
Reg. et Paralip. delineatur, nonnihil differre ;
id non inficiabimur. At quemadmodum tem-
plum secundum à Zorobabele exstructum,
deinde plurimum ab Herode amplificatum est ;
nonne credibile est successores Salomonis ex
immensis illis donariis et tributis annuis eu-
râsse Dei domum exornari, et pro datâ occa-
sione amplificari?

Ad secundam partem antecedentis, resp. va-

rias de duobus Ezechielis capitibus prælium Gog
spectantibus esse interpretationes. Multi volunt
agi de prælio propriè dicto, de Israele et terrâ
Israeliticâ propriè acceptis, ac referunt illud
vaticinium alii ad blasphemum et homicidam
Antiochum Epiphanem ; ita interpretum vul-
gus ; alii ad Cambysem Cyri filium et succes-
sorem, Ecbatanis in Carmelo versùs extremi-
tatem Palæstinæ post expeditionem Ægypti
fato functum teste Herodoto lib. 3, cap. 21 et
seq. Ita Calmetus in Dissert. de Gog et Magog ;
alii « opinantur Gog esse regem ipsum Babylo-
« nis, non quidem personaliter, ut aiunt, sed
« ratione regiæ dignitatis spectatum, terram
« verò Magog esse imperium ipsum Chaldæo-
« rum ; » ita novus Vatabli editor in hunc lo-
cum. Complures de Antichristi temporibus
explicant eandem Ezechielis Prophetiam. Non
pauci sentiunt à Prophetâ edictas poenitentias
quas in idololatriam ac falsos Deos Christus
retulit, vel prælia quæ adversùs justos commit-
tunt impii, aliquando debellandi et puniendi.
De his omnibus fusè inquirere necesse non est ;
ad solutionem sufficit 1º, in illis Ezechielis ca-
pitulis nullam prorsus haberi vel minimam
Messiae mentionem, ex quo sequitur objectio-
nem penitus corruere ; 2º ibidem multa occur-
rere metaphoricè et figuratè accipienda : v. g.
quòd dicitur cap. 38, v. 20, in die adventus
Gog commovendos pisces maris, et volucres cæli,
et bestias agri, et omne reptile quod movetur su-
per humum, cunctosque homines qui sunt super
faciem terræ ; et subvertendos montes, etc., et
cap. 39, v. 12, septem insumendos menses se-
peliendis iis qui ex exercitu Gog infecti fuerint ;
3º non videri posse secerni quæ in hac Pro-
phetiâ proprio sensu accipienda sunt, ab iis
quæ metaphoricè debent intelligi ; hæc tamen
à Judæis prius esse discernenda, quam possint
de sensibus metaphoricis hic assignatis con-
queri. Fortè hic duplex sensus distingui debet,
alter proprius et ad regem Babylonis, vel ad
Antiochi tempora referendus, alter præcellen-
tior et sublimior ad persecutiones quas Pro-
pheta prævidebat in Ecclesiam et in pios sin-
gulis seculis, ac præsertim versùs mundi finem
suscitandas.

Objicies 3º : Sensus spiritualis quem in Pro-
phetiis regnum Messiae contingentibus admit-
tere cogimur, Deum fecit deceptorem. Nam
ille est deceptor, qui non intendit eum sensum
quem verba naturaliter præ se ferunt ; atqui
juxta nostras expositiones Deus ita se gerit in
præsenti casu ; verba enim Prophetarum natu-

raliter et ad litteram sumpta exhibent regnum terrenum; ergo, etc. Ita idem Orobio passim.

Nego anteced.: Aliud est non revelare clarè et apertè, aliud in errorem inducere. Ad probationem, nego min. Sensus litteralis generatim, ut jam notavimus, ille est quem verba immediatè significant, et duplex distinguitur; alter est proprius, alter metaphoricus: proprius est ille quem verba sensu proprio et nativo sumpta referunt, ut quando à Jonâ dictum est cap. 3, v. 4: *Adhuc quadraginta dies, et Ninive subvertetur*; metaphoricus ab analogiâ quâdam seu rerum convenientiâ ducitur, ut cum Christus dixit, Joan. 10, v. 9, se esse *ostium*, et cap. 14, v. 6, se esse *viam*. Prophetæ quidem exprimunt Messiam regnaturum, et regnum ejus iis sæpè describunt verbis quæ sensu proprio terrena regna designarent; sed cum, hæc eadem verba sensu metaphorico accepta ad regnum spirituale denotandum idonea sint; cum præterea expressis à se regni Messiae characteribus multa Prophetæ immiscere soleant, quæ propriè sunt regni spiritualis; cum denique plurima ab iisdem de Messia prænuntientur terrenum ipsi regnum abjudicantia, sequitur verbis Prophetarum naturaliter et ad litteram sumptis non exprimi regnum Messiae futurum esse terrenum et temporale, sed potius ea sacrorum Vatum oracula in quibus voces regnis terrenis significandis natæ ad Messiae regnum applicantur, debuisse rebus omnibus accuratè perpensis, metaphoricè et sublimiori sensu intelligi; ergo, etc.

Inst. 1^o: Si Messias sit rex spiritualis et cœlestis, non terrenus; si plura vaticinia regnum ejus spectantia spirituali ac metaphorico sensu accipienda sint, fatendum erit Prophetias illas obscuras fuisse et intellectu difficiles; sed si Prophetiæ ad regnum Messiae attinentes fuerunt obscuræ et intellectu difficiles, saltem culpandi non sunt Judæi quod Messiam non agnoverint; ergo, etc. Dist. maj.: Fuissent obscuræ et intellectu difficiles ante adventum ipsius Messiae, concedo; post ejus adventum, nego. Itaque sacrorum Vatum oracula quædam, antequàm recipiendus esset Messias, aliquibus nubibus obtegi Deus sapientibus de causis voluit, fortè ne populus ad terrena supra modum propensus regem spirituales et cœlestes sibi clarè cognitum minùs appeteret et haberet in levi. Quidquid sit, fatemur vaticinia ad regnum Messiae attinentia obscuritatibus non sine aliquo labore discutiendis obvoluta fuisse; at ubi Christus apparuit et cum hominibus conversa-

tus est; ubi se esse Messiam et regem spirituales ipse docuit; ubi idipsum miraculis innumeris confirmavit; ubi à Joanne testimonium accepit; ubi Prophetiæ ejus nativitatem, præcursorem; vitæ rationem, prædicationem, miracula, etc., spectantes adimpleri visæ sunt, ubi deinde temporis decursu compertum fuit omnem sacrorum oraculorum seriem ejusdem passione, morte, resurrectione, discipulorum miraculis, et prædicatione, multorum Judæorum conversione ac gentium vocatione, etc., compleri; ubi primùm, inquam, hæc fieri cœpta sunt, evanuit profectò omnis obscuritas, adeò ut magni criminis rei sint Judæi, quod regem suum sibi à tot seculis prænuntiatum, olim non receperint, quod eum morti tradere non dubitaverint, quod postea Apostolorum prædicationi restiterint, ac successoribus Apostolorum eos ad Christi fidem adhuc vocantibus etiamnum obductentur.

Inst. 2^o: Deus Israelem sincerè diligebat, et aliunde ab eo certò prævidebatur fore ut si obscurè tantùm revelaret quale futurum esset Messiae regnum, illud Judæi non agnoscerent. Ergo si Messiae regnum debuisset esse spirituale, Deus clarè et apertè prænuntiasset eum ut regem spirituales et cœlestes, non ut temporales expectandum. Respondeo 1^o hoc argumento nimis probari, ac proinde nihil probari; nam inde sequeretur peccatum nunquàm à Deo permitti potuisse: sic enim retorqueri potest argumentum: Deus sincerè diligebat Adamum et Evam, et prævidebat eos peccaturos si fructus arboris scientiæ boni et mali eis interdicere; ergo Deus non potuit Adamum et Evam ejusmodi constringere præcepto. 2^o Nego conseq. Nam ab iis quos diligit, non semper Deus avertit mala quæ futura prævidet; aliàs qui semel justificati sunt, nunquàm peccarent; ipsi satis est si media illis ad vitandum malum aptissima suppeditet. Horumce Dei consiliorum rationem quidem ignoramus; sed nihilominus coguntur Judæi cum Christianis fateri rem ita se habere, et adorandas hic esse, ut in cæteris, vias divini providentiæ investigabiles. Porrò non defuisse Judæis media, quibus si uti voluissent, Jesum Christum esse Messiam sibi promissum agnovissent, ex dictis in totâ istâ disputatione liquet; ergo, etc.

CAPUT III.

De variis aliis momentis et indicis, quibus Messiam venisse, eumque esse Jesum Christum confirmatur.

Adpuctis huc usque adversus Judæos argu-

mentis, septem octove alia adjicienda supersunt momenta, quæ paucis exponemus.

Primum momentum ex typis quibus olim Messias figuratus est, petitur. — Typi Messiae sunt veluti quoddam Prophetiarum genus, non verbis, sed rebus personisve et actionibus expressum. Non inficiantur Judæi multos ejusmodi fuisse olim Messiae typos et figuras Isaacum videlicet, Josephum, Moysen, Davidem, Salomonem, Jeremiam, Agnum Paschalem, etc. Christum porro inter et typos illos tanta est in præcipuis convenientia, ut inter figuram et rem figuratam, inter umbram et veritatem major desiderari nequeat. Lege Huetium prop. 9, cap. 170, singulos illos typos eruditè, more suo, recensentem, et post SS. Patres accuratè explicantem; neque enim nobis hic licet varia hujusmodi admirandæ consensionis capita sigillatim evolvere. Atqui, quamvis argumentum quod ex ejusmodi typis eruitur, tanti non sit ponderis, quanti illud invictum quod ex Prophetiis hactenùs deductum est, eam tamen, quæ in Christo Jesu cum tot insignibus Messiae typis deprehenditur, admirabilem cohærentiam nemo sanè casui fortuito adscripserit. Multùm ergo Messiae typis firmatur quod jam demonstratum est, nempe Messiam non ampliùs expectandum, sed jam diu venisse et esse Christum Dominum.

Secundum momentum, ex Prophetiarum Messiae prænuntiarum cessatione. — Ex quo Joannes Baptista, qui Christo præivit ipsique testimonium perhibuit, neci ab Herode Antipà traditus est, nullus apud Judæos prodiit Propheta Messiae prænuntius. Hoc ipsum prænuntiaverat Christus Luc. 16, v. 16, his verbis: *Prophetæ usque ad Joannem.* Jam verò quid causæ esse potuit cur ab ævo Joannis Baptistæ, id est, à plusquàm septemdecim seculis, vaticinia Messiae prænuntia desierint, nisi quòd ille jamdudùm advenerit in quo prædictum fuerat *implendam esse visionem et Prophetiam*, hoc est, Messias, isque sit Christus Jesus?

Tertium momentum: Christus tunc venit, cum Messias à Judæis expectabatur. — Si illo ævo quo Christus natus est, Messias venerit, fateantur Judæi necesse est hunc alium esse non posse quàm Christum. Quis enim alter illius ævi homo Messiae titulo cum vel minimâ veri specie insigniri posset? Atqui præter evidentia argumenta quibus supra stabilitum est Christum eo tempore natum esse quo Messias ex Prophetiis nasci debuit, illud insuper in Judæos urgemus, eorum videlicet majores non

dubitâsse quin Messias tum adventurus esset. Atque id quidem evincitur 1º ex testimonio Evangelistarum. Luc. 2, v. 25 et 26, de Simeone sene hæc leguntur: *Homo iste justus et timoratus, expectans consolationem Israel, et Spiritus sanctus erat in eo; et responsum acceperat à Spiritu sancto non visurum se mortem, nisi priùs videret Christum Domini.* Ibid. v. 38, Anna Prophetissa inducitur loquens de illo (Christo) omnibus qui expectabant redemptionem Israel. Et ex Joan. 1, v. 19 et seqq., colligitur Judæos omnes, ubi Joannes Baptista prodire cœpit, in hanc dubitationem fuisse adductos, annon is esset Messias quem expectabant; quapropter ut ibi habetur, *miserunt Judæi ab Jerosolymis sacerdotes et levitas ad eum, ut interrogarent eum: Tu quis es? nempe, an esset Christus.* Hinc, *cùm natus esset Jesus in Bethleem Juda, et Magi ab Oriente venissent Jerosolymam ut eum inquirerent et adorarent, audiens Herodes rex turbatus est, et omnis Jerosolyma cum illo, et congregans omnes principes sacerdotum, et scribas populi, sciscitabatur ab eis, ubi Christus nasceretur. At illi dixerunt ei: In Bethleem Juda.* Omitto Joannem Baptistam, Matth. 11, v. 3, et Luc. 7, v. 9, misisse duos è discipulis suis ad Jesum, ut interrogarent eum: *Tu es qui venturus es, an alium expectamus?* Omitto et verba mulieris Samaritanæ ad Jesum Joan. 4, v. 25: *Scio quia Messias venit, qui dicitur Christus; cùm ergo venerit ille, nobis annuntiabit omnia.* Testes itaque sunt Evangelistæ pro certo tenuisse Judæos futurum ut illo ævo, quo Christus venit, Messias esset oriturus.

2º Idem Rabbiorum ipsorum testimonio comprobatur. Nam ex eorum libris clarè eruit Huetius, propos. 9, cap. 8, n. 1, eam fuisse doctorum paulò ante Christi tempora florentium sententiam, tempora adventûs Messiae tunc instituisse. Testatur verò Josephus, lib. 6 de Bello Judaico cap. 5, aliàs 12, n. 4, Judæos spe et opinione Messiae mox venturi incitatos fuisse ab illud in Romanos suscipiendum, quod ultimâ Jerosolymorum conflagratione conclusum est. Tandem Talmud Babylonicum in Gemarâ tract. Sanhedrin, in cap. 11, sic habet: « Traditio domûs Eliæ: Sex mille annos durat mundus. Bis mille annis inanitas et vastitas. Bis item mille annis lex. Denique bis mille annis dies Christi. » Quæ, interprete R. Menasseh lib. 3 de Resurrectione, significant bis mille annis ante Abrahamum homines sine lege scriptâ vixisse; bis mille annos alios ab Abrahamo ad Messiam interjacere; « ita

« ut elapsis à mundo condito quater mille annis, illustris ac mirabilis dies exoriturus sit, « quo Messias in has terras veniet. » Ergo cum juxta acceptam Judæis chronologiam versùs annum mundi quater millesimum Christus natus sit, consequens est eum venisse eo tempore quo Messias ex traditione domus Eliæ venire debuit.

5^o Suffragantur historici profani. A Judæis quippe procul dubio orta fuerat, quæ fidejussore Suetonio in Vespasiano, cap. 4, « percre-
« buerat Oriente toto vetus et constans opinio, « esse in fatis, ut eo tempore Judæâ profecti « rerum potirentur. » Eadem iterum tradit in Nerone cap. 40. His similia quoque scribit Tacitus, lib. 5 Histor. « Pluribus, inquit persuasio « inerat, antiquis sacerdotum litteris contineri, « eo ipso tempore fore ut valesceret Oriens, « profectique Judæâ rerum potirentur. » Eodem referri solet, tum quod in Tullio, lib. 2 de Divinat. legitur de rege, cui nisi parerent Romani, à salute exciderent; tum istud Virgili, Eclog. 4 de Deo juxta Sibyllinos versus nascituro :

Clara Deum soboles, magnum Jovis incrementum.

4^o Adeò certum est versùs Christi tempora opinatos esse Judæos Messias adventum imminere, ut, cum antea nemo sese Messiam perhibisset, tunc multi Pseudo-Messias prodire cœperint, et ex illo tempore varii variis seculis eruperint. Herodes, juxta plurimos, ab Herodianis Messias est habitus. Josephus Theudæ et aliorum pseudo-prophetarum mentionem facit, à quibus ante excidium urbis non semel deceptus est populus et in desertum abductus.

Omnium porrò falsorum Messiarum famosissimus fuit insignis ille impostor, qui nomen Bar-Kokebæ, id est, *Filii stellæ* sibi eo consilio imposuit, ut *stella Jacob* à Balaamo prævisa haberetur. Is juvante celebri R. Akiba, Synagogæ principe, quem sibi comitem seu potiùs præcursorem elegerat, Messiam se esse Judæis persuasit, immensoque eorum in Judæâ congregato exercitu, adversùs Adrianum Imperatorem anno Christi circiter 129, vel ut aliis placet 134, rebellare ausus est, sicque Romanis bellum difficile, gentique suæ novam stragem et horrendas calamitates intulit. Quapropter Judæi fraude hominis agnitâ, eum cognominaverunt *Bar-Kosiba*, id est filium mendacii. Legi possunt de hoc falso Messia Eusebius in Chronico ad annum 17 Adriani; Sanctus Justinus in apologiâ 2 pro Christianis, olim 1;

S. Hier. in Catalago script. ecclesiastic.; R. David Ganz in Tzemach David ad annum 4880. Hujus etiam mentio fit in Talmude et in Echâ rabathi.

Id obiter notandum, R. Ahibam, etsi tantæ fraudis artifex præcipuus, et tot malorum causa extiterit, haberi tamen à Judæis ut doctorem summum, quem maximâ veneratione prosequuntur.

Quartum momentum, ex multitudine Pseudo-Messiarum, à quibus, juxta Christi vaticinium, decepti sunt Judæi.—Ineptâ credulitate Judæos laboraturos, et falsis quibuslibet Messiis temerè adhæsueros disertè prædixerat Christus Joann. 5, v. 43, his verbis : *Ego veni in nomine Patris mei, et non accipitis me; si alius venerit in nomine suo, illum accipietis.* Prædictioni porrò eventus stupendum adeò in modum respondet, ut certo indicio sit criminis à natione commissi, dum eum, à quo hæc prædicta sunt, noluit ut Messiam agnoscere. Scilicet, quoties eruperunt Pseudo-Messias, aut Messias pseudo-præcursores, toties plebs Judaica, et Rabbinii ipsi, non sine magno plerumque miseræ nationis detrimento eis fidem adhibuerunt. Quod non solum eo seculo quo venit Christus aut sequenti, ut mox dicebamus, observatum est, sæpiùs etiam temporibus subsecutis. Narrat Socrates, Hist. lib. 7, cap. 38, magnam Judæorum multitudinem Christo Domino fidem dedisse, postquam se à falso Messia, cui nomen Moyses, ineptè delusam intellexisset; quod anno Christi 434 contigit. Anno 529, Justiniano imperante, alter Pseudo-Messias, nomine Julianus, plures sibi Judæos in Palæstinâ devinxit, gentium domitoris sibi nomen arrogans; sed brevi à Romanis oppugnatus est, et ipse captus, morte poenas temeritatis suæ dedit. Octavo seculo alter prodiit de quo loquitur Theophanes. Octo novemve alii seculo duodecimo variis in regionibus apparuere. Famosus fuit seculo desinente decimo quinto et ineunte decimo sexto David Leemlein, qui anno 1409 audacter pronuntiare non dubitavit futurum ut ipso anno sequente 1500 Messias oriretur. Cui adeò confidenter crediderunt Judæi, ut eorum multi furnos suos azymis panibus coquendis destinatos demoliti sint, rati se anno sequenti panes azymos Jerosolymis esse comesturos. Auctor est R. David Ganz, avum suum Selikman Ganz Rabbini celebrem in eam cæcitatem cum cæteris impigisse, suumque paschalem furnum etiam destruxisse. Atque ad iter Jerosolyma peragendum plerique se accingebant, cum impostor

promulgavit propter populi iniquitates paulisper retardatum esse adventum liberatoris. Natio tamen adhuc erroris tenax anno 1502 jejunium solenne celebravit, ut quam frustra expectabat liberationem acceleraret. Alter Messias exortus est in Hispaniâ anno 1532. Alius in Indiâ orientali visus est anno 1615. Alter patriâ Smirnensis anno 1666, totam nationem seduxit: qui ne à Turcarum imperatore ob tumultuationes inter Judæos in imperio Turcico excitas capite plecteretur, de Messiâ Judæorum factus est Musulmanus eodem anno, die 17 Septembris. Tandem anno 1682, alter se esse Messiam in Italiâ et in Germaniâ mentitus est. Vide plura apud Imbonatum Biblioth. Latino Hebr. in Dissert. de adventu Messiæ pag. 111 et seqq., et apud scriptores seu Judæos seu Christianos ibidem citatos.

Quintum momentum, ex statu dispersionis et captivitatis in quo Judæi detinentur. — Desolationem populi Judaici, à tot seculis è solo patrio extorris; et per gentes varias toto orbe disjecti, jam consideravimus ut pœnam quam prædixerant Prophetæ Judæis ob Messiæ interempti scelus irrogandam. Nunc stupendum hunc nationis Judaicæ statum alio modo attendimus, eumque habitâ ratione promissionum Dei et consuetæ ejus erga hunc populum benevolentiae statuimus non posse oriri nisi ex illâ causâ quam Evangelium assignat; nempe ex eo quòd Judæi Messiam crucifigendum tradiderint, *sanguinem ejus super se* (Matth. 27, v. 25) *et super filios suos* esse consenserint, atque hujusce patrum suorum criminis adhuc sese reos efficiant Christum respuendo. Sic itaque argumentari licet: Si Judæis pœna sit alicujus sceleris, ut in præsentī captivitate versentur, atque id criminis non aliud esse possit quàm rejectio et occisio Messiæ, quarum eas esse reos contendimus, profectò Messias venit, isque est Christus Jesus, à Judæis neci traditus. Atqui 2º Judæis pœna est sceleris alicujus gravissimi, quòd in hâc captivitate detineantur. Quippe tamdiù Judæos terram Chanaam possessuros Deus expressis verbis sæpiùs promiserat, quamdiù mandata ejus observarent; simulque eosdem à quâvis dispersione in illam terram revocandos pollicitus fuerat, ubi eos pœniteret. Scelus ejusmodi non aliud esse potest quàm Messiæ rejectio et occisio, quarum eos reos esse contendimus. Debit enim esse crimen cujus se natio tota participem reddiderit, et cui etiamnum illa consentiat; siquidem propter alicujus privati facinus, cæteris exe-

crandum, toti nationi irrogata non fuisset adeò singularis, gravis, et diuturna pœna. Debit quoque esse crimen summum et ipsâ idololatriâ pejus; etenim delictum quod gravitate suâ idololatriam non superâsset, tam lugendâ captivitate à Deo non puniretur. Certè captivitas Babylonica, quâ in populum propter effusam ejus in idololatricos ritus libidinem Deus animadverterat, annis solùm 70 duravit, atque per id tempus populo solamen afferebant tum Prophetæ Ezechiel et Daniel qui tunc vixere, tum certa spes Dei ipsius promissis innixa in patriam post illos 70 annos redeundi. Præsens verò captivitas à plusquàm septemdecim seculis perseverat, nec ulla spes affulget ejus aliquando finiendæ. Dubitari itaque non potest quin præsentī Judæorum dispersione et captivitate puniatur crimen aliquod idololatriâ pejus, quo se illi obstrinxerint et obstringere se etiamnum pergant.

Jam verò solam Messiæ rejectionem et occisionem Judæis in Evangelio adscriptam, posse esse illud populi Judaici crimen idololatriâ pejus, facile perspicere est. Si enim attendatur Judæos præ cæteris gentibus à Deo specialiter electos fuisse, qui ejus cultui manciparentur, atque eos innumeris perpetuisque beneficiis cumulatos; quis inficias ierit cultûs divini desertionem ut se idolis dederent, maximum fuisse crimen quod in se admittere illi possent, unâ Messiæ rejectione et occisione exceptâ? Quodnam aliud ita enorme scelus assignabunt Judæi quo eorum natio sese devinxerit et adhuc devinciat, nisi quod ipsis attribuimus? Illud fateamur de quo conqueruntur Rabbini, plerosque Judæos gravioribus sese obligare peccatis; at peccata hæc privatorum sunt, non nationis, quæ contra profitetur ea esse vetita et à Deo punienda. Deinde ejusmodi peccata, saltem respectu Judæorum, idololatriâ minora sunt, à quâ prorsus abstinent Judæi. Et præterea inquiri num ab ejusmodi noxis sese immunes olim servaverint omnes Israelitæ, cùm terram Chanaan incoluerunt, cùm è captivitate Babylonicâ redierunt, cùm eorum respublica maximè floruit? Fateantur ergo illi, hujuscemodi peccata dispersionis captivitatis in quâ nunc versantur causam non esse, sed potius istud unum quòd Messiam occiderint, et etiamnum obfirmato animo abjiciant.

Confirmatur. Vel propter Messiæ rejecti et occisi facinus Judæi in hâc captivitate affliguntur, vel ii soli dicendi sunt in orbe universo veræ legis divinæ observantes, veræ religionis

cultores, et veritatis assertores; hanc propositionem tenetur Judæus libenter admittere. At si Judæi soli legem Dei observarent, si soli veram religionem colerent, ac veritatem tuerentur, num erga dilectum suum populum nullo Deus flecteretur misericordiæ motu? num adeò constans legi Mosaicæ adhæsiō nullam delictorum veniam nationi conciliaret? numquid Deus promissorum suorum oblitus populum suum è patriâ extorrem in captivitate et dispersione à septemdecim seculis perseverante desereret? Ergo Judæi non possunt dici soli legis divinæ cultores et veritatis assertores; proindeque, etc.

Dices 1^o: Secula ferè quinque supra viginti effluxerunt, ex quo decem tribus à Salmanasare Assyriorum rege abductæ, manent à solo patrio extorres; quæ tamen Messiae occisi insontes sunt; ergo captivitas similis quâ ab annis plus quàm septingentis supra mille affliguntur Judæi, infirma res est ad probandum Messiam ab ipsis rejectum et trucidatum fuisse.

Nego paritatem. Ut aliqua paritatis species institueretur, ostendendum esset 1^o, propter crimen idololatriâ minùs decem tribus fuisse in manus Assyriorum traditas; 2^o eas in terram longinquas deportatas ad meliorem frugem sese aliquando recepissee, sicque meruisse ut in terram patrum suorum reducerentur. Judæorum namque in præsentī dispersione conditio utrumque, ut dictum est, complectitur, si Messiae rejectio et occisio captivitatis hujusce causam non attulerint. Atqui non modò hæc duo de tribubus decem non probantur, sed contra 1^o, ex Scripturis indubitatum est ideò tribus illas fuisse captivitati traditas, quòd ab execrando idolorum cultu nollent recedere. 2^o Cùm Israelitarum in captivitatem à Salmanasare deportatorum nullum jamdudum vestigium supersit, nec ulla eorum certa apud veteres deprehendatur mentio, ii censendi sunt ad ritus gentium inter quas deportati fuerant sese adjunxisse, sicque omni distinctionis ratione sublatâ, in unum corpus cum iisdem coaluisse; unde nihil mirum quòd in terram Chanaan, juxta verbum Moysis Deut. 30, reducti non fuerint. Nec tamen eos Deus deseruisse dicendus est, quippe qui hos ad fidem Messiae simul cum gentibus, quibus erant immixti, Apostolorum prædicatione vocavit.

Saltem istud certissimum est, totam stirpem Israelitarum à Salmanasare abductorum vel gentibus, vel Judæis reliquis esse insertam et

confusim conjunctam, siquidem nullibi exstitit separatim. Si primum, nulla est objectio, ut dictum est. Si secundum, ex quo illi Israelitæ aliis Judæis sese adjunxere, eorum conditionem secuti sunt. Nempe tam potuere ante Christum in patriam remeare, quàm ceteri Judæi; cunctis namque indiscriminatim Israelitis facta fuit à Cyro potestas in Judæam revertendi. Ubi verò à natione rejectus et occisus est Christus, tanti criminis facti sunt consortes quotquot ex Israelitis etiam tum temporis per orbem dispersis Christo nomen dare noluerunt.

Dices 2^o: Captivitas præsens spectari debet ut continuatio captivitatis Babylonicæ; hæc enim edicto Cyri soluta non fuit, cùm major pars Judæorum dispersorum in patriam tunc non redierit. Igitur captivitas præsens non fuit inflicta propter Messiae necem.

Nego ant. Solutam fuisse captivitatem Babylonicam patet 1^o ex prophetiâ Jeremiæ, qui cap. 25, eam post 70 annos solvendam prædixerat. 2^o Ex prophetiâ Danielis 9, de civitatis et sanctuarii restauratione. 3^o Ex oratione Nehemiæ, qui 2 Esdr. 1, ad reditum populi è captivitate Babylonicâ transfert et applicat promissionem nomine Dei à Moyse factam de Judæis, si ipsi resipuerint, ab extremis terræ in terram Chanaan reducendis. 4^o Ex decreto Cyri, 2 Paralip. 36, v. 22, et 1 Esdr. 1, v. 1, atque ex edicto Artaxerxis, 1 Esdr. 7, v. 11, quibus fit facultas universis è populo Dei in Judæam revertendi. 5^o Ex eventu, si quidem ex Judæis quotquot voluere, in patriam cum Zorobabele post edictum Cyri, et cum Esdrâ post decretum Artaxerxis reversi sunt, ibique religionem et rempublicam gentis suæ restaurarunt.

Ad probationem dist.: Major pars Judæorum extra terram Chanaan mansit lubens et volens, concedo; remansit invita et coacta, nego. Solutur captivitas, cùm potestas revertendi in solum patrium conceditur; ad id necesse non est ut captivi cogantur discedere. Si captivus qui donatur libertate abeundi, malit in terrâ alienâ remanere, quàm ad suos reverti, nihilo secius liber est et à captivitate solutus.

Dices 3^o: Judæi non debuerunt puniri ob rejectum et occisum Jesum. 1^o Enim ipsum non occiderunt Judæi sed Romani. 2^o Eos ignorantia excusabat, ut patet ex his Christi verbis Luc 23, v. 34: *Pater, dimitte illis; non enim sciunt quid faciunt*; et ex testimonio Apostoli, 1 Cor. 2, v. 8: *Si cognovissent, nunquàm Dominum gloriæ crucifixissent*; ac tandem ex eo quòd idem

Paulus, 1 Timoth. 1, v. 13, ait se, cùm Christi discipulos persecutus est, *ignorantem fecisse*.

Nego ant. Ad primam prob. Etsi à Pontio Pilato præsidente romano Christus cruce damnatus fuerit, attamen cùm id iudicium latum fuerit Christum accusante Judæorum concilio, quod eum morte dignum pronuntiaverat; cùm nihil non moliti sint Judæi ut ad ferendam istam sententiam mortis iudicem romanum invitum adducerent; cùm impiâ voce conclamaverint Matth. 27, v. 25: *Sanguis ejus super nos, et super filios nostros*; cùm denique hanc patrum suorum agendi rationem approbent omnes Judæi ad Christum non conversi; evidens est occisionis Christi reos esse Judæos, ac totam nationem criminis tam horrendi sese constituere participem. Ad secundam prob. nego ant. Ignorantia vincibilis ex invidiâ et cupiditatibus orta minimè excusat; atqui ea fuit ignorantia quâ Judæi circa Christum laboraverunt. Terrenarum rerum cupidine irretiti Salvatorem à bonis temporalibus avertentem, ad cœlestia animos erigentem, noluerunt recipere. Præ invidiâ eum Pontio Pilato tradiderunt principes sacerdotum et seniores populi, Matth. 27, v. 18, et Marc. 15, v. 10. Christus rogans Patrem ut illis dimittat, hos à crimine immunes non fuisse satis ostendit. Dùm verò addit: *Non sciunt quid faciunt*, affert qualemcumque eorum excusationem, non autem eam legitimam fuisse significat. Inde patet quid respondendum sit ad testimonium adductum ex cap. 1 Epistolæ 1 ad Corinthios. Porro Paulus quem zelus legis nimius discipulis Christi infensum reddiderat, minori scelere constrictus fuit quàm cæteri; nec tamen se criminis insontem judicavit, qui se *blasphemum, persecutorem et contumeliosum* fuisse confitetur, et ideò indiguisset *misericiordiâ Dei*.

Dices 4^o: Non puniuntur Judæi quòd Messiam occiderint; sed potius quia unus gentis suæ, nempe Jesus Nazarenus sese Filium Dei prædicare ausus est; ergo, etc. Nego ant., in quo insulsè non minùs quàm impiè supponitur propter crimen ab aliquo homine privato commissum quod ejus natio detestatur et execratur ac supplicio ultimo animadvertit, posse Deum æquissimum pœnas maximas ab illâ natione per longam seculorum seriem repetere.

Sextum momentum: *Judæi sibi conscii sunt tempora adventûs Messiae à Prophetis perfixa, præterisse*. — Id à nobis non temerè affirmari probatur 1^o ex imprecatione quâ temporis Mes-

siae computatorum caput solent defigere. Nimirum, cùm omnem ejusmodi temporum computationem sibi adversari sentiant, ab illâ prorsus abstinendum statuunt, quamvis tamen ratio temporum unum sit ex insignioribus adventûs Messiae indiciis apud Prophetas assignatis. Imprecatio illa in Talmude cap. 11 Gemaræ tract. *Sanhedrin* his verbis exprimitur: *Inflata rumpantur ossa eorum qui periodos temporum computant*, atque in consuetudinem proverbii venit inter Judæos. Probatur 2^o ex eorum vulgari dicto, Messiae adventum peccatis populi retardatum esse; seu, quod eodem recidit, Messiam, secundum Prophetarum vaticinia, jamdudum advenire debuisse, sed Dei promissorum executionem propter populi iniquitates procrastinatam. *Elapsi sunt omnes termini*, inquit jam olim celebris Raf, relatus in Talmude loco mox citato, et *res non pendet nisi à resipiscentiâ et bonis operibus*. Ejusmodi effugium supra non semel præclusimus, præsertim quia, cùm ex Prophetis Messias venturus sit ad delenda peccata, et homines ab iniquitatibus liberandos, non potest intelligi promissio sub eâ conditione quòd ante ejus adventum homines non peccarent. Sed præterea num sperant Judæi futurum ut aliquando peccare desinant ante Messiae adventum? nonne eorum Rabbini finem peccato imponendum vulgò habent ut fructum adventûs Messiae? numquid ex solis justis constitutam sese tunc existimabat natio, quoties à falsis Messiis delusa est? ergo, etc. Probatur 3^o ex variis celeberrimorum Rabbino- rum eâ de re opinionibus, quas paucis sic recenset illustriss. Huetius, *Demonstr. evang.* prop. 9, cap. 8, n. 1: « Fertur in libris Rab-
« binorum, confessos esse majores ipsorum,
« qui temporibus Christo Jesu paulò superiori-
« bus vixerunt, Messiae adventum imminere;
« qui non multò recentiores fuerunt, et tem-
« plum excindi viderunt; Messiae tempus jam
« venisse. Sunt qui non alium quàm Eze-
« chiam fuisse velint; quàm sententiam peni-
« tûs damnari posse negat R. Joseph Albo
« in libro Ikkarim. Tradit R. Selomoh Jarchi
« asseverasse vetustos gentis suæ doctores jam
« venisse Messiam, eoque die esse natum quo
« excisa Jerosolyma. Referunt R. Gedalias in
« Catenâ Cabalæ, et R. Azarias in Lumine
« oculorum, quid ipsi de tempore adventûs
« Messiae, quid R. Bechai, quid R. Saadias, quid
« is quem proximè laudavi R. Selomoh Jarchi,
« quid R. Levi ben Gerson, quid R. Abraham
« Hanassi, quid R. Moses Gerundensis, quid

« Abrabanel senserint, quid et in libro Zohar
 « proditum sit; ex quorum rationibus sequitur
 « jam id tempus esse elapsum. Quocirca in
 « eodem libro Sanhedrin venisse quidem Mes-
 « siam aiunt de verporum grege nonnulli, at
 « Romæ inter ægros lepris laborantes latitare
 « (nam ex his Isaïæ verbis: *Et nos putavimus*
 « *eum quasi leprosum*, nomen ipsi leproso esse
 « fingunt), ratum verò tempus, quo ex his la-
 « tebris emersurus sit, non assignant. Quidam
 « inter horti Eden delicias ævum agitare vo-
 « lunt cum Eliâ, à quo ungendus sit olim læti-
 « tiæ oleo, cum ad muneris sui administratio-
 « nem foras prodibit. » Hinc Raf modò confi-
 « tentem audivimus, *clapsos esse omnes terminos*.
 Hinc excogitata à Judæis distinctio duplicis
 Messiae, quorum alter sit filius Joseph seu de
 tribu Ephraim, pauper, morti traditus, et à
 Christianis adoratus, alter filius David ad Ju-
 dæos mittendus eosque liberaturus. Quæ omnia
 deliramenta non aliunde orta sunt, quàm quòd
 Messiae adventus tempora esse præterita Judæi
 perspicerent.

*Septimum momentum, ex miraculis Christi et
 Apostolorum.* — Diximus hæc prodigia fuisse à
 Prophetis prædicta; nunc ea spectamus in se.
 His autem, si semel de eorum veritate consti-
 terit, evidentissimum est planè confici divinam
 esse Christi et Apostolorum missionem, nec
 proinde recedi debere à sensu quo Christus et
 Apostoli veteres prophetias explicârunt, nul-
 lumque esse posse dubium quin Dominus Jesus
 sit verus Messias Patriarchis promissus. Atqui
 miracula Christi ejusque Apostolorum ipsis-
 met editis à Moyse miraculis certiora esse ali-
 quando docuimus, atque eadem extra omnem
 dubitationis aleam longè esse posita mox
 evincemus adversus gentiles et incredulos;
 tandem vel ipsi Judæi ejusmodi miraculorum
 fidem augent, dum iis elevandis incumbunt.
 Namque cum maxima à Christo prodigia edita
 fuisse inficiari non potuerint Judæi, adeò sci-
 licet nationem affecerant ejusmodi prodigio-
 rum magnitudo et numerus, eò sese converte-
 runt, ut magicis artibus ac ineffabilis nominis
 Dei prolationi illa attribuerint. Quâ in re eos
 non esse audiendos manifestè liquet vel ex ipsâ
 ratione quâ fabulam hanc ipsi compingunt. Ita
 rem narrant in Toldoth Jesu, libro absurdissi-
 mis in omni genere commentis et blasphemis
 referto quem Wagensellius hebraicè et latinè
 edidit Altdorfii Noricorum an. 1681, ut quàm
 ineptis mendaciis Judæi à christianâ religione
 avertantur manifestum faceret: « Tum tem-

« poris erat in templo insculptum nomen Dei
 « ineffabile lapidi τοῦ στερεώματος (*fundamenti*).
 « Etenim cum David rex foderet fundamen-
 « tum, reperit ibi lapidem quemdam ἐπὶ τοῦ
 « στέματος τῆς ἀβύσσου (*super os abyssi*), in quo
 « Dei nomen incisum conspiciebatur, quem
 « inde sustollens in Sanctum sanctorum depo-
 « suit. Cum verò metuerent sapientes ne
 « fortè studiosi juvenes nomen hoc discerent,
 « orbique (quod Deus omen prohibeat!) in-
 « ferrent vastitatem, confecere incantationi-
 « bus æneos leones duos, quos ante fores
 « Sancti sanctorum, unum à dextris, alterum
 « à sinistris statuerunt. Si quis igitur intrâs-
 « set illuc, et arcanum nomen didicisset,
 « hunc exeuntem allatrabant leones, et in
 « causâ erant ut ob ingentem pavorem ac con-
 « sternationem nomina menti exciderent, et
 « oblivio illorum eum pervaderet... Jesus ita-
 « que venit clanculùm Jerosolymas, ingressus-
 « que templum didicit ibi τὰ ἱερὰ γράμματα (*sa-
 « cros characteres*) nomenque ἀνεκφώνητον (*inef-
 « fabile*) membranæ cum inscripsisset, nomine
 « hoc enuntiato, ne dolorem persentisceret,
 « scindit carnem, ibique membranam cum
 « mysteriis condit. Mox prolato rursus nomine
 « effecit ut caro consolidaretur. Necesse est
 « autem arte magicâ et vi incantaminum tem-
 « plum introierit, secus enim si foret, quo-
 « modò permissuri erant sanctissimi sacerdo-
 « tes Aaronis progenies, ut illuc ingrederetur?
 « Proinde manifestum est eum ope impuri no-
 « minis et magicâ arte patrâsse ista omnia.
 « Egre dientem per ostium allatrabant leones,
 « unde ἡ τοῦ ὀνόματος λησμονή (*nominis oblivio*).
 « Ergo extra urbem se confert, ac dissectâ
 « rursus carne educit scripturam, et cum cha-
 « racteres probè perpendisset, tenet nomen.
 « Abiit deinde Bethlehemum Judææ, locum na-
 « tivitatis suæ, ac voce magnâ clamare occipit:
 « Et quales sunt isti nequam homines? . . .
 « Annon mater virgo me peperit? . . . De me
 « vaticinatus est Isaïas Propheta: *Ecce virgo*
 « *concupiet*, etc. . . . Afferte huc ad me homi-
 « nem mortuum; eum ego vitæ reddam. Fe-
 « stinat plebs et sepulcro quodam effosso nihil
 « ibi reperit præter mera ossa arida Iis
 « allatis combinat inter sese ossa singula, eaque
 « obducit pelle, inque pedes erectum ibi staret
 « quod fuerat cadaver Cumque ante eum
 « statuissent leprosum, hunc similiter per no-
 « men ἀνεκφώνητον (*ineffabile*) sanitati resti-
 « tuit, » etc. Hæc illi quæ retulisse refutasse

est. Qui plura voluerit, adeat Wagensellium in confutatione illius libri.

Octavum momentum, ex testimonio Josephi. — Flavius Josephus, Hebræus, Matathiæ filius, ex genere sacerdotali, Judæorum historicus insignis, lib. 18 Antiquitatum Judaicarum cap. 3. aliàs 4, n. 3 de Christo Jesu sic loquitur : « Eo etiam tempore fuit Jesus vir sapiens, si tamen virum eum appellare fas est; fuit enim mirabilium operum effector, magister hominum qui verum cum voluptate accipiunt; multosque Judæos, multos item gentiles ad se pellexit. Hic erat Christus. Quem cum Pilatus, ab hominum nostrorum primis delatum, crucis supplicio addixisset, eum tamen amare non desierunt, qui primum amaverant. Apparuit enim eis tertio die revivus, divinis vatibus et hæc et mille alia de eo miranda effatis; atque ab eo denominata Christianorum natio durat usque ad hunc diem. »

Circa hujusce textus authenticitatem, quam nemo ante seculum decimum sextum in dubium vocaverat, gravis inter eruditos proximè elapso præsertim seculo controversia exorta est, à nobis mox expendenda. Sed in antecessum sic argumentari licet : Vel is textus Josephi genuinus est, vel gesta Christi prorsus siluit insignis ille Judæorum historicus, quippe cum nullo alio in loco eum commemoret nisi lib. 20 Antiq. cap. 9, aliàs, n. 1, ubi injustè illatam Jacobo mortem referens, ait eum fuisse fratrem illius Jesu qui dicebatur Christus. Si prius, nemo non videt quantum ex adeò illustri testimonio clarissimi historici causæ christianæ robur accedat. Si posterius, nempe si gestorum Christi nullam Josephus mentionem fecerit, dico hoc ipsum scriptoris celeberrimi silentium vel apertissimo quod ipse proferre potuisset testimonio æquivalere. Liceat enim inquirere quâ de causâ res Christi gestas siluisset Josephus. Num quòd ignoraverit quæ ad ipsum spectabant ? Verùm is rerum Judaicarum diligentissimus indagator, qui prima etiam reipublicæ munia exercuerat, potuitne ea ignorare quæ ante per paucos annos acta fuerant, quæ, latentibus ipsismet Judæis, celeberrima fuerant, quæ ad Judæorum religionem maximè pertinebant, quæ in Judæâ tot fuerant concertationum causa, quæ demùm ab Apostolis et in Judæâ et in toto orbe promulgata fuerant ? Non ergo Christi gesta silentio pressisset Josephus; quòd ea perspecta non haberet. An verò quòd negotium illud minoris

momenti arbitraretur, quàm ut ad posteros transmitteretur ? At nonne de Joanne Baptistâ sermonem instituit, libro eodem 18, cap. 5, aliàs 7, n. 2, et de ipso Jacobo, quem ut notiore faceret, fratrem fuisse ait illius Jesu qui dicebatur Christus, lib. 20, cap. 9, aliàs 8, n. 1 ? Quomodo igitur Christum prætermisisset, Christum, inquam, qui se esse Messiam patribus promissum primus prædicaverat, qui maxima prodigia, Judæis confitentibus, patraverat, qui religionem de nomine suo condiderat quam ad Judæos primum, et deinde ad gentes universas jusserat ab Apostolis perferendam et prædicandam, qui tum per se, tum per discipulos, sibi ex Judæis multos, ex gentilibus longè plures toto orbe devinxerat, cujus denique fama apud ipsos imperatores paganos, ut infra dissert. 5, cap. 1, dicemus, etc., erat celebratissima ? Itaque fateamur quod res est, si nullam Christi mentionem fecisset Josephus, idcirco siluisset quia veritatis amator et propriæ existimationis studiosus noluisset fictis opprobriis famam Christi lædere; simulque metuens ne Judæis invisum se redderet, verum ipsi non ausus fuisset testimonium perhibere; ergo, etc.

Jam de insignis hujusce textus authenticâ fide disserendum.

An allatum Josephi testimonium genuinum sit.

— Illud Josephi testimonium Judæis omnibus adulterinum esse testatur R. Menasseh ben Israel in epist. ad Arnoldum, quæ extat ad calcem tomi 2 operum Josephi edit. Havercampi pag. 254. Quod ad Christianos spectat, textus ille ad seculum usque decimum sextum ab iis unanimiter habitus fuerat ut genuinus historici fœtus. Lucas Oziander, celebris discipulus Lutheri, in Epitome historiæ ecclesiasticæ, cent. 1. lib. 11, cap. 7, primus scripsisse videtur ejusmodi testimonium adulterinâ manu insertum fuisse. Fertur ita enim opinatum fuisse Hubertum Gifanium insignem in Germaniâ jurisconsultum. Eamdem sententiam amplexi sunt quidam è Catholicis, Alphonsus Salmeron, Salianus, etc. Et ex Protestantibus plurimi, uterque videlicet Capellus, Dallæus, Christophorus Noldius, Sebalus, Snellius, Christop. Arnoldus, Blondellus, Tanaquillus Faber, etc. Isti duo ultimi, Faber nempe et Blondellus, hic in lib. 1 de Sibyllis cap. 7, ille in Epist. ad Chabrolium, quæ ad calcem operum Josephi, pag. 267, extat, præ cæteris huic tractando argumento incubuerunt; quorum præcipua et valentiora, ut putat, momenta

collegit et lectori obtrudit Dupinus in suis Bibliorum Prolegomenis lib. 2, cap. 7, § 5, ubi observandum neque genuinum illi critico esse Josephi de Joanne Baptistâ testimonium, quod solus antea Blondellus in suspicionem suppositi fœtus vocaverat; uterque autem, cum cæteris omnibus, parcit textui ad Jacobum Christi fratrem attinenti.

Causæ christianæ illud eripi subsidium, quod ipsi Josephus eo loci subministrat, haud passi sunt eruditi plurimi seu inter Catholicos, seu inter Protestantes. Legi possunt eâ de re Spencerus, Commentario in libros Origenis contra Celsum, Henricus Valesius in Annotat. ad Eusebii historiam, Franciscus Regius (de Roye) jurisconsultus Andegavensis in Dissert. super hoc argumento publici juris factâ anno 1656; illustriss. Huetius episcopus Abrincensis in Demonstr. Evang. prop. 3, n. 11 et seq. Isaac Vossius in Chronolog. sacrâ, Natalis Alexander in Hist. ecclesiast. veteris Testam. dissert. 6, Samuel Parkerus, episcopus Oxoniensis, in Demonstr. Relig. christianæ, Tillemontius, T. 1 Hist. Imperatorum, notâ 40, Pagi in Dissert. ad Annales Baronii, Pearsonius, Annalium Paulinorum pag. 29, Houtteville in tractatu gallicè scripto de Relig. christianâ, T. 2, edit. 2, Carolus Daubuz in eximiâ Dissert. ad calcem operum Josephi ab Havercampo editâ, et alii complures; quibus præiverat tota virorum summè eruditorum à Carolo Daubuz recensitorum manus, qui de hoc testimonio, antequàm nasceretur aut excalesceret controversia, paucis sententiam dixerunt. Cum iis sit

CONCLUSIO. Testimonium Josephi de Christo genuinum est hujusce historici fœtus. Probatur. Illud testimonium est genuinum Josephi fœtus, quod in omnibus exemplaribus tum impressis, tum manuscriptis extat; quod ab initio quarti seculi à compluribus et accuratis auctoribus ecclesiasticis laudatur; quod à nemine unquàm expressè rejectum est ante medium seculi decimi sexti; de quo olim dubitatum aut disputatum fuisse nulla extat memoria, cujus denique stylus stylo Josephi simillimus est. Atqui sic se habet textus de quo agimus.

Ut majoris propositionis veritas ampliùs pateat, advertendum est Josephum fuisse scriptorem suâ ætate celeberrimum, ejus libros de bello Judaico manu imperatoris Vespasiani subsignatos ne corrumpi possent, in Bibliothecâ romani imperii repositos fuisse, atque hoc opere insignem historicum meruisse ut

sibi statua Romæ erigeretur. Itaque dubium esse non potest quin omnes Josephi libri citiùs vulgati fuerint, et in omnibus bibliothecis asservati, omniumque manibus triti. Jam verò probanda est minor per partes. 1º Testimonium de quo agitur, extat in omnibus Josephi exemplaribus seu editis, seu manuscriptis; neque enim hactenùs laudatum est vel unum exemplar in quo desideraretur. Observantur quidem in hoc textu, ut et in aliis promiscuè Josephi locis, leves quædam inter varia exemplaria diversitates; sed nemo nescit varias ejusmodi lectiones ad substantiam non attinentes in omnibus veterum scriptis sæpius occurrere, nec eorum authenticitati et integritati officere. Hic nota obiter vetustum codicem hebraicum M. S. Bibliothecæ Vaticanæ, in quo Baronius censuerat testimonium istud fuisse erasum, quique multis eruditorum concertationibus locum dederat, ad rem de quâ agitur non attinere. Erraverat eminentiss. Annalium ecclesiasticorum parens. Manuscriptus ille codex non Josephum genuinum exhibet, sed impostorem illum qui se Josephum Gorionidem simulavit, atque textus qui in eo codice erasus est, non spectat ad Christum.

2º Ab initio quarti seculi illud testimonium laudârunt multi ecclesiastici scriptores. Nam Eusebius qui initio 4 seculi, ducentis circiter post Josephum annis vixit, bis illud protulit, nempe lib. 3 Demonstr. evang. cap. 5, et lib. 1 Hist. eccles. cap. 10. Eundem textum in Catalogo scriptorum ecclesiast. exhibens S. Hier. nullam adjicit suspicionis notam. Rufinus Aquileiensis, æmulus S. Hieronymi, lib. 1 Hist. ecclesiasticæ, Isidorus Pelusiota, S. Joannis Chrysostomi discipulus, Epistolarum lib. 4, n. 225, auctor antiquus libri de Excidio Judæorum qui Hegesippo tribuitur, Sozomenus lib. 1 Hist. cap. 1, Cassiodorus Senator qui libros Antiquitatum latinè verti curavit, Nicephorus Calixtus, Cedrenus, Zonaras, Suidas, et alii, illud testimonium suffragiis suis comprobârunt, cæterique omnes posteriorum temporum scriptores.

3º A nemine expressè rejectus est textus ille Josephi ante seculum decimum sextum. Adversarii objiciunt quidem plures è veteribus illum prætermisisse ubi illud adhibere potuissent; sed neminem citare possunt qui illum suppositum esse significaverit.

4º De ejusmodi testimonio olim dubitatum fuisse aut disputatum nulla manet memoria. Imò illud aut certum et indubitæ fidei pro-

ferunt Eusebius, S. Hier. alique, nec à quodam reprehensi sunt quòd hunc textum attulissent.

5^o Stylus testimonii, de quo agitur, simillimus est stylo Josephi. Stylus intelligo verba, phrases, nominum phrasiumque dispositionem ab unoquoque scriptore usurpari solita. Itaque si in testimonio quod expendimus, eæ occurrant voces phrasesque, ac vocum et phrasium dispositiones quæ sæpiùs in Josephi scriptis ac præsertim in postremis Antiq. libris deprehenduntur, fatendum erit textum hunc genuinis Josephi foetibus tam similem non posse ipsi abjudicari. Atqui jam comperta et explorata est omnimoda illa consensio et cohærentia styli inter cætera Josephi opera et testimonium quod ipsi adscribimus. Jam dixerat illustriss. Huetius, prop. 3, n. 18, Fabrum hic obtendentem styli discrepantiam refellens, *nec ovum sibi videri ovo similis, quàm περιόχη hæc reliquarum Josephi scriptorum similis est.* Longius progressus est laudatus modò Carolus Daubuz. Is nimirum singulas ejusdem periochæ voces, phrases, constructiones, cum vocibus, phrasibus, constructionibus Josepho usitatis labore indefesso contulit; sicque non modò judicii Huetii æquitatem, et Fabri, quem Dupinus secutus est, in hoc negotio inconsiderantiam demonstravit, sed et authenticitatem testimonii nostri valido argumento firmavit. Unum duntaxat hujus auctoris diligentiae exemplum referam; ad hanc vocem, *Γίνεται*, quâ textus incipit, « non insolitum, inquit, Josepho, sicubi filo « orationis abrupto, in aliam rerum seriem « transit, hoc verbum præponere. Sic enim « libro Archæologiæ 18, cap. 12, cùm superiore capite de imagine Caii Cæsaris in templo Jerosolymæ statuendâ disseruisset, ad « res Babylonicas conversus his exorditur verbis : *Γίνεται δὲ περὶ τοὺς*, etc. Sic libro 20, « cap. 2 : *Γίνεται δὲ πρῶξις*, etc. Unum tantum « addam ex eodem libro cap. 6 : *Γίνεται δὲ καὶ τῶν Καισάρειαν διχοφύτων Ἰουδαίων στασίς*, etc. « Confer. lib. 1, cap. 3, Archæologiæ.... et « cap. 16.... lib. 20, cap. 5,.... et de Bello « Judaico, lib. 1, cap. 1.... et cap. 4.... et « lib. 4, cap. 15.... et iterum Archæologiæ « lib. 3, cap. 6.... et cap. 8.... Quin etiam « dignum est observatu, Josepho esse ferè solemne, verbum quod vocant principale, in « sententiâ statim à principio ponere; quippe « quòd verbum sic positum, tanquàm fundamentum, vim ac pondus addat orationi. » Jam verò cùm unicuique scriptori suus sit stylus

ac dicendi color, quo casu fieri potuisset ut impostor eâ ætate quâ ad ejusmodi exiliora artis critices minùs attendebatur, Josephi stylum in brevi illo textu adeò accuratè imitatus esset? Ergo, etc.

Solvuntur Objectiones. — Objicies 1^o Illud testimonium in textu Josephi adulterinâ manu insertum est, quod filum et seriem orationis abruptit et intersecat; atqui sic se habet testimonium de quo agimus. Nam post ejusmodi testimonium ita legitur : *Circa eadem tempora etiam mali quippiam aliud Judæos perturbavit*, etc., quod nullam cum iis quæ nostrâ continentur periochâ habitudinem dicit, ad eadem verò Judæorum ante illud testimonium commemoratam planè refertur; ergo, etc.

Respondet Tillemontius loco citato, poni posse Josephum non nisi ex post facto testimonium illud addidisse, tuncque transitionis mutandæ esse oblitum. Sed ad hanc hypothesim necesse non est ut recurramus. Itaque dist. maj. : Illud adulterinâ manu insertum est, quod filum et seriem orationis intersecat, modo historicis optimis ac ipsi Josepho insueto, concedo; modo consueto, nego. « Familiare est « historicis, inquit Huetius, prop. 3, n. 14, « disconvenientes et diversas narrationes congerere, prout rerum postulat varietas, nullâ « argumentorum commissurâ. Ni fiant, magnâ « quippe voluptate lector, magis historia fraudetur ornamentis, infinitis sese scriptor angustis impediat, et in connectendis singulis « et aptandis frustra desudet; ac legem præterea pervertat historiæ, quæ temporum ordinem, non rerum persequi debet. » Atque is mos est nobilissimorum historicorum, præsertim ubi memorabile quoddam factum paucis indicare volunt. Tunc autem sufficit 1^o si ab iis habeatur ratio temporis; 2^o si transitio quâ ad orationem priùs inceptam se reverti exprimunt, hanc eorum mentem haud perplexè notam faciat. Utrumque verò Josephus hic præstitit. Et quidem habuit rationem temporis. « Nam, ut ait Huetius ibidem, quamvis ea quæ « proximè subest Paulinæ et Decii mundi « historia contigerit ante Christi mortem, quæ « narratur in hoc Josephi loco, non minùs « propterea ordo temporum ab eo servatus est; « nec enim mortem tantum Christi, sed vitam « etiam, munus ac res gestas, velut in brevi « tabellâ complexus est; quam in id tempus « coniecit, quo vixisse eum constabat: non « verò singula per annos digesta explicare instituit. » Et reverà nullo alio in loco aptius de

Christo potuisset sermonem instituere. Deinde transitio quam his memoratis Josephus adhibet, hunc ad incceptum antea propositum redire haud perplexè indicat; ita ut nemo sit qui attentâ rerum expressarum naturâ, id statim non habeat perspicuum; ergo, etc.

Ad probationem, dico res ejusmodi ad normam exiliorum grammatices regularum non esse expendendas, quarum nimis anxia observatio, in transitionibus præsertim, tantum molestiæ lectori intelligenti, quantum laboris auctori parit. Narratio quibusdam solum constans lineis non ita sermonem abrumpit, ut ad eam necesse sit transitionem referri. Quot in Thucydide historico eximio occurrunt digressiones et intempestivæ narrationes, quibus longè ampliùs mens lectoris perturbatur quàm hoc Josephi loco? quot in aliis omnibus historicis similia? Sed ut res planè conficiatur, in ipso Josepho loca alia ejusdem generis habentur. Nam 1^o, Blondellus et Dupinus idcirco dubitant an testimonium in quo de Joanne Baptistâ loquitur Josephus, genuinum sit, quia ibi orationis seriem abrumpi arbitrantur; atqui tamen illius loci authenticam fidem tot testimonia demonstrant, ut de eo dubitari non possit; nec sanè à Christo potuit ille locus corrumpi, cum in eo aliqua Evangelistis non consona occurrant. 2^o Hæc verba lib. 5 Antiq. cap. 10, aliàs 11, n. 1, « Hebræi autem, rebus eorum « in deterius lapsis, rursus bellum movent Pa- « læstinis talem ob causam, » etc., tam exigent quæ immediatè præcedunt ad bellum aliquod adversus Philistæos gestum attinere, quàm ista lib. 18, quæ obijciuntur: « Circa eadem « tempora etiam mali quidpiam aliud Judæos « perturbavit, » videri possunt postulare ut cædi illi Judæorum Pilati jussu factæ immediatè connectantur. Atqui verba laudata capitis 10 lib. 5, immediatè non præcedunt illius belli narratione, sed historiæ Ruthæ, quæ ibi perinde inserta est ac testimonium de Jesu suo loco apponitur, et quæ multò longior est, seriemque orationis magis interrumpit; ergo.

Obj. 2^o: In hoc testimonio assertitur 1^o Christum, utpote plurium miraculorum effectorem, non esse appellandum duntaxat hominem, ac proinde esse Deum; 2^o hunc esse Christum, id est, Messiam; 3^o cum tertiâ die resurrexisse; 4^o ejusdem resurrectionem oraculis Prophetarum confirmari; 5^o cum fuisse magistrum veritatis, et miracula edidisse quibus ejus divinitas adstrueretur. Quis unquam crediderit Judæum aliquem, sectâ Pharisæum, nationis

sux causæ addictissimum, talia sensisse et protulisse? ergo, etc. Ita Dupinus Blondelli, Fabri, aliorumque rationes exhibet. Resp. duo in hoc argumento esse vitia, quibus tota vis ejus labefactatur. Nimirum supra modum amplificatur tum ea quæ in laudem Christi Josephus narravit, tum studium quo ille nationis suæ causam est amplexus. Et 1^o falsum est Christum in testimonio Josephi appellari Deum; imò falsum est ibi asserti eum non esse hominem duntaxat appellandum. Hæc sunt verba Josephi: *Si tamen virum eum appellare fas est*, quibus mirum est viros eruditos putasse exprimi Christum non fuisse purum hominem, seu eum esse Deum. Enimverò, ubi de eximio quodam viro, doctrinâ et operibus præcellenti agitur, nonne apud quoscumque auctores hæc aut alia similis figura frequentissimè occurrit? Innumera ejusmodi locutionis exempla suppeditat vel unus Cicero; quæ cum aliis compluribus ex multiplici scriptore depromptis in dissertatione Caroli Daubuz legi possunt p. 218 et seq. Josephus ipse duplici in loco eundem loquendi modum adhibet, de puris hominibus sermonem faciens, nempe lib. 3 Antiq. cap. 15, aliàs 13, n. 3, et lib. 9, cap. 8, aliàs 9, n. 6. In priori sic habet de Moyse: *Quin et alia plurima auctoritatis ejus PLUSQUAM HUMANE argumenta sunt*, etc., in alio verò de Elisæo: *Postquàm fatis excessisset*; inquit, VI DIVINA pollebat.

2^o Ubi Josephus de Domino Jesu dixit: *Hic erat Christus*, non eo sensu intelligendus est quòd hunc esse Messiam ipse tenuerit, sed ita tantum ut voluerit significare Jesum de quo loquebatur eum esse qui toto orbe *Christi* nomine designabatur, quasi dixisset: Hic ille est qui *Christus* appellatur. Scilicet cum Josephus scripsit, Christi nomen, Apostolorum prædicatione, necnon Neronis persecutione, omnibus innotescebat, nec aliâ appellatione apud gentiles nuncupabatur Salvator noster. Narrans ergo Josephus quæ ad Jesum spectabant, monere debuit gentiles, hunc de quo verba faciebat eum esse qui Christus apud omnes cognominabatur et audiebat. Porrò ad id exprimendum cum hæc phasi usus est, *Hic erat Christus*, locutionem usurpavit quam nemo non adhibet in simili occasione. Sic et Pilatus Christi cruci inscripsit: *Hic est rex Judæorum*, quamvis Christum ut regem Judæorum neque ipse haberet, neque ab aliis haberi vellet.

3^o Falsum est in testimonio, de quo agimus, à Josepho agnosci multa Christum in divinitatis suæ confirmationem edidisse mira-

cula; imò de divinitate Christi ibi ne verbum quidem.

4° Ait quidem Josephus Christum fuisse magistrum eorum qui vera libenter amplectuntur; at non dixit simpliciter eum fuisse magistrum veritatis. Istud Christo assereret infallibilitatem. Prius ipsi ejusque discipulis non vindicat nisi magnum veritatis studium et amorem, cum assecutione veri saltem in plurimis.

5° Non ait absolutè Josephus Christum surrexisse, quâ voce certò certius usus esset Christianus, sed minùs confidenter et apertè loquitur; dicit duntaxat eum discipulis suis *apparuisse rursus viventem*, ἐφάνη πάλιν ζών. Pariter non definit an miracula ab eo patrata, doctrinæ quæ à Christianis prædicabatur adhærendum probarent. Itaque in argumento proposito amplificatur multùm ea quæ in laudem Christi testimonium nostrum continet.

Jam verò in eodem argumento studium et zelus Josephi erga Judæorum causam nimium etiam exaggerantur. De Judæis post Christi passionem et Josephi tempore viventibus idem volunt adversarii esse judicium ac de Judæis hodiernis. Falluntur. Multi ex Judæis veteribus etiam legi addictis, non ita fuère iniqui erga Christum, ut sunt cuncti Judæi posteriores. Creverunt odia multis de causis. Isti omnes sunt zelotæ, ut aiunt. At primo seculo alii, et quidem multi, etiam ex numero sacerdotum, ad fidem christianam conversi sunt, ut ex Actibus Apostolorum discimus. Alii christianæ veritatis fuerunt osores et Christianis apertè inimici. Alii fuère quasi semi-christiani, qui nec amplectebantur christianam fidem, nec tamen odia cæterorum adversùs Christum et ejus discipulos approbabant. Josephum porrò etsi sacerdotem, etsi Pharisæum, quid vetat in tertiâ istâ Judæorum classe collocari, cum aliis multis, qui, ut sæpè fit, veritatem prodere nefas putant, quam tamen ob cordis dritiem non amplectuntur? Certè si multi sacerdotes ad religionem Christi conversi sunt, aliqui ex eis potuerunt esse in Christum ejusque fidem propensi, quin ei se devoverint. Conjecturam hanc de Josepho quibusdam argumentis firmamus. 1° Observant ipsi adversarii Josephum ut apud gentiles fidem faciliùs inveniret, quædam miracula in libris Judæorum sacris relata imminuisse, imò de iis aliquando videri dubitasse; quæ, si ita sint, certè in Judæum, in Pharisæum zelotam non cadunt. 2° Judæi veteres in libro *Zohar*, quem ii scriptum volunt initio secundi seculi, distinguunt Messiam du-

plicem: alterum filium Davidis, regem magnum, victorem, et liberatorem Israelis; alterum filium Joseph Ephraimitam, pauperem, contemptum, quem Romanis et Christianis colendum relinquunt. Vide Lud. Capell. ad cap. 2 Geneseos, v. 4, 5, 6. Qui porrò in eâ fuère sententiâ, quæcumque de Jesu Josephus attestatur potuerunt ut vera libenter agnoscere. 3° Josephus post Jerosolymorum cladem Romæ vixit, Romanorum præsidio fretus, nationi suæ invisus. Ergo immeritò habetur ut partibus Judæorum addictissimus; proindeque cùm in conscribendâ historiâ sola ipsi veritas cordi fuerit, nihil mirum esse debet quòd de Christo ea protulerit quæ ipsius testimonio comprehenduntur.

Obj. 3° cum Blondello. Christus multos ex gentilibus ad se non pellexit, ut in textu quem defendimus, legitur; ergo, etc.

Dist. ant.: Non pellexit per se, esto; non pellexit per discipulos, nego. Certissimum est tempore quo Josephus scripsit à magnâ Gentilium multitudine fidem Christi fuisse susceptam; quod satis est ut dici potuerit Christus multos ex gentibus ad se pellexisse. Cæterùm ex cap. 2 S. Matthæi ubi sermo fit de Magorum adoratione, et ex cap. 12, v. 20 S. Joannis liquet ipsi, dùm viveret, plures ex gentilibus fuisse addictos.

Obj. 4°: S. Justinus in Dialogo cum Tryphone, Tertull. in lib. adversùs Judæos et in Apologet. S. Clemens Alexandr. Origenes, etc., non laudaverunt illud testimonium; ergo eorum ætate et antequàm ab Eusebio adduceretur, deerat in scriptis Josephi. 1° Nego consequ. Quia 1° plurima auctorum ecclesiasticorum, qui tribus prioribus Ecclesiæ seculis floruerunt, scripta perièrunt, in quibus fortè textus de quo agimus, referebatur; 2° quia quòd propiores erant illi scriptores temporibus Christi, eò minùs necesse fuit ut testimonium Josephi adversùs Judæos adducerent. Quid ita? quia quo tempore recentia adhuc erant facta evangelica, multis poterant firmari argumentis, quibus non magnum addidisset pondus auctoritas Josephi scriptoris non coætanei.

2° Resp. ad singula. Ad S. Justinum, is si testimonium Josephi in Dial. cum Tryphone Judæo attulisset, à proposito declinasset. De factorum evangelicorum veritate non disputabat Tryphon; sed negabat divinos honores Christo tribuendos. Ex libris sacris Judæorum, ex Prophetarum oraculis efficit S. Justinus Messiam seu Jesum esse Deum. Ad illud ad-

struendum quorsum allatum fuisset Josephi testimonium? Ad Tertull. In Apologetico non affert quidem Josephi testimonium ut facta evangelica confirmet Gentilibus; sed ratio in promptu est; majoris ponderis ipsi erant instrumenta. Laudabat epistolam Pilati ad Tiberium, et ipsius imperii romani archiva. Ubi verò contra Judæos disserit, de factorum evangelicorum veritate non disputat, quam fortè ii, quibuscum res ipsi erat, Judæi non inficiabantur. Ad S. Clementem Alexand. Fatemur in libris Stromatum collocari potuisse Josephi testimonium; verum non probabunt adversarii illud, si genuinum sit, à S. Clemente non potuisse omitti. Cæterum cum eruditissimi illius operis pars non modica perierit, quis non videat ex S. Doctoris silentio nihil posse confici? Ad Origenem. Resp. duo ejus testimonia objici. Primum extat tract. 10 in Matth. n. 17. T. 3, edit. 1735, pag. 463; alterum lib. 1 contra Celsum, n. 47, T. 1, pag. 362. Prius nullam difficultatem facessit, siquidem eò loci nihil erat quod Origenem cogeret facta Evangelica ex testimonio Josephi adstruere. Ibi quidem dicitur « hoc esse mirabile (Josephum), cum Jesus nostrum esse Christum non crediderit, » tantam tamen Jacobo justitiam testimonio « suo tribuisse; » ex quo id unum sequitur juxta Origenem à Josepho Jesum non fuisse habitum ut Messiam, quod et nos statuimus. Quod ad alterum Origenis locum spectat, major in eo difficultas est, quia propositæ à Celso objectioni diluendæ videtur alicui usui esse potuisse nostrum Josephi testimonium. Attamen cum Celsus de solo Christi baptismo quæstionem movisset, satis fuit Origeni afferre testimonium in quo Josephus de Joanne Baptistâ et de baptismo ab eodem in remissionem peccatorum collato sermonem instituerat. Quod addit ibidem, Josephum non agnovisse Jesum pro Christo, significat duntaxat Josephum in Christum ut Messiam non credidisse. Vide Spencerum in notis ad libros Origenis contra Celsum.

Obj. 5^o : In Bibliothecâ Photii tria observantur, quæ probant erudito illi viro Josephi textum fuisse supposititium. Nam 1^o, dum Josephi opera recenset, et de libris Antiq. sermonem facit cod. 76, nullam habet mentionem illius testimonii. 2^o Idcirco abjudicat Josepho librum de Universo, cod. 48, quia illius de libri auctor « de Christo vero Deo nostro aptissimè loquitur, quando et ipsam Christi appellationem « ipsi attribuit, et inenarrabilem ex Patre ge-

nerationem citra reprehensionem describit. » 3^o Loquens de justo Tiberiensi, cod. 33, ait eum « communi Hebræorum vitio laborantem, « Judæus genere cum esset, de Christi adventu, deque iis quæ ipsi acciderunt, aut de « miraculis ab illo patratis nullam prorsus fecisse mentionem. » Ergo tam honorificum Josephi de Christo testimonium non prætermisisset Photius.

Nego ant.; imò si Photius ut supposititium habuit celebrem illum textum, quare more suo alios non carpit auctores à quibus id testimonium tanquam genuinum afferri non potuit ignorare? Ad primum neque etiam meminit Photius loco citato testimoniorum Josephi de Joanne Baptistâ et de Jacobo *fratre illius Jesu qui dicebatur Christus*. Ergo ne hæc testimonia supposititia sunt, quorum posterius à nemine hactenùs rejectum est, prius verò ab Origene etiam laudatum tot characteribus sinceritatis vestitur, ut mirum sit à Blondello et Dupino in suspicionem vocatum fuisse. Ergo sinceritati testimonii quod expendimus, non nocet silentium Photii, librorum de Antiq. argumenta paucis duntaxat exponentis. Quinimò ex illo silentio potius evincitur hoc testimonium esse genuinum. Nam si Photius illud ut supposititium habuisset, qui ergo, ut mox dicebamus, Eusebium, totque alios scriptores more suo carpit nusquam aut notat, à quibus probè sciebat textum illum ut authenticum laudari? Cæterum cod. 238 videtur Photius ex Josepho facere de Christi passione mentionem.

Ad secundum, 1^o Photius non abjudicat Josepho librum de Universo, sed tantum dubitat utrum ipsius sit. 2^o Quæ auctor illius libri circa Christum verum Deum et ejus *inenarrabilem ex Patre generationem*, teste Photio, *aptissimè et citra reprehensionem* disserit, in immensum distant ab iis quæ continentur in Josephi textu quem expendimus. Illa christianum theologum produnt; ista sincerum duntaxat historicum.

Ad tertium facilis responsio. Quod occasione Justi Tiberiensis Judæi zelotæ, id est religioni suæ addictissimi, Romanorum et Christianorum osoris, Photius eloquitur, necesse non est extendi ad Josephum eodem vitio non laborantem, et cujus scripta fortè nondum legerat Photius, cum de Justo Tiberiensi sermonem faceret. Sed si conjecturis certandum sit, cur, quæso, Photius Justum Tiberiensem redarguit quòd de Christo sileat, nihil verò ejusmodi opponit Josepho? quare isti parci, non illi, si in historiæ leges ambo et

perinde peccaverint? Ergo ex eo argumento potius sequitur nihil simile Josepho objici potuisse proindeque, etc.

Dissertatio iij.

QUOMODO ADVERSUS GENTILES EFFICIATUR MYSTERIUM INCARNATIONIS EXISTERE.

Adversus gentiles et incredulos divinam Scripturarum inspirationem non agnoscentes eatenus valet mysterium Incarnationis demonstrari, quatenus missio Christi et Apostolorum ejus, à quibus mysterium illud prædicatum est, divina esse ostendi potest. Si enim Christus et Apostoli à Deo missi sint, doctrina christiana, juxta quam Christus est Homo-Deus, vera sit necesse est et fide tenenda. Porro missionem Christi ejusque Apostolorum esse à Deo profectam, eadem evincunt argumenta, quibus ipsamet religionis christianæ veritas et revelatio adstruitur. Quapropter, si de propositâ quæstione, eâ quam res ferre posset diligentiam dissereremus, tractatio integra veritatis religionis christianæ esset instituenda, quod præsentis propositi ratio non patitur. Itaque, ut scholarum mori hic obsequamur et simul brevitati consulamus, præcipua tantum hujusce negotii capita summatim attingemus. 1^o Ex factis evangelicis, præsertim verò ex miraculis Christi et Apostolorum, hunc esse à Deo missum adversus gentiles et incredulos ostendemus. 2^o Ex resurrectione Christi speciale ducemus argumentum. 3^o De miraculis in historiâ ecclesiasticâ relatis quidquam addemus. 4^o Ex mirabili religionis propagatione, et 5^o ex Prophetiis divinam Christi missionem confirmabimus.

CAPUT PRIMUM.

Ex factis evangelicis, præsertim verò ex miraculis Christi et discipulorum ejus, hunc esse à Deo missum adstruitur.

Miraculorum nomine ab omnibus intelliguntur effectus illi rari, sensibiles, stupendi, hominis facultatem excedentes, nulli causæ physicæ, saltem naturaliter, seu ratione, seu experientiâ cognitæ, connexi, cujusmodi complures in Scripturis et in historiâ memorantur, ut sunt mortuorum resurrectiones, subitæ morborum etiam desperatorum curationes, transformationes variæ, v. g. aquæ in vinum, virgæ in serpentem, etc. Hæc miraculi notio,

quam omnes recipiunt, haberi potest instar definitionis nominis.

Quod ad definitionem rei attinet, variæ sunt opiniones quas nec referre, nec expendere eò loci possumus. Annotare satis sit, dubitari non posse quin miracula legibus communicationis mortuum abjudicanda sint; unde generatim finiri debent, exceptiones legum generalium communicationis motuum, seu quod eodem redit, effectus sensibiles iis oppositi effectibus ad quos iisdem in circumstantiis physicis producendos, leges communicationis motuum destinatæ sunt. Enimverò licet determinare nemo possit quousque pateat legum communicationis motuum potestas in speciali; id est, quamvis non valeas assignare singulas effectuum species ex ejusmodi legibus nexas; attamen si rem expendas non ad amussim metaphysicæ subtilioris, sed pro sano et ut sapientem physicum decet, faciliè perspicias ad effectus miraculosos has leges non extendi. Nonne enim opera miraculosa iisdem in circumstandiis physicis patrantur, in quibus exploratum est effectus dissimiles vi legum naturalium produci? Quis, v. g., resurrectionem mortui, id est organorum penitus destructorum restitutionem, et animæ ad corpus reditum? quis paucissimorum panum pluribus hominum millibus reficiendis multiplicationem? quis vel ipsum Petri super aquas incessum, aut vestimentorum populi Israelitici perseverantem quadraginta annis in deserto integritatem? quis, inquam, hosce effectus judicaverit esse totidem legum communicationis motuum appendices? Certè non ita sentiet prudens quisque physicus, prima omnium principia, prima plantarum et animalium organa Deo speciali voluntate operanti adscribens, legibus verò generalibus motuum id unum tribuens, ut corpora dividant, component, coagmentent, et succorum accessu prima rerum rudimenta et lineamenta explacent ac evolvant. Ergo miracula non sunt consecutiones legum communicationis motuum; proindeque, etc.

Miracula dividi solent in propriè dicta et impropriè dicta. Illa solus Deus producit; hæc ab Angelis seu bonis seu malis patrari possunt. Quod ut intelligatur, sciendum est omnes effectus miraculosos vel esse *transformationes* ut aiunt, id est introductiones formarum essentialium seu configurationum quibus corpora diversi generis constituuntur, ut cum aqua in vinum à Christo versa est; vel consistere in iis tantum mutationibus quæ *alterationes* ap-

pellantur; vel in merâ translatione aut quiete corporum. Transformationes duplicis generis distinguuntur; aliæ quæ fieri possunt vi alienius agentis materialis effectui producendo applicati; sic, v. g., ope ignis lignum mutari potest in fumum et in cineres; aliæ ejus naturæ sunt ut excedant omnis agentis materialis vires, ita ut nihil in corporalium rerum naturâ existat, quod, quocumque modo applicatum, ejusmodi effectui producendo sufficiat; sic, v. g., nullum datur agens materiale quod organa plantarum aut animalium corrupta penitus et destructa restituere possit, proindeque cum virga Aaronis floruit, cum Lazarus resurrexit, factæ sunt transformationes vim omnem agentium materialium superantes.

Supponunt passim Scripturæ, et omnes theologi docent, Angelis seu bonis seu malis datam à Deo esse lege aliquâ generali potestatem transferendorum corporum. Nempe cum Angeli sint substantiæ nobiliores corporibus, statim atque creati sunt, ac dum adhuc erant in viâ, aliqua ipsis fuit in corpora potestas, quæ ab Angelis bonis profectò amitti non debuit, in malis verò Angelis quantum ad substantiam remansit, sicut nec intellectu nec voluntate ob peccatum privati sunt. Sed hæc potestas non extenditur ad transformationes aut alterationes immediatè inducendas; nec enim independens esse debet à legibus naturæ sapienter à Deo institutis. Ubi itaque Angelus seu bonus, seu malus vult in corpus aliquod novam formam inducere, utatur oportet agentibus naturalibus à Deo ad hunc effectum producendum institutis, hæc agentia transferat, et, ut aiunt, activa applicet passivis. Ex quo sequitur, quamlibet transformationem, quæ omnium agentium materialium activitatem superat, esse etiam supra virtutem naturalem Angeli sive boni sive mali.

Aliis insuper modis restringitur Angelorum potestas circa corpora transferenda. Nam ipsi Angeli boni non exercent sine ullâ lege ejusmodi facultatem; ordo quippe immutabilis, quem in ipsâ Dei substantiâ contemplantur, eorum actus omnes dirigit, nec potentiâ sibi concessâ eos uti sinit, nisi prout gloriæ Dei et attributorum ejus manifestationi magis expedierit. Fortè etiam singulorum potestas non ad omnia corpora pertinet, sed ad aliqua solum.

Quantum verò ad dæmones, potestas eorum intra angustiores adhuc limites coarctatur. Et 1º quidem ratione objecti; nempe nec simul

nec successivè omnia corpora movere possunt, alioquin universum orbem subverterent. 2º Ratione circumstantiarum: fortassis enim, v. g., eis non est concessum, ut singulis momentis quidquam agere possint. 3º Per potentiam oppositam Angelorum beatorum, à quibus oppugnantur et vincuntur. 4º Id generatim certum est, nihil quidquam ab iis fieri, nisi quod Deus permiserit.

Ex his colligere est quid sit miraculum propriè dictum seu divinum, et miraculum impropiè dictum seu angelicum. Miraculum propriè dictum, seu quod soli Deo tribuendum est, excedit naturalem facultatem omnis creaturæ, etiam angelicæ; nempe consistit in inducendis immediatè et sine ullo agente materiali formis essentialibus. Ubi autem sic se habet ejusmodi effectus à Deo immediatè productus, ut alicujus causæ materialis ope ab Angelo applicatæ produci potuisset, miraculum dicitur divinum quantum ad modum duntaxat, non quantum ad substantiam; appellatur verò divinum per se et quantum ad substantiam, ubi agitur de inductâ formâ essentiali ad quam introducendam nulla causa materialis à quocumque agente creato applicata idonea sit. Miraculum angelicum constituunt alii effectus sensibiles et stupendi, ex legibus communicationis motuum non sequentes, et facultatem hominis excedentes. Aliud verò producit ab Angelo bono, et semper ordini consentaneum est, nec ullo perverso fine, nullâ pravâ circumstantiâ vitatur. Aliud à dæmone patrat, permittente Deo, ut mox explicuimus. Non omittendum autem dæmonem seu præstigiis, seu unius corporis in locum alterius substitutione, posse aliquando simulare miracula etiam divina.

Non difficulter assignantur regulæ certæ quibus miracula divina et angelica à diabolicis discernantur; nempe si operis substantia, si circumstantiæ, si principium, si finis, si miraculorum numerus, auctoritas et splendor attendantur, facile dignoscere erit opus diabolicum, quod semper vitio quodam manifesto proditur. Etsi porrò quæ de naturâ miraculi divini aut angelici paucis exposuimus, verissima sint, nec videantur posse à theologo prudenter philosophante rejici, attamen necesse non est ea omnia perspecta haberi, ut intelligatur vim summam inesse miraculis ad probandam doctrinæ veritatem. Ita enim genus humanum à Deo constitutum est, ut miraculis maximè alliciat, ut credendum, nec quisquam sapiens possit iis non assentiri, ubi certis characteribus

vestiuntur. Hæc potissimum regula eâ de re statuenda est tanquam evidentissima : Quisquis novit Deum unum, optimum, maximum rebus omnibus præesse, sapienter non potest temperare se ab adhibendâ fide homini pio, doctrinam sanctam, dogmata sublimia etsi rationi impervia prædicanti, qui se à Deo missum perhibens, miraculis innumeris, indubitatis, splendidissimis, nullâ pravâ circumstantiâ vitiatis, nullo iis comparando prodigio impugnatis missionem suam comprobât. Quapropter cum fieri omnes cogantur miracula Christi et Apostolorum ejusmodi fuisse, modò facta evangelica extra omnem dubitationis aleam posita demonstrantur, is nobis hic erit præcipuus scopus, ut illorum factorum fidem indubitatam faciamus.

Factorum evangelicorum veritas demonstratur.

—Sic arguimus : Facta possibilia, publica et magni momenti, à pluribus testibus oculatis aut coætaneis, qui nec falli potuerunt, nec mendacii et fraudis possunt insimulari, unanimiter nulloque alio scriptore contradicente narrata, cum factis aliis posterioribus extra omnem controversiam positis necessario connexa, ac tandem usque ad nos sine ullâ corruptione et depravatione transmissa, ejusmodi, inquam, facta vera et certissima sunt; atqui facta quæ in Evangelio narrantur sic se habent; ergo, etc.

Major negari nequit. Enimverò qui facta hisce characteribus vestita in dubium revocaverit, is circa facta historica incidat necesse est in Pyrrhonismum universalem, cui hominis ratio et natura, ipsorumque deistarum in rebus humanis cogitandi et agendi modus prorsus repugnant; idem ille apud se statuat homines nullo motivo ductos, imò motivis omnibus posthabitis, posse veritatem odisse, mendaciis et falsitatibus manifestissimis delectari; judicet fieri posse ut cuncti ad eum decipiendum conspirent; neget Romam olim extitisse aut etiamnum extare; plerasque demonstrationes mathematicas rejiciat, quippe quæ ejusmodi factorum certitudinem moralem evidentiâ non superant, sunt verò plerumque hominum indoli ac ingenio multò minus proportionatæ. Non tot autem et tantas enumeravi certitudinis factorum notas, quòd omnes crediderim ad unamquamque veritatem historicam firmiter stabiliendam requiri; sed eâ mente ut quæcumque facto alicui suadendo prodesse possunt, in unum collecta ostendam factis evangelicis competere.

Jam probanda est minor propositio per par-

tes : 1^o Possibilia sunt facta quæ in Evangelio narrantur. De solorum miraculorum possibilitate post Spinosam dubitatio moveri posset; atqui evidens est miracula esse possibilia, seu nullam contradictionem involvere. Miracula enim, ut ex dictis colligere est, seu quæ à Deo solo, seu quæ ab Angelis producuntur, sunt effectus rari, sensibiles, stupendi, ex legibus generalibus motuum excepti, seu quod idem est, dissimiles iis effectibus quos iisdem in circumstantiis physicis leges naturales producunt. Atqui ejusmodi exceptiones, ejusmodi effectus nullam contradictionem involvunt. Deus enim, qui liberè instituit leges naturæ, potuit, eas instituendo, quas voluerit exceptiones decernere; potuit statuere futurum ut illæ leges ad speciales quosdam non pertinerent casus, in quibus volebat alios effectus produci. Rem explico exemplo. Leges motuum à Deo institutæ exigunt, v. g., corpus aquâ gravius ipsi superpositum mergi; quis negaverit Deum, cum illam legem tulit, potuisse eum excipere casum in quo S. Petrus super aquas incessit, et contra præfinire ut in ejusmodi casu produceretur effectus ei quem in iisdem circumstantiis physicis leges motuum producant oppositus? Ergo miracula ac proinde omnia facta quæ in Evangelio narrantur, possibilia sunt.

2^o Ejusmodi facta publica fuerunt. Id inductione aliquâ patebit. Namque Joannem Baptistam, hominem sanctissimum, baptismi poenitentiae prædicantem, Christi præcursorem fuisse et ipsi testimonium reddidisse; pariter Christum Bethleemi natum; Magos coelesti phænomeno ab Oriente deductos ad eum adorandum venisse, eâque occasione infantes omnes in Bethleem et in omnibus finibus ejus à bimatu et infra Herodis jussu fuisse occisos; anno ætatis suæ duodecimo Christum, stupentibus et sapientiam ejus admirantibus Judæorum magistris, in templo docuisse; dum à Joanne baptizatus est, apertos fuisse coelos, et auditam de cælo vocem dicentem : *Hic est filius meus dilectus, in quo mihi complacui*; duodecim Apostolis plebeiis viris, rudibus, illitteratis, quibus doctrinam suam traderet, selectis, ipsum per tres annos prædicasse, et sese Messiam perhibuisse; innumera interim ab ipso edita miracula, in civitatibus, in pagis, in domibus, in plateis, in templo, ubique, coram scribis et pharisæis, coram Samaritanis, coram alienigenis; filium archisynagogi, puerum centurionis romani, cæcum à nativitate, innumerosque alios, leprosos, claudos, cæcos, mutos,

et morbis quibuscumque etiam desperatis affectos, ab eo sanatos fuisse, quatuor mortuos suscitatos, mare sedatum, aquam in vinum versam, paucos panes pluribus hominum millibus saturandis multiplicatos; eundem nihilominus, promouentibus Judæis, à Pontio Pilato cruci affixum; tenebras, eo moriente, super universam terram factas fuisse; sepulcrum ipsius à principibus sacerdotum et pharisæis obsignatum et militibus traditum fuisse custodiendum; in eo tamen corpus ejus tertiâ die non repertum, sicque ipsâ Judæorum cautione auctam resurrectionis ejus certitudinem; Apostolos in die Pentecostes audiente hominum multitudine ex omni natione quæ sub cœlo est, variis linguis locutos, etsi nullam didicissent, ac intar magistrum sui, ejusque nomine, maxima patrantes miracula, evangelicam fidem primùm Judæis, et deinde gentibus usque ad extremas terras prædicasse, etc.; hæc, inquam, omnia facta, aliaque similia quæ in novo Testamento narrantur, manifesta fuisse, eorum natura ipsa satis ostendit, eaque tanquàm publica, id est, ut nota Synagogæ, magistratibus et nationi Judæicæ in Evangelio narrari ex solâ ejus lectione perspicuum est; ergo, etc.

2º Eadem facta erant magni momenti, adeò ut ea attendi necesse fuerit, nec sine maturo examine prævio potuerint recipi. Namque ejusmodi factis Apostoli Judæis suadere conabantur *et Dominum eum et Christum à Deo factum esse hunc Jesum quem illi crucifixerant*, Act. 2, v. 36; fidem illi homini esse adhibendam, *nec aliud nomen, esse sub cœlo datum hominibus, in quo oporteat nos salvos fieri*, Ibid. 4, v. 12; in ipso vaticinia omnia Prophetarum compleri, et regnum ejus non esse illud terrenum quod cupiditatibus ducti inaniter sperabant, sed regnum spirituale quo bona summa quidem sed insensibilia et cœlestia subditis conferuntur. Receptum ubique et cupiditatibus faventem deorum cultum infidelibus interdicebant, ejusque loco ipsis porrigebant religionem severam, sensibus et præjudiciis adversam, cupiditatibus inimicam, dogmatum suorum sublimitate percellentem, merum sanctitate absterrentem, afflictiones, ærumnas, persecutiones, cruces cultoribus suis prædicentem nec nisi cœlestia bona promittentem, malis pœnas in altero ævo æternùm duraturas comminantem. Hæc ut suaderent Apostoli testes se evangelicorum factorum præbebant, Christum resurrexisse affirmabant, miracula innumera edebant, sævissimis suppliciis sese alacres offerebant. Quis autem non videat

facta cum rebus tanti ponderis connexa non facile recipi debuisse, nec nisi post sufficiens examen potuisse admitti?

4º Facta evangelica referuntur ab auctoribus coætaneis, quorum plurimi fuerunt testes oculati. Primus Evangelistarum S. Matthæus è telonio ad apostolatam, ut ipse refert, à Christo vocatus, et unus deinceps ex ejus comitibus individuus, Evangelium suum anno æræ vulgaris circiter 39, paulò post Christi mortem, Jerosolymis conscripsit.

Marcum fuisse unum è 72 Christi discipulis quidam opinati sunt; sed Apostolorum duntaxat, præsertim verò S. Petri discipulus videtur extitisse. Quidquid sit, auctoris coætanei ab Apostolis eruditi titulus ipsi denegari non potest; sed præterea constat Evangelium ejus à S. Petro fuisse approbatum, et proinde eandem (humano modo loquor) auctoritatem habere ac si à S. Petro exaratum fuisset.

S. Lucas pariter coætaneus historiæ Christi scriptor dicendus est. Is in locis Palestinæ vicinis natus, et in eâ diu versatus, sese S. Paulo discipulum adjunxit. Non ea quidem ipse vidit quæ in Evangelio suo litteris consignat; sed testatur cap. 1, v. 2 et 3, se *assecutum omnia à principio diligenter*, eaque scribere *quæ tradiderunt qui ab initio ipsi viderunt et ministri fuerunt sermonis*. Cum autem ejus Evangelium ante Apostolorum mortem exaratum fuerit, et ab omnibus Ecclesiis semper et unanimiter receptum, dubitari non potest quin illud approbaverint Apostoli.

Porrò S. Joannes è Galilæâ oriundus Apostolorum collegio sociatus, et ob accepta à Christo singularis prorsus dilectionis testimonia, Dilecti discipuli nomen adeptus, Christum ad crucem usque secutus est, primusque testis et præco resurrectionis ejus fuit, et ad extremum usque spiritum per annos ferè septuaginta assertor indefessus. Hæc et alia quæ de eo sive in Evangeliiis, sive in historiâ ecclesiasticâ leguntur, testem gestorum Christi ipso graviorem et locupletiore desiderari non posse ostendunt.

Actuum Apostolorum auctor S. Lucas, plerarumque rerum quas in hac historiâ commemorat, spectator fuit.

Quæ autem in Evangelio edisseruntur, Apostoli in suis Epistolis pro certo et inconcusso habent, et suo testimonio confirmant. « Non doctas fabulas secuti, » inquit S. Petrus, Epist. 1, cap. 1, v. 16, « notam fecimus vobis Domini nostri Jesu Christi virtutem et præsentiam; sed speculatores facti illius magni-

« tudinis. » Et S. Joan. Epist. 1, cap. 1, v. 1 et 2: « Quod audivimus, quod vidimus oculis nostris, quod perspeximus, et manus nostræ contrectaverunt de Verbo vitæ, et vita manifestata est, et vidimus, et testamur, et annuntiamus vobis, etc. » Nec omittendum est curavisse Apostolos ut in locum Judæ proditoris seligeretur aliquis factorum Christi oculatus testis, qui apostolatûs officium exerceret, adeò interesse existimabant facta evangelica idoneis testimoniis muniri. « Oportet, ait super hæc re S. Petrus Act. 1, v. 21, ex his viris qui nobiscum sunt congregati in omni tempore quo intravit et inter nos Dominus Jesus incipiens à baptismo Joannis usque in diem quâ assumptus est à nobis, testem resurrectionis ejus nobiscum fieri unum ex istis. »

5° Testes factorum evangelicorum falli non potuere. Eos enim decipi natura ejusmodi factorum plerumque non sinebat. Facta illa erant visibilia, sensibus objecta, manifesta, publica, circa quæ error in testem oculatum non cadit. Num, v. g., decipi potuerant Apostoli et discipuli circa Christi et Præcursoris ejus prædicationem, circa miracula multiplicationum panum, circa restitutionem visûs cæci nati, circa resurrectionem Lazari, circa resurrectionem ipsius Christi, qui vulnera sua ipsis palpanda præbuit, circa donum linguarum quo in die Pentecostes à Spiritu S. donati sunt, circa alia innumera quæ enarrare longius foret? Insuper, ne in ejusmodi rebus stolidè allucinari potuisse judicentur vetat etiam sapientia illa planè divina quæ in Evangelistarum et Apostolorum scriptis elucet. Expolitum quidem et elegans dicendi genus non adhibent, nempe, ut ait Apostolus, 1 Cor. 2, v. 4, *non in persuasibilibus humanæ sapientiæ verbis*. At verò quanta in doctrinâ quam tradunt deprehenditur ubertas! Quanta in morum præceptis gravitas et sanctitas! Quanta in dogmatibus et mysteriis divinis altitudo et majestas! Quanta in factis exponendis ingenuitas, diligentia et perspicuitas! Quantam Numinis supremi ac cultûs ipsi debiti ideam ingenerant animis, eâ ætate quâ in densissimis tenebris, in erroribus turpissimis, universum genus humanum circa religionem versabatur! Quàm sapienter tandem ad rerum quas tractant diversitatem, ad varias circumstantias, ad fines à se intentos sermonem accommodant! Res gestas accuratè, ut congruit, et simpliciter narrant; ratione, exemplis, parabolis regulas morum, ubi opus est, confirmant,

explicant, suadent; quæ miraculis ac Prophetarum oraculis fuerunt stabilienda, ut missionis suæ divinitas et mysteria fidei, hæc prodigiis Dei virtute patratis, et testimoniis Scripturam, prout expediebat, adductis, adstruere nörunt. Ergo seu doctrinæ præcellentia, seu forma dicendi attendatur, fatendum erit Evangelistarum et Apostolorum libros summâ fulgere sapientiâ, quæ testes factorum evangelicorum circa ejusmodi facta turpiter allucinari non potuisse demonstrat.

Sed decipi potuerint Apostoli et alii discipuli circa miracula quæ patravit Christus, numquid ipsi sibi videri potuerunt innumera miracula edere? atqui miraculorum Christi testes, Apostoli scilicet, miracula et ipsi innumera ediderunt, ut ipsi et alii scriptores novi Testamenti auctores sunt. « Per manus Apostolorum, inquit S. Lucas, Act. 5, v. 12 et seq., fiebant signa et prodigia multa in plebe... ita ut in plateas objicerent infirmos, et ponerent in lectulis ac grabatis, ut, veniente Petro, saltem umbra illius obumbraret quemquam illorum, et liberarentur ab infirmitatibus suis. Concurrebat autem et multitudo vicinarum civitatum Jerusalem, afferentes ægrotos et vexatos à spiritibus immundis, qui curabantur omnes. » Et Act. 19, v. 11, et 12: « Virtutes non quaslibet faciebat Deus per manum Pauli; ita ut etiam super languidos deferrentur à corpore ejus sudaria et semicinctia, et recedabant ab eis languores, et spiritus nequam egrediebantur. » Hinc S. Paulus. 1 Cor. 2, v. 4: « Sermo meus et prædicatio mea non in persuasibilibus humanæ sapientiæ verbis, sed in ostensione spiritûs et virtutis. » 2 Cor. 12, v. 12: « Signa apostolatûs mei facta sunt super vos in omni patientiâ, in signis, et prodigiis, et virtutibus. » Et Hebr. 2, v. 4: « Contestante Deo signis et portentis, et variis virtutibus, et Spiritûs S. distributionibus secundum suam voluntatem. » Vide etiam Luc. 10, v. 17, Joan. 14, v. 12; Act. cap. 2, 3, 5, 6, 8, 9, 10, etc.

6° Sinceri fuere testes factorum evangelicorum, nec fraudis et mendacii insimulari possunt, quod argumento ducto ex eorum fortunâ, conditione, moribus, genio, indole et officiis, et ex horum factorum promulgatione, modo, circumstantiis ac fine planè efficitur. Si enim quo genere nati factorum evangelicorum testes, quâ disciplinâ innutriti fuerint, inquiras; viri fuere rudes, sine litteris, piscatores, qui-

bus proinde universi orbis decipiendi consilium tribuere insulsum foret. Si doctrinam inspicias quam tradiderunt, nihil eâ sanctius et illibatius, nihil majori dignum veneratione, nihil ab omni dolo abhorens magis. Si ad eorum mores et vitæ rationem attendas, terrena contemnebant, fidei propagandæ, muneri suo implendo sese toti dedebant, sanctissimæ magistri sui, quam prædicabant, doctrinæ vita eorum tam pulchrè congruebat, ut nullum in iis vel minimum vitium redarguerint Porphyrius, Celsus, alique religionis christianæ hostes. Si modum scribendi consideres, res candidè et ingenuè narrant, sine fuco, sine ullâ exaggeratione aut dissimulatione, sine animi motu et ostentatione. Nec Apostolorum cum Christo conversantium inscitiam, asperitatem et in fide ipsi adhibendâ tarditatem, nec eorumdem in sese invicem jurgia et altercationes, nec denique ipsorum, dùm Christus passus est, pusillanimitatem et fugam tacuerunt. Omnia fidei historiæ commisère, unius veritatis studiosi. In Christi osores, in principes sacerdotum et alios Judæos ejus necis auctores, in Judam proditorem, in Pilatum et milites romanos, in eos à quibus ipsi contumelias, carceres, flagra, et alia supplicia passi sunt, non invehuntur, non effervescunt, nihil convitii proferunt, nihil querimoniarum sibi permittunt. Iis satis est singula nudè exponere. Ipsum Christi supplicium ejusque mortem sedato animo et simpliciter referunt : *Ibi, inquit, crucifixerunt eum*, Luc. 24, v. 33. Si tandem motivum perpendas quo ducti Evangelistæ et Apostoli facta evangelica attestati sunt; nullâ eos spe depastos, nullo temporali emolumento illectos fuisse deprehendes. Quid enim Apostolis munus crucis Christi prædicandæ parere poterat, nisi labores plurimos, paupertatem, ignominias, supplicia, necesse? Propter Christum et salutem æternam sibi à Christo promissam iis ærumnis et periculis sese libenter obtulère; atque adeò ipsis persuasa erat factorum evangelicorum veritas, ut eam sanguinis sui effusione consignaverint. Denique si modum, tempus, et varia adjuncta promulgationis evangelicorum factorum ab Apostolis vel eorum jussu editæ observaveris, hæc ea esse facilè perspicies, cum quibus voluntas fallendi consistere non possit. Enimverò paucis post Christi ascensionem diebus, ipso scilicet festo Pentecostes, multitudinem Judæorum, quæ, propter *factum repente de cælo sonum tanquàm advenientis spiritûs vehementis*,

convenerat in domum ubi manebant Apostoli, alloquens Jerosolymis S. Petrus, Act. 2, v. 22, 23 et seq. : « Viri Israelitæ, inquit, audite verba hæc : Jesum Nazarenum, virum approbatum à Deo in vobis, virtutibus et prodigiis et signis quæ fecit Deus per illum in medio vestri, sicut et vos scitis : hunc definito consilio et præscientiâ Dei traditum, per manus iniquorum affligentes interemistis; quem Deus suscitavit, solutis doloribus inferni.... hunc Jesum resuscitavit Deus, ejus omnes nos testes sumus. » Audis Apostolorum principem, cæterorum nomine verba facientem, præcipua facta evangelica ob Judæorum oculos ut res ipsis compertas et in medio eorum factas tunc subjicientem, cùm vix à morte Christi dies 52 elapsi essent. Se igitur et alios discipulos resurrectionis Christi testes esse confidenter eo tempore perhibuit, quo, si res falsa fuisset, facillimè potuissent mendacio convinci. Quod ad alia facta virtutesque et prodigia Christi attinet, illa commemorat ut res apud Judæos publicas et nemini in Judæâ non exploratas : *Quæ fecit Deus, per illum in medio vestri, sicut et vos scitis*. Idem Apostolus in alio sermone Act. 10, v. 37 et seq., summario factorum Evangelicorum quod exhibet, hæc præmittit, auditores compellans : *Vos scitis quòd factum est verbum per universam Judæam*. Porro ex eodem Actuum libro passim colligere est alios quoque Apostolos iis in concertationibus quæ cum Judæis seu in Palæstinâ, seu alibi commorantibus, frequentes ipsis de Christo fuerunt, de factis evangelicis pari fiduciâ esse locutos. Ergo testes illorum factorum, ut Judæis suaderent Christum esse Messiam, facta ejusmodi promulgârunt ac testificati sunt, cùm eorum recentissima adhuc esse debuit apud Judæos memoria, diebus videlicet paucis post Christi obitum et resurrectionem. Numquid hæc cum voluntate fallendi consistunt?

Ad hæc, quæ facta Apostoli sæpiùs vivâ voce in memoriam revocaverant et oraculis Prophetarum consona ostenderant, unus ex illis S. Matthæus cæterorum jussu anno à morte Christi sexto, æræ vulgaris 39, Jerosolymæ litteris consignavit. Anno abhinc circiter 18, prodiit Evangelium à S. Lucâ in Achaïæ et Beotiæ partibus conscriptum. Fortè priusquàm scriberet S. Lucas, aut saltem paucis post annis, S. Marcus Romæ Evangelium Christi concinnavit. Tandem anno æræ nostræ 96, Evangelium à Joanne Ephesi exaratum est. In-

terea diversis temporibus et variis in locis conscripti sunt alii novi Testamenti libri, quibus facta evangelica supponuntur et confirmantur.

Jam verò hæc advertenda sunt : 1° Ab Evangelistis magnâ diligentia notantur circumstantiæ vel minimæ annorum, dierum, locorum, personarum, principum tum regnantium, summorum sacerdotum, etc. Id non assolent deceptores, nec sanè possent quin statim mendacio evincerentur. 2° S. Matthæus, utpote Jerosolymis scribens, sermonem adhibuit hebraicum, seu potius syriacum quo tunc Judæi utebantur; cæteri verò librorum novi Testamenti auctores, cum aliis in regionibus scriberent, græcam linguam usurpavere, quam populis omnibus, atque ipsis Judæis apud Græcos et Romanos degentibus valdè usitatam fuisse constat. Voluere igitur ejusmodi scriptores historiam à se promulgatam posse non difficulter ab unoquoque comprobari. 3° Etsi annis à se invicem aliquo intervallo dissitis, et in diversis regionibus scripserint auctores novi Testamenti, attamen de factis evangelicis summè consentiunt, quod non leve est veritatis argumentum. Certè si Matthæus falsi convictus fuisset, eadem prorsus ac ille non ausi essent proferre Evangelistæ subsequentes, aut saltem nonnisi rebus quibusdam et circumstantiis ad earum substantiam pertinentibus immutatis hæc protulissent. Nempe fraus pro varietate circumstantiarum varias induit formas, nec iisdem semper armis pugnat, quorum infirmitatem est experta. 4° Quantumvis inter se similes sint Evangelistæ quatuor, attamen simul à se invicem nimium diversi deprehenduntur, quàm ut collusionis possint accusari. Si falsa narrassent, nunquam potuissent non communicatis consiliis adeò perfectè concordare. Si communicatis consiliis colludere voluissent, minor in eorum historiis dissimilitudo deprehenderetur. Itaque cæteris, quæ attulimus, Apostolorum sinceritatis evidentibus argumentis, istud addendum est non minus manifestum, eo de fine, iis in circumstantiis quæ cum voluntate fallendi consistere nequeunt, promulgata fuisse facta evangelica.

7° Unanimitè ab Evangelistis narrantur facta evangelica, ut modò dictum est, iisque concinunt alii librorum novi Testamenti auctores.

8° Factis evangelicis non contradicunt alii scriptores, imò vel infestissimi christianæ religionis hostes, Judæi, Pagani, Mahumetani; magna à Christo edita fuisse prodigia et miracula non inficiati sunt. Et quidem Judæi. De

coætaneis testes sunt Evangelistæ, à quibus habemus sæpè Judæos prodigia Christi admiratos esse. Hinc ipsum alii existimabant esse *Eliam, alii verò Jeremiam aut unum ex Prophetis, alii*, ipseque Herodes Antipas, *Joannem Baptistam* à mortuis suscitatum. Vide Matth. 16, v. 14; Marc. 8, v. 28; Luc. 9, v. 19. Ne ipsi quidem Pharisei negabant à Christo miracula patrari. Conquesti sunt non semel quòd die sabbati ægros curaret; dixerunt eorum quidam in nomine Beelzebub principis dæmoniorum ejici ab ipso dæmonia; sed et his querimoniis et conviciis maximè apparet illum manifestissima prodigia esse operatum. Tandem post resurrectionem Lazari Joan. 11, v. 47, 48 et seq. : « Collegerunt pontifices et pharisæi concilium, et dicebant : Quid facimus, quia hic homo multa signa facit? Si dimittimus eum sic, omnes credent in eum Ab illo ergo die cogitaverunt ut interficerent eum. » Quantum ad posteriores Judæos, jam diximus in Talmude et in utroque libro Toldoth Jesu, prodigia Christi adscribi virtuti ineffabilis nominis Dei, quod magicis artibus è Sancto sanctorum ab eo ereptum fuisse comminiscuntur fabulam ridiculam, quam eà de re proferunt, exposuimus, atque ex eà collegimus Christi prodigiis Judaicam gentem olim stupendum in modum fuisse affectam, quippe cum ejusmodi miracula, licet tot fabellis eorum traditiones scateant, nondum penitus apud eos obliterari potuerint. Pagani etiam fidem miraculorum Christi confirmant. Porphyrius enim (1), Celsus (2), Julianus imperator (3) facta evangelica non impugnârunt; aliqua à Christo edita esse miracula non negârunt, imò fassi sunt expressè. Sed quod majoris est ponderis, Christi sapientiam et opera admirati sunt ipsi imperatores Pagani. Tiberius, cognitis ex Pilati relatione, miraculis, morte et resurrectione Christi, divinos illi honores decerni, re ad senatum delatâ, postulavit. Id affirmat in Apologetico cap. 5, Tertullianus, qui profectò, veritus ne causæ noceret suæ, factum ejusmodi, quod ex archivis imperii comprobatu facillimum erat, nunquam tantâ confidentiâ senatui ipsi objecisset, nisi illud compertum et exploratum habuisset. Magnâ veneratione Christum prosecutos esse Adrianum et Alexandrum Severum, auctor est Lampridius scriptor paganus in Severo. Loqui-

(1) Apud Euseb. Præp. evang. lib. 5, cap. 4.

(2) Apud Orig. lib. 2, contra Celsum.

(3) Apud S. Cyril. lib. 6 contra Julianum.

tur Chalcidius Commentario in Timæum de stellâ seu phænomeno cœlesti quod Magis apparuit, et Phlegon (1) Olymp. Chronic. lib. 13, mentionem facit stupendæ illius defectio-
nis solis quæ tempore mortis Christi contigit. His addi possunt quæ in gratiam Christianorum dicta sunt à Plinio lib. 10, epist. 102, ad Trajanum, à Severo Graciano proconsule in Epist. ad imperatorem Adrianum (2), ab Adriano imperatore in epist. ad Minutium Fundanum (3), à Tito Antonino imperatore in epist. ad Asian. (4).

Factis evangelicis Mahumetani quoque suffragantur. Mahumetes in Alcorano, et Moslemi doctores Alcorani interpretes Christum Dominum magnum Prophetam fuisse prædicant, et hominem à Deo missum, atque innumera ab eo patrata fuisse miracula confitentur, inter quæ nonnulla commemorant quæ nos non agnoscimus.

9° Facta evangelica necessariam connexionem habent cum factis posterioribus extra omnem controversiam positis. Nempe orbem ferè integrum densis paganis tenebris obsitum ante Christi tempora jacuisse certissimum est. Constat pariter idola fuisse eversa, et cultum christianum, etsi à nullâ errorum nostrorum causâ ortum habere potuerit, idololatricorum rituum loco obtinuisse. Hæc porrò tanta rerum immutatio non nisi à factis evangelicis originem duxit, adeò ut planum sit nullam illius assignari posse causam, nisi eorum veritas agnoscat. Accedet huic argumento robur maximum ex infra dicendis de propagatione religionis christianæ.

10° Facta evangelica ad nos usque transmissa sunt sine ullâ corruptione et depravatione. Ad hoc enim satis est libros novi Testamenti, et præsertim Evangeliorum, integros et incorruptos usque ad nostram ætatem pervenisse. Atqui argumento triplici id facilè adstruitur. Primum est, librorum hujusmodi et rei christianæ statum ab initio cum semper fuisse ut illi libri à nemine corrumpi et adulterari potuerint. Nam si adulterati et depravati fuissent, vel à Judæis, vel à Paganis, vel à Christianis; sed nullum horum dici potest. Non à Judæis, quippe cum tot ipsis adversantia in hisce libris etiamnum contineantur. Deinde passi-ne essent Christiani libros, quos manibus quotidie terebant, quos tanquàm fidei suæ regulam summè

venerebantur, ab extraneis corrumpi? Istud postremum evincit pariter neque à Paganis ejusmodi depravationem inductam; qui præterea nullo motivo ad eam tentandam impelli potuerunt. Jam verò neque à Christianis. Namque an ab omnibus uno consensu Christianis id tentatum, an ab aliquibus tantum? Non ab omnibus communi consilio. Quomodò enim omnes Christiani consentire inter se potuissent de sacro librorum suorum textu corrumpendo? quomodò sperâssent non divulgandam ejusmodi librorum toto orbe disseminatorum corruptionem communi tot hominum consilio peractam? quomodò ejusmodi fraude et se et religionem suam ludibrio et irrisioni Paganorum et Judæorum certò exponere non dubitâssent? quomodò detectâ illâ fraude potuisset christiana religio, quæ factis evangelicis tota innititur, propagari? quomodò Christianis turpem hanc librorum suorum depravationem Celsus, Porphyrius, Julianus, etc., non objecissent? Ergo evidentissimum est ab omnibus simul Christianis corrumpi non potuisse novi Testamenti libros. Planum est pariter ab uno aut paucis aliquibus Christianis id fieri nequivisse. Etenim novi Testamenti ac præsertim Evangeliorum libri, statim atque exarati sunt, in varias orbis partes fuere deportati et disseminati; innumera eorum exemplaria transcripta sunt; plures subinde in varias linguas editæ versiones; illorum intelligentiæ et meditationi præcipuè incumbant pastores; terebantur assidue à cæteris Christianis et ab iis memoriter disci solebant; legebantur quotidie et explicabantur in cœtibus fidelium; maximâ asservabantur curâ præsertim in Ecclesiarum matricum archivis; atque ex historiâ ecclesiasticâ compertum est, quod et res ipsa loquitur, Christianos tantâ erga illos libros veneratione semper affectos fuisse, ut in iis quidquam immutari tulissent nunquàm, ac vel unius litteræ inter pronuntiandum mutatio de se indifferens magno crimini versa aliquando sit; ergo, etc.

Ne adulterari potuerint novi Testamenti libri, illud etiam maximè obstat quòd ab Ecclesiæ incunabilis extiterint hæretici, Ebionitæ scilicet, Valentiniani, Carpocratiani, Gnostici, etc. Ii adversus Ecclesiam pugnantes perversa sua dogmata malè intellectis Scripturæ locis adstruere conabantur, et ex Scripturarum auctoritate etiam revincebantur. An ergo Catholici libros sacros corrumpere ausi fuissent? Sed ab illis hæreticis cum ignominia et dedecore illico fracti fuissent. An illud moliti fuissent hære-

(1) Apud Euseb. in Chron. Lat. et alios.

(2) Apud Euseb. Hist. Eccl. l. 4, c. 9.

(3) Ibid. cap. 9. — (4) Ibid. cap. 13.

tici? Verum à pastoribus catholicis contra fraudem apertè reclamatum fuisset, sacrilegumque erroris ausum et temeritas repressa, quod et adversus Valentinum et Marcionem id facinoris attentantes factum legimus. Novi igitur Testamenti et præsertim Evangeliorum libros corrumpi potuisse nunquàm permisit eorum librorum et rei christianæ status.

Alterum incorruptæ ejusmodi librorum integritatis argumentum est, citationes locorum novi Testamenti in SS. Patrum operibus et in variis traditionis monumentis frequentissimè occurrentes, exemplaribus textûs sacri, quibus hodiè utimur, planè concinere; quod argumentum sic proponi potest: Si libri novi Testamenti corrumpi potuerint, vel antequàm fidei illustrandæ ac defendendæ causâ scriptores ecclesiastici opera edere cœperint, vel nonnisi postea; neutrum dici potest. Non prius; si quidem Evangelistarum et Apostolorum libros et Epistolas excepere scripta ab eorum discipulis exarata. Nec etiam posterius; cùm enim loca quæ in ejusmodi auctorum ecclesiasticorum operibus leguntur, eadem in nostris librorum sacrorum exemplaribus extent, corruptionis argui non possunt exemplaria nostra, quin scripta auctorum ecclesiasticorum aut supposita, aut saltem quantum ad textus Scripturæ in iis citatos corrupta statuuntur. Atqui non supposita; quid enim repugnat magis quàm tot ejusmodi scripta et monumenta suppositionis insimulare, quorum priora ab immediatè sequentibus, et ista rursus ab aliis nostro ævo vicinioribus laudantur et fidem certam obtinent? Eadem scripta et instrumenta adhuc absurdius dicerentur solum corrupta quantum ad loca textûs sacri in iis allata; enimverò scriptores ecclesiastici loca illa explicant, ex iis argumenta eruunt; atque eorum interpretationes et ratiocinationes testimoniis ejusmodi, prout in illorum scriptis nunc leguntur, consentaneæ sunt et accommodatæ; sed si testimonia illa in eorum operibus immutata fuissent et corrupta, quomodo staret hæc cohærentia et consensio? Ergo scriptores ecclesiastici qui variis Ecclesiæ seculis floruerunt, eosdem reverà adhibuerunt sacrarum Scripturarum textus quos in eorum operibus legimus; cùmque ejusmodi textus frequentissimè ab iis laudentur, et nostris librorum sacrorum exemplaribus consonent, consequens est libros nostros non fuisse adulteratos.

Tertium argumentum ex consensione omnium exemplarium et versionum eruitur. Etenim si textus librorum novi Testamenti corrup-

tus et vitiatus fuisset, variarent eorum exemplaria et versiones, atque in rebus maximis secum invicem non constarent. Atqui, quantum ad mores, ad fidem et ad substantiam factorum attinet, inter tot varia exemplaria seu manuscripta seu edita textûs primigenii librorum novi Testamenti, inter tot versiones diversas et ejusmodi textum, inter varia illarum versionum exemplaria summam esse consensionem affirmant unanimiter eruditi qui rem ejusmodi accuratissimè expenderunt. Ita testatur Richardus Simon in Hist. criticâ textûs novi Testam. cap. 30. Ita Ludovicus Capellus Criticæ sacræ lib. 1, cap. 2, n. 13. Ita etiam liquet ex immensâ illâ variantium lectionum sylvâ, quas ex innumeris propemodum novi Testamenti codicibus manuscriptis, versionibus et editionibus, ac ex SS. Patrum scriptis, continuo triginta ferè annorum labore collegit Joannes Millius in suo novo Testamento græco: de quibus meritò Ludolphus Kusterus in præfatione ad secundam hujusce operis editionem observat, « plerasque codicum MSS. lectiones « variantes ita comparatas esse, ut parùm vel « nihil inter eas intersit. Quid enim, quæso, « inquit, interest utrum, exempli gratiâ, scri- « batur $\alpha\lambda\gamma\omega$ an $\alpha\lambda\iota \epsilon\gamma\omega$, etc., et innumera alia « hujus generis, quæ longè maximum varian- « tium lectionum numerum in hac editione « implent? Sanè (pergit ille), si leviora illa « à reliquis separaveris, mirum quàm exiguus « eorum relinquatur numerus quæ videantur « alicujus esse momenti, et erudito pioque « lectori dubitandi materiam præbere possint « utra lectio alteri præstet. » Idem advertit Daniel Whitby in suo Examine variantium lectionum Joannis Millii in novum Testamentum, ubi ideò operam Millii tanquàm inutilem et nocivam reprehendit.

Obijciuntur aliqua, sed levioris momenti: 1^o Decipi potuisse Apostolos, quippe qui rudes erant et sine litteris; 2^o non repugnare eos nobis voluisse illudere, ac fortè ex collusione natam esse consensionem illam summam quæ inter eos deprehenditur; 3^o periisse autographum historiæ evangelicæ, superesse tantum exemplaria ab amanuensibus et librariis transcripta aut impressa, proindeque innumeros potuisse irrepere errores; 4^o Celsus olim Origeni (1) objecisse à Christianis quibusdam textum Evangelii primigenium variis modis mutari;

(1) Apud Orig. lib. 2 contra Cels.

5° referri à Victore Tununensi in *Chronico* (1), « Messalà consule, jubente Anastasio imperatore, sancta Evangelia tanquàm ab idiotis « Evangelistis composita, reprehensa fuisse et « emendata; » quod etiam narrat Isidorus Hispal. in *Chron.* 6° Duodecim postremos versus S. Marci olim in melioribus manuscriptis desideratos fuisse, testibus S. Greg. Nysseno, S. Hieron. et Euthymio; pariter in pluribus græcis exemplaribus Evangelii S. Joannis desiderari vel obelo confodi historiam mulieris adulteræ; ac tandem deesse in plerisque codicibus græcis latinisque nonnullis versiculum 7 capitis 5 Epistolæ 1 S. Joannis : *Tres sunt qui testimonium dant in cælo, Pater, Verbum, et Spiritus sanctus, et hi tres unum sunt.*

Resp. ad singula breviter. Ad primum et secundum, jam demonstratum est Apostolos nec falli nec fallere potuisse. Illud duntaxat hic observandum superest, nempe incredulos in manifestam labi contradictionem, dum ex unâ parte volunt adeò rudes fuisse Apostolos, ut circa facta visibilia et manifestissima, eorum oculis subjecta, decipi potuerint, et ex alterâ ponunt eos potuisse decipiendi universi orbis consilium suscipere et exequi. Ad tertium, 1° nullius historiæ veteris autographum habemus; ergone ideò de omnibus historiis dubitandum est? 2° Agitur hic de libro, ubi primùm prodit, per totum orbem disseminato, de libro cui omni ævo addictissimi fuerunt Christiani, quem illi summè venerabantur, quem quotidie legebant atque meditabantur, quem in suis sermonibus et scriptis perpetuò pastores adducebant et explicabant, cujus omnes versiones, omnia exemplaria inter se quantum ad substantiam maximè conveniunt. Ergò si multi extent veterum libri, de quorum authenticitate, etsi perierit autographum, nemo sapiens dubitaverit; summè profectò foret insanix de integritate libri Evangeliorum dubitare, quamvis autographum ejus exhiberi non possit. Sed ut quid autographum Evangelii sibi exhiberi increduli postulant? Num, si exhiberetur, ideò tricas movere et cavillari desinerent? Si sincerè veritatem quærant, nonne ipsis satis esse debet certò ostendi authentica esse quæ adhibemus exemplaria? Certè si ipsummet exemplar autographum superesset, quibuscumque momenti probaretur illud esse autographum, (non temerè coniecimus), de ejusmodi probationibus eadem calliditate altercarentur, quâ

(1) Editio post *Chronic.* Euseb. Amstelod. an. 1668, p. 6.

de argumentis evidentibus nostrorum exemplarium authenticitatem adstruentibus vitiligant.

Ad quartum, ipse reposuit Origenes, fideles illos quos vocabat Celsus, non alios fuisse reverà quàm hæreticos, qui Christianorum titulum sibi impudenter arrogavère; neque à se quosquam cognosci Evangelia corrumpere ausos, præter Marcionitas et Valentinianos quorum corruptiones jam diximus à SS. Patribus fuisse graviter notatas et confutatas.

Ad quintum, Victor Tununensis refert unam voculam textûs sacri jussu Anastasii imperatoris in Nestorianismi gratiam à quodam episcopo mutatam fuisse, reclamantibus Catholicis. Nonne hæc potius argumento sunt integritatis librorum sacrorum maximâ curâ servatæ?

Ad ultimum, 1° nullum factum in duodecim postremis S. Marci versiculis exprimitur, quod ab aliis Evangelistis non fuerit relatum. Ex historiâ mulieris adulteræ nihil prorsus in gratiam religionis à nobis deducitur. Dogma sanctissimæ Trinitatis aliis in locis exprimitur, quæ præcludendis Arianorum effugiis magis idonea sunt quàm versiculus 7, cap. 5, Epist. 1 S. Joannis; ergo causæ christianæ parùm interest ejusmodi locorum authenticitas. 2° Seu amanuensium incuriâ, seu quocumque casu factum sit ut circa tria illa loca codices varient, ea tamen esse authentica meritò et facilè defendi potest. Nam quantum ad duodecim ultimos S. Marci versiculos, ii in omnibus exemplaribus seu manuscriptis, seu editis, et in omnibus versionibus leguntur. Præterea laudati sunt à S. Irenæo, ab Ammonio, Eusebio, à SS. Athanasio et Augustino, à Theophylacto, etc., proindeque de eorum versuum authenticitate non est quod dubitemus. Cur autem in pluribus manuscriptis codicibus olim omissi fuerint, rationem reddit S. Hier. *quòd diversa atque contraria cæteris Evangelistis continere videantur*; quæ ratio nulla omninò est, ut ex commentariis interpretum ad hunc locum videre est; ergo, etc. Porro historiam mulieris adulteræ, licet in pluribus græcis exemplaribus desit, et à quibusdam Patribus omittatur, omnes tamen Stephanici codices retinent, et plerique alii optimæ notæ quos Millius viderat. Eandem laudant Ammonius Alexandrinus, Origenis magister, Tatianus, Eusebius, SS. Athanasius, Hier. Amb. Augustin. Hanc habent versiones persica, arabica, æthiopica, coptica, et Vulgata latina. Ergo tanquàm authentica omninò habenda est. Cæ-

terum ex SS. Ambr. in Apolog. 2 pro Davide, cap. 1, et Aug. lib. 2 de adulterinis conjugiiis, cap. 7, colligere est, unde factum sit ut in aliquibus codicibus hæc historia non habeatur; nempe in iis omissa est, ne, ait S. Ambr. *si quis eam auribus accipiat otiosis, incentivum erroris occurrat*, vel, ut ait S. Aug. ne quis putaret *peccandi impunitatem dari mulieribus*. De versiculo 7 cap. 5 Epist. 1 S. Joan. major est difficultas, de quâ consule jam laudatum Millium in hunc locum, et Rogerium Ecclesiæ Bituricensis decanum in Dissert. quam super hæc re edidit an. 1713. Interim cum testimonium illud reperiat in antiquissimo codice græco britannico quem viderat Erasmus in alio codice græco montfortiano, licet recentiori manu descripto, de quo P. Le Long Biblioth. sacr. T. 1, pag. 172, col. 2, et in uno aliquo antiquissimo Vaticanæ Bibliothecæ codice in quo se illud reperisse asserit P. Amelotte; cum idem exhibeant quàm plurimi MSS. codices latini antiquissimi, et vetus correctorium Sorbonicum cujus auctor circa decimum seculum scripsit; cum in multis antiquis codicibus græcis ad marginem suppleatur ille versiculus, et sæpè eadem manu; cum ferè omnes MSS. codices græci, à quibus ille abest, sexcentis annis minores sint ipso fatente Simonio in Dissert. criticâ de MSS. novi Testam.; cum Ecclesia græca versum hunc legat in suo Lectionario cui titulus ἀπόστολος, feriâ 5 hebdomadis 35 post Pascha, et in omnibus suis Bibliis, similiterque Ecclesia Moscovitica, quantumvis Latinis inimicæ; cumque præsertim adductus ille fuerit à Tertull., auctore apostolicis temporibus vicino, lib. contra Praxeam, cap. 25; à S. Cypr., epist. ad Jubaianum et lib. de Unit. Eccles.; ab auctore disputationis in conc. Nicæno habitæ, inter opera S. Athanasii; à Pseudo-Athanasio, lib. 11 de Trinit., qui in editione Paris. anni 1627, nonus est; à S. Fulgent., lib. de Trinit. cap. 4, et in lib. Responsion. contra Arianos ad object. 10; ab auctore Prologi in Epistolas catholicas S. Hieronymo adscripti; ab Idatio, lib. 1 contra Varimadum, cap. 5; à quadragintis episcopis Africanis in Sardinia exulibus in confessione fidei oblatâ Hunnerico Vandalorum regi an. 484; apud Victorem Vitensem, lib. 3 de persecut. Vandal.; à Vigilio Tapsensi aliisque sexti seculi scriptoribus, ac tandem à Cassiodoro, cujus eâ de re summa est auctoritas, in Summario hujus loci; versiculum hunc juxta prudentis critices regulas rejici non posse ju-

dicamus. Omnes verò corrueunt difficultates, si attendatur versum octavum ejusdem capituli itidem ac 7 vocibus incipere: *Tres sunt qui testimonium dant*, adeoque versiculi septimi, de quo agimus, sine dolo prætermittendi facilem ansam amanuensi præbuisse. Certè in hebraicis græcisque codicibus alia reperiuntur loca simili lapsu omissa, ut vers. 36 capituli 21 libri Josue, qui versus in longè pluribus exemplaribus hebraicis deest; quem tamen restituendum evidentibus argumentis demonstrant eruditi.

CAPUT II.

Ex resurrectione Christi speciale argumentum eruitur.

RESURRECTIO Christi, si verè contigerit, evidentissimum est veritatis ejus doctrinæ, ac proinde mysterii Incarnationis argumentum. Etenim tria in eâ includuntur maxima miracula: nempe 1º, est resurrectio quod ostentum cætera quævis prodigia, omnibus fatentibus, superat; 2º, est resurrectio ipsius Prophetæ cujus missio probanda erat, et quidem resurrectio effecta sine ullius alterius hominis sancti interventu; 3º hanc suæ resurrectionem ejusque diem Christus pluries conceptis verbis prædixerat. *Dixit illis* (discipulis) *Jesu*, inquit S. Matthæus, cap. 17, v. 21 et 22: *Filius hominis tradendus est in manus hominum, et occident eum, et tertiâ die resurget*. Vide etiam Matth. 16, v. 21, et cap. 20, v. 49; Marc. 8, v. 31, cap. 9, v. 30, et cap. 10, v. 34; Luc. 9, v. 22, et cap. 18, v. 33; Joan. 2, v. 19, etc.

Atqui Christum resurrexisse indubitatum est; quod duplici conficio argumento. Primum sic se habet: Illud factum indubitatum est, quod plurimorum testium oculatorum, qui nec decipi nec deceptores fuerunt, auctoritate comprobatur; atqui resurrectio Christi, etc. 1º Resurrectio Christi plurimorum testium auctoritate comprobatur. Christus enim post crucem et mortem sibi irrogatam multis se vivum compluries exhibuit. Matth. 28, Marc. 16, et Luc. 24, narratur quomodo Christus apparuerit tum mulieribus sanctis, quæ cum aromatibus ad ejus sepulcrum venerant, ut ejus corpus ungerent, tum discipulis duobus in castellum Emmaus euntibus, tum undecim Apostolis aliisque discipulis qui cum illis erant congregati. S. Joannes, Evangelii sui cap. 20 et 21, Christum Apostolis ter apparuisse commemorat. Ex Actib. 1, v. 3, Apostolis Christus præbuit se ipsum vivum post passionem et suam in multis argumentis, per dies quadra-

« ginta apparens eis, et loquens de regno
 « Dei. » Testatur S. Paulus, 1 Cor. 15, v. 5
 et seq., « quoniam Christus mortuus est,...
 « et quia resurrexit tertiâ die secundum Scri-
 « pturas; et quia visus est Cephæ, et post hoc
 « undecim; deinde visus est plusquàm quin-
 « gentis fratribus simul; ex quibus, inquit,
 « multi manent usque adhuc, quidam autem
 « dormierunt. Deinde visus est Jacobo, deinde
 « Apostolis omnibus. Novissimè autem omnium
 « (subdit ille), tanquàm abortivo visus est
 « mihi. » Plurimorum igitur oculatorum te-
 stium auctoritate resurrectio Christi confir-
 matur.

2° Illi testes non fuerunt decepti. Ii namque
 in ejusmodi negotio falli non potuerunt, qui
 ad credulitatem minimè proni, non facilè, nec
 nisi cunctis cautè perpensis, rem esse sibi per-
 suaserunt. Atqui Apostoli et discipuli, Scri-
 pturarum juxta quas Christus à mortuis susci-
 tandus erat adhuc nescii (Joan. 20, v. 9) non
 facilè, nec nisi cunctis cautè perpensis, Chri-
 stum resurrexisse sibi persuaserunt. Ne ipsæ
 quidem mulieres sanctæ ad fidem resurrectio-
 nis suscipiendam plus æquo sese ostenderunt
 proclives, et ex Evangelio (Joan. 20, v. 11 et
 seq.) apparet præter earum expectationem id
 prodigii evenisse. Quoad Apostolos autem,
 dùm *regressæ è monumento mulieres muntiave-
 runt hæc omnia*, quæ ipsæ viderant, *illis unde-
 cim, et cæteris omnibus*, S. Lucâ teste, cap. 24,
 v. 9 et 11, *visæ sunt ante illos sicut deliramen-
 tum verba ista, et non crediderunt illis* Apostoli.
 Neque etiam ut Apostoli hoc sibi miraculum
 persuaderent, satis iis fuit (Marc. 16, v. 12 et
 13) testimonium discipulorum quibus in cas-
 tellum Emmaus euntibus Christus sese mani-
 festaverat. Ad eorum frangendam incredulita-
 tem necesse fuit ut Christus ipse ante eorum
 oculos se sisteret; ut eis, Luc. 24, v. 39, ma-
 nus suas et pedes confixos ostenderet; ut sese
 iisdem palpandum exhiberet, v. 41 et 43. At-
 que adeò oppositum credulæ temeritati affe-
 ctum et animum gerebant, ut Thomas, qui
 tunc aberat cùm Christus cæteris sese osten-
 derat, redux deinde noluerit uniformi Apo-
 stolorum testificationi credere. *Nisi videro*, in-
 quiebat ille Joan. 20, v. 25, *in manibus ejus*
fixuram clavorum, et mittam digitum meum in
locum clavorum, et mittam manum meam in latus
ejus, non credam; et reverà ab ejusmodi obsti-
 natione suâ non recessit Thomas, donec die
 abhinc octavo Christus iterùm discipulis appa-
 rens, illum in manus suas et in latus suum di-

gitos inferre jussit, ut ejus incredulitatem
 sanaret, Joan. 20, 26 et 27. Decepti ergo non
 fuerunt resurrectionis Christi testes.

3° Noluerunt decipere. Huc ea recurrunt
 invicta momenta ex conditione, moribus et
 indole Apostolorum, et ex eorum prædicatio-
 nis fine ac adjunctis deprompta, quibus supra,
 cap. 1, demonstravimus Apostolos non fuisse
 deceptores. Quæ quidem eò aptius huic loco
 accommodata sunt, quòd, ad persuadendam
 Christi fidem, Apostoli ab initio prædicationis
 suæ resurrectionem ejus maximè et perpetuò
 (1) attulerint. Nempe resurrectio Christi ipsis
 fuit fundamentum prædicationis suæ ac totius
 fidei et spei christianæ. *Si autem Christus non*
resurrexit, inquiebat S. Paulus, 1 Cor. 15, v.
 14, 17 et seq., *inanis est ergo prædicatio nostra,*
inanis est et fides vestra... adhuc enim estis in
peccatis vestris. Ergo et qui dormierunt in Chri-
sto, perierunt. Si in hac vitâ tantum in Christo
sperantes sumus, miserabiliores sumus omnibus
hominibus. Ergo Apostoli idcirco tot laboribus
 se dediderunt, tot periculis caput objectârunt,
 quia ipsis persuasissima erat Christi resurre-
 ctio, atque in ejusmodi facti, quo tota eorum
 spes innitebatur, confirmationem, sanguinem
 suum fuderunt.

Alterum argumentum ejusmodi est: vel
 Christus verè surrexit à mortuis, vel ejus dis-
 cipuli, corpore ejus sublato, hunc à mortuis
 resurrexisse divulgârunt. Enimverò si Christus
 non resurrexisset, et Apostoli, corpore ejus
 non subrepto, hunc tamen resurrexisse sta-
 tim et tanto apparatu prædicassent, id facino-
 ris viri illi religiosi et sapientes ausi essent,
 quod ne quidem ab hominum impudentissimis
 attentaretur; atque ipsum sepulcrum Domini
 et corpus ejus penès principes sacerdotum et
 pharisæos existens illos adeò turpis mendacii
 manifestos fecisset, ut nemo eos audire voluis-
 set. Atqui Apostoli corpus Christi non sustule-
 runt, ut ipsum à mortuis resurrexisse persua-
 derent. Nam 1° cautiones, ne id eveniret, à
 principibus sacerdotum et pharisæis adhibitæ
 furtum illud impossibile effecerant. Nempe ii
 obsignandum curaverant magnum illud saxum
 advolutum ad ostium monumenti novi et in pe-
 trâ excisi, quo Christi corpus reconditum erat,
 ac sepulcrum illud militibus usque in diem
 tertiam, quâ sese resurrecturum Christus as-

(1) Vide Act. cap. 1, v. 22, cap. 2, v. 24 et
 32, cap. 3, v. 15, cap. 4, v. 2, 10, 33, cap. 5,
 v. 31, cap. 7, v. 53, cap. 10, v. 40 et 41, cap.
 13, v. 30, 33, 37, v. 3, 18, 31, etc.

seruerat, curâ maximâ custodiendum commiserant. Vide Matth. 27, v. 65 et seq., et cap. 28, v. 4, 11 et seq. Ad suffurandum itaque Christi corpus, vel adversus milites armis dimicandum et prævalendum fuisset; vel custodum hujusmodi, quos pharisæi et sacerdotum principes è sinu suo (Matth. 27, v. 65 et 66) apposuerant, vigilantia fallenda, aut corrumpenda fides; vel ad monumentum in petrà excisum via sibi aliqua subterranea aperienda, cujus nulla vestigia remansissent. Atqui tria hæc, ut patet, perinde impossibilia erant. Cautionibus igitur quas pharisæi et principes sacerdotum adhibuerant id effectum, ut Christi corpus à nemine potuerit è sepulcro subripi. 2° Si ejusmodi furtum aliquo modo fieri potuisset, certè non ab hominibus exterritis, periculi metuentibus, pavidis et consternatis: atqui passione Christi ita exterriti et consternati fuerant ejus discipuli, ut *omnes, relicto eo, fugerint*, Matth. 26, v. 56, ut ipse Petrus, qui omnium fortissimus videbatur, ter eum negaverit, ibid. v. 33, 35, 51, 70 et seq., ut denique mortuo Christo omnes in cœnaculum se receperint, ibique manserint *foribus clausis, propter metum Judæorum*, Joan. 20, v. 19; ergo, etc. 3° Denique si hoc furto sese obstrinxissent Christi discipuli, nonnè facillimè illo crimine convicti fuissent? Certè illi nec fugâ, nec latebris, inquisitiones, judicium, aut pœnam subterfugerunt. Vel initio prædicationis suæ, id est ipso quinquagesimo tertio die à morte Christi, sese apertè coram Judæis promulgaverunt resurrectionis ejus testes, atque ex hoc præsertim prodigio ipsum à Deo constitutum Dominum et Christum Judæis demonstrare aggressi sunt. Exinde perpetuò, constanter, confidenter idem testati sunt, et ut invictum fidei christianæ argumentum auditoribus subjecerunt. Judæorum igitur Christo adversantium referebat maximè ut discipuli circa resurrectionem Christi, quam prædicabant, doli mali convincerentur. Quare igitur id à principibus sacerdotum et à pharisæis non tentatum? Numquid timendum fuit ne ejusmodi facinus discipulorum ita occultè et secretò patratum esset, ut nullo pacto posset detegi? Nonne potiùs tum ipsum rei genus, tum cautiones quas jam diximus à Judæorum principibus adhibitas fuisse, fraudis, si qua fuisset, certò certiùs detegendæ indubitatum erant indicium? Quare ergo nullam de ejusmodi negotio inquisitionem principes sacerdotum et pharisæi præscribere? Nodum solvit S. Matthæus cap. 28, v. 11 et seq., hæc scri-

bens: « Quidam de custodibus venerunt in civitatem, et nuntiaverunt principibus sacerdotum omnia quæ (resurgente Domino) facta fuerant. Et congregati cum senioribus, consilio accepto, pecuniam copiosam dederunt militibus, dicentes: Dicite quia Discipuli ejus nocte venerunt, et furati sunt eum, nobis dormientibus; et si hoc auditum fuerit à præside, nos suadebimus ei, et securos vos faciemus. » Ubi contradictio manifesta cum S. Aug. advertenda est. Nam *si dormiebant milites*, inquit S. doctor, *quid videre potuerunt? Si nihil viderunt, quomodo testes sunt?* Verùm principes sacerdotum, pharisæi, et seniores, veriti ne quò major inquisitio circa Christi resurrectionem ageretur, eò ampliùs illud confirmaretur prodigium, quidquid sibi mente oblatum est avidè arripuerunt, obstinati non decernere ut eâ de re legibus quæreretur.

Dices 1°: Si Christus resurrexisset à mortuis, resurrectio ejus fuisset publica sicut et ejus mors fuerat, nec solùm discipulis post resurrectionem suam apparuisset, sed omni Israeli; ergo, etc. 2° Auctores profani nullam Christi resurrectionis mentionem faciunt; ergo. 3° Repugnat Christum semetipsum resuscitasse; ergo. 4° Apostoli apud Luc. cap. 24, et Joan. cap. 20, referuntur vulnera Christi à mortuis suscitati inspexisse et tetigisse; at quomodò vulnera, quæ Christo mortem intulerant, potuerunt post ejus resurrectionem, in ipsius corpore remanere, conspici, et tangi? ergo, etc.

Resp. ad primum: Nego ant. Ut factum aliquod certissimum sit, necesse non est illud perinde esse publicum ac mors Christi fuerat; sufficit planè auctoritas plurimorum testium oculatorum, qui nec falli nec fallere potuerunt. Et certè nonne satis publica facta est resurrectio Domini vel ex solis cautionibus quas Judæi adhibuerunt ne quid fraudis eâ in re posset obrepere? Quo autem fine Deus Christum, quem *suscitavit tertiâ die, dederit manifestum fieri, non omni populo*, ut ait S. Petrus, Act. 10, v. 40 et 41, *sed tantùm testibus præordinatis à Deo*, Apostolis scilicet et discipulis, *qui manducaverunt et biberunt cum illo, postquam resurrexit à mortuis*; quo, inquam, fine Deus ita disposuerit, certò assignare non possumus, quia sapientissimas et altissimas consiliorum suorum vias hîc, ut et in aliis multis, non dignatus est hominibus revelare. Id tantùm novimus, populum Judaicum malitiâ, incredul-

litate et perviciâ suâ sese illâ gratiâ indignum præbuisse, ac tum ipsi tum nobis satis esse testes resurrectionis Christi præordinatos à Deo, fuisse ejusmodi, ut fides indubitata et inconcussa ipsis debeatur.

Ad secundum, resp. auctores profanos, dùm Christi et prodigiorum ejus generatim mentionem faciunt, omnia facta evangelica, ac ipsam proinde resurrectionem Domini confirmasse. Eorum porrò de Christi speciatim resurrectione silentium abundè suppletur et compensatur tot gentiliùm ad fidem Christi conversione, qui accuratiùs et propiùs rem inspexerant quàm profani historici.

Ad tertium, nego ant. Posito incarnationis mysterio, non magis repugnat Christum semetipsum resuscitasse, id est, divinitatis Christi virtute corpus ejus et animam in pristinum statum reddita et sibi invicem denuò unita fuisse, quàm impossibile est alium hominem à Deo resuscitari. Verùm hoc unum impræsentiarum volumus gentilibus et incredulis suadere, Christum à Deo fuisse suscitatum, ac proinde doctrinam ejus esse veram; quod si semel illi faterentur, citò convinci possent Dominum Jesum, in unâ Verbi personâ, naturæ divinæ et naturæ humanæ esse consortem, ac proinde semetipsum resuscitare potuisse.

Ad quartum, falsò ponitur Evangelistas loqui de vulneribus quæ post resurrectionem Christi eodem in statu fuerint ac quando ille in cruce pendebat. Sermonem faciunt tantùm de ostensis à Christo manibus, pedibus et latere, de *fixurâ* et *loco clavorum*; quibus nemo non videt significari solùm ejusmodi vulnerum notas et cicatrices; ergo, etc.

CAPUT III.

De miraculis quæ ab Apostolis eorumque discipulis ac primis fidelibus edita sunt.

Maxima et splendidissima ab Apostolis et eorum discipulis aliisque piis religionis christianæ cultoribus patranda esse miracula, prænuntiaverat et præmiserat ipse Christus Dominus. Marc. 16, v. 17 et 18: « Signa autem eos, qui crediderint, hæc sequentur: « In nomine meo dæmonia ejicient; linguis « loquentur novis; serpentes tollent; et si « mortiferum quid biberint, non eis nocebit; « super ægros manus imponent, et benè habebunt; » et Joan. 14, v. 12: « Amen, « amen, dico vobis, qui credit in me, opera « quæ ego facio, et ipse faciet, et majora horum faciet. » Quod oraculum in Apostolis

completum fuisse, ex supra dictis cap. 1, indubitatum est. Similiter autem innumera ab Apostolorum discipulis, à martyribus et aliis fidelibus edita esse primis Ecclesiæ seculis miracula, testes sunt S. Justinus Apol. 2 (olim 1) in. 6, et dialog. cum Tryphone, n. 88; S. Iren. lib. 2 contra hæreses, cap. 52 (olim 57) n. 4; Orig. contra Celsum passim, præcipuè verò lib. 1, n. 2 et 46, et lib. 2, n. 8, etc.; Tertull. ad Scapulam, cap. 2 et 4, et Apologet. cap. 23; S. Cypr. ad Demetrian., et epist. ad Donatum, etc., aliique illorum temporum scriptores ecclesiastici. Unius S. Irænei textum exhibere liceat: « In illius (Jesu Christi) nomine, inquit loco citato, qui verè illius sunt discipuli « ab ipso accipientes gratiam, perficiunt ad « beneficia reliquorum hominum, quemadmodum « dùm unusquisque accepit donum ab eo; alii « enim dæmones excludunt firmissimè et verè, « ut etiam sæpissimè credant ipsi, qui emundati sunt à nequissimis spiritibus, et sint in « Ecclesiâ. Alii autem et præscientiam habent « futurorum, et visiones et dictiones propheticas. Alii autem laborantes aliquâ infirmitate « per manus impositionem curant, et sanos « restituunt. Jam etiam, quemadmodum diximus, et mortui resurrexerunt, et perseveraverunt nobiscum annis multis. Et quid « autem? Non est numerum dicere gratiarum, « quas per universum mundum Ecclesia à « Deo accipiens in nomine Christi Jesu crucifixi sub Pontio Pilato, per singulos dies in « opitulationem gentium perficit.... Nec invocationibus angelicis facit aliquid, nec incantationibus, nec reliquâ pravâ curiositate; « sed mundè et purè, et manifestè orationes « dirigens ad Dominum qui omnia fecit, et « nomen Domini nostri Jesu Christi invocans, « virtutes ad utilitates hominum, sed non ad « seductionem, perficit. »

Ipsis paganorum adversus Christianos calumniis confirmantur hæc scriptorum ecclesiasticorum testimonia. Quare enim Christiani à gentilibus veritati repugnantibus sæpè appellati sunt incantatores, et incantatorum secta? Non aliam sanè ob causam, quàm propter frequentia illa, quæ edebant signa et prodigia. Videatur Celsus apud Orig. lib. 1, n. 16, etc.; Suetonius in Nerone, Lucianus de morte Peregrini, etc.

Jam verò hæc miracula non leve esse veritatis christianæ, ac proinde Incarnationis argumentum, nemo non videt, atque illorum pondus ex eo etiam maximè augetur, quòd ea,

ut vidimus, prædixerit Christus Dominus; undè nihil mirum, si religionis propagationem juverint et promoverint.

CAPUT IV.

Christum esse à Deo missum ex ejus Religionis propagatione ostenditur.

Religionis christianæ propagatio Christi missionem esse divinam adeò manifestè evincit, ut mirum videatur vi hujus argumenti incredulorum pervicaciam non frangi; ea quippe omnium miraculorum maximum est, præsertim si virtute miraculorum Christi et Apostolorum non fuerit peracta, ut increduli statuunt. Sic enim argumentari licet: Maximum sanè est prodigium ope paucorum hominum simplicium, omni humano auxilio destitutorum, latè per orbem et velocissimè propagatam fuisse religionem sanctam, eorum quibus annuntiabatur affectibus planè contrariam, et omni genere potentissimorum hostium impugnata; solus enim Deus qui voluntatum humanarum quò voluerit inclinandarum habet omnipotentissimam voluntatem, tanti prodigii auctor esse potest.

Atqui 1^o religio Christi latè per orbem et velocissimè propagata est. Testis est S. Paulus qui in Epistolà ad Romanos aiebat cap. 1, v. 8, *fidem eorum annuntiari in universo mundo*; et cap. 10, v. 18, *in omnem terram exivisse sonum vocis discipulorum Christi, et in fines orbis terræ verba eorum*; et capite 16, v. 25 et 26, gratias esse agendas Deo quòd Evangelium esset *in cunctis gentibus cognitum*. Idem Apostolus in Epistolà ad Coloss. 1, v. 6, scribit *Evangelium in universo mundo fructificare et crescere sicut in illis*; et v. 23, *illud in universâ creaturâ quæ sub cælo est prædicari*. Vide etiam caput 3 Epist. 1 ad Tim. v. 16.

Testes sunt omnes scriptores ecclesiastici. S. Justinus Apologîâ primâ; S. Irenæus, lib. 1 adversùs hæreses, cap. 5; Tertullianus, lib. 1 adversùs Judæos et in Apologetico; Origenes tum homiliâ 4 in Ezechielem, tum lib. 1 contra Celsum; S. Clemens Alexandrinus, lib. 5 Stromatum; Arnobius lib. 2, etc. Testes sunt ipsimet auctores pagani: Seneca Christianos Judæorum nomine designans, quod scriptoribus profanis tunc temporis non infrequens est, eo quòd Christiani ex Judæis essent orti, sic habet apud S. Augustinum lib. 6 de Civit. Dei, cap. 11: *Sceleratissima gentis consuetudo usque ed invaluit, ut per omnes jam terras recepta sit; victi victoribus leges dederunt*; quæ verba Ruti-

lius Nomentianus, itinerarii lib. 1 sua fecit. Tacitus, Annalium lib. 13, c. 44, immensæ multitudinis Christianorum qui in persecutione Neronis, variis suppliciis affecti mortem subierunt, mentionem facit. Plinius Junior in celebri epistolâ quam, dum Pontum ac Bithiniam regeret versùs annum 104, ad Trajanum imperatorem de Christianis misit, non modò innocentiae Christianorum fidejussor est locuples, sed et eorum multitudinis et diffusionis. Ait enim illam religionem, quàm superstitionem vocat, in urbibus ac in vicis apud cujuslibet ætatis, conditionis ac sexûs personas obtinere. Dion, lib. 37, loquens de Christianis sub nomine Judæorum: *Est etiam, inquit, apud Romanos genus istud imminutum quidem sæpè numero, adeò tamen auctum, ut vim legum pervicerit*.

Atque hæc quidem spectant priora secula ante imperium Constantini elapsa. Quòd si seculorum subsecutorum rationem habeas, nonne mirum nationes barbaras à quibus imperium romanum destructum est, Christo se subdidisse? hæresim Arianam, etsi dogma rationi penitùs impervium impugnaret, etsi omni imperatorum auctoritate fulciretur, nunquàm prævalere potuisse? per ipsum decimum seculum plures nationes Christo fuisse partas, atque etiamnum ad Indias seu Orientales, seu Occidentales ab Ecclesiâ catholicâ tot mitti Evangelii præcones qui juxta præscriptum Christi illorum regionum incolas ad ejus fidem convertant? denique religionem christianam quæ perpetuò, et undequaque impugnatur, semper firmam et stabilem sine ullâ suæ mutatione permansisse.

2^o Ope quorundam hominum simplicium omni auxilio humano destitutorum christiana religio sic propagata est; Apostoli enim, ut constat non modò ex historiâ evangelicâ; sed etiam ex omnium consensu, erant viri simplices, plebei, illitterati. Media humana quibus homines seducuntur, vel sunt promissiones de honoribus et divitiis concedendis, vel minæ de ejusmodi bonis auferendis. Hæc media ab Apostolis adhiberi non potuerunt, quippe qui ad gentes verbo Dei subigendas missi fuerant pauperes, neque aurum, neque argentum possidentes, viri privati, sine auctoritate, vexationibus ac insectationibus obnoxii, quorum arma patientia, crux Christi, Verbum Dei.

3^o Religio Christi eorum quibus annuntiabatur affectibus erat contraria. Ii enim vel erant

Judæi vel pagani. Judæi verum quidem agnoscebant Deum, sed cupiditatibus et affectibus terrenis plerique irretiti divina sacrorum vatum oracula carnali sensu interpretabantur, atque ideam Messie longè diversam ab eâ quam Christus exhibebat sibi efformabant. Denique cæremoniis legis suæ plus æquo addicti dignos morte judicabant quotquot eas abolendas esse sentiebant. Pagani verò de quibus præsertim hic agitur, extincto in se sensim rationis lumine in cæcitatem mentis et corruptionem summam inciderant. Astris, fluminibus, bestiis, animalibus vilissimis, plantis, manuum suarum operibus, ipsis morbis et calamitatibus quibus homines affliguntur, ipsi amoris impudico honores divinos exhibebant. In honorem Veneris celebrabantur projectæ libidines, diis homines immolabantur, vel nobilissimæ nationes ejusmodi abominationibus erant addictæ, tantisque in tenebris ac corruptione miseri mortales tunc temporis erant demersi, ut maximi philosophi, Socrates, Plato, etc., unicum summum Deum quem agnoscebant non ausi sint populo colendum proponere, ne se irrisioni ac periculo mortis exponerent. Hæc ex historiâ certissima sunt.

Itaque suadendum erat Judæis virum nomine Jesum, pauperem, multis modis exagitatum, opprobriis saturatum, cruci tandem affixum, hunc esse Messiam quem expectabant, eorumque legis cæremonias tandem abolendas. Non ergo admirari subit quòd tot Judæi terrena appetentes Christo non crediderint; sed ad istud potiùs, si Christus miracula ut increduli volunt non patrasset, maximè obstupendum, quòd Judæorum magna multitudo Christi fidem susceperit, eique ut vero suo Messie regi spirituali adhæserit. Gentilibus porrò persuadendum erat eos omnes deos quos colebant, quique cultorum suorum cupiditatibus favebant, esse rejiciendos, omnia sacrificia, omnes superstitiones ab ipsis adhibitas debere deseri; ejusmodi numinum loco non modò adorandum esse in spiritu et veritate supremum Deum, criminum vindicem, sed et Jesum Christum Hominem Deum à Judæis crucifixum; hujus fidem tenendam; legi ipsius obtemperandum; exemplis adhærendum; refrenandas proinde cupiditates, etc. Religio igitur christiana, cum ab Apostolis et eorum discipulis promulgata est, eorum quibus annuntiabatur affectibus summè repugnabat.

4^o Omni genere hostium impugnabatur. Nam ut religio Christi stabiliretur, vivendi fuere

adversarii quos in religionem suscitabant præjudicia et cupiditates quibus adversabatur. Vincenda fuit philosophorum facundia atque subtilitas religionem suam pro virili defendentium, ac christianam fidem summo conatu aggredientium; vincenda fuit imperatorum religionem paganam legibus confirmantium et in Christianos tyrannicè desævientium ipsamet suprema auctoritas; hæc, inquam, vincenda fuere crucis Christi et verbi Dei virtute, patientiâ in tribulationibus et suppliciis, ac sanguinis sui effusione. Superandum fuit et aliud hostium genus religioni magis adhuc reformidandum, hæresis nempe et schisma perpetuò pullulans, atque auctoritate totâ imperatorum aliquando suffultum. Denique religio debuit integra permanere, etsi major eam profitentium pars mores sequeretur perversos, etsi maxima existerint scandala, ut à Christo prædictum fuerat; etsi, quod ad doctrinam fidei et morum attinet, nunquàm sese temporis accommodare voluerit Ecclesia, nec suis definitionibus quidquam detrahi permiserit ut suæ securitati consuleret.

Ergo religio christiana, nisi fuisset opus divinum, neque hocce modo propagari, neque hactenùs illibata stare potuisset.

CAPUT V.

Ex Prophetiis adstruitur Christi missionem esse divinam.

De veteribus sacrorum Vatum oraculis in Christo Domino adimpletis, jam fusè antea adversus Judæos diximus; superest ut quæ ibi statuta sunt, ad hunc locum contra gentiles et incredulos transferamus. Quod antequàm exequamur, nonnulla de Prophetiâ et Prophetis generatim prætermittenda sunt, quæ explicari non postulavit controversia cum Judæis habita. Prophetia, vero et proprio sensu accepta, definiri potest: Rei futuræ, contingentis et liberæ prædictio infallibilis, ubi nihil quod eò pertineat, nullam proclivitatem præviam mens detegit. V. g., veri Prophetæ nomen procul dubio is meretur, qui cujusdam hominis, non nisi post plura secula nascituri, infallibiliter prænoscit nomen, vitæque et mortis diversas ac singulares circumstantias, atque multa prodigiosa præsignificat ab eo patranda, quorum indicia nulla habentur. Cum soli Deo competat nomen *scrutatoris cordium*, eaque sit futurorum liberorum natura, ut nonnisi ab infinitâ intelligentiâ certò cognosci queant, evidentissimum est solo Deo auctore futura ejusmodi in-

fallibiliter prædici posse, ac proinde veram prophetiam inconcussum esse veritatis argumentum; seu, quod idem est, hanc à Deo indubitanter profectam esse doctrinam, quæ manifestò talium prophetiarum eventu confirmatur. Jam verò nemo nescit juxta libros veteris Testamenti, quos ut à Deo inspiratos Judæi perinde ac Christiani venerantur, plures à Patriarchis editas esse prophetias; Moysen fuisse Prophetam insignem, simul et legislatorem Judæorum; Prophetas paucos tempore judicium exitisse; ab ætate verò Samuelis multos continuatâ serie, usque ad templi restaurationem sibi successisse; denique in Prophetarum illorum libris sæpè mentionem fieri liberatoris quem Judæi exspectabant, atque insuper multa de gentium diversarum ac præsertim nationis hebrææ statu vaticinia ibidem occurrere.

Observant theologi veros Prophetas fuisse viros sanctos ac cultui divino summè addictos, non quòd sanctitas morum et veræ religionis professio vel satis sint vel absolutè requirantur ut homo spiritu prophetico affletur; sed quia Deus sanctissimus hominem impium ac moribus corruptum non seligit, quem extraordinariè et miraculosè mittat mandata sua hominibus denuntiaturum. Observant præterea indubitata quædam fuisse indicia, quibus divina verorum Prophetarum missio tum ipsis Prophetis tum aliis hominibus innotesceret. Et se ipsos quidem à Deo inspiratos cognoscebant Prophetæ, sive ex dono miraculorum sibi aliquando concesso; sive per signum aliquod peculiare et miraculosum quo Deus eos à se missos esse certiores reddebat, quemadmodum de Moyse Exod. 4, et de Gedeone Judic. 6, refertur; sive ex vocatione præcellenti et miraculosâ, quam certò ab iis percipi Deus efficiebat, ut Jeremiæ contigit, Jer. c. 1, v. 5, etc. Quod ad alios attinet, iis missionem suam comprobabat Propheta vel miraculis quæ edebat, vel prophetiis temporalem reipublicæ Judaicæ statum contingentibus manifestè ad exitum perductis, vel etiam alterius Prophetæ jam cogniti testimonio et auctoritate. Observant etiam necessum non fuisse ut prophetiarum sensus, quo tempore illæ edebantur, semper esset clarus et manifestus. Oportet quidem, cum res prædicta evenit, tunc saltem prophetiæ sensum dignosci posse, alioqui hæc inutilis foret. At verò non ea est prophetiarum indoles ut ante eventum ipsæ necessariò debeant esse omninò claræ et apertæ. Ratio est quia Deus sese manifestat

liberè et secundum modos quos in altissimis sapientiæ suæ consiliis constituit, ac ejus verba, quocumque tandem modo ipse loqui dignetur, summâ cum veneratione semper suscipienda sunt. Et reverà, licet multa de Christo vaticinia ante eventum aperta fuerint et perspicua, alia tamen eventu illustrari egebant, et pleraque post eventum plenius intelliguntur. Nec mirum, cum et in ipsis historicorum scriptis sæpè non pauca difficulter percipiuntur, quæ olim quo tempore res contigerunt, omnibus obvia fuerunt et manifesta.

Atque ex his colligere est sensum prophetiarum quæ Judæorum statum temporalem spectabant, ipsis olim cognitu faciliorem fuisse, quàm nunc à nobis intelligi possit; siquidem multa procul dubio de rebus Judaicis nos latent, quæ Judæis veteribus comperta erant et explorata. At prophetias ad Christum, et ad Ecclesiam attinentes facilius intelligere debemus quàm Judæi ante Christum, cum eventus ejusmodi prophetiis prænuntiati nobis ex historiâ jam innotescant.

Denique observandum est, in prophetiis, ut et in cæteris Scripturis, locum habere distinctionem sensûs litteralis, et sensûs mystici. Sensus litteralis immediatè verbis exprimitur, et in proprium ac metaphoricum dividitur. Mysticus non significatur immediatè verbis ipsis, sed rebus quas verba exprimunt designatur. V. g. hæc verba Exodi 12, v. 46: *Nec os illius confringetis*, quæ litteraliter accepta ad agnum paschalem referuntur, mysticè ad Christum attinent agno paschali figuratum. Faten- tur omnes nullam sensui mystico per se inesse vim ad probandum, id est, nisi is aliunde ostendatur à Spiritu S. intentus. Quidam post Grotium statuere non dubitârunt in prophetiis Christum spectantibus duplicem esse sensum litteralem, seu immediatè verbis expressum et à Spiritu S. directè intentum, quorum unus referatur ad facta quædam historiæ Judaicæ Christum figurantia, alter sublimior et spiritalis ad Christum pertineat. Non inficiamur quibusdam paucis in prophetiis hunc duplicem litteralem sensum non absurdè admitti. Sed omnibus aut plerisque vaticiniis quisquis illum affingit, is certè invictum quod ex prophetiis ducitur argumentum valdè saltem infirmat. Nam si quis è duplici sensu litterali prophetiæ cuidam assignato, eum velit tantum agnoscere qui ad historiam Judæorum pertinet, quomodò duplicis sensûs indagatores nimii poterunt alterum suum de Christo sensum huic homini

persuadere? Opponent magnam consensionem quæ intercedit factum historicum inter et rem aliquam ad Christum contingentem. Dicent sublimiori sensu accepta prophetiæ verba in Christum perfectè quadrare, idque sine speciali Spiritûs sancti directione non factum. Hæc alicujus esse ponderis fatebor libenter. Sed argumenta ejusmodi iis nonne simillima sunt quæ ex typis eruuntur? Quis autem argumento ex typis Christum præsignificantibus deducto tantam vim tribuat, quantam sibi vindicat argumentum quod prophetia solum Christum litteraliter spectante subministratur? Verùm hæc ad præsens institutum non pertinent. Sensûs illius duplicis distinctionem, quantum adversus gentiles et incredulos satis est et oportet, supra confutavimus, dùm contra Judæos agendo, plurima sacrorum vatum insignia oracula recensentes, ea ostendimus ad solum Christum litteraliter referenda. His præmissis, sit

CONCLUSIO. Christum Jesum à Deo esse missum plurima vaticinia evincunt.

Prob. Hunc enim à Deo esse missum plurima vaticinia evincunt, qui plures edidit prophetias ad eventum perductas, et in quo innumera vaticinia Messiae prænuntia impleta sunt. Atqui 1^o Christus plures insignes edidit prophetias, de quarum præcipuis supra in suo loco egimus. 2^o Innumeræ prophetiæ ipsius prænuntia in eo completæ sunt. Prædicta enim fuerant, longè antequàm ille nasceretur, quæcunque attinent ad ejus originem, nativitatem, infantiam, vitæ rationem, prædicationem, miracula, passionem, mortem, resurrectionem, ascensionem, discipulorum missionem, etc. Necnon et quæ spectant ad Spiritûs S. effusionem, novî fœderis sanctionem, Baptismi et sacrificii novæ Legis institutionem, donorum cœlestium collationem, Judæorum plurium conversionem, aliorumque punitionem, gentium vocationem, Ecclesiæ diffusionem et durationem, etc. Hæc omnia dissertatione præcedenti fusè exposuimus, adeò ut ad illa hæc applicanda, et propositionem nostram stabiliendam, unum eo loci probandum supersit, nempe libros ex quibus hæc vaticinia eruuntur, diù antequàm nasceretur Christus, fuisse exaratos et diligenter custoditos, non verò post Christi adventum ex industriâ confictos et suppositos, aut quantum ad substantiam adulteratos. Istud igitur argumentis aliquibus evincendum.

Et quidem ejusmodi libros diù antequàm

nasceretur Christus fuisse exaratos, prob. 1^o, quod ad libros Moysis spectat; ex populi Israelitici totâ constitutione. Nationem Judaicam antè Christum extitisse, eamque juxta leges sibi proprias vixisse ac Deo uni cultum adhibuisse, non modò ex historiâ hujus nationis, sed et ex aliis innumeris paganorum historiis omninò constat et indubitatum est. Vide Josephum contra Appionem. Atqui Judæorum religio integra, omnes eorum ritus et cæremoniæ, quæ prope modum infinitæ fuerunt, omnia festa ab ipsis certâ serie celebrata, eorum reipublicæ status et gubernatio, judiciorum formæ, ipsummet privatum familiarum regimen, uno verbo quæcumque ad nationem Judaicam pertinent, Moysis libros exaratos supponunt, atque ex factis, quæ in iis narrantur et legibus quæ ibidem præscribuntur originem ducunt. Ergo jam habemus libros Moysis, in quibus Messias Patriarchis promittitur; et insignia leguntur oracula ipsum contingentia, nempe oracula Jacobi, Balaami, etc., longissimo tempore antè Christi nativitatem fuisse conscriptos. 2^o Judæis Christianorum hostibus infensissimis libri prophetici concrediti fuerant, atque ex eorum manibus Christiani ac gentiles libros veteris testamenti acceperunt. Etsi porro vaticinia Prophetarum perpetuò referta sint durissimis in populum Judaicum objurgationibus; etsi noverint Judæi Christianos ex illis maximum causæ suæ præsidium querere; ea tamen ut à Deo inspirata semper venerati sunt, atque etiamnum, licet orbe toto disjecti, usque ad superstitionem venerantur. Non ergo post Christi adventum exarati et suppositi sunt illi libri, sed diù antea, et eo tempore, quo Prophetæ, quorum nomine inscribuntur, vixerunt. 3^o Antequàm Christus nasceretur, in græcâ sermonem tunc temporis apud populos omnes valdè usitatum; translato fuisse ejusmodi libros, sicque per orbem universum disseminatos, certum est; ergo, etc., 4^o Libri Moysis cæteris omnibus veteris Testamenti libris supponuntur; ex istis alii plerumque alios supponunt et confirmant. Præterea, in libris novi Testamenti, quos ab Evangelistis et ab Apostolis initio prædicationis evangelicæ editos fuisse nemo ambigit, libri veteris Testamenti sæpissimè citantur; ergo, etc. 4^o Si libri veteris Testamenti non sint genuini, vel anius tantum, vel plurium impostorum erunt factus; neutrum dici potest. Non prius; si quidem in iis diversissimus est stylus, diversum dicendi genus, pro diversorum auctorum varietate, nec fieri

potest ut unus idemque homo tantam in scribendo diversitatem induerit. Non posterius; quippe inter omnes hujusmodi libros summus deprehenditur consensus quantum ad doctrinam, mores et facta. Deinde, vel illi impostores fuissent amici, vel inimici Judæorum. Si amici, non tot in illis libris extarent objurgationes contra Judæos, totque alia Judaicam nationem valdè deprimentia. Si inimici, non tot in iisdem reperirentur Judæis faventia. Denique dicant deistæ quomodò impostores potuissent simul tot facta prodigiosa et tanti momenti, integræ Judæorum nationi per orbem dispersæ suadere, illisque tam difficile imponere jugum quod in cæremonialium et judicialium legum observatione constituitur? ergo libris veteris Testamenti diù antequàm Christus nasceretur exarati sunt.

Jam verò ejusmodi libros mansisse integros et incorruptos non minùs evidenter ostenditur. Nam si corrupti fuissent, vel ante, vel post Christi tempora. Atqui non ante; nemo enim nescit quantà veneratione libros suos Judæi semper prosecuti sint: Pentateuchum Moysis à Samaritanis asservatum inter et Pentateuchum quem Judæi exhibent nulla quod ad rem spectet discrepantia reperitur, quamvis sibi invicem illi inimici fuerint; versio græca diù ante Christum paracta et pervulgata etiam argumento est integritatis librorum veteris Testamenti. Sed in hac parte probandâ diutius immoramur, nemo quippe dixerit vaticinia in Christo adimpleta, antequàm ipse oriretur, ab impostore conficta fuisse. Quòd autem libri veteris Testamenti post Christi ætatem non fuerint corrupti, probatur 1º ex consensu exemplarium et versionum, ac locorum ejusmodi librorum quæ in scriptis auctorum ecclesiasticorum perpetuò occurrunt. Probatur 2º quia, si fuissent corrupti, vel à Judæis, vel à Christianis, vel ab infidelibus. Non ab infidelibus; id nec Judæi nec Christiani passi essent; deinde non consentirent codices; postremò infideles in illis libris non inseruissent vaticinia in Christo ad exitum perducta. Non à Judæis, qui sanè illa vaticinia non confecissent, quique à Christianis fuissent fraudis accusati et revicti, ut quantum ad loca quædam rarissima contingit. Non à Christianis: reclamassent Judæi; nec jam exemplaribus quibus per orbem dispersi utuntur, nostri codices essent consentanei; ergo, etc. Plura addi possent, sed hæc instituto nostro sufficiunt.

Dissertatio iv.

MYSTERIUM INCARNATIONIS EXISTERE ADVERSUS
HÆRETICOS ADSTRUITUR.

ERRORES hæreticorum de mysterio Incarnationis ad tria revocantur capita. Aut enim circa Christi divinitatem, aut circa ejus humanitatem, aut circa utriusque naturæ nexum et conjunctionem versantur. Circa divinitatem Christi triplici modo erratum est. Alii divinam naturam ipsi Verbo divino abjudicantes, eam proinde Christo detraxère. Alii verbum divinum cui humanitas in Christo conjungitur, seu Filium Dei, à Patre nomine tenùs distinxerunt. Alii Christum esse purum hominem ideò statuerunt, quòd negarent naturam humanam à Filio Dei assumptam fuisse. Postremus hic error ad Nestorianismum mox memorandum referendus est, et simul cum eo erit confutandus. De duplici altero speciatim hic non agemus, quippe utriusque confutatio ad tractatum de SS. Trinitate pertinet, in quo adversùs Arianos ex unâ parte, et ex alterâ adversùs Sabellianos, Noetianos, Paulianistas, etc., demonstratur præcipuum hoc esse fidei christianæ mysterium: Filium Dei esse personam à Patre divino realiter distinctam, ipsique æqualem et consubstantialem. Itaque licet humanitatis cum Verbo divino conjunctionem postea evincendo, plurima testimonia Verbi divinitatem adstruentia allaturi simus, attamen ex professo et datâ operâ ejusmodi non tractabimus quæstionem. Non unâ etiam ratione, ut modò videbitur, à pluribus olim hæreticis impugnata est Christi humanitas. Denique, qui de nexu naturæ humanæ et divinæ in Christo falluntur, ii vel unionem physicam seu hypostaticam humanitatis cum Verbo divino nolunt agnoscere, qui fuit error Nestorii; vel unionem illam ita explicant, ut unicam naturam in Christo esse arbitrentur, quod docuit Eutyches; vel distinctionem naturarum fatentes, unicam Christi esse voluntatem et operationem contendunt, in quo positum fuit perversum Monothelitarum dogma.

Quatuor igitur capitibus complectemur quæcumque hic discutienda veniunt: In 1º natura humana Christo vindicabitur. In 2º ostendemus humanitatem in Christo esse Verbo divino personaliter unitam, matrem proinde Christi Mariam esse titulo Deiparæ insigniendam. Ibidem de Nestorii erroribus, condemnatione, et asseclis disseremus. In 3º, Eutychianismum exponemus

et refellemus, seu comprobabimus unionem hypostaticam non obesse quominus in Christo sint duæ naturæ, divina et humana, integræ et perfectæ. In 4^o adversus Monothelitas ostendemus eâdem unionem non effici ut unica sit in Christo operatio et voluntas; ubi de facto Honorii dicendum erit.

CAPUT PRIMUM.

Adversus plurimos veteres hæreticos asseritur Christi natura humana.

INTER veteres hæreticos humanitatis Christi oppugnatores fuere plurimi, qui fictam, umbratilem, et phantasticam carnem ei tribuerunt, non veram et solidam. Juxta alios habuit quidem Christus carnem solidam, sed è cœlo delapsam, ex elementis coagmentatam, non ex Mariâ Virgine sumptam. Alii animam aut mentem humanam Christo tribuere noluerunt. Ii errores triplici articulo refellendi.

ARTICULUS PRIMUS.

An Christo fuerit verum et solidum corpus.

IPSA Apostolorum ætate nonnulli veram et solidam Christo fuisse carnem inficiati sunt, quos S. Joannes Epist. 1, cap. 4, v. 1, perstringit his verbis : *Multi pseudo-prophetæ exierunt in mundum.... Omnis spiritus qui confitetur Jesum Christum in carne venisse, ex Deo est; ut omnis spiritus qui solvit Jesum (græca habent : Qui non confitetur Jesum in carne venisse), ex Deo non est, et hic est Antichristus.* Ejusmodi hæreticorum princeps extitit Simon Magus cujus insanos errores refert S. Irenæus, lib. 1, cap. 23, aliàs 20; Simoni, ut Eusebius refert, lib. 3. Hist. eccles. cap. 26, successit Menander, qui et ipse discipulos habuit Saturninum Antiochenum, et Basilidem Alexandrinum. Hi docuerunt Christum specie tenus hominibus apparuisse, ac corpus ejus fuisse merè phantasticum, unde Phantasiastæ appellati sunt. Addebat Basilides loco Christi crucifixum fuisse Simonem Cyrenæum. Vide S. Iren., lib. 1, cap. 24, aliàs 22; Euseb., lib. 4 Hist. cap. 6 et 7; S. Epiphan., hæresi 24. In disseminandâ impietate Saturnini cæteros omnes ita superavit Julius Cassianus, ut à Clemente Alexandr. lib. 3 Stromatum, *Princeps Phantasiastarum* nuncupetur. Idem dogma insulsum amplexati sunt Heracleonitæ, apud S. Epiphan. ab Heracleone orti; Ophitæ, sic dicti quòd serpentem à quo decepta est Eva venerarentur; Cerdo, teste Tertull. lib. de Præscriptionibus, cap. 51; Marcion, ex eodem in libris contra Marcionem et

de Carne Christi; Manes seu Manichæus, à quo Manichæi apud S. Augustin. lib. de Hæresibus cap. 46. Consule Petavium integro lib. 1 de Incarnatione Verbi divini, varios errores qui circa illud dogma erupuerunt, fusè et accuratè exponentem.

CONCLUSIO. Christus habuit verum et solidum corpus, non fictum, umbratile et phantasticum.

Probatur 1^o ex Scripturis. Joan. v. 14, disertè exprimitur unio Verbi cum carne in Christo. *Verbum caro factum est*, inquit Evangelista; atqui corpus phantasticum caro non est, sed mera umbra carnis; ergo, etc. Rom. 1, v. 3, de Christo hæc leguntur : *Qui factus est ei ex semine David secundum carnem.* Unde sic arguitur : Qui secundum carnem est ex semine David, is certè veram ac solidam carnem habuit; atqui Christus, etc. Hebr. 5, v. 17, de eodem ait Apostolus : *Qui in diebus carnis suæ preces supplicationesque ad eum, qui possit illum salvum facere à morte, cum clamore valido et lacrymis offerens, exauditus est*, etc. Ubi dies vitæ mortalis Christi appellantur *dies carnis* ejus; verà ergo carne fuit indutus. Ibid. cap. 10, v. 5, ex Psal. 59, v. 7, istud de Christo assertur : *Hostiam et oblationem noluisti, corpus autem aptasti mihi.* Audis Christo aptatum corpus, et quidem corpus quod substitueretur hostiis veris et realibus veteris legis; ergo ejus humanitas verum et solidum corpus complectebatur. Denique Matth. 1, et Luc 3, genealogia Christi secundum carnem textitur; eodem in capite Matthæi, et Luc 1 et 2, conceptus in utero Mariæ et ex eâ natus perhibetur, Matth. 26, v. 26, et 1 Cor. 11, v. 24, corpus ejus morti tradendum, et sanguis ejus in remissionem peccatorum effundendus dicitur; Matth. 27, Marc. 15, Luc 23, Joan. 19, cruci affixus est Christus; 1 Petr. 2, v. 24, *peccata nostra ipse pertulit in corpore suo super lignum*; Coloss. 1, v. 22 : *Reconciliavit nos in corpore carnis ejus per mortem*; Matth. 27, v. 59, corpus ejus sepulcro fuisse conditum narratur. Act. 2, v. 31, significat S. Petrus carnem ejus in sepulcro à corruptione divinitus fuisse servatam; Joan. 20, v. 27, ipse à mortuis redivivus seipsum Thomæ palpandum præbuit, ut veritatem corporis sui probaret; et Luc 24, v. 39 : *Videte manus meas et pedes*, inquebat discipulos alloquens, *quia ego ipse sum; palpate et videte, quia spiritus carnem et ossa non habet, sicut me videtis habere.* Ergo solidam et realem carnem Christus habuit. Alia multa omitto testimonia, quibus idem

etiam conficitur. Horum plurima deinceps, aliud agendo passim adhibebimus. Ea potissimum notanda in quibus significatur Christum esse hominem; quæ ad quæstionem dirimendam sola sufficerent, cum homo mente et corpore vero essentialiter constituatur.

Probatur 2º ex Symbolis fidei, in quibus Filius Dei dicitur, caro factus, ex Mariâ Virgine natus, passus, crucifixus, sepultus, etc., quæ omnia veritatem carnis ejus exprimunt.

Probatur 3º rationibus theologicis, quibus in hoc argumento usi sunt SS. Patres. Prima est Christum, nisi verum corpus habuerit, non potuisse pro salute nostrâ verè pati, et veram mortem subire. Hoc argumentum validè Tertullianus in Marcionem premit lib. de Carne Christi, cap. 5. Secunda petitur ex veracitate verbi divini. Si phantasma fuit corpus Christi, inquit S. Aug. lib. 83 Quæstionum, quæst. 14, 14, fefellit Christus; et si fefellit, veritas non est; est autem veritas Christus; non igitur phantasma fuit corpus ejus. Similia habent S. Irenæus, lib. 3, cap. 20, S. Epiphanius et alii. Tertia ejusmodi est: Illusoria non fuere exempla, quibus ad cruces, ærumnas et labores hujus vitæ patienter tolerandos Christus nos excitavit; atqui exempla ejusmodi illusoria fuerunt, si non nisi phantasticum ei fuerit corpus, in quo solummodò fictè et apparenter pati potuerit; ergo. Ita S. Irenæus loco mox citato. Quarta: In Scripturis clariùs non exprimitur Christi divinitas, quàm ejus humanitas; proindeque si liceat eum habere ut hominem fictum, poterit etiam spectari ut fictus Deus. Sic ad hominem argumentatus est Tertull. contra Marcionem, lib. 3, cap. 8.

Dices 1º: Frustra in Manichæos et Marcionitas adducuntur testimonia, ex Evangeliiis S. Matthæi et S. Joannis deprompta; idem dicendum de Christi genealogiis. Il enim hæretici unicum recipiebant Evangelium secundum Lucam, et ex eo genealogiam resecabant; ergo. 1º Neg. ant. Ad probationem nego consequ. Perditam fuisse horum hæreticorum causam vel maximè ex eo manifestum sit, quòd eam tueri non valerent, nisi Scripturas auctoritatis certissimæ et ubique receptas rejicerent aut mutilarent. 2º Nego consequ. In Evangelio S. Lucæ ab illis admissio evidentissima soliditatis corporis Christi argumenta sæpè occurrunt, quorum aliqua inter probationes attulimus.

Dices 2º: Rom. 8, v. 3, Apostolus sic loquitur: *Deus filium suum mittens in similitudinem carnis*. Ergo Christo fuit duntaxat similitudo

carnis, nec proinde verà et solidà carne indutus est. Nego ant. Habetur in textu, *in similitudinem carnis peccati*; quo solum significatur Christum, nullius peccati sotentem, habuisse similitudinem carnis peccatricis et pœnas peccatorum ab hominibus commissorum dedisse. Nempe *posuit Dominus in eo iniquitatem omnium nostrum*. Et 2 Cor. 5, v. 21: *Eum qui non novit peccatum*, inquit Apostolus, (cum Deus) *pro nobis peccatum fecit* (id est, hostiam pro peccato). Hæc ubi de satisfactione Christi fusè exponuntur,

Dices 3º: Apostolus, 2 Cor. 5, v. 16, hæc habet: *Et si cognovimus secundum carnem Christum; sed nunc jam non novimus*. Ergo nunc Apostolo compertum erat veram carnem Christo non esse. Nego consequ., et dico hæc verba *secundum carnem*, in textu allato non ad Christum, sed ad fideles qui ipsi adhærent referri, et idem sonare ac *affectus terrenos* juxta quos Christo jam non est adhærendum; quasi dictum esset: Si olim gloriati sumus in Christo secundum affectus humanos, nempe quòd inter nos natus, quòd ex gente nostrâ esset oriundus, jam ad ejusmodi temporalia et sensibilia non attendimus; sed ad spiritualia, ad cœlestia quæ in Christo sunt, mentem ducimus erigendam. Atque is sensus perfectè consonat tum aliis S. Pauli testimoniis; in quibus vocem *carnis* pro humano et terreno affectu accipit; cum maximè isti loco quem expendimus; siquidem ibi Apostolus hortatur ut Christo vivamus, agiturque de bonis spiritualibus quæ per Christum sumus consecuti. Deinde, hæc verba: *Itaque nos ex hoc neminem novimus secundum carnem*, quæ locum S. Pauli objectum immediatè præcedunt, de exclusionem humanorum et terrenorum affectuum optimè intelliguntur; absurdissimè verò de carne solidà et mortali explicarentur, quâ cæteros homines spoliatos esse dixisset Apostolus; ergo verba subsequenter ad eandem periodum pertinentia, absurdè etiam de carne solidà exponerentur. S. Augustinus, lib. 11 contra Faustum, et synodus septima generalis, actione 6, nomen *carnis* hic acceperunt pro conditione carnis passibilis, secundum quam Christus post resurrectionem suam jam non cognoscitur, Faventhuc interpretationi eamque innuunt verba antecedentia (v. 15), *ut et qui vivunt, jam non sibi vivant, sed ei, qui pro ipsis mortuus est et resurrexit*.

Dices 4º: Verbum divinum, juxta plurimos veteres Ecclesiæ doctores, olim apparuit Pa-

triarchis in corpore assumptō, quod non erat verè humanum, nec tamen ideò finxisse dicendum est. Quòd si reponas Angelos, non ipsum Verbum, tunc apparuisse, idem argumentum recurret, cùm sanctis Angelis nulum liceat mendacium adscribere; ergo etsi Christus non habuisset corpus solidum, non ideò nos decepisset. Nego conseq. et paritatem. Etenim seu Verbo, seu Angelis attribuantur illæ apparitiones, constat eas fuisse duntaxat transeuntes, et ad certum quoddam functionum et actionum genus restrictas; atque sive ex circumstantiis et prodigiis eas comitantibus, sive ex modo quo cessabant, sive ex declaratione Angelorum apparentium cognoscere erat quid de ejusmodi visionibus esset judicandum. Præterea, dùm apparitiones quasdam in veteri Testamento memoratas verbo divino SS. Patres adjudicant, ii docent simul eas fuisse signa veritatis cujusdam insignis; nempe illas habent ut totidem Incarnationis futuræ prælusionem. At verò Christus constanter exhibetur in Scripturis ut verus homo; juxta ipsas ex Mariâ conceptus est, natus est, crevit, adolevit, ampliùs triginta annis vixit, passus est, mortuus, sepultus, resurrexit, etc.; quæ sanè ad meram fictionem et oculorum fascinationem referri nequeunt, quin verbum divinum deceptionis insimuletur. Deinde Incarnatiō phantastica nullius veritatis fuisset indicium, nec nisi illusionem purum mendacium obtrusisset; ergo.

ARTICULUS II.

An corpus Christi terrenum fuerit, et ex Mariâ Virgine sumptum.

VALENTINUS inter varia absurdissima quæ finxit commenta, istud etiam protulit, teste Tertull. de Præscript. cap. 9: « Christum in substantiâ corporis nostri non fuisse, sed spirituale nescio quod corpus de cœlo deferentem, quasi aquam per fistulam, sic per Mariam Virginem transmeasse, nihil inde vel accipientem, vel mutuantem. » De Valentini figmentis legi possunt S. Irenæus lib. 1, cap. 1; Tertull. integro adversus Valentinianos libro; S. Epiphani. hæresi 31, et Theodoret. lib. 1 hæreticarum fabularum, cap. 7. Valentinianis accensendus est Apellas, à quo Apelliani. Is Marcionem, quem aliquando secutus fuerat, deseruit, docuitque Dominum « Christum neque in phantasmate « fuisse, sicut Marcion tradiderat, neque in « substantiâ veri corporis, ut Evangelium docet, sed eò quòd è superioribus partibus descendere, ipsodescensusidream sibi carnem

« et aeream contextuisse. Hunc in resurrectione « ne singulis quibusque elementis, quæ in descensu suo mutata fuissent, in ascensu redididisse, et sic dispersis quibusque corporis « sui partibus, in cœlo spiritum tantum rediisse. » Ita Apellem sensisse refert Tertull. De Præscript. cap. 51. Similem errorem Apollinari impingunt S. Greg. Nazianz. Orat. 46; et S. Ambr. lib. de Incarnat. cap. 6. Huic Apellianorum hæresi valdè affine fuit dogma Theopaschitarum, quos deinceps dicemus ex Eutychianis prodiisse.

CONCLUSIO. Christo fuit corpus terrenum ex Mariâ Virgine conceptum non sidereum vel è cœlo delapsum. Prob. ex Scripturis. Et 1º quidem ex testimoniis in quibus Christus ex hominibus originem traxisse asseritur. Gen. 22, v. 18, Deus promittens Abrahamo Christum ex ejus stirpe nasciturum: *Benedicentur, inquit, in semine tuo omnes gentes terræ*; quæ in Christo completa sunt juxta Apost. Galat. 3, v. 8. Matth. 1, et Luc. 3, Christi genealogia ex veteribus Patriarchis exhibetur, ut art. præcedente observavimus. Hebr. 2, v. 16, significatur Christum fuisse *semen Abraham*; et cap. 7, v. 14, eum esse ortum ex Judâ: *manifestum est, inquit Apostolus, quòd ex Judâ ortus sit Dominus noster*. Passim etiam Christus dicitur *filius David, fructus lumbi ejus, et ex semine ejus factus*. Vide Matth. 1, v. 1, Marc. 1, v. 1, Act. 3, v. 3, Rom. 1, v. 3, etc.

2º Ex testimoniis in quibus Christus dicitur secundum carnem ex B. Virgine factus, conceptus, natus. Isaïa 7, v. 14: *Ecce Virgo concipiet et pariet filium, et vocabitur nomen ejus Emmanuel*; quod oraculum ad Christi ortum pertinere et res ipsa ostendit, et testatur S. Matthæus cap. 1, v. 22 et 23. Idem S. Matth. ibid. v. 16, Christum ex B. Virgine natum esse his verbis declarat: *Jacob autem genuit Joseph virum Mariæ, de quâ natus est Jesus, qui vocatur Christus*. Et v. 20, narrat Josephum virum Mariæ sic ab Angelo compellatum fuisse: *Noli timere accipere Mariam conjugem tuam; quod enim in eâ natum est, de Spiritu sancto est: pariet autem filium, et vocabis nomen ejus Jesum*. Et v. 25: *Peperit (Maria) filium suum primogenitum, et vocavit nomen ejus Jesum*, ait Evangelista. Luc. 1, v. 31, Gabriel Archangelus mysterium Incarnationis Beatæ Virgini annuntians: *Ecce, inquit, concipies in utero, et paries filium, et vocabis nomen ejus Jesum.... Quod nascetur ex te sanctum, vocabitur Filius Dei*. Gal. 4, v. 4: *Misit Deus Filium suum, factum ex muliere,*

Animadvertite in ipso textu particulam *ex*, quam Tertull. lib. de Carne Christi cap. 20, et S. Athanas. in Epist. ad Epictetum apud S. Epiphan. hæresi 77, n. 7, adversus Valentinianos validè premunt. Enimverò, si Christus *factus* sit *ex muliere*; ergo falsum est eum per Virginem duntaxat transiisse, et nihil ex eâ sumpsisse.

3° Ex testimoniis in quibus Beata Maria dicitur mater Christi. Matth. 1, v. 18: *Cum esset desponsata mater ejus Maria Joseph*; cap. 2, v. 11: *Invenerunt puerum (Jesum) cum Mariâ matre ejus*. Et v. 13, 14: *Ecce Angelus Domini apparuit in somnis Joseph, dicens: Surge, et accipe puerum et matrem ejus... Qui consurgens, accepit puerum et matrem ejus*. Eadem verba repetuntur v. 20 et 21. Luc. 1, v. 42 et 43: *Exclamavit voce magnâ (Elizabeth), et dixit... Unde hoc mihi, ut veniat mater Domini mei ad me?* Joan. 2, v. 1: *Nuptiæ factæ sunt in Canâ Galilææ, et erat mater Jesu ibi*; et v. 3: *Deficiente vino, dicit mater Jesu ad eum*, etc. cap. 17, v. 25 et seq.: *Stabant, inquit S. Joannes, juxta crucem Jesu mater ejus, et soror matris ejus.... cum vidisset ergo Jesus matrem.... dicit matri suæ*, etc. Act. 1, v. 14: *Erant perseverantes unanimiter in oratione cum mulieribus et Mariâ matre ejus (Jesu)*. Accedit quòd Christus se passim *filium hominis* nuncupet, quæ appellatio idcirco tantum in eum quadrat, quòd sit Mariæ filius.

In probationem conclusionis innumera facile afferri possent Patrum et conciliorum testimonia; sed in negotio tam facili et obvio id supervacaneum habemus. Observabimus tantum in Symbolo Nicæno Jesum Christum dici *Incarnatum de Spiritu sancto ex Mariâ Virgine*.

Dices 1°: Angelus, Matth. 1, v. 20, ait Christum in Mariâ natum, non ait *ex Mariâ*: *Quod in eâ natum est*, inquit, *de Spiritu sancto est*. Atqui hæc loquendi ratio non obscure indicat in Mariæ sinu aliunde adductam fuisse Christi carnem, non ex eâ genitam; ergo.

Nego min.; ut enim observat Tertull. lib. de carne Christi; cap. 20, ideò Angelus dicit, *in eâ*, quia *in eâ erat, quod ex eâ erat*. Nimirum utraque particula suum in doctrinâ catholicâ verum habet intellectum. Verum est juxta fidem Christum in utero Virginis esse conceptum, et simul verum est hunc ibi esse conceptum ex eadem Virgine. Atque istud posterius, quod satis ex priori intelligitur, conceptis verbis exprimitur à S. Lucâ cap. 1, v. 3: *Quod nascetur ex te sanctum*, etc., et ab Apostolo, Gal. 4, v. 4, jam laudato: *Misit Deus Filium*

suum factum ex muliere. Nihil etiam expressius in rem nostram citato Isaïæ oraculo: *Ecce Virgo concipiet et pariet filium*, et dicto Angeli Luc. 1, v. 31: *Ecce concipies in utero et paries filium, et vocabis nomen ejus Jesum*; si enim Maria *concepit* Christum; ergo *ex eâ* Christus carnem habuit.

Dices 2°: Matth. 12, v. 48, Christus nullam agnoscit matrem, nullos fratres et cognatos: *Quæ est mater mea, inquit, et qui sunt fratres mei?* Joan. 2, v. 4, nihil sibi cum Mariâ commune fuisse declarat his verbis: *Quid mihi et tibi est, mulier?* Tandem, nunquam Christus legitur Mariam appellâsse matrem suam, sed nudè ac simpliciter mulierem; ergo.

Resp. ad singula. Ad 1, neg. ant. Dùm ait Christus, *Quæ est mater mea, et qui sunt fratres mei?* non significat nullam sibi esse cognationem secundum carnem, sed solummodò docet cognationem cum ipso spirituali, quæ in gratiâ sanctificante quâ filii Dei et fratres Christi efficimur, et in observatione mandatorum consistit, esse longè anteponendam cognationi illi quam secundum carnem Maria ipsa cum eo habuit. Monet igitur beatiorem esse Virginem Mariam quòd mente, quam quòd carne Christum tulisset. Quapropter statim *extendens manum in discipulos suos, dicit: Ecce mater mea et fratres mei. Quicumque enim fecerit voluntatem Patris mei, qui in cælis est, ipse meus frater, et soror, et mater est*. Vide Luc. 11, v. 27 et 28. Ad 2, dist. ant., nihil sibi cum Mariâ commune fuisse ratione divinitatis, quam patrando miraculum mox erat ostensurus, concedo; ratione naturæ humanæ, nego. Agitur eò loci de miraculo patrando, non de cognatione. Nec nos, inquit S. Aug. lib. de Fide et Symbolo cap. 4, n. 9, ad negandam Christi matrem cogit, quod ab eo dictum est: *Quid mihi et tibi*, etc., sed admonet potius ut intelligamus secundum Deum non eum habere matrem, ejus majestatis personam parabat ostendere, aquam in vinum (vertendo.)

Ad 3, nego conseq. 1° Quia Mariam esse matrem suam toties Christus non obscure declarat, quoties semetipsum appellat *filium hominis*; siquidem eatenus erat filius hominis, quatenus ex Mariâ conceptus et natus. 2° Quia in aliis multis Scripturæ locis jam allatis Maria dicitur Jesum concepisse et peperisse. 3° Quia S. Joannes, cap. 19, v. 25, et S. Lucas, Act. 1, v. 14, conceptis verbis Mariam appellant matrem Jesu. Observat S. Epiphan. hæresi 79,

Christum nomine matris suæ non eam designare ne fortè errandi occasionem aliquibus daret.

Dices 5º: S. Paulus 1 Cor. 15, v. 47, docet Christum esse hominem de cœlo cœlestem *Primus homo de terrâ, terrenus; secundus homo de cœlo, cœlestis*. Ergo Christo fuit corpus cœleste. Præterea pluribus in locis Christus dicitur descendisse de cœlo, Joan. 3, v. 13, cap. 6, v. 38, etc. Ad primum nego consequ. Christus secundum fidem nostram est cœlestis tum ratione personæ suæ divinæ, tum ratione modi quo corpus ejus virtute Spiritûs sancti sine viri consortio formatum est; tum denique ob dona cœlestia quibus Christus ut homo donatus est, ac vitam cœlestem quam duxit, et ad quam suos instituit et erudit; ergo ex eo quòd Apostolus eum cœlestem appellaverit, non sequitur ipsi fuisse corpus de cœlo delapsum. Loco allato S. Paulus opponit hominem cœlestem homini terreno seu terrena sapienti et cupienti; quapropter v. 49, Christianos hortatur ut, sicut *portaverunt imaginem terreni*, studeant portare et *imaginem cœlestis*, spiritualia scilicet et cœlestia cogitando ac sectando. Nihil igitur est in textu objecto, quod ad corpus ex cœlesti materiâ, ex elementis sidereis compactum attingat.

Ad 2, nego quoque consequ. In locis quæ obijciuntur, agitur de personâ divinâ Verbi, quod figuratè dicitur descendisse de cœlo, quia sui ipsius Incarnatione cœpit novo quodam modo esse in terris, nempe secundum humanitatem assumptam, sicque *semetipsum exinanivit*, ut Apostolus loquitur Philip. 2, v. 7, *formam servi accipiens*, id est sibi uniens personaliter naturam humanam quæ Deo omnimodè subjecta est, et à perfectione ac maiestate naturæ divinæ Verbi in infinitum distat. Vide S. Hilarium lib. 40 de Trinitate.

ARTICULUS III.

Utrum Christus habuerit animam et mentem humanam.

Arianis visum est animam Christo detrahendam. Docuere scilicet Verbum solam carnem assumpsisse, et in eâ, vice animæ extitisse. Ita refert S. Athanasius in utroque lib. contra Apollinarium T. 1, pag. 935 et 942, ubi eis exprobat, quòd ipsam divinitatem Verbi, quam suo modo admittebant, pro nobis passam esse dicerent. Illum Arianorum errorem commemorant quoque S. Epiphanius hæresi 69, n. 49 et 50; S. Aug. de Hæresibus, cap. 49; Theodoret. lib. 5 Hæret. fabul., cap. 11, etc. Maximo studio eandem hæresim propugnârunt

Apollinaristæ, à magistro suo Apollinari Laodiceo nuncupati, quam tamen subindè paululùm temperârunt, mentem ab animâ separantes, et illâ, tantum, non istâ, Christum spoliantes. Rem dilucidè exponit Socrates, lib. 2 Hist. cap. 46: « Initio quidem, inquit, dicebant (Apollinaristæ) hominem absque animâ à Deo Verbo assumptum esse in dispensatione Incarnationis. Postea verò tanquàm pœnitentiâ ducti, ac pristinum emendantes errorem, adjecerunt animam quidem assumptam esse, sed quæ mentem non haberet; Deum autem Verbum loco mentis esse in homine assumpto. » Lege et Athanas., lib. 1 contra Apollinar. T. 1, pag. 925; S. Epiphanius, hæresi 77; S. Aug. de Hæresibus cap. 44; Theodoret. Hæretic. fabul. lib. 4, cap. 8. Tradunt insuper SS. Athanasius et Epiphanius locis modò citatis Apollinaristas aliquando dixisse Christi carnem esse increatam et divinitati consubstantialem. Quod incarnationem penitus labefactat et ad Eutychianismum deinde expendendum recidit.

CONCLUSIO. Christus verè habuit animam et mentem humanam. Probat 1º ex Scripturis duplici argumento: Primum petitur ex iis locis in quibus Christus dicitur *homo, filius hominis*, etc. Ea loca innumera sunt tum in veteri, tum maximè in novo Testamento. Planum autem est quòd Christus non potuisset toties homo appellari, nisi naturâ humanâ fuisset præditus, seu nisi animam rationalem, hoc est, animam cum mente, simul et corpus assumpsisset. Enimverò si animam distrahas à carne, quid manebit, nisi merum corpus organisatum, quod homo appellari non poterit? Si verò eam spectes sine mente, quid erit? anima nimirum irrationalis, anima solum sentiens, seu nonnisi sensationum capax. Ejusmodi anima bruti est, non hominis. Homo mente et corpore essentialiter constituitur. *Non est homo perfectus*, ait S. Aug., Epist. 187, aliàs 57, ad Dardanum, n. 4, *si vel anima carni, vel animæ ipsi mens humana defuerit*. Secundum petitur ex iis locis, in quibus Christo ut homini tum anima, tum intellectus et voluntas, ac proinde mens, adscribuntur, et ipsi quidem tribuitur anima. Joan. 10, v. 15: *Animam meam pono pro ovibus meis*. Et v. 17: *Ego pono animam meam, ut iterum sumam eam*. *Nemo tollit eam à me; sed ego pono eam à me ipso et potestatem habeo ponendi eam, et potestatem habeo iterum sumendi eam*. Matth. 26, v. 38: *Tristis est anima mea usque ad mortem*. Ex quibus

et similibus sic arguere est : Anima illa, quam Christus pro ovibus suis posuit, quam spontè et libenter dimisit, quam iterum sumpsit, quæ pridè passionis usque ad mortem tristic fuit, vel est anima humana, vel ipsa Verbi divinitas; atqui absurdum est hanc animam de divinitate accipi, à quâ Christus nunquàm separatus fuit, et in quam cadere tristitia non potest; ergo. Adde eosdem animæ affectus qui nobis adhærescunt, pavorem scilicet, tedium, tristitiam, etc., detractis imperfectionibus quas in nobis secum important, Christo in sacris paginis adjudicari. Matth. 26, v. 38 : *Tristis est anima mea usque ad mortem.* Marc. 14, v. 33 : *Cœpit pavere et tædere,* etc. Si affectus vel sunt animæ humanæ in Christo, vel ejus divinitatis; atqui in ipsam divinitatem cadere non nisi impiè et insulsè judicarentur; ergo sunt animæ humanæ, proindeque anima humana Christo tribuitur in Scripturis. Ipsi attribuuntur pariter intellectus humanus et voluntas; 1º intellectus humanus : Isaï. 41, v. 2 : *Requiescet super eum Spiritus Domini, spiritus sapientiæ et intellectus, spiritus consilii et fortitudinis, spiritus scientiæ et pietatis,* etc. Luc. 2, v. 52 : *Proficiebat ætate et sapientiâ.* Coloss. 2, v. 3 : *In quo sunt omnes thesauri sapientiæ et scientiæ Dei absconditi.* Quæ dona nemo non videt ad intelligendi vim attingere, Christique humanitatem; non divinitatem spectare; ergo ostendunt intellectum humanum inesse Christo; ac proinde intellectus humanus Christo adscribitur in Scripturis. 2º Adscribitur pariter humana voluntas. Luc 22, v. 15 : *Desiderio desideravi hoc pascha manducare vobiscum.* Illud desiderium fuit Christi ut hominis; ac consequenter ejus voluntatis humanæ certum est argumentum. Ibid. v. 42 : *Non mea voluntas, sed tua fiat.* Hic Christo assignatur voluntas distincta à voluntate Patris æterni; atqui voluntas ejusmodi non potest alia esse in Christo quàm voluntas humana; siquidem voluntas ejus divina, seu quæ ipsi ut Deo Verbo competit, una et eadem est ac voluntas Patris; quippe tribus personis SS. Trinitatis unica est voluntas summè perfecta. Idem argumentum erui potest ex isto Joan. 6, v. 38, testimonio : *Descendi de cælo, non ut faciam voluntatem meam, sed voluntatem ejus qui misit me.* Vide infra quæ adversus Monothelitas afferentur.

Prob. 2º ex conciliis. Concilium Constantinop. I, quod est secundum generale, in Epist. synodicâ ad Damasum Sum. Pontif. profitetur se « nec animæ aut mentis expertem, nec im-

« perfectam carnis œconomiam admittere, verum nosse se perfectum ante secula Dei « Verbum; et perfectum hominem in novissimis diebus propter nostram salutem fuisse. » Synodus Romana contra Macedonianos et Apollinaristas congregata, eos anathemate percutit qui dixerint Verbum assumptæ carni esse loco animæ rationalis. Adjici possent plurima alia conciliorum decreta, ac præsertim Chalcedonensis generalis IV, et II Constantinop. generalis VI, in quibus fides catholica de naturâ Christi humanâ integrâ et suis facultatibus ac perfectionibus omnibus præditâ, clarissimè explicata et determinata fuit.

Prob. 3º ex Symbolis fidei. Cùm in Symbolo Nicæno dicitur Filium Dei *hominem factum esse*, perspicuè et sine ambiguitate significatur eum assumpsisse naturam humanam, ac proinde mentem et corpus. Symbolum quod sub nomine S. Athanasii circumfertur, idem fidei caput ipsâ hominis adductâ definitione magis adhuc evolvit et explicat : « Perfectus Deus (Christus), « inquit, perfectus homo; ex animâ rationali « et humanâ carne subsistens. »

Prob. 4º auctoritate et testimonio SS. Patrum qui ante Appollinarium vixerunt (nam de aliis nulla potest esse controversia), videlicet. S. Justini Apol. 1, aliàs 2, quæ est ad senatum, in fine; Tertulliani lib. de Carne Christi, cap. 10, et lib. de Resurrectione carnis; cap. 54; Origenis, lib. 6 contra Celsum, etc.

Prob. 5º rationibus theologicis. Prima desumitur ex passione Christi. Si Christus animâ caruerit, ergo dolores non tulit; vel ipsa ejus divinitas est passa; caro enim ipsa à spiritu sejuncta nullum potest doloris sensum recipere; atqui ex fide constat et Christum esse passum, et divinitatem ejus nullis posse doloribus affici; ergo Christus animam habuit. Jam porro si animâ fuerit instructus; ergo et mente, seu anima ejus fuerit rationalis necesse est. Quid enim absurdius, quàm animam irrationalem, animam sine mente; animam sentientem tantum, quæ belluæ esse possit, fuisse assumptam à Verbo? Numquid hanc insulsam et indecentem Incarnationis Dominicæ ideam Scripturæ et traditio exhibent! Secunda ratio petitur ex orationibus Christi; ex ejus sacerdotio, mediatione, etc. Nam functiones Redemptoris, Mediatoris, Sacerdotis, postulârunt ut Christus offerret Patri sanguinis sui pretium, ut seipsum in victimam vellet immolari, ut preces ad Patrem funderet, ut obsequii erga Deum; et voluntariæ sui demissionis actus exerceret; et hæc omnia reverà

Christus præstitit ex Scripturis. Atqui ejusmodi officia non potuerunt impleri à Christo ut Deo, nec illos actus elicere potuit illius divinitas; ergo per humanitatem suam hæc munera obiit, et illas actiones edidit Christus. Jam verò quis non videt ad ista peragenda, nec corpus sine animâ, nec animam sine mente satis fuisse, sed animam rationalem prorsus fuisse necessariam? ergo. Tertia desumitur ex Christi morte et ad inferos descensu. *Et inclinato capite*, inquit S. Joannes, cap. 19, v. 30, *tradidit* (Jesus) *spiritum*. In eo igitur Christi mors fuit posita, quòd ejus spiritus à corpore avulsus et separatus fuerit. Ille autem spiritus non fuit Verbum ipsum vices animæ gerens; nam, ut aliquando dicemus, unio humanitatis cum divinitate in Christo triduo mortis ejus interrupta non fuit. Ergo mors Christi ut et aliorum hominum, in animæ ejus à corpore secessu constitit. Anima autem Christi post ejus à corpore separationem, juxta Scripturas (1 Petri 3, v. 19, etc.) ad inferos descendit, ibique detentas animas sanctorum liberavit; quod opus animæ sentienti et mentis experti insanè attribueretur. Ergo.

CAPUT II.

An sit unica in Christo persona, nempe persona Verbi.

Humanam Christi naturam unâ Verbi divini personâ terminari et subsistere inficiati sunt, 1^o quotquot ex veteribus hæreticis Christum esse purum hominem ausi sunt asserere. Quæ impietas fuit Cerinthi, adversus quem, auctore S. Hier. lib. de scriptoribus eccles. Joannes ab Asiæ episcopis rogatus suum conscripsit Evangelium, quod à Verbi et Christi divinitate orditur; Ebionis, à quo Ebionitæ; Nazarenorum seu Nazaræorum; Carpocratis Gnosticonum parentis; Theodoti, Artemonis, Pauli Samosatani in duobus conciliis ann. 257 et 260 Antiochiæ damnati, Photini, etc.; de quibus consule Petavium lib. 1 de incarnatione. Iis adjungendi sunt Sociniani, qui censent Filium Dei non extitisse priusquam de Mariâ nasceretur, docentque (etiam posito SS. Trinitatis mysterio quod negant), repugnare penitus naturam humanam in personæ unitatem Verbo divino copulari. 2^o Nestorius, qui etsi diceret Christum non esse hominem purum, hypostaticam tamen in Christo naturæ humanæ cum Verbo divino unionem quinto sæculo impetivit. Verum, cum de erroribus ipsi adscribendis, necnon de eorum condemnatione, de-

fensoribus et impugnatoribus lites moveantur, operæ pretium erit de ipsâ Nestorii hæresi prius disserere, quàm catholicum dogma Nestorianismo oppositum asseramus. Impiam aliorum hæreticorum Christum esse purum hominem statuentium doctrinam hic specialiter non refellemus; tum quia plerorumque error ex negatâ ab iisdem Verbi divinitate manat, quam, ut jam dictum est, in tractatu de Trinitate assertam ponimus; tum quia eadem argumenta quibus errores Nestorii convelluntur, à fortiori illorum hæresim confodiunt. Istud igitur caput in duos distribuatur articulos.

ARTICULUS PRIMUS.

De hæresi Nestorianâ.

Nestorius monasticam vitam primùm professus in monasterio sancti Euprepîi propè Antiochiam, deinde in clerum Antiochenum cooptatus et factus presbyter, tandem ob sanctimoniam et eloquentiam famam anno 428, mense Febuario, Coelestino I Rom. pontifice, et Theodosio juniore imperante, in episcopum Constantinopolitanum consecratus, dum acerrimè impugnat hæreticos, nefandæ ipse hæreseos sectator et princeps effectus est. Summa ejus erroris fuit, Mariam Virginem appellandam non esse Θετόκον seu Deiparam, quia homo quem illa genuit, scilicet Christus, ejusdem tantum generis unionem ac cæteri sancti, Deo Verbo conjunctus fuit, licet modo præcellentiori, et à primò conceptu, et inseparabiliter. Uno verbo, hypostaticam unionem humanitatis Christi cum Deo Verbo è medio sustulit, solamque admisit conjunctionem moralem, ex quâ consequens erat duas in Christo propriè personas agnoscendas, nempe personam Verbi et personam hominis. Hanc fuisse Nestorii doctrinam mox evincendum erit. Eam hauserat ille ex scriptis Diodori, Tarsensis episcopi, et præsertim Theodori Mopsuesteni, quem ad sedem Constantinopolitanam properans etiam inviserat.

Dogma verò ejusmodi, ubi primùm Clero et populo Constantinopolitano seu ab Anastasio presbytero, seu à Dorotheo episcopo, Nestorii familiaribus, etc., tum ab ipso Nestorio fuit obtrusum, novitate suâ vehementer animos perturbavit, strenuosque Constantinopoli et alibi oppugnatores expertum est. Nihilò secius tamen erroris sui disseminandi cupidus novator, quas eâ de re Constantinopoli pronuntiaverat hominibus toto Occidente et Oriente divulgari curavit, easque deinceps unâ cum litteris et

tribus tractatibus, ad Cœlestinum rom. pontificem misit. Interim S. Cyrillus, patriarcha Alexandrinus in epistolâ quâdam ad monachos directâ errorem, tacito auctoris nomine, confutârat, duasque ad ipsum Nestorium dederat epistolas, quarum secunda accuratissimam catholici dogmatis continebat expositionem. Utrâque nitebatur ad meliores fruges leniter hominem reducere, sed irritò conatu. Quapropter, cum hunc accepisset Cœlestino scripsisse, ad eundem pontificem maximum litteras Possidonio diacono dedit deferendas, quibus eum totius hujus negotii certiore fecit, misitque simul plura Nestorii scripta, tum epistolas à se ad illum datas, et responsa quæ ab eodem acceperat. Cœlestinus, coactâ Romæ synodo, post diligentem rei discussionem, Nestorium damnavit, vicesque suas Cyrillo litteris ad eum datis die 11 Augusti anno 430 committens, novatorem jussit, (nisi intra decem à monitione dies impia dicta revocaret,) omni christiani nominis communione interdici, et episcopali sede indignum declarari. Mandatum pontificis executus est Cyrillus. Ejus sententiam Nestorio denuntiavit epistolâ in concilio episcoporum Ægypti eam ob causam Alexandriæ congregato exaratâ; quâ ipsi fidem de Incarnatione tenendam assignabat, duodecimque anathematis subscrībendos proponebat. Nestorius acceptis his litteris, sententiæ adeò non paruit, ut anathematismis seu capitulis Cyrilli totidem alios contrarios opposuerit. Nihil intentatum reliquit ut omnibus suaderet ejusmodi Cyrilli capitula erroribus Apollinariis esse referta; atque reipsâ Joanni Antiocheno patriarchæ, et Theodoro episcopo Cyri, jamdudum sibi conjunctissimis, necnon pluribus aliis orientalibus episcopis hanc persuasionem induxit. Insuper Theodosii imperatoris animum tum illâ accusatione, tum aliis artibus, in sanctum Cyrillum maximè exacerbavit. Postremò rogavit ut synodus œcumenica, quæ litem decideret, imperatoris jussu congregaretur; quod à Basilio abbate et monachis in postulatione adversus Nestorium jam petitum fuerat, quodque à S. Cyrillo expostulatum fuisse Theophanes et Nicephorus scribunt.

Res igitur ad concilium totius Ecclesiæ deducta est. Hoc fuit generale tertium. Theodosius, litteris XIII, kal. Decembris an. 430 datis, illud Ephesi celebrandum ad diem Pentecostes anni sequentis indixit, qui dies illo anno 431 incidit in 7 Junii; quamvis non ante diem ejusdem mensis 22 cœptum illud fuerit. Se-

ptem actionibus fuit absolutum. In primâ post accuratam causæ discussionem, adversus Nestorium qui secundum canonum præscripta vocatus venire renuerat, sententiam depositionis Patres universi, numero circiter ducenti unanimiter protulerunt; quibus etiam consensere paulò post plures alii episcopi, qui etsi tunc Ephesi adessent, huic tamen actioni interesse noluerant. Gestis ejusdem actionis, post eorum recognitionem, legati tres apostolicæ Sedis ac totius Occidentis Arcadius et Projectus episcopi, ac Philippus presbyter, qui nonnisi die 10 Julii Ephesum appellere potuerant, actione tertiâ subscripserunt.

Jam antea cœperat schisma in gratiam Nestorii à Joanne Antiocheno creatum. Is die Junii 27 vel 28, post amici sui depositionem quintâ, suis stipatus episcopis advenerat; qui se ad tanti momenti negotium non expectatum ægrè ferens, ipso adventûs sui die confestim episcopos secum adductos, et alios quosdam Nestorio adhærentes in synodum convocat, et in ejusmodi synodo triginta tantum, vel ad summum quadraginta tribus episcopis constante, S. Cyrillum, et Memnonem episcopum Ephesinum, ne citatos quidem, deponere aggreditur, et concilii Ephesini rescindere sententiam. Deinde, adjuvante comite Candidiano quem pacis tutelæ causâ ad synodum Theodosius miserat, Joannes et alii fautores Nestorii, falsis rerum Ephesi gestarum narrationibus variisque artibus animum imperatoris præoccupant, ac per aliquod tempus sacræ synodo minùs æquum reddunt. Eò res deducta est, ut Theodosius utriusque partis legatos ad se Chalcedonem accersere coactus fuerit; quos cum audivisset, compertâ tandem veritate, decreta concilii summâ veneratione suscepit; Joannem Antiochenum cum Cyrillo in concordiam redire curavit, quæ pax anno 433 est inita; ac Nestorium, qui in monasterium suum jam amandatus, errores suos variis colloquiis et epistolis spargere, Ecclesiasque turbare pertinaciter pergebat, monente ipso Joanne Antiocheno Oasis Ægypti oppidum in exilium anno 434 relegavit; ubi infelix hæresiarcha miserè obiit, vermibus, si Evagrius fides, linguam ejus depascentibus.

His delibatis et historicè præmissis, ut dicendis major lux affulgeret, quorum accuratam narrationem legere est præsertim apud Petavium lib. 4 de Incar. cap. 7, 8 et 9, et Tillémontium in S. Cyrillo, tom. 14 Hist. eccl. nunc de triplici quæstione disserendum. Prima est, utrum Nestorius eum tenuerit errorem, pro-

pter quem damnatus est. Altera, an canonicè fuerit in concilio Ephesino damnatus; ubi structæ à quibusdam hæreticis in sacram synodum et S. Cyrillum calumniæ diluentur. Tertia, num Joannes Antiochenus, dùm favit Nestorio, ejus erroribus imbutus fuerit.

§ 1. *Utrum Nestorius eum tenuerit errorem propter quem damnatus est.*

Nonnulli apud Calvinianos extitère, qui etsi unicam in Christo personam agnoscerent, odio tamen in concilia et SS. Patres, quod non dissimulabant, impulsì, Nestorium ut virum orthodoxum et ab omni errore immunem exhibuerunt, Cyrillumque et Patres Ephesinos ut hæreticos Eutychis antecessores, et Nestorii improbos vexatores traduxerunt. Primus eò temeritatis devenisse fertur Ægidius Gaillard vir nobilis è Provinciâ oriundus, qui ab Ecclesiâ catholicâ ad partes Calvini defecerat. Hunc secutus est David à Rodone pseudo-minister Nemausensis et philosophiæ professor, in singulari libro quem inscripsit de Supposito, quemque tacito suo nomine anno 1645 Francofurti edidit. Nestorii quoque patrocinium suscipiunt, et simul tamen in Nestorianismum anathema contorquent Albertinus in suo de Eucharistiâ opere, Saurinus in Apologiâ suâ, et in Examine theologiæ Jurisæ, etc. Non prætermisit Baylius in Dictionario hanc adversus concilia, Ecclesiam et Patres blaterandi occasionem. Verbo *Nestorius*, notâ A, totam S. Cyrillum inter et Nestorium controversiam exhibet ut meram nominis quæestionem, in quâ non de re ipsâ, sed de modis aliquibus loquendi retinendis aut proscribendis obfirmatiùs disputatum fuisse pronuntiat.

Richardo Simoni, viro alioqui catholico et doctissimo, sed in seligendis opinionibus quandoque incautiori, illud in libro de fide Ecclesiarum orientalium, cap. 7, pag. 96, temerè excidit, Nestorii sententiam remotis consecrariis quæ ex eâ S. Cyrillus eruebat, esse simpliciore et minoribus difficultatibus implicitam. Plura etiam de eodem Nestorio, de S. Cyrillo et de synodo Ephesinâ imprudentiùs scripserat Ludovicus Ellies du Pin, tom. 3 Biblioth. auctorum ecclesiastic. part. 2, quæ retractatione expunxit.

CONCLUSIO. Duplicem in Christo personam admisit Nestorius. Probatur 1^o quatuor argumentis, ex pluribus ejus scriptis, quæ supersunt, depromptis. Primum argumentum ea testimonia suppeditant in quibus Nestorius

illud apertè inculcat principium, quo dogma duplicis in Christo personæ continetur. Hoc enim dogma principio isto includitur, Incarnationem in merâ unionem morali naturæ humanæ, seu hominis assumpti, cum Verbo consistere, id est in affectu, in concordia, in prædestinatione quâdam eximiâ, in largitione donorum, etc., quæ unio cum Deo cunctis competit sanctis aliquo in gradu. Atqui istud principium docuit sæpissimè Nestorius. Sermone 1, n. 6 et seq., Mariam non esse Deiparam probare aggressus, hoc potissimùm argumento nititur, totam Incarnationis rationem in eo duntaxat constitui, quòd homo sit *Deitatis instrumentum*, quòd Verbum in illo homine *habitet* ut in templo, quòdque homo assumptus, ratione honoris, dignitatis et reverentiæ ipsi exhibendæ unus sit cum Verbo divino. Maximè verò advertendum, quâ ratione explicet unam et parem homini assumpto ac Verbo Deo reverentiam deberi. Scilicet, non eam rationem adhibet quam fides amplectitur, nempe Christum hominem esse ipsam Verbi Dei personam prout humanitatem sibi hypostaticè conjunctam habet; sed istud tantùm premit, hominem qui assumptus est, *Divinitatis verè inseparabilis esse simulacrum, et imaginem absconditi judicis*. Voluit ergo Nestorius Incarnationem triplici hominis assumpti ad Deum Verbum relatione seu habitudine constitui, nempe instrumenti, templi et imaginis, atque eatenus unam esse hominis assumpti et Verbi dignitatem, unumque honorem, quatenus homo assumptus, cum sit ratione donorum imago Verbi, propter Verbi dignitatem colitur; quemadmodum imagines coluntur propter unam personæ, quam representant, dignitatem. Atqui tres illi respectus et alii similes, meram cum Deo Verbo unionem moralem sonant, qualem reperire est in cæteris sanctis et piis. Sunt enim justi divinitatis instrumentum, cum voluntati divinæ pareant, eaque exequantur quibus Dei providentiâ destinantur. Sunt templa Dei, quippe in quibus Deus colitur, et infusione virtutum inhabitat. *Si quis diligit me*, inquit Christus Joan. 14, v. 23, *sermonem meum servabit, et Pater meus diliget eum, et ad eum veniemus, et mansionem apud eum faciemus*. Et Apostolus 1 Cor. 3, v. 16: *Nescitis quia templum Dei estis*, etc. Postremo sunt imagines Dei, siquidem Deum, ad cujus imaginem conditi sumus, sic charitate imitantur, ut non solum ipsum, ait S. Leo serm. 1 de jejuniis decimi mensis, cap. 1, *sed etiam quidquid diligit, diligant*. Ergo in his statuit Nesto-

rius Incarnationem consistere, quæ solùm unionem moralem sonant, qualis est sanctorum cum Deo; hoc tantùm adhibito discrimine, quòd illam unionem excellentiorem senserit esse in Christo quàm in cæteris sanctis. Hæc Nestorius sermone illo primo, *in quo* inquit Marius Mercator Præfat. ad sermones Nestorii, *de Incarnatione dominicâ malè lapsus infelicitè corruit.* Sermone 2, suam de Incarnationis dogmate, seu Θεωπωσίας doctrinam studiosè exponens : « Dic de assumente, inquit, quòd « Deus sit; adjice de assumpto, quòd servi « forma; infer postea conjunctionis dignitatem, « quòd communis sit duorum auctoritas, quòd « eadem sit duorum dignitas; manentibusque « naturis, confitere unitatem, » scilicet *dignitatis*, ut habetur in græco, τὴν τῆς ἀξίας ἐνότητά. Hic iterùm Nestorius Incarnationem reponit in communi Verbi et hominis assumpti dignitate, seu *unitate dignitatis*, quæ unionem merè moralem sonat. Serm. 5, qui adversùs Proclum secundus est, n. 5 et 6, hæc profert quæ controversiæ finiendæ sufficere deberent : « Beata « Virgo etsi pepererit hominem simul cum « illo pertranseunte Deo Verbo, non ideò est « Dei genitrix. Non enim Verbi dignitas (ut « habetur in græco) à beatâ Virgine est, sed « erat naturâ Deus. De beato Joanne Baptista « prædicatur à sanctis Angelis, implendum « esse infantem Spiritu sancto, adhuc ex utero « Matris suæ; atque ita beatus Joannes Spiritum sanctum habens editus est. Quid igitur? « Appellabisne ipsam Elizabeth Spiritus genitricem? » Audis ex Nestorio unionem hominis assumpti cum Verbo, ei esse similem quæ fuit Joannis Baptistæ cum Spiritu sancto; atqui unio Joannis Baptistæ cum Spiritu sancto moralis tantùm fuit, nemine diffitente, in eo scilicet posita quòd Spiritus sanctus per charitatem et donorum diffusionem habitaret in Joanne, quòd voluntas Joannis Spiritui sancto esset subjecta, ejusque voluntati conformis, etc. Ergo, etc. In primo ex anathematismis quos S. Cyrillo opposuit Nestorius, negat Emmanuelem esse Deum Verbum, sed eum definit esse nobiscum Deum, hoc est, inhabitasse eam, quæ secundum nos est, naturam, per id quod unitus est massæ nostræ, etc. Quæ ab eo dicta sunt, ut Incarnationem solâ inhabitatione Dei in homine constitui exprimeret.

Ab afferendis similibus aliis testimoniis, quæ multa sunt, supersedemus. Confidenter verò asserimus, quotiescumque Nestorius exponit unionis, de quâ agimus, naturam, toties hanc

ab eo significari factam, vel secundum operationem, quòd scilicet homo sit instrumentum Verbi, vel secundum inhabitationem, vel secundum participationem honoris et dignitatis, et aliis ejusmodi rationibus nihil ad unionem hypostaticam attinentibus. Ergo Nestorius illud principium docuit, quo hæresis duplicis in Christo personæ continetur.

Eòdem pertinet similitudo celebris quâ utebatur Theodorus Mopsuestenus, et quæ refertur in quintâ synodo can. 12, « talem nimirum « factam esse unionem Dei Verbi ad Christum, qualem dicit Apostolus de viro et muliere : *Erunt duo in carne unâ.* » Sicut ergo vir et mulier, etsi verè et propriè duas personas constituent, dicuntur tamen propter vinculum matrimonii *una caro* et unius dignitatis; ita et secundum Nestorianos Filius Dei et filius hominis dicuntur unus Christus propter spirituales conjunctionem, tametsi duæ sint realiter personæ. Huic Incarnationis explicandæ modo S. Cyrillus quartum opponit anathematismum.

Secundum argumentum petitur ex iis locis, in quibus duas in Christo personas verè distinguit Nestorius. Serm. 1, jam laudato, n. 10 : « Intende, inquit, in hæc quæ dicuntur. Non « per seipsum Deus est, qui in utero figuratus « est; nam si sic esset, essemus hominis verè « cultores; sed quoniam in assumpto Deus est, « ex illo qui assumpsit, qui assumptus est appellatus est et appellatur Deus. » Hic duas in Christo personas significari apertum est, nempe eum qui in utero figuratus est, qui assumptus est, quem dicit Nestorius non esse per se Deum, ac proinde non esse personam divinam, sed humanam, et illum qui assumpsit, nempe Deum Verbum, à quo habet homo assumptus, seu persona assumpta, ut Deus appellatur, ob unionem moralem de quâ modò diximus. Serm. 3, n. 6 : « Verbum ergo Deus, « inquit, non est natus ex Mariâ, sed in illo, « qui ex eâ natus est, mansit... Aliud est autem « dicere : Cum illo qui natus est, manet; et « aliud, illum qui cum nato manet, hunc esse « cui, ut nasceretur, mensium opus fuisset « curriculo. » En iterùm persona duplex in Christo clarissimè distincta, Verbum scilicet, et ille qui natus est ex Virgine et qui non est Verbum, sed cum quo Verbum mansit. Sermo 7, n. 22 : « Numquid ego duplicem Christum « solus appello? Nonne semetipsum et templum solubile, et Dominum nuncupat suscitantem? Si autem Deus erat, qui solvebatur

• (quæ in caput Arii blasphemia convertatur);
 « dixisset Dominus : *Solvite Deum istum, et in
 « triduo suscitabitur.* Si Deus mortificatus est
 « in sepulcro, mentitur Christus qui dixit :
 « *Quid me quæritis occidere hominem qui vera
 « locutus sum vobis?* » Itaque juxta Nestorium
 duplex est Christus, quia homo qui suscitatus
 est, non est persona Verbi.

Ibid. n. 38 : « Quoniam in assumpto Deus,
 « ex assumente; qui assumptus est, tanquam
 « assumenti conjunctus appellatur Deus... Ideo
 « et judex venturus est iste qui visui patuit,
 « quoniam omnipotenti conjungitur deitati. »
 Ibi Nestorius distinguit Deum qui assumpsit,
 ab eo qui assumptus est; atqui ille qui assum-
 ptus est reverà est persona humana juxta Ne-
 storium. Nam si nomine illius qui assumptus
 est, intelligeret naturam humanam sine subsi-
 stentiâ, et, ut aiunt, in abstracto, profectò
 non diceret hanc eo quòd Deo conjuncta sit,
 Deum appellari, et esse judicem venturum.
 Similia passim apud Nestorium occurrunt, ut
 patet ex ejus testimoniis hactenus relatis et
 mox referendis, ex quibus proinde idem ra-
 tiocinium colligi potest. Serm. 8. n. 3, in fine,
 conceptis verbis duplicem in Christo filium
 confitetur : « Separa naturam, inquit, sed uni-
 « tionem conjunge; filium Dei Christum con-
 « fiteri, **SED FILIUM DUPLICEM**, hominem et
 « Deum, ut passio quidem humanæ deputetur
 « naturæ, passionis verò absolutio, quæ in
 « homine, qui passus est, facta est, solius sit
 « Divinitatis. » Fatendum est Nestorium à voce
duplicis filii, duplicis Christi, plerumque ab-
 stinuisse, imò illum loquendi modum non se-
 mel rejecisse; sine ullo tamen, ut dicemus,
 hæresis suæ præjudicio. Hic verò apertè men-
 tem suam exprimit; fatetur duos, quos reverà
 admittebat, filios, unum æternum et naturalem,
 alterum temporalem et adoptivum. Anathema-
 tismo 7 in S. Cyrillum : « Si quis, inquit, ho-
 « minem qui de Virgine creatus est, hunc esse
 « dixerit Unigenitum qui ex utero patris ante
 « luciferum natus est, et non magis propter
 « unionem ad eum qui est Unigenitus natu-
 « raliter Patris, Unigenitum eum appellationis
 « confiteatur participem factum.... anathema
 « sit. » Certè si, ut fides docet, unica sit in
 Christo persona, credendum est hominem in
 Christo seu personam quæ humanitatem habet,
 et ex Virgine secundum carnem nata est, ipsum
 esse Unigenitum, qui à Patre ante luciferum
 natus est. Duplex igitur persona apertè desi-
 gnatur, dum dicitur *hominem qui de Virgine*

creatus est non esse *Unigenitum* à Patre ante
 secula natum; istumque esse Unigenitum na-
 turâ, alterum appellationis Unigeniti participem
 factum propter unionem. In Confessione Ne-
 storianâ, quæ refertur actione 6 conc. Ephesini :
 « Neque duos filios, inquit, aut duos Domi-
 « nos dicimus, quandoquidem unus tantum
 « est per essentiam Filius, nempe Deus Verbum,
 « Filius Patris unigenitus, qui conjunctus hic,
 « et deitatis comparticeps, consors etiam est
 « appellationis et honoris Filii, etc. » Adverte
 quâ arte Nestoriani intacto suo dogmate, duos
 filios aut Dominos in Christo esse negent, quia,
 inquit, *unus tantum est per essentiam Filius,
 nempe Deus Verbum.* An verò ideò negant duas
 esse personas? Minimè. Imò alteram apertè
 confitentur, dum à Verbo *hunc* distinguunt qui
 propter conjunctionem appellatur filius. Cui,
 aiunt, **CONJUNCTUS HIC, et Deitatis compar-
 ticeps, consors etiam est appellationis et honoris
 filii.**

Ex multis aliis testimoniis, quæ afferri possent,
 unum duntaxat addam, in quo Nestorius expli-
 cavit quâ ratione intelligeret participem di-
 vinitatis factum esse eum qui assumptus est.
 « Quemadmodum, inquit serm. 2, et quater-
 « nione 27, dicimus Deum omnium opifi-
 « cem, et Deum Mosem,.... et Israel filium
 « Dei,.... et quemadmodum dicimus Christum
 « Saül,.... similiter et Cyrum,.... et Ba-
 « bylonicum sanctum,.... Ita dicimus Domi-
 « num et Christum, et Deum, et filium, et
 « sanctum; sed communio quidem nominum
 « similis est, dignitas verò non eadem est. »

Frustra reponeres Nestorium tria aliquando
 esse confessum, quibus dogma catholicum unius
 in Christo personæ significari solet; nempe
 1° Christum non esse purum hominem; 2° hunc
 in duos filios, in duos Christos non esse dividen-
 dum; 3° duas naturas in unâ personâ esse con-
 junctas. Nam quod ad primum attinet, fatemur
 quidem serm. 7, qui est quartus adversus Pro-
 clum, n. 23, Nestorium ita locutum esse : *Non
 nudus homo Christus, ò calumniator, sed homo
 simul et Deus.* Et serm. 12, n. 2 et seq., eum-
 dem vehementer invehi in Paulum Samosate-
 num; quòd is *Dominicam humanitatem nudam
 à Deitate deliret, et solam, præter Divinitatem,
 fabuletur hanc quæ semper conjuncta est atque
 connexa, etc.* At hæc proferre potuit Nestorius,
 quin à pravo suo de duplici in Christo personâ
 dogmate recederet. Enimverò ad eum ab hæ-
 resi absolvendum, non satis est ea catholicæ
 fidei exprimendæ esse idonea, quæ in utroque

textu allato protulit. Requiritur insuper ut solò sensu distinctioni duarum personarum opposito potuerint hæc ab illo proferri. Nemo quippe nescit quantà curâ hæretici verba Scripturæ et traditionis fidem vel maximè significantia, suis erroribus subtiliter accommodare soleant, ut nempe fucum faciendò, minorem, dogmatum suorum promulgatione, horrorem concitent, faciliùs incautos fallant, novitatis difficiliùs convincantur, controversias alant et in longum ducant, Scripturasque et SS. Patres sibi esse contrarios non cogantur confiteri. Quod quidem cùm sit omnibus hæreticis commune, in Nestorio præsertim et ejus discipulis concilia et Patres observaverunt. In his (libris tuis) à nobis investigatus, inquiebat S. Coelestinus ad eum scribens, *deprehensus et tentus es quòd multiloquiolas laberaris; dùm vera involvis obscuris; rursus utraque confundens, vel confiteris negata, vel niteris negare confessa*. Vide eam relationem concilii Ephesini ad imperatorem, tom. 3 concil. pag. 747, et præsertim synodum quintam generalem, collatione 8, in anathematibus contra Nestorianos; concil. tom. 5, pag. 570. Hujus rei exempla plurima ex Nestorii scriptis deprompta facilè colligi possent. Quædam passim referemus.

Itaque propositiones in speciem catholicæ à Nestorio prolatæ eum ab hæresi excusare non valent, nisi saltem excludant disertè errorem duplicis in Christo personæ, de quo ille accusabatur et quem sæpiùs clarè exprimit, ut vidimus. Atqui mox allata ejus verba; non satis hunc errorem excludunt; cùm enim Nestorianismus in eo positus sit, Christum constare et personâ Dei verbî, et personâ hominis assumpti, summo quòdam et perpetuo nexu morali conjunctis, planum est illius erroris auctorem et patronum, ut catholicas voces hæresi suæ adaptaret, potuisse, non mutatâ sententiâ asserere, 1^o Christum non esse purum hominem, sed esse Deum et hominem simul, id est, personam humanam personæ divinæ spiritualiter conjunctam; 2^o Christi humanitatem, utpote Divinitati, cujus est templum et instrumentum, morali nexu semper copulatam, *non esse nudam*, seu separatam à Divinitate. Atque reipsa non alius fuit in locis allatis sensus Nestorii, ut patet non modò ex iis quæ hactenùs in ipsum adduximus, sed vel ex lectione sermonum è quibus ea quæ solvimus excerpta sunt.

Nota obiter Nestorium à Paulo Samosateno, quem citato serm. 12 insectatur, in multis reverà discrepasse, etsi non in eo quod ad In-

carnationem præcipuè attinet. Errabat Samosatenus circa Verbi Divinitatem; aiebat Christum esse hominem purum, volebat hunc operibus suis, unionem suam cum Deo promeruisse. Nestorius contra de Trinitate orthodoxè sensit; Christum esse purum hominem nunquàm pronuntiavit, atque tandem docuit hominem qui è Mariâ natus est, vel à primo conceptu fuisse inseparabiliter unitum Verbo. At reverà sensit hunc hominem assumptum qui ex Virgine natus est, qui pro nobis passus est, personam esse à Verbo distinctam; seu Verbum non esse humanitati unitum *secundum substantiam καὶ ὑποστασιν*, sed duntaxat moraliter *secundum affectum, κατὰ σχεσιν*. Hunc errorem loco allato à se non eliminat Nestorius; quo tamen præcipua Samosatени hæresis de Incarnatione continetur.

Quod spectat alterum, nempe *indivisionem* Filii in Christo, fatemur etiam Nestorium dixisse serm. 2: « Christus, secundum quod est Christus, indivisus est, et Filius, secundum quod est Filius, indivisus est. Non enim habemus duos Christos, vel duos Filios; neque est apud nos primus Christus et secundus.... Sed idem ipse est duplex, non dignitate, sed naturâ; » et serm. 11, n. 2: « Filiationis unitatem servamus in Deitatis humanitatisque naturâ. » Et serm. 12, n. 3: « Unus Filius, ... unus Christus, et iste qui utitur, et id quo utitur: naturæ duplices, sed Filius singularis. » Verùm et ista potuit Nestorius, et quidem duplici sensu, dicere, quin suam hæresim desereret. Priòr sensus ille est quem ferè integro serm. 2 mox citato ac ipsis verbis ex eo allatis indigitat; Christus, inquit, *est duplex, non dignitate, sed naturâ*. Excludit igitur à Christo solam divisionem dignitatis. Atqui jam ostendimus hanc dignitatis indivisionem, seu unitatem, nihil aliud apud Nestorium sonare quàm unionem moralem in ratione instrumenti, templi, imaginis, simulacri Dei Verbi consistentem; ergo indivisio Christi et filiationis quam profitetur Nestorius, in conjunctione morali duplicis personæ tota sita est, proindeque, etc. Vide citatum sermonem 2. Illum sensum Nestorianis affingit synodus V generalis, collat. 8, anathem. 4.

Alter sensus est unicum à Nestorio dici in Christo Filium; quia unicus in eo Filius est ex utero Dei ab æterno genitus, unicum Verbum, cui homo conjunctus sit, filiationis quidem et honoris factus illâ conjunctione particeps, sed tamen non alter Filius Dei unigenitus. Hic sensus clarè exprimitur in professione fidei Nesto-

rianorum, quam Charisius presbyter synodo Ephesinæ obtulit, et cujus verba jam supra retulimus. Porro nemo non videt duos illos sensus valdè sibi affines, et Nestorianismo planè esse consentaneos. Ergo.

Denique quantum ad vocem *unius personæ*, non inficiabimur eam fuisse aliquoties à Nestorio adhibitam. Epist. 2 ad S. Cyrill. n. 2 : « In eo laudo, inquit, quòd distinctionem naturarum, secundum divinitatis et humanitatis rationem, harumque in unâ personâ conjunctionem prædicat. » Ibid. n. 1, ait « nomen hoc, Christus, utramque naturam, patibilem et impatibilem, in unicâ personâ denotare. » Epist. 2 ad Cœlestin. rom. pontif. ait « utramque naturam, per conjunctionem summam et inconfusam in unâ personâ Unigeniti adorari. » Quæ certè omnia sensum maximè catholicum præ se ferunt.

Atqui tamen ejus absolutioni illa non sufficiunt, dicendumque voce *personæ* Nestorium hic esse abusum, ut et post ipsum Nestoriani. Audiatur synodus V generalis, collat. 8, anathem. 4 : « Nestoriani, inquit, Deum Verbum et Filium et Christum vocantes, et hominem separatim Christum et Filium nominantes, et duas personas evidenter dicentes, per solam nominationem et honorem, et dignitatem, et adorationem, unam personam, unum Filium, et unum Christum contingunt dicere. Sed non confitentur unitatem Dei Verbi ad carnem animatam animâ rationabili et intellectuali, secundum compositionem, sive secundum subsistentiam (καθ' ὑπόστασιν) factam esse, sicut SS. Patres docuerunt. » Et anathem. 5 : « Si quis unam subsistentiam Domini nostri Jesu Christi sic intelligit, tantumquam suscipientem plurimarum subsistentiarum significationem, et per hoc introducere conatur in mysterio Christi duas subsistentias, seu duas personas, et duarum personarum quas introducit, unam personam dicit secundum dignitatem, et honorem, et adorationem, sicut Theodorus et Nestorius insipientes conscripserunt.... sed non confitetur Dei Verbum carni secundum subsistentiam (καθ' ὑπόστασιν) unitum esse, et propter hoc unam ejus subsistentiam seu unam personam,.... talis anathema sit. » Eò igitur, teste sacrâ synodo, devenerunt Nestorius et Nestoriani, ut voces quaslibet dogmati catholico exprimendo natas recipere quandoque viderentur, retento nihiloseciùs perverso suo de duabus in Christo personis dogmate, rejectâque duplicis

naturæ unitione secundum hypostasim. Quod quidem quàm verè à S. synodo traditum sit, facile est evincere. Nam 1º, ut jam ostendimus, et ex dicendis adhuc magis innotescet, etsi nomen duarum in Christo personarum non adhibuerit, rem tamen ipsam evidenter docuit Nestorius, easdemque personas propter unionem moralem hominis assumpti cum Verbo divino, voluit esse unius dignitatis, operationis, honoris et adorationis. Ergo cum simul duarum naturarum in unâ personâ conjunctionem exprimit, explicandus est de unitate dignitatis, operationis, honoris et adorationis, non de unitate καθ' ὑπόστασιν. 2º Eò libentiùs illa interpretatio admittenda, quòd vox *personæ* duplicem intellectum habeat, alium proprium et physicum, juxta quem est natura rationalis ultimò completa; alterum moralem et à legisperitis usurpatum, apud quos unam personam ii dicuntur constituere, qui etsi personæ sint physicè diversæ, communibus tamen juribus et separatim non exercendis potiuntur. Sic, v. g., vir et mulier dicuntur una persona, ut et una caro propter vinculum matrimonii. Cum igitur senserit Nestorius conjunctionem moralem, quæ hominem assumptum inter et verbum intercedit inseparabilem esse, et eâ effici ut homo assumptus instrumentum sit, imago, templum et indumentum Verbi, sicque propter unam Verbi dignitatem, cujus est particeps, honoretur et adoretur; cumque ad hujusce unionis naturam explicandam Theodorus Mopsuestenus ejus magister ipso unionis conjugum exemplo usus fuerit; nonne apertissimum est meritò quintam synodum censuisse quòd Nestorius et ejus discipuli *duas personas evidenter dixerunt, et per solam nominationem et honorem, et dignitatem, et adorationem, unam personam.... confinxerunt dicere; nunquàm confessi unitatem secundum subsistentiam?* 3º In ipsis epistolis ex quibus excerpuntur loca objecta, manifestè exprimit Nestorius dogma suum de duabus in Christo personis ratione honoris, dignitatis et cultûs solùm conjunctis. Habentur illæ tom. 5 concil., col. 521, et seq., et col. 551, et apud Marium Mercat. edit. Garnerii, part. 2, pag. 57, et part. 1, pag. 69.

Tertium argumentum ex eo colligitur, quòd Nestorius illam obfirmatè negaverit nominum attributorumque utriusque naturæ communionem, quæ nonnisi negatâ unitate personæ rejici potest. Nimirum, si humana natura Verbo divino unita sit in personæ unitatem, sequitur Christum esse ipsummet Verbum tum naturam

divinam, tum naturam humanam habens; si autem Christus sit Deus Verbum naturam humanam sibi personaliter unitam habens, manifestissimum est in Christo Deum esse hominem, et hominem esse Deum, id est, personam quæ habet naturam divinam, esse personam quæ habet et naturam humanam, et vice versâ; ac proinde, cum actiones sint personarum seu personis tribuantur, posse prædicari in concreto, ut aiunt, de Deo Verbo, quæcumque ipsi secundum carnem contigerunt, nempe quod natum sit, passum, mortuum; et vicissim de homine, seu de personâ Verbi habente humanitatem, posse prædicari quæ Dei sunt. Hæc est communicatio idiomatum, quæ aliquando magis explicabitur. Ejusmodi porro consecrarium mysterio unitatis personæ in Christo adeo connexum, et Patrum traditione constantissimè stabilitum, sæpius rejecit Nestorius.

Serm. 1, jam non semel citato, Mariam non esse Dei matrem, etsi Christum pepererit, sic probare nititur, n. 7: « Non peperit creatura eum, qui est increabilis; non recentem de Virgine Deum Verbum genuit Pater: *In principio enim erat Verbum*, sicut Joannes ait; « non peperit creatura Creatorem, sed peperit hominem Deitatis instrumentum. » Et rursus, n. 8: « Incarnatus est quidem Deus, « sed non est mortuus; sed illum, in quo incarnatus est, suscitavit. » Quatuor ibi negat Nestorius, quæ in communicatione idiomatum præcipuè attenduntur, nempe Deum Verbum dici posse natum, mortuum, et semetipsum suscitasse, et pariter hominem qui ex Mariâ natus est, seu personam quæ ex eâ carnem sumpsit, esse Deum Verbum, esse creatorem, esse eum qui increabilis est.

Innumera alia afferri possent loca, in quibus similia repetit. Lege sermones ejus 2, 3, 4, 7, etc. Illud præsertim celebre est quod coram pluribus episcopis triduo ante concilium Ephesi protulit: *Ego bimestrem et trimestrem Deum non dico*. Tom. 3 concil., col. 506, 562, 571.

Quartum argumentum est, Nestorium negasse aliud unitatis personæ in Christo consecrarium, nempe B. Virginem esse Θεοτόκον, seu Deiparam. Scilicet, si unica persona sit in Christo, nempe persona Verbi, manifestissimum est matrem Christi esse matrem Dei secundum carnem. Atqui Nestorius, ipsis fatentibus adversariis, negavit B. Virginem esse matrem Dei; ergo, etc.

Neque 1º id ipsi incautè excidisse dicendum est. Nam contra, in unâ ejusmodi veritatis re-

pudiatione perversum suum dogma integrum conclusisse visus fuit. Hinc à vocis *Deipara* condemnatione voluit hæresim suam diffundi incipere; cum nempe Anastasius presbyter, quem Antiochiâ secum Constantinopolim adduxerat, et cujus consiliis solebat regi, palam in Ecclesiâ, eo præsentem, nec improbante, populum universum harumce vocum impietate commovit: *Mariam Deiparam nemo appellet*, etc. Rem narrant Socrates, Evagrius, Theophanes, Liberatus. Hinc in omnibus sermonibus, quos postea ad populum frequenter habuit, totus est ut probet Mariam non esse matrem Dei. Serm. 1, n. 5, sic loquitur: « Audiant hæc, qui in « dispensatione Dominicæ innovationis cæca « ti non intelligunt, neque quæ loquuntur, « neque de quibus affirmant; qui sicut modò « cognovimus, à nobis invicem frequenter « sciscitantur an Θεοτόκος dicenda sit, id est « puerpera Dei sive genitrix Dei Maria, an autem ἀνθρωποτόκος, id est, hominis genitrix. « Habet matrem Deus? Ergo excusabilis gentilitas matres diis subintroducens.... Non, vir optime, Maria peperit Deum. Quod enim de carne natum est, caro est; et quod de spiritu, spiritus est. Non peperit creatura eum qui est increabilis, » etc. Serm. 7, n. 48. Θεοδόχον (*Dei susceptricem*) dico, non Θεοτόκον, « δ litteram, non x exprimi volens. Unus est enim.... Pater Deus Θεοτόκος. » Et epist. 2 ad S. Cyrillum, n. 11: « Convenientius ac aptius est, inquit, S. Virginem non genitricem Dei, id est, Θεοτόκον, sed Christi genitricem, id est, Χριστοτόκον vocari. » Vide etiam sermones 2, 3, 4, etc. Hinc vocis *Deiparæ* usum aliquando etiam abominatus est Nestorius, ut colligere est ex anathemate quod de ejus, ut creditur, consensu, Dorotheus episcopus Marcianopolitanus coram populo in Ecclesiâ protulit: *Si quis Mariam Deiparam ipse dixerit, anathema sit*; ad quam vocem exhorruere universi, et ab Ecclesiâ exierunt, ne cum impio communicarent: siluit verò Nestorius, nec oratorem cohibuit, imò eum ad sacra mysteria admisit. Vide S. Cyrill. epist. 6 et 9 edit. Paris. 1638, pag. 30 et 37. Hinc, ut Mariam non esse Dei matrem persuaderet, tot rationes undequaque accumulavit, quas numero decem fuisse observat Garnerius dissert. 1 de Hæresi Nestorii, cap. 2, § 3, ad calcem 2 partis Marii Mercat. pag. 292. Ergo consultò et datà operâ negavit Nestorius Mariam esse matrem Dei.

Non dicas 2º, ab eo repudiatam quidem vocem *Deiparæ*, sed propter abusus quostimebat,

et solo Arii et Apollinaris sensu. Namque non solum vocem, sed etiam ejus sensum legitimum et catholicum ab eo rejectum fuisse, constat 1^o, quia in serm. suo 1, ac aliis in locis, absolute pronuntiat Mariam non esse matrem Dei, eoque devenit ut ore Dorothei anathema in eos contorqueret qui dicerent Mariam esse Dei matrem. Num ita loquerentur illi à Reformatis qui solum illius vocis abusum timent? Imò pleno ore ii fatentur Mariam esse *Deiparam*; sed illà voce non nisi cautè utendum, vel etiam omninò eà abstinendum judicant, ne imperitis detur occasio arbitrandi Mariam esse deam, et infidelibus calumniandi religionem christianam. Quà de re dicemus infra. Ultra has metas Nestorius progreditur, Mariam verè esse Dei matrem prorsus negans; ergo. Constat 2^o ex loco jam supra citato è serm. 5, n. 5 et 6: « Beata Virgo, etsi peperit hominem, simul cum illo pertranseunte Dei Verbo, non ideò est Dei genitrix.... Beatus Joannes Baptista Spiritum sanctum habens editus est. Quid igitur? Appellabisne ipsam Elizabeth Spiritus genitricem *Πνευματοτόκον*; » Hic certè Nestorius significat non magis B. Virginem ob Christi partum esse matrem Dei Verbi, quàm ob partum Joannis Spiritum sanctum habentis Elizabeth dici potest mater Spiritus sancti; proindeque, etc. Constat 3^o ex pluribus argumentis quibus illius vocis usum impugnat. Nam etsi aliqua ex iis argumentis solum abusum vocis *Deiparæ*, aut solum Arii et Apollinaris in eà voce adhibendà sensum hæreticum excludant, ejusmodi est, v. g., istud serm. 1, n. 6: « Habet matrem Deus? ergo excusabilis gentilitas matres diis subintroducens; » et illud, quod aliàs inculcat, Divinitatem non esse natam; attamen alia urget sæpissimè, quibus sensus ejusdem vocis catholicus repudiatur. V. g., serm. 1 ideò maximè probat Mariam non esse genitricem Dei, quia 1^o homo quem illa genuit, est tantum *Deitatis instrumentum, templum*, etc., id est, quia morali solum unione conjunctus est cum Deo verbo. 2^o Quia utriusque naturæ proprietatum et attributorum communio nulla admittenda est. 3^o Quia ille qui genitus est in utero Virginis alius est à Deo Verbo. Hæ porro rationes, et aliæ similes quæ passim à Nestorio proferuntur, sensum vocis *Deiparæ* catholicum prorsus excludunt. Itaque id circa vocem *Deiparæ* contigit Nestorio, quod cæteris novatoribus in quâcumque aliâ materiâ. Sensus hæreticos, errori suo extremè oppositos, adversariis suis attribuit ille, ut eis invidiam pare-

ret, et Catholicorum odium ipse declinaret. Eosdem sensus, ut orthodoxus videretur, studiosè rejectit. At ibi non constitit; sed doctrinam catholicam simul conatus est alià ex parte impetere, pravosque suos ingessit sensus.

Non dicas 3^o Nestorium tandem pluribus in locis, nempe serm. 5, n. 2 et 4, serm. 12, n. 7, serm. 13, n. 7, et epist. 2 ad Cœlestin. consensisse ut Maria *Deipara* appellaretur, modò Apollinaris et Arii excluderetur sensus. *Damna*, inquit, serm. 12, n. 7, *eos qui dicunt secundum Apollinaris et Arii sensum, Dei genitricem; et egounà tecum clamo Θεοτόκον*. Nam etsi ita locutus fuerit Nestorius, attamen simul cum hæreticâ Apollinariis et Arii sententiâ repudiavit et doctrinam catholicam, nec nisi eo sensu Mariam posse appellari *Deiparam* factus est, quo hominem ex eà natum appellavit Deum, ut vidimus; nempe propter moralem ejus cum Deo Verbo unionem, et dona quæ ab ipso percepit. Nimirum triplici modo vox, *Deipara*, fuit intellecta. Primus est Ariarum et Apollinaristarum, juxta quos Maria ipsam Verbi Divinitatem genuerat. Secundus Catholicorum, qui dicunt personam Verbi, quæ Deus est, secundum carnem quam sibi hypostaticè univit, fuisse à Mariâ genitam. Tertius est Nestorii, quem contendimus docuisse Mariam posse utcumque appellari *Deiparam*, quòd fuerit mater hominis illius qui summo quodam nexu morali cum Deo conjunctus est, et ideò est consors appellationis et dignitatis Dei. Tertium autem hunc sensum fuisse Nestorii, patet non modò quia illum exigunt quæ de duplici personâ, et de unione morali semper tenuit, ut dictum est; sed etiam quia ejusmodi sensum manifestè indicat illis ipsis in sermonibus et epistolâ quæ opponuntur. Serm. 12, sedulò inculcat B. Virginem non nudè saltem vocandam esse *Dei genitricem Θεοτόκον* sed addendum nomen *ἀνθρωποτόκον* id est, *genitricis hominis*. Similia habet in epist. 2 ad Cœlestin. et in utroque loco significat non nisi ægrè à se permitti usum *Θεοτόκον* et sibi multò magis probari Virginem *Χριστοτόκον* nuncupari. Eodem serm. 12, n. 10, rationem reddens cur possit Maria vocari *Deipara*, solam affert unionem moralem. « Genitrix Dei est, inquit, non propter nudam humanitatem divinitatem, sed propter unitum templo Deum Verbum; hominis verò genitrix, id est *ἀνθρωποτόκος* propter templum quod consubstantiale est naturaliter Virgini sanctæ. » Catholicus dixisset Mariam esse *Deiparam*, quia natura humana quæ ex eà sum-

pta est, unitur Verbo secundum hypostasim. Non ita loquitur Nestorius, sed ad solitam templi metaphoram recurrit, quâ unionem moralem ab eo exprimi solere jam diximus. Simillima leguntur serm. 13. Ex serm. 5 plura jam attulimus, quibus indubitatum fit, catholicum vocis *Deiparæ* sensum in eo sermone admissum non fuisse; ergo, etc. Hinc synodus V generalis, collat. 8, anathema. 6, adversus Nestorianos ita statuit: « Si quis abusivè et non verè Dei genitricem dicit gloriosam semper Virginem Mariam.... anathema sit. »

Probatur 2^o conclusio ex agendi ratione Nestorii. Quædam tantum facta annotabo. 1^o Testes sunt S. Cyrillus, lib. 1, adversus Nestorum cap. 5, et Marius Mercator, « cum Nestorius in mediâ Ecclesiâ profanis uteretur vocum novitatibus (quibus et Θεοτόκον et γεννητριάς Christi nativitate insectabatur), « virum quemdam sanè probum, qui adhuc « inter laicos erat, sed tamen admirabilem sibi « collegerat eruditionem, ferventi et religioso « zelo permotum, et contentiori voce inclamasse: IPSUM ANTE SECUla VERBUM, ETIAM « SECUNDAM SUBISSE GENERATIONEM, id est, illam « secundum carnem et ex muliere. » Manifestum est hæc voce plenissimè expressum fuisse catholicum dogma de unâ Christi personâ duplicique naturâ, et de temporaneâ Verbi secundum carnem nativitate. Illud tamen dictum tanquam ab infelici homine flagitiosè prolatum rejecit Nestorius, et refellere aggressus est.

2^o Jam diximus S. Cyrillum initio disputationum, et antequam ad S. Cœlestinum utrinque scriberetur, duas ad Nestorium dedisse epistolas, in quarum secundâ, omnibus fatentibus, dogma catholicum de naturâ duplici, et unicâ in Christo personâ accuratissimè et clarissimè proponebat ac explicabat. Quid tum Nestorius? Misit responsum acerbissimum, in quo dogma suum iterum propugnabat, et S. Cyrilli doctrinam consultò deformabat, ut omnium invidiam in eum concitaret. Habentur hæc S. Cyrilli litteræ et Nestorii responsum 3 concil. Labb., col. 313 et seqq., et apud Marium Mercat. Garnerii, part. 2, p. 42 et seqq.

3^o Joannes Antiochenus, Nestorio, ut jam diximus, conjunctissimus, eximiam quoque epistolam ad ipsum misit antequam Ephesi concilium haberetur. In eâ doctrinam Ecclesiæ perspicuè declarabat, sensum catholicum vocis *Deiparæ* exponere, ac errore facti, ut aliquando ostendimus, ponens Nestorium or-

thodoxæ fidei addictum esse, et de solâ *Deiparæ* voce disputare, hunc ad eam juxta traditionem Patrum usurpandam hortatur. Refertur hæc epistola tom. 3 concil., col. 387 et seqq. Certè si Nestorius solâ terminorum ignorantia laborasset, nec mentem gessisset hæreticam, veritati sibi tam dilucidè ab amico expositæ adhæsisset. Non habemus porrò quid Nestorius Joanni responderit; sed eum in priori suâ sententiâ persistisse, ex his quæ ipse Ephesi et postea in monasterio suo egit certissimum est.

4^o Acacius Melitenensis, vir doctrinâ et pietate celeberrimus, et Nestorio amicus, cum eo Ephesi ante cœptam synodum collationes de dogmate habuit, in quibus illum à pravis suis opinionibus frustra conatus est revocare. Quâdam die inprimis, quæ videtur fuisse 19 Junii, Nestorius adversus Acacium dixit non potuisse Filium unigenitum fieri hominem, quin incarnarentur simul Pater et Spiritus sanctus. Tum « episcopus quidam qui cum ipso « (Nestorio) erat, sermonem excipiens, alium « asserebat Filium esse qui mortem subierat, « et alium item Dei Verbum... Aderat et alius « quidam ipsi qui Judæis patrocinator, eos « non in Deum, sed in hominem impios extitisse affirmabat. » Eâdem die cum Theodoto Ancyrano et aliis episcopis, Christum quem Virgo peperit, Deum esse affirmantibus, colloquens Nestorius hanc impiam vocem emisit: *Ego bimestrem et trimestrem Deum non dico*, aliasque protulit impietates, quibus Christi divinitas et Incarnationis mysterium è medio prorsus tollebantur. Referuntur hæc in concilio Ephesino actione 1, et apud Socratem, lib. 7, Hist., cap. 34; Liberatum, in Breviario, cap. 5; Theophanem, etc.

Prob. 3^o ex uniformi veterum Patrum et historicorum testimonio, et Ecclesiæ ipsius judicio. Sic enim argumentari possumus: Ille de Deo incarnato et Virgine *Deiparâ* perversè sensit, unamque tantum esse in Christo hypostasim noluit agnoscere, quem ob negata ejusmodi dogmata veteres Ecclesiæ Patres et historici hæreticum fuisse tradunt, atque ut hæreticum universa Ecclesia condemnavit; atqui de Nestorio sic se res habet. Nempe ob negatam unionem hypostaticam Verbi cum naturâ humanâ, et consequenter rejectum legitimum vocis *Deiparæ* sensum, damnatus est Nestorius in synodo Romanâ an. 450, in synodo Alexandrinâ totius Ægypti eodem anno, in synodo Ephesinâ generali III, an. 431, in concilio

Chalced. œcumenico IV, an. 451, et in Constantinop. II, generali V, ut omnibus notum est. Pariter eosdem errores ipsi adscribunt S. Cœlestinus rom. pontif. in resp. ad Nestorium, parte 1; con. Ephes. cap. 18, pag. 353 et seq., tom. 5 concil.; S. Leo Magnus epist. 154, aliàs 97; S. Cyrillus Alexandrinus multis in locis; Cassianus in libris de Incarnatione, quos adversus eum conscripsit; Vincentius Lirinensis in *Commonit.* 1 cap. 47; Marius Mercator; auctor coætaneus, à quo habemus plures Nestorii sermones et fragmenta; Evagrius, lib. 1 et 6 Hist. cap. 2; Liberatus Breviarii cap. 4; Facundus Hermianensis, lib. 1 et 6, etc. Quorum, ut et aliorum multorum testimonia, fusè collegit Natalis Alexander Dissert. 6 in hist. seculi V.

Adde episcopos illustres, qui, cum eo amicitia conjuncti, diù ipsi faverant, rati ejus fidem esse integram, tandem errores ejus agnovisse, ac illius condemnationi subscripsisse. Ita Joannes Antiochenus, qui cum obstinatum hominis mentem variis colloquiis explorasset, imperatori ipse auctor fuit ut illum juberet è monasterio prope Antiochiam educi et in exilium pelli. Ita Theodoretus, qui non modò in concilio Chalcedonensi ipsi palàm dixit anathema, sed et in lib. 4 Hæreticarum fabul. cap. 12, hæresim de quâ agimus, Nestorio adscribit, ejusque blasphemias recenset.

Solvuntur Objectiones. — Quæ ex scriptis Nestorii objici possent, jam præoccupata sunt. Pauca supersunt diluenda. Obj. 1^o: Joannes Antioch. in epist. ad Nestorium ante synodum Ephesinam scriptâ, cui Theodoretus, Macarius Laodiceus, Meletius alique episcopi subscripserant, et extat part. 1 concilii Ephes. cap. 25, p. 587 et seqq.; Acacius Beroënsis in epist. ad S. Cyrill. quæ ibid. legitur cap. 25, p. 581; et Theodoretus in epistolis ad Andream Samosatenum, et Alexandrum Illicopolitanum, post pacem cum S. Cyrillo à Joanne initam exaratis, Nestorium ab omni errore vindicant. Atqui tamen ipsos latere non potuit Nestorii sententia; ergo, etc.

Nego min. Illi episcopi, cum in Nestorii personam plus æquo essent propensi, ambiguis ejus locutionibus decepti sunt: idque eò facilius ipsis contigit, quòd dogma duarum in Christo naturarum in anathematismis contra Nestorium à S. Cyrillo editis læsum esse putarent. Notandum tamen est Joannem in præclarâ ad Nestorium epistolâ mox citatâ nonnisi subdubitanter esse locutum, illudque in eo

improbâsse quòd nomen *Deiparæ* dogmati exprimendo aptissimum rejiceret. « Si enim, » inquit, n. 3, mens tua eadem sapit et sentit, « quæ SS. Patres Ecclesiæque doctores sentiunt et sapiunt, (nam hoc, domine mi, et ex multis, et ex communibus amicis de te accepimus) quorsum vereris pium sensum con- » venienti voce publicare? » et n. 4: « Si id » quod nominis (Θεοτόκος) significatione offer- » tur, non recipimus, restat ut in gravissimum » errorem prolabamur; imò verò ut inexpli- » cabilem illam unigeniti Filii Dei œconomiam » abnegemus; quandoquidem nomine hoc su- » blato, vel hujus potiùs nominis notione re- » pudiatâ, sequitur mox illum non esse Deum, » qui admirabilem illam dispensationem nostræ » salutis causâ suscepit; tum Dei Verbum ne- » que se exinanivisse, » etc. Cæterum Joannes et Acacius, rebus propiùs inspectis, Nestorii condemnationi postea consenserunt; quod idem, etsi seriùs, Theodoretus quoque præstitit, ut modò dictum est.

Obj. 2^o: Socrates. coætaneus scriptor, lib. 7 Hist. cap. 32: « Ego, inquit, cum libros à » Nestorio editos legissem, hominem imperi- » tum esse deprehendi... Mihi quidem videtur » Nestorius nec Paulum Samosatensem, nec » Photinum imitatus; neque omninò nudum » hominem Christum dicere. Sed solam Dei- » paræ vocem, velut larvam quamdam refor- » midat. Idque illi ex gravissimâ contigit im- » peritiâ.... Arrogantiâ enim elatus ob dicendi » facultatem, non satis accuratè vetustioribus » legendis operam dabat... Apparet igitur Ne- » storium scripta veterum penitus ignorasse; » et ob eam causam, ut jam dixi, solam *Dei-* » *paræ* vocem impugnat. »

Nego conseq. quia Socratis auctoritas levioris est ponderis, præsertim ubi de ejusmodi rebus theologicis agitur. Historicus enim qui de foro scholasticus et de aulâ scriptor extitit, facilè potuit artificiosâ Nestorii errores suos vulgandi ratione decipi, eum arbitrari catholicum, quem in hæreticos invehementem videret, nec satis perspicere in quo cum Paulo Samosateni et Photino consentiret, quos noverat ab eo serm. 4 et 12 confutari, et à quibus reipsâ in pluribus, ut diximus, Nestorius discrepabat. His igitur de causis maluit Nestorium imperitum et in vocibus lapsum exhibere, quàm hominem hæreticum judicare.

Obj. 3^o: Non alia fuit Nestorii doctrina, ac Diodori Tarsensis et Theodori Mopsuesteni, quos fuisse hæresis Nestorianæ præformatores

non semel testatur S. Cyrillus. Atqui Theodorum Mopsuestenum, ejusque inprimis magistrum Diodorum Tarsensem, orthodoxam Ecclesiae fidem tenuisse probat Facundus Hermianensis, lib. 3 et 4; ergo, etc.

Nego min. Frustra conatus est Facundus Hermianensis Theodorum, cujus scripta synodus V generalis damnavit, et Diodorum ejus magistrum à Nestorianismo purgare. Sanctorum quidem Athanasii, Basillii et Epiphanii amicitia usus est Diodorus, ob integram suam de Trinitate fidem, quam strenuè adversus Arianos propugnavit. Quapropter à magno Meletio patriarcha Antiocheno creatus est episcopus Tarsensis. At ii sancti Patres extirpandae haeresi Arianæ toti incumbentes, Diodori ecclesiasticæ unitatis studiosissimi viri dogmata de Incarnatione non expenderunt; ergo.

Obj. 4^o : Ex fide discipulorum Nestorii, qui etiamnum in Oriente numerosissimi existunt, de eorum magistri mente primorumque illius sectatorum doctrinam judicandum est. Atqui recentiores Nestoriani circa Incarnationis fidem penes verba tantum à Catholicis differunt, ut patet ex eorum fidei professione an. 1610 Romæ editâ, cui concordant aliæ antiquiores, annorum videlicet 1247, 1445, 1550 et 1562; ergo. Ita juxta quosdam Richardus Simon in lib. cui titulus : *Hist. crit. de la créance et des coutumes des nations du Levant*, quem sub ementito nomine D. Moni, an. 1693, Francofurti (Rothomagi) edidit.

1^o Nego maj. Namque variis de causis fieri potuit ut Nestoriani decursu temporis dogma magistri sui sensim emollirent ac immutarent. Scilicet auctoritate SS. Patrum, quorum scripta legebant, potuerunt commoveri; frequens ipsis fuit cum Latinis consortium; eos sæpius adierunt viri apostolici qui illos instruerent: fœdera identidem cum Ecclesiâ romanâ ab iis redintegrata sunt, in quibus eorum professiones fidei ad normam Ecclesiæ romanæ fuerunt exactæ; hæc omnia totidem suppeditant rationes, quibus id efficitur, ex hodiernorum Nestorianorum fide certum de Nestorio et primis ejus discipulis judicium ferri non posse. 2^o Minor propositio non omninò certa est. Siquidem ex ipsâ professione fidei, quam nomine Eliæ Nestorianorum seu Chaldæorum patriarchæ Babylonici Paulo V summo pontifici anno 1610 obtulit abbas Adamus primariæ Chaldæorum Ecclesiæ archidiaconus et Nestorianorum monachorum præpositus generalis, quem fœderis cum Ecclesiâ romanâ renovandi causâ

Elias miserat atque etiam ex annexo eidem fidei professioni commentario, quem Adamus conscripserat ut ostenderet Ecclesiam suam à romanâ circa Incarnationem nonnisi verbo tenus dissentire; ex iis, inquam, scriptis apparet Orientales illos solitos esse uti vocibus exprimendo dogmati catholico minus idoneis, et olim à Nestorio sensu perverso adhibitis. Iis quidem loquendi modis contendit Adamus sensum eundem à suis alligari, quem Ecclesia romana recipit, constatque eum fuisse testem idoneum et eximie sinceritatis. Sed tamen semper superest non levis causa metuendi, ne fortè, concordiae promovendæ studio, suorum doctrinam benignius sit interpretatus; vixque sub verbis tam diversis integra potest esse in fide conformitas. Quapropter Paulus V voluit ab Adamo emitti professionem fidei iis terminis conceptam, quibus dogma catholicum à conciliis expositum est; quod ille nomine sui patriarchæ et Ecclesiæ chaldaicæ libenter præstitit. Rem narrat Petrus Strozza, Paulo V à secretis, in lib. De dogmat. Chaldæorum, an. 1617 Romæ edito. Vide insuper Raynaldum in Annalibus. Ad probationem ex citatis Nestorianorum recentiorum fidei formulis deductam, eæ formulæ exactæ sunt ad fidem et loquendi modum Ecclesiæ romanæ; ac proinde ex iis id unum concluditur, quotquot apud Syros seu Chaldæos has, ut sonant, recipiunt, illos à Nestorianismo certo certius recessisse.

Cæterum, objectio proposita malè Richardo Simoni attribuitur. Is quidem loco jam superius laudato Nestorianorum hodiernorum hæresim ait esse imaginariam, et in meris vocum æquivocationibus positam; in quo veremur ne erraverit. Addit audaciùs ibidem, fortè Nestorium et S. Cyrillum solis vocibus certasse, quod rationibus quibusdam jam à nobis in antecessum refutatis stabilit. Doctrinam verò Nestorianorum hodiernorum esset sinceræ Nestorii fidei indicium nullo modo sustinet.

§ II. De æquitate condemnationis Nestorii; ubi falsæ criminationes in sacram synodum Ephesinam et S. Cyrillum à quibusdam hæreticis structæ, diluuntur.

Jam observavimus recentiores illos, qui Nestorium ab eâ hæresi propter quam damnatus est, eximunt, de latâ adversus eum à concilio Ephesino sententiâ conqueri; intemperatioris studii et violentiæ S. Cyrillum accusare; eoque furoris perditos quosdam processisse, ut erroris Nestorianismo extremè oppositi,

negatæ scilicet distinctionis naturarum in Christo, non modò S. præsulem, sed et sacram synodum œcumenicam insimularent. Contra quos

CONCLUSIO I. Erroris Nestorianismo oppositi seu negatæ duplicis naturæ Christi stolidè accusatur concilium Ephesinum. Eadem accusatio in S. Cyrillum malè etiam contextitur.

Prob. prima pars, nempe de negatâ duplici naturâ Christi stolidè argui sacram synodum. Nam 1º, in epist. 2 S. Cyrilli ad Nestorium, quam singuli Patres suffragiis particularibus ut genuinam fidei Nicænæ expositionem approbârunt, quæque iis definitionis fidei in Nestorium loco extitit; in hâc, inquam, epistolâ, dogma duarum in Christo naturarum distinctarum, perinde ac unitas personæ tam disertè explicantur, ut nihil clarius desiderari possit. Magnam hujusce epistolæ partem exscribere non dubitabimus, ut hominum adversus sacram synodum blaterantium temeritas manifestissimè innotescat. Sic itaque in eâ legitur :
 « Neque enim dicimus Verbi naturam per sui
 « mutationem carnem esse factam, sed neque
 « in totum hominem transformatam ex animâ
 « et corpore constitutum. Asserimus autem
 « Verbum, unitâ sibi secundum hypostasim
 « carne animatâ rationali animâ, inexplica-
 « bili incomprehensibilique modo hominem
 « factum, et hominis filium extitisse... Et
 « quamvis NATURE SINT DIVERSE verâ tamen
 « unione coeuntes unum nobis Christum et Fi-
 « lium effecerunt; NON QUOD NATURARUM DIFFE-
 « RENTIA PROPTER UNIONEM SUBLATA SIT; VERUM
 « quòd divinitas et humanitas secretâ quâdam
 « ineffabilique conjunctione in unâ personâ
 « unum nobis Jesum Christum et Filium con-
 « stituerint. Ad hunc modum, qui ante omne
 « seculum existit, et ex Patre genitus fuit,
 « secundum carnem ex muliere natus dicitur;
 « NON QUOD DIVINA ILLIUS NATURA existentie
 « suæ initium in sacrâ Virgine sumpserit, aut
 « quòd post primam ex Patre, alterâ propter
 « seipsam generatione necessariò indiguerit,...
 « sed quia propter nos, et propter nostram
 « salutem, HUMANA NATURA secundum hyposta-
 « sim sibi unitâ, ex muliere natus est, hinc
 « est quòd secundum carnem natus prædica-
 « tur... Ad eundem modum illud passum et
 « resuscitatum dicimus : non quòd Dei Ver-
 « bum aut plagas, aut clavorum perforationes,
 « aut alia id genus vulnera in PROPRIAM NA-
 « TURAM acceperit (nam ut divinum numen
 « corporis expers est, ita perpeti quoque nihil

« potest); sed quia corpus quod sibi adscive-
 « rat, hæc fuit expertum, eam ob rem ipsum
 « nostrâ causâ illa perpassum asseritur. IMPA-
 « TIBILE ENIM VERBUM IN CORPORE PASSIBILI
 « existebat. Idem et de ejusdem quoque morte
 « sentimus; siquidem Dei Verbum SUAPTE NA-
 « TURA immortale et à corruptione alienum,
 « et vita rursùm et vivificans est. Verum quia
 « suum ipsius corpus gratuito Dei munere
 « mortem, attestante Paulo, omnium causâ
 « degustavit, fit ut ipsum mortem propter nos
 « perpassum dicatur: non quòd quidem ad
 « propriam naturam attinet, mortem excepe-
 « rit,... sed quia caro illius mortem, ut modò
 « aiebam, degustavit. Pari modo, quia caro
 « illius resurrexerit, ipsi resurrectio tribui-
 « tur... SUUM ERGÒ FECIT NOSTRUM CORPUS, pro-
 « diitque homo ex muliere, DEITATE interim
 « aut ex Patre nativitate NON ABIECTA; MANSIT
 « ENIM IN IPSA QUOQUE CARNIS ASSUMPTIONE QUOD
 « ERAT... Ita non dubitârunt (SS. Patres) sa-
 « cram Virginem Deiparam appellare: NON
 « QUOD VERBI NATURA, IPSIUSVE DIVINITAS ORTUS
 « sui principium ex sanctâ Virgine sumpserit;
 « SED QUOD SACRUM ILLUD CORPUS ANIMA INTELLI-
 « GENTE PERFECTUM EX EA TRAXERIT, cui et Dei
 « Verbum secundum hypostasim unitum, se-
 « cundum carnem natum dicitur. » Hactenus
 fidei expositio Cyrilli ad Nestorium, quam so-
 lemni ter et summâ cum laude singuli Patres
 Ephesini exceperunt. Dicant sacræ synodiosores
 quid ad plenam et apertam duarum in
 Christo distinctarum naturarum confessionem
 expressius proferri potuerit? Ergo inductæ
 duarum in Christo naturarum confusionis cri-
 men in sacram synodum stolidè moliuntur.

2º Ejusdem accusationis stoliditas ampliùs
 patebit, si argumenti, quo ea nititur, spectetur
 infirmitas. Nempe idcirco volunt Patres Ephe-
 sinos Eutychi duas Christi in unam confun-
 denti prælusisse, quia tertiam S. Cyrilli ad
 Nestorium epistolam celebres S. doctoris ana-
 thematismos continentem, actione 1, approba-
 verint. Atqui hâc ratione nihil infirmius. Fateor
 quidem hâc in epistolâ tertiâ S. Cyrillum de
 Nestorianis erroribus, profanisque vocum no-
 vitatibus excludendis et anathemate percutien-
 dis magis esse sollicitum, quàm de dogmate
 duplicis naturæ exprimendo et inculcando.
 Scilicet de duplici naturâ Christi nulla erat
 controversia, jamjamque dogma catholicum
 eâ de re, laudatâ epistolâ secundâ, ad tollendas
 ambiguitates satis superque fuerat Nestorio
 expositum; necesse verò erat ut unius personæ

fidem Nestorius juxta sententiam Cœlestini apertè confiteretur, utque eas locutiones ambiguias, quibus errorem suum obvolvere solebat, manifestè rejiceret. Fateor insuper mirum non esse, quòd, cùm controversia primum agigaretur, hanc epistolam, etsi orthodoxæ fidei non adversam, in sensum perversum nonnulli interpretati sint episcopi aliàs docti, sed studio partium abrepti, et in Nestorii personam propensi.

At verò 1º, quamvis tertia hæc S. Cyrilli epistola in mediâ synodo Ephesinâ lecta fuerit, nec à Patribus reprobata; imò etiamsi modus quo ea à Nestorio recepta fuerat, Patribus visus sit novum ejus obstinationis argumentum; attamen ex actis concilii manifestum est eam solemniter et, ut aiunt, *conciliariter*, approbatam non fuisse (1). Quapropter S. Cyrilli anathematis summam, quam in Ecclesiâ obtinent, auctoritatem, nonnisi longo post tempore consecuti sunt. 2º Vix concipitur, quomodò, controversiæ æstu jamdudum sopito, et eliquatâ quæstione, reperiri possint qui epistolam, quâ de agimus, non modò alicujus obscuritatis, sed et Eutychianismi protervè redarguant. Nam, etsi non ex professo et datâ operâ S. Cyrillus in hac epistolâ fidem duplicis in Christo naturæ inculcare satagat, hanc tamen satis designat non uno in loco. Docet enim, n. 5, Verbum ut « naturâ Deum et ex paternâ substantiâ genitum, » nemini esse subjectum; quanvis ut homo, « secundum legem humanæ naturæ congruentem Deo subjectum sit. Ad hunc quoque modum, subdit, sub lege factus est, » quatenus est homo; « etiamsi ut Deus legem ipse tulerit ac promulgârit. Et n. 6: « Confitentur, » inquit, ipsum Unigenitum Dei filium ex Patre natum, etiamsi secundum propriam naturam impassibilis sit, nostri tamen causâ in carne secundum Scripturas passum esse. » Quæ certè significant duas esse in Christo naturas planè diversas, divinam et humanam. Similiter n. 8: « Cùm ut Deus de se ipso ait: « Qui videt me, videt et Patrem meum; et: Ego et Pater unum sumus; divinam ineffabilemque illius naturam concipimus, secundum quam unum est cum suo Patre propter eandem quam cum ipso sortitur essentiam: est enim imago, et character, et splendor gloriæ illius. » Quando verò humanæ naturæ infirmitatem.

(1) Vide Christian. Lupum in Schol. et not. ad cap. 17 Variar. Epist. p. 70, et ad caput 22, p. 110; et Tillemont. notâ 26 in S. Cyrillum T. 14 Hist. Eccles. p. 758 et seqq.

« non aspernatus, Judæos hac oratione alloquitur: *Nunc quæritis me interficere, hominem qui veritatem dixi vobis*; æquè iterum ac ante, « ipsum Dei Verbum, quod in æqualitate et similitudine Patris consistit, per humanæ etiam suæ naturæ conditiones agnoscimus. » En rursus utraque natura apertè expressa. Earumdem naturarum distinctionem indigitat S. Doctor, dùm anathematismo 1, definit B. Virginem *genuisse incarnatum Dei Verbum secundum carnem*; anath. 12, *Dei Patris Verbum carni secundum hypostasim unitum, et unum unâ cum suâ carne esse Christum*, eundem nimirum Deum simul et hominem; anath. 6 *post Verbum secundum Scripturas incarnatum unum eundemque Deum simul hominem esse*; anath. 12, *Dei Verbum secundum carnem crucifixum*, etc., *etsi idem vita est vivificum ut Deus*; ergo.

Sed præterea nihil in hac epistolâ, neque in ipsis anathematismis, distinctioni duplicis naturæ Christi legitur adversum. Plura quidem in scripto ejusmodi olim redarguit Theodoretus; sed ex superstite parte scriptorum de hac controversiâ ab eo editorum, liquidò colligitur doctum hunc virum in hoc argumento mirum in modum cæcutiisse, ac disputationis æstu, nimioque in Nestorium studio abreptum continuas et inanes movisse tricas, nec mentem Cyrilli esse assecutum. Idem judicium ferendum est de iis quæ Andreas Samosatenus nomine Orientalium adversus anathematismos objecit. Vide utriusque illius, Andreæ scilicet et Theodoreti objectiones simul et defensionem Cyrilli tom. 3 concil. part. 3, pag. 809 et seq. Illud autem præsertim objicit calvinianus scriptor quem citavimus, unionem scilicet Verbi cum naturâ humanâ in hoc scripto, n. 4 et 8, comparari unioni animæ et corporis; unde concludit hujus auctorem S. Cyrillum, ac proinde et Patres Ephesinos, censuisse unam esse Christi naturam, sicut ex unionem animæ et corporis una exurgit natura humana. Verum adeò infirmum est illud argumentum ad tantas accusationes fulciendas, ut nonnisi ex præconcepto in concilia et Patres odio vehementi prodire potuerit. Nam in epistolâ de quâ agimus comparatio illa solùm instituitur ad explicandum unionem naturæ humanæ cum Verbo esse personalem et secundum hypostasim; cui rei exponendæ hanc comparisonem esse natam nemo inficiabitur; quapropter eâ pariter utitur auctor Symboli quod S. Athanasio tribui solet, eandemque frequenter adhibent concilia et Patres etiam post natam Eutychianam hæresim; Eu-

tychiani, qui illà aliquando voluerant errorem suum confirmare, intellexere tandem se in eà causæ suæ præsidium aliquod frustra quærere, et ab illà recesserunt. Ergo erroris Nestorianismo oppositi stolidè accusatur Ephesina synodus.

Prob. secunda pars, nempe adversus S. Cyrillum similem insimulationem præposterè instrui; accuratà consideratione scriptorum quæ de Incarnationis fide S. doctor edidit. Is enim malè arguitur duas Christi naturas in unam confudisse, qui fidem duplicis naturæ Christi ab initio controversiæ ad ejus finem apertè et pluries expressit, quique eam planè supponit et indicat iis ipsis in locis quibus adversariorum criminatio fuleitur. Atqui ex accuratà scriptorum S. Cyrilli consideratione utrumque manifestum est. Primum facilè evincitur, duarum videlicet in Christo naturarum fidem, ab initio controversiæ usque ad finem pluries et apertè à S. Cyrillo expressam et inculcatam. Jam retulimus perlongum et disertissimum eà de re S. doctoris testimonium, ex epistolà ejus ad Nestorium secundà vel ab initio controversiæ conscriptà depromptum. Quædam alia addere sufficiet. In homilià Ephesi dictà, cùm synaxes peragerentur deposito Nestorio, seu die Dominicà 28 Junii an. 431, sic habet: « Non enim « cùm homo esset (Christus), fecit se ipsum « Deum; sed Deus suapte naturà cùm sit, sine « ullà mutatione ac sine confusione factus est « homo; et qui ineffabili modo ex Deo Patre « generatus est secundum carnem ex muliere « nasci sustinuit, ac filius hominis appellatus « est ut nos salvaret. Factus est tibi similis « propter te, et mansit propter se ipsum hoc ipsum quod erat. » Audis ex S. Cyrillo Verbum divinum sine ullà naturæ suæ *confusione* aut *mutatione*, atque *manens hoc ipsum quod erat*, factum esse hominem nobis similem, seu naturam humanam in suppositi unitatem assumpsisse; ergo, etc.

In explicatione duodecim anathematismorum Ephesi pronuntiata, sanctà synodo clariorem illorum declarationem exigente, ad secundum anath. sic habet: « Qui nobis assimilatus est, « licet id quod erat manserit, quæ nostra sunt « non aversatur; imò verò propter dispensationem ea omnia quæ ad humanam naturam « pertinent, cum humanitatis mensuris simul « admittit; neque ullum hinc tamen secundum « propriam naturam vel gloriam detrimentum « capit. » Lege totam hanc expositionem. Lib. 2 contra Nestorium: « Illud quoque, inquit,

« haud inutiliter addiderim, aliam esse carnem à Deo Verbo (quod ad suæ naturæ rationem attinet), aliamque rursus essentialiter ipsam Verbi naturam. Sed quamvis hæc « differre intelligantur, et naturali diversitate « esse disjuncta, unus tamen ex utroque Christus intelligitur dùm per veram unitatem « deitas simul et humanitas invicem conveniunt. » In Epist. celebri ad Joan. Antiochenum quâ pax cum Orientalibus anno 433 reintegrata et definita fuit, integram refert S. Cyrillus et suam facit confessionem fidei Orientalium, dogma duarum Christi naturarum disertissimè continentem. Deinde Joannem rogat, « ut illorum ora comprimere dignetur, « quiconcretionem, vel confusionem vel commixtionem Verbi cum carne factam esse dicunt. » Addit quæ tantum abesse ut quid simile « à se unquam cogitatum fuerit, ut eos etiam « insanire existimet, qui vel aliquam conversionis adumbrationem in divinam Verbi naturam cadere posse suspicantur. Manet enim illa, « pergit, quod est semper; neque alterata est, « sed neque unquam alterabitur; neque ullius « erit mutationis capax. » Tandem explicat, et S. Petri auctoritate probat Christum non esse passum in *ineffabili divinitatis naturâ*, sed in *carne*, id est, in humanâ naturâ quam Verbum assumpsit. Ergo ab initio disputationis ad ejus finem S. Cyrillus duarum Christi naturarum fidem pluries et apertissimè professus est et inculcavit.

Alterum perinde evidens est, scilicet iis ipsis in locis quibus adversariorum criminatio innititur, eandem fidem duplicis in Christo naturæ planè supponi et indicari. Præcipua ejusmodi loca easunt, in quibus S. Cyrillus ait in Christo *unum esse Verbi Dei naturam incarnatam* (1); quam locutionem minùs esse claram non diffitemur. At 1º Observa S. Cyrillum non dixisse *unam esse Christi naturam*, quod Eutyches docuit; sed *unam VERBI DEI*, seu, *FILII DEI naturam*. Observa 2º neque etiam unquam ab ipso positum simpliciter *unam esse in Christo Verbi Dei naturam*, sed adjunctum semper ab eo fuisse vocabulum *incarnatam*, aut aliud æquivalens. Atque his annotatis, fidem duplicis in Christo naturæ hæc S. Cyrilli locutione planè

(1) Vide epist. 1 et 2 ad success.; epist. ad Acacium Melitenens.; alteram ad Eulogium presbyt. Constantinop.; item ad Valerianum Iconiensem, etc., quæ extant T. 5 oper. part. 2; vide et lib. 2 contra Nestorium, T. 6, etc.

supponi et indicari sic conficio : Qui divinam Verbi naturam esse ab omni mutatione alienam censet et simul hanc in Christo docet incarnatam, ille planè supponit et significat, præter naturam divinam Verbi integram et perfectam, aliam esse in Christo naturam, nimirum carnem, seu naturam humanam; alia quippe est natura divina et immutabilis quæ incarnata est; seu quæ carnem assumpsit, et alia natura carnis, seu humanitatis assumptæ. Atqui Deum Verbum suapte naturâ esse immutabile sæpè docuit S. Cyrillus; ut videre est in locis superius laudatis, quibus alia multa addi possent; nec ullo sanè in loco legitur immutabilitati Verbi quidquam vel minimùm detraxisse. Ergo, cùm dixit unam esse in Christo naturam Verbi Dei incarnatam, planè indicavit, et supposuit duas reipsâ in Christo esse naturas distinctas et inconfusas.

Et verò, vel hæc S. Cyrilli locutio naturam duplicem esse in Christo supponit et indicat, vel accipienda est de naturâ unâ compositâ ex divinitate et humanitate, ut eam interpretatur calvinianus ille scriptor David de Rodone, qui S. Cyrillo tantoperè adversatur. Atqui clarum est locutionem ejusmodi accipi non posse de naturâ hoc modo compositâ. Implicat enim in terminis, naturam ex divinitate et humanitate coalescentem, dici unam naturam incarnatam, seu unitam humanitati; totum aliquod duas partes complectens, malè dicitur uni ex illis partibus unitum; ergo, etc. Nec certè nova hæc est et incerta conjectura, quâ S. Cyrilli mentem assequi contendamus. Dictum S. doctoris, prout sonat, explicamus: illudque olim ita exposuerunt non modò antiqui S. Cyrilli defensores, Eulogius Alexandrinus apud Photium Cod. 230; S. Maximus martyr in Opusculis theolog. et polemicis, T. 2, edit. Combefis.; Petrus Diaconus in lib. de Incarnat. T. 9; Biblioth. PP. Lugd. et alii complures; sed et ipse S. præsul adversus sui obtrectatores sententiam hanc suam propugnans: « Si dicentes « unam Verbi naturam, inquit, epist. 2 ad « Successum, num. 3, tacuissemus, ac minimè « adjunxissemus INCARNATAM, excluso prope- « modum dispensationis mysterio, esset illo- « rum fortassè oratio non inepta.... sed quia « et illa in humanitate perfectio, et essentiæ « nostræ declaratio illata est, dùm dicimus « INCARNATAM, desinant baculo inniti arundi- « neo. Is enim, pergit, qui excluderet dispen- « sationis mysterium, incarnationemque nega- « ret, jure coargui posset tanquàm à Filio

« perfectam humanitatem auferret. Sed si, ut « jam dixi, in eo quod illum incarnatum esse « dicimus, perspicua et certa confessio conti- « netur, quâ etiam hominem esse factum pro- « fitemur, nihil jam intelligere prohibet, Chri- « stum, cùm sit unus ac solus filius, eundem « Deum esse et hominem, ut in Deitate, ita « etiam in humanitate perfectum. » Deinde, ille loquendi modus ab Eutycheis errore immu- nis fuit, quem usurpare, vel etiam adversus hunc hæresiarcham premere non dubitârunt ejus erroris impugnatores SS. Patres; quem admittere ipse Eutyches renuit; quem denique approbaverunt ipsa concilia contra Eutychem et Monothelitas habita. Atqui 1º, SS. Patres sententiam S. Cyrilli, de quâ agimus usurpa- vere, vel etiam adversus Eutychem pressere; Flavianus nempe Constantinop. patriarcha in suâ *Fidei professione* imperatori Theodosio oblatâ, hanc locutionem adhibet. Eamdem contra Eutychem attulit Basilius Seleuciensis in synodo Constantinop. sub eodem Flaviano an. 448 celebratâ. Quibus adjungendus Justinianus imperator in *Professione fidei*, itemque Eulogius, S. Maximus martyr, Ephremius, Joannes Damascenus, etc. 2º Hanc admittere renuit Eutyches. Cùm enim in concilio Constantinop. mox memorato Athanasii et Cyrilli sese tue- retur nominibus, ipsum Basilius Seleuciensis adhortatus est, ut cum illis diceret *unam Verbi naturam incarnatam*; hanc verò loquendi ratio- nem usurpare noluit hæresiarcha, quippe quâ errorem suum destrui pervidebat. 3º Eamdem S. Cyrilli sententiam approbârunt concilia in Eutychem habita. Nimirum in concilio Chalce- donensi generali IV, an. 451, S. Flaviani de- fendendi causâ adducta fuit mox laudata ejus professio fidei, quæ, ut dictum est, sententiam, de quâ agimus, continet. Quinta verò synodus probavit Professionem fidei imperatoris Justi- niani, quâ prædictus loquendi modus in Euty- chen urgetur. Tandem synodus Lateranensis sub Martino I, rom. pontifice celebrata, quâ Monothelitæ proscripti sunt, in *Definitione fi- dei*, can. 5, legitimum hujus dicti sensum sic determinat juxta vim græci textûs: « Si quis « secundum SS. Patres non confitetur propriè « et secundum veritatem, unam naturam Verbi « Dei incarnatam, per hoc quod incarnata di- « tur, nostram substantiam perfectè in ipso « Christo Deo et indiminutè absque tantum- « modò peccato, significare, condemnatus « sit. » Adde quòd hanc loquendi rationem à S. Athanasio traditam fuisse censuerit, S. Cy-

rillus pluribus in locis (1); cui eâ de re consenserunt Basilii Seleuciensis in synodo Constantinop. contra Eutychen, Eulogius Alexandr. loco citato apud Photium, Ephremius, Joannes Damascenus, etc. Ubi tandem fatendum codice depravato fortè usm esse S. doctorem; jamdudum enim Leontius id sensit, et reverà in lib. S. Athanasii *de Incarnatione* quem etiamnum habemus, non extat testimonium quod ex eâ S. Cyrillus laudat.

Quæres, quid S. Cyrillus nomine *naturæ* intelligeret, cum dixit in Christo *unam esse Verbi naturam incarnatam*? an ipsam Verbi naturam? an personam? Resp. veteres diversâ ratione illam phrasim S. Cyrilli esse interpretatos. Ephremius, Eulogius, et alii quidam senserunt nomine *naturæ* ibi intelligendam esse naturam ultimò completam, hoc est, personam Verbi. Et reverà potuisset S. doctor ita accipere *naturæ* nomen, appositè ad refellendum Nestorium, qui sæpè voci *naturæ* eam alligabat ideam et dotes quæ personæ competunt. Leontius tamen, Gelasius, Rusticus diaconus, Anastasius Synaita, Theorianus, S. Cyrillum de ipsâ divinâ Verbi naturâ accipiunt, quibus assentiendum judicamus. Nam 1º, S. Cyrillus duas esse in Christo naturas dissimiles et integras non semel confessus est, præsertim in epist. 2 ad Nestorium, et epist. celebri ad Joan. Antiochenum, in quâ professionem fidei Orientalium recepit. Ergo *naturæ* vocem juxta significationem usitatam, non verò in sensu *personæ* usurpavit; alioqui unitati personæ in Christo malè consulisset, ac termini ejusdem tam dissimili acceptione omnia confudisset. 2º Hanc naturam Verbi incarnatam appellat naturam Deitatis in lib. de fide ad Reginas. 3º Si voce *naturæ* S. Cyrillus personam intellexisset, proclive fuisset ab ipso dici *unam Christi naturam*; atqui id nunquam dixit, sed tantum *unam Verbi Dei* vel *Filii divini* naturam; ergo, etc. 4º Positâ nostrâ expositione S. Cyrillus scopum suum nihilominus attigisse concipitur. Nempe ut unitatem personæ in Christo magis firmaret, naturam propriam Verbi, ut pote præcipuam, primariò et directè solam in Christo prædicare amabat, naturam verò humanam obliquè tantum et secundariò denotare; utramque tamen re verâ illâ locutione

significans et distinguens, imò ambas directè aliquando exprimens, et à Joanne Antiocheno aliisque Orientalibus exprimi approbans, quorum fidei confessionem ad usque vitæ exitum contra ejusdem oppugnatores defendit.

SOLVUNTUR OBJECTIONES. — Obj. adversus secundam conclusionis partem: 1º S. Cyrillus in Epist. 2 ad Successum, n. 4: « *Duas quidem naturas, inquit, unitas asserimus, post unionem verò, tanquam sublatâ jam illâ in duo divisione, unam esse credimus Filii naturam, tanquam unius, sed hominis facti et incarnati.* » Similia habet in Epist. 1 ad eundem, et in Epist. ad Acatium Melitenensem. Duas igitur naturas ante unionem quidem concipiebat S. doctor, peractâ verò unionem unam tantum; atqui duæ naturæ quas ante unionem concipiebat, erant propriè dictæ; ergo sensit unam esse tantum, peractâ unionem, naturam propriè dictam, ex duabus videlicet coalescentem, ut humanitas ex animâ et corpore coalescit.

Dist. maj. peractâ unionem, unam tantum concipiebat naturam præcipuam, et ideò solam primariò et directè prædicandam, nempe naturam Filii divini, concedo; unam simpliciter, ex divinitate et humanitate compositam, nego. Itaque cum S. doctor dixit unam esse, peractâ unionem, naturam, non attendebat præcisè ad ea quæ naturam propriè dictam constituunt; sed solum contendebat istud ex ejusmodi unionem consequi, naturam scilicet Filii divini, utpote in Christo præcipuam, solam primariò et directè prædicari debere; ipsique videbatur illa locutio dogmati catholico adversus Nestorium firmando magis idonea; quòd eâ obliquè tantum et indirectè connotaretur humanitas, quam, ut personam à Verbo distinctam, pingebat Nestorius. Cæterum, *unam hanc Filii naturam*, quam post unionem prædicat S. Cyrillus, non esse unam naturam ex divinitate Filii et humanitate assumptâ coalitam et compositam, ex eo patet, quòd 1º illam perpetuò dicat esse *naturam verbi Dei*, quam esse immutabilem censet; 2º quòd illam *incarnatam* prædicet, eique carnis assumptionem tribuat; quæ attributa in naturam prædicto modo compositam non cadunt; 3º quòd duas in Christo naturas distinctas et perfectas post unionem admiserit; recale superiùs dicta inter probationes.

Obj. 2º: Dioscorus tanquam Eutychianus damnatus est à concilio Chalcedonensi, quamvis confusionem, commixtionem aut conversio-

(1) Lib. de rectâ fide, ad Reginas T. 5, part. 2, p. 48; Defens. anathematism. adversus Orientales, ad anath. 8, T. 6, p. 178, et Epist. utrâque ad Successum, T. 5, part. 2, p. 135, etc.

nem in Christum inducentibus anathema diceret. Ergo quamvis ab ejusmodi confusione, conversione, commixtione abhorruerit S. Cyrillus, non ideò ab Eutychanismi labe immunis est.

1° Negari potest antecedens. Non enim compertum est an Dioscorus errores Eutyichis reverà tenuerit. Ob patrocinium Eutyichi præstitum, ob gesta procaciùs in R. pontificem S. Leonem, aliaque crimina, non propter hæresim ipsum à Chalcedonensi synodo depositum fuisse complures existimant. 2° Nego consequ., in quâ 1° falsum supponitur. Namque ab erroris labe non ideò tantum censetur immunis S. Cyrillus, quòd omnem conversionem, commixtionem aut confusionem naturarum à Christo abjecerit; sed et propter alia argumenta superiùs allata; nempe propter expressam non semel duplicis naturæ distinctionem, fidemque Orientalium libentissimè et sine cunctatione ab ipso approbatam. 2° Non modò omnem à Christo conversionem, commixtionem et confusionem naturarum exclusit S. Cyrillus, sed et docuit ne ullam quidem umbram mutationis in naturam verbi cadere posse. Si eadem senserit Dioscorus, et simul unam tantum in Christo naturam ex divinitate et humanitate compositam admiserit, ut ponit objectio, et probabilius est, certè non satis secum ipse consensit, ut aliquando patebit. Num verò in re tanti momenti pugnantes ejusmodi sententias S. doctori gratis affingere licebit?

Obj. 3°: Pluribus in locis S. Cyrillus tradit eàdem ratione naturam divinam et naturam humanam in Christo uniri, quâ uniuntur in homine mens et corpus; atqui mens et corpus in homine ita uniuntur, ut ex iis una fiat natura composita; ergo. Dist. maj. eàdem ratione quoad unitatem personæ, concedo; quoad unitatem naturæ, nego. Corpus et anima in homine ita uniuntur, ut ex illorum conjunctione exurgat una persona, nempe homo, et una natura. Ex unione naturæ divinæ et naturæ humanæ exurgit etiam unus Christus, unicâ Verbi divini personalitate subsistens. Sed cum verbum divinum suapte naturâ infinitum sit et immutabile, hinc illâ unione humanitas sola mutatur et perficitur, nullatenus natura divina; adeòque duplex manet in Christo natura perfecta et integra etiam post unionem; natura namque divina eadem omninò est ac antea; naturæ autem humanæ per unionem nihil essentiae et perfectionis detrahitur. Porro S. Cyrillum hanc comparisonem insti-

tuendo ad solam personæ unitatem spectasse, tum scopus ejus, tum ea quæ sæpè memoravimus, manifestum faciunt. Atque adeò futile est argumentum quod inde eruitur, ut eàdem comparisonem usi sint SS. Patres, etiam Acephalis eâ abutentibus posteriores.

Obj 4°: In Epist. 2 ad Successum, et in Dialogo de uno Christo, docet S. Cyrillus divinitatem et humanitatem ita in unum Christum coaluisse, ut solâ cogitatione, solâ contemplatione, θεωρία μόνῃ secernatur et distinguatur; ergo, etc. 1° Argumentum nimis probat. Quippe id unum contendit David de Rodone, admissam esse à S. Cyrillo unam in Christo naturam ex divinitate et humanitate compositam, ut hominis natura ex animâ et corpore est composita: sed si solâ distinctione, ut vocant, rationis distinguerentur natura divina et natura humana Christi, jam in Christo esset una natura simplex; quod nimis absurdum est, quàm ut possit S. doctori adscribi; ergo. 2° Nego consequ. Differentia, distinctio, discretio quæ solâ ratione, solâ cogitatione fit, opponitur eò loci *divisioni*, seu rei ab re distractioni, quâ res separatæ et seorsim existunt, non verò illi solùm distinctioni quam *realem* appellant in scholis; et quæ rebus conjunctis et indissolubili nexu unitis etiam competit. En locus integer ex Epist. 2 ad Successum objectus: « Ignorant, inquit S. doctor n. 4, quæcumque non solâ mentis consideratione distingui solent, ea prorsus etiam in diversitatem distinctam omnifariam ac privatim (εις ἑτερότητα τὴν ἀνὰ μέρος ὁλοτρόπος καὶ ἰδικῶς) à se mutuò segregari. Sit rursus nobis in exemplum homo nostrî similis. Duas namque in eo naturas intelligimus, unam animæ, alteram corporis. Sed cum solâ discreverimus intelligentiâ, et differentiam subtili contemplatione seu mentis imaginatione conceperimus, non tamen seorsim ponimus naturas, neque illis in totum per divisionem virtutem immittimus; sed unius hominis esse intelligimus, ita ut illæ duæ non jam sint duo, sed utrâque animal unum absolvetur, » etc. Hæc ille: ubi apertissimum est ea ab ipso dici solâ ratione, solâ mentis consideratione distingui, quæ cum unita sint nec separatim existere queant, possunt tamen sine se invicem cogitari.

Neque ea acceptio specialis fuit ejusmodi loco, vel etiam S. doctori. Vulgatissimum est tum apud S. Cyrillum, tum apud alios SS. Patres, ut distinctio et differentia rationis hocce

modo sumatur. Ii nempe, quæcumque conjunctim extant, seu ratione solâ, seu reipsâ inter se differant, hæc dicere assolent solâ cogitatione et intelligentiâ discerni et distingui, quia nempe solâ cogitatione sine se invicem attingi possunt. Hinc anima et corpus, etsi diversæ sint substantiæ et realiter distinguantur, dicuntur tamen ab Ephremio Antiocheno apud Photium, à S. Cyrillo in Epist. ad Valerianum et in utroque loco objecto, et ab aliis, solâ cogitatione differre. Hinc SS. Trinitatis personas, etsi re maximè distent, solâ ratione discreverunt. Hinc in face accensâ flammam à materiâ discerni ratione ait S. Greg. Nyssenus. Hinc non modò ante Cyrilli ætatem plures Patres solâ ratione separârunt aut distinxerunt utramque Christi naturam, ut S. Basilius lib. 4 contra Eunomium, S. Greg. Nazianz. Orat. 56, etc., sed etiam multi ex iis qui post natam Eutychianam heræsim scripserunt, aut etiam hanc impugnârunt, ut Patres concilii V generalis, can. 7, Agatho rom. pontifex in Epist. ad imperatores quæ legitur actione 4 synodi VI, Maxentius in libello contra Acephalos, etc. Ergo, etc. Plura vide apud Petavium, Dogmat. theologic. lib. 1 de Deo, cap. 10, lib. 4 de Incarn. cap. 3, n. 13 et seqq., et lib. 6, cap. 9, n. 13 et 14. Atque de toto argumento quod hic à nobis tractatum est, consule eundem libro 6 de Incarn. integro, in quo summâ eruditione et judicio, Davidis de Rodone librum, cujus auctorem ignorabat, ita planè refellit, ut mirum sit ab aliis postea eandem crambem recoctam fuisse.

CONCLUSIO II. Nestorium canonicè damnavit Ephesina synodus. Prob. Illud judicium canonicum fuit, quod ab auctoritate legitimâ, justâ de causâ, in reum canonicè citatum et contumacem, de crimine certo et juridicè probato, ac tandem servato tempore præscripto prolatum est. Atqui sic se habuit judicium quod synodus Ephesina adversus Nestorium pronuntiavit.

1º Latum est illud judicium ab auctoritate legitimâ. Nam primæ actioni (de quâ potissimum movetur controversia, quòd ante legatorum Româ missorum et Joannis Antiocheni adventum causa Nestorii in eâ decisa fuerit), primæ, inquam, illi actioni intererant episcopi circiter ducenti, inter quos S. Cyrillus, patriarcha Alexandrinus, Juvenalis Jerosolymitanus, Memnon Ephesinus, aliique metropolitani multi. In eâdem actione romani, pontificis Cælestini locum, ut expressè acta habent, obti-

nebat S. Cyrillus; quippe cui vices suas Cælestinus commiserat, ut sententiæ adversus Nestorium à Sede apostolicâ in Romano concilio latæ executionem promoveret. Quapropter Mennas Constantinopolitan. in Professione fidei, quæ inserta est Vigilii Papæ constituto, Liberatus Breviarii cap. 5, Evagrius Hist. ecclesiast. lib. 4, cap. 4, Marcellinus Comes in Chronico, Nicolaus I, Epist. 9 ad Michaellem imperatorem, Photius in lib. de Synodis, alii-que quos refert Natalis Alexander, Dissert. 7 in Hist. eccles. V. seculi, edit. 1699, T. 5, p. 228, hunc in concilio Ephesino legatum Cælestini fuisse tradunt; et reverà cùm adventâssent legati quos ad synodum Româ miserat Cælestinus, adhuc præsidem S. Cyrillus egisse conspicitur T. 3 conc. p. 610 et 655; ergo.

Quòd si prætereà attendantur, ut maximè attendi debent, episcopi quotquot seu stante adhuc synodo, seu eâ dissolutâ, judicium primâ actione pronuntiatum calculo suo approbârunt, damnatum auctoritate legitimâ Nestorium fatebitur, quisquis aliquam ejusmodi auctoritatem in Ecclesiâ constitutam agnosceret. Enimverò multi ex episcopis, qui Joannem esse expectandum rati, noluerant primæ actioni adesse, post latam sententiam, et impiâ Nestorii mente penitùs inspectâ, sanctæ synodo sese adjunxerunt. Quod colligitur tum ex relatione synodi ad imperat. per Palladium Magistrianum transmissa, in quâ non obscurè id significatur; tum ex eo quòd sæpè synodus triginta tantum episcopos Joanni adhærentes commemoret, cùm tamen protestationi Nestorii 68, episcopi subscripsissent (1), et conciliabulo Joannis quadraginta tres. Consule Christianum Lupum in Scholiis et notis ad variorum Patrum Epistolas, ad caput 7. Ubi primum autem legati Cælestini Arcadius et Projectus episcopi et Philippus presbyter Ephesum apulerunt, confestim actione 2, quæ die 10 Julii in episcopio habita est; postulavère sibi gesta prioris actionis privatim recognoscenda communicari; quæ cùm expendissent, et tertiâ actione die 11 ejusdem mensis in mediâ synodo legi curâssent, nomine Cælestini et totius concilii Occidentis sententiam depositionis in Nestorium singuli pronuntiârunt, actisque subscripserunt. Vide T. 3 concil. p. 628 et 629.

Deinde concilium Ephesinum confirmatum est à Sixto III, rom. pontifice, Cælestini inte-

(1) Apud Christ. Lupum in *variorum Patrum Epist.*, etc., cap. 7, edit. Lovan. 1682, p. 26.

rea mortui successorē, et ab utrāque Ecclesiā. Quid, quod ipse Joannes Antiochenus, cum plerisque suis Orientalibus, damnationi Nestorii demum consensit anno 453. Ipseque Theodoretus, qui diutius personæ Nestorii patrociniatus fuerat, huic tandem anathema dixit in concilio Chalcedonensi, ejusque pravos errores lib. 4 Hæretic. fabularum cap. 12, exposuit et damnavit. Ergo sive actio prima concilii Ephesini seorsim spectetur, sive eorum à quibus gesta illius actionis deinde probata sunt, habeatur ratio, auctoritate legitimā damnatus est Nestorius.

2º Judicium contra Nestorium justā de causā latum est. Siquidem agebatur de proscribendo errore, quo præcipuum religionis dogma subvertebatur. Addo, etiamsi Nestorius in eo tantum, ut quidam adversarii volunt, fortè peccasset, quod voces receptas et ad dogma exprimendum usitatas nolisset adhibere, vel hoc unum satis fuisse ad justam eum damnandi præbendam causam; quippe cum *profanas vocum novitates* S. Paulus *devitari* præcipiat, 1 Tim. 6, 20, ac diversitas vocum vi quādam nativā sensus diversos ad discrimen in fide mentibus ingeneret.

3º Latum est in reum canonicè citatum. Nam pridie quā concilium inciperet, die scilicet Dominicā 21 Junii, à quatuor episcopis cæterorum nomine ad sacrum consessum invitatus fuit Nestorius, *ut ea quæ ad religionem pertinent, communi omnium sententiā et consensu constituerentur*. Die verò 22, sacra synodus antequā de fide ageret, alios iterum, et tertio alios delegavit episcopos qui eum *rogarent, ut ipse se synodo adjungeret, neque ullo pacto ab earum rerum tractatione, quæ jam præ manibus erat, diutius abesse pergeret*; admonerentque, ut ipse accederet, *sanctissimum synodum necessitate compulsam ea de illo prolaturam quæ sanctorum Patrum canonibus sunt sancita*. Malè porrò conjecit eruditus Marii Mercatoris editor Garnerius, parte 2, dissert. 2 de Synodis habitis in causā Nestorii, pag. 349 et 351, *primam vocationem*, quæ à quatuor episcopis facta est die 21 Junii, *non habuisse vim canonici processus, sed admonitionis tantum et invitationis*. Causam affert quia *dies 21 Junii fuit Dominicus... neque ullus cum episcopis profectus est notarius, quod in citationibus semper accidit; neque citatio conceptis verbis scriptisque comprehensa est, quod tamen canones jubent*. Verum undenam accepit Garnerius jure cautum fuisse ne die Dominicā aut sine notario admonitiones ejus-

modi fierint? Deinde notarius adesse potuit, etsi nulla ejus mentio in actis concilii eò loci habeatur. Primam porrò citationem scripto consignatam fuisse apparet ex actis ipsis, in quibus instrumentum secundæ ex iis citationibus quæ die 22 factæ sunt, ter appellatur in Græcis *τρίτην παρακληρωστικὴν*, quasi diceretur *tertia citatio conscripta*; eoque ad Nestorium misso existimavit *synodus nihil ex iis quæ ad ecclesiasticum ordinem pertinent prætermissum esse*. Certè in citando Nestorio quidquam à sacrâ synodo peccatum esse, nec Nestorius, nec Joannes Antiochenus, nec alius quilibet unquam opposuit. Vide T. 3 concil., p. 457, 460, 562, 574.

4º Latum est judicium in reum contumacem. Tribus enim vicibus juxta canonum præscripta citatus Nestorius, quamvis tunc Ephesi versaretur, ac locum suum in concilio fuisset obtenturus, attamen obstinatè noluit causam suam defensum venire. Ad primam invitationem respondit: *Mecum deliberabo, et siquidem venire me oportuerit, veniam*. Qui ad eum secundò delegati sunt præsules, nequidem ad ejus conspectum admissi sunt, sed hanc ab eo per Florentium militum tribunum responsionem acceperunt: *Cum omnes episcopi simul convenissent, tum ipsum quoque concilio affuturum*. Demum episcopi à synodo tertium deputati *non parvam militum fustibus armatorum manum in ipso ædium Nestorii vestibulo invenerunt*. Atque diu multumque præstolati, ne ad umbram quidem à satellitibus consistere permissi sunt, imò verò insolenter repulsi sunt, deque locis exturbati. Tandem ipsi dimissi sunt à militibus, qui addiderunt et hoc quoque, nempe eā de causā vestibulo se custodes adhibitos, illudque ab ipso (Nestorio) in mandatis accepisse, ne ullum omnino qui à synodo missus esset, ad ipsum ingredi permetterent. Hæc cum ad sacram synodum relata essent, censuit ipsa *quartam citationem*, quā etsi *ecclesiasticis sanctionibus* minimè requisitā, *Nestorium advocare parata erat*, futuram inutilem; ac manifestum esse, eum conscientia nequaquam purā sanctæ hujus synodi conspectum recusare. Quopropter causam Nestorii et dogmata de quibus agebatur, *juxta canonicas sanctiones* recognoscere sine cunctatione incepit; ergo, etc.

5º Judicium illud latum est de crimine certo et juridicè probato; quod quidem ipsa causæ conditio, et modus quo concilium processit, manifestum faciunt. Etenim ferenda non erat sententia de re occultā et sine arbitrio pera-

etâ. Impietates suas in sermonibus publicis prodiderat Nestorius; hos suos sermones et alio scripta toto orbe vulgaverat; jam in synodis Romanâ et Alexandrinâ ejus causa discussa fuerat; Patres concilii plura cum ipso de fide Incarnationis habuerant Ephesi colloquia antequam synodum auspicarentur, multique ex eis, quos inter inprimis notandi Acacius Melitenensis et Theodotus Ancyranus, ambo pietate et doctrinâ insignes ac Nestorio amici, blasphemiarum in Christum triduo ante primam actionem ab eo prolatarum testes fuerant; tandem quæstio integra his terminis concludebatur, an dogmata Nestorio adscripta ejus essent, et Symbolo Nicæno consentirent. Ea igitur fuit causæ Nestorii conditio, ut quæcumque illam constituebant, Patribus Ephesinis cognitum difficilia non fuerint.

Hi autem sic processerunt. Post recitatum Symbolum Nicænum, quod ut vera fidei tessera habitum est, lecta sunt causæ instrumenta, nimirum 1° eximia illa S. Cyrilli epistola 2 ad Nestorium, quam, ut jam observavimus, Patres universi suffragiis sigillatim dictis, ut fidei Nicænæ in omnibus consonam summâ cum laude approbârunt; 2° responsum Nestorii ad hanc epistolam, quod Patres judicârunt Nicæno Symbolo adversari, quodque ideò cum anathemate rejecerunt; 3° litteræ Cœlestini rom. pontificis contra Nestorium ad Cyrillum datæ; 4° epistola Cyrilli tertia ad Nestorium, quâ ei sententiam romani pontificis denunciavit; 5° plura veterum doctorum testimonia, ut scilicet nihil nisi secundum sibi traditam à decessoribus suis doctrinam episcopi statuerent; 6° denique multa ex homiliis, et ex aliis, ut videtur, Nestorii scriptis excerpta, quæ blasphemias in Christum scatere reperta sunt. Insuper auditi testes omni exceptione majores. Nam sacra synodus jussit ut quas Acacius Melitenensis et Theodotus Ancyranus ex ore Nestorii tribus antea diebus blasphemias audiverant, eas coram sancto consessu enarrarent. Quod ii Nestorio amicitia conjuncti, sed Christo et veritati conjunctiores, non sine lacrymis præstiterunt. Tandem his omnibus præmissis et accuratè discussis, Patres sententiam in Nestorium dixere. Ergo eorum judicium de crimine certo et juridicè probato latum est.

6° Latum est servato tempore præscripto. Nempe tempus condictum Patres non prævertère. Imò, quamvis synodus indicta fuisset ad diem Pentecostes Junii septimam, omnemque tardioris adventûs excusationem episcopi ade-

misset imperator litteris ipsis quibus concilium convocaverat, ac tandem sacri consessûs dilatio episcopis qui die præstituto Ephesum se contulerant, valdè molesta esset; attamen diebus quindecim expectatus est Joannes Antiochenus, nec nisi die 22 ejusdem mensis actio prima habita est. Quâ de re audiatur ipsa synodus in Relatione ad imperatores. « Cum omnes itaque, « inquit Patres concilii, juxta præstitutum « nobis terminum Ephesum venissemus, acci- « dit ut Joannes, sanctissimus Ecclesiæ Antio- « chensæ episcopus adventum suum differret. « At nos itineris difficultatem tarditatis causam « rati, post terminum nobis à vestrà majestate « præfixum elapsum, sexdecim totos dies (ha- « bitâ utriusque extremi ratione) sessionem « distulimus. Jam verò alii quidem sanctorum « episcoporum senio confecti, in exterâ regio- « ne morari non sustinebant; alii adversâ va- « letudine in periculum vitæ adducebantur; « nonnulli quoque ex illis in hac Ephesiorum « metropoli diem extremum obierant; quidam « verò rerum penuriâ constricti, nos adeun- « tes instantèr urgebant, ut mox audientiam « auspicaremur. Exactis proinde sexdecim in- « tegris diebus post Pentecosten, ad synodicam « audientiam convenimus. Cum verò Joannes « quoque sanctissimus Ecclesiæ Antiochenæ « episcopus per Alexandrum Apameæ et Ale- « xandrum Hierapolis, religiosissimos episco- « pos, quos præmiserat, nobis significavit, ut « rem propositam aggredieremur; nondum « comparens, longiori tarditate molestiam « sanctæ synodo attulit. Itaque vigesimo secun- « do die mensis Junii, secundum Romanos, « congregati sumus, cum pridè per religiosis- « simos quosdam episcopos, admirabilem il- « lum Nestorium, ut nostro consessui sese ad- « jungeret, pietatisque et fidei examinationi « unâ nobiscum interesset rogavissemus, etc. « Ergo, etc. »

SOLVUNTUR OBJECTIONES. — Obj. 1° : Unâ concilii œcumenici auctoritate Nestorii causa definiendi poterat : siquidem concilium generale, quo lis decideretur, à Nestorio et monachis postulatam fuerat, et ab imperatore indictum. Atqui concilium Ephesinum tunc œcumenicum non fuit, cum actione primâ Nestorius damnatus est. Namque ea synodus non fuit œcumenica, è quâ aberant legati romani pontificis, Joannes Antiochenus patriarcha cum episcopis sui patriarchatûs, et Nestorius patriarcha Constantinop.; atqui actione 1 aberant è synodo, etc.; Ergo.

1° Nego maj. Ad cujus probationem, nego-conseq. Postulatum quidem fuerat concilium generale, et illud indixerat imperator; sed simul diem præstituerat, quo episcopi convenirent; proinde, ut omnia legitimè gererentur, satis erat 1°, eam synodum de Nestorio haberi, quæ die præscripto haberi poterat; 2° in eadem synodo reperiri episcopos auctoritate et numero sufficientes causæ Nestorii expendendæ et dirimendæ; 3° episcopis qui nondum adveniant, et quorum adhæsiō complendæ synodo œcumenicæ videri poterat necessaria, facultatem deinde fieri acta in Nestorium recognoscendi, ut ea, si vellent, calculo suo approbarent. Atqui 1° synodus Ephesina, cum actio prima celebrata est, ea non modò fuit quæ die præscripto, sed quæ post expectatos, diebus adhuc quindecim, episcopos absentes haberi potuit, ut dictum est; 2° Hanc tunc constitisse præsulibus numero et auctoritate sufficientibus causæ Nestorii judicandæ, pariter ex dictis indubitatum. 3° Facta est episcopis absentibus facultas prioris actionis gesta recognoscendi. Quâ quidem facultate uti sunt legati Cœlestini, ut ex actionibus secundâ et tertiâ concilii manifestum est. Debuisset et potuisset Joannes Antiochenus cum suis eadem ratione de judicio in Nestorium lato proferre sententiam. Constat eum à sacrâ synodo ad illud approbandum invitatum fuisse; sed ne auditis quidem ejus legatis, causâque nullo pacto cognitâ, in sanctam synodum insurgere maluit. et ejus sententiam irritam declarare; ergo, etc.

2° Negari potest minor. Etsi enim certior et indubitata magis evaserit auctoritas et œcumenicitas concilii Ephesini, seu subscriptione legatorum Româ à Cœlestino missorum, seu confirmatione romanæ Sedis, totiusque Ecclesiæ approbatione; attamen vel ipsâ actione primâ illud videtur fuisse œcumenicum, universamque Ecclesiam sufficienter repræsentasse. Enimverò synodus quæ ex universâ Ecclesiâ convocata fuit; cui interfuere episcopi ex Oriente ducenti, inter quos episcopi Alexandrinus, Jerosolymitanus, Ephesinus, orientalis Ecclesiæ capita; in quâ romani pontificis et concilii occidentalis sententia, quæ de eadem causâ præcesserat, relata et approbata est; cujus præses fuit S. Cyrillus romani pontificis locum obtinens; ea, inquam, synodus œcumenica fuit, seu Ecclesiam universam sufficienter repræsentavit. Atqui talis fuit synodus Ephesina actione 1, ut diximus; ergo, etc.

Ad probationem minoris, 1° nondum qui-

dem actione primâ advenerant legati quos Româ misit Cœlestinus ut adessent synodo; sed Cœlestini locum in concilio obtinebat S. Cyrillus, cui vices suas commiserat summus pontifex ut latam anno præcedenti in synodo Romanâ adversus Nestorium sententiam executioni demandari curaret; 2° Aberat Joannes Antiochenus ejusque episcopi; sed expectatus fuerat diebus quindecim, et videbatur ut mox dicemus, moras de industriâ nectere; ergo.

3° Resp. ad summum ex objectione sequi, synodi Ephesinæ œcumenicitatem plenam et perfectam, mansisse aliquo modo suspensam usque ad tempus quo à legatis romanæ Sedis actioni primæ nomine Occidentalium subscriptum est, et usque ad schisma invectum à Joanne Antiocheno et perpaucis ejus episcopis, qui sacræ synodo prævalere non poterant; quo schismate effectum est, ut suffragium Joannis ad concilii œcumenicitatem constituendam non ampliùs expectari oportuerit.

Obj 2°: S. Cyrillus sacræ synodo præesse non debuit, quippe qui, ut Nestorium hæresis accusabat, ita propter anathematis quos ediderat à Nestorio vicissim hæresis Apollinaristarum accusabatur; ergo. Nego ant. Præfuit concilio S. Cyrillus nomine Cœlestini summi pontificis, cujus locum, ut diximus in synodo obtinuisse in actis legitur; quapropter concilium Chalcedonense (T. 4 concil. p. 362) Cœlestinum et Cyrillum vocat concilii Ephesini capita. Ad prob. dist.: S. Cyrillus accusabatur à Nestorio, sed ejus accusatio nec juridica erat, nec ad concilium delata, concedo; juridica erat, etc., nego. Maximum intererat discrimen inter accusationem adversus Nestorium instructam, et eam quæ in S. Cyrillum erat conflictâ. Secundum canonicas sanctiones de hæresi Nestorius postulabatur, sententiâ Cœlestini sum. pontif. in concilio Romano post causæ cognitionem lata jam erat irretitus; S. Cyrillus verò, ut ejusmodi sententiam in Nestorium executioni demandaret, vices Cœlestini acceperat, neque ullius criminis, seu ante synodum Ephesinam, seu in ipsâ synodo, juridicè fuit accusatus. Si locum suum occupaturus, ac causam suam defensurus ad sacram synodum Nestorius, ut par erat, accessisset, ibique exceptiones suas in Cyrillum exposuisset, Patres; cognitâ causâ, ea statuissent, quæ ipsis visa fuissent expedire. At certè nemo dixerit accusationem vagam nec coram legitimis iudicibus illatam, posse jura cujusquam suspendere, illumve inhabilem reddere ad ea

quæ ejus muneris sunt. Proindeque, etc.

Inst. S. Cyrillus, Acacius Melitenensis et Theodotus Ancyranus accusatorum et testium partes, in concilio adversus Nestorium egerunt, et simul inter judices sedere; atqui nemo potest esse accusator aut testis adversus aliquem et simul judex; ergo, etc. Resp. S. Cyrillum nec testis nec accusatoris partes in S. concilio sustinuisse. Certè necessum non erat ab aliquo accusationem in Nestorium denuò instrui. Ad cognoscendam ejus causam concilium convocatum fuerat, vicesque in eo quasi promotoris, Petrus presbyter Ecclesiæ Alexandrinæ et Primicerius notarius explevit. Acacius verò et Theodotus nec venerant nec vocati fuerant ad S. synodum ut testimonium adversus Nestorium proferrent; non erant ergo testes propriè et strictè sumpti. Cùm autem ex plurium litis instrumentorum lectione jam appareret Nestorii impietas, placuit Patribus ut ad majorem rei confirmationem ambo auditas à se ex ore Nestorii tribus antea diebus blasphemias coram sacrâ synodo edissererent. Atqui propter testimonium sic prolatum nec jure naturali, nec jure canonico à munere judicis arcebantur; ergo.

Obj. 3° : Sacris canonibus præscriptum est, ut tres admonitiones juridicæ totidem diebus distinctis fiant. Ergo eâdem die 22 Junii non potuit Nestorius bis citari, quod tamen factum est. Resp. Hunc usum olim non obtinuisse. Ipsi Patres Ephesini duas priores monitiones Joanni Antiocheno unâ eâdemque die 16 Julii significaverunt actione 4, p. 638 et 642, et Dioscorus in concilio Chalcedonensi generali IV, ter eâdem die citatus est, T. 4 concil. pag. 384, 396 et 416.

Obj. 4° : Etsi prima actio à primo diluculo in noctem obductam duraverit, liquet tamen tempus causæ Nestorii examinandæ impensum impar tanto negotio fuisse; ergo, etc. Nego ant. Namque Patres concilii tum antequàm Ephesum se conferrent, tum maximè diebus illis quindecim à Pentecoste usque ad diem Junii 22, quâ actio prima celebrata fuit, elapsis, causæ Nestorii cognoscendæ sese parare potuerant, et reipsâ paraverant. Testes sunt Socrates, lib. 7 Hist. cap. 34, et Liberatus, Breviar. cap. 5, episcopus per illud tempus dilationis synodi expendisse quæstionem Incarnationis, et utrum Beata Virgo Deipara appellanda esset diligenter examinasse. De re igitur Patribus inauditâ et peregrinâ non agebatur, ut dictum est. Omne litis instrumentum præstò erat. Habebantur testes idopei. Collectæ fuerant SS. doctorum

sententiæ, quibus excerpta ex sermonibus Nestorii testimonia conferrentur. Denique ex actis concilii manifestum est Patres primâ illâ actione nihil horum omisisse, quæ ad certam et juridicam inquisitionem poterant desiderari. Vide supra. Ergo, etc.

Obj. 5° : Illud judicium canonicum non fuit, quod suffragiis vi extortis latum est. Atqui S. Cyrillus adjuvante Memnone Ephesino episcopo vim Patribus intulit ut eorum adversus Nestorium suffragia extorqueret. Sic enim loquuntur episcopi Joanni adhærentes in *Epistola ad populum Constantinopolit.* : « Ephesum
« advenimus, inquit, ac civitatem quidem om-
« ni tumultuationis genere plenam, universam
« verò synodum non mediocriter turbis agita-
« tam, sanctam autem Ecclesiam velut mare
« sævâ quâdam tempestate jactatam reperimus,
« Cyrillo Alexandriæ antea episcopo et Mem-
« none Ephesino, instar procellæ terram hanc
« tempestatem concitantibus.... Et ille quidem
« (Cyrillus) quinquaginta episcopos ægyptios,
« alter verò plusquàm triginta asianos, et ali-
« quos alios, hos quidem astu circumventos,
« illos verò metu inductos, congregans, nolue-
« runt quidem commune sanctissimorum epi-
« scoporum undecumque adventantium expe-
« ctare concilium.... Nautas verò clericosque
« ægyptios, et agrestes asianos ad episcoporum
« domos mittentes, extremaque interminantes,
« ac infirmiores perterrefacientes, et domos
« forinsecùs inseribentes,... iniquis ipsorum
« actis assentiri compellebant.... Quare hos
« quidem tanquàm malorum auctores deponere
« coacti fuimus, et ab episcopatu omninò amo-
« vimus; cæteros autem qui horum adjutores,
« et administri fuerunt, excommunicationis
« vinculo subjecimus, pœnitentiam non dene-
« gantes, quin potiùs clementiæ ostium sub-
« apertum eis reliquimus. » Et in *Epist. ad sena-
tum Constantinop.* : « Comperimus, inquit, Cy-
« rillum Alexandrinum episcopum, et Memno-
« nem Ephesiorum,... civitatem sanctamque
« synodum turbis tumultibusque complèsse;
« atque ex nautis ægyptiis, asiaticisque rusticis
« satellitio collecto, tyrannidi suæ ministros
« quæsisisse.... omniaque iniquè et illegitimè
« perpetrâsse, sacram sanctæ Pentecostes so-
« lemnitatem celebrari vetuisse, sacra templa
« invictissimorumque martyrum aedes præclu-
« sisse, ita ut ne orare quidem volentibus
« licuerit.... Quapropter prædictos Cyrillum et
« Memnonem deponere et episcopali munere
« exuere compulsi sumus; reliquos verò tyran-

« nidis ac temeritatis illorum fautores et admistros, sive metu adacti, sive fraude quoque allecti fuerint, excommunicationi subiecti mus, » etc.

Nego min. Ad probationem, 1° in actis concilii nulla violentiarum hujusmodi quas Cyrillo et Memnoni fautores Nestorii adscribunt, vestigia videntur; quin potius apparet contrarium. Vide jam superius dicta. 2° Quæ iidem de violentiis illis referunt, omnem fidem superant. Enimverò quomodo comes Candidianus, qui cum copiis, quibus Ephesi imperabat, totus Nestorio patrocinebatur, quique in ejus gratiam tanta molitus est, ejusmodi impetus potestate sibi ad fovendam pacem ab imperatore concessâ non cohibuisset, tantamque in episcopos erga amicum suum propensos vim adhiberi passus esset? Num adeò potentis viri et copiarum ejus præsidio tecti episcopi Cyrillum timuissent, Cyrillum, in quem omnes noverant animum imperatoris (malis Nestorii artibus) valdè esse exacerbatum? Annon ipsis metuendum erat ne comitem offenderent quem loco suo imperator Ephesum miserat? Nonne aulicorum gratiâ cunctos Ephesinos Patres longè vincebat Nestorius ut eventus ostendit? An ipse Cyrillo opibus inferior? an inimicitiarum incapax? an à vi inferendâ et ab artificiis alienus? Nonne ipsum abbatem Basilium et alios quosdam monachos quòd suis erroribus repugnarent, carcere, fame et fustibus, Constantinopoli crudelissimè (1) mulctaverat? nonne, ut ipsis ejusdem Basilii verbis utar, *superbiâ quâ omnes parvipendebat, elatus, pecuniisque et corruptorum quorundam hominum potentiâ fretus, omnia audebat, nullam pœnam iniquis decretam formidans*? Nonne testibus episcopis qui tempore concilii Ephesini Constantinopoli degebant in Rescripto ad commonitorium S. synodi (2), *Nestorii studiosi ecclesiastica omnia ab illo acceperant*? Nonne laicos plures flagellis sævissimè cædi et in exilium mitti (3) effecerat? Nonne in S. Cyrillum inscitaverat viros omni dignos crimine, qui calumnias adversus illum apud omnes et ipsum inprimis imperatorem spargerent (4)? Nonne, ut ex ipso accipimus, testesque sunt SS. Cœlestinus et Cyrillus (5),

in adversarios novitatum suarum censuris severè animadverterat, in sacerdotes videlicet et diaconos depositione, in laicos excommunicatione? Nonne eosdem, et præsertim clericos, minis, vexationibus, artibus malis corrumpere conatus fuerat, multisque exilii pœnam invexerat (1)? Quis porrò, his, quæ indubitata et comperta sunt, perpensis, judicaverit à Cyrillo et Memnone potuisse in episcopos immanem illam vim, de quâ fautores Nestorii conqueruntur, adhiberi, eâque Patrum suffragia adversus Nestorium extorta fuisse? 3° Si vi à S. Cyrillo et Memnone admotâ inducti fuissent Patres Ephesini ad Nestorium damnandum, à judicio in eum lato tunc procul dubio recessissent, cum imperator à Nestorii amicis deceptus, rem denuò tractari jussit. Saltem amborum illorum, Cyrilli et Memnonis, depositioni omnes facilè consensissent, ubi, utroque custodiæ militum tradito, comes Joannes juxta imperatoris præscriptum postulavit, ut ii simul cum Nestorio depositione plecterentur, atque ad ineundam cum Orientalibus communionem vario vexationum genere Patres Ephesinos immaniter adigere conatus est. Atqui nemo ex Ephesinis Patribus à sententiâ in Nestorium latâ unquam recedere voluit, nemo Cyrillum et Memnonem deseruit, nemo depositioni eorum consensit; sed omnes contra postulaverunt sibi reddi episcopos fidei integerrimæ, et eâ de re ad imperatorem scripserunt. Quæ ergo de injustâ vi in episcopos à Cyrillo et Memnone adhibitâ objiciuntur, à Nestorio ejusque asseclis animo factioso conficta fuere, à Joanne Antiocheno levius credita, et ad imperatorem, reginas, senatum, populumque Constantinop. in odium concilii legitimi conscripta.

Quod autem attinet ad solemnitatem Pentecostes quam aiunt Nestorii fautores *celebrari vetitam*, et ad oclusas sacrarum basilicarum fores, observ. 1°, non Nestorium modò, sed neque Cyrillum, neque alios episcopos sacra mysteria solemniter celebrâsse die Pentecostes et Dominicis quæ ad usque incœptum concilium effluerunt, sed coram ipsis *clericos officium explevisse*. Ita colligitur ex actione 2 conciliabuli Joannis Antiocheni quam exhibet Christianus Lupus variorum Patrum Epist. cap. 12, et ex ipso Baluzius in novâ collectione seu Appendice conciliorum, ubi eadem instrumenta, sed prætermisiss Lupi scholiis et notis, integra edidit sub hoc titulo : *Synodicon adver-*

(1) Vide Basilii et monachorum *supplicationem* ad imperatorem, T. 3 conc. p. 429.

(2) Ibid. p. 751.

(3) Socrat. *Hist.* lib. 2, cap. 16.

(4) *Apologetic. Cyrilli ad Theodosium imperatorem*, T. 3 conc. p. 1055.

(5) Item *Epist.* 4, 7, 8 et 12, T. 5 ejus oper. part. 2, p. 22, 31, 33, 34 et 68.

(1) T. 3 concil. p. 328, 372, 373, 376, 397;

(2) Ibid. p. 360, 369, 372, 429.

sus tragœdiam Irenæi. Observ. 2°, id ad jus commune pertinuisse, ut episcopi in alienâ diocesi solemniter mysteria non celebrarent sine obtentâ facultate episcopi loci in quo debebant; ac proinde, donec concilium inceptum esset, Patres qui Ephesum appulerant, inconsultò aut non invitante Memnone solemniter agere collectas nequivisse. De quo vide eundem Christ. Lupum in Scholiis ad caput mox citatum. Observ. 3°, in veteribus monumentis non exprimi quâ de causâ Cyrillo facta non fuerit à Memnone illa celebrandi facultas, vel potius quare Cyrillus et alii episcopi eâ uti noluerint. Conjici meritò potest Cyrillum et reliquos ita sese gerere voluisse, ut citra ullius offensionem Memnon posset Nestorium juridicè accusatum et à Cœlestino jam damnatum, ad collectas populi faciendas, seu ad solemne sacrificium peragendum non invitare. Nempe omnis Nestorio et ejus fautoribus querendi locus tollebatur, ubi eodem modo ille tractabatur, ac Cyrillus aliique episcopi. Observ. 4°, Nestorium de cætero ut episcopum catholicum à Cyrillo et Patribus Ephesinis habitum fuisse, donec sententiâ concilii damnatus fuerit. Observa 5°, neque Nestorium, neque ejus amicos unquam dixisse præclusam sibi fuisse magnam B. Mariæ basilicam, in quâ habitum est concilium. Cæteræ ædes sacræ cunctis potuerunt occludi, ne conventus privati et schismatici à Nestorio et ejus asseclis in iis haberentur.


Inst. Si comitis Candidiani et Orientalium relationes nullam fidem meruissent, gesta concilii statim approbasset pius imperator; atqui tamen non statim, etc.; ergo. Dist. maj., statim approbasset, si momenta, quibus ejusmodi relationum elevabatur fides, operâ fautorum Nestorii ipsum non latuissent, concedo; si latuerint, nego. Itaque satendum est comitis Candidiani, quem tranquillitatis fovendæ causâ Ephesum miserat Theodosius, necnon Joannis et Orientalium relationes in se spectatas magni ponderis imperatori videri debuisse, dum hunc latuere momenta quibus infirmabatur earum auctoritas. Atque apud ipsum procul dubio harum fidem illud maximè augebat, quòd Cyrillum ut hominem factiosum et turbarum amatorem imperator jam ante concilium, Nestorii artibus circumventus, haberet (1). Attamen ejusmodi mendacia decipiendo imperatori non suffecissent, si cætera ipsi fuissent perspecta; ideòque, ut omnia cognoscendæ veritatis me-

(1) Vide *Epist.* imperatoris ad Cyrillum, T. 3 concil. p. 433.

dia ei eriperent, machinas omnes adhibuere Nestorii patroni.

1° Enim operâ comitum Candidiani et Irenæi aliorumque Nestorii studiosorum, nemo à S. synodo missus Constantinopolim pervenire, nullæ ejusdem litteræ imperatori aut aliis quibusvis reddi permittebantur. « Qui Nestorii studiosi erant, » inquit episcopi qui tunc Constantinopoli reperiiebantur, in Rescripto ad commonitorium S. synodi, « qui Nestorii studiosi erant, ecclesiasticaque omnia ab eo acceperant, veritatem circumveniebant; omnia scilicet, tum navigia, tum publicas quoque vias obsidentes neminem prorsus à S. synodo Constantinopolim venire, neque inde rursus ad synodum abire permittebant; ea interim, quæ inimici Christi erant, ultrò citròque deferebantur. » Hæc illi; qui continenter narrant, « Dei providentiâ, epistolam, quæ ex Ephesinâ civitate ad sanctos episcopos et monachos perscripta fuerat operâ cujusdam mendici, qui in arundine eam inclusam gerebat, tandem redditam fuisse, » adduntque, eâ receptâ, « confestim S. Dalmatium aliosque omnes Archimandritas monachorum catervis stipatos, exsurrexisse, hymnosque et psalmos alternantes ad regiam contendisse, » et de omnibus quæ gerebantur imperatorem certior fecisse. Vide ibid. *Apologiam* S. Dalmatii pro S. synodo.

2° Cùm, postulante Dalmatio, imperator jussisset tres à S. synodo episcopos ad se legari, quorum relatione, rerum gestarum cognosceret veritatem, miserunt Nestorii fautores comitem Irenæum ipsi amicissimum, qui litteras Joannis Antiocheni et ejus conciliabuli ad sacram majestatem perferret. Gloriatum est is comes legatos concilii Ephesini à se coram imperatore superatos. Legatorum illorum, utpote ægyptiorum, et Cyrillo addictissimorum, facile potuit fides suspecta reddi. Quidquid sit, ne vera rerum conditio imperatori innotesceret ita tunc effectum est, ut in *Epistolâ* ad omnes indiscriminatim episcopos qui Ephesi aderant à Joanne sacrarum largitionum comite perlata ipsisque recitata, imperator scripserit se et Nestorii, et Cyrilli ac Memnonis exauctorationem ab eorum sanctitate sibi indicatam, approbare. » Ad quæ verba respiciens sacra et orthodoxa synodus in *Rescripto* ad imperatorem sic habet: « Vestræ serenitatis litteræ modò per magnificentissimum gloriosissimumque comitem Joannem nobis lectæ... ostendunt imposturam quampiam et mendacium veraces



« vestras aures obturbavisse. Perinde namque
 « sonant, ac si majestas vestra litteras à nobis
 « accepisset, quæ Cyrilli sanctissimi sacratis-
 « sinique episcopi, et Memnonis sanctissimi
 « Deoque dilectissimi coepiscopi nostri deposi-
 « tionem continerent. » Subduntur plurima
 quibus utriusque defensio validè suscipitur.
 Tunc igitur veritas non potuerat Theodosio sic
 celari, ut Nestorii depositionem non perspice-
 ret esse firmandam; sed simul de Cyrillo et
 Memnone adeò deceptus fuerat, ut utriusque
 exauctorationi cæteros omnes consentire ar-
 bitraretur, ambosque Ecclesiæ paci dandos esse
 putaret.

3º Joannes sacrorum comes, qui initio men-
 sis Augusti 451 Ephesum advenit, *quæ utilia*
perspiceret, ea, auctoritate imperatoris, *perfec-*
turus, brevi cognovit episcopos S. synodi nun-
 quàm Cyrilli et Memnonis depositioni consen-
 suos, neque cum Orientalibus, nisi isti utrum-
 que absolverent, Nestoriumque et ejus dogmata
 condemnarent, esse communicaturos. Cùm
 verò, ut ipse ad imperatorem scribit, *omnibus*
consiliis et operibus ejus interesset Candidianus
comes, mirum non est eum tum agendi ratione,
 tum in relatione ad imperatorem Joanni Antio-
 cheno fuisse, sacræ verò synodo fuisse adver-
 satum. Primò itaque Cyrillum et Memnonem
 Jacobo comiti arcè custodiendos tradidit, Nes-
 torium autem Candidiano. Tum variis modis
 episcopos orthodoxos immaniter vexavit, ut eos
 ad fines suos adduceret. Eos in urbe sic con-
 strinxit, ut nequidem auræ purioris captandæ
 causâ è civitate egredi permiserit. Iisdem omni
 interdixit commercio litterarum, quibus po-
 tuisset Theodosius de luctuoso ipsorum statu
 edoceri. Interim verò Cyrillo et Memnoni ut
 episcopis depositis exilium parabatur, quod S.
 Dalmatius impedivit. Hæc omnia accuratè nar-
 rata lege apud Tillemontium in Cyrillo Alexan-
 drino, art. 79, etc.

Hæ igitur fuere artes, quibus deceptus Theo-
 dosius à suscipiendâ sacrâ synodo retardatus
 est. At cùm octo ex unâquaque parte selectos
 episcopos, quos ad se mitti jusserat, Chalce-
 done audivisset, per semetipsum tandem ex-
 ploratâ rerum veritate, sanctæ synodo se toto
 corde subjecit, et ejus judicium voluit accuratè
 observari; proindeque agendi ratio Theodosii
 erga Ephesinam synodum novum est sententiæ
 ejus canonicitatis argumentum.

Obj. ultimò : Joannes Antiochenus cum suis
 expectari debuisset. 1º Enim is erat unum ex
 capitibus Ecclesiæ orientalis. 2º Notum erat

tum *Litteris* Joannis ad S. Cyrillum humanis-
 simè scriptis, tum præcipuè ex magistriano-
 rum, quos Candidianus miserat, relatione Joan-
 nem quinque solùm dierum spatio Epheso ab-
 fuisse, cùm actio prima celebrata est, eumque
propediem adventurum. 3º S. Cyrillus *Epist.* ad
 Joannem *biduò ante habitum* concilium datâ
 pollicitus fuerat futurum ut *universa synodus*
adventum ejus præstolaretur. Ita testatus est
 Joannes ipse in *Epistolâ* ad imperatorem et in
Relatione ad reginas. 4º Comes Candidianus,
 quem loco suo Ephesi esse voluerat Theodosius,
 Joannis adventum instare cognoscens, nihil in-
 tentatum reliquit, quemadmodum ipse refert
 in actis concilii Joannis, ut Cyrillum aliosque
 episcopos ad differendum quinque diebus judi-
 cium induceret. 5º Præpropere concilii festi-
 natio, schismati, quo Ecclesia duobus annis
 scissa est, infelicem causam attulit. 6º Nesto-
 rius promiserat se ad synodum accessurum,
 ubi *omnes episcopi simul convenissent*; ergo.

Nego ant. et dico 1º nullo jure ad eum ex-
 pectandum Patres fuisse adstrictos. Quod ut
 evidentissimè probetur, satis superque est 1º
 actionem priorem non fuisse celebratam nisi
 elapsis diebus plurimis ab eo tempore, quod,
 nullâ quibusvis episcopis relictâ dilationis ex-
 cusatione præstitutum fuerat; 2º Patres nu-
 mero et auctoritate causæ expendendæ et judi-
 candæ tunc fuisse sufficientes; 3º Non fuisse
 illicò dissolutum concilium, ac proinde gesta
 priora recognoscendi et approbandi non erep-
 tam fuisse Joanni facultatem quâ legati ro-
 manæ Sedis usi sunt. Atqui ex dictis inter
 probationes, et in solutione primæ objectionis,
 hæc tria constant. Ergo ad expectandum Joan-
 nem Antiochenum Patres Ephesinos nullum
 jus alligabat. Ubi observa vel hoc uno ostendi,
 malè ob Joannem non expectatum impeti ca-
 nonicitatem judicii actione 1 latî.

Dico 2º gravioribus œconomix et sapientis
 dispensationis rationibus motum fuisse sacrum
 concilium ad cognoscendam Nestorii causam
 ante adventum Joannis Antiocheni.

Prima fuit, quam notant Patres in *Relatione*
 ad imperatores de Nestorii depositione, his
 verbis : « Cùm omnes juxta præstitutum nobis
 « terminum Ephesum venissemus, inquit,
 « accidit ut Joannes.... adventum suum differ-
 « ret. At nos itineris difficultatem tarditatis
 « causam rati, post terminum nobis à vestrà
 « majestate præfinitum elapsam, sexdecim totos
 « dies sessionem distulimus. » Nempe judicâ-
 runt Patres se Joanni sat temporis concessisse,

ut, si ita tulisset ejus voluntas, venire potuisset. Non ignoro Joannem in Relatione suâ ad Theodosium contendisse, majorem à se variis de causis, quas exponit, non potuisse diligentiam adhiberi; atque ipsum quoque ab Evagrio lib. 1 Hist. cap. 3, et Nicephoro lib. 14, capite 34, excusari. Ubi observa obiter cum Christiano Lupo in Schol. et notis ad var. Epist. cap. 7, rationem quâ isti præcipuè insistent, quòd nempe Joanni ante profectum suum celebrandæ fuerint octavæ Paschales, ne memoratam quidem unquàm à Joanne fuisse. Sed quidquid sit de causis quibus ille à culpâ eximi potest; hic non tam inquirendum, quid, habitâ ratione singularium quarundam circumstantiarum, non potuerit Joannes, quàm, quid de ejus tarditate prudenter sentire debuerit sacra synodus. Atqui hunc de industriâ morari meritò judicatum est. 1^o Enim à festo Paschali, quod erat tempus profectioni ab imperatore (1) fixum, ad usque diem à Pentecoste decimam sextam, quâ prima actio celebrata est, dies intersunt 65; Antiochia verò triginta tantum dierum spatio ab Epheso dissita est, ut Evagrius loco mox citato scribit. 2^o Juvenalis Jerosolymitanus die 5 post Pentecosten (2) Ephesum advenerat, etsi Jerosolyma longius Epheso distet quàm Antiochia; pariterque Joannem anteverterant plures alii, qui longè majori viarum intercapedine distabant (3). Cùm ergo magnam adhiberi diligentiam jussisset imperator, « nec
« ullam vel apud Deum, vel apud se habituros
« excusationem declarâset, qui statim impigrè
« secundum significatum tempus ad destinatum
« locum præstò non forent (4); » meritò à Patribus judicatum est Joannem moras neectere, seu quòd fictâ cunctatione, illius (Nestorii) improbitati gratificaretur, ut postea ex eventu collegit S. Cyrillus in Apologetico ad imperatorem; seu ut Patribus tunc visum est, « quòd
« metueret, ne fortè reverendissimus Nestorius,
« qui ex illius Ecclesiâ assumptus fuerat, loco
« suo moveretur; quæ res ipsi fortassè justum
« pudorem incuteret. » Verba sunt ejusdem S. Cyrilli Epist. ad quosdam de clero Constantinop. Secundam rationem ita exprimunt Patres Ephesini in eadem ad imperatorem citatâ relatione: « Alii sanctorum episcoporum (qui
« tempore præfixo Ephesum se contulerant),

(1) Vide epist. Theodosii ad convocandum concil. missam, T. 3 conc. p. 457.

(2) Socrat. lib. 7 Hist. cap. 34.

(3) Relat. synodi ad Cælestin. T. 3 conc. p. 659.

(4) Epist. mox citatâ.

« senio confecti, in exterâ regione morari non
« sustinebant; alii adversâ valetudine in peri-
« culum vitæ adducebantur; nonnulli quoque
« ex illis in hac Ephesiorum metropoli diem
« extremum obierunt; quidam verò rerum penuriâ constricti, nos adeuntes instantè urge-
« bant, ut mox audientiam auspicaremur. » Tertia ratio est, *Alexandrum Apameæ, et Alexandrum Hierapolis religiosissimos episcopos, quos Joannes Ephesum præmiserat*, quique die Junii 21, pridie quàm inciperet synodus, huc advenisse meritò judicantur (4), nomine ejusdem Joannis Patribus de ejus tarditate conquerentibus significâsse ut rem propositam aggrederentur. Sic ipsi Patres in Relatione ad imperatorem laudatâ verba illorum episcoporum interpretantur; S. verò Cyrillus in Epist. ad quosdam de Clero Constantinop. ipsa eorum verba sic refert: *Præcepit nobis Dominus Joannes episcopus, ut vestrâ pietati dicamus: Si tardavero, quod facturi estis, id faciat. Uterque tamen ille Alexander actioni primæ concilii interesse noluerunt, et protestationi adversus concilium subscripsisse reperiuntur apud Christ. Lup. var. epist. cap. 7. Sed nihilominus reverà dixerunt, quæ Patres concilii et S. Cyrillus ab iis dicta fuisse confidenter affirmant; observatque S. doctor in Apologet. episcopos illos à Joanne Antiocheno, quòd ejus nomine hæc significâssent, nunquàm fuisse mendacii accusatos. « Eos, inquit, qui adventum ejus
« præcurrerunt, et sacræ synodo denuntiave-
« runt ipsum expectandum non esse, nec se
« venisse spontè, sed ipsius mandata ferentes,
« cur non potiùs exosos habuit ut mendaces ac
« seductores, sed eosdem inter præcipuos amicos habet? » Ergo non modò nullo jure ad expectandum Joannem S. synodus tenebatur, sed contra gravioribus rationibus mota est ad eum non expectandum.*

Jam ad ea quæ in probationem allata sunt, sigillatim respondeo. Ad primum, etsi Joannes unus esset è capitibus Ecclesiæ orientalis, attamen eo absente sacra synodus causæ Nestorii expendendæ et judicandæ par erat, ut dictum est. Satis ergo fuit ipsum (ut cunctis videbatur) cunctantem expectari diebus sexdecim, nec ipsi auferri facultatem recognoscendi acta iisque subscribendi. Quid quòd potuisset S. synodus rationes tantæ dilationis ab eo postulare? Ad secundum, constabat quidem ex

(4) Vide Christian. Lupum in Schol. et not. ad var. epist. cap. 7, p. 29, et Tillemont. in S. Cyrill. Notâ 37, T. 14.

epistolâ Joannis ad Cyrillum et ex magistrianis non amplius quinque aut sex dierum spatio abfuisse Joannem; at in epistolâ ad S. Cyrillum itineris molestias ita exaggerabat, ut certum esse non posset an non diuturniores moras is esset tracturus. Præterea, satis superque expectatus, per præmissos à se episcopos S. synodo *significaverat, ut rem propositam Patres aggredierentur*. Ad tertium, epistola sancti Cyrilli ad Joannem data fuerat die 20 Junii, biduò scilicet ante primam concilii actionem; postea verò, nempe die 21, ab utroque Alexandro S. synodus accepit, ut diximus, hanc esse Joannis mentem ut res proposita perageretur. Ergo, etc. Deinde dici potest universam synodum, ut S. Cyrillus scripserat, Joannis adventum *præstolatum esse*. Siquidem, cum Joannes Ephesum advenit, conclusa nondum erat sacra synodus, legavitque ipsa episcopos qui ei appropinquanti obviam irent, eumque de Nestorii depositione certiore facerent, ne illum ut episcopum ipse inviseret; quos quidem legatos à militibus quibus erat stipatus repellere jussit, nec eos pluribus horis præstolatos audire consensit nisi post celebratum suum conciliabulum, quod itineris *pulvere adhuc aspersus* habuit, et in quo Cyrillum et Memnonem nec auditos nec citatos deponere ausus est. Confer Epistolam Memnonis ad clerum Constantinop. T. 3 concil. p. 762 et 763, cum actis conciliabuli Joannis ibid. p. 594. Ad quartum, 1º comes Candidianus ad tranquillitatem fovendam missus fuerat, non ad diem, quâ concilium celebrandum esset, determinandam. Ejusmodi diem litteris suis condixerat imperator; congregatisque episcopis numero et auctoritate liti expendendæ sufficientibus, nulla esse poterat majoris dilationis necessitas. 2º Non modò Joannis Antiocheni, sed et cæterorum episcoporum, qui ex Italiâ et Siciliâ proficisci debuerant, volebat Candidianus adventum expectari; ac metuendum erat ne Joannes, qui fictæ cunctationis in suspicionem veniebat, eandem quoque sententiam post adventum suum amplecteretur; quo posito sacræ synodi initium in diem incertam rejectum fuisset. Ad quintum, agendi ratio Joannis, non festinatio concilii, schismatis causa extitit. Certè episcopos ad se à concilio missos audire debuisset, ad sacram synodum accedere, acta concilii secum communicari postulare, si quid in iis sibi videretur esse reprehendendum, immutandum, aut exponendum, illud mediâ in synodo objicere, de

dogmate cum Cyrillo et aliis episcopis amicè colloqui; denique non debuisset affectibus humanis, doloris, iræ, Nestorii amicorum inprimisque comitum Candidiani et Irenæi instigationibus se tradens, ipso adventûs sui die, confestim congregatis episcopis quibusdam, causâ non cognitâ, et ex unius Candidiani relatione, ne auditis quidem præsulibus ad se à concilio delegatis, Cyrillum et Memnonem exauctorare, et integram ducentorum Patrum synodum anathemati subicere. Hæc à legibus omnibus abhorrens Joannis agendi ratio schismatis sola causam attulit. Ad sextum, Nestorius ad defendendam coram synodo legitimâ causam suam juridicè vocatus, se sistere debuisset, non tergiversari; hæreseosque convictus, meritò ut contumax condemnatus est.

CONCLUSIO III. S. Cyrilli agendi ratio in causâ Nestorii malè redarguitur, quæ potiùs maximè laudanda est. Probatur 1º eorum consideratione quæ S. doctor in hac causâ, seu ante synodum Ephesinam, seu post eam synodum, seu Ephesi gessit.

Et 1º quidem inductione liquet præcipua gesta ejus ante synodum Ephesinam, ipsi non posse vitio verti. Enimverò, 1º nulla alia ipsi fuit dissensionis cum Nestorio causa præter profanas istius novitates (1). 2º Epistolæ ad solitarios Ægypti, quam adversus Nestorii errores primam vulgavit, summa fuit episcopo Alexandrino conscribendæ necessitas. Priores namque Nestorii homiliæ ad illos usque solitarios pervenerant, qui maximè conturbabantur tum earum lectione, tum ab hominibus quibusdam eorum fidei simplicitatem subvertere conantibus, et, utrùm Maria vocanda esset *Deipara*, in dubitationem adducentibus. Duos priores Nestorii sermones hac epistolâ S. Cyrillus confutat; at ita parcit personæ, ut nec ejus appellet nomen. Scripta est anno 429 paulò post Pascha, quod illo anno incidit in diem 7 Aprilis (2). 3º Nihil sapientius, moderatius ac generosius epistolâ primâ, quam S. doctor ad Nestorium scripsit, cum rescivisset eum molestè ferre se in epistolâ ad solitarios refutatum. In hac primâ ad Nestorium epistolâ significat S. Cyrillus multorum scandalorum causam afferri iis sermonibus qui sub ejus nomine divulgabantur; nempe ad eum leniùs in viam

(1) Vide Epist. 7 S. doctoris T. 5 ejus operum edit. Paris. 1658, p. 31, et alteram ejusdem T. 3 conc. p. 440, 441.

(2) Habetur T. 5 concil. p. 19, et apud S. Cyrill. T. 5, part. 2.

reducendum, utrum ipsius essent illi sermones videtur dubitare. Rogat ut, si quid ipsi incauto exciderit, illud emendare dignetur, nec *Deiparam* dicere reformidet. Demum addit se à defendendâ divinitate Christi non potuisse temperare, et pro eâ usque ad extremum vitæ pugnaturum. Exarata est hæc epistola an. 429, an æstate, an autumno, non satis compertum est (1). 4° Ex elatâ Nestorii responsione, quæ tom. 3 concil. p. 515, legitur; nihil se inprimis suis litteris profecisse intelligens S. Cyrillus, secundas ad Nestorium dedit litteras in quibus apertâ dogmatis catholici expositione, cum ad avitam fidem revocare conatur; ejus quidem consilii sapientiam nemo non videt. Ejusmodi litteras secundas ad Nestorium jam non semel laudavimus (2). Dogma catholicum de duplici naturâ et unicâ personâ Christi in iis tam dilucidè explicatur, ut à conciliis contra Nestorium et Eutychen ex æquo approbari meruerint. Scriptæ sunt anno 450 post diem 26 Januarii et ante Februarii 14. 5° Jam supra annotavimus Nestorium in concepto errore malè constantem dogmaticæ S. Cyrilli epistolæ animo acerbo et superbiæ pleno, ac parùm sincerâ fide respondisse. Tunc judicavit S. Cyrillus è re catholicâ esse, ut de Divinitate Christi et unicâ in eo Verbi divini personâ ad Theodosium imperatorem, ad sponsam ejus Eudoxiam, ad Pulcheriam Augustam et ejus sorores scriberet, ne scilicet artibus Nestorii eorum fides corrumperetur. In scriptis quæ ad eos omnes direxit, se fidei orthodoxæ strenuum defensorem ostendit, tacitoque Nestorii nomine ejus errorem cum magnanimitate confutat (3).

6° Non priùs ad Cœlestinum sum. pontificem Nestorii causam S. præsul detulit, quàm accepisset ipsummet Nestorium, spe Ecclesiæ romanæ ad suam sententiam adducendæ, huic scripsisse pontifici, eidemque homilias suas per Antiochum virum illustrem et præpotentem misisse. Quapropter latori litterarum suarum Possidonio diacono injunxerat, ne eas Cœlestino redderet, si ad eum litteræ Nestorii non pervenissent (4). 7° Delegatus à Cœlestino ut latam in synodo Romanâ adversus Nestorium sententiam ipsi denuntiaret, totius Ægypti

synodum Alexandriae propter illud negotium convocavit, ut scilicet consultius res ageretur, et majus denuntiationi pondus adjiceretur. Facendum quidem est ipsum in epistolâ quam ex hoc concilio ad Nestorium misit (1) et in anathematismis illâ contentis, potuisse clariùs exponere ac magis inculcare fidem de duabus in Christo naturis integris et inconfusis. Sed de eo dogmate non agebatur. Unus erat S. doctori scopus, ut fidem unius in Christo personæ subscribendam Nestorio proponeret, variisque ejus ambiguitatibus et effugiis obviam iret. Satis ergo fuit, dum hæc executus est, dogma duplicis naturæ ab ipso relinqui illæsum. Si idcirco vituperetur ille, quòd aliquando majori cautione fortè potuisset malevolorum interpretationes pravas antevenire, jam cum ipso vituperandi venient SS. doctores quotquot profligandis quibusvis hæresibus feliciter laborârunt. Hactenùs ea attendimus quæ ante synodum Ephesinam in causâ Nestorii S. Cyrillus egit, eaque gloriæ, non vituperationi comperimus ipsi esse debere.

2° Quæ gessit Ephesi non minùs laudanda sunt. Indubitatum est S. doctorem in retinendâ voce *Deiparæ* et in damnando Nestorio magnam Ephesi habuisse partem; illius præsertim operâ eas Patrum auctoritates, variaque Nestorii testimonia collecta fuisse, quæ in mediâ synodo lecta sunt, et ad instruendam litem magno usui fuerunt; demum à latâ in Nestorium sententiâ S. præsulem nullâ ratione, nullâ vi potuisse dimoveri. In his porrò duo attendi debent, res ipsa nempe, et modus quo ea gesta est. Rem S. doctori laudi esse dandam evincunt argumenta quibus supra ostendimus Nestorium hæresi fuisse infectum, et canonico judicio damnatum. Modus verò quo illud negotium S. Cyrillus promovit, si actis et concilii ejusque synodicis relationibus et epistolis stemus, omni pariter justâ reprehensione caret, ut ex dictis conclusione 2 facillè colligere est. Quas autem ex actis conciliabuli Joannis Antiocheni accusationes accersunt S. præsulibus obrectatores, de vi ab ipso in episcopos adhibitâ, etc., eas jam diluimus in resp. ad object. adversus 2 conclus.

3° Post concilium, Ecclesiæ utilitati ac paci restaurandæ se victimam præbuit. Injuriarum sibi à Joanne aliisque Orientalibus illatarum immemor, easque libenter Ecclesiæ bono concodens, pro illis sibi satisfieri nunquàm postula-

(1) Legitur T. 3 concil. pag. 515, et ap. S. Cyrill. T. 5.

(2) Extant T. 3 conc. p. 515 et seqq., et ap. S. Cyrill. T. 5, part. 2.

(3) Extant hæc scripta T. 3 conc. p. 46 et seqq. et 105, 225, et T. 3 Op. S. Cyr. part. 2.

(4) Vide T. 3 conc. p. 379 et 451.

(1) Habetur T. 3 concil. p. 395, et ap. S. Cyrill. T. 5, part. 2.

vit. Auctor fuit pontifici Cœlestino, ut unius Nestorii damnatione contentus, cæteris qui ipsius partibus faverant (dummodò ejusdem Nestorii proscriptioni consentirent), portam reconciliationis aperiret; scriberetque ad omnes Ephesinæ synodi episcopos, ut unam dogmatum Nestorii condemnationem à Joanne et ab Orientalibus postularent; quod quidem S. doctoris consilium secutus est Xystus III, qui Cœlestino interim mortuo successerat. Ne schismatis extinctioni et unitatis restitutioni ullâ in re obesset, cum Joanne Antiocheno, Theodoreto, et aliis Orientalibus humanissimè egit; pro suâ et anathematismorum suorum defensione longè moderatiùs scripsit, quàm ab adversariis fuerat impugnatus; in hæreses, de quibus falsò et immeritò accusatus fuerat, anathema intorquere, duasque in Christo naturas, quantum ad rem ipsam, ita clarè exprimere et profiteri satègit, ut ipse Theodoretus ejus probaverit doctrinæ expositiones. Scripta quidem à se in Nestorium vulgata, anathematismosque suos proseribere noluit, et meritò sanè; sed eorum nullam, in concludendâ pace, mentionem fieri consensit, etsi satis prævideret inimicos suos ex illo silentio occasionem capturos spargendi in vulgus eum doctrinam suam emendâsse. Tandem professionem Joannis Antiocheni aliorumque ejus episcoporum orthodoxam libentissimè suam fecit: cùmque fidem catholicam, et concilii œcumenici auctoritatem in tuto positas vidit, pacem sine cunctatione conclusit. Quæ quidem omnia ex instrumentis innumeris constant. Vide duas epistolas Xysti III, Rom. pontif. ad S. Cyrillum apud Cotelierum in *Eccles. Græcæ monumentis*, edit. Paris. 1677, et seq. T. 1, pag. 42 et seq. ad 47; Epistolam S. Cyrilli ad Joannem Antiochenum pro concludendâ eum Orientalibus pace T. 3 concil. p. 1105, et T. 5 Oper. Cyrilli part. 2, p. 104; Epist. alteram Cyrilli ad Acacium Berœensem apud Balusium in *Appendice conciliorum*, ed. Paris. 1685, p. 746, 747; Epistolas Cyrilli ad Theognostum, Joannis Antiocheni ad Cyrillum, Cyrilli item ad Donatum, ad Maximianum, etc., loco citato Operum S. Doctoris p. 152, etc.

Probatur 2^o conclusio ex judicio quod Ecclesia et SS. Patres de S. Cyrilli scriptis, laboribus et virtutibus tulerunt. Scripta ipsius, præsertim verò secunda ejus ad Nestorium epistola, et ejusdem ad Orientales rescriptum, doctrinæ catholicæ regula habita sunt. Secundam ad Nestorium epistolam approbârunt Romana synodus, quam Cœlestinus ad causam

Nestorii cognoscendam coegit, synodus Alexandrina totius Ægypti; concilium Ephesin. particularibus singulorum Patrum suffragiis; concilium Constan. sub Flaviano habitum anno 448; concilium Chalcedonense generale IV, tum actione 1, dùm scilicet Patribus lectus est locus concilii Constantinop. mox citati in quo hæc epistola comprobatur, tum actione 5, in definitione fidei, ubi etiam approbatur epistola S. doctoris ad Orientales. Idem concilium actione 2, S. Leonis doctrinam probat ut S. Cyrilli doctrinæ consentaneam. SS. Pontifices Cœlestinus et Xystus III summis laudibus S. Cyrillum extulerunt (1). S. Leo Anatolium, ut de fide Ecclesiæ instrueretur, ad epistolam à S. Cyrillo Nestorii refellendi et sanandi causâ conscriptam remittit Epist. 52 et 154 (2). Eusebius Dorylæensis in concilio Constantinop. jam citato (3) ut tesseram fidei adversus Nestorium et Eutychem proposuit secundam S. Cyrilli ad Nestorium epistolam, quam inquit, scripserat S. Cyrillus *habens amorem Dei et zelum fidei*. S. Flavianus ibidem (4) ait S. *Spiritus verbis resistere* eum qui epistolæ S. Cyrilli adversatur; et Basilius Seleuciensis (5) tradit sapientiâ S. Cyrilli compressam fuisse impietatem Nestorii, aliàs toto orbe obtenturam. Idem Basilius in Epist. episcoporum Isauriæ ad Leonem imperatorem (6) scribit S. doctorem *uno fonte et iisdem syllabis à se conscriptis, et impietatem Nestorii perculisse, et contra zizania prævæ sectæ Eutychis.... falcem sectionis apertissimè præparâsse*. Theodoretus in conc. Chalced. actione 2 (7), ad firmanda quædam epistolæ S. Leonis loca adduxit testimonium aliquod S. Cyrilli in quo S. doctor eodem modo loquitur ac S. Leo. Idem Theodoretus, qui Cyrillo tantoperè adversatus fuerat, ejus scriptorum auctoritate contra Eutychianos usus est, eum primis orbis luminibus accensens, Epist. 85, et Dial. 2 (8). Theodosius imperator anno 448, ulticibus flammis tradi jussit quæcumque scripta concilio Ephesino et doctrinæ S. Cyrilli non consentirent.

Innumera alia afferri possent in gratiam S. Cyrilli testimonia; sed quibus hæc vindicando

(1) Vide T. 3 concil. p. 376, 377 et 1077. et *Monum. Græc.* Cotelierii T. 1, p. 42, etc.

(2) Edit. Quesnel. T. 1, p. 545 et 714.

(3) T. 4. conc. p. 157.

(4) Ibid. p. 175.

(5) Ibid. p. 181.

(6) Ibid. p. 925.

(7) Ibid. p. 369.

(8) Edit. Paris. 1642, T. 3, p. 959, 960, et T. 4, p. 110 et 111.

S. doctore satis non erunt, nulla etiam alia sufficerent.

Dices 1^o : S. Isidorus Pelusiota ad ipsum S. Cyrillum, cujus amicissimus erat, scribens, cum redarguit quod odio impulsus, propriasque inimicitias persequens et ulciscens, Nestorii damnationem promovisset; quemadmodum avunculus ejus et prædecessor Theophilus, adversus S. Joannem Chrysostomum episcopum Constantinop. furorem effuderat. Habetur hæc epistola lib. 1 Operum S. Isidori, Epist. 310, et laudatur à Facundo Hermianensi lib. 2, c. 4. Eodem etiam modo apud Facundum loco citato Gennadius Constantinopolit. invehitur in S. Cyrillum, quem vocat *secundum Væ malum Alexandriæ*. Dist. ant. S. Isidorus Pelusiota ex rumore à Nestorii fautoribus sparso hæc scripsit, quorum postea falsitatem agnovit, concedo : secus, nego. Amicum suum S. Cyrillum, quem consiliis et monitis adjuvare consueverat, S. Isidorus in epistolâ laudatâ admonet eorum quæ adversus ipsum divulgabantur, non verò hæc à se pro certis haberi significat. *Multi, inquit, ex iis qui Ephesi coacti sunt, te traducunt ut tuas inimicitias persequentem et ulciscensem, etc.* Horumce porrò rumorum falsitatem à S. Isidoro deinde fuisse agnitam, patet ex epistolâ ejusdem lib. 1, 324, in quâ, veritus ne nimio pacis studio Cyrillus ultra metas abriperetur, eum adhortatur ut in susceptâ veritatis defensione præstet immobilis. *Te oportet, inquit, vir admirande, firmum atque constantem semper manere : sic nempe ut nec metu cælestia prodas, nec tecum ipse pugnare videaris, etc.*

Quod ad Gennadium Constantinopolitanum attinet, hæc et alia quæ refert Facundus, adversus S. Cyrillum scripsit, quod ejus anathematis mos malè intelligens, arbitraretur S. doctorem contendere *divinam Christi naturam et impassibilem passionibus subjacere*. Quapropter eis Facundus assentitur qui Gennadium excusabant quoniam *potuerat de christianâ fide quæ recta sunt credens, non intellectum beatum Cyrillum bonâ intentione culpæ*. Illa verò procul dubio scripsit Gennadius antequàm ad sedem Constantinopolitanam eveheretur, imò ante pacem cum Orientalibus anno 453 reintegratam; cum scilicet Maximianus, Nestorii loco suffectus anathematis à S. Cyrillo proscribi postulabat.

Dices 2^o : Solo odio moveri potuit S. Cyrillus ad urgendum tanto impetu Nestorii judicium, ut unicâ actione causa ejus instructa fuerit et definita; ergo, etc. Nego ant. Fatendum est in

expendendâ et definiendâ Nestorii causâ S. Cyrillum et Patres Ephesinos maximâ usos esse diligentiam. At 1^o concedendum quoque eos tamen in ejusmodi ferendo judicio præscripta canonum transgressos non esse. 2^o Malè et temerè odio Cyrilli in Nestorium, potius quàm studio fidei adscribitur S. synodi diligentia. Etenim, quamvis firmissimis constaret argumentis idcirco ejusmodi fuisse adhibitam in deponendo Nestorio celeritatem, quod timerent Patres ne post Joannis Antiocheni adventum ea depositio difficilius statueretur, non ideo S. Cyrillus dicendus esset odio eum voluisse opprimere. Certè erroris christianæ religionis eversivi postulabatur et manifestus erat Nestorius, ut ex dictis liquidum est. Metuendum erat ne Joannes, Ecclesiæ suæ, è cujus clero Nestorius assumptus fuerat, honori plus æquo consulens, et præterea hominis personæ addictissimus, de anathematismis S. Cyrilli, quos non intelligebat, magnas in concilio turbas excitaret, negotii consummationem in longum duceret, aliosque adhuc episcopos expectandos esse contenderet; errore interim grassante novasque vires serpendo in dies acquirente. Ergo tarditas et procrastinatio, quæ plerisque in rebus odiosa est, hic summè erat periculosa. Ergo studio fidei Cyrillus et Ephesini Patres moveri potuerunt, et reipsâ moti sunt ad sententiam canonicam adversus Nestorium sine cunctatione ferendam; proindeque eorum diligentia præpensæ Cyrilli in Nestorium simultati præposterè et perversè attribuitur.

§ 5. *De agendi ratione et fide Joannis Antiocheni aliorumque qui Nestorio patrocinati sunt.*

CONCLUSIO. Joannis Antiocheni et ejus conciliabuli in synodum Ephesinam agendi ratio à legibus abhorrens et schismatica; nec ipse tamen, nec orientales episcopi (paucissimis tantum exceptis) hæresi Nestorianæ adhæserunt.

Probatur prima pars, nempe schismaticam planè fuisse agendi rationem Joannis Antiocheni ejusque conciliabuli. Nam 1^o, Joannes in suo conciliabulo contra Cyrillum et Memnonem jurisdictioni ejus nullâ ratione subjectos sententiam depositionis tulit (1). 2^o Nullâ observatâ juris formâ, et paucis tantum episcopis stipatus (2), adversus ducentos episcopos in concilio œcumenico congregatos anathema intorquere ausus est (3). 3^o Nihil intentatum

(1) Vide acta hujus conciliabuli T. 3 conc. p. 389 et seq. et 698, etc.

(2) Ibid. p. 599, 557, 655, etc.

(3) Ibid. p. 595, 597, etc.

reliquit ut utrumque illud facinus apud imperatorem defenderet, ejusque auctoritate hæc iniqua et abnormia decreta confirmari impetraret (1). 4^o Variis epistolis, variisque synedis Tarsi et Antiochiæ eâ de re habitis, patriarchatûs sui Ecclesias ad partes suas adversus S. Cyrillum et synodum Ephesinam amplectendas impulit, et sententiam conciliabuli confirmavit (2). Atqui manifestum est ejusmodi agendi rationem à legibus planè abhorre- re et schismaticam esse; ergo, etc.

Frustra, ad excusandum Joannem et ejus episcopos, opponeres, sic eos se gessisse 1^o quòd Nestorio amicitia conjuncti hunc ab hæresi immunem faciliè arbitrarentur et præproperâ celeritate damnatum; 2^o quòd existimarent S. Cyrilli anathematis Apollinarismi labe infectos et à synodo Ephesinâ approbatos. Enimverò ex dictis liquidò constat illa duo, nempe Nestorium absolvendum et damnandos anathematis, immeritò ab iis credita fuisse. Atque, etsi utrumque gravissimis conjecturis ducti opinati fuissent, nihiloseciùs tamen summè culpanda esset et prorsus inexcusabilis eorum agendi ratio. Quid ita? quia abnormis omninò illa fuit et canonibus repugnans; quia malo, quod inductum falsò putabant, augendo lugendæque divisioni invehendæ solùm idonea; quia alia minùs violenta, legibus magis consentanea et efficaciora media potuissent adhiberi. Vide S. Cyrillum in Apolog., tom. 3 conciliorum, pag. 4044.

Probatur secunda pars, scilicet Joannem Antiochenum, et episcopos orientales (paucissimis exceptis) Nestorianæ hæresi non adhæsisse, 1^o inspectione eorum quæ in causâ Nestorii ab iis peracta et scripta sunt. Antequàm haberetur Ephesina synodus, Joannes ad Nestorium scripsit egregiam epistolam à nobis jam supra laudatam, in quâ unius personæ dogma disertissimè exprimit, Virginem dicendam esse *Deiparam* contendit, ac Nestorium, à quo solùm vocis Θεοτόκου usum, non sensum, rejici supponebat, magnoperè hortatur, ut illud « nomen quod à multis sæpè Patribus usurpatum, scriptum, ac pronuntiatum est, adjungere non gravetur; neque vocabulum, quod « piam rectamque notionem animi exprimit, « refutare pergat. » Additque « non solùm se

« hanc epistolam dictasse, sed præsentibus « multis episcopis..... in fidei doctrinâ instru- « ctissimis et Nestorii studiosissimis, » horum- que sex nominat, inter quos notandus venit celebris Theodoretus episcopus Cyri.

In actis conciliabuli, quod stante synodo Ephesinâ habuit, in relationibus et in epistolis inde missis, in variis eorum, quæ postea in gratiam schismatis egit, superstitionibus instrumentis, fidem unius in Christo personæ nusquam læsam deprehendes. Anathematis quidem S. Cyrilli perpetuò rejicit, nimiâque celeritate et vi adhibitâ damnatum Nestorium contendit; at anathematis malè intelligens pravos Apollinaris sensus iis affingebat, et dogmatum Nestorio adscriptorum defensionem nullâ ratione suscepit. Quid quòd illa ipsa fidei professio quam, ut mox dicemus, Cyrillus pacificâ suâ epistolâ approbavit, Ephesi medio in æstu litigii post adventum comitis Joannis fuit edita, et in relatione ejusdem Joannis tunc temporis ad imperatorem missâ, quam Lupus publici juris fecit, continetur? Vide Lup. Epist. Varior. Patr. cap. 17, edit. Lovan. 1682, p. 52, et Notas Lupi ad idem caput, p. 70 et 71. Ex quo autem anno 432 de pace agi cœptum est, manifestè apparuit Joannis et plerorumque Orientalium fidem semper mansisse integram et illibatam. Nam 1^o, ubi primum Joannes prospexit S. Cyrillum in Epistolâ ad Acacium Berœensem duplicis naturæ fidem clarè professum esse, eo ipso, etsi personæ unitas in eâdem hâc epistolâ non minùs disertè exprimeretur, S. præsulis doctrinam esse catholicam agnovit; hancque epistolam idem Acacius, Theodoretus, et complures alii Orientales ut orthodoxam quoque habuerunt. 2^o Anno 433, mense Martio, è synodo Antiochenâ synodalem ad S. Cyrillum per manus Pauli Emiseni pacis sequestri misit epistolam, in quâ se Ephesinæ synodo, Nestorii damnationi, et successoris ejus Maximiani ordinationi subscribere significavit, et insuper adjecit modò memoratam fidei professionem, dogma catholicum de Incarnatione, et personæ unitate ita clarè continentem, ut hanc suam fecerit, et integram transcripserit S. Cyrillus in præclarâ illâ ad Joannem epistolâ supra laudatâ, quæ incipit: *Lætentur cœli*, etc. Hanc verò Cyrilli epistolam, quâ pax anno 433 omninò conclusa est, approbârunt non modò Joannes cum concilio suo (1), sed

(1) Ibid. p. 601, etc. 697, etc.

(2) Vide Lup. Epist. Varior. Patr. cap. 18, 19, 39, 136, 141, 174, etc.; Mar. Mercat. edit. Garnerii, T. 2, p. 357; Socratem, Liberatum, etc.

(1) Liberat. Breviar. cap. 8.

etiam Theodoretus (1), ipse Andreas Samosatenus (2), qui mox memoratam S. Cyrilli ad Acacium epistolam improbaverat (3), et ferè omnes orientales episcopi. 3^o Joannes, pace cum Cyrillo redintegratà anno eodem 453 omnes patriarchatùs sui episcopos encyclicà epistolà (4) monuit, S. Cyrillum eximio rescripto, cujus eis exemplar misit, omnia dubia et ambiguitates sustulisse, eosque ad pacem amplectendam invitavit et adhortatus est, atque omni ope et operà deinceps enixus est ut omnes ad Ecclesiæ unitatem (5), etiam cum propriæ existimationis dispendio (6) revocaret, donec Alexandri Hierapolitani expulsionemense Aprili an. 455 schisma penitus extinctum fuerit. 4^o Pravis Nestorii sensibus propius inspectis, Joannes ejus condemnationi pacem concludendo consenserat; hanc enim conditionem exegerat S. Cyrillus. Cum verò novator è monasterio suo litteris et colloquiis multos corrumpere, turbasque agere iterum moliretur, hunc anno 456 Oasin in exilium amandari Joannes à Theodosio impetravit (7).

2^o Eadem conclusionis pars evincitur etiam multis testimoniis. Ipse Joannes in Epist. ad Xystum III, rom. pontif. Ecclesiæ suæ fidem de Incarnatione nullum passam esse detrimentum his verbis testatur : « Placuit et nobis quod », inquit, in synodi sententia, quā Nestorium deposuit, acquiescere, ipsumque pro deposito habere, ac blasphemam illius doctrinam anathematizare; eò quòd nostræ Ecclesiæ, perinde ac vestra sanctitas, rectam semper inculpatamque fidem tenuerint ac servaverint, eandemque populis tradiderint. » Cui declarationi adjungit fidei suæ expositionem quam ad Cyrillum miserat. Xystus III, sum. pontifex in Epist. ad S. Cyrillum : « Non se exuli vestro (Nestorio), inquit, sanctus frater noster Joannes addiderat, non ejus blasphemā prædicatione deceptus; nam, quantum rerum exitus docet, suspendit suam (de Nestorii condemnationis æquitatem) sententiam, non negavit. » S. Cyrillus in Epist. ad Valerianum : « Religiosissimi, ait,

« totius Orientis episcopi, unā cum domino meo Joanne religiosissimo Ecclesiæ Antiochenæ episcopo scriptā dilucidāque confessione omnibus palam fecerunt, se profanas Nestorii vocum novitates æquè ac nos condemnasse et anathematizasse, seque nullo unquam loco eas habuisse. » Vide et epistolam ad Acacium Melitenensem. Facundus lib. 1, cap. 5, tum Orientalium, tum S. Cyrilli fidem semper fuisse orthodoxam ponit, atque id apertum factum fuisse ait cum pax redintegrata est. *Quia, inquit, nec illi quidquam expetiverunt indignum, nec ille quod expetitur est (nempe duarum naturarum confessionem) denegavit.*

Probatum tertia pars, nempe paucissimos tantum excipiendos esse Orientales, qui fortè in Nestorianam hæresim impingerint. Scilicet ubi pax à Joanne cum Cyrillo inita fuit, episcopi patriarchatùs Antiochiæ in tres partes scissi sunt. Joanni Antiocheno plerique adhæsere, iique cum Cyrillo et Maximiano in Nestorii locum ordinato communicaverunt, et Nestorii condemnationi consenserunt (1). Alii numero longè pauciores non semel laudatam Cyrilli ad Joannem epistolam ut fidei conformem calculo suo comprobârunt, et cum Joanne Nestorium damnari non exigente, servandam esse communionem censuerunt. Cæterum voluere ii anathematismos Cyrilli non esse orthodoxos, et Nestorium injustè damnatum, ac proinde latæ adversus ipsum sententiæ non esse subscribendum. Ita cum episcopis Euphratesiæ Zeugmate in concilium coactis anno 453, statuit Theodoretus (2) qui deinde Nestorii personam non prius condemnavit, quàm à concilio Chalcedonensi generali IV, ad id adigeretur. Nota tamen illum interim communicasse cum iis qui Nestorium condemnabant; judicans scilicet satis sibi esse lato injustè, ut putabat, ab aliis in amicum suum judicio album non adjicere calculum. Alii ipsam epistolam Cyrilli ad Joannem hæresis Apollinaristarum labe infectam habuerunt, et à Joannis patriarchæ sui communione, quòd ille cum Cyrillo, viro, inquebant illi, impio et hæretico communicaret, et Nestorii depositioni consentiret, recesserunt. Ita Alexander Hieropolitanus (3), Meletius Mosuepstenus, Euthérius Thyannensis, Dorotheus Marcianopolit. qui pertinaces

(1) Lup. Epist. Varior. Patr. cap. 88, edit. Lovan. p. 195.

(2) Lup. ibid. cap. 106, p. 260.

(3) Ibid. cap. 90, collato cum cap. 60, p. 198 et 142, et Schol. Lupi ad eadem capp. p. 411 et 522.

(4) Ibid. cap. 2, p. 12, et Schol. p. 2.

(5) Ibid. capp. 122, 123, p. 256, 258.

(6) Ibid. cap. 122, p. 256.

(7) Evagr. Hist. l. 1, cap. 7.

(1) Lup. Varior. Patr. Epist. cap. 106, pag. 226.

(2) Vide Ibid. cap. 95 et 99, p. 198 et 217.

(3) Ibid. cap. 100, 104, 113, 114, 115, etc., pag. 318, 224, 235, etc.

deinde in exilium missi sunt; Maximinus Anazarbeusis, Helladius Tarsensis, et alii quidam, quos fuisse numero paucissimos colligere est ex ipsâ Epistolâ quam Euthérius Thyanensis ad Xystum rom. pontificem adversus pacem (1) dedit; cùm enim scribat solùm nomine episcoporum *Euphratesiæ, utriusque Ciliciæ, secundæ Cappadociæ. Bithyniæ, Thessaliæ, et Mesiciæ*, quæ loca nonnisi tres provincias patriarchatûs Antiochiæ constituebant, sequitur reliquas octo hujusce patriarchatûs provincias Joanni adhæsisse; et reipsâ in iis solus Macharius magnæ Laodicæ in provinciâ Antiochenâ episcopus pacem respuisse legitur. In tribus autem provinciis quas nominat Euthérius, constat plures episcopos Joannis partes esse amplexos, plures etiam Theodoretî et concilii in Zeugmâ coacti iudiciûm secutos. Jam verò nemo non videt ex illis episcopis qui Joannis schismati participârunt, eos ferè solos posse Nestorianæ hæresis suspectos videri, qui dogma catholicum sibi clarè propositum noluerunt statim recipere; cùmque hi paucissimi fuerint, planum est ferè omnes Orientales episcopos ab hæresi Nestorianâ sese immunes servâsse.

Dices 1^o: Joannes à Patribus Ephesinis non semel traductus est ut hæreticus. 2^o Ille hæreticus est qui synodo œcumenicæ se non subdit. 3^o Anathematismis S. Cyrilli dogma catholicum continebatur, atque ii à synodo Ephesinâ approbati fuerant; quos tamen rejecit Joannes cum suis Orientalibus. 4^o Jussu Joannis Antiocheni in anathematismos S. Cyrilli Theodoretus scripsit, ejus eâ de re libri proscripti sunt à V synodo generali; ergo, etc.

Ad primum, dist. Traductus est ut hæreticus, id est, ut hæresis graviter suspectus ob datum Nestorio patrociniûm, concedo; id est, ut doctrinæ hæreticæ manifestus et convictus, nego. Quæ adversus synodum Ephesinam à Joanne acta sunt, Patribus concilii fidem ejus valdè suspectam reddidère; unde ipsum cum Nestorio consentire ii non immeritò conjecerant; nec aliud quidquam ex actis et relationibus synodicis concilii colligi potest (2). Eventus porrò docuit hanc eorum conjecturam, etsi gravissimo fundamento nixam, tamen falsam fuisse, Joannemque schismatis ex errore facti et ex nimio in Nestorium affectu invecti sontem tantum fuisse; quod, ut vidimus, ipse S. Cy-

rillus agnovit. Ad secundum, dist. Ille hæreticus est qui obluctatur synodo œcumenicæ ut tali approbatæ et in rebus fidei ab eâ definitis, concedo; qui obluctatur synodo œcumenicæ nondum ut tali approbatæ, nec in rebus fidei, nego. 1^o Quo tempore Joannes synodo Ephesinæ reluctari cœpit, quæ rebellio omnium ejus culparum fons extitit et origo, nondum sacræ synodi œcumenicitas Ecclesiæ totius approbatione comperta et explorata erat. 2^o In rebus fidei à synodo definitis non reluctatus est; fassus erat B. Virginem vocandam esse Deiparam, dogma catholicum de Incarnatione professus fuerat, nihilque ejusmodi dogmati adversi proponebat; ergo, etc. Ad tertium, dist. Rejecit Joannes S. Cyrilli anathematismos, eis sensum Apollinaris perperam affligendo, concedo; eos ut sonant intelligendo, nego. Hanc sibi Joannes falsam persuasionem induxerat, Cyrillum in anathematismis suis catholicam de duplici naturâ in Christo doctrinam impugnare, quam à Nestorio assertam existimat. Unde mirum non est quòd hæreticos sensus, etsi à mente Cyrilli prorsus alienos, nec ab eo ullatenus expressos, capitulis illis affingeret, quemadmodum, ut jam observatum est, Andreæ Samosateno et Theodoro, qui rogante Joanne in anathematismos scripserant, contigit. Itaque dùm Joannes rejecit anathematismos, doctrinam catholicam iis expressam non respuit, sed solos Apollinaristarum errores. Hinc statim atque fidem duplicis in Christo naturæ simul cum unitate personæ à S. Cyrillo in Epistolâ ad Acacium Berœensem expressam vidit, illicò ejus doctrinam approbavit, ut diximus; atque ubi de pace actum est, utraque pars, nempe tum S. Cyrillus, tum Orientales circa fidem facillimè et sine ullâ cunctatione consenserunt.

Quod attinet ad approbationem à synodo Ephesinâ anathematismis datam, jam supra diximus eam solemnem non fuisse, sed in eoduntaxat positam, quòd epistola Cyrilli, quâ ii continentur, inter instrumenta litis mediâ in synodo producta fuerit, nec à quoquam reprehensa; quod certè ad constituendam fidei definitionem nullo pacto sufficit. Nec sanè, ad schismaticos reducendos, Ecclesia, circa fidei definitionem in concilio œcumenico constitutam, eâ posset indulgentiâ uti, quam erga Orientales adhibuit quantum ad anathematismos, quos silentio premi consensit S. Cyrillus, relicto proinde singulis quilibet de iis sentiendi arbitrio, donec magis ab Ecclesiâ confirmarentur.

(1) Lup. ibid. cap. 117, p. 245 et 246.

(2) Confer. T. 3 conc. p. 667, 745, 747, 767, 772, 1044, etc.

Ad quartum, 1^o Ex eo quòd Theodoretus, Joannis mandato, in Cyrilli anathematis scripserit, non sequitur Joanni probata fuisse quæcumque in Theodoreti scriptis continebantur. 2^o Etsi quintæ synodi judicium adversus scripta à Theodoro in anathematis exarata æquissimum fuerit, et summâ veneratione suscipi debeat; attamen fateri non cogimur Theodoretum ipsum, quem ut hæreticum non damnavit, fuisse Nestorii dogmatibus infectum. Scilicet malè interpretatus est S. Cyrillum Theodoretus; multas ejus locutiones catholicas et exprimendo dogmati natas, non intellexit, ideòque proscripsit; sæpè eas ex adverso usurpavit phrases, quæ si urgeantur, hæresim Nestorianam sapiunt et continent. Illius igitur scripta, quibus Nestoriani abutebantur, jure ac meritò condemnata fuerunt. Attamen cum ille celebris præsul Virginem Deiparam semper dixerit, cum eximiam Joannis ad Nestorium epistolam approbaverit, cum Cyrilli fidem in epistolâ ad Acacium Bercœensem clarè expressam statim orthodoxam habuerit, necnon ejusdem Cyrilli epistolam ad Orientales; hunc arbitramur ex quâdam obscuracione mentis, stupendâ quidem in ejusmodi viro, sed tamen facilè in illius ipsius scriptis advertendâ, S. Cyrilli anathematis impugnâsse, dicta ejus catholica ad Apollinaristarum sensus pertraxisse, et Nestorianas quasdam loquendi rationes, quarum venenum, studio partium abreptus non sentiebat, usurpasse.

ARTICULUS II.

Adversus Nestorium dogma catholicum adstruitur.

Duas in Christum personas induxit Nestorius, ut dictum est, atque idcirco, Virginem verè esse Deiparam negavit. Duplex ille error duplici conclusione confutandus.

CONCLUSIO I. Unica est in Christo persona, nempe persona Verbi.

Probatur 1^o ex Scripturis. Joan. 1, v. 14: *Verbum caro factum est, et habitavit in nobis.* Unde sic arguitur: Vel Verbum caro, id est homo factum est, per substantialem et hypostaticam unionem, hoc est in suæ personæ unitatem assumendo naturam humanam; vel per moralem duntaxat unionem, qualis est amicorum; vel per inhabitationem in homine ut in templo; vel per sui in naturam humanam conversionem, aut cum eâ permixtionem. Atqui Verbum non est caro factum per sui in naturam humanam conversionem, aut cum eâ permixtionem, quippe cum sit immutabile ex Scriptu-

ris; neque per unionem moralem; quantacumque enim sit amicorum inter se necessitudo, ea nunquàm sufficit ut illorum unus dicatur fieri alter; neque per inhabitationem in homine ut in templo; ut enim S. Cyrillus Alexandrinus notat Dialogo 9, *quòd unus sit Christus*, ejusmodi inhabitatione Verbum non fieret caro, non fieret homo, « sed potius ἀνθρωποπολίτης (hoc est hominis incola), et conveniens fuerit « illum non hominem, sed humanum vocare: « quemadmodum et qui Nazareth inhabitavit, « Nazareus dictus est, non Nazareth; quinimò « nihil prorsus obstiterit.... hominem vocari « unâ cum Filio etiam Patrem et Spiritum « sanctum. Habitavit enim in nobis, etc. Ergo per substantialem et hypostaticam unionem Verbum factum est caro; proindeque, etc. Philip. 2, v. 6 et seq. sic habet Apostolus de Christo: *Qui cum informâ Dei esset, non rapinam arbitratus est esse se æqualem Deo; sed semetipsum exinanivit formam servi accipiens, in similitudinem hominum factus, et habitu inventus ut homo.* Humiliavit semetipsum, factus obediens usque ad mortem. Christus itaque, ex Apostolo, prius erat in formâ seu naturâ Dei, et æqualis Deo; deinde verò non desinens esse quod erat, exinanivit semetipsum, formam servi, seu naturam humanam, accipiens, et factus est in eâ naturâ obediens usque ad mortem. Hæc porrò unitatem personæ arguunt, non simplicem unionem moralem, aut inhabitationem, etc. Sic enim argumentari licet: In eo sunt natura divina et natura humana in unicâ personâ divinâ, qui cum in formâ Dei esset, accepit formam servi; qui æqualis Deo, factus est homini similis; atqui Christus ex Apostolo is est qui, cum in formâ Dei esset, formam servi accepit, etc. Ergo. Et verò, nonne apertissimum est personam quæ est in formâ Dei et æqualis Deo, unam esse personam divinam? Nonne pariter evidens est hanc ipsam personam, prout accepit formam servi, et homini similis facta est, ab Apostolo hic appellari Christum? Ergo ex Apostolo Christus est una persona divina quæ naturam humanam accepit, non verò persona duplex morali vinculo juncta, ac proinde, etc.

In Epist ad Hebr. S. Paulus dignitatem Filii Dei splendide extollit eum appellans, cap. 1, v. 3, *splendorem gloriæ Patris, et figuram substantiæ ejus*; ipsumque simul, cap. 2, v. 9 et 14, ut hominem exhibet *propter passionem mortis, gloriâ et honore coronatum*,... *ut per mortem destrueret eum qui habebat mortis imperium, id est, diabolus.* Hæc rursus designant duplicem

in Christo naturam, et unicam *Filii Dei* personam. Multis in locis Scripturæ, Christus homo et cum hominibus conversans appellatur Deus. Joan. 20, v. 28, eo post resurrectionem palpato S. Thomas exclamat : *Dominus meus et Deus meus*. Rom. 9, v. 5 : *Ex quibus (Israelitis) est Christus secundum carnem, qui est super omnia Deus benedictus in secula*. Joan. 10, v. 30, ipse Christus tribuit sibi eandem cum Patre æterno naturam : *Ego, inquit, et Pater unum sumus*. Ex quibus sic arguo : Vel Christus homo persona est humana Verbo divino moraliter conjuncta; vel una est ex personis divinis, nempe persona Verbi, quæ humanitatem sibi hypostaticè conjunxerit. Atqui ex locis adductis, quibus alia plura addi possent, Christus homo non est persona humana Verbo moraliter solum conjuncta; persona enim humana quantumlibet conjuncta Verbo, non nisi improprie, Deus vocari posset, quemadmodum judices dicti sunt Dii; non esset *super omnia Deus benedictus in secula Filius Dei unum* cum Patre seu unam cum eo habens naturam, *Dominus et Deus noster*. Ergo Christus homo una est persona divina, seu ipsum est Deus Verbum, quod humanitatem sibi hypostaticè conjunxit, quodque ratione naturæ divinæ sibi propriæ *super omnia Deus* appellatur, etc. Christus homo in Scripturis appellatur etiam simpliciter *Filius Dei, Filius unigenitus, Filius proprius*. Matth. 16, v. 16 : *Simon Petrus dixit : Tu es Christus Filius Dei vivi*; quod oraculum revelante Patre fuisse prolatum Christus ibid. v. 17, affirmat. Narratur Matthæi 17, v. 5, Marc. 1, v. 11, Luc. 3, v. 22, dum tingeretur Christus, et Matth. 17, v. 5, Marc. 9, v. 6, Luc. 9, v. 35, et 2 Petr. 1, v. 17, dum transfiguraretur, hanc de coelo emissam esse vocem : *Hic est Filius meus dilectus, in quo mihi complacui*. Joan. 1, v. 18 : *Unigenitus Filius, qui est in sinu Patris, ipse enarravit*. Rom. 8, v. 32 : *Proprio Filio suo non pepercit (Deus), sed pro nobis omnibus tradidit illum*. Ex quibus manifestum est Christum qui cum Petro conversabatur, qui tinctus et transfiguratus est, qui enarravit divinitatis excelsitatem, qui pro nobis traditus est morti, esse *Filium Dei, Filium Dei dilectum, Filium Unigenitum qui est in sinu Patris, Filium Dei proprium*. Ergo non est persona humana Verbo Dei conjuncta moraliter, sed est ipsamet persona Dei Verbi; proindeque, etc.

Innumera alia sunt Scripturæ testimonia in quibus Christo divina et humana adscribuntur. Humana quidem, scilicet, quod sit homo,

filius hominis, quod in utero conceptus, ex muliere natus, ex Davidis stirpe oriundus, quod passus, mortuus, etc. Divina pariter, nempe Dei nomen, Filiique divini titulus et Dei Verbi, ut ex allatis textibus liquet, quibus alia non minùs diserta faciliè adjicerentur; natura et attributa Dei, Joan. 10, v. 30 : *Ego et Pater unum sumus*. Ibid. v. 38 : *Pater in me est, et ego in Patre*; cap. 14, v. 9 : *Qui videt me, videt et Patrem... Non creditis quia ego in Patre, et Pater in me est?* cap. 16, v. 15 : *Omnia quæcumque habet Pater, mea sunt*; et cap. 17, v. 10 : *Mea omnia tua sunt, et tua mea sunt*; operatio divina, Joan. 5, v. 17 et 19 : *Pater meus usque modò operatur, et ego operor... Quæcumque ille fecerit, hæc et Filius similiter facit*; æternitas, Joan. 8, v. 58 : *Antequàm Abraham fieret ego sum*; Apocal. 1, v. 8 : *Ego sum α et ω , principium et finis*; creatio, coloss. 1, v. 16 : *In ipso condita sunt universa in cælis et in terrâ, visibilia et invisibilia sive Throni, sive Dominationes, sive Principatus, sive Potestates; omnia per ipsum et in ipso creata sunt*; Immutabilitas, Hebr. 1, v. 12 : *Tu autem idem ipse es, et anni tui non deficient*. Jam verò sic argumentari licet : In eo unica est persona Filii Dei, qui est Filius Dei proprius ante secula à Patre æterno genitus, et filius hominis ex Davide ortus, natus in tempore, etc., qui ejusdem naturæ cum Patre, eadem operatur et perinde immutabilis est, et nobis quoque consubstantialis dicitur, et nostri causâ passus ac mortuus; uno verbo, qui simul est Deus Verbum et homo; enimverò ejusmodi nominum attributorumque utriusque naturæ communio, ut sequitur ex unitate personæ, ita et ejusmodi unitatis manifestum est argumentum. Atqui ex allatis Scripturæ testimoniis Christus est Filius Dei proprius simul et Filius hominis, etc., ergo.

Probatur 2^o ex symbolis fidei, et ex conciliis ante exortam Nestorianam hæresim habitis. Symbolum Apostolorum Jesum Christum ex Virgine natum appellat *Filium Dei Patris unicum, Dominum nostrum*. Atqui, si Jesus Christus esset persona duplex, non posset appellari *Filius unicus*; si esset tantum persona humana morali nexu Verbo conjuncta, donis quantumlibet præcellentibus ornata, non posset dici *Filius Dei unicus, Dominus noster*; ergo, etc. Symbolum quod Patres Nicæni ad asserendam contra Arianos Filii divinitatem, condiderunt, unitatem personæ in Christo disertissimè etiam confirmat. « Credimus, inquit,.... in unum « Dominum Jesum Christum Filium Dei, ex

« Patre natum Unigenitum, id est ex substantiâ Patris; Deum ex Deo, lumen ex lumine, « Deum verum ex Deo vero; natum non factum, consubstantialem Patri, per quem « omnia facta sunt, et quæ in cœlo, et quæ in « terrâ. Qui propter nos homines, et propter « nostram salutem descendit, et incarnatus est, « et homo factus, passus est, et resurrexit tertiâ die, etc. » Itaque juxta Symbolum Nicænum 1° Jesus Christus qui pro nobis passus est et cruci affixus secundum humanitatem, ille idem est Filius Dei Unigenitus, ex Patre natus ante omnia secula, Deus de Deo, Patri consubstantialis, etc., secundum divinitatem. Ergo juxta Patres Nicænos persona quæ pro nobis cruci affigi voluit, non alia est à personâ Unigeniti Filii Dei; proindeque non est in Christo nisi una Verbi Dei persona. 2° Si in Jesu Christo, ut volebat Nestorius, duplex esset persona, nempe Filius Dei Unigenitus, et persona hominis indissolubili nexu ipsi conjuncta, non diceretur in Symbolo Jesum Christum, ex Patre natum ante omnia secula, descendisse de cœlis, et ex Mariâ Virgine esse incarnatum. Etenim in systemate Nestorii eatenus Verbum incarnatum est, quatenus hominis personam sibi conjunxit; atqui nemo dici potest sibi unire personam quam continet; ergo Christus, qui in systemate Nestorii continet personam hominis, dici non posset incarnatus. Ergo fides catholica de unâ in Christo personâ Dei Verbi, quod ab æterno ex *Patre natum*, in tempore dignatum est de Spiritu S. ex Mariâ Virgine incarnari, Symbolo Nicæno sola consentit.

Observe illud Symbolum à concilio Constantinop. primo, quod est œcumenicum II, ante Nestorii hæresim habitum, solemniter fuisse approbatum; atque ad illius amussim expensa fuisse dogmata ejusdem Nestorii in concilio Ephesino generali III, quo ille proscriptus est. Egregium videre est hujusce Symboli commentarium adversus Nestorium in secundâ epistolâ quam ad ipsum scripsit S. Cyrillus. Symbolum quod sancto Athanasio diu attributum est, quodque nemini probabilius fortè adscribi potest, sic habet: « Dominus noster Jesus-Christus Dei Filius, Deus et homo est; Deus est « ex substantiâ Patris, etc. Perfectus Deus, « perfectus homo, etc. Æqualis Patri secundum divinitatem, minor Patre secundum « humanitatem. Qui licet Deus sit et homo, « non duo tamen, sed unus est Christus.... « unus omnino non confusione substantiæ, sed « unitate personæ. Nam sicut anima rationalis

« et caro, unus est homo; ita Deus et homo « unus est Christus. »

Probatur 3° ex SS. Patribus qui ante natum Nestorii errorem scripserunt, nam de subsequentibus res est manifesta. S. Ignatius martyr in Epistolâ ad Ephesios, n. 18: « Deus « noster Jesus Christus, ait, in utero gestatus « est à Mariâ, juxta dispensationem Dei, ex semine Davidis, Spiritu autem sancto. Qui « natus est, et baptizatus est, ut passione aquam « purificaret. » Audis eum ipsum, qui natus est, baptizatus, etc., esse Deum nostrum. Et n. 20: « Singuli communiter omnes, ex gratiâ, « nominatim convenitis in unâ fide, et in uno « Jesu Christo, secundum carnem ex genere « Davidis, filio hominis et Filio Dei. » Hic rursus vides unum et eundem esse simul et Filium hominis et Filium Dei; atqui si unio Verbi cum humanitate esset moralis duntaxat, duo essent, non unus Christus physicè et secundum hypostasim; ergo. Hæc S. Ignatii testimonia laudat Theodoretus, Dial. 1. S. Irenæus, lib. 3, cap. 16, aliàs 18, n. 2, ex Scripturis demonstrat, « unum et eundem esse Verbum Dei, « et hunc esse unigenitum, et hunc incarnatum pro salute nostrâ, Jesum Christum Dominum nostrum. » Ergo, etc. S. Dionys. Alexandr. in synodicâ ad Paulum Samosatenum epistolâ, hunc hæresiarcham refellit quòd doceret, « duas hypostases esse et duas personas unius et solius Christi; et duos Christos « ac duos filios; unum naturâ filium Dei, qui « fuit ante secula; et unum homonymè Christum et filium David, qui... secundum beneplacitum Dei accepit nomen filii. » S. Athanas. lib. De Incarn. Verbi Dei, n. 2, unionis animæ et corporis in homine similitudine adductâ, explicat in Christo unam esse personam: « Homo, inquit, una persona et unum animal « est, ex spiritu et carne compositum; ad cuius similitudinem intelligendum est Christum « unam esse personam et non duas. » S. Greg. Nazianz. Orat. 51, unionem humanitatis in Christo cum divinitate Verbi substantialem fuisse, non moralem tantum, sic adversus Apollinarium edisserit: « Si quis duos Filios, alterum ex Deo et Patre, alterum ex matre, non « autem unum atque eundem intellexerit, is « ab eâ quoque filiorum adoptione excidat quæ « rectè credentibus promissa est. Quanquàm « enim Deus et homo duæ naturæ sunt, quemadmodum et anima et corpus, non tamen « duo Filii nec Dii, quemadmodum nec hic « duo homines.... Si quis divinitatem in eo,

« velut in Prophetâ, per gratiam operatam
 « fuisse, non autem secundum essentiam co-
 « pulatam fuisse atque copulari dixerit, à præ-
 « stantiori allatu vacuus sit, imò contrario
 « impleatur. Si quis crucifixum non adorât,
 « anathema sit, » etc. Et Orat. 31 : « Id quod
 « erat, exinanivit; id quod non erat, assumpsit;
 « non duplex factus, sed unum ex duplici na-
 « turâ fieri sustinens. Ambo enim Deus, nimi-
 « rum quod assumpsit, et quod assumptum
 « est; duæ naturæ in unum occurrentes, non
 « duo filii. » S. Ambros. lib. De Incarn. Do-
 min. Sacramento cap. 5, n. 35, de Christo,
 seu Verbo incarnato loquens : « Cùm Deus,
 « inquit, semper esset æternus, Incarnationis
 « sacramenta suscepit, non divisus, sed unus;
 « quia utrumque unus, et unus in utroque,
 « hoc est, vel divinitate vel corpore; non enim
 « alter ex Patre, alter ex Virgine, sed idem
 « aliter ex Patre, aliter ex Virgine. » S. Au-
 gustin. Enchiridii cap. 35 : « Jesus Christus
 « Dei Filius, inquit, est et Deus et homo. Deus
 « ante omnia secula; homo in nostro seculo.
 « Deus quia Dei Verbum. *Deus enim erat Ver-*
 « *bum* : homo autem, quia in unitatem personæ
 « accessit Verbo anima rationalis et caro.....
 « Unus Dei Filius, idemque hominis filius; unus
 « hominis filius, idemque Dei Filius; non duo
 « Filii Deus et homo, sed unus Dei Filius;
 « Deus sine initio, homo à certo initio, Domi-
 « nus noster Jesus Christus. » Et cap. 36 : « Ex
 « quo homo esse cœpit, non aliud cœpit esse
 « homo, quàm Dei Filius; et hoc unicus, et
 « propter Deum Verbum quod illo suscepto
 « caro factum est, utique Deus; ut quemad-
 « modum est una persona quilibet homo, anima
 « scilicet rationalis et caro, ita sit Christus
 « una persona, Verbum et homo. » Et lib. de
 Corrept. et gratiâ, cap. 11, n. 30 : « Deus, in-
 « quit, naturam nostram, id est, animam ra-
 « tionalem carnemque hominis Christi suscepit,
 « susceptione singulariter mirabili, vel mira-
 « biliter singulari, ut nullis justitiæ suæ præ-
 « cedentibus meritis Filius Dei sic esset ab
 « initio quo esse homo cœpisset, ut ipse et
 « Verbum, quod sine initio est, una persona
 « esset. »

Plurima alia SS. Patrum testimonia afferre non esset operosum. Ea vide quæ collecta habentur tum parte 1 concilii Ephes. cap. 4, tum parte 2, actione 1, T. 3 concil. pag. 115 et seqq. et pag. 108 et seqq.

Probatur 4^o : Quia ex iis quæ in causâ Nestorîi contigerunt, planum est, ubi ejus error

caput extulit, fidem contrariam toto orbe obtinuisse. Nam 1^o, cùm ab Anastasio presbytero, et à Dorotheo Marcianopolis in Mœsiâ episcopo, Constantinopoli, Nestorio præsente et connivente, hæresis illa populo propinata est, ex historiâ constat clericos monachos, et laicos illi statim vehementer reclamâsse, tumque auditam primam hanc fidei avitæ vocem, quæ, ubi primùm novitates aliquæ spargi incipiunt, nunquàm non insonat. Constat 2^o eandem hæresim statim fuisse in synodis Alexandrinis damnatam, moxque à summo pontifice in synodo Romanâ, atque à Patribus ducentis Ephesi congregatis auctorem ejus depositum. Constat 3^o Joannem Antiochenum et Orientales, etsi aliquando Nestorii personæ plus æquo faverint, ejus tamen errores non tenuisse; atque imprimis in præclarâ illâ epistolâ, quam ad Nestorium *non solus*, sed ex sententiâ doctissimorum patriarchatûs sui episcoporum Joannes ante concilium Ephesinum scripsit, vocis *Deiparæ* usum, et Incarnationis fidem modo catholico et impietati Nestorianæ prorsus adverso explicari et egregiè confirmari. Ergo ubi caput extulit error Nestorii, universus orbis fide orthodoxâ ipsi contrariâ detinebatur; proindeque, etc.

Probatur 5^o rationibus theologicis, quas adhibuerunt SS. Patres. Prima est, errore Nestoriano penitus subverti mysterium redemptionis, quod aliud est religionis christianæ fundamentum. Enimverò in principiis Nestorii illa redemptio vel fieret à personâ divinâ Verbi, vel à personâ hominis, vel ab utrâque simul. Atqui non à personâ divinâ; cùm Verbum divinum immutabile sit et impassibile. Non à personâ hominis solitariè sumptâ, quæ pati quidem et mori potuisset, sed ejus satisfactionum valor non fuisset nisi finitus, et proinde impar compensandæ injuriæ per peccatum Deo illatæ. Non ab utrâque simul; nam utriusque simul ejusmodi personæ quæcumque tandem ratio habeatur, non ideò tamen satisfactiones, quas persona hominis exhiberet, valorem infinitum à personâ divinâ consequerentur; quid ita? quia necesse est actiones ab illâ personâ produci, quæ eis valorem suum confert; actiones, quas producit persona hominis, undequaque finitæ sunt, nimirum tum ratione entitatis, tum ratione personæ agentis; nec ullo pacto adscribi possunt supposito divino actiones quas mera hominis persona à supposito infinitè distincta producit. Ergo, etc. Hanc rationem theologicam adversus Nestorium

non uno in loco urget S. Cyrillus. Secunda ratio, quam idem S. doctor fusè prosequitur, lib. 4 contra Nestorium cap. 5 et 6, petitur ex eo quòd vim et efficaciam sacramenti Eucharistiæ planè infringat Nestoriana hæresis. Eximia siquidem illius sacramenti virtus ex Christi humanitate divinitati hypostaticè conjuncta et in hoc mysterio contenta oritur.

Tertia desumitur ex adoratione, quam Christo nato ex Virgine, crucifixo, etc., omnes Christiani semper tribuerunt. Etenim juxta Nestorium Christus natus, passus, cruci affixus, etc., mera est persona hominis, Deo Verbo conjuncta quidem, sed moraliter tantum, nec ideò desinens esse hominis persona. Ergo ex illo systemate sequeretur Christianos omnes cultum latriæ soli Deo debitum, personæ hominis exhibuisse, ac proinde semper fuisse idololatrias. Hinc S. Cyrillus, lib. 4 contra Nestorium cap. 16, eum sic interpellat: « Non « horres dicere vulgarem hominem, creaturæ « cultum exhibendum excogitans?... Si veteri « errore liberati sumus in eo quòd servire « (λατρεῖν) creaturæ tanquam rem impiam « recusavimus, cur nos in vetera crimina conjicis, et efficis hominicolas (ἀνθρωπολάτραις)? Vide etiam lib. 2, cap. 11 et seq. Quarta ratio passim etiam à S. Cyrillo pressa, in eo sita est, quòd Christum diviserit Nestorius, ac duos Filios, duos Christos, duos Dominos agnoscere debuerit. Quod consecrarium, etsi à Nestorio perseveranter negatum, ex ejus tamen errore necessariò nexum est. Nam juxta ipsum veræ sunt illæ propositiones: *Christus est Deus Verbum, Christus est homo*; et tamen *Deus Verbum, et homo*, sunt duæ personæ planè distinctæ, quæ nec in naturâ, ut patet, nec in hypostasi et personalitate conveniunt; ergo, etc. Quinta ratio est, solum Deum Verbum incarnatum esse, non Patrem, neque Spiritum S. Atqui, si Incarnatio in merâ inhabitatione Dei Verbi in Christo ut in templo consisteret, vel in donis quibuscumque humanitati Christi collatis, etc.; uno verbo, nisi in unione naturæ humanæ cum personâ Verbi Dei posita sit, evidens est non magis Verbum quàm Patrem aut Spiritum sanctum dici posse Incarnatum. Ubi enim Verbum inhabitat, necesse quoque est, propter *circumincessionem* ineffabilem personarum divinarum, inhabitare et Patrem et Spiritum sanctum; quæcumque dona largitur Filius, hæc ipsa voluntate eadem et actione indivisibili Pater et Spiritus sanctus largiuntur; quæcumque (personalitate exceptâ) competunt

Filio, Patris quoque ac Spiritus sancti sunt; ergo nisi unio naturæ humanæ Christi cum Verbo divino personalis sit et hypostatica, Pater et Spiritus sanctus dicendi essent pariter incarnati; quòd cum fidei repugnet, consequens est, etc.

SOLVUNTUR OBJECTIONES. — Obj. 1^o: Moyses in Scripturis appellatur Deus, Exod. 7, v. 1: *Ecce constitui te Deum Pharaonis*, inquit ipse Deus Moysen alloquens. Israel cognominatur Filius Dei Exod. 4, v. 22: *Hæc dicit Dominus: Filius meus primogenitus Israel*. Ergo Christus homo, etsi persona sit humana, attamen propter conjunctum sibi moraliter Filium Dei, Deus et Filius Dei appellari potuit. Eò ferè redit ratiocinium Nestorii Serm. 2 apud Marium Mercat. part. 2, p. 9 et 10.

Nego conseq. In locis Exodi objectis planum est Moysen, qui se esse duntaxat ministrum et legatum Dei sæpè aliàs docet, metaphoricè appellari Deum Pharaonis, quòd nempe in eum potestatem à Deo acceptam exerceret; et Israellem dici Filium Dei, quòd eum populum speciali providentiâ et affectu Deus regeret; atque in iis locis metaphoricus sensus apertus est, et cuilibet obviis. At verò nomen Dei sine metaphorâ Christo competit, ipso fatente Nestorio; Jesus Christus cum hominibus conversans, ministerium suum implens, pro nobis sanguinem fundens, nuncupatur in Scripturis, ut ostensum est, *Deus super omnia, Filius Unigenitus, Filius proprius, Filius qui est in sinu Patris*; ipse docet se esse ejusdem substantiæ cum Patre, sibi inesse quæcumque Patris sunt, etc. Vide loca inter probationes allata. Proindeque nunquàm licet nomen *Dei* et *Filii Dei* metaphoricè accipere, ubi Christo attribuitur.

Obj. 2^o: Christus ipse, Joan. 2, v. 20, humanitatem suam appellat *templum*. *Solvit*, inquit, *templum hoc, et in tribus diebus excitabo illud.... Ille autem dicebat de templo corporis sui*. Ergo Deus Verbum in humanitate Christi solummodò residet ut in templo; proindeque, etc. Nego conseq. Fatemur *templi* appellationem humanitati Christi per metaphoram apprimè competere; nempè Deus in hac humanitate modo præcellenti residet, et actibus ejus perfectè colitur. Sed nego huic humanitati eam solam inesse templi rationem, quæ 1 Cor. 3, v. 16 et 17, competit etiam aliis sanctis. Scilicet in Christo *inhabitat omnis plenitudo divinitatis corporaliter*, ut ait Apost., Coloss. 2, v. 9, natura humana Christi non modò templum est

Verbi, sed ipsi hypostaticè unitur, ut ex omnibus supra prolatis argumentis liquidum est.

Obj. 3^o plurimorum SS. PP. auctoritatem. Scilicet idcirco supra judicavimus Nestorium admisisse duas in Christo personas, quòd humanitatem Christi templum et instrumentum divinitatis appellaverit, quòd Christum ipsum nuncupaverit hominem θεοφόρον, Deiferum, aut Deificatum, hominem Dominicum, quòd denique dixerit hominem à Deo Verbo esse assumptum. Atqui plures SS. doctores easdem voces adhibuerunt: S. Greg. Nyssenus, lib. 2 adversus Eunomium apud Theodoret. Dial. 1; S. Athanas. Orat. 4 in Arianos, et alii, humanitatem Christi nomine *domus, domicilii, templi* Dei Verbi designarunt. S. Athanas. lib. de Incarn.; Eusebius Cæsariensis, Eustathius Antioch. et ipse S. Cyrillus voce *instrumenti* Dei Verbi eandem denotarunt. Christum hominem *Deiferum* vocant S. Basilius apud Theodoret. in Repræsentatione anathematis quinti, et Eustathius apud Gelasium sum. pontificem in opusculo de duabus Christi naturis. Idem appellatus est homo Dominicus *κυριακός* à S. Athanas. in Expositione fidei; S. Epiphan. in Anchorato; S. Augustin. lib. 83 Quæstionum, quæst. 56 et 57, etc. Tandem S. Ambrosius, lib. de fide, cap. 5; S. Aug. lib. 11 de Civit. Dei, cap. 2; et Enchiridii cap. 56; Prudentius in Apotheosi, Ecclesia universa in hymno *Te Deum*, qui sanctis Ambrosio et August. tribuitur, aiunt à Deo Verbo *assumptum esse hominem*. Ergo ii omnes censuerunt duas esse in Christo personas, proindeque, etc.

Dist. maj. Judicavimus Nestorium sensisse duas esse in Christo personas, propter ejusmodi locutiones perpetuò obtrusas, et pluribus adjunctis impietati significandæ addictas, concedo; propter usurpatas simpliciter illas voces, nego. Locutiones istæ: Humanitas Christi est Divinitatis vel Dei Verbi templum, instrumentum; Christi caro est Deifera, Deificata, Dominica; Christus est homo Deifer, Deificatus, Dominicus; Verbum assumpsit hominem; illæ, inquam, locutiones dogmati catholico exprimendo per se non sufficiunt, falsum tamen intellectum non necessariò annexum habent, sed ex adjunctis determinari possunt ad significationem catholicam, vel ad heterodoxam. Apud doctores catholicos dogma fidei pleno ore confitentes, nihil nisi verum et orthodoxum sapiunt; apud Nesto-

rium pluribus aliis adjunguntur quibus impietati significandæ addicuntur. Singula paucis ostendenda sunt.

1^o Illæ voces dogmati catholico exprimendo per se non sufficiunt; qui enim audit humanitatem Christi esse templum vel instrumentum divinitatis, non ideò intelligit humanitatem esse Deo Verbo hypostaticè unitam. Idem de aliis locutionibus manifestum est.

2^o Falsum tamen intellectum non necessariò annexum habent. Nam ratio templi et instrumenti Verbi Dei sicut non inducit, ita nec excludit unionem hypostaticam naturæ humanæ cum Verbo Divino. Non negat fides catholica humanitatem Christi esse templum et instrumentum Verbi; sed addit hanc Verbo inhabitanti et eâ utenti esse hypostaticè conjunctam. Pariter caro seu humanitas Christi sine ullo fidei detrimento Deifera dici potest; nempe Deum portat, si ita loqui fas est, non ut onus alienum et sibi extraneum, sed tanquàm suum et proprium, id est intimè sibi et substantivè conjunctum. Hæc humanitas etiam est Deificata et Dominica, propter eandem rationem. Major est difficultas in vocibus *hominis Deiferi, Deificati, et Dominici*, quia nomen *homo* propriè personam involvit, persona autem in Christo non est tantum Deifera, Deificata et Dominica, sed Deus et Dominus. Illic S. Cyrillus in anathem. 5, et post ipsum S. Joannes Damascenus Christum appellari hominem Deiferum non permittunt; et S. Augustinus, qui voce *hominis Dominici* aliquando usus fuerat, hanc lib. 1 Retractat. cap. 19, revocavit. Verum necesse non est hæc ad amussim regularum logices in Patribus qui ante exortam Nestorii hæresim scripserunt, semper exigi. Aliquando minùs accuratè loqui iis licuit, et concreta pro abstractis quandoque usurpare, adeò ut homo Deifer, Deificatus et Dominicus, ipsis fuerit humanitas Deifera, Deificata, Dominica. Idem statuendum est de istâ phrasi: *Verbum assumpsit hominem*, quæ maximè catholicum sensum ingerit, si vox *hominis*, ut aliquando contingit, minùs strictè sumatur pro humanitate, seu pro naturâ humanâ; hæresim verò refert, si ejusdem vocis significatio urgeretur, et pro personâ humanâ acciperetur.

3^o Locutiones de quibus agimus, ad sensum catholicum aut hæreticum determinari possunt ex adjunctis. Id sequitur ex dictis; nam si illæ dogmati catholico exprimendo per se non sufficiunt, nec tamen falsam significationem necessariò inducunt; ergò ex adjunctis, etc.

4° Apud doctores catholicos, præsertim qui Nestorii tempora præcesserunt, nihil nisi catholicum et orthodoxum sonant; quid ita? quia illi SS. doctores sæpè dogma catholicum pleno ore confitentur, sæpè aiunt non modò Jesum Christum esse Deum, sed et Deum nostrì causà ex Virgine natum, pro nobis passum, mortuum, etc., atque ipsam Deiparæ vocem libenter usurpant, rati Mariam eum genuisse et peperisse secundum carnem, qui verè Deus est. Unum S. Athanasii testimonium, in quo caro Christi instrumentum Verbi dicitur, in exemplum proferre satis erit. « Ait Petrus, inquit, « Orat 3, in Arianos, n. 3, Christo igitur « passo in carne, ut scilicet planum fieret, « omnesque crederemus, eum ipsum qui semper Deus fuit... propter nos hominem postea « factum fuisse, atque ut loquitur Apostolus, « Divinitatem corporaliter in carne habitasse; « quod idem est, ac si diceret, cum Deus esset, proprium habuit corpus, quo ut instrumento utens, homo propter nos factus est. « Hinc quæ carnis sunt propria, illi attribuuntur, quia nempe in eà existerat; sic ergo « dicitur esurire, sitire, pati, laborare, et « similia quæ ad carnem pertinent. » Clariùs exprimi non poterat corpus Christi esse instrumentum Deo Verbo intimè, substantivè, seu hypostaticè conjunctum. Plura de toto hoc argumento vide apud Petav. lib. 7 de Incarn. cap. 10, 11 et 12. Adde mirum non esse SS. doctores ante notam Nestorii hæresim aliquando minùs accurata vocabula adhibuisse; idemque hic Nestorianis reponere possumus, quod Pelagianis in alio argumento S. Augustinus, lib. 1 contra Julian. cap. 6, n. 22: *Vobis nondum litigantibus, securiùs loquebantur.*

5° Eadem locutiones apud Nestorium pluribus adjunctis impietati significandæ addiuntur. Etenim 1°, continuò ab ipso obtruduntur. 2° Dum eas perpetuò usurpat, simul alias rejicit locutiones quibus dogma catholicum disertè exprimitur. Nempe noluit fateri Deum Filium secundum assumptam carnem esse genitum et natum ex Beatâ Virgine; hunc fuisse himestrem, trimestrem; eundem esse passum, crucifixum, mortuum; negavit communicationem idiomatum quæ ex unitate personæ necessariò consequitur. Voluit Christum visibilem et cum hominibus conversantem, non propter se adorandum, sed tantum ut simulacrum et imaginem Divinitatis; vocis *Deiparæ* appellationem mysterio Incarnationis tam intime connexam diutissimè, sensum autem

vocis perpetuò repudiavit: siquidem et in ipsâ ad Scholasticum epistolâ concilio Ephesino desinente exaratâ, nomen illud adhiberi consentiens hanc rationem affert, scilicet *id quod nobis consubstantialia est inseparabili divinitate plenum de Virgine genitum*, sed non dicit ex eâ genitum eum qui Deus est. 3° Nestorius à S. Cyrillo et à Joanne Antiocheno epistolis dogma catholicum egregiè et sine ambiguitate declarantibus amicè admonitus ut ad meliores fruges se reciperet, tum à S. Cœlestino rom. pontif. et à synodo Ephesinâ damnatus, obfirmato animo voces ad exprimendam fidem totâ traditione destinatas rejecit, suisque loquendi modis, propter quos erroris meritò insimulabatur, perseveranter adhæsit; ergo, etc. Recole quæ suprâ, art. 1 hujus capitis, fusè à nobis dicta sunt.

Obj. 4°: Si unica esset in Christo persona, nempe persona Dei Verbi, vera esset ista propositio: *Unus de Trinitate passus est.* Atqui propositionem hanc in monachis Scythiæ velut erroneam proscripsit Hormisdas sum. pontifex; ergo, etc. Nego min. Vera enim et orthodoxa est propositio, quam sum. pontifex Hormisdas nusquam erroris incusavit, sed tantum ut novam ac dissidiorum causam silentio premedam esse judicavit, repressâ monachorum Scythiæ temeritate ac pertinaciâ, qui hujusmodi loquendi formam definitioni concilii Chalcedonensis necessariò adjiciendam esse contendebant, quasi absque tali additione manca illa et imperfecta foret. Cæterum hanc loquendi rationem probavit postea Joannes II, sum. pont. in Epist. ad Justinianum in quâ et imperatorem laudat qui eam tuebatur, et Acemetas monachos contra sentientes condemnat. Probavit et suo judicio confirmavit Ecclesia in V generali concilio can. 4 et 5. Sed de totâ hæc controversiâ lege eruditam cardinalis Norisii Dissertationem, de uno ex Trinitate passo, et ejusdem Apologiam monachorum Scythiæ, T. 3 ejus Oper. edit. Veron. 1729, col. 775 et seq.

CONCLUSIO II: Beata Virgo verè est *Θεοτόκος*, Deipara. Probatur 1° ex Scripturis. Isai. 7, v. 14, et Matth. 1, v. 23. *Ecce Virgo concipiet et pariet filium, et vocabitur nomen ejus EMMA-NUEL, quod, addit S. Matthæus, est interpretatum, nobiscum DEUS.* Luc. 1, v. 35: *Quod nascetur ex te sanctum, vocabitur FILIUS DEI, et v. 45: Unde hoc mihi, ut veniat MATER DOMINI MEI ad me?* Rom. 1, v. 2 et 3: *Quod ante promiserat (Deus) per Prophetas... de Filio suo,*

qui factus est ei ex semine David secundum carnem. Gal. 4, v. 4 : *Misit Deus Filium suum, factum ex muliere* (plures codices græci MSS. et versiones apud Millium habent *genitum ex muliere*). His in locis videmus *Emmanuel*, id est, *nobiscum Deum*, et *Filium Dei*, seu Deum Verbum ex Mariâ Virgine genitum et natum dici, ac eandem B. Virginem *matrem Domini nostri* appellari. Ergo, etc.

Probatur 2^o ex fidei Symbolis, juxta quæ, ut præcedenti conclusione expositum est, Jesus Christus Filius Dei unicus, Dominus noster, Deus verus, consubstantialis Patri, ex Virgine incarnatus est et natus.

Prob. 3^o ex SS. Patribus, etiam qui ante Nestorii tempora floruerunt. Complura eorum testimonia exhibet Petav. lib. 5 de Incarn. cap. 15 et 16, et post ipsum Natalis Alexander, Hist. eccles. sec. V, dissert. 23, art. 2, ex quibus manifestum est notionem vocis *Deiparæ* ab omnibus Patribus traditam, ipsumque pium nomen à pluribus esse usurpatum. Collegerat etiam olim plurima S. Cyrillus in lib. ad Reginas, et in Epist. ad Acacium Berœensem, quæ consule. Nos aliqua tantum referemus. S. Ignatius martyr in Epist. ad Ephesios, n. 18 : « Deus noster Jesus Christus, inquit, in utero gestatus est à Mariâ, juxta dispensationem Dei, ex semine Davidis, Spiritu autem sancto. » Et n. 6, dixerat : « Medicus unus est, et carnalis, et spiritualis, genitus et ingenuitus seu factus et non factus (nam græca hic variant) in homine (græcè εν σαρκι in carne) existens Deus, in morte vita erat, et ex Mariâ et ex Deo, » etc. S. Justinus in Dial. cum Tryph. n. 84 : « Ex Virginali utero, inquit, Primogenitum omnium rerum conditarum carnem factum, verè puerum nasci, id præoccupans per Spiritum S., » etc. Et n. 100 : « Cum eum Filium Dei esse in commentariis Apostolorum scriptum legamus, et Filium dicimus illum et esse intelligimus, ac ante omnes res creatas ex Patre, ipsius virtute et voluntate, prodiisse... et ex Virgine hominem esse factum, » etc. S. Irenæus, lib. 3, cap. 21, aliàs 31, n. 10 : « Verbum, inquit, existens ex Mariâ quæ adhuc erat Virgo, rectè accipiebat generationem Adæ recapitulationis. » S. Dionys. Alexandr. in Epistolâ ad Paul. Samosat. « Una, inquit, sola Virgo filia vitæ, genuit Verbum vivens et per se subsistens, increatum et creatorem. » Et superius dixerat : « Quomodo ais tu hominem esse eximium Christum, et non

« reverà Deum, et ab omni creaturâ cum Patre et Spiritu sancto adoratum, incarnatum ex S. Virgine et DEIPARA Mariâ ? » Tertullianus lib. de Præscript. cap. 13, docet regulam esse fidei ut profiteamur et credamus Verbum Filium Dei « delatum ex Spiritu Patris Dei et virtute in Virginem Mariam, carnem factum in utero ejus, et ex eâ natum. » S. Athanas. Orat. 3, aliàs 4 contra Arianos, ait « hunc scopum et characterem sanctæ Scripturæ esse, nempe ut duo de Salvatore demonstret; illum scilicet Deum semper fuisse et filium esse,.... ipsumque postea propter nos carne ex Virgine Deiparâ Mariâ assumptâ hominem factum esse. » S. Cyrillus Hierosolymit., Catechesi 4, n. 9 : « Crede quòd hic Unigenitus Filius Dei propter peccata nostra de cœlis ad terram descendit, assumptâ humanitate, istâ iisdem quibus subijcitur affectibus obnoxia, natusque est ex S. Virgine et S. Spiritu. » S. Greg. Nazianz. Orat. 51 : « Si quis, inquit, S. Mariam DEIPARAM non credit, extra divinitatem est. »

S. Joan. Chrysost. Homil. 2 in Matth. n. 2 : « Admodum stupendum est, inquit, audire Deum ineffabilem, inenarrabilem, incomprehensibilem, Patri æqualem, per virginem venisse vulvam, et ex muliere nasci dignatum esse. » S. Hieron. lib. contra Helvidium : « Natum, ait, Deum esse de Virgine credimus, quia legimus. » S. Aug. Enchirid. cap. 36 : « Invenisse apud Deum gratiam dicitur (Maria), ut Domini sui, imò omnium Domini mater esset. » Et cap. 37 : « Idem Jesus Christus Filius Dei Unigenitus, id est Unicus, Dominus noster, natus est de Spiritu S. et Virgine Mariâ. »

Tandem hujusce Patrum traditionis locupletissimum testem habemus Joannem Antiochenum in laudatâ pluries epistolâ ad Nestorium, ex sententiâ Theodoretii aliorumque episcoporum Nestorii studiosorum, ante Ephesinam synodum exaratâ, ubi de voce, *Deipara*, hæc inter cætera prædicat : « Nomen quod à multis sæpè Patribus usurpatum, scriptum, ac pronuntiatum est, adjungere ne graveris, neque vocabulum, quod piam rectamque notionem animi exprimit, refutare pergas. Etenim nomen hoc, *Theotocos*, nullus unquam ecclesiasticorum doctorum repudiavit. Qui enim illo usi sunt, et multi reperiuntur, et et apprimè celebres : qui verò illud non usurparunt, nunquam erroris alicujus eos insinularunt qui illo usi sunt.... Etenim si

« id quod nominis significatione offertur, non
 « recipimus, restat ut in gravissimum errorem
 « prolabamur; imò verò ut inexplicabilem il-
 « lam Unigeniti Filii Dei œconomiam abnege-
 « mus. Quandoquidem nomine hoc sublato, vel
 « hujus potius nominis notione repudiata, se-
 « quitur mox illum non esse Deum, qui, etc....
 « Nulli nos periculo exponimus, si ea sentimus
 « et loquimur quæ doctores in Ecclesiâ Dei
 « celeberrimos sensisse et docuisse certò no-
 « vimus. »

Prob. 3^o ex rationibus theologicis, quas post S. Cyrillum et alios Patres, latè deducit Petavius lib. 5 de Incarn. cap. 17. Prima hoc argumento continetur. Ea verè et propriè est Dei genitrix, quæ eum genuit et peperit qui in ipso ortu suo verè et propriè fuit Deus; hæc enim sunt duo reciproca. Atqui ex Scripturis et totâ traditione Beata Virgo eum genuit et peperit, quem ut primâ conclusione probatum est, ab ortu suo verum Deum fuisse eadem Scripturæ et traditio adstruunt, nempe Jesum Christum Dominum nostrum; ergo, etc. Hinc egregiè Joannes Antioch. in laudatâ mox epistolâ: « Nomine hoc (Deiparæ) sublato, vel
 « hujus potius nominis notione repudiata, se-
 « quitur mox illum non esse Deum, qui admi-
 « rabilem illam dispensationem nostræ salutis
 « causâ suscepit; tum Dei Verbum neque se
 « exinanivisse, » etc. Nota ipsummet Nestorium ausum non fuisse negare Jesum Christum esse Deum; quapropter si unam tantum in Christo personam, nempe Verbi Dei, admisisset, non potuisset inficiari B. Mariam esse Dei genitricem.

Secunda sic potest proponi: Christus non est in duos Filios dividendus, sed unus idemque est Dei primùm, deinde et hominis Filius, ut ex conclusione I colligitur. Atqui B. Virgo, fatentibus Nestorianis, est genitrix Christi Filii hominis; ergo genitrix est etiam Filii Dei, aliàs filius hominis divisus esset à Filio Dei. Mirum videri posset Nestorium, qui Christum in duos Christos et duos filios dividendum esse negabat, argumenti hujus evident à convictum non fuisse, nisi compertum esset eum unitatem Christi et filii suo tantum modo, nempe de unitate morali intellectam fassum esse, dumque voces duorum filiorum repudiabat, rem iis vocibus expressam admisisse.

Tertia ratio petitur ex comparatione B. Virginis, cum aliis mulieribus. Scilicet, posito unionem hypostaticam naturæ humanæ Christi cum Verbo divino à primo conceptu esse factam, tam dicenda est B. Virgo mater Dei, etsi

Divinitatem non genuerit, quàm mulieres vulgares dicendæ sunt matres filiorum suorum, quorum animas non generant. Istæ enim idcirco dicuntur matres filiorum suorum, etsi animas eorum non generent, quia concurrunt ad corporum conceptum et formationem, quibus efformatis animæ vi decreti divini uniuntur; sic namque fit ut conceptio ad unionem animæ cum corpore et ad personam filii relationem dicat. Atqui pariter, cum, operante Spiritu sancto, Beata Virgo corpus Christi concepit, corpus illud vi decreti Dei non modò animâ rationali informari debuit, sed et simul cum illâ Verbi divini personalitate terminari et subsistere; ergo, etc.

Solvuntur objectiones. — Obj. 1^o: Apostolus, Hebr. 7, v. 1 et 3, ait Melchisedech sacerdotem Dei summi sine patre, sine matre, sine genealogiâ, assimilatum esse Filio Dei; ergo Filius Dei in terris nec matrem habuit nec genealogiam. Nego conseq. Id unum Apostolus eò loci significat, nimirum Melchisedech sacerdotem, cujus genealogia in Scripturis non textitur, cujus sacerdotii nec initium nec finis notantur, eximiam in hoc fuisse figuram Christi sacerdotis in æternum.

Obj. 2^o: S. Hilarius, lib. 10 de Trin. n. 16, sic loquitur: « Non enim corpori (Christi) Maria originem dedit, licet ad incrementa partumque corporis omne, quod sexus sui est naturale contulerit. » Unde sic arguitur: Juxta illum Beata Virgo non est genitrix Dei, juxta quem ipsa non dedit corpori Christi originem; atqui Maria, juxta S. Hilarium, loco citato, non dedit originem corpori Christi; ergo, etc.

Dist. maj.: Juxta illum, etc., juxta quem ipsa non dedit corpori Christi originem, neque primariam, neque secundariam, concedo; juxta quem ipsa non dedit originem primariam, licet secundariam dederit, nego. Sensus sancti doctoris evidenter est primam originem corporis Christi et ejus conceptionis initia fuisse à Spiritu sancto, quippe cujus virtute Beata Virgo concepit. Liquet autem non propterea Mariam à matris titulo excidere; cum in generatione vulgari mulier primam corporis originem non suppeditet, quæ tamen concepti in utero suo filii mater est et dicitur. Hunc porrò esse S. Hilarii sensum patet, tum quia loco objecto docet Virginem ad incrementa partumque corporis Christi, omne quod sexus sui est naturale, contulisse, quo amplius nihil præstant cæteræ matres; tum quia, n. 17, ait eandem

officio usam materno, sexûs sui naturam in conceptu et partu hominis (Christi) executam esse ; tum denique quia, n. 15 et 22, duplicem illam, quam diximus, corporis Christi originem, primam ex Dei operatione, alteram ex Virgine, clarè exprimit. *Assumptâ sibi per se*, inquit, n. 15, *ex Virgine carne, ipse sibi et ex se animam concepti per se corporis cooptavit*. Et n. 22 : *Per se sibi assumpsit ex Virgine corpus*. Immeritò ergo ob locum objectum Joannes Præpositus olim apud Philippum Bonæ-Spei abbatem, et postea Scultetus et Erasmus hunc sensum S. doctori tribuerunt, *Christum non accepisse carnem à Beatâ Virgine*; atque, ut aiunt eruditi PP. Benedictini S. Hilarii editores in *Notâ* ad hunc locum, *in sanctum virum illius ipsius erroris injecere suspicionem, quem hâc datâ operâ conatur in hæreticis sanare*; ex quo sequeretur B. Virginem ne quidem Christi esse genitricem. Vide circa hunc textum eorundem editorum Præfationem, § 1, pag. 14, et doctissimum Petavium, lib. 5 de Incarn. cap. 19, n. 5.

Obj. 5^o : Quæ Divinitatem non genuit, Dei genitrix dici non potest; atqui B. Virgo Divinitatem non genuit; ergo, etc. Nego maj. : Ut B. Virgo verè dicatur Mater Dei, satis est quòd genuerit secundùm carnem eum qui Dei Filius est ac verus Deus. Porrò, ut genuerit secundùm carnem eum qui Deus est, opus non est ut Divinitatem genuerit, sed sufficit in ejus utero atque ex ejus carne formatum fuisse corpus, quod à primo ortu animâ donatum Verbo divino confestim fuerit hypostaticè unitum; uno verbo sufficit Verbum divinum, secundùm carnem quam sumpsit, ex eâ genitum et natum fuisse. Et verò, num anima prolis generatur à matre vulgari? minimè; generatur corpus, cui organis, quantum satis est, instructo statim infunditur anima; atque nihil amplius requiritur ut totius prolis animâ et corpore constantis vulgares foeminæ nuncupentur matres; ergo ut B. Virgo dicatur Mater Dei, non oportet hanc esse Divinitatis genitricem; satis est quòd genuerit secundùm carnem eum qui Deus est.

Inst. Ut B. Virgo titulo genitricis Dei insigniretur, debuisset saltem concurrere ad productionem humanitatis ut unitæ substantialiter Divinitati; atqui istud de Virgine dici non potest; ergo, etc. Nego min. Etsi B. Virgo non fuerit causa cur Deus voluerit et Filium suum incarnari et cum tali humanitate uniri, quemadmodum matres vulgares non sunt causa cur Deus vel tulerit decretum uniendi animam

cum corpore, vel illud in tempore exequatur, nihilominus tamen B. Virgo dicenda est concurrisse ad productionem humanitatis ut unitæ substantialiter Divinitati. Namque illa influxit in productionem humanitatis ut subsistentis et quodam supposito terminatæ; atqui à primo ortu suo, à primo conceptûs instanti, humanitas Christi Verbo Divino terminata et ultimo completa fuit; ergo, etc. Et certè illa influxit in productionem humanitatis ut unitæ Divinitati, quæ corporis suppeditavit materiam iis instructam organis et dispositionibus, quæ, posito Dei decreto de perficiendo in tali humanitate mysterio Incarnationis, unionem cum animâ et cum Verbo divino exigebant; atqui B. Virgo suppeditavit materiam, etc.; ergo.

Obj. 4^o : Beata Virgo non est consubstantialis Deo, ipsique tempore est posterior; ergo ejus mater dici non potest.

Dist. ant., non est consubstantialis Deo et ipsi posterior est quantum ad ejus Divinitatem, concedo; quantum ad carnem ab eo assumptam, nego. Beata Virgo non est mater Dei quantum ad Divinitatem ipsam; sed eatenus est mater Dei, quatenus mater est Homini Dei, id est, quatenus ex eâ originem duxit humanitas quam à primo ortu Verbum assumpsit.

Obj. 3^o : Etsi B. Virgo dici posset Mater Dei, attamen satius esset illâ locutione abstinere, 1^o Quia, ut aiebat Nestorius *Serm. 1* : *Si habet matrem Deus, ergo excusabilis gentilitas, matres Diis subintroducens*. 2^o Quia cum naturaliter non cognoscamus Deum Verbum assumpsisse naturam humanam, sensus nativus tituli *Deiparæ* ad naturam Dei propriam videtur referri. 3^o Quia hâc voce datur ansa saltem simplicibus cogitandi B. Virginem esse Deam, ipsomet supremo numine antiquiorem et celsiorem; ergo, etc.

Ad primum, nego conseq. Docebant gentiles Deos secundùm nativam et sibi essentialem ac propriam naturam ex matribus esse ortos, quod absurdissimum est; docemus verò nos Beatam Virginem non esse Matrem Dei quantum ad naturam sibi essentialem spectati, sed tantum quoad naturam humanam quam Deus Verbum nostrî causâ in personæ unitatem sibi devincire dignatus est; ergo, etc. Ad secundum, ut sensus nativus vocis *Deiparæ* habeatur, considerandum non est quid illud nomen sonaret positâ solâ religione naturali; inspicendum est quid significet positâ revelatione, et secundùm placita christianæ religionis quam Deus instituit. Cum verò hæc religio doceat Deum Ver-

hum et esse ens supremum æternum, independens, immutabile, et simul tradat ipsum in utero Virginis naturam nostræ similem assumpsisse; quisquis prima hujusce religionis dogmata delibavit, facile percipit vocem, Deipara, ad naturam à Verbo assumptam referri, non ad divinitatem. Ad tertium, nego ant. Quippe docentur simplices B. Virginem meram esse creaturam, filium verò, quem secundum carnem genuit, esse naturâ Deum omnipotentem, rerum omnium ipsiusque B. Mariæ, creatorem. Qui porro perperam timent ne B. Virgo à simplicibus Dea credatur, quare non magis metuunt ne Christus, Mariæ juxta Scripturas filius, credatur simplex homo, si ejus matrem non liceat Deiparam appellare?

De celebri S. Chrysostomi testimonio ex Homil. ejus 5 in Epist. ad Hebr.

Operæ pretium est Nestorianæ hæreseos confutationem celebris hujusce testimonii expositione concludi. Ad istud Apostoli cap. 4, v. 8 : *Ad Filium autem* (dicit Deus, Psal. 44, v. 7) : *Thronus tuus, Deus, in seculum seculi; virga æquitatis, virga regni tui. Dilexisti justitiam, et odisti iniquitatem; propterea unxit te Deus, Deus tuus, etc.*, sic habet S. Doctor, juxta editionem græcam veronensem (1) an. 1529, cui Comelliana græco-latina, et pleræque versiones latinæ (2) concinunt : « Hic (adducto scilicet « Davidis textu) et Judæos, et Pauli Samosateni asseclas; et Arianos, Marcellumque, et « Sabellium feriit (Apostolus), et Marcionem. « Quomodo? Judæos quidem, ostendens duas « personas, et Deum et hominem. Alios autem, « Pauli, inquam, Samosateni asseclas, quod « hæc dicat de æternâ substantiâ et increatâ essentiâ, ... Adversus Arianos autem, et rursus « hoc ipsum, et quod non sit servus; si autem « creatura, servus. Adversus Marcellum autem « et alios, quod sint duæ personæ divisæ per « hypostasim. Adversus Marcionistas autem, « quod Divinitas non ungitur, sed humanitas. »

Facessunt jamdudum eruditis negotium hæc voces : *Judæos quidem* (feriit Apostolus) *ostendens duas personas, et Deum et hominem*, δὲ πρὸς Ἰουδαίους, καὶ Θεὸν καὶ ἄνθρωπον; quas celebres

(1) Adornata fuit à Stephano Sabio juxta exemplaria Bibliothecæ Palatinæ.

(2) Editio latina Homiliarum in Paulum, Veron. 1550, edit. Antwerp. 1544, Basileensis 1558, Nivelliana Paris. 1681, Comelliana 1605; editio latina Frontonis-Duceti an. 1615, quæ è regione græci contextûs exhibetur in edit. Paris. 1656, etc.

inprimis fecit concertatio quæ inclinante seculo proximè elapso exorta est occasione cujusdam versionis gallicæ Homiliarum S. doctoris in Epistolas divi Pauli Parisiis editæ an. 1690. Nimirum relata mox verba interpretes gallicus sic reddiderat : *S. Paul confond les Juifs, en montrant qu'il y a deux personnes en Jésus-Christ, Dieu et l'homme.* Et ista pariter : *Adversus Marcellum autem et alios* (Sabellianos scilicet), *quod sint duæ personæ divisæ per hypostasim*, sic verterat : *Il confond Marcel et les autres, en montrant que les deux personnes qui sont en Jésus-Christ sont subsistantes par elles-mêmes, et séparées entr'elles.* Hæc interpretatio, præsertim adjectione præposterâ vocis *Jesu Christi*, quæ nullo in codice MS. nullâ in editione seu græcâ seu latinâ compareret, purum putum Nestorianismum S. doctori affungebat. Quapropter illa ad sacram facultatem Parisiensem tanquàm Nestorianismum renovans denunciata est scripto cui titulus : *Le Nestorianisme renaissant* : quo gravissimâ etiam ejusdem erroris suspicione aspergebantur Jansenii defensores, inprimis Arnaldus, cujus, sicut et domini de Saci, olim quasi amanuensis fuerat D. Fontaine versionis auctor. Verum tota hæc controversia extincta est retractatione solemnî, quam Epistolâ datâ die 4 septemb. an. 1695, ad illustrissimum archiepiscopum Parisiensem Harlæum direxit interpretes gallicus, in quâ se ex merâ rerum theologiarum imperitiâ circa locutiones ad summa fidei mysteria attinentes graviter lapsum esse, candidè agnovit, sibi que soli errata sua esse attribuenda contestatus est. Animadvertendum ducimus R. P. Daniel doct. è S. J. theologum in eximiâ Dissertatione latinâ quam fervente hoc dissidio super illo S. Chrysostomi textu exaravit, hominis simplicitati, non malitiæ aut hæresi præconceptæ, vitia et errores interpretationis tribuisse; Arnaldum verò de mysterio Incarnationis variis in locis ita orthodoxè esse locutum, ut Nestorianismi infamia ipsi nullo pacto impingi queat.

Quod ad ipsum testimonii intellectum attinet, observandum 1^o Judæorum, quos ibi perstringit S. doctor, duos fuisse errores, de quibus sæpissimè cum iis SS. Patres disputarunt. Prior spectabat distinctionem personarum in Deo quam negabant, nolentes agnoscere duplicem in Divinitate personam, Patrem scilicet et Filium, à Prophetis distingui. Alter error ad Christum attinebat, quem purum fuisse hominem contendebant. Sabellius verò et Marcellus, quos etiam in textu allato refellit S. Chrysos-

tomus, non repudiabant nomen personarum in Deo, sed volebant eas esse voce tenus distinctas, non secundum subsistentiam et hypostasim.

Observ. 2°, evidentissimum videri has voces, *Adversus Marcellum autem et alios* (scilicet Sabellianos), quod sint duæ personæ divisæ per hypostasim, de Deo Patre et Filio esse intelligendas. In eo quippe tota posita fuit Sabellii et Marcelli præcipua hæresis, quod Patrem à Filio per hypostasim non distinguerent, textusque Apostoli quem ibi S. Chrysostomus explicat, huic hæresi confutandæ natus est, atque à Patribus, ipsoque S. doctore et ejus discipulis in hunc finem sæpè adhibitus fuit; ergo.

Observ. 3°, partem textûs allati, quam diximus difficultatem parere, variis modis legi. Jam retulimus lectionem editionis græcæ veronensis cui etiam notavimus Commellianam et plerasque latinas versiones consentire. Editio græca etonensis ab erudito Savilio Anglo, variis codicum MSS. per Europæ Bibliothecas sparsorum lectionibus summo sumptu comparatis, anno 1612 adornata; editio græco latina Parisiensis anni 1636, et editio nova PP. Benedictinorum T. 12, an. 1735, habent: *δύο τὸν αὐτὸν δεῖκνύς, καὶ θεὸν καὶ ἄνθρωπον*; quæ reddenda sunt, *ostendens eundem esse duo, et Deum et hominem*. Porro Mutianus Scholasticus, qui, jussu Cassiodori senatoris post annos à sancti Chrysostomi obitu circiter centum, homilias S. doctoris in Epistolam ad Hebr. juxta exemplar à Constantino seu Constantio presb. Antioch. collatum, latinas fecit, et cujus versio Par. anno 1523, ac deinde Basileæ 1527, jam typis mandata, ad imum paginæ novæ editionis operum S. Chrysostomi iterum exhibetur; vetustus, inquam, ille interpres sic legit: *Judæos quidem* (percussit), *ostendens eis esse duas personas et unum Deum*. His observatis,

Dico, quæcumque textûs allati lectionem et versionem sequaris, dogma Nestorii non posse S. Chrysostomo adscribi. Probatur tribus argumentis, quæ seorsim sumpta magni sunt ponderis, simul autem conjuncta rem planè faciunt. Primum est, S. doctorem disertissimè docuisse unicam esse in Christo personam; sic enim loquitur in Epist. ad Cæsarium monachum: « Pium et valde pium, Christum, qui « morte circumdatus est, confiteri in Divini- « tate perfectum, et in humanitate perfectum, « unum Filium unigenitum non dividendum in « filiorum dualitatem, portantem tamen in se- « metipso indivisarum duarum naturarum in-

« convertibiliter proprietates. Non alterum et al- « terum, absit; sed unum et eundem Dominum « Jesum Christum Dei Verbum carne nostrâ « amictum.... Etsi enim duplex natura, verum- « tamen indivisibilis et indissipabilis unitio, in « unâ filiationis confitendâ personâ, et unâ « substantiâ. » Non minùs clarè dixerat superius: « Sic et hic divinâ insidente corpori na- « turâ, unum Filium, unam personam utraque « hæc fecerunt. Agnoscendum tamen inconfu- « sam et indivisibilem rationem, non in unâ « solùm naturâ, sed in duabus perfectis. » Ad- « verte autem utrumque hunc locum ab Anastasio, à Nicephoro Constantinop. et à S. Joanne Damasceno, ut Bigotius notavit, adductum fuisse adversus Monophysitas.

Alterum argumentum his tribus continetur. 1° Neque Nestorius, neque ejus fautores unquam pro suæ causæ defensione textum Chrysostomi, de quo agimus, attulerunt. 2° S. Cyrillus et S. Cœlestinus sum. pontifex in suis Epistolis ad clericos Constantinop. et Cassianus lib. 7 de Incarn. cap. 30, Nestorium exagitant quod doctrinam à S. Chrysostomo alienam traderet. 3° Facundus Hermian. lib. 11, ut Theodorum Mopsuestenum à V synodo damnandum non fuisse probet, SS. Patrum dicta quædam erroribus Nestorii in speciem affinia undequaque colligit, imò cap. 5, ipsas laudat S. Doctoris Homilias in epistolam ad Hebr. nec tamen textûs allati ullam mentionem facit; ergo, etc.

Tertium argumentum est, nullâ ejusdem textûs lectione aut versione Nestorianismum obtrudi aut indicari. Nam 1°, si sequamur lectionem Mutiani, *Ostendens eis* (Judæis) *esse duas personas, et unum Deum*, omnia plana sunt, et nulla difficultas. Errorem Judæorum de unâ tantum in Deo personâ, Apostoli et Psaltis Regii auctoritate ibi comprimit Chrysostomus; de incarnatione nihil loquitur. Plurimi porrò hanc versionem faciebat Henricus Savilius, ipsique procul dubio magnam auctoritatem confert Senatoris Cassiodori, cujus jussu peracta est, summâ in codicibus accuratis comparandis diligentia. Halesius, in notis quas ad calcem editionis suæ Savilius edidit, observat Mutianum vertisse quasi legisset *δύο πρόσωπα δεῖκνύς, ἀλλ' ἓνα θεόν*, quæ fortassis lectio sequenda est, inquit ille.

Nec dicas, positâ hac lectione idem dogma à S. doctore adversus Judæos hic ostendi; quod mox adversus Marcellum et Sabellium adstruitur, nempe dogma duarum in Deo personarum, Patris et Filii; proindeque Judæos seorsim à Marcello et Sabellio non debuisse

confutari. Enimverò, idem quidem dogma utrobique, sed diversimodè expressum stabilitur, appositè scilicet ad varios illorum errores. Judæi absolutè negabant esse in Deo plures personas, Sabellius et Marcellus personarum nomen non repudiabant, sed tantùm eas negabant esse distinctas secundùm hypostasim et subsistentiam. Potuit ergo S. doctor adversùs Judæos ostendere ex verbis Davidis ab Apostolo adductis, duas esse in Deo personas, et deinde contra Marcellum et Sabellium ex eodem sacro textu adstruere has duas personas esse distinctas secundùm hypostasim; ergo, etc. 2º Si editioni Etonensi eamque subsecutis Parisiensibus editionibus adhæreamus, juxta quas legendum est, *ὁὗς τὸν αὐτὸν δεικνύς, καὶ Θεὸν καὶ ἄνθρωπον*, *Ostendens eundem esse duo, et Deum et hominem*; vel de Deo, vel de Christo, istud, *eundem esse duo*, accipietur. Si de Christo, patet ibi prædicari ejus personæ unitatem, atque adversùs Judæos, Christi Divinitatem negantes, ostendi unum *eundemque* Christum *esse duo*, id est, duas res, duas naturas, nempe *et Deum et hominem*.

Frustra opponeres, verba quæ inferiùs leguntur : *Adversùs Marcellum autem et alios, quòd sint duæ personæ divisæ per hypostasim*, planè referri et ordinem dicere ad personas antea significatas, idque postulare vim pronominis, ταῦτα, quod in græco habetur, in quo legitur ὅτι δύο ἐστὶ ταῦτα πρόσωπα διηκριμένα κατὰ τὴν ὑπόστασιν, *quòd sint HÆ duæ personæ, distinctæ secundùm hypostasim*; proindeque partem quæ spectat Judæos non posse ad solum Christum referri, quin in eo duæ personæ admittantur distinctæ secundùm hypostasim. Namque ubi lectio Etonensis de Christo intelligitur, voces δύο ταῦτα πρόσωπα, *hæ duæ personæ*, quæ inferiùs leguntur, referendæ sunt ad duas personas ipsomet textu Apostoli significatas, nec ulla in eo est difficultas. Sin autem de Deo exponantur hæc eadem verba, *eundem esse duo*; difficultas quidem in intelligendis istis, *et Deum et hominem* aliqua remanebit, quam mox explicabimus, sed nullum ibi esse poterit Nestorianismi vestigium. 3º Tandem, si cum editore Veronensi legatur : *Ostendens duas personas, et Deum et hominem*, non dissimulabimus priora verba : *Ostendens duas personas*, si de Christo intelligantur, hæresim Nestorii sapere. Censuit quidem Flaminus Nobilius (1), qui jussu Gregorii XIII,

S. pontificis recognoscendis SS. Patrum ac præcipuè S. Chrysostomi operibus utilissimam operam impendit, *impropriè ab illo voces istas πρόσωπον καὶ ὑπόστασιν esse usurpatas, idemque valere atque οὐσίαν καὶ φύσιν*, hoc est, essentiam et naturam, seu respectus ad essentiam et naturam; atque eam expositionem secutus est vindex interpretis gallici (1), nec Witassius improbat (2).

Sed 1º, etsi paulò ante S. Chrysostomi tempora, de vocis *hypostaseos* significatione disputatum fuerit, de nomine tamen πρόσωπον idem non legitur, vixque ullum afferri potest impropriæ hujusce vocabuli acceptionis exemplum, quod ad rem attineat. 2º Hanc à mente S. Chrysostomi fuisse alienam patet ex laudatâ *Epistolâ ad Cæsarium : Duplex natura, in unâ filiationis confitendâ personâ, et unâ subsistentiâ*, διττὴ ἡ φύσις . . . ἣν ἐν ἐνιῶ τῆς ὑπόστατος ἐμολογοῦμεν πρόσωπα καὶ μιᾷ ὑποστάσει. 3º Apud omnes constat S. Chrysostomum dixisse semper tres esse in Trinitate hypostases. Cùm igitur paulò post verba quæ expendimus, ista jam laudata adjiciat S. doctor, *quòd sint duæ personæ divisæ per hypostasim*; planum est ab eo strictè et propriè sumi *personæ* προσώπων nomen, nempe pro naturâ subsistente et ultimò completâ; ergo, etc.

Itaque dandum videtur hâc editionis Veron. lectione : *Ostendens duas personas*, si illud de Christo intelligeretur, Nestorii popinari errorem. At pariter fatendum, quod ex dictis sequitur, posse ejusmodi voces ad duas in Divinitate personas, seu ad Patrem et Filium divinum attinere, nisi eas ad Christum referri aliquid cogat: atqui illas ad Christum referre nihil nos cogit. Enimverò 1º ibi Christus ne nominatur quidem. 2º Scopus S. doctoris percellentis Judæos, Patris à Filio in Divinitate distinctionem, perinde ac Divinitatem Christi inficientes, non postulabat eum de solo Christo adversùs illos agere. 3º Textus Apostoli, seu potius textus Davidis ab Apostolo laudatus utrumque Judæorum errorem ex æquo comprimat. Ergo.

At, inquires, ista immediatè sequentia : *et Deum et hominem*, nonne manifestè Christum naturâ divinâ et humanâ præditum indignant? Atqui tamen personarum præcedentibus verbis primùm an. 1578 editis, deinde verò ad caleem tomi 3 edit. Nivellianæ, an 1581.

(1) Libello inscripto : *Le Roman du Nestorianisme renaissant convaincu de calomnie et d'ex-trava-gance*.

(2) De Incarn. T. 1, Q. 5, art. 1, p. 426.

(1) In notis ad opera S. Chrysostomi, Romæ

memoratarum explicationem hæc continent, quasi dictum esset : *Ostendens duas personas, nempe Deum et hominem*; ergo duplicem in Christo personam exprimunt. 1° Majorem propositionem aliqui negant, sed variis de causis. Nonnulli contendunt has voces, *et Deum et hominem*, posse referri ad Deum Patrem, et ad Deum Filium, quem nomine *hominis* ibi satis designatum fuisse volunt, quòd homo factus fuerit. Hæc fuit una è conjecturis Sixti Senensis circa hunc locum, lib. 6 *Biblioth. sanctæ* annotat. 329. Verùm à consueto S. doctoris nitore et perspicuitate hæc nimis aliena videntur. Suspiciatus est idem Sixtus Senensis ibid. « hunc locum etiam in græcis codd. esse « depravatum; et pro eo quòd in eis scrip- « tum est Θεὸν καὶ ἄνθρωπον, id est, Deum et « hominem, legendum fore Θεόν καὶ Θεόν, Deum « et Deum. Occasionem suspicionis, inquit, « præbent geminæ conjecturæ. Harum prior « est, quòd Theophylactus referens (melius « dixisset, contrahens) hæc eadem verba « Chrysostomi, omissâ hominis mentione, et « nomine Dei bis posito sic scribat: *Hoc ad- « versus Judæos, et Sabellium et Marcellum pu- « gnat, tanquàm duas personas indicans, Deum « et Deum*. Altera conjectura est, quòd con- « duplicatio particulæ, *Dei*, aptissimè con- « gruât cum propositâ Pauli sententiâ, in quâ « geminato nomine dicitur: *Unxit te Deus, « Deus tuus*, ad expressionem scilicet duarum « personarum, reclamantibus Judæis, Sabellio « et Marcello, qui unam tantum Deitatis per- « sonam agnoscunt. »

Recentior quidam in commentariis Trivol- tiensibus ad mensem Jul. an. 1730, iisdem fretus argumentis, S. doctoris textum aliâ ratione corrigit. Scilicet conjectat legendum esse : *Ostendens duas personas, et Deum, et Deum, et hominem*, καὶ Θεόν, καὶ Θεόν καὶ ἄνθρωπον; vult autem has voces, *et Deum, et Deum et hominem*, idem significare ac : *et Deum Patrem, et Deum hominem factum*; quippe cùm ista loquendi ratio, καὶ Θεός καὶ ἄνθρωπος, idem Græcis sæpè sonet ac composita hæc vox latina *Deus-Homo*. Equidem concedo ejusmodi erratum amanuensibus facilè contingere potuisse. Sed si illius recentioris valeret observatio de significatione vocum καὶ Θεόν καὶ ἄνθρωπον, nihil vellem in textu corrigi, locumque ita reddendum censerem : *Ostendens duas personas, et Deum hominem*; quibus error duplex Judæorum perstrictus haberetur. 2° Nego min. Nequaquàm necesse est hæc verba, *et Deum*

et hominem, haberi ut designationem amplio- rem personarum antea memoratarum. Nihil obstat quominus aliud dogma, nempe Christi Divinitatem adversus Judæos exprimere judi- centur, perinde ac si dictum esset : *Ostendens tum duas personas, tum Deum et hominem*, seu : *Ostendens duas personas, et simul ostendens Deum et hominem*, nimirum duas personas in Divinitate, et Deum ac hominem in Christo. Hanc expositionem multa confirmant. 1° Scop- us S. doctoris; siquidem positâ illâ expositione duplicem Judæorum errorem ex Apostoli textu, ut par est, comprimit. 2° Particula *et*, quæ vocem *Deum* præcedit. Si verba *et Deum et ho- minem*, fuissent præcedentium explicatio, de- buisset omitti illa particula, et simpliciter poni : *Ostendens duas personas, Deum et hominem*; ejus verò adjectione efficitur ut voces *Deum et ho- minem* ad verbum *ostendens* eodem modo refe- rantur, illoque perinde regantur ac si vox illa sic repetita esset : *Ostendens duas personas, et ostendens Deum et hominem*. 3° Hæc ipsâ inter- pretatione lectiones editionum Etonensis et Veronensis, ut observat Andræas Dounæus in notis ad calcem editionis Savillii, possunt ali- quâ tantum suppositâ levi transpositione con- ciliari, siquidem cum illo critico ita legere poterimus : Δύο πρόσωπα δεικνύς, καὶ τὸν αὐτὸν Θεόν καὶ ἄνθρωπον, *duas personas ostendens, et eundem esse Deum et hominem*.

CAPUT III.

Exponitur hæresis Eutychiana, et duas esse in Christo naturas ostenditur.

Ante medium quinti seculi, Eutyches pres- byter et Archimandrita Constantinopolitanus, imperitus et imprudens senex, ut ex Leone et Avito habetur, cùm Nestorianorum hæresim vehementiùs insectaretur, in aliam ivit è dia- metro oppositam, docuitque *ex duabus naturis fuisse Dominum nostrum ante adunationem, post adunationem verò unam naturam*. Quâ ratione autem è duabus naturis unam conflinxerit, non explicavit Eutyches, nec fortè ut illud expli- caret doctrinam ipse suam satis intelligebat. Certè cùm in concilio Constantinop. à Pa- tribus urgeretur ut suam aperiret mentem, quo sensu duas ante, unam verò post unitionem naturam in Christo intelligeret, nunquàm, ut id declararet, potuit adduci. *Ego*, inquebat, *non veni disputare, sed veni suggerere sanctitati vestræ quid sentiam*.

Scitè verò observat Petavius, lib. 1 de In- carn. cap. 14, n. 6, nonnisi triplici ratione

intelligi potuisse ex duabus naturis unam esse factam, scilicet vel *alterutrâ consumptâ, et in alteram mutatâ; vel duabus extinctis ut in tertiam conversis; vel certè integris manentibus et ad tertiam conflandam coeuntibus.*

Conjiciunt quidam theologi duos sensus priores esse absurdiores, quàm ut Eutychi et ejus asseclis tribuantur, atque in eo ejus errorem reponunt quòd ex naturâ divinâ et humanâ unam compositam admiserit, quemadmodum ex anima et corpore coalescit una natura humana. Fatemur Eutyichis hæresim à quibusdam Eutychianis eâ ratione fuisse emolitam, nempe à Timotheanis quos Gennadius, de dogm. Eccles. cap. 2, commemorat, et refutarunt Euthymius in Panopliâ, part. 1, tit. 7, et Leontius, lib. 1 contra Nestorium et Eutychem. Dandum quoque est Eutychianos vulgò verbis negâsse confusionem et permixtionem naturarum esse admitti, ut ex Theodoro, dial. 2, colligere est. Sed nihilominus statuendum est non solam naturarum compositionem ab Eutyche et Eutychianis admissam esse; atque tum ex dictis quibus Eutyches ensa sua prodidit, tum ex SS. Patribus ejus hæresis oppugnantibus, tum ex conciliis adversus Eutychem habitis indubitatum videtur confusionem naturarum, quam illi hæretici voce repudiabant, reverà ab iis fuisse inveciam, ideòque hos dixisse ex duabus naturis unam esse factam, quòd eas permixtas et confusas comminiscerentur, et in hâc mixtione arbitrarentur humanitatem summâ Divinitatis perfectione consumptam et absorptam fuisse.

1^o Id disertè tradit Theodoretus in Dial. *Inconfusus*, quem ante synodum Chalcedonensem, anno circiter 447, adversus Eutychianos composuit. *Ex duabus naturis*, inquit Eranistes, Eutychiani personam gerens, *dico Christum, duas verò naturas non dico.* Ad quæ orthodoxus: *Nempe tu naturæ utriusque propria non fateris?* Respondet Eranistes: *Post unionem handquaquam.* Orthodoxus pergit: *Doce nos quomodo unam post unionem dicas naturam; an quòd una ex duabus facta sit, an quòd, alterâ deletâ, altera remanserit?* Reponit Eranistes: *Ego dico mansisse Divinitatem; ab hac verò absorptam esse humanitatem... ut mare mellis guttam si accipiat; statim enim gutta illa evanescit maris aquæ permixta... Non dicimus deletam esse naturam quæ assumpta est, sed mutatam esse in substantiam Divinitatis.* Ex his habes in Christo secundum Eutychianos naturam esse unam, quòd humanitas mixta naturæ Divinæ, ab eâ absorpta

sit, et *propria*, seu proprietates suas amiserit.

2^o Eutyches, in synodo Constantinop. sub Flaviano an. 448, actione 7, fidei suæ rationem reddens, dum unam profiteretur Domini nostri peractâ adunatione *naturam*, noluit cum Cyrillo addere *Incarnatam*, noluit anathema iis dicere qui negant Christum, carnis habitâ ratione, et nobis et B. Virgini esse consubstantialem; cùmque eum sic urgeret Basilius Seleuciensis: *Si non duas naturas post adunationem dixeris, commixtionem et confusionem dicis*, consectorium illud non rejecit, sed in eadem quam antea emiserat confessione obfirmato animo perseveravit.

3^o Flavianus ad S. Leonem scribens, ait *renovari Apollinaris et Valentini hæreses ab Eutyche monacho*, docerique ex duabus naturis, post unitatem, unam naturam esse factam, quod ipse sic refellit: « Neque etiam unitas conventientium in Christo duarum naturarum sicut unâ re proprietates suas in unitate confundit, sed manent in unitate perfectæ naturarum proprietates. »

4^o S. Leo in Epist. ad Flavianum, quam expensis ejus concilii in Eutychem Actis scripsit, totus est ut contra novatorem probet salvas esse in Christo utriusque naturæ proprietates, aitque ab illo impiè naturam singularem in Christo asseri.

5^o Concilium Chalcedonense generale IV, contra Eutychem congregatum definit act. 5, « Christum in duabus naturis inconfusè, immutabiliter, indivisè, inseparabiliter agnoscendum; nusquàm sublatâ differentiâ naturarum propter unionem, magisque salvâ proprietate utriusque naturæ. » Antea Eutychem ejusque sequaces sic pinxerat: « Alii confusionem et mixtionem introducentes, et naturam esse carnis et divinitatis stultè confingentes, et passibilem Unigeniti divinam naturam per confusionem prodigosè dicentes, » etc.

6^o Idem dogma confusionis naturarum Eutychianis attribuit concilium generale V, can. 4, ubi sic habetur: « Qui impietatem Apollinarii et Eutychetis sequuntur, interemptionem eorum quæ convenerunt colentes, unionem secundum confusionem dicunt. »

7^o Constat ex Theodoro, Hæretic. fabul., lib. 4, cap. 15, Eutychem et præcipuos ejus discipulos docuisse « cruci affixam et appensam fuisse incirconscriptam, interminatam, incomprehensam Unigeniti Divinitatem eamque demum tumulo mandatam resurrexisse; »

atque hinc ii dicti sunt Theopaschitæ, quòd Divinitatem ipsam dicerent esse passam. Atqui si duas admisissent naturas distinctas et incon-
fusas, in unam per compositionem coalitas, necesse non fuisset dogma tam impium tamque absurdum ab iis defendi; ergo, etc.

De Eutylianæ hæreseos origine, progressu, oppugnatoribus, defensoribus, condemnatione, et in plures factiones partitione, aliqua dicere non abs re erit.

Ex malè intellectis quibusdam S. Cyrilli locis Eutyches in hæresim cæcus et præceps infelicitè actus est. Renovatæ partim impietatis Valentini et Apollinaris meritò accusatus fuit, de quo vide Petav. lib. 1 de Incarn. cap. 15. Primus in ejus hæresim, si Facundo fides, lib. 8, cap. 5, et lib. 12, cap. 5, insurrexit Dominus, celebris Joannis avunculi sui in Ecclesiâ Antiochenâ successor, qui de eâ synodicam epistolam ad Theodosium juniorem initio anni 448 scripsit. Eodem anno Eusebius Dorylæensis strenuus Nestorianismi oppugnator, et fidei catholicæ vindex, agnito Eutyche, cui amicitia devinctus erat, pravo dogmate, privatis admonitionibus crebrisque colloquiis eum ad veram fidem revocare conatus est; se verò hâc ratione nihil ab illo consequi prospiciens, ad concilium 29 vel 32 episcoporum, quod præside S. Flaviano Constantinop. patriarchâ ibidem tunc mense novembri habitum est, causam ejus detulit. Novator ad disquisitionem concilii juxta canonum præscripta ter vocatus, postquam illius declinandæ rimam frustra quæsiisset, tandem stipulatus *magnâ multitudine militum et monachorum*, judicio se sistit, hæresim suam coràm Patribus profitetur, eamque repudiare animo obfirmato abnuat. Quapropter synodisentiâ, ut hæreticus pertinax *ab omni officio sacerdotali, et à fidelium communione, et primatu monasterii*, seu abbatis munere dejicitur.

Ab hâc synodi sentiâ *ad Romanum et Ægyptium et Jerosolymitanum concilium*, id est, ad concilium œcumenicum provocare se, Patricio Florentio, qui jussu imperatoris Theodosii synodo interfuerat, *dissoluto conventu, silenter* insusurravit Eutyches; et ad S. Leonem, qui S. Petri sedem tunc tenebat, atque ad alios complures episcopos adversus Flavianum causæ suæ tuendæ gratiâ scripsit. At cum à Flaviano pontifex maximus litteras et concilii acta accepisset, his diligenter expensis, auctoritate apostolicâ sententiam concilii confirmavit, eximiumque de Incarnatione adversus

Eutyche errores rescriptum ad Flavianum dedit.

Eutyche impensè favebat Chrysaphius eunuchus, præcipuus rerum imperii administer, quem abbas ille è sacro fonte susceperat, quemque avaritia sacrilega infensissimum reddiderat S. Flaviano, à quo munera propter ejus ordinationem non potuerat extorquere. Hujus patrocínio ab imperatore Theodosio juniore, principe catholico, sed imbecillioris ingenii et nimiae facilitatis, obtinuit novator ut concilii Constantinop. acta quæ à S. Flaviano corrupta fuisse contendebat, coram Florentio Patricio in conventu episcoporum recognoscerentur; quod peractum est die 13 aprilis an. 449, in cœtu 34 episcoporum, inter quos quindecim synodo Flaviani anno præcedente interfuerant. Sed testibus Liberato, Brev. cap. 41. et Evagrio, lib. 4, cap. 9, nihil in iis falsi repertum.

Jam antea imploraverat Eutyches Dioscorum Alexandrinum patriarcham, virum ab omni moderatione longè alienum et Flaviani, propter datum aliquod S. Cyrilli cognatis quos ille persequabatur patrocinium, osorem ac Chrysaphio addictissimum. Dioscorus, Chrysaphio adnitente, imperatorem adduxerat, ut in concilio œcumenico causam Eutyche retractari juberet. Data igitur fuerat die 30 martii an. 449, sacra divalis, quâ viginti supra centum episcopi è sex orientalis imperii diœcesibus Ephesum ad diem 1 augusti ejusdem anni convocabantur. Insuper constitutum est Dioscorum concilio præfuturum prohibitumque ne inter judices sederent episcopi qui contra Eutychem in synodò Constantinop. jam sententiam dixerant. Incœptum est concilium die 8 augusti; adfuere episcopi circiter 130, necnon legati S. Leonis, Julius seu Julianus episcopus et Hilarius diaconus, quos epistolis ad concilium et ad Flavianum instructos S. pontifex miserat. Porro à Dioscoro et à comitibus, quos imperator, vel potiùs Chrysaphius ipsum imperatorem auctoritate vincens, ejus nomine cum copiis adesse jusserat, omnia contra fas et per vim in hoc conventu gesta. Noluit Dioscorus S. Leonis epistolas legi, etsi earum lectionem se permissurum cum juramento non semel esset pollicitus. Nulla juris forma observata; absolutus Eutyches, damnatus verò et depositus Flavianus, unâ cum Eusebio Dorylæensi et aliis fidei addictis episcopis. Insuper Flavianus ad S. Leonem provocans, ab ipso Dioscoro et à Barsumâ impio monacho ita cæ-

sus est, ut post triduum, dum in exilium ageretur, ex vulnerum dolore Epipæ in Lydiâ mortuus sit. Postremò episcopi comminationibus, et violentiâ à militibus medio in concilio horribiliter adhibitâ, ad subscribendum Dioscori statutis compulsi; qui omnes metu depositionis, exilii et mortis turpiter superati sunt, exceptis Sedis apostolicæ legatis. Harumce autem rerum per Hilarium diaconum, qui Epheso clam aufugerat, certior factus S. Leo, coactâ Romæ synodo, gesta hujus conciliabuli, seu ut appellari solet, *Latrocinii Ephesini* reprobavit et penitus rescidit; quo accepto Dioscorus furore actus in ipsum pontificem sententiam excommunicationis ferre ausus est.

Paulò post vitam finivit Theodosius die 20 junii vel 28 julii anno 450. Soror ejus, S. virgo Pulcheria Augusta ipsi successorem, sibi que conjugem, retento virginitatis servandæ arbitrio, Marcianum selegit. Is princeps, quem nemo imperatorum, seu religionis, seu imperii ratio habeatur, virtute superavit, paci Ecclesiæ restituendæ statim totus incumbens, auctore S. Leone, concilium generale Nicæam in Bithyniâ ad diem 1 septembris anni 451 indixit, quod deinceps, postulantibus S. Leonis legatis, Chalcedonem translatus est, ut ad illud imperator, quem in urbe regiâ imperii negotia detinebant, facilius posset accedere. Numerosissimum fuit illud concilium. Tradit ipsa synodus in Epistolâ ad S. Leonem quingentos et viginti, Liberatus et alii (1) aiunt triginta supra sexcentos episcopos, omnes ex Orientis imperio, si duos Africanos præsules, et legatos summi pontificis excipias, in eam convenisse. Sacro cœtui, cujus actio prima celebrata est die 8 octobris 451, per legatos suos Paschasinum et Lucentium episcopos ac Bonifacium presbyterum S. Leo præfuit. In eo lecta sunt acta tum synodi Constantinop. sub Flaviano, tum conciliabuli à Dioscoro contra S. Flavianum, Eusebium Dorylæensem et alios in Eutychem gratiam Ephesi celebrati. Prioris gesta confirmata, posterius rescissum. Dioscorus ad meliores fruges nolens sese recipere, juxta canones depositus; qui deinde Gangram in exilium pulsus (2), ibidem an. 454 obiit. Cæteris, qui ipsi per vim in Latrocinio Ephesino consenserant, venia concessa. Epistola

(1) Liberat. c. 13, Chronicon Alexandr., Theophanes, Leontius Byzant., codex vetus Eccl. Rom. Vide Tillem. Not. 42 in S. Leonem, T. 13, p. 915.

(2) Evagr. lib. 2, cap. 3. Vide Tillemont. ibid. not. 63, p. 928.

S. Leonis ad Flavianum de Incarnatione solemniter approbata, et decretum fidei adversus Nestorii et Eutychem errores editum. Quæ omnia ex ipsius synodi actis manifesta sunt.

Eutychem vocatus non fuit ad concilium, nec in eo se stitit. Nempe satis esse censuerant Patres latam adversus eum in Flaviani synodo, et à S. Leone approbatam sententiam, firmari, quæ in ejus gratiam Ephesi acta fuerant, reprobari; ejusdemque errores, quos pertinaciter defendere non cessabat, fidei decreto condemnari. Ille hæresiarcha jam in exilium, non longè tamen ab urbe Constantinopolitanâ (1), à Marciano amandatus fuerat versùs finem anni 450, vel initium 451, nempe postquàm iterùm damnatus fuisset in concilio quod contra ipsum Anatolius, à Dioscoro licet in Flaviani locum suffectus, Constantinopoli tunc temporis habuit (2).

S. Leo Epist. ad Marcianum, datâ die 15 aprilis an. 454, scribit cap. 2, Eutychem quamvis exulem, *in ipso suæ damnationis loco multa adversus integritatem catholicam blasphemiarum desperatiùs venena profundere*, rogatque imperatorem *ut ad longinquiora eum jubeat et secretiora seu tutiora loca transferri*. Quid deinde Eutychem contigerit, nullo veteri monumento comperit habemus.

Quantacumque fuerit synodi Chalcedonensis auctoritas, eâ Eutychemianismus deletus non est et extinctus; imò in varias divisus factiones, Orientali Ecclesiæ ingentium turbarum causam attulit, quas Marcianus ipse, ejusque successor Leo Augustus penitus comprimere non potuerunt. Auctum est deinde illud malum, cùm anno 482, Zeno, Leonis successor, in solemnibus Edicto quod *henoticum* seu unitivum appellatum est, unam duasve naturas et Chalcedonensem synodum siluit, solamque Symboli Nicæni professionem præscripsit; atque majus adhuc incrementum sub imperatore Anastasio cepit pestifera lues.

Præcipuæ Eutychemianorum sectæ ad duas generatim revocari solent, alteram *Theopaschitarum*, alteram *Acephalorum*. Theopaschitæ, quorum dux fuit Petrus Gnapheus, seu Fullo, qui sedem Antiochenam an. 476 invasit, sic appellati sunt, quòd Divinitatem verè passam esse assererent; unde hymno Catholicorum trisagio, *Sanctus Deus, Sanctus fortis, Sanctus immortalis, miserere nobis*, istud inserebant, *qui passus es pro*

(1) S. Leo Epist. 64, c. 3, ed. Quesnel. T. 1, p. 563.

(2) S. Leo, Epist. 68, c. 3, p. 567, 568.

nobis, ut significarent totam Trinitatem, cui una Divinitas inest, pro nobis esse passam. Is error ex eo natus est, quòd putarent divinitatem, Incarnatione Verbi, factam esse carni consubstantialem. Vide Theodorum, Lect. lib. 2 et Theophan. Acephalorum factioni originem dedit quædam Eutychianos inter et Petrum Moggum, quem illi in sedem Alexandrinam intruserant, orta dissensio. Cùm enim, hic anathema in Chalcedonensem synodum intorquere cunctaretur, et postea eam à se rejectam recipere simularet, plerique Eutychiani ab ipso discesserunt, unde dicti sunt *Acephali*, id est, avulsi à capite seu patriarchâ suo. Acephali pro libitu in suam fidei professionem varia inseruerunt, unde ex iis natæ sunt complures aliæ sectæ quarum duæ præcipuæ fuerunt una *Corrupticolarum*, qui Christi carnem corruptibilem dicebant, altera *Incorrupticolarum*, qui eandem carnem, utpote unius cum Verbo jam naturæ, incorruptibilem prædicabant. Horum dux fuit Julianus Halicarnassensis episcopus; priorum verò Severus monachus, à quo *Severianorum* nomen traxerunt. Is Severus, tempore Anastasii, Zenonis successoris, in locum Flaviani episcopi Antiocheni malis artibus suffectus est. Ex iisdem Acephalis ortum ducunt *Jacobitæ*, à Jacobo quodam syro obscuri generis homine nuncupati; quod nomen omnibus hodiè Nestorianis et Eutychianis in Ægypto et per totum Orientem commune est; sicut et Catholicis appellatio *Melchitarum*, quasi *Imperatorios* dicas, quòd Chalcedonensis sydoni ab imperatoribus congregatæ fidem sequantur. His historicè notatis, sit

CONCLUSIO. Duæ sunt in Christo naturæ inconfusæ et perfectæ, divina et humana.

Probatum 1^o ex Scripturis. Joan. 1, v. 14: *Verbum caro factum est, et habitavit in nobis*, etc. Hic duæ naturæ distinctæ evidentè significantur, nempe natura Verbi, quod mox *Deus* appellatum fuerat, et natura hominis, nomine *carnis* designata, et secundum quam Verbum cum hominibus conversatum est, et habitavit in nobis. Ergo. Philip. 2, v. 6: *Cùm in formâ Dei esset* (Christus), *non rapinam arbitratus esse se æqualem Deo; sed semetipsum exinanivit formam servi accipiens, in similitudinem hominum factus, et habitu inventus ut homo*. Unde sic arguitur. Ille duplici naturâ constat, divinâ et humanâ, in quo est *forma Dei et forma servi*, qui est *æqualis Deo et homo simul*. Atqui juxta Apostoli testimonium Christus ejusmodi est; ergo, etc.

1 Joan. 1, v. 1: *Quod fuit ab initio, quod audivimus, quod vidimus oculis nostris, quod peraspeximus, et manus nostræ contrectaverunt de Verbo vitæ... testamur et annuntiamus vobis vitam æternam quæ erat apud Patrem, et apparuit nobis*. Ex quo sic argumentari licet: Ille in quo est natura Verbi, simul et natura oculis perspecta et manibus contrectata, duplici profectò naturâ constat; atqui ex illo S. Joannis loco, in Christo est natura Verbi, cùm ille dicatur *Verbum vitæ*; est etiam natura oculis perspecta et manibus contrectata, cùm hæc de ipso expressè prædicentur; ergo, etc. Ibid. cap. 4, v. 2 et 3: *Omnis spiritus qui confitetur Jesum Christum in carne venisse, ex Deo est; et omnis spiritus qui solvit Jesum* (seu ut in græco habetur, *qui non confitetur Jesum in carne venisse*), *ex Deo non est, et hic est Antichristus*. Atqui Christum in carne venisse non confitentur, qui per Incarnationem volunt absorptam fuisse humanitatem; ergo, etc.

Observa Epistolas S. Joannis editas magnâ ex parte fuisse ad adstruendam humanitatem Christi quemadmodum ad Divinitatem ejus comprobendam Evangelium ipse conscripserat.

Demum in Scripturis Christus sæpè dicitur Deus, sæpè dicitur homo; sæpè ipsi divina et humana adscribuntur. Vide loca superius adducta adversus Nestorium. Atqui ille duplici naturâ constat, divinâ et humanâ, qui est simul Deus et homo, cui divina et humana competunt; ergo.

Decretoria inprimis sunt adversus Eutychianos testimonia in quibus Christus asseritur verus homo nobis similis et consubstantialis; quippe in eo præsertim errabant, quòd naturam humanam vellent factâ Incarnatione integram non mansisse, sed à Divinitate fuisse absorptam. Atqui non modò innumeris in locis, nempe Isai. 53, v. 2 et seqq., Jerem. 31, v. 22, Matth. 17, v. 21, Joan. 8, v. 40, Act. 2, v. 22, 1 Timoth. 2, v. 5, etc., Christus dicitur *vir, homo, filius hominis*; sed et ubique delineatur nobis similis secundum carnem, et ejusdem nobiscum naturæ. Nempe ejus genealogia describitur Matth. 1 et Luc. 3. Dicitur *ex semine Abraham, Jesse, Davidis*, etc. Matth. 1, v. 1, Luc. 1, v. 32, Act. 3, v. 25, etc. Dicitur *factus ex muliere*, Gal. 4, v. 4. *Natus est*, Matth. 1, v. 16, etc. *Crevit* Luc. 2, v. 52. *Jejunavit*, Matth. 4, v. 2. *Esuriit*, ibid. *Manducavit*, Matth. 11, v. 19. *Fatigatus est ex itinere*, Joan. 4, v. 6. *Flevit*, Luc. 19, v. 41. *Factus est obediens usque ad mortem, mortem autem crucis*, Philipp. 2, v. 8. *Expiravit et emisit spiritum*, Luc. 23, v. 46,

Matth. 23, v. 50. Uno verbo corpus et anima tum intellectu tum voluntate prædita Christo tribuuntur multis in locis cap. 1 hujus disput. relatis, atque *ex hominibus assumptus*, Hebr. 5, v. 1, *debit per omnia fratribus simulari*, ibid. 2, v. 17.

Probatur 2° ex fidei Symbolis et conciliis. In Symbolo Apostolorum, postquàm professi sumus fidem in *Jesum Christum Filium ejus* (Dei) *unicum, Dominum nostrum*, quæ Christo inesse naturam divinam significant, continenter addimus: *Qui conceptus est de Spiritu S., natus ex Mariâ Virgine, passus sub Pontio Pilato, crucifixus, mortuus et sepultus*, etc., quibus ejus humanitatem apertissimè confitemur. Pariter in Symbolo Nicæno, Christi divinitate disertissimè expressâ, additur eundem incarnatum esse, et hominem factum, passum esse, et resurrexisse tertiâ die, et ascendisse in cœlos, etc. Ubi clarissimè designatur natura humana quam Filius Dei assumpsit, et secundum quam natus est ex Virgine, passus est, crucifixus, mortuus, sepultus, etc. Hinc meritò Eutychen S. Leo, Epist. ad Flavianum, redargebat, quòd ille *nimis imperitus senex nec ipsius quidem Symboli initia comprehenderet*. Symbolum quod S. Athanasio attribuitur: *Perfectus Deus* (Christus), *perfectus homo, ex animâ rationali et humanâ carne subsistens*. Patres concilii Constantinop. generalis II, an. 381, in *Epist. synodicâ ad Damasum*, rom. Pontif. aiunt se *agnoscere Verbum Dei ante secula omninò perfectum, et perfectum hominem in novissimis diebus pro nostrâ salute factum esse*. Damasus, S. Pontif. in synodo romanâ, quæ circa id tempus contra Macedonianos et Apollinaristas congregata est, adversus istos definit in Christo fuisse simul cum corpore et animam rationalem et intelligentem, eumque non in divinitate, sed in carne cum animâ quam induerat in formâ servi, passionem crucis sustinuisse et mortem gustasse. Concilium Ephesinum generale III, an. 431, solemniter approbavit secundam S. Cyrilli ad Nestorium epistolam, in quâ natura duplex, divina scilicet et humana, et utriusque proprietates ac functiones sine ullâ confusione uni eidemque Jesu Christo disertissimè ex Nicæno Symbolo adscribuntur. Hujusce Epistolæ verba antea retulimus. Denique condemnata est hæresis Eutychiana Constantinopoli an. 448, in concilio 30 episcoporum sub Flaviano, et an. 450, in alterâ synodo quam in eum habuit Anatolius; Romæ an. 449, in synodo à S. Leone coactâ, qui tunc etiam scripsit præclaram illam et accuratam adversus Eu-

tychen Epistolam ad Flavianum; in Galliis, quarum episcopi mox memoratam S. Leonis Epistolam summo plausu exceperunt; Mediolani, an. 451, in cœtu plurium episcoporum, à quibus illa quoque Epistola solemniter approbata fuit, tandem Chalcedone eodem an. 451, in synodo generali IV, cui triginta supra sexcentos interfuerunt episcopi per se vel saltem per procuratores suos, et quam certum est non paucioribus 520 præsentibus constitisse; ergo, etc.

Prob. 3° ex sanctis Patribus qui ante floruerunt quàm Eutyches hæresis postularetur; quorum plura testimonia ab ipso S. Leone collecta referuntur ad calcem actionis secundæ concilii Chalcedonensis; multa etiam exhibet Theodoretus *Dial. 2*, qui inscribitur, *Inconfusus*; amplissimam verò eorum collectionem suppeditat Petavius lib. 3 *de Incarn.* cap. 6 et 7. Aliqua tantum exscribere satis sit.

S. Ignatius martyr in *Epist. ad Ephesios* duplicem Christi naturam his verbis perspicuè exprimit, n. 7: « Medicus unus est, et carnalis et spiritualis, genitus et ingenitus, seu factus et non factus, in homine existens Deus, in morte vita vera, et ex Mariâ et ex Deo, primum passibilis, et tunc impassibilis, Jesus Christus Dominus noster. » S. Athanasius duos adversus Apollinarium, Eutychis antecessorem, libros integros conscripsit. S. Greg. Nazianz. in carmine 2, quod est *de Virginitate*, sic canit:

. Deus et mortalis in orbem
Venit, naturam duplicem complexus in unum.
Altera mortales hominum fugiebat ocellos.
Altera perspicuo feriebat lumina sensu.
Illa Deus sublimis erat, dominator Olympi:
Hæc nostræ causâ tandem producta salutis,
Tunc cum mortali Deus est in corpore junctus.
Unus utrinque Deus. Deitati namque beatæ
Junctus homo, deitasque homini simul addita, Christus.

Amphilochius, S. Gregor. Naz. æqualis, apud Theodoret. *Dial. 2*: « Discerne, inquit, naturas, unam Dei, alteram hominis. Neque enim ex Deo excidens, homo factus est; neque proficiens ex homine Deus. » S. Chrysost., in Psalm. 44, n. 4: « Neque enim inquit, carnem (Propheta) dividit à divinitate, neque divinitatem à carne; non substantias confundens; absit, sed unionem ostendens.... Quando dico eum fuisse humiliatum, non dico mutationem, sed humanæ susceptæ naturæ demissionem. » S. Hilarius, lib. 9 *de Trinitate*, n. 5, ait Christum Jesum, ut verum Deum,

« ita et verum hominem esse. Et ejusdem periculi res est, pergit, Christum Jesum vel Spiritum Deum, vel carnem nostri corporis denegare. » Addit utramque in Christo naturam mansisse, « ne fortè Deus esse, homo nascendo, desineret; et homo rursùm Deus manendo, non esset. » Tandem concludit : « Fides vera est Deum et hominem prædicare, Verbum et carnem confiteri. » S. Ambros., lib. de Fide, cap. 9, aliàs 4, n. 77 : « Servemus distinctionem Divinitatis et carnis. Unus in utrâque loquitur Dei Filius, quia in eodem utraque natura est..... Quasi Deus, loquitur quæ sunt divina, quia Verbum est; quasi homo, dicit quæ sunt humana, quia in meâ substantiâ loquebatur. » S. Aug., lib. 1 de Trinit., cap. 7, n. 14, Eutyichis hæresim in antecessum clarissimè confodit. « Neque enim, inquit, illâ susceptione (humanitatis à Verbo) alterum eorum in alterum conversum atque mutatum est; nec Divinitas quippe in creaturam mutata est, ut desisteret esse Divinitas; nec creatura in Divinitatem, ut desisteret esse creatura. » S. Cyrillus Alexandr., cujus vestigiis se inhærere Eutyches contendebat, multis in locis, ut supra ostendimus, præsertim verò in *Epist.* 2 ad Nestorium, et *Epist.* quæ incipit *Lætentur*, ad Joan. Antiochenum, duas esse in Christo naturas, divinam et humanam, inconfusas et perfectas apertissimè significat, ut supra videre est.

Prob. 4^o ratione theol. Si ex naturis divinâ et humanâ, unica in Christo natura per incarnationem Dei Verbi facta esset; vel natura humana absorpta fuisset à divinitate, quem loquendi modum Eutyichiani sæpè adhibuerunt; vel natura divina in humanitatem versa fuisset; vel duæ illæ naturæ in tertiam aliquam permixtæ, confusæ ac mutatæ fuissent, neutrà illarum remanente integrâ vel denique divinitas et humanitas sine confusione et permixtione in unam naturam compositam coaluissent, ut ex animâ et corpore homo conflatur. Atqui nullum horum dici potest :

1^o Natura divina humanam in Christo non absorpsit. Nam si natura divina in Christo humanitatem consumpsisset et absorpsisset, vel dicendum esset Christum non esse natum, passum, crucifixum, mortuum, etc., vel hæc ipsi essent tribuenda secundum ipsam divinitatem. Atqui 1^o, de fide est Christum esse natum, passum, etc. 2^o Tam fidei quàm rationi repugnat Divinitatem ipsam pasci, pati, mori, etc., cum ipsa juxta fidem et rationem sit æterna, inde-

pendens, et essentialiter immutabilis; ergo, præter naturam divinam Christus habuit humanitatem, secundum quam est natus, passus, etc., nec ista ab illâ absorpta fuit et consumpta. Præterea, tota Trinitas non est nata, passa, etc., solus Deus Verbum pro nobis carnem assumpsit et mortem subiit; atqui, si secundum Divinitatem Christus esset natus, passus, etc., cum Divinitas una et eadem sit totius SS. Trinitatis, fatendum esset totam Trinitatem esse natam, passam, etc. Deinde, si natura humana per adunationem à divinitate absorpta est; ergo Beata Virgo nec concepit, nec peperit Christum secundum naturam sibi consubstantialiæ nec Dei paradici potest. Ubi observa cum SS. Patribus Eutyichianam hæresim etsi Nestorianæ è diametro oppositam, ad B. Virginem titulo Deiparæ spoliandam æqualiter collimare. Postremò, Christus non potuit vices Redemptoris, Mediatoris, Pontificis, per naturam suam divinam adimplere : hæc enim munia preces, supplicationes, aliosque actus edi postulant, quos à naturâ divinâ elici repugnat. Atqui Christus egit Mediatorem, Redemptorem, Pontificem. Natura ergo ejus humana à Divinitate non fuit absorpta. Quinimò, absorberi non potuisset natura humana à Divinitate, quin mutaretur Divinitas. Nam distinguebant Eutyichiani inter illa duo humanitatem esse destructam, et eam esse absorptam; istud fatebantur, non illud. Igitur humanitas, juxta illos, absorpta fuerat, quatenus Divinitati admixta evanescebat; quod sine Divinitatis mutatione contingere non potest.

2^o Natura divina in humanitatem versa non est : siquidem id repugnat perfectionibus divinis, quas fides perinde ac ratio apertissimè prædicant, quibusque excluditur à Deo vel levissima *vicissitudinis obumbratio*, Jacob. 1, v. 17.

3^o Non minùs evidenter postulant illæ perfectiones nullam admitti permixtionem et confusionem naturarum divinæ et humanæ; hæc enim confusione divinitas desineret esse quod erat, ut fieret quid novi. Præterea naturæ illi ex confusione divinitatis et humanitatis exurgenti adscribenda esset nativitas, passio, mors et resurrectio Christi. Denique natura ex illâ confusione exurgens nec esset divina nec humana, proindeque nec Deus nec homo esset Christus, nec Patri nec matri consubstantialis; ergo.

4^o Ex duabus naturis inconfusis et integris manentibus non coaluit unica in Christo natura

composita. Nam ut Divinitas et humanitas unam in Christo naturam compositam constituere dicerentur, deberent esse pariter incompletæ, seu ad se invicem naturalem habere habitudinem, qualis intercedit corpus inter et animam hominis; aut saltem necesse foret naturam divinam ipsâ unionem immutari et perfici; etenim sine alterutro ex iis, nulla concipitur vera compositio. Atqui 1°, Verbum et humanitas non sunt partes incompletæ, id est, nec humanitas naturâ suâ tendit ad unionem hypostaticam cum Verbo divino, nec etiam Verbum divinum naturâ suâ postulat uniri cum humanitate. Namque naturalis ejusmodi respectus summæ perfectioni et independentiæ Verbi divini repugnet, docetque insuper fides ex mero Dei beneplacito et summâ ejus benignitate hanc unionem peractam esse. 2° Pariter secundum catholicam fidem, Divinitas, dum humanitati in unâ Verbi divini personâ conjungitur, nihil aut amittit aut acquirit perfectionis, cum sit prorsus immutabilis. Humanitas quidem unionem suâ cum Deo Verbo perficitur; at Divinitas sine ullâ suâ mutatione humanitati conjungitur. Imò licet, ut infra dicemus, natura divina habeat rationem partis numericæ Christi, attamen non habet rationem partis perfectionum ejus, quippe cum ipsa infinitè perfecta sit, et omnes naturæ humanæ à Verbo assumptæ perfectiones, quas illæsas relinquit, summo et eminenti modo contineat. Ergo fidei repugnat ex naturâ et divinâ et humanâ unam fieri naturam compositam, ac planè dicendum est duas esse in Christo naturas, divinam et humanam, distinctas, inconfusas, impermixtas, integras.

SOLVUNTUR OBJECTIONES. — Obj. 1°: Verba hæc Joan. 1, v. 14: *Verbum caro factum est*, utriusque naturæ confusionem significant; ergo, etc. Nego ant. Vox *fieri*, non semper conversionem unius in aliud, sed sæpè meram novæ rei accessionem, sine prioris interitu, significat; ut cum dicitur quis factus esse consul, etc., vel cum Adam dictus est, Gen. 2, v. 7, *factus in animam viventem*. Ergo ut Verbum dicatur caro factum, sufficit naturam humanam ab illo assumptam fuisse in personæ unitatem; namque eam sic assumendo factum est propriè humanitatem habens, ac proinde homo. Ita illud testimonium explicant S. Ignatius martyr, in Epist. ad Trallianos; S. Epiphanius, hæresi 77; S. Ambrosius, lib. de Incarn. cap. 6; S. Aug. ser. 187, aliàs 27, de Tempore. Et verò, adeò cum Scripturis pugnat et de se

absurdum est Deum Verbum in humanitatem conversum dici, ut nequidem ab Eutychianis id unquam cogitatum fuerit.

Obj. 2°: Alter textus inter probationes allatus ex Philip. 2, naturæ duplicis fidem labefactat. Nam 1°, Verbum ibi dicitur *semetipsum exinanivisse, formam servi accipiens*. Atqui si duæ essent in Christo naturæ inconfusæ, Verbum non semetipsum exinanivisset, etc. Ergo. 2° Hæc verba: *In similitudinem hominum factus, et habitu inventus ut homo*, non denotant veram humanitatem, sed ejus duntaxat speciem quamdam exteriorem; proindeque significant naturam humanam in Christo absorptam fuisse à Divinitate. Nego ant. Imò in illo textu planè adstruitur dogma duplicis distinctæ naturæ in eademque Verbi personâ. Ad primam probationem, min. Verbum non dicitur eò loci sese exinanivisse amittendo quod erat, sed accipiendo et sibi uniendo formam servi, id est, naturam humanam unionem hypostaticâ sibi copulando. Sub hac ratione verò Verbum verè dicendum est sese exinanivisse; tum quia natura humana, quem dignatus est assumere Dei Filius, à naturâ divinâ sibi propriâ in infinitum distat; tum quia secundum eandem humanam naturam factus est servus, subditus Deo, humiliatus, et obediens usque ad mortem. Ad secundam probationem, nego ant. Voces illæ, *in similitudinem hominum factus*, de se non sonant similitudinem adumbratam, sed veram et naturalem, quasi dictum esset, Verbum, quatenus accepit formam servi, factum esse simile naturâ cæteris hominibus. Pariter in his verbis, *habitu inventus ut homo*, particula *ut* nihil quidquam humanitatis detrahit, sed magnitudinem mysterii indicat; id quippe mirum, quòd Christus, cum sit naturâ Deus, ut homo tamen apparuerit et ratione naturæ assumptæ similis hominibus inventus sit. Atque hunc esse sensum illius loci, duo plenissimè demonstrant, 1° *Forma servi*, quam ibi dicitur Christus accepisse; nam formam servi hic sumi pro naturâ humanâ ex eo patet, quòd ibidem *forma Dei* pro naturâ divinâ usurpetur: *Qui cum in forma Dei esset... semetipsum exinanivit formam servi accipiens*; 2° mors Christi, quæ ibidem ab Apostolo memoratur, et quæ in humanitatem umbratilem et phantasticam cadere non potuit.

Obj. 3°: Auctor Symboli quod sub nomine S. Athanasii circumfertur, sic habet: *Sicut anima rationalis et caro unus est homo, ita Deus et homo unus est Christus*; atqui simili compas-

ratione sæpissimè utuntur alii SS. Patres; ergò, quemadmodum ex animæ et corporis unione fit una natura composita; ita ex duabus naturis in Christo una natura coalescit. Nego conseq. Cùm unionem naturarum in Christo conferunt SS. Patres cum unione animæ et corporis in homine, nolunt similitudinem esse adæquatam et in omnibus urgendam; noverant enim, et sæpè expressè docent, Verbum esse undequâque immutabile, sponte suâ naturam humanam assumere esse dignatum, eâque unione ipsum nec perfici nec mutari. Ergò ad unitatem naturæ non est referenda similitudo, sed tantum ad unitatem personæ; atque, ut explicat S. Thomas, 3 part., qu. 2, art. 1 ad 2, sensus est, quemadmodum unus homo subsistit in carne et animâ, ita *unum Christum subsistere in divinâ naturâ et humanâ*. Quapropter auctor Symboli non ait: sicut anima rationalis et caro unus est homo, ita natura divina et humana unus est Christus; sed utitur terminis concretis, *Deus et homo*, ut ostendat comparisonem spectare ad personas ambas naturas complectentem.

Obj. 4°: S. Irenæus, lib. 2 adversus Hæreses, cap. 21, Tertull. in Apologet. cap. 21, S. Cyprian. lib. de Vanit. Idolor., S. Greg. Nyssen. Orat. Catechet. cap. 25, S. Aug. in Epist. 137, aliàs 3, ad Volusianum, S. Leo, serm. 3, in die Natalis Domini, et alii quos laudant Petav. lib. 3, de Incarn. cap. 2, n. 14 et seqq., Thomassinus, de Incarn. lib. 3, cap. 4, n. 10 et 11, et cap. 5 integro, etc., naturarum in Christo unionem nominibus *mixturæ* et *mixtionis* designant; utunturque variis comparisonibus ex liquorum permixtione desumptis; ergò, etc.

Dist. ant., ut significant hanc unionem esse intimam et intrinsecam, concedo; ut significant hanc unionem in confusione naturarum esse positam, nego. Cùm unio naturarum in Christo omnium arcissima existat, totius sit naturæ divinæ Verbi, substantiamque humanitatis et omnes ejus partes attingat, mirum videri non debet SS. doctores ad eam exprimendam, variis comparisonibus et metaphoris ex rerum sensibilibus arcissimè unitarum ductis esse usos. Inprimis verò *mixturæ* nomen ad id idoneum videri debuit; tum quòd Verbum per Incarnationem omnes et singulas naturæ humanæ partes immeet et eis uniatur; tum propter communionem idiomatum, quæ ex illo mysterio sequitur, ut postea dicemus. Cæterum, monuere SS. doctores hæc intelligenda

esse modo à corporearum rerum mixtionibus alieno, et salvâ ambarum naturarum integritate, quam sæpius asserunt. Audiatur Augustinus ipso loco objecto: « Sicut in unitate personæ, inquit, anima unitur corpori, ut homo sit; ita in unitate personæ Deus unitur homini, ut Christus sit. In illâ ergo personâ mixtura est animæ et corporis; in hac personâ, mixtura est Dei et hominis; si tamen recedat auditor à consuetudine corporum, quæ solent duo liquores ita commisceri, ut neuter servet integritatem suam; quanquàm et in ipsis corporibus aeri lux incorrupta misceatur. » Vide etiam Tertull. lib. contra Praxeam, cap. 27. Observat autem Petavius, lib. 3 de Incarn. cap. 2, vocem *permixtionis* à nonnullis Patribus repudiatam fuisse, quòd ad sensum suæ hæreseos eam Apollinaristæ et Eutychiani traherent.

Obj. 5°, cum Eutychianis, auctoritatem Julii romani episcopi qui in Epist. ad Dionysium Corinth. Episcopum refellit eos qui in Christo *duas naturas dicunt*; ergò, etc. Respondet Eulogius Alexandrinus patriarcha apud Photium, codice 230, *naturæ* nomen pro *personâ* à Julio fuisse usurpatum. Sed veriùs respondet Leontius, lib. de Sectis, act. 8, Epistolam illam Julii non esse, sed ipsi ab Eutychianis falsò adscriptam. Quod probat maximè quia S. Greg. Nyssen. in opere contra Apollinarem multa ex illâ Epistolâ laudat, quæ Apollinaris haud dubiè sunt, quæque Gregorius refellit.

Obj. 6°: Verba hæc S. Gregorii Thaumaturgi Neocæsariensis episcopi, ab Eulogio Alexandr. relata apud Photium, codice mox citato: *Non duæ personæ, neque duæ naturæ; non enim quatuor nos adorare dicimus*. Respondet Leontius in fragmento adversus Apollinaristas Patrum depravatores, opus illud S. Gregorio falsò inscripsisse Apollinaristas aut Eutychianos, *ut simpliciores fallerent*.

Obj. 7° auctoritatem S. Gregorii Nysseni, qui Orat. 4 contra Eunomium sic habet: « Nos etiam corpus, quo passionem suscepit (Christus), divinæ naturæ temperatum, illud factum esse per temperationem dicimus, quod quidem est natura quæ assumpsit..... ita ut si quid etiam naturæ infimæ assumptum est, propter dispensationem hominum generi benevolam, hoc etiam credamus an id quod divinum est et immortale transformatum esse. » Et infra: « Quomodo nos ad duos Christos fidem dispartiri dicimur?..... Scientes ex iis quæ didicimus (de unione

« naturæ humanæ cum Deo Verbo), quod
 « divina quidem natura semper una eam-
 « demque et eodem modo se habet; caro verò
 « per semetipsam hoc quidem est, quod de
 « ipsâ ratioque et sensus assumit; sed cum
 « Divinitate temperata, non ampliùs in suis
 « terminis et proprietatibus manet, sed ad id
 « quod prævalet et supereminet assumitur. »
 Et rursùs : « Cum Divinitate temperatione, se-
 « cundùm id quod præpotentius est recreata
 « corruptibilis natura potentiae Deitatis parti-
 « ceps facta est; ut si quis dicat aceti guttam
 « vasto mari immixtam, per huiusmodi mix-
 « tionem maris qualitates induisse; quia non
 « ampliùs secundùm naturam huius liquoris
 « qualitas in immensitate præpotentis inma-
 « neat. » Similia repetit in lib. contra Apollina-
 rem, ubi et docet duplicem in Christo ad-
 mittere iam fore personam, si humanitas Verbo
 unita proprias suas qualitates conservaret. Ex
 his autem sic arguitur : Ille unicam in Christo
 naturam admittit, qui ait assumptam à Verbo
 naturam ad id quod divinum est transforma-
 tam esse; hanc in suis terminis et proprietati-
 bus non manere, sed ad id quod prævalet, as-
 sumi, ac tandem Deitatis participem fieri,
 quomodò aceti gutta mari inmixta maris quali-
 tatem induit. Atqui ita S. Gregorius Nyssenus;
 ergo, etc.

Respondet Petavius, lib. 10 de Incarn. cap. 4,
 S. Gregorium loqui non de ipsâ naturæ hu-
 manæ substantiâ aut de proprietatibus ejus es-
 sentialibus, sed de accidentalibus « propieta-
 « tibus illis, inquit n. 10, quæ ex peccato
 « consecutæ, non ejus tamen maculæ sunt in-
 « fectæ, neque dedecus ac turpitudinem ha-
 « bent; » ut est moriendi conditio, tristitia,
 fames, lassitudo, sitis, etc., quas « assumptas
 « quidem ait (S. Gregorius); sed eâ causâ sub-
 « latâ propter quam erant ascitæ, prorsus
 « extinctas, et in Divinitatis statum, ut ille lo-
 « quitur, absorptas fuisse. Quod nisi ita factum
 « foret, meritò existimatum iri duas in Christo
 « esse personas, ac filios duos; quæ suspicio
 « beatâ illâ et admirabili humanæ naturæ com-
 « mutatione tollitur. »

Dist. maj. Ille unicam, etc., qui hæc ait,
 naturam humanam et ejus proprietates intelli-
 gens physicè et quoad entitatem in naturam di-
 vinam immutari, concedo; qui hæc ait propter
 dignitatem et excellentiam quam natura huma-
 na ejusque actiones ex unionem physicâ et hypo-
 staticâ cum Deo Verbo consequuntur, nego.
 Positâ unionem hypostaticâ naturæ humanæ cum

personâ Verbi, ea quæ insunt naturæ humanæ
 ad id quod divinum est physicè quidem et quan-
 tum ad entitatem non transformantur, sed ta-
 men dicenda sunt summam et infinitam in
 genere moris, ut aiunt, ex personæ unitate
 dignitatem consequi. Atque hoc ipsum est quod
 locis objectis S. Gregorius Nyssenus significat.
 Scilicet Eunomius, quem ibi refellit S. doctor,
 objecerat S. Basilium Christi passiones ipsi di-
 vinæ Verbi naturæ abjudicantem, easque natu-
 ræ humanæ ab ipso assumptæ tribuentem,
 de Christi cruce erubescere, duosque Christos
 et filios constituere, nempe Filium Dei in pro-
 priâ naturâ impassibilem, et hominem qui pas-
 sus est. Hanc calumniam ut diluat S. Grego-
 rius, ostendit ea quæ carnis Christi sunt et ab
 humanitate peraguntur, non esse solius natu-
 ræ humanæ, sed ipsi Verbo divino adscriben-
 da, sicque, non quantum ad entitatem, sed
 in genere moris, et propter eminentem digni-
 tatem quam ex unionem hypostaticâ cum Deo
 Verbo desumunt, divina fieri, seu, ut ille ait,
 ad id quod divinum est transformari, assumi
 ad id quod prævalet et supereminet, ac deita-
 tem participare; quod explicat comparatione
 valdè idoneâ, sed non in omnibus urgendâ,
 guttæ aceti, quæ mari permixta fit particeps
 proprietatum maris. Hinc laudatâ orat. 4 contra
 Eunomium post verba objecta, *Scientes ex iis
 quæ didicimus*, etc., continenter addit : « Car-
 « nis tamen et Divinitatis proprietatum (etiam
 « peractâ unionem, ut ex toto contextu patet),
 « inconfusa permanet contemplatio, quamdiù
 « in seipsis horum utrumque spectatur, tale
 « quid dicens : Verbum ante secula erat; caro
 « verò in extremis temporibus facta est. » Re-
 latisque pluribus quorum alia à Divinitate, alia
 ab humanitate Christi prodire, sic pergit :
 « Hæc enim sunt clara, etiamsi quis sermone
 « non explicet : quod plagæ et verbera sunt
 « servi, in quo Dominus; honores autem Do-
 « mini, circa quem servus; ita ut per compa-
 « gem et nexum naturalem communia fiant
 « utriusque utraque, Domino serviles vices
 « assumente, et servo dominico honore glori-
 « ficato. Ob eam causam enim et Domini glo-
 « riæ crux dicitur, et omnis lingua confitetur
 « quia Dominus Jesus Christus in gloriâ est
 « Dei Patris.... Exinanitur enim Divinitas, ut
 « capi possit in humanâ naturâ; renovatur
 « verò quod humanum est, cum fit divinum
 « per temperationem (hoc est, unionem) cum
 « Divinitate. » Ubi observa etiam clarè desi-
 gnari in Christo esse naturam Domini et natu-

ram servi, ac utriusque naturæ proprietates inconfusas. Quod et alibi disertius adhuc exprimit S. doctor. Sic orat. 5 contra Eunomium : « Neque in sententiis, inquit, neque in notionibus incertat (Apostolus); ubique enim humani cum divino temperationem prædicans, nihilominus in utroque quod cuique proprium est intuetur.... Ac ne quis immortalis naturæ, passionem crucis affricet, per alia manifestiora talem emendat errorem, mediatorum ipsum Dei et hominum, et hominem et Deum nominans; ut cum duo de uno dicuntur, congruum intelligatur in utroque; in eo quod divinum est, impassibilitas; in eo quod est humanum, in passione dispensatio. » Et lib. adversus Apollinarem : « Nos, inquit, naturam quidem humanam Verbo conjunctam servatam esse ex mysterio didicimus et credimus. » Deinde, ut explicet quomodo quidquid in naturâ nostrâ infirmum est et caducum, Divinitati commixtum (hoc est, unitum) in id evaserit quod ipsa est Divinitas, sic pergit, idiomatum communicationem clarissimè exprimens : « Propter exactam unionem assumptæ carnis et assumptis divinitatis, communicantur et mutuò dantur nomina; ita ut et humanum ex divino, et divinum ex humano denominetur : quapropter et qui crucifixus est, Dominus gloriæ à Paulo vocatur, » etc.

CAPUT IV.

Contra Monothelitas ostenditur duas esse in Christo voluntates et operationes. Ubi de facto Honorii.

Monothelitæ ita dicti sunt, à duabus vocibus Græcis *μόνος unus*, et *θέλησις voluntas*, quod nempe unam tantum in Christo voluntatem agnoscerent; quæ hæresis ante annum 626 in Oriente prodire cœpit, magnasque post modum in Ecclesiam invexit turbas, donec anno 680 in concilio generali VI proscriberetur. Præcipui Monothelitarum duces fuere Theodorus civitatis Pharan in Arabiâ episcopus, qui et ejusmodi hæreseos auctor fuisse videtur; Athanasius Eutychianorum Jacobitarum Syriam et Armeniam incolentium patriarcha; is ut imperatori Heraclio Chalcedonensem synodum à se suscipi postulanti satisfaceret, et simul errorem suum integrum retineret, duas in Christo confessus est naturas, unam verò operationem et voluntatem; Cyrus primùm Phasidis in Colchide, et deinde Alexandriæ episcopus, qui anno 633 Eutychianos Theodosianos

ad Ecclesiam reducendi specie, unam in Christo operationem sub anathematis poenâ credendam proposuit; quatuor Patriarchæ Constantinop., Sergius videlicet, cujus fraudibus et Heraclius imperator, et Honorius pontifex romanus circumventi sunt, et hæreseos fautores effecti, Pyrrhus, Sergii successor, qui errores suos Romæ coram sum. pontifice Theodoro ejuravit, et in eisdem postea relapsus est, Paulus, qui imperatori Constanti auctor fuit ut typum ederet, et Petrus; quibus Theodorus, qui, interjectis aliquibus, Constantinopolit. quoque sedem tenuit, à nonnullis adjungitur. Nemo verò inter Monothelitas celebrior extitit Macario, patriarcha Antiocheno, qui in concilio generali VI professionem fidei suæ Patribus obtulit, et errorem pertinaciter defendit; Favere Monothelismo Honorius rom. pontifex, de quo fusè postea dicemus, et imperatores duo, Heraclius nempe, qui ab unius aut duplicis voluntatis et operationis vocibus abstinendum anno 639 famosâ *Ecthesi* seu Expositione edixit, quam tamen postea, cum à Joanne Papâ proscripta fuisset, suam esse negavit, et Sergio adscripsit; et Constans Heraclii nepos, auctor alterius Edicti anno 648 promulgati, quod *Typus* appellatum est, et quo idem quoque silentium fuit imperatum.

Porrò grassanti errori vehementer, ut par erat, obstitere inprimis Sophronius, monachus doctus juxta ac pius, et deinde Jerosolymorum episcopus; Stephanus Dorensis, quem ad Honorium cum litteris idem Sophronius misit, quemque Theodorus papa suum in Palestinâ vicarium esse voluit; S. Maximus prosapiæ nobilitate, perinde ac eruditione et sanctitate celeberrimus in Africâ monachus, qui pro fide catholicâ, quam scriptis variisque in collationibus strenuè defenderat, sub Constante martyr occubuit; summi pontifices Honorium in Sede romanâ consecuti, maximè Joannes IV, à quo *Ecthesis* Heraclii improbata est; Theodorus, qui Pyrrhum Constantinopolitanum à S. Maximo aliquando conversum ad communionem admisit, et post modum in impietatem relapsum anathemate percussit; Martinus I, qui, coactâ synodo Lateranensi, anno 649, tum hæresim ipsam, tum Heraclii *Ecthesim*, Typum Constantis, et præcipuos erroris defensores Theodorum, Cyrum, Sergium, Pyrrhum, Paulumque damnavit; quocirca à Constante è sede suâ avulsus, in exilium agitur, ubi ærumnis confectus coronam martyrii meruit; Agatho, quo Pontificatum gerente, habita est synodus oecumenica

sexta, cui et ipse per legatos suos Theodorum et Georgium presbyteros, et Joannem diaconum præfuit.

Rei catholicæ adversus Monothelitas promovendæ incubuerunt Constantinus, Heraclii filius et successor, qui post paucos imperii menses extinctus est, et alter Constantinus cognomento Pagonatus, id est Barbatus, qui patrem suum Constantem excepit, et synodo sextæ suis et Agathonis curis congregatæ interesse voluit.

Hæ autem præcipuæ fuerunt synodi in quibus novellum Monothelitarum dogma proscriptum est. Nempe Jerosolymitana, à Sophronio ad hanc sedem recens evecto coacta an 635, è quâ synodica ad Honorium et ad Sergium scripta est; Romana, anno 640, in quâ Ecthesis Joannes IV improbavit; Africanæ complures, anno 646 habitæ, ut constat tum ex Epistolâ primatum Numidiæ, Byzacenæ, et Mauritanianæ ad Theodorum papam in conc. Lateran. secretario 1 relatâ, tum ex synodicâ concilii Bizaceni ad imperatorem à 48 episcopis subscriptâ, tum ex synodicâ concilii Provinciæ Carthaginensis ad Paulum Constantinop. octo et sexaginta episcoporum chirographo munitâ; Lateranensis, sub Martino I, anno 649, quâ, ut mox dictum est, Monothelismus proscriptus, et ejus defensores præcipui anathemate percussi; Romana altera viginti quinque supra centum episcoporum, ab Agathone ex omnibus Italiæ partibus et ex Galliis coacta, è quâ ad imperatorem duæ Epistolæ datæ sunt, altera nomine pontificis maximi, altera nomine concilii et totius Ecclesiæ occidentalis; in utrâque duplicis in Christo voluntatis et operationis fides luculenter exponebatur; tandem concilium Constantinop. III, generale VI, quod eodem Constantino imperante, præside per legatos suos Agathone, mense novembri an. 680, incæptum est, mense septembri anni sequentis conclusum; in eo dogma catholicum de duabus in Christo voluntatibus et operationibus assertum et definitum est, ac supra memoratis Monothelismi auctoribus et propugnatoribus Theodoro, Cyro, Sergio, Pyrrho, Paulo, etc., nominatim anathema dictum, quibus non uno in loco Honorius papa adjungitur; denique synodi sextæ judicium reverenter suscepit synodus Toletana an. 684, atque illud idem in concilio Nicæno II, generali VII, actione 7, est confirmatum.

Nunc propiùs inspicendum est in quo posita fuerit Monothelitarum hæresis. Jam diximus

unam tantum in Christo voluntatem et operationem à Monothelitis admissam fuisse. Id verò eo sensu accipiendum est, quòd solam in eo agnoverint voluntatem et operationem divinam; ut planè colligere est tum ex variis ejusmodi hæreticorum dictis, tum maximè ex professione fidei quam sextæ synodo, act. 8, Macarius Antiochenus obtulit; in eâ enim disertè attribuitur Christo *una et singularis voluntas divina*, negaturque in eo esse *aliam* voluntatem seu *adversantem* aut *contrariam*, seu *similem*, id est, conformem voluntati divinæ; atque inde eruitur quod consequens est, unam videlicet Christi esse operationem. Constat igitur Monothelitas ideò unam dixisse Christi voluntatem et operationem, quòd humanitatem ejus naturali voluntate et operatione spoliarent. At verò *voluntas* illa quam detraxere humanitati Christi, sumebaturne ab illis pro *actu*, an pro ipsâ *facultate* volendi? item, quid sibi nomine *operationis* volebant?

Circa primum, Vasquez in 3 part. D. Thomæ, Disp. 73, cap. 1, De Lugo, de Incarn. disp. 25, § 3, existimârunt Monothelitas, utpote duplicem in Christo naturam inconfusam et impermixtam confitentes, eò stoliditatis non devenisse ut voluntatem humanam sumptam pro facultate volendi Christo detraxerent. Dicunt ergo solum affectum seu actum illius facultatis ab iis humanitati Christi denegatum fuisse, affectu scilicet seu motu voluntatis divinæ actuum voluntatis humanæ supplente vices, et humanitatem ad opus, instar instrumenti inanimati, applicante. Verùm D. Thomas, 3 p., q. 18, art. 1, et q. 19, art. 1, omnesque theologi usque ad Vasquesium, ipso fatente, et plerique illi qui eum subsecuti sunt, censent tum actum tum facultatem volendi à Monothelitis fuisse Christo adjudicatam; quod longè probabilius esse probat fusè Petavius, lib. 8 de incarn. cap. 4 et seqq. Animadvertemus solum S. Maximum in disputatione cum Pyrrho, et S. Joannem Damascen., in libro quem adversus Monothelitas de duabus Christi voluntatibus conscripsit, nomine *voluntatis* non solum actum, sed et facultatem ipsam seu potentiam volendi intellexisse.

Quòd si cum Vasquesio objicias non potuisse Monothelitas in tantam absurditatem prolabi, ut animam rationalem quam in Christo agnoscebant, voluntatis facultate privatam esse judicarent, resp. 1º, compluribus exemplis exploratum haberi, errori illud esse proprium, ut secum pugnantibus ex partibus constet. Itaque

qui rationis et iudicii constantiam, inquit cap. 4 mox citato, n. 7, Petavius, *in eorum* (hæreticorum) *dogmatibus requirit, hoc ab illis, quod non fert natura rerum, exigit; et nihilo plus agit, quam si det operam, ut cum ratione insaniant.* Resp. 2° Potuit videri Monothelitis facultatem volendi non esse essentialem animæ rationali, sed hanc esse tantum ejusmodi animæ naturam ut illius facultatis recipiendæ sit capax. Quamvis de iis subtili et philosophico more discutiendis Monothelitæ solliciti fuisse non videantur.

Quod ad alterum attinet, nempe quid *operationis* nomine à Monothelitis intellectum fuerit, observ. 1° errorem de unâ in Christo operatione, ex altero de unâ ejusdem voluntate esse necessariò nexum. Nam cum operatio humana ea sit quæ voluntariè seu ad imperium voluntatis humanæ elicitur, consequens fuit Christum voluntate humanâ à Monothelitis non potuisse spoliari, quin ipsi et operatio humana ab iisdem denegaretur. Observ. 2°, vocem *operationis* latius patere quàm *voluntatis* nomen; istud sumitur tantum pro facultate aut actu appetitus rationalis; illa verò ad omnes facultatum omnium functiones attinet. Observ. 3°, Monothelitas inter se non consensisse circa illam unicam, quam in Christo omnes admittebant operationem. Nam alii, ut Pyrrhus in disputat. cum Maximo, Macarius in *Professione fidei*, etc., voluere hanc appellari *Theandricam*, Deivirilem non ut exprimerent, quod fide catholicâ docetur, nempe operationes quas Christus naturâ suâ humanâ elicit, esse Deo Verbo adscribendas; sed ut significarent Christi operationem in eo esse positam quòd voluntas divina humanitatis facultates sola moveret, et instar instrumenti inanimi ad agendum applicaret; quod dogma hæreticum est. Alii verò, ut Colluthus in concilio Lateran. secret. 3, accuratius sibi visi sunt loqui, unam simpliciter dicendo operationem divinam quam Θεοπρεπῆ Deo decibilem seu Deo convenientem appellabant. S. Martinus Papa in concilio Lateran. loco citato, meritò judicavit istos ad suum errorem exprimendum aptius esse locutos, quia qui *Deivirilem operationem* Christi dicit, *duas* reverà *significat operationes, id est, divinam et humanam.*

Hæresis Monothelitarum præformatores fuere Ariani, Apollinaristæ, et Eutychiani. Nempe, quemadmodum Eutychiani præcipui humanitatem Christi à Divinitate absorptam fuisse statuerunt; quemadmodum Ariani animam, et

Apollinaristæ mentem Christo homini detraxerunt; ita Monothelitæ Christum alioqui perfectum Deum et perfectum hominem confitentes, ipsum voluntate et operatione humanâ spoliârunt. His præmissis, dogma catholicum adstruendum est.

CONCLUSIO. Duplex in Christo voluntas et operatio distincta admittenda est.

Probatur 1° iis Scripturæ locis quibus olim Sophronius, S. Maximus et alii Monothelitas impugnârunt. Psalmo 39 (Hebr. 40), v. 8 et 9: *In capite libri scriptum est de me, ut facerem, Deus, voluntatem tuam; Deus meus, volui, et legem tuam in medio cordis meî.* Unde sic arguitur: Ibi duplex designatur voluntas, nempe voluntas divina his verbis, *ut facerem, Deus, VOLUNTATEM TUAM*; et voluntas illius qui ibidem inducitur loquens, *Deus meus, VOLUI*, etc. Atqui utraque illa voluntas est in Christo. Est quidem in eo voluntas divina, cum sit Deus Filius, et una eademque voluntas, fatentibus Monothelitis, juxta fidem insit tribus SS. Trinitatis personis. Est etiam in eo voluntas altera hic designata, siquidem ipsum Christum hic loquentem à sacro Vate induci per se patet, et ex Apost. Hebr. 10, v. 5 et seqq., indubitatum est. Ergo præter voluntatem divinam quæ Christo ut Deo competit, altera ipsi ut homini inest voluntas quâ verè operatur et facit voluntatem divinam. Matth. 26, v. 38, 39: *Tristis est anima mea usque ad mortem..... Pater mi, si possibile est, transeat à me calix iste. Verumtamen non sicut ego volo, sed sicut tu.* Marc 14, v. 36: *Abba Pater... transfer calicem hunc à me. sed non quod ego volo, sed quod tu.* Luc. 22, v. 42: *Pater, si vis, transfer calicem istum à me. Verumtamen non mea voluntas, sed tua fiat.* En iterum duplex voluntas, nempe voluntas divina, quam in Christo eandem ac in Patre admitti fides catholica postulat, et voluntas altera, quâ Christus tristis erat, mortem reformidabat, et sese voluntati divinæ subiciebat; ergo, etc.

Nota autem 1°, illos affectus tristitiæ et timoris non fuisse in Christo involuntarios et indeliberatos; quippe hos motus Christus Dominus non sensisset, nisi eos multis de causis aliquando explicandis voluisset experiri. Nota 2°, voluntatem divinam inter et actus illos quibus voluntas Christi humana refugiebat mortem, nullam fuisse veram pugnam; non modò propter conditionem à Christo expressam: *Si possibile est, si vis*, etc.; sed maximè propter diversam rationem quâ voluntas Patris et Chris-

tus homo idem objectum spectabant. Enimverò voluntas Christi humana mortem avversabatur solum ut naturæ humanæ oppositam; porro sub eo respectu Deus hanc non imperabat; libentissimè verò Christus homo mortem oppetiit sub eâ ratione quâ Deo placita erat, nempe quatenus illâ humanum genus redimi et salvari oportuit. Ergo locis allatis citra ullam imperfectionem et pugnam cum voluntate divinâ, Christo adscribitur humana voluntas, proindeque, etc.

Joan. 4, v. 54 : *Dicit eis Jesus : Meus cibus est ut faciam voluntatem ejus qui misit me.* Ibid. 6, v. 58 : *Descendi de cælo, non ut faciam voluntatem meam, sed voluntatem ejus, qui misit me.* Ibi rursus attribuitur Christo voluntas distincta à voluntate Patris. Philipp. 2, v. 8 : *Humiliavit semetipsum, factus obediens usque ad mortem.* Hebr. 5, v. 8 : *Didicit ex iis quæ passus est, obedientiam.* Certè obedientia est actus voluntatis creatæ; ergo Christus factus pro nobis obediens usque ad mortem, præter voluntatem divinam, habuit humanam voluntatem et operationem. Omitto alia plurima loca in quibus de Christo dicitur quòd doluerit, flevit, indignatus fuerit; quòd voluerit exire in Galilæam, in Judæam ambulare; quòd latere voluerit nec potuerit, etc., quæ omnia voluntatem et operationem humanam significant.

Prob. 2º disertissimis testimoniis SS. Patrum qui ante exortum Monothelismum scripserunt. Hippolytus Portuensis, qui initio tertii seculi floruit, in fragmentis adversus Beronem et Helicen Valentinianos, quæ in collectaneis suis Anastasius Bibliothecarius exhibet, et habentur etiam T. 3 Biblioth. PP. Lugd. pag. 260 et 261, ex professo probat duas esse in Christo naturas divinam et humanam, et unicuique naturæ suas esse proprietates et suam operationem. Fragm. 5, statuit illud palmare principium quod adversus Monothelitas deinceps adductum est, nempe ex identitate, aut distinctione operationum nexam esse naturarum distinctionem aut indistinctionem. « Quæ, inquit, sunt inter se ejusdem operationis et efficientiæ, ac cognitionis, et omninò idem patiuntur, nullam naturæ differentiam recipiunt. » S. Athanasius, orat. de Incarnat. et contra Arianos n. 21, ad hæc verba Christi : *non mea voluntas, sed tua fiat*; sic loquitur : « Duas voluntates ibi ostendit; alteram humanam quæ est carnis, alteram divinam, quæ Dei est. Siquidem humana ob infirmitatem

« carnis, deprecatur passionem. Divina autem « ejus voluntas prompta est. »

S. Ambros. lib. 10 in Lucam, n. 59 et 60 : « Quod autem ait (Christus) : *Non mea voluntas, sed tua fiat*, suam ad hominem retulit; « Patris, ad Divinitatem; voluntas enim hominis, temporalis; voluntas Divinitatis, æterna. » S. Leo, Epistolâ 24, aliâs 10, quæ est ad Flavianum contra Eutychem, cap. 4 : « Qui verus « est Deus, inquit, idem verus est homo; « et nullum est in hâc unitate mendacium, « dùm invicem sunt et humilitas hominis et « altitudo Deitatis. Sicut enim Deus non mutatur miseratione, ita homo non consumitur « dignitate. Agit enim utraque forma cum alterius communione, quod proprium est; « Verbo scilicet operante quod Verbi est, et « carne exequente quod carnis est.... et sicut « Verbum ab æternitate paternæ gloriæ non « recedit, ita caro naturam nostri generis non « relinquit. » Multa alia afferri possent SS. Chrysostomi, Cyrilli, Alexandrini, August. Hieron. aliorumque Patrum testimonia, quæ à doct. Petavio collecta habentur, lib. 3 de Incarn. cap. 8 et 9, et quæ in re obviâ prætermittimus. Diserta ejusmodi loca *sexcenta*, ξ ἑκατοντάδας olim contra Sergium duobus libris collegerat Sophronius, ut habetur in Supplicatione Stephani Dorensis concilio Lateran. oblatâ. Plurima leguntur tum act. 10 synodi VI, p. 785, tum in Epistolâ Agathonis papæ quæ act. 4 ejusdem synodi recitata est, p. 641.

Prob. 3º rationibus theologicis. Prima petitur ex actionibus naturæ humanæ, quas Christus exercere voluit. Joan. 7, v. 1 : *Ambulabat Jesus in Galilæam; non enim volebat in Judæam ambulare, quia querebant Judæi eum interficere.* Ibid. cap. 1, v. 45, refertur Christum *in crastinum voluisse exire in Galilæam.* Et Marc. 7, v. 24 : *Inde surgens (Jesus) abiit in fines Tyri et Sidonis; et ingressus domum, neminem voluit scire, et non potuit latere.* Has functiones eâdem profectò naturâ Christus voluit, quâ eas exercuit; atqui eas exercuit naturâ humanâ, ut patet; ergo. Illud momentum versant S. Maximus, T. 2 operum, p. 478, et S. Joan. Damascenus lib. de duabus voluntat., n. 8, T. 4, p. 546. Secunda est, Christum ex Scripturis, ex fidei Symbolis et ex conciliorum definitionibus, esse Deum perfectum et hominem perfectum simul, seu constare duabus naturis integris, divinâ et humanâ, sed qui constat naturâ divinâ et naturâ humanâ perfectis et integris,

duas habet voluntates et operationes; unicuique enim ejusmodi naturæ planum est suam esse voluntatem et operationem : *Impossibile* namque, *et contra ordinem naturæ est*, ut ait Agatho papa in Epist. ad Constantinum Pogonatum, *posse esse naturam, et operationem non habere naturæ*. Imò, ut scitè advertit Sophronius in Epist. ad Sergium, vel ex operationibus tantum, secundum eos qui sunt talia et callentes, naturæ noscuntur, et essentialium semper differentiam ex differentiâ operationum est insitum comprehendere. » Hanc rationem urgent Martin. I, in conc. Lateran. secret. 5, p. 275, S. Damascen. lib. 3 de fide orthodoxâ, cap. 15, etc. Tertia eruitur ex principio quod à S. Greg. Nazianz. SS. Patres et theologi mutuati sunt, illud videlicet à verbo esse assumptum, quod ab eo curatum est. Sic enim arguere licet cum S. Joan. Damasceno, orat. De duabus Christi voluntatibus : « Si non assumpsit humanam voluntatem, remedium ei non attulit, quod primum sauciatum erat. Quod enim assumptum non est, nec est curatum, ut ait Gregorius Theologus. Ecquid enim offenderat, nisi voluntas? » Quarta sic se habet : Christus salutis nostræ causâ semetipsum humiliavit, pro nobis oravit, meruit, satisfecit, nobisque eximia dedit virtutum omnium exempla; atqui evidentissimum est illa omnia non potuisse à Christo præstari nisi per actus voluntarios et liberos, id est à voluntate et libertate humanâ elicitos aut imperatos; ergo.

SOLVUNTUR OBJECTIONES.—Obj. 1^o : S. Dionysius Areopagita, in Epist. 4, quæ est ad Caium, unam *Theandricam seu Deivirilem operationem* admisit; ergo, etc. Ita Cyrus anathematismo 7; Pyrrhus in collatione cum S. Maximo; Macarius Antiochenus, act. 2 concil. VI. Scilicet cum tunc temporis, opera quæ sub nomine S. Dionysii Areopagitæ circumlata sunt, ejus esse minimè dubitaretur, illorum auctoritatem valdè premebant Monothelitæ.

1^o Nego anteced. Ut enim observat. concil. Lateran. sub Martino I, secret. 5, et antea adverterat Sophronius, ille locus à Monothelitis corruptus est; cumque in textu habeatur *novam quamdam Theandricam operationem*, ipsi unam substituebant. Hanc observationem, quâ tota difficultas tollitur, confirmare est ex Pyrrho Constantinopolitano qui in tomo dogmatico act. 13 synodi VI relecto, fatetur apud Dionysium legi *novam*, non *unam*; quamvis hanc immutationem non malitiosè à Cyro Alex. fac-

tam fuisse existimet, et utrâque lectione sensum Monothelitarum perinde exhiberi; quapropter, 2^o dist. : *Novam Deivirilem operationem* admisit, id est, docuit operationes Christi esse Dei-Hominis, vel quædam ejus opera externa tum à naturâ divinâ tum à naturâ humanâ proficisci, concedo; id est, voluntatem Christi humanam nihil operari, aut varios actus voluntatis divinæ et humanæ confundi et in unum redigi ac coalescere, nego. Meritò observat S. Martinus I in concil. Lateran. secret. 3, ab eo qui *operationem Theandricam* seu Deivirilem dicit, *duas significari operationes, id est, divinam et humanam*; quapropter, ut inibi refertur, aliqui Monothelitæ vocem *Deivirilis operationis* adhiberi nolebant. Tam porrò absurdum est quàm quod maximè, actum voluntatis divinæ Christi cum actu humanæ ejus voluntatis sic fuisse mixtum et confusum, ut ex utroque unicus efficeretur. Itaque nec ista mixtio et confusio, nec solùm Divinitatis operatio à S. Dionysio prædicari censendæ sunt, maximè si alia occurrat textus allati explicatio non absona. Atqui reverà is textus duplici sensu catholico facilè explicatur. Primus assignatur à S. Sophronio in Epist. ad Sergium, à S. Maximo tum in collatione cum Pyrrho, tum in scholiis ad illum S. Dionysii locum. Il non intelligunt operationem Theandricam de quâlibet actione Christi, sed de certo illo genere operis cui patrando Divinitas ejus et humanitas simul concurrebant. Scilicet aliæ operationes Christi sunt purè humanæ, ut manducare, ambulare, etc.; aliæ purè divinæ, ut peccata dimittere; aliæ ab utrâque naturâ quadamtenus profectæ, ut tactu corporis morbos depellere, vocis sono mortuos suscitare. De istis Sophronius et S. Maximus locum objectum interpretantur. Alter sensus quo idem textus exponi potest, ad omnes Christi operationes hunc extendit, et in eo consistit quòd actiones quas Christus sive naturâ suâ divinâ, sive naturâ suâ humanâ produxit dicantur Theandricæ seu Deiviriles, propter conjunctionem in uno supposito, seu quia sunt Dei-Hominis, à quo per alterutram naturam omnes eliciuntur. Ita S. Dionysium explicat S. Joannes Damasc., lib. 3 de fide orthodox. cap. 19.

Obj. 2^o, cum Monothelitis, varia testimonia SS. Patrum. S. Athanasius in libro de salutari adventu Christi admisit in Christo *voluntatem Deitatis tantum*. Ita Pyrrhus in disputatione cum S. Maximo, T. 2 op. S. Maximi, pag. 177, et Macharius, ac Stephanus act. 8 concil.

VI, p. 760. S. Greg. Naz. orat. 2 de Filio, docet *Christi velle non fuisse Deo contrarium, utpote deificatum totum*. Pyrrhus, ibid. p. 175, Stephanus, act. 9, p. 776. S. Greg. Nyssenus contra Eunomium : *Operatur, inquit, verè deitas per corpus quod circa ipsam est, omnium salutem, ut sit carnis quidem passio, Dei autem operatio*. Ita Sergius in Epist. ad Honorium. S. Cyrillus Alex. lib. 4 in Joan. *unam quamdam cognatam operationem per ambas naturas à Christo ostensam fuisse docet*. Deinde plures è Patribus naturam Christi humanam *instrumentum* ejus Divinitatis nuncupant; quâ locutione solebant Monothelitæ dogma suum exprimere. Postremò iidem in medium proferebant varia testimonia Julii rom. pontificis, Gregorii, Thaumaturgi, quoddam Mennæ scriptum ad Vigilium, necnon hujus Vigilii Epistolas ad Justinianum imperatorem.

Resp. ad singula. Ad primum, dist. Solius in Christo fuit Divinitatis voluntas, per exclusionem voluntatis contrariæ, concedo; per exclusionem voluntatis rationalis et subjectæ, nego. Ibi S. doctor loquitur de carnalibus voluntatibus seu affectionibus ex peccato natis et ad peccandum inclinantibus, easque solas à Christo excludit, ut observavit Theophanes presbyter et abbas actione 8 synodi VI. Ad secundum, nego consequ. Voluntatem contrariam voluntati divinæ à Christo eliminat quidem S. Greg. Nazianz. loco objecto; at ibidem supponit esse in eo voluntatem humanam. Nam evidentissimum est voluntatem deificatam non esse voluntatem ipsam divinam, ut optimè animadvertunt S. Maximus in collat. cum Pyrrho, Agatho in Epist. I ad imperatorem, et Basilius Gortynensis in VI synodo, act. 9. Præterea de voluntate divinâ absurdè quis pronuntiaverit eam non esse Deo contrariam; atqui id S. doctor asserit de voluntate quam ibi in Christo fuisse commemorat; ergo. Ad tertium, dist. Salus nostra Dei operatio est, quatenus ex Deo seu personâ Verbi fuit valor infinitus passionum carnis, concedo; eo sensu quòd caro seu humanitas nihil operata sit, nego. Probat S. Greg. Nyssenus contra Eunomium, ut jam alibi notavimus, positâ fide catholicâ de Verbi Divinitate, passiones Christi maximi fuisse pretii et valoris; cùm igitur salutis nostræ opus Deo Verbo adscribit, intelligendus est de valore quem ex dignitate Dei Verbi trahunt passiones carnis quam assumpsit. Cæterum S. doctor, dùm carni passiones adscribit, satis indicat Christum per humanitatem operatum

esse, quod et aliis in locis disertè explicat. Vide synodum VI, et Petavium locis supra inter probationes conclusionis laudatis. Ad quartum dist. Unam quamdam operationem, id est, unum opus externum, concedo; id est, unum actum interiorem, nego. Adverte S. Cyrillum duabus Christi naturis operationem, de quâ loquitur, attribuire; jam autem notavimus quàm absurdè voluntatis divinæ et humanæ actus in unum confunderentur; ergo ibi operatio non sumenda pro ipso actu interiori, sed proclive est hanc sumi pro opere exteriori ad quod producendum tum Divinitas tum humanitas Christi vario modo conducunt. Atque reipsâ S. doctor de miraculis ab utrâque naturâ profectis eò loci disserit. Ad quintum, dist. fuisse instrumentum animatum, concedo; inanimatum, nego. Volebant Monothelitæ naturam humanam Christi nihil agere, sed tantum à Divinitate agi, et ad opus veluti rem inanimatam applicari, quemadmodum, inquietabant, corpus, cui vis volendi nulla est, ab animâ rationali movetur et agitur. Alia fuit mens SS. Patrum. Ii voluere tantum humanitatem Deo Verbo hypostaticè unitam, ejus juris esse, proinde ab eo regi et gubernari ut suam, nec sine ejus ductu quidquam perficere; et hoc solum sensu vocaverunt eam instrumentum Divinitatis. Ad ultimum, loca Julii et S. Greg. Thaumaturgi à Monothelitis olim adducta, eadem sunt quæ jam supra diximus ab Eutychianis aut Apollinaristis fabricata fuisse. Quod ad Mennam et Vigilium attinet, scriptorum ipsis à Monothelitis attributorum suppositio accuratâ inquisitione demonstrata est act. 14 concilii VI; ergo.

Obj. 3^o : Si duæ sint in Christo voluntates, divina et humana, necesse est inter illas pugnam intercedere; siquidem voluntas hominis sæpè voluntati divinæ adversatur; ergo. Nego ant. Voluntas humana de se non importat rebellionem et pugnam adversus voluntatem divinam. Ex peccato oriuntur motus illi legi divinæ oppositi, quibus voluntates nostræ ad peccatum inclinantur; proindeque Christus, ab omni peccato naturâ suâ immunis, iis motibus obnoxius esse non potuit. Itaque hic distinguendum diligenter cum SS. Patribus inter voluntatem personalem seu arbitriam, et voluntatem naturalem. Hæc nihil aliud est quàm facultas volendi, aut velle simpliciter. Illa est velle benè aut malè, velle hoc aut illud. Rectè observat S. Joannes Damascenus, lib. *de duabus Christi voluntatibus, sicut origo erroris Nestoria-*

norum et et Eutychianorum fuit, quòd non satis personam et naturam distinguerent, « sic et et Monothelis, eò quòd nescirent quid inter voluntatem naturalem et personalem sive arbitriam, discriminis interesset, hoc in causâ fuisse, ut unam in Christo dicerent voluntatem. » Scilicet cùm Christo non possit attribui voluntas arbitraria, falsò judicârunt nec ipsi fuisse naturalem voluntatem.

Obj. 4° : Ubi unica persona, ibi et unica operatio; atqui in Christo unica est persona; ergo, etc. Dist. maj. : Ubi unica persona, et unica natura operans, ibi unica est operatio, concedo; ubi unica persona, et natura duplex nego. Una vel multiplex non est operatio, prout una vel multiplex est persona, sed prout una est aut multiplex natura. In Deo, etsi triplex sit persona, una tamen operatio agnoscitur, quia unica est natura divina; ergo in Christo, tametsi unica persona est, duplex nihilominus agnoscenda est operatio, quia duæ in eo sunt naturæ integræ et perfectæ, per quarum unamquamque operatur persona.

Inst. Actiones sunt suppositorum, ut fert vulgare axioma; ergo ubi unicum est suppositum, seu unica persona, ibi unica est actio.

Dist. ant. Actiones sunt suppositorum denominatione et attributione, id est, attribuuntur suppositis quorum sunt naturæ et facultates agentes, concedo; sunt suppositorum elicitive, ut aiunt, id est, eliciuntur à suppositis sub ratione suppositi, nego. Alia est ratio suppositi seu personæ, alia ratio sub quâ persona agit. Personarum actiones non eliciuntur ab earum personalitatibus, sed à facultatibus et naturis quas continent. Licet, v. g., intellectio sit Petri, qui persona est, attamen non intelligit Petrus per suam personalitatem, sed per suum intellectum et suam naturam rationalem; ergo cùm duæ sint in Christo naturæ quibus facultas volendi et operatio competit, debent in eo agnoscisci duæ voluntates naturales et operationes duæ, atque ipse intelligendus est per utramque suam naturam et voluntatem operari et velle. Itaque licet actiones meritò dicantur suppositorum seu personarum, tum quia pro actionum merito vel demerito, personæ vituperio vel laude dignæ sunt, tum quia ex personæ dignitate suam actiones dignitatem consequuntur; attamen ubi unicum est suppositum, non ideò unica operatio est, si illud duplicem naturam distinctam et perfectam comprehendat. Objecerunt quoque olim Monothelitæ auctoritatem

rescriptorum Honorii, ideòque de hujus pontificis mente et condemnatione nunc disserendum est.

De mente Honorii, et judicio quod de eo tulit synodus VI.

Anno 633, Sergius, Constantinop. patriarcha, Monothelita insignis, ut jam dictum est, totusque ex fraude et mendacio factus, litteras ad Honorium rom. pontificem malo dolo plenas dedit, quibus ipsi hanc induxit persuasionem, ad Ecclesiæ bonum maximè interesse, ut nec una nec duplex Christi voluntas et operatio diceretur. Extat hæc Epistola actione 12 synodi VI. Rerum itaque circumstantias haud satis perspectas habens pontifex supremus, Sergium facilius audivit, ac silentium, quo, ut eventus docuit, grave damnum fidei allatum est, judicavit servandum. Quâ de re quatuor conscripsit Epistolas, unam ad Sergium quæ celeberrima est, et in eadem act. concilii VI exhibetur; alteram ad Cyrum, Alexandrinum patriarcham et tertiam ad Sophronium Jerosol. quæ perierunt; ultima, cujus fragmenta duntaxat supersunt ibid. act. 13, ad eundem Sergium fuit missa. Ex istâ colligitur Honorium insuper à legatis, quos Sophronius Jerosolymorum recens episcopus cum synodicâ Epistolâ ad se miserat, silentii ejusdem per Sophronium observandi exegisse pollicitationem; quæ promissa Sophronius, vir studio fidei clarissimus, adeò non probavit, ut Stephanum Dorensem episcopum, suffraganeorum suorum principem, ad apostolicam Sedem miserit, quo summus pontifex de fidei periculo certior fieret, eique promptum remedium adhiberet. Ob scriptas ad Sergium litteras Honorius à sextâ synodo, unâ cum Theodoro Pharanitâ, Sergio, Cyro, aliisque Monothelitarum ducibus, act. 13 condemnatus est.

Quæritur an suis ad Sergium litteris Honorius errorem Monothelitarum propinaverit, an ei saltem faverit, et quo sensu accipienda sit sententia in ipsum à Patribus concilii VI lata.

Multiplex eâ de re est eruditorum opinio. Magdeburgenses, centuriâ 7, cap. 10 et 11 Forbesius Instruct. Hist. Theolog. lib. 5, Guillemus Cave in Historiâ litterariâ, seculo Monothelitico, et alii Protestantes, Honorii litteras ad Sergium hæreticas esse statuunt, eumque ut hæreticum Monothelitam à synodo VI condemnatum fuisse. Idem sentiunt è Catholicis non pauci, nempe Melchior Canus, lib

6 de Locis Theologicis, capite ultimo, Edmundus Richerius, in Historiâ conciliorum generalium lib. 1, cap. 10, ubi docet Honorium excusari solum posse ab hæresi formali, quod Monothelismus nondum esset solemnî Ecclesiæ judicio proscriptus, Simon Vigorius regius consiliarius, in Commentariis ad resp. synod. concilii Basileensis, Mæmburgus in Tractatu historico gallicè scripto de Ecclesiæ Romanæ prærogativis, Argentæus in Appendice ad elementa sua Theologica, qui tamen mentem Honorii Monothelismo imbutam fuisse negat, Dupinus Biblioth. Eccles. T. 5, p. 222, edit. Paris., Launoïus, tomo 5, passim, etc.

Istud verò discrimen inter hos omnes maxime intercedit, quod Canus, Argentæus et alii Honorium duntaxat ut privatum errasse existiment; contra non modò Protestantes, sed et Richerius, Vigor, Mæmburgus, Dupinus, etc., contendunt ab Honorio ut pontifice errorem fuisse Ecclesiæ propinatum. Visi sunt porrò Quesnelli apologistæ moderationis et verisimilitudinis omnes metas transgredi, cum, ut se de rejectâ constitutione *Unigen.* excusarent, affirmaverunt Honorii litteras etsi dogmaticas et hæresim definientes, fuisse tamen ab orientalibus episcopis expressè acceptatas, et ab occidentalibus tacito consensu. Vide *Témoignage de la vérité*, avertiss. pag. 11 et 12, et pag. 215, 214; *Mémoires sur l'appel des 4 Evêques*, 1717, pag. 25 et 26; *Vérité rendue sensible*, 3^e édit. pag. 217, 218, 425; *Réponse à l'Instruction de M. le cardinal de Bissy*, 1772, etc.

Qui Honorium ab hæresi eximendum censent, ii autem sunt multi, in varias etiam discedunt sententias. Baronius (cui Pighius et Hosius præiverant), *Annal. eccl. ad. an. 635 et 681*; Bellarminus, lib. 4 de S. Pontif. cap. 11; Binius, in notis ad Honorii vitam et ad Leonis Epistolas, T. 6 concil. Labb.: Gretserus, in *Examine mysteriorum Plessæi*; Vallius, de *Infallibilitate rom. pontificis* pag. 2, q. 4; Sylvius, lib. 4. *Controvers. q. 2, art. 12*; Franciscus Marchesius, *Oratorii romani presbyter*, in *Clypeo fortium, seu Vindiciis Honorii, rom. edit. 1680*; auctor cujusdam opusculi cui titulus: *Examen exact et détaillé du fait d'Honorius*, quod anno 1758 prodit, alique conjectant acta synodi VI fuisse interpolata in iis quæ ad Honorii damnationem attinent. Auctorem interpolationis Baronius facit Theodorum qui ad sedem Constantin. è quâ ante synodum VI deturbatus fuerat, aliquando post hujus synodi exitum, iterum evectus est.

Putat Annalium ecclesiast. parens hunc Theodorum in synodo VI inter Monothelitas damnatum fuisse; cumque ejus nomen in actis hodiè non compareat, conjicit hunc nominis sui loco Honorii nomen substituisse, atque acta hocce modo corrupta legatis Agathonis qui synodo præfuerant, facinoris impii participibus, data fuisse, quæ ad romanum episcopum Agathonis interim è vivis erepti successorem deferrentur. Marchesius verò opinatur sincera synodi VI acta, nullam damnationis Honorii continentia mentionem, ad Agathonem à suis legatis allata fuisse, et ab eo confirmata, atque in Gallias et Hispanias missa; Honorium autem in quodam conciliabulo Græcorum paulò post synodum VI Constantino-poli habito, auctore inprimis ex-patriarchâ Theodoro Monothelitâ, damnatum ponit. Tandem exemplaria actorum synodi VI statuit fuisse in Oriente rarissima, et penes Monothelitas asservata, ab iisque corrupta ac demum conciliabuli gestis commixta et confusa. Prædictus porrò Examini auctor fraudem Paulo Constantinopolitano, qui Theodoro anno 687 successit, aslingendam ducit, additque eundem Paulum concilio quinisexto, quod in Trullo anno 692 habitum est, et cui ipse præfuit, acta synodi VI à se adulterata obtulisse, sicque effecisse ut Honorium à concilio VI damnatum habuerit illa synodus, quam Græci postmodum à concilio VI non discrevere.

Nonnulli suspicantur Honorii Epistolas fuisse confictas aut saltem à Monothelitis adulteratas, præsertim priorem. Has fortè confictas fuisse conjectatio est Bellarmini loco citato, Vallii, parte 2 lib. de supremâ Potestate; Sylvii, lib. 4 *Controv., q. 2, a. 12*. Eas verò aliquatenus à Sergio adulteratas ponunt Joannes Baptista Tamagninus, benedictinus Venetus in Historiâ Monothelitarum, tacito auctoris nomine typis mandatâ Parisiis an. 1678 et 1679, scrutinio 5, n. 8; Combefisius in notis ad calcem T. 2 editionis suæ operum S. Maximi; Corgninus in *Dissertatione gallicâ de Monothelismo editâ Paris. 1741*, pag. 57 et sequentibus, etc.

Pluribus videtur Honorium, etsi ab errore Monothelitarum alienus fuerit, nec illum in suis litteris expresserit, favoris tamen ex imprudentiâ et negligentia hæreticis præstiti meritò accusari; hunc graviter in eo peccasse, ac tandem à synodo VI propterea jure fuisse condemnatum. In hac erat sententiâ illustrissimus de Marcâ, teste Stephano Balusio in ejus

vitâ, cap. 70. Eamdem opinionem sequuntur doct. Combefisius in *Historiâ Monothelismi*, editâ Paris. 1648, et insertâ T. 8 *Biblioth. PP.* Paris.; Tamagninus modò allatus, scrutinio 6; Thomassinus, dissertat. in synodum VI, n. 18, 19 et seqq.; Natalis Alexander, dissert. 2 ad VII seculum; Contensonius, T. 3 *Hist. ecclesiasticæ colloquiis digestæ*, colloq. 3; Wittassius, de *Incarnat.* q. 6, a. 3, sect. 3, cap. 3, etc. Negligentiæ etiam alicujus dicam Honorio impingit Christianus Lupus in *Scholiis et notis ad canones concilii VI*, cap. 4. Sed hanc *humanam* appellat, et extenuat quantum potest.

Denique plurimi et ab hæresi et à patrocinio hæreticis præstito Honorium absolventes, in eo condemnando synodum VI *ex falsâ informatione*, ut ait cardinalis Turrecremata, à vero deviâsse arbitrantur. Hanc solutionem quæ à laudato Turrecrematâ traditur lib. 2 de *Ecclesiâ*, cap. 93, Pighius, Baronius, Bellarminus, Binius, alique integritatem actorum synodi VI inficientes, ab iis volunt admitti qui acta synodi VI fuisse corrupta sibi persuadere non possunt. Wallemburgenses, post Veroniam in *Regulâ fidei*. Andreas Vallius, de *infallib. rom. pontif.* parte 2, q. 4. Coefetæus, episcopus Massiliensis, in libro adversus Mor næum, et alii plurimi concilium VI *errore facti* in Honorium anathema vibrâsse, pronuntiant. Quandoquidem, inquit Vallius loco citato, *conciliis generalibus.... cum viâ ordinariâ ex allegatis et probatis judicant, error potest* (per falsos testes) *obrepere*.

Adverte obiter hujusce opinionis patronis, Joanni scilicet à Turrecrematâ, Baronio, Bellarmino, Wallemburgensibus, etc., non consensisse Arnaldum aliosque Jansenii defensores, dum suæ juris à facto distinctionis fulciendæ causâ, Honorii defensionem susceperunt. Etenim Arnaldus ejusque asseclæ, ut scopum attingerent, censere debuerunt synodum VI Honorium damnando, circa factum dogmaticum errâsse, id est, hunc Honorii Epistolis in se spectatis sensum affinxisse hæreticum à quo erant alienæ; ideòque eas in se sumptas, tanquàm hæreticas proscripsisse, etsi obvio sensu nihil nisi pium et catholicum spirarent. At Turrecremata, Bellarminus alique Theologi *errorem facti* synodo VI adscribentes, intelligendi non sunt de facto dogmatico, seu de facto, circa quod si Ecclesia falsò judicaret, de ipso dogmate perperam pronuntiaret. Ipsimet profitentur se loqui de facto particu-

lari, de errore *ex falsâ informatione* orto. Id unum proinde volunt, episcopos synodi VI de Honorii litteris judicâsse relativè ad circumstantias in quibus scriptæ sunt, et ad ipsius Honorii mentem; eosdem *ex falsâ informatione* arbitratos esse Honorium verarum quibus scripsit circumstantiarum non fuisse in scium, atque illos idcirco errore facti pronuntiâsse Epistolas ad Sergium animo hæretico et ad fovendam Monothelitarum impietatem fuisse exaratas. Ejusmodi autem error est facti *personalis* tantum, quem *ex falsâ informatione* ipsis conciliorum generalium judiciis obrepere posse omnes consentiunt. Verum hujusce argumenti tractatio ad præsens institutum non pertinet. Quid de hactenus expositis opinionibus sentiendum sit aperient sequentes conclusiones.

CONCLUSIO I. Litteræ Honorii ad Sergium et acta synodi VI in suspicionem corruptionis malè vocantur.

Probatur prima pars, nempe perperam conjici litteras Honorii fuisse adulteratas. Nam ex actis concilii VI, quæ incorrupta mansisse modò ostendemus, liquidò constat, neque legatis romani pontificis Agathonis, quorum unus priorem Honorii Epistolam mediâ in synodo cum versione græcâ contulit, neque ulli ex Patribus hujus sacri conventus istam incidisse suspicionem, fortè ejusmodi litteras fuisse à Monothelitis depravatas.

Præterea acta synodi VI quibus prior Epistola integra, et fragmentum, quod superest secundæ, inserta sunt, Leo II, pontifex maximus, Agathonis successor, datis anno 683, die 7 mensis maii, ad imperatorem litteris approbavit et confirmavit. In his verò tantum abest ut de depravatis Honorii rescriptis conqueratur, ut potius latæ adversus Honorium sententiæ subscribat. Quam etiam ratam habet in Epistolis quas ad Hispanos super eadem synodo direxit. Quisquis igitur acta synodi VI et Epistolas Leonis II incorrupta habet, ut reverà habenda sunt, litteras Honorii ad Sergium à Monothelitis depravatas non fuisse censeat necesse est. Et verò, si expendamus quibus ducti argumentis adversarii velint illas Epistolas vitiatas fuisse, levioribus eos in conjecturis niti deprehendemus. Atque ut à posteriori Epistolâ exordiamur, illud ejus corruptionis argumentum affert Corgnius, incredibile esse, quod in eâ legitur, legatos Sophronii promisisse futurum ut de duplici operatione Sophronius sileret, si Cyrus de unâ reticendâ consentiret.

Atqui illud argumentum leve est. Quid ita ? quia, ut optimè monet ipse Corgnuius et aliàs indubitatum est, non agitur hic de strenuo illo fidei defensore Stephano Dorensi qui postea ad apostolicam Sedem à Sophronio missus est, sed de latoribus synodicae Epistolæ, quam Sophronius, recens creatus Jerosolymorum antistes, ad romanum episcopum, juxta morem consuetum dirigere curavit. Quid verò absurdi aut incredibilis in eo esse potest, Honorium auctoritate suâ ejusmodi legatos, rerum fidei fortè minùs peritos, eò adduxisse, ut œconomiam silentii approbarent, hancque Sophronio probandam fore sibi persuaderent ?

Quod attinet ad priorem Epistolam, hæc sunt verba de quibus ambigitur : *Unam*, inquit Honorius, *voluntatem fatemur Domini nostri Jesu Christi, quia ab eo assumpta est nostra natura, non culpa*. Tamagninus putat loco vocabuli *unam*, lectum fuisse in autographo *novam*; atque interpretatur voluntatem Christi hominis, ab Honorio *novam* dici, quia legi mentis perfectè subjecta, aliorum hominum voluntatibus legem membrorum rationi refragentem experientium similis non est. Corgnuius verò in unâ voce, *humanitatis*, à Monothelitis, ut putat, expunctâ hujus loci depravationem collocat. Censet igitur ab Honorio scriptum fuisse : *Unam voluntatem fatemur HUMANITATIS Domini nostri Christi*; non verò ut nunc habetur : *Unam voluntatem fatemur Domini nostri*, etc. Dissimulandum non est utramque ejusmodi immutationem textui accommodari ac præsertim posteriorem; nam altera videtur longius esse petita. Nihiloseciùs neutram judicamus admittendam. 1^o Quia neutram exigit ipse contextus. Verum quidem est ejusmodi verba Honorii à Joanne IV et ab aliis fuisse intellecta de solâ humanitate Christi, neque inficiamur genuinam hanc esse illius loci interpretationem, quam ipsi modò propugnabimus. Damus præterea apertiore et planiore fieri seusum ejusdem propositionis, si vocabulum *humanitatis* ei inseratur. Sed nefas et periculosum putamus è veterum textibus eas voces resecatas judicare quæ eorum sensibus magis declarandis idoneæ sunt. 2^o Joannes abbas cujus ope in hac Epistolâ conscribendâ usus erat Honorius, et Joannes IV, Honorii post Severinum successor, dùm in Epistolis ad Constantinum imperatorem, Heraclii filium, anno 641, calumniam Monothelismi ab Honorio propulsant, nec significant in loco quo de agitur et quem obje-

rant Monothelitæ, esse legendum *novam*, non *unam*; neque aiunt vocem *humanitatis* ab Honorio adhibitam, quo tamen uno tota evanisset difficultas; nec tandem ullo pacto significant ibiquidquam à Monothelitis immutatum. Verùm ex scopo Honorii et ex ejus Epistolæ contextu ostendunt ejus verba de solâ humanâ Christi naturâ accipienda esse. Cui naturæ una voluntas rationi et legi divinæ consentanea competit, exclusâ voluntate legi repugnante, et ad peccatum inclinante, quam utpote à peccato ortam Christus non habuit; ergo.

Dices : S. Maximus in tomo dogmatico ad Marinum presbyterum ex Anastasii abbatis testimonio refert Joannem Symponum abbatem, qui jussu Honorii primam ad Sergium Epistolam exaraverat, testatum esse, *nullo modo in eâ per numerum, unius prorsus voluntatis* (Honorium) *mentionem fecisse*; licèt hoc tunc ab eis confictum esset qui Epistolam græcè reddiderant; ergo adulterata est prior Epistola Honorii.

Nego consequentiam. Si quid ejusmodi evincerent hæc Anastasii abbatis apud S. Maximum verba, istud maximè, ne quidem *UNUS voluntatis* vocabulum excidisse Honorio. Nam, si *UNAM voluntatem* dixit, ergo *aliquo modo per numerum UNUS voluntatis mentionem fecit*. Hinc Combefisius in notis ad opera S. Maximi supra laudatis, et Tamagninus, scrutinio 5, ex hoc loco S. Maximi concludunt in genuino Honorii exemplari, loco vocis *unam*, lectum fuisse *novam*. Itaque, si certum sit vocabulum, *unam*, hîc ab Honorio usurpatum fuisse, corrui argumentum quod ex illâ Anastasii abbatis relatione conficitur. Atqui testes sunt tum ipse Joannes abbas, tum Joannes IV, in suis ad Constantinum imper. Epistolis, Honorium dixisse, *unam voluntatem*; quod etiam ab ipso abbate Anastasio videtur loco citato non obscurè significari. Ait enim, « diu se multùmque cum magnæ illic (Romæ) Ecclesiæ sacratissimis viris sermonem contulisse, ejus, quam ad Sergium scripserant (Anastasius Bibliothecarius legit, *scripserat*), Epistolæ gratiâ; » seiscitando quid causæ esset, ac quomodò *UNA* illi voluntas inserta esset; invenisseque *EJUS* *REI CAUSA* dolentes et excusantes. » Dolebant igitur juxta Anastasium Ecclesiæ romanæ primores quòd una voluntas litteris Honorii esset inserta, eumque pro virili excusabant, benignam videlicet et æquam ejus verborum interpretationem afferentes. Ergo, dùm referebat Anastasius abbas amanuensem Honorii testatum esse hunc *nullo modo per numerum, unius prorsus*

sus voluntatis mentionem fecisse; sensus non erat vocem *unius voluntatis* manu adulterâ fuisse Epistolæ Honorii insertam. Quid igitur sibi voluit Joannes abbas Honorii amanuensis, dùm ea protulit, quæ ex abbate Anastasio S. Maximus refert, nempe Honorium *nullo modo per numerum unius prorsus voluntatis mentionem fecisse*? Arbitror 1^o eum, hujusmodi verba proferendo, voci *prorsus*, quam adhibet (*unius prorsus voluntatis*, inquit), magnam vim tribuisse; quasi dixisset, Honorium nunquàm scripsisse, *unam tantum esse voluntatem Domini nostri Jesu Christi*, quod tamen Monothelitæ huic affingebant, imò non definivisse an una, an duplex operatio Christi esset. Arbitror 2^o, cùm addit: *Licet hoc nunc ab eis confictum sit, qui Epistolam græcè reddiderunt*; ista non esse exponenda de depravatione in textum invectâ à Monothelitis, sed de pravo sensu quo illum locum prioris Epistolæ Honorii interpretabantur. Saltem id unum ex his verbis colligi poterit Joannem abbatem (corruptionis in versionem græcam invectæ quam non comprobaverat, testem non perinde idoneum ac mentis Honorii) sibi persuasisse Monothelitas græcâ suâ Epistolæ Honorii versione eum sensum expressisse, quem ejusmodi Epistolâ contineri divulgabant. Quæ conjectura, de se verisimillima, rumoribus publicis procul dubio confirmabatur. Hinc cùm in synodo VI Epistola prior ad Sergium ex archivis Ecclesiæ Constantinopolitanæ in medium allata est, Joannes Portuensis Agathonis legatus, Honorii autographum cum versione græcâ conferre voluit. Constat autem, ut dictum est, ejusmodi examine et collatione agnitam fuisse Epistolæ hujus integritatem et authenticitatem. Cæterùm ipse sanctus Maximus relatum Anastasii abbatis testimonium non alio sensu adhibet quàm quo à nobis expositum est. Siquidem inde colligit tantùm hoc testimonio confirmari quæ ad Honorium defendendum dixerat. Atqui defendendo Honorium, non contenderat ejus Epistolam, cujus partem magnam refert, interpolatam et adulteratam fuisse; sed eam ratione eadem interpretatus fuerat, quâ à nobis explicata est. Vide opus laudatum S. Martyris, T. 2, p. 130 et seqq.

Probatur secunda pars, nimirum incorrupta ad nos pervenisse acta synodi VI, quâ parte Honorii condemnationem spectant. Nam si corrupta essent, vel antequàm divulgarentur, vel postquàm divulgata sunt; atqui neutrum dici potest. Non fuere corrupta postquàm divulgata sunt; siquidem 1^o circa Honorii condemna-

tionem consentiunt omnes actorum synodi VI codices seu editi, seu manuscripti. 2^o Nullum afferri potest historiæ ecclesiasticæ monumentum, quod vel minimam hujusmodi corruptionis suspicionem in animum ingerat. 3^o Honorium à synodo VI damnatum confirmant certissima cujusvis generis monumenta. Nam, anno 685, in Epistolis ad Constantinum Pogonatum et ad Hispanos, Leo II, Agathonis successor, pronuntiatam à concilio VI adversus Honorium sententiam memorat et approbat. Concilium quinisextum, quod anno 892 habitum est, ipsaque concilia œcumenica VII et VIII, Honorium ut à synodo VI proscriptum habent et proscribunt. Multis annis olim romani pontifices usi sunt formulâ fidei à Garnerio in diurno pontificum exhibita, quâ Honorio ut à synodo VI damnato anathema dicebatur. Tandem omnes historici et auctores ecclesiastici usque ad XVI seculum, unanimiter tradunt à concilio VI Honorium anathemate percussum fuisse. Ita auctor coætaneus vitæ Leonis II, T. 6 concil. pag. 1242; Agatho diaconus qui in synodo VI notarium agens, ejus acta conscripserat, in epilogo ad hanc synodum, Theodorus Jerosolymitanus, t. 7 conc. p. 182; Tharasius Constantinopolit. in Epistolâ ad summos sacerdotes Antiochiæ, Alexandriæ, etc., ibid. p. 166; Epiphanius diaconus nomine VII synodi loquens pag. 422 et 825; Anastasius Bibliothecarius, in præfatione ad collectanea sua, Beda in libro de sex ætatibus mundi ad synodum VI; Nicephorus Constantinopolitanus in suâ ad Leonem III, rom. pontif. Fidei professione; Photius, in libello de Synodis, t. 6 concil. pag. 1217; Hinemarus archiepiscopus Remensis, in libro de non trinâ Deitate; Nilus, Ado Viennensis, Cedrenus, etc. Acta igitur synodi VI postquàm divulgata sunt, non fuere corrupta.

Jam verò neque corrupta sunt antequàm divulgarentur. Vult Baronius auctorem interpolationis fuisse Theodorum, mortuo Georgio denuò factum Constantinopolitanum patriarcham. Paulo hujus Theodori successor, auctor Examinis citatus idem facinus adscribit. Atqui nec Theodorus, nec Paulus acta concilii immutare potuerunt antequàm divulgarentur. Enimverò certum est ejusmodi acta ante mortem Georgii Constantinopolitani divulgata fuisse. Mortuus est Georgius teste Theophane tertio anno à solutâ synodo. Cùm igitur ultima actio concilii celebrata fuerit die 16 septembris anni 681, vitâ non cessit Georgius ante annum 685 exeuntem, vel initium sequentis. Atqui ante id

tempus evulgata fuerant acta synodi VI : 1° enim ea per legatos apostolicæ Sedis qui concilio interfuerant, recipit anno 682 Leo II, Agathonis, ut jam non semel monuimus, interim è vivis erepti successor. Quod constat tum ex illius Leonis Epistolâ ad Constantinum Pogonatum datâ die 7 maii anno 683, quâ ejusmodi acta à se post accuratam eorum lectionem, confirmari significat; tum ex litteris ejusdem ad Hispanos hoc ipso anno 683 quoque scriptis; ubi ait se solam fidei à concilio constitutam definitionem ad eos mittere, quòd acta nondùm essent ex toto latinè versa; polliceturque illa se ad hos directurum, quibus promissis stetisse ex synodo Toletanâ XIV, sub Benedicto II, Leonis successore, anno 684 celebratâ, manifestè colligitur. Observa autem, hisce in Epistolis ad imperatorem et ad Hispanos, latam à concilio VI in Honorium sententiam memorari et approbari. Porro ad Leonem II acta synodi VI fuisse missa, confirmat quoque auctor coætaneus vitæ Leonis II, jam laudatus, dùm scribit illa acta à Leone græci sermonis gnaro in latinum idioma conversa fuisse; ergo.

Nihil aliud ad hæc reponere possunt Baronius, Bellarminus et alii, nisi hoc unum, laudatas Leonis II litteras esse supposititias. Varias rationes quas Baronius et alii ad id suadendum adhibent, summam et dilucidè Binius in suis ad has Epistolas notis exponit. Quas rationes sigillatim prosecui et refellere longius foret quàm difficile et operosum. Præcipuas optimè solvit Labbeus in notulis suis marginalibus ad has Epistolas et ad notas Binii. Consule. Unam tantùm referam et diluam quod auctor suprâ allatus Examinis, præsertim premit pag. 115. Observat itaque post Baronium, Binium, etc., in Epistolâ Leonis II ad Hispaniæ episcopos legi absolutum fuisse sacrum concilium indictione IX, cùm tamen ex actis habeatur indictione X celebratas fuisse duas ultimas actiones; in quarum unâ edita est definitio fidei. Sed hæc conciliatû facilia sunt. Consentiant eruditi triplicem usurpatam fuisse indictionem, Constantinopolitanam nempe, Cæsaream et Pontificiam. Constantinopolitana incipiebat à die primâ septembris, Cæsarea die ejusdem mensis 24, Pontificia à die januarii primâ. Constat autem tempore concilii VI indictionem Constantinopolitanam Græcis usitatam fuisse, Cæsaream verò Romanis et toti Occidenti. Ergo, ut observat Labbeus ad marginem Epistolæ Leonis de quâ agitur, nihil mirum quòd duas ultimas concilii actiones

utpote habitas diebus 11 et 16 septembris, referat Leo Hispanis scribens ad indictionem IX, quæ juxta ejus et Hispanorum morem illis diebus nondùm erat elapsa; dùm easdem actiones Græci indictioni X, jam ab aliquot diebus secundùm suum calculum inchoatæ, in actis concilii adscripserunt.

2° Etsi, quo tempore acta synodi VI Romam pervenerint, minùs esset compertum, saltem dubium nullum esse potest quin exemplaria quinque definitionis fidei à concilio editæ chi-rographo sigilloque imperatoris munita ne quid eorum auctoritati deesset, rogante ipso concilio data sint quinque sedium Patriarchalium episcopis, nempe Patriarchis Constantinopolitano et Antiocheno præsentibus, et legatis romani pontificis aliorumque duorum Patriarcharum. Atqui in hac fidei definitione Honorius cum Monothelitis damnatur; ergo.

Respondet prædictus auctor Examinis pag. 72, nec Honorii nec ullius Monothelitarum ducis nomina contineri exemplari hujus definitionis quod in synodo suâ in gratiam Palamæ anno 1530 habitâ græci schismatici attulerunt. Quod exemplar legitur t. 11 concil. Hard. p. 298. Verùm falsò ponit is auctor fidei decretum quod concilium VI adornavit, ab illâ Græcorum synodo totum exhiberi. Græci pro scopo suo præcipuam tantùm ejus partem retulerunt, his verbis incipientem : *Quæ præsens, sancta et universalis synodus suscipiens*, etc. sed multa ejusmodi voces præcedentia, atque hoc fidei decreto comprehensa omittunt, inter quæ præcipuorum Monothelitarum, ipsiusque Honorii nomina memorantur. Vide t. 6, concil. Labbei, p. 1020 et seq., et t. 3 ed. Hard. p. 1595.

3° Ex ipso concilio VI missa est ad Agathonem pontificem romanum Epistola synodica quæ Leoni II reddita est anno 682. Atqui in ejusmodi Epistolâ legimus Honorium anathemate fuisse percussus; ergo, etc. Has litteras quæ græcè et latinè extant 6 concil. Lab. p. 1073 et seqq., spurias etiam declarat Baronius propter aliquam diem mendosè appositam, qui error nullo negotio à Labbeo corrigitur, et facillimè librariis excidere potuit.

4° Imperator, qui gestorum sacri concilii testis plerumque oculatus fuerat, ipso anno 68, statim à solutâ synodo, sancta ejus decreta executioni demandari edicto solemnî sanxit. Hoc autem in decreto, quod profectò statim publici juris factum est, Honorius notatur ut fautor hæreseos et sibi contrarius. Dicentue adversarii illud quoque decretum à Theodoro

aut à Paulo Constantinopolitanis potuisse supponi, nemine eorum fraudem detegente?

5° Quo tempore per universam Ecclesiam divulgatum est Honorium à synodo VI damnatum fuisse, adhuc in hac vitâ erant plerique episcopi qui sacro interfuerant concilio, imprimis aliqui ex legatis quos Agatho et synodus Romana ad sacrum concilium miserant. Illiusce enim condemnationis divulgatio procrastinari non potuit ultra annum à synodo VI decimum, quo celebrata est synodus quini-sexta quæ Honorium ut à synodo VI proscriptum iterum condemnavit; ergo si quæ Honorii damnationem spectant, actis synodi VI adulterinâ manu inserta fuissent, multi procul dubio ejusmodi corruptionem advertissent illiusque auctoribus reclamarent. Aliqui saltem ecclesiastici scriptores fraudis ejusmodi mentionem fecissent. Quomodo igitur nullum ejusmodi facinoris vestigium in totâ antiquitate deprehendere est? Quomodo intortum à synodo VI in Honorium anathema cunctis ita persuasum est ut nullus romanus pontifex id factum negaverit, hoc ipsum Adrianus II posuerit in Epistolâ ad Patres concilii generalis VIII, quæ refertur actione 7, ac tandem ipsa concilia œcumenica VII et VIII, auctoritate synodi VI ducta Honorii etiam memoriæ æternas anathemate notas inusserint? Numquid ea erat negotii indoles ut quæ illud contingebant potuerint non attendi, aut intra breve tempus è memoriâ elabi? num depravatio quâ de agitur, in quarumdam solùm litterarum mutatione consistit? Minimè. Quæstio est de condemnatione romani pontificis, primatum honoris et jurisdictionis in universâ Ecclesiâ obtinentis, cujus sedes habebatur catholicæ unitatis centrum, et validissimum fidei adversus erumpentes hæreses munimentum. Quæstio est de recitatis Honorii litteris, l. 6 concil. p. 928 et seqq., 968 et seq. de judicio in eum lato pag. 944, de anathemate contra eumdem sæpiùs repetito, nempe actione 13, pag. 944, act. 17, pag. 1009, actione ultimâ, quæ Latinis decima octava, pag. 1044, in Oratione acclamatoriâ ad imperatorem pag. 1053, et in Epistolâ synodicâ ad Agathonem, p. 1073.

Dices cum Baronio: Theodorus Constantinopolitanus Monothelitarum hæresi infectus fuit, ut colligitur tum ex Anastasio Bibliothecario, tum ex sententiâ in quodam concilio contra illum Theodorum latâ antequàm synodus VI haberetur; ergo à synodo VI annumerari debuit aliis Monothelitarum ducibus, proin-

deque cùm in actis nulla ejus mentio fiat, meritò conjicitur ea fuisse ab illo corrupta.

1° Nego ant. Quæcumque fuerit causa depositionis Theodori, de quâ nihil certi habetur, is certè non videtur propter Monothelismum in hanc poenam incurrisse. Nam 1°, Monothelitæ, antequàm à concilio VI illorum hæresis condemnaretur, in Orientali Ecclesiâ tolerabantur. 2° Theodorus, Georgio qui sibi fuerat suffectus, defuncto, ad sedem Constantinopolitanam iterum evectus est. Num verò, qui adhuc imperabat, Constantinus Pogonatus, utpote fidei catholicæ studiosissimus, hominem ob hæresim depositum in suum patriarcham assumi passus esset? Hinc Anastasio Bibliothecario, qui diù postea floruit, fides hic fortè adhibenda non est. Quidquid sit, 2° nego consequ. Nam ex eo quòd Theodorus sedem Constantinopolitanam secundò tenuerit, id saltem planè sequitur, hunc, ab hæresi, si eâ aliquando infectus fuerit, sese tandem revocasse, seseque fidei catholicæ præbuisse assertorem. Atqui, si ad meliores fruges Theodorus sese receperit, non potuit à synodo VI damnari; ergo.

Dices cum auctore Examinis parte 1, acta concilii VI quod ad Honorii condemnationem attinet, contradictionibus plena esse. 1° Secundum illa, Honorius est hæreticus, et simul non est hæreticus. Est hæreticus quidem, cùm annumeretur hæreticis, et eorum dogmatibus consensisse dicatur; non est hæreticus; namque ejus Epistolæ hæresim non continent, et præterea Agatho omnium prædecessorum suorum, quorum unus erat Honorius, fidem laudaverat in Epistolâ ad imperatorem, quam concilium approbavit. 2° Ex iisdem actis fautor est hæreseos, et simul non est hæreseos fautor. Enimverò acta concilii, ut se habent, saltem significant Honorium propter adhibitam intempestivè silentii œconomiam à synodo VI damnatum fuisse. Atqui tamen sapienter imperavit illud silentium servari, ne controversiæ recrudescerent, et nasceretur schisma quod tot annis perseveravit. 3° Judicatus est à synodo VI Honorius, ut patet ex ipsis verbis sententiæ in eum et in alios latæ, actione 13, et tamen dici nequit ab eâdem synodo judicatus; nemo enim judicatur, nisi ab aliquo accusetur; atqui à nemine accusatus est Honorius coram synodo VI. Condemnatus est et simul condemnatus non est; siquidem in Epistolâ synodicâ ad Agathonem leguntur Patres damnasse Theodorum Pharanitem, Sergium, Honorium, Cyrum, etc., secundum sententiam quam ipse Agathoin suis

litteris contra eos tulerat; Agatho tamen suis litteris non damnaverat Honorium; ergo.

Nego ant. Ad primam probationem, etsi litteris suis ad Sergium Honorius hæresim Monothelitarum non definiverit, ut infra dicemus, attamen nemo negaverit eas verum fidei detrimentum attulisse, atque in illis exaratas fuisse circumstantiis, quas si novisset Honorius, non potuisset ab hæresi, aut saltem à favore hæreticis de industriâ præstito excusari. Hæc modò evincentur, quibus positis, contradictio objecta evanescit. Vide infra conclus. II. Quod attinet ad Epistolam Agathonis: 1^o nulla Honorii apologia, nulla ejus mentio expressa in eâ legitur. Prædecessorum suorum in rectâ fide conservandâ et prædicandâ studium obiter laudat Agatho, quam laudem hos esse meritos nemo æquus negaverit, etsi eorum unus aut alter, Liberius et Honorius pusillanimitate aut negligentia in fidei negotio aliquando peccassent. 2^o Hæresis, cui condemnandæ Patres concilii incumbabant, absolutam confutationem, et rectæ fidei longam, dilucidamque expositionem continebant eadem litteræ. 3^o Monothelismi auctores et defensores iis proscribebantur, ac proinde Honorius ipse, posito quòd culpæ cuiusdam gravis in hoc negotio reus deprehenderetur. Atque ex his tribus manifestum sit sanctam synodum œcumenicam sapienter non potuisse eximias ejusmodi litteras non approbare, quamvis Honorium anathemate dignum judicaverit.

Ad secundam probationem, eadem solutio facilè accommodari potest, nempe Honorium gravis negligentiae reum fuisse, imò nec à favore de industriâ hæreticis dato posse excusari, si noverit circumstantias in quibus suas ad Sergium Epistolas scripsit.

Ad tertiam probationem, malè asseritur judicatum non fuisse Honorium, quòd nemo adversus eum accusationem instruxisse legatur. Ut judicio solemniori ejus memoriam Patres anathemate dedecorarent, satis fuit illius ad Sergium Epistolas, inter expendendas præcipuorum Monothelitarum causas, in medium proferri, et ex earum lectione, sacro concilio hunc pontificem visum hæresi fuisse, quam comprimere debuisset. Certè, nec Leo II, nec Adrianus II, nec concilia œcumenica VII et VIII, existimârunt statim et solennem judiciorum ecclesiasticorum rationem adversus Honorium observatam non fuisse. Adde quòd plurima quæ ad causarum disquisitionem præstabantur, olim in acta conciliorum non solebant referri.

Ad quartam probationem, cum Agatho litteris suis hæresim, cui Honorius planè fuisse judicabatur, confodisset, omnesque hujusce hæresis patronos condemnasset, Patres synodi VI dicere potuerunt, se juxta sententiam Agathonis Honorium cum aliis Monothelitis proscriptionis se

Dices cum eodem parte 2: Acta synodi VI dudum latuere et penes paucos extitere. Namque unicum eorum exemplar, quod dum synodus habebatur, exaratum fuerat, jussu Constantini Pogonati, archivis imperialibus est repositum; atque diu creditum fuit illud unicum exemplar concilii VI extare. Hinc Bardanes tyrannus, Monothelitis deditus et S. synodi osor, teste Agathone in Epilogo et Joanne Constantinopolitano in Epistolâ ad Constantinum papam anno 713 datâ, hujus concilii tomos in palatio repositos igni tradendo, illius memoriam abolitam putavit. Porro diligenter advertendum est, illud autographum et unicum exemplar quod suis scriniis recondi voluerat Constantinus Pogonatus, post ejus mortem, imperante Justiniano II, ejus filio, anno 687 è palatio fraudulenter ereptum fuisse, nec nisi post aliquod tempus curis ejusdem Justiniani, ut ipse scribit ad Joannem papam, imperialibus tabulariis restitutum. Quæ fraus adscribenda Paulo tunc Constantinopolitano patriarchæ, qui Constantini Pogonati amanuensis fuerat. Fatendum quidem, diligentia Justiniani acta fuisse palatii archivis sine ullâ corruptione restituta. Sed Paulus interea eorum unum exscripserat exemplar, quo deinde ad corruptum codicem edendum par commodum usus est. Hunc codicem adulteratum Paulus, manu Agathonis diaconi, qui concilii VI genuinum exemplar scripserat, exarari curavit. Atque ille ipse est codex qui tanquam exemplar autographum anno 692 synodo quinisextæ exhibitus est; exemplar verò manu Pauli exscriptum Joannes Constantinopolitanus Anastasio imperatori catholico, anno 713 obtulit, quod loco esset autographi exemplaris à Philippico tyranno combusti. Quæ cum ita sint, facilè intelligitur quomodo depravata fuerint acta synodi VI.

Respondeo colligi quidem ex allatâ Epistolâ Just. II exemplar actorum, quod in Palatio antea servabatur, anno 687 penes quosdam senatores extitisse, illudque imperialibus archivis, post accuratam et solennem recognitionem quâ re ejus integritas constituit, redditum fuisse. Constat pariter ex Epilogo Agathonis

et Epistolâ Joannis Constantinopolitani, tomos actorum synodi VI, qui in palatio asservabantur, fuisse à Bardane igni traditos. Demùm idem Joannes testis est à se reperta in archivis patriarchalibus et Anastasio imperatori oblata fuisse acta synodi VI propriâ manu Pauli Constantinopolitani conscripta, qui *cùm esset* Constantino Pogonato à *secretis in hac sanctâ synodo inservierat*. Hæc vera esse agnoscimus. Cætera gratis et sine teste conjiciuntur, et sine ullâ verisimilitudinis specie. Enimverò 1° nihil causæ est cur Pauli Constantinopolitani, et Agathonis diaconi fides reddatur suspecta, nisi dicas hanc sufficientem esse hujus suspicionis causam, quòd aliàs acta synodi non potuissent corrumpi. 2° Quæ de tomis synodi VI à Bardane combustis refert Joannes Constantinopolitanus, tam ad fidei definitionem à concilio editam, quàm ad reliqua acta referuntur et attinent, ita ut si probent unicum fuisse actorum exemplar, probent quoque unicum fuisse exemplar definitionis fidei. Vide t. 6 conc. p. 1416. Atqui ipsi adversarii fatentur plura fuisse definitionis fidei exemplaria; ergo, etc. 3° Jam suprâ probatum est ex Epistolis Leonis II, ex auctore ejus vitæ, et ex concilio Toletano XIV, acta sanctæ synodi à legatis apostolicæ Sedis, qui ei præfuerant, fuisse Romam allata, et sermone latino ab ipso Leone reddita. Ergo non modò leviter, sed falsò conjicitur actorum ejusmodi unicum fuisse authenticum exemplar. 4° Cùm habitum est concilium quinisextum, cùm ejusdem acta divulgata sunt, et Romam missa, multi adhuc supererant ex iis qui synodo VI interfuerant. Ut quid ergo nemo annotavit ab hoc concilio quinisexto illud falsò et per calumniam synodo VI adscribi quòd in Honorium anathema intorsisset? Quomodò ipsi Patres synodi quinisextæ passi sunt sibi ut authentica obtrudi acta in quibus tot paginæ Honorii condemnationem spectantes insigni fraude assutæ fuissent? Quomodò tanti facinoris nullum vel minimum in litteris romanorum pontificum, in actis posteriorum conciliorum, in scriptoribus ecclesiasticis seu græcis seu latinis vestigium superesset? Denique, quod majus est, quomodò concilia, pontifices, scriptores universi latam adversus Honorium à synodo VI sententiam, ut rem indubitam ponunt?

Dices: Is fuit Græcorum mos ut acta ipsorummet conciliorum generalium vitiarent; quod adductis quibusdam exemplis et auctoritatibus Bellarminus comprobatur.

Nego ant. Non fuit is mos Græcorum, sed hæreticorum apud Græcos. Quotiescumque autem ejusmodi corruptiones inductæ sunt, toties illis reclamatum est et fraus agnita. Sic, v. g., in concilio VI deprehensum est, actis synodi generalis V à Monothelitis insertam fuisse falsam Mennæ Constantinopolitani ad Vigilium Epistolam. Cùm igitur nemo veterum acta synodi VI vel minimâ corruptionis suspicionem asperserit; sequitur, etc.

Dices ultimò. Martinus I, in concilio Lateranensi I, Honorium damnandum non censuit; quod acceptioni personarum nequit attribui, id enim vitii pontifici sancto, qui tanta pro fide molitus et passus est, nefas esset affingere; ergo à synodo VI damnari non potuit Honorius, proindeque, etc. Ita Bellarminus et alii.

Nego cons. Non sanè ex acceptione personarum, sed propter testimonium Joannis abbatis Honorium bonâ mente egisse et fidem integram habuisse asseverantis, ipsi censendus est Martinus I quæ negligenter et minùs prudenter gesserat condonasse. In VI synodo severius in eum inquisitum. Ex circumstantiis in quibus litteras ad Sergium scripsit, et ex malis quæ agendi ratione suâ fovit, dùm ea impedire debuisset, judicatum est eum, si non collusionis cum hæreticis, saltem præproperæ festinationis et oscitantiae tam gravis esse reum, ut eadem poenâ quâ ipsi hæretici mulctandus esset. Cæterùm de causâ Honorii nihil actum est in concilio Lateranensi I, proindeque concilium illud inter et synodum VI, de Honorio nulla vera pugna esse potest. Istud verò non omittendum, nec Pyrrhum, nec alios Monothelitas quorum causam expendit synodus illa Lateranensis, ab eâ reprehendi, quòd Epistolis Honorii Monothelismum confirmare moliti sint.

CONCLUSIO II. Litteræ Honorii hæresim Monothelitarum in se spectatæ non spirant, non tamen ab omni nævo immunes. Si autem ratione adjunctorum considerentur, in iis exaratae sunt circumstantiis, quas si perspectas habuisset Honorius à favore hæresi de industriâ præstito non posset excusari. Ejusmodi adjunctorum ignoratio à tanto crimine hunc liberat, sed non à gravi culpâ.

Plures sunt conclusionis partes. Probatur prima pars, nempe hæresim Monothelitarum litteris Honorii in se sumptis non propinari: 1° auctoritate Joannis abbatis romani, qui priorem ad Sergium Epistolam nomine Ho-

norii ipse exaraverat, quique proinde ejus mentem probè callebat. Is jubente Joanne papâ IV, seu, ut ait S. Maximus, *ex ejus personâ* ad Constantium imperatorem Heraclii filium scripsit, ut de sinceritate fidei Honorii testimonium perhiberet, atque illum Monothelitis auctoritatem ejus opponentibus non consensisse ostenderet. Hæc constant ex S. Maximo in dialogo cum Pyrrho t. 5 concil. pag. 1816, ubi verba ipsa Epistolæ abbatis illius referuntur. 2° Auctoritate Joannis IV, qui altero ab Honorii morte anno, Severino in pontificatu successit. Legitur in collectaneis Anastasii Bibliothecarii à Sirmondo editis, et t. 5 concil. pag. 1760, Epistola apologetica quam ille pro Honorio ad eundem Constantinum imperatorem misit. 3° Auctoritate S. Maximi martyris, qui Honorium à Monothelismo vindicatum in Dialogo cum Pyrrho adductis Joannis IV et Joannis abbatis testimoniis, tum in Epistolâ, seu tomo dogmatico ad Marinum presbyterum. 4° Auctoritate Anastasii Bibliothecarii, qui in collectaneis suis à Jacobo Sirmondo anno 1620 primùm editis memoratas Joannis IV et S. Maximi apologeticas Epistolas exhibet, et in præfatione eorundem collectaneorum tritam ab illis Honorii defendendi viam sequitur. Operum Sirmondi t. 3, p. 468, 475 et 481, ed. 1696. 5° Ipsarum Honorii litterarum consideratione Monothelitorum error in eo positus fuit, quòd unam in Christo voluntatem, nempe voluntatem divinam, unamque tantùm operationem admitterent; atqui contextus Epistolarum Honorii hunc errorem non spirat. Nam quod ad unam voluntatem attinet, ista quidem statuit Honorius : *Unam voluntatem fatemur Domini nostri Jesu Christi*; quæ Monothelitæ contra Catholicos olim presserunt ut Honorium suum fuisse persuaderent. Atqui ejusmodi verba prout jacent in Epistolâ Honorii, attentis nimirum quæ sequuntur, Monothelismum non propinant. Ita censuere modò laudati Joannes IV, Joannes abbas, et S. Maximus, rati ejusmodi locutione Honorium ab humanitate Christi solam exclusisse voluntatem carnalem, voluntati rationali repugnantem, non verò ipsam rationalem voluntatem. Atque non alium reverà fuisse ejus sensum tum scopus ipsius, tum consequentia planè indicant. 1° Scopus; ipsi enim, testibus Joanne abbate et Joanne IV, locis supra laudatis, Sergius suaserat in Christo homine voluntatem legi mentis repugnantem à quibusdam admitti; hunc errorem Honorius hic refellit, proindeque ipsi

mens est tantùm ut excludat voluntatem legi repugnantem. 2° Idem consequentia manifestum faciunt; reddens enim rationem ille pontifex, cur unam fateatur voluntatem, continenter sic habet : « Quia profectò à Divinitate assumpta est nostra natura, non culpa ; « illa profectò quæ ante peccatum creata est, « non quæ post prævaricationem vitiatâ.... « Non est itaque assumpta, sicut præfati simus, « à Salvatore vitiatâ natura quæ repugnaret « legi mentis ejus, sed venit quærere et salvare « quod perierat, id est, vitiatam humani generis naturam. Nam lex alia in membris, aut « voluntas diversa non fuit, vel contraria Salvatore, quia super legem natus est humanæ « conditionis. » Audis ab Honorio solam excludi voluntatem carnalem, voluntatem legi mentis repugnantem, seu legem membrorum ex peccato ortam, et naturæ vitiatæ appendicem; ergo, etc.

Et verò tantùm abest ut voluntatem rationalem et divinæ legi conformem humanitati Christi abjudicaverit Honorius, ut potius non obscure eodem in loco hanc ipsi attribuat. Nam 1° disertè docet nostram naturam qualis ante peccatum creata est assumptam fuisse à Verbo; atqui natura nostra ante peccatum, voluntate rationali erat instructa; ergo. 2° Supponit esse in Christo *legem mentis ejus*, ac proinde voluntatem rationalem. 3° Paulò post adducta verba duplicem hunc Scripturæ locum : *Non veni facere voluntatem meam, sed ejus qui misit me*; et : *Non quod ego volo, sed tu*; referens ad dispensationem humanitatis assumptæ, non ad voluntatem contrariam, statim explicat hanc dispensationem in eo fuisse positam quòd Christus nos exemplo suo docuerit voluntates nostras voluntati divinæ submittere. « Ista, « inquit, propter nos dicta sunt, quibus nobis « dedit exemplum ut sequamur vestigia ejus.... « ut non suam unusquisque nostrum, sed potius Domini nostri in omnibus præferat voluntatem. » Ubi planè ponitur esse in Christo voluntatem humanam, quâ voluntati divinæ se subdens nobis dedit exemplum *ut non suam unusquisque nostrum, sed potius Domini præferat voluntatem*. Ergo unam Christi voluntatem sensu Monothelitarum non dixit Honorius, sed potius in eo duas esse non obscure indicavit.

Dices cum Richerio : Docet Honorius propter unionem hypostaticam dici *humanitatem* (Christi) *ex celo cum Divinitate descendisse*; et ex eo colligit unam esse ejus voluntatem. Unde, inquit, *et unam voluntatem fatemur Domini no-*

stri Jesu Christi. Atqui hoc ipsum fuit ratiocinium familiare Monothelitarum, quod ab Eutychianis mutuati fuerant. Præterea solebant Monothelitæ suam de unâ Christi voluntate hæresim ex eo adstruere, quod non esset in Christo voluntas repugnans divinæ voluntati; nimirum nullum illis videbatur esse medium inter voluntatem Christi unicam et duas voluntates oppositas; ergo eodem sensu et modo quo Monothelitæ, Honorius docuit unam esse Christi voluntatem.

Ad primum, distingo: *Humanitas*, id est, Christus homo è cælo descendisse dicitur, juxta Honorium, concedo; humanitas sumpta in abstracto, ut aiunt, nego. Hic abstractum pro concreto ab Honorio usurpatum est, atque id unum voluit, propter idiomatum communicationem Christum hominem dici è cælo descendisse. Quod patet 1º, quia eodem modo ait humanitatem dici descendisse de cælo, quo Deus dicitur pati; Deus autem ex ipso non dicitur pati quod Divinitas passa sit, sed propter unionem cum naturâ patibili. En verba illius Pontificis: « Profectò Divinitas nec crucifigi potuit, nec passiones humanas experiri; vel perpeti; sed propter ineffabilem conjunctionem humanæ divinæque naturæ, idcirco et ubique Deus dicitur pati, et humanitas ex cælo cum Divinitate descendisse. » Patet 2º, quia paulò antea conceptis verbis docuerat, non de cælo, sed de sanctâ esse assumptam carnem Dei genitricis. Patet 3º, quia hætenus exposuerat Honorius duas esse in Christo naturas, in unâ Verbi personâ unitas inconfusè, indivisè, ineffabiliter, et communionem nominum et proprietatum ex hac unionem nexam exposuerat, inprimis verò *Filium hominis descendisse de cælo, et, Dominum majestatis esse crucifixum.*

Ad secundum, alia ratio esse debet Monothelitarum, alia Honorii. Hic falsâ Sergii relatione, ut mox dicetur, deceptus, putavit à quibusdam Christo voluntates pugnantes adscribi, eumque errorem refellens Christo voluntatem rationalem competere non obscure significavit. Illi verò perversum unius voluntatis Christi dogma in Ecclesiam invexerunt, hanc unam voluntatem esse Divinitatis docuerunt, voluntatem humanam etiam divinæ consentaneam Christo detraxerunt, dogma catholicum sibi dilucidè propositum respuerunt; proindeque cum unam idcirco Christi voluntatem visi sunt tueri, quod nulla esse posset in Christo voluntas divinæ voluntati repugnans, alii censendi sunt fucum facere voluisse, ut

incautos fallerent, Catholicis sibi adversantibus, ut hæretici solent, dogma perversum affligendo; aliorum lugenda obscuratio mentis et pervicacia, qui voluntatem rationalem divinæ voluntati conformem Christi animæ posse competere non conceperunt, illudque dogma ab Ecclesiâ propositum, et in Scripturis sæpè expressum noluerunt suscipere. Hætenus de iis quæ Honorius circa unam voluntatem tradidit.

Jam porrò de unâ aut duplici operatione Christi censuit quidem ex œconomiâ silendum, ne scilicet recrudescerent controversiæ difficiles. At si vocabulum reticendum existimavit, dogma ipsum quod duplicis operationis voce significari solet, curavit exprimere et tenendum docuit. In Epistolâ priore ait *Christum operatum esse divina mediâ humanitate*, id est, per humanitatem ut instrumentum sibi hypostaticè conjunctum. Additque *eundem esse operatum humana ineffabiliter atque singulariter assumptâ carne.* Atque ibidem *passiones* Divinitati abjudicat, et humanitati adscribit. Inferiùs ait Dominum Jesum juxta sacras litteras esse *unum operatorem Divinitatis et humanitatis*, et alia opera *Divinitati*, alia humanitati attribuenda recensens, rursus Christum nuncupat *unum operatorem divinæ atque humanæ naturæ.* Tandem in fine Epistolæ hortatur Sergium ut secundum fidem catholicam prædicet *unum Dominum Jesum Christum. . . in duabus naturis operatum divinitus atque humanitus.* In alterâ autem Epistolâ clariùs adhuc catholicam fidem exponit: « Utrasque, inquit, naturas in uno Christo unitate naturali copulatas cum alterius communione operantes, atque operatrices confiteri debemus; et divinam quidem, quæ Dei sunt operantem; et humanam, quæ carnis sunt exequentem, non divisè, neque confusè aut convertibiliter, Dei naturam in hominem, et humanam in Deum conversam edocentes, sed naturarum differentia integras confitentes. » Et paulò post: « Auferentes ergo. . . scandalum novellæ adinventionis, non nos oportet unam vel duas operationes definientes prædicare, sed pro unâ, quam quidam dicunt operatione, oportet nos unum operatorem Christum Dominum in utrisque naturis veridicè confiteri, et pro duabus operationibus, oblato genuinæ operationis vocabulo, ipsas potiùs duas naturas, id est, Divinitatis et carnis assumptæ, in unâ personâ Unigeniti Dei Patris, inconfusè, indivisè et inconvertibiliter nobiscum præ-

« dicare propria operantes. » Hæc Honorius. Ubi advertas, velim, tot locutiones catholicas quarum plurimæ ex Epistolâ S. Leonis ad Flavianum desumptæ sunt, etsi aliquando à Monothelitis fallaciter adhibitæ fuerint, tamen apud Honorium nihil eorum sensui obvio et nativo adversi obtrudentem, accipiendas esse ut sonant, atque iis proinde doctrinam orthodoxam referri. Ergo dùm Honorius ex œconomiâ quâdam, de unâ aut duplici operatione silentium præscripsit, dogma ipsum vocabulo duplicis operationis designatum sategit inculcare.

Probatur secunda pars, nempe litteras Honorii, etiam in se spectatas non esse ab omni nævo immunes. 1^o Enim in primâ Epistolâ falsò assertitur de unâ aut duabus Christi operationibus neminem antea esse locutum, nisi *fortassis quidam aliqua balbutiendo*. Patres enim plurimi duplicem esse Christi voluntatem et operationem docuerunt, sed Sergio immodicè confisus Honorius rem tanti momenti videtur non expendisse, ac de eâ potuisse esse verum quod ille scripserat. 2^o Ibidem quæstio de unâ aut duplici operatione habetur ut *otiosa*, à *philosophis turgidis* invecta, et grammaticis *exquisita pueris derivando nomina venditantibus* relinquenda. 3^o Rursus tam unius quàm duplicis operationis voces ex æquo dicuntur *novæ et scandalum Ecclesiis* generare. 4^o In priori fragmento secundæ Epistolæ postquàm dixit vocabulum unius aut duplicis operationis esse *novellæ inventionis*, et *ex prædicatione fidei eximendum*; sic pergit: « Nam qui hæc dicunt, quid aliud nisi juxta unius vel geminæ naturæ Christi Dei vocabulum, ita et operationem unam vel geminam suspicantur? Super quod clara sunt divina testimonia. Unius autem operationis vel duarum esse vel fuisse medium... sentire et promere satis ineptum est. » Noverat igitur Honorius, cùm hanc secundam Epistolam scripsit, ab assertoribus duplicis naturæ Christi duas prædicari operationes, ab hæreticis verò unius naturæ propugnatoribus unam operationem induci. Licet autem statim declaret se duas secundum divina testimonia agnoscere naturas; attamen quis negaverit, imprudenter et præposterè ab eo addi, quòd unam aut duas operationes Christi *sentire et promere satis ineptum sit*? 5^o In altero fragmento ejusdem Epistolæ, prædicatio unius aut duplicis operationis nuncupatur *scandalum novellæ adinventionis*. Ex his omnibus colligendum videtur Honorium œconomiæ silentii in-

ducendæ cupidum, acerbioribus notis usum vocabuli operationis duplicis perstrinxisse; dogmate tamen, quod ejusmodi voce exprimi solet, aliàs, ut diximus, exposito nec impigrè inculcato.

Probatur tertia pars, scilicet utramque suam ad Sergium Epistolam, in iis circumstantiis Honorium scripsisse, quas si perspectas habuisset, à favore hæresi de industriâ præstito non posset excusari. Nam ex Theophane in Chronographiâ, pag. 274, ex duabus Epistolis Cyri ad Sergium et hujus Cyri capitulo septimo, ex Epistolâ quam Sergius ad eundem Cyrum dedit, cui annexerat quemdam à se in gratiam Monothelismi confictum Mennæ Constantinopolitani ad Virgilium papam sermonem, cujus falsitas actione tertiâ concilii VI comprobata est, ex Epistolâ Theodori Pharanitæ ad Sergium episcopum Arseoniten, ex alio ejusdem Theodori de Patrum testimoniis sermone, ex aliis monumentis, necnon ex rerum serie et eventu compertum habetur, quo tempore litteræ Honorii scriptæ sunt, Sergium et alios Eutychianâ labe infectos hæresim unius in Christo voluntatis et operationis omni arte conatos esse diffundere; eâ mente videlicet, ut, servatâ Eutychiani dogmatis substantiâ, duas tamen naturas profiteri, atque Chalcedonense concilium juxta imperatoris Heraclii constituta suscipere viderentur. Atqui, si Honorius illas rerum novisset circumstantias, à favore hæreticis de industriâ præstito et à collusione excusari non posset. Quid ita? quia, etsi litteris suis hæresim non definiat, attamen non eam excludit et comprimit prout ejusmodi circumstantiæ exegissent; quia à præcipuis Monothelitis, Sergio videlicet, in Epistolâ suâ ad Honorium, Machario, in Professione suâ fidei, Theodoro Pharanite, ad fucum faciendum, quandoque adhibitæ sunt pleræque locutiones catholicæ quas Honorius in suis litteris usurpavit; quia proinde fidei quam in summo periculo versari prospexisset, pro Sedis suæ auctoritate et præcellentiâ non succurrisset: *error autem cui non resistitur, approbatur*; quia non nisi pravo animo novatores adjuvandi, potuisset unam Christi voluntatem quocumque modo dicere, de duabus voluntatibus silere, unius aut duplicis operationis vocabulum ut profanam novitatem proscribere; ergo, etc.

Probatur quarta pars, nempe Honorium malis Sergii artibus deceptum veras rerum circumstantias non cognovisse. Nam, 1^o Joannes abbas et Joannes IV, supra laudati testes sunt

Honorium à Sergio deceptum fuisse. 2° Si conferantur litteræ Honorii cum Sergii Epist., manifestum erit res Honorio visas esse eo modo se habere, quo retulerat Sergius; atqui veras rerum circumstantias non retulerat Sergius; namque dissimulaverat Theodorum Pharanitem tum in Epistolâ ad Sergium Arseoniten episcopum, tum in Sermone de interpretationibus Patrum testimoniorum, unam esse in Christo voluntatem, nempe voluntatem divinam et unam operationem docuisse; tacuerat litteras à se datas Cyro tum Phasidis, ac deinde Alexandriæ episcopo, Epistolam Heraclii imperatoris ad Arcadium Cyprensem, nec non eam quâ ipse eidem imperatori teste Theophane, suaserat unam operationem et voluntatem esse tenendam; siluerat veram novelli dogmatis originem, pravosque unam voluntatem et operationem profitentium sensus affectusque; finxerat se solo pacis Ecclesiæ et hæreticorum reducendorum studio motum vereri, ne quæstio de unâ aut duplici operatione agitaretur; inprimis celaverat hæresim quâ erat contaminatus, à se duas voluntates contrarias duntaxat rejici simulans, suasque locutionibus catholicis ita obvolvens sententias, ut duarum operationum fidem (solo suppresso vocabulo) minùs cautis videri posset confiteri; duarum operationum defensoribus errorem duplicis in Christo voluntatis contrariæ attribuerat; id falsò SS. Patribus affinxerat, à pluribus eorum unam operationem prædicatam fuisse, à nemine duplicem dictam; laudaverat præsertim falsum illud Mennæ ad Vigilium papam scriptum, quod ipse confinxerat; demùm eò fraudis devenerat ut Sophronium ipsum affirmaret de silentio circa duas operationes servando consensisse, quod, ut Forbesius notat, ex professione fidei in synodicis Sophronii litteris contentâ mendacii manifesti arguitur. Lege prolixam hanc Sergii Epistolam t. 6 concil. pag. 921 et seqq., et confer cum monumentis inter probandam partem tertiam laudatis; ergo, etc.

Probatur quinta pars, nimirum ignorance ejusmodi circumstantiarum personam Honorii à favore hæreticis de industriâ præstito excusari. Etenim, si veras rerum circumstantias hoc modo ponatur ignorasse; ergo Sergium et Cyrum arbitratus est esse orthodoxæ doctrinæ addictos, dum iis patrociniatus est; proindeque, etc.

Probatur ultima pars, nempe non ideò tamen à culpâ gravi eximi Honorium. Nam 1°, etsi

adhibendam Sergio fidem ipsum gravia momenta impellerent: siquidem Sergius sese fidei catholicæ addictum hactenùs exhibuerat, ac imperatori Heraclio concilii Chalcedonensis studiosissimo erat acceptus; attamen tanti momenti res erat, ut, ante receptas à Sophronio Epistolas et diligentem negotii disquisitionem, non debuisset priore suâ Epistolâ œconomiam silentii quæ fidei valdè nocuit, præscribere. Alia certè fuerat agendi ratio S. Leonis, qui Eutychis se à Flaviano Constantinopolitano injustè damnatum conquerentis Epistolæ festinanter respondere non præsumpsit; verùm expectavit pluribus mensibus donec litteras à Flaviano unâ cum actis ejus synodi accepisset. Pariter sanctus Cœlestinus non priùs Nestorio responsum dederat quàm ejus scripta accuratè expendisset et de omnibus à S. Cyrillo certior factus esset; ergo, etc. 2° Cum cognovisset Honorius eos qui unam vel duas operationes dicebant, *juxta unius vel geminæ naturæ Christi Dei vocabulum, ita et operationem unam vel geminam suspicari*; nonne præposterè omninò in suâ posteriore Epistolâ præscribere perrexit silentium de unâ aut duplici operatione servari? 3° Peccavit Honorius quòd tam duplicis quàm unius operationis vocabulum profanam novitatem habuerit, aliisque nævis quos suprâ notavimus, litteras suas præproperè festinus, et Sergio nimium credulus consperserit; ergo, etc.

CONCLUSIO III. Epistolæ Honorii nec dogmaticæ, nec è synodo aliquâ romanâ datæ, nec ad omnes Ecclesias directæ, nec tandem ab episcopis occidentalibus, aut etiam ab orientalibus plerisque ullo modo approbatæ et acceptatæ.

Probatur prima pars, nempe Honorii Epistolas dogmaticas non fuisse. Nam ubi inquiritur an Epistolæ Honorii dogmaticæ sint, quæstio est an de novâ quæstione sibi propositâ, et quâ parte illæ reprehendendæ veniunt, quidquam credendum iis statuerit et definiverit; atqui, etsi ejusmodi Epistolis inculcetur dogma jam à S. Leone et à concilio Chalcedonensi constitutum de Christo duabus naturis constante, et per unamquamque operante, attamen evidentissimum est circa propositam quæstionem de unâ aut duplici operatione nihil ab ipso credendum proponi, nihil ipsis terminis quæstionis definiri, sed, ex disputatione et ex quâdam œconomia, tam circa unam quàm circa duas operationes prædicandas silentium ab eo imponi; ergo, etc.

Frustra objiceres aliquas hujusce silentii servandi causas ab Honorio afferri minimè probandas. Fatemur, sed his nævis definitionem

quæstionis contineri quis cordatus dixerit? Has rationes affert Honorius ut legem suam de utroque vocabulo reticendo stabiliat; num utramque partem oppositam simul definire, et credendam præscribere potuit? Hinc observare est synodum VI, etsi varia scripta Sergii, Cyri, Sophronii, Pyrrhi, etc., dogmatica nuncupet, nunquam tamen hæc appellatione Honorii ad Sergium Epistolas designare, t. 6 concil. p. 928, 944, 945, 949, 960, 968, etc.

Probatur secunda pars, nempe Epistolas Honorii ad Sergium ex aliquâ synodo Romanâ ad expendendam quæstionem coactâ non fuisse missas. Nam 1^o, ubi, post Honorii mortem, de exponendâ ejus mente, ipsoque à Monothelitarum hæresi purgando actum est, solius Joannis abbatis qui illi fuerat ab Epistolis adjutor, testimonium fuit adductum sive à Joanne IV, cujus jussu is abbas Honorium defendit, sive à S. Maximo, sive ab Anastasio abbate apud S. Maximum in tomo dogmatico ad Marinum presbyterum, nulla verò synodi cujusvis, harumce Epistolarum sensûs consciæ, aut etiam vel unius episcopi, aut primorum Ecclesiæ romanæ in medium prolata est auctoritas; ergo, Nec dicas Anastasium abbatem, dum apud S. Maximum refert se cum Ecclesiæ romanæ *sacratissimis viris sermonem contulisse, ejus, quam ad Sergium scripserant, Epistolæ gratiâ*; non soli Honorio, sed etiam Ecclesiæ romanæ primoribus priorem ad Sergium Epistolam attribuere. Nam incertior est hujus loci lectio quàm ut ex eo quidquam certò colligi possit. Sirmondus et Combefisius ad fidem codicum suorum vertunt quidem *scripserant*. At Anastasius Bibliothecarius qui initio IX sæculi floruit, et Bibliothecæ Vaticanæ cui præerat, codicibus utebatur, reddidit, *scripserat*; quæ versio contextui aptissimè congruit. Proindeque, etc. Deinde potuisset Anastasius abbas apud S. Maximum, plurali numero uti, quò soleant per figuram valdè usitatam ea de cœtibus prædicari quæ ab eorum capitibus gesta sunt.

2^o Auctor *Libelli synodici* enumerat capitibus 150, 152 et 153, concilia quatuor quæ de Monothelismo Romæ à summis pontificibus habita sunt. Recenset etiam synodos in quibus episcopi Africani Monothelitas condemnarunt. Demùm conciliorum à Cyro in urbe Alexandrinâ, à Sergio, Pyrrho et Paulo Constantinopoli in gratiam Monothelismi celebratorum cap. 121, 122, 123, 125, mentionem facit. Etsi autem contra Honorium, Sergium, etc., synodum VI habitam esse tradat, de concilio tamen quod Honorius cele-

braverit, prorsus silet. Pariter nullam Honorii synodum memorat Theophanes in Chronographiâ, neque ullus historicorum aliquam annotavit; ergo, etc.

3^o Si qua ratio suaderet Honorium è synodo aliquâ litteras suas ad Sergium dedisse, maximè quia de rebus alicujus momenti et difficilioribus, nihil sine synodo statuere solebant romani pontifices; atqui hæc ratio nulla est; siquidem omnes quoque concedunt ab ejusmodi consuetudine, saltem in faciliioribus, episcopos romanos non rarò recessisse. Quapropter, cum ex ipsis Honorii litteris appareat eum, ut difficilem non spectasse quæstionem de silentio circa unam aut duas operationes servando propositam, planum est malè asserti sine teste, Honorium è synodo aliquâ Romanâ Epistolas suas ad Sergium dedisse.

Probatur tertia pars, videlicet Honorii Epistolas ad Sergium non fuisse ad universam Ecclesiam directas. Enimverò ad omnem Ecclesiam directæ non sunt vi inscriptionis, cum soli Sergio inscriptæ sint; non vi materiæ in iis pertractatæ, quippe cum in iis, ut dictum est, nulla contineatur nova dogmatis definitio; sed silentium de controversiâ emergente solum præcipiatur; non vi universalis earum missionis ad omnes Ecclesias, siquidem Honorius non legitur has litteras ad alium quàm ad Sergium misisse, aut ipsi illud commisisse munus ut eas ad omnes episcopos pervenire curaret. Scripsit quidem ad Cyrum Alexandrinum, et ad Sophronium Jerosolymitanum, eos, ut voces memoratas reticerent, adhortans; ad quemquam alium litteras super hæc re ab eo datas fuisse gratis confingeretur. Et verò, quæ causa ipsi esse potuisset de unâ aut duplici operatione Christi tacendâ ad alios scribendi, qui de ejusmodi controversiâ nihil audivèrant, aut quos ad unam aut duplicem operationem prædicandam propensos non noverat? nonne contra à litteris circa ejusmodi negotium orbe toto spargendis graves eum rationes deterrere debuerunt? Laudandus S. Leo quòd suam ad Flavianum Epistolam quâ Eutychianam hæresim confodit, ad Galliarum et aliarum provinciarum episcopos dirigere curaverit. Laudandus alter S. pontifex Martinus I, quòd canones synodi suæ Lateranensis adversus Monothelitas per universam Ecclesiam divulgari operam dederit. Quid ita? quia, fidei, quæ ubique eadem esse debet, definitiones in novas hæreses latæ, ejusmodi litteris et canonibus continebantur, quos proinde omnibus innotescere Ecclesiæ postu-

labat utilitas. At, si Honorius ad omnes Ecclesias utramque suam de silentio circa unam aut duplicem Christi operationem servando Epistolam direxisset, tantum abest ut suum attigisset scopum, ut potius plurimis novitatum avidis hominibus, qui in omni loco deprehenduntur, ansam dedisset de ejusmodi questione disputandi; ergo Honorius præposterè et sine ullà verisimilitudine diceretur Epistolassuas ad omnes Ecclesias quocumque modo direxisse.

Probatur quarta pars, nimirum Honorii litteras nullo pacto acceptatas fuisse ab episcopis occidentalibus et à plerisque orientalibus, præsertim si illæ ponantur hæreticæ aut per se hæresi favisse. Quod ut clariùs innotescat, observandum est controversiam duntaxat esse posse de annis circiter octo vel decem qui effluxère à scriptâ priore Honorii Epistolâ anno 653, ad tempus quo Joannes IV in concilio romano Ecthesim Heraclii damnavit et Monothelismum compressit. Enimverò ridiculum sese profectò is exhiberet, qui in hypothesi quòd Honorii litteræ hæresim spirent aut illi per se faveant, eas, sine teste, contenderet consensu expresso aut tacito à plerisque fuisse tunc acceptatas, quando in hunc errorem concilia numerosa variis in locis anathema contorquebant; atqui ex quo Joannes IV in suâ synodo Ecthesim Romæ proscripsit, constat Monothelismum, ut jam supra dictum est, à Theodoro papâ in alterâ synodo Romæ habitâ, à præsulibus Africanis in variis conciliis, à concilio Cyprio, à synodo Lateranensi quinque supra centum episcoporum sub Martino I, qui hujus definitionis toto orbe vulgandæ sategit, tandem à synodo generali VI et à subsequentibus anathemate percussum et confossum fuisse. Proindeque eò res tota deducitur, an litteræ Honorii in hypothesi quòd Monothelismum spirent, aut illi faveant per se, in Oriente et in Occidente à plerisque episcopis ante annum 641 vel 642 aliquo modo acceptatæ sint.

Jam verò 1º, nemo negaverit tam extraordinarium et tanti momenti esse illud factum, nempe litteras alicujus summi pontificis hæreticas aut hæresi per se faventes ubique esse acceptatas, ut illud admitti nequeat sine teste. Nullum tamen vel minimum testimonium veterum afferri potest, quo litteras Honorii constet in Oriente et Occidente, non dico acceptatas; sed vel vulgatas fuisse per illud tempus de quo agimus, nempe ante damnatam à Joanne IV Heraclii Ecthesim.

Diceturne proclivè fuisse eas vulgari, ac

proinde cum pauci reclamâsse legantur, eas fuisse acceptatas? Verum 1º, in negotio tam gravi, ubi nullus probabilitati locus relinquendus est, numquid licet quibuscumque conjecturis inniti? Sed 2º per me fas sit conjecturis indulgere. Si toto orbe christiano tunc temporis sparsæ et vulgatæ sint Honorii litteræ, vel ab Honorio, vel à Sergio. Non ab Honorio; cum Epistolas suas, ut jam diximus, ad omnes Ecclesias mitti non curaverit. Non à Sergio, nam legitur quidem Sergius ad condendam Ecthesim Heraclium impulsisse, illud decretum imperatorium in concilio eam ob causam Constantinopoli coacto, subscribendum episcopis obtulisse, quosdam præsules jussionibus et viminisque adhibitis ad subscriptionem adegisse, unde has sergii synodos S. Maximus vocavit *latrociniales*, memoriæ etiam mandatum est promulgatione Ectheseos totam fuisse offensam et graviter commotam urbem Constantinopolitanam; atque hæc quidem ex monumentis historiæ habemus. At de Epistolis Honorii, quæ hæreticæ aut per se hæresim favere ponuntur, et quibus reverà idem præscribitur silentium, quod suâ Ecthesi imperabat Heraclius, ullam vel minimam in Oriente tunc factam fuisse mentionem nullo in loco traditur, aut indicatur. Quid porrò inde colligere est? istud imprimis, sergium satis prospicientem Monothelismo Honorii mentem reverà non esse imbutam, timuisse ne, si litteras ejus manifestas faceret aut subscribendas proponeret, motibus inde ortis, velut galli cantu, supremus ille pontifex excitatus, periculum in quo fides versabatur, tandem adverteret, litteras ipse suas interpretaretur, artes quibus ad eas scribendas inductus fuerat, manifestaret, ac demum nascentem hæresim profligaret; sicque omnem Monothelitis auctoritate suâ innitendi ansam et prætextum eriperet. Vigilantiam igitur supremi pontificis fefellisse tunc satis sibi esse ratus homo versipellis, litteras Honorii recondidit, tempore opportuniori, nimirum post Honorii mortem, in Monothelismi confirmationem proferendas. Hinc Occidentalibus ejusmodi Epistolæ non antea innotuerunt, quàm Pyrrhi qui Sergio successerat et ejus errorem pari studio diffundebat, litteræ in Occidentem tempore Joannis IV pervenissent. Pyrrhus hisce in scriptis suis Monothelismum propinabat, eumque Honorii Epistolarum auctoritate studebat adstruere. Testis verò est Joannes IV, à quo solo hæc omnia accipimus, in Epistolâ ad Constantinum imperatorem Heraclii filium, ejus-

modi scripta Pyrrhi *nova quædam et præter fidei regulam prædicantis, et ad proprium sensum Honorium attrahere festinantis*, toti Occidenti qui à novâ lue prorsus immunis mansit, magnæ offensioni fuisse. Jam porro si litteræ Honorii hæresim spirassent aut illi per se favissent, et Occidentalibus jamdudum cognitæ et acceptæ fuissent, num litteræ Pyrrhi eundem errorem spirantes et ex Honorio confirmantes ejusmodi offensionis causam Occidentalibus attulissent? Ergo nec testibus nec conjecturis suaderi potest Honorii Epistolas fuisse per orbem christianum vulgatas et ullo modo acceptatas antequam Ecthesis à Joanne IV damnaretur, imò eas tunc plerisque nequidem notas fuisse, conjecturis plusquam probabilibus suadetur.

At 2^o solis conjecturis non certamus. Nam 1^o constat Occidentalium neminem memorari qui in Monothelitarum hæresim impegerit, neminem qui latis à romanis pontificibus in conciliis suis, et à synodis Africanis adversus Monothelitas decretis refragatus sit. 2^o Martinus I, in suâ ad imperatorem Constantem Epistolâ, anno 649 exaratâ, ait necessarium fuisse, *ut omnium ferè piorum sacerdotum et populorum contra eos* (Sergium et Pyrrhum, etc.) *clamores apostolica Sedes acciperet, orantium atque obtestantium*, etc. 3^o S. Maximus, in Dialogo cum Pyrrho fidejussor est *Orientem totum et Occidentem lacrymas, lamenta*, etc., *Deo obtulisse, ut* (Monothelitæ) *cessarent ab hæresi propriâ*. 4^o Stephanus Dorensis quem jam ab anno 656 Sôphronius Sedem apostolicam de fidei discrimine commonefacturum legaverat, in supplici libello Lateranensi synodo sub Mart. I à se oblato, attestatus est *supplicationibus omnium penè habitantium orientalium tractum reverendiss. episcoporum et christian. populorum, consonanter prædicto beato Sôphronio ad hoc invitatum fuisse, ut Romam pergeret, Monothelismi condemnationem promoturus*. Ex his, quibus alia adjici possent, satis superque, ni fallor, evincitur totum Occidentem et maximam orientalium episcoporum partem Monothelitarum erroribus semper adversatam fuisse; ac proinde nunquam ab iis ullo modo acceptatas fuisse Honorii Epistolas, in hypothese quòd ejusmodi errorem per se obtruserint aut foverint.

CONCLUSIO ULTIMA. Honorius videtur à synodo VI damnatus fuisse ut hæreseos ex gravi imprudentiâ et negligentîâ fautor.

Probatur, quia Honorii condemnatio eo sensu intelligenda videtur, qui tum verbis

condemnationis, tum speciei et naturæ criminis ab Honorio reverà admissi congruat et consonet; atqui si dixeris Honorium, ut hæreseos ex imprudentiâ et negligentîâ, fautorem, à synodo VI damnatum fuisse, hæc interpretatio 1^o consonat speciei et naturæ criminis ab Honorio reverà admissi; siquidem, ut jam dictum est, Honorius litteris suis non definivit errorem, licet ex imprudentiâ et negligentîâ de se graviter culpabili silentium intempestivè injunxerit, et nævis quibusdam utramque suam Epistolam maculaverit, sicque hæresi patrocinium et fomentum præbuerit; 2^o eadem interpretatio consonat ipsismet condemnationis verbis. Si quæ in ejusmodi condemnatione occurrerent quibus non consonaret nostra interpretatio, ista duo maximè, primum, quòd Honorius annumeretur hæreticis Sergio, Pyrrho, Cyro, etc., et cum eis plectatur eadem anathematis pœnâ, alterum quòd Sergii dogmatibus dicatur *in omnibus consensisse*. Atqui his accommodari potest nostra interpretatio.

Enimverò quod ad primum attinet, episcopi hæreseos fautores non ita argutè olim ab hæreticis discernebantur. Quemadmodum quidquid sanæ et orthodoxæ doctrinæ quoquo modo nocebat et adversabatur, hæreticum quandoque appellabatur, ita quotquot seu ex collusionem, aut conniventîâ, seu ex gravi negligentîâ aut imprudentiâ errorem adjuvabant, ii eodem loco ac ejus defensores et eadem pœnâ digni habebantur; cujus rei inprimis testes sunt imperatores Honorius et Theodosius in rescripto ad Aurelium episcopum Carthaginensem dato Ravennæ, idus V junias, Monaxio et Plintâ consulibus; ii enim episcopis, qui segniter se gesserint contra Pelagianos, comminantur non modò expulsionem à civitatibus, quæ pœna secularis est, sed et episcopatus amissionem, et interdictam in perpetuum communionem; quæ juxta canones ab imperatoribus præscribi dubium esse nequit. Hanc autem suæ constitutionis afferunt rationem: *unam eandemque esse culpam eorum qui aut dissimulando conniventiam, aut non damnando favorem noxium præstiterint*. Quando igitur summus pontifex Honorius, qui auctoritate et prærogativâ Sedis suæ principem locum in Ecclesiâ occupabat, cuique præcipua proinde hæresum comprimendarum incumberebat cura, ex imprudentiâ et negligentîâ se sivit à Monothelitis circumveniri, et eorum hæresi fomenta præbuit; nemini dubium esse potest quin in gravissimam culpam, et ipsâ depositione, ut illustrissimo de Marca videbatur,

juxta canones dignam infelicitè lapsus sit. Nihil proinde mirum, quòd eodem cum hæreticis anathemate à synodo VI percussus sit.

Quòd autem spectat alterum, nempe à S. synodo Honorium dici Sergii litteris et dogmatibus consensisse, hæc videntur restringi posse ad significandam consensionem favoris et patrocinii ex gravi culpâ dati; quasi dictum esset Honorium subdolum Sergii Epistolam ad se datam præposterè ex oscitantia intolerabili approbasse, et silentio juxta ejus mentem imperator, ac quibusdam loquendi modis imprudenter usurpatis, hominis hæretici dogmata eo sensu confirmasse, quo à S. Cœlestino scriptum est: *Error cui non resistitur, approbatur.*

Confirmatur integra conclusio, quia non de hæresi, sed de favore hæreticis, ab Honorio gravi culpâ præstito, sacra synodus à Leone II, ab imperatore, et ab auctore veteris diurni pontificum, olim intellecta est, Leo enim II, in Epistolâ ad Hispanos, Honorium à synodo VI damnatum scribit, *qui, inquit, flammam hæretici dogmatis, non ut decuit apostolicam auctoritatem, incipientem extinxit, sed negligendo confovit.* Et in Epistolâ ad Constantinum imperatorem de eodem sic habet: *Qui hanc apostolicam Ecclesiam non est conatus lustrare doctrinâ Apostolicæ traditionis, sed, profanâ proditiōe, puram maculari permisit.* Ubi observa à nobis hic post illustrissimum de Marca, cui Labbeus in notulis suis margin. consonat, reddita esse græca de verbo ad verbum, quæ vulgari versione latinâ minùs clarè expressa sunt.

Constantinus Pogonatus in decreto quo imperiali auctoritate gesta synodi sextæ muniri voluit: *Ad hæc, inquit, et Honorius, qui fuit antiquæ Romæ papa, hujusmodi hæreseos confirmator, qui etiam suæ extitit oppugnator, seu, qui etiam sibi non constat.* Ubi Honorius ideò dicitur hæresim confirmando se ipsum oppugnasse, quia mente non gesserat nec verbis expresserat hæresim cui litteris suis præposterè faverat.

Tandem in fidei professione quæ à rom. pontificibus die ordinationis suæ olim emittebatur, et legitur in libro diurno pontificum à Garnerio an. 1680 edito, Honorius dicitur, *pravis Sergii, Pyrrhi, etc., assertionibus fomentum impendisse.*

Cæterum, si gravis negligentia et imprudentia quam Honorio in tanto negotio adscriptimus, vi verborum quibus ejus memoriam synodus VI proscripsit, non satis videatur consonare, statuatur per nos licet, Patres errore

facti existimasse collusionis cum hæreticis aut conniventia eum fuisse reum. Etenim ejusmodi errorem in ipsum generale concilium cadere nihil repugnat. Cùmque decretorium Joannis amanuensis Honorii testimonium, quo præsertim hujus pontificis persona excusatur, Patribus fortè fuerit minùs perspectum, facile sibi persuadere potuerunt ejus Epistolas quæ hæresi tanto adjumento fuerant, ex nefandâ collusionē, non ex imprudentiâ tantum, aut præposterâ œconomiâ fuisse exaratas.

Dissertatio v.

DE CONVENIENTIA ET NECESSITATE INCARNATIONIS.

Illud alicui rei convenire hic dicitur, quod ei decorem quemdam affert et ejus est naturæ consentaneum. Aliud autem rei convenit intrinsecè, aliud extrinsecè tantum. Illud est conveniens intrinsecè, quod rem perficit et aliquâ ratione complet, seu quod ad ejus perfectionem et integritatem sive necessariam, sive accidentalem, seu naturalem, seu supernaturalem quodam modo necessarium est. Illud est conveniens extrinsecè tantum quod ad perfectionem et integritatem rei nullo pacto requiritur, sed ei solùm affert decorem quemdam extrinsecum quo ipsa non indiget. Sic, v. g., mundus, divinis perfectionibus exprimendis et declarandis idoneus, supremo Numini, quod per se sibi sufficientissimum est, dicitur convenire.

Necessarium duplici quoque ratione accipitur. Aliud est necessarium simpliciter, aliud secundum quid. Illud est necessarium simpliciter quod alio modo se habere non potest. Illud dicitur necessarium secundum quid, quod ad finem assequendum est utile et conveniens.

Quod est necessarium simpliciter, vel est necessarium absolutè, vel solummodò hypotheticè. Illud est necessarium simpliciter absolutè, quod, nullâ factâ hypothesi contingenti ita existit, ut aliter se habere non possit, seu, ut oppositum existere repugnet. Illud est necessarium simpliciter hypotheticè, seu conditionatè, quod, factâ aliquâ hypothesi contingenti, aliter se habere non potest, seu sine quo finis nullo pacto potest acquiri.

Advertendum insuper Incarnationem posse accipi vel speciatim, quatenus est unio hypostatica talis naturæ humanæ cum Verbo divi-

no, hoc modo, hoc de fine, et his in circumstantiis peracta; vel generatim, et quantum ad substantiam, nempe pro unione cujuslibet naturæ intelligentis cum aliquâ personâ divinâ, abstrahendo à modo et à circumstantiis.

Quæstio est an Incarnatio quâcumque ratione accipiat, sit conveniens, vel etiam necessaria simpliciter, seu absolutè, seu hypotheticè, et quâ in hypothesi; an scilicet in hypothesi creationis mundi, aut lapsûs hominis, aut reparationis generis humani, aut condignæ satisfactionis? De quibus quinque capitibus dissendendum est.

CAPUT PRIMUM.

An absolutè necessaria fuerit Incarnatio, aut saltem per se Deo conveniens extrinsecè.

VERBI Incarnationem non modò convenientissimam Deo extrinsecè, id est, attributis ejus exprimendis per se aptissimam, sed etiam absolutè necessariam fuisse docuit Wiclefus in Trialogo, lib. 3, cap. 24 et 25, ubi idem quoque de Christi morte et satisfactione statuit. Hoc dogma consequebatur ex necessitate quâ Deum in suis ad extra operationibus constringi sentiebat Wiclefus. Scilicet ex ipso nihil aliud Deus velle potuerat quàm quod vult, nihil aliud producere quàm quod suo tempore producit, nec magis liber concipitur circa ea efficienda quæ extra se facit, quàm circa æternam Filii sui generationem. Celeberrimus Leibnitz, dùm in suis *Theodiceæ tentaminibus* existimat Deum ad mundum hunc condendum bonitate et sapientiâ suâ certò et infallibiliter inductum fuisse; planè supponit eandem Dei sapientiam et bonitatem pariter exegisse Incarnationem peragi, utpote rerum præsentis dispositione conclusam. Hujus systematis, quod Wallius, Bullingerus, Clarkius, et alii quidam adoptant, substantiam et præcipuum fundamentum mox explicabimus proponendo objectiones. Censent theologi post S. Thomam, p. 3, q. 4, a. 1 in corpore, Deo maximè conveniens fuisse ut sese per Incarnationem summo modo communicaret, sicque suam bonitatem et alia sua attributa exprimeret. At verò hanc convenientiam contendunt merè extrinsecam fuisse; quia Deus utpote sibi sufficientissimus, non indiget ullâ sui ipsius ad extra communicatione aut manifestatione, et planè liber concipitur ad aliquid extra se producendum vel non producendum. Juxta quam doctrinam sacris Scripturis et toti traditioni perinde consonam, sit

CONCLUSIO. Incarnationem peragi Deo per se convenientissimum fuit extrinsecè; sed non

absolutè necessarium; nec proinde, ad illam peragendam, Deus immutabilibus bonitatis et sapientiæ suæ legibus certò et infallibiliter inductus est.

Probatur prima pars, nempe Deo per se convenientissimum fuisse extrinsecè, ut Incarnationem perageret. Illud enim est Deo per se convenientissimum extrinsecè quod attributis divinis exprimendis per se aptissimum est; atqui Incarnatio aptissima est attributis divinis exprimendis, quod aliquâ inductione ostentu facile est. 1^o Enim Incarnatione maximè exprimitur perfectio, munificentia et bonitas divina. Ille enim se esse perfectissimum, munificentissimum et optimum exprimit, qui Divinitatem suam summo modo communicat, et quidem sine ullâ indigentia et sine ullo perfectionis suæ detrimento; atqui Incarnatione Deus se summo modo communicat sine ullâ indigentia et sine ullo perfectionis suæ detrimento; quippe Incarnationem peragendo, increatæ suæ et infinitæ perfectionis ex merâ liberalitate, sine ullâ sese extra communicandi indigentia, et infinite perfectus usque manens, naturam creatam participem facit, quatenus videlicet cum ejusmodi naturâ personam divinam substantiali et personali nexu devincit; quâ quidem Divinitatis communicatione, nulla major ad extra concipi potest. Sola cam superat communicatio illa naturalis et immanens, quâ Filius divinus à Patre et Spiritus sanctus ab utroque procedunt. Verùm quid simile ejusmodi perfectissimæ et ineffabili communicationi fieri extra Deum tam impossibile est, quàm Deum repugnat extra se ipsum constitui; ergo, etc. Ratiocinium istud est S. Thomæ, p. 3, q. a. 1 in corpore; « Ipsa autem natura Dei, inquit, est essentia bonitatis... Unde ad rationem summi boni pertinet, quòd summo modo se creaturæ communicet, quòd quidem maximè fit per hoc quòd naturam creatam sibi conjungit, ut una persona fiat ex tribus, scilicet Verbo, aima et carne, sicut dicit Augustinus, lib. 13 de Trinitate. Unde manifestum est quòd conveniens fuit Deum incarnari. » Eodem pertinet quòd S. Augustinus lib. de Prædest. sanctorum, cap. 15, tradit, *tantam nimirum, tam excelsam, tam summam esse hanc naturæ humanæ (à Verbo per Incarnationem assumptæ) subreptionem, ut quo attollatur altius non habeat*, quod et alii Patres observant.

Dices. Ex his sequeretur, quòd trium personarum Incarnatione, aut Verbi divini cum

omnibus creaturis intelligentibus unione, Deus bonitatem suam magis communicâset, suaque attributa significantius expressisset, quàm producendo unicam Incarnationem; proindeque vel ratio adducta nihil probat, vel conveniens fuit tres personas incarnari, etc.

Dist. ant. Bonitatem suam magis communicâset intensivè, nego; magis extensivè, subdistinguo, et illa communicatio extensivè major ad mundi perfectionem de se necessaria non est, imò fortè ipsi noceret, concedo; secùs, nego. Si tres personæ incarnatæ fuissent, vel omnes naturæ intelligentes in unitatem suppositi assumptæ fuissent à Verbo, tunc bonitas divina se extensius communicâset, id est, personarum incarnatarum et naturarum à Deo assumptarum major fuisset numerus. Sed 1°, non ideò bonitas divina sese intensius, seu secundum plures perfectionis gradus communicâset, siquidem Verbi divini persona, quæ se naturæ humanæ Christi per Incarnationem communicavit, totam Divinitatis perfectionem continet, et præterea tam intima fuit ejusmodi communicatio ut, quemadmodum dictum est, nulla major et intimior extra Deum esse possit. 2° Licet Divinitatis communicatio summa intensivè quæ fit per Incarnationem, de se sit conveniens, et ad perfectionem et complementum operis à Deo producti valdè conducat, attamen, ejusmodi communicationem fieri multis, et sic majorem esse extensivè, mundi perfectioni accidentarium videtur. Scilicet, tota rerum universitas ita est ordinata et disposita, ut partes singulæ ad se invicem respectum dicant. Ipsemet ordo rerum supernaturalium, cum ordine naturali, Deo cuncta sapienter disponente, mirabiliter connexus est. Hinc quæcumque in mundo sunt, ad unicum opus constituendum conspirant, quâ quidem in rerum concordia et consensione à theologis cum de providentiâ agunt, explicari solitâ, maximè sapientia divina splendet et emicat. Jam verò nonne huic unico operi perficiendo unica Verbi divini Incarnatio sufficiebat? Ergo aliarum personarum divinarum Incarnationes, necnon unio Verbi cum aliis naturis creatis præter rem fuissent, ad aliam universi dispositionem pertinuissent, ad mundum nostrum per se non attigissent; atque si Deus operi, quod condere voluit, adjecisset alterius naturæ creatæ unionem cum Verbo hypostaticam, fortè sapientiam suam et alia suæ attributa minùs perfectè expressisset.

2° Maximè Incarnationis mysterio exprimun-

tur Dei virtus et omnipotentia. Nam si res in Incarnatione conjunctæ spectentur, eæ à se invicem in infinitum distant, et tamen summo quodam vinculo junguntur, supremus scilicet spiritus cum infimo et cum carne, increata persona cum creatâ naturâ. « Omni miraculo « mirabilius est », inquit S. Bernardus, Serm. 3 de Vigil. Nativitatis Domini, « quomodo tam « diversa, tamque divisa ab invicem potuerint « conjungi. » Et S. Gregorius Nyss. Orat. Catechetica, cap. 24: « Naturam omnipotentem, « inquit, ad humanæ naturæ vilitatem potuisse « descendere, majus est potentiæ argumen- « tum, quàm ingentia quælibet ac stupenda « miracula. Etenim magnum aliquod et excel- « sum elaborare divinam potentiam, naturæ « quodammodo consentaneum est ac proprium; « at verò delapsus ille ad id quo abjectum est « et humile, abundantia quædam est potentiæ, « quæ nec in illis quidem quæ sunt præter na- « turam impediri potest. » Non assimilia habet S. Aug. L. De Prædest. sanct. cap. 15. Si porro attendas rationem, quâ rerum ita dissitarum arctissima conjunctio facta fuit, miraberis utriusque naturæ servatas esse proprietates, sine ullâ confusione et mixtione; ita ut, inquit S. Leo, sermone 3 de Passione, « tota « sit in majestate humilitas, tota in humilitate « majestas; nec inferat unitas confusionem, « nec dirimat proprietas unitatem; nec (Serm. « 4 de Nativ. cap. 2) inferiorem consumat glo- « rificatio, nec superiorem minuat assumptio. » Ergo mirum non est quòd Incarnatio opus Dei per excellentiam appelletur in Scripturis, atque ejus omnipotentiae magnum prædicetur argumentum. Habac. 2, v. 2: *Domine, opus tuum in medio annorum vivifica illud.* Luc. 4: *Fecit*, inquit B. Virgo, *mihi magna qui potens est.*

3° In mysterio Incarnationis emicat sapientia, tum quia mirabilis unionis in quâ consistit, modum reperire sola sapientia infinita potuit, ut et sola omnipotentia exequi, tum propter respectus quos ad hominem et universas creaturas habet Incarnatio, in quibus respectibus, sapientia necnon misericordia, justitia, sanctitas, majestas et infinitas divina mirum in modum splendent et emicant, ut in hac disputatione, capitibus seqq. explicabitur. Ex dictis hic colligere satis sit Incarnationem, quantum ad substantiam spectatam, esse opus perfectionibus divinis exprimendis aptissimum, ac proinde Deo per se convenientissimum extrinsecè.

Probatur contra Wiclefii hæresim, secunda pars concl., nempe mysterium Incarnationis non esse absolute necessarium. 1° Ex Scripturis. Quod enim in iis singulari benevolentiae et misericordiae divinae attribuitur, liberum est, non est absolute necessarium; atqui Incarnatio in Scripturis singulari Dei benevolentiae et misericordiae attribuitur; *Sic Deus dilexit mundum*, inquit Christus, Joan. 3, v. 16, *ut Filium suum unigenitum daret*; et S. Joan. in Epistola suâ primâ, cap. 4, v. 9: *In hoc apparuit charitas Dei in nobis, quoniam Filium suum unigenitum misit Deus in mundum, ut vivamus per eum*; ergo. 2° Ex ratione. Nullum opus ad extra est communicatio necessaria divinitatis. Id innumeris Scripturarum et SS. Patrum testimoniis facile evincitur ubi de Dei libertate theologi disserunt. Vide Petavium l. 5 de Deo et divinis Attributis, cap. 6, et alios theologos ad quæst. 19 primæ part. S. Thomæ. Idem quoque ratio clarissimè adstruit. Cum enim Deus sit infinitè perfectus, manifestum est hunc esse sibi suum summum et unicum bonum, suum unicum finem ultimum, suam felicitatem consummatam; eum proinde sibi sufficere, rebus à se distinctis nullo pacto indigere, se solum necessariò amare, posse concipi existere totum et perfectum quin cætera existant. Atqui si Deus sibi sufficiat, nec rebus à se distinctis indigeat, si se solum necessariò amet, sibi suum sit bonum, suus finis, sua felicitas, totusque et perfectus existere concipiatur quin cætera existant, nonne evidentissimum est, ad aliquid extra se producendum necessitate suæ naturæ illum non determinari? Hinc eximiè S. Thomas p. 1, q. 49. a. 4: *Deus inquit, se communicat creaturis et agit, non quatenus est, sed quatenus vult*. Et S. Augustinus lib. 4 de Genesi contra Manich. c. 2, docet non aliam esse causam ultimam cur Deus fecit cælum et terram, nisi *quia voluit*. Quibus Scriptura sacra Psal. 110, v. 2, Psal. 113, v. 3, etc., et universa traditio consonat; ergo Incarnatio quæ est opus ad extra, non potest esse communicatio necessaria Divinitatis, seu non est absolute necessaria.

Probatur tertia pars, nempe Deum proinde ad Incarnationem peragenda bonitate et sapientiâ suâ immutabili non fuisse certò et infallibiliter inductum. Ratio est quia id ad quod bonitate et sapientiâ suâ Deus infallibiliter et certò inducitur, dicendum est necessariò ex Divinitate emanare, et absolute necessarium. Etenim tam repugnat quàm quod maximè, Deum non velle id operari, ad quod producen-

dum certò et infallibiliter sapientiâ et bonitate suâ inducitur. Namque, si Deus non vellet id operari, ad quod producendum sapientiâ et bonitate suâ certò et infallibiliter induceretur, tunc sapientiam et bonitatem suam negaret, seu iis contrariam voluntatem haberet, insipienter se gereret et malignè; atqui Deum attributa sua essentialia negare, insipienter et malignè se gerere, tam sanè repugnat, quàm Deum ipsum non existere; ergo, etc. Et verò nonne illud contradictionem involvit quòd tam repugnat, quàm impossibile est Deum peccare aut mentiri, aut mendacium et peccatum præcipere? atqui tam repugnat Deum non velle id operari ad quod producendum, bonitate et sapientiâ suâ certò et infallibiliter inducitur, quàm repugnat Deum peccare, aut mentiri, aut mendacium et peccatum ab ipso imperari. Nam quæ causa est cur peccatum et mendacium etsi in se maximè possibilia sint, à Deo tamen admitti vel præcipi nequeant? id oritur ex sanctitate et veracitate divinâ, id est, ex amore summo et necessario quo Deus ordinem immutabilem et veritatem prosequitur; ergo pariter si bonitas et sapientia in quibus Deus sibi summè et necessariò complacet, certò et infallibiliter postularent aliquod à Deo opus produci, ab eo producendo Deum abstinere penitus repugnaret; ergo, etc. Deinde quid infallibilitas seu certitudo ex immutabili essentiâ attributorum divinorum nexa et manans, differre potest à verâ et absolutâ necessitate? nonne ejusmodi infallibilitas est immutabilis? nonne immutabilitas quæ in attributorum divinorum essentiâ nititur, ab omni hypothesi contingenti est independens? nonne istud contradictionem involvit, rem hujusmodi immutabilitate affectam aliter se habere ac se habet? nonne quod ab hypothesi contingenti non pendet et aliter se habere non potest ac se habet, id ipsum est absolute necessarium? ergo si bonitate et sapientiâ suâ Deus certò et infallibiliter ad præsentem rerum universitatem, ac proinde Incarnationem producendam inductus fuisset, absolute necesse fuisset mundum à Deo creari, et Incarnationem existere, et planè repugnaret Deum ab iis peragendis abstinere potuisse. Præterea, si ad hunc mundum condendum, atque Incarnationem eo conclusam producendam, bonitate et sapientiâ suâ certò et infallibiliter Deus inductus fuisset, actus quo creavit mundum certò et infallibiliter fluere conciperetur ex attributis Dei necessariis, nempe ex ejus bonitate et sapientiâ; proinde-

que ejusmodi actus, etiam sub eo respectu quo mundi creationem inferret, aliqua esset divina proprietas, seu esset attributum Dei ab ejus essentia necessariò derivatum; enimverò quod Deo intrinsecum est et ab ejus essentiâ immutabili fluit, illud est attributum divinum, et quidem tam necessarium quàm ipsa ejus essentia ex quâ manat. Jam porrò, si actus quo Deus mundum creavit, esset ejusmodi proprietas Deo necessariò inhærens, cùm mundum non existere posito illo actu planè repugnet, repugnaret quoque metaphysicè mundum ex divinitate non emanare; ergo.

Ad hæc, si Deus bonitate et sapientiâ suâ infallibiliter inductus fuisset ad hunc mundum, et proinde Incarnationem quæ eo continetur producendum, tam necessariò mundus et Incarnatio suo tempore existerent, quàm necessaria est Verbi divini generatio. Namque generatio æterna Verbi divini ideò necessaria est, quia licet cum cognitione et inclinatione fiat, attamen ex essentiâ divinâ, seu ex naturâ intellectûs divini infinitè fœcundi oritur et procedit; ergo similiter; si attributa Dei essentialia, ejus nempe sapientia et bonitas, mundum produci infallibiliter exigerent, actus quo mundus creatus est, ex illis attributis necessariò fluere, proindeque mundus et Incarnatio suo tempore, necessariò etiam existerent. Itaque, cùm Incarnatio non sit necessaria absolutè, ut contra Wiclefum probavimus, statuendum quoque, quod consequens est, Deum ad hanc peragendam, non fuisse certò et infallibiliter, legibus immutabilibus sapientiæ et bonitatis suæ inductum.

Confirmatur eadem conclusionis pars, 1^o quia quod ex bonitate et sapientiâ Dei certò et infallibiliter consequitur, illud ab æterno esse debet; neque enim concipi potest necessaria Dei attributa appendice quâdam ex se certò et infallibiliter nexâ unquàm carere posse. Atqui tamen mundus ab æterno non cœpit, quod Leibnitius fatetur, rebus creatis æternitatem futuram solùm adscribens; et idem ex Scripturis et ex ratione indubitatum est; Incarnatio non nisi post plura à condito mundo annorum millia peracta fuit; ergo, etc. Confirmatur 2^o, quia principium quo nititur totum systema Leibnitii istud est, Deum ad nihil quidquam extra se producendum determinari posse nisi ratione aliquâ bonitatis et sapientiæ prævalenti et infallibili. Atqui istud principium falsum est. Nam 1^o inde sequeretur bonitati et sapientiæ divinæ aliquid defu-

turum, si mundum non existere poneretur, proindeque Deum sibi non sufficere. Tunc enim concipitur aliquid defuturum bonitati et sapientiæ divinæ, cùm illud non existeret, quod fieri à Deo hæc attributa rationibus suis immutabilibus exigunt. Sequeretur 2^o Deum immutabili sapientiâ et bonitate suâ impelli, et induci ad aliquid à se distinctum absolutè expetendum; quasi verò ipse sibi non esset suus finis unicus et essentialis. Sequeretur 3^o mundum nec citiùs incipere potuisse; quod falsum est. Hoc enim citiùs incipere potuit, quod non cœpit ante omne tempus possibile; atqui, quamcumque de temporibus naturâ sententiam amplectamur, mundus, cùm ex Leibnitio et ex rei veritate ab æterno esse non cœperit, dicendus est ante omne tempus possibile non incœpisse. V. g., ponamus cum Leibnitio tempus nihil aliud esse quàm successionem existentium successivè, ac proinde antequàm creaturæ existerent, in quibus solis dari potest ejusmodi successio, nullum reverà tempus extitisse; nihilo seciùs tamen concipiemus ante mundi exordia possibile fuisse aliquod tempus. Intelligimus enim v. g., mundum aliquem possibilem qui creari potuisset longo tempore antequàm mundus noster existere cœperit, adeò ut cùm præsens rerum dispositio orsa est, jam in illo altero mundo innumera entia successivè effluxissent; ergo mundus ante omne tempus possibile existere non cœpit; ergo Deus, illæsis sapientiâ et bonitate suâ, ejus initia citiùs ponere potuisset; proindeque caducum et falsum est principium quo uno systematis Leibnitii moles universa fulcitur.

Dices adversùs tertiam conclusionis partem. Deus rationibus sapientiæ et bonitatis *sufficientibus*, ac proinde *prævalentibus* et *certis*, sed non *absolutè necessariis*, tum ad creandum, tum ad creandum id ipsum quod creavit inductus est. 1^o Quidem rationibus *sufficientibus*; res enim nulla existit, quin detur ratio sufficiens cur exstat. 2^o Rationes ejusmodi fuere bonitatis, nam ad benefaciendum creaturis Deum extra se operatum esse nemini dubium est. 3^o Fuere etiam rationes sapientiæ; enimverò, cùm Deus voluit mundum condere et dispo- nere, ipsi adstitit ejus sapientia, veritates æternas et necessarias, legem ordinis immutabilem, omnesque mundos et dispositiones rerum posibles exhibens. 4^o Hæ rationes fuere prævalentes; si enim aliis paribus æquatæ fuissent, et Deus ad unum præ alio sese determinasset, jam nulla data fuisset ratio sufficiens ejus de-

terminationis; quod ex dictis repugnat. 5^o Fuere certæ et infallibiles; quia, si Deus illud non ageret, ad quod prævalentibus bonitatis et sapientiæ suæ rationibus inducitur, non esset summè bonus et summè sapiens. 6^o Non tamen illæ rationes sunt absolutè et metaphysicè necessariæ. Nam alia est certitudo et infallibilitas, quæ necessitas moralis dici potest, et oritur ex principio *rationis sufficientis*; alia necessitas absoluta et metaphysica, quæ principio contradictionis fundatur, juxta quod illud ponitur esse verum, cujus oppositum repugnantiam seu contradictionem in se involvit; ergo, etc.

Nego ant. Demonstratum est Deum rationibus infallibilibus bonitatis et sapientiæ suæ ad creationem mundi inductum dici non posse, quin extra se aliquid necessariò expetere, et necessariò agere concipiatur. Quod ejus infinitati et perfectæ libertati planè contrarium est.

Ad primam probationis partem, fateor nullam rem existere quæ non habeat sufficientem existendi rationem. Sed hæc ratio, ubi agitur de determinationibus liberis, tota petitur ex vi ipsâ sese determinandi naturæ intelligenti et liberæ insitâ, et iis omnibus quæ ad agendum prærequiruntur instructâ. Nimirum alia est ratio causarum liberarum, et alia causarum necessariarum. Ratio sufficiens determinationis causarum necessariò et sine libertate agentium, ab ipsâ earum facultate agenti repeti nequit, cum ipsis non insit vis sese ad unum aut ad aliud flectendi; aliunde igitur eorum determinationis ratio repetatur necesse est. At non ita res se habet, ubi agitur de causis liberis. In eo siquidem consistit illarum libertas, quòd activè indifferentes sint, non quidem eo sensu quòd sese determinent sine motivo, sed quòd tunc ad unum sese determinent, cum ad illud sese possent non determinare. In creaturis, quæ non à se ipsis, sed à Deo solo perfectionem et felicitatem suam consequi possunt, fons et origo libertatis est appetitus veri boni, sive per modum actûs ille appetitus concipiatur, sive per modum facultatis, parùm interest. Naturâ volumus vero bono potiri. Hinc si objectum ad quod amandum allicimur, nos verè beatos non efficiat, penès nos est expendere an illud amandum sit, proindeque penès nos est illud prosequi vel non prosequi. At in Deo, qui sibi met suum bonum, suus finis, sua perfectio et summa felicitas est, origo libertatis circa ea quæ extra se producit, et ipsa essentiæ di-

vinæ infinitas, quâ sibi sufficientissimus est. Se solum amat necessariò, nihil extra se necessariò expetit, quia solus est summum et infinitum bonum. Hinc 1^o potuit sese non determinare ad creandum. Hinc 2^o, in hypothesi quòd creet, sua quidem non potest attributa negare; id est, repugnat eum velle quod ejus sapientiæ, sanctitatis, bonitatis, aliaque attributa fieri vetant; sed non ideò tenetur producere quod optimum est; quia, ut capite sequenti uberiùs exponetur, falsum est ejus attributa exigere ut optimum producat.

Ad secundam, fatemur quoque Deum creâsse ut boni participes faceret creaturas, imò non potuit velle creare, quin vellet benefacere creaturis, aliàs suam bonitatem et beneficentiam negâset. At non ideò censendus est bonitate suâ essentiali ad creandum certò et infallibiliter inductus. Deus absolutè non tenetur exercere potestatem quam habet benefaciendi creatis. Hæc potestas Deo essentialis, seu exerceatur, seu non exerceatur, perinde perfecta est et divina; nec minùs ens supremum et infinitum esset bonum essentialiter, quamvis nullæ creaturæ existerent.

Ad tertiam, ultìò concedimus sapientiâ divinâ repræsentari veritates æternas et necessarias, necnon leges immutabiles ordinis. Censem quoque Deum nihil ejusmodi legibus et veritatibus contrarii velle posse. Denique confitemur mundos omnes possibiles, cunctasque rerum dispositiones diversas Deo esse perfectissimè notas. Sed contendimus nec veritates æternas, nec leges ordinis immutabilis ullo modo postulâsse, ut Deus quidquam crearet; quia evidentissimum est Deum potuisse abstinere à creatione, quin desineret esse sapiens, justus, verax et omni perfectionum genere cumulatus.

Ad quartam, Deus est causa prima, causa summè libera, et ut à suâ essentiâ habet existendi vim, ita à suâ voluntate solâ habet vim se determinandi; proindeque activè indifferens est ad unum inter plura æqualia volendum. Non dico ad *unum seligendum*, quia aliud est inter æqualia unum aliis propriè anteponere, quod insipiens foret, aliud est eorum unum velle relictis aliis. Voluntatis Dei libertas solo amore, quo seipsum diligit, constringitur. Hinc non potest innocentem plectere, media ad fidem idonea non disponere, virtutem prohibere, aut præcipere peccatum, quia ejus æquitati, sapientiæ, et sanctitati hæc repugnant. V. g., velle peccatum est velle deordi-

nationem ac proinde volitio peccati ab eo qui se amando, summè amat ordinem immutabilem, necessariò excluditur. Pariter velle absolute finem et ad eum media idonea non eligere, à sapientiâ alienum est. Sed tamen Deus potuit non creare, quia nihil creando attributis suis refragatus non esset. Etenim etsi mundum condendo et disponendo, creaturas bonorum suorum participes fecerit, sibi que gloriam extrinsecam comparaverit, attamen amor attributorum suorum non postulabat ut quidquam produceret, siquidem nulla ejus perfectio augeri aut compleri cujuslibet operis creatione potuit. Si ens supremum creaturas existere non voluisset, non ideò desivisset summè se amare, cum sibi perfectè sufficiat, nec ullo pacto, ut sit idipsum quod est, creaturis egeat. Et certè, velit nolit Leibnitius, nonne mox ostendimus Deum solâ suâ voluntate liberrimâ ad mundum nec citius nec tardius creandum potuisse induci? ergo.

Ad quintam, dist. Deus non esset summè bonus et sapiens, si id non ageret ad quod rationibus bonitatis et sapientiæ prævalentibus intrinsecis inducitur, concedo; si illæ rationes prævalentes, sint tantum majora bonitatis et sapientiæ divinæ argumenta extrinseca, nego. Rationes bonitatis et sapientiæ Dei extrinsecæ, eæ sunt, quibus effectui carentibus, aliquid bonitati et sapientiæ divinæ deesse conciperetur. Rationes eorundem attributorum extrinsecæ sunt majora eorum signa et testimonia extra Deum existentia. Si Deus nihil creâset, nulla extra eum extitissent illius bonitatis et sapientiæ argumenta. Si *optimum* opus producere voluit, maxima extra se dedit ejusmodi testimonia. Verum, sive nihil creâset, sive minùs perfectum produxisset, non ideò quidquam deesset attributis divinis; siquidem Deus de se optimus et sapientissimus est, nec argumentis ac testimoniis quibuscunque extrinsecis sapientiæ et bonitatis suæ indiget.

Ad sextam, respondeo metaphysicè repugnare Deum velle abstinere à producendo effectui ad quem bonitate et sapientiâ suâ infallibiliter determinatur, quia repugnat metaphysicè Deum attributis quæ necessariò amat, refragari. Nec dicas, ut mundus sit contingens et certò tantum, non absolute necessariò existat, satis esse eum in se spectatum posse non existere, seu in ejus ideâ non deprehendi repugnare quòd non existat. Nam 1^o, evidentissimum est, si ab aliquo opere producendo Deo abstinere repugnaret, ejusmodi opus dicendum fore ab-

solute necessarium. 2^o Nonne idcirco repugnat absolute Deum mentiri aut præcipere peccatum, quia à mendacio et à præcipiendo peccato suâ veracitate et sanctitate avertitur; atqui tamen mendacium et peccatum in se possibilia sunt, nec involvunt contradictionem; ergo. 3^o Si ad *optimum* producendum, Deus sapientiâ et bonitate suâ certò et infallibiliter induceretur, repugnaret, ut dictum est, optimum à Deo non produci. Si repugnaret optimum à Deo non produci, ergo aliquid contineret natura optimi propter quod repugnaret illud non existere, proindeque ita necessarium esset optimum ut ejus oppositum aliquâ ratione veram repugnantiam involveret. Necessitatem igitur principio *contradictionis* innixam, et infallibilitatem seu certitudinem ex principio *rationis sufficientis* petitam eò loci malè distinguit Leibnitius, cum ratio sufficiens quam ex attributis divinis hic desumit, oppositi repugnantiam et impossibilitatem involvebat.

Instabis. Etsi Deo tribuenda sit libertas ab imperfectionibus libertati creaturarum annexis defæcata, attamen necesse non est eum esse magis liberum ad creandum, quàm creatura libera est in actibus suis liberis eliciendis; atqui creatura libera non sese determinat ad unum nisi ratione prævalenti et infallibili ad illud impellatur; ergo.

1^o Nego majorem. Disparitas est quòd creatura libera finem suum, beatitudinem et perfectionem suam extra se querere indigeat. Quapropter cum invincibiliter beatitudinem appetat, necesse est eam magis inclinari versùs objecta quæ quoquo modo meliora apparent. Hinc æquilibrium ponderum et inclinationum essentielle non est libertati creatæ. At verò Deus suum sibi est bonum, suus finis, sua felicitas et perfectio, in se solo sibi necessariò complacet; proindeque voluntatem ejus liberrimam, nulla inclinatio necessaria et præponderans ad creandum potiusquàm non creandum impellere potuit.

2^o Ad minorem respondeo non esse hic locum expendendi varias theologorum et philosophorum de libertate humanâ sententias. Multis videtur saltem aliquo in statu, aut respectu actuum naturalium, voluntatem creatam posse aliquando unum præ alio velle, ubi non magis ab uno quàm ab alio antecedenter trahitur et allicitur. Alii sentiunt etiam in præsentī statu, hominem æqualiter impulsus à gratiâ ad bonum supernaturale, et à concupiscentiâ ad

peccatum, posse poni, dùm hi motus æquales utrinque adhuc manent, unam partem seligere præ aliâ. Sunt qui in isto statu existimant hominem ad duo opposita indeliberatè motum et impulsus, si tunc ad unum eorum se determinet, illud quidem amplecti quo magis allicitur, sed aiunt eum posse à consensu præbendo tunc is in circumstantiis abstinere, quia scilicet potest velle expendere an bonum ad quod amplius impellitur, habeat characteres summi boni quod naturaliter appetit. Thomistæ censent creaturam liberam quocumque in statu ad singulos suos actus liberos physicè et infallibiliter præmoveri à Deo; verùm hanc præmotionem arbitrantur non agere per modum motivi, atque eâ statuunt Deum omnipotentem et actum et modum actûs attingere, id est, hujusce auxilii naturam in eo esse positam ut voluntates creatas ad actus liberè producendos infallibiliter applicet. Denique omnes theologi orthodoxi uno ore libertatem constituunt in indifferentiâ activâ ad agendum vel non agendum, ad agendum hoc vel illud; docent, creaturæ liberæ dùm ad actum determinatur, inesse veram potentiam abstinendi ab hoc actu, omnesque, salvo suo de actione Dei in creaturas et auxiliis gratiæ systemate, libenter concedent libertatem divinam è medio tolli, si, ad creandum quod creavit, immutabilibus sapientiæ suæ et bonitatis legibus Deus inductus fuerit. Quemadmodum eorum nullus inficiatur absolutè repugnare à Deo præcipi vitium, et virtutem prohiberi.

Instabis 2°: Si Deus ita esset ad creandum indifferens, concipi non posset Deum creare. Resp. Id cognosci non à priori, sed ab effectu, nempe quòd dentur entia finita, à seipsis non existentia, et à Deo infinitè perfecto et sibi sufficientissimo planè distincta.

Inst. 3°: Hæc indifferentia ad creandum vel non creandum non est perfectio; ergo Deo tribuenda non est. Nego ant. Siquidem illa indifferentia ex infinitate Dei oritur, et eum esse sibi suum bonum, suum finem, suam perfectionem, uno verbo esse sibi sufficientissimum arguit, adeò ut si Deus illâ indifferentiâ activâ non polleret, imperfectus et extra se quidquam necessariò expetens et requires concipiendus esset.

Instabis 4°: Melius fuit Deum creare quàm non creare, siquidem quæ Deus fecit, bona sunt; ergo, etc. Dist. ant. Id est, creando Deus bonitatem extra se communicavit creaturis, quam aliàs non communicasset, et gloriam ac-

cidentalē sibi comparavit, quam aliàs non comparasset, concedo; id est, creando, Deus suam bonitatem, suam sapientiam, suam perfectionem complevit, veramque suam et essentialē gloriam in cognitione sui et in amore quo sua attributa prosequitur, repositam amplificavit, nego. Uno verbo melius est creatis mundum produci quàm non produci, id verò propriè non est melius Deo, quia Deus seipso optimus et perfectissimus est. Tantum autem abest ut mundum creari quàm non creari eo sensu melius fuerit, quòd sapientiâ et bonitate suâ ad creationem Deus infallibiliter inductus fuerit; ut potiùs Deo melius fuisset mundum ab ipso non creari quàm hâc ratione produci. Deo enim melius fuisset nihil extra se producere, quàm operari necessariò; siquidem operatio Dei extra se necessaria, hunc solum non esse suum finem, sibi que planè non sufficere argueret. Atqui, si bonitate et sapientiâ suâ ad creandum Deus certò et infallibiliter inductus fuisset, necessariò extra se operatus esset, ut dictum est; ergo, etc.

CAPUT II.

Utrum Incarnatio in hypothesi creationis fuerit necessaria.

INCARNATIONEM ex hypothesi mundi alicujus à Deo condendi necessariò nexam existimavit olim Raymundus Lullus apud Vasquez, in tertiam p. divi Thomæ, disp. 1, cap. 2.

Illud dogma non ita pridem tenuit quoque Malebranchius, Oratorii Jesu sacerdos, scriptor perelegans, et memoratissimus philosophus; cujus systematis, quod ad rem nostram attinet, summa hæc est. Statuit Deum esse omninò liberum et indifferentem ad creandum vel non creandum, quia, inquit, ens infinitè perfectum solam suam substantiam necessariò amat, sibi que sufficientissimum est (1). At verò, si agat extra se, amor necessarius et essentialis quo suam substantiam prosequitur, necessariò exigit ex Malebranchio ut opere suo, quantum fieri potest, attributa sua exprimere intendat, ac proinde ut opus producat perfectissimum, id est, opus quod ratione bonitatis suæ intrinsicæ et simul perfectionis viarum quibus perficiendum est, characterem attributorum divinorum maximè gerat (2). Hoc est totius de

(1) *Traité de la nature et de la grâce*, second discours, art. 50, 51, 52, 53, 54. *Ecrit contre la prévention*, T. 4. Resp. ad Arnaldum edit. 1709, pag. 156, 158. *Entretien IX sur la Métaphysique et sur la Religion*, etc.

(2) *Traité de la nature et de la grâce*, premier

providentiâ Dei systematis Malebranchii fundamentum. Quod non significat, advertas velim, unicum esse opus optimum possibile; sed tantum præsentis rerum universitate et dispositione nullum esse opus possibile perfectius, seu attributis Dei exprimendis magis aptum. Non enim definit Malebranchius plures æqualis perfectionis mundos posibles non esse, imò expressè docet, si mundi ejusmodi posibles æquabiliter perfecti dentur, Deum ex illis potuisse pro arbitrio, quem voluerit, exsequi (1).

Jam verò mirum quot ex illo generali principio consectaria ad illustrandam et explicandam Dei providentiam Malebranchius colligat. Quorum unum est, Incarnationem (2) saltem sumptam pro unione alicujus naturæ intelligentis cum personâ unâ divinâ (3), in hypothesi creationis mundi fuisse necessariam; quia sine hoc mysterio mundus non esset dignus, qui ad majestatem divinam referretur, nec infinitatem ejus, ut par est, exprimeret.

Porrò inter Malebranchii doctrinam et systema capite præcedenti expositum, quod post Malebranchium Leibnitius adornavit, triplex juvat annotare discrimen. Juxta Malebranchium 1° Deus potuit nihil creare; 2° ex pluribus mundis possibilibus æqualiter perfectis, unum producere potuit aliis non productis; 3° necessitas, quâ Deus propter sapientiam suam et attributorum suorum amorem ad aliquid agendum adigitur, cum libertate compati nequit; proindeque in hypothesi quòd quidquam extra se producat, liber non est ad producendum opus minus perfectum. Contra Leibn. 1° et ad creandum et ad creandum optimum, sapientiâ et bonitate suâ, Deum certò et infallibiliter inductum fuisse statuit. 2° Inter infinitos mundos posibles, unicum agnoscit opus optimum, id est, unicum opus quo nullum perfectius esse possit. 3° Libertatem ita cona-

tur explicare, ut hujus notio possit Deo sapientiâ et bonitate suâ certò et infallibiliter agendum inducto attribui; quapropter retinet libertatis divinæ nomen; reipsa tamen Deus in ejus systemate absolute mundum hunc non creare non magis potuit, quàm in systemate Malebranchii potest, si agat, attributa sua nolle quàm maximè exprimere. Quippe Leibnitius, ut ostensum est, veram et absolutam necessitatem à Deo reverà non removet, sed tantum necessitatem cæcam. Libentissimè fatentur theologi Incarnationem esse opus perfectissimum, quod à Deo fieri possit (Vide S. Th. p. 3, q. 1, a. 1, in corp. et Suares. Comment. ad hunc locum), illoque mysterio rerum universitati maximum decorem et homini bona eximia afferri censent. Sed tamen non dubitant potuisse Deum creationem decernere, quin illud mysterium peragere intenderet. Imò, teste de Lugo, *De Incarn.* disp. 1, sect. 2, sententiam Lullii ut temerariam notant.

CONCLUSIO. Incarnatio mundo et homini licet convenientissima, in hypothesi tamen creationis simpliciter necessaria non est.

Probatur prima pars, nempe mundo et homini incarnationem fuisse convenientissimam. Illud enim mundo et homini maximè convenit, quo bona summa homini allata sunt, et à quo rerum universitas et dispositio decorem maximum consequuntur. Atqui, etc.

1° Incarnatione summa bona supernaturalia homini allata sunt; namque Incarnatione 1° natura humana in Christo exaltata est et sublimata ad summum dignitatis fastigium, ut docet S. Augustinus lib. De prædest. SS. cap. 15. 2° Doctrinâ cœlesti imbuti sumus *Deo loquente nobis in Filio*,.... *per quem fecit et secula*, Hebr. 1, v. 2. 3° Reparata est per Christum natura nostra quæ depravata erat et perdita, Rom. 3, v. 24 et 25. 4° Redempti sumus et liberati à servitute dæmonis et à peccato, et assecuti fuimus gratiam sanctificantem quâ *Filii Dei* efficimur ejusque *hæredes*,.... *cohæredes autem Christi*, Rom. 8, v. 17. 5° Virtutum omnium exempla nobis dantur, maximè verò religionis et obedientiæ Deo debitæ, cui sese in victimam Homo-Deus obtulit, *factus obediens usque ad mortem*, Philip. 2, v. 8, tum amoris erga homines exercendi, quos *usque in finem* Christus dilexit, Joan. 13, v. 1, necnon bonorum et malorum temporalium despicientiæ quam paupertas et passiones Christi commendant, ac tandem humilitatis, quam in remedium innatæ nobis superbiæ Christus toto suæ mortalis vitæ decursu

discours 13, 14, 15. *Écrit contre la Prévention*, T. 4, des Rép. à M. Arnauld, édit. 1709, pag. 130, 131. *Entretiens sur la Métaphysique et sur la Religion*. ent. IX, etc.

(1) *Écrit contre la Prévention*, ubi sup. pag. 156, 180, 181. *Entret. sur la Métaph. et sur la Relig.* entret. IX, n. 10, pag. 369, édit. Paris. 1752.

(2) *Traité de la nature et de la grâce*, 1 Discours art. 2 et 3; troisième éclaircissement sur ce Traité. *Écrit contre la Prévention*. ubi sup. pag. 159. *Entret. IX sur la Métaph.* etc. n. 6, p. 550 et seq.

(3) *Entret. sur la Métaph. et sur la Rel.* entr. IX, n. 5, p. 348, 349, 350.

magnoperè coluit. « Quæ superbia sanari potest, ait S. Augustinus, lib. de Agone christiano, cap. 11, n. 12, si humilitate Filii Dei non sanatur? Quæ avaritia sanari potest, si paupertate Filii Dei non sanatur? Quæ iracundia sanari potest, si patientiâ Filii Dei non sanatur? » Lege caput integrum. 6° Patfactus est nobis aditus facilis ad Deum; *advocatum enim habemus apud Patrem Jesum Christum justum: et ipse est propitiatio pro peccatis nostris, non pro nostris autem tantum, sed etiam pro totius mundi*, 1 Joan. 2, v. 1; ergo, etc.

2° Rerum universitati et dispositioni magnum decorem attulit Incarnatio, nempe maxima mundi hujus perfectio, seu quod idem est, ratio præcellens quâ Dei perfectiones opus ejus exprimit, ex eo oritur quòd præsens rerum universitas et dispositio hoc mysterium includat. Si enim Incarnatio spectetur in se et quantum ad substantiam, jam capite præcedenti monstrata est bonitatem et perfectionem divinam, necnon supremam potentiam et sapientiam summo modo exprimere. Si autem in ordine ad cætera omnia, seu visibilia, seu invisibilia, seu præsentia, seu futura, seu terrestria, seu cœlestia consideretur, mirum quæ in hæc omnia perfectio, quæ attributorum Dei exprimendorum potestas ex hoc mysterio derivetur. Quod argumentum paucis tantum attingam; 1° unio hypostatica personæ divinæ cum naturâ aliquâ spiritu et corpore constitutâ, rerum universitati quæ ex spiritibus et corporibus tota coalescit, sanctitatem quamdam summamque dignitatem confert, quâ Dei, ad quem omnia referuntur, sanctitas et infinitas mirum in modum elucescunt. 2° Incarnatio id decoris universo tribuit, cunctis videlicet præesse et imperare Deum-Hominem, qui et ipse secundum naturam suam creatam, et actus infiniti valoris quos per eam elicit, Deo sit subjectus et ad eum referatur. *Constituit* (Christum Deus), inquit Apostolus, *ad dexteram suam in cælestibus, supra omnem principatum, et potestatem, et virtutem, et dominationem, et omne nomen quod nominatur non solum in hoc seculo, sed etiam in futuro. Et omnia subjecit sub pedibus ejus; et ipsum dedit caput supra omnem Ecclesiam, quod est corpus ejus, qui omnia in omnibus adimpletur*, Ephes. 1, v. 20 et seqq. Et alibi: *Omnia vestra sunt; vos autem Christi; Christus autem Dei*. 1 Cor. 4, v. 22 et 23. 3° Non nisi ab Incarnatione, Angeli, ut homines, habent quòd juncti Christo capiti suo, possint cultum infiniti valoris creatori suo exhibere. Atque ex

Scripturis novimus templi illius magnifici et æterni quod ex omnibus beatis mentibus et hominibus justis Deus construere destinat, lapidem angularem, sacerdotem summum, maximumque decus et ornamentum futurum esse ipsum Christum Jesum; in quo et per quem omnes sancti Deo in omni æternitate reddituri sunt honores ejus majestati proportionatos. 4° Redemptio hominum, gratiæ ipsius etiam ante Christum collatæ, sacramentorum vis et efficacia, gentium vocatio et conversio, Ecclesiæ institutio, ædificatio, et stabilitas, uno verbo omnia vitæ æternæ consequendæ media, ipsaque æterna vita ex satisfactionibus, meritis et efficaci operatione Christi oriuntur. Quàm meritò igitur ipse exclamat Joan. 3, v. 16: *Sic Deus dilexit mundum ut Filium suum unigenitum daret, ut omnis qui credit in eum non pereat, sed habeat vitam æternam!* Et Apostolus, Eph. 1, v. 9 et 10: *Proposuit* (Deus), inquit, *in dispensatione plenitudinis temporum, instaurare omnia in Christo quæ in cælis et quæ in terrâ sunt in ipso*. 5° Lapsus hominem erigendo et reparando per Incarnationem, Deus eximiâ ratione misericordiam, justitiam, sapientiam, sanctitatem potentiamque suam expressit; misericordiam quidem, et bonitatem, dum hominis misertus, *misit Filium suum... ut salvetur mundus per ipsum*. Joan. 3, 17; justitiam, dum *Filio proprio*, qui in se iniquitates nostras expiandas susceperat, *non pepercit, sed pro nobis omnibus tradidit illum*, Rom. 8, 32; sapientiam, dum accuratissimæ justitiæ simul cum summâ misericordiâ conciliandæ viam adinvenit salvis utriusque juribus; exigendo scilicet pœnas à Christo qui sese sponsorem nostrum constituerat, et peccata hominibus persolvendæ debitæ satisfactioni imparibus remittendo; ubi adimpletum vaticinium Davidis, Psal. 84, v. 11: *Misericordia et veritas obviaverunt sibi; justitia et pax osculatæ sunt*. Expressit sanctitatem suam, dum in odium et ultionem peccati, adeò severas à Christo vade nostro pœnas repetiit. Denique omnipotentiam suam, non modò ipsam Incarnationem tot bonorum fontem operando expressit, sed etiam gratiâ suâ quæ hujus mysterii fructus est, corda hominum subigendo, et sanctos ex peccatoribus creando; ergo maxima hujus mundi perfectio, seu, quod idem est, ratio præcellentior quâ mundus characterem attributorum divinorum gerit, ex Incarnatione oritur.

Prob. secunda pars, scilicet in hypothesi creationis hoc mysterium non esse simpliciter

necessarium. Primum argumentum ex iis Scripturarum et SS. Patrum petitur testimoniis, quibus Incarnatio Verbi divini nobis, ut pignus eximii amoris et summæ Dei erga homines misericordiæ argumentum exhibetur, atque ut divinum beneficium ad eos liberandos et redimendos concessum. Duplici capite sequenti multa ejusmodi loca afferemus. Atqui, licet ex ejusmodi testimoniis colligi non posset unicum Incarnationis finem fuisse redemptionem generis humani, de quo aliquando disseremus, iis tamen hoc saltem significatur Deum potuisse creare, quin Incarnationis mysterium etiam quantum ad substantiam peragere in animo haberet.

Secundum argumentum in istâ ratione theologicâ positum est: Opus supernaturale non est simpliciter necessarium in hypothese creationis mundi; siquidem creatio id unum secum importat et necessariò includit, nempe creaturis illud à Deo concedi quod earum natura continet et exigit. Atqui Incarnatio est opus supernaturale; nulla enim esse potest creatura intelligens, quæ suapte naturâ hypostaticam cum Verbo divino unionem postulet; ergo, etc.

Tertium argumentum in principiis Malebranchii labefactandis penè totum versatur. Si Incarnatio creationi necessariò connexa esset, vel hæc connexio necessaria ab ideâ operis cujuslibet possibilis in se sumpti, vel à Deo ipso repeteretur; atqui non ab ideâ operis cujuslibet possibilis in se sumpti; non enim inficiatur Malebranchius (quod aliàs per se manifestissimum est) dari infinitas rerum dispositiones et mundos posibles, id est, nullam ratione sui repugnantiam involventes, quibus Incarnatio non continetur.

Neque ab ipso Deo ulla deduci potest necessaria Incarnationis cum creatione connexio. Etenim connexio ejusmodi à Deo repeli nequit, nisi vel gloria accidentalis seu extrinseca quæ ex creatione in Deum redundat, vel gloria ejus essentialis, vel ordo immutabilis eam concipiantur certò adstruere et demonstrare. Nullum autem horum dici potest. 1º Gloria accidentalis quam ex creatione Deus percipit, connexionem aliquam necessariam Incarnationis cum creatione non adstruit. Namque ejusmodi gloria accidentalis et extrinseca in hoc consistit, quòd à creaturis intelligentibus Deus cognoscatur, laudetur, ametur, quodque ab omnibus suis operibus aliquo modo exprimatur. Atqui, etiamsi 1º gloria ejusmodi maxima Deo per Incarnationem tribuatur; etiamsi 2º, ens

supremum cum suis creaturis intelligentibus à gloriâ sibi reddendâ, seu à cultu sibi debito dispensare non possit, quippe quem ordo immutabilis, à quo voluntas divina recedere non potest, Deo exhiberi præscribit; etiamsi denique Deus velle nequeat opus attributorum characterem nullo pacto exprimens, siquidem seipsum negare non potest; attamen non idcirco in hypothese quòd creet, tenetur Incarnationem peragere. Quid ita? quia sibi sufficientissimus, et gloriâ extrinsecâ quâcumque non indigens, ut sæpè monet ipse Malebranchius, et ex Scripturis, ex universâ traditione (1), et ex manifestâ ratione certissimum est, non tenetur, sicut mox liquebit, etiam in hypothese quòd creet, illud producere, ex quo gloriam accidentalem et extrinsecam quàm maximam consequi possit; ergo gloria accidentalis, quæ ex opere condendo in Deum redundare debet, necessariam aliquam Incarnationis cum creatione connexionem non evincit.

2º Gloria Dei essentialis ejusmodi connexionem pariter non adstruit. Eatenus enim gloria Dei essentialis Incarnationem ex hypothese creationis nexam esse ostenderet, quatenus postularet ut Deus in hac hypothese produceret opus sua attributa quoad potest exprimens, id est, opus quod, reverà et judice Deo ipso, maximum esset divinæ perfectionis testimonium et argumentum; atqui gloria Dei essentialis id non postulat. Nam gloria Dei essentialis est judicium quod Deus fert de seipso, quo scilicet Deus pronuntiat se utpote infinitè perfectum, esse sibi suum unicum finem, unicam et summam perfectionem suam et felicitatem. Huic judicio essentialiter annectitur amor necessarius quo Deus in se sibi summè complacet, quique, etsi infinitus, suo tamen objecto totus expletur et adæquatur. Hoc porrò judicium et ille amor non exigunt ut Deus in hypothese quòd creet, producat opus sua attributa quoad potest exprimens. Etenim tantum abest ut Deus, in hypothese creationis, ideò sua attributa maximè exprimere teneatur, quia judicat se

(1) Psal. 15, v. 2, Jacob. 1, v. 5, S. Justinus, vel alter antiquissimus scriptor in Epistolâ ad Diognetum, n. 3, edit. novæ Op. S. Just. pag. 315. Tertul. de Orat. cap. 5, n. 5. p. 150, ed. Paris. 1673, ad hæc verba orationis Domin. *sanctificetur nomen tuum*. S. Cypr. de Orat. Domin. ad eandem sententiam, p. 207 ed. regię 1726. S. Augustinus lib. 15 Confess. cap. 1, 2, 4, idem in Epist. 102 ad *Deo gratias*, n. 17, et epist. 138, ad Marcellinum, n. 6, S. Th. 1 p., q. 19, ar., 2 et 4, et quæst. 44, art. 4, etc.

esse sibi suum finem, suam perfectionem et felicitatem, ac proinde undequaque sibi sufficientissimum; ut potius ejusmodi judicio pronuntiare intelligatur se perinde esse infinitè beatum et perfectum, seu magis, seu minùs attributa sua creando exprimat. Pariter tantum abest ut amore infinito quo suam substantiam diligit, ad sua attributa maximè exprimenda, posito quòd agat, adigatur, ut potius is amor utpote suo objecto expletus, non possit ullà naturali necessitate ad aliquid extrinseci expetendum ferri; ergo, etc.

Et verò si gloria essentialis seu judicium quod Deus fert de seipso et amor quo in se solo sibi summè complacet, exigent ut Deus in hypothesei creationis, opere suo seipsum quoad potest exprimeret, vel hanc sese exterius proferendi et exprimendi rationem expeteret ut finem suū saltem partialem, aut ut medium, vel ne sua attributa negaret. Non primum, quippe Deus quacumque in hypothesei se esse ens infinitè perfectum, se sibi esse suum unicum finem, necessariò cognoscit, ut diximus, seque solum ideò amore infinito et essentiali diligit.

Non secundum, siquidem opus quodvis à Deo productum quantumlibet exprimat ejus attributa, medium non est, quacumque in hypothesei, augendæ divinæ perfectioni idoneum; nec ad amplificandum cognitionem et amorem quibus seipso Deus fruitur, et summè beatus redditur, ullo adjumento esse potest.

Non denique tertium, fatemur quidem Deum non posse sua attributa negare; at, ut sua attributa negare ut intelligeretur, censemus eum concipiendum esse aliquid velle suis attributis oppositi. V. g., non potest velle peccatum, quia illa voluntas repugnaret ejus sanctitati; non potest velle fallere, quia id repugnaret ejus bonitati et veracitati; non potest innocentes plectere, quia id repugnaret ejus æquitati et justitiæ; non potest creaturas intelligentes à cultu sibi debito eximere, quia id repugnaret ordini immutabili; non potest earundem creaturarum nolle esse finis ultimus, quia id repugnaret ejus infinitati; non potest, cum finem sibi proponit, media ad hunc finem aptissima non disponere, quia id repugnaret ejus sapientiæ; non potest producere opus quod sua attributa nullo pacto exprimat, quia opus attributa divina nullo pacto exprimens esset undequaque malum et iis dissentaneum, quidquid enim extra Deum boni est, imperfecta quædam sit necesse est ejus attributorum participatio; uno verbo quodcumque voluntatem amoris attributorum

divinorum contrariam denotaret, illud à Deo intendi nequit. Verum, de his sic statuendo, simul propugnandum est Deum circa reliqua esse liberrimum. Se solum Deus amat necessariò. Solo igitur substantiæ suæ seu attributorum suorum amore vinciri potest, proindeque censendus est posse, quidquid illæsis suis attributis potest velle. Jam porrò, si Deus produxisset opus attributa sua minùs exprimens, non ideò conciperetur attributa sua læsisse, seu voluntatem iis gessisse contrariam. Sic enim arguere est: Deus attributa sua opere quodam minùs perfectè exprimendo quàm alio potuisset, non ideò iis oppositam voluntatem gereret, modo 1º attributa sua minùs exprimendo, ea tamen verè exprimat ac proinde velit aliquid iis conforme et consentaneum; et 2º, hæc attributa quàm maximè exprimi non postulent. Atqui 1º Deus attributa sua minùs perfectè exprimendo, ea tamen aliquà ratione expressisset, ut per se liquet, proindeque voluisset aliquod opus iis conforme et consentaneum. 2º Attributa divina etiam in hypothesei creationis, quàm maximè exprimi non postulant; siquidem nihil minùs perfecta et summa sunt, seu magis, seu minùs exprimantur; ergo.

Itaque inter ista duo extremè opposita: Deum videlicet quodam opere attributa sua negare; et eadem quàm maximè exprimere; duo quædam quasi media concipiuntur; nempe eundem potuisse 1º nullo pacto perfectiones suas exterius exprimere, nihil scilicet creando; 2º eas exterius exprimere et proferre aliquo modo tantum, id est, opere non tam perfecto quàm ab eo produci potuisset. Atque, quemadmodum ens supremum, utpote sibi sufficientissimum, potuit quin seipsum negaret, nullo opere sua attributa promovere et manifestare extra se; eadem ratione potuit, iisdem attributis suis illæsis, producere opus minùs perfectum, eorumque characterem minùs perfectè gerens. Mundum igitur perfectissimum, inprimis verò Incarnationem ex hypothesei operis creandi necessariò nexam esse non postulat gloria Dei essentialis.

3º Tandem, neque hanc connexionem ordo immutabilis exigit. Nam id unum ordo immutabilis exigit, ut existentium habeatur ratio pro vario eorum perfectionis gradu, ac proinde, ut Deus in hypothesei quòd creet, propter seipsum agat, minùs perfecta ad perfectiora, et universa ad seipsum ut ad eorum ultimum finem referat. Atqui, ex eo quòd Deus omnia ad seipsum ut ad ultimum eorum finem re-

ferre debuerit, non sequitur Incarnationem esse necessariò ex creatione nexam. Aliud est enim Deum teneri omnia referre ad seipsum, aliud est eum teneri, si creet, producere opus perfectissimum quod ad seipsum referat. Si non referret quæ facit ad seipsum, negaret sua attributa, quia vel seipsum summè perfectum non haberet quod ejus infinitati et scientiæ adversatur; vel minùs perfectum, creaturam scilicet ad perfectissimum non referret, quod cum ordine immutabili apertissimè pugnat. Ut verò teneretur, in hypothesi creationis, opus perfectissimum, quod ad se referret, producere, necesse foret Deum secundum leges ordinis immutabilis idcirco debere omnia ad seipsum referre, quòd rebus creatis aliquà ratione indigeret. Atqui non ideò ordo exigit ut Deus ad seipsum omnia referat quòd iis indigeat; sed tantum quia ipsi ut enti supremo et perfectissimo omnia debentur, et ad eum omnia pertinent; ergo, etc.

SOLVUNTUR OBJECTIONES. — Obj. adversus primam conclusionis partem. Perfectiones Divinitatis in Incarnatione obscurantur; quod factà aliquà enumeratione facilè probaretur; ergo nullo modo conveniens fuit Incarnatio. Ita infideles et increduli.

Distinguo ant. Obscurantur, iudicio rationis humanæ ex sensuum et imaginationis affectu judicantis, concedo; iudicio rationis rectæ et fide illustratæ, nego. *Animalis homo*, inquit Apostolus, 1 Cor. 2, v. 14, *non percipit ea quæ sunt spiritus Dei; stultitia enim est illi, et non potest intelligere; quia spiritualiter examinatur.* Non quærimus quid de Incarnationis Mystério ac modo quo peractum est, homines impii, increduli et *carnales*, sentiant; sed quid illud reipsa sit? an decorem maximum, in quo Deus sibi placeat, reverà afferat mundo, seu an attributa divina splendidè exprimat? Ut verò de ejusmodi quæstione judicet mens humana, à sensibilibus et terrenis se avocet, et ad fidei christianæ doctrinam sese erigat, necesse est. Licet autem nonnisi valdè imperfecta illius mysterii idea nobis concessa sit, multæque ejus eximiæ appendices nos in hac vitâ prorsus lateant, attamen ex fidei placitis jam manifestè deduximus perfectiones divinas in eo mirum in modum coruscare, quod et postea non uno in loco adhuc observabitur. Unde colligere, est quantum reverà et Deo ipso iudice, hoc mysterium characterem attributorum divinatorum referat.

Quòd si externâ Christi abiectione et demis-

sione offendaris, cogita eum ita venire debuisse ut munia servatoris impleat, nempe ut pro peccatis nostris pateretur et satisfaceret, ut bonorum temporalium quibus à salute avertimur, nostris animis contemptum instillaret, ut *concupiscentiam carnis, concupiscentiam oculorum*, seu divitiarum sitim, et *superbiam vitæ* exemplis coerceret, et sanaret. Dùm autem voluntariâ demissione se esse hominem ostendit, quantum gloriæ splendorem in eo deprehendit fides! Concipitur, inquit Turnelius, eâ de re observationes Patrum eloquenter contrahens, concipitur quidem in carne; sed de Spiritu sancto, sed ex Virgine. In humili et obscuro loco pannis involvitur; sed præcones habet Angelos, et à regibus adoratur. Vivit pauper et abjectus; sed stupenda operatur, ac in monte coram discipulis transfusâ in corpus suum Divinitatis gloriâ, se Deum esse manifestè comprobatur. Baptizatur à Joanne, sed de cœlo clamat Pater: *Hic est Filius meus dilectus in quo mihi benè complacui.* Esurit in deserto; sed ministros habet Angelos. Rapitur à militibus; sed eos prius voce prostrat, et auriculam Malcho restituit. Ligari se permittit; sed penès ipsum est rogare Patrem ut duodecim mittat in sui defensionem legiones Angelorum. Cruci affigitur; sed terra concutitur. Moritur; sed obscuratur sol, sepulcra aperiuntur, mortui reviviscunt. Sepelitur; sed propriâ virtute resurgit, in cœlum ascendit, Spiritum sanctum ad suos mittit. Atque ita, ut se Deum simul et hominem probet, quasi alternis vicibus et Divinitas humanitatem illustrat, et humanitas Divinitatem obscurare videtur. Lege Epistolam 137, aliàs 3, S. Augustini ad Volusianum, in quâ præcipuè dissolvit momenta quæ adversus Incarnationem sibi proposita fuerant.

Obj. contra secundam partem 1^o auctoritatem quorundam Patrum, quæ meliora sunt à Deo produci affirmantium. *Credamus*, inquit Patres concilii Francofordiensis anno 794 in *Epistolâ* ad Hispaniæ episcopos, *credamus Deum omnia velle quæ meliora sunt.* S. Augustinus, lib. 3 de libero Arbitrio cap. 5: *Quidquid, ait, tibi verâ ratione melius occurrerit, scias fecisse Deum, tanquàm bonorum omnium conditorem.* Lib. de Quantitate animæ, cap. 33, n. 73: *Iustitiâ summi Dei factum est ut non modò sint omnia, sed ita sint ut omninò melius esse non possint.* Et lib. 1 contra adversarios legis et Proph. cap. 14: *Usque adeò desipiendum est ut homo videat aliquid melius fieri debuisse et hoc*

Deum vidisse non putet; aut putet vidisse, et credat facere noluisse; aut voluisse quidem, sed minime potuisse? Atqui nisi Deus incarnationem peregisset, non fecisset quæ meliora sunt; ergo ex hypothesi condendi mundi necessaria fuit Incarnatio.

Dist. ant. Affirmant quidam SS. Patres Deum facere quod est melius in ordine ad bonum universi, et finem quem sibi præfixit, concedo : quod melius est absolutè, et ita ut Deus ab eo faciendo abstinere non potuerit, nego. Locis objectis S. Augustinus adversus Manichæos disputabat, non de mysterio Incarnationis, et aliis supernaturalibus religionis nostræ mysteriis, sed de ordine naturæ et malis quæ in isto ordine deprehendere nobis videmur, ex quibus Manichæi inferebant dari malum aliquod principium. Hos refellebat S. doctor, tum quia mala ejusmodi adeò non officiunt bonitati divinæ, ut semper sint quid melius in ordine ad bonum universi quod ex variis rerum et perfectionum gradibus efflorescit; tum quia credendum est *Deum fecisse quod verà ratione à se faciendum fuisse cognovit, etiamsi hoc in rebus factis* (humana anima) *non videt*; tum quia largissima Dei bonitas adhuc esset laudanda, etiamsi aliquo inferiore creaturæ gradu nos condidisset. Vide lib. 3 de lib. Arbitrio, cap. 5. t. 1, pag. 614 et seqq. Itaque tantum abest ut S. doctor definiat Incarnationem esse necessariam in hypothesi mundi alicujus creandi, vel mundum esse ita perfectum ut perfectior dari nequeat, vel circa producendum opus aliud in se minus perfectum, creatorem non fuisse liberum; ut potius has quæstiones ne leviter attingat. Imò verò in Enchiridio ad Laurentium cap. 95, t. 6, p. 131, et aliis in locis tradit multa à Deo effici potuisse quæ non operatus est. Quod et alii SS. Patres passim et sæpè docent, quorum testimonia legere est apud Petavium, lib. 5 de Deo, cap. 6.

Objicies 2º cum Raymundo Lullo : Sine Incarnatione mundus careret maximâ perfectione. Præterea agens perfectissimum, qualis est Deus, posito quòd operetur, debet opus perfectissimum producere, ac proinde Incarnationem; ergo ex hypothesi creationis Incarnatio necessaria fuit.

Ad primum, distinguo : Careret maximâ perfectione ordinis supernaturalis, ac proinde cum operis alicujus naturalis creatione non necessariò connexâ, concedo, secus, nego. Ad secundum, pariter distinguo : Debet producere opus perfectissimum, si necessariò agat, con-

cedo, si liberè subdistinguo : In ordine ad consilium suum et finem quem sibi præfixit, concedo; perfectissimum in se, seu quo nullum perfectius dari possit, nego. Deus non eget illâ gloriâ extrinsecâ quam ex opere magis vel minùs perfecto consequi potest; proindeque consilia sua debet quidem exequi modo perfectissimo, sed non tenetur operis perfectissimi condendi consilium capere. Ratio est quia solo substantiæ suæ et attributorum suorum amore essentiali et necessario constringitur et vincitur, ut jam explicatum est.

Obj. 3º cum Malebranchio : Deus seipsum solum necessariò amat, solam suam substantiam, sola sua attributa essentiali et necessario amore prosequitur; ergo, si agat, necesse est ut opere et agendi ratione suâ simul, id est, ut opere viis conjuncto, attributa sua exterius quàm maximè exprimat. Si enim Deus produceret opus quod junctum viis attributa divina minùs exprimeret, ergo in opere minùs perfectè attributa sua exprimente, sibi ampliùs complaceret quàm in altero iisdem exprimendis magis apto; non ageret proinde secundum illud quod est, secundum amorem summum et necessarium quo sua tantum attributa diligit. Deus igitur in hypothesi quòd agat, producit opus quod viis conjunctum ita perfectum est, ut nullum perfectius dari possit. En summa argumenti præcipui quo fundamentum sui systematis adstruere multis in locis Malebranchius nititur. Unde aliquando colligit Deum non potuisse creare quin Incarnationem quantum ad substantiam peragi voluerit. Nego consequ. imò cum Deus seipsum solum necessariò amet, ac proinde sibi solus sit finis suus, sua perfectio, sua felicitas, statuendum est eum posse illæsis suis attributis, ea velle minùs vel magis extra se exprimere. Amor enim essentialis quo Deus sua sola amat attributa, nequaquam postulat ut id efficiatur quo nullo pacto indigent, sed tantum ut voluntas divina operando ad extra, iis consentanea sit et nihil iis contrarii intendat. Atqui evidens est attributa divina, eo ipso quo sunt unicus Dei finis, et tota ejus perfectio et felicitas, non egere magis, vel minùs exprimi. Evidens est pariter Deum gerere voluntatem iis consentaneam, non oppositam, ubi ea exprimit, etsi minùs perfectè; ergo, etc.

Ad probationem, nego consequ. Amor quo Deus sibi in aliquo objecto complacet, duplex est, alter necessarius, quo sibi complacet in seipso, et in omnibus possibilibus, prout ipsi

sapientiâ suâ exhibentur, et ab omnipotentia produci possunt, atque attributis divinis magis vel minus perfectè exprimendis et participandis apta sunt. Alter amor non est absolutè necessarius, is nempe est quo Deus in operibus à se exterius liberrimè productis, sibi complacet. Fatendum est Deum in opere possibili quod ejus attributa magis exprimere posset, sibi necessariò et absolutè ampliùs complacere, quàm in opere possibili imperfectiori. Pariter si duo opera existerent, ratione sui et viarum, aliud magis, aliud minus substantiam divinam exprimentia, Deus in illo magis quàm in isto sibi complaceret. At si unicum opus existat, illudque minus exprimat divina attributa, quàm ab altero quodam opere possibili exprimi possent; numquid idcirco Deus in opere minus attributa sua exprimente, ampliùs quàm in altero quod ea magis referret, sibi complacere dici poterit? minimè. Quid ita? quia complacentia divina quæ habet pro objecto opus productum, hâc ratione conferri non potest nisi cum complacentiâ habente pariter pro objecto aliud opus productum, quod ex hypothese nullum est. Nec quæri potest an Deus sibi magis complaceat in opere aliquo liberè à se creato, quàm sibi absolutè et necessariò complacet in aliquo possibili perfectiori, siquidem ejusmodi complacentiæ sunt rationis diversæ et disparatæ, ac proinde ad se invicem non comparandæ. Hoc unum verum est, complacentiam Dei in operibus magis vel minus perfectis quæ creavit, respondere, si ita loqui fas est, complacentiæ quam necessariò habet circa eadem ut possibilia; atque opus existens quod magis exprimeret attributa divina, plus placitum Deo, quàm opus aliud etiam productum ea minus exprimens.

At, inquires, si ex eo quòd Deus seipsum amore summo et essentiali diligat, sequitur cum in opere possibili, ad attributa divina exprimenda magis idoneo sibi ampliùs complacere quàm in alio possibili minus perfecto; nonne eodem sui amore essentiali inducetur (si agat) ad producendum opus perfectius, et exprimendis suis attributis aptius? ergo. Nego ant. Deus lege ordinis immutabilis tenetur unumquodque objectum amare prout amabile est. Hæc lex ex summo amore, quo suam substantiam diligit, derivatur, Deus seipsum essentialiter diligit; ergo sibi magis (et quidem necessariò et absolutè) complacere in aliquo possibili quod substantiam divinam magis imitari et participare potest, quàm in alio possibili im-

perfectiori. Pariter, si duo opera ab ipso condantur, magis sibi complacere in perfectiori quod perfectius exprimitur, quàm in minus perfecto. Non posset aliam gerere voluntatem, quin judicaret minus perfectum esse amabilius magis perfecto, creaturam magis attributa sua participantem esse inferiorem creaturæ eadem attributa minus participantem; quin proinde semetipsum negaret. At verò, ut dictum est, cum Deus infinitus, qui sibi suus finis, sua perfectio, sua felicitas est, et sibi undequaque planè sufficit, nullo pacto indigeat sua attributa exprimi magis vel minus, exprimi vel non exprimi, siquidem seu aliquo opere exprimantur, seu non promantur exterius, eadem illa manent summa et infinitè perfecta; planum est quòd iis voluntatem oppositam non gessisset. 1^o Si ea nullo opere voluisset exprimere, nihil scilicet extra se producendo; 2^o si ea opere minus perfecto expressisset. Recole quæ inter probationes conclusionis diximus.

Objicies 4^o cum eodem (1): Inter mundum et actionem quâ productus est, debet esse aliqua relatio; atqui actio quâ mundus è nihilo eductus fuit, divina est et pretii infiniti, mundus verò quantumlibet perfectus supponatur, non est infinitè amabilis, nec Deo potest honorem eo dignum exhibere; ergo Christum à reliquis separa creaturis, et perpende an Deus qui propter solam suam gloriam potest operari, et cujus sapientia est infinita, possit quidquam extra se producere.

Dist. Inter mundum et actionem quâ productus est debet esse relatio habitudinis, relatio scilicet effectûs ad actionem quâ producitur, concedo; entitatis, quasi tanta esse deberet entitas et perfectio mundi, quanta est entitas et perfectio actionis divinæ quâ mundus productus est, nego. Meritò dicitur perfectionem causæ efficientis minorem non posse esse perfectione effectûs quem producit, quippe effectus in causâ suâ virtualiter contineatur necesse est. At nullo argumento probari potest tantam oportere esse mundi creati realitatem, quanta est realitas actionis divinæ quâ producitur. Quid quòd, ne posito quidem mysterio Incarnationis, verè dici potest actio divina opere quod produxit adæquata? Nam actio Dei physicè et ratione entitatis suæ infinita est. In Incarnatione verò persona quidem infinita est, sed non producitur, natura autem humana

(1) *Traité de la nature et de la grâce* 1 disc. n. 5. *Entret. sur la Métaph. et sur la Rel.* Entr. IX, n. 5.

assumpta à Verbo, et quæcumque in eâ peraguntur sive ad unionem hypostaticam constituendam, sive ut appendices ipsius, hæc quantum ad entitatem finita sunt; ipsæ actiones quibus Christus Patrem suum colit et pro nobis satisfacit, physicè et secundum entitatem finitæ sunt, utpote à naturâ ejus humanâ elicite; pretium autem quod ex dignitate personæ Christi illæ actiones consequuntur, non est quid physicum, sed morale, ac proinde non nisi in genere moris infinitum est. Porro quod infinitum est duntaxat in genere moris, adæquatne perfectionem actionis quantum ad entitatem infinitæ?

Instabis cum eodem Malebranchio (1): Nulla est proportio inter finitum et infinitum; ergo mundus finitus nullam ad Deum infinitum relationem habere potest. Sed mundus esset finitus nisi ipsi persona aliqua divina uniretur per assumptionem alicujus creaturæ intelligentis; ergo. Præterea, mundus finitus perfectioni Dei essentiali, nempe ejus infinitati exprimendæ impar esset. Deus igitur non posset in hoc opere sibi complacere; ergo illud creando, semetipsum negaret. Deinde mundus profanus dignus non est qui ad Deum sanctum referatur, ipsi placere non potest; persona igitur divina quæ illum sanctificaret, ipsi uniri necesse fuit. Denique, Deus propter gloriam suam omnia operatur, quod ratio demonstrat, et ex Scripturis patet: *Universa propter semetipsum operatus est Dominus*, Prov. 16, v. 4. Debuit ergo persona divina aliquam naturam intelligentem assumere, ut dignitas infinita mundo conferretur, et majestas divina gloriam ex eo, non negatâ suâ infinitate, percipere posset.

Ad primum, disting. Nulla est proportio entitatis, concedo; habitudinis, nego. Mundus planè finitus naturâ suâ ad Deum à quo conditus esset, referretur, atque hunc ad seipsum Deus referret illæsis suis attributis. Namque opus creatum ad seipsum non idcò refert Deus, quòd eo ullâ ratione indigeat, sed quia omnia ipsi debentur, omnium habet dominium, et quia minùs perfectum ad perfectissimum referri ordo immutabilis postulat.

Ad secundum, fatemur infinitatem divinam splendidissimè, et mirabiliter exprimi, dum mundus cui Incarnatio valorem infinitum tribuit, ad Deum ut ad omnium principium et ultimum finem refertur, nec tamen ejus opes,

(1) *Entretien sur la Métaph. et sur la Rel.*, 1^o 5.

ejus perfectionem aut felicitatem auget. Verùm, nobis etiam concedatur mundum undequàque finitum, suo etiam modo, etsi minùs perfectè, infinitatem divinam expressurum. Nam quæcumque in hoc mundo existerent, ad Deum referrentur; creaturæ inprimis intellectuales in eo solo deberent finem suum ultimum quærere, et beatitudinem suam in eo solo reperirent. Demùm, Deus mundum minùs perfectum, mundum dignitatis et pretii tantum finiti liberè producendo, significasset se etiam gloriâ illâ accidentali et extrinsecâ quam ex Incarnatione ipsâ aut simili mysterio, consequi potuisset, non indigere, ac proinde se esse sibi sufficientissimum et infinitum. Atque inde patet quomodò, illæsis suis attributis, Deus in hoc mundo finito sibi complacere et illum creare potuisset; nempe, illæsis suis attributis, sibi complacere potest in omni opere quod ea refert et exprimit.

Ad tertium, illud sanctum est quod ordini immutabili est conforme; atqui Incarnatio non est ita necessaria ut sine eâ mundus disponi nequeat modo conformi legibus ordinis immutabilis; ergo etiamsi magna sanctitas et dignitas orbi per Incarnationem allatæ sint, attamen sine hoc mysterio mundus posset à Deo disponi ita sanctè, ut ad eum referri posset. Et verò, etsi actio pia, quam elicit creatura intellectualis, ex unione cum Christo capite nostro magnam sortiatur dignitatem, quis tamen negaverit actionem ejusmodi in se sumptam esse conformem ordini immutabili, et proinde ita sanctam, ut ad Deum summè sanctum, id est, suâ naturâ ordinis diligentem referri, et ab eo præmium suum consequi possit? ergo, etc.

Ad quartum, distingo: Deus propter gloriam suam omnia operatur, sed ita ut gloriâ ejusmodi extrinsecâ non indigeat, nec proinde, teneatur gloriam ejusmodi quàm maximam intendere, concedo; secùs, nego. Cùm Deus sit ens infinitè perfectum et sibi sufficientissimum, evidens est eum non agere propter se eo sensu quòd agat propter utilitatem suam: *Bonis nostris non eget*, inquit Psalter Regius. Operatur ergo extra se propter utilitatem creaturarum, ut iis communicet bonitatem suam; creaturas verò omnes, agendo, ad se refert, quia omnes suæ sunt, omnes ad ipsum ut ad supremum suum Dominum pertinent, cùmque solus sit perfectissimus, solus ipse est omnium ultimus finis. Fateor itaque Deum se solum necessariò amantem, hunc sibi, cùm creare voluit, finem

præstituisse, nempe ut bonitatem suam exterius communicando, attributa sua exprimeret. Sed cum attributa divina magis vel minus exprimi non egeant, necesse non fuit ut ea quam maximè exprimere decerneret; proindeque necesse non fuit ut in hypothese mundi condendi, producere voluerit opus quod viis conjunctum, divinas perfectiones summo modo exprimeret.

CAPUT III.

Utrum in hypothese lapsus generis humani necessaria fuerit, aut saltem conveniens Incarnatio?

Sanctus Anselmus in lib. 1, *Cur Deus homo*, et Richardus à S. Victore De Incarnatione cap. 8, Vasquesius in p. 3, disp. 2, cap. 2, et alii nonnulli sensisse videntur Incarnationem in hypothese lapsus hominis fuisse simpliciter necessariam. Et reverà, in iis alio sensu intelligendis, non levis est difficultas quam modò attingemus. Duo autem includeret hypothetica ejusmodi Incarnationis necessitas, primum oportuisse hominem lapsum à Deo reparari; alterum, non nisi per Incarnationem eum reparari potuisse. De posteriori agemus capite sequenti. Circa prius cum S. Th. p. 3, q. 1, S. Bonav. in 3 dist. 20, a. 1, et omnibus theologis, sit

CONCLUSIO. Etsi bonitati seu misericordiae divinae et hominis lapsi conditioni conveniens fuerit, ut ipse repararetur, eum tamen reparari, seu à malo culpæ et poenæ in quod incurrerat liberari, non fuit simpliciter necessarium.

Probatur prima pars, nempe divinae misericordiae et hominis lapsi conditioni conveniens fuisse ut ipse erigeretur et repararetur; 1º ex SS. Patribus. S. Athanasius, de Incarnatione Verbi Dei, n. 6: « Indecorum, inquit,.... divinam bonitatem indignum prorsus erat res à Deo factas ob fraudem quam homines diabolus circumvenit, destrui. Inprimis verò dedecebat Dei artem in hominibus, vel propter illorum incuriam, vel propter dæmonum dolum deleri.... Satiùs erat eos omnino non fieri, quam factos negligi et interire.... Itaque par Deo non erat sinere homines in corruptionem labi, quia id indecorum et indignum divinae bonitatis erat. » Non absimilia habet S. Cyrillus Alex. lib. 5 *Thesauri*, cap. 7. 2º Ratione theologicâ. Ille effectus misericordiae et bonitati divinae valdè convenire dicendus est, quo illud attributum valdè communicatur et exprimitur, et cujus contrarium hanc perfectionem non referret, sed tantum justitiam rigorosam; præsertim si res eximiâ quâdam

peragatur ratione, quæ tam justitiæ quam misericordiae characterem excellenter gerat; atqui 1º, reparationis generis humani bonitas et misericordia divina communicantur et exprimuntur, ut nemo non videt. 2º Deus non reparando genus humanum misericordiam suam erga homines lapsos non expressisset; tunc enim eis media non concessisset quibus à malo culpæ et poenæ in quod incurrerant, potuissent liberari, ac proinde ipsius erga genus humanum agendi ratio solum rigidissimæ justitiæ characterem gessisset. 3º Reparatio hominis lapsi quâdam eximiâ ratione, justitiam divinam perinde ac misericordiam excellentissimè referente peracta fuit. Namque, ut suo loco deinceps uberius declarabitur, Deus Filii sui Incarnatione et passione hominem lapsum erigens et reparans, benignitatem et misericordiam suam modo nostras cogitationes infinitè superante expressit; et simul justitiæ suæ cumulatissimè satisfieri curavit. Sic factum est, ait Ivo Carnotensis, *ut Deus nec peccatum hominis dimitteret impunitum, quia justus est; nec insanabile, quia misericors est*. Ergo bonitati et misericordiae divinae conveniens fuit ut homo lapsus repararetur.

Illud idem statui hominis lapsi congruebat. Si enim conferatur hominis lapsi conditio cum statu Angelorum lapsorum, planè apparebit congruum fuisse ut divina providentia cum illo benignius ageret, non tantum eo sensu quod minori poenâ plecteretur, sed etiam quod ei salus redderetur possibilis. Enimverò, ut observant S. Gregor. Magnus, Moral. lib. 4, cap. 9, S. Bernardus, S. Bonaventura, etc., Angeli mali propriâ suâ voluntate lapsi sunt; corruptio humana ab uno Adamo orta est. 2º Lapsorum Angelorum numerus longè minor fuit quam Angelorum fidelium, quemadmodum docet S. Augustinus in Enchiridio cap. 29; omnes verò homines in Adamo ceciderunt, ac proinde nisi illorum saluti Deus post lapsum providisset, regnum cælorum ad quod universi destinati fuerant, nullus eorum fuisset assecutus. 3º Angeli mali sponte suâ et nullâ tentatione illecti peccaverunt, quod advertit S. Greg. Magnus, loco citato; tempus viæ brevissimum ipsis constitutum fuerat, et illorum voluntas suscepti propositi naturâ erat valdè tenax; at primi parentes à dæmone tentati sunt, et unusquisque nostrum, per longum viæ tempus, *tentatur à propriâ concupiscentiâ abstractus et illectus*. Vid. S. Th. parte 1, quæst. 63 et 64. 4º Angeli propriâ voluntate peccantes et in

malo obfirmati, pœnis æternis statim addici meruerunt. Peccatum verò ex quo maculam originalem contrahimus, tunc commissum fuit, cum nondum quidquam propriâ voluntate operari poteramus; ergo, etc.

Probatur secunda pars, quam esse certam definit Suarez, nempe Deum potuisse hominem lapsum non liberare : 1^o ex Scripturis. Sapientiae 12, v. 1 et seqq. : *O quàm bonus et suavis est, Domine, spiritus tuus in omnibus!... His tanquàm hominibus pepercisti... semen enim erat maledictum ab initio... quis imputabit tibi si perierint nationes, quas tu fecisti?* Isaïæ 54, v. 7 : *In misericordiâ sempiternâ misertus sum tuû, dixit Redemptor tuus Dominus.* Rom. 3, v. 25 : *Justificati gratis per gratiam ipsius, per redemptionem quæ est in Christo Jesu.* Ephes. 2, v. 4, 5, 7, 8 : *Deus qui dives est in misericordiâ propter nimiam charitatem suam quâ dilexit nos, cum essemus mortui peccatis, convivificavit in Christo, cujus gratiâ estis salvati... ut ostenderet divitias gratiæ suæ in bonitate super nos in Christo Jesu; gratiâ enim estis salvati, etc.* Ad Titum 3, v. 5 : *Non ex operibus justitiæ quæ fecimus nos, sed secundum misericordiam suam magnam regeneraverit nos in spem vivam.* Ex his et aliis similibus, quæ sæpè occurrunt; testimoniis, sic argumentari licet : Qui hominem ex merâ suâ charitate, misericordiâ et gratiâ redemit et reparavit, potuit illum non redimere et reparare; siquidem opus misericordiæ et gratiæ libero miserentis proposito adscribitur Exodi 33, v. 19, his verbis : *Miserebor cui voluero, et clemens ero in quem mihi placuerit;* quod et ratione perspicuum est; quæ enim misericordia et gratia elucere potest in eo quod necessitate naturæ perficitur? atqui, juxta allata Scripturæ loca, Deus ex merâ suâ bonitate et misericordiâ hominem redemit et salvavit; ergo, etc. 2^o Auctoritate S. Augustini lib. *de Naturâ et Gratiâ*, cap. 5, n. 5 : « *Unica versa massa, inquit, pœnas debet, et si omnibus damnationis supplicium redderetur, non injustè procul dubio redderetur... Quis igitur usque adeò dementissimè insaniat, ut non agat ineffabiles gratias misericordiæ quos voluit liberantis, qui rectè nullomodo posset culpæ justitiam universos omniâ damnantis?* » Certè ex hac doctrinâ quæ genuinum est fidei Ecclesiæ de originali labe consecrarium, planè sequitur simpliciter necesse non fuisse hominem lapsum à Deo erigi et liberari; 3^o ratione theologicâ. Deus potuit non peragere opus extra se, ad quod peragendum nullo jure adstringebatur. Atqui redemptio generis hu-

mani est opus extra Deum, ut evidens est; præterea, ad illam peragendam nullo jure adstringebatur Deus; nam si aliquo jure Deus ad reparandum hominem lapsum adstrictus fuisset, vel quia homines lapsi minùs Angelis malis sotes fuerunt, vel quia potuissent mereri liberationem suam; atqui 1^o, licet minùs sotes sint homines quàm Angeli mali, nec tantâ pœnâ digni sint, attamen propter peccatum quod ex Adamo contrahunt, à Deo abjici, et à regno cœlorum excludi merentur juxta fidem; 2^o de fide etiam est eos non potuisse per se mereri justificationem et redemptionem suam, ergo, etc.

Obj. 1^o, adversùs secundam conclusionis partem, auctoritatem sancti Athanasii inter probationes partis prioris allatam. Scilicet adducto loco S. Athanasius ait *indecorum et indignum bonitate divinâ* fuisse sinere homines interire; sed qui ita loquitur, procul dubio existimat Deum non potuisse non reparare genus humanum; repugnat enim Deum id non facere cujus oppositum bonitate ejus indecorum et indignum est, ergo.

Dist majorem : ait S. Athanasius *indecorum et indignum*, etc., atque illud intelligendum est, ut aiunt, negativè, concedo; privativè aut positivè, nego. Illud esset indecens et indignum bonitate divinâ positivè, quod aliquid ipsi contrarii involveret. Illud esset eadem bonitate indignum et indecorum privativè quod privaret bonitatem divinam decore aut dignitate quam ipsa necessariò postularet. Denique illud est hæc bonitate indignum et indecorum negativè, quod hanc privat aliquo decore exteriori, si ita loqui fas est, qui ipsi quidem est consentaneus, sed, quo tamen deficiente, perinde perfecta manere concipitur. Cum ait S. Athanasius, *indecorum et bonitate divinâ indignum fuisse* hominem lapsum à Deo non erigi, intelligendus est prostremo hoc sensu, nempe quòd agendi ratio Dei erga homines, si in suâ corruptione relictis fuissent, characterem bonitatis divinæ sub eo respectu non tulisset, ita tamen ut loco pulchritudinis illius attributi, decorem alterius, justitiæ scilicet rigorosæ induisset. Atque non aliam fuisse S. doctoris mentem evincitur, 1^o quia licet eodem in loco, n. 8, pariter doceat Dei Verbi fuisse *id quod corruptum erat, incorruptum iterum reddere*, nihilominus, orat. 2, aliàs 5, contra Arianos disertè tradit alio modo quàm per Incarnationem Verbi homines redimi potuisse. 2^o Quia rationem reddens loco objecto cur indecorum

fuisset homines non liberari, ait *infirmittatis Dei, non bonittatis majus fuisse argumentum, si nimirum opus quod fecerat destrui permisisset*. Ubi de quâdam bonittatis divinæ manifestatione loquitur, quam profectò sibi Deus operando conciliare non tenetur. Nec nos movere debet, quòd S. doctor hanc rationem valentiùs premat, neque enim insolitum est, graves convenientiæ rationes quandoque significantioribus verbis urgeri.

Obj. 2^o : S. Anselmus, lib. 1 *Cur Deus homo* capite 4, Incarnationis necessitatem ita probat; « Nonne satis necessaria ratio videtur.... quia « genus humanum, tam scilicet pretiosum opus « ejus omninò perierat; nec decebat ut quod « Deus de homine proposuerat penitùs annihilaretur; nec idem ejus propositum ad effectum duci poterat, nisi genus humanum ab ipso creatore suo liberaretur? » Audis ex S. Anselmo non decuisse ut homo lapsus non repararetur; atqui, juxta eundem hujusmodi indecentiâ necessitatem inducit; capite enim 10 istud principium generale statuit : « Sicut in « Deo quamlibet parvum inconveniens sequitur impossibilitas, ita quamlibet parvam rationem, si majori non vincitur, comitatur « necessitas. » Ergo, etc.

Richardus à sancto Victore, de Incarnatione cap. 8, necnon Guillelmus Paris. in libello de Causis *Cur Deus homo factus sit*, S. Anselmo planè consentiunt. Dist. majorem : Ex S. Anselmo non decuit consequenter ad aliquod decretum divinum ut homo lapsus non repararetur, concedo; in hypothesi solius lapsùs, nego. Jam observavimus quibusdam theologis videri hæc et alia similia sancti Anselmi dicta nullâ posse benignâ interpretatione emolliri, eumque in libris *Cur Deus homo*, ex professo docuisse, 1^o solâ hominis lapsi spectatâ conditione, simpliciter necesse fuisse eum à Deo reparari; 2^o non alio modo quàm per Incarnationem ipsi Deum subvenire potuisse. Contra Suarez, disp. 4, sect. 2, cardinalis Lugo, de Incarnat. disp. 2, sect. 2, n. 4 et alii, S. doctorem explicare conantur de necessitate consequente decretum aliquod divinum, aut de majori quâdam decentiâ et congruentiâ, quam per exaggerationem et figuram interdum impossibilitatem appellaverit. Nobis videtur simplicem et propriè dictam necessitatem Incarnationis in hypothesi reparationis hominis lapsi fuisse à S. Anselmo assertam; de quo argumento dicemus capite sequenti. Quod verò attinet ad reparationem ipsam de quâ nunc agitur, existi-

mamus eam à S. Anselmo non dici simpliciter necessariam in hypothesi solius lapsùs. Ita S. doctorem interpretatur Petavius, lib. 2 De Incarnatione, cap. 13, n. 5 et 10. Loquitur ergo S. Anselmus loco objecto de decentiâ quæ necessitatem inducat; sed hæc decentia, ut et illa necessitas reparationis generis humani, *exurgit*, inquit S. Bonaventura in 3 dist. 20, a. 1, q. 1, mentem sancti doctoris exponens, *ex stabilitate et immutabilitate divinæ dispositionis, quæ non opponitur libertati voluntatis, ac per hoc nec gratiæ, nec liberalitati*. Scilicet opinatus est S. Anselmus certum aliquem salvandorum numerum decreto divino ab æterno fuisse constitutum; ne verò libertati Angelorum qui priores ad gloriam fuerant destinati, vis inferretur, Deum permisisse ut eorum multi à salvandorum numero sese subtraherent, atque eundem voluisse istorum locum ab hominibus occupari. Vide cap. 16 et 18, lib. 1 *Cur Deus homo*; in quibus suam hanc doctrinam disertissimè S. doctor exponit. Jam verò censemus S. Anselmum cum ait decuisse et necessum fuisse hominem lapsum reparari, ad hoc decretum ruinas Angelorum per homines resarciendi respexisse. Quam interpretationem duo conjuncta planè comprobant. Primum est, necessitatem quæ Deo ex immobilitate decreti sui contingit, commemorari à S. doctore lib. 2, cap 4 et 5, atque ibidem ab eo exponi quomodò ejusmodi necessitas liberalitati et gratiæ non officiat. « Cum, inquit cap. 5, ipse (Deus) se sponte « necessitati benefaciendi subdit, nec invitus « eam sustinet, tunc utique beneficii gratiam « meretur majorem.... Dicamus tamen quia « necesse est ut bonitas Dei propter immutabilitatem suam perficiat de homine quod incœpit, quamvis totum sit gratia, quod facit. » Alterum est, S. Anselmum ipsis verbis objectis ad decretum seu propositum divinum spectare, et ex eo deducere decentiam et necessitatem reparationis hominis lapsi. Sic enim loquitur : *Nec decebat, ut quod de homine proposuerat, annihilaretur*. Audis ideò non decuisse hominem lapsum non reparari, quia nisi erectus fuisset, *quod Deus de homine proposuerat*, omni suo effectû caruisset. Cum ergo ex cap. 16 et 18 jam laudatis, habeamus juxta S. Anselmum, homines Angelis à gratiâ et ab æternâ salute lapsis supplendis fuisse à Deo destinatos, manifestum est ab ejusmodi destinatione et decreto decentiam et necessitatem de quibus loco objecto sermo fit, secundum S. doctoris mentem esse repetendas.

Richardo à S. Victore idem sensus adhuc facilius et clarius accommodatur. Guillelmus Parisiensis nobis planè consentit, adeò ut mirum sit ab aliquibus ipsi adscriptam fuisse opinionem oppositam.

Obj. 3^o : Deus omittere non potest quod aliquà in hypothesei reipsà existente bonitati suæ est reverà conveniens; atqui juxta primam conclusionis partem bonitati et misericordiæ Dei conveniens fuit hominem lapsum redimi; ergo, etc. Dist. maj. : Quod est bonitati suæ conveniens intrinsecè, id est, quod ejus bonitatem intrinsecè perficit, aut sine quo eam negare ipse censetur, concedo; quod est conveniens extrinsecè tantum, id est, quod bonitati divinæ afferet decorem aliquem extrinsecum quo ipsa non perficitur, nego. Reparatio generis humani exprimendæ bonitati et misericordiæ divinæ apta fuit, ut diximus; sed 1^o, ejusmodi decore extrinsecò hoc attributum non indiget, quemadmodum capitibus 1 et 2 hujusce Disputationis fusè explicatum et inculcatum est; 2^o hunc decorem extrinsecum Deus agendi rationi suæ erga hominem non tribuendo, non ideo bonitatem et misericordiam suam negasset; licet enim ex bonitate et misericordiâ donis suis gratuitis peccatori obviam ire, ipsi gratiam quâ convertatur largiri, et veniam concedere possit, attamen ejusmodi virtutes id fieri non necessariò exigunt, exercitium earum liberum est; nec illis quidquam oppositi Deus egisset, si loco effectuum hujusmodi attributa exprimentium, alios produxisset ejus duntaxat justitiæ characterem ferentes.

CAPUT IV.

De convenientiâ aut necessitate Incarnationis in hypothesei reparationis generis humani.

OMNES theologi post S. Thomam inter se consentiunt Incarnationem non tantum in se sumptam, sed etiam ratione modi quo peracta est, fuisse reparando generi humano aptissimam et convenientissimam. Sed præcipuè in disceptationem cadit, utrum ad ejusmodi reparationem hoc mysterium simpliciter necessarium fuerit; seu, quod eodem recidit, an citra debitam et condignam pro peccato satisfactionem, Deus homini lapso condonare potuerit. Ferè omnes theologi tanquam indubitatum statuunt Deum in exercendâ justitiâ suâ ita esse liberum, ut, juribus propriis cedens, potuerit sine condignâ satisfactione pro peccato sibi persolutâ, ac proindè sine Incarnatione genus humanum liberare. Suarez, disp. 4, sect. 2,

hanc doctrinam pronuntiat ita esse certam, *ut negari non possit sine temeritate et aliquo fidei incommodo*. Opinionem oppositam ait Cardinalis de Lugo disp. 2, de myst. Incarn. sect. 1, n. 6, *ad errorem accedere*; nec desunt qui adhuc gravioribus censuris hinc utantur. Docuit tamen S. Anselmus simpliciter necessariam fuisse Incarnationem ad hominem liberandum; quia non potuit Deus, illæsis justitiæ suæ juribus, eum salvum facere, quin pro ejus offensâ plena satisfactio exhiberetur. Vide inprimis cap. 12, lib. 1 *Cur Deus homo*, ubi S. doctor disertè significat tam Deum non potuisse sine satisfactione condignâ remittere peccatum, quàm non potest velle mentiri, ratus utrinque parem adfuturam indecentiam intrinsecam quæ in Deum cadere non potest. Eundem sensum nonnulli affingunt quibusdam veteribus Patribus quorum testimonia mox referemus. Turretinus, celebris è Calvinistarum societate, in Academiâ Genevensi theologiæ professor, in Institutionibus suis Theologicis, et alii complures ejusdem religionis scriptores idem dogma tuentur, quod ad Socinianos satisfactionum Christi necessitatem inficientes refellendos magis idoneum judicant. Videtur quoque inter recentiores theologos catholicos clarissimus Turnelius hanc opinionem suam facere, qui etiam scribit
« præsentem quæstionem ex earum numero
« esse quæ salvâ fide in utramque partem de-
« fendi possunt, et theologicâ ratione potius
« quàm auctoritate dirimendæ sunt. »

Observa autem istius posterioris opinionis defensores aliquando monere se tantum de potentiâ Dei ordinariâ loqui, adeò ut fateantur Deum ex potentiâ absolutâ et extraordinariâ posse, remittendo peccatum, condignam pro eo satisfactionem non exigere. Verum ii nomine potentiæ Dei absolutæ et extraordinariæ, hinc intelligant necesse est, potentiam Dei in se sumptam, abstrahendo ab ejus attributis moralibus, et in ordine etiam ad ea quæ justitia Deo essentialis ab eo fieri vetat; quæ certè potentia, fatentibus iisdem theologis, in Deo nulla est, et libertati non sufficit, siquidem illud impossibile est à Deo oriri, quod aliquod necessarium ejus attributum, nempe ipsius justitia ab eo oriri non permittit. Recole quæ superius in simili argumento dicta sunt capite 1 hujus Disputationis. Quod si nomine potentiæ ordinariæ intelligerent, ut intelligi debet, potentiam quæ juxta ordinem à Deo constitutum exercetur; nomine verò potentiæ extraordinariæ significarent potentiam divinam in

se sumptam, abstrahendo tantum ab omni hypothesi contingenti, et à decretis liberè à Deo stabilitis; tunc distinctionem inter potentiam ordinariam et extraordinariam in præsentī negotio, ut advertimus, adhibendo, ad priorem opinionem mox explicatam de Incarnatione in hypothesi reparationis generis humani simpliciter non necessariā redirent, et à pervulgatā theologorum doctrinā non recederent. Omnes enim concedunt, quod adversus Socinianos Disput. septimā evincemus, Deo in præsentī hypothesi constantem esse voluntatem puniendi peccati, huiusque sine satisfactione accuratā non remittendi.

CONCLUSIO. Incarnatio tum in se sumpta, tum ratione modi quo peracta est, medium fuit reparando generi humano maximè conveniens. Ea tamen etiam quoad substantiam spectata, huic operi simpliciter necessaria non fuit.

Probatur prima pars, nimirum Incarnationem in se sumptam fuisse medium reparando generi humano maximè conveniens. Enimverò Deus per Incarnationem hominem liberando manifestavit mirum in modum attributa sua, ut jam supra dictum est, nempe bonitatem, liberalitatem et misericordiam suam, tum justitiam, sanctitatem, sapientiam, omnipotentiam, etc.

Probatur secunda pars, illud scilicet mysterium peractum fuisse modo ad hominum reparationem congruo. Atque illud patet quidem ab effectu; Deus enim qui hoc modo voluit Incarnationem peragi ad homines salvandos, profectò non sine rationibus sapientiā suā et tanto mysterio dignis, talem modum selegit. Quapropter, etsi singulorum non possent à nobis infirmis mortalibus causæ sufficientes assignari, dubitandum tamen non esset quin reipsa ejusmodi causæ existerent.

Verum paucis exponamus præcipuas rationes quibus mysterii illius modum convenientem fuisse SS. Patres ostendunt. 1° Convenientius fuit ut Filius incarnaretur, et ad liberandos homines veniret, quàm Pater aut Spiritus sanctus. Magis enim decebat 1° ut idem, qui est Filius Dei ab æterno, fieret in tempore filius hominis, ne scilicet duo in SS. Trinitate nuncuparentur filii, alter æternus, alter temporalis, et filii nomen ad alterum transiret, qui non fuisset æternā nativitate filius. Ita ratiocinantur Gennadius, de Dogmatibus Eccles. cap. 2; S. Fulgentius lib. de Fide ad Petrum, cap. 2; S. Anselm. lib. de Fide Trinit. et de Incarnat. cap. 5; S.

Bernardus, serm. 2 de Annuntiatione; Hugo Victor., etc. Decebat 2° ut Verbum quod per appropriationem omnia fecisse dicitur Joan. 1, v. 3, hominum quorum fuit conditor, esse etiam liberator et reparator. Ita S. Athanasius lib. de Incarn. n. 7 et 8; S. Hilarius in Psal. 66, ad vers. 21; S. Cyrillus Alex. Glaphyrorum lib. 1, etc. Decebat 3°, ut Verbum quod vi suæ originis est *imago Dei invisibilis*, imaginem Dei restituerit, quam in homine peccatum deleverat. Ita S. Athanasius, loco mox laudato; S. Cyrillus Alex. lib. 1 in Joannem; S. Joan. Damasc. lib. 4 de fide orthodoxā, cap. 4; Richardus à S. Victore, de Incarnat. cap. 10, etc. Decebat 4°, *incarnari* Filium qui est *Dei sapientia*, ut *deleteretur hominis insipientia*, verba sunt Guitmundi episcopi Aversani in Confessione de S. Trinitate, etc. Denique *erat et decens*, inquit Hugo Victorinus, Summæ sententiarum tract. 1, cap. 15, *ut sicuti per sapientiam suam Pater mundum fecit, ita per eandem redimeret*. Itaque magis conveniens fuit Filium ad liberandos homines incarnari quàm vel Patrem vel Spiritum sanctum. 2° Congruens etiam fuit ut Filius homines liberaturus veniens, homo fieret. *Sicut per unum hominem*, inquit S. Paulus, Rom. 5, v. 12 et 15, *peccatum intravit in mundum, et per peccatum mors, et ita in omnes homines mors pertransiit, in quo omnes peccaverunt... multò magis gratia Dei et donum in gratiā unius hominis Jesu Christi in plures abundavit*. Hinc S. Leo, serm. 20, aliàs 1 de Nativitate, cap. 1: « In eo conflictu, inquit, pro nobis inito, magno et mirabili æquitatis jure certatum est; dum omnipotens Dominus cum sævissimo hoste, non in suā majestate, sed in nostrā congreditur humilitate. » 3° Decens fuit ut Filius divinus homines redempturus, ex muliere Virgine carnem sumeret et nasceretur. « In Virginem enim adhuc Evam (ait Tertullianus lib. de Carne Christi, cap. 17) irrepererat verbum ædificationis mortis; in Virginem æquè introducendum erat verbum extractorium vitæ, ut quod per ejusmodi sexum abierat in perditionem, per eundem sexum redigeretur in ordinem. » Et S. Augustinus lib. de Agone christiano, cap. 22, n. 24: « Dominus Jesus Christus, inquit, qui venerat ad homines liberandos, in quibus et mares et fœminæ pertinent ad salutem, nec mares fastidivit, quia mare suscepit, nec fœminas, quia de fœminā natus est. Huc accedit magnum sacramentum, ut quoniam per fœminam nobis

« mors acciderat, vita nobis per foeminam nasceretur. » 4° Eidem fini, nempe saluti hominum propter quam Filius Dei venit, consentaneum fuit, carnem nostræ similem, et eisdem (peccato excepto) obnoxiam miseriis ab eo assumi. Namque 1°, voluntariâ et summâ sui demissione, quam ejusmodi naturâ à se assumptâ Filius divinus exercuit, aptissimum superbiæ hominum, quæ maximum eorum malum est, remedium attulit. « Ne ergo (inquit S. Augustinus in Psal. 33, enarratione 1, n. 4) dedignaretur homo imitari hominem humilem, Deus factus est humilis, ut vel sic superbia generis humani non dedignaretur sequi vestigia Dei. » Et alibi : « Quæ superbia sanari potest, si humilitate Filii Dei non sanatur ? » 2° Deus assumens naturam nostræ similem exinanivit semetipsum, inquit Apostolus Philip. 2, v. 7 ; hoc autem opportunum fuit. Nempe, ut advertit Richardus Victorinus, de Incarnat. capitulo 8, « quando homo præsumpsit contra Deum, facta est elatio de imo ad summum. Oportuit ergo ut ad expiationis remedium fieret humiliatio de summo ad imum ; sed hoc omninò non potuit, nisi aliâ quâ in Trinitate personarum. » 3° Christus nobis similis factus, ut ad eum cum fiduciâ accedamus nos piè movet et compellit. *Non enim habemus Pontificem qui non possit compati infirmitatibus nostris, tentatum autem per omnia pro similitudine, absque peccato.* 4° Tandem hinc etiam factum est ut dæmonem vinceret et nos sanaret per naturam ipsam quæ victa fuerat et sauciata. Ita S. Greg. Nyss. orat. catechet. cap. 27, S. August. L. 13 de Trinit. cap. 18, S. Leo serm. 20, aliàs 2, de Navitate, etc. 5° Ad hominum redemptionem et salutem illud quoque accommodatum fuit, quòd Filius Dei, factus homo, pauperem vitam egerit, vilem conditionem elegerit, contumeliis, et suppliciis se offerret ; ut scilicet, ab hominibus ejus exemplo institutis, *neque in bonis terrenis quæreretur felicitas, neque in malis sustinendis infelicitas timeretur.* Verba sunt S. Augustini lib. de Catechizandis rudibus, cap. 22, n. 40, qui lib. de Agone christiano, cap. 11, n. 12. hæc etiam præclara profert : « Nolite amare temporalia, quia si benè amarentur, amaret ea homo quem suscepit Filius Dei. Nolite timere contumelias, cruces et mortem, quia si nocerent homini, non ea pateretur homo quem suscepit Filius Dei. » 6° Decorum fuit ut morte suâ nos redimeret, tum ut *mors morte perimeretur*, ut Oseam cap. 13, v. 14,

imitatus loquitur S. Greg. Nazianz. Orat. 30, tum ut maximum daret hominibus amoris sui argumentum, sicque eos ad amorem divinum magis accenderet ; tum ut injuriam Deo per peccatum illatam abundantius compensaret, gravitatem peccati tantâ pœnâ digni significantius declararet, et nos ab eo perpetrando validius avocaret. Pariter mortem illam affixus ligno crucis oppetere debuit, ut, quemadmodum ab Ecclesiâ canitur, dæmon, *qui in ligno vincebat, in ligno quoque vinceretur.* 7° Congruum fuit ut magistrum et doctorem hominum ageret, quippe qui viam salutis nobis monstraturus venerat. Decuit ut Apostolos toto orbe mittendos seligeret, cosque rudes et illiteratos ; inde enim Dei virtus, gratiæ potentia atque fidei christianæ veritas maximè in admirabili religionis propagatione enituerunt. 8° Opera prodigiosa à Verbo incarnato fieri oportuit, tum quia necesse fuit ejus mysteria et doctrinam prodigiis confirmari et suaderi, tum quia cum esset Deus et homo simul, ostentis admirandis manifestari debuit ejus Divinitas, dum voluntariis demissionibus se esse hominem ostendebat, ac sese pro nostrâ salute immolabat. 9° Tandem quod ad tempus, quo incarnatio peracta est, attinet, novimus etiam quosdam fines optimos quibus consentaneum fuit versùs ipsa mundi exordia non incarnari Dei Filium, sed tantum in plenitudine temporum. 1° Id videtur postulasse tanti mysterii dignitas. « Per multam seriem temporum et annorum, inquit S. August. tract. 31 in Joannem, n. 5, prædicendus fuit. Non enim aliquid parvum venturum fuit. Diù fuerat prædicendus, semper tenendus. Quantò major judex veniebat, tantò præconum longior series præcedebat. » 2° Lex evangelica, quam Christus erat instituturus, tantæ perfectionis est ut opportunum fuerit homines per longum tempus ad eam præparari. Hanc rationem post Eusebium, lib. 8 Demonstrat. evang. affert S. Th. parte 3, q. 1, a. 5. 3° Tanti doni dilatio, atque antiquior et uberior ejus prædicatio fidei nostræ excitandæ et augendæ apta fuit, dum interim potuerunt veteres fide in Incarnationem futuram à peccatis liberari et salutem assequi. « Cessent illorum querelæ, inquit S. Leo serm. 22, aliàs 3, de Nativit. cap. 4, qui impio murmure divinis dispensationibus obloquentes, de Dominicæ nativitatis tarditate causantur, tanquàm præteritis temporibus non sit impensum, quod in ultimâ mundi ætate est gestum. Verbi Incarnatio hoc con-

« tulit faciendâ, quod facta; et sacramentum
 « salutis humanæ in nullâ unquàm antiquitate
 « cessavit... Sapientia verò et benignitas Dei
 « hâc salutiferi operis morâ capaciores nos suæ
 « vocationis effecit; ut quod multis signis,
 « multis vocibus, multisque mysteriis per tot
 « fuerat secula prænuntiatum, in his diebus
 « Evangelii non esset ambiguum; et nativitas,
 « quæ omnia miracula, omnemque excessura
 « erat mensuram, tantò constantiorem in nobis
 « gigneret fidem, quantò prædicatio ejus et
 « antiquior præcessit et uberior. » 4^o Christus
 redemptor et salvator non priùs venire debuit,
 quàm homines fidem tanti mediatoris quâ sal-
 vari potuissent, negligentes et posthabentes,
 infirmæ rationis suæ cæcitatem et naturæ suæ
 virium in quibus malè confidebant imbecillita-
 tem, infaustâ experienciâ agnovissent. Hanc
 doctrinam cujus fusior explicatio ad hunc lo-
 cum non pertinet, passim tradunt variis in
 locis, præsertim SS. Augustinus et Thomas
 quam ab Apostolo mutuati sunt Act. 14, v. 15,
 Rom. 7, v. 8 et seqq., etc.

Jam verò, si conveniens fuit Incarnationem
 differri, ergo peragi debuit tempore quo per-
 acta est, nempe in plenitudine temporum;
 namque ad usque finem mundi eam procrastina-
 ri non decuit, aliàs paucissimis hominibus
 tunc superstitionibus tantum beneficium profuis-
 set. Sunt procul dubio et aliæ dilati hujus my-
 sterii rationes Deo cognitæ, ordini gratiæ,
 quem ipse instituere voluit connexæ, et nobis
 mortalibus, *per fidem nunc ambulantes*, et non
per speciem, absconditæ. Quas S. Augustinus
 in Epistolâ 102, aliàs 49, ad *Deo gratias*, quæst.
 2, n. 14, generatim indicat, scribens « tunc
 « voluisse hominibus apparere Christum et
 « apud eos prædicari doctrinam suam, quando
 « sciebat et ubi sciebat esse, qui in eum fue-
 « rant credituri; » supple, ex auxilio gratiæ
 divinæ hominis ad credendum moventis, ut
 ipse explicat S. August., *l. de Prædest. sancto-
 rorum*, cap. 9, et lib. 2 *Retractationum*,
 cap. 31.

Probatur tertia pars conclusionis, scilicet
 Incarnationem etiam quantum ad substantiam
 spectatam, reparando generi humano simpli-
 citer necessariam non fuisse : 1^o ex Scripturis
 in quibus Dei omnipotentia magnoperè prædi-
 catur, Etsi enim inde colligi nequeat Deum ea
 posse producere quæ planè repugnant, attamen
 hinc sequitur cavendum ne id Deo impossibile
 esse dicatur quod manifestam repugnantiam
 non involvit. Atqui Deum homini peccatori

gratiam et veniam concedere citra satisfactio-
 nem condignam, id est, vel gratis peccatum
 condonando, vel qualemcumque pro offensâ
 satisfactionem ratam spontè habendo, profectò
 non repugnat manifestè. Imò verò quis nega-
 verit Deum, ut creavit hominem solo nutu, ita
 solo nutu posse absolutè peccatorem immutare
 eumque gratiæ sanctificantis infusione jus-
 tum sine morâ efficere ? 2^o Auctoritate sancto-
 rum Patrum.

S. Athanasius *Oratione* 2, aliàs 3, *contra Ari-
 nos*, n. 68 : « Etiam, inquit, sine ullo ejus (Sal-
 « vatoris) adventu poterat Deus tantummodò
 « dicere, atque ita solvere maledictionem. Ve-
 « rùm attendere, oportet quid sit hominibus
 « utile, non autem quid in omnibus possit
 « Deus. » S. Gregorius Nazianz. *Orat.* 9 : « Hæc,
 « ait, Salvator fecit, idque cùm voluntate solâ
 « nobis, utpote Deus salutem afferre posset,
 « quemadmodum et universam rerum machi-
 « nam solo jussu atque imperio procreavit. »
 S. Augustinus lib. de Agone christiano, cap. 11,
 n. 12 : « Sunt stulti, inquit, qui dicunt : Non
 « poterat aliter sapientia Dei homines liberare, nisi
 « susciperet hominem, et nasceretur de femina,
 « et à peccatoribus omnia illa pateretur. Quibus
 « dicimus : Poterat omninò, sed si aliter face-
 « ret, similiter vestræ stultitiæ displiceret. »
 Et lib. 13 de Trinitate, cap. 10, n. 13 : « Eos,
 « inquit, qui dicunt : *Itane Deo defuit modus
 « alius quo liberaret homines à miseriâ mortali-
 « tatis hujus, ut unigenitum Filium Deum sibi
 « coæternum, hominem fieri vellet?.....* Pa-
 « rùm est sic refellere, ut istum modum.....
 « asseramus bonum et divinæ congruum digni-
 « tati; verùm etiam ut ostendamus non alium
 « modum possibilem Deo defuisse, cujus potes-
 « tati cuncta æqualiter subjacent. » Audis præ-
 ter Incarnationem, alium fuisse modum sal-
 vandi homines possibilem Deo, idque esse
 indubitatum, quia potestati Dei *cuncta æqua-
 liter subjacent*; ergo ex S. doctore, licet modus
 salvandi homines per Incarnationem fuerit bo-
 nus et divinæ congruus dignitati, alter tamen
 perinde possibilis est. S. Cyrillus Alexandrinus
 apud Euthymium tit. 13 : « Ne corpore qui-
 « dem indiguit Deus Verbum cùm nullâ re
 « egeat, et jussu solo potuit salutem nostram
 « peragere. » Theodoretus serm. 6 contra gen-
 tes : « Erat illi facillimum, inquit, vel citra
 « carnis involucrum, hominum salutem per-
 « ficere, solâque voluntate mortis potestatem
 « dissolvere. » S. Leo magnus sermone 21,
 aliàs 3, de Nativitate, cap. 3 : « Verax, inquit,

« misericordia Dei, cum ad reparandum humanum genus infallibiliter ei multa suppeterent, hanc potissimum consulendi viam elegit, quâ ad destruendum opus diaboli, non virtute uteretur potentiae, sed ratione justitiae. »

Concinunt alii multi, quorum testimonia exscribere longius foret. Hilarius Arelatensis homil. 4 de Paschate; S. Greg. Magnus, lib. 20 Moral., cap. 26; S. Joan. Damascenus, lib. 3, cap. 18; S. Bernardus, sermone 11 in Cantica, et Tractatu de Erroribus Abælardi, olim. Epist. 190, ad Innocent. summum pontificem cap. 8, T. 1, pag. 654; Guitmundus Aversanus, in Confessione, T. 18 Bibl. PP. Lugd.; Guillelmus Parisiensis, in libello de Causis cur Deus homo, etc. Adde hanc esse unanimem Petri Lombardi, in 3 dist. 20; Alexandri Alensis, 3 parte, quæst. 1, membro 3, art. 4; S. Thomæ 3 p., q. 1, a. 2; S. Bonaventuræ ad dist. 20 lib. 3 Sentent.; Scoti, aliorumque ferè omnium theologorum sententiam, quorum plures, ut jam diximus, opinionem adversam non levi censurâ perstringunt. Vide cardinalem de Lugo, de Incarnationis mysterio, disp. 2, sect. 1, n. 6.

3^o Hâc ratione theologicâ : Incarnatio Verbi in hypothesi liberationis hominum ideò diceretur simpliciter necessaria, quia Deus peccatum dimittere non posset quin pro injuriâ sibi à peccatore illatâ condignam satisfactionem exigeret; atqui citra ejusmodi condignam satisfactionem Deus peccatum condonare potuit. Nam punitio vel condonatio peccati est opus ad extra circa quod proinde Deus liber est nisi adsit aliqua repugnantia vel ex parte objecti, vel ex parte hominis, vel ex parte Dei ipsius. Atqui 1^o, peccatum condonari aut poena mitiori puniri ratione sui non repugnat, ut omnes fatentur. 2^o Illud idem non repugnat ex parte hominis peccatoris, cum è contra ejusmodi remissio poenæ gratia sit maxima. 3^o Non repugnat ex parte justitiæ divinæ; in eo enim non consistit justitia divina quòd teneatur à peccatore poenas offensæ proportionatas repetere, sed quòd eas repetere possit. Distinguendum hic inter justitiam divinam et ejus exercitium. Deus est naturâ sanctus et justus; necessariò amat ordinem; necessariò peccatum quod ordini oppositum est, aversatur; atque peccatori ut peccatori non tantum benè velle non potest, sed etiam ipsi, sub hoc respectu, necessariò malè vult donec mutetur, potestque ab ipso poenas æternum repetere. At, cum

peccator alios habeat respectus quibus Deo odibilis non est, cum nempe sit ejus creatura, gratiæ recipiendæ idonea, poenitentiae et sanctificationis capax; non repugnat Deum misericordem velle donis suis eum immeritum prævenire et restaurare, nullâ etiam, vel saltem mitiori et temporaneâ tantum poenâ ipsi inflictâ. Deus ejusmodi gratuitâ condonatione, non exprimeret quidem justitiam suam. At 1^o hanc perfectionem non negaret, quippe illa non indiget exprimi, et præterea, cum justitia Dei vindicativa, de quâ agimus, tum in potentia poenas à sontibus debitas repetendi, tum in impossibilitate iis parcendi quamdiù à poenitentia aversi sunt, tota consistat; gratuita poenæ remissio peccatori per gratiam justificato concessa huic attributo non esset opposita. 2^o Decore aliarum perfectionum divinarum non careret hæc agendi ratio; non tantum bonitas et misericordia Dei eâ exprimerentur, sed etiam ejus sanctitas; quatenus scilicet, ut Deus odio prosequi peccatores desineret et eis malè velle, hos justificari oporteret. Ergo nec justitiam suam, nec alia attributa sua Deus læsisset, si voluisset cedere juri suo, nec condignam pro peccato exigere satisfactionem. Et verò concedunt universi, et ex Scripturis certò colligitur, ut aliquando liquebit, præmerâ suâ benignitate et misericordiâ Deum Incarnationem in remedium peccati destinasse: imò poenas ab hominibus peccatoribus debitas in Christum sponsores nostrum transferri liberè consensit; adeò ut ex rigore justitiæ potuisset satisfactiones condignas sibi à Christo pro nobis oblatas non recipere. Jam verò, si in gratiam peccatorum, ut salutem, consequi possent, Christum loco nostro substitui gratis voluerit; ergo antecederet ad satisfactiones Christi potuit quidquam in gratiam peccatorum decernere; quidni igitur potuisset peccata ipsis condonare gratis, aut saltem sine satisfactione condignâ?

SOLVUNTUR OBJECTIONES. — Quæ adversus primam conclusionis partem opponi possunt, necnon aliqua secundam impetentia jam capitibus 2 et 3 hujus Disputationis præoccupavimus. Pauca supersunt quæ solutione indigent.

Obj. contra secundam partem conclus. 1^o: Apostolus, 1 Cor. 1, v. 21, mysterium Crucis vocat *stultitiam prædicationis*. 2^o Nonne indecens est Deum summum in infantis corpuseculo contineri, eumque nasci, pati et mori? Hinc Apostolus, Philip. 2, v. 7, lateri cogitur Deum

seipsum Incarnatione *exinanivisse*. 3^o Eatenus Incarnatione salvamur, quatenus Christus innocens pro nobis impiis morti traditus est, quo nihil à justitiâ et æquitate alienum magis. 4^o Deus posito hoc mysterio per Deicidium à Judæis commissum nobis salutem conferre voluisset; atqui medium ejusmodi turpe et iniquum fuisset; ergo.

Ad primum, distingo : Appellat *stultitiam prædicationis* alludens ad judicium perversum, quod de hoc mysterio ferebant gentiles et Judæi, concedo; reipsâ, nego. Continenter enim S. Paulus subjungit v. 23, 24 et 25 : *Nos autem prædicamus Christum crucifixum : Judæis quidem scandalum, gentibus autem stultitiam; ipsis autem vocatis Judæis atque Græcis, Christum Dei virtutem, et Dei sapientiam; quia quod stultum est Dei, sapientius est hominibus, etc.* Ad secundum, distingo quoque : Indecens est Deum in infantis corpusculo contineri, seu in eo coarctari; indecens est imò planè absurdum est Deum in propriâ naturâ nasci, pati, mori, concedo; indecens est Deum infantis corpusculo ita uniri ut eo non coarctetur, vel eum in naturâ assumpta nasci, pati, etc., nego. Natura humana Christi tota unitur toti naturæ divinæ in personâ Verbi, sed illa unio in dimensionum æqualitate et convenientiâ non consistit, neque ejusmodi nexu quidquam detrahitur immensitati quâ Deus, substantiâ suâ infinitè perfectâ, omnia pervadit et omnibus præsens est. Pariter nativitas, passio, mors et alia quæcumque naturam humanam à Verbo assumptam afficiunt, nullo pacto in naturâ divinâ ut in subjecto recipiuntur, nec ullâ ratione Deum immutant. Enimverò ambæ illæ naturæ in Verbo arctissimè uniuntur sine ullâ confusione aut mixtione, servatâ earum distinctione et salvis utriusque proprietatibus ac operationibus; unde, ut observat S. Leo, serm. 20, aliàs 1 de Nativitate cap. 2 : « Nec in inferiorem naturam consumit glorificatio, nec superiorem minuit assumptio. Tota est in majestate humilitas, tota est in humilitate majestas. » Sicut ex eo non deprimitur majestas divina, quòd locis etiam sordidissimis præsens sit, nec radius solaris conspurcatur quòd in lutum incidat; multò magis nec Filius Dei vilescit quòd sibi naturam humanam hypostaticè conjunxerit, et quæ humanitatis propria sunt, per eam operetur. Cæterum, jam superius observavimus quantum in iis omnibus agendis ipsa Christi resplenduerit Divinitas. Cum autem Philipp. 2, Apostolus ait Filium

Dei se Incarnatione *exinanivisse*, non significat eum à majestate divinâ excidisse, sed tantum 1^o naturam ab eo in hoc mysterio assumptam, utpote finitam et creatam, esse rem nullam si cum dignitate et perfectione Divinitatis conferatur; 2^o hunc per ejusmodi naturam stupendos obedientiæ et demissionis actus pro nostrâ salute elicuisse. Ad tertium, adhuc distingo : A justitiâ et æquitate alienum est innocentem pro sontibus neci tradi, ubi se pro sonte vadem et sponsorem liberè non constituit, concedo; ubi dominium vitæ suæ habens seipsum vadem pro sonte constituit, seseque sponte pro eo neci offert, nego. Hæc ubi de satisfactione Christi uberius explicabuntur. Ad quartum, nego majorem. Neque ut finem, neque ut medium quo salus posset hominibus conciliari, Deus voluit Deicidium quod à Judæis patratum est. Nequaquam prædestinavit Judæos ad Christum occidendum, ut eo scelere tanquam medio salvandorum hominum uteretur. Sed ita sapiens et potens est ut ex tanto crimine bonum maximum eruere noverit. Scilicet prævisâ Judæorum malitiâ, voluit ut mors, quam Christo intulerunt, quatenus ab eo voluntariè pro nobis tolerata, salutis causam hominibus afferret. Mors igitur Christi fuit ex parte Judæorum infandum scelus Deo et hominibus detestabile et omni poenâ dignum; sed ex parte Christi sponte pro salute nostrâ se immolantis, fuit opus infiniti pretii, summæ erga Deum religionis et immensæ erga nos charitatis; ex parte Dei, opus summæ misericordiæ simul et justitiæ, necnon infinitæ dignitatis et majestatis. Vide S. Bernard. Tract. de Erroribus Abælardi, olim Epist. 90, cap. 8, n. 21.

Obj. rursus adversus eandem partem. Charitatis est beneficia accelerare, unde Proverb. 30, v. 38, legitur : *Ne dicas amico tuo : Vade et revertere, cras dabo tibi, cum statim possis dare.* Ergo conveniens non fuit Incarnationem hominibus summè necessariam per tot secula differri. 1^o Dist. ant. : Charitatis est accelerare beneficia, quando illis quibus conferuntur, prodest acceleratio, concedo; quando noceret, nego. Jam docuimus juxta sanctos Patres Incarnationis dilationem fuisse generi humano proficuum. Si summum remedium peccato destinatum, Incarnatio scilicet et mors Christi, hominibus ab exordio rerum concessum esset, fortè positâ præsentī rerum constitutione, à genere humano superbiēte fuisset contemptum, atque ita hominum plaga insēnabilis evasisset, « Si fortè inquiritis, ait Theodoretus

« sermone 6 de Providentiâ Dei, cur non
 « prius olim hoc præstiterit opifex mundi;
 « medicos etiam accusate, quòd acriora reme-
 « dia in ultimum tempus differunt; levioribus
 « siquidem prius, usi, potentiora ultimo loco
 « adhibent. » 2^o Dist. consequens: Si habeatur
 ratio non solùm bonitatis et misericordiæ divi-
 næ, sed etiam aliorum attributorum, nego.
 Si habeatur ratio solius charitatis et misericor-
 diæ Dei, subdistinguo: Si Incarnationis virtus
 applicari non potuerit antequàm illud myste-
 rium perageretur, concedo; si virtus Incarna-
 tionis præteritis temporibus potuerit per fidem
 applicari, nego. Itaque 1^o, etsi Incarnatio maxi-
 mum sit Dei donum hominibus collatum, attamen,
 cùm de ejusmodi mysterii convenientiâ inquiri-
 tur, non habenda est solius divinæ mi-
 sericordiæ et charitatis erga creaturas ratio.
 Ad reliqua etiam ejus attributa attendendum
 est, quæ hujus doni dilatione potuerunt ex-
 primi. V. g., justitiam suam, sanctitatem et
 odium peccati ab homine commissi Deus Incar-
 nationem differendo, magis expressit, quàm si
 tantum munus et uberes gratias ipsi annexas
 illicò concessisset. 2^o Virtutem Incarnationis et
 mortis Christi fide sibi veteres applicare potue-
 runt, adeò ut licèt nec lex naturæ, nec ipsa
 lex Mosaica de se ullam vim benè agendi con-
 ferrent, attamen à mundi origine Deus generi
 humano providerit; conferens scilicet intuitu
 meritorum Christi auxilia salutis, quæ gratis
 post Incarnationem concessis minùs quidem
 affluerunt, sed tamen non fuerunt nulla. Hinc
 Apocal. 13, v. 8, Christus dicitur *Agnus occisus*
ab origine mundi. Atque illud est totius tradi-
 tionis dogma quod inprimis S. Augustinus et
 ejus discipuli passim inculcant. « Incarnatio
 « (inquit S. Leo serm. 21, aliàs 3, de Nativit.
 « cap. 3) hoc contulit facienda, quod facta; et
 « fundamentum salutis humanæ in nullâ anti-
 « quitate cessavit. Quod prædicaverunt Apos-
 « toli, hoc annuntiaverunt Prophetæ, nec serò
 « est impletum quod semper est creditum....
 « Non itaque novo consilio Deus rebus huma-
 « nis, nec serà miseratione consuluit; sed à
 « constitutione mundi unam eandemque om-
 « nibus causam salutem attulit. Gratia enim
 « Dei quâ semper est universitas justificata
 « sanctorum, aucta est Christo nascente, non
 « cœpta. Et hoc magnæ pietatis sacramentum,
 « quo totus jam mundus impletus est, tam po-
 « tens etiam in suis significationibus fuit, ut
 « non minùs adepti sint, qui in illud credidere
 « promissum, quàm qui suscepere donatum. »

Obj. adversus tertiam conclusionis partem,
 plura SS. PP. testimonia, quibus id effici vide-
 tur, sine condignâ satisfactione, ac proinde
 sine Incarnatione homines non potuisse libe-
 rari. Multa ejusmodi loca refert Petavius, lib.
 2 de Incarnat. cap. 12 et 13; consule: aliqua
 exhibere sufficiet. S. Irenæus, lib. 3, cap. 18,
 aliàs 20, n. 7. « Nisi homo, inquit, conjunc-
 « tus fuisset Deo (per Incarnationem), non po-
 « tuisset particeps fieri incorruptibilitatis. »
 S. Athanasius, Orat. 3, aliàs 4, contra Aria-
 nos, n. 33: « Nisi, inquit, quæ propria sunt
 « carnis, Verbi esse dicerentur, ab his homo
 « non penitus fuisset liberatus. » Adhuc signi-
 ficantiùs loquitur L. De Incarnatione Verbi
 Dei, n. 7, pag. 53. S. Augustinis, serm. 174,
 aliàs 8, de Verbis Apostoli, n. 1: « Non libe-
 « raretur genus humanum, nisi sermo Dei di-
 « gnaretur esse humanus. » Et sermone 14 de
 tempore, nunc inter rejectos ad Append. 193:
 « Nullum esset salutis remedium, nisi Christus
 « adveniret è cœlo. » S. Cyrillus, dialogo de
 Incarnatione Unigeniti: « Apprehendit, inquit,
 « Deus.... semen Abraham, sicut scriptum est.
 « Ita enim et non aliter, genus ad perniciem
 « devolutum instaurandum erat. » S. Leo Ma-
 gnus, serm. 50, aliàs 1, de Passione Domini,
 cap. 2: « Talibus, ait, vinculis tenebamur
 « obstricti, ut nisi per hanc opem non posse-
 « mus absolvi. » Denique S. Anselmus, in
 opere, cui titulus: Cur Deus homo, ex pro-
 fesso probat præsertim lib. 1, cap. 12, Incar-
 nationem fuisse medium reparando generi hu-
 mano prorsus necessarium.

Respondeo hæc et alia sanctorum Patrum,
 excepto S. Anselmo, similia testimonia intel-
 ligenda esse hypotheticè, seu de potentiâ Dei
 ordinariâ, quâ Deus secundùm leges quas ab
 æterno constituit, operatur, non verò abso-
 lutè, seu de potentiâ extraordinariâ quâ ope-
 ratus fuisset in aliâ hypothesi, seu in alio
 rerum ordine quem instituere potuisset. Enim-
 verò pœnas peccatis debitas Deus repetere in
 præsentī statu ab æterno decrevit; id certò ex
 Scripturis constat ut aliquando ostendemus;
 positâ illâ lege, manifestum est eum citra
 condignam satisfactionem, ac proinde sine
 Incarnatione peccata dimittere non potuisse,
 quin immutabilitatem, veritatem et justitiæ
 suæ jura læderet et posthaberet. Atque hoc
 unum significant SS. Patres; ut patet 1^o, quia
 eorum sententiis hæc de re explicandis sufficit
 ejusmodi necessitas quæ consequitur decreta
 liberè à Deo ex omni æternitate constituta;

2^o quia iidem SS. Patres à quibus Incarnationis necessitas ab liberandos homines asseritur, non minùs disertè inculcant alio modo verè potuisse reparari genus humanum. Vide loca inter probationes tertiæ partis concl. allata.

Obj. iterùm : Qui naturæ suæ necessitate justus est, sanctus, imò et justitia ipsa et sanctitas ; qui peccatum necessariò odit, non potest illud non punire, non potest quin ex eo plenam satisfactionem reposeat ; atqui Deus, etc. ; ergo, etc.

Dist. majorem : Non potest illud non punire nisi illud deleat et aboleat, concedo ; si illud deleat et aboleat, nego ; fatemur Deum necessario odio peccatum prosequi, imò et peccatorem quâ peccator est. Sed contendimus illud odium necessariam non habere cum satisfactione accuratâ reposcendâ connexionem ; quid ita ? 1^o quia peccator varios habet respectus sub quibus Deus ipsi bonum velle potest ; nimirum est creatura à Deo facta, restaurationis capax ; quare ergo Deus eum gratiâ suâ prævenire et reparare non posset, sicque iniquitatem ejus delere et abolere, atque ab eo ad justitiam reverso nullam pœnam, vel saltem mitiorem et temporaneam tantùm repetere ? 2^o Si odium summum quo Deus peccatum aversatur connexionem necessariam haberet cum peccatoris punitione, Deus non posset ex mero suo beneplacito et misericordiâ pœnas à sontibus lueudas, in Christum innocentem transferre, neque consentiret hunc pro nobis condignæ satisfactioni imparibus justam compensationem exhibere. Nempe, ubi adest necessitas, ibi liberæ dispositioni nihil relinquitur. Si naturæ suæ necessitate Deus ita adigitur ad puniendum peccatum, ut nequeat illud abolere sine satisfactione condignâ, pœnas peccato debitas à peccatore ipso reposeat necesse est. Sin verò, ut peccator à debito liberari et salutem consequi posset, Deus misericors potuit statuere futurum ut alter pœnas peccato debitas solveret ; ergo ex necessitate suæ naturæ Deus non odit sub omni respectu peccatorem, sed potius eum esse opus manuum suarum considerans, potest ex infinitâ suâ misericordiâ velle ipsi succurrere, et ejus reparationem, seu peccati abolitionem decernere. Proindeque odium necessarium, quo Deus peccatum et ipsum peccatorem ut peccatorem prosequitur, absolutè non habet necessariam cum plenâ satisfactione repetendâ connexionem.

Instabis : Deus non potest sibi denegare quod sibi debet ex justitiâ ; atqui Deus sibi ex justitiâ

illud debet ut plenam de peccato satisfactionem exigat ; ergo, etc.

Nego minorem. Debetur quidem Deo plena pro peccato satisfactio. Hinc non modò potest non parcere nisi condigna pro peccato satisfactio ipsi exhibeatur, sed etiam potuisset hominibus condignæ satisfactioni reddendæ per se imparibus non condonare ; imò non necessariò pro nobis acceptavit, quas Christus obtulit satisfactiones. At non ideò sibi absolutè et antecedenter ad omne decretum debet, ut condignam pro peccato commisso satisfactionem reposeat. Hoc enim tantùm absolutè sibi Deus debet 1^o ut extra se agendo, sua attributa non neget, id est, ut nihil velit quod ipsis opponatur ; 2^o ut opus ejus et agendi ratio decorem habeant attributorum suorum. Atqui Deus, delendo et abolendo peccatum citra condignam satisfactionem, nihil operaretur justitiæ suæ oppositi. Eam quidem non exprimeret, sed ea non indiget exprimi. Cæterùm, nullam iniquitatem perseverare et subsistere impunitam sineret, nullum peccatorem facti non pœnitentem à pœnâ semper immunem relinqueret ; siquidem ex hypothesi, quas sine satisfactione condignâ iniquitates condonaret, eas gratiâ suâ deleat et aboleat. Pariter, licet ejusmodi gratuita peccati abolitio et condonatio characterem justitiæ divinæ non gereret, non tamen attributorum divinorum decore privaretur. In eâ enim emicarent bonitas et misericordia, sanctitas et omnipotentia Dei. Bonitas nempe et misericordia, ut patet ; sanctitas, seu amor recti et odium peccati, quatenus ad peccatorem pœnis subtrahendum, eumque felicitate donandum, oportuisset eum immutari et justum effici ; omnipotentia tandem in hâc ipsâ hominis immutatione et restauratione peragendâ. Fatendum in modo quo Deus genus humanum reparavit, longè splendidius hæc ipsa attributa, simul cum justitiâ et aliis perfectionibus divinis, refulgere et exprimi. Sed jam non semel docuimus, præsertim capite 2 hujus Disputationis, Deum non necessariò teneri, posito quòd agat, attributa sua quoad potest exprimere.

Obj. ultimò : Deus non potest justum mercede pactâ destituere ; ergo à pari peccatorem pœnis debitis afficere tenetur. Nego consequentiam. Ratio disparitatis est quòd Deus operæ mercedem justo non tribuendo jus ejus violaret. Peccatum verò citra condignam satisfactionem remittendo nemini injuriam faceret, sed tantùm suo jure cederet, cujus exercitium ipsi necessarium non est.

CAPUT V.

Utrum in hypothesis condignæ satisfactionis pro peccato exhibendæ, simpliciter necessaria fuerit Incarnatio?

Vox satisfacere, apud Latinos multiplici sensu accipi solet. Dicitur enim satisfacere, qui rem alteri gratam facit, et ejus desiderium implet, item qui officio suo fungitur, qui alicui se excusat, qui debitum solvit, illata resarcit damna, honorem læsum restaurat, etc. Eò loci satisfacere idem nobis est ac solvere debitum quod ex læsione honoris et existimationis contrahitur. Satisfactio hoc sensu accepta à multis dividitur in perfectam, condignam, et congruam. Satisfactio perfecta ea est, quæ omnes conditiones summo jure ad accuratè satisfaciendum requisitas continet, et definiri potest: *Redditio voluntaria honoris et reverentiæ æquivalentis, ex propriis et aliàs indebitis, ad compensandam injuriam alicui illatam.* 1^o Dicitur, *Redditio*, quia satisfactio est actus justitiæ ad alterum, quo scilicet honos ei restituitur et injuria illata compensatur. 2^o Dicitur, *Voluntaria*, tum quia injuria seu offensa ab actu libero profecta, actu libero compensari debet; tum quia sine aliquâ voluntariâ personæ honorantis submissione, nullus honos reddi posse concipitur; tum denique quia satisfactio est actus virtutis justitiæ; omnis autem virtutis actus voluntarius sit necesse est. Hinc propriè non dicitur satisfacere, sed satis pati, qui judicis sententiâ coactus pœnas debitas lueret, et alteri quod suum est invitus persolveret. 3^o Dicitur, *Honoris et reverentiæ æquivalentis*, id est, cujus æstimatio et valor compensandæ ad æqualitatem gravitati et malitiæ injuriæ sufficiant. Justitia enim cujus actus est satisfactio perfectam æqualitatem, si sit accurata, necessariò postulat. Hæc autem æqualitas est rei ad rem, unde arithmetica dici solet. Neque enim ad perfectam satisfactionem sufficeret illa æqualitas, quam in hoc negotio geometricam vocant, quâ scilicet tantumdem redditur quantum debitoris toti solvendo non idonei facultas ferre potest. Si valor honoris in satisfactionem exhibiti, offensæ gravitate vel minimùm superaretur, à perfectione justitiæ deficeret. 4^o Dicitur, *Ex propriis*, quia necesse est ut persona satisfaciens de suo offerat, quæ satisfactioni sufficiant, et ut in eâquæ offert, habeat dominium. Quòd si persona læsa de bonis suis tribueret, quæ sibi in satisfactionem reddi consentiret, non ideò tolleretur inæqualitas per offensam inducta. Censeretur hæc persona injuriam à

se acceptam gratis condonare; quemadmodum creditor pecuniam debitori suo donans ut sibi eam reddendo satisfaciat, censetur debitum remittere. Alio modo res se haberet, si quis lucrum ex bonis acceptis industriâ propriâ perceptum in solutionem tribueret; v. g., si homini industrio centum aureos tibi debenti, totidem alios in mercaturam impendendos ut ex lucro tibi satisfaciat, commodaveris, atque is reipsa illud lucrum faciat quod utrique debito exsolvendo aptum sit, tunc verè satisfacere poterit. Cæterùm, tum de hæc, tum de proximè sequenti satisfactionis perfectæ conditione accuratè definiendâ et explicandâ, nec non de utrâque satisfactioni Christi accommodandâ, non leves sunt theologorum concertationes, quas Dissertatione 8, de perfectione satisfactionum Christi disserentes, expendemus. 5^o Dicitur, *Ex aliàs indebitis*, quia non satisfacit, qui rem alicui obligationi extinguendæ obstrictam et consumptam, in solum novum debiti confert. Decem aureos mutuò accepisti, et alios decem ratione mercium non numeratâ pecuniâ sumptarum debes, huic duplici debito exsolvendo non sufficiunt decem aurei. Nec obstat aliquem sacris ordinibus initiatum et ecclesiastico beneficio potientem, etsi duplici titulo teneatur recitare horas canonicas, unâ tamen earum semel in die recitatione officio suo satisfacere; nam ejusmodi obligatio non à jure naturali, sed ab Ecclesiæ lege oritur, quæ id tantum oneris in ejusmodi casu imponere voluit. 6^o Dicitur, *Ad compensandam injuriam alicui illatam*; quia honor et reverentia satisfactione ad hunc finem redditur personæ læsæ; ut offensio seu injuria quam passa est, compensetur. Unde satisfactio differt à merito, quod præmium respicit, et à restitutione, quæ res ipsas seu bona fortunæ spectat.

Satisfactionis condignæ notio varia est apud diversos. Alii, ut Turnelius, quæst. 5, nomina satisfactionis condignæ et satisfactionis perfectæ et accuratæ promiscuè sumunt, et nullum inter ea discrimen constituunt. Alii, ut Frassen, de Incarn. disp. 4, satisfactionem condignam appellant eam quæ æquivalet debito, sed non fit ex aliàs indebitis. Alii, ut Suarez, disput. 4, sect. 7, statuunt ad satisfactionem aliquo modo condignam sufficere ex parte Dei, promissionem; et ex parte satisfaciens, aliquam, etsi imperfectam nec æquivalentem operum ejus cum satisfactione exhibendâ proportionem, ex solâ gratiâ et charitatis dignitate ortam. Satisfactionis condignæ nomine inte-

ligimus eam quæ est ad æqualitatem; seu desint, seu adsint aliæ conditiones ad perfectam satisfactionem summo jure necessariæ. Ita ut omnis satisfactio perfecta sit condigna, licet non vice versâ; ut ex consequentibus satis liquet. Satisfactio congrua et imperfecta ea est cujus valor viribus debitoris toti solvendo imparis respondet, non debito. Ex his intelligitur operi quo satisfit, inesse aliquem valorem. Valor autem generatim est dignitas seu excellentia quædam, quâ aliquid natum est in pretium vel compensationem dari. Proindeque valor satisfactionis est dignitas quâ opera quibus exhibetur, compensandæ offensæ seu injuriæ idonea sunt. Planum est ejusmodi valorem (haud secus ac honestatem et meritum actionum) esse quid morale, ex variis, tum ad excellentiam personæ satisfaciens, tum ad actuum objectum et circumstantias respectibus resultans, ac veræ æstimationi fundamentum præbens.

Observandum autem valorem satisfactionis eò superioris esse ordinis quò excellentior et sublimior est personæ satisfaciens dignitas; gravitatem verò, seu malitiam offensæ ex dignitate personæ læsæ et ex vilitate offendentis esse æstimandam. Ubi igitur summa est dignitas personæ satisfaciens, tunc valor satisfactionis est ordinis supremi; atque ubi persona læsa offendenti infinitè præstat, tunc ad supremum offensæ genus gravitas injuriæ pertinet. Quæ tamen non officiunt ne intra eundem satisfactionis ordinem, actus quibus satisfactio exhibetur, spectatis objecto, fine, difficultate, etc., varii valoris esse queant; nec etiam quominus malitia seu gravitas offensæ intra eundem ordinem major sit vel minor, prout gravior vel minus gravis est materia peccati, majorque vel minor cognitio aut advertentia peccantis.

Jam porrò à nobis hic supponitur, quod ex dicendis inferiùs Dissert. 8 perspicuum fiet, Christum videlicet plenam et perfectam pro redimendis hominibus satisfactionem persolvisse. Quapropter præsens quæstio eò tota reducitur, an purus homo, seu mera creatura redimendis hominibus ex perfectâ justitiâ suffecerit, seu plenam et condignam pro eorum peccatis satisfactionem exhibere potuerit. Si enim quævis mera creatura donis gratiæ quibuslibet ornata condignam et accuratam pro peccatis hominum satisfactionem reddere non valeat, evidens est ad ejusmodi satisfactionem simpliciter necessarium fuisse mysterium Incarnationis, quantum ad substantiam spectatum.

Nam nomine meræ creaturæ ea intelligitur quæ alicui personæ divinæ unita non est.

Consentiunt omnes theologi 1º, quocumque in statu puram creaturam tibi relictam, seu omni auxilio gratiæ destitutam, non posse ullo modo verè satisfacere pro peccato quovis, præsertim mortali. Id certò colligunt ex iis quæ contrà Pelagianos de necessitate gratiæ ad opus supernaturale et meritorium definita sunt. Consentiunt facilè 2º, meram creaturam, à peccato immunem, gratiâ sanctificante, et uberibus auxiliis actualibus instructam, de potentiâ Dei absolutâ potuisse saltem aliquo modo satisfacere Deo pro peccatis hominum. Ponamus enim, v. g., hominem quemdam, his donis cumulatam, aliorum hominum caput in ordine gratiæ à Deo constitutum fuisse, adeò ut juxta hanc dispositionem divinam is homo in alios influxisset, et iis potuisset prodesse sicut Adam nobis nocuit. Hac factâ hypothesi, opera quæ hic homo in satisfactionem peccatorum alienorum obtulisset, utpote supernaturalia et à personâ sanctâ et Deo gratâ quæ esset cæterorum caput, profecta, aliquam ex gratiæ dignitate et ex Dei ordinatione habuissent ad satisfaciendum habitudinem; atque iis proinde, si non condignè, ut dicemus, saltem congruè et imperfectè Deo satisfactum fuisset. Consentiunt 3º, purum hominem, quamvis sanctissimum, de potentiâ Dei ordinariâ, seu juxta præsentem rerum dispositionem non potuisse de condigno et ad æqualitatem pro peccato omnium hominum Deo satisfacere, ac proinde ad salutem nostram operandam in hoc rerum statu opus fuisse Homine-Deo. Quòd quidem tum ex Scripturis, præsertim Heb. 9 et 10, tum ex constanti SS. Patrum traditione, quorum multa testimonia mox referemus, manifestissimè deducitur. At verò in diversas itur sententias circa condignitatem et perfectionem satisfactionis quam de potentiâ absolutâ Dei, et juxta extraordinariam dispositionem rerum, mera creatura pro peccatis exhibere potuisset.

Scotistæ doctorem subtilem secuti, existimant purum hominem gratiæ donis ornatum, pro peccatis humani generis, de potentiâ Dei absolutâ, et secundum extraordinariam ejus dispositionem potuisse perfectè et ad æqualitatem ipsi satisfacere. Ratio quâ præcipuè inniuntur, ita est, malitiam peccati eo tantum sensu crescere juxta dignitatem personæ offensæ, et vilitatem offendentis, quòd offensa contra digniorem personam, cæteris paribus, sit

gravior illâ, quæ minùs dignæ personæ irrogatur; adeò ut ejusmodi malitia solum objectivè infinita sit, in se verò formaliter et intrinsecè etiam in genere moris finita; aliàs, inquit, nullum peccatum altero gravius esse posset, cùm infinitum non possit esse infinito majus. Hinc concludunt absolutè non repugnare ut opera hominis justì numero et dignitate suâ gravitatem offensæ per peccata hominum Deo illatæ adæquent, illamque ex perfectâ justitiâ compensent, quamvis tamen in præsentì statu nemo seu multitudo actuum satisfactoriorum, seu eorum excellentiâ possit condignam pro multitidine peccatorum generis humani satisfactionem impendere. Vide Fressenqum, t. 3 Theologiæ Scoti, tract. 1, disp. 1, a. 1, sect. 3, q. 2.

Thomistæ contra, rati malitiam peccati lethalis esse simpliciter et intrinsecè infinitam in genere moris, statuunt etiam de potentiâ Dei absolutâ fieri non posse ut pura creatura, quantiscumque gratiæ donis ornata æquivalentem et perfectam pro mortali delicto seu proprio seu alieno satisfactionem impendat. Censent igitur in hypothesi condignæ seu æquivalentis satisfactionis, simpliciter necessariam fuisse Incarnationem. Vide Gonetum, tom. 4 Clypei Thomistici, tract. de Incarn. disp. 4, art. 1, et t. 3, tract. De peccatis, disp. 9, ubi fusè explicat quâ ratione peccata lethalia diversæ gravitatis esse possint, etsi omnium malitia intrinsecè infinita sit.

Suarez in 3 S. Th., disp. 4 de Incarn. sect. 7, et alii circa necessitatem Incarnationis ad satisfactionem æqualem pro peccato mortali impendendam Thomistis consentientes, diverso tamen modo rem explicant. Nimirum de peccati lethalis malitiâ quamdam inter oppositas Scotistarum et Thomistarum opiniones mediam sententiam tenent. Cum Scotistis negant hanc malitiam esse intrinsecè et simpliciter in genere moris infinitam. Tuentur autem cum Thomistis peccatum lethale in superiori quodam offensæ ordine ita esse collocatum, ut superet quancumque injuriam cuilibet creaturæ etiam possibili irrogatam, et nullâ puræ creaturæ satisfactione exæquari et compensari possit. Vide Suarez, loco citato. His notatis, sit

CONCLUSIO. In hypothesi condignæ et accuratæ satisfactionis simpliciter necessaria fuit Incarnatio.

Probatur 1^o ex SS. Patribus. S. Athanasius Orat. 2 contra Arianos, n. 67: « Quod (re-

gnum cœlorum) ideò, inquit, consequimur, quòd ipsum Dei Verbum proprium atque ex Patre genitum carnem induit factusque homo est. Nam si creatam cum haberet naturam, factus postea fuisset homo, idem profectò quòd antea mansisset hominum genus, neque cum Deo conjunctum fuisset. Quia enim res facta per rem factam cum Creatore conjungi posset?... Qui verò, si Verbum res creata esset, Dei sententiam abrogare, peccatumque dimittere, cùm hoc Dei proprium esse scripserint Prophetæ? » S. Basilius, homiliâ in Psal. 48, ad hæc verba: *Frater non redimit, redimet homo*, etc. Sic habet: « Neque igitur fratrem in redemptionem quære, sed aliquem, qui tuam excedat naturam; neque hominem nudum, sed Hominem-Deum, Jesum Christum, qui solus pro nobis omnibus Deo dare potest placationem. » S. Augustinus, *Enchiridii* cap. 108: « Neque, inquit, per ipsum liberaremur unum mediatorem Dei et hominum hominem Jesum Christum, nisi esset et Deus. » S. Cyrillus Alex. in Epist. ad Valerianum Episcopum adversus Nestorianos: « Quo pacto, ait, unus pro omnibus pretium exolveret, si illa passio puri cujuscumque hominis fuisse putatur? » Simili ratione iterum contra Nestorium arguit, lib. 1 de Fide ad reginas, ut probet Christum qui pro nobis passus est, purum hominem non fuisse. S. Leo Magnus, sermone 20, aliàs 1, de Nativitate, cap. 2: « Nisi (Christus) esset Deus, non afferret remedium. » S. Paulinus Nolanus episcopus, in Epist. 4 ad Severum: « Ideò, inquit, dictum puto: *Frater non redimit, redimet homo*; quia quos frater non redemerat, hoc est, propheta, seu legislator, qui homo tantum erat, hos homo redemit, qui et Deus erat: *Deus enim, inquit, erat in Christo mundum reconcilians sibi*. Hujus enim modi homo solus prævalere potuit adversus sententiam mortis et aculeum peccati, ut chirographum mortis aboleret. » S. Fulgentius, lib. de Incarnatione et gratiâ, cap. 4: « Nullatenus, ait, humana natura ad auferendum peccatum mundi sufficiens atque idonea fieret, nisi in unione Dei Verbi non naturali conjunctione, sed solùm personali unitate transiret. » Adrianus, S. pontifex I, in Epistolâ ad episcopos Galliæ et Hispaniæ, et Patres concilii Francofordiensis, in libro sacro syllabo, probant Christum non fuisse Filium adoptivum, quia gratiam adoptionis nobis obtinere

non potuisset, se ipse, utpote homo purus eâ indiguisset. Vide T. 7 concil. pag. 1017 et 1025. S. Joannes Damascenus, lib. 3 de Fide orthodox. cap. 15: « Non, inquit, humano amore (Christus) humana facitabat, qui non homo solùm, verùm et Deus esset, unde passiones quoque ipsius vivificæ fuerunt et salutares. » S. Thomas, in 3 sent. dist. 20, q. 1, a. 4: « Ex parte Dei, inquit, fuit alius modus possibilis nostræ liberationis, quia ejus potentia limitata non est, quem si elegisset, convenientissimus fuisset; non tamen habuisset rationem redemptionis, sed liberationis tantùm, quia liberatio non fuisset facta per solutionem pretii. » Art. 2 jam dixerat: « Ad hoc ut satisfactio esset condigna, oportebat quòd haberet virtutem infinitam, quia peccatum pro quo fiebat satisfactio, habebat infinitatem quamdam.... Actio autem puræ creaturæ non potest habere infinitam efficaciam, et ideò nulla pura creatura poterat sufficienter satisfactionem facere. » Et p. 3, q. 1, a. 2 ad 2: « Peccatum contra Deum commissum, quamdam infinitatem habet ex infinitate divinæ majestatis; tantò enim offensa est gravior, quantò major est ille in quem delinquitur; unde oportuit ad condignam satisfactionem, ut actus satisfaciens haberet efficaciam infinitam, utpote Dei et hominis existens. » Probatur 2º duplici argumento theologico. Primum petitur ex triplici ratione juxta Scripturas et universam traditionem in peccato lethali attendendâ; nempe debiti, quo, propter honorem Dei læsum, ejus justitiæ obstricti sumus; inimicitiae, quâ Dei inimici constituimur; et criminis, quo rei sumus mortis et pœnæ æternæ. Unde peccatores in Scripturis, modò *debitores* Matth. 6, v. 12, Coloss. 2, v. 14; modò *inimici Dei*, tam activè quàm passivè, Rom. 5, v. 10, Coloss. 1, v. 21; modò *rei*, Marci 3, v. 29, Jacobi 2, v. 10, appellantur. Itaque ut pro nobis satisfaceret, necesse fuit debitum inimicitiae Dei et pœnâ æternâ dignum persolvi; num verò probabile est puram creaturam tanto debito ad æqualitatem solvendo idoneam fuisse? Certè aliam omninò cogitationem nobis videntur injicere SS. Scripturæ, dùm Christum Hominem-Deum exhibent *dentem* (Coloss. 2, n. 14) *quod adversus nos erat chirographum decreti, quod erat contrarium nobis, affigentem illud cruci; solventem* (Ephes. 2, v. 14 et 16) *inimicitias in carne suâ.... interficientem eas in semetipso; dolores nostros*

(Isaïæ 53, v. 4) *portantem, ac pacificantem* (Col. 1, v. 20) *per sanguinem crucis, sive quæ in terris, sive quæ in cælis sunt; ergo, etc.*

Secundum argumentum deducitur ex conditionibus ad dignam et perfectam satisfactionem requisitis. Nam condigna satisfactio est æquivalens injuriæ illatæ, satisfactio autem perfecta debet præterea fieri ex propriis et ex aliis indebitis; atqui nec satisfactio æquivalens, nec satisfactio ex propriis et ex aliis indebitis, citra Incarnationis mysterium Deo pro peccatis hominum impendi potuit. 1º Satisfactio æquivalens non potuit sine Incarnatione pro peccatis impendi; seu quod idem est, ejusmodi satisfactioni reddendæ mera creatura quibuslibet gratiæ donis ornata, impar fuisset. Enimverò omnes fatentur, et de se evidentissimum est, gravitatem seu malitiam offensæ ex personæ læsæ dignitate, et ex personæ offendentis vilitate esse æstimandam, ut jam explicatum est. Crescatne illa malitia seu gravitas ad æqualitatem arithmeticam, adeò ut extrinsecè et simpliciter infinita sit in genere moris, ut Deus infinitus est in ratione entis? an verò crescat tantùm juxta aliquam proportionem quæ hic appellari solet geometrica, eo nempe sensu quòd offensa majestatis divinæ, etsi finita in se, ad supremum tamen offensæ ordinem pertineat? Controversiam hanc eò loci non attingimus. Solummodò statuimus malitiam seu gravitatem peccati mortalis in genere offensæ, ad eum gravitatis et malitiæ gradum seu ordinem esse referendam quem nulla puræ creaturæ satisfactio, etiam de potentiâ Dei absolutâ exæquare valeat. Etenim dubitari non potest quin malitia peccati mortalis in genere offensæ, superet malitiam cujuslibet delicti, quocumque modo in quamvis creaturam commissi; Deus enim ut infinitus, ut omnium finis ultimus, temnitur, deseritur per peccatum mortale, utpote quo unioni cum Deo anteponitur unio cum objectis caducis et finitis; ergo fingas quamlibet meram creaturam possibilem, in quocumque gradu honoris possibilis à Deo collocatam, injuria quæ illi creaturæ per aliam creaturam inferretur, inferior esset gravitati offensæ Deo peccatis lethalibus illatæ. Jam verò, ut jam observavimus, valor satisfactionis, quod spectat ordinem ad quem referendus est, petitur ex dignitate personæ satisfaciens; ubi igitur persona satisfaciens mera est creatura, quantacumque sit ejus dignitas, satisfactionum ejus valor non potest transcendere ordinem gravitatis injuriæ quæ creaturæ puræ ad sum-

nam dignitatem possibilem evectæ inferretur, ac proinde injuriæ Deo per peccatum mortale illatæ ad æqualitatem compensandæ sufficere non potest. Et verò, quemadmodum crēscit malitia offensæ ex dignitate personæ læsæ et vilitate offendentis, ita eò minuitur satisfactionis valor, quò persona satisfaciens inferior est personæ cui injuria fuit illata, et cui debetur satisfactio. Hinc omnibus probatur illud Aristotelis dictum lib. Moral. 5, de jure talionis non adhibendo, ubi deprehenditur personarum inæqualitas: « Si quis, inquit, magistratum « gerens, alterum percusserit, non est percus- « tiendus; si quis verò eum qui magistratum « gerit, verberaverit, non modò reverberandus « est, sed etiam supplicio afficiendus. » Cùm igitur dignitas cujusvis creaturæ puræ comparata ad supremam Dei majestatem nulla sit, planum videtur quaecumque ejusmodi puræ creaturæ satisfactionem, ad supremum satisfactionis ordinem reparando peccato mortali parē, pertinere non posse.

2º Citra Incarnationem satisfactio non potuit esse ex propriis. Nam pura creatura de suo nihil in satisfactionem offerre potest; etsi enim gratiis sibi à Deo concessis homo purus liberè consentiat, ac proinde in ejusmodi auxiliorum usum et bonos fructus habeat dominium actui libero intrinsecum; attamen omne meritum actuum nostrorum in ordine ad finem supernaturalem, omnis omninò valor actionum quibus pura creatura potest pro peccatis utcumque satisfacere, ejusmodi, inquam, meritum et valor à gratiâ quam Deus gratuito impertit ita oriuntur, ut à nobis provenire dici nequeant. *Non sumus*, inquit S. Paulus, 2 Cor. 3, v. 5, *sufficientes aliquid cogitare à nobis, quasi ex nobis; sed sufficientia nostra ex Deo est*; et Cor. 4, v. 7: *Quid habes*, ait, *quod non accepisti?* unde S. Augustinus docet Deum coronando merita nostra coronare dona sua.

3º Satisfactio ex aliis indebitis sine Incarnatione non potuit impendi. Nam tunc satisfactio non fit ex aliis indebitis, cùm valor solvendo alteri debito jam obstrictus et consumptus in solum novum debiti et quidem maximi per offensam illatam contracti offertur; atqui sic se haberet valor actionum quibus pura creatura Deo pro peccato satisfacere conaretur. Valor enim ejusmodi actionum 1º esset alteri debito solvendo obstrictus, siquidem quidquid creatura operatur, illud omne titulo gratitudinis, dependentiæ, religionis, ad Deum referri debet ut ad summum Dominum et ad omnium prin-

cipium et finem. 2º Eidem solvendo debito esset consumptus, quippe tituli illi gratitudinis, dependentiæ, etc., satis superque sufficiunt omni exhauriendo valori actionum puræ creaturæ, cùm ille valor finitus sit. 3º Is valor in solum novum et maximi debiti conferretur; maximi quidem, ut omnes fatentur et ex dictis liquet; novi etiam, nam vel creatura illa conciperetur satisfacere pro peccato proprio, vel pro alieno. Si pro peccato proprio, hoc ipsum est peccatum quod novum debitum extinguendum induxit. Cùm igitur is homo purus, antequàm peccasset, omnia sua opera, omnes suos actus cum eorum valore Deo jam deberet, nihil proinde ipsi manet aliàs indebitum, quod in solum hujus novæ et tantæ obligationis conferre possit. Si pro peccato alieno, vel mera creatura de quâ quæstionem movemus, lethali peccavit, vel ab omni peccato immunis est. Quamvis nihil peccasset, illud tamen quod susciperet pro aliorum peccatis satisfaciendi onus, esset novum debitum, in solutionem cujus nihil potest afferre quod aliis titulis jam Deo non deberet. Sin autem lethali peccato obstricta esset, jam non modò titulis gratitudinis, dependentiæ, religionis, etc., sed etiam titulo justitiæ et satisfactionis illud Deo deberet, quod pro aliorum liberatione exhiberet; ergo pura creatura non potest Deo pro peccatis satisfacere ex aliis indebitis, etc.

SOLVUNTUR OBJECTIONES. — Obj. 1º: Mera creatura æquivalenti satisfactioni pro peccato lethali exhibendæ impar censi nequit, nisi malitia peccati habeatur intrinsecè et simpliciter in genere moris infinita; si enim in se finita esset, et solummodò infinita extrinsecè et objectivè, seu ratione objecti infiniti quod lædit, procul dubio compensari posset valore actuum quibus pura creatura satisfaceret, siquidem illi actus etsi finiti intrinsecè, ad Deum tamen tendunt, et ad ipsum terminantur. Atqui malitia peccati lethalis in genere offensæ simpliciter et intrinsecè infinita non est. Aliàs omnia peccata lethalia essent perinde gravia, odium formale Dei non esset pejus furto; quod enim infinitum est nihil agnoscit se majus.

1º Nego majorem; nam, ut mera creatura impar sit exhibendæ æquivalenti pro peccato satisfactioni, satis est malitiam peccati in supremo ordine offensæ esse constitutam ad quem omnes actus satisfactorii puræ creaturæ pertinere non possint; atqui, etiam malitia peccati non esset in genere offensæ simpliciter infinita, attamen in supremo ordine gravitatis

et malitiæ injuria illa constitueretur, ad quem actus satisfactorii puræ creaturæ pertingere non possent. Offensam enim cuilibet creaturæ quocumque in statu irrogatam malitia peccati lethalis in genere offensæ longè superaret, ut dictum est. Offensa autem longè superans omnem offensam quæ quocumque modo et quocumque in statu cuivis creaturæ irrogari potest, superioris est ordinis ad omnes puræ creaturæ satisfactiones.

Ad probationem majoris, distingo : Si malitia peccati lethalis esset tantum infinita extrinsecè, et præterea valor satisfactionum ab objecto, seu à personâ cui satisficit perinde repeteretur, ut atrocitas delicti à personâ læsâ ; tunc malitia peccati mortalis valore satisfactionum puræ creaturæ ad æqualitatem compensari posset, concedo ; secus, nego. Valor satisfactionum, ut non semel diximus, quantum ad ordinem in quo collocandus est, à personæ satisfaciendæ dignitate desumitur, adeo ut eò superioris ordinis sit satisfactio, quò major et excellentior est personæ satisfaciendæ dignitas. Contrà, ordo ad quem pertinet malitia seu gravitas peccati lethalis in genere offensæ, petitur ex objecto quod hoc peccato contemnitur, seu ex dignitate personæ læsæ et ejus supra personam offendentem præstantiâ ; ergo peccatum lethale, etsi malitiæ finitæ esset, posset tamen ex læsione objecti infiniti consequi gravitatem ordinis superioris quem satisfactiones puræ creaturæ exæquare non possent.

2° Negari potest minor cum Thomistis. Ad cujus probationem, distingo : Omnia peccata mortalia essent perinde gravia, quâ parte infinita forent, concedo ; undequaque, nego. Ponatur linea tenuis in infinitum protensa, et supponatur corpus crassius infinitè etiam secundum longitudinem ductum, eadem erit utriusque longitudo, sed tamen extensio amborum erit longè diversa quantum ab aliis dimensionibus. Sic licet omnia peccata lethalia in ratione offensæ et in genere moris essent infinita simpliciter quatenus à Deo ut à fine ultimo avocant et disjungunt, ex aliis tamen capitibus possent valdè differre, nempe ex speciali gravitate violati præcepti, ex majori cognitione et deliberatione, ex subjectâ materiâ.

Instabis 1° : Gravitas offensæ ex dignitate personæ læsæ derivatur quidem, sed secundum modum et capacitatem ipsius actûs quo injuria irrogatur ; atqui is modus in peccato lethali finitus est, hujusque peccati malitiam supra ordinem satisfactionum puræ creaturæ consti-

tui non arguit. Peccatum enim lethale nullâ perfectione intrinsecâ Deum privat, ejus beatitudinem non minuit, entitate finitum est, non habet intensionem infinitam, non fit cum cognitione Dei perfectâ et adæquatâ, cum advertentiâ infinitâ ; ergo gravitas offensæ Deo per peccatum lethale illatæ, nec est infinita simpliciter, nec excedit ordinem valoris satisfactionum quas pura creatura exhibere potest.

Nego minorem. Ad probationem, reponunt Thomistæ his omnibus probari tantum peccati lethalis malitiam non esse infinitam in genere entis, id est, non esse actum physicè seu entitate infinitum, quod libenter fatentur ; ex iisdem verò non consequi malitiam peccati in genere offensæ et moris non esse intrinsecè infinitam. Nam, inquiunt, atrocitas offensæ non sequitur rationem entitatis actûs peccaminosi, sed ex dignitate personæ læsæ æstimanda est, proindeque, cum suprema Dei dignitas peccatorem, qui illam lethali delicto contemnit, non lateat, agnoscendum est eum offensæ infinitæ esse reum, etsi nec ejus advertentia et cognitio, nec ipsius actûs intensio et entitas infinitæ sint. Quòd si hæc difficulter admittas, istud saltem fatearis, quod nobis hic satis est, ex supremâ Dei per peccatum mortale contempti et posthabiti majestate, derivari gravitatem seu malitiam, nullâ puræ creaturæ satisfactione, ut explicatum est, æquivalenter compensandam.

Instabis 2° : Actus charitatis habet à gratiâ quòd sit ordinis divini. Præterea, idem actus Deum ut summè bonum et omnium finem ultimum respicit, atque objectivè infinitus est, ut et offensa Dei. Hinc charitas omnium virtutum est perfectissima. Deinde actus charitatis et contritionis perfectæ peccato lethali è diametro opposita est, ita ut charitas tantumdem reddat Deo, quantum ipsi per peccatum ablatum est ; sci icet peccator aufert Deo rationem finis ultimi, hanc ipsi charitas restituit ; ergo actibus charitatis perfectæ purus homo absolute posset pro suo aut alieno peccato ad æqualitatem satisfacere.

Respondeo ad singula. Ad primum, etsi purus homo gratiâ sanctificante ornatus, sit divini seu supernaturalis ordinis, etsi actus charitatis perfectæ ad eundem ordinem pertineat, attamen integrum hujusce personæ, tum illius actuum dignitas seu valor ab aliquo creato et finito oritur, nempe à dignitate gratiæ quâ ornatur moveturque. Verum offensæ Deo per

peccatum illatæ gravitas ab ipsâ Dei majestate increatâ et infinitâ repetitur; proindeque illa gravitas exæquari non potest dignitate seu valore actuum charitatis, prout à gratiâ oriuntur, et ab homine justo producuntur. Ad secundum, charitas habet quidem Deum pro objecto; circa eum perfectiùs quàm aliæ virtutes versatur, atque illarum omnium est perfectissima. Sed non eodem sensu objectivè infinita est, quo peccatum lethale. Charitate amor et obedientia Deo debita ipsi redduntur; peccato mortali deseritur Deus, posthabetur, et in eum rebellatur. Quis autem non videt in exhibendis principi obsequio et amore debitis, parùm esse meriti; defectionem verò et in ipsum rebellionem esse crimen læsæ majestatis quod severiùs puniri nequit? Sed præterea, hic de satisfactione agitur, valor autem in genere satisfactionis quem charitas ab objecto suo consequitur, æquiparandus non est gravitati quæ ex Deo læso in peccatum mortale sub ratione offensæ derivatur. Offensa enim multò magis crescere concipitur secundum personæ offensæ præstantiam, quàm valor actûs quo personæ dignitatis summi amor et obsequium debitum redduntur, ex ejusmodi personæ excellentiâ in genere satisfactionis crescere potest et adaugeri. Ad tertium, ex eo quòd charitas et peccatum è diametro opposita sint, id unum sequitur peccatum prout inducit privationem charitatis esse tantum malum, quantum bonum est charitas. At nihilominus peccatum lethale ut est offensâ Dei, in superiori quodam ordine constituitur, ad quem charitas in ratione satisfactionis non assurgit. Scilicet ordo ad quem pertinet valor charitatis, quatenus in satisfactionem impendi potest, sumitur à dignitate personæ sese per charitatem litantis et consecrantis. Atqui ejusmodi valor non potest offensæ gravitatem ex supremâ Dei læsi majestate derivatam adæquare; ut ex dictis satis liquet. Neque insolitum est inter actus oppositos virtutum et vitiorum, nullam in ratione offensæ et satisfactionis deprehendi æqualitatem, ubi personæ sunt inæquales. V. g., qui regi suo addictus est nullam mercedem meretur; qui verò regem odio prosequitur et in eum rebellat summo supplicio est dignus. Itaque licet peccator actu charitatis ad Deum ut ad finem ultimum convertatur, à quo per peccatum aversus fuerat, non ideò tamen exhibet Deo honorem æquivalentem injuriæ quam ipsi per peccatum intulerat, quod tamen ad condignam satisfactionem esset requisitum.

Ad consequentiam, ex dictis patet puram creaturam actibus charitatis perfectæ non posse satisfacere pro peccato mortali alieno. Multò minùs autem posset satisfacere pro suo. Nam creatura pura satisfaciens pro alieno supponi potest gratiâ sanctificante ornata et grata Deo, quæ dignitas meritum auget. Peccator verò qui actu charitatis pro suo peccato satisfacere diceretur, nondùm esset gratiâ sanctificante instructus, quippe quæ remissionem et condonationem peccati secum habet necessariò annexam.

Instabis 3^o: Malè censemus puram creaturam non posse de potentiâ Dei absolutâ pro peccato mortali satisfacere, etiamsi malitia hujus peccati non esset simpliciter et intrinsecè infinita. Namque, ut ait Gonetus de Incarn. disp. 3, c. 1, n. 5, offensâ peccati mortalis non est ordinis divini per essentiam, nec per communicationem Divinitatis ut formæ seipsâ dantis gravitatem, aliàs esset infinita simpliciter et entitivè; ergo solùm est ordinis divini objectivè, quatenus terminatur ad Deum, et participativè, gravitate derivatâ à personâ divinâ per peccatum offensâ. Sed actus charitatis est etiam ordinis divini objectivè, terminatur enim ad Deum, et participativè, cùm charitas creata sit effluxus et participatio charitatis divinæ; ergo, nisi offensâ peccati mortalis constitutur infinita simpliciter in genere moris, non erit superioris ordinis ad omnes actus satisfactorios puræ creaturæ.

Dist. min.: Actus charitatis est ordinis divini, id est, ordinis supernaturalis, concedo. Est ordinis divini eodem modo quo offensâ Deo per peccatum mortale illata, nego. Actus charitatis est ordinis divini, seu supernaturalis 1^o objectivè, quòd nempe Deum summè bonum ut gratiæ et gloriæ auctorem habeat pro objecto; 2^o ratione principii, siquidem gratia ad eum eliciendum necessaria naturæ non debetur et gratis à Deo conceditur; 3^o ratione finis, quia ad supernaturalem finem, scilicet visionem Dei, relationem dicit. Sed non ideò in genere satisfactionis est ejusdem ordinis ac offensâ peccati mortalis. Nam valor actûs charitatis in genere satisfactionis petitur à dignitate gratiæ, et personæ gratiâ sanctificante ornata; quæ sunt ordinis creati et finiti, etsi à Deo oriantur ut à causâ efficiente, et ad ipsum tendant ut ad gloriæ auctorem. At verò gravitas offensæ Deo per peccatum mortale illatæ, immediatè petitur ex ipso Deo tanquàm à personâ læsâ et contentptâ; proindeque non eadem ratione, ordi-

nis divini sunt actus charitatis et offensa peccati lethalis; illud igitur immotum stat, gravitatem hujus offensæ, etsi dicenda non esset simpliciter infinita, propter finitum modum quo peccator Deum offendit, nihilo seciùs tamen ad supremum offensæ ordinem nullâ puri hominis satisfactione condignè compensandum attinere.

Inst. 4° : Valor satisfactionis non tantum sumitur à personâ satisfaciente, sed etiam ab objecto et aliis circumstantiis concurrentibus ad actum; sicut gravitas offensæ, non solum à personâ læsâ sed etiam ab objecto et à circumstantiis ad actum peccati concurrentibus desumitur; ergo. Dist. ant. : Valor satisfactionis intra eundem ordinem sumitur ab objecto, etc., ut et gravitas offensæ, concedo. Valor satisfactionis ut et gravitas offensæ ratione ordinis in quo collocanda sunt, nego. Si persona regie dignitatis satisfactionem aliquam exhibeat, nemo non videt hujusmodi satisfactionem esse ordinis superioris satisfactioni quam imponderet plebeius. Posset verò regia hæc persona intra eum ordinem satisfactionis quem ejus dignitas constituit, diversi pretii actus satisfactorios elicere, pro diversitate objecti, difficultatis et circumstantiarum. Pariter offensa quam rex à plebeio sibi subdito acciperet, ordine superaret offensam quam subditus alii hujus regis subdito inferret; atque intra illud offensæ regi factæ genus, diversitas objecti, modi et circumstantiarum, potest augere vel minuere delicti gravitatem. Itaque valor satisfactionis ratione ordinis ad quem pertinet, ut et gravitas offensæ eodem modo spectatæ, repeti debent, ille à dignitate personæ satisfaciens, hæc à personæ læsæ præstantiâ et excellentiâ; tametsi, intra eundem ordinem, ad valorem satisfactionis et gravitatem offensæ, objectum et circumstantiæ operis conducunt; proindeque quantuscumque sit valor, quem charitas ab objecto suo consequitur, is in genere satisfactionis, ad ordinem supremum quò gravitas peccati lethalis in genere offensæ pertinet, assurgere non potest.

Instabis 5° : Ex his sequeretur nunquam posse privatum pro injuriâ vel levissimâ regi illatâ satisfacere; ergo, etc. Nego ant., quando enim personæ læsæ dignitas solum finita est, quod personæ satisfaciens deest, illud excellentiâ et utilitate operis satisfactorii suppleri et compensari non repugnat. V. g., si subditus qui aliquam regi offensam intulit, sese postea capitali periculo offerret ad eum incolumem servandum, atque ipsum adimeret letho, illi

satisfecisse meritò censeretur. Sed ubi persona læsa offendenti infinitè præstat, offensa ad supremum ordinem gravitatis attinet, proindeque, etc.

Inst. 6 : Tantus est valor actûs charitatis perfectæ, quantum est peccati mortalis demeritum; siquidem, ut peccato mortali debitum poenæ æternæ contrahitur; ita per actum charitatis æterna meretur felicitas. Dist. ant. : Tantus est valor actûs charitatis perfectæ, in ratione operis meritorii, quantum, etc., concedo; in ratione operis satisfactorii, nego. Ad merendum de condigno vitam æternam non requiritur actus qui in se sit pretii et valoris præmio æqualis; satis est hominem in statu gratiæ sanctificantis esse constitutum, atque ab eo elici opus supernaturale, id est, quod ad supernaturalem beatitudinem de se habitudinem dicat. Nam meritum de condigno non tantum in opere meritorio fundatur, sed præsertim in promissione Dei qui ad præmium ob ejusmodi opus largiendum fidem suam obligavit. Verum ad satisfactionem condignam et æquivalentem necesse est gravitatem offensæ ipso opere satisfactorio exæquari.

Instabis 7° : Peccator actu contritionis et charitatis perfectæ, gratiam sanctificantem consequitur; atqui nisi contritio charitate perfecta satisfactioni æquivalenti sufficeret, ejusmodi actu peccator gratiam sanctificantem non posset consequi; ergo saltem pro peccato proprio potest creatura pura donis ornata satisfacere. 1° Dist. maj. : Gratiam sanctificantem consequitur in præsentī statu, et ex Dei liberalitate, concedo; absolutè, et ex naturâ rei, nego. Itaque, etsi juxta dispositionem præsentem à Deo institutam, homo peccator per contritionem charitate perfectam cum voto sacramenti, à peccatis illicò liberetur, et gratiam sanctificantem consequatur, attamen ejusmodi dispositionis naturæ non necessariò alligatur justificatio, seu infusio gratiæ sanctificantis. Congruum quidem est ut Deus peccatori cui actum contritionis charitate perfectum inspiravit, veniam et sanctificationem quoque tribuat; sed illud non est absolutè necessarium. Hinc concilium Tridentinum, sess. 5, can. 5, inter actus quibus ad justificationem peccator gratiâ excitatus se disponit, Dei dilectionem computans, in iis tamen nullam rationem meriti vel satisfactionis cap. 8 agnoscit. De quo legatur Vega, quæst. 6 et 7, de Justificatione; Bellarminus, de Justificat. cap. 23; Suarez hic disp. 4, sect. 8. 2° Nego minor. Si peccatori

actu contritionis charitate perfectæ sese ad gratiam obtinendam disponenti, deberet ex naturâ rei concedi à Deo venia et sanctificatio, non ideò pura creatura censenda esset pro peccato proprio satisfacere de condigno seu æquivalenter; sed inde sequeretur duntaxat, Deum auxilia ad actum contritionis charitate perfectæ eliciendum necessaria peccatori concedendo, velle ipsi gratis et citra æquivalentem satisfactionem remittere peccatum.

Obj. 2^o: Mera creatura potest gratiâ infinitâ donari; atqui hoc posito condignè satisfaceret; ergo. Præterea potest pati pœnam infinitam; sed pœna infinita satisfactioni condignæ procul dubio sufficit; ergo. Ad primum, nego maj., quia quidquid recipitur ad modum recipientis recipitur; ergo gratia cujus entitas esset infinitè intensa non potest in merâ creaturâ quæ necessariò finita est, recipi. 2^o Nego minorem. Nam valor satisfactionis exhibitæ à merâ creaturâ dono gratiæ infinitæ instructâ repeteretur ab aliquo creato, et infinito tantum sub aliquo respectu, nempe à gratiâ infinitâ. Gravitas autem peccati lethalis in ratione offensæ petitur à dignitate Dei, qui in omni genere perfectionum infinitus est. Ad secundum, 1^o nego etiam maj. Quia pœna infinita non potest in subjecto finito recipi. Æternum quidem pœnam dabunt damnati; quia eorum peccatum semper manebit. Sed nunquàm dici poterit pœnam infinitam ipsos esse passos. Ipsa damni pœna infinita est solum objectivè. 2^o Nego min. Quia aliud est satis pati, aliud est satisfacere. Satis patitur qui pœnas delictis debitas etiam invitus subit. Satisfacit verò ad æqualitatem, qui ut offensam illatam compenset, honorem æquivalentem voluntariè reddit.

Obj. 3^o: Homo purus potest satisfacere ex propriis. Nam 1^o actuum suorum habet dominium, utpote liber. 2^o Si ad satisfactionem ex propriis non sufficeret illud in actus satisfactorios dominium, quod intrinsecum est actui libero; neque Christus pro nobis potuisset ex propriis satisfacere. 3^o Supremum dominium quod Deus habet in actus supernaturales creaturæ non magis officit quominus mera creatura ex propriis satisfacere possit, quàm dominium reipublicæ in bona subditorum obesse potest ne privati ex propriis satisfacere valeant reipublicæ; ergo. Nego antecedens. Ad primum in probationem adductum, non sufficit ut quis satisfaciât ex propriis, illud quod offert, esse aliquâ ratione sub ejus dominio; insuper requiritur ut id quod in satisfactionem impendit

de suo proveniat. Atqui mera creatura nihil potest in satisfactionem impendere quod de suo proveniat; quidquid enim valoris supernaturalis seu in genere meriti, seu in genere satisfactionis actibus ejus liberis inesse potest, illud ex ipsâ non provenit, sed ex gratiâ quæ ejus naturæ non debetur, quamque à Dei liberalitate accepit. Ad secundum, ostendemus cap. 3 Disputationis VII, ubi de perfectione satisfactionum Christi, earum valorem ex ipsâ Christi personâ provenisse. Ad tertium, nego paritatem. Dominium altum quod respublica in bona subditorum habet, iis tantum in casibus exerceri potest, in quibus necessitas reipublicæ id postulat. Neque enim ejusmodi bona sunt propria reipublicæ, neque ab eâ accepta sunt ut eorum usus ad eam referatur; privati soli eorum habent dominium tam utile quàm directum. Verum omnis actuum creaturæ puræ valor in genere meriti aut satisfactionis magis Dei est, quàm hujus creaturæ, neque oritur à naturâ, sed à gratiâ naturæ creatæ indebitâ et à Deo liberaliter impertitâ, ut ejus usum ad eum solum referamus.

Quæres an pura creatura possit condignè satisfacere pro peccato veniali? Resp. hominem purum gratiâ sanctificante ornatum posse de condigno satisfacere pro peccato veniali. Ita fert communis opinio theologorum, vide Suarez, Gonetum Disputationibus supra citatis, etc. Probatur 1^o, quia testimonia Patrum quibus puram creaturam condignæ satisfactioni exhibendæ non esse idoneam modò evicimus, de solo peccato mortali manifestè intelligenda sunt. 2^o Quia peccatum veniale juxta Scripturas et traditionem à peccato mortali essentialiter differt, ut theologi ostendunt in tractatu de peccatis. In hoc autem juxta veram et communem doctrinam, constituitur illud discrimen, quòd peccato mortali Deus ut finis ultimus à creaturâ deseratur et contemnatur, quatenus unioni cum ipso præfertur unio cum rebus caducis et finitis; dùm contrà per peccatum veniale homo à Deo ut à fine ultimo nullo modo se avertit; sed tantum in re levi ad dissolvendam cum Deo unionem non sufficienti, vel saltem cum imperfectâ advertentiâ et consensu præceptum aliquod divinum transgreditur. Hinc S. Th. primæ secundæ, q. 72, a. 5, in corp.: « Quando enim, inquit, deordinatur « per peccatum usque ad aversionem ab ultimo « fine, scilicet Deo, cui unimur per charita- « tem, tunc est peccatum mortale; quando « verò sit deordinatio citra aversionem à

« Deo, tunc est peccatum veniale. » Jam verò peccatum quo Deus non deseritur, quod cum voluntate ipsi ut fini ultimo adhærendi consistit, neque infinitum in genere offensæ dici potest, neque ad ordinem supremum injuriæ pertinet, ad quem pura creatura satisfactionibus suis assurgere nequeat; ergo, etc. 3^o Quia si pura creatura donis ornata non posset pro peccato veniali ad æqualitatem satisfacere; sequeretur 1^o Deum posse in æternum punire justum ob peccatum veniale ab ipso commissum; tamdiù enim qui peccatum commisit, ob illud justè puniri potest, quamdiù ad æqualitatem non satisfecit. Atqui repugnat justum puniri in æternum propter peccatum veniale; tum quia Deo gratus est justus ac proinde in æternum non potest puniri; tum quia illud est noxam venialem inter et peccatum mortale discrimen necessarium, quod illà non mereri pœnas æternas demonstrat. « Qui peccat citra aversionem à Deo (inquit S. Thomas loco mox citato), ex ipsâ ratione peccati reparabiliter deordinatur, quia solvatur principium (vitæ, nempe ratio finis ultimi); et ideò dicitur peccare venialiter; quia scilicet non ita peccat ut mereatur vitam interminabilem amittere. » Sequeretur 2^o, justum noxæ venialis reum Deo magis esse odibilem, quàm gratus esse possit ratione gratiæ sanctificantis quâ ornatur; quippe, cum malitia peccati venialis in hac hypothesi dicenda foret infinita, vel saltem ad ordinem aliquem in genere offensæ pertinere quem nullis satisfactionibus justus assequi posset.

Dices 1^o : Peccatum veniale est offensa Dei; atqui dignitas offensæ crescit ex dignitate personæ læsæ; ergo gravitas peccati venialis in genere offensæ est intrinsecè infinita, aut saltem est ordinis superioris ad quem justis satisfactiones assurgere non possunt. Disting. major. : Est Dei offensa levis et secundum quid, concedo; est Dei offensa gravis et simpliciter : nego. Peccatum veniale illud habet commune cum peccato mortali, quòd utroque præceptum Dei violetur; verum longè diverso sensu peccatum mortale ita offendit Deum, ut ejus contemptum et abjectionem includat. Nimirum peccans mortaliter unionem cum creaturâ unioni cum Deo anteposit, ac proinde Deum deserit et contemnit, atque in eum rebellat. Contrà verò, justus in peccatum veniale incidens, à Deo ut fine ultimo non avertitur, ipsum non deserit nec contemnit; benevolentiae divinæ non præfert creaturarum

possessionem; quippe nihil aliud est peccatum veniale, quàm aliqua præcepti divini transgressio ita levis, ut juxta veram æstimationem dissolvendæ Dei cum creaturâ suâ unioni non sufficiat. Jam porrò nemo non videt offensam ejusmodi non esse offensam simpliciter, sed tantum secundum quid et sub aliquo respectu, proindeque de ejusmodi offensæ gravitate et ordine idem non esse statuendum quod de offensâ per peccatum mortale illatâ docuimus.

Dices 2^o : Justus pro peccato veniali non magis satisfacere potest ex propriis et ex aliis indebitis, quàm pura creatura gratiæ donis ornata potest ex propriis et ex aliis indebitis pro peccato mortali, proprio aut alieno satisfacere; ergo, etc. Nego consequentiam. Non dicimus justum pro peccato veniali posse secundum perfectionem justitiæ satisfacere, sed tantum illud posse condignam exhibere satisfactionem. Atqui, ut satisfactio secundum perfectionem justitiæ reddatur, necesse est quidem hanc fieri ex propriis et ex aliis indebitis; idem verò non requiritur ad satisfactionem tantum condignam, sed sufficit æqualitatem restitui per actus satisfactorios in quos illud personæ satisfaciendi competat dominium, quod actibus liberis intrinsecum est; adeò ut illi actus liberè producantur et eorum valor liberè in satisfactionem impendatur. Enimverò alia est ratio satisfactionis ac restitutionis; in restitutione transfertur dominium saltem physicum rei quæ restituitur, proindeque in eâ maximè attendi debet an fiat ex propriis et aliis indebitis; in satisfactione verò non transfertur ullius rei dominium, sed solum redditur honos ablati, et injuria illata compensatur; ergo ut condignè satisfiat, sufficit actibus liberis tantum honorem reddi, quanta erat injuria reparanda.

Dissertatio vi.

DE NATURA INCARNATIONIS.

Naturam Incarnationis non ita exponere aggredimur ut mysterium tam altè reconditum captui et intelligentiæ nostræ subicere intendamus. Diligenter enim in Dissertationis hujus limine advertendum est, non idem esse theologi naturam alicujus mysterii explicare et evolvere, ac illud ipsum ratione attingere et planum manifestumque facere. Agnoscunt divinarum rerum tractatores hoc posterius penitus repugnare, quia Deus optimus, ut obsequio fidei locum daret, non nisi imperfectam et te-

nebris obsitam mysteriorum fidei notitiam nobis in hac vitâ concessit. Prius verò feliciter tentant et exequuntur, quippe quod in aliquâ hujusmodi imperfectæ notitiæ expositione, et in tradendâ fidei prædicandæ accuratâ ratione solùm consistit. Itaque hic nobis duntaxat animus est illam quam ex Scripturis et traditione haussimus Incarnationis ideam post sanctos Patres et theologos pro virili evolvere, ita ut exactiorem et hæresibus comprimendis aptiorem de mysterio nostro loquendi usum deliniamus et exponamus.

Jam verò, cùm natura mysterii Incarnationis in eâ unionem mirabili consistat, quâ natura humana Christi cum naturâ divinâ in personâ Verbi hypostaticè conjungitur; liquet totam præsentem quæstionem circa ea quæ ad hanc unionem pertinent explicanda versari. Quatuor autem capitibushæc omnia complectimur. Primum erit de unionem hypostaticâ seu personali, ubi quid voces hypostaseos, personæ, etc., significant aperiemus; secundum, erit de extremis unionis hypostaticæ; tertium, de ejusdem unionis modo; quartum, de ejus proprietatibus, præsertim de communicatione idiomatum.

CAPUT PRIMUM.

De Unionem hypostaticâ in se spectatâ.

Unio hypostatica seu secundum hypostasim aut subsistentiam definiri potest: Unio quâ natura humana et natura divina in unitatem personæ Verbi divini in Christo conjunctæ sunt. Itaque hujusce unionis in se sumptæ tractatio duo inquiri postulat, primum, quid voces *hypostaseos* et *personæ* juxta Ecclesiæ usum significant; alterum, quid unionem hypostaticam formaliter constituat. Istud igitur caput in duos Articulos dividemus.

ARTICULUS PRIMUS.

De usu et significatione vocum Hypostaseos et Personæ. — 1° Ejusmodi vocabulorum usus et necessitas.

Nominum hypostaseos et personæ sensus quidemprehenditur in Scripturis, at non verba ipsa, atque ea, non nisi cogente necessitate, ad coarctandas hæreticorum fraudes in fidei prædicationem invecata sunt. Enimverò, mysteria Trinitatis et Incarnationis ad quæ exprimenda his vocibus utimur, non aliis in Scripturâ sacrâ sentiis designantur quàm istis aut similibus: Patrem, Filium et Spiritum sanctum esse tres, et simul esse unum Deum; Christum esse Verbum carnem factum, esse

Deum et hominem, esse Filium æqualem Patri, formâ servi indutum, etc. Quibus loquendi modis, cùm aliæ deinceps formulæ adjectæ sunt, putâ, unam esse in Deo naturam et substantiam, et tres personas, vel hypostases, aut subsistentias; atque unam esse in Christo hypostasim et personam, duas autem naturas: non ideò quidquam novi dogmatibus in Scripturâ inculcatis adjectum est, siquidem nihil vocabulis illis significatur, nisi quod Scripturæ locutiones referunt; neque major horumce inscrutabilium mysteriorum intelligentia ex hæc vocabulorum accessione fidelibus instillata est. Quippe quid sint, v. g., tres personæ, perinde inexploratum est, ac cùm Pater, Filius et Spiritus sanctus tres simpliciter dicebantur. Cùm *quæritur quid tres*, inquit S. Augustinus, lib. 5 de Trinitate, cap. 9, *magnâ prorsus inopiâ humanum laborat eloquium. Dictum est tamen tres personæ, non ut illud diceretur, sed ne taceretur.* Itaque non aliâ de causâ hæ voces ab Ecclesiæ doctoribus usurpatæ sunt, quàm ut genuina fides et verus Scripturarum sensus contra hæreticos illibata et integra servarentur. Nempe, cùm novorum dogmatum inventores perversis suis et distortis interpretationibus sacras Scripturarum sententias erroribus suis accommodarent, necesse fuit controversias fidei ipsis terminis quibus motæ et agitatæ fuerant definiri, sicque, novarum vocum usu, hæreticorum tergiversationibus et fallaciis occurri. Quod inprimis annotavit Facundus Hermianensis lib. 1: « Personarum nomen, inquit, « nonnisi cùm Sabellius impugnaret Ecclesiam « necessariò in usum prædicationis assumptum « est; ut qui semper tres crediti sunt et vocati, « Pater, Filius et Spiritus sanctus, uno quo- « que simul et communi personarum nomine « vocarentur. Deinde etiam subsistentiæ dictæ « sunt; quoniam Ecclesiæ placuit ad significandam Trinitatem, et hoc nomen distinctioni personali tribuere. »

2° *Quid vox Personæ significet.* — Persona vulgò definitur: Natura rationalis ultimò completa. Differt à supposito ut species à genere, nempe suppositum est natura quæcumque ultimò completa, unde natura irrationalis etiam potest esse suppositum. Soli verò naturæ rationali nomen personæ competere potest. Omnis igitur persona est suppositum, non verò omne suppositum est persona. Id porrò, quo natura ultimò completur, generatim nunc appellatur subsistentia, et ubi agitur de personâ, dicitur etiam personalitas. Idem ergo subsi-

stentiam inter et personalitatem discrimen intercedit, quod inter suppositum et personam. Omnis personalitas est subsistentia, sed non omnis subsistentia est personalitas. Quid verò sit illa subsistentia et personalitas seu ultimum illud complementum quo suppositum et persona in ratione suppositi seu personæ constituuntur, jam declarandum; atque in eo tota præsentis quæstionis difficultas consistit.

Subsistentia definiri solet: Ultimum complementum naturæ, eam reddens incommunicabilem alteri tanquam supposito. Dicitur 1º, *Complementum*, id est, perfectio et forma quædam, seu modus aliquis actualis. Dicitur 2º, *ultimum*, id est, cæteras perfectiones, proprietates et affectiones ipsamque existentiam supponens. Dicitur 3º, *naturam reddens incommunicabilem alteri tanquam supposito*, quibus vocibus exprimitur illius formæ seu complementi natura et effectus formalis. Quod ut intelligatur, quadruplicem hic distinguere solent incommunicabilitatem. Prima est incommunicabilitas alteri tanquam subjecto inhæsionis; hæc incommunicabilitas substantiam constituit, ac proinde competit supposito et personæ, siquidem accidens non potest esse suppositum aut persona; verum supposito vel personæ constituendis illa non sufficit; quippe quidquid habet rationem substantiæ, non ideò est persona vel suppositum; v. g., natura humana in genere, non est persona, etsi ratio substantiæ ipsi conveniat.

Secunda est incommunicabilitas alteri tanquam inferiori; quæ in singularitate seu entitate numericâ et individuali consistit, atque ab existentia inseparabilis est; quidquid enim existit, unum sit et singulare necesse est; universalis non existunt, nisi quatenus attributa quibus naturæ universales constant, in earum individuis è nihilo eductis continentur. Porro ad rationem suppositi requiritur quidem, sed non satis est ista incommunicabilitas; nam, etsi omne suppositum sit substantia singularis, non tamen omnis substantia singularis est suppositum. V. g., manus Pauli est aliqua singularis substantia, nec tamen rationem suppositi continet. Pariter anima ejusdem Petri, quamvis sit substantia singularis non est etiam persona, propter habitudinem quam habet ad corpus cui unitur.

Tertia est incommunicabilitas alteri tanquam toti. Hæc soli convenit toti actuali propriè dicto, id est, soli substantiæ singulari, quæ nec aliqui uniri indiget ut omnem sibi naturalem

perfectionem habeat, nec reipsâ unitur alteri à quo perficiatur. Deest verò 1º naturæ seu substantiæ incompletæ, quæ scilicet, quamvis sine cujusvis consortio existat, alteri tamen uniri indiget ut perfectione sibi naturali potiatur. Sic anima à corpore sejuncta dici non potest incommunicabilis alteri tanquam toti, quia habitudinem ad unionem cum corpore naturâ dicit, quippe cum ipsi sint naturales functiones quas avulsa à corpore exercere nequit. Deest proinde 2º parti propriè dictæ, id est substantiæ, quæ sui unionem cum altero, illud perficit et ab eo vicissim perficitur, ut manus quæ jungitur corpori, corpus quod animæ copulatur, etc. Deest 3º illi parti impropriè dictæ, quæ illud cui unitur non perficit, sed tantum ab eo perficitur, cujus fortè nullum exemplum planè idoneum reperire est nisi in naturâ humanâ Christi. Etenim nulla fortè datur res vel minima, quæ finito quantumlibet perfecto adjuncta aliquid ei perfectionis non adjiciat. Christi verò humanitas perficitur quidem unionem suam cum Verbo, et ad tantam dignitatem evehitur, ut non possit altius extolli, sed nullam, sui accessionem, Verbo divino perfectionem affert. Quid ita? quia Verbum utpote infinitè perfectum, omnes humanitatis perfectiones eminenter continet. Unde naturam humanam assumendo factum non est pars perfectionis Christi, nec rationem totalitatis perfectionis amisit, seu Christus divinâ et humanâ naturâ constitutus, non est perfectior personâ Verbi in se tantum considerati.

Quarta est incommunicabilitas alteri tanquam supposito, id est, quâ natura singularis et totalis fit sui juris physici; ita ut 1º quæcumque diversis ejus respectibus aut partibus competunt, ejus reipsâ sint, ei attribui debeant, ut toti omnes partes et facultates et respectus suos continenti; ita ut 2º, ejusmodi natura singularis et totalis, quatenus hæc incommunicabilitate afficitur, non possit de altero prædicari neque sit alterius essentia et attributum, neque ejus pars aut accessio quædam, vel forma, vel modus. Rem explico exemplo; etsi intellectio et volitio Petri ab ejus animâ solâ eliciantur, et functiones ejus corporis à facultatibus ipsius corporeis producantur, ac proinde ejusmodi actus tribui possint, hi facultatibus corporis ac corpori Petri, illi, ejus animæ et facultatibus ejusdem spiritualibus, attamen tum ejusmodi volitiones et intellectiones, tum motus illi et functiones corporeæ reverà Petri personæ attribui debent,

utpote cujus sunt tum anima, tum corpus, tum proinde utriusque facultates et operationes; ipse verò Petrus de altero prædicari non potest, neque ut essentia aut natura, neque ut forma et attributum, neque ut pars aut actus ejus. V. g., dici non potest esse natura aut forma aut pars Pauli, Joannis, etc., quia nempe ab iis distinguitur et disjungitur, et seorsim existit. Sic igitur concipere est Petrum esse sui juris et incommunicabilem alteri tanquàm supposito.

De hæc quartâ incommunicabilitate tria dicam paucis. Primum, eâ nihil contineri, quod subsistentiæ seu rationi personæ et suppositi apprimè non congruat, ut exemplo mox allato liquet. Alterum, hanc esse necessariam appendicem incommunicabilitatis alteri tanquàm toti. Quippe totum propriè dictum, cùm seorsim et sine alterius à quo perficiatur consortio existat, necessariò est sui juris physici sensu quem mox explicavimus; hoc est, neque alterius est attributum, nèque actio, modus, vel forma, neque ejus est pars propriè dicta, aut accessio quædam. Tertium est illam tamen incommunicabilitatem alteri tanquàm supposito in definitione subsistentiæ minùs accuratè exprimi. Malè enim memoratur suppositum in definitione in quâ agitur de ejus ratione constitutivâ explicandâ.

Ergo ut accuratiùs definiamus subsistentiam, dicimus 1º, hanc in genere esse modum existendi, quo substantia singularis redditur incommunicabilis alteri ut perficienti. 1º *Est modus existendi*, unde cùm priùs (ratione) sit existere, quàm existere tali modo, seorsim videlicet, aut alteri unitum, sequitur subsistentiam esse ultimam rei formam, seu modum, id est, eâ supponi omnes rei perfectiones, proprietates et modos existentes. 2º *Est modus quo substantia singularis*, etc., scilicet ut dictum est, neque accidentibus, neque universalibus potest competere ratio suppositi aut personæ. 3º *Est modus quo ejusmodi substantia redditur sui juris, seu incommunicabilis alteri perficienti*; talis videlicet est ille modus, ut, eo stante, natura cui inest seorsim existat et distincta ab alio quocumque à quo perficeretur.

Probatur autem hanc definitionem subsistentiæ in genere esse legitimam 1º, quia hæc definitione continetur quidquid in alterâ vulgari, singulas ejus partes recensendo, contineri diximus. 2º Quia ea definitio convenit omnibus subsistentiarum speciebus, nempe subsistentiis tum divinis, tum creatis, et insuper id conti-

net quo posito suppositum et persona concipiuntur, quo sublato non concipiuntur. Convenit quidem nostra definitio subsistentiis divinis; tres enim subsistentiæ seu personalitates divinæ sunt totidem modi existendi, quibus natura divina in genere talis personæ contrahitur, et sub eo respectu incommunicabilis redditur. Convenit etiam nostra definitio subsistentiis creatis. Quocumque modo explicetur ratio suppositi et personæ in creatis, seu sit modus realis naturæ singulari supperadditus, seu nihil aliud sit quàm ratio totius, seu perfectionum totalitas, seu quod in idem recidit, concipiat in negationis unionis alteri ut comparti perfectivæ, etc., planum est ejusmodi ratione seu subsistentiâ illud includi quod nostra definitio complectitur. 3º Ubi ponitur in aliquâ singulari substantiâ modus existendi eam incommunicabilem alteri perfectivo reddens, tunc ratio suppositi concipitur; sublato autem hoc existendi modo, ratio suppositi et personæ concipi non posset. Enimverò quidquid alteri perfectivo physicè communicatur, seu conjungitur, seorsim non existat nec sui juris sit necesse est, nec proinde potest esse persona vel suppositum. Positâ verò ratione existendi singularem substantiam reddente incommunicatam alteri perfectivo, adeò evidens est adesse rationem suppositi, ut aliud quidquam assignari nequeat, quod vocibus suppositi et personæ intelligatur.

Nec objicias subsistentiam et personalitatem, seu rationem suppositi et personæ terminis abstractis et generalioribus à nobis definiri. Etenim quod universalissimum est, atque Deo et omnibus personis et suppositis creatis est commune, illud vocibus abstractis et universalissimis explicari nihil mirum; quemadmodum rationes generales substantiæ, modi, potentiæ, individuationis, et alia ejusmodi benè multa ad ontologiam pertinentia abstractis et generalissimis notionibus explicantur.

Dico 2º subsistentias seu personalitates divinas esse eas proprietates relativas quæ singulis personis propriæ sunt; in creatis verò subsistentiam in totalitate perfectionum substantiæ singularis reponi.

Probatur prima pars, quia per proprietates relativas, unicuique personæ divinæ proprias, nempe per Paternitatem, Filiationem et Spirationem passivam (quæcumque sit illarum perfectionum ratio quam non satis cognoscimus), natura divina triplici modo existit, et, ut existens tali modo, incommunicabilis est alteri

personæ divinæ, quod ex principiis fidei in tractatu de SS. Trinitate facillè deducitur. Quod autem naturam divinam contrahit, eamque, ut tali modo existentem, personæ divinæ incommunicabilem reddit, id consequenter hanc reddit incommunicabilem alteri ut perfectivo. Quippe si (quod prorsus repugnat) natura divina ut sit contracta alicui perfectivo communicari posset, sanè non nisi quatenus, ut sic contracta poneretur (quod pariter impossibile est) alteri personæ divinæ communicari. Enimverò planum est personam divinam, utpote perfectissimam, nullâ suâ communicatione cum naturâ quâlibet creatâ posse perfici. V. g., Filius Divinus assumendo et sibi uniendo naturam humanam, perfectior non factus est, quippe, cum infinitus sit, omnes non tantum hujus humanitatis, sed etiam omnium creaturarum perfectiones eminenter continet.

Probatur secunda pars; nempe subsistentiam in creatis nihil aliud esse quam rationem totalitatis perfectionum subsistentiæ singularis. Hæc enim totalitas est certus existendi modus, in eo positus quod res nec exigit uniri, nec reipsâ uniatur physicè cum altero à quo perficiatur. Substantia enim singularis quæ naturâ ultiores perfectiones exigeret, non conciperetur totalis ratione perfectionum; imò nec esset completa in ratione naturæ. Hinc anima humana, quæ sejuncta à corpore, quasdam facultates sibi naturâ insitas exercere non potest, incompleta appellari solet, nec totalitatis propriè dictæ rationem includit. Porro substantia singularis completa in ratione naturæ, nec per se postulans uniri cum altero, si reipsâ tamen alteri perficienti adjungatur, eo ipso desinit habere perfectionum totalitatem, quippe ulteriorum perfectionum additione hanc totalitatem tolli manifestissimum est; quemadmodum numerus, v. g., denarius, unius unitatis adjectione fit undecimus, et denarius esse desinit. Jam verò nemo non videt, hanc totalitate perfectionum stante, substantiam singularem cui competit, esse incommunicabilem alteri perficienti; ergo. Et certè, nonne evidentissimum est omnem substantiam singularem et totalem suppositum aut personam appellari; quidquid verò non est substantia singularis totalis, illud nec personam nec suppositum dici. Atque hinc omne accidens, omnis substantia et natura communis omnis etiam substantia singularis quæ sit pars physica alicujus totius, aut alterius principalioris accessio quædam et veluti

additamentum, excluduntur à ratione suppositi et personæ, ergo, etc.

Ex his colliges quâ ratione utcumque explicare liceat 1^o, unam esse in Christo personam Verbi divini; 2^o naturam Christi humanam carere propriâ subsistentiâ, seu personalitate, subsistere verò et terminari personâ seu subsistentiâ Verbi. Cum enim unione suâ cum Verbo divino natura humana Christi ulteriùs perficiatur, manifestum est hâc unione ipsi auferri rationem totalitatis perfectionum, quam habuisset si cum altero perfectivo non fuisset unita. Caret verò hâc totalitatis ratione, non propter deductionem seu jacturam ullius perfectionis sibi essentialis, sed propter perfectionis alicujus maximæ et supernaturalis, nempe unionis cum Verbo, adjunctionem et accessionem; etenim nihil aliud præter ejusmodi unionis adjectionem, huic rationi totius auferendæ necessarium concipitur. « Dicendum, inquit S. Thomas, parte 3, q. 4, a. 2. ad 2, quod « naturæ assumptæ non deest propria personalitas propter defectum alicujus, quod ad « perfectionem naturæ humanæ pertineat; sed « propter additionem alicujus quod est supra « naturam humanam, quod est unio ad divi- « nam personam. » Vide etiam ejusdem Opusculum 3, cap. 6, et Compendium Theologiæ, cap. 211. Quando autem natura humana Christi unita est Verbo divino, sicque caruit subsistentiâ sibi propriâ seu totalitate perfectionis, ex ejusmodi unione subsistentia aliqua communis Verbo et naturæ humanæ minimè coaluit; sed rationem personæ et subsistentiæ solum Verbum servavit et constituere potuit; quippe ex ipsius solius parte mansit totalitas perfectionum, neque hâc unione communicatum est alteri perfectivo. Enimverò, ut jam dictum est, nulla perfectio accessit aut accedere potuit Verbo divino, cum naturam humanam in Christo sibi hypostaticè copulavit; siquidem Verbum divinum, propter infinitam perfectionem sibi essentialem, formaliter continet perfectiones summas, omnis perfectionis finitæ, ac proinde perfectionum naturæ humanæ vicem præcellentissimâ ratione supplentes. Quapropter Christus constans uaturâ divinâ et naturâ humanâ in unâ Verbi personâ conjunctis, perfectior non est solo Verbo divino seorsim spectato. Atque hinc natura humana Christi subsistere dicitur et ultimò compleri et terminari subsistentiâ seu personâ Verbi divini; quod scilicet hæc natura ita uniatur Verbo ut ejus sit velut accessio quædam, quòdque

propriâ subsistentiâ non subsistens, una sit ex naturis quibus constat Christus, qui non aliam subsistentiam et personalitatem habet quam personalitatem Verbi divini.

Colliges 2^o, malè fingi à pluribus scholæ theologis substantialem quamdam entitatem modalem naturæ superadditam, in quâ entitate rationem subsistentiæ reponant. Etenim 1^o hujusmodi entitatis modalis nullum in rerum natura reperire est vestigium; imò, si solis philosophiæ principiis insistas, quæcumque concipiuntur ad suppositi aut personæ notionem pertinere, tunc alicui substantiæ evidenter insunt, cum habet omnia ad suam naturalem integritatem requisita, et insuper non adjungitur alteri ejus sit pars aut accessio. 2^o Fides mysterii Incarnationis nullo pacto exigit entitatem ejusmodi in suppositis aut personis creatis agnosci. Natura enim humana Christi, etsi singularis et completa in ratione naturæ, tamen unita Verbo concipitur non esse persona, etsi hâc unione nullam entitatem deperdat; nam non est persona, si non existat seorsim, non sit proinde sui juris, non habeat rationem totius: non existit autem seorsim, non est sui juris, non habet rationem totius, seu totalitatem perfectionum ipsi tribui nequit, statim atque unitur perfectiori, ejus sit veluti accessio et quoddam veluti additamentum, ut jam explicatum est; ergo, etc.

Dices: Una est in Deo natura et persona triplex, et una ex adverso persona in Christo et natura duplex; ergo realiter distinguuntur natura et subsistentia seu personalitas; ergo subsistentia et personalitas in aliquâ entitate modali et substantiali quæ naturæ superaddita concipiatur, reponendæ sunt. Aliàs metuendum est ne erroribus veterum hæreticorum, Sabellii scilicet, Arii, Nestorii et Eutychis patrocinium præbeatur, si quidem ii idcirco erraverunt, quòd inter suppositum seu personam et naturam non satis distinguerent.

Nego utramque consequentiam. Cum subsistentia, ut diximus, sit aliquis modus rei existentis, non solum fides, sed etiam ratio manifestè postulat distinctionem aliquam inter naturam et subsistentiam seu personalitatem admitti, quæ verò illa sit distinctio non faciliè determinatur. 1^o Procertoponimus hanc non esse realem majorem, quæ etiam simpliciter realisset nuncupari, id est non esse hujus generis distinctionem, quæ inter substantiam et substantiam, personam et personam, rem et rem constituitur; quòd quidem de se evidentissimum est. 2^o

Statuimus illam ejusdem speciei esse in creatis, ejus est distinctio quæ inter naturam et ejus modificationes non necessarias intercedit. Namque subsistentia est quidam existendi modus quem natura creata non conservat ubi unitur physicè alteri à quo perficiatur, ac proinde modis qui possunt adesse vel abesse sine subiecti interitu illa accensenda est; ergo qui modos rei non necessarios volunt abs re ipsâ distingui positivè et ante omnem mentis operam, distinguant eâdem ratione, per nos licet, subsistentiam à naturâ quam complet et terminat; qui verò modos ejusmodi inter et naturam agnoscunt distinctionem virtuales tantum, non aliam admittant inter subsistentiam et naturam; neque de hâc opinione etiam hic disputabimus. Scilicet ab ejusmodi subtilibus, et in utramque partem agitari solitis logicorum quæstionibus, certitudo aut explicatio fidei non pendet. Mysterio Incarnationis satis est subsistentiam humanam ab humanitate modaliter distingui, id est instar modorum à naturâ cui insunt; ex quo consequens est, sicut substantia quævis potest existere sine aliquo modo speciali quo non necessariò afficitur, ita naturam humanam Christi posse esse sine subsistentiâ propriâ, si nempe perfectiori, ut dictum est, putà Verbo divino physicè uniatur. 3^o Quod ad perfectiones relativas quibus personalitates divinæ constituuntur, attinet, eas dicimus eodem modo distingui à naturâ divinâ quo cæteræ ejusdem naturæ proprietates necessariae. A se invicem ejusmodi relativæ perfectiones distinguuntur quidem realiter quia constituunt personas inter quas distinctio realis major admittitur; sed ad naturam divinam cui insunt seu inhaerent, non aliam dicunt habitudinem quam cætera attributa seu proprietates. Proindeque si hæ à naturâ divinâ distinguuntur positivè et ante omnem mentis operam, idem statuendum erit de personalitatibus divinis ad naturam comparatis. Sin autem cum Thomistis attributum absolutum à naturâ divinâ dixeris duntaxat virtualiter et æquivalenter differre, personalitates divinas à naturâ solum etiam virtualiter et æquivalenter secernere erit. Quævis porrò seligatur opinio, concedendum erit tum ejusmodi personalitates inter et naturam esse aliquam distinctionem, tum ejusmodi distinctionem, quæcumque sit, sufficere ut, servatâ unitate naturæ, tres sint in Deo realiter personæ. Sed hujus argumenti tractatio ad hunc locum non pertinet.

3^o De usu et significatione vocis ὑποστάσις,

ubi de ejus a substantiâ et naturâ discrimine. — Vox ὑποστάσεως, si primam ejus originem et acceptionem attendas, id significat quod reipsa existit, estque aliquid solidum, non fictum et adumbratum. Hinc 1° derivata est ad designandum aliquid permanens et consistens, cui opponitur res fluens et caduca, quo sensu res omnes creatæ hypostasi carere aliquando dictæ sunt. Hinc 2°, tota litterarum secularium schola, si S. Hieronymo fides in Epist. ad Damasum nihil aliud hypostasim, nisi USIAM, (id est, substantiam) noverat. Hinc 3°, deduci faciliè potuit ad significandam substantiam singularem, actu existentem, completam, et per se seorsim ab aliâ omni subsistentem, quæ, ut diximus, in rebus ratione destitutis idem est ac suppositum, et in naturis intellectu præditis appellatur persona. Omnes autem in eo conveniunt eruditi, hanc, à labente seculo quinto, ubique vocis hypostaseos obtinuisse notionem, ut sumeretur pro supposito aut personâ, aut saltem quod rarius est apud antiquos, pro formâ suppositi aut personæ constitutivâ, quæ, ut antea notatum est, solet hodiè *subsistentia* appellari. Vide Petav., lib. 4 de Trinit., et lib. 2 de Incarn. cap. 2. Porro Thomassinus, ex aliquo S. Augustini testimonio (L. 5 de Trin. c. 9), et ex altero Facundi Hermianensis (L. 1) inter se collatis, colligere sibi videtur nonnisi sub finem seculi quinti excusum fuisse à Latinis nomen *subsistentiæ*, quod vocabulo *hypostaseos* Græcis usitato responderet. Cæterum, *subsistentia*, ut monet Petavius, lib. 4 de Trinit. c. 3, n. 6, apud veteres non sumebatur in abstracto, sicut hodiè accipitur, sed concreti nominis vim habuit, et suppositum aut personam, non suppositi aut personæ formam tantum significavit.

Quis verò prioribus quinque Ecclesiæ seculis fuerit apud Christianos vocis *hypostaseos* usus; quidve eam inter et οὐσία, id est, *essentiam* seu *substantiam*, et φύσις, seu *naturam*, distulerit operosius est definire.

Petavius locis mox laudatis docet 1°, à Patribus Antenicænis, ab ipsâ synodo Nicænâ et à S. Athanasio contra Arianos disputante nomina *hypostaseos* et *usiæ* pro uno eodemque habita et ab illis utroque vocabulo nihil aliud fuisse designatum, nisi rem seu substantiam actu existentem, ac proinde singularem et determinatam; siquidem universalia non existunt. Hoc ipsum etiam traditur ab illustrissimo Huetio Origenian. lib. 2, pag. 32, et doctiss. Thomassino, jam laudato, lib. 3 de Incarn.

cap. 1. Docet 2°, φύσις proinde seu naturam ab *usiâ* et *hypostasi* tunc fuisse distinctam; voce φύσεως nimirum designante naturam communem, quæ definitione explicatur, seu complexionem attributorum necessariorum quibus singularibus communis constituitur. Docet 3°, à labente medio seculi quarti, *usiam* ab *hypostasi* aliquo modo distingui cœptam, ita ut prioris vocabuli eadem esset notio ac φύσεως, illudque naturam communem et ab individuis abstractam exprimeret, sola verò hypostaseos appellatio naturam actu existentem et singularem designaret. Docet 4°, ex quo usu recepta est illa *hypostaseos* ab *usiâ* distinctio, ut hæc communem naturam; individuum et singularem illa notaret; duplici ratione paululum diversâ *hypostasim* esse acceptam. Nimirum, aliis hanc fuisse substantiam individuum duntaxat, atque unam numero, quocumque tandem modo, hoc est seu proprio, seu alieno subsisteret; aliis verò substantiam non tantum singularem, sed etiam per se et seorsim ab aliâ omni substantiâ consistentem, quæ aliàs suppositum aut persona dici solet. Docet denique nonnisi post elapsam majorem seculi quinti partem, hypostaseos rationem fixam et constitutam fuisse, ut apud ecclesiasticos scriptores suppositum aut personam constanter designaret. Atque ista fusè prosequitur locis citatis doctiss. Petavius.

Plura verò iis adversa statuit eruditus Bullus, presbyter Anglicanus in eximiâ suâ *Fidei Nicænæ defensione*, sect. 2, cap. 9, n. 11. Is quidem fatetur voces *hypostaseos* et *usiæ* priscis temporibus apud Christianos variè usurpatas. Advertit vocem *usiæ* pro eo quod nos *hypostasim* appellamus à Pierio martyre et presbytero, Pamphili martyris præceptore apud Photium *Bibliot.cod.* 119, et ab aliis quibusdam aliquando fuisse acceptam. Notat quoque synodum Sardicensem quæ anno 347 habita est, et deinde plures è Catholicis et è scriptoribus ecclesiasticis per aliquod tempus eâdem voce pro eo, quod *usiam* seu *substantiam* dicimus, nos esse. Tandem diversas ejusmodi nominis interpretationes schismatis infausti causam attulisse observat. Verum contendit à priscis Ecclesiæ doctoribus, etiam qui concilium Nicænum antecesserunt, illud vocabulum aliquoties usurpari pro *subsistentiâ*, vel pro re singulari per se subsistente, quæ in rebus intellectu præditis idem est quod *persona*. Id verò invictè, nostro quidem judicio, probat testimoniis Origenis (1)

(1) Grotius in *notis* ad Joan. c. 1, v. 2, et

præsertim tomo 12 in Joan. edit. Huetianæ pag. 186, Dionysii utriusque, romani scilicet in Epistolâ adversus Sabellianos, apud S. Athanasium lib. de synodi Nicænæ decretis, et Alexandrini, tum in responsione ad quæstionem quartam Pauli Samosatani, tum in Apologiâ suâ contra Sabellianos apud S. Basilium lib. de Spiritu sancto cap. 29; sex episcoporum, qui è synodo Antiochenâ ad Paulum Samosatenum scripsère; S. Alexandri episcopi Alexandrini in Epistolâ ad Alexandrum Constantinopolitanum ante synodum Nicænam exaratâ; ac tandem Eusebii Cæsariensis *quo nemo melius*, inquit Bullus, *antiquum vocis ὑποστάσεως in Ecclesiâ usum intellexit*, quique in litteris suis ad Eustathium Antiochenum referente Socrate Hist. lib. 1, c. 25, scripsit, *Filium Dei propriam hypostasim et subsistentiam habere, Deumque in tribus hypostasibus unum esse*. Addit porro vir eruditus se vocis *hypostaseos*, « à scriptore « aliquo catholico de SS. Trinitate disserente « ante concilium Nicænum, aut aliquandiù « post, » pro usiâ usurpatæ nequaquam meminisse. Ait præterea *hypostasim* sumi pro *subsistentiâ* aut *personâ* à concilio Nicæno in Symbolo fidei, cum eos anathemate percutit, qui dicerent Filium esse ἐξ ἑτέρας ὑποστάσεως, ἢ οὐσίας *ex aliâ hypostasi, sive substantiâ* quàm Patris. Hæc ipsa sunt verba in quibus Petavius, et post eum Huetius et Thomassinus arbitrantur *hypostasim*, pro usiâ à sanctâ synodo sumi. Bullus contrâ existimat ibi damnari duos errores, unum nempe Arianorum rigidiorum, qui Filium neque ex substantiâ, neque ex hypostasi seu subsistentiâ Patris esse sentiebant, quique ideò eum, ut cæteras creaturas, ex non extantibus productum fuisse apertè pronuntiabant; alterum Semiarianorum, qui, cum Filium negarent esse consubstantialem Patri, non tamen inficiabantur eum ex Patris personâ peculiari quodam modo ante omnia tempora natum esse; quorum dogma disertè explicatum est ab ipso Petavio lib. 1 de Trinit. cap. 10, n. 7. Atque hanc suam sententiam confirmat Bul-

Epist. ad Hebr. c. 1, v. 5, ait usum vocis ὑποστάσεως pro personâ fuisse ab Origene primum in Ecclesiam ex Platonicis inductum. Sed hanc acceptionem antiquiorem fuisse colligit Bullus præsertim ex S. Hippolyto Portuensi, qui contra Noetum n. 5, edit. græco-latine Hamb. 1718, p. 17, hæc habet « Neque caro per se « sine Verbo subsistere (græcè ὑποστάναι) poterat, qui in Verbo habebat τὴν οὐσίαν (legit « Bullus ὑπόστασιν, sed repugnant omnes editiones) »; id est, inquit interpres Turianus, in Verbo subsistebat.

lus, 1^o auctoritate S. Basilii magni qui ejusmodi particulam symboli Nicæni hæc ratione in Epistolâ olim 78, nunc 125, tom. 3, p. 215, interpretatus est; 2^o ejusdem S. doctoris argumentis, quorum prius est, in tam brevi symbolo duas istas voces simul adhibituros non fuisse Patres Nicænos, si eadem fuisset ambarum significatio. Nec sanè hujusce symboli sensum satis assequitur Petavius, dum aliquam sibi videtur in eo ejusdem rei repetitionem deprehendere; de quo vide Bullum ubi supra, nobis enim in his diutius immorari non licet. Alterum est, duas reverâ extitisse modò memoratas Arianorum classes, quorum alii negarent, Filium è substantiâ esse Patris, alii contenderunt eum neque ex Patris substantiâ esse, neque ex ejus insuper prodiisse hypostasi; ac proinde pronum iuisse à Patribus Nicænis utrumque ejusmodi perversum dogma verbis de quibus agitur, tanquàm alienum à sensu ecclesiastico repudiari.

Demùm arbitratr Bullus vocem hypostaseos pro subsistentiâ aut personâ « sine offensione « usurpari perseveraturam fuisse, nisi, inquit, « Ariani ipsâ abusi fuissent ad propagandam « hæresim suam pro naturâ ac substantiâ eam « in generali significatione accipientes, ac « docentes Patrem et Filium duas esse hypostases, hoc est, naturas ac substantias diversas, à se invicem discrepantes. Adversus hos, « pergit ille, catholici doctores affirmârunt in « concilio Sardicensi Patris et Filii *μὴν* esse « ὑποστάσιν. » Quod ut confirmet recitat verba Epistolæ synodicæ, ut loquitur. Patrum Sardicensium, apud Theodoretum Hist. Eccl. lib. 2, c. 8, quæ hujusmodi sunt juxta ejus versionem: « Hæreticorum factio pertinaciter asseverat, « Patris ac Filii et Spiritûs sancti diversas esse « hypostases, à se invicem separatas; nos verò « hanc à majoribus accepimus ac didicimus, et « hanc tenemus catholicam atque apostolicam « traditionem et fidem ac professionem, unam « esse hypostasim, quam ipsi hæretici substantiam appellant, Patris ac Filii et Spiritûs sancti. » Quæ sic exponit: « Illic Patres, inquit, « disertè monent, se Patrem, Filium et Spiritum sanctum *μὴν* ὑποστάσιν dixisse eo tantum sensu, quo hæretici vocem ὑποστάσιν pro οὐσίᾳ acceperunt; significantes nimirum, se « alium hujus vocabuli sensum, apud veteres « Ecclesie doctores receptum (quippe à quibus « usurpatum fuerit pro personâ sive subsistentiâ) non ignorasse, eumque libenter amplexuros fuisse, ac fassuros juxta istam vocis

« acceptionem, tres esse in Divinitate per-
 « sonas sive subsistentias. Hinc tamen natum
 « fuisse constat triste illud dissidium, quod
 « post modum Orientis adeoque Occidentis
 « Ecclesias turbavit, de unâ sive tribus hypo-
 « stasibus divinis; dùm scilicet alii cum Patri-
 « bus concilii Sardicensis loqui amârunt; alii
 « verò veterem vocabuli usum et significatio-
 « nem retinuerunt, quem usum suâ tandem
 « auctoritate confirmavit concilium Constanti-
 « nopolitanum primum; in Epistolâ synodicâ
 « apud Theodoretum, eccl. Hist. lib. 5, c. 9.
 « Cæterum Ariani tandem etiam vocem ὑπο-
 « στάσεως unâ cum ὑσσίας vocabulo, è symbolis
 « suis abjiceindam decrevêre... in confessione
 « Constantinopoli scriptâ ab Acacio, Eudoxio,
 « aliisque qui Seleuciensis synodi decreto dam-
 « nati ad Imperatorem confugerunt. » Hacten-
 « us vir eruditus.

Jam verò, si inquiras quid de duabus adeò
 oppositis sententiis ac de veteri vocis *hyposta-*
seos usu tandem statuendum sit, dico 1°, vo-
 cabulum *hypostaseos* nunquàm à veteribus ubi
 de mysteriis nostris disserebant, usurpatum
 fuisse, nisi vel ut illud exprimerent quo nomi-
 nibus *subsistentiæ*, *suppositi*, aut *personæ* intel-
 ligimus; vel saltem ut substantiam aliquam
 singularem et realem seu actu existentem et
 ut extra nihil constitutam designarent. Enim-
 verò docti consentiunt quòd nonnisi alterutro
 ex his modis vox ejusmodi in scriptis veterum
 adhibita reperitur.

Dico 2°, pro certo tenendum vocem *hyposta-*
sis, multò antequàm Nicæna synodus habere-
 tur, à celeberrimis Ecclesiæ scriptoribus de
 SS. Trinitate disserentibus pro *subsistentiâ* aut
personâ aliquoties usurpatam fuisse. Atque illud
 profectò evincunt testes magni nominis à Bullo
 producti, quos etiam modò post ipsum lauda-
 vimus. Suadent etiam tum auctoritas, tum
 pondus rationum S. Basilii Magni eodem sensu
 Patres Nicænos illud vocabulum in suo symbolo
 adhibuisse.

Dico 3°, nullum afferri scriptorem ecclesia-
 sticum qui de mysteriis SS. Trinitatis aut In-
 carnationis disserens, ante celebratam synodum
 Sardicensem, *hypostasim* pro re singulari et
 existente tantum, non pro personâ aut supposito
 acceperit. Enimverò *Epistola* 38, aliàs 43, S.
 Basilii, in quâ ab aliis dici unam in Deo *hypo-*
stasim, quòd eam cum *usiâ* confunderent, ab
 aliis dici tres *hypostases*, observat, ideòque ejus-
 modi vocum notiones accuratè distinguit et
 explicat, non ante annum 369 ab habitâ synodo

Sardicensi vigesimum secundum exarata est.
 Et præterea S. doctor in eâ *hypostasim* inter-
 pretatur suppositum seu personam, tresque
 ait esse in SS. Trinitate hypostases. Jam autem
 observavimus eundem in Epistolâ 125, aliàs
 78, scriptâ an. 373, pro certo habere et ex
 professo statuere vocem hanc alio sensu quàm
 pro ὑσσία à Patribus Nicænis fuisse usurpatam.
 Pariter S. Athanasius non nisi anno 362 post
 syn. Sard. decimo quinto, scripsit tomum sy-
 nodicum ad Antiochenses in quo disserit de
 iis qui in eadem fide reverà consentientes, ta-
 men circa vocem *hypostaseos* differebant, ita
 ut alii tres hypostases profiterentur, alii unam
 tantum, prout illud vocabulum de *usiâ*, vel de
personâ intelligebant. Ipse verò, tum in Expo-
 sitione fidei, cujus annus incertus est, n. 2,
 t. 1, part. 1, pag. 100; tum in Tractatu ad il-
 lud: *Omnia mihi tradita sunt*, n. 6, ibid pag.
 108, ante an. 343, ac proinde ante concilium
 Sardicense exarato; tum etiam in lib. de Incar-
 natione et contra Arianos, ibid. part. 2, n. 10,
 pag. 878, vocem *hypostasis* pro *personâ* acci-
 pit. Siquidem in priori loco adversus Arianos
 docet *tres hypostases* in Deo *non esse divisas* sed
 distinctas; et in duobus aliis, *tres esse* in unâ
 Divinitate *hypostases*.

Objicitur quidem eum in Oratione 4, *contra*
Arianos, olim 5, n. 1, t. 1, p. 617, promiscuè
 sumpsit se *usiam* et *hypostasim*, atque eundem
 in Epistolâ ad Afros, trium horumce vocabu-
 lorum *usiæ*, *hypostasis*, et ὑπαρξενω; seu *existentiæ*,
 unam esse vim asserere; nempe iis signifi-
 cari, *hoc ipsum quod est.... et existit*. Verùm
 hæc oratio, ut et reliquæ contra Arianos, non
 ante annum 358 edita est, et Epistola ad Afros
 non ante annum 369 diu post synodum Sardi-
 censem.

Dico 4°, ex his maximè confirmari quod
 Bullus conjicit, videlicet ab Arianis primum
 vocem *hypostaseos* pro eo quod substantiam di-
 cimus fuisse usurpatam, ut nempe hæresim
 suam de substantiâ Filii diversâ à substantiâ
 Patris facilius propinarent. Nec videtur esse
 dubium quin propterea Episcopi quidam con-
 cilio Sardicensis, verbis, quæ ex Theodoreto
 refert Bullus, voluerint contra eos definiri
 unam esse Patris, Filii et Spiritus sancti hy-
 postasim eo sensu quo illi hæretici vocem
 ejusmodi pro *usiâ* seu *substantiâ* accipiebant.
 Etsi autem hæc definitio ut superflua et post
 confessionem Nicænam minimè necessaria ple-
 risque Patribus, ac proinde synodo probata non
 fuerit, ut ex S. Athanasio habetur in Epistolâ

ad Antiochenses, n. 5, t. 4, part. 2, pag. 772, adeoque Bullus à vero deviaverit hanc toti synodo adscribendo; attamen inde præsertim natus est diversus hujusce vocabuli usus, quo (salvâ tamen fidei substantiâ ut ibidem auctor est S. Athanasius) dissidiis non levibus occasio data est; quorum tractatio ad hunc locum non pertinet.

Dico 3^o vocem *hypostaseos*, pro subsistentiâ aut personâ à S. Cyrillo Alexandrino pluries adhibitam, pluries etiam contra Nestorium in significatione latiori; eandem de naturâ singulari et existente in anathematismis S. Doctoris interpretatos esse Theodoretum et Orientales; tandem cum pax S. Cyrillum inter et Orientales composita est, omnem hujusce vocabuli prætermisam esse mentionem.

Probantur singula. Primum, nempe S. Cyrillum Alexandrinum pro subsistentiâ aut personâ vocem *hypostaseos* pluries usurpasse, liquet ex *Dialogo 6 de Trinit.* t. 5, pag. 592, ubi ait Patri et Filio propriam esse utrique hypostasim; tum ex *Dialogo 1*, ibid. pag. 409, et ex lib. 3 *Contra Nestorium* t. 6, pag. 91, quibus in locis docet tres esse in Deo hypostases, et unicam ac singularem naturam; tum etiam ex ejus ad Valerianum epistolâ T. 5, p. 160, ubi salvam manere in Christo utramque hypostasim sentientes rejicit, eosque ex similitudine hominis mente et corpore constituti, in quo una tantum est hypostasis, refellit. Secundum, scilicet S. doctorem pluries etiam usurpasse hanc vocem in significatione quâdam latiori, seu genericâ respectu tum substantiæ realis et existentis, tum suppositi vel personæ, demonstrant varia testimonia ex scriptis quæ Nestorium aut ejus defensores edidit deprompta. Nam lib. 2 contra Nestorium docet « duos « induci Filios; nec unum jam Dominum, et « Christum et Filium fore, si utrique sua persona est et ratio atque etiam hypostasis ad « diversitatem secedens et rem veræ unionis « recusans, et quæ omnino cum alterâ convenire non possit. » Adverte nomini *hypostasis* rationem divisionis et separationis à S. Doctore adjici ad exprimendam suppositi notionem. In Defensione anathematismi sui primi, contra Theodoretum ait *rerum, sive hypostaseon concursum* (in Incarnatione) *factum esse*; quæ intelligi de unitione rerum solidarum et realium, seu naturarum singularium et existentium, non verò de personis, et orthodoxa fides, et doctrina quam ipse aliàs sæpè declarat, necessariò postulant. Non absimilia habet lib. 2 contra Ne-

storium, t. 6, pag. 33 et 34, ubi quod Nestorius appellaverat *naturam*, ipse *hypostasim* nuncupat. Eandem acceptionem *hypostaseos* observare est in (Defensione tertii anathematismi) contra Theodoretum et in (Defensione quarti) contra Orientales, etc. Tertium, Orientales, nimirum et Theodoretum in anathematismis S. Cyrilli *hypostasim* interpretatos esse naturam singularem, apertè deprehendere est in scriptis quæ Andreas Samosatenus nomine Orientalium et Theodoretus adversus eos promulgârunt, quæ extant t. 6 Oper. S. Cyrilli, pag. 159 et seqq., et t. 3 concil. Labbæi, p. 829 et 889. Quartum denique, omnem videlicet prætermisam fuisse *hypostaseos* mentionem, cum pax Orientales inter et S. Cyrillum redintegrata est, manifestissimè patet ex istius pacis monumentis, nempe ex *Confessione fidei* quam Joannes Antiochenus ad S. Cyrillum misit, et ex istius ad Joannem responso cui illa fidei confessio inserta est.

Quæres 1^o, quid causæ fuerit cur S. Cyrillus acceptionem *hypostaseos* pro personâ aut supposito, quam aliàs, præsertim ubi de Trinitate usurpat, contra Nestorium, et ejus defensores scribens non semper adhibuerit.

Respondeo S. doctorem latiori significatione contra Nestorium usurpando vocem *hypostaseos*, causæ Ecclesiæ consuluisse et inutiles morosasque vitasse nominis quæstiones. Enimverò naturam seu substantiam singularem et existentem inter et naturam seu substantiam per se et seorsim ab aliâ consistentem quæ suppositum dicitur, nihil differentiæ Nestorius agnoscebat. Proindeque vocem *hypostaseos* quæ à Pat. diversimodè, nempe vel pro naturâ seorsim existente, seu supposito, vel pro re singulari tantum et reali usurpata fuerat, cautè S. doctor nonnisi in significatione quâdam latiori adversus versipellem hunc hæreticum agens, plerumque accepit; ita ut ad suppositum vel personam significandam non poneretur sola, sed cum aliquo addito ipsam suppositi aut personæ rationem magis explicante et inculcante; imò et aliquando usurparetur ipso adversariorum sensu, pro naturâ singulari et existente, tum ad quæstiones vocum removendas, tum ad dogma catholicum ipsis pressius et evidentiùs ingerendum. Ubi observa longè aliter se gessisse S. Cyrillum circa vocem πρόσωπον *personæ*, ac circa nomen *hypostaseos*. Cum enim prioris indubitata et fixa semper fuisset notio, nunquam passus est hanc immutari aut dici in Christo duas convenisse perso-

nas. At de *hypostaseos* vocabulo utpote à Patribus variè accepto, necdùm illà ætate ad significandum suppositum aut personam planè fixo et constituto, prudenter œconomiâ uti voluit, atque illud ex scopo et adjunctis et ex adversariorum mente, ad hanc vel illam significationem induendam restringi.

Quæres 2^o quo sensu S. Cyrillus intellexerit nomen *hypostaseos*, in hâc sententiâ quam frequentissimè usurpat, quæque græcis latinisque theologis deinceps celeberrima evasit: *Naturam nempe humanam unitam esse Verbo secundum hypostasim*? Respondeo multis videri S. doctorem ibi vocem *hypostaseos* sumpsisse pro personâ; adeò ut sensus propositionis sit, naturam humanam naturæ divinæ per incarnationem unitam fuisse in unâ Verbi personâ; seu quod eòdem recidit, naturam humanam carere propriâ subsistentiâ, et in unâ Verbi personâ subsistere. Existimat verò Petavius, lib. 6 de Incarn. c. 2, n. 4 et seqq., nomine *hypostaseos* in hâc suâ sententiâ S. Cyrillum intellexisse φύσις seu naturum, atque istud significare voluisse, unionem naturæ humanæ cum Verbo divino esse secundum naturam, ut aliàs loquitur S. doctor, id est, realem, physicam, non moralem tantum, nec totum aliquod morale aut accidentale solum constituentem; uno verbo eam esse ex quâ resultet unitas suppositi.

Hic autem advertere operæ pretium est, utramque ejusmodi interpretationem, etsi, quod ad nomen *hypostaseos* attinet, valdè diversam, ad eundem tamen sensum sententiæ S. doctoris affligendum spectare. Nam si unio naturæ humanæ cum Verbo sit physica et naturalis, non moralis tantum, necesse est ejusmodi naturam in unâ Verbi personâ subsistere; et pariter, si natura humana Christi in unâ Verbi personâ subsistat, huic oportet illam physicè uniri. Unam proinde esse in Christo Verbi Dei personam, contra Nestorium S. Cyrillus eâ, de quâ agimus, sententiâ perindè expressit, seu eam pronuntians nomine *hypostaseos*, intellexerit personam aut suppositum, sive naturam aut essentiam cogitaverit. Nec sanè ibi tantum, sed et aliis in locis quandoque deprehenditur vox *hypostaseos* à sancto doctore sic adhibita ut duplici suâ vi perversam Nestorii doctrinam æqualiter feriat. Vid. Anath. 3 et 4 contra Nestor., etc.

Inde verò hoc efficitur, ut nonnisi difficulter solvi queat quæstio proposita. Cum enim aliàs constet, ut notatum est, S. Cyrillum du-

plici sensu usurpasse vocem *hypostaseos*, nempe pro personâ et pro naturâ aut substantiâ, adeoque ex adjunctis aut ex subjectâ materiâ definiendum sit utram variis in locis significationem hujusce vocabuli adhibeat; manifestum est mentem ejus non esse obviâ, ubi utraque significatio ad rem æquè pertinet, et in idem conspirat. Verisimilius tamen videtur hic et aliis in testimoniis in quibus nomen *hypostaseos*, neque ex antecedentibus neque ex consequentibus, neque ex ipsâ re subjectâ ad naturam seu substantiam tantum significandam determinatur, illud esse accipiendum de personâ aut supposito, quippe cum compertum sit hanc vocem ubi de Trinitate, et interdum ubi de Incarnatione, illo sensu à S. doctore sumi. Nec obstat quod Petavius ait, unionem secundum hypostasim, aliàs appellari à S. Cyrillo secundum naturam, secundum essentiam, naturalem, physicam, essentialem, substantialem, etc. Etenim illæ omnes denominationes ipsi unioni personali seu secundum subsistentiam et personam, perfectissimè conveniunt.

Dico 6^o, istud generatim statui posse, sæpè « veteres in usurpandis istiusmodi vocabulis, « usiæ, hypostaseos, naturæ, etc., non ejus « quam illis tribuebant, notionis, sed in quâ « usurpabant ii, contra quos vel ad quos, et « quorum gratiâ loquebantur, rationem habuisse. » Verba sunt Petavii, lib. 6 de Incarn. cap. 2, n. 8, qui et ibidem accuratè adjicit quòd, « etsi vocum ejusmodi non tanta est ab « illis adhibita cautio, quantam ii qui deinceps « sunt secuti, tenuerint; nihilominus aliis et « idem significantibus vocabulis, aut eodem « certè conspirante verborum circuitu ad hoc « pervenerunt, quod recentior theologia majore est compendio consecuta. Intellexerunt « enim, inquit, et aptis etiam sententiis exprimere studuerunt, in substantiâ quâlibet duo, « re implicata et involuta, ratione et cogitatione distincta cerni: quorum unum est « commune pluribus ejusdem nominis ac formæ; quod interroganti quid rei sit responderi soleat, ut in homine communi subjecta « nomini ratio ac definitio est, ut sit animal « intelligentiâ et ratione præditum; alterum « singulorum sub eodem vocabulo ac definitione proprium, quo à se mutuò illa dignoscantur; adjectis ad id quod commune est « particularibus notis. Sed nec istud ignorarunt naturam aliquam et substantiam esse « quæ non solum extaret reipsâ, nec nihil esset; « verum etiam per sese et ab quâcumque aliâ

separata consideret, nec in unius compositionem cum altero veniret.

ARTICULUS II.

In quo formaliter consistat Unio hypostatica.

Illud jam non semel monuimus, inò et ex Scripturis et ex traditione aliquando confirmavimus, hypostaticam unionem esse mysterium altius reconditum, quam ut à nobis mortalibus quos rerum vel maximè obviarum et tritarum natura latet, mente concipi et verbis dilucidè explicari valeat. Verùm generalem, imperfectam atque analogicam illius nexùs ideam, quam nobis suppeditat fides, cum philosophiæ placitis post SS. Patres et theologos hic conferre expedit; tum ut paulò minùs generalem, si fieri potest, ejus notionem, horumce placitorum ope, ex principiis fidei exprimamus; tum etiam ut magis ac magis illud appareat, quod jam disputatione 1, c. 2, art. 2, assecuti sumus, scilicet ejusmodi mysterium argumentis philosophicis frustra et præposterè ab hæreticis et incredulis impugnare.

Inprimis verò advertendi sunt quatuor modi quibus unionis hypostaticæ ratio, quoad licet, declarari potest. Primus adhibetur, cum vocibus propriis pro virili exprimere conamur quàm arcta sit illa unio et quis sit ejus formalis effectus. Hunc modum usurpant SS. Patres et theologo, dùm inculcant unionem naturæ humanæ cum Verbo divino in Christo, esse physicam et naturalem, veram, realem, solidam, intimam, intrinsecam, substantialem, secundùm naturam, secundùm substantiam, in personâ Verbi, secundùm hypostasim, etc. His omnibus locutionibus significare intendunt, unionem hypostaticâ constitui unum aliquod, constans duabus naturis perfectis et integris in unicâ Verbi personâ conjunctis. Quod ut plenius intelligatur, sciendum est *unionem* ab *uno* dici; nempe *unum* quod ex pluribus copulatis resultat, est formalis effectus *unionis*; hinc ad se invicem *unum* et *unio* referuntur, adeò ut talis sit *unio* quale est *unum* quod ex illâ coalescit, et vice versâ. *Unum* porrò vocatur quod minimè divisum est et multiplex. Aliud verò nuncupatur unum improprie et metaphoricè, aliud per se et proprie. Ea dici solent efficere quid *unum* improprie et metaphoricè, quæ etsi multa sint et non modò distincta et diversa, sed et separata, et seorsim extantia, ratione tamen affectûs vel similitudinis, vel imitationis aut finis ad quem tendunt, aut etiam loci

aut contactûs, necessitudinem quamdam et habitudinem inter se habent. In hâc significatione impropria et metaphoricâ cœtus, exercitus, acervus quoque rerum corporearum, etc., appellantur quid unum. Sic pariter S. Lucas ait Act. 5, v. 32: *Multitudinis credentium cor unum et animam unam fuisse*; et Christus Joan. 17, v. 21, discipulos suos *unum esse* jussit. *Unio* quâ *unum* ejusmodi efficitur, improprie dicta appellatur et moralis.

Unum per se et proprie dictum, illud est, quod verè et reipsâ indivisum est, seu quod coalescit vel ex attributis, vel ex rebus ita connexis ut multiplicem naturam, aut saltem multiplex suppositum aut personam non constituent. *Unio* ex quâ ejusmodi *unum* resultat, vera et proprie dicta dicitur; atque hujusmodi est unio hypostatica; siquidem Divinitatem humanitatemque consociat, non quidem in unicâ naturâ, sed in unicâ proprie eademque personâ. Quod quidem dogma contra Nestorium supra assertum est Dissert. 4. Idipsumque est quod diversis locutionibus quas modò retulimus, Patres et theologo declarare conantur.

Secundus modus unionem hypostaticam utcumque exponendi, consistit in enumerandis simul et excludendis variis unionum generibus ab hypostaticâ diversis. Scilicet juxta ejusmodi methodum dicitur unionem hypostaticam non esse metaphoricam, fictam, umbratilem, adumbratam; non esse moralem tantùm et secundùm affectum, qualis est inter amicos; non in prædestinatione solùm, aut præcellentissimis etiam gratiæ et gloriæ donis, quæ sanctis à Deo dantur, reponendam; non esse duntaxat secundùm dignitatem aut honorem, qualis intercedit principem supremum inter et magistratum aut ducem præcipuum, quem auctoritatis suæ princeps participem facit; neque secundùm solam habitudinem similitudinis alicujus, aut imitationis, aut dependentiæ instrumenti ab eo qui illud adhibet; nec denique secundùm contactum solum et unionem localem, ut est inter corpora contigua, vel inter liquores permixtos, aut substantias in eodem loci spatio sese penetrantes, et quoquo modo extantes. Planum est hanc methodum ad aliquam unionis hypostaticæ veram notionem nobis efformandam valdè esse utilem, maximè si, ut fieri solet, simul adhibeatur alter modus quem mox explicavimus.

Tertius ejusdem unionis declarandæ modus in variis comparisonibus et similitudinibus

positus est, quibus passim SS. Patres et theologi utuntur. Quæ etsi omnes imperfectæ sint et in multis vitiosæ mentem tamen coelestia attingere adnitentem utiliter fulciunt, ipsique ad veritatem capescendam maximo adjumento sunt. 1º Igitur Origenes, S. Basilius, S. Joannes Damascenus et alii usi sunt exemplo ferri igniti, ad diversa tamen pro sui scopi diversitate ejusmodi similitudinem referentes. Origenes enim humanitatem ferro et Divinitatem igni conferebat, ut nempe exprimeret totam naturæ assumptæ perfectionem et efficaciam summumque operationum per eam elicitarum valorem oriri à Verbo, quemadmodum tota vis urendi quâ ferrum ignitum pollet, non à naturâ ferri, sed ab igne derivatur. Sanctus Basilius verò hanc ignis et ferri comparisonem adhibuit, ut Verbum humanitatis assumptæ fragilitate et imperfectione vitiatum non fuisse adumbraret. Sicut enim ignis de ferri proprietatibus nihil accipit, neque ex ejus frigedine frigescit, neque ejusdem nigredine tingitur, sed potius ipsi calorem splendoremque communicat; « hunc ad modum, inquit S. Doctor, « et humana Domini caro cum Divinitatis effecta est particeps, suam ipsius infirmitatem « nequaquam contulit Divinitati. » Observat porro S. Joannes Damascenus, si ferro ignito aqua supereffundatur, ignem extingui; incolume manente ferro quod ab aquâ pati non natum est; illoque exemplo ostendit impassibilem divinitatem potuisse nullo pacto lædi, dum humanitas ipsi unita dolores passionis sustinuit. 2º Cyrillus Alexandrinus, lib. 2 contra Nestorium et alibi, carbonis ardentis similitudinem in medium adduxit. Ut enim carbo ex ligno et igne, rebus dissimilibus et in unitatem conjunctis constituitur, ita Christus constat duabus naturis in unâ personâ subsistentibus et coadunatis. Præterea, ut ignis de suis proprietatibus nihil amittens, in suum splendorem et vires lignum transfert; sic Verbum idem manens, quam assumpsit naturam, perficit et decorat. 3º S. Gregorius Nyssenus adversus Apollinarem disserens humanitatem à Verbo assumptam confert guttæ aceti immenso mari commixtæ, ut scilicet naturæ assumptæ perfectiones, si Verbi divini perfectioni comparentur, nullas esse adumbraret, easque divinâ virtute imbui, tum unam esse Christi personam significaret. 4º Theodorus de Abucara tom. 11; Bibl. PP. pag. 392, et Theorianus in Dialogo ad Armenos ut, sensibus quasi subijciant quâ ratione Filius divinus etsi

ejusdem cum Patre et Spiritu sancto essentialis, potuerit solus carnem assumere, atque ejusmodi novam induere naturam sine ullo Divinitatis suæ detrimento, Verbum incarnatum compararunt uni ex tribus aureis, qui solus in ignem coniectus ejus naturâ solus induitur, non amissâ naturâ auri. 5º Multi (1) hypostaticam unionem nominibus *mixtionis et mixturæ Dei et hominis*, aut similibus designarunt; metaphorâ procul dubio inde ductâ quòd res sensibiles sibi invicem immixtæ seseque immeantes maximè videantur uniri; atque ut inculcarent quidquid Verbo divino inest, illud toti humanitati arctissimè esse conjunctum. Ubi tamen, sicuti S. Augustinus diù ante Eutychis hæresim quæ his vocibus abusa est, accuratè advertit, oportet ut *recedat auditor à consuetudine corporum, quâ solent duo liquores ita commisceri ut neuter servet integritatem suam; quanquam, inquit præclaram et ipse similitudinem adducens, et in ipsis corporibus aeri lux incorrupta misceatur.*

Verùm has omnes atque alias similes comparisones tum celebritate tum etiam convenientiâ majori facilè vincit ea quæ ab unionem animæ et corporis in homine ducitur. Hanc frequentissimè SS. Patres adhibent, necnon Symbolum quod S. Athanasio diù attributum est, ipsaque concilia passim. In tribus autem illa similitudo potissimum consistit. Enimverò 1º, sicut ex unionem animæ et corporis una exurgit natura totalis atque unum suppositum seu persona quæ sit talis homo; ita ex unionem Verbi cum naturâ humanâ resultat, non quidem una natura totalis (obstat enim summa Dei Verbi perfectio, ut sæpius explicatum est, eaque parte exemplum animæ et corporis deficit), sed unum totum duplici naturâ constans, nempe unus Christus, uno Verbi divino supposito seu personâ subsistens. 2º Anima et corpus, etsi tam arcto vinculo copulata, ita tamen à se invicem differunt, ut nisi tanta ejusmodi substantiarum unio experientiâ cognosceretur, procul dubio vix judicaretur possibilis. Hinc intelligitur summam distantiam quæ humanitatem inter et Verbum divinum intercedit non posse nobis obtrudi ut certum impossibilitatis unionis hypostaticæ ar-

(1) Tertul. l. 2, contra Marcionem et Apologet. c. 12; Orig. l. 3 contra Celsum; S. Cypr. de Vanitate idolorum; S. Greg. Nyss. Orat. catech. 25; S. Greg. Naz. Orat. 1; S. Augustinus in Epist. ad Volus. 137, aliàs tertia; S. Cyrillus Alex. in Thesauro, p. 235; S. Leo Serm. 22 de Nativitate aliàs 3; Vigil. Martyr, L. 1, contra Eutychen, etc.

gumentum. 3^o Denique, quæma lmodum suppositum unicum seu persona quæ ex unione animæ et corporis coalescit, est principium unicum ac subjectum denominationis omnium actionum tum animæ tum corporis; ita unione hypostaticâ naturæ humanæ ad Verbum divinum, efficitur ut una Christi persona, nempe persona Verbi, omnes non tantum Divinitatis, sed etiam humanitatis proprietates et actiones sibi vindicet, unumque sit principium per humanitatem operans; unde communicatio idiomatum capite 4 hujusce Dissertationis explicanda nascitur, necnon valor infinitus actionum quibus Christus pro nobis satisfacit.

Quartus modus unionis hypostaticæ explicandæ, in hac definiendâ quæstione situs est, an unio hypostatica aliquid in se physicum formaliter includat, seu utrum aliquam mutationem physicam, aliquam formam sive modum perficientem novum et realem arguat saltem in naturâ humanâ; quâ formâ seu modo ratio formalis hujusce unionis constituatur. Circa hanc quæstionem quæ jam nobis expendenda est, varias in partes scinduntur scholæ theologi; quorum eâ de re opiniones ad duo generatim systemata referri possunt ut jam alibi docuimus. Prius his terminis solet declarari hypostaticam unionem formaliter nihil distincti esse ab extremis unitis, nempe à personâ Verbi et à naturâ assumptâ. Sed hæc magis exponenda sunt. Defensores igitur hujusce systematis non modò pro certo ponunt Verbum divinum sibi naturam humanam uniendo nihil novi in se recepisse nullâque ratione esse mutatum, quod libenter admittunt adversæ sententiæ patroni; sed præterea statuunt ad rationem formalem illius unionis constituendam necesse non esse naturam assumptam physicè immutari, seu aliquâ formâ, aliquâ modificatione reali et physicâ instrui quam non habuisset, si à Verbo non fuisset assumpta. Quapropter ex eorum mente unio hypostatica definiri potest, communicatio subsistentiæ immutabilis Verbi, nullam naturæ assumptæ physicam mutationem in suo conceptu formaliter involvens. Dico *in suo conceptu formaliter*, quia non negant ii theologi quorum placita referimus, maximas ex unione hypostaticâ diffluere in naturam assumptam dotes, quibus physicè immutatur et perficitur. Dico etiam *nullam mutationem physicam*, quia libentissimè agnoscunt naturam humanam, etsi Verbo divino sine ullâ modi realis receptione (ut putant) uniatur, tamen hac unione eatenus dici posse mutata, quatenus, ut SS. Patres

observârunt, nexu tam intimo cum Divinitate ad summum honoris fastigium exaltata concipitur.

Quòd si objicias Incarnationem à Deo productam fuisse actione quâdam verâ et reali, ejus proinde esse debeat aliquis terminus formalis, nullum verò assignari posse hujus actionis terminum, nisi, præter Verbi personam increata, et naturam humanam quæ creatione producta est, aliquid physici et realis concipiatur ad hanc unionem formaliter requisitum, respondent actionem quâ Incarnatio peracta est, fuisse *unitivam*; terminum porrò actionis unitivæ esse unionem extremorum, seu illa uniantur per aliquod physicum de novo adveniens, seu sine ejusmodi medio; priori casu actionem quâ extrema copulantur esse *unitivam* simul et *productivam*; posteriori hanc appellandam esse *unitivam* tantum; demùm actionibus ejusmodi duntaxat *unitivis* illam accensendam esse quâ Deus Incarnationem peregit, ut et eam quâ hominis animam et corpus conjunxit. Utrum autem actio hujusmodi, quâ Deus Incarnationis mysterium operatus est, distinguatur necne ab actione quâ humanitatem Christi creavit, inter se disputant, quâ de re non inquirimus.

Si objicias iterum, relationem unionis nullam posse intercedere inter Verbum divinum et naturam assumptam, nisi in aliquo reali et physico fundetur, quod, ejusmodi unione non stante, minimè existeret, quod indifferentiam naturæ humanæ ad illam unionem tollat, quodque in hac naturâ sit receptum, siquidem in Verbo utpote immutabili nihil hujusmodi tantquam in subjecto recipi potest, aiunt huic fundandæ et efficiendæ relationi sufficere ipsam Verbi personam, seu personalitatem; hanc enim volunt ejus esse perfectionem, et ut loquantur, actualitatem, ut sine ullâ sui mutatione, sine ullâ novæ modificationis receptione, dicere possit relationem unionis physicæ ad hanc vel illam naturam rationalem, seu eam ultimò complere et terminare antecederet ad quamlibet etiam hujusce naturæ mutationem; quemadmodum, inquiunt, actus voluntatis divinæ simplicissimus et purissimus, sine ullâ sui mutatione atque idem semper manens, creaturas producit vel non producit. Atque hæc est summa prioris systematis, quod fusiùs expositum et latè propugnatum videre est apud Gonetum, t. 3 *Clypei Thomistici*, tract. de Incarn. disp. 6, a. 3, ubi illam opinionem tribuit Cajetano, Alvares, Joanni à S. Thom. et alijs

pluribus insignibus Thomistis. Eam quoque tenent quantum ad substantiam, Turnelius et Witassius. Goneto autem nihil super hanc re pronuntiâsse videtur S. Thomas.

Ad eandem sententiam revocandum est quod docet Thomassinus et ex SS. Patribus probare nititur toto ferè lib. 3 De Incarnatione, eo videlicet intelligi factam esse utriusque naturæ hypostaticam unionem, quo Verbum divinum ad se tanquam ad digniorem hypostasim, traxisse sibi physicè conjunxisse concipitur naturam humanam, ut eam velut sibi propriam suique juris factam immearet, regeret et ageret. Neque enim agnoscit ille quidquam in humanitate assumptâ esse productum, quo formaliter fiat ut illa humanitas immeetur, pervadatur regaturque à Verbo ea speciali ratione quæ hypostaticæ unioni constituendæ necessaria est. Hinc Witassius systemati mox exposito, ut notatum est, adhærens, explicationem Thomassini suam quoque facere et adoptare non dubitat.

Secunda opinio multorum etiam est qui existimant naturam humanam Christi non potuisse Verbo hypostaticè uniri nisi ipsa reciperet aliquid reale et physicum, seu aliquem modum realem, quo constitueretur formaliter unita cum personâ Verbi. Aiunt hunc modum naturâ suâ necessariò dicere relationem unionis physicæ inter naturam humanam et Filium divinum, adeò ut repugnet humanitatem eo affici, quin Verbo divino hypostaticè conjuncta sit. Naturam hujus formæ seu modi nobis esse ignotam non diffitentur; haud secùs, inquit, ac ignoramus naturam vinculi animam cum corpore unientis. Sed nihilominùs illum modum admittendum esse statuunt; quia eo sublato, 1º Verbum divinum non magis ad hanc naturam quam assumpsit, relationem habere videretur, quàm ad aliam naturam relationem; 2º natura assumpta ad unionem conciperetur indifferens, nec magis ad Verbum, quàm ab Patrem aut ad Spiritum sanctum relationem unionis diceret; 3º actio quâ tota Trinitas Incarnationem produxit nullum haberet terminum formalem nec quidquam physici produceret. Hanc sententiam prout à nobis terminis generalioribus hactenùs explicata est, multi sequuntur theologi; nempe Thomistæ insignes non pauci, teste Goneto ubi supra, Frassen De Incarnat. disp. 1, a. 2, cum aliis scholæ scotisticæ magistris, Suarem in 3 D. Th., disp. 18, Vasquez, disp. 18, Salmanticenses, etc. Hos verò inter nonnihil discriminis interjacet; nam aliqui

docuerunt realem illum naturæ assumptæ modum quamdam esse qualitatem supernaturalem, quam *gratiam unionis* nuncupârunt, ut eam humanitati quæ assumpta est, debitam non fuisse significarent. Alii dixerunt hunc esse modum substantialem, rati modo accidentali non nisi accidentalem unionem posse constitui, non verò substantialem et hypostaticam; ita Suarez, Vasquez, Salmanticenses, etc. Alii existimant eundem modum nihil aliud esse quàm modum realem seu physicum in humanitate Christi à Deo liberè productum, et ab eâ distinctum eadem ratione quâ modi solent distingui à substantiis quibus inhærent; cujus quidem modi natura in eo posita sit quòd inter hanc humanitatem et Verbum divinum relationem unionis veræ, substantialis, et physicæ, non moralis tantum constituat. Ita videntur opinari Frassen, et alii Scotistæ qui modum hunc propterea appellare solent *relationem realem unionis extrinsecus advenientem*. Sed de variis illis opinionibus circa modi hujus naturam necesse non est ut inquiramus; ista sufficiat.

CONCLUSIO. Incertum videtur utrum unio hypostatica formaliter includat necne aliquam formam, seu modum quemdam humanitatis perfectivum qui in ipsâ à Deo sit productus; et cujus ea natura sit, ut ejusmodi unionis relationem essentialiter dicat naturam humanam inter et Verbum divinum.

Probatur, quia neque ex auctoritate, neque ex ratione theologicâ quæstio illa videtur posse dirimi. Non ex auctoritate. Enimverò in Scripturis quidem disertè traditur Filium Dei carnem factum esse, et in utero Virginis conceptum, sed ratio formalis hujus mysterii in fide non aperitur. Id verò unum, quod ad præsentem quæstionem transferri possit, concilia et SS. Patres habent, nempe naturam quam Verbum sibi unire dignatum est, hanc unionem esse mutatam et perfectiorem evasisse, Verbum autem immutatum mansisse. Atqui hæc loquendi ratio ad illius modi exclusionem nihil attinet, ut evidentissimum est; generalior autem est, quàm ut indè colligi possit novam formam seu aliquam mutationem physicam unioni hypostaticæ formaliter constituendæ necessariam esse; nam quoquo modo facta sit unio hypostatica, certum est et ab omnibus concessum eâ formaliter mutatum esse statum et conditionem naturæ assumptæ, quippe quæ fuisset persona merè humana, si Verbo conjuncta non fuisset; unita verò personæ Verbi jam personam huma-

nam non constituit, sed ad hunc honoris gradum evehitur, ut subsistentiâ divinâ sibi modo admirabili communicatâ ultimò compleatur et terminetur. Adde propter illam unionem donis eximiis scientiæ, gratiæ, etc., humanitatem Christi esse cumulativissimam; quæ dona etsi unionis hypostaticæ sint tantum appendices, potuerunt tamen à sanctis Patribus attendi, dum locutionem de quâ agimus, usurpârunt; ergo ex auctoritate quæstio proposita dirimi nequit.

Nec etiam ex ratione theologicâ. Nam non potest rejici modus de quo loquimur, nisi ut impossibilis aut saltem inutilis; neque haberi potest ut certò admittendus, nisi possibilis ponatur et necessarius. Atqui nullum horum ratione theologicâ evinci potest. 1º Non evincitur impossibilis ille modus seu illa forma aut perfectio quam in humanitate Christi ut in subjecto inhæsionis plures volunt esse receptam, quâque relationem unionis hujus humanitatis ad Verbum constitui statuunt. Quis enim novit quousque extendatur naturæ humanæ potentia obedientialis, seu ad quem perfectionis gradum ea possit absolutè evehi? Negetur Deum id posse quod planè repugnare percipitur; hoc juris sibi ratio meritò vindicat. Verum, ex conjecturis et verisimilitudinibus quibuslibet, limites omnipotentiae divinæ præscribere nefas est. Nunquam porrò modi, de quo loquimur, impossibilitatem veris demonstrationibus adstrues. Fatendum quidem rationi sibi relictæ nullam modi illius notionem esse posse. Fatendum quoque ejusdem modi possibilitatem aut existentiam ex Incarnationis fide certò non colligi ut modò videbitur; fatendum denique ideam cui efformandæ fides Incarnationis locum præbet, esse valdè generalem et imperfectam. Sed modi illius, ad unionem hypostaticam fortè necessarii, possibilitati pugnaciter negandæ hæc non sufficiunt. Certè quidem nonne experienciâ quotidianâ et ipso intimo sensu multa existere cognoscimus, quorum possibilitatis aliàs ne minimam quidem suspicionem habuissemus, quæque etiam ubi nobis comperta sunt, non nisi generalibus et imperfectis ideis exprimere possumus? exempla afferre necesse non est, adeò vulgata sunt et obvia. Quòd si objicias nullam in animâ sentiri modi hujus recipiendi capacitatem, illi te similem ostendes, qui sensibus tantum quatuor ab ortu instructus, quinti possibilitatem idecirco nollet agnoscere, quòd facultatem sentiendi impressiones quæ ope ejusmodi sensus habentur, in se nunquam ex-

pertus esset, quasi verò capacitates et potentiæ animæ alio modo cognoscerentur, quàm sensu quem sui faciunt actus ex ejusmodi facultatibus aut potentiis manantes vel in iis recepti. Quod cum facultatibus naturalibus verum sit, à fortiori de potentiâ obedientiali ad recipiendos modos et formas supernaturales intelligendum est.

2º Ille modus non evincitur inutilis. Ut enim, eo posito, unio hypostatica naturæ humanæ ad Verbum necessariò datur; ita, eo sublato, saltem incertum est an unio hypostatica dari possit. Etenim, ut natura humana uniatur Verbo divino, necesse est, 1º, hanc desinere esse passivè indifferentem ad unionem hypostaticam cum aliquâ personâ divinâ; 2º, eandem naturam potius ad Verbum quàm ad Patrem et ad Spiritum sanctum relationem unionis dicere; 3º, hanc consequenter à Verbo potius respici et ultimò compleri quam cæteræ humanitates. Quis autem pro certo habuerit hæc tria fieri potuisse sine aliquâ mutatione physicâ quâ humanitas Christi ad unionem hypostaticam cum Verbo formaliter accommodaretur, id est sine modo illo perfectivo de quo sermonem habemus? Num clarè concipitur naturam humanam Christi desiisse esse indifferentem ad unionem hypostaticam cum aliquâ personâ divinâ, quamdiù non aliâ ratione se habuit physicè ac cæteræ humanitates quæ ad hanc unionem indifferentes manent? Pariter, numquid manifestum est ejusmodi naturam ad Verbum magis quam ad Patrem aut ad Spiritum sanctum relationem unionis potuisse dicere, dum non alio modo affecta est ac si Patri aut Spiritui sancto uniretur? An denique nullum dubium est quin Verbum immutatum manens, nec ullam modificationem novam in se ut in subjecto inhæsionis recipiens, potuerit tamen ad humanitatem aliquam, citra omnem ejus mutationem physicam quâ à cæteris humanitatibus distaret, specialem respectum dicere, eamque in personæ unitatem sibi conjungere? Quòd si modum illum seu formam perfectivam admittas, hoc ipso tollitur indifferentia naturæ humanæ ad unionem cum Verbo, discriminatur assumpta humanitas à cæteris quæ non sunt assumptæ, ac Verbum cui vis perfectissima naturam unioni accommodatam ultimò terminandi competit, concipitur sine ullâ sui mutatione humanitatem Christi eo modo immeare, pervadere et regere quo unio hypostatica constituitur; ergo modus ille non evincitur inutilis. Adde non satis concipi quomodò tota SS. Trinitas Incarnationem perege-

rit, nisi ad unionem hypostaticam formaliter constituendam necessarius fuerit ille modus de quo disputamus. Actionis enim divinæ quâ Incarnatio peracta est assignandus videtur aliquis terminus realis et physicus. Is terminus non est Verbum aut ejus aliqua mutatio, quippe quod increatum est, et immutabile; non est etiam natura assumpta, quæ per creationem producta est; ergo nisi naturam ejusmodi formaliter unitam constituerit aliqua forma seu perfectio quâ caruisset si non fuisset assumpta; non facillè assignatur in Incarnatione terminus aliquis operationis trium SS. Trinitatis personarum, proindeque, etc.

3^o Idem modus non evincitur possibilis; nam planum est ex imperfectæ ideæ quam nobis de hoc modo fingimus, contemplatione, nos nihil certi de ejus possibilitate pronuntiare; ergo eatenus tantum posset adstrui ejus possibilitas, quatenus eum existere ex revelatione deduceretur, id est quatenus unioni hypostaticæ constituendæ ostenderetur necessarius. Atqui, etc.

4^o Tandem is modus non evincitur necessarius. Nam, etsi argumenta quæ modò attulimus ut hunc modum non posse rejici ut inutilem comprobaremus, magni videantur esse momenti ad ejus necessitatem adstruendam, attamen, si genuina unionis et actionis indoles, necnon illa vis quæ inesse potest subsistentiæ Verbi divini, propiùs inspiciantur, ejusmodi argumenta non esse indubitata apparebit. Observandum itaque 1^o, nullam nobis esse ideam unionis, potentiæ, et actionis physicæ, nisi valdè imperfectam et generalem; vulgò videri possunt hæ voces perspicuæ, quia familiares et usitatissimæ; quisquis verò philosophus eas definire aggreditur, veritatem quam observari volumus statim perspicit. Potentia generatim est capacitas ad aliquid. Actio physica est exercitium potentiæ ad aliquid efficiendum seu producendum, seu est potentia alicujus efficiendi exercita et ad effectum producendum applicata. Unio physica est ea quâ substantiæ in unum propriè dictum coalescunt; id est vel in unam naturam totalem, ut in unione animæ et corporis; vel in unum (servatâ naturarum discretionem et integritate) superpositum, ut in mysterio quod explicamus. Jam verò generalissimas et inadæquatas esse ejusmodi notione nemo non videt. Observ. 2^o, non consentire inter se philosophos utrum actiophysica aliquam per se formaliter importet mutationem potentiæ; seu an per se et necessario

dicat aliquid reale et physicum potentiæ superadditum, et ab effectu distinctum. Sententia autem negans vera nobis videtur. Sit in exemplum anima nostra aliquam volitionem producens. Certè nostram animam esse causam physicam volitionum suarum deliberatarum, ac proinde earum producendarum ipsi inesse vim seu potentiam, ex sensu intimo indubitatum est. Volitiones, puta actus amoris, odii, etc., sunt hujusce potentiæ immediatum objectum et effectus. Constat ejusmodi volitiones in animâ recipi, ut in subjecto inhæsionis; ac proinde iis quasdam modificationes addi animæ (si ita loqui fas est), seu potentiæ volendi. Verùm ut anima, seu potentia volendi, has volitiones produceret, debuitne priùs naturâ seipsam complere et alio modo sese disponere, quàm se habuisset si eas non produxisset? En difficultatis cardo. Si dicas volitionem hanc esse productam aliâ volitione, de istâ recurret quæstio et sic in infinitum. Si velis ad hanc volitionem præ aliâ producendam animam determinari ideis et motionibus præviis quas recipit, id quoque fatebimur; sed fatearis quoque necesse est, positis hisce ideis iisdemque motionibus præviis quibuscumque, animam (utpote etiam in præsentis statu, et à fortiori in statu naturæ integræ aut innocentis, à necessitate liberam), potuisse ad aliam volitionem producendam se ipsam inflectere; ergo exercitium potentiæ quam habet anima circa volitiones suas, seu actio quâ eas producit, formaliter non includit aliquam hujusce potentiæ mutationem physicam seu aliquem modum ipsi (si ita loqui fas est) superadditum antecederet ad actus producti receptionem; sed vis illa animæ talis est ut, sine ullâ sui physicâ mutatione aut modificatione novâ antecedenti, et ad hanc vel illam volitionem præ cæteris habitudinem dicente, hanc tamen vel illam præ aliâ per se et immediatè inferat et producat. Proindeque dari potest actio physica quæ nullam potentiæ mutationem physicam arguat, seu nihil ipsi superaddat distincti ab effectu.

Aliud hujus rei exemplum suppeditat actio quâ Deus omnia produxit. Tam ratione quàm fide constat Deum, utpote nihil necessario extra se appetentem, potuisse abstinere à creando mundo. Actus autem quo mundum creavit, potest concipi vel ut modus non necessarius, et in se minimè perfectivus, qui sit effectus liber voluntatis divinæ, et quo Deus caruisset si mundum noluisse producere; vel ut perfectio quædam simplicissima quæ sit

subjectum libertatis divinæ, ipsamque voluntatem divinam constituat. Si prius actus dicendus erit à voluntate divinâ processisse, citra omnem hujusce voluntatis mutationem huic actui antecedentem, adeò ut voluntas divina ac ipse Deus totus quantus est se non alio modo intrinsecè habuerit, sub eo respectu sub quo est principium hujusce actûs, ac se habuisset, si alium produxisset actum. Actus seu volitio creandi mundi fuisset quidem in hoc systemate modificatio quædam quâ Deus alio modo (sed non perfectivo) se haberet, ac si mundum noluisset creare; sed ex eadem potentiâ volendi antecedenter ad omnem ejus mutationem aut dispositionem diversam, seu ex eodem principio, positâ hâc sententiâ emanâset volitio creandi hanc rerum universitatem è quo volitio creandi alterius mundi, vel nolitio creandi profluxisset, si Deus nihil creare, vel aliud producere statuisset. Hûc, servatâ, quæ par est, proportionem, transfer quæ de volitionibus animæ nostræ modò tradebamus. Quòd si nihil in Deo cogitetur per modum potentiæ, ut reipsâ in eo nihil hoc modo cogitandum esse sentimus; si proinde actus divinus concipiatur ratione entitatis suæ necessarius et immutabilis, ipse sit libertatis divinæ sedes, uno verbo voluntatem divinam constituat; tunc ipsi attribuenda erit vis per se et immediatè inferendi creaturas has vel illas sine ullâ suâ mutatione antecedenti, ut ex dictis facile colligere est, sive etiam consequenti, cùm creaturæ non recipiantur in Deo ut in subjecto inhæSIONIS. Sed de his in tractatu de Deo uberius disseritur. Hic satis sit ostendisse exercitium potentiæ aliquid producendi, ac proinde actionem ipsam, non necessariò, ac semper in suo conceptu formali arguere quidquam physici et existentis potentiæ adjuncti, et ab effectu distincti.

Observ. 3^o, præter actionem voluntatis divinæ tribus SS. Trinitatis personis communem, quâ Incarnatio decreta est et peracta, quæque ideò appellanda est actio uniens seu unitiva, necesse fuisse ad mysterium illud formaliter peragendum, ut Verbum exerceret vim illam seu potentiam quam habet naturam rationalem ultimò terminandi et complendi. Quid autem vetat quominus exercitium ejusmodi potentiæ concipiatur instar actionis à Divinitate prout in Verbo est, id est à Personâ Verbi quatenus est talis persona, seu ab ejus personalitate aut subsistentiâ proficiscens, quâ actione formaliter à Verbo assumpta fuerit natura humana Christi?

Etenim substantiam divinam etiam sub hoc respectu actuosam esse, non inertem et omni efficaciam vacuum, numquid stolidè supponitur? si autem potentia quæ inest personæ Verbi Dei, ad sustentandam naturam à se distinctam, supponatur actiosa; ergo exeritur, seu exercetur per actionem aliquam soli Verbo propriam, quæ formaliter sit ipsa unio ex parte Verbi, seu unio activè sumpta, id est assumptio naturæ humanæ à Verbo divino in personæ unitatem. Quò non immeritò referes quod SS. Patres et concilia asserunt, Verbum scilicet assumpsisse naturam humanam. Hâc enim sententiâ aliquam Verbi Dei actionem denotabant. Illa autem actio non erat voluntatis divinæ Verbi, aliàs fuisset communis Patri et Spiritui sancto; ergo unionem ex parte Verbi in quâdam vi ejus personæ insitâ, in exercitio virtutis quam habet sustentandi, ac proinde in actione quâdam ipsi propriâ formaliter consistere significasse videntur.

His observatis, jam facilè comprobatur modum illum de quo agimus non demonstrari necessariò in humanitate Christi ad unionem hypostaticam requisitum. Nam 1^o, ex observ. 1 et 2, actio seu exercitium potentiæ activæ non necessariò et semper ratione sui formaliter arguit mutationem aliquam physicam seu modum potentiæ superadditum antecedenter ad effectum productum; 2^o, ex observ. 3, unio ex parte Verbi divini, concipi potest instar actionis, seu exercitii potentiæ quam habet Verbum sustentandi naturam rationalem à suâ distinctam. Ergo 1^o unio ex parte Verbi, etiamsi instar actionis quâ naturam humanam assumat, concipiatur, non tamen ideò dici potest addere quidquam Verbo, nempe modum aliquem physicum quo caruisset, si carnem non assumpsisset. Ergo 2^o, eadem unio activè sumpta relationem unionis naturæ assumptæ ad Verbum fundare potest, citra modum ullum in naturâ humanâ ad hanc unionem productum. Eâ enim unionem seu actionem Verbum divinum statim occupat et sui juris facit naturam humanam. Dùm enim eam Verbum assumit, necesse est ut et ipsa assumatur. Et sanè quis pro certo et indubitato statuerit exercitium potentiæ sustentandi Verbo insitæ solum non posse sufficere ad ejusmodi relationem fundandum, si attenderit ad modum observ. 2 declaratum, quo potentia efficiendi sæpè suos infert et producit effectus?

SOLVUNTUR OBJECTIONES. — Obj. 1^o: Modus quidam in humanitate receptus, et unionis re-

lationem Verbum divinum inter et naturam humanam dicens impossibilis est. 1° Quia nonnisi accidentaliter Verbo uniret naturam humanam, quæ tamen ipsi substantialiter unitur. 2° Vel modus ille in totâ humanitate reciperetur, vel in corpore solo, vel in animâ solâ. Si in corpore solo; ergo corpus quod in extensione actuali certo modo dispositâ consistit, cuius proinde omnes modificationes nihil aliud sunt quàm relationes distantiarum, dicendum erit posse quâdem formâ donari ex quâ unio hypostatica humanitatis ad Verbum resultet; quod absurdum est. Si in totâ humanitate, ergo partim spiritualis et partim corporeus erit ille modus; quod etiam absurdum est. Si in animâ solâ, ergo vi ejus non tota humanitas, sed sola anima Verbo divino immediatè et proximè copulabitur; corpus verò nonnisi remotè et quatenus animæ conjunctum est, quod communi et certæ theologorum doctrinæ adversatur.

Nego ant. Ad primam probationem, nego etiam ant. Si enim ea esset modi illius ratio et indoles, ut naturâ suâ relationem unionis inter humanitatem et Verbum divinum diceret, si præterea unio inde resultans ipsas naturas respiceret, atque (citra earum confusionem) in unum propriè dictum, id est in suppositi unitate conjungeret, quis negaverit futurum ut hoc modo unio essentialis et substantialis eodem sensu constitueretur, quo unio hypostatica à SS. Patribus essentialis et substantialis appellata est? Ad secundam probationem, 1° nego, ex eo quòd ille modus in solâ animâ ut in subjecto inhæSIONIS reciperetur, inde consequi eo non posse constitui relationem unionis humanitatis totius ad Verbum. Humanitas quippe in eo systemate non eatenus dicitur Verbo formaliter uniri, quatenus præcisè modi hujus est subjectum, sed quatenus is modus perfectivus, seu forma essentialiter et naturâ suâ constituit relationem actualis unionis humanitatem inter et Verbum divinum. Fortè ergo ille modus, licet in solâ animâ tanquàm in subjecto inhæSIONIS resideret, posset tamen non tantùm animæ, sed et corporis unionem immediatam ad Verbum divinum fundare; nempe propter habitudinem naturalem quam anima ad corpus dicit, et corpus ad animam. 2° Verum quidem est omnes corporis affectiones nihil aliud fore quàm relationes distantiarum si materiæ essentia in solâ extensione actuali reponeretur. Sed nemo nescit. varias esse hæc de re philosophorum opiniones, atque, ut dicam quod res est, naturam materiæ solum ferè cognoscimus

quantum satis est, ut eam à substantiâ cogitante certissimè secernamus.

Obj. 2°: Qui modi alicujus in humanitate recepti necessitatem ad unionem hypostaticam tuentur, concedere coguntur Verbum, citra omnem hujus rationis modum in eo receptum, desinere esse indifferens ad unionem hypostaticam. Atqui planum est non magis modum aliquem esse unioni hypostaticæ necessarium ex parte humanitatis ad tollendam ejus indifferentiam, quàm ex parte Verbi divini; ergo inutilis est modus in humanitate receptus, etc.

Præterea anima et corpus sine ullo modo immediatè uniuntur, atque actio quâ ejusmodi unionem Deus producit, est unitiva tantum, non productiva; ergo, etc.

Ad primum, nego minorem. Aliud est duo extrema uniri inter se, citra omnem utriusque mutationem physicam, aliud est hanc unionem formaliter constitui uno ex extremis ad eam accommodato, et propterea physicè immutato, id est aliquâ modificatione instructo quâ aliàs caruisset. Aliquid enim physici et realis in altero extremorum receptum, fundandæ relationi unionis inter utrumque facilius concipitur sufficere, quàm hæc unio intelligi queat exurgere ambobus extremis perinde non mutatis manentibus. Porro, si ad tollendam indifferentiam naturæ humanæ ad Verbum et vicissim Verbi ad naturam humanam, necessarius sit modus in alterutro receptus, meritò naturæ humanæ adscribitur, tum quia Verbum est immutabile, tum quia propter suæ subsistentiæ perfectionem poni potest per se idoneum ultimò complendæ et sustentandæ naturæ creatæ intelligenti quæ ad hanc unionem accommodata est. Ad secundum transeat antecedens; quia natura unionis animæ et corporis nos latet. Deinde nego consequ. Anima et corpus sunt naturæ incompletæ quæ uniri postulant; adeoque ut uniantur, fortè sufficit ea creari iis donata proprietatibus et dotibus quæ ad ipsa naturaliter attinent. At humanitas Christi est completa in ratione naturæ, nec Verbo uniri naturaliter postulat; ergo, etc.

Obj. 3°: Ille modus tum Verbo, tum humanitati uniretur vel immediatè, vel mediante alio modo. Si prius, nonne Verbum et humanitas tam possent immediatè inter se conjungi, quàm cum illo modo? Si posterius, admittendus erit in infinitum progressus modorum inter se conjunctorum; ergo ille modus repugnat vel saltem inutilis est. Respondeo, si detur hic modus, 1° eum in humanitate recipi tanquàm

in subjecto inhæsionis, atque sub eo respectu ejusdem esse conditionis ac cæteros modos humanitatis perfectivos; 2º nec Verbum, nec naturam humanam cum illo uniri hypostaticè, si quidem repugnat modum aliquem per se esse unum ex extremis hypostaticæ unionis; hæc unio est naturarum in personâ, non modorum aut formarum subjecto inhærentium; 3º hanc igitur fore modi illius naturam, ut relationem unionis hypostaticæ immediatam et proximam diceret totius naturæ assumptæ ad Verbum divinum.

Obj. ultimò : Tres SS. Trinitatis personæ Incarnationem, utpote opus ad extra, peregerunt; atqui, si unio hypostatica peracta fuisset illâ ratione quam explicavimus, ut modum in humanitate receptum huic unioni necessarium non adstrui ostenderemus, jam tres SS. Trinitatis personæ Incarnationem non peregissent; quippe, cùm juxta hanc explicationem, nullus esset terminus formalis actionis ejusmodi personarum. Enimverò ille terminus deberet esse aliquid reale et distinctum à Verbo, quod increatum est et ab humanitate Christi, quæ creatione fuit producta; sed juxta explicationem allatam nihil hujusmodi in Incarnatione daretur; ergo, etc.

Respondeo in illo systemate ut et in altero quovis, terminum formalem decreti et actionis quâ Pater, Verbum et Spiritus sanctus ab æterno liberè decreverunt Incarnationem in tempore peragendam, hunc, inquam, terminum formalem esse assumptionem naturæ humanæ à Verbo, seu communicationem personæ Verbi factam naturæ humanæ. Si dicas ad hanc assumptionem aut communicationem formaliter necesse fuisse modum aliquem realem et perfectivum in humanitate produci, hunc modum tres personæ produxerunt, eorumque actio fuit productiva, et unitiva simul. Sin verò facta fuerit hæc communicatio aut assumptio sine ullâ ejusmodi formâ reali et physicâ, dicendum erit actionem trium personarum fuisse unitivam tantum, et in adductione extremorum eorumque ineffabili conjunctione citra omnem modum realem peractâ fuisse sitam.

COROLLARIUM. — Ex dictis colliges duas unionis hypostaticæ explicandæ vulgò adhiberi rationes, quas repugnare hæretici et increduli non demonstrabunt. Recole etiam quæ Disputatione 1 diximus de possibilitate Incarnationis.

CAPUT II.

De extremis unionis hypostaticæ.

EXTREMA unionis hypostaticæ sunt persona assumens, nempe Verbum, et natura assumpta, seu natura humana. De utroque dicendum duobus articulis.

ARTICULUS PRIMUS.

De personâ assumente.

CIRCA personam assumentem seu Verbum divinum duo tantum investigabimus. Primum an ejus natura dicenda sit unita naturæ humanæ ita tamen ut unio facta sit in personâ non in naturâ. Alterum an solum Verbum naturam humanam assumere potuerit, seu an Pater et Spiritus sanctus incarnari potuissent. Itaque,

1º *Uniuntur natura divina et natura humana in Christo; atque utrum facta sit unio hypostatica in naturâ an verò in personâ.* — CONCLUSIO I. Natura divina dicenda est in Christo unita naturæ humanæ, et vice versâ humanitas unita divinitati. Probatur. Nam 1º, id significat Apostolus dùm ait in Christo *habitare plenitudinem Divinitatis corporaliter*. 2º Idem expriment SS. Patres, cùm passim tradunt humanitatem à Divinitate assumptam fuisse, ipsi esse immersam, ejus virtute imbibitam, alteram alteri esse immixtam, ac tandem secundum naturam eas esse conjunctas et unitas. Quorum plurima ea de re testimonia apud Petavium, lib. 5 de Incarn. cap. 1, et apud Thomass. lib. 3, capit. 4, 5, 6, 7, 8, collecta habentur. 3º Natura humana unita est physicè et hypostaticè Verbo divino; atqui evidens est Verbum non posse tam arcto vinculo uniri naturæ humanæ, quin Divinitas prout in Verbo est et ejus personalitate contrahitur, tota uniatur toti naturæ humanæ Christi et vice versâ; ergo, etc.

CONCLUSIO II. Unio hypostatica facta est in personâ, non in naturâ. Probatur 1º auctoritate concilii Toletani XI, an. 675, quod in professione fidei illum loquendi modum usurpat et disertè explicat : « Solus Filius, inquit, formam servi accepit in singularitate personæ, non in unitate divinæ naturæ; in id quod proprium est Filii, non quod commune Trinitati. » Probatur 2º ex SS. Patribus, qui sæpius docent idipsum quod illâ locutione intelligitur, nempe Filium solum, non Patrem, neque Spiritum sanctum, assumpsisse naturam nostræ similem; ex quo sequitur naturam humanam non uniri naturæ divinæ absolutè in se spectatæ abstrahendo à personâ Verbi, et quantum tribus personis est communis; sed hanc

unionem esse factam sub eâ tantùm ratione quâ Divinitas contrahitur personalitate Verbi, et ad constituendam secundam SS. Trinitatis personam restringitur, si ita loqui fas est, et determinatur. Rem totam dilucidè exponit Ferrandus diaconus in Epistolâ ad Anatolium : « Pater et Filius, ait, substantiâ unum sunt, « non personis; una est natura Patris et Filii, « sed alia est persona Patris, alia Filii. Filius « verò suscipiens carnem.... naturam sibi ad- « navit humanam, sed in unitate personæ, « quam non habet cum Patre communem, non « in unitate substantiæ, quam habet cum Pa- « tre communem. Idè non Trinitas, sed tan- « tummodò Filius et natus et passus est. » Pro- batur 3^o, quia si unio hypostatica facta esset in naturâ divinâ, cùm hæc natura communis sit tribus SS. Trinitatis personis, manifestis- simè sequeretur Patrem et Spiritum sanctum, perinde ac Filium, esse incarnatos, natosque, passos, etc., quod fidei catholicæ omninò adver- satur; ergo, etc. Atque ex his omnibus patet utramque conclusionem esse de fide quatenùs iis significatur Deum Verbum naturam huma- nam assumpsisse, atque ipsum solum fuisse in- carnatum.

Dices. Quæ primâ conclusione observavimus à Patribus esse dicta de unionem utriusque na- turæ in Christo, videntur significare unionem ejusmodi factam esse in naturâ; ergo, etc. Nego ant. Ejusmodi enim locutionibus id unum exprimunt SS. Patres unionem duarum natu- rarum divinæ et humanæ in Christo, citra om- nem confusionem, esse arctissimam, intimam, realem et physicam, quod omnes Catholici uno ore profitentur. Verùm, dùm ita loquuntur SS. Patres, non definiunt, naturam divinam, abstra- hendo à personâ Verbi et quatenùs communis est tribus SS. Trinitatis personis, humanitatem assumpsisse, etc. Imò verò evidentissimum est hæc ab iis intelligi de Divinitate prout in Verbo existit, seu quatenùs per ejus personalitatem contrahitur et Filium æternum constituit. Sæpissimè enim aiunt Deum Verbum, Filium Dei, nostrâ naturâ esse indutum, atque ejus- modi locutiones, aut alias similes tanquàm sy- nonymas et parallelas cum loquendi modis in objectione notatis, passim adhibent, ac longè frequentius illas usurpant. Deinde, dùm crebrò attribuunt soli Filio quòd carnem assumpserit, hoc ipsum conceptis verbis Patri et Spiritui sancto abjudicant. Denique errorem eorum qui carnem et passionem Patri vel toti Trinitati adscripserunt, ut tetram et turpissimam hære-

sim habuère; quæ omnia nimis comperta sunt, quàm ut iis diutiùs immoremur.

Instabis : Si dixeris unionem hypostaticam factam esse in personâ, non in naturâ, nonne videris in quorundam abire sententiam, quos doctissimus Thomassinus, lib. 3 de Incarn. cap. 5, n. 2, his verbis perstringit : « Permi- « rum accidit mihi quidem, ecquid in mentem « venerit nonnullis naturas separare, imme- « diato iis interdicere complexu, personæ tan- « tùm quasi extremi termini contactu eas ad- « movere magis quàm connectere, aut eo quasi « vinculo connectere tantùm, non insinuare, « non immergere alteram alteri, non permi- « scere, cùm ex hâc tamen insinuatione, im- « mersione et commixtione, inconfusa utrius- « que naturæ (juxta SS. Patres) efflorescat « unitas personalis? ergo, etc. »

Respondeo doctissimum Thomassinum *non- nullis* tantùm scholæ magistris hanc censuram inurere; dùm tamen omnes docent post S. Thomam et concilium Toletanum, et juxta to- tius traditionis sensum, unionem hypostati- cam factam esse in personâ, non in naturâ; proindeque noluit celeberrimus ille theologus neque hunc loquendi modum, neque dogma illo expressum quod certissimum est, quodque ipse aliàs ut indubitatum tradit et d'sertè explicat, ullo pacto reprehendere. Et verò ne- mo theologorum non agnoscit, naturam divi- nam quatenùs Verbi est, totam esse unitam toti naturæ humanæ Christi, quæ doctrina id ipsum est quod variis comparationibus, metaphoris et locutionibus à Thomassino rotatis declarant SS. Patres. Quòd si hos inter et illos discrimen aliquod intercedat, illud exaggerandum non est, quippe quod rei substantiam non spectet, et in loquendi modo ac speciali quâdam rei considerandæ ratione totum contineatur.

Dices 2^o : Unio hypostatica sæpè in eo dici- tur consistere quòd natura humana sit juris Verbi, ab eo pendeat et regatur (sed ejusmodi jus, dominiumque et regimen competunt Verbo Dei prout habet naturam tribus personis com- munem, seu prout voluntate supremâ et omni- potenti præditum est, quæ facultas ad naturam tribus personis communem pertinet; ergo unio hypostatica facta est in naturâ. Dist. maj., sit juris physici, pendeat à Verbo ut à personâ ul- timò complente et sustentante et regatur ab eo sub eodem respectu, concedo; sit juris mor- alis tantùm, pendeat et regatur à Verbo dun- taxat ut à causâ efficiente movente, nego. 1^o Jam docuimus duplex jus distinguendum, aliud

physicum, aliud morale; istud per voluntatem exercetur, ibique reperitur quidem ubi est persona, cum persona naturam intellectualem in suo conceptu involvat; verum non constituit rationem personæ; quapropter potest etiam concipi in naturâ abstrahendo à personâ, et reipsâ exercetur humanitate Christi quæ tamen persona non est. Jus physicum necessaria est totalitatis perfectionum appendix, unde est commune tum supposito tum personæ; in eo autem positum est quod quæcumque naturæ insunt, et ab eâ producuntur, debeant supposito aut personæ cuius est natura, *in concreto* attribui, et reipsâ ad ipsum attineant. Cum humana Christi natura dicitur per Incarn. juris Verbi divini facta, id intelligitur de jure illo physico, non de morali quod independentem ab illâ unione necessario Verbo competit ut et aliis duabus SS. Trinitatis personis. 2^o Natura humana Christi duplici modo pendet à Verbo, primò ut à causâ efficiente, sicque etiam pendet à Patre et Spiritu sancto, sed hæc ejus dependentia unionem hypostaticam non constituit; secundò ut à personâ ultimò complente et sustentante, sicque à solo Verbo pendere dici potest, quia ipsi soli unitur physicè. 3^o Regitur etiam humana Christi natura à tribus SS. Trinitatis personis, quatenus quidquid in eâ et per eam producitur, à totâ oritur SS. Trinitate, sed à solo Verbo regitur specialiter, ut à personâ cui physicè unita est, et quæ eam proprii sui juris fecit.

2^o *Utrum Pater et Spiritus sanctus incarnari potuerint.* — CONCLUSIO. Absolutè repugnare non videtur Patrem aut Spiritum sanctum incarnari. Probatur 1^o auctoritate divi Thomæ et theologorum qui id ipsum statuunt. Probatur 2^o, quia persona Patris et persona Spiritus sancti non minùs perfectæ sunt quàm persona Filii, nec proinde minorem habent virtutem ad naturam aliquam rationalem ultimò complendam et terminandam. Neque enim videtur posse Filio divino inesse aliquid speciale et proprium quo salus ex personis divinis absolutè reddatur humanitati assumendæ idoneus. Magis tamen decuit ut Filius incarnaretur propter rationes congruentiæ quas supra post SS. Patres attulimus, Dissert. 5.

ARTICULUS II.

De naturâ assumptâ.

Nos hic inquirimus quæ natura à Verbo divino assumpta fuerit. Jam Disputatione 3, adversus hæreticos monstratum est hanc non

aliam esse quàm naturam humanam animâ rationali et corpore solido ex Mariâ nato constantem, omnibusque facultatibus et proprietatibus quibus humanitas constituitur, donatam. Supponimus autem hanc humanitatem quam Verbum sibi unire dignatum est, etsi à primo ortu summis donis ornata fuerit, atque ignorantiae, peccati, et fomitis peccati expers fuerit, iis tamen antequàm Christus gloriosè resurgeret obnoxiam fuisse defectibus sine quibus fines Incarnationis non potuissent attingi; proindeque Christo fuisse naturam dolori mortique obnoxiam, corpus passibile, mortale, siti, fami, defatigationi subjacens, ut scilicet pro hominibus ille posset satisfacere, nobisque eximia omnium virtutum præbere exempla. De his naturæ assumptæ defectibus, et simul de ejus perfectionibus ex professo dieturi sumus Dissert. 9, c. 2. Impræsentiarum quæstio est 1^o, an sola natura humana potuerit à Verbo assumi; 2^o an natura quam Verbum assumpsit, propriam habeat existentiam, sitque individua et singularis; 3^o an omnes naturæ humanæ partes assumptæ fuerint. Quæ tria sigillatim expendenda sunt.

1^o *An sola natura humana potuerit à Verbo assumi?* — CONCLUSIO. Verbum divinum absolutè potuisset naturam angelicam assumere. Probatur, quia perse non magis repugnat naturam angelicam aut quamlibet rationalem à Verbo assumi, quàm naturam humanam. Hinc Scripturæ indigitant et SS. Patres supponunt, vel etiam expressè tradunt magnum illud esse bonitatis et munificentiae divinæ erga homines beneficium, non modò quòd pro eorum salute Verbum voluerit naturam aliquam creatum sibi secundum hypostasim unire, sed etiam quòd humanitatem ad tantum mysterium peragendum elegerit. Divinæ autem sapientiæ non defuerunt rationes naturæ humanæ præ angelicâ assumendæ; quarum plurimæ procul dubio nos latent. Quæ nobis innotescunt suprâ à nobis fuerunt expositæ jam citatâ Dissert. 4, cap. 2 et 4.

Quæstiones aliquas à theologis nonnullis de possibilitate vel impossibilitate quarundam assumptionum hic agitas nos consultò prætermittimus, quippe quas otiosas et steriles, minùs decentes et decoras arbitramur.

2^o *Utrum natura humana à Verbo assumpta propriam existentiam habeat, sitque individua et singularis?* — Negant plures Thomistæ naturæ humanæ Christi suam esse existentiam propriam, quâ in quæstione fortè magis de nomi-

ne quàm de rebus disputatur. Ut omnis ergo tollatur æquivocatio, nomine existentiae intelligimus positionem rei extra nihil, seu modum quo reponitur extra nihil.

Quod ad aliam quæstionem attinet, de eâ omnes theologi post S. Joannem Damascenum lib. 3 de Fide Orthod. cap. 11, unanimiter statuunt naturam humanam Christi esse singularem. Natura autem singularis illis ea est quæ pluribus non est communis, quæ ab individuis non abstrahit, quæ est una numericè.

CONCLUSIO. Natura humana Christi propriam habet existentiam, atque est singularis. Probatur prima pars, nempe naturæ humanæ Christi propriam esse existentiam. Nam existentia est positio rei extra nihil; atqui natura humana Christi habet positionem extra nihil sibi propriam sibi quæ inhærentem; enim verò positio hujusce naturæ humanæ extra nihil non est modus Verbi, sed status hujus naturæ, neque ab unione sui cum Verbo habet hæc humanitas quòd existat, siquidem prius naturâ debuit existere quàm Verbo divino hypostaticè adunaretur; ergo. Probatur secunda pars, nempe naturam humanam Christi esse singularem seu individuum, non communem et ab individuis abstractam. Quæ propositio eatenus fide certa est, quatenus fide constat Christum esse hominem singularem, ab aliis numero distinctum, non tantum ratione personæ, sed etiam naturæ humanæ. Probatio verò est obvia et facilis. Nam natura à Verbo assumpta existit; atqui quod existit illud singulare est, et numericè differt à quolibet alio existente. Universalia enim ab individuis abstracta non existunt; atque eatenus tantum attributa quæ ideis universalibus exhibentur, in rerum naturâ possunt extare, quatenus in singularibus seu in individuis extra nihil constitutis continentur.

Dices 1^o adversus primam partem. Sophronius Hierosolymitanus in Epistolâ synodicâ quam concilium generale VI, act. 2, approbavit; et S. Joan. Damasc. lib. 3, de Fide, cap. 12, aiunt carnem Christi non per seipsam, sed in Verbo extantiam seu existentiam habuisse; ergo, etc. Dist. ant. Ut significarent carnem Christi non existere seorsim et separatam à Verbo, concedo; ut existentiam propriam seu humanam ipsi abjudicarent, nego. Aliud est humanitatem Christi in Verbo existere, aliud est hanc non existere per existentiam humanam, nec nisi per existentiam Verbi. Prius docent Sophronius et S. Joan. Damas. adversus Nestor.; de posteriori nihil pronuntiant.

Dices 2^o: Natura humana Christi non habet propriam subsistentiam, sed solum subsistit subsistentiâ Verbi; ergo ipsi nec existentia propria adscribi potest. Nego consequentiam et paritatem. Aliud est subsistentia, aliud existentia. Illa hanc supponit, atque etiam afficit ut et cæteras rei affectiones et modificationes. Res enim existens seu extra nihil posita, potest in se subsistere vel in alio; in se subsistit, si seorsim existat, nec uniatur alteri perfectivo, adeò ut sit sui juris physici, integrumque atque unicum suarum actionum principium; in se verò non subsistit, si seorsim non existat, id est, si fiat pars propriè dicta alicujus totius, vel quasi accessio quædam perfectionis, et veluti additamentum. Non ideò igitur natura humana Christi in Verbo subsistit, quòd existentiam humanam non habeat, sed quia ipsi unitur physicè, summam inde perfectionem consequens, et nullam ipsi tribuens, unde ipsius juris fit, et in ejus personâ subsistere dicitur.

Dices adversus alteram partem, naturam hominibus communem, juxta quosdam SS. Patres, à Verbo esse assumptam. Dist., id est, naturæ nostræ similem, et iisdem attributis, et partibus constantem, quibus natura omnibus communis constituitur, concedo; naturam universalem, ab individuo abstractam, nego.

Dices iterum: Suppositum nihil nisi principia individuationis seu rationem individui addit naturæ specificæ et communi; atqui natura individua et singularis continet principia individuationis, seu rationem individui; ergo si Verbum assumpsisset naturam humanam individuum et singularem, assumpsisset suppositum seu personam; quod fidei repugnat. Nego majorem, nam principia individuationis seu ratio individui ad omnem naturam existentem pertinent et quidem eo ipso quo existit. Ratio autem suppositi addit naturæ existenti ac proinde individuæ et singulari, specialem statum seu modum, in se videlicet et seorsim, nomine totius, existendi.

3^o An Verbum assumpserit omnes naturæ humanæ partes? — Natura humana quam sibi Verbum in personæ unitatem devinxit, multis partibus, ut et cæteræ humanitates, constat; nempe illa constituitur animâ rationali variis donatâ facultatibus, tum corpore quod in partes diversi generis distribuitur, ut sunt ossa, caro, sanguis, alii humores, etc. Quæritur utrùm ad hæc omnia unio hypostatica pertineat, et quomodò, an proximè, an remotè? Quæ quidem quæstio multa continet ca-

pita, non omnia pari certitudine definienda.

CONCLUSIO I. Verbum assumpsit naturam humanam, veram et essentialiter perfectam, ac proinde assumpsit veram animam rationalem, verum solidumque corpus ejusdem materiæ et rationis, quoad substantiam, cum nostro, atque illam quidem animam, illudque corpus inter se unita ad humanitatem unam perfectam et componendam.

Tota propositio est de fide, quantum ad omnes suas partes, ut satis liquet ex iis quæ supra, Dissert. 4, fusè demonstravimus adversus hæreticos, quorum alii animam, alii mentem, alii corpus solidum et ex Mariâ natum, alii personæ unitatem Christo Domino detraxerunt.

Aliquid tantum superest hic addendum circa ultimam partem nostræ conclusionis, nempe Magistrum Sentent. in 3 dist. 6, et Hugonem à S. Victore, lib. 1 de Sacramentis, parte 2, non habuisse ut hæreticam quorundam opinionem negantium corpus et animam quæ Verbum assumpsit, fuisse partes inter se unitas; Scotumque in eandem distinctionem 6, quæst. 3, aliosque scholæ perantiquos doctores censuisse hanc sententiam non fuisse hæreticam, donec ab Alexandro III pontifice maximo damnata fuit in capite *Cum Christus*, extra. de *Hæreticis*.

Verumtamen omninò constat et ex dictis in mox citatâ Dissertatione planè liquet, hanc etiam nostræ conclusionis partem, corpus scilicet et animam quæ Verbum sibi univit, fuisse inter se ad unam humanitatem componendam conjuncta; constat, inquam, hanc partem ad fidem catholicam semper attinuisse, seu ab Ecclesiâ ad credendum semper fuisse clarè propositam. Enimverò, 1º id de ipsâ est mysteriî incarnationis substantiâ, et ad conceptum ejus formalem pertinet, siquidem de conceptu formali naturæ humanæ est ut constet animâ rationali et corpore inter se unitis, nec aliud intelligi potest, cum dicitur Verbum factum esse hominem nisi ipsum assumpsisse animam, et corpus inter se unita, ut par est, ad humanitatem constituendam.

2º Concilia et SS. Patres hoc ipsum sæpius significant, ipsammet dogmatis catholici substantiam exprimendo. Alii enim, inprimis verò S. Cyril., in Epist. suâ secundâ ad Nest., dicunt Verbum assumpsisse carnem animâ rationali animatam; qui modus loquendi ut frequenter occurrit, ita nihil aliud sonat quàm corpus animæ unitum. Alii, quos infra laudabimus, tradunt Christum assumpsisse carnem mediante

animâ, ubi unio animæ Christi cum corpore assumpto ut res certa ponitur et perspicuè exprimitur. Alii in eo mysterium Incarnationis consistere conceptis verbis declarant, quòd Verbum assumpserit corpus et animam, et factum fuerit homo, simulque aiunt hominem constitui animâ rationali et corpore simul conjunctis. Ita auctor Symboli quod dudum S. Athanasio adscriptum est, ipsique adhuc à pluribus attribuitur; ita concilium Chalced. act. 5, Lateranense in cap. *Firmiter*, de summâ Trinitate, S. Augustinus in Epistolâ 137, aliàs 3, ad Volusianum; S. Joan. Damascenus, lib. 3 de Fide orthodoxâ, cap. 2; S. Thomas in Opusculo 4, contra Gentes, cap. 37, etc.

3º Si corpus et anima Christi non fuissent inter se unita, non potuissent à se invicem morte divelli et separari, unde nec Christus mori potuisset. Pariter nec verè resurrexit, nisi ejus anima et corpus iterum post mortem in unam naturam coaluerint. Denique, sublata hac unione, Christus ut homo verè non est genitus ex matre, siquidem generatio hominis ad unionem animæ cum corpore formaliter refertur.

CONCLUSIO II. Corpus humanum quod Verbum Dei assumpsit, fuit integrum et omnibus suis partibus constans.

Propositio certissima est, atque eo nomine ab omnibus admissa. Probatur, quia Christus non est tantum homo verus, sed etiam perfectus et integer, nullâ sui parte mutilus aut monstrosus. Nam 1º Scripturæ significant eum fuisse hominem, corpore et animâ constitutum, ejusque corpus in utero beatæ Mariæ Virginis speciali Spiritus sancti operatione efformatum. 2º Docent concilia et SS. Patres Verbum assumpsisse corpus perfectum, quale in Adamo condiderat; sicut ergo Adamus creatus est integer quoad omnes partes, ita etiam Verbum perfectam et integram humanitatem sibi hypostaticè conjunxit. Vide S. Joan. Damascen. lib. 3 de Fide, cap. 3 et 6.

Ex his colligere est Verbum divinum vel proximè et secundum hypostasim, vel saltem remotè et ut in humanitate inclusas et ei adjunctas assumpsisse omnes corporis Christi partes. Quasnam verò assumpserit proximè, an aliquas assumpserit remotè tantum jam explicandum est. Observa autem quibusdam partibus ita constitui corpus humanum ut sine iis nullo in statu esse possit; quasdam ad integritatem illius pertinere, ut pes, manus; alias functionibus vitæ, saltem in præsentī statu esse necessarias,

ut humores; alias ad ornatum ut capilli; alias ad ornatum simul et aliquas operationes, ut dentes, etc. Quæstio est an omnes ejusmodi partes unio hypostatica complectatur et immediate attingat.

CONCLUSIO III. Verbum saltem præcipuas corporis assumpti partes proximè et hypostaticè sibi univit.

Propositio certa est. Probatur quia pro certo tenendum est corpus, quod Verbum assumpsit, ipsi uniri proximè et hypostaticè. Quod quidem ex mox dictis, maximè ex hæc locutione Patrum, Verbum assumpsisse carnem animâ rationali animatam, satis apparet, quodque inferiùs, capite sequenti art. 3 et 4 ex professo confirmabitur, cum explicabimus hanc unionem esse indissolubilem, necnon quo sensu à Patribus dictum sit Verbum mediante animâ carnem assumpsisse. Atqui Verbum proximè et secundum hypostasim assumere corpus non potuit, quin eodem modo præcipuas hujusce corporis partes assumeret; siquidem corpus non est aliud quidquam à suis partibus, nec ulla afferri potest ratio, quæ magis de unâ ejusmodi parte præcipuâ quàm de aliis similibus militet.

Jam verò si inquiras quænam sint illæ partes præcipuæ, quas saltem constet à Verbo proximè et hypostaticè assumptas, respondent Suarez, disp. 15, sect. 5, Turnelius, q. 10, a. 2, et alii communiter theologi, eas esse quæ informantur animâ rationali; atque vulgò ut ex philosophiâ certum ponunt sic ab animâ informari et vivificari partes omnes organicas, necnon ossa, et carnem, etc. De humoribus verò, dentibus, unguibus, capillis, utrum scilicet anima hæc informet, in varias opiniones abeunt. Verum, quandoquidem de partibus corporis quibus anima immediatè unitur, recentiores philosophi tum à veteribus plerumque, tum à se invicem non minùs quàm circa unionem utriusque illius substantiæ explicandam, id est, summè dissentiunt; idcirco Christi partes præcipuas hic satius ducimus eas definire, quæ constitutioni ac integritati corporis humani ita necessariae sunt, ut, ipsâ teste S. Scripturâ, in corpore Christi resuscitati etiam extiterint; sic enim efficitur à nobis nihil doceri quod Scripturæ testimonio non firmetur. Jam verò ex sacris litteris habemus Christo ex mortuis resuscitato fuisse corpus carne et ossibus coagmentatum, illudque eodem modo figuratum et dispositum, atque iisdem membris et organis ac corpora nostra constans, licet diversis omninò qualitatibus affectum. Vide Matth. cap. 28, Marc. 16,

Luc. 24, Joan. 20 et 21, Act. 1, necnon S. Augustinum in Epistolâ 205, aliâs 146, ad Consentium.

CONCLUSIO IV. Sanguis Christi Domini fuit proximè et hypostaticè Verbo unitus.

Propositio intellecta de sanguine unito corpori Christi, ut certa habetur à plerisque theologis. Durandus quidem in 4 distinct. 10, q. 1, n. 16, Gabriel in Canonem Missæ Lect. 53, ejusdemque Gabrielis Supplem. in 4 dist. 44, q. 1, circa finem, et alii quidam sanguini Christi, etiam ejus carni antequàm mortem subiret unito, nonnisi remotam ratione totius corporis, non verò proximam et hypostaticam cum Verbo unionem concesserunt. Verum obsoleta est et patronis jam destituta hæc opinio. De sanguine qui triduo mortis Christi ab ejus corpore separatus extitit, dicemus capite seq. art. 4, ubi de indissolubilitate unionis hypostaticæ. Probatur 1º ex Scripturis. Matth. 26, v. 28: *Hic est enim sanguis meus... qui pro multis effundetur in remissionem peccatorum*. Quæ observari esse dicta de sanguine quemadmodum de corpore dicitur Luc. 19: *Quod pro vobis datur*, et 1 Cor. 11, v. 24: *Quod pro vobis tradetur*. Ephes. 1, v. 7: *Habemus redemptionem per sanguinem ejus, remissionem peccatorum*; 1 Petri 1, v. 18: *Non corruptibilibus auro et argento redempti estis... sed pretioso sanguine quasi agni immaculati Christi*; Joan. 1, v. 7: *Sanguis Jesu Christi Filii ejus emundat nos ab omni peccato*. Ex his aliis ejusmodi locis, quibus tota traditio concinit, manifestè apparet Christi sanguinem, utpote quo redempti dicimur, infiniti valoris et efficaciae fuisse, quam à solâ Verbi dignitate consequi potuit. Unde multi statim concludunt unionem sanguinis Christi cum Verbo immediatam fuisse et proximam. Verum non advertunt duo tantum requiri et sufficere ut Christi sanguine redempti dici possimus. Primum, ut efficacia seu valor infinitus illi sanguini annexus fuerit saltem quatenus à personâ infinitâ effusus est, quemadmodum et lacrymæ Christi, et alia ejus opera quæ Verbo per se uniri hypostaticè non poterant, vim infinitam ab ipsius personæ dignitate consequebantur. Alterum, ut Deus ejusdem sanguinis effusioni seu morti Christi nostram salutem specialiter alligare voluerit. Quapropter ut ex locis allatis conclusio efficacius comprobetur, illud videtur inprimis premedandum quod statim observavimus, eodem scilicet modo dictum esse sanguinem Christi pro hominibus effundendum, quo et corpus ejus pro iisdem tradendum; atqui corpus Christi, dum

tradebatur pro multis, valorem infinitum consequeretur ex unione sui proximâ cum Verbo, quam nemo inficiatur; ergo idem statuendum est de sanguine.

Aliud probandæ conclusioni idoneum argumentum desumitur ex illo Hebr. 2, v. 14: *Quia ergo pueri communicaverunt carni et sanguini, et ipse similiter participavit eisdem.* Ubi Christus eodem modo et iisdem verbis dicitur participasse tum carni, tum sanguini. Non aliter autem nostræ naturæ particeps factus est quàm eam assumendo; ergo sicut assumpsit carnem proximè et hypostaticè, ita et dicendus est assumpsisse sanguinem. Atque hæc est interpretatio quam illius loci tradunt S. Chrysost. S. Ambrosius, Theodoretus, Theophylactus, OEcumenius, S. Anselmus et S. Thomas. Eandem etiam tradit S. Cyrillus, lib. de Incarnatione Unigeniti circa finem, et lib. 1 de Fide ad reginas, longè post medium. Probatur 2º ex traditione. In actione primâ concilii Ephesini et in secundâ conc. Chalcedonensis refertur et approbatur secunda S. Cyrilli ad Nestor. Epistola ubi sic legitur: *Verbum carnem factum esse, id aliud nihil est, quàm quòd carni et sanguini communicavit.* Quam quidem explicationem tradidit etiam S. doctor, lib. 1 de fide ad Theodos. versus initium. Homiliâ autem 5, Ephesi dictâ *Verbum carnem et sanguinem assumpsisse* pronuntiat, et lib. de Fide ad reginas, illud *particeps factum esse carnis et sanguinis.* S. Gregorius Nazianzenus Homil. 50, ait *Verbum carnem factum esse non putativè, sed verè, quia assumpsit corpus ex carne, ossibus et sanguine constans.* Et S. Epiphanius hæresi 77, *Christus, inquit, ... mentis et humanæ particeps quemadmodum carnis et sanguinis.* Non prætermittendum illud Clementis VI, in extravag. *Unigenitus*, de poenitentiis et remissionibus ubi de effuso super arâ crucis sanguine Christi sic habet: « In arâ crucis innocens immolatus, non guttam sanguinis modicam, quæ tamen propter unionem ad Verbum pro redemptione totius humani generis suffiebat, sed velut quoddam profluvium noseitur effudisse. » Ubi tanquàm rem certam ponit summus pontifex sanguinem Christi fuisse unitum Verbo, et ex hac unione vim infinitam esse consecutum. Probatur 3º ratione theologica ex mysterio Eucharistiæ deductâ. Nam sub speciebus vini in hoc sacramento vi verborum formaliter constituitur præsens solus sanguis Christi, cætera verò ad Christum pertinentia solummodò per concomitantiam. At-

qui non patitur tanti mysterii dignitas et efficacia illud quod unum in eo vi verborum formaliter sub speciebus vini constituitur præsens, non uniri proximè Verbo divino, sed tantum remotè et ratione corporis quod sub ejusmodi specie per concomitantiam solum habetur; ergo.

Dices: Non rarò concilia et SS. Patres tradunt Christi operationes esse assumptas à Verbo, et ipsi uniri, atque inde valore infinito conspergi; atqui tamen dici non potest Verbum proximè et hypostaticè assumpsisse modificationes naturæ humanæ, ut sunt operationes quas elicit; ergo ex eo quòd à conciliis et à SS. Patribus dictum sit Verbum assumpsisse sanguinem Christi, ideòque illi sanguini valorem infinitum tribuant, non sequitur ejusmodi sanguinem assumptum esse proximè et hypostaticè. Nego consequentiam et paritatem; ratio disparitatis est quòd iisdem modis loquendi ad varias ideas exprimendas idoneis, variæ reverà ideæ alligandæ sint pro subjectâ materiâ. Cum ergo operationes quas Christus per naturam humanam producit, non possint uniri Verbo, nisi quatenus sunt naturæ quam hypostaticè assumpsit, oportet allata SS. Patrum verba ubi operationibus humanitatis Christi applicantur, de unione remotâ et ratione naturæ eas elicientis exponere. Cum verò eadem locutiones ad Christi sanguinem qui proximè Verbo uniri potuit transferuntur, tunc de unione proximâ intelligendæ sunt, maximè quia idem loquendi modus in locis inter probationes allatis sanguini simul accommodatur ac carni, quam constat esse Verbo proximè et hypostaticè conjunctam.

CONCLUSIO V. Probabilius videtur tres alios humores proximè etiam à Verbo assumptos, tum etiam spiritus vitales, dentes, ungues, capillos ipsos. Sed substantias medias inter alimenta et sanguinem, lacrymas pariter, salivam, sudores et similia excrementa nullo pacto Verbum assumpsit.

Probatur prima pars, quia probabile est illos tres humores, necnon spiritus vitales, non tantum in præsentī statu functionibus vitalibus esse necessarios, sed etiam per se ad integritatem corporis humani requiri; unde et in corporibus gloriosè resurrecturis non improbabilius quantum ad substantiam admitti possunt, longè diversis tamen qualitatibus vestiti, et usibus quibusdam ad corpus animale pertinentibus non ampliùs destinati. Quod ad dentes, ungues et capillos attinet, ii videntur ad

aliquam corporis humani integritatem et perfectionem per se referri. Certè quidem S. Augustinus, lib. 22 de Civit. Dei, cap. 19, et Enchiridii c. 88, eos corporibus resurgentium non defuturos docet; quod et opinantur theologi omnes post ipsum. Nec sanè dubium esse potest quin Christus resuscitatus has etiam partes habuerit, siquidem post resurrectionem suam legitur comedisse, ac procul dubio quâ ante morte apparere solebat figurâ ac specie, eâdem discipulis suis redivivus apparuit. Quæcumque prior ista conclusionis pars continet, confirmari possunt auctoritate S. Athanasii in Epistolâ ad Epictetum apud S. Epiph. hæresi 77, et S. Ambrosii lib. de Incarnat. Dominicæ Sacramento, cap. 6. Hi statuunt hæreticos qui Divinitati et carni Christi unam et eandem substantiam esse prædicabant, consequenter dicturos esse in carnem, capillos, ossa et sanguinem Verbum esse conversum. Ubi manifestè ponitur capillos, ut et carnem et ossa et sanguinem, Verbo esse unitos. Jam verò si unio hypostatica capillos etiam corporis Christi respiciat, quidni ungues, dentesque, spiritus vitales atque humores?

Probatur secunda pars, quia substantiæ mediæ inter alimenta et sanguinem, putâ cibi primò aut secundò digesti, et ipse chylus ad veritatem humanæ naturæ et ad vitæ operationes per se non requiruntur, sed tantum ratione specialis statûs in quo ad sustentandam vitam cibi necessarii sunt; unde post resurrectionem in corporibus ejusmodi substantiæ nullæ erunt. Lacrymæ verò, sudor, saliva aut similia excrementa nullo modo ad naturæ humanæ integritatem spectant.

Dices: Cùm Christi corpus naturali modo nutritum fuerit, creverit ac vixerit, multas ipsi partes indesinenter accessisse, multas etiam ab eo recessisse manifestissimum est; planè oportuit sanguinem, aliosque humores et spiritus vitales perpetuò in eo transmutari, resolvi et renovari. Ergo si partes præcipuæ corporis Christi, imò et sanguis, humores alii et spiritus vitales fuerint proximè hypostaticè unita Verbo divino, admittenda erit nova alicujus materiæ unio continuò facta ad Verbum, necnon alterius materiæ nova à Verbo separatio; ex quo illud tandem consequetur non modicam materiæ molem fuisse successu temporis unitam Verbo et ab eodem prorsus dimissam. Atqui hæc repugnare videntur tum rationi, tum axiomati in scholis pervulgato quod ex S. Joanne Damasceno lib. 3 de Fide ortho-

doxâ, cap. 27, desumptum est, *nunquàm scilicet à Verbo esse dimissum quod semel assumpsit*; ergo Respondeo nec rationi, nec effato in scholis pervulgato hæc adversari. 1^o Non rationi; etsi enim mysterium Incarnationis humanas omnes cogitationes longè superet, attamen eo admissio ratio facilè concipit corpus Christi in terris conversantis, utpote simile nostro quantum ad præcipuas functiones vitales, nutritionem videlicet, accretionem, etc., necessariò varias debuisse experiri mutationes, tum accessu novæ materiæ sustentandis et alendis quibuslibet partibus et maximè sanguini necessariæ, tum particularum resolutione, et dissipatione, spirituum exinanitione, etc. Ex quo illud consequens est, quod ultrò fatemur nec rationi dissonare ostendi potest, partes nempe plurimas materiæ quæ successivè ad Christi corpus accedebant, ubi primum formâ seu configuratione partis seu particulæ alicujus naturalis ejusmodi corporis donabantur, hoc ipso fuisse unitas Verbo, quemadmodum et tunc uniebantur animæ quâ illud informabatur corpus. Particulas verò ab eodem corpore jugiter recedentes, ubi formam induebant à configuratione partium ad corporis humani integritatem pertinentium alienam, hoc ipso desiisse Verbo divino uniri, quippe cui catenûs solum conjungebantur, quatenûs ad integritatem corporis Christi contingebant. Quid porrò incommodi deprehendes, si multæ partes materiæ, amissâ (sensim et juxta leges à Deo constitutas) ratione particularum corporis à Verbo assumpti, novâque omninò indutâ formâ, atque idcirco jam à verbo dimissæ, si, inquam, ejusmodi partes, ut in omnibus corporibus viventibus citra miraculum contingit, à Christi corpore recessisse dicantur et in rerum naturâ etiamnum extare diversis indutæ formis? Certè id non magis impossibile est quàm particulas animâ rationali informatas dùm corpus humanum constituunt, repugnat ab illo corpore amoveri, stante adhuc ejus cum animâ unione, et in diversi generis corpuscula transmutari. 2^o Neque etiam effato quod à S. Joanne Damasceno scholæ mutuatae sunt, illa omnia repugnant. Nam sensus hujusce axiomatis est, Verbum nunquàm separatum esse ab animâ et corpore quas assumpsit; non verò hæc sententiâ significatur eas corporis humani particulas, quæ ni obstat miraculum, continuò immutantur et recedunt, non potuisse in corpore Christi nondum gloriâ quam resurgendo consecutus est, vestito, formam ab integrantibus

partibus aut particulis hujusce corporis omnino diversam induere, hæcque indutâ, non potuisse ab illo corpore secundum naturæ leges recedere, atque à Verbo separari. Et verò nonne meritò judicatur animam à corpore quod informat, non avelli nisi per mortem, licet à primo instanti quo illi corpori conjungitur, usque ad tempus mortis, perpetua hujusce corporis partium mutatio et renovatio contingat?

Instabis. Nonne absurdissimum est et infinità Verbi Dei majestate indignum, illud uniri proximè variis humani corporis partibus, ipsis unguibus, capillis? Dist.: Si hæc unio facta est sine respectu ad animam rationalem, concedo; secus, nego. Jam aliquando diximus, et modò ampliùs exponemus, unionem Verbi cum naturâ humanâ, et cum corpore Christi factam esse in ordine ad animam rationalem; scilicet si natura humana solo corpore constitisset non mente, nunquàm fuisset assumpta à Verbo, tum quia absurdum atque indecorum est cogitare naturam irrationalem assumi à Verbo Dei, tum quia natura ejusmodi salutis nostræ operandæ inutilis fuisset. Etsi autem Verbum ab animâ rationali infinito intervallo distet, hanc tamen propter se, tum corpus propter ipsam atque corporis partes non potuisse à Verbo immediatè assumi, seu esse unum ex extremis unionis immediatæ cum ipso nunquàm demonstrabitur. Illud Verbo Dei indignum non est quod nullam in ipsum mutationem inducit, nullam ei perfectionem detrahit, quo salutis media hominibus ratione admirabili affert, quo tandem perfectiones divinæ ipsaque Verbi Dei majestas mirum in modum declarantur. Atqui aliquam in Verbo mutationem aut imperfectionem nostro mysterio argui non ostenditur, ut patet ex dictis, Dissert. 1, cap. 2, a. 2. Atque perfectiones divinas ipsamque Verbi Dei supremam majestatem Incarnatione mirum in modum declarari jam alibi explicavimus. Vide Dissert. 5, cap. 1, 2, 3 et 4; ergo.

CONCLUSIO VI. Corpus Domini nunc in cælo existens, constat ossibus, carne et sanguine, carnisque habet lineamenta. Verùm hæc omnia am qualitativis longè diversis ab iis quas ante Christi resurrectionem induerant, afficiuntur et ornantur.

Probatur prima pars, quia corpus Christi in cælo iisdem constat partibus, quibus post ejus resurrectionem, in terris componebatur. Absurdè enim diceretur corpus quod gloriosè è sepulcro egressum est, deinde fuisse à Domino

immutatum, aliisque partibus coagmentatum. Et præterea nonne fide tenendum est illud in cælis extare, quod à discipulis visum est in cælos ascendere, præsertim cum Act. 1, v. 11, vox angelica insonuerit: *Sic veniet quemadmodum vidistis eum euntem in cælum*. Atqui ex Scripturis indubitatum est corpori Christi post resurrectionem fuisse ossa, carnem ac formam corporis humani; *Videte manus meas et pedes*, inquebat Luc. 24, v. 39, discipulis de resurrectione suâ dubitantibus, *palpate et videte, quia spiritus carnem et ossa non habet, sicut me videtis habere*. De sanguine aliqua difficultas, quia Scripturæ sacræ corpori Christi redivivo ejusmodi humorem conceptis verbis non adscribunt. Verumtamen, 1º, cum juxta easdem sacras litteras necnon testimonia SS. Patrum, certum sit, ut modò dicebamus, Verbum divinum sanguinem immediatè et proximè assumpsisse, ipsique hæc unione valorem contulisse infinitum, quo redempti sumus; consequens est re tanti pretii et sibi naturali non esse in cælo vacuum illud corpus. 2º Non caro tantum Christi Domini, sed et sanguis ejus in sacramento Eucharistiæ verè adsunt, nobisque sub speciebus panis et vini in alimentum animæ tribuuntur. Atqui, quod sub ejusmodi speciebus in Eucharistiâ verè extat, et fidelibus datur, illud sub specie propriâ in cælo existit et constituit corpus Christi immortale et gloriosum; ergo, etc. 3º Sanguis integritati ac veritati corporis humani ita necessarius est, ut corporibus resurgentium detrahi nequaquam possit; ergo, etc.

Probatur secunda pars nempe carnem, ossa, sanguinem atque universas Christi corporis partes longè diversis in cælo ornari qualitativis, quàm cum in terrâ ante resurrectionem extabant. Fide enim constat Christi corpus in cælis esse immortale et gloriosum, nec passioni nec dolori subjectum, atque, uno verbo, illud multò præcellentiùs quàm cætera gloriosè resurgentium corpora iis vestitum esse dotibus corporis *spiritualis*, quas in Epistolâ ad Cor. primâ, cap. 19, S. Paulus describit. Ergo leges motuum generales quæ ad corpora *animalia* et terrestria hic pertinent, in hoc corpore non ampliùs observantur; juxta alias regulas à Deo optimo, maximo, præclarè institutas, reguntur vitales ejus motus; nec ulli partium aut particularum resolutioni, transmutationi, accessioni, aut separationi obnoxium est.

De utrâque porrò nostræ conclusionis parte S. Augustinum disserentem audire non abs re

erit. Is, in Epistolâ 205, aliâs 146, ad Consensum qui ab ipso postulaverat, *utrum nunc corpus Domini ossa et sanguinem haberet, et reliqua carnis lineamenta*, primum sapienter monet
 « ea quæ in usu vitæ hujus nostræ corrupti-
 « bilia novimus, sine corruptione cogitare vix
 « nos posse, cum divinorum miraculorum
 « quædam documenta jam data sint, ex quibus
 « liceat conjectare majora. Nam, inquit, si
 « vestis Israelitarum per tot annos in eremo
 « sine triturâ esse potuit; si morticina pellis
 « calceamentorum tamdiu sine labe duravit,
 « potest utique Deus quorumlibet corporum,
 « per quantum voluerit tempus incorruptam
 « protendere qualitatem. » Deinde quæstionem
 solvit his verbis : « Ego, ait, Domini corpus ita
 « in cœlo esse credo, ut erat in terrâ quando
 « ascendit in cœlum. » Allatisque verbis Christi
 discipulos de resurrectione suâ dubitantes allo-
 quentis : *Videte manus meas, etc.*; quæ mox lau-
 davimus; « Fides adsit, inquit, et nulla quæstio
 « remanebit; nisi fortè de sanguine requi-
 « rendum est, quia cum dixisset : *Palpate et*
 « *et videte quia spiritus carnem et ossa non ha-*
 « *bet*; non addidit, sanguinem. » Ne autem
 ista quæstio aliis disceptationibus importunis
 det locum, hanc agitari non vult, quamvis tamen
 corpori Christi in cœlis sanguinem profectò non
 detrahat. « Non ergo, pergit, et nos addamus
 « inquirere, quod ille (Christus) non addidit
 « dicere; et de compendio, si placet, finita sit
 « quæstio. Fortassis enim acceptâ occasione
 « sanguinis, urgebit nos molestior perseru-
 « tator, et dicet, si sanguis, cur non et pituita,
 « cur non et fel flavum et fel nigrum, quibus
 « quatuor humoribus naturam carnis temperari
 « etiam medicinæ disciplina testatur? Sed
 « quodlibet quisque addat, corruptionem addere
 « caveat, ne suæ fidei sanitatem castitatemque
 « corrumpat. » Quàm porrò digna sunt obser-
 vari quæ addit S. doctor! « Ex consuetudine
 « rerum expertarum, ait, inexperta opera di-
 « vina infirmitas metitur humana, et argutulè
 « se garrere arbitratur, cum dicit, si caro
 « est, et sanguis est; si sanguis et cæteri hu-
 « mores; ergo et corruptio. Eodem modo dice-
 « ret, si flamma est, et ardet; si ardet, et urit;
 « si urit, ergo virorum trium in fornacem ignis
 « ab impio rege missorum corpora incendit.
 « Si autem hoc in tribus viris miraculum fac-
 « tum esse non dubitat quisquis de divinis ope-
 « ribus rectè sapit, cur non creditur qui fecit
 « illa corpora non posse igni corrumpi, fecisse
 « illud corpus nec igne, nec fame, nec mor-

« bo, nec senio, nec ullâ vi aliâ, quâ solet hu-
 « mana corpora labefactare corruptio? »

CAPUT III.

De modo unionis hypostaticæ.

Quatuor hîc quærentur, 1° an unio hypostatica sit naturalis, substantialis et omnium unionum maxima; 2° an natura humana Christi priùs extiterit quàm uniretur Verbo; 3° an illa unio facta fuerit animâ mediante; 4° an sit indissolubilis.

ARTICULUS PRIMUS.

Utrum hypostatica unio sit naturalis, substantialis et omnium unionum maxima.

Dico 1° : Unio hypostatica vero sensu dicenda est naturalis, non tamen si vox, *naturalis*, contra supernaturale accipiat. Probatur prima pars, quia S. Cyrillus anathematismo 3 et alibi, necnon alii plures è sanctis doctoribus unionem ejusmodi appellavêre naturalem et secundum naturam; 1° quia vera est, physica, et realis, non fucata, non adumbrata; 2° quia est naturarum in personæ unitatem, non personarum, inter quas non potest esse unio nisi moralis et secundum affectum. Probatur secunda pars, quia reverà unio hypostatica est supernaturalis respectu naturæ assumptæ. Ipsi enim indebita fuit, superat omnem creaturæ exigentiam, atque ad finem supernaturalem tendit et refertur; ergo, etc.

Dico 2°, unionem hypostaticam dicendam esse substantialem. Probatur, tum quia hâcce loquendi ratione usi sunt SS. Patres, tum quia ejusmodi locutio valdè idonea est exprimendæ veritati et soliditati unionis hypostaticæ : unio enim substantialis non est solum juxta affectum, sed res ipsas seu naturas attingit, atque eas, si non in unam naturam totalem, saltem in unitatem suppositi copulat et conjungit.

Dico 3°, unionem hypostaticam esse omnium unionum maximam. Probatur. Ea enim unio est omnium maxima, quâ extrema summè à se invicem dissita præstantissimo et arctissimo nexu colligantur; atqui 1° extrema unionis hypostaticæ, Verbum scilicet et natura humana summè distant, nempe ut finitum differt ab infinito. 2° Unio hypostatica præcellentissimè et arctissimè ejusmodi extrema unit, siquidem Deus non potest sese perfectiùs et uberiùs creaturæ communicare, nec creatura illa potest præstantiùs et arctiùs conjungi Verbo divino quàm per unionem hypostaticam; ergo.

ARTICULUS II.

An natura humana Christi prius extiterit quàm uniretur Verbo.

Manifestissimum est naturam humanam prius naturâ, ut aiunt, extitisse, quàm in Verbo subsisteret; prius est enim esse quàm alicui coniungi. Agitur ergo de prioritate temporis. Docuit Origenes animam Christi ante Incarnationem extitisse, atque ut illud mysterium fieret meruisse. Ita lib. 2 de principiis, c. 6; quod dogmatis præexistentiæ animarum ab ipso asserti quoddam consectorium fuit. Paulus Samosatenus et Photinus opinati sunt Christum prius extitisse quàm Deo conjungeretur, adeò ut ejusmodi unionem decursu temporis promerisset. Idem error solet affingi Nestorio. Vide Petavium, lib. 4 de Incarnat. capp. 9 et 10. Cæterum ii nonnisi adumbratam et moralem admiserunt unionem Christi hominis cum Deo. Accuratè verò observat Garnerius in suis ad Marium Mercatorem *Dissertationibus*, illam unionem moralem, quam inter Christum hominem et Deum Verbum Nestorius admisit, juxta ipsum à primo Christi conceptu in utero B. Virginis incoepisse.

CONCLUSIO. Humanitas Christi nullâ sui parte prius extitit, quàm Verbo hypostaticè copularetur.

Propositio est de fide. Probatur 1º ex Scripturis. Isaïæ 7, v. 14, et Matth. 1, v. 23: *Ecce virgo concipiet et pariet filium, et vocabitur nomen ejus Emmanuel, quod est interpretatum: Nobiscum Deus.* Luc. 1, v. 3: *Quod nascetur ex te sanctum, vocabitur Filius Dei,* Galat. 4, v. 4: *Misit Deus Filium suum factum ex muliere.* Rom. 1, v. 2 et 3: *Quod ante promiserat.... de Filio suo, qui factus est ei ex semine David secundum carnem.* Ex quibus testimoniis manifestum est eum quem Beata Virgo concepit, fuisse *Deum nobiscum*, seu incarnatum fuisse Filium Dei, factum ex muliere, et ex semine David. Atqui nisi in primo conceptu humanitas fuerit unita Verbo divino, Beata Virgo non concepisset Deum incarnatum, nec Filius Dei dici posset *ex muliere factus*; quid ita? quia si humanitas in primo ortu Verbo divino non fuisset unita, tunc in se seorsim substitisset, ac proinde constitueret hominem merum, meram personam humanam; ergo, etc.

Probatur 2º ex concilio generali VI, act. 11: « Incarnatur Verbum Deus penes nos, non prius effictæ carni copulatus, aut præformato, atque in sese præsubsistenti aliquando

« corpori implicatus, aut præexistenti animæ
« compositus, sed his tunc ad existentiam venientibus, quando ipsis Verbum Deus compositus est. Naturaliter coævam habentia ipsi existentiae unionem, et non ante suam cum Verbo verissimam copulationem per se ipsa unquam fuere, aut cujusquam alterius extiterunt, sed coætaneam habentia cum Verbi unionem existentiam, non, vel quantum ictus est oculi, anteriorem, ut Paulus Samosatenus et Nestorius obstrepunt. Simul enim caro, simul Dei Verbi caro fuit, simul animata rationaliter, simul Dei Verbi caro animata rationaliter. » Et actione 18: « In Verbi hypostasi, totius humanitatis formata natura, et quæ sua sunt indimnutè operante, cum eo cui unita est hypostaticè. »

Probatur 3º ex *Confessione fidei* Justiniani imperatoris pro synodo V: « Unitas autem secundum hypostasim, inquit; significat quod Deus Verbum, id est una hypostasis ex tribus Deitatis hypostasibus, non præexistenti homini unita est, sed in utero sanctæ Virginis fabricavit sibi ex ipsâ in propriâ hypostasi carnem animatam animâ rationali et intellectuali, quod est humana natura... Neque enim humana Christi natura per se absolute unquam dicitur. Sed nec propriam hypostasim, aut personam habuit; sed in hypostasi Verbi principium habuit existentiae. » Idem Justinianus in *Epistolâ* ad Mennam, quam, si Liberato fides, Vigilius S. pontifex approbavit, sic habet: « Si quis dicit aut sentit Domini animam prius extitisse, atque unitam fuisse Deo Verbo ante Incarnationem et generationem ex Virgine, anathema sit. » Ibid. corpus Christi statuitur ante unionem non formatum.

Probatur 4º auctoritate S. Leonis Magni qui in *Epistolâ* 25, ad Julianum Coensem episcopum, ita loquitur: « In eo verò quod Eutyches in episcopali judicio ausus est dicere, ante incarnationem duas in Christo fuisse naturas, post Incarnationem autem unam, necessarium fuerat ut ad reddendam rationem professionis suæ, crebris atque sollicitis judicium interrogationibus urgeretur, ne tanquam inane aliquid præterslueret, quod nonnisi de haustu venenatorum dogmatum videbatur effusum. Arbitror enim talia proloquentem hoc habere persuasum, quod anima quam Salvator assumpsit, prius in cœlis sit cominorata quàm de Mariâ Virgine nasceretur, eamque sibi Verbum in utero

« copularet. Sed hoc catholicæ mentes aures-
« que non tolerant... natura quippe nostra
« non sic assumpta est, ut prius creata post
« assumeretur, sed ut ipsa assumptione crea-
« retur. Unde quod in Origene meritò damna-
« tum est, » etc.

Probatur 5^o ex SS. Patribus, qui 1^o omnes
unanimitè docent Dei Verbum ex Mariâ Vir-
gine naturam humanam, seu, ut sæpè loqui
amant, carnem animâ rationali animatam as-
sumpsisse, idcòque Beatam hanc Virginem ap-
pellandam esse Deiparam. « Non dubitârunt
« (sancti Patres), inquit S. Cyrillus in Epis-
« tolâ ad Nestorium, sacram Virginem Deipa-
« ram appellare; non quòd Verbi natura,
« ipsiusve Divinitas ortûs sui principium ex
« sanctâ Virgine sumpserit, sed quòd sacrum
« illud corpus animâ intelligente perfectum ex
« eâ traxerit, cui et Dei Verbum secundùm
« hypostasim unitum secundùm carnem na-
« tum dicitur. » 2^o Tradunt præterea SS. doc-
tores naturam assumptam nunquàm seorsim
extitisse, nunquàm propriâ subsistentiâ sub-
stituisse, sed in hypostasi, et, ut sic loquar, in
sinu Verbi divini fuisse productam et in
primo suo ortu ab eò assumptam. S. Augus-
tinus Enchiridii cap. 26 : « Quid enim, inquit,
« humana natura in homine Christo meruit,
« ut in unitatem personæ uniti Filii Dei sin-
« gulariter esset assumpta?... Numquid antea
« fuit homo, et hoc ei singulare beneficium
« præstitum est, cùm singulariter promerere-
« tur Deum? Nempe ex quo esse homo cœpit,
« non aliud cœpit esse homo quàm Dei Fi-
« lius. » S. Cyrillus, in Epistolâ secundâ ad
Nestorium, quam tota synodus Ephesina so-
lemniter approbavit : « Non enim, ait, primùm
« vulgaris quispiam homo ex Virgine ortus
« est, in quem Dei Verbum deinde sese demi-
« serit; sed in ipso utero carni unitum, se-
« cundùm carnem progenitum dicitur, utpote
« suæ carnis generationem sibi ut propriam
« vindicans. » S. Joan. Damasc. lib. 4 de Fide
orthodoxâ, cap. 6 : « Non, inquit, quemadmo-
« dùm quidam falsò prædicant, mens ante
« carnem ex Virgine assumptam, Deo Verbo
« copulata est, et jam tum Christi nomen ac-
« cepit. Commentum enim hoc inter Origenis
« deliramenta recensetur, qui animas esse cor-
« poribus vetustiores docuerit. » Joannes
Maxentius, Dialogo primo : « Non homini jam
« in propriâ manenti subsistentiâ Deum Ver-
« bum credo unitum... Sed subsistentiam sive
« personam Verbi naturam suscepisse huma-

« nam quæ nunquàm velut communis præter
« Deum Verbum subsistit. »

Ratio autem cur anima Christi non prius
extiterit quàm corpus ejus adaptaretur, su-
menda est ex eo quòd Christus ut homo ejus-
dem ac cæteri homines fuerit naturæ; atqui
animæ nostræ non prius creantur quàm corpus
nostrum organis suis fuerit instructum. Hoc
discriminis solùm occurrit, quòd in ordinariâ
generatione materia per gradus disponitur ac
paulatim organa evolvuntur et explicantur.
Corpus verò Christi statim à Spiritu sancto
perfectè conformatum fuit.

Quæres an impossibile fuerit naturam huma-
nam prius seorsim existentem, postea assumi
à Verbo in unitatem personæ? Respondeo
ejusmodi naturam non posse seorsim existere,
quin propriâ seu merâ humanâ subsistentiâ
consistat, ac mera sit persona humana, repu-
gnare proinde hanc assumi à Verbo, et simul
personam merè humanam remanere; atque
hoc saltem sensu à SS. Patribus passim pro-
nuntiatum est, Verbum nonnisi secundùm af-
fectum, uno verbo nonnisi moraliter, non verò
hypostaticè aliquam sibi potuisse conjungere
personam. Utrum autem Verbum absolutè pos-
set ejusmodi naturam personalitate ipsi pro-
priâ, si ita loqui fas est, spoliare, sicque eam
sibi in personæ unitatem devincire, quæstio
est levioris momenti circa quam non omnes
eodem modo sentiunt. Notandum est hâc de re
istud Leontii Bysantini testimonium. « Quod
« nonnulli dicunt (inquit in solutione argu-
« mentationum Severi), quia humanitas Chri-
« sti non prius fuit formata, neque prius in se
« habuit hypostasim, neque perfecta assum-
« pta fuit, sed in Verbo habuit hypostasim,
« idcirco unam hypostasim amborum facere,
« hoc quidem ex parte verum est; ex parte
« non. Etenim non habuisse in se hypostasim
« neque prius formatam esse, non etiam
« dabimus; fieri verò propter hoc unam
« hypostasim amborum, tanquàm non pos-
« set aliter fieri, neque possent Deus et
« perfectus homo sic uniri, hoc non da-
« bimus. Quid enim sic aut illo modo habenti,
« ampliùs erit Deo ad unionem? Nec enim tem-
« pus unionis, vel locus vel imperfectio corpo-
« ris, ipse modus unionis unum Christum fecit.
« Non igitur propter impossibile, sed quia non
« decebat nudam esse unquàm, et sine Divi-
« nitate humanitatem Domini, idcò rejicimus
« anteformationem. » Doctrinam verò hanc
Leontii prædarguit [doctissimus Thomassinus,

lib. 3, cap. 12, n. 11, primò quia adversatur
 « auctoritati conspiratissimæ SS. Patrum, qui
 « adstipulatione unanimi unam utriusque na-
 « turæ ideò factam esse personam asseverà-
 « runt, quia non præsubsistens humanitas
 « copulata Verbo postea est, sed creando as-
 « sumpta. Si potest enim (inquit) præsubsis-
 « tens assumi ad personæ unitatem, falsum
 « ergo est ideò assumptam esse ad unitatem
 « personæ, quia non præsubsistens, sed creando
 « assumpta est. Nobis tanta est (inquit vir doc-
 « tissimus) hæc auctoritas Patrum, ut dissen-
 « tienti non facilè Leontio auscultemus. » Sec-
 « undò propter momenta quibus naturam priùs
 per se consistentem post assumi non posse
 adstruitur, quæ ipse sic explicat : « Quia nempe,
 « inquit, profana et (natura) quæ sine Divi-
 « nitate aliquando fuit; quia deflorata quodam
 « modo et infamata est, quæ creatæ hypostasi
 « subjacent; quia ingenua non est, quæ creatæ
 « personæ jure et dominio attrita est; quia
 « non coalescet usquequaque cum Verbo, quæ
 « extranea quandoque ab illo fuit; quia pere-
 « grinitatis vestigia elui penitùs non potuerunt
 « ab eâ quæ peregrè nata sit extra Divinitatis
 « confinia; quia peregrina erit ipsa Deitati, l'ei-
 « tas ipsi, nisi ab exortu concreverint; quia
 « naturale et substantiale non erit ipsi, quod
 « nata diù et formata supervenerit; quia pro-
 « priam semel vel aliquandiù experta hyposta-
 « sim, minùs libenter eâ spoliabitur, ad eam
 « suspirabit postea, rugamque faciet ne exae-
 « tissimè cum superiore hypostasi conveniat;
 « insuperabilis enim est naturæ impetus, sisti-
 « que et retardari sanè potest, at extingui ra-
 « dicitùs haud unquam potest. » Habes in his
 duobus testimoniis quæcumque de propositâ
 quæstione utrinque dici possunt. Nobis verò
 videtur temperandum quod Thomassinus tra-
 dit, à sanctis videlicet Patribus unanimiter do-
 ceri aut saltem supponi naturam humanam ab-
 solutè assumi non potuisse à Verbo nisi in ipso
 primo suo ortu. Nam paucos reperies ex Pa-
 tribus qui hanc de possibili quæstionem con-
 ceptis verbis attigerint; paucos etiam qui ex-
 ponentes esse unam in Christo personam quia
 natura humana à primo conceptu assumpta
 fuit, non magis studuisse videantur rationem
 ipsam quâ mysterium peractum est declarare,
 et ex eâ illud explicare, quàm, utrum alio modo
 absolutè fieri potuisset, investigare. Etenim
 aliud est cum SS. Patribus, unam in Christo
 esse personam inde colligere, quòd natura hu-
 mana nunquam à Verbo separata extiterit, nec

proinde propriam personalitatem unquam ha-
 buerit; aliud est dicere ejusmodi naturam, si
 semel seorsim et per se constitisset, nunquam
 potuisse assumi à Verbo divino; nec ullus non
 perspicit prius esse verissimum, quidquid de
 posteriori statuatur. Præclare porrò ad quæs-
 tionem quam agitamus hæc habet Petrus Picta-
 viensis *Sententiarum* parte 4, cap. 10 : « Ad
 « præmissam quæstionem nullam novimus so-
 « lutionem nisi quam Augustinus docet : Non
 « QUÆRAMUS ID QUOD NON EST, NE ID QUOD EST
 « NON INVENIAMUS. Ergo cùm Filius statim ani-
 « mam et carnem assumpsit ex quo fuerunt,
 « non quæramus quid fieret si priùs essent
 « caro et anima, quàm essent assumpta. Fortè
 « enim impossibile est fuisse factum. » Quà re-
 sponsione nihil sapientius.

ARTICULUS III.

*Utrum Verbum Divinum mediante animâ carnem
assumpserit.*

TRIA in quæstionem hic veniunt. Primum,
 an dicendum sit solo animæ interventu carnem
 à Verbo fuisse assumptam. Secundum, an ex
 necessitate vel ex congruentiâ tantùm id fac-
 tum fuerit. Tertium, quo sensu intelligi debeat
 carnem mediante animâ esse assumptam.

CONCLUSIO I. Verbum carnem assumpsit me-
 diante animâ rationali.

Probatur auctoritate SS. Patrum quorum hæc
 est doctrina et modus loquendi; quem loquendi
 modum imitatisunt Magister *Sententiarum*, l. 3,
 dist. 2; S. Thomas, 3 p., q. 6, a. 1 et 2, et post
 ipsos theologi omnes. Itaque Origenes, lib. 2
 de Principiis, cap. 6 : « Hæc ergo, inquit,
 « substantiâ animæ inter Deum carnemque
 « mediante; non enim possibile erat, Dei na-
 « turam corpori sine mediatore misceri. » S.
 Greg. Nazianz., Orat. primâ : « Ob hanc cau-
 « sam, inquit, Deus animæ interventu carni
 « junctus est; ac res inter se distinctæ et dis-
 « sidentes per interpositæ rei cum utrâque
 « illarum affinitatem et cognationem habentis
 « copulatæ sunt. » Et Orat. trigesima quintâ :
 « Per intermediam mentem Verbum cum carne
 « conjunctum est. » Denique Orat. 51, seu
 Epistolâ 1, ad Cledonium : « Mens menti,
 « inquit, ut propinquiore et conjunctiori jun-
 « gitur, et per eam carni, inter Divinitatem
 « et carnis molem intervenientem. » Rufinus
 in Symbolum scribens : « Filius ergo Dei, ait,
 « nascitur ex Virgine, non principaliter soli
 « carni sociatus; sed, in animâ in carnem
 « Deumque mediâ, generatur. Animâ ergo
 « mediâ et in secretâ rationalis spiritûs

« arce Verbum Dei capiente.... Deus est natus
 « ex Virgine. » S. Augustinus, Epistolâ 137,
 aliâs 3, ad Volusianum : « Ipsa (Divinitas), in-
 « quit, animam rationalem, et per eandem
 « etiam corpus humanum totumque omninò
 « hominem sibi coaptavit. » Et Epistolâ 140,
 aliâs 120, cap. 4 : « Verbum, ait, particeps
 « carnis effectum est animâ rationali median-
 « te. » Vide et lib. de Agone christiano, cap.
 18. S. Gregorius Magnus, lib. 18 Moral. cap.
 20, aliâs 12, n. 33 : « Dominus, inquit, per
 « Divinitatem lumen est, quod mediante ani-
 « mâ in ejus (B. Virginis) utero fieri dignatus
 « est per humanitatem corpus. »

Rationes diversas quibus conclusio fulciri
 potest, exposuit Petrus Cluniacensis, lib. 2
 Epistolarum, Epistolâ primâ. Præcipuas facile
 colligere erit ex modò dicendis conclusione
 tertiâ, ubi genuinam hujusce Patrum senten-
 tiæ interpretationem trademus. Interim adver-
 tendum est ejusmodi doctrinam usui præsertim
 duplici fuisse sanctis Ecclesiæ doctoribus.
 1° Ut Apollinaristas confutarent, qui, ut dis-
 sert. 4, cap. 3, notavimus, animam aut men-
 tem Christo detrahebant, et Verbum vices
 animæ aut mentis in ipso gessisse affirmabant;
 nam si Verbum divinum non potuerit assumere
 carnem nisi animâ rationali mediante; ergo
 anima rationalis Christo adscribenda est. 2° Ut
 paganis mysterium Incarnationis idcirco irri-
 dentibus quòd Deus Christianorum, utpote spiri-
 tus simplicissimus, crasso corpori uniri non
 posset, faciliùs responderent. Etenim observa-
 bant animam licet spirituales corpori humano
 arcuissimè uniri; aiebantque minùs difficile
 videri creditu Deum naturâ spirituales uniri
 posse animæ spirituali, quàm animam corpori.
 « Quid incredibile est, inquiebat S. Augusti-
 « nus, L. 10 de Civit. Dei, c. 29, Platonicos
 « alloquens, si aliqua una intellectualis anima
 « modo quodam ineffabili et singulari pro mul-
 « torum salute suscepta est? Corpus verò ani-
 « mæ cohærere ut homo totus et plenus sit,
 « naturâ nostrâ ipsâ teste cognoscimus. Quod
 « nisi usitatissimum esset, hoc profectò esset
 « incredibilius. Faciliùs quippe in fidem reci-
 « piendum est, etsi humanum divino, etsi mu-
 « tabile incommutabili, tamen spiritum spiri-
 « tui, aut ut verbis utar quæ in usu habetis, in-
 « corporeum incorporeo, quàm corpus incor-
 « poreo cohærere. »

CONCLUSIO II. Verbum mediante animâ car-
 nem assumpsit non ex congruitate tantumjuxtâ
 SS. doctores, sed ex necessitate.

Probat^{ur} 1°, quia SS. Patres locis modò al-
 latis, præsertim verò Origenes, S. Greg. Na-
 zianz. et S. Augustinus rem alio modo fieri non
 potuisse perspicuè significant, quibus adjun-
 gendus est S. Ambrosius, seu auctor tractatûs
 in Symbolum ad Append. oper. S. doctoris in
 ultimâ edit. rejecti. « Verbum, » inquit ille
 scriptor antiquus, quisquis sit, c. 13, « Ver-
 « bum et substantia Dei quæ per omnia incor-
 « poreâ est, corpori humano inseri non pote-
 « rat, nisi aliquâ spiritali naturâ mediante, id
 « est animâ. » Probat^{ur} 2°, quia adversùs
 Appollinaristas hanc doctrinam SS. Patres ur-
 gebant ut Christum animâ rationali non esse
 spoliatum ostenderent; atqui, nisi posuissent
 Verbum ex necessitate carni mediante animâ
 fuisse unitum, seu non aliâ ratione quàm me-
 diante spiritu hanc unionem potuisse peragi,
 jam nullum fuisset eorum argumentum; ergo.

Dices : S. Th. par. 3, q. 6, a. 1 ad tertium,
 non obscure innuit animam fuisse Verbo divino
 duntaxat medium *congruitatis* ad sumendam
 carnem. Unde, triduo mortis Christi *separatâ*
animâ (à corpore) *remansisse unionem Verbi Dei*
ad carnem concludit; ergo, etc. Dist. ant.,
 animam actu corpori conjunctam, medium
 congruitatis duntaxat fuisse eo sensu quòd
 animæ et carnis unione ad tempus cessante,
 non ideò Verbum carnem deserere debuerit,
 concedo; eo sensu quòd corpus, seu animæ
 unitum, seu ab eâ separatum, sub alio respec-
 tu potuerit conjungi Verbo, quàm propter
 habitudinem quam ad animam dicit, nego.
 Patrum sententiæ doctrina S. Thomæ consen-
 tanea est. Loquitur ille objecto in loco de
 animâ prout actu unitâ corpori. Censet hanc
 unionem actuales nexui carnis cum Verbo
 non ita esse necessariam ut eâ aliquantulùm
 triduo mortis interruptâ, tunc Verbum à carne
 separari debuerit. Quæ doctrina veterum sen-
 tentiæ consona ut capite sequenti patebit. Ve-
 rùm non negat S. doctor carnem, etiam dùm
 ab animâ triduo mortis separata extitit, alio
 modo fuisse unitam aut potuisse uniri Verbo,
 quàm propter habitudinem quam ad animam
 per id tempus retinuit. Quod tamen sufficit ut
 corpus ab animâ separatum nonnisi mediante
 animâ triduo mortis Verbo unitum perman-
 sisse dici debeat; et quidem eodem sensu quo
 hanc locutionem adhibuère SS. Patres, ut modò
 videbitur.

CONCLUSIO III. Corpus mediante animâ as-
 sumptum non est eo sensu, quòd sola Christi
 anima proximè uniatur Verbo divino, corpus

verò nonnisi remotè et quatenùs animæ unitæ conjunctum est; sed illud, *mediante animâ*, saltem significat corpus non fuisse assumptum nec potuisse assumi nisi propter habitudinem quam ad animam dicit.

Probatur prima pars, quæ certa est et ab omnibus docetur theologis, excepto Gabr. qui in 3 dist. 1, q. 2, a. 3, dub. 2, contrarium probabile judicat; probatur, inquam, 1^o ex hoc testimonio S. Gregorii Nysseni Orat. 1 in Christi resurrectionem: *Vides, inquit, quomodo Divinitas utrique parti* (animæ scilicet et corpori) *conjuncta per utramque declaratur* (miraculis à Christo patratis,) *cum et corpus agat et animus velit.* 2^o Quia capite præcedenti ex Scripturis et ex SS. Patribus manifestè ostensum est non modò animam Christi, sed et ejus corpus, imò et ejus corporis partes esse terminum proximum et inmediate unionis hypostaticæ, seu ea proximè et immediate à Verbo fuisse assumpta. Quod et capite seq. planè confirmabitur compluribus SS. doctorum testimoniis, disertè tradentium tum animam, tum corpus Christi triduo mortis, etsi à se invicem separata, Verbo tamen unita permansisse; ergo, etc. Probatur secunda pars, tum quia reipsa constat corpus Christi non fuisse assumptum nisi propter habitudinem quam habet ad animam rationalem, siquidem sine hac habitudine assumptio corporis ad Incarnationis fines nihil attinisset; tum quia, vel nihil sonat illa locutio, vel saltem significat Christi corpus esse assumptum propter habitudinem quam ad animam dicit. Consultò autem dicimus id *saltem* ejusmodi locutione significari. Nam 1^o, non absurdè censerentur SS. Patres voluisse indigitare priùs *naturâ* animam quàm corpus esse assumptam. Hoc unum quidem docet fides totam humanitatem simul tempore conditam et Verbo unitam fuisse; sed nihil vetat quominùs una humanitatis illius pars dicatur unita Verbo priùs *naturâ* quàm altera. Censent plures è scholâ theologi priùs hoc modo corpus esse assumptum; quia, inquit, priùs *naturâ* fuit organis suis instructum corpus Christi quàm animâ informaretur: atqui fuit unitum hoc ipso quo suis organis instructum; ergo. Verùm toties concilia et SS. doctores asserunt Verbum assumpsisse carnem animâ rationali animatam, ut nullo pacto dici queat carnem priùs *naturâ* esse assumptam quàm animâ informaretur. Imò verò, si quis ordo ejusmodi in assumptione animæ et corporis Christi cogitandus est, anima quæ per se

assumpta est et in quâ reperitur ratio assumendi corporis, priùs censenda est assumpta. « Una intellectualis anima, » ait S. August. loco jam allato lib. 10 de Civit. Dei, cap. 29, « modo quodam ineffabili et singulari pro multorum salute suscepta est; corpus verò animæ cohærere, ut homo totus et plenus sit, naturâ nostrâ ipsâ teste cognoscimus. » 2^o Fortè etiam illa locutio, *mediante animâ*, transferri potest ad significandum aliquâ perfectione seu formâ perfectivâ in animam ut in subjectum inhæSIONIS inductâ, totam humanitatem atque adeò ipsum corpus fuisse immediate copulatum Verbo; seu quod eodem recidit, ejusmodi formâ sive modo perfectivo in animâ recepto fundari relationem unionis proximæ tum animæ tum corporis ad Verbum. De quâ perfectione seu modo in memoriam revoca quæ superiùs dicta sunt cap. I hujusce dissertationis, art. 2.

ARTICULUS IV.

Utrum unio hypostatica sit perpetua et indissolubilis.

Tria hic quærentur, primum, an Verbum divinum ita sibi conjunxerit humanitatem Christi, ut nunquàm hanc deseruerit aut deserturum sit; secundum, an corpori ab animâ separato triduo mortis Christi unitum permaneret; tertium, an etiam per idem tempus sanguini in passione effuso conjunctum fuerit. Circa primum, notandus 1^o error Marcelli Ancyran, juxta quem teste Eusebio, lib. 3 de Eccles. Theol. cap. 9, Christus impleto omni servatoris et mediatoris munere, post ultimum judicii diem, corpus suum et animam erat relicturus; tum, iis in nihilum reversis, Patri resignaturus quod ab ipso regnum acceperat. Notandus 2^o error Arianorum quos S. Gregorius Naz. Orat. 36 refert opinatos esse Divinitatem conterritam accedente morte à Christo recessisse. Circa secundum, Gabriel, in 3 dist. 1, probabilius judicat triduo mortis corpus Christi Verbo unitum non fuisse, quæ opinio ei consentanea est, quam, ut jam notavimus, tanquàm probabiliorem ibidem trahit, nempe carnem Christi nonnisi remotè et mediatè esse Verbo conjunctam. Circa tertium, observandum est 1^o, quæstionem hanc de sanguine effuso et à carne separato, longè esse diversam ab eâ, quam supra tractavimus de sanguine in corpore Christi ante ejus mortem diffluente, vel rursus ab ipso cum à mortuis resurrexit, assumpto. Obser. 2^o, non agi de illis sanguinis Christi particulis quæ in Ecclesiis quibusdam

asservari dicuntur; nec de iis cruoris sacri vestigiis, quæ, v. g., in sindone Taurini exhiberi solitâ, deprehenduntur. Qui ejusmodi reliquias pretiosi sanguinis tanquàm veras admittunt theologi, has non ampliùs esse Verbo divino unitas consentiunt. Obs. 3^o, quòd circa annum 1351, grave jam super eâ quæstione dissidium Barcinonæ exortum fuerat; de quo ad Arragoniæ inquisitorem rescripsit Morlandinus, cardinalis, Clementis VI tum S. pontificis nepos, se vivo vocis oraculo in mandatis à pontifice accepisse, ut qui sanguinem in passione effusum à Divinitate fuisse separatum prædicaverant, ad retractandam hanc sententiam ut hæreticam cogerentur. Quod cùm executioni demandari curâsset inquisitor, tota controversia tunc temporis consopita est.

Recruduit verò anno 1462, Dominicanos inter et Franciscanos, Sedem S. Petri tenente Pio II, istis propugnantibus sententiam negantem ab Arragoniæ inquisitore proscriptam. Tribus diebus hoc ipso anno, coram ipso pontifice maximo, quæstio hinc et inde magno æstu agitata est. Qui in aliud tempus decisionem referri tunc voluit. Post biennium autem « ad pacem inter illos Ordines et in universâ Ecclesiâ super hâc quæstione conservandam, » inquit Spondanus, statuit (constitutione datâ calendis augusti) nulli licere opinionem negantem sanguinem Christi in triduo passionis à corpore separatum, Divinitati unitum permansisse, ut hæreticam proscribere, donec nec per Sedem apostolicam, quid in hujusmodi quæstione sentiendum esset, definiretur. » Atque adhuc sub judice lis est, de quo lege Wadingum in annalibus Ordinis Minor. ad an. 1351 et 1462, et Frassenium, t. 3 Scoti Academicæ, disp. 2, de Incarn. a. 1, sect. 2, q. 3.

Observ. 4^o, duas igitur de propositâ quæstione esse theologorum sententias. Durandus, in 4, Gabriel in Canonem, Tostatus Paradoxo 2, cardinalis S. Petri ad Vincula, et alii negant sanguinem effusum mansisse unitum Verbo. Ex adverso stant Capreolus, in 4, Bartholomæus Medina, 3 parte, q. 5, Suarez hic disput. 15, sect. 6, Vasquez, Gonctus, etc., qui sententiam negantem velut temerariam, erroneam et à S. Sede damnatam traducere non dubitant. Collius collegii Ambrosiani doctor, in amplâ Dissertatione quam quinque libris de hâc controversiâ Mediolani edidit an. 1617, opinionem affirmantem ut longè probabiliorem et veram amplectitur, sed notam erroris opinionem oppositâ impingere non audet. Eandem

sententiam, sed tantum ut probabiliorem tenent Frassenius loco citato, Witassius et alii. Utriusque partis rationes summam refert celeberrimus Turnelius, non in unam magis quam in aliam inclinans.

CONCLUSIO I. Unio hypostatica est ita constans et indissolubilis, ut Verbum humanitatem assumptam nunquàm deseruerit nec deserturum sit.

Propositio est fidei dogma certum et inconcussum. Probatur 1^o ex Scripturis. Danielis 7, v. 14 : *Potestas ejus (Christi) potestas æterna, quæ non auferetur; et regnum ejus quod non corrumpetur.* Psal. 109, v. 4 : *Tu es sacerdos in æternum.* Luc. 1, v. 33 : *Regni ejus non erit finis.* Joan. 12, v. 34 : *Christus manet in æternum.* Hebr. 7, v. 24 : *Hic autem eò quòd maneat in æternum, sempiternum habet sacerdotium;* et cap. 13, v. 8 : *Jesus Christus heri et hodiè, ipse et in secula.* Quæ omnia de Christo ut homine esse dicta manifestissimum est; ergo, etc. Probatur 2^o ex conciliis. In Symbolo Nicæno, quod omnia concilia subsequencia approbârunt, habetur regnum Christi nunquàm desitutum : *Et regni ejus non erit finis.* Et in definitione fidei concilii Chalcedonensis utraque naturadicitur concurrisse in eadem personam indivisibiliter et inseparabiliter.

CONCLUSIO II. Verbum divinum, triduo mortis, corpori Christi unitum mansit. Probatur 1^o, quia tum in Scripturis, tum in Symbolo fidei Christus dicitur sepultus, ratione videlicet corporis sui quod in sepulcro jacuit. Eodem autem modo dicitur sepultus, quo dicitur ratione animæ ad inferos descendisse; cùm ergo ipsis adversariis indubitatum sit animam Verbo conjunctam ad inferos descendisse, ac proinde de Christi personâ intelligi debeat quod dicitur eum descendisse ad inferos; ita pariter et de personâ Christi ratione corporis accipiendum est quod dicitur, eum sepultum fuisse. Ergo persona Christi seu Verbum triduo mortis corpori unitum mansit.

Probatur 2^o ex versu 10 Psalm 15 : *Non dabis sanctum tuum videre corruptionem.* Quæ prophetia à S. Petro, Act. 2, v. 27, ad Christum in sepulcro jacentem, ibique nullam expertum putredinem, atque inde redivivum cum gloriâ egressum refertur et applicatur. Ergo, cùm Christi corpus in sepulcro jacuit, ipse *sanctus Dei*, id est Christi persona juxta Psalterium Regium et Apostolum Petrum ibi jacuisse dicenda est, ratione videlicet corporis. Nec aliam ob causam omnis putredo ab ejusmodi corpore

propulsata est, nisi propter illius cum Verbo unionem; ergo, etc.

Probatur 3° auctoritate SS. Patrum. S. Gregorius Nyssenus, *Orat. 1 in Christi resurrectionem*, sic loquitur: « Deus qui totum hominem per suam cum illo conjunctionem in naturam divinam mutaverat, mortis tempore à neutrâ illius quam semel assumpsit parte recessit. » Et paulò post: « Quoniam igitur duplex est hominis concretio, simplex autem atque una Divinitatis natura, cum homo dirimatur atque distrahitur, Divinitas ipsa quæ individua est, non separatur, sed contra potius propter unitatem naturæ divinæ quæ utrique hominis parti ex æquo inest, quæ sejuncta separataque erant, rursus coeunt et conjunguntur. » S. Augustinus, *Epist. 87*, aliàs 57, ad Dardanum, cap. 3, n. 7: « Homo Christus, inquit, illo die (mortis) secundum carnem in sepulcro, secundum animam in inferno futurus erat; Deus verò idem ipse Christus ubique semper est. » S. Leo *Serm. 66*, qui est 17, de passione Domini, cap. 1, ait: « in tantam unitatem Dei et hominis naturam convenisse, ut nec supplicio potuerit dirimi, nec morte disjungi. » Ergo, si corpus Christi, juxta S. doctorem, fuerit à Verbo assumptum, constat ex ipso illud triduo mortis Verbo unitum permansisse. Atqui secundum S. Leonem corpus Christi fuisse à Verbo assumptum patet ex his ejus verbis sermone 27, qui est 8, de *Nativit.* cap. 1: « Utrique naturæ in suis proprietatibus permanente tanta est unitatis facta communio, ut quidquid ibi est Dei non sit ab humanitate disjunctum; quidquid autem est hominis, non sit à Deitate divisum. » S. Joan. Damascenus, lib. 3 de *Fide*, cap. 27, rem totam dilucidè exponit his verbis: « Quamvis, inquit, Christus ut homo mortem obierit, sanctaque ipsius anima ab immaculato corpore distracta sit; Divinitas tamen à neutro, hoc est, nec ab animâ, nec à corpore quoquo modo sejuncta est, neque propterea persona una in duas personas divisa fuit; siquidem et corpus et anima simul ab initio in Verbi personâ existentiam habuerant, ac licet in morte divulsa fuerint, utrumque tamen eorum unam Verbi personam quâ subsisteret semper habuit. Quam ob rem una eademque Verbi hypostasis, tum animæ tum corporis erat. Neque enim unquam aut anima aut corpus peculiarem atque à Verbi subsistentiâ diversam subsistentiam habuit. »

Probatur 4° ex axiomatico in scholis pervul-

gato: Quod semel Verbum assumpsit, nunquam dimisit; atqui Verbum non modò animam sed et corpus assumpsit; ergo, etc. Probatur 5° ex facto quod Suavis et post eum cardinalis Palavicinus L. 17 Hist. conc. Trid. cap. 6, referunt; cum videlicet Amandus aut Amans è familiâ Servitarum theologus, inter disputandum de Communionem sub utrâque specie, Corpus Christi demortui sejunctum fuisse à divinitate pronuntiasset, tum exortum esse inter Patres Trid. strepitum et murmur, illudque dictum improbatum fuisse. Nullum tamen hujusce theologi errorem in acta relatum haberi observat Palavicinus. Probatur 6° ex ratione quâ utitur S. Joannes Damascenus loco mox citato, nempe *nunquam aut animam aut corpus* (Christi) *peculiarem atque à Verbi subsistentiâ diversam subsistentiam habuisse*. Nam corpus triduo mortis ab animâ separatum, nisi Verbo unitum permansisset, saltem partialem habuisset subsistentiam creatam, quippe cum seorsim extitisset. Dixi *saltem partialem*; quidam enim volunt substantiam quamlibet singularem et existentem, hoc ipso quo seorsim seu alteri non unita existit, esse suppositum vel personam, sive sit natura completa in ratione naturæ, sive sit incompleta, id est, seu dicat naturaliter habitudinem ad constituendam cum altero naturam aliquam totalem. Qui autem hanc opinionem sequuntur quæ etsi minùs communis, nequaquam tamen est evidenter falsa, ii, inquam, quod consequens est statuerent, corpus Christi videlicet si triduo mortis à Verbo sejunctum fuisset, tunc totalem subsistentiam creatam habiturum; adeò ut verum et propriè dictum suppositum creatum constituisset. Verùm, licet in triduo mortis, partialis tantùm subsistentia creata corpori Christi tribueretur, suppositum creatum partiale ipso tunc fuisset constitutum, quod cum fide orthodoxâ conciliari non potest; ergo, etc.

Dices: Tertullianus, L. contra Praxeam, cap. 30, Eusebius L. 4 Demonstr. evang. cap. 13, S. Hilarius, cap. 33 in Matth., S. Epiphanius hæresi 20 et 69, S. Ambr. l. 10 in Lucam et in Expositione Symboli nunc ad Appendicem rejectâ, cap. 13, Leporius in Libello emendationis, Vitalis et Constantius Hispani episcopi, in Epistolâ ad Capreolum, Carthaginensem episcopum, docent ipso mortis tempore carnem à Divinitate fuisse derelictam; ergo, etc. Dist. ant., fuisse derelictam quantum ad specialem protectionis influxum, concedo; quantum ad unionem hypostaticam, nego. Intelligenti sunt

hi veteres eo sensu quòd, tempore Passionis et mortis, Divinitas humanitatem non eruerit, non defenderit, sed sævientium manibus dereliquerit, ut secundum altissima sapientiæ æternæ consilia, Christus omnium salvator et redemptor esse posset. Quo sensu hanc Christi morientis vocem : *Deus meus, Deus meus, ut quid dereliquisti me?* S. Leo, serm. 66, qui est 17, de Passione, et alii interpretes explicant. Magister Sententiarum L. 3 dist. 21, ita S. Ambrosium interpretatur, atque non aliam S. Hilarii fuisse mentem volunt doctissimi Benedictini in suâ ad S. doctoris opera præfatione.

Dices 2º : Si triduo mortis corpus et anima Christi manserunt unita Verbo, nonne dicenda sunt unita mansisse inter se, ac proinde veram et propriè dictam humanitatem constituisse? atqui tamen propriè dici nequit Christum triduo mortis verum fuisse hominem; ergo, etc. Nego maj. Siquidem alia est unio animæ et corporis ad se invicem, humanitati constituendæ necessaria; alia unio utriusque cum Verbo divino.

CONCLUSIO III. Certò definiri non potest Christi personam sanguini quem in passione effudit, hypostaticè unitam permansisse. Id tamen probabile videtur.

Probatur prima pars, quia nullo argumento, sive ex Scripturis, sive ex traditione deducto id certò adstrui potest. Diximus quidem superiùs Verbum divinum sanguini intra vivens Christi corpus extanti hypostaticè unitum fuisse, atque hanc propositionem pronuntiavimus nobis videri certam, licet Frassenius Scoti acad. T. 5, p. 16, et alii non infimæ notæ theologi eam tantum ut probabiliorē tueantur. Verum, licet Suarez et alii nonnulli contrasentiant, magnum discrimen statuendum est quæstionem inter de sanguine unito, et illam de sanguine separato quam nunc tractamus. Sanguis unitus pars est necessaria corporis, ejus functionibus vitalibùs inserviens; sanguis effusus et separatus, hoc ipso desinit esse pars corporis, illicò corrumpitur, seu induit formam ab eâ quam in corpore habet diversam. Quod ergo de priori ex Scripturis et traditione colligitur, non ideò adscribendum alteri. Et verò fatentur omnes theologi Verbum divinum non mansisse unitum sanguini quem Christus in circumcissione effudit, quia sanguis ille à corpore Christi separatus mutavit formam nec ampliùs erat ipsius pars actualis. Quo igitur argumento certo evinci poterit Christum sanguini in passione effuso et separato unitum permansisse? Dicentne san-

guinem qui in passione effusus est, incorruptum mansisse? Sed nullam in Scripturis aut traditione reperire est idoneam et certam hujusce incorruptibilitatis sanguinis effusi ac separati probationem. Hinc illum sanguinem à corruptione non eximunt, nisi quia supponunt quod in quæstione positum est, nempe ejus unionem cum Verbo triduo mortis perseverantem. 2º Tantum abest ut certò cognoscatur utrum Christi sanguis à corpore separatus naturam sanguinis servaverit, ut potiùs contrarium suadere videantur illæ pretiosi cruoris reliquiæ quæ aliquibus in locis conservantur, quæque eo quòd sanguinis naturam amiserint, à theologis qui eas esse veras sentiunt, Verbo jam non unitæ asseruntur.

Probatur secunda pars, præsertim ex virtute quam sanguini et aquæ ex latere Christi lanceâ post mortem percusso egressis Scripturæ et SS. Patres attribuere videntur. *Hic est*, inquit S. Joannes, ad id prodigium ejus testis fuerat, respiciens, *qui venit per aquam et sanguinem Jesus Christus; non in aquâ solùm, sed in aquâ et sanguine*. Sanctus verò Augustinus, tractatu 120 in Joannem, n. 2, de eodem ostento disserens : « Vigilanti verbo, inquit, Evangelista usus est, ut non diceret : Latus ejus percussit, aut vulneravit, aut quid aliud; sed aperuit; ut illic quodam modo vitæ ostium panderetur, unde sacramenta Ecclesiæ manaverunt, sine quibus ad vitam, quæ vera vita est, non intratur. Ille sanguis in remissionem fusus est peccatorum; aqua illa salutare temperat potulum; hæc et lavacrum præstat et potum.... Secundus Adam in cruce dormivit, ut inde formaretur ei conjux, quod de latere dormientis effluxit.... Quid isto sanguine mundius? Quid illo vulnere salubrius? » Plura de hoc argumento legere est apud auctores supra appellatos.

CAPUT IV.

De duobus unionis hypostaticæ consecrariis, nempe an compositio aliqua in Christo admittenda, et quæ communicatio idiomatum.

In duos articulos caput istud esse dividendum, ipse titulus ejus præfert.

ARTICULUS PRIMUS.

Utrum Christus aliquâ ratione compositus dici possit, et quomodo.

Conclusio. Christus non est compositus eâ compositionis speciè quæ fit ex partibus propriè dictis, et incompletis, quæque in scholis appet-

lari solet *ex his*; bene verò eâ quæ fit per modum numeri, et appellatur *cum his*.

Probatur prima pars; nam partes propriè dictæ sunt naturæ incompletæ quæ ad constituendum aliquod totum per se habitudinem dicunt, unde sibi mutuò aliquam perfectionem addunt; atqui Christus non constat ex ejusmodi partibus seu incompletis naturis, ut patet 1^o ex sacris Scripturis, siquidem ex iis liquidò habetur Verbum divinum esse immutabile et perfectissimum, ac proinde carnem assumendo non fuisse immutatum aut perfectius factum. 2^o Ex SS. Patribus; S. Athanasius apud Eutymium in Panopliâ, p. 2, tit. 15: « Cernis, inquit, in « unâ personâ non partium compositionem, sed « perfectarum (id est completarum in ratione « naturæ) naturarum conjunctionem, quâ non « duæ una fiunt essentia, sed una dignitas et « gloria declaratur. » Et S. Augustin. L. 2 contra Maximinum Arian., cap. 10: « Christus « una persona est geminæ substantiæ, quia et « Deus et homo est. Nec tamen Deus pars hu- « jus personæ dici potest; alioquin Filius Dei « Deus, antequàm susceperet formam servi, « non erat totus, et crevit cùm homo Divinitati « ejus accessit. » 3^o Ex ratione theologicâ; tum quia fide constat duas esse in Christo naturas distinctas et inconfusas, non unam tantum ex duplici naturâ compositam; tum quia nec natura divina cum humanâ uniri postulat, nec humanitas ad unionem cum divinitate habitudinem naturaliter dicit; tum denique quia perficitur quidem maximè natura humana, cùm unitur divinæ in personâ Verbi; at Verbum cùm sit suapte naturâ perfectissimum, nullam inde perfectionem consequi potest, nec Christus constans naturâ divinâ et humanâ perfectior dici potest Verbo ipso, quod utpote summè perfectum, quidquid perfectionis inest naturæ assumptæ, in se eminenter continet.

Probatur secundapars, nempe Christum esse compositum eâ specie compositionis quæ fit ex partibus impropriè dictis seu per modum numeri; partes enim impropriè dictæ sunt naturæ distinctæ realiter, et completæ in ratione naturæ, quæ uniri physicè naturaliter non postulant, quæque unionem sui vel non perficiuntur, vel non perficiunt; atqui ex duabus ejusmodi naturis Christus constat; natura enim divina et humana ex quibus coalescit, sunt distinctæ numero; præterea physicè uniri non postulant, ut dictum est; atque hæc perficitur quidem unionem hypostaticâ, sed alteram non perficit; illa verò perficit, non autem perficitur. Hinc

SS. Athanasius et Augustinus modò laudati dixerunt *duas essentias* seu *geminas* esse Christo *substantias* in unâ personâ Verbi. Et concilium Vœcumenicum collat. 8, anathematismo 4, S. Cyrillus L. de rectâ fide, ad Theodos. act. 1, concil. Ephes., S. Maximus, in tractatu contra unam naturam, Sophronius, in Epistolâ synodicâ ad Sergium, S. Joannes Dam., L. 3 de fide cap. 3 et 5, et alii, cùm de Christo loquuntur, compositionis nomen non refugiunt; et meritò sanè, cùm compositio nihil aliud sit quàm distinctorum unio. Atque juxta sensum in hac secundâ conclusionis parte explicatum, intelligendum est quod à nonnullis veteribus aliquando dictum est, Divinitatem et humanitatem esse partes Christi. Nempe nomen partium acceperunt impropriè, ut exprimerent naturam divinam et humanam in unam personam convenire.

Quæres 1^o, an dici possit Christum esse ex duabus naturis, an præterea dicendus sit esse in duabus naturis. Respondeo catholicam esse hanc locutionem, Christus est ex duabus naturis, siquidem duæ sunt in Christo naturæ, divina et humana. Hanc adhibent S. Hilarius, lib. 9 de Trinitate, n. 3, necnon Flavianus in suâ primâ fidei professione, quam concilium Constantinopolitanum probavit. Cùm tamen Eutychiani ut fucum facerent, Christum ante unionem ex duabus esse naturis profiterentur, duplicem cæteroqui naturam post unionem in ipso non agnoscentes; idcirco, ut ejusmodi hæreticorum fraudi occurrerent, Patres concilli Chalcedonensis act. 4, formulæ fidei Anatolii Constantinopolitani in quâ dicebatur *Christum esse ex duabus naturis*, voluere adjici non tantum *ex duabus*, sed etiam *in duabus naturis* esse Christum.

Quæres 2^o, an Christus dici possit ex tribus substantiis, nempe ex divinitate, animâ rationali et carne. Respondeo affirmativè. Ita locuti sunt S. Augustinus, lib. 13 de Trinit. cap. 17, n. 22, Isidorus Hispalensis, lib. de Differentiis n. 6, synodus Toletana XI, anno 675 celebrata in Professione fidei, item Toletana synodus XV, an. 688; imò aliquando utile fuit hunc loquendi modum adhiberi ut error Apollinaris Christo animam rationalem detrahentis disertius excluderetur. Quapropter cùm Benedictus II, summus pontifex, ad episcopos Hispanos rescripsisset, minùs cautè ab iis dictum in mox laudatâ synodo Toletanâ XI, Christum esse ex tribus substantiis; ii coactâ alterâ synodo contenderunt dici quidem posse Chri-

stum ex duplici constare substantiâ, divinâ nempe et humanâ, sed et alteram locutionem quam adhibuerant, esse etiam conformem fidei, et præterea elidendis Arianorum et Apollinaristarum fraudibus magis idoneam.

ARTICULUS II.

De communicatione idiomatum in Christo.

Ex iis quæ adversus Nestorium, Dissert. 4, cap. 2, art. 2, statuimus, liquidò constat esse admittendam in Christo aliquam nominum et proprietatum utriusque naturæ communicationem. Illa verò communio et attributio mutua considerari potest vel respectu naturæ, ut si diceres : *Divinitas est humanitas, natura humana est immensa, Divinitas est mortalis* ; quæ propositiones falsæ sunt et tam fidei quàm rationi repugnant, ut deinceps ostendemus ; vel considerari potest respectu personæ, ut si de Christo agens dicas : *Deus est homo, homo est Deus ; Deus est mortalis, homo est immortalis* ; id est persona Christi habens Divinitatem habet etiam humanitatem, etc. Quæ positâ unionem hypostaticâ sunt verissima et necessariò admittenda.

Duplex circa communicationem idiomatum est error extremè oppositus, alter Nestorianorum, qui communicationem ejusmodi etiam ratione personæ è medio sustulerunt, ut aliquando diximus ; alter Lutheranorum, qui communionem illam etiam respectu naturæ, saltem quantum ad aliqua Divinitatis attributa communicata humanitati, agnoscendam censuerunt. Itaque communicationem idiomatum sub duplici illâ ratione sigillatim spectabimus.

De communicatione idiomatum in Christo ratione personæ adversus Nestorianos. — Communicatio idiomatum quam ex mysterio Incarnationis nexam esse Scripturæ et tota traditio demonstrant, definiri solet, prædicatio seu attributio mutua et reciproca, in concreto, nominum, attributorum et proprietatum naturæ divinæ et humanæ, ratione unius Christi personæ. Sic, v. g., dicitur : *Christus est homo, Christus est Deus ; hic homo est Deus, Deus est homo ; Deus natus est, passus, mortuus ; homo est æternus, impassibilis, immortalis*, etc. Ut illa definitio intelligatur, observandum est nomina alia esse abstracta, alia concreta. Nomen abstractum seu terminus abstractus formam tantum significat, non subjectum. Hujusmodi sunt hæ voces, Divinitas, humanitas, æternitas, mortalitas. Nomen concretum significat tum formam tum subjectum ejus, ut *Deus*, id est, ille

qui habet naturam divinam, *homo*, id est, habens naturam humanam ; *immortalis*, id est, habens immortalitatem, etc. Prædicatio igitur seu attributio nominum utriusque naturæ si fieret in abstracto, coincideret cum communicatione quæ fieret ratione naturæ, de quâ communicatione mox locuti sumus, daretque istas propositiones insulas et fidei contrarias, ut videbimus : *Divinitas, seu natura divina in Christo est humanitas, natura humana est natura divina ; Divinitas est mortalis, humanitas est Deus*, etc. Prædicatio verò seu attributio reciproca eorundem nominum et attributorum in concreto et ratione unius Christi personæ, istas loquendi formulas exhibet : *Christus est homo, Christus est Deus ; Deus est homo*, etc. Hæ sunt locutiones quæ ex unionem hypostaticâ necessariò consequuntur. Nempe, quemadmodum propter unionem physicam animæ et corporis, ex quâ unica hominis persona resultat, dici potest, homo est corporeus, homo est rationalis, necnon rationalis est corporeus et vice versâ ; quia nempe hæc unitatem personæ hominis duas substantias diversas complectentis duntaxat supponunt, ut patet eo quòd illæ propositiones sic resolvendæ sint : Qui habet humanitatem, habet tum corpus, tum animam rationalem ; hæc persona quæ habet animam rationalem, habet etiam corpus ; ita propter unionem hypostaticam naturæ humanæ ad Verbum, quâ fit ut in Christo natura sit duplex, et una Verbi Dei persona, dici debet Christum esse Deum, et esse hominem, Deum esse hominem, et hominem Deum, etc. In comprobandâ autem ex sacris litteris et ex SS. Patrum et conciliorum auctoritatibus hæc idiomatum communicatione hîc non immorabimur, quippe cùm jam à nobis id confectum sit Dissert. 4, cap. 3, ubi adversus Nestorium demonstravimus unicam esse in Christo personam ; tunc enim in probationem attulimus nominum et attributorum utriusque naturæ communionem, in Scripturis et in totâ traditione sæpè usurpatam ; quæ, ut est hujusce unitatis necessaria appendix, ita ejusdem est certum et indubitatum indicium.

Verùm tradendæ sunt regulæ juxta quas illa communicatio idiomatum adhibenda sit ; ad quarum intelligentiam præterea advertendum ex nominibus concretis, alia appellari substantiva, alia adjectiva. Inter quæ illud discrimen intercedit quòd concreta substantiva rei naturam tanquàm formam cum subjecto exprimant, ut *Deus*, id est, habens Divinitatem, seu natu-

ram divinam, homo, id est, habens naturam humanam; contra verò adjectiva cum subjecto non significant naturam ipsam, sed tantum formam aliquam seu necessariò seu accidentaliter naturæ adjacentem, vel ejusdem naturæ actionem aliquam aut passionem aut participationem, ut immortalis, natus, mortuus, humanus. Rursus nomina concreta adjectiva, vel sunt derivata, vel absoluta. Derivata participationem aliquam substantiæ seu naturæ designant, ut *humanus*, *divinus*. Absoluta vel proprietates, vel actiones, vel passiones naturæ denotant, ut *mortalis*, *natus*, *passus*, etc. His præmissis sit

REGULA I. Nomina concreta substantiva, id est, quæ naturam ipsam seu Dei hominis tanquam formam cum subjecto exprimunt, ut *Deus et homo*, de Christo et de se invicem possunt prædicari. Itaque dicendum est: *Christus est homo*, *Christus est Deus*, et pariter cum de Christo agitur, *Deus est homo*, et *homo est Deus*. Ratio est quia nomina concreta subjectum ipsum cum formâ ei conveniente exprimunt; ergo, cum unum sit in Christo subjectum seu suppositum, evidens est ubi nomina concreta substantiva utriusque naturæ de Christo et de se invicem prædicantur, iis hoc unum significari, nempe idem suppositum seu personam quæ in Christo divinitatem habet, habere etiam humanitatem, quod verissimum est et ad fidem catholicam pertinet, juxta quam una est Christi persona et natura duplex, divina et humana. Triplicem tamen volunt Theologi adhiberi cautionem. Prima, ut nomen substantivum personam creatam non designet. Sic, v. g., demonstrato Christo dici nequit: *Ille homo factus est Deus*, licet dici possit: *Deus factus est homo*. Posterior enim propositio solum significat Deum seu personam divinam factam esse personam quæ humanitatem habeat; quod ipsam dogmatis sacri substantiam exhibet. Prior autem indigiteret personam aliquam quæ prius fuisset persona creata et humana, factam esse decursu temporis personam divinam; quod fidei penitus adversum est. Ob eandem causam abstinendum est quoque ab illâ locutione: *Homo factus est Deus*, quanquam aliquo sensu catholico accipi possit, quo eam usurpârunt S. Athanasius, lib. 1, de *Naturâ humanâ*; S. Greg. Naz., *Orat.* 36; S. Augustinus, lib. 4 de *prædestinatione Sanctorum*, cap. 16, et synodus Lateranensis, sub Martino I. Secunda cautio est ut nulla reduplicatio fiat. Namque dici non potest: *Deus quatenus Deus est homo*. Redu-

plicatio in formam cadit, et sensus ejusmodi propositionis foret Deum, quatenus habet Divinitatem, habere naturam humanam; quod tam insulsum est quam fidei adversum. Tertia ut illæ vitentur loquendi rationes, quæ etsi veræ in se, hæresi tamen promovendæ adjuvamento esse possent. Sic licet Christus ut homo reverà sit creatus et creatura, atque ideò, cum creaturam veriti non sint appellare SS. Ambros. Serm. 5 in Psal. 118, August. Epistolâ 187, aliàs 57, ad Dardanum, Joan. Damasc. lib. 3, c. 3, etc., attamen hæc propositio: *Christus est creatura*; simpliciter pronuntianda non est, ut S. Thomas advertit, 3, p., q. 16, a. 8, et post eum Patavius, lib. 7 de Incarn. cap. 6, quia scilicet hæresim Arianorum adjuvaret, sed dicendum: *Christus secundum quod homo, est creatura*.

REGULA II. Nomina concreta adjectiva quæ absoluta sunt, seu quæ proprietates, actiones, passiones significant, de Christo dici possunt et de se invicem. Sic, verbi gratiâ, dicendum est *Christum esse mortalem et immortalem*, *eum qui est immortalis factum esse mortalem*, etc. Pariter dicendum est, *Deum esse in terris visum*, *esse natum*, *crucifixum*, etc. Ratio est quia illa omnia suppositum sonant, et ad illud referuntur. Immortalis enim idem est ac habens immortalitatem, mortalis verò idem ac qui naturam mortalem habet; proindeque cum natura divina sit immortalis et natura humana morti obnoxia, sequitur, 1º illum qui habet utramque, dici posse mortalem simul et immortalem; 2º de eodem agendo dicendum quoque immortalem esse mortalem, etc., seu eundem qui habet immortalem naturam, habere etiam naturam mortalem.

Observa autem neque hic apponendam esse reduplicationem. Scilicet dici nequit: *Christus ut Deus, est mortalis, est natus, passus, etc.* non enim hæc competunt Christo sub eo respectu quo Deus est, sed tantum propter naturam creatam quam assumpsit.

REGULA III. Nomina concreta adjectiva, quæ derivata appellantur, seu quæ participationem aliquam naturarum sonant, ut *divinus*, *humanus*, minùs accuratè dicuntur de Christo et de se invicem. Sic, v. g., minùs rectè diceretur *Christum esse divinum, dominicum, deiferum*, vel *humanum*. Ratio est quia is minùs accuratè naturam divinam aut humanam participare solum dicitur, qui utramque reverà habet et complectitur: atqui Christus naturam divi-

nam et humanam non modò participat, sed utramque habet et complectitur; ergo minùs accuratè, etc. Id porrò unum in hâc regulâ pronuntiamus, quòd hæc *minùs accuratè* dicerentur. Scilicet locutiones ejusmodi errorem fidei adversum necessariò non involvunt, nec difficulter ad significationem catholicam possunt inflecti. Unde à veteribus quibusdam hæresis Nestorianæ non suspectis, et fidem unius in Christo personæ aliàs disertè exprimentibus, citra omnem erroris notam adhiberi potuit, ut observavimus Dissert. 4, cap. 2, art. 2.—Unum igitur harumce propositionum vitium est, quòd mancæ et imperfectæ dogmatis catholici expositiones sint, sensui hæretico per se non oppositæ, illique animis instillando valdè idoneæ, si nempe qui eas adhibere amat, simul voces alias sacro dogmati plenius declarando natas abjiciat, ut Nestorio contigit.

Allatam regulam S. Augustinus totam confirmat, lib. 1 *Retractationum*, cap. 19, n. 8, ubi postquàm dixit: « Non video utrùm rectè dicatur, *homo dominicus*, qui est mediator Dei et hominum, homo Christus Jesus, cùm sit utique Dominus... sed ubicumque hoc dixi, dixisse me nollem. Postea quippe vidi non esse dicendum; » continenter addit: « Quamvis nonnullâ possitratione defendi. » S. Thomas, 3 parte, q. 16, a. 3, ab ejusmodi regulâ excipiendam ducit propositionem istam: *Christus est homo divinus*; « quòd, inquit, nomen illud divinum consuevit prædicari etiam de his de quibus prædicatur essentialiter nomen Deus. Dicimus enim quòd divina essentia est Deus.... et quòd essentia est Dei sive divina... et Verbum divinum, cùm tamen Verbum sit Deus. » Hæc S. doctor. Attamen, si ad exactioris dialectices amussim dictam propositionem expendamus, satius videbitur eâ abstinendum, ne fortè cùm diceretur Christus homo divinus, dotibus duntaxat præcellentissimis ornatus intelligeretur, ut cùm Plato homo divinus fuisse perhibetur. Cæterùm caro et anima Christi accuratè dicuntur deificatæ, namque id tantùm significat humanitatem Christi Deo Verbo esse hypostaticè unitam.

REGULA IV. Nomina abstracta naturæ divinæ possunt de personâ Christi in sensu reali prædicari, non verò nomina abstracta naturæ humanæ. Sic, v. g., dici potest personam Christi, seu Christum esse Divinitatem, omnipotentiam, veritatem, etc. Non verò potest dici Christum esse humanitatem, vel huma-

nitatis proprietates. Ratio est quia Divinitas, et omnia Divinitatis attributa identificantur realiter cum personâ Christi, nempe Verbo divino; contra verò natura humana et ejus proprietates, etsi uniantur Verbo, ab ipso tamen realiter distinguuntur.

REGULA V. Quæ competunt naturæ divinæ et naturæ humanæ, de se invicem non possunt in abstracto prædicari. Sic dici non potest: Natura divina est natura humana, vel humanitas est æternitas. Ratio est quia ambæ naturæ unione hypostaticâ non confunduntur, sed distinctæ manent et inconfusæ.

REGULA VI. Nomina concreta, seu substantiva, seu adjectiva unius naturæ non possunt de aliâ naturâ prædicari aut de ejus partibus. Sic dici nequit: *Divinitas est homo, humanitas est Deus; Divinitas est nata, passa*, etc.

Ratio est quia, cùm naturæ distinguantur, necesse est ut quæ propria sunt uni, non possint de alterâ prædicari.

REGULA ULTIMA. Nomina adjectiva quibus unio hypostatica seu assumptio naturæ humanæ asseritur, de Christo Deo et homine non possunt promiscuè dici. Nimirum, v. g., licèt optimè dicatur, Deus incarnatus, vel caro factus, non tamen dici potest, homo incarnatus. Ratio est quia communicatio idiomatum supponit unionem hypostaticam cujus est necessaria appendix, non proinde ad ea quæ ejusmodi unionis sunt, seu quæ eam constituunt, se extendit.

Quæres utrùm vera sit et catholica hæc propositio: *Unus de Trinitate passus est*; necnon ista: *Unus de Trinitate incarnatus est*, seu: *Christus aut Verbum est unus de Trinitate*; quam sententiam altera supponit. Respondeo has propositiones esse verissimas et catholicas. Hoc unum inter eas discrimen intercedit, quòd ista: *Unus de Trinitate incarnatus est*; vera sit etiam reduplicativè, seu quatenus est *unus de Trinitate*; altera verò quæ ex eâ deducitur, nempe *unus de Trinitate passus est*, non sit vera nisi ratione humanitatis assumptæ, in quâ solâ Christus passus est, et propter communicationem idiomatum, quam jam explicavimus. Probatur responsio 1º ex Conciliis. Synodus V generalis, can. 10, sic habet: « Si quis non confitetur Dominum Jesum Christum, qui crucifixus est carne, Deum esse verum, et Dominum gloriæ et unum de Sanctâ Trinitate, talis anathema sit. » Vide etiam can. 4 et 5. Concil. Lateran. à Martino I, anno 649, contra Monothelitas celebratum, can. 2,

sic statuit : « Si quis.... non confitetur propriè et secundùm veritatem ipsam unum sanctæ et consubstantialis et venerandæ Trinitatis Deum Verbum è cœlo descendisse, et incarnatum ex Spiritu sancto ex Mariâ semper Virgine, et hominem factum, crucifixum carne, etc., condemnatus sit. » Patres concilii VI, tum in definitione fidei, t. 6 conc. pag. 1095, tum in sermone acclamatorio ad imperatorem, pag. 1052, tum etiam plerique actione VIII, suffragia singuli proferentes, Christum unum de Trinitate prædicant.

Probatur 2^o auctoritate summorum Pontificum. Joannes II, in *Epistolâ* 2 ad Justinianum imperatorem datâ Romæ VIII kal. aprilis an. 534, primus quæstionem definivit, confirmans quæcumque ad eum de fidei doctrinâ Justinianus scripserat in litteris quas suæ epistolæ inserit, inter quæ illud erat inprimis « Christum.... crucifixum, unum esse sanctæ et consubstantialis Trinitatis. » Et in *Epistolâ* 3 ad Senatores : « Justinianus imperator filius noster, inquit,... de his tribus quæstionibus orta certamina fuisse significavit, utrum unus ex Trinitate Christus et Deus noster dici possit; hoc est, una de tribus personis sanctæ Trinitatis sancta persona, etc. Probavimus in his catholicam imperatoris fidem, etc. Unum enim ex sanctâ Trinitate Christum esse, hoc est, unam de tribus sanctæ Trinitatis personis sanctam esse personam, sive subsistentiam, quam Græci ὑποστάσις dicunt..... evidenter ostendimus. » Eadem Justiniani fidem de uno ex Trinitate passo approbavit etiam Agapetus, Joannis II successor, in *Epistolâ* ad Justin. his verbis : *Huic quisquis contradicere præsumperit, à catholicâ communionem se noverit alienum.* Dedit hanc *Epistolam* Agapetus, die 18 martii Constantinopoli, quo à senatu romano exoratus, belli ab Italiâ avertendi causâ se contulerat. De anno verò quo exarata est, scitè observat doctissimus et eminentissimus Norisius, in dissertatione de uno ex Trinitate passo, cap. 10, pontificem non nisi die 22 februarii an. 536 Constantinopolim pervenisse, ac proinde ejusmodi *Epistolam* in edit. Bini et Labbæi malè legi datam *Flavio Belisario* V. C. id est, anno 535. legendum cum codice Vaticano : *Post consulatum Belisarii* V. C. id est anno 536.

Vigilius papa, in constituto quod eidem Justiniano inscripsit, dato Constantinopoli die 14 maii an. 535, hunc laudat quòd orthodoxâ professione unum de sanctâ Trinitate Christum

Deum et Dominum nostrum confitendum adstruxerit. Tandem S. Agatho, in *Epistolâ* ad imperatorem Constantinum Pogonatum quæ actione 4 concilii VI recitata est, fidei quam Justinianus Imperator suis edictis professus est, *rectitudinem* laudat. Is porrò maximè inculcârat unum de Trinitate esse Christum qui pro nobis crucifixus est.

Probatur 3^o ex sanctis Patribus. Dissimulandum non est propositionem de quâ agimus, licet quantum ad sensum in Scripturis et in totâ Traditione sæpiùs exprimatur, iisdem tamen terminis et vocibus non fuisse adhibitam ante quintum seculum. Primus omnium S. Proclus, fidei catholicæ adversus Nestorium strenuus et accuratus defensor, *ad interimendas*, inquit Liberatus, *Breviarii* cap. 10, *Nestorianorum versutias qui duas in Christo inducunt personas, unum de Trinitate incarnatum posuit.* Extat hæc *Epistola* S. Procli tum græcè, tum ex versione Dionysii exigui, qui Hormisdâ pontificatum gerente, occasione dissidii à monachis Seythis excitati, hanc latinè reddidit. Non modò autem unum de Trinitate incarnatum, sed etiam Christum pro nobis carne passum unum esse ex Trinitate tradidit S. Proclus in *Epistolâ* ad Joannem Antiochenum cui tomum suum ad Armenos approbandum miserat. Cujus quidem *Epistolæ* fragmenta leguntur apud Liberatum loco mox citato, apud Facundum Hermianensem, lib. 1, et collatione 5 concilii V generalis. Laudat etiam in hanc rem Joannes papa II, in *Epistolâ* 3, quæ est ad senatores, duo testimonia S. Procli ut excerpta ex ejus *Epistolâ* ad Occidentales. Horumce verò textuum posteriorem ut et alia plura Maxentius in Professione fidei, t. 9 Bibl. PP. Lugd., p. 535, tanquàm ex *Epistolâ* Procli ad Armenos desumptâ recitat, in quâ tamen non reperiuntur. Censet Petavius, lib. 5 de Incarn. cap. 3, in *Epistolâ* Joannis II mendum irrepsisse, et legendum *ad Orientales* quibus S. Proclum reverà scripsisse ex S. Cyrillo colligitur; Maxentium verò, quæ in hac S. Procli *Epistolâ* ad Orientales continebantur, præ inconsiderantiâ, ut è tomo ad Armenos excerpta exhibuisse. Contra Norisius Maxentium interpretatur de refutatione capitulorum Theodori Mopsuesteni *Epistolæ* ad Armenos adjectâ. Quæ refutatio perit quidem, sed extitisse colligitur tum ex fragmentis *Epistolæ* ad Joan. Antioch. collat. 5 synodi V insertis, tum ex alterâ S. Procli ad eundem *Epistolâ* apud Facundum Hermianensem, lib. 8, cap. 2.

Testis porrò est Liberatus, loco mox citato, Epistolam S. Procli ad Armenos à Joanne Antiocheno et ab episcopis cum eo congregatis approbatam fuisse et subscriptam. Cyrillus Schytopolitanus scribit S. Euthymium, celebrem monachorum in Palæstinâ institutorem, qui anno 475 obiit, necnon S. Sabam abbatem adversus Nestorianos prædicasse unum de Trinitate esse Christum. Constat quoque tum ex libello quem legatis Anastasii papæ Apocrisarii Ecclesiæ Alexandrinæ, versùs initia imperatoris Anastasii obtulerunt, cùm maximè ex supplicatione seu deprecatione clericorum et abbatum diœcesium Antiochiæ, Hierosolymorum et secundæ Syriæ ad Justinum imper., Anastasii successorem, constat, inquam, famosam sancti Procli sententiam de Christo uno ex Trinitate, genuino et catholico sensu intellectam, etiam quo tempore eâ mutilatâ, ut deinde dicemus, abutebantur Eutychiani, à Catholicis in pluribus Orientis Ecclesiis in professione fidei contra Nestorianos fuisse recitatam. Latinis quidem seriùs cognita et usitata fuit eadem sententia. Nec mirum, siquidem 1^o, ad notitiam eorum non antea pervenit Epistola S. Procli ad Armenos quàm à Dionysio exiguo temporibus Hormisdæ S. P. latinitate donaretur. 2^o Contra Nestorianos quibus coercendis nata erat illa locutio, concertationes Occidentalibus erant pauciores; Orientalibus verò frequentissimæ. 3^o Henoticum Zenonis, datum anno 482, Procli sententiam his verbis conceptam continebat: *Trinitas enim mansit Trinitas, et incarnato uno de sanctâ Trinitate Deo Verbo*. Illud autem edictum in Occidente rejectum est unanimi cum Ecclesiâ Romanâ consensu, à pluribus verò in Oriente receptum fuit. Facile ergo intelligitur quæ fuerit causa cur sententia de quâ agimus, etsi planè catholica et quoad rem ipsam ab Occidentalibus admissa, non statim quoad verba, ab iis recepta fuerit, quandoquidem nova iis videri debuit, et eâ insuper abusi fuerant Eutychiani. Sed ex eo maximè elucebat veritas hujusce locutionis, quòd eam esse catholicam, Dionysius exiguus in præfatione ad Epistolam S. Procli, Ferrandus diaconus in Epistolâ ad Anatolium, et alii præstantes viri apud Latinos statim agnoverint; quòdque post aliquam ejus ventilationem et discussionem, anno à morte Hormisdæ papæ qui de eâ nihil statuere voluerat, decimo, Joannes II, S. P., hanc solemniter approbandam duxerit, nemine reclamante præter solos ferè monachos Acœmie-

tas, quos idem pontifex propter Eutychianum errorem ab Ecclesiæ communione expellendos censuit.

Probatur ultimò ratione theologicâ. Omnes Catholici semper fassi sunt, atque etiam, dùm inter ipsos de uno ex Trinitate passo disputatum est, altè profitebantur, quod ex Scripturis et ex traditione certissimum est, Christum scilicet, qui pro nobis secundum humanitatem passus et crucifixus est, esse Verbum ipsum, seu Filium Dei pro nostrâ salute incarnatum, unam è personis sanctissimæ Trinitatis. Atqui hæ propositiones, unus de Trinitate incarnatus est et pro nobis secundum carnem est passus, hoc ipsum significant, non aliud quidquam. Enimverò planum est hanc esse ejusmodi propositionum significationem, modò vox *unus* in hac locutione, *unus de Trinitate*, accipienda sit *personaliter* et *notionaliter*, non verò *essentialiter* et *substantialiter*; adeò ut sensus sit, una Trinitatis persona, non verò una Divinitas Trinitatis, vel, unus è Trinitate Deus; atqui cùm dicitur, *unus è Trinitate*, vox *unus* sumitur personaliter non essentialiter, et sensus est, una persona SS. Trinitatis, non una Divinitas, seu unus Deus Trinitatis. Nam 1^o, istud Dei dictum Genes. 3, v. 22, *unus ex nobis*, juxta genuinam et omnibus probatam interpretationem, idem sonat ac una persona ex tribus SS. Trinitatis personis. Atqui eadem planè vis est vocis *unus*, in hac locutione, *unus de Trinitate*, ac in istâ Dei de se loquentis sententiâ *unus ex nobis*; ergo, etc. Hoc argumento utuntur Joan. II, in Epist. 3, ad senatores, Facundus Harmianensis, lib. 1, etc. 2^o S. August. Enchiridii cap. 38, ait: *unus trium*, ut designaret unam SS. Trinitatis personam; atqui hæ voces, *unus de Trinitate* idem manifestè exprimunt, ac istæ *unus trium*, quando agitur de Trinitate; ergo, etc. 3^o Quodcumque vox *unus*, sine adjuncto *Deus* aut alio æquivalenti, de Trinitate agendo pronuntiatur, nunquàm concipitur essentiam seu naturam divinam quæ cum suo concreto Deus identificatur, significare. Si velis unicâ voce unitatem substantiæ seu naturæ tribus personis communis designare, adhibe vocem *unum*, ut dixit Christus: *Ego et Pater unum sumus*; non dicas, *unus*, aliàs in Sabellianismi notam incurres. Pater enim, Filius et Spiritus sanctus sunt, *unum* id est, una substantia et divinitas, seu unus Deus, at non sunt *unus*, seu *unus* subsistens, ut aiunt, seu *una* persona. Hanc rationem premit Ferrandus diaconus cap. 15, Epistolæ ad Anato-

lium. 5° Cùm dicitur, *unus de Trinitate*, nonne ipsâ vi sermonis et indole vox *unus* ad aliquem ex iis tribus quibus sancta Trinitas constat, refertur? Certè id confirmant omnes loquendi modi quibus unus de pluribus numero designatur. Atque unus ex tribus quibus sancta Trinitas constituitur, idem planè est ac una sanctæ Trinitatis persona. Unde meritò Joan. II, in Epistolâ 3 ad senatores, jam non semel laudatâ, unum de sanctâ Trinitate Christum esse ita explicat : *Hoc est, unam de tribus sanctæ Trinitatis personis sanctam esse personam*; ergo, etc.

Quæres 2°, quodnam fuerit controversiæ de uno ex Trinitate passo olim excitatæ initium, status, progressus et finis. Respondeo quatuor præsertim circa id negotii esse notatu digna et tenenda. Primum est duplicem olim fuisse Catholicis de sententiâ S. Procli admittendâ aut rejiciendâ concertationem. Prior, impetrantibus Zenone ac deinde Anastasio, mota est adversus hæreticos : Petrum nempe Fullonem sedis Antiochenæ invasorem et alios Eutychianos Theopaschitas, qui in sententiâ S. Procli nomen carnis quâ passus est Christus, et aliud quodcumque naturarum in Christo diversitatem indicans consultò resecantes, idcirco profitebantur unum de Trinitate passum, ut significarent naturam divinam, quâ putabant humanitatem Christi esse absorptam et consumptam, dolores passionis sustinuisse. Il igitur vocem *unus* in mutilatâ sententiâ S. Procli sumebant essentialiter, vel saltem propositionem hanc, *unus de Trinitate passus est*, propugnabant reduplicativè; nolebantque eâ enuntiari subjectum duplex aliud denominationis, nempe persona Verbi cui tribuitur passio propter naturam humanam quam hypostaticè assumpsit, et in quâ solâ dolores passionis recepti sunt; aliud inhæSIONIS nempe humanitas quâ Christus passus est, quamque, unitione factâ, superstitem non mansisse Theopaschitæ contendebant. Hinc Felix III, in Epistolâ 3 ad Petrum Fullonem, graviter eum objurgat, eique in crimen maximum meritò vertit quòd unum de Trinitate passum dicens, Trinitatem consubstantialem in tres Deos dividat. Qui enim Deum Filium in propriâ naturâ passum dicit, divinam ejus naturam necessariò distinguit à Divinitate impassibili Patris et Spiritûs sancti, siquidem natura passibilis et natura impassibilis una eademque esse non possunt, adeoque plures naturas divinas et proinde plures deos inducit. Ubi manifestè apparet sum. hunc pontificem

qui in eâdem Epist. Filium appellare non dubitat *unum individuae Trinitatis*, non rejecisse hanc propositionem in se sumptam, unus de Trinitate passus est, sed tantum prout ab hæreticis obtrudebatur ad errorem suum callidè mentibus infundendum.

Altera controversia quæ de hâc propositione olim mota est, ipsosmet Catholicos divisit. Cœpit anno 519 Constantinopoli, auctoribus monachis quibusdam Scythis, hujusce sententiæ, unus de Trinitate passus est, professionem nimio studio urgentibus, Justino imperante, et Hormisdâ romano pontifice. Tunc in hâc urbe versabantur Sedis apostolicæ legati, quos pacis Ecclesiarum diuturno Acacii schismate interruptæ redintegrandæ causâ Hormisdas ad Justinum principem catholicum miserat. Il contentionem à monachis Scythis excitatam compescere frustra conati, de eâ Hormisdam certiore faciant, quem etiam ut adirent monachi Romam profecti sunt. Hormisdas, ex prudenti œconomiâ, quæstionem, ut modò probabimus, solemni judicio dirimere noluit, adeò ut adiaphoris liberæ Catholicorum disputationi relictis hæc controversia annumerata fuerit, donec anno 554, à morte Hormisdæ decimo, Joannes II hanc Justiniani Augusti professionem, nempe, unum de Trinitate esse Christum qui pro nobis crucifixus, auctoritate suâ confirmaverit.

Secundum, quod hic observandum et tenendum ducimus istud est, eos Scythas monachos, qui tanto studio pro sententiâ S. Procli, Constantinopoli primùm, ac deinde Romæ decertarunt, ab omni hæreseos Nestorianismo oppositæ, nempe ab Eutychianâ pravitate fuisse prorsus immunes. Baronius ad annum 520, Binius in notis ad Epist. 70 Hormisdæ, Labbæus, in observationibus ad Epistolam eandem, et alii complures, monachos Scythas Eutychianâ saltem fuligine tinctos putant. Vasquesius verò, in 3 S. Th. Disp. 13, cap. 3, Petavius, lib. 5 de Incarn. cap. 2, Thomassinus, Dissert. 18 in Synodos, n. 40 et lib. 3 de Incarn. cap. 14, Christianus Lupus in Notis ad Epist. variorum Patrum t. 2, p. 452, Duhamelius, lib. 2 de Incarn. cap. 5, Dionysius à Sanctâ Marthâ in vitâ Cassiodori gallicè scriptâ, Norisius in Dissertatione de uno ex Trinitate passo, et in Apologiâ monachorum Scytharum, etc., quam sequimur opinionem propugnant. Probatur autem quia, ut ait Petavius loco citato n. 2, « qui professiones fidei ab illis (monachis Scythis) « editas, ac cætera eorundem scripta, quæ

« extant, diligenter expenderit, nullum ibi
« deprehendet vestigium hæresis illius, » vide-
licet Eutychie. Quod quidem doctissimi
Petavii judicium nemo theologus non approba-
verit, si accuratè legat ejusmodi scripta,
nempe Apologiam quam illi monachi legatis
obtulerunt; habetur t. 9, Bibl. PP. Lugd.
p. 534; capitula quæ ejusmodi Apologiæ ad-
junxerant, ibid. p. 537; Professionem fidei Ma-
xentii horumque monachorum doctissimi, quæ
iisdem ferè vocibus concipitur, quibus definitio
fidei concilii Chalcedonensis; ibid. p. 534;
denique reliqua hujusce Maxentii opera, in
quibus vehementius aliquando studium, et
alios hujus generis nævos nonnunquam depre-
hendes, nihil verò prorsus quod eum Euty-
chianæ hæreseos suspectum efficiat.

Tertium est nec legatos Hormisdæ, neque
Hormisdam ipsum, monachorum Scytharum
propositionem ut hæreticam damnâsse. Et qui-
dem legati ut hæreticam non proscripserunt.
Tametsi enim in suis ad Hormisdam suggestio-
nibus, illorum monachorum intempestivam
inquietudinem maximè vituperant, fidem eorum
suspectam habent; atque illorum propositio-
nem novam et hæresibus multisque malis in
Ecclesiâ fovendis idoneam esse scribunt, attamen
1^o non suggerunt Hormisdæ ut monachorum
propositionem tanquam hæreticam pro-
scribat; sed tantum ut eam dogmati catholico
contra Nestorianorum versutias declarando non
esse necessariam doceat. « Sanum mihi vide-
« tur, et utile et ad pacem Ecclesiarum con-
« veniens, » inquit Dioscorus diaconus in unâ
è suis ad Hormisdam de hoc negotio suggestio-
nibus, « nihil aliud responsum dari, nisi : Suf-
« ficit sanctum Chalcedonense concilium, in
« quo et aliæ synodi continentur; sufficiunt
« Epistolæ papæ Leonis, quas synodus confir-
« mavit. Novitatem in Ecclesiâ introducere
« nec volumus nec debemus. » 2^o Quod à S.
pontifice respondendum arbitrabantur legati,
illud ipsum coram imperatore et senatu de illâ
quæstione responderant : « Modò hoc dicimus, »
inquiunt in suggestionem ad Hormisdam cuncto-
rum nominibus inscriptâ, « ut nulla novitas à
« Sede apostolicâ scribatur; quia et nos ante
« imperatorem et ante senatum hæc indicavi-
« mus, dicentes : Extra synodos quatuor; ex-
« tra Epistolas papæ Leonis nec dicimus nec
« admittimus quidquid non continetur in præ-
« dictis synodis, aut quod non est scriptum à
« papâ Leone non suscipimus; quia si voluerit
« Dominus noster qualemvis novitatem scri-

« bere, pejus erit istud initium (vitium) quam
« illud quod factum est per Eutychetem. »
Similia quoque iidem legati ad monachos, co-
ram se et coram episcopo Constantinopolitano,
adversus Victorem diaconum volentes ut con-
cilio Chalcedonensi necnon S. Leonis et S.
Cyrilli dogmaticis litteris adderetur *unus de*
Trinitate; responderunt teste Dioscoro dia-
cono in aliâ suâ suggestionem ad Hormisdam t.
4 conc. pag. 519. Itaque sententia quam mo-
nachi tanto æstu propugnabant non visa est
legatis ut hæretica damnanda; nempe eos mi-
nimè latere poterat ejusmodi propositioni in se
sumptæ significationem inesse catholicam, sed
1^o quia nova erat, id est, neque à conciliis ne-
que à S. Leone conceptis verbis adhibita; 2^o
quia in sensum perversum à Petro Fullone et
ab Anastasio imperatore fuerat usurpata; ideò
volebant eam synodorum definitionibus non
adjici, imò minimè necessariam declarari, at-
que ejusmodi synodos et Epistolas S. Leonis
plenæ dogmatis expositioni statui sufficere.
Votis legatorum suorum annuit Hormisdas. In
sex Epistolis quas de monachorum Scytharum
dissidio scripsit, hanc propositionem : *Unus de*
Trinitate passus est, non modò non condemnat,
sed ne quidem conceptis verbis exprimit et
memorat. In primâ quæ est ad Justinianum
numero 66, solummodò rescribit monachos
illos Romæ mansuros, donec legatis suis redu-
cibus inquirere possit *quâ reverà faciente causâ*
inter eos fuerit commota discordia. Secundæ
ejus Epistolæ, quæ est 67, idem est argumen-
tum. In tertiâ, quæ est 70 ad Possessorem,
in Scythas monachos Româ profugos vehemen-
ter quidem et acriter invehitur, illos rixandi
libidinis accusat, temeritatisque, novitatis, su-
perbiæ et contumaciæ notas iis impingit. At nul-
lam hæreseos accusationem in ipsos instruit,
nullamque propositionis : *Unus de Trinitate pas-*
sus, expressam mentionem facit. In quartâ, quæ
est 77 ad Justinianum; promissam sibi à Justi-
niano circa hoc negotium legationem à se expec-
tari dicit. Interim, ut excludat sensus perversos
qui propositioni famosæ quam tamen expressè
non commemorat, poterant ab hæreticis alliga-
ri, hæc de sanctâ Trinitate docet : « Sancta Tri-
« nitas, Pater, Filius et Spiritus sanctus unus est
« Deus, hanc Israel jussus adorare; cujus inse-
« parabilis et indiscreta substantia non potest
« dividi, non potest sacrilegâ distinctione sepa-
« rari, servatâ tamen proprietate unicuique per-
« sonæ. » In quintâ, quæ est 78 ad Justinum
Augustum, constitutis à concilio Chalcedonensi,

et à S. Leone inhærendum statuit; et quamvis ab imperatore rogatus quæstionem definire, vitandæ tamen discordiæ causâ nihil de eâ pronuntiandum putat. In sextâ demùm, quæ est 79 ad eundem Justinum Augustum, Trinitatis et Incarnationis mysteria accuratè exponit, divisionem in Trinitate, et passionem in Divinitate admittendam negat sicque eos proscribit pravos errores quos propositioni : *Unus in Trinitate passus*, Theopaschitæ præposterè annexuerant. Cæterùm de hâc propositione idem silentium servare pergit. Ergo propositionem monach. Scytharum Hormisdas ut hæreticam non damnavit. Id ipsum testimoniis auctorum coætaneorum maximè confirmatur. Maxentius in Responsione ad Epistolam Hormisdæ, cunctis notum esse affirmat, quòd monachis responsum quærentibus romanus episcopus dare omnibus distulerit. Ferrandus diaconus in Epistolâ ad Severum scribit nihil ante pontificatum Joannis II fuisse ab Ecclesiâ romanâ in hâc causâ definitum. Denique Anatolius Ecclesiæ romanæ diaconus post Hormisdæ mortem de hâc propositione eundem consulit Ferrandum diaconum Carthaginensem; quod certo indicio est quæstionem à Sede apostolicâ nondùm solemnî judicio definitam fuisse.

Itaque Hormisdas S. P. ex unâ parte prospiciens sententiam *de uno ex Trinitate passo*, non fuisse antiquis Patribus usitatam, tùm Latinis prorsus ignotam esse, eamdemque apud Græcos à Petro Fullone pseudo-patriarchâ Antiocheno, et ab Anastasio imperatore sensu Eutychiano usurpatam; ex aliâ verò parte sibi non dissimulans hâc propositione in se sumptâ sensum catholicum referri; de cætero apud se meritò statuens eam plenæ declarationi fidei minimè esse necessariam; prudenter œconomiâ usus est, atque ab ejusmodi approbandâ vel reprobandâ sententiâ cautè abstinuit, jure veritus ne in iis quibus res christiana versabatur circumstantiis, definitio quæstionis ejusmodi, quoquo modo fieret, novarum dissensionum in Ecclesiâ occasionem daret.

Quartum est controversiam de uno ex Trinitate passo meram fuisse inter Catholicos logomachiam, seu quæstionem de nomine. Quod probatur 1º, quia hoc ipsum annotârunt Justinianus in tertiâquam de ejusmodi argumento ad Hormisdam scripsit Epistolâ, t. 4 Conc. Lab. col. 1517; Ferrandus in Epistolâ ad Anatolium c. 18, et in Epistolâ ad Severum c. 9, necnon Facundus Hermianensis, lib. 4 de tribus capitulis. Probatur 2º, quia omnes Catholici quidquid

in hoc negotio fide erat tenendum, apertè et unanimiter profitebantur. Etenim aiebant universi secundam SS. Trinitatis personam seu Filium Dei unigenitum pro nobis esse incarnatum, et secundum carnem cruci affixum, seu, quod eodem recidit, Christum qui pro nobis passus est, unam esse Trinitatis personam. Cuncti in Christo duas admittebant naturas, divinam secundum quam eum prædicabant esse impassibilem, et humanam secundum quam eum esse passum et crucifixum credebant. Hæc erat fides inprimis legatorum Hormisdæ, ut patet ex jam laudatâ suggestionem secundâ Dioscori diaconi ad Hormisdam, tùm Hormisdæ ipsius qui in Epistolâ suâ ad Justinum, quæ est 79, hanc disertè exponit, tùm denique monachorum Scytharum ut videre est in eorum Apologiâ et capitulis, et in Maxentii lucubrationibus. Qui igitur unum ex Trinitate passum volebant dicere, vocem *Unum*, accipiebant essentialiter, et absolute, id est, sine relatione ad personas, unde inferebant hâc locutione vel Divinitati ac proinde toti Trinitati passionem adscribi, vel sanctam et individuum Trinitatem in tres Deos dividi. Sanè ex Epistolis 77 et 79 Hormisdæ manifestissimè colligitur hunc esse veritum pontificem ne propositio quâ de agimus, ejusmodi pravo et hæretico sensu quo à Fullone propugnata fuerat, adhiberetur. Aliqui etiam, ut Trifolius (1) vocem *Unus*, pro uno Patre, aut uno Filio, aut uno Spiritu sancto in laudatâ propositione sumi posse contendeant, quasi eâ unus pater de Trinitate, aut unus de Trinitate Filius, etc., passus significaretur. Quapropter ineptè postulabant quis ex tribus Patribus, aut ex tribus Filiis, etc., hâc sententiâ passus exprimeretur? Jam verò qui inter Catholicos ex adverso unum Trinitatis esse passum profitebantur, ut Dionysius exiguus, Ferrandus Rusticus, ipsique monachi Scythæ, ii omnes S. Proclum sententiæ hujus auctorem secuti, vocem *unus* accipiebant ut in eâ propositione reverà sumi debet, notionaliter scilicet seu personaliter, non pro uno Patre, aut uno Filio, etc., ut ridiculè Trifolius, sed generalius pro uno subsistente, seu unâ è Trinitatis personis, adeò ut sensus sit: Unus subsistens de Trinitate, seu una de Trinitate persona carnem assumpsit, et in naturâ assumptâ dolores passionis et ipsam crucifixionem sustinuit. Atque non aliam fuisse ejusmodi Catholicorum mentem ex eorum

(1) Vide Epistolam Trifolii presbyteri t. 4 conc. Labb. et ad calcem t. 2 collect. Harduini.

scriptis adhuc superstilibus liquidissimè constat. Ergo, licet Maxentius in responsione ad Epistolam Hormisdæ et alibi adversarios suos non sine magnâ temeritate hæreticos nuncupet, quamvis legatis Hormisdæ suspecta visa fuerit monachorum Scytharum fides, istorumque propositione hæresim Arianam propinari senserit Trifolius, attamen quod ad fidem attinet, et substantiam dogmatis, nullum hos inter et illos discrimen intercessit.

Quæres 2º, an Trisagio, id est, invocationi quâ Deus ter dicitur sanctus in hunc modum: *Sanctus Deus, Sanctus fortis, Sanctus immortalis*; addi possit, *qui crucifixus aut crucifixus es pro nobis*. Respondeo 1º, si primum Trifagii usum spectes, juxta quem ad totam SS. Trinitatem refertur, illi nonnisi impiè et hæreticè adjici posse hæc verba: *qui crucifixus es pro nobis*. Ratio est quia hæc additione vel toti Trinitati adscriberetur passio, vel saltem Spiritui sancto, qui, ut observat Felix III, S. P., in Epistolâ tertiâ ad Petrum Fullonem, his verbis, *sanctus immortalis* in Trisagio ad totam Trinitatem relato designatur. Atqui sive toti Trinitati, sive Spiritui sancto ac proinde Divinitati passionem adscribere impium, absurdum et hæreticum est. Solus Filius pati potuit qui solus naturam passibilem assumpsit, nempe naturam humanam in quâ, non in Divinitate, dolores passionis sustinere dignatus est. Hinc Petrus Fullo, sedis Antiochenæ inceptor, graviter à Felice III, mox laudatâ ejus Epistolâ tertiâ, necnon in duabus sequentibus, reprehensus est quòd sacro Trisagii hymno additionem de quâ agimus, adjungere ausus esset. Quas Epistolas, etsi Valesius in observat. de Petro Antiocheno ad Evagrium cap. 5, pag. 178, Tillemontius in Acacio Constantinop. art. 49, et alii spurias existiment, meritò tamen retinendas censet. Norisius in Historiâ controversiæ de uno Trinitatis passo, cap. 2, et geminas esse colligit ex Anastasio Biblioth. in Epistolâ ad Joannem diaconum, t. 12 Biblioth. PP. Lugd. p. 834, col. 2. Tanti verò Constantinopoli tumultus occasione ejusdem additamenti jussu Anastasii imperatoris in Ecclesiâ solemniter decantati, anno 512 exorti sunt, tantaque seditio adversus impium principem tanquàm in Trinitatis inimicum mota, ut ipse ne è solio ejiceretur metuens, se deinceps in Ecclesiæ ritibus nihil innovaturum polliceri et jurare coactus fuerit. Factum referunt Evagrius, lib. 3 Hist. eccles. c. 44, Marcellinus comes in Chronico, Theophanes, Cedrenus, Victor Tununensis, Zonaras, etc., quorum in

enarrandis quibusdam rei circumstantiis dissimilitudines hic annotare nihil necesse est.

Respondeo 2º Christum utpote naturâ Deum, reverà dignum esse qui ter sanctus, Deus, fortis, et immortalis nuncupetur; nihil proinde in eo usu reprehendi posse, juxta quem Trisagion ad solum Christum referretur; atque demùm, ubi ad solum Christum hymnus ter sanctus dirigitur, nihil nisi fidei maximè consentanei in additione crucifixionis illi assutâ reperiri; siquidem Christus secundum humanitatem verè crucem subiit. Quapropter laudanda fuit prudens dispensatio et œconomia Calendionis viri apprime catholici, qui in locum Petri Fullonis quem Zeno imperator in exilium amandarat, canonicè suffectus, Ecclesiam Antiochenam aliquandiu rexit. Is, ut testatur Theodorus Lector Hist. eccles. lib. 1, pag. 566, sacro hymno inseruit, memoratæque additioni, *qui crucifixus es pro nobis*, præfixit has voces, *rex Christe*, quibus eam invocationem soli Christo applicans errorem à Fullone propinatum amovit. Verùm Calendione paulò post jussu ejusdem Zenonis ejecto, *reversus iterùm Petrus Fullo sustulit verba, Rex Christe*, inquit Theophanes in Chronographiâ.

Respondeo 3º hunc olim in Ecclesiis orientalibus, non verò in Ecclesiâ Constantinopolitanâ, neque apud Latinos obtinuisse usum, ut Trisagion cum additione, *qui crucifixus est pro nobis*, etiam Christi nomine non appellato, usurparetur, sine ullo fidei detrimento. Nempe ejusmodi Ecclesiæ Orientis, etsi mentionem Christi expressam in Trisagio non facerent, attamen ad ipsum solum illam invocationem cum additione dirigebant; ut ex eo facîle intelligere erat, quòd solum Filium esse incarnatum altè profiterentur, et in eo duas esse naturas, alteram impassibilem, nempe divinam, alteram quâ passus est nempe humanitatem. Cujus quidem usus et interpretationis habetur in primis testis locupletissimus Ephrem patriarcha Antiochenus qui seculo sexto floruit. Vide plura de hoc argumento apud doctissimum Assemani T. I. Biblioth. Orientalis pag. 518, et apud Michaellem le Quien in *Oriente Christiano* t. 3, p. 22.

Respondeo 4º, de usu hodiernarum Christianorum societatum in Oriente, quæ Trisagium cum additamento, *qui crucifixus*, etc., etiam tacito Christi nomine adhibent, esse judicandum præsertim ex ejusmodi societatum professione et fide. Enimverò constat ex dictis hunc hymnum secundum analogiam fidei, et secundum usum veteris Ecclesiæ orientalis cum additione

de quâ agitur, sensu orthodoxo ad Christum solum referri. Quæ ergo societates orientales fidem catholicam de Christo, de duplici in eo naturâ, de Divinitatis impassibilitate profitentur, necessariò censendæ sunt Trisagium cum mentione crucifixionis usurpatum ad solum Christum dirigere, sicque hoc suo usu doctrinam orthodoxam nihil lædere. Secùs sentiendum esset de Eutychianis qui humanitatem à Divinitate absorptam et consumptam putarent. Ii, si sibi constant, non alio sensu possunt in Trisagio passionem et cruci affixionem commemorare quàm ut passionem Divinitati ac proinde toti Trinitati attribuant.

Docet probatque doctissimus Assemanus Maronita Biblioth. Orient. t. 1, pag. 518, « Monophysitas antiquiores recentioresque Jacobitas circa Trisagium cum Catholicis (illud ad solum Christum referentibus) sensisse et modò sentire. » De Maronitarum verò circa hymnum eundem usu, quos catholicæ fidei addictos et romanæ Sedi communione conjunctos esse nemo nescit, hæc scribit Faustus Naironus Banensis Maronita, Romæ, seculo proximè elapso linguæ Syriacæ professor, in suâ de origine, nomine et religione Maronitarum Dissertatione, n. 85 : « Id fieri quidem (nempe crucifixionem Trisagio addi) etiam à Maronitis fateor, sed sensu catholico et ab Ecclesiâ romanâ non improbo, cum illud in recognitis ipsorum ecclesiasticis libris Romæ impressis reliquerit; sed tunc non refertur Trisagium ad Trinitatem sanctissimam, sed ad Christum unum, qui ter sanctus, id est infinitè sanctus, omnium confessione dicendus est. Nam apud Maronitas Trisagium dupliciter accipitur; aliquando enim tribus applicatur personis, et tunc crucifixionem addere impium, blasphemumque arbitrantur; ac propterea nunquàm in hoc sensu penès eos legitur hic hymnus cum additione crucis; ut videre est in ipsorum Missali post lectionem Evangelii, ubi sic : *Sanctus Deus, Sanctus fortis, Sanctus immortalis, miserere nobis*. Aliquando verò soli tribuitur Filio et tunc additur crucifixio, quia verè crucifixus est Christus, imò in multis locis Breviarii Maronitarum manifestè declaratur, et præsertim ad Matutinum Officii Nativitatis Domini, sic : *Sanctus Deus, qui Nativitate tuâ sanctâ liberasti nos à seductionibus. Sanctus fortis, qui fortificasti gregem tuam, ut canat tibi gloriam. Sanctus immortalis, quoniam mortales filii Adam vixerunt Nativi-*

tate tuâ vivificante omnes. Qui crucifixus es, Domine noster, pro Ecclesiâ tuâ et liberasti eam die Nativitatis tuæ ex seductione et peccato. » Hactenùs Naironus, cui consonant doctissimus Assemanus Biblioth. Orientalis 1, pag. 520, necnon eruditus Michael le Quien Ordinis Prædicat. Orientis christiani tomo 3, de Ecclesiâ Maronitarum n. 17, pag. 24. Atque hanc ipsam à Nairono traditam de duplici apud Maronitas Trisagii acceptione distinctionem attulerunt quoque Maronitæ præsules anno 1596, mense sept. in synodo congregati coram R. P. Hieronymo Dandino quem eorum doctrinæ cognoscendæ causâ Clemens VIII in Syriam miserat. Cujus quidem concilii acta capite 54 Historiæ itineris ejusdem patris Dandini ad montem Libanum inserta habentur.

De communicatione idiomatum in abstracto adversus Lutheranos. — Attributa Divinitatis, nempe omnipotentiam, omniscientiam, ac præsertim omnipræsentiam humanitati Christi communicatam fuisse docet Lutherus in libro seu sermone *Quòd verba Christi* : Hoc est corpus meum, *adhuc stent*, quem anno 1527 edidit, tum in Confessione de cœnâ Domini, ubi vult Christi carnem tam longè extra creaturas collocandam, quàm Deus ipse extra creaturas est, eòque progreditur ut Zuinglianos vehementer reprehendat quòd Christi passiones soli humanitati attribuant, non etiam Deitati. Dogma istud, Christi carnem vi unionis hypostaticæ esse ubique præsentem, appellatum est *Ubiquismus*. Illud verò commentus est Lutherus, vel potiùs à Jacobo Fabro Stapulensi ad cap. 14 Joan. et ad 12 primæ ad Cor. jam antea traditum, idcirco suum fecit, quia Christi corporis præsentiae reali in Eucharistiâ defendendæ ipsi idoneum visum est. Philippum Melanctonem discipulorum Lutheri doctissimum et celeberrimum, doctrinam ubiquitatis detestatum fuisse constat. At eam amplexi sunt Joannes Brentius qui hanc ita locupletavit, ut dictus fuerit ubiquitatis parens, Flaccius Illyricus, David Chytræus, Joannes Widangus, Nicolaus Selneccerus, Jacobus Andreas Smidelinus, Martinus Kemnitius qui cautiùs cæteris loqui affectat, etc. Atque is error in libro Concordiæ quem ferè universi in Germaniâ Lutherani receperunt; tanquàm fidei dogma asseritur pag. 572, 751 et 745 edit. 1580. Duplex autem apud Lutheranos scriptores deprehenditur ubiquitatis explicandæ ratio; nam alii ut Brentius, Smidelinus, etc., sentiunt omnipræsentiae communicationem factam humanitati Christi, ut et

aliorum saltem plurimorum attributorum, ad essentiam unionis hypostaticæ pertinere, seu hanc unionem formaliter constituere; alii verò, ut Kemnitius, hanc communicationem solum docentes esse unionis hypostaticæ necessarium consecrarium, adeò ut, hanc unionem positâ, consequens sit naturam humanam Christi verè esse omniscientem, omnipotentem, et omnipræsentem.

CONCLUSIO. Communicatio idiomatum in abstracto, seu respectu naturarum, nulla in Christo admittenda est, neque unio hypostatica postulat ut Christi corpus sit ubique præsens. Probatur prima pars, nempe communicationem idiomatum in Christo respectu naturarum admittendam non esse, ac proinde dici non posse naturam humanam Christi esse immensam, esse omnipotentem, esse scientiâ infinitâ præditam, etc. Probatur, inquam, 1^o quia nec in Scripturis, nec in conciliis, nec apud sanctos Patres ullum reperire est ejusmodi locutionum exemplum. 2^o Quia si natura humana Christi verè et reipsâ esset immensa, omnipotens, omniscia, etc., quocumque modo id explicetur, jam desineret habere humanitatis proprietates, divinisque attributis constaret; atqui humanam Christi naturam sui cum Verbo unionem, humanitatis proprietatibus spoliata fuisse, et attributis divinis constitutam, ipsa est Eutychianorum hæresis, in concilio Chalcedonensi proscripta; ubi definitum est incarnationem peractam esse *salvâ utriusque naturæ proprietate et in unam personam atque subsistentiam concurrente*. Quod quidem dogma fidei ex Scripturis et ex traditione supra, Dissertatione 4, cap. 3, fusè demonstravimus. 3^o Quia absurdissimum est attributa Divinitatis verè et in conceptu suo formali communicari naturæ creatæ et finitæ qualis est Christi humanitas. Quod enim finitum est, in se verè et formaliter attributum seu proprietatem infinitam non potest recipere. Deinde naturam humanam Christi à Divinitate esse distinctam de fide est et Lutherani profitentur; si igitur naturæ Christi humanæ verè tribuatur omnipotentia divina, et immensitas, jam duæ erunt omnipotentiae divinæ et duæ immensitates in Christo; siquidem repugnat unicum attributum in duplici naturâ, ut in subjecto inhæsionis simul existere. Atqui duas naturas omnipotentes, immensas, etc., admittere impium et absurdum; ergo, etc. Denique anima et corpus in homine personam unicam constituunt; atqui tamen corpori non communicantur animæ attributa et proprietates, nec vice versâ. Neque enim corpus dici potest in-

telligere, judicare, dubitare, vel, etc., quæ animæ propria sunt; neque ex adverso quis dixerit animam ambulare, sedere, etc., quæ sunt propria corporis? Ergo ut Christi humanitas Divinitati uniatur in unâ Verbi personâ necesse non est illi humanitati divina attributa adscribi.

Aiunt Concordiæ auctores (1) necnon Kemnitius (2) et alii, proprietates divinas juxta se non fieri proprietates naturales et essentielles humanitatis Christi, sed illi tantum esse communicatas per gratiam, sicut principale agens virtutem suam instrumento communicat. Sed hæc malè cohærent. Nulla vera communicatio idiomatum inter instrumentum et agens principale admitti potest. Quis scriptoris scientiam et eloquentiam attribuet calamo quo is scriptor utitur? Quocumque igitur modo scientia, omnipotentia, immensitas et alia Dei attributa humanæ Christi naturæ communicata dicantur, seu essentialiter, seu per gratiam tantum, necesse est hanc communicationem realem esse et veram, adeò ut humanæ Christi naturæ verè ejusmodi attributa inhæreant; aliàs dici non poterit quod volunt Lutherani, nempe Christi humanitatem verè esse omnipotentem, immensam, etc., neque ex eâ communicatione colligi poterit, hanc naturam humanam reverà ubique existere.

Probatur secunda pars, nempe unionem hypostaticam non postulare ut Christi corpus ubique sit præsens. 1^o Ex Scripturis ex quibus patet Christi corpus sive ante mortem, sive post mortem non fuisse ubique, sed contra, loco finito circumscriptum. Matth. 28, v. 6: *Jesum qui crucifixus est, quæritis; non est hic*; Joan. 11, v. 15: *Lazarus mortuus est; et gaudeo propter vos, ut credatis quia non eram ibi*. Ibid. v. 21: *Domine, ait Martha, si fuisses hîc, frater meus non esset mortuus*, quibus alia innumera addi possunt; ubi exhibetur Christus iter faciens, ex uno loco in alium locum se conferens, modò in navi, modò in templo, modò in deserto, etc., consistens. Addenda etiam testimonia in quibus Christus dicitur natus, crucifixus, sepultus, descendisse ad inferos, resurrexisse, ascendisse in cælum, et inde cum gloriâ venturus. Enimverò natus intelligitur, cum è sinu B. V. exivit, cruci affixus, cum in eâ pependit, sepultus, cum è cruce in tumulum corpus ejus translatus est, descen-

(1) In Repetitione articulorum controvers. art. 8.

(2) Lib. de duabus naturis cap. 21, 22 et 25.

disse ad inferos, cùm ejus anima à corpore avulsa eò permeavit, resurrexisse, cùm è sepulcro redivivus egressus est, ascendisse in cœlum, cùm illuc è terris fuit sublatus, et è cœlo venturus, cùm ad judicandos homines inde descendet; ergo cùm Christus, si secundum humanitatem ubique sit, locum non potuerit mutare, sequitur, etc.

Respondent Lutherani hæc omnia dicta esse de Christo, quia etsi locum reverà non mutaret, tamen apparenter et secundum formam visibilem mutare locum videbatur. Sed licetne ad libitum confingere tot Scripturæ sacræ testimoniorum expositiones metaphoricæ, ubi quid simile ne minimum innuitur?

2º Ex symbolis quæ Christum post Scripturas exhibent etiam natum, sepultum, ad cœlos sublatus, etc., quæ cum omnipræsentia corporis ejus ubique, stare non possunt.

3º Ex SS. Patribus. Multa eorum loca in hanc rem proferunt Bellarminus, lib. 3 de Christo, cap. 14, Petavius, lib. 10 de Incarn. cap. 7, et alii. Unum satis sit S. Augustini testimonium, quo cæterorum mens præclare exhibetur. « Secundum hanc formam (naturam humanam) » inquit, Epist. 187, aliàs 57, ad Dardanum, n. 10, « non est putandus (Christus) » ubique diffusus. Cavendum enim est, ne ita « divinitatem astruamus hominis, ut veritatem » corporis auferamus. Non est autem consequens, ut quod in Deo est, ita sit ubique ut « Deus..... aliter homo ille in Deo, quoniam » aliter et Deus ille in homine, proprio quodam « et singulari modo. Una enim persona Deus et » homo est, et utrumque est unus Christus « Jesus, ubique per id quod Deus est, in cœlo » autem per id quod est homo. »

4º Ex triplici ratione theologicâ. Prima est, ubiquitate destrui ipsum præsentia realis dogma propter quod excogitata est. Namque si eatenus Christi corpus est in Eucharistiâ, quatenus est ubique; ergo nullâ speciali ratione est in Eucharistiâ quàm in re aliâ quâlibet; neque ex institutione suâ in ordine ad præsentiam realem quidquam habet Eucharistiâ, quod cuilibet rei alteri non competat. Imò repugnabit Christi corpus accipi et manducari in Eucharistiâ; quia quod ubique est, non potest ex ore in stomachum transmitti. Dicentne cum Brentio in Eucharistiâ Christum esse specialiter præsentem, propter specialem efficaciam quam in hoc Sacramento exercet? Verum hæc responsione nihil speciale in Eucharistiâ agnosceretur nisi virtus quædam; quod ipsum est

Sacramentarium à Lutheranis tanto studio rejectum. Secunda est, ubiquitatis dogmate Eutychianismum invehiri. Nam si humanæ Christi naturæ, ipsique ejus corpori propter unionem hypostaticam divina competat immensitas, adeo ut de ipso verè prædicari possit; cùm unum attributum singulare, non possit esse commune duabus naturis, necesse est duas Christi naturas in unam confundi et commisceri. Præterea, cur immensitas humanæ Christi naturæ communicata vi unionis hypostaticæ prædicabitur, necnon omnipotentia et omniscientia non verò æternitas et alia ejusmodi attributa? Numquid omnipotentia et immensitas, subjecti inhæSIONIS finitudine et limitatione minùs excluduntur quàm æternitas et aliud quodlibet divinum attributum? Denique, cùm attributa divina absoluta inter se realiter identificentur, evidentissimum est unum non posse alicui naturæ attribui, quin et reliqua eidem naturæ adscribantur. Tertia est, nullum afferri posse à Lutheranis momentum seu ex Scripturis seu ex ratione depromptum, quo probent si vi unionis hypostaticæ saltem aliqua attributa divina verè et reipsâ naturæ assumptæ communicantur, inde non sequi aliquas pariter ejusdem naturæ assumptæ proprietates de naturâ divinâ prædicari posse. Dicent proprietatibus naturæ humanæ sibi reipsâ communicatis divinam naturam destructam iri. Fatemur, sed si fieri posset naturam humanam sibi reipsâ communicatis et in se receptis quibusdam attributis divinis in divinitatem non converti, quidni divinitas posset quasdam humanitatis proprietates in se ut in subjecto inhæSIONIS recipere quin in humanam naturam mutaretur? Par utrobique ratio, non magis proprietates humanæ naturæ divinitati repugnant, quàm proprietates naturæ divinæ repugnant humanitati; ergo, etc.

Dices 1º: Christus ut homo sedet ad dexteram Patris; atqui dextera Patris est ubique; ergo Christus ut homo est ubique. Dist. maj. Christus ut homo sedet ad dexteram Patris ratione suppositi et personæ, concedo majorem; ratione naturæ humanæ præcisè, nego. Sedere ad dexteram Patris æqualitatem honoris significat: cùm ergo Christus ut homo dicitur ad dexteram Patris sedens, sensus est personam quæ Christi humanitatem habet, esse æqualem Patri, quod verissimum est, siquidem illa persona ipsum est Verbum divinum. Sed sensus non est naturam humanam Christi esse Divinitati æqualem. Id tam impropium quàm absurdum

foret. Jam verò persona habens humanitatem Christi, cùm sit Patri æqualis, ubique consistat necesse est, sed nihil probat de humanitate assumptâ idem esse statuendum. Imò ex Scripturis et ex ratione evidentissimum est hanc naturam non posse esse immensam.

Dices 2º : Quæ uniuntur intimè, eorum unum non potest esse sine alio; atqui natura humana et persona Verbi in Christo uniuntur intimè; ergo ubicumque est Verbum, ibi humana Christi natura esse debet. Distinguo maj., quæ intimè uniuntur localiter et adæquatè, eorum unum non potest existere alicubi, quin et ibidem aliud existat, concedo; quæ uniuntur personaliter, eà scilicet unione quæ nihil habeat cum unione locali commune, nego. Itaque natura humana non unitur Verbo localiter et adæquatè, ita ut tantùm pateat, quantum Deus diffunditur, et ipsi, si ita loqui fas est, commensuretur. Quippe in commensuratione et spatii ejusdem communione unio hypostatica nequaquàm consistit. Quemadmodùm igitur in hypothesis philosophorum qui animam humanam toto corpore diffusam ponunt, oculus, v. g., etsi exigua tantùm sit corporis pars, toti animæ conjungitur, ita persona Verbi immensa cum naturâ humanâ alicubi solùm existente uniri potest; aut saltem non demonstraveris Verbum ejusmodi naturam hocce modo sibi non posse hypostaticè conjungere. Adde Verbi divini immensitatem in eo esse positam quòd totum ubique et in singulis loci partibus sine divisione idem existat; proindeque, etsi ad unionis hypostaticæ rationem formalem id pertineret, nempe humanam Christi naturam aliquo esse in loco in quo Verbum totum esset præsens, non inde sequeretur hanc non posse hypostaticè toti Verbo uniri quin ejus immensitate donaretur. Quippe cùm, quocumque in loco existat Christi humanitas, ibi totum Verbum substantiâ suâ necessariò præsens existat.

Dices 3º : Juxta fidem catholicam Christus homo est ubique; ergo, etc. Dist. ant. Christus homo est ubique ut Deus, concedo; Christus homo reduplicativè ut homo, id est, quantum ad naturam humanam, nego. « Neque enim Deus, inquit S. Ambrosius lib. 2 de Fide cap. 8, n. 60, de loco ad locum transit, qui ubique semper est. Ut homo, est qui vadit, ipse qui venit. Denique et alibi dicit : *Surgite eamus*. In eo ergo vadit et venit, quod est commune nobiscum. » Et S. Fulgentius lib. 2 ad Trasimundum, cap. 17 : « Unus idemque secundùm humanam substantiam

« absens cœlo cùm esset in terrâ, et derelin-
« quens terram cùm ascendisset in cœlum;
« secundùm divinam verò immensamque sub-
« stantiam nec cœlum dimittens cùm de cœlo
« descendit, nec terram deserens cùm ascendit
« in cœlum. » Similia habent Rufinus *In Symbolum*, S. Augustinus Tractatu 78 in Joan., S. Gregorius Magnus, Homiliâ 29, Vigilius, lib. 1 contra Eutychem, etc.

Dissertatio vij.

DE CAUSIS INCARNATIONIS.

Planum est nullam esse propriè causam materialem, ut aiunt, et formalem Incarnationis. Sensu tamen minùs proprio dici potest duas naturas quæ in Christi personâ uniuntur materiæ locum tenere, earumque unionem hypostaticam esse instar formæ. Atque istæ sunt causæ intrinsecæ quæ Incarnationis mysterium constituunt, de quibus dissertationibus IV et VI, jam satis superque dictum est. Superest igitur ut hîc de causis efficiente, meritoriâ, et finali Incarnationis disseramus.

CAPUT PRIMUM.

De causâ efficiente Incarnationis.

CONCLUSIO. De fide est causam efficientem Incarnationis esse totam Trinitatem. Probatur quia de fide est omnia opera quæ Deus extra se producit esse communia toti Trinitati; atque pariter de fide est Incarnationem esse opus quod Deus extra se produxit. Joan. 3, v. 16 : *Sic Deus dilexit mundum ut Filium suum unigenitum daret*. Galat. 4, v. 4 : *Misit Deus Filium suum, factum ex muliere*. Hinc concilium Toletanum XI, in professione fidei : *Incarnationem Filii Dei, inquit, tota Trinitas operata esse credenda est, quia inseparabilia sunt opera Trinitatis*. In re manifestâ et ab omnibus concessâ plura afferre testimonia superfluum foret.

Itaque maximè distinguenda est Incarnatio, seu unio hypostatica naturæ assumptæ cum Verbo divino, ab actione quâ ejusmodi humanitas producta et Verbo unita est. Actio productiva naturæ assumptæ, ejusque unitiva cum Verbo, ab omnipotenti voluntate Dei tribus personis communi profecta est; unio verò hypostatica solum Verbum formaliter respicit, quippe ad quod solum humanitas Christi in personæ unitatem conjungitur. Speciales igitur, quas in eo mysterio Filius divinus habet partes, non ad eum attinent instar principii edicientis,

sed instar terminantis et ultimò complentis naturam humanam.

Cæterò advertendum, tum in Scripturis Matth. 1, v. 20, Luc. 1, v. 35, tum in traditione, opus Incarnationis speciali quâdam *appropriatione* Spiritui sancto attribui; quia nempe, cum Spiritus sanctus à Patre et Filio per voluntatem seu per amorem procedat, idcirco specialiter ipsi adscribi solent opera misericordiæ et bonitatis, seu amoris Dei erga homines, inter quæ mysterium Incarnationis principem locum procul dubio obtinet.

CAPUT II.

De causâ meritoriâ Incarnationis.

Observandum est 1^o, duplicis generis meritum à theologis distingui, aliud de condigno, aliud de congruo. Meritum de condigno illud definitur cui ex justitiâ debetur merces. Ad ipsum constituendum quatuor conditiones requiruntur, nempe, libertas et sanctitas in agente, dignitas præmio proportionata in opere, et promissio in remunerante. Homo justus operibus ex gratiâ elicitis hocce modo meretur vitam æternam. Quæ quidem uberius explicantur à theologis ubi de merito disserunt. Vide Bellarm. lib. 5 de Justific. Meritum de congruo illud est cui solum ex aliquâ decentiâ et benignitate præmium tribuitur. Fundatur illud in aliquâ relatione seu convenientiâ operis cum fine acquirendo. V. g., peccator qui auxilio divino ad gratiam conversionis perfectæ postulandam sibi concesso utitur, ejusmodi gratiam meretur de congruo; quædam enim in eo convenientia esse concipitur, ut Deus opus quod gratiâ suâ incœpit, eâdem gratiâ misericorditer compleat.

Meritum de congruo duplex est, aliud strictè sumptum, quod tunc adest cum opus non modò aliquam habet cum fine convenientiam, sed etiam ex se, vel ex mente operantis ad illum rationem dicit, ut in exemplo proximè allato peccatoris conversionem suam deprecantis; aliud latè sumptum, quod totum in aliquâ convenientiâ positum est, ita ut opus nec de se nec ex operantis mente specialiter ad finem referatur.

Observandum 2^o, Incarnationem spectari posse, vel in se, quatenus videlicet est unio personalis naturæ humanæ cum Verbo, vel quantum ad varias circumstantias temporis, originis, et ad diversa mysterii consecutaria.

Jam verò quæstio movetur de Christo ipso, de veteribus Patriarchis, ac de beatâ Virgine, an scilicet aliquo modo Incarnationem merue-

rint, aut saltem aliquas ejus circumstantias vel appendices.

CONCLUSIO I. Christus nullo modo meruit Incarnationem. Probatur 1^o, quia juxta Scripturas Incarnatio fuit opus summæ misericordiæ et bonitatis divinæ quod proinde humanitas Christi non meruit. Joan. 3, v. 6 : *Sic Deus dilexit mundum ut Filium suum unigenitum daret.* Luc. 1, v. 78 : *Per viscera misericordiæ Dei nostri, in quibus visitavit nos Oriens ex alto.* Probatur 2^o ex S. Augustino Enchiridii cap. 36 : « Hic (in Incarnatione), inquit, granditer et evidenter gratia Dei commendatur. Quid enim natura humana in homine Christo meruit ut in unitatem personæ unici Filii Dei singulariter esset assumpta? Quæ bona voluntas? cujus boni propositi studium? Quæ bona opera præcesserunt quibus mereretur Christus homo, ut una fieret persona cum Deo? » Probatur 3^o, quia vel ante vel post Incarnationem peractam Christus homo meruisset Incarnationem. 1^o Non ante, siquidem natura humana Christi prius tempore non extitit quàm uniretur Verbo, ut fides catholica docet. Vide dicta in præced. Dissert. cap. 3, art. 2. Præterea, etsi poni posset humanitatem Christi ante unionem suâ cum Verbo extitisse, vel saltem prius naturâ quàm uniretur Verbo potuisse aliquem ex gratiâ elicere actum quo sese ad suâ assumptionem disposuisset, certè nemo non videt nullius puri hominis merita posse cum tantâ Divinitatis communicatione quanta per Incarnationem Verbi divini facta est, ullam habere proportionem. 2^o Nec post Incarnationem peractam potuit Christus homo Incarnationem mereri. Idcirco enim tantum Christus post Incarnationem dono ejusmodi promerendo par conciperetur, quia, peractâ Incarnatione, merita ejus, utpote Dei hominis, sunt meriti infiniti; atqui id non sufficit ut Christus Incarnatione peractâ eam mereri potuerit. Liquet enim, principium hujusce infiniti valoris meritorum Christi esse Incarnationem ipsam. Atqui, ut loquuntur scholæ, principium meriti non cadit sub meritum; aliàs res eadem esset simul prior et posterior merito, utpote ejus principium simul et effectus, proindeque esset simul prior et posterior seipsâ, quod repugnat; ergo, etc.

CONCLUSIO II. Quædam, non omnia Incarnationis suæ consecutaria Christus de condigno promeruit. Probatur. Meruit quædam; namque beata immortalitas, nominis sui exaltatio, Ecclesie institutio, diffusio, sanctitas et perenni-

tas, sacramentorum efficacia, gratiæ hominibus collatæ, etc., sunt totidem Incarnationis Verbi divini appendices; atqui illa Christus de condigno promeruit; ergo, etc.

Non meruit omnia; nam inter varia Incarnationis consecraria, aliqua sunt hujusce mysterii necessariæ proprietates, ut, v. g., Christi impeccantia, necnon essentia divina intuitiva visio menti ipsius à primo ortu concessa. Horum consecratorum necessariorum planum est, quod ad præsens institutum attinet, eamdem esse debere rationem ac ipsiusmet hypostaticæ unionis.

CONCLUSIO III. Veteres Patriarchæ et Prophetæ de condigno Incarnationem non meruerunt, imò nec hujus mysterii circumstantias; quas tamen de congruo meruisse dicendi sunt. Probatur 1º eos Incarnationem non meruisse de condigno. Nam sacræ Scripturæ, ut dictum est, soli benignitati et misericordiæ Dei, non merito hominum, Incarnationis opus adscribunt. Præterea principium meriti non cadit sub meritum; atqui Verbi Incarnatio fuit principium meriti totius generis humani; ergo, etc. Denique meritum de condigno postulat ut dignitas operis præmio respondeat, tum ut intercesserit pactum et promissio; atqui, cum Incarnatio sit pretii summi, nullum opus bonum à Patriarchis aut Prophetis elicium potuit esse dignitas et ordinis ipsi correspondentis; pariter aliquod pactum aut promissionem divinam eâ de re extitisse, temerè et stolidè fingeretur; ergo. Probatur secunda pars, nempe eos non meruisse de condigno circumstantias Incarnationis, v. g., ut ex stirpe suâ et hoc potius quàm illo tempore Messias nasceretur; nam ad meritum de condigno requiritur pactum et promissio operi meritorio anterior; atqui nullum ejusmodi pacti aut promissionis ex parte Dei vestigium existit; ergo.

Probatur tertia pars, nempe veteres Patriarchas et Prophetas quasdam ejusmodi circumstantias temporis et originis de congruo meruisse. Nam 1º, Abraham, Gen. 22, v. 18, obedientiâ suâ meruit sibi promitti futurum ut Christus secundum carnem ab eo ortum duceret. *Benedicentur*, inquit Deus sanctum hunc Patriarcham alloquens, *in semine tuo omnes gentes, quia obedivisti voci meæ*. Psal. 131, v. 11, simile promissum fit Davidi. 2º Dicuntur Danielis 9, v. 23, accelerata Messia tempore propter illius Prophetæ desideria et preces; et Lucæ 2, v. 26, sanctus senex Simeon perhibetur responsum accepisse à Spiritu sancto non vi-

surum se mortem nisi prius videret Christum Domini. 3º S. Thomas auctoritate suâ simul et momentorum suorum pondere idem confirmat: *Ex congruo, Incarnationem petendo et desiderando. Congruum enim erat ut Deus exaudiret eos qui ei obediebant*.

CONCLUSIO IV. Beata Virgo nec Incarnationem, nec ejus circumstantias, nec maternitatem divinam de condigno meruit; licet tamen de condigno meruerit eum gratiæ statum, quo posito in Dei matrem præ cæteris assumpta est. Imò ne quidem propriè et strictè loquendo de congruo maternitatem divinam meruit, sed tantum latius loquendo ac minùs propriè.

Probatur prima pars, Virginem scilicet neque Incarnationem neque ejus circumstantias esse meritam de condigno, probatur, inquam, iisdem argumentis quibus Patriarchas illud idem non meruisse de condigno ostensum est; par enim, quod ad hanc rem attinet, utrinque est ratio. Probatur secunda pars, nempe eam non meruisse de condigno ut mater Dei fieret. Duo enim ad id promerendum necessaria ipsi defuerunt, nempe dignitas operis et promissio Dei. Defuit quidem operis dignitas; nam, etsi Beatæ Virginis opera propter eximiam ejus sanctitatem fuerint excellentiâ singulari prædita, ejusdem tamen ordinis cum eminentissimâ matris Dei dignitate nequaquàm dici possunt. Defuit etiam promissio; nam Dei paræ titulum sub quâvis conditione Beatæ Virgini à Deo fuisse promissum, nullo in loco legitur; nec sanè, ut in Evangelio narratur, Angelo sibi tantum nuntiante mysterium, turbata fuisset, si ejusmodi promissionem accepisset.

Probatur tertia pars, quòd videlicet eum meruerit gratiæ eminentem statum, quo posito in Dei matrem electa est. 1º Ita docent sancti Patres. S. Basil. in homiliâ de Natali Domini; S. Epiph. Hæresi 78; S. Ambrosius, lib. de Virginitate; S. Hieronymus, Epist. 22; S. August. serm. 11 de Natali Christi, S. Bernardus, serm. 4 de Assumptione. 2º Id ipsum Ecclesia declarat, dum ait in publicis precibus Beatam Virginem *dignum Filii Dei habitaculum effici meruisse*. 3º Dum operabatur beata Virgo, aderat in agente sanctitas, in ejus operibus dignitas augmento gratiæ conveniens et proportionata; aderat etiam libertas, et ex parte Dei promissio; omnes igitur ad meritum de condigno requisitæ conditiones hic deprehenduntur, proindeque, etc.

Probatur quarta pars, scilicet strictè et pro-

priè loquendo Beatam Virginem de congruo non meruisse ut Deipara efficeretur. Enimverò, nec ex naturâ suâ, ut patet, nec ex mente Beatæ Virginis quæ ad tantam dignitatem utpote summè humilis non aspirabat, quæque ut jam notavimus, ad præsentiam Angeli mysterium illud sibi annuntiantis turbata fuit, opera ejus ad maternitatem divinam ut ad finem iis obtinendum referebantur; atqui tamen ad meritum de congruo propriè et strictè sumptum, necesse est ut opus ex naturâ suâ aut ex intentione agentis ad finem obtinendum referatur; ergo, etc.

Probatur ultima pars, nimirum Beatam Virginem latius ac minus propriè loquendo meruisse in Dei matrem præ cæteris assumi, 1º ex Angeli verbis, Luc. 1, v. 28, 30 et 31: *Ave, gratiâ plena; Dominus tecum; benedicta tu in mulieribus...* *Invenisti enim gratiam apud Deum; ecce concipies in utero*, etc. 2º ex SS. Patribus laudatis supra, qui dùm aiunt beatam Virginem eum meruisse statum quo posito in Dei matrem electa est, planè etiam significant eam præ cæteris dignam fuisse quæ ad tantum honoris cumulum eveheretur. 3º Congruum sanè fuit ut Virgo præcellenti sanctitate omnes longè superans, tantâ dignitate præ cæteris insigneretur.

CAPUT III.

De causâ finali Incarnationis.

CAUSA finalis seu finis alicujus rei id ipsum est ad quod illa res refertur. Finis ultimus Incarnationis est gloria Dei, cujus attributa, ut alibi dictum est, hoc mysterio mirum in modum exprimuntur. Finis cui sunt creaturæ intelligentes, præsertim verò homines quibus summa bona attulit Incarnatio. De fine proximo tum operis tum operantis duntaxat controversia esse potest. Quæritur autem 1º, an ad liberandum hominem lapsum Incarnatio decreta et peracta fuerit; 2º, an sola hominis lapsi liberatio primus et præcipuus fuerit ejusmodi Sacramenti finis, ita ut antecedenter ad Adami peccatum Incarnatio nec decreta nec peragenda fuerit; seu quod eòdem recidit, utrumvi illius decreti quo præsens rerum dispositio constituta est, Christus Dominus venisset, etiamsi non peccasset Adamus. Circa primum erraverunt 1º Pelagiani, qui cùm negarent peccatum originis, contendebant quod consequens est, ad illud delendum Christum non venisse; imò non alium illi videntur agnovisse Incarnationis finem, quam ut Christus exemplo suo, doctrinâ, miraculis hominis eru-

diret, eosque ad salutem æternam consequendam redderet promptiores. 2º Abælardus, qui, referente S. Bernardo, *Epist.* 190, cap. 5, censuit *nec diabolus unquam jus aliquod in homine habuisse ... nec Filium Dei, ut hominem liberaret, carnem assumpsisse*. 3º Sociniani, qui peccatum originale cum Pelagianis negant, Christumque pro nobis verè Deo satisfacisse inficiantur, quorum errores Dissertatione sequenti latius prosequemur et refellemus.

Circa secundum, quod libertati scholæ totum relinquitur, observandum est 1º, quæstionem illam dirimendam proponi ex Scripturis solis et ex traditione; hic enim agitur de consilio Dei liberrimo quod nonnisi divinâ revelatione innotescere potest.

Observ. 2º, omnes fateri non solam hominum redemptionem fuisse Incarnationis finem; venit enim Christus ut esset dux, legislator et magister hominum, ut religionis caput existeret, ut rerum universitati præcipuum suum decus et ornamentum afferret, ut omnium creaturarum, ipsorumque Angelorum Dominus constitueretur. Decretane fuit propter ejusmodi causas Incarnatio quantum ad substantiam, etiam antecedenter ad decretum de permittendo et reparando Adæ peccato? en quæstio. Dico quantum ad substantiam; namque

Observ. 3º, omnes theologos fateri Incarnationem spectatam quantum ad modum quo peracta est, nempe quantum ad corpus passibile et mortale quod Christus assumpsit, nonnisi consequenter ad generis humani à peccato liberandi consilium esse decretam. Quæstio proinde est de Incarnatione factâ in carne impassibili et immortalis, aut saltem spectatâ in se et quantum ad ea quibus necessario constituitur, abstrahendo à statu passibili et mortali in quo Christus venit.

Observandum denique duas esse de hac controversiâ theologorum opiniones. Multi aiunt Deum ante omnia statuisset Incarnationem Verbi faciendam eo meliori modo quo rerum universitati expediret, ac præsertim generis humani bono; ac proinde vi præsentis decreti Christum, etsi Adamus non peccasset, fuisse venturum in carne impassibili tanquam doctorem et rectorem hominum, religionis caput, etc.; positâ verò Adami culpâ eum ad eluenda peccata carnem passibilem sumpsisse. Ita Scotus, in 3 dist. 3, q. 3, Frassenius, de Incarn. disput. 1, et alii Scotistæ, Alensis, 5 parte, q. 2, membro 15, Albertus Magnus in 5 dist. 7, Catharinus in opusc. de eximiâ prædestina-

tione Christi, Suarez, de Incarn. disp. 5, sect. 5, Jacobus Naclantus in caput 1 Epist. ad Eph., Salasar ad versiculum 22 capitis 8 Proverbiorum, Isambertus, etc.

Multi etiam ex adverso sentiunt redemptionem generis humani eo sensu esse præcipuum et totalem Incarnationis finem, ut nonnisi præviso Adami peccato, ejusque reparandi suscepto consilio Deus illud mysterium etiam quoad substantiam peragendum decreverit. Ita S. Thomas, cum plerisque Thomistis. Ita etiam Turnelius, quæst. 6. Witassius, quæstione 4, etc.

CONCLUSIO I. De fide est Verbum ad redimendos homines reverà incarnatum fuisse.

Probatur 1° ex Scripturis. Isaïæ 61, v. 1 : *Dominus misit me ut mederer contritis corde, et prædicarem captivis indulgentiam.* Matth. 9, v. 13 : *Non veni vocare justos, sed peccatores.* Matt. 18, v. 11, Luc. 19, v. 10 : *Venit Filius hominis quærere et salvum facere quod perierat.* Joan. 3, v. 17 : *Non venit Filius hominis in mundum, ut judicet mundum, sed ut salvetur mundus per ipsum.* Epist. ad Galat. 4, v. 4 et 5 : *Misit Deus Filium suum factum ex muliere, factum sub lege, ut eos qui sub lege erant redimeret.* Tim. 1, v. 15 : *Fidelis sermo et omni acceptione dignus, quòd Jesus venit in hunc mundum peccatores salvos facere.* Joan. 3, v. 8 : *In hoc apparuit Filius Dei ut dissolvat opera diaboli.* Probatur 2° ex Symbolo Nicæno : *Qui propter nos homines et propter nostram salutem descendit de cælis, et incarnatus est, etc.*

Innumera alia in probationem afferri possent sive ex Scripturis sive ex traditionis instrumentis deprompta, quorum plurima dissertatione sequenti capite 2°, ubi de veritate satisfactionis Christi, afferentur.

CONCLUSIO II. Probabilius est decretam non fuisse Incarnationem nisi consequenter ad peccati prævisionem ejusque reparandi consilium, ac proinde Christum vi præsentis decreti, venturum non fuisse, si Adamus non peccasset.

Probatur 1° Scripturis, in quibus quatuor observare est. 1° Enim multis in locis sacræ paginæ affirmant Filium Dei fuisse missum, fuisse Incarnatum, venisse in mundum ut vocaret peccatores, ut salvum faceret quod perierat, ut eos qui sub lege erant redimeret, ut peccatores salvos faceret, et opera Diaboli dissolveret. Hæc continentur in textibus inter probandam priorem Conclusionem adductis. Non autem in ejusmodi testimoniis solum

dicitur Christum in carne passibili venisse ad redemptionem generis humani, et peccatorum salutem, sed simpliciter dicitur eum ad id venisse. 2° Etiam si quædam Scripturæ loca adversarii proferant in suæ sententiæ defensionem, nullum tamen adducunt, in quo quidquam aliud quàm redemptio hominum, aut aliquid ad eam pertinens pro fine Incarnationis disertè assignetur. 3° Incarnationis opus immensæ Dei erga homines charitati et misericordiæ sæpè auctores sacri adscribunt. Joan. 3, v. 16 : *Sic Deus dilexit mundum ut Filium suum unigenitum daret.* Primæ Joan. 4, v. 9 : *In hoc apparuit charitas Dei in nobis, quoniam Filium suum unigenitum misit Deus in mundum ut vivamus per eum.* Ubi rursus nulla carnis passibilis et mortalis mentio. 4° Quæ in gratiam adversæ sententiæ testimonia laudantur, hæc non difficulter cum sensu quem ex tot locis exprimere nobis videmur, poterunt conciliari, si duo attendantur; primum, non potuisse Christum venire ad homines redimendos et salvandos, quin ejusmodi fini alii plures annecterentur, seu ex eo consequerentur. Salvator enim et redemptor hominum, eis viam salutis verbo et exemplis ostendere, media vitæ æternæ capescendæ mereri et tribuere, ac religionem sanctam instituere debuit, proindeque ex eo quòd hæc et alia ejusmodi in Scripturis Christo adscribantur, perperam colligeretur ad illa eum esse venturum etiam: si homines à peccato liberandi non fuissent. Alterum est, quemcumque ob finem decreta fuerit Incarnatio, attamen ex hoc mysterio multa fuisse necessariò nexa, quæ inter fines præcipuos et primarios propter quos hoc mysterium decretum est, præposterè recenserentur. Enimverò, in hypothesi quam tenemus, de Incarnatione ad solam generis humani redemptionem principaliter et primariò decretâ, quis non videt Christum ut hominem ob excellentiam suæ personæ, 1° debuisse constitui Angelorum caput omniumque creaturarum Dominum, cujus omnia essent, ipse autem esset Dei, seu ad quem omnia referrentur? juxta illud primæ Cor. 3, v. 22 : *Omnia vestra sunt, vos autem Christi, Christus autem Dei.* Quam tamen gloriam, nominis exaltationem et potestatem Christus homo, Philip. 2, v. 8, 9, 10, 11, *factus obediens... usque ad mortem crucis sibi etiam promeruit.* Quis non videt 2°, eundem pariter ut hominem, spectandum esse ut *primogenitum omnis creaturæ, in quo constant universa, et qui est ante omnes*, Coloss. 1, v. 15?


Qui enim habet naturam creatam, et simul est Filius Dei unigenitus, is ratione naturæ quam sibi hypostatico nexu conjunxit, omnia Dei opera adeò antecellit, ut etiam sub hoc respectu sit omnis creaturæ primogenitus et ante omnes creaturas. Nec vox *primogeniti* urgenda, siquidem in Scripturis non rarò accipitur ad excellentiam rei ad quam transfertur prædicandam. 3º Tandem, positâ sententiâ quam ut probabiliorem defendimus, in Christum hominem quadraret etiam illud Proverb. 8, v. 22 : *Dominus possedit me*, seu ut 70 Seniores legunt, *creavit in initio viarum suarum antequàm quidquam faceret*. Ad id enim satis esset Deum hanc rerum dispositionem decernendo et condendo, maximè ad Christum respexisse, quem videbat illâ dispositione consequenter ad Adæ culpam et condignam sibi exhibendam satisfactionem, esse inclusum. Atqui positâ nostrâ sententiâ, Deus ad Christum hoc modo respexisset; ergo. Non me latet præcipua horumce testimoniorum, nempe versiculum 15 cap. 1 Epist. ad Coloss. necnon v. 22 cap. 8 Proverb. aliaque nonnulla loca similia quæ afferri potuissent, à multis intelligi de Christo ut Deo, seu de Verbo æterno, juxta quam interpretationem ii textus ad propositam quæstionem nihil attinerent. Verùm, cùm adversarii hos ad Christum ut hominem esse referendos contendunt, atque ut id inprimis de versu 22 cap. 8. Proverb. comprobent, multas SS. Patrum auctoritates proferant, satius duximus annotare ejusmodi testimoniis, etiam de Christo ut homine acceptis, nostram opinionem non necessariò labe factari.

Probatur 2º ex sanctis Patribus. Laudantur eâ de re ex Græcis S. Irenæus lib. 5, cap. 4, Origenes, Homil. 24 in Numeros, S. Athanasius, Orat. 2, aliàs 1, contra Arianos, S. Greg. Naz. Orat. 36, S. Basil. Homiliâ adversus Calumniatores S. Trinitatis, aliàs 29, S. Chrys. Hom. 31 in Matth. n. 3, S. Cyrillus Alex. lib. 5 de Trinit.; ex Latinis verò Tertull. lib. de Carne Christi, cap. 14, S. Ambr. de Incarn. cap. 6, S. Augustinus multis in locis, præsertim sermone 174, aliàs 8, de Verbis Apostoli, serm. 175, aliàs 9, Enchiridii c. 108, et l. 1 de peccatorum meritis et remiss. cap. 26, 27 et 28, S. Leo Sermone 3 de Pentecoste, S. Fulgentius, de Incarnat. cap. 7, S. Greg. Magnus, in lib. 4 Regum cap. 1, etc., quorum testimonia collecta habentur à Petavio lib. 2 de Incarnat. cap. 17, n. 8, 9, etc., et apud Thomass. lib. 2, cap. 5, necnon apud Turnel. Witass., etc. Uum aut alterum eorum hic

exscribere satis erit. S. Irenæus loco citato : *Si non haberet caro salvari*, inquit, *nequaquàm Verbum Dei caro factum fuisset*; adverte à S. doctore non dici, *caro passibilis*, sed *caro simpliciter*. S. Athanasius : *Illi (Deo Verbo) facto homini*, inquit, *antecedit hominum necessitas, sine quâ carnem minimè induisset*. S. Chrysostomus hæc Christi verba : *Non veni vocare justos sed peccatores*, liberiùs ita explanat : *Tantum abest, ut peccatores abominationi habeam, ut etiam propter illos tantum advenerim*. S. Ambrosius : *Quæ erat causa Incarnationis, nisi ut caro quæ peccaverat, per se redimeretur?* S. Augustinus, sermone 174 : *Si homo non periisset, Filius hominis non venisset*. Et sermone sequenti : *Nulla causa fuit veniendi Christo Domino, nisi peccatores salvos facere*. Clara hæc videntur, nec elucidatione indigent.

Probant tertio conclusionem nonnulli ex ratione; quia, inquiunt, decretum seu voluntas divina mittendi Filii fuit efficax, siquidem 1º effectum suum habuit; 2º illa voluntas fuit prædestinatio Christi; prædestinatio autem decretum sit efficax necesse est; atqui, pergunt illi, nulla citra Adæ peccatum fuit in Deo voluntas efficax mittendi Filii sui, seu Incarnationis Verbi; nam illud decretum efficax vel ad carnem passibilem vel ad carnem impassibilem, vel ad carnem generatim abstrahendo à passibili aut impassibili spectâset. Nullum horum dici potest. Nam 1º, non ad carnem passibilem, cùm fateantur adversarii nonnisi propter peccatum reparandum carnem passibilem à Christo fuisse assumptam. 2º Non ad carnem impassibilem, nam decretum efficax effectum suum infallibiliter consequitur, Christus autem non venit in carne impassibili. 3º Non ad carnem generatim, siquidem efficax voluntas ad aliquid speciale determinata est quod reipsâ ejus vi est exiturum. Unde differt à voluntate antecedenti quæ à circumstantiis objectivè præscindit.

Hoc argumento non utimur, 1º quia inde sequeretur adversariorum sententiam in se contradictionem aliquam et veram repugnantiam involvere, adeò ut in eo instanti rationis seu ordinis qui prævisionem peccati Adæ præcessisse concipitur, Deus non potuisset ita statuere : Volo ut Filius divinus incarnetur eo meliori modo quo generi humano expedire poterit; vel: Volo ut hoc modo et eâ de causâ veniat si Adamus non peccet, istâ verò ratione si in peccatum primus homo incidat; atqui tamen ejusmodi decretum in hoc instanti virtuali repugnasse nemo theologus dixerit. 2º Nonne



vi præsentis decreti, secundum Scripturas multa si Adamus non peccasset, reipsa evenissent, quæ eo in peccatum lapso, non contingere? V. g., nonne eâ in hypothesi immunis fuisset protoparens à miseriis hujus vitæ, à concupiscentiâ, à morte? nonne ejus posterî in justitiâ originali concepti fuissent? Decretum de Christo in carne impassibili venturo si Adamus non peccasset, ejusdem fuit naturæ et conditionis ac decretum vi cujus hæc omnia in eâdem hypothesi extitissent. Ex Scripturis itaque et traditione hic argumentari liceat; rationi verò infirmæ sibi relictæ, ubi agitur de consiliis Dei liberrimis, nequidem permittatur conjectationibus indulgere. Cæterum non pro certo, sed tantum ut probabilius in conclusione posuimus Incarnationem citra Adæ peccatum non fuisse decretam; 1° quia dum in Scripturis assignatur redemptio ut motivum et finis Incarnationis peractæ, non idcirco disertè et conceptis verbis excluditur motivum aliud propter quod citra peccatum Adæ id mysterium quantum ad substantiam peragi potuisset. 2° Quia, etsi laudati versiculi 22 cap. 8 Proverb. et 15 cap. 1 Epistolæ ad Colossenses, etc., possint intelligi de Christo ut Deo; imò, etiamsi de Christo ut homine accepti cum nostrâ sententiâ adhuc conciliari possint, ut vidimus; attamen duo dissimulanda non sunt. Primum, multos è Patribus hæc loca, præsertim versiculum 22 cap. 8 Proverb. de Christo ut homine esse interpretatos; alterum, positâ ejusmodi interpretatione, eosdem textus de Incarnatione ante res omnes, ipsamque Adæ peccati permissionem decretâ facilius et magis propriè explicari. 3° Quia non absona omnino est responsio quam adversarii ad laudata Patrum testimonia afferunt, hos nempe sanctos doctores locutos esse de Incarnatione prout peracta est, nihilque quod ad statum controversiæ in scholis ab ætate S. Thomæ et Scoti agitatæ pertineat, ab iis fuisse definitum.

Atque hæc de propositâ quæstione sufficiant. Plura apud auctores laudatos utrinque disputata legere est. Tanti nobis non videtur momenti illa controversia, ut in eâ expendendâ diutius immoremur.

Dissertatio viij.

DE SATISFACTIONE CHRISTI.

In memoriam revocanda sunt quæ de satisfactionis notione, capite 5 Dissertationis V, jam

observavimus, nempe 1°, satisfactionem prout à nobis accipitur, esse redditionem voluntariam honoris et reverentiæ ad compensandam injuriam Deo per peccatum illatam; 2° ubi reditio ejusmodi est ad æqualitatem, seu æquivalens debito, tunc satisfactionem esse condignam; 3° si præterea fiat ex propriis et ex aliis indebitis, hanc esse perfectam et ad strictos apices juris. Jam verò tria hic in controversiam versantur, necessitas nimirum, veritas et perfectio satisfactionis Christi, de quibus triplici capite disseremus.

CAPUT PRIMUM.

De necessitate satisfactionis Christi.

Quæstio non est 1° utrum satisfactio Christi ad redimendum genus humanum ita necessaria fuerit, ut citra eam Deus, etiam de potentiâ absolutâ, homines liberare et salvare nequiverit. Hanc quæstionem jam solvimus supra, Dissert. V, cap. 4, ubi ostensum est Deum absolutè potuisse sine Incarnatione, ac proinde sine satisfactionibus Christi, peccatum dimittere. Non quæritur etiam utrum in hypothesi quod peccati puniendi, illiusque citra condignam satisfactionem non remittendi constans in Deo sit voluntas, simpliciter necesse fuerit ad homines redimendos Christum eorum loco satisfacere. Cum enim pura creatura quibuslibet gratiæ donis ornata compensandæ ad æqualitatem injuriæ Deo per peccatum illatæ non modò in præsentî statu, sed etiam absolutè impar sit, ut supra loco mox citato docuimus, cum insuper capite 3 hujus Dissertationis ostensurî simus Christum pro hominibus non solum condignè, sed et juxta strictos juris apices satisfecisse; dicendum, quod consequens est, satisfactionem alicujus personæ divinæ nempe Christi, in illâ hypothesi satisfactionis condignæ Deo exhibendæ, esse simpliciter necessariam. Præsens igitur controversia eò revolvitur, an reipsa hujusmodi hypothesis existat, seu an Deus hanc rerum dispositionem instituendo, peccatum punire, illudque citra condignam satisfactionem non condonare decreverit, adeò ut, propter illud decretum ad æterno positum, hominibus redimendis necessariæ fuerint satisfactiones Christi. Negant Sociniani tale decretum fuisse à Deo constitutum, rati sine ullâ satisfactione condignâ seu æquivalenti Deum velle peccata remittere quorum peccatorem poenitet, ac proinde opus non fuisse ut Christus pro nobis faceret. Ita Socinus, lib. 1 de Servatore Christo, cap. 1, Smalzius contra

Frantzius, Catechesis Racoviensis, Crellius, L. de Satisfactione Christi contra Grotium, Wolkelius, l. 5 de verâ Religione, cap. 22, etc. Contra omnes theologi statuunt in præsentī statu Christisatisfactiones hominibus salvandis fuisse necessarias, quia Deus peccata impunita et sine satisfactione sufficienti non dimittit, et aliunde, ut Dissert. V dictum est, satisfactionis sufficienti pro peccatis generis humani persolvendæ purus homo, saltem juxta præsentem rerum constitutionem, idoneus esse non potest.

CONCLUSIO. Cùm Deus statuerit peccatum sine condignâ satisfactione non remittere, idcirco salvandis hominibus necessariae fuerunt Christi satisfactiones. Probatur 1^o argumento ex pluribus ad se invicem collatis Scripturæ sacræ locis justitiæ Dei severitatem et Christi satisfactiones spectantibus deducto. Etenim, si Deus non tantum ut osor peccati et peccatoris, sed etiam ut severus secundum certas justitiæ leges criminum ultor et vindex in Scripturis exhibeatur, et præterea in iisdem Christus significetur ad satisfaciendum pro peccatis nostris mortem oppetiisse, profectò fatendum erit Christi satisfactiones hominibus salvandis fuisse necessarias, quia Deus peccata sine condignâ satisfactione non remittere decrevit. Atqui 1^o Deus ut osor peccati et peccatoris in sacris Litteris exhibetur. Levit. 26, v. 27: *Sin autem nec.... audieritis me,.... ego incedam adversus vos in furore contrario.... et abominabitur vos anima mea.* Psal. 5, v. 6: *Odisti omnes qui operantur iniquitatem, perdes omnes qui loquuntur mendacium. Virum sanguinum et dolosum abominabitur Dominus.* Proverb. 3, v. 32: *Abominatio Domini est omnis illusor.* Ibid. cap. 15, v. 9: *Abominatio est Domino via impii.* Sapientiae 14, v. 9: *Similiter odio sunt Deo impius et impietas ejus.* Habacuc. 1, v. 13: *Mundi sunt oculi tui ne videas mahum, et respicere ad iniquitatem non poteris.* Ex his et aliis benè multis Scripturarum testimoniis quæ afferri possent, satis superque liquet, in iis Deum osorem criminum prædicari. 2^o Juxta easdem est severus peccatorum ultor et vindex. Exodi 20, v. 5: *Ego sum Dominus Deus tuus, fortis, zelotes, visitans iniquitatem patrum in tertiam et quartam generationem eorum qui oderunt me.* Ibid. 34, v. 7: *Nullus apud te per se innocens est, hebraicè, sontem impunè non dimittes.* Num. 14, v. 18: *Nullum innoxium derelinquens.* Quæ sententia eundem habens sensum cum præcedente, iisdem etiam vocibus in hebræo exprimitur.

Deuter. 7, v. 10: *Reddens odientibus se statim, ita ut disperdat eos, et ultra non differat, protinus eis restituens quod merentur.* Psal. 17, v. 27: *Cum electo electus eris, et cum perverso perverseris.* Psal. 93, v. 1: *Deus ultionum Dominus.* Jeremiæ 51, v. 56: *Fortis ultor Dominus reddens retribuet.* Nahum. 1, v. 1: *Deus æmulator et ulciscens Dominus; ulciscens Dominus et habens furem;.... et mundans non faciet innocentem; id est, ut supra, sontem impunè non dimittet.* Rom. 1, v. 18: *Revelatur ira Dei de cælo super omnem impietatem et injustitiam hominum eorum qui veritatem Dei in injustitiâ detinent.* 3^o Deus ex sacris Litteris peccata punit juxta certas et fixas justitiæ regulas. Gen. 18, v. 25, Abraham sic Deum alloquitur: *Absit.... à te, ut.... occidas justum cum impio, fiatque justus sicut impius; non est hoc tuum, qui judicas omnem terram; nequaquam facies judicium hoc; seu ut in hebræis legitur: Numquid judex universæ terræ non exerceret jus?* Rom. 3, v. 5: *Si autem, inquit Apostolus, iniquitas nostra justitiam Dei commendat, quid dicemus? Numquid iniquus est Deus qui infert iram?... Absit; alioquin quomodo Deus judicabit hunc mundum?* 2^o Thessal. 1, v. 6: *Justum est apud Deum retribuere tribulationem iis qui vos tribulant.* 4^o Quàm severus ultor criminum sit Deus, seu quàm severe ea puniat, patet ex pœnis ab ipso propter peccata secundum Scripturas inflictis. Nempe ejusmodi pœnæ sunt mors tum animæ tum corporis, maledictio Dei et supplicia æterna.

Mors quidem animæ et maledictio Dei: Ezech. 18, v. 20: *Anima quæ peccaverit ipsa morietur.* Deuter. 27, v. 26: *Maledictus qui non permanet in sermonibus legis hujus; quæ sententia, etsi de solis Israelitis distinctè profertur, ad omnes tamen legis à Deo profectæ ac proinde legis naturalis violatores perinde attinet; unde ab Apostolo, Gal. 3, v. 10, omnibus etiam gentilibus qui peccaverunt, accomodatur.* Genes. cap. 6, in pœnam criminum generis humani diluvium generale decernitur. Capite autem 2, v. 17, hæc Adamo Deus verba facit: *In quâcumque enim die comederis de eo (ligno scientiæ boni et mali), morte morieris; quibus non tantum animæ mortem, sed etiam (quidquid contra obtendant Sociniani) corporis interitum significari manifestum est ex Sapient. cap. 2, v. 23: Deus creavit hominem inexterminabilem... invidiâ enim diaboli mors introivit in orbem terrarum; et ex Apostolo Rom. 5, v. 12: Per unum hominem peccatum in hunc mundum intravit, et per peccatum mors, et ita*

in omnes homines mors pertransiit, in quo omnes peccaverunt. Ubi observa ab hâc interitûs corporei pœnâ, propter Adæ peccatum, ipsi, licet non contumaci, et omnibus ejus posteris ex Apostolo inflicta, nullum Adami Filium, quidquid agat, eximi. Tandem supplicia æterna; Matth. 25, v. 41 : *Discedite à me, maledicti, in ignem æternum qui paratus est Diabolo et Angelis ejus.* 2 Petri 2, v. 4 : *Deus Angelis peccantibus non pepercit; sed rudentibus inferni detractos in tartarum tradidit cruciandos, in judicium reservari.*

5° In sacris paginis Christus significatur ad satisfaciendum pro peccatis nostris mortem oppetiisse. Id ex professo demonstrabimus capite sequenti. Interim hæc loca proferam; Isaïæ 53, v. 5 : *Vulneratus est propter iniquitates nostras, attritus est propter scelera nostra; disciplina pacis nostræ super eum, et livore ejus sanati sumus. Posuit Dominus in eo iniquitates omnium nostrum, etc.* Rom. 5, v. 10 : *Cum inimici essemus, reconciliati sumus Deo per mortem Filii ejus.* 1 Tim. 1, 5 : *Qui (Christus) dedit redemptionem semetipsum pro omnibus.* Hæc magis explicabuntur, et innumera alia adjicientur capite sequenti.

Frustra reponit Crellius, de Deo, cap. 3, cum aliis Socinianis, 1° Deum, Jerem. 18, v. 10, Ezech. 18, v. 21, et cap. 33, v. 11, culpæ et pœnæ condonationem peccatori resipiscenti esse pollicitum; 2° nullas in sacris litteris pœnarum comminationes absolutas peccatoribus intentari quamdiù in vivis sunt, sed tantum conditionatas, si nempe contumaciter in peccatis suis perseverent; ut patet exemplis comminationum Isaïæ ad Ezechiam et Jonæ ad Ninivitas. Namque ad primum, fatemur condonationem peccatori resipiscenti, et ad Deum sese convertenti esse promissam, quanquam tamen ipsi sæpius maneat pœna aliqua temporalis luenda, ut ex Davidis exemplo manifestum est. Sed de eo hic necesse non est disputari. Quæstio autem est an ille peccator quem suorum delictorum verè et sincerè pœnitet, donum conversionis et veniam à Deo citra Christi satisfactiones obtineat; an verò nonnisi intuitu meritorum et satisfactionum. Christi utrumque ipsi impertiatur. Prius Sociniani contendunt, rati se in eo ductum rationis sequi. Nos contra, rationum momenta quibus illi innituntur, caduca et nulla esse dicimus, ut inferius patebit; ex Scripturis verò manifestè ostendimus satisfactionibus ac morte Christi nos Deo reconciliatos fuisse, et à pœnis æter-

nis quæ peccatis nostris debitæ erant, liberatos. Enimverò Christus mortuus est *pro nobis*, Rom. 5, v. 6, *ut nos reconciliaret*, ibid. v. 10; *ut nos justificaret*, ibidem; *ut nos redimiret*, Tit. 2, v. 14. Vide aliorum testimoniorum silvam cap. sequenti producendorum. Ad secundum, eadem est etiam responsio. Esto enim juxta præsentem rerum ordinem, nonnisi conditionatæ comminationes peccatori quamdiù in terris degit in Scripturis proponantur, inquirendum superest quâ de causâ ejusmodi minæ solum conditionatæ sint. Volunt Sociniani id ex eo oriri quòd Deus nullam de peccato commisso satisfactionem exigat. Ex adverso Scripturæ tradunt innumeris in locis Deum, ad justitiam suam et misericordiam simul summâ ratione manifestandas, voluisse ut nulla peccatori spes conversionis et salutis affulgeret nisi in Christo, qui dedit semetipsum redemptionem pro omnibus, 1 Tim 2, v. 15, qui *semel pro peccatis nostris mortuus est, justus pro injustis, ut nos offerret Deo*, 1 Petri 3, v. 18, *quem Deus proposuit propitiationem... in sanguine ipsius... propter remissionem præcedentium delictorum*, Rom. 5, v. 25, qui ideò dicitur *Agnus occisus ab origine mundi*, Apocal. 13, v. 8. Idcirco igitur minæ horrendæ quibus in peccatores Deus intonat, nonnisi conditionatè juxta Scripturas accipiendæ sunt, quia Christus, *in quo* (Eph. 1, v. 7) *habemus redemptionem per sanguinem ejus*, pro nobis satisfecit, illudque sanguinem suum offerendo pro suâ reverentiâ obtinuit, ut peccator, si gratiis ad resipiscendum sibi in hâc vitâ concessis benè uteretur, delictorum suorum condonationem et salutem consequeretur. Probatur 2° ex cap. 3 Epistolæ ad Galatas v. 13 et 14, ubi Apostolus significat homines à solo Christo redimi potuisse de maledicto legis, ut *benedictionem Abrahamæ*, et *pollicitationem spiritûs* per fidem reciperent. Christus nos redemit, inquit, *de maledicto legis, factus pro nobis maledictum; quia scriptum est: Maledictus omnis qui pendet in ligno; ut in Gentibus benedictio Abrahamæ fieret in Christo Jesu, ut pollicitationem Spiritûs accipiamus per fidem.*

Probatur 3° ex capitibus 9 et 10 Epist. ad Hebræos. Nam ibi Apostolus docet sacrificia veteris legis et expiationes nonnisi umbras et imagines fuisse sacrificii et satisfactionis quæ Christus in arâ crucis obtulit; iis autem veteribus victimis significatum esse, sine sanguinis effusione Deum nolle peccata auferre et eorum relaxare pœnas; cum verò impossibile esset sanguine taurorum et hircorum peccata deleri,

ideò necesse fuisse ut Christus sese pro hominibus Deo reconciliandis morti objiceret. *Omnia penè sanguine secundum legem mundantur*, inquit, capit. 9, v. 22 et seqq. *et sine sanguinis effusione non fit remissio. Necesse est ergo exemplaria quidem cœlestium his mundari; ipsa autem cœlestia melioribus hostiis quàm istis... Christus semel oblatus est ad multorum exhaustiendâ peccata.* Et cap. 10, v. 4 et seqq.: *Impossibile enim est sanguine taurorum et hircorum auferri peccata. Ideò ingrediens mundum dicit: Hostiam, et oblationem noluisti; corpus autem aptâsti mihi; holocaustomata pro peccato non tibi placuerunt. Tunc dixi: Ecce venio. In capite libri scriptum est de me: Ut faciam, Deus, voluntatem tuam, etc.*

CAPUT II.

De veritate satisfactionis Christi; an verè et propriè pro nobis satisfecerit.

Totius controversiæ quæ de satisfactione Christi cum Socinianis habetur, præcipuum istud est ac veluti unicum caput. Negant ii Christum pro nobis verè et propriè satisfecisse. Ne autem vocabulorum ambiguitatibus, quas in id argumenti, dialecticis suis captionibus induxerunt, quæstio implicata maneat,

Observandum 1^o, agi de satisfactione propriè dictâ, quâ, pretii æquivalentis solutione, sponsor debitorem liberet, et contractum ab eo debitum extinguat; non verò de illâ satisfactione metaphoricâ et impropiè dictâ, quæ in adimplendis quibusdam conditionibus à superiore impositis, aut in impetrandâ gratuitâ debiti relaxatione solummodò consistit. Observandum 2^o, posse aliquem duobus modis dici alterius servatorem. Nempe aut consilio tantum, adhortationibus et exemplo, qui modus valdè improprius est; vel insuper merito, opere et efficacîâ. Observandum 3^o, duplici etiam ratione intelligi posse Christum Dei et hominum esse mediatorem, 1^o quòd Dei mandatorum et benevolentîæ apud homines interpres fuerit, et advocatum agens apud Patrem pro nobis intercesserit, et etiamnum intercedat; quo sensu omnis propheta, et verbi Dei administer potest appellari mediator; 2^o quòd passionis et mortis suæ pretium in redemptionem et satisfactionem offerens homines Deo reconciliaverit. Observandum 4^o, cum Christus dicitur mortuus pro nobis, vel intelligi eum loco nostro verè subrogari voluisse, ut videlicet sacerdos simul et victima se ad iniquitates

nostras expiandas cruentæ morti offerret; vel significari duntaxat ipsum alterius cujusdam utilitatis nostræ causâ, puta ut fortitudinis et patientiæ exempla nobis daret, doctrinamque nobis salutarem confirmaret, mortem appetiisse.

Utrò concedunt Sociniani Christum pro nobis impropriè satisfecisse, id est, veniam delictorum nostrorum gratis obtinuisse, et voluntatem Dei circa ea quæ saluti nostræ prodesse poterant, fideliter esse executum. At propriè dictam satisfactionem ab eo ut à vade et sponsore nostro fuisse impensam, seu illum pro delicto quod peccando contraximus extinguendo, passionis et mortis suæ pretium insolutum contulisse inficiantur. Concedunt pariter Christum posse servatorem nostrum impropriè dici, eo sensu quòd salutis seu vitæ æternæ promissiones nobis aperuerit, eam consequentium felicissimum statum nos docuerit, iter ad illam conducens ostenderit, ad hanc viam tenendam adhortationibus, exemplisque suis homines impulerit et allexerit, atque demum omnem suam doctrinam morte suâ consignaverit ac potissimum confirmaverit. Sed eum prorsus nolunt esse merito, opere et efficacîâ servatorem hominum, seu à pœnis quibus eramus obnoxii eum nos redemisse, nobisque justificationem et media salutis promeruisse. Nomen etiam mediatoris Christo attribuunt, sed eo tantum sensu quòd apud Deum sit pro nobis intercessor, et apud homines diviniæ voluntatis interpres, non verò quòd iram Dei placaverit, et inimicitias Deum inter et homines per peccatum inductas oblatione sui extinxerit. Demum fatentur Christum pro nobis esse mortuum, id est, pro aliquo bono et commodo nostro, ut scilicet saluberrimam doctrinam quam prædicaverat, confirmaret, exempla patientiæ nobis daret, homines à terrenis avocaret. Non verò agnoscunt eum esse mortuum loco nostro, seu sese ad expianda peccata nostra in victimam piacularem Deo Patri obtulisse. Uno verbo, nihil Sociniani de Christo servatore, redemptore, mediatore, et pro nobis satisfaciente et moriente statuunt, quod eodem sensu multis aliis sanctis hominibus, putà Prophetis, Apostolis et Martyribus perfectè non congruat.

At verò contra omnium Christianorum indubitata est fides, Christum verè et propriè pro nobis satisfecisse, ac proinde 1^o hunc vadem et sponsorem nostrum esse voluisse, ut satisfactionum suarum pretio et valore illud

debitum expungeret, quod peccando contraxeramus, cuique extinguendo nobis relictis impares fuisset; 2^o eundem esse servatorem et liberatorem nostrum non exemplo tantum, consilio, aut præconio, sed redemptione, merito et efficaciam; 3^o ipsum ut Dei et hominum mediatorem sanguinis sui oblatione numen iratum placasse, ipsique hominem reconciliasse; 4^o eum passum et mortuum esse non solum alicujus boni et commodi nobis conciliandi causâ, sed etiam loco nostro, adeo ut vices sacerdotis simul et victimæ sustinens, ad nos à morte æternâ eximendos et salvandos, sese neci cruentæ objecerit.

CONCLUSIO. Christus verè et propriè, sensu explicato, pro nobis satisfecit. Probatur 1^o ex Scripturis. Ille pro nobis verè et propriè satisfecit, qui 1^o debitum quod homines peccando contraxerant, vas eorum et sponsor factus, passione et morte suâ solvit; 2^o qui dato sanguinis sui pretio homines redemit et servavit, ac media salutis ipsis promeruit et acquisivit; 3^o qui Dei et hominum eo sensu mediator est, quod seipsum offerendo iram divinam placaverit, eosque Deo reconciliaverit; 4^o qui sacerdos simul et victima se in expiationem criminum nostrorum morti libenter obtulit; atqui hæc præstitit Christus juxta Scripturas; ergo, etc. Major evidentissima est ex dictis; hæc enim præstare non potuit Christus quin Deo honorem redderet illatæ ipsi per peccatum injuriæ compensandæ idoneum. Minor propositio quatuor habet partes, quæ, etsi ita inter se connexæ sint, ut, unâ concessâ, aliæ non possint non concedi, sigillatim tamen tractandæ et comprobandæ sunt, ut veritas sub singulis suis respectibus inspecta ampliùs affulgeat. Itaque

1^o *Christus juxta Scripturas vas et sponsor hominum factus, debitum quod peccando contraxerant, passione et morte suâ extinxit.* — Multa sunt testimonia quibus id adstruitur. Primum est Isaïæ cap. 53: « Verè, inquit, v. 4 et seqq., « languores nostros ipse tulit, et dolores nostros ipse portavit; et nos putavimus eum « quasi leprosum, et percussus à Deo, et humiliatus. Ipse autem vulneratus est propter « iniquitates nostras, attritus est propter scelera nostra; disciplina pacis nostræ super eum, et livore ejus sanati sumus.... Posuit « Dominus in eo iniquitatem omnium nostrum. « Oblatus est quia ipse voluit... Abscissus est « de terrâ viventium; propter scelus populi « mei percussi eum.... Eo quod iniquitatem

« non fecerit, nec dolus fuerit in ore ejus, et « Dominus voluit conterere eum in infirmitate. « Si posuerit pro peccato animam suam, videbit semen longævum et voluntas Domini in manu ejus dirigetur... In scientiâ suâ justificabit ipse servus meus multos, et iniquitates eorum ipse portabit. Ideò dispertiam ei plurimos, et fortium dividet spolia, pro eo quod tradidit in mortem animam suam.... et ipse peccata multorum tulit. »

Ex hoc insigni vaticinio, quod ad Christum attinere liquidò constat, ut alibi contra Judæos ostendimus, ipsique fatentur Sociniani, in hunc modum argui potest: Ille, ut vas et sponsor noster, debita seu pœnas quibus ob peccata eramus obnoxii solvit, qui cum sit ab omni peccato immunis, iniquitates nostras in se à Deo conjectas, spontè expiandas suscepit, quique idcirco vulneratus est, attritus est, percussus et contritus à Deo, atque neci traditus, sicque nobis pacem, sanitatem, et sanctificationem conciliavit. Atqui 1^o ex illâ Isaïæ Prophetiâ Christus fuit ab omni peccato immunis: *Eo quod iniquitatem non fecerit*, inquit Propheta v. 9, *neque dolus fuerit in ore ejus*. 2^o Iniquitates nostras in eum Deus conjecit; v. 6: *Posuit Dominus in eo iniquitatem omnium nostrum*. Hebraicè, *conjecit in illum iniquitates omnium nostrum*. 3^o Eas expiandas spontè suscepit; v. 7: *Oblatus est quia ipse voluit*. 4^o Propter iniquitates nostras in eo sic positas et à se libenter susceptas vulneratus est, attritus est, percussus à Deo et morti traditus; v. 5: *Ipsæ autem vulneratus est propter iniquitates nostras, attritus est propter scelera nostra*; v. 8: *Abscissus est de terrâ viventium; propter scelus populi mei percussi eum*; v. 10: *Dominus voluit conterere eum in infirmitate*; v. 11: *Tradidit in mortem animam suam.... et ipse peccata multorum tulit*. 5^o Vulneribus, doloribus, sui oblatione et morte nobis pacem, sanitatem, justificationem conciliavit; v. 5: *Attritus est propter scelera nostra; disciplina* (hebraicè castigatio seu pœna), *pacis nostræ* (id est reconciliationis nostræ cum Deo, aut immunitatis nostræ à pœnis, ut ex subjectâ materiâ apparet, et sensus est, *castigatio seu pœna quâ liberamur et Deo reconciliamur*), *super eum, et livore ejus sanati sumus* (hebraicè *livor ejus sanitas nobis fuit*); v. 10: *Si posuerit pro peccato animam suam* (hebraicè, *si posuerit seipsum sacrificium pro delicto*), *videbit semen longævum, et voluntas Domini in manu ejus dirigetur*; v. 11: *In scientiâ suâ justificabit ipse servus meus multos*; v. 12: *Dispertiam ei*

plurimos; et fortium dividet spolia, pro eo quòd tradidit in mortem animam suam.... et ipse peccata multorum tulit; ergo, etc.

Potest et aliud argumentum efficax ex eo erui quòd Christus in textu allato dicatur languores et peccata nostra tulisse, dolores et iniquitates nostras portasse. V. 4 : *Verè languores nostros ipse portavit* (grece, *ipse peccata nostra fert et pro nobis affligitur*); et nos putavimus eum quasi leprosum et percussum à Deo, etc.; v. 11 : *In scientiâ suâ justificabit ipse servus meus multos, et iniquitates eorum ipse portabit*; v. 12 : *Tradidit in mortem animam suam.... ipse peccata multorum tulit*. Enimverò ille pœnas à nobis ob peccata nostra debitas passionibus et eruentâ suâ morte solvit, qui languores nostros et dolores, iniquitatesque et peccata humiliationibus suis, vulneribus et morte juxta Scripturas tulit, portavit; is etenim secundum Scripturæ usum dicitur peccata ferre qui pro iis pœnas dat, vide Levit. 5, v. 1, cap. 17, v. 16, cap. 19, v. 8, cap. 20, v. 17, 19, 20, et cap. 24, v. 15; Num. 9, v. 13, et cap. 14, v. 34; Ezech. 14, v. 10, cap. 18, v. 19 et 20, cap. 23, v. 49, et cap. 44, v. 12, etc. Atqui ex laudato Isaïæ textu Christus languores nostros et dolores, iniquitates et peccata tulit, portavit; ergo, etc.

Aiunt Sociniani versiculum 4 : *Verè languores nostros ipse tulit et dolores nostros ipse portavit*, referendum esse ad miracula quibus Christus morbos plurimorum sanavit, interprete ipso S. Matthæo cap. 8, v. 16 et 17, qui illum Isaïæ locum sic reddit : *Ipsæ infirmitates nostras accepit, et ægrotationes nostras portavit*; præterea vocem hebræam נָסָא *nasa*, quam vulgatus interpres hoc versu 4 et versu 12 reddit verbo *tulit*, significare etiam idem quod *abstulit, condonavit*; vocem autem סָבַל *Sabal*, quam versibus 4 et 11 vertimus *portavit*, etiam ubi cum peccato conjungitur, non necessariò significare pœnas peccati ferre, sustinere, sed posse accipi de afflictionibus quâcumque occasione toleratis; quod Socinus, lib. 2 de Satisfactione, cap. 4, probare conatur hoc Jeremiæ loco Thren. 3, v. 7 : *Patres nostri peccaverunt et non sunt; et nos iniquitates eorum portavimus*. Hic, inquit, hebraicè legitur *Sabal*, nec tamen ulla potest intelligi pœnæ imputatio facta filiis. Addit porro idem Socinus, ibidem, cap. 3, hebræa, ubi legimus v. 6 Isaïæ : *Posuit Dominus in eo, vel coniecit in illum iniquitates omnium nostrarum*, posse ita verti : *Deus occurrit per ipsum iniquitati omnium nostrarum*. Hæc præcipua sunt quæ de textu allato Isaïæ observant Sociniani, ex qui-

bus colligere sibi videntur hunc explicari posse de doloribus et morte à Christo eâ tantum de causâ toleratis, ut doctrinam suam confirmaret, justificationis et salutis viam peccatoribus ostenderet, etc.

Sed 1º, quæ præcedunt et sequuntur versiculum 4 capitis laudati, manifestum faciunt ibi agi de doloribus et pœnis ipsi Christo impositis, siquidem v. 3 appellatur *novissimus virorum, vir dolorum*; v. 5, dicitur *vulneratus propter iniquitates nostras, attritus propter scelera nostra*. Quid quòd ipso versu 4 exhibetur ut *percussus à Deo et humiliatus*? Hinc ex subjectâ materiâ, præsertim quia reliquo in capite exhibetur ut onustus peccatis nostris et propter illa in victimam oblati, meritò hoc in versu 4 languores nostros cum 70 Viris intelligimus *peccata* seu peccatorum nostrorum pœnas. Nec repugnat S. Matthæus, dum ejusmodi versiculum miraculis quibus morbos Christus abstulit, accommodat. Cum enim morbi sint peccati appendices et inter ejus pœnas recenseri debeant, planum est Christum, iis verbis quibus immediatè et directè ab Isaïa prædicatur pœnas quas pro peccato debebamus soluturus, iisdem etiam præsignificari nos à corporis infirmitatibus liberaturum; quod etsi maximè post corporum resurrectionem perfectè complendum sit, jam tamen olim miraculis quæ patravit, adimpleri cœptum est.

2º Omnibus hebraicè peritis exploratum et indubitatum est, verbum *Sabal*, quod in Vulgatâ nostrâ, v. 4 et 11, vertitur, *portavit*, nihil aliud unquam significare quàm *bajulare, sustinere, onustum esse*. Certum est pariter verbum *Sabal*, v. 11, cap. 53 Isaïæ, quod exponimus, nomini *peccati* esse adjunctum. Legitur enim ibi vox אָוֹן *avon*, quæ nihil aliud est quàm *peccatum, iniquitas*. Certum est denique, illud idem verbum, ubi *peccato* adjungitur, idem esse Hebræis ac *ferre peccatorum pœnas*. Neque obstat locus Jeremiæ à Socino allatus; cum enim constet ex cap. 20 Exodi v. 5, et ex multis aliis locis, ipsique fateantur Sociniani, Deum ob patrum delicta filiis eorum prævaricationes imitantibus pœnas imponere, atque ex versu 16 laudati capitis Jeremiæ manifestum sit eos de quibus objecto versu 7 sermo sit, patrum suorum crimina esse imitatos, sequitur tam ejusmodi locum de pœnæ imputatione quàm alium quemlibet intelligendum esse; ergo.

3º Quod ad verbum *nasa* attinet, etsi junctum *peccato* sæpè significet *pœnas peccati ferre*, ut videre est locis supra laudatis, attamen fa-

tendum eo etiam non rarò significari *peccata auferre, condonare* (1). Quapropter, nonnisi ex adjunctis, nempe ex antecedentibus et consequentibus et ex subjectâ materiâ cognosci potest utrâ accipiatur significatione. Qui verò attenderit Christum toto illo capite Isaia de quo agimus, exhiberi ut vulneratum et attritum ob iniquitates nostras, ut onustum peccatis nostris, ut offerentem sese pro peccato in victimam, is facillè perspiciet verbum *nasa* priori significatione hîc accipi, id est, eo designari poenas peccatorum nostrorum à Christo toleratas fuisse. Præterea ipso versu 4, quo de languoribus nostris agens Isaias, vocem *nasa* adhibet, in eodem ipso commate dolores nostros à Christo *portatos* ipse exprimit verbo *Sabal*, quod, ut diximus, nihil unquam aliud quàm *bajulare* aut *esse onustum* sonat. Pariter, vocabulum *nasa* usurpatur quidem v. 12, ubi legimus: *Peccata multorum ipse tulit*; at versu 11, quo habemus: *Iniquitates multorum ipse portabit*; hebraicè est *Sabal*; etc.

4° Falsissimum est hebræa v. 6 posse reddi: *Deus occurrit per illum iniquitati omnium nostrum*. Nam in hebræis habetur vox *הִפְחִיחַ* *hiph-giiah* in conjugatione *hiphil*, quæ fatentibus omnibus non unicam sed duplicem actionem significat, et proinde verbum illud propriè idem est ac *fecit occurrere*, metaphoricè verò idem ac *fecit deprecari*, aut etiam *deprecatus est*, quia deprecator suas preces quasi interponit. Jam verò hic averti nequit *deprecatus est*, siquidem Deus dici non potest deprecatus pro Christo. Neque etiam legi potest *fecit deprecari*, tum quia obstat *בִּלְבָד* quod sequitur et significat *in illum*, quid enim sonaret, *fecit deprecari in illum*? tum quia proximè antecedentia et consequentia ad perpressiones dolorum pro peccatis, non ad deprecationem attinent; ergo literalis et genuinus hebræi hîc sensus est, *fecit occurrere*, id est *impegit, coniecit in illum iniquitates omnium nostrum*.

Objicit Socinus loco citato, Levit. 16, v. 21 et 22, peccata dici imposita hirco expiatorio qui ea in vastam solitudinem deferret; atqui, inquit, hic hircus poenas pro peccatis populi profectò non pertulit, præsertim cùm non interimeretur, licet, teste Apostolo Hebr. 9, v. 22, *sine sanguinis effusione non fieret remissio*.

(1) Vide Gen. 50, v. 17; Exod. 10, v. 17; cap. 23, v. 21; cap. 32, v. 32; cap. 34, v. 7; Num. 14, v. 18; Jos. 24, v. 19; Reg. 13, v. 23; Job. 7, v. 21; Psal. 32, v. 5; Psal. 85, v. 3; Mich. 7, v. 18, etc.

Nego minorem. Cùm enim poenæ generali quâdam acceptione sumptæ in bestias etiam cadant, Genes. 8, v. 21, et cap. 9, v. 5, Exodi 21, v. 28, Levit. 20, v. 15, cùm præterea is fuerit sacrificiorum in expiationem institutorum finis et scopus, ut loco nocentium hominum, victimæ sufficerentur et interimerentur, quis non videt hircum expiatorium idcirco dictum fuisse peccata populi pertulisse, quòd poenis à populo ob peccata debitis quasi oneraretur, et ejus vice in sacrificium offerretur? Tradunt Rabbini ejusmodi hircum è celsiori loco præcipitem ejectum fuisse, atque ita neci datum. Quidquid sit, manifestum est hunc in vastam solitudinem abigi non potuisse, quin morti certæ exponeretur. Cæterum sacrificium illud, ut et alia veteris legis, teste Apostolo in Epistolâ ad Hebræos, ut inferiùs exponemus, totidem figuræ erant sanctæ et perfectæ illius oblationis, quâ Christus vas et sponsor noster victimam ad delicta nostra luenda sese sponte in arâ crucis obtulit.

Secundum testimonium legitur Matthæi 26, v. 28: *Hic est sanguis meus novi Testamenti qui pro multis effundetur in remissionem peccatorum*. Unde sic in formâ: Ille poenas pro peccatis debitas solvit, cujus sanguis pro multis effusus est in remissionem peccatorum; atqui ex loco allato sanguis Christi pro multis effusus est in remissionem peccatorum; ergo, etc.

Tertium testimonium desumitur ex cap. 5 Epist. 2 ad Corinth. v. 21: *Eum* (Christum), *qui non noverat peccatum, pro nobis* (Deus) *peccatum fecit, ut nos efficeremur justitia Dei in ipso*. ex quo hoc argumentum eruitur: Ille debitum à nobis peccando contractum, vas et sponsor noster factus persolvit, quem Deus *pro nobis peccatum*, id est, juxta Scripturæ usum, victimam pro peccato *fecit*, ut justificationem consequeremur, seu *efficeremur justitia Dei in ipso*. Atqui Christum *qui non noverat peccatum*, Deus ex allato textu *pro nobis peccatum fecit*, etc. ergo.

Aiunt Sociani Christum eò loci dici *factum esse pro nobis peccatum*, quòd sub peccatoris specie nostri causâ venerit, et ut peccator habitus sit. Sed 1º, ejusmodi metaphora longissimè petita quâ Sociniani volunt Christum ob carnis peccatricis similitudinem, ab Apostolo appellari *peccatum*, neque in Scripturis, neque apud auctorem quemlibet unquam usurpata legitur. Contra verò figura est obvia et naturalis et in Scripturis usitata Levit. 5, v. 6 et 7, etc. ut *hostia pro peccato, seu peccatis alienis*

onusta et iis expiandis destinata, *peccatum*, nuncupetur; ergo. 2° Si Christus eo quòd ut peccator habitus sit, diceretur loco allato factus peccatum; profectò, non à Deo, sed à Judæis factus peccatum dictus fuisset; atqui tamen, juxta Apostolum, non Judæi et impii homines, sed Deus ipse Christum *qui non noverat peccatum, pro nobis peccatum fecit*; ergo, etc.

Quartum testimonium ex Epistolâ ad Galatas, 3, v. 13: *Christus nos redemit de maledicto legis, factus pro nobis maledictum; quia scriptum est: Maledictus omnis qui pendet in ligno*. Hic Christus manifestè significatur à maledicto legis, id est, à pœnis contra legis transgressores decretis nos liberâsse, non sine satisfactione pro nobis exhibitâ, sed *factus pro nobis maledictum*, id est, pœnas sustinens debito nostro compensando pares. Præposterè igitur Sociniani hunc locum duntaxat explicant de cruce ad exemplum nobis præbendum et utilem doctrinam consignandam à Christo toleratâ. Non enim Apostolus hanc crucis utilitatem aut aliam ejusmodi solùm commemorat, sed agit de redemptione à maledicto in quod homines incurrerant, quam redemptionem Christus sese in cruce litando, operatus est, *factus pro nobis*, seu loco nostro *maledictum*. Et verò, numquid Martyres qui in exemplum et utilitatem nostram crucibus affixi sunt, ideò prædicari possent nos redemisse de maledicto legis, facti pro nobis maledictum? quis Christianus patienter ferret ejusmodi præconiis hos efferri? ergo.

Quintum testimonium. Hebr. 7, v. 22, Apostolus ait *melioris testamenti sponsorem factum esse Jesum*; Christus igitur est sponsor noster; atqui, si una pars solvendo impar est, sponsor pro illâ solvit; ergo. Censent Sociniani Christum idcirco tantùm sponsorem nostrum dici, quòd novam legem instituerit tanquàm Dei interpres et legatus; at evidens est eodem sensu Christum laudato capite 7 ab Apostolo prædicari novi Testamenti sponsorem, quo ejusdem Epistolæ capite 9, v. 10, dicitur *novi Testamenti mediator*; atqui isto in loco novi Testamenti mediator dicitur, *ut morte intercedente in redemptionem earum prævaricationum, quæ erant sub priori testamento, repromissionem accipiant, qui vocati sunt, æternæ hæreditatis*; ergo, etc.

Sextum testimonium. 1 Petri 2, v. 24: *Qui (Christus) peccata nostra ipse pertulit in corpore suo super lignum, ut peccatis mortui justitiæ vivamus; cujus livore sanati estis*. Ubi quæ Isaias cap.

53 supra laudato præsignaverat, hæc jam adimpleta S. Petrus rursus iisdem ferè verbis exprimit, et pressius exponit; unde plura superius à nobis dicta de illo Isaiæ textu huc faciliè transferri possunt. Præterea verò sit istud argumentum: Ille tanquàm vas et sponsor noster debitum quod peccatis nostris contraximus moriendo in cruce exsolvit, *qui peccata nostra ipse pertulit in corpore suo super lignum, ut peccatis mortui justitiæ vivamus, et cujus livore sanati sumus*. Atqui Christus peccata nostra, etc.; ergo, etc. Minor propositio ipso sancti Petri testimonio continetur. Major autem facilis est probatu. 1° Enim quid illud sonat nos *livore* Christi in cruce mortui *esse sanatos*, nisi nos efficaciam et virtute passionum et mortis ejus justificatos fuisse et à pœnis quæ iniquitatibus debentur liberatos? 2° Hæc verba: *Christus peccata nostra ipse pertulit in corpore suo super lignum ut peccatis mortui justitiæ vivamus*, possuntne alio sensu explicari quàm de doloribus quos Christus *in corpore suo* passus est, et de morte quam subiit ut justitiæ divinæ pro nobis satisfaceret? 3° Vel præclarum illud sancti Petri testimonium, vi et efficaciam mortis Christi nos à peccatis sanatos, et à pœnis propter illa debitis solutos esse demonstrat, vel id unum eo exprimitur, ut Socinianis placet, Christum scilicet, cùm mortuus est, à Deo postulâsse ut gratis peccata condonaret, atque hominibus viam ostendisse quâ peccata sua delere possent; atqui meram gratuitæ condonationis impetrationem, aut doctrinæ salutiferæ confirmationem, vel patientiæ exempla, sanctus Petrus allatis verbis non designat. Quis enim sapienter dixerit intercessorem qui moriens veniam pro aliquo gratis et citra meritum mortis suæ impetrat, in corpore suo morte suâ perferre illius hominis delicta et livore suo illum sanare? quis meram viæ salutis ostensionem verbis ejusmodi solùm designari putaverit? Certè S. Stephanus, Act. 7, v. 59, pro suis persecutoribus quorum tunc S. Paulus unus erat, rogavit, iisque morte suâ exemplum fortitudinis dedit et viam salutis ostendit. Num idcirco is sanctus martyr à quoquam sapiente dicetur in corpore suo peccata Pauli martyrio pertulisse, ut Paulus peccatis mortuus justitiæ viveret? numquid livoribus Stephani Paulus sanatus prædicabitur? 4° Loco vocis *pertulit*, in græco habetur ἀνέχεσθαι, quod à composito ἀναδέχεσθαι *sursùm ferre* oritur, et significat *sursùm tulit*. Ex quo colligere est ibi sanctum Petrum ad ritum oblationis victima-

rum quæ in arâ offerebantur respexisse; ut nempe disertè exprimeret Christum peccatis nostris onustum instar victimæ ad ea expianda in cruce oblatum et exaltatum fuisse. 5° Falsum est quod ut hujusce testimonii vim elevent, fingunt Sociniani, nempe ἀνένεγκεν, reddi posse per *abstulit*. Inprimis enim repugnat adverbium ἀνα, quod *supra*, *sursum* constanter significat, nunquàm præpositione à redditur. Deinde repugnat usus; quippe ἀναφέρειν pro *auferre* nemo græcus scriptor usurpavit. In novo Testamento illa vox idem est ac *sursum ferre*, Luc. 17, 24, v. 51, vel idem ac *sursum ducere*, Matth. 17, v. 1, Marc. 9, v. 2, adhibetur etiam de victimis, Hebr. 7, v. 27, et Jacobi 11, v. 22, quia scilicet victimæ in locum superiorem, nempe in altare afferebantur. Hinc ad Christum ipsum in cruce exaltatum, Hebr. 7, v. 27, et ad nos ipsos quatenus laudis seu spiritualia sacrificia sumus, Hebr. 13, v. 15, et 1 Petr. 11, v. 24, applicatur et transfertur. Socinus lib. 2, cap. 6, contendit vocem hanc pro *auferre* usurpari Hebr. 9, v. 28, ubi Christus dicitur mortuus *ad multorum exhaurienda peccata*, Græcè ἀνενεγκεῖν ἀμαρτίας. Sed ibi expressa sententia significationem verbi ἀναφέρειν ab etymologiâ et ab usu adeò alienam nullo pacto exigit. Opponit Apostolus secundum Christi adventum priori, in eoque discrimen utriusque constituit, quòd Christus in secundo venturus sit χωρὶς ἀμαρτίας. *sine peccato*, seu peccatis non gravatus, dum in primo venerat *ad multorum ἀνενεγκεῖν ἀμαρτίας*. Hoc posterius si veritas cum Socinianis *ad multorum auferenda peccata*, jam nulla erit oppositio seu antithesis; ergo græca de verbo ad verbum vertenda sunt, *ad multorum peccata sursum ferenda super crucem*, ut apud S. Petrum, vel simpliciter *ad multorum peccata perferenda*, seu *ad pœnas peccatorum tolerandas*; siquidem ἀναφέρειν aliquando *perpeti* et *tolerare* apud profanos significat. Cæterùm, cùm Christus sese onustum peccatis nostris super crucem litando, ea reverà exhausserit, vituperanda non est versio Vulgata, quòd in eâ legatur, *ad multorum exhaurienda peccata*. 6° Cùm in textu allato S. Petrus de summâ Christi patientiâ quam in exemplum fidelibus proponit, solummodò disserat, patientia autem in ferendo et sustinendo, non in auferendo sita sit; sequitur vocem græcam de quâ disputamus, etsi absolute posset sumi pro *auferre*, hâc tamen in laudato versiculo significatione non esse accipiendam. 7° Sed demus ibi legi posse Christum peccata nostra abstulisse seu delevisse in

corpore suo super lignum, et livore suo nos sanâsse, numquid idcirco omni efficacîâ ad probandam nostram thesim destituetur ille locus? certè quidem qui in corpore seu per corpus suum et livoribus suis, moriendo in cruce aufert seu delet peccata aliena, is censendus est iis onustus fuisse, et pro iis pœnas exsolvisse; ergo, etc.

2° *Christus dato sanguinis sui pretio homines redemit et servavit, iisque salutis media promeruit et acquisivit.* — Christum dici sæpissimè in Scripturis sacris salvatorem hominum Sociniani non diffitentur; eum verò hoc sensu servatorem et redemptorem esse, quòd seipsum offerendo et sanguinis sui persoluto pretio, nos à morte æternâ, cui propter peccata obnoxii eramus, redemerit et liberavit, hæc testimonia evincunt. Matth. 20, v. 28: *Filius hominis... venit dare animam suam redemptionem* (Græcè λύτρον *pretium redemptionis*) *pro multis*. Idem legitur Marc. 10, v. 45. Joan. 6, v. 52: *Panis quem ego dabo, caro mea est pro mundi vitâ*. Act. 20, v. 28: *Quam* (Ecclesiam) *acquisivit* (Christus) *sanguine suo*. Rom. 3, v. 24: *Justificati gratis per gratiam ipsius per redemptionem* (græcè διὰ τῆς ἀπολυτρώσεως) *quæ est in Christo Jesu, quem proposuit Deus propitiationem per fidem in sanguine ejus ad ostensionem justitiæ suæ, propter remissionem præcedentium delictorum, in sustentatione Dei, ad ostensionem justitiæ suæ*. 1 Cor. 6, v. 20: *Empti estis pretio magno*. Galat. 2, v. 20: *Dilexit me et tradidit semetipsum pro me*. Ephes. 1, v. 7: *In quo habemus redemptionem* (græcè τὴν ἀπολυτρώσιν) *per sanguinem ejus, remissionem peccatorum, secundum divitias gratiæ ejus*. 1 ad Tim. 2, v. 6: *Qui dedit redemptionem* (græcè ἀντίλυτρον *pretium redemptionis*) *semetipsum pro omnibus*. Ad Tit. 2, v. 13 et 14: *Expectantes... adventum gloriæ... Salvatoris nostri Jesu Christi qui dedit semetipsum pro nobis, ut nos redimeret* (græcè λυτρώσεται) *ab omni iniquitate, et mundaret sibi populum acceptabilem*. Heb. 9, v. 15: *Novi Testamenti mediator est, ut morte intercedente in redemptionem* (græcè ἀπολυτρώσιν) *earum prævaricationum, quæ erant sub priori testamento, repromissionem accipiant, qui vocati sunt, æternæ hæreditatis*. 1 Petri 1, v. 18: *Non corruptilibus auro aut argento redempti estis* (græcè ἐλυτρώθατε) *de vanâ vestrâ conversatione paternæ traditionis; sed pretioso sanguine quasi agni immaculati Christi, et incontaminati*.

Ex his testimoniis sic arguitur: Vel ejus,

modi testimonia evincunt Christum esse salvatorem et redemptorem hominum, eo sensu quòd passione et morte suâ pœnas quibus eramus obnoxii persolverit, sicque justitiæ Dei satisfecerit, vel cum Socinianis tenendum est vocibus, *pretii*, *redemptionis*, etc., in his textibus nullam compensationem designari; atqui voces *pretii*, *redemptionis*, etc., in ejusmodi textibus aliquam compensationem manifestè designant; nempe significant Christum animam suam, vitam suam, seipsum, sanguinem suum obtulisse in compensationem pœnæ quam aliàs Deus peccatori inflicturus fuisset. Etenim, si hæ voces *pretium*, *redemptio*, *redimere*, etc., his in locis propriè accipiantur, fatentur ipsi Sociniani hunc esse ejusmodi testimoniorum sensum; atqui propriè sumendæ sunt. 1° Quia voces græcæ quibus illæ respondent, et quas exhibuimus, vix impropriè et metaphoricè accipi possunt. 2° Quia nulla in his textibus metaphora innuitur, imò tot modis sensus proprius in iis inculcatur, ut metaphoricæ significationes hic fingere nefas sit. Nam in iis dicitur Christum dedisse seipsum, animam seu vitam suam, carnem suam, sanguinem suum, pro nobis, in redemptionem nostrî, in redemptionem nostrorum peccatorum, sicque eum nos acquisivisse, nos emissee, nos redemisse pretio magno, non corruptibilibus auro et argento, sed pretioso sanguine suo. Quis non videt omnes ejusmodi sententias esse totidem loquendi modos sensui proprio redemptionis inculcando, et metaphorico excludendo natos, proindeque, etc. 3° Quia subjecta materia sensum proprium redemptionis hic exigit. Redemptio enim propriè definiri potest, impendium à redimente exhibitum, quo accepto liberator redemptum ab incommodo aliàs ipsi infligendo eximit. Cum ergo Deus nobis propter peccatum esset iratus, ac pœnas de peccato commisso repetere in præsentî rerum ordine statuerit, ut probavimus capite 1 hujus Dissertationis; cùmque præterea humiliationibus, passioni et mortî Christi, utpote Hominis-Dei, ad compensandam injuriam Deo per peccatum illatam et pœnas peccatis debitas expungendas, maximam inesse vim indubitatum sit; nonne proclive est, imò necesse, ut ubi toties et tot diversis modis legimus nos sanguine Christi esse redemptos, id intelligamus propriè, id est, de oblato pro nobis et impenso actionum ac præsertim mortis Christi valore cujus intuitu Deus nos à morte æternâ liberavit, quam aliàs propter peccata nostra inflicturus nobis fuisset?

4° Quia hæc est Scripturæ explicandæ regula generalis ab ipsis Socinianis admissa, non recedendum à sensu proprio verborum, nisi ubi fides, aut mores, aut ratio evidens id postulant. Atqui 1° fides non postulat in locis adductis redemptionem sumi metaphoricè; nulla sunt enim Scripturæ loca in quibus Deus vel minimum innuatur citra omnem compensationem et satisfactionem sibi exhibitam velle condonare peccatum. Contra verò multa sunt quibus ut severissimus ultor et vindex criminum exhibetur. Vide quæ de eâ re diximus supra. 2° Morum regulæ pariter illud non exigunt; imò id mysterii ad peccati fugam maximè confert. Si enim Deus adeò severus sit criminum vindex, ut citra satisfactiones Christi noluerit hominum peccata condonare, quis iram tanti judicis non reformidabit? quis sapiens à salutis viâ quam nobis Christus ostendit, tenendâ refugere poterit? 3° Non ratio evidens; hic enim non agitur de rebus obviis quas ratione scrutari liceat, sed de mysterio altissimo, de viis Dei, teste Apostolo *investigabilibus*, de æternis ejus consiliis, de operibus ad supernaturalem ejus providentiâ attinentibus, proindeque hic habent locum quæcumque Dissertatione I hujus tractatûs cap. 2, art. 3, contra methodum Socinianam demonstravimus. Præterea objectiones quas adversus Christi satisfactionem Sociniani ex ratione depromunt, inferiùs afferemus, atque eas ab omni demonstrationum specie alienas esse ostendemus.

3° *Christus Dei et hominum eo sensu juxta Scripturas mediator est, quòd seipsum offerendo et sanguinis sui effusione iram divinam placaverit eosque Deo reconciliaverit.*—1 Tim. 2, v. 5 et 6: *Unus enim Deus, unus et mediator Dei et hominum, homo Christus Jesus, qui dedit semetipsum redemptionem pro omnibus.* Hebr. 9, v. 15: *Et ideò novi testamenti mediator est, ut morte intercedente in redemptionem earum prævaricationum quæ erant sub priori testamento, remissionem accipiant, qui vocati sunt, æternæ hæreditatis.*

Hebr. 12, v. 24, fideles dicuntur accessisse ad..... testamenti novi mediatorem Jesum, et sanguinis aspersionem meliùs loquentem quàm Abel. Ubi alludens Apostolus ad sanguinem victimarum quo Exod. 24, v. 8, aspersus est populus, significat, ut harumce victimarum sanguine maculæ legales tollebantur, ita peccata nostra Christi sanguine fuisse expiata et extincta.

His in testimoniis Christus nos inter et Deum significatur fuisse mediator quatenùs seipsum offerendo, morte suâ, sanguine suo nos rede-

mit et peccata nostra extinxit et expiavit. Jam alia addenda sunt, in quibus etsi Christus conceptis verbis *mediator* non appelletur, adhuc tamen clariùs dicitur nos morte suâ Deo reconciliâsse, iram Dei placâsse, et inimicitias peccato Deum inter et homines inductas extinxisse. Rom. 3, v. 24 : *Justificati gratis per gratiam ipsius, per redemptionem, quæ est in Christo Jesu, quem proposuit Deus propitiationem* (græcè ἱλαστήριον id est pretium numinis placandi causâ oblatum) *per fidem in sanguine ipsius; ad ostensionem justitiæ suæ propter remissionem præcedentium delictorum*. Ibid. cap. 5, v. 10 : *Cum inimici essemus, reconciliati sumus Deo per mortem filii ejus*. Ephes. 2, v. 13 : *Nunc autem in Christo Jesu, vos qui aliquando eratis longè, facti estis prope in sanguine Christi. Ipse enim est pax nostra, qui fecit utraque unum, et medium parietem maceriæ solvens, inimicitias in carne suâ... ut... reconciliet ambos in uno corpore Deo per crucem, interficiens inimicitias in semetipso... quoniam per ipsum habemus accessum ambo in uno spiritu ad Patrem*. Coloss. 1, v. 19 : *In ipso complacuit omnem plenitudinem inhabitare, et per eum reconciliare omnia in ipsum, pacificans per sanguinem crucis ejus, sive quæ in terris, sive in cælis sunt. Et vos cum essetis aliquando alienati et inimici sensu in operibus malis; nunc autem reconciliavit in corpore carnis ejus per mortem*. 1 Joan. 2, v. 2 : *Et ipse est propitiatio* (græcè ἱλαστήριον, id est, *victima ad placandum Deum*, Num. 5, v. 8, et toto cap. 16 Levitici) *pro peccatis nostris; non pro nostris autem tantum, sed etiam pro totius mundi*.

Itaque cum essemus à Deo abalienati ipsique inimici, Coloss. 1, v. 21, cumque Deus propter peccata nostra, Rom. 1, v. 8, Ephes. 2, v. 3, Galat. 3, v. 19, et aliis in locis suprâ laudatis, nobis esset infensus et iratus, Christus ab eo constitutus est illum inter et nos mediator, qui pœnas à nobis debitas in se susciperet, atque oblatione sanguinis sui inimicitias extinguere, nosque ipsi reconciliaret. Unde factum, sicut alibi jam notatum est, ut Deus condonando nobis delicta nostra, justitiam suam simul et misericordiam summâ ratione expresserit; misericordiam quidem, Filium suum unigenitum mediatorem nostrum et redemptorem constituendo; justitiam verò, ab eo repetendo satisfactionem cui impendendæ eramus impares; ergo, etc.

4° Christus sacerdos simul et victima se in hostiam piacularem pro nobis, seu loco nostro, neci fruentæ objecit. — Duo in idem ferè recidentia

sigillatim hîc probanda veniunt. Primum est, Christum eo sensu in Scripturis dici mortuum pro nobis, quòd ad satisfaciendum Deo, loco nostro mortem oppetierit. Alterum est, eundem pro nobis moriendo, sacerdotis simul et victimæ egisse vices, seseque in hostiam piacularem pro peccatis obtulisse. Quo rursùm conficitur eum loco nostro esse passum et mortuum.

Prius autem testimonia ista demonstrant. Matth. 26, v. 28 : *Hic est sanguis meus novi testamenti, qui pro multis effundetur in remissionem peccatorum*. Rom. 3, v. 25 : *Quem (Christum) proposuit Deus propitiationem... in sanguine ipsius... propter remissionem præcedentium delictorum*. Ibid. 5, versu 6 : *Vix pro justo quis moritur... commendat autem charitatem suam Deus in nobis, quoniam cum adhuc peccatores essemus, secundum tempus Christus pro nobis mortuus est*. Ibid. 8, v. 32 : *Proprio Filio suo non pepercit, sed pro nobis omnibus tradidit illum*. 1 Cor. 1, v. 13 : *Numquid Paulus crucifixus est pro vobis, aut in nomine Pauli baptizati estis?* 2 Cor. 5, v. 14 : *Unus pro omnibus mortuus est*. Gal. 3, v. 13 : *Christus nos redemit de maledicto legis, factus pro nobis maledictum; moriendo nempe in arâ crucis*. Eph. 1, v. 7 : *In quo habemus redemptionem per sanguinem ejus*. Coloss. 3, v. 13 : *Et vos, cum mortui essetis in delictis... convivificavit cum illo donans vobis omnia delicta, delens quod adversum nos erat chirographum decreti, quod erat contrarium nobis, et ipsum tulit de medio, affigens illud cruci*. 1 Tim. 2, v. 15 : *Qui dedit semetipsum redemptionem pro omnibus*. Hebr. 2, v. 9 : *Ut gratiâ Dei pro omnibus gustaret mortem*. Ibid. 9, v. 15 : *Et ideò novi testamenti mediator est, ut morte intercedente in redemptionem earum prævaricationum quæ erant sub priori testamento, repromissionem accipiant, qui vocati sunt, æternæ hæreditatis*. 1 Petri 3, v. 18 : *Christus semel pro peccatis nostris mortuus est, justus pro injustis, ut nos offerret Deo*. 1 Joan. 2, v. 2, dicitur *propitiatio pro peccatis... totius mundi*; et Apocal. 13, v. 8 : *Agnus qui occisus est ab origine mundi*.

His in testimoniis Christus dicitur 1° justus mortuus pro injustis, mortuus pro nobis qui eramus peccatores et in remissionem peccatorum, pro nobis à Patre neci traditus; dicitur 2° unus pro nobis mortuus, adeò ut alter pro nobis mortuus dici non possit; 3° dicitur factus cruce suâ pro nobis maledictum; 4° dicitur seipsum pro nobis redemptionem dedisse, 5° dicitur decretum mortis nobis contrarium

delevisse, illudque de medio tulisse et cruci affixisse; 6° denique dicitur morte suâ intercessisse in redemptionem prævaricationum quæ erant sub priori testamento, fuisse propitiatio pro peccatis totius mundi, atque idcirco nuncupatur agnus occisus ab origine mundi. Atqui hæc evincunt Christum esse mortuum loco nostro, seu ut pœnas ab hominibus propter peccata sua debitas morte suâ lueret, et justitiæ divinæ satisfaceret. Enimvero 1°, in his locutionibus, Christus pro nobis qui eramus peccatores mortuus est, justus pro injustis, Pater ipsi non pepercit, sed pro nobis omnibus tradidit illum, præpositio, *pro*, in græco fonte ὑπὲρ, substitutionem apertè significat. Fatendum quidem voces ejusmodi aliquando ad causam finalem aut motivam exprimendam transferri, tuncque idem sonare ac *propter* (1); sed id solùm contingit ubi subjecta materia, aut quæ adjunguntur, omnes substitutionis ideam excludunt; ut, v. g., cum Christus allato versiculo 18 capitis 3 Epist. primæ S. Petri dicitur *mortuus pro peccatis nostris*. Per se verò hæc vocabula juxta usum receptissimum, cùm de personis agitur, substitutioni plerumque exprimendæ nata sunt. Jam porrò materia subjecta et aliaquæ adjiciuntur, non modò è locis de quibus quæstio est, substitutionem non excludunt, sed potiùs hanc in iis intelligi necessariò postulant. Et quidem subjecta materia; nam non tantùm agitur de personis in quibus subrogationi locus esse possit; sed agitur de peccatoribus pœnæ obnoxiiis, Deo in eos irato reconciliandis, pro quibus Christus neci eorum criminibus expiandis sufficienti dicitur à Patre traditus; quis non videt his Christum exprimi subrogatum peccatorum loco, ut pœnas quas aliàs tulissent, ferret ipse, ac injuriam per eos Deo illatam, *factus obediens usque ad mortem, mortem autem crucis*, compensaret? Adjuncta autem idem etiam indicant; nam cùm S. Paulus ait *Patrem proprio Filio suo non pepercisse, sed pro nobis omnibus illum tradidisse*; nonne apertè ostendit Patrem divinum cum Christo Filio suo idcirco severè egisse, quòd peccatis nostris esset onustus, et propter eandem causam eum morti pro nobis seu loco nostro, ut liberaremur, tradidisse? ergo. 2° Christus unus non esset mortuus pro nobis, si has voces *pro nobis*, interpretaremur tantùm ad utilitatem nostram, nempe ad præ-

bendum nobis exemplum, ad confirmandam salutarem suam doctrinam, etc. Namque hoc sensu pro nobis Paulus crucifixus est, omnesque Apostoli et martyres mortui sunt. 3° Qui ita mortuus est pro nobis ut cruce suâ factus sit pro nobis maledictum, ut in remissionem peccatorum sanguinem suum fuderit, ut decretum mortis in nos latum abstulerit et cruci affligerit, ut seipsum redemptionem pro nobis dederit, numquid mortuus est solùm ad præbendum exemplum et doctrinam peccatoribus salubrem confirmandam? Nonne potiùs dicendus est, loco nostro, ut nostra delicta lueret et expiaret, nobisque veniam obtineret, mortem subiisse? ergo. 4° Christus morte suâ nobis quidem exemplum præbuit, ac doctrinam suam confirmavit, sed si eâ tantùm ratione mors ejus hominibus profuisset, nullo pacto potuisset morti ejus adscribi remissio *præcedentium delictorum quæ erant sub veteri testamento*, non propterea dici posset *propitiatio pro peccatis totius mundi*, neque *agnus ab origine mundi occisus*; ergo non mortuus est tantùm pro nobis eo sensu quòd miranda virtutis exempla nobis dederit, et doctrinam suam confirmaverit; sed reverà, ut justitiæ divinæ loco nostro satisfaceret, necem cruentam tulit. Jam verò quod ad alterum attinet, nempe Christum spontè pro nobis mortem sustinuisse, sacerdotem et victimam moriendo egisse, Deoque in hostiam piacularem sese obtulisse; atque ex his rursùm confici eum, ut injuriam Deo per peccatum illatam compensaret, loco nostro esse mortuum; illud multis etiam Scripturæ locis manifestè adstruitur. 1° Spontè pro nobis mortem sustinuit, Isaïæ 53, v. 7: *Oblatus est quia ipse voluit*; et versu 10: *Si posuerit pro peccato animam suam*. Joan. 10, v. 15 et 18: *Animam meam pono pro ovibus meis...* Nemo tollit eam à me, sed ego pono eam à meipso, et potestatem habeo ponendi eam. Hebr. 9, v. 14 et alibi dicitur *semetipsum obtulisse*; et cap. 10, v. 5, 6 et 7: *Ingrediens (Christus) mundum dicit: Hostiam et oblationem noluit, corpus autem aptasti mihi; holocaustomata pro peccato non tibi placuerunt. Tunc dixi: Ecce venio... ut faciam, Deus, voluntatem tuam*. 2° Sacerdotis et victimæ vices moriendo egit. Ephes. 5, v. 2: *Christus dilexit nos et tradidit semetipsum pro nobis oblationem et hostiam Deo in odorem suavitatis*. Hebr. 5, v. 1, 5, 7, 9, 10: *Omnis pontifex ex hominibus assumptus pro hominibus constituitur in iis quæ sunt ad Deum, ut offerat dona et sacrificia pro peccatis...* Christus

(1) Rom. 4, v. 15; Galat. 1, v. 4; Coloss. 1, v. 24; 1 Joan. 3, v. 16, etc.

non semetipsum clarificavit ut pontifex fieret... qui in diebus carnis suæ, preces supplicationesque ad eum qui possit illum salvum facere à morte cum clamore valido et lacrymis offerens, exauditus est pro suâ reverentiâ... et consummatus factus est omnibus obtemperantibus sibi, causâ salutis æternæ, appellatus à Deo pontifex juxta ordinem Melchisedech. Hic Christo morienti munia sacerdotis et victimæ attribuuntur. Ibid. 7, v. 26 et 27 : *Talis enim decebat ut nobis esset pontifex... qui non habet necessitatem quotidie, quemadmodum sacerdotes, prius pro suis delictis hostias offerre, deinde pro populi. Hoc enim semel fecit seipsum offerendo.* Observa oblationem suâ quam semel tantum Christus perfecit, non posse accipi nisi de ejus oblatione in arâ crucis. Nam oblatio incruenta quâ sese Christus in cœlis litat, ad quam Sociniani hæc verba referre vellent, jugis est et perpetua ipsismet fatentibus. Ibid. 9, v. 24, 25, 26, 28 : *Non in manufacta sancta Jesus introivit, exemplaria verorum; sed in ipsum cœlum, ut appareat nunc vultui Dei pro nobis; neque ut sæpè offerat semetipsum, quemadmodum pontifex intrat in sancta per singulos annos in sanguine alieno; alioquin oportebat eum frequenter pati ab origine mundi; nunc autem semel in consummatione seculorum, ad destitutionem peccati, per hostiam suam apparuit... Christus semel oblatus est ad multorum exhaurienda peccata.* Hic iterum oblatio suâ quâ Christus peccata nostra extinxit, semel tantum facta prædicatur, et in ejus passione et morte constitisse significatur. Ibid. cap. 10, postquam observavit S. Paulus vetera sacrificia fuisse eadem indesinenter oblata, quia erant umbra futurorum bonorum, nec poterant accedentes perfectos facere, seu mundare; quippe cum impossibile sit sanguine taurorum et hircorum auferri peccata; continenter subjicit, v. 5 : *Ideo (Christus) ingrediens mundum dicit: Hostiam et oblationem noluisti; corpus autem aptasti mihi; holocausta pro peccato non tibi placuerunt. Tunc dixi: Ecce venio... ut faciam, Deus, voluntatem tuam.* Quæ interpretans Apostolus : *In quâ voluntate, inquit v. 10, sanctificati sumus per oblationem corporis Jesu Christi semel. Et omnis quidem sacerdos præsto est quotidie ministrans, et easdem sæpè offerens hostias, quæ nunquam possunt auferre peccata. Hic autem unam pro peccatis offerens hostiam, in sempiternum sedet in dexterâ Dei... unâ enim oblatione consummavit in sempiternum sanctificatos; et v. 19, sic concludit: Habentes itaque, fratres, fiduciam in introitu sanctorum in sanguine Chri-*

sti... accedamus cum vero corde in plenitudine fidei, etc. Non poterat clariùs exprimi Christum sese obtulisse in victimam ut nos à peccatis liberaret, hancque oblationem ejus semel tantum ab ipso peractam, in mactatione corporis ipsius, seu in sanguinis ejus effusione fuisse constitutam; ergo, etc.

Unum duntaxat reponunt Sociniani, hæc videlicet testimonia in quibus Christus sacerdos et pontifex dicitur, esse intelligenda tantum de eo prout in cœlis existit. Quod probare conantur 1º, quia Heb. 2, v. 17, 18, et cap. 4, v. 15, Christus dicitur tentatus, passus, etc., *ut misericors fieret et fidelis pontifex.* Ergo, inquiunt, factus non est pontifex nisi post passionem et mortem; 2º quia Heb. 8, v. 4, sic Apostolus loquitur : *Si ergo esset super terram (Christus), nec esset sacerdos.* Ergo, inquiunt, antequam in cœlum ascenderet, sacerdos non fuit; 3º quia allato vers. 26, cap. 7 Epist. ad Hebr. ita habetur : *Talis decebat, ut nobis esset pontifex.... excelsior cœlis factus;* 4º quia Christus *sempiternum habet sacerdotium*, et sese in cœlis jugiter reverà Deo offert, *semper vivens ad interpellandum pro nobis*, Hebr. 7, v. 24 et 25. Verum ista levissima sunt. Et ut à postremo incipiam, æternum quidem est sacerdotium Christi, ipse in cœlis sese indesinenter Patri offert, semperque vivit ad interpellandum pro nobis; sed inde non sequitur eum pontificem non fuisse dum in terris degeret. Contra ex locis allatis manifestissimè liquet eum unâ suâ oblatione quæ in arâ crucis consummata est; pro nobis satisfecisse, et pretium nobis redimendis et salvandis sufficiens contulisse; adeò ut jugi intercessionem Christi in cœlis, sacrificium crucis non compleatur et perficiatur, sed tantum fructus ejus applicetur.

Locis autem primo loco objectis non determinat Apostolus quandonam Christus pontifex esse cœperit, sed tantum ejus dotes, passionem et tentationes memorat, ut nostram erga ipsum fiduciam excitet.

Non absimili ratione explicandum testimonium, quod tertio loco à Socinianis allatum fuit. Cum enim Apostolus ait : *Talis decebat ut nobis esset pontifex, sanctus, innocens, etc., excelsior cœlis factus;* docet quidem excelsiorem cœlis factum fuisse Christum pontificem, sed non ait eum tunc solum cœpisse esse pontificem cum excelsior cœlis factus est. Imò contra, versu sequenti perspicue significat ipsum in terris fuisse sacerdotem, dum scilicet expressè

tradit ad delicta populi expianda satis fuisse ut *semel* offerret *seipsum*. Quo de sacrificio in arâ crucis oblato duntaxat intelligi posse jam observavimus.

Denique versiculus 4 capitis 8 Epist. ad Hebræos, nihil ad rem attinet. Ibi Apostolus significat sacerdotium Christi non esse simile Levitico quo figurabatur, sed eo longè esse excellentius, adeò ut 1^o non in oblatione munierum secundum legem repositum fuerit, sed in oblatione sui ipsius; adeò ut 2^o post oblationem sui in arâ crucis, *non in manufacta sancta Jesus introierit*, quemadmodum sacerdotes Levitici generis qui mactatâ in atrio victimâ, sacrarium ingrediebantur pro populo intercessuri; sed *in ipsum cælum* quod sancta adumbrabant se receperit, *ut appareat nunc vultui Dei pro nobis*. Verba sunt ipsius Apostoli id mysterii capite 9 Epist. ejusdem ad Heb. v. 24, exponentis; qui et ibidem, v. 25 et 26, aliud sacerdotii Christi à Levitico discrimen explicat, quo, ut jam observavimus, res planè conficitur: *Neque inquit, (necesse est) ut sæpè offerat semetipsum, quemadmodum pontifex intrat in Sancta per singulos annos in sanguine alieno; alioquin oportebat eum frequenter pati ab origine mundi; nunc autem semel in consummatione seculorum, ad destitutionem peccati, per hostiam suam apparuit.... Christus semel oblatus est ad multorum exhaurienda peccata*. En igitur S. Pauli doctrina: Christus, non secundum ordinem leviticum, sed secundum ordinem Melchisedech in æternum sacerdos, cujus sacrificium et sacerdotium, sacrificiis et sacerdotio levitico adumbrata sunt, non opus habuit ut sese in victimam pro nobis sæpè offerret; peccatis expiandis et placando numini suffecit unica tantæ hostiæ oblatio. Postquàm verò in arâ crucis velut in atrio sese mactavit Christus, non in manufacta sancta, sed in cælum introire debuit, ut Deo se sisteret, et vultui ejus pro nobis appareret. Proindeque ut dicitur loco objecto, *si esset super terram, non esset sacerdos*; id est, nisi ascendisset in cælum, non posset ipsi sacerdotium attribui; non quòd in terris degens sacerdos non fuerit, sed quia, cùm non esset ex sacerdotibus *qui offerebant secundum legem munera*, sed ad alterum ordinem longè præcellentiore, seu potius unicum et supremum attineret, non decuisset eum in manufacta sancta pro nobis intercessurum introire; sed in ipsum cælum, post cruentam sui immolationem, redivivus ingredi debuit, ut munia Pontificis exercere pergeret. Illud igitur firmum

manet et inconcussum quod demonstravimus, nempe Christum sacerdotis et victimæ vices morti se objiciendo sustinuisse.

3^o Christus moriendo se in hostiam piacularem obtulit. Id manifestum est ex locis modò allatis in quibus Christus dicitur oblatio, et hostia, pro peccatis; nam hostia piacularis ea est quæ pro peccatis expiandis offertur. Idem probant multa testimonia in quibus Christus cum piacularibus veteris Testamenti victimis confertur, in eoque ab iis differre significatur, quòd unâ sui oblatione et sanguinis sui virtute peccata deleverit et aboleverit; vetera autem sacrificia haberent tantum vim adumbrandi sacrificii veri à Christo offerendi, per se verò ad peccata auferenda nullam haberent efficaciam. *Umbram habens lex futurorum bonorum*, inquit Apostolus, Hebr. 10, v. 4... *per singulos annos eisdem ipsis hostiis quas offerunt indesinenter; nunquàm potest accedentes perfectos facere... Impossibile est enim sanguine taurorum et hircorum auferri peccata. Ideò ingrediens (Christus) mundum dicit: Hostiam et oblationem nolui, corpus autem aptasti mihi; holocausta pro peccato non tibi placuerunt; tunc dixi: Ecce venio... ut faciam Deus voluntatem tuam.... in quâ voluntate sanctificati sumus per oblationem corporis Jesu Christi semel... Unâ enim oblatione consummavit in sempiternum sanctificatos*. Vide etiam cap. 9 ejusdem Epistolæ v. 12, 14, 15, 22, 23. Præterea huc recurrit jam allatus Isaïæ 53 versiculus 10: *Si posuerit (Christus) pro peccato animam suam, videbit semen longævum*. Jam notavimus Hebræa ad litteram habere: *Si posuerit peccatum*, id est, *victimam pro peccato animam suam*. Denique Christus, Joan. 1, v. 29, dicitur *Agnus Dei... qui tollit peccatum mundi*; Petri 1, v. 18: *Agnus immaculatus, cujus pretioso sanguine sumus redempti*; Apocalyps. 5, v. 12: *Agnus occisus ab origine mundi*. Ex quibus manifestum est, non ideo tantum nomine Agni Christum sæpè in Scripturis designari, quòd patientiâ, innocentia et humilitate maximè claruerit, sed etiam quia agni sub veteri lege in victimas piaculares pro peccato offerri sæpè soliti, sacrificii ab ipso in cruce offerendi totidem erant figuræ et imagines; ergo.

4^o Ex eo quòd Christus, sacerdos simul et victima, seipsum pro peccatis nostris in hostiam piacularem obtulerit, rursum planè conficitur ipsum loco nostro esse mortuum ut Deo satisfaceret. Enimverò per se evidentissimum est, victimam Deo ita gratam ut ejus oblatione

et sanguine peccata nostra deleta et extincta fuerint, victimam, quā Deo nobis antea irato reconciliati sumus, poenis quæ à nobis propter crimina nostra repeti potuissent, supplevisse, atque injuriam quam supremo Numini peccando intuleramus, voluntariis suis humiliatibus et obedientiæ actibus compensasse. Deinde victimæ quæ propter peccata expianda, et ad iram numinis placandam olim offerebantur, apud omnes gentes, præsertim verò juxta legem Mosaicam, spectabantur ut loco hominum reorum mactatæ. Hinc Levit. 17, v. 11: *Anima carnis in sanguine est*, ait Deus, *et ego dedi illum vobis, ut super altare in eo expietis pro animabus vestris, et sanguis pro animæ piaculo sit*. Hinc antequàm sanguis victimæ pro peccatis oblatae funderetur, nocentes super eam manus imponebant; tum peccata sua supra caput ejus confitebantur, eamque diris deprecationibus prosequabantur et deligebant. Vide Levit. cap. 4, v. 4 et 15, cap. 16, v. 21, cap. 17, v. 11. Hinc denique victimæ piaculares dicuntur in Scripturis portasse poenam peccatis debitam, Levit. cap. 11, v. 22, imò et peccata, ibid. cap. 5, v. 6, 7, 15, etc., ergo, etc.

Hactenus ex Scripturis demonstravimus Christum pro nobis verè et propriè satisfecisse. Probatur 2º idipsum ex sanctis Patribus. Laudantur in hanc rem à Grotio ad calcem libri quem inscripsit: *Defensionem fidei Catholicæ de veritate satisfactionis Christi adversus Socinum*, multa sanctorum Patrum testimonia, nempe S. Irenæi, Tertulliani, Origenis, S. Cypriani, Lactantii, Eusebii Cæsariensis, Antonii eremitæ, Macharii Hierosolymitani, S. Athanasii, S. Hilarii, S. Optati Milev. Victoris Antioch. S. Cyrilli Hierosolym. S. Basilii, S. Gregorii utriusque, S. Ambrosii, S. Epiphani, Andreæ Cæsariensis, Prudentii, S. Chrysostomi, S. Hieronymi, S. Augustini, S. Cyrilli Alexandrini, Theodoret, S. Procli Constantinopolitani, S. Leonis, S. Gregorii magni et aliorum plurimorum, quibus S. Justinum martyrem in Dialogo cum Triphone Judæo, et alios adhuc adjicere faciliè potuisset; quorum testimonia exscribere nihil necesse habemus. Quippe hanc testium nubem sibi adversari Crellius in præfatione Responsionis suæ ad Grotium cæterique Sociniani non dilitentur. Sed eorum auctoritatem quibusdam tricis, atque aliquot ipsorum notando nævos conantur elevare; ab iisque ad Christum et Apostolos provocare non dubitant. Verùm, præterquàm quòd veritas sa-

tisfactionis Christi disertis ejus et Apostolorum testimoniis adstruitur; 1º nonne evidentissimè liquet doctrinam tanti momenti quam ab omni Ecclesiâ semper et ubique creditam fuisse tot testimonia evincunt; quamque ad usque Socini tempora nemo etiam hæreticus impugnaverit, nonnisi à Christo ipso et ab Apostolis oriri et derivari potuisse? 2º Cùm à tot omnium ætatum scriptoribus et doctoribus Ecclesiæ ad Christum et Apostolos Sociniani appellant, necessariò ponunt omnes Christianos vel ipso Ecclesiæ initio, in re tantâ et adeò gravi, à fide quam Christus et Apostoli tradiderant illicò defecisse, et in eâ defectione usque ad Socinum omnes constanter et unanimiter perseverasse. Atqui, ne ejusmodi nota omnium ætatum Christianis inuratur, ratio et pietas perinde vetant; ergo. 3º Universi Ecclesiæ doctores summo consensu dogma satisfactionis Christi singuli seculis non aliâ de causâ tradiderunt, nisi quia illud in verbo Dei judicârunt esse contentum. Quis autem interpretationem verborum Christi et Apostolorum à tot sanctis et doctis Patribus nobis transmissam, nuperis et contortis Socinianorum explicationibus faciliè non anteposuerit?

At, inquit Crellius, loco citato, Origenes censuit Christum, ut nos à captivitate diaboli liberaret, ipsi persolvere pretium sanguinis sui; quod etiam Ambrosius et Augustinus, duo Ecclesiæ latinæ lumina docuerunt, ut advertit Socinus; atqui ab hac doctrinâ nemo Christianus hodiè non abhorret; ergo, etc.

Dist. Censuit Origenes Christum dæmoni persolvere pretium sanguinis sui, id est se permisisse à dæmone necari, seu sese tradidisse nocentium manibus, qui dæmone instigante eum occiderunt, concedo; dæmoni persolvere seu obtulisse pretium sanguinis sui, ipsique litasse, nego. Etsi in pluribus erraverit Origenes, is tamen non fuit qui Christum diabolo litasse, et sanguinis sui pretium obtulisse doceret, atque ab ejus doctrinâ hanc absurdam impietatem penitus esse alienam patet tum ex iis quæ de falsorum deorum cultu adversus gentiles passim tradit, tum etiam ex locis in quibus de Christo redemptore disserit. Vide Homiliam ejus tertiam in Levitic., Homiliam 4 in Numeros et in Matth. cap. 16 Tract. 2. Cùm igitur in Epistolam ad Roman. docet à dæmone ejus eramus servi *poscitum esse pretium nostrum sanguinem Christi*, illudque à Christo fuisse persolutum, intelligendus est secundùm analo-

giam fidei eo sensu quòd à dæmone, id est, ab impiis dæmonis impulsu agentibus se Christus occidi permiserit, ut nos à captivitate liberaret. Tradunt etiam SS. Ambrosius et Augustinus eandem doctrinam de nece Christo à Judæis dæmone impellente illatâ; quæ doctrina Scripturis planè consentit. Cæterùm ambo fidem satisfactionis Christi multis in locis disertissimè exprimunt, nusquàm vero duriora Origenis verba eâ de re adhibent. Addit Crellius tam licere Socinianis auctoritatem veterum de veritate satisfactionis Christi posthabere quàm Patribus Nicænis Filii consubstantialitatem definire licuit, etsi trium priorum seculorum doctores huic dogmati penitus adversarentur. Sed fallitur Crellius dùm pro certo ponit Patres Ante-Nicænos æternitati et consubstantialitati Verbi divini repugnare; qui contra sacro huic dogmati manifestissimè suffragantur. De quo argumento consule eruditum Bullum, in Defensione fidei Nicænæ.

Probatur 3^o rationibus theologicis. Prima est, Christum juxta Socinianos, etsi cæteris creaturis longè præstet, esse tamen puram creaturam, merum hominem, qui eatenus tantùm morte suâ nos redemit, et salvavit, quatenus doctrinam, salutarem, quam prædicârat, morte suâ confirmavit, nobisque eximiarum virtutum moriendo exempla præbuit. Atqui, si res ita se haberet, certè Prophetæ, Apostoli, martyres qui pro fide tuendâ mortem oppetierunt, dicendi essent verè et propriè, id est eodem sensu, licet non ita præcellenter, pro nobis redimendis, justificandis et salvandis, mortui. Quare igitur neque in veteri, neque in novo Testamento, neque apud ullos veteres, redemptio, justificatio, et salus nostra unquàm ejusmodi sanctorum morti attribuitur? Quare Apostolus expressè docet *unum pro omnibus mortuum* esse Christum, et neque Paulum, neque alium quemlibet pro fidelibus *crucifixum* esse? ergo.

Secunda est, Christum omnibus vitæ suæ mortalis actionibus mira virtutum exempla præbuisse eundemque tum innumeris à se editis prodigiis, tum maximè resurrectione suâ, tum etiam Apostolorum suorum miraculis et felici eorum prædicationis exitu doctrinam quam tradidit ampliùs confirmâsse fidemque ac spem nostram magis quàm morte suâ consolidâsse. Quæ quidem ejus mors si ad satisfaciendum pro nobis, et auxilia salutis nobis promerenda, impensa non fuisset, per se profectò ad salutem nostram non ita conduxisset, ut ipsi soli nostra

salus in Scripturis perpetuò adscriberetur. Atqui tamen Scripturæ sacræ nos sanguine et morte Christi redemptos, mundatos et salvatos esse perpetuò inculcant; ergo, etc.

Frustra reponunt Sociniani (1) « Qui mortem subit et acerbissimam et maximè infamem, ejus doctrinæ causâ, quam nisi verissima esset, falsissimam esse planè sciret, nec ullam vacillantis animi aut sententiæ dat significationem, ubi maxima foret occasio, vel necessitas potiùs, is morte suâ doctrinam illam validè adstruit, eamque verissimam esse ostendit. At Christus illud præstitit; unde, » etc. Nam 1^o ibi nihil dicitur de Christo quod proportionem quâdam servatâ in Socinianorum sententiâ de pluribus Prophetis, Apostolis et martyribus, in odium fidei quam prædicabant interemptis, jure dici non debeat. Proindeque prior à nobis allata ratio theologica hâc responsione non infirmatur. 2^o Libenter concedimus Christum, dùm inter homines conversatus est, ita se sapientem præbuisse, atque tantâ constantiâ et fortitudine passionem et mortem sustinuisse, ut inde non parùm roboris ad ejus confirmandam doctrinam accedat. Sed tamen ejusmodi argumento solitariè sumpto majorem ad veritates fidei christianæ persuadendas virtutem et efficaciam attribuere quàm miraculis Christi et Apostolorum, quàm præsertim ejus resurrectioni toties in testimonium Evangelii ab Apostolis allatæ; præterea, de ejusmodi ad probandum virtute quæ morti Christi inesse ponitur, velle Scripturas sanguini ejus in solidum, redemptionem, justificationem et salutem nostram adscribentes explicari; hæc sanè absolum planè paradoxum continent, quod Socini, Crellii et aliorum ejusmodi hominum subtilitas et captiones nemini prudenti et cordato unquàm in animum inducere poterunt.

Tertia ratio est, Socinianos, ut explicent quomodò morti Christi in Scripturis redemptio et salus nostra tanquàm effectus ejus annectatur, aliam afferre rationem quam specialiorem appellant, quæque ab eis inde derivatur quòd Christus, postquàm morte ut maleficus affectus est, tertiâ die resurrexit; « ut, inquit, exemplo esset omnibus eum imitantibus, fore ut similiter ex mortuis excitentur, et licet infame aliquod fortè et dirum mortis genus subeant, non tamen in morte relinquantur, et sic veram illam peccati pœnam à Deo decretam subeant,

(1) Crell. de Causis mortis Christi, t. 1 op. fol. 617.

sed ab illâ liberati in cœlestia gaudia transferantur. » Atqui juxta hanc interpretationem, non morte Christi, quidquid Scripturæ tradant, sed ejus resurrectione dicendi essemus redempti, à peccatis nostris liberati et salvati. Non enim ex eo quòd mortuus sit Christus, sed ex eo quòd vitæ redditus fuerit, juxta hanc expositionem spes futuræ resurrectionis, nos ad pœnitentiam et Christi imitationem excitans, accenderetur et nutriretur. Mors Christi ad id conferret tantum ut conditio, sine cujus interventu, resurrectio ejusdem contingere non potuisset. Frustra observant Sociniani mortem Christi fuisse opus arduum et difficile à Christo susceptum; non insolitum verò esse ut effectus operi ejusmodi arduo adscribatur, qui tamen ex eo non nisi mediante aliquo alio ortum duxit. Nam neque ullum exemplum idoneum ejusmodi usus, quod ad rem præsentem accommodari queat, proferre possunt; neque in exemplis quæ adducunt, effectus ita attribuitur causæ mediatæ ut nunquam ad immediatam referatur. Hic verò nos doloribus, sanguine et morte Christi esse redemptos, mundatos à peccatis, liberatos et salvatos, perpetuò Scripturæ inculcant, ne memoratâ quidem semel Christi resurrectione tanquam ejusmodi effectuum causâ; ergo, etc.

Quarta ratio petitur ex eo quòd Christus pontifex fuerit seu sacerdos: *Omnis autem pontifex ex hominibus assumptus*, inquit Apostolus Hebr. 5, v. 1, *pro hominibus constituitur in iis quæ sunt ad Deum, ut offerat dona et sacrificia pro peccatis*. En igitur primum sacerdotis munium, ut sacrificium pro peccatis offerat. Juxta fidem catholicam, quam S. Paulus in eâdem Epistolâ sæpè exprimit, Christus hoc munere functus est cum seipsum in victimam pro hominibus nocentibus in arâ crucis obtulit. Atqui Christi sacerdotium Sociniani mutilant, dum in eo duntaxat illud constituunt quòd Christus intercedat pro nobis, et divinæ voluntatis internuntius sit, quæ ad Prophetam et ad sacerdotem impropriè dictum pertinent; ergo, etc.

SOLVUNTUR OBJECTIONES. — Objiciunt 1°: Dogma satisfactionis Christi, prout à nobis explicatur, in Scripturis sacris non habetur expressum; neque enim voces satisfactionis, subrogationis et substitutionis in iis vel semel reperiuntur adhibitæ; ergo. Nego antecedens, quippe innumeris sacrorum codicum testimoniis illud dogma modò stabilitum est. Ad probationem, de vocibus hic non agitur, sed de re

ipsâ ejusmodi vocibus significatâ. Ecclesia sanè tum ut doctrinam Scripturarum aliquo vocabulo commodius exprimeret, tum ut genuinum earum sensum contra contortas Novatorum interpretationes apertiùs declararet, potuit *satisfactionis* nomine, atque etiam vocibus *substitutionis et subrogationis*, citra omnem reprehensionem uti, modò res ipsa ejusmodi vocabulis designata, in sacris litteris contineretur. Ergo de hac ipsâ re seu de ipso dogmate tota controversia esse debet. Atqui ejusmodi dogma seu mysterium non tantum in Scripturâ exprimi, sed etiam sæpissimè inculcari ex allatis testimoniis et ex Socinianarum interpretationum refutatione satis superque demonstratum est. Nec sanè à sensu eâ de re à nobis exposito, qui omnium Christianorum semper fuit, unquam recessisset Socinus, nisi impiæ suæ methodo insistens hunc fidei nostræ articulum priùs ad superbæ rationis placita curiosius et temerè expendisset, illumque repugnare nec proinde potuisse revelari apud se statuisset. Quo quidem eò audaciæ impulsus est ut se ejusmodi dogmati negaverit assensurum, etiamsi disertis et conceptis verbis illud in Scripturâ declararetur. *Ego quidem*, inquit, parte 5 de Servat., cap. 2, *nec si ubique clarissimis verbis testatum reperirem, sic tamen rem se habere mihi compertum esset*.

Obj. 2°: Repugnat dogma satisfactionis Christi ex parte Dei. Nam Deus ex Scripturis gratis delicta condonat. Quod colligitur ex Matth. 18, ubi in parabolâ debitoris hæc leguntur, v. 7: *Dominus servi illius dimisit eum, et debitum dimisit ei*; et v. 32: *Serve nequam, omne debitum dimisi tibi quia rogasti me*. Colligitur insuper ex 2 Cor. 5, v. 19, ubi Deus dicitur *in Christo mundum reconcilians sibi, non reputans illis delicta illorum*; ex Colos. 2, v. 13, ubi exhibetur Deus *donans nobis omnia delicta*; et maximè ex Rom. 3, v. 24, ubi homines ab Apostolo dicuntur *justificati gratis per gratiam ipsius* (Dei scilicet). Atqui, si Christus verè et propriè pro nobis satisfecisset, Deus dici non posset delicta gratis condonare, nosque gratis justificare; ergo, etc.

Nego antecedens. Ad probat. nego min.; in hypothesi enim veræ satisfactionis à Christo pro nobis exhibitæ, multiplici titulo Deus dicendus est gratis nos justificare et gratis condonare peccatum. 1° Quia citra omne hominum meritum, quod nullum esse poterat, eis delicta condonavit, atque ipsos justificavit. 2° Quia ex gratuitâ benignitate summæque charitate et misericordiâ concessit hominibus medium, quo

pro eorum peccatis satisfaceret, cum nempe Filium suum unigenitum misit, seu incarnari voluit. Sic *Deus dilexit mundum*, inquit Christus ipse, Joan. 3, v. 16, *ut Filium suum unigenitum daret; ut omnis, qui credit in eum, non pereat, sed habeat vitam æternam.* 3° Quia, etsi Christus condignæ pro peccato satisfactioni exhibendæ par fuerit, attamen non tenebatur Deus ex iustitiâ concedere, ut ipse loco hominis peccatoris substitueretur. Potuisset Deus exigere, ut ipsemet peccator poenas debitas lueret. Agitur hic de debito per offensam contracto, adeoque de debito personali. Ex merâ igitur misericordiâ Deus in compensationem injuriæ sibi per peccatum illatæ, et in solum poenarum à peccatoribus iustitiæ divinæ debitarum, dignatus est Christi innocentis satisfactiones acceptare. Atque hinc Apostolus locis objectis, dum peccata à Deo condonari, nosque ab ipso gratis justificari tradit, simul inculcare satagit hæc nobis concedi propter redemptionem quam Christus operatus est, seu intuitu oblationis et sacrificii sui ipsius, quod in cruce peregit. *Justificati gratis*, inquit Rom. 3, v. 24 et 25, *per gratiam ipsius (Dei), per redemptionem quæ est in Christo Jesu quem proposuit Deus propitiationem per fidem in sanguine ipsius, ad ostensionem iustitiæ suæ, propter remissionem præcedentium delictorum.* 2 Corint. 5, v. 18, 19, 21: *nos (Deus) reconciliavit sibi per Christum.... quoniam quidem Deus erat in Christo mundum reconcilians sibi, non reputans illis delicta ipsorum.... eum qui non noverat peccatum, pro nobis peccatum (id est victimam pro peccato) fecit, ut nos efficeremur iustitia Dei in ipso.* Coloss. 2, v. 13 et 14: *Et vos, cum mortui essetis in delictis.... (Deus) donans nobis omnia delicta; delens quod adversus non erat chirographum decreti, quod erat contrarium nobis, et ipsum tulit de medio affigens illud cruci.* Ergo hæc duo simul facillimè consistunt, nempe Christum pro nobis verè satisfacisse, et tamen delicta à Deo verè condonari nosque vero sensu gratis justificari.

Instabis 1°: Si quis debeat centum nummos, et alter pro eo ejusmodi debitum solvat, creditor censeri non potest remisisse debitum; ergo, si Christus tanquàm vas et sponsor noster debita nostra expunxerit, Deus dici non potest gratis condonare peccata. Nego consequentiam. Disparitas est 1° quòd Deus ex merâ misericordiâ suâ statuerit Christum venturum ut pro peccatis nostris satisfaceret, quâ ex parte condonatio peccatorum et justificatio nostra est gratuita in primâ suâ origine et radice. Unde

Apostolus, Rom. 5, v. 8: *Commendat autem, ait, charitatem suam Deus in nobis; quoniam cum adhuc peccatores essemus secundum tempus Christus pro nobis mortuus est.* Et 1 Joan. 4 Epist. cap. 4, v. 10: *Ipse (Deus) prior dilexit nos et misit Filium suum propitiationem pro peccatis nostris.* Nihil autem huic misericorditer à Deo statutæ dispositioni simile occurrit in allato exemplo creditoris, qui pecuniam sibi ab aliquo debitam, ab altero recipiens, debitorem liberat. 2° Quòd alia sit ratio debiti personalis, alia debiti realis. In debito reali, ubi nimirum agitur de rebus, attenditur æqualitas solius rei ad rem, nihilque refert, utrum debitor ipse, an verò alter pro eo debitum solvat. At, ubi agitur de debito personali, id est personam ipsam afficiente, non sufficit ejusmodi æqualitas, tenetur præterea debitor per seipsum satisfacere, nisi jure suo creditor cedat. Cum ergo injuriæ illatæ compensandæ debitum sit personale, seu personam offendentem spectet et afficiat, planum est Deum potuisse ab ipsis peccatoribus poenas repetere, quarum debitum peccatis suis contraxerant, proindeque gratuitæ ejus misericordiæ adscribendum quòd eas in Christum conjicere voluerit, atque oblatas sibi ab eo satisfactiones pro nobis suscipere. 3° In debito reali persolvendo, de quo in antecedente argumenti objecti sermo fit, ad meritum personale reddentis nullo pacto attenditur. Ad redditionem verò debiti personalis maximè confert meritum personæ quo extinguitur, proindeque cum Deus nobis condonaverit delicta nostra citra omne meritum nostrum proprium, adhuc eâ ratione dici debuimus gratis justificati, etiam si per Christi redemptionem iustitiam adepti simus.

Inst. 2°: Si *Deus prior dilexit nos*, atque idcirco *misit Filium suum*, ut habet S. Joannes loco mox laudato; ergo antecederet ad missionem Filii, ac proinde antecederet ad Christi mortem, peccata nostra nobis condonare voluit. Sed non potuit antecederet ad mortem Christi velle nobis condonare peccata nostra, quin ea voluerit condonare citra satisfactiones à Christo moriente exhibitas; siquidem voluntas peccata propter Christi satisfactiones condonandi, necessariò ejus mortis determinationem supponeret; ergo, etc.

Dist. maj., ergo antecederet ad Christi mortem peccata nobis condonare voluit, citra satisfactionem à nobis exhibitam, quippe cui impendendæ eramus impares, concedo; citra omnem veram et propriam satisfactionem à

Christo pro nobis exhibendam, nego. Distin-
gui similiter potest minor propositio, vel po-
tius simpliciter negari. Itaque decretum quo
Deus voluit *Filium suum unigenitum propitiatio-*
nem pro peccatis nostris mittere, ex summâ ejus
erga nos charitate quâ *prior dilexit nos* ortum
duxit. Nec sanè Deus illud potuit constituere,
quin simul ex mero suo beneplacito nos, citra
satisfactionem condignam à nobismetipsis ex-
hibendam, utpote cui non eramus pares, vellet
à peccatis liberare. Hæc fatemur tum ex Scrip-
turis tum ex ratione esse evidentissima. At
verò numquid ex his sequitur Deum, cum illa
decrevit, necessariò voluisse citra satisfactiones
à Christo exhibendas nobis peccata condonare?
minimè. Contendimus, et ex verbo Dei mani-
festè adstruimus, hoc fuisse Dei consilium, ut
in negotio salutis nostræ peragendo, attributa
sua, præsertim misericordiam et beneficentiam,
simulque justitiam et sanctitatem mirum in
modum exprimeret. Enimverò beneficentiæ et
misericordiæ infinitæ characterem, præclare
viis suis impressisse concipitur, cum *redemption-*
em facere plebis suæ, ut Scriptura, Luc. 1, 68,
loquitur, ex mero suo beneplacito instituit,
dando scilicet hominibus peccatoribus Filium
suum unigenitum qui in naturâ à se assumptâ
eorum sponsor, mediator, redemptor esset et
pro lissacerdos et victima constitueretur. Suam
verò justitiam et sanctitatem, seu odium pec-
cati et amorem ordinis Deus pariter summâ
ratione expressit et prodidit, cum voluit ut
unigenitus ille Filius suus pœnas à nobis debi-
tas ut sponsor noster in naturâ assumptâ lue-
ret, ut sanguinis sui effusione pretium libe-
rationis nostræ solveret, ut ad compensandam
injuriâ Divinitati per peccatum illatam, sese
humiliaret obediens factus usque ad mortem
crucis, atque in victimam sese pro peccatoribus
offerret in corpore suo super lignum, sicque
nos *justitiæ* redderet, *et livore suo nos sanaret*,
1 Petr. 2, v. 24. In mysterio igitur satisfactio-
num Christi frustra Sociniani *oppressi à gloriâ*
majestatis quam curiosius scrutantur, repugnan-
tias et contradictiones quærent. Ab homine
christiano, *rationabile obsequium fidei* præstante
ibi nihil aliud deprehenditur quàm eventus
mirabilis insigni Davidis oraculo Psal. 84, v.
11, eximiè respondens : *Misericordia et veri-*
tas obviaverunt sibi; justitia et pax osculatae
sunt.

Inst. 3^o : Si ex Scripturis et ex ratione evi-
dentissimum sit Deum nonnisi præ infinitâ
erga nos misericordiâ et charitate decrevisse

Filium suum pro peccatis nostris mittere *pro-*
pitiationem; sequitur eum non exegisse ut Chri-
stus peccatorum nostrorum pœnas ferret, ad
loco nostro satisfaceret. Enimverò si ex infi-
nitæ et charitatis motivo Christum misit; ergo
antecedenter ad passionem et mortem ejus
peccatoribus iratus et inimicus non erat, sed
donec Christus se neci pro nobis objiceret non
expectavit, ut nobis iratus et inimicus esse
desineret. Quomodo enim inimicitia et ira Del
in peccatores, cum tantâ erga eosdem charitatē
et benevolentiam potuisset consistere? Atqui, si
Christus antecedenter ad Christi passionem et
mortem nobis iratus et inimicus esse desierat,
consequens est Christum sanguine suo nos eo
sensu non reconciliasse, neque iras eâ ratione
extinxisse ut verè pro nobis satisfecerit; ergo,
etc.

Nego antecedens. Nodum in scirpo quærent
Sociniani. Quoquo modo Deus condonet deli-
cta, id ejus bonitati et misericordiæ adscri-
bendum est, quin etiam ubi ad justitiam et
sanctitatem suam exprimendum, satisfactio-
nem exigit, ipse dat media satisfaciendi. Itaque
suam quidem Deus misericordiam expressisset,
si nobis peccatoribus citra condignam satisfa-
ctionem pro nobis exhibitam delicta condo-
nasset. At verò eam quoque mirum in modum
expressit, ubi, sicut fides docet, Filii sui me-
ritis et satisfactionibus, nos injuriæ ipsi per
peccatum illatæ aliàs compensandæ impares,
salvos fieri et à peccatis liberari ex mero suo
beneplacito instituit. Hos inter duos condo-
nandi modos duplex tamen occurrit annotan-
dum discrimen quo posterior longè priorem
antecellit et superat. Unum est, Deum dando
Filium suum qui pro nobis satisfaceret, non
solum suam erga homines charitatem et mise-
ricordiam, sed etiam odium quo infinitè san-
ctus peccatum prosequitur, necnon justitiæ
suæ severitatem præcellentissimâ ratione pro-
didisse. Alterum est, hâc eâdem Filii sui tra-
ditione, ipsum multò sublimiùs suam bonitatem
et misericordiam expressisse, quàm nudâ et
citra omnem satisfactionem condonatione eam-
dem prodere potuisset; ergo. Neque in his ullâ
repugnantia occurrit species. Etenim Deus, ut-
pote circa hominum genus reparandum liber,
nonne potuit in ejusmodi reparatione decer-
nendâ conditiones æquas attributis suis decla-
randis idoneas quas voluerit apponere? Num-
quid alteri causæ quàm infinitæ ejus bonitati
et misericordiæ illud attribui potest, quòd per
Filium suum nos salvare decreverit, quòdque

illum pro nobis in sponsorem et victimam miserit? Non quidem ex misericordiâ, sed ex justitiâ, Deus sibi satisfieri exegit; verum non nisi ex infinitâ misericordiâ Filium suum misit, qui satisfactiones quas pro nobis impendi justitia postulabat, exhiberet, sicque nobis gratiam et salutem afferret.

Ad probationem, distinguo sequel. majoris : ergo antecederet ad mortem Christi Deus non erat peccatoribus iratus et inimicus sub omni respectu, et ita ut omnia ipsis in gratiam redeundi media denegare vellet, concedo; non erat iis iratus et inimicus ut peccatoribus, et ita ut citra omnem satisfactionem iis vellet condonare et media salutis tribuere, nego. Peccatores spectari possunt 1° ut peccatores; 2° ut homines à Deo creati, conversionis et gratiæ recipiendæ capaces. Peccatoribus Deus sub omni respectu nunquàm irascitur aut inimicus est, sed tantum ut peccatoribus. Inimicitia enim Dei in ejus voluntatis aversione posita est. Ideirco autem à peccatore avertitur voluntas divina, quia hæc necessariò sancta est, seu ordinem immutabilem diligit, à quo peccator deviat et amovetur. Cum ergo peccator ut homo, ut opus manuum Dei, ut gratiæ recipiendæ capax, non sit ab ordine devius, sed tantum ut peccator; sequitur Deum ipsi esse inimicum duntaxat ut peccatori, non verò ut enti à se creato et conversionis capaci; pariter ira Dei, quæ cum in nullâ commotione consistat, nihil aliud quàm puniendi consilium seu voluntas esse potest, ira Dei, inquam, non spectat peccatorem, nisi ut peccatorem, quia sub eo tantum respectu peccator pœnam meretur. Si autem peccatoribus solum ut peccatoribus iratus et inimicus sit Deus, planum est ipsum, ejusmodi irâ et inimicitia nondum depositâ, posse iisdem sub alio respectu consideratis, nempe ut à se conditis et gratiæ recuperandæ capacibus, ex merâ misericordiâ et bonitate benevelle. Quod quidem ne ab ipsis negandum est Socinianis. Ii enim fatentur obstinatos et sine pœnitentiâ defunctos peccatores à Deo severe puniri in alterâ vitâ, hos verò puniri tantum ut peccatores evidentissimum est, nam sub aliis respectibus nullam merentur pœnam; quid, quod Deus iis ut hominibus conservat esse et facultates naturales. Imò ipsos à pœnis aliquando liberandos statuunt Sociniani? Ut certum igitur et ab ipsis Socinianis admittendum statui debet, Deum, dum peccatoribus ut peccatoribus iratus est, ipsis ut creaturis suis posse præ misericordiâ bene velle.

Jam verò, hoc posito principio, nihil planè obstat quominus Deus antecederet ad Christi mortem constitutam dicatur hominibus ut peccatoribus inimicus fuisse, seu ab iis aversus, iisdemque iratus, id est eorum puniendi peccata voluntatem gessisse; et simul tamen ipsis ut hominibus à se conditis et boni recipiendi capacibus voluisse præ infinitâ misericordiâ redemptorem et sponsorem parare qui pro iis satisfaceret, quique eatenus inimicitias ejus exstingueret et iram divinam placaret, quatenus 1° in se ferret pœnas ab hominibus ob eorum peccata debitas; 2° honorem obedientiâ suâ aliisque actibus eximiis Deo offerret injuriæ per peccatum ipsi illatæ compensandæ parem; 3° hominibus mereretur media quorum usu merita sua et satisfactiones ipsis applicarentur, adeò ut justificationem ii consequi possent, benevolentiam divinam recuperarent, et hæreditatem Dei filiis constitutam possiderent, quæ quidem omnia Christus Dominus executus est.

Instabis ultimò : Statim atque Deus statuit redemptorem et sponsorem hominibus concedere, hoc ipso pœnas ob peccata debitas ab ipsis non vult repetere, nec proinde ipsis jam iratus est; ergo, etc. Dist. ant., non vult ab ipsis repetere pœnas, sed à sponsore eas repetere statuit, concedo; nec ab ipsis nec à sponsore, nego. Tandem Deus ob peccata iratus concipitur, quamdiu pœnas propter peccata debitas vult infligere, quas seu à peccatore, seu ab alio vice et nomine peccatoris, exigit tolerari. Atqui Deus, dum ex infinitâ misericordiâ statuit dare hominibus sponsorem et redemptorem qui pro iis satisfaceret, voluit simul ab illo redemptore et sponsore pœnas peccatorum nostrorum ferri, ut innumeris Scripturæ sacræ locis et totâ traditione demonstravimus; ergo, etc.

Objicies 5° : Repugnat ex parte hominum, pro ipsis Christum verè et propriè satisfacisse. Nam ad id necesse fuisset 1°, ab ipso innumerabiles sufferri mortes. Tot enim ad satisfaciendum pro hominibus mortes debuisset Christus oppetere, quot fuere et erunt homines propter peccata sua morti obnoxii; atqui innumera-biles ejusmodi fuere et erunt homines; ergo, etc. 2° Necesse etiam fuisset pœnam æternam ab ipso tolerari; siquidem pati debuisset pœnam peccatis nostris debitam; atqui peccatis hominum debetur pœna æterna; ergo, etc.

Nego ant. Ad primam probationem, distinguo : Necesse fuisset à Christo innumera-biles mortes sufferri, nisi ejus unica mors innumeris

compensandis suffecisset, concedo; si unica ejus mors innumeris compensandis suffecerit, imò præponderaverit, nego. Mors Christi fuit personæ infinitæ sese in victimam Deo, loco nostro, offerentis ad injuriam ipsi per peccata nostra illatam compensandum et poenas à nobis debitas persolvendum. Cùm ergo in satisfactione et poenarum voluntariâ solutione maximè habeatur ratio dignitatis personæ quæ satisfactionem exhibet, manifestum est necesse non fuisse Christum se multis objicere necibus, sed satis fuisse ipsum semel in victimam piacularem offerri ad muliorum exhaustiendâ peccata, ut ait Apostolus, et ad consummandum in sempiternum sanctificatos, Heb. 9, 28, 10, 14.

Ad secundam probationem, nego ant. et distinguo majorem syllogismi ad illud confirmandum adducti: Christus pati debuisset poenam à nobis debitam vel alteram ipsi compensandæ parem, concedo; eandem ipsam, nego. Satisfactio est rei æquivalentis redditio, non verò omninò ejusdem. Cùm ergo satisfactio à personâ infinitâ qualis est Christus, exhibita, infiniti sit valoris, planum est mortem ipsius compensandæ poenæ æternæ peccatis debitæ non modò suffecisse, sed et præponderasse. Et verò quis non videt iis poenis quas Deus à Christo Filio suo dilecto ut sponsore nostro repetit, justitiam ejus vindicativam, id est, quantas propter peccata nostra poenas infligere possit longè significantius declarari, quàm idem divinum attributum æterno peccatoribus obstinatis et impœnitentibus illato supplicio manifestatur et exprimitur? atqui in genere satisfactionis illud procul dubio æquivalet, imò præponderat poenæ æternæ, quod justitiam Dei vindicativam magis exprimit et declarat; ergo, etc.

Denique ideirò tantum poena æterna dicitur peccato mortali debita, quia cùm infinitum sit in genere offensæ, proindeque poenâ infinitâ plectendum, peccator verò utpote ens finitum supplicio activitatis infinitæ subjici nequeat, superest ut poena quæ ipsi infligitur, ratione durationis suæ sit infinita. Duratio igitur ejusmodi poenarum infinita officere non potest quominus Christi satisfactionibus quæ valoris et pretii infiniti fuerunt, compensari potuerint. Adde quòd etsi verum sit, ut deinde ostendetur, Christum æquivalenter imò et superabundanter pro nobis satisfacisse, non tamen ut jam observavimus, aliud quidquam eâ de re ad fidem catholicam pertinet, nisi satisfactionem pro nobis ab ipso exhibitam, eam fuisse

quæ congruenter à Deo acceptaretur pro hominum peccatis, ita ut opera puri hominis quâlibet gratiâ ornati non fuissent satisfactioni ejusdem generis impendendæ idonea. Hoc unum ita disertè exprimitur in verbo Dei seu scripto seu tradito, ut in eo omnes theologi catholici consentiant. Hoc unum sufficit ut Deus, dùm ex summâ misericordiâ peccata condonavit, dicatur simul quàm maximè potuit, justitiam suam, sanctitatem et odium quod habet peccati expressisse. Quapropter, cùm de stabiliendo dogmate catholico hic solùm agatur, frustra congerent Sociniani argumenta quibus intactâ ejusmodi satisfactionum Christi sufficientiâ, solùm concluderetur iis quasdam defuisse è conditionibus ad perfectam undequâque satisfactionem requisitis.

Instabis: Si Christus pro nobis verè et propriè satisfacit, non opus est ut ipsi pro peccatis nostris satisfaciamus; atqui tamen tenemur satisfacere pro peccatis nostris; ergo, etc. Dist. maj., et insuper voluerit non agentibus et cooperantibus valorem satisfactionum suarum applicari, concedo; si voluerit nonnisi agentibus et cooperantibus valorem illum applicari, subdistinguo: Non opus erit ut pro peccatis nostris satisfaciamus independenter à satisfactionibus Christi et ut eas compleamus, concedo; dependenter à satisfactionibus Christi et ut eas nobis applicemus, nego. Itaque eadem fides catholica quâ docemur Christum pro peccatis hominum verè et propriè satisfacisse, nos etiam docet ad percipiendum satisfactionum ejus fructum necessarios esse pios actus atque opera bona, fidem nimirum, spem, charitatem, poenitentiam, sacramentorum usum, etc. Nempe noluit Deus nos otiosos et sine actibus bonis salutem consequi posse. Neque ipsi perfectioni satisfactionum Christi id adversatur, siquidem 1º omnis efficacia sacramentorum, omnis benè operandi virtus nobis concessa, omnis satisfactionum nostrarum valor et meritum, ex satisfactionibus et meritis Christi Domini derivatur. 2º His opus habemus, non quidem ut quidquam perfectionis et complementi satisfactioni Christi adjiciamus, sed ut eam nobis applicemus; adeò ut quidquid in nostris satisfactionibus boni esse potest, in Christi satisfactione fundetur, eâque compleatur et perficiatur, seu potius ex eâ omnem suam vim habeat et desumat. Sed de hoc argumento theologi ex professo ubi de necessitate bonorum operum, de sacramentis, et de Poenitentia.

Obj. 4º: Repugnat dogma satisfactionis ex

parte Christi; nam iniquum est innocentem et justum loco peccatoris et rei poenas dare : atqui Christus summè justus et innocens pro nobis peccatoribus poenas dedisset, si verè et propriè satisfecisset loco nostro; ergo, etc. Nego ant., ad probationem, distinguo : Injustum est innocentem pro nocente poenas dare, si legitimè, id est secundum auctoritatis legitimæ præscripta, et lubens constitutus non sit ejus sponsor, concedo; si legitimè et lubens constitutus est nocentis sponsor, nego. Christus lubens et volens, atque ipsiusmet Dei auctoritate ac proinde legitimè constitutus fuit juxta Scripturas, vas et sponsor noster, cui loco nostro satisfactionem exhiberet, cui impendendæ eramus impares. *Posuit*, inquit Isaias cap. 53, v. 6, *Dominus in eo iniquitatem omnium nostrum; oblatus est quia ipse voluit*. Porro tantum abest ut injustum sit sponsolem legitimè constitutum, loco debitoris solvendo imparis satisfacere, ut potius id ipsum omnia jura præscribant; ergo, etc. Et verò fateri coguntur ipsi Sociniani præceptum cruentæ mortis oppetendæ Christo fuisse à Deo impositum, tum ut nobis exemplo esset et doctrinam salubrem quam prædicârat, firmaret, tum maximè, inquiunt, ut interveniente hâc conditione Christus potestatem illam supremam à quâ, ut putant, remissio peccatorum nostrorum pendet, adipisci debuerit. Atqui, si ad utilitatem nostram et ut possemus peccatorum remissionem consequi Deus ejusmodi conditionem, nempe patiendi et moriendi præceptum Christo innocenti et justissimo potuerit præscribere; quidni pariter nostri causâ, et ut nobis parcendo justitiam suam, ut par erat, exprimeret, quidni, inquam, potuit Christum sponsolem nostrum constituere, qui lubens et volens pro nobis satisfaceret, sicque sibi gloriam immensam, nobisque reconciliationem et salutem compararet? Ubi observa causas mortis Christi, quas Sociniani asserunt à nobis non negari, nisi quòd gloriam et potestatem quam morte suâ consecutus est, alio modo secundum Scripturas, explicemus. Hanc verò ejusdem mortis assignamus alteram causam, nempe necessitatem Dei justitiæ pro nobis satisfaciendi, ejusque iram placandi, sicque justitiam et sanctitatem divinam ostendendi et prodendi. Opus porro quod Deus ex adversariis, ob unam aliquam causam injungere potuit, quidni et propter alteram quoque causam potuisset injungere?

Instabis 1° : Injustum est innocentem in causâ capitali, seu quæ in crimine consistit,

fieri sponsolem nocentis, et ejus loco poenas dare. Quocirea illud omni jure divino et humano prohibitum est. Dist. ant., injustum est innocentem in causâ capitali fieri sponsolem nocentis et ejus loco poenas dare, ubi tria, ut vulgò fit, non concurrunt, nempe si vel ipse non consentiat, vel ei desit potestas, vel detrimentum reipublicæ aut ipsius sponsoris sequatur, concedo; ubi tria concurrunt, nempe ubi innocens pro reo sponsor esse consentit, ipsi sese ejus loco substituendi fit potestas, magnumque tum ipsius, tum etiam reipublicæ sequitur commodum, nego. Fatemur itaque, non tantum jure divino et humano, sed etiam jure naturali esse vetitum tripliciter in casu, ne innocens, ubi agitur de causâ quæ in crimine consistit, fiat innocentis sponsor et pro eo poenas det : nimirum 1° si ejusmodi subrogationi suæ in locum sontis ipse non consentiat; 2° si sese alterius vice hoc modo substituendi facultatem ab auctoritate legitimâ non habeat, puta à Deo vitæ et necis supremo arbitro, vel etiam à reipublicâ, quæ licet ejusmodi subrogationes lege divinâ non prohiberentur, posset tamen eas, ubi sibi noxiæ forent, proscribere et vetare; 3° si sequantur incommoda, quæ summa profectò forent ubicumque ejusmodi substitutiones solerent usurpari. Earum quippe usu bonis civibus destitueretur respublica, dum noxii et improbi servarentur; deinde istorum in criminibus patrandis augetur audacia et furor, consuetudine ejusmodi majorem poenæ scelestorum vitandæ spem animis instillante.

Fatendum præterea, ubi de poenâ capitis agitur, nullum fortè, citra miraculum in præsentis rerum dispositione occurrere posse casum, in quo innocentis loco rei substitutio licitè fieri possit; sæpissimè enim deerit consensus, semper potestas, et sequerentur gravissima sponsoris et reipublicæ incommoda. Quapropter jure divino et humano subrogationes ejusmodi meritò prohibitæ sunt. Quid quòd etiam ubi poena criminis esset minor capitis supplicio, rari ob similes rationes reperiri possunt in isto rerum ordine casus in quibus substitutio de quâ agimus per se esset justa, seu jure naturali non vetaretur? Quidquid verò sit, illud pro certo et manifesto tenendum est, ubi quoquo modo, id est seu naturaliter, seu miraculosè concurrerent istæ conditiones, liber nimirum sponsoris consensus, potestas ipsi legitimè facta, necnon ejus et reipublicæ summa utilitas; tunc innocentis in sontis locum substitutionem, non modò fu-

turam de se et jure naturali licitam, sed insuper laudandam et jure divino et humano permit- tendam. Rem explico exemplo: Ponamus quem- dam civem cujus opera reipublicæ sit utilissima et necessaria, in grave quoddam crimen exilio plectendum incidisse. Facinus verò tale sit ut nisi hæc pœnâ secundum leges puniretur, valde metuendum esset ne pravam illud exemplum alios in perniciem traheret. Ponamus etiam civem alterum, patriæ non ita utilem, sed cri- minis expertem, et publicæ utilitatis studio accensum, necessitati simul et satisfactioni reipublicæ consulendi causâ, sese ad pœnam exilii loco alterius luendam offerre, atque ejus- modi ipsius obsequium à reipublicæ moderato- ribus acceptari. Liquet in hæc hypothesi sub- stitutionem innocentis loco rei fore licitam. Quid ita? quia liberè et spontè generosus ille civis se alterius loco substitui consentiret, ac proinde ipsi utpote volenti non fieret injuria; quia per se illicitum non est ut quis gravi de causâ velit à patriâ suâ exul vivere, quocirca, ad id se offerendo, potestatem sibi factam non excederet; quia hæc substitutio fieret ad sum- mam reipublicæ conciliandam utilitatem, at- que adeò auctoritate publicâ mereretur ap- probari; quia denique illud sponsoris obsequium possent reipublicæ moderatores variis donis et muneribus compensare, seu finito ejus exilio; seu etiam adhuc eo durante, unde nihil de- trimenti ex suâ magnanimitate reverà patere- tur, sed potiùs inde commodum reportaret.

Ut igitur minimè injustum fuerit, Christum innocentem pro hominibus criminosis sponso- rem constitui erga Deum, et pro iis pœnas dare, satis est quòd lubens pro nobis necem ab impiis passus sit, quòd hocce modo se litandi et in victimam offerendi potestatem habuerit, quòdque summa universo orbi, ac præsertim hominibus, necnon sibi bona morte suâ attu- lerit. Atqui 1º Christus, ut loco nostro satis- faceret, sponsor noster fieri et ab impiis se necari lubentissimè consensit. Quod Isaias 53, v. 7, disertè significat his verbis: *Oblatus est quia ipse voluit*; ibid. v. 10: *Si posuerit pro peccato animam suam, videbit semen longævum*. Et Christus ipse, Joan. 10, v. 15 et 18: *Animam meam*, ait, *pono pro ovibus meis*. . . . *Nemo tollit eam à me; sed ego pono eam à me ipso, et potestatem habeo ponendi eam; et potestatem habeo iterum sumendi eam; hoc mandatum ac- cepi à Patre meo*. 2º Moriendi loco nostro, et sese pro nobis in victimam offerendi potestatem habuit Christus ut homo. Enimverò, cum

Deus ex mox laudato vers. 6 cap. 53 Isaiæ; *posuerit in eo iniquitatem omnium nostrum*, cum ex versu 8 ejusdem capitis *propter scelus populi sui percusserit eum*, et ex versu 10 propter eandem causam *voluerit conterere eum*; cum pariter juxta Apostolum Rom. 8, v. 32, *Filio suo unigenito non pepercerit, sed pro nobis omni- bus* (neci cruentæ) *tradiderit illum*; numquid dubium ullum esse potest, quin Christus ut homo, sese pro nobis morti quam passus est objiciendi facultatem habuerit? Imò non so- lum facultatem sed et mandatum sic moriendi à Patre accepit. *Potestatem habeo*, inquit ipse loco Joan. mox allato, *ponendi eam* (animam meam pro ovibus meis). . . . *Hoc mandatum accepi à Patre meo*; et Apostolus, Philip. 2, v. 8: *Humiliavit semetipsum, factus obediens us- que ad mortem, mortem autem crucis*. 3º Ex morte quam Christus ut homo pro nobis sus- tinuit, præcellentissima bona, nempe attribu- torum Dei perfectissima expressio, tum libe- ratio hominum et salus secuta sunt, ut jam non semel observavimus. Quod verò ipse inde passus est detrimentum, momentaneum fuit, et summâ ac sempiternâ utilitate et gloriâ compensatum et resarcitum. Siquidem die post obitum suum tertiâ è sepulcro gloriosè egressus, *omnem potestatem* Matt. 28, v. 18, *in cælo et in terrâ* obtinuit; Luc. 24, v. 26: *Intravit in gloriam suam*; Philip. 2, v. 9, à Deo *exaltatus* est et *nomen consecutus quod est super omne nomen, ut in nomine Jesu omne genu flectatur cælestium, terrestrium et infernorum; et omnis lingua confiteatur, quia Dominus Jesus Christus in gloriâ est Dei Patris*; ergo, etc.

Sed, ut objectionis Socinianæ magis adhuc appareat levitas, expendamus quid in dogmate catholico Sociniani tanquàm injustum et Deo indignum reprehendant. Numquid contendunt præceptum passionis dolores sustinendi et mor- tem cruentam et probrosam subeundi Christo innocenti et sanctissimo non potuisse à Deo imponi? minimè; mandatum illud Christo da- tum fuisse ipsimet agnoscunt. Numquid volunt id muneris in ordine ad liberationem et salutem peccatorum Christo nequivisse injungi? Contra laborant maximè, ut, negatâ Christi satisfactio- ne, exponant quo sensu in Scripturis signifi- cari potuerit nos morte Christi à peccatis fuisse liberatos et ad salutem perductos. Quid ergo in dogmate Christi satisfactionum ipsis displi- cet? Unum duntaxat, quod tamen sæpissimè et disertissimè in verbo Dei exprimitur, nempe ad compensandam, quoad fieri poterat, inju-

triam Deo per peccatum illatam, et pœnas pro peccatis debitas persolvendas, Christum factum fuisse sponsorem nostrum, et eâ de causâ mortis crucis libenter se objecisse. Verum, si Deus sine injustitiâ potuit Christi innocentis mortem ut conditionem liberationi peccatorum in præsentî ordine utilem vel necessariam exigere; quæ injustitia esse potest, si præterea, eandem Christi mortem, ad compensandam injuriam sibi peccatum illatam et pœnas à peccatoribus debitas extinguendas ordinari et referri voluerit, sicque attributa sua præcellentissimè expresserit, nullâ Christo innocenti factâ injuriâ, tum propter consensum ab eo libenter adhibitum, tum propter immensam gloriam quâ ejus opprobria et dolores compensata sunt?

Instabis 2° : Deus est summè bonus et misericors; ergo instituere non potuit ut Christus justus et innocens nocentibus substitueretur, et eorum loco acerbissima tormenta et mortem ipsam toleraret. Dist. ant. : Deus est summè bonus et misericors, et simul summè sanctus et justus, concedo; est summè bonus et misericors tantum, nego. Deum esse bonum et misericordem auctoritas Scripturarum et ratio manifesta perinde quidem docent; at non minùs certò ex Scripturis et ratione adstruitur Deum esse quoque summè sanctum et justum, id est, ab eo ordinem immutabilem necessariò diligi, ac proinde necessariò ac summè peccatum odio haberi; unde sequitur ipsi inesse justitiam vindicativam, seu potestatem peccatoribus infligendi pœnas eorum peccatis proportionatas : cujus quidem potestatis exercendæ constantem in præsentî ordine esse Deo voluntatem ex Scripturis insuper demonstratur, ut ex dictis capite I hujusce Dissertationis liquet. Jam verò, si Deus non modò bonus sit et misericors, sed etiam sanctus et justus; ergo, ut ad bonitatem et misericordiam suam exprimendam decrevit hominibus parcere; ita ad justitiæ suæ et sanctitatis suique in peccatum odii manifestationem potuit velle delicta eorum lui à Christo, nec citra exhibitas ab ipso satisfactiones illos liberare et salvare. Etenim mox ostendimus in ejusmodi conditione à Deo appositâ, seu in satisfactionibus Christi exigendis nihil per se iniqui deprehendi. Deus verò hoc modo et sub illâ conditione nobis parcens, non idcirco minùs splendide, quàm si nobis sine eâ condonaret, bonitatem et misericordiam suam in salutis nostræ negotio declarat; imò indè fit ut bonitas et misericordia divina

multò magis emicent et refulgeant, quod jam sæpiùs observatum et explicatum est. Quòd autem morte, loco peccatorum, à Christo eorum sponsore toleratâ præcellentissimè exprimantur sanctitas et justitia divina, per se manifestum est, et jam non semel annotare curavimus; ergo, etc.

Instabis 3° : Nulla potuit esse causa ejusmodi substitutionis Christi loco peccatorum ut pro iis satisfaceret; ergo injusta fuit illa substitutio.

Nego ant. Nam 1° ex Scripturis colligimus, Deum statuisse peccatum non dimittere impunitum, ac proinde necesse fuit peccata hominum puniri vel in ipsis hominibus, vel saltem in sponsore peccatis eorum onusto. 2° Deus exigendo à Christo ut pro nobis satisfaceret et pœnas peccatorum subiret, attributa sua, præsertim suam sanctitatem et justitiam, ac simul bonitatem et misericordiam suam summâ ratione expressit, quod jam sæpiùs animadvertere et exponere curavimus; ergo. 3° Sunt etiam procul dubio aliæ hujusce mysterii causæ, quas in hac vitâ ut par est investigare non possumus. Etsi porrò nullas cognosceremus, nihiloseciùs tamen illud certâ fide tenendum esset, cum in Scripturis clarè expressum habeatur; Deus qui nihil operatur sine causâ, non tenetur tamen mysteriorum quæ efficit, nobis rationes et causas in hac vitâ aperire. 4° Quibusdam videtur absolutè repugnare à Deo peccatum citra satisfactionem condignam sibi exhibitam remitti; quia Deus, inquit, non potest cedere jure suo, nec proinde peccatum relinquere impunitum quin semetipsum neget. Ii necessitatis satisfactionum Christi facilè causam reddunt. Verum, etsi fortè ejusmodi opinio planè evidentibus argumentis non refellatur, attamen reverà videtur falsa, et idcirco eam non adhibemus. Vide quæ eâ de re dicta sunt Dissert. IV, cap. 4. Verum operæ pretium est annotare objectionem propositam ipsismet solvendam esse Socinianis. Nam ab iis inquiri utrum mors Christi iis fuerit finibus propter quos volunt eam à Deo fuisse præceptam, planè necessaria? Quæro utrùm ejus doctrina quam tot prophetiæ et miracula confirmant, quæque aliis multis potuisset ostentis comprobari, ipsius morte necessariò fuerit consignanda? An ad supremam illam potestatem, à quâ volunt Sociniani pendere remissionem peccatorum nostrorum, Deus absolutè non potuisset Christum evehere, quin passionis et necis sustinendæ præceptum ab ipso impleri exigeret? Num is unicus fuerit

saluti hominum providendi modus, ut conditiones tam acerbæ Christo justissimo et sanctissimo imponerentur? Nullas igitur Sociniani cruentæ Christi necis afferunt necessarias causas. Nos verò eas non respuentes, quæ ab ipsis adducuntur, etsi paulò aliter aliquas exponamus, aliam præterea assignamus præcipuam et maximi momenti, quam nihil supplere potuisset, nempe necessitatem compensandæ injuriæ Deo per peccatum illatæ, atque etiam justitiæ et sanctitatis divinæ in ipsâ peccati condonatione mirum in modum exprimendæ et declarandæ.

Obj. 5^o: Cum divinitate Christi et Spiritûs sancti stare nequit satisfactionum Christi dogma: Nam « si Christus, et unâ cum illo Spiritus sanctus, est unus cum Patre Deus, qui sit quòd Pater solus placeat, Filius eum placeat; Patri soli satisfiat, Filius satisficiat; Patri soli victima offeratur, Filius offerat? An Filius et Spiritus sanctus, licet unus cum Patre Deus, non fuerunt æquè ac Pater peccatis nostris offensi ac nobis irati? Non æquè voluerunt exemplum aliquod severitatis statui et satisfactionem sibi præstari? Aut Pater solus cùm iratus esset, erat placandus, non item Filius et Spiritus sanctus? illi soli satisfactio erat præstanda, non etiam duabus reliquis ejusdem Deitatis personis? »

Respondeo, non solum Deum Patrem sed etiam Filium et Spiritum sanctum peccatis nostris offensos fuisse, et nobis iratos. Trium enim divinarum personarum una est voluntas in quam peccator rebellat, atque majestas una, quam audet contemnere. Ira etiam ad voluntatem tribus personis communem pertinet. Ergo, inquiunt Sociniani, non soli Patri, sed etiam Deo Filio et Spiritui sancto passione et morte Christi hominis satisfieri necesse fuit. Id fatemur ex dogmate catholico consequi, et ex sacris litteris colligimus toti Trinitati fuisse satisfactum; neque in eo ulla pugna; si qua enim ibi contradictio esse posset, maximè quia Christus qui Filius Dei ponitur, simul Filio Dei ac proinde sibi ipsi diceretur satisfecisse; atqui hæc inter se non pugnant; cùm enim Christus non solum sit Deus Filius, sed etiam homo, cùmque ut homo tantum, passionis dolores et mortem sustinuerit et actus satisfactorios elicerit, planum est eum potuisse sibi ipsi ut Deo satisfactionem exhibere. Hæc capite sequenti explicabuntur uberiùs, ubi gravem controversiam quæ eâ de re inter theologos agitur, expendemus, an scilicet Christi satisfactio

quâ parte sibi ut Deo satisfecit, fuerit ad alterum. Illa verò quæstio quam fatemur esse difficiliorem, spectat perfectionem satisfactionis Christi non ad dogmatis catholici substantiam attinet. Conditiones perfectæ et undequaque accuratæ satisfactionis quas superius enumeravimus, Christi satisfactioni competere contra Socinianos non statuimus. Hic solum attingimus quæ sunt fidei catholicæ, illudque duntaxat propugnamus, Christum loco nostro verè et propriè satisfecisse, adeoque eo fine orasse, sese humiliasse, opprobriis saturari voluisse, mortem oppetiisse, se in victimam obtulisse, ut injuriam Deo per peccatum illatam, quoad fieri poterat, compensaret, pœnas à nobis debitas in se ferret, sicque nos redimeret et salvaret.

CAPUT III.

An undequaque perfecta fuerit Christi satisfactio?

Calvinistæ eo sensu volunt Christi satisfactionem fuisse perfectam quòd singulis hominibus jam necesse non sit piis operibus propter propria delicta Deo satisfacere. Quapropter à Catholicis pœnitentiæ et privatarum satisfactionum necessitatem propugnantibus contendunt præstantiæ ac perfectioni satisfactionis Christi multum detrahi. Verum errant; privatas satisfactiones esse necessarias non idcirco docet Ecclesia catholica, quòd quidquam perfectioni satisfactionis Christi deesse arbitretur, sed tantum ut infinitus ejusmodi satisfactionis valor nobis applicetur. Sensit Calvinus ad id sufficere fidem; at verò non fides sola, sed etiam spes, charitas, pœnitentia, et alia opera in Scripturis præcipiuntur. Verum de illo Calvinistarum errore hic non agimus, qui refellitur ubi de necessitate bonorum operum et de sacramento Pœnitentiæ disserunt theologi. Jam porrò monuimus quæstionem præsentem de Christi satisfactione undequaque perfectâ et ad strictos juris apices accuratâ, ad fidem non pertinere. Omnes quidem theologi ut dogma fidei profitentur Christum verè et propriè pro nobis satisfecisse, et satisfactiones ejus saltem eas fuisse, quæ præstantiâ suâ puri hominis quâlibet gratiâ ornati opera longè superarent, et congruenter à Deo pro hominum peccatis acceptarentur. Verum de cætero circa condignitatem et perfectionem ejusmodi satisfactionum in varias sententias abeunt, quas deinde singulas suo loco exponere curabimus. Plerique tamen omnes ad perfectam satisfac-

tionem requisitas condiciones in Christi satisfactione observatas fuisse existimant.

CONCLUSIO. Satisfactio Christi fuit ex se condigna et perfecta. Probatur. Ea satisfactio ex se condigna et perfecta dicenda est, quæ omnes ad perfectam et condignam satisfactionem condiciones requisitas habuit; id est, quæ 1^o fuit voluntaria et ad compensandam injuriam per peccatum illatam; 2^o quæ fuit æquivalens imò et superabundans; 3^o quæ ex propriis et aliàs indebitis; 4^o quæ, quantum satis est, ad alterum; 5^o tandem, quæ ad strictos justitiæ apices. Atqui sic se habuit satisfactio à Christo loco nostro exhibita. Fuit enim voluntaria: *Oblatus est quia ipse voluit*, inquit Isaias, cap. 53, v. 7, quæ conditio ab omnibus theologis Christi satisfactionibus adscribitur, et Dissertatione sequenti cap. 2, ubi de Libertate Christi commodius disseremus, patebit ad fidem pertinere. Fuit etiam ad compensandam injuriam Deo per peccatum illatam, et iratum numen placandum; ut ex multis Scripturarum testimoniis capite præcedenti allatis facillè colligitur. Cum porrò hanc fuisse æquivalentem aliisque præditam enumeratis dotibus satisfactioni perfectæ necessariis, non sine aliquâ discussione probari possit, idcirco de iis sigillatim, totidem articulis dicendum est.

ARTICULUS PRIMUS.

Ostenditur Christi satisfactionem fuisse æquivalentem et superabundantem.

Varias de satisfactionis Christi condignitate seu æquivalentiâ opiniones theologorum refert cardinalis de Lugo Dissert. 6 *de Incarnat.*, sect. 1, his verbis: « Negaverunt nonnulli satisfactionem Christi esse de se æqualem, quos refert Vasquez. Dissert. 5, cap. 1, quorum aliqui dicunt fieri æqualem ex Dei acceptance; alii non judicant nec hâc ratione accipere condignitatem, sed Deum eam acceptare ac si esset condigna. Utrique tamen concedunt habuisse Christi opera longè majorem congruitatem ad acceptance, quàm opera puri hominis, et ad hoc fuisse necessariam Christi satisfactionem ut scilicet congruenter acceptarentur à Deo pro nostris peccatis. Communis et vera sententia affirmat opera Christi Domini habuisse ex se sufficientem valorem et condignitatem ad satisfaciendum pro peccatis. Hæc est communis inter theologos. » Hactenùs cardinalis de Lugo. »

Observandum autem diligenter in actionibus

Christi triplicem distinguendum esse valorem, nimirum essentialem seu objectivum, accidentalem et substantialem qui et personalis dici potest. Valor objectivus seu essentialis, desumitur ex objecto et fine actionis. Idcirco nuncupatur essentialis, quòd ex iis repetatur sine quibus actio etiam hominis puri esse non potest. Valor accidentalis ex statu gratiæ sanctificantis quâ Christus instructus est, et ex intensione ejus operum æstimatur. Dicitur accidentalis, quia sine iis ex quibus desumitur, posset esse actio hominis puri. Valor substantivus seu personalis petitur ex dignitate personæ satisfaciens, et duplex est, alter radicalis seu fundamentalis, alter derivatus. Valor radicalis seu fundamentalis actionum Christi oritur ab ejus personâ quatenus à seipso in pretium et victimam pro nobis et loco nostro oblata. Reperitur ille valor in omnibus actibus sacrificii à Christo peractis. Valor derivatus ille est qui petitur à dignitate personæ solum ut à circumstantiâ dignitatem actioni conferente. Sic se habebat valor actuum humiliationis, demissionis, amoris divini, etc., quos Christus exercuit.

Certum est et ab omnibus admittitur valorem tum objectivum seu essentialem, tum accidentalem actionum Christi esse finitum. Intensio enim ejusmodi actionum utpote ab humanâ Christi naturâ elicitarum necessariò fuit finita. Gratia sanctificans quâ illa humanitas ornatur, quantacumque sit, attamen est etiam finita. Objectum verò et finis in eorum dignitatem nonnisi finitè influebant, quemadmodum et in puri hominis operibus. Agitur ergo tantum de valore qui ex dignitate personæ Christi fluxit, seu radicali, seu derivato. Utrum scilicet compensandæ injuriæ per peccatum Deo illatæ æquivalens fuerit et superabundans?

CONCLUSIO. Satisfactio Christi non tantum fuit æquivalens, sed etiam superabundans.

Utraque Conclusionis pars planè videtur certis argumentis nixa. Probatur prior, 1^o ex Scripturis. S. Paulus Hebr. cap. 7, v. 27, cap. 9, v. 14, 25 et 28, et cap. 10, v. 10, 12 et 14, sacrificii à Christo in cruce oblatis excellentiam præ sacrificiis veteribus inde demonstrat, quòd satis fuerit ad *exhaustiendâ peccata et emundandam conscientiam nostram* Christum semel offerri; dum contra necesse fuerat frequentissimè iterari sacrificia antiquæ legis quibus *impossibile erat... auferri peccata*. Atqui nisi per sacrificium crucis Deo ad æqualitatem

Christus satisfecisset, illud S. Pauli ratiocinium non satis fuisset firmum. Etenim si unica sacrificii Christi oblatio condignæ seu æquivalenti satisfactioni non suffecisset, quare illud sacrificium non debuisset multoties iterari, ut et sacrificia vetera? Ergo iterationis ejusmodi sacrificii inutilitas quam adstruit Apostolus, certum est ejus condignitatis argumentum; proindeque, etc. Idem S. Paulus, Rom. 5, v. 15: *Non sicut delictum, inquit, ita et donum. Si enim unius delicto multi mortui sunt, multò magis gratia Dei et donum in gratiâ unius hominis Jesu Christi in plures abundavit.* Et v. 17: *Si unius delicto mors regnavit per unum, multò magis abundantiam gratiæ et donationis et justitiæ accipientes in vitâ regnabunt per unum Jesum Christum.* In duplici illo textu maximè ad has attendendum voces, *multò magis*, quibus Apostolus se à fortiori arguere significat. *Gratia* igitur *et donum* propter merita et satisfactiones Christi abundare debuerunt ex Apostolo in eos qui per peccatum mortui erant, seu iis *abundantia gratiæ et donationis et justitiæ* per Christum dari debuit; ergo saltem æquivalens fuit Christi satisfactio.

Idem Apostolus 1 Cor. 6, v. 20: *Empti estis, inquit, pretio magno.* Ibidem 7, v. 23: *Pretio empti estis.* Et S. Petrus, Epistolæ suæ 1 cap. 1, v. 18: *Non corruptibilibus auro vel argento redempti estis... sed pretioso sanguine quasi agni immaculati Christi, et incontaminati;* et Epist. 2 cap. 2, v. 1: *Erunt magistri mendaces qui... eum qui emittit eos Dominum negant.* Quibus in locis 1º dicimur pretio empti, quæ metaphora æqualitatem designat. 2º Pretii illius quo sumus empti magnitudo et valor extolluntur; atqui tamen magnitudo et valor pretii non condigni extolli non merentur; ergo, etc.

Probatur 2º ex Clemente VI, qui in Constitutione quæ incipit, *Unigenitus*, datâ anno 1320, ut Jubilæus anno duntaxat centesimo antea celebratus ad quinquagesimum reduceretur; ait, Christum « in arâ crucis... non guttam sanguinis modicam, quæ tamen propter unionem ad Verbum pro redemptione generis humani suffecisset, sed (eum) copiosè velut quoddam profluvium... effudisse. » Et inferius satisfactiones et merita Christi *infinita* esse nos docet. Hæc verò tradit ut thesaurum Ecclesiæ ex meritis Christi conflatum, non posse exhauriri ostendat.

Probatur 3º ex SS. Patribus. S. Cyrillus Hierosolymitanus, Catechesi 13, n. 2: « Neque mirum, ait, tibi videatur totum orbem (cruce

« Christi) redemptum esse. Non enim nudus « homo, sed unigenitus Dei Filius erat, qui eâ « causâ moriebatur.... Si primus hominum de « terrâ fictus universalem mortem attulit; qui « illum finxit è terrâ, nonne cùm ipse sit vita, « vitam æternam afferet? Si Phinees zelo accensus, interempto fœdæ actionis auctore, « iram Dei placavit; Jesus, non alium interficiens, sed semetipsum in pretium tradens, « numquid iram adversus homines non dissolvit? » Et n. 33: « Dei, inquit, sapientiam « conspicare: suam servavit et sententiæ firmitatem, et bonitati efficaciam. Assumpsit « Christus peccata in corpore (suo) super lignum, ut nos per mortem ejus peccatis « mortui justitiæ viveremus. Non minimi pretii « erat qui pro nobis moriebatur; non erat ovis sensibilis, non erat nudus homo, non erat solummodò Angelus; sed Deus inhumanatus. « Non tanta erat peccantium iniquitas, quanta « ejus, qui nostri gratiâ moriebatur, justitia. « Non tantum peccavimus, quantum ille excelsit qui pro nobis animam posuit. » S. Chrysostomus, Hom. 10 in Epistolam ad Rom. n. 2: « Quemadmodum, inquit, si quis hominem « obolos sibi decem debentem in carcerem « tradat; neque ipsum solum, sed etiam uxorem, filios et famulos propter ipsum. Alius « verò accedens, non decem tantum obolos « numeret, sed etiam decies mille talenta auri... « Qui decem obolos commodaverat, eorum ultra reminisci non poterit; sic et in nobis « contigit. Longè plura quam debeamus solvit « Christus, et tantò plura quantum immensum « pelagus ad stillam aquæ collatum, majus est. » S. Anselmus lib. *de Conceptu virginali et peccato origin.* cap. 22: « Deus, inquit, non exigit ab ullo peccatore plusquam debet. Sed « quoniam nullus potest reddere quantum debet, solus Christus reddit pro omnibus qui « salvantur plusquam debent. » Ex his testimoniis quibus alia addi possent, perspicuum est juxta sanctos doctores non tantum ad æqualitatem et æquivalenter, sed etiam ad cumulum et superabundanter Christum pro nobis satisfecisse; ergo, etc.

Probatur 4º eadem prima conclusionis pars ratione theologicâ. Valor satisfactionum Christi infinitus est. Nam valor satisfactionis, ut aliquando probatum est et ex jure naturali et civili evidentissimum fit, ex dignitate personæ satisfaciendæ sumi debet, adeò ut quò major sit dignitas personæ quæ ad satisfaciendum, sese liberè humiliat et pœnæ subjicit; eò ma-

jus sit pretium seu valor satisfactionis quam exhibet. Cum ergo Christus sese, ad Deo satisfaciendum, ut homo humilians ac demittens, et pœnæ subjiciens, sit persona dignitatis et majestatis infinitæ, ipse scilicet Filius Dei, qui cum in formâ Dei esset inquit Apostolus..... (ut nos redimeret) *formam servi accepit*; sequitur actibus satisfactoriis quos humanitate suâ elicit, quatenus ab eo procedunt, valorem inesse infinitum. Jam verò valor satisfactionis Christi infinitus esse non potest, quin æquivalens et condignus fuerit. Etenim, si spectetur in ordine ad pœnam quæ peccato debetur, evidens est hanc pœnam, licet duratione infinitam, tamen satisfactionibus infiniti valoris ad æqualitatem expungi et persolvi; quod jam à nobis cap. præced. observatum est. Si autem spectetur in ordine ad injuriam compensandam, de quâ potissimum agitur, nulla pariter difficultas. Nam, ut Dissert. 5, cap. 5, explicavimus, tres sunt de gravitate injuriæ Deo per peccatum illatæ theologorum opiniones: ab aliis dicitur finita etiam in genere offensæ nec ad ordinem pertinens satisfactiones cujusvis puræ creaturæ absolutè superantem; ab aliis statuitur finita quidem intrinsecè, sed tamen cujuslibet creaturæ possibilis satisfactiones excedens; ab aliis ponitur infinita intrinsecè et simpliciter. Porro, etiamsi gravitas peccati lethalis censeretur infinita intrinsecè et simpliciter, nihilominus illi ad æqualitatem compensandæ pares essent satisfactiones Christi; namque propter summam ejus personæ dignitatem, perinde saltem dicendæ sunt infinitæ, ac gravitas peccati propter supremam numinis offensi majestatem infinita in genere offensæ dici potest; ergo, etc.

Probatur altera pars conclusionis, nempe satisfactionem Christi fuisse superabundantem, 1^o ex modo adductis Scripturæ locis, præsertim ex vers. 15 et 17 cap. 5 Epist. ad Rom., ubi Apostolus docet debuisse per Christum *abundare* gratiam et dona Dei in homines peccato detentos. Quibus testimoniis et illud addendum est ejusdem Apostoli ibid. v. 20: *Ubi abundavit delictum, superabundavit gratia*. Namque in ejusmodi testimoniis tanquàm indubitatum ponit S. Paulus, id ex naturâ rei, seu ex meritorum et satisfactionum Christi indole, consequi, ut gratiæ et dona sibi ejusmodi satisfactionum fructum applicantibus collata, majora sint quàm delictum, et *superabundent*. Atqui id falsum esset nisi satisfactiones Christi superabundantes fuerint; si enim fuissent

solum condignæ, non superabundantes, potuissent Deo exhiberi, et ab ipso accipi, quin donum magis quàm delictum abundasset, proindeque nullus supra observato Apostoli in hanc rem ratiocinio locus relinqueretur.

Probatur insuper ex laudatis testimoniis Clementis VI et SS. Cyrilli Hieros. Chrysost. et Anselmi, qui clarè et perspicuè tradunt, ut modò advertimus, superabundantes fuisse Christi satisfactiones. Quibus addendi S. Leo sermone 12 de passione et sermone 1 de Ascensione, S. Agapetus I, S. P., in Epistolâ de duabus Naturis, ad Antimum, S. Bernardus, sermone 22 in Cantica, Petrus Cluniacensis in opusculo quod *Nucleus* inscribitur, etc.

Probatur denique ratione theologicâ. Vel gravitas peccati mortalis in genere offensæ est tantum intrinsecè finita et ordinis quem satisfactiones puri hominis possint absolutè exæquare, ut placet Scotistis; vel, etsi non infinita intrinsecè, pertinet tamen ad ordinem satisfactionis puri hominis absolutè excedentem, ut Suarez et alii sentiunt; vel est infinita simpliciter et intrinsecè, ut docent Thomistæ. Atqui, quidquid eâ de re statuatur, planum est superabundantes fuisse Christi satisfactiones. Nam 1^o, seu gravitas peccati lethalis ponatur finita atque hominis puri satisfactionum ordinem non excedens, seu dicatur ejusmodi ordinem excedere, planum est superabundantes fuisse Christi satisfactiones; quippe cum valor earum simpliciter infinitus sit, utpote ex dignitate derivatus personæ infinitæ sese ad satisfaciendum humiliantis et in pretium ac victimam offerentis. 2^o Si gravitas peccati mortalis sit infinita simpliciter in genere offensæ, adhuc superabundantes concipiuntur satisfactiones Christi; nam ex uno tantum capite infinita dici potest offensa mortalis in genere moris, nempe propter dignitatem infinitam Dei offensi supra personam offendentem. Atqui, non uno tantum sed duplici de titulo valor satisfactionum Christi est infinitus; 1^o quia ejus actus satisfactorii sunt humiliactiones, subjectiones, opprobria, dolores personæ infinitæ, hæc omnia ad satisfaciendum liberè sustinentis et impendentis; 2^o quia ejusmodi actibus sese redemptionem et pretium pro nobis exhibuit et in victimam loco nostro obtulit et substituit. Satisfecit enim pro nobis Christus, sese eò usque humiliando et depri-mendo, ut semetipsum, ipsam suam personam, prout naturam humanam sustentat, victimam loco nostro constituerit, et ad nos

redimendos in pretium dederit; ergo, etc. Et verò quidquid de gravitate peccatorum mortalium in genere offensæ definiatur, illud saltem fatendum est gravitatem uniuscujusque peccati non posse esse undequâquē infinitam etiam in genere moris; aliàs enim omnia peccata mortalia essent æqualia. Constat præterea gravitatem maximi peccati lethalis ab hominibus admissi vel etiam omnium ab iis commissorum aut committendorum, non esse quoque undequâque et in omni ordine infinitam. Et enim manifestissimum est ex eo semper minui ejusmodi gravitatem, quòd peccans nonnisi valdè imperfectè majestatem quam offendit cognoscat. Porro, quis non videt satisfactiones quas Christus seipsum humiliando, deprimendo, litando, in redemptionem et pretium dando exhibuit, superioris esse ordinis majorisque æstimationis in ratione valoris ac meriti, quàm possit esse in genere offensæ gravitas illa peccati lethalis, quæ, quantumvis simpliciter et intrinsecè, nonnisi tamen in aliquo genere infinita dici potest?

Denique una sanguinis Christi gutta exhibendæ pro nobis satisfactioni infinitæ sufficisset juxta Clementem VI, in constitutione supra laudatâ, quod et aliàs facillè evincitur, siquidem in satisfactionem pro peccatis nostris Christus ejusmodi sanguinis guttam effundendo, sese ad compensandam injuriam per ejusmodi peccata Deo illatam humiliasset, et rem quæ infinitum pretium ex unione et Verbum consequebatur, obtulisset. Ergo, cum totum Christus sanguinem effuderit, cum insuper deprecationes *ad Deum cum clamore valido* obtulerit, immensos labores sustinuerit, doloribus et opprobriis saturari voluerit, ac tandem usque ad mortem crucis subeundam se humiliaverit, nonne evidens est ab ipso superabundanter satisfactum fuisse?

SOLVUNTUR OBJECTIONES. — Obj. 1°: Qui pro injuriâ infinitâ satisfecit per actiones finitas, is non satisfecit æquivalenter, multò minus superabundanter; atqui injuria quæ peccato lethali Deo infertur, infinita est, actiones verò quibus Christus satisfecit erant finitæ; actiones enim illæ erant finitæ quæ producebantur ab humanitate Christi; atqui actiones quibus Christus satisfecit, nempe humiliações, oblationes, etc., producebantur ab ejus humanitate; nec enim nisi impiè et absurdè naturæ divinæ adscriberentur; ergo, etc. Dist. maj., qui pro injuriâ infinitâ satisfecit per actiones finitas tum physicè tum mora-

liter, is non satisfecit, etc., concedo; per actiones finitas physicè tantum, moraliter verò infinitas, seu infiniti valoris, nego. Itaque actio satisfactoria spectari potest vel physicè, vel moraliter. Spectatur physicè cum consideratur ejus entitas; spectatur verò moraliter cum ejus dignitas in ratione operis satisfactorii attenditur. Actionibus physicè finitis Christus satisfecit, siquidem actiones illæ à naturâ finitâ, nempe à naturâ humanâ quam assumpsit, eliciebantur, hujusque erant naturæ modificationes. Verum eadem ejusmodi actiones moraliter erant infinitæ, in ratione operis satisfactorii; ex infinitâ enim dignitate personæ Christi eas per humanitatem suam producentis, valorem infinitum consequebantur, ut sæpius dictum est. Neque mirum videri debet actionibus Christi finitis physicè valorem moraliter et in genere satisfactionis infinitum competere; id enim necessariò ex isto sequitur principio, secundum personæ satisfaciendæ dignitatem crescere valorem actûs in satisfactionem exhibiti; quod quidem principium evidentissimum est, et in humanis etiam locum habet. Etiam si enim satisfactio exhibita à plebeio iisdem consisteret actionibus physicis, quibus ea quam impenderet princeps, constitueretur; nemo tamen non videt istam longè majoris valoris et dignitatis extituram priore. Licet igitur actiones quibus Christus Dominus pro nobis satisfecit, physicè et quantum ad suam entitatem finitæ fuerint, attamen, cum essent actiones Theandricæ seu Dei Hominis, ex divinâ ejus personâ sese per humanitatem humiliantis et immolantis, dignitatem et valorem infinitum habuerunt. Proindeque, posito etiam quòd malitia peccati in genere offensæ simpliciter et intrinsecè esset infinita, quòd hic non expendimus, attamen Christus pro peccatis nostris non tantum ad æqualitatem, sed etiam ad cumulum et superabundanter satisfecisset.

Instabis 1°: Valor actionum à naturâ finitâ elicitarum non potest esse nisi finitus; atqui actiones quibus Christus satisfecit, à naturâ finitâ, nempe ab ejus humanitate elicite sunt; ergo.

Dist. maj.: Valor actionum à naturâ finitâ elicitarum non potest esse nisi finitus, si persona finita sit, concedo; si persona sit infinitæ dignitatis, subdistinguo: Valor objectivus et accidentalis, concedo; valor substantialis, seu radicalis, seu derivatus, nego. Jam observavimus actiones naturæ finitæ, ac proinde actio-

nes ab ipsâmet humanitate Christi elicitas nonnisi finito valore essentiali et accidentali insigniri posse; seu quod idem est, quem sive ab objecto et fine, sive à gratiâ habituali et ab intensione valorem consequuntur, hunc necessario esse limitatum. Idem statuendum est etiam de valore substantiali seu ex personæ dignitate derivato, ubi persona finita est. At verò, si persona satisfaciens sit dignitatis infinitæ, certè valor actionum quas naturâ sibi hypostaticè unitâ, ad satisfaciendum eliciet, valor, inquam, ejusmodi actionum substantia-
 jis seu personalis, id est ex dignitate personæ satisfaciens diffluens et manans, summus et infinitus dicatur necesse est. Actiones, ut fert vulgare axioma, sunt suppositorum. Cùm igitur natura humana Christi actus obedientiæ, humiliationis, sacrificii, etc., exercebat, ipsi Christo, ipsi Verbi divini personæ humanitatem terminanti et sustentanti, hæ actiones ut supposito per hanc naturam operanti verè tribuendæ sunt. Quis autem in actionibus personæ divinæ ad satisfaciendum opprobriis ac doloribus se submittentis, et semetipsam in victimam offerentis non agnoverit virtutem satisfaciendi infinitam? Jam porrò Christus nec actionibus suis satisfactoriis physicè sumptis, nec iisdem ratione valoris seu essentialis aut objectivi, seu accidentalis consideratis pro nobis satisfecit, sed tantùm valore earumdem substantiali et personali, ex dignitate scilicet suæ personæ orto, ut multoties explicatum est; ergo.

Instabis 2º: Valor satisfactionis non potest ex eo desumi quod in actiones satisfactorias non influit; atqui persona divina Christi non influit, etc.; ergo. Dist. minorem: Divina Christi persona non influit in actiones ejus satisfactorias, ut principium *quo*, seu ut natura aut facultas quâ eliciantur, concedo; ut principium *quod*, id est ut persona agens per humanitatem, nego. Principium *quo*, est natura aut facultas quâ persona agit; principium *quod* est ipsum suppositum seu persona per facultatem agens, seu ejus juris est natura aut facultas quâ actio elicitur. V. g., Petrus est principium *quod* suæ volitionis, mens et voluntas sunt ejusdem actûs principium *quo*. Manifestum est divinam Christi personam nec esse, nec esse posse principium *quo* actionum quibus Christus satisfecit; sed earum est principium *quod*; quia persona divina Christi habet personaliter sibi unitam naturam humanam quâ actus satisfactorii producti sunt: adeò ut,

cùm actiones sint suppositorum, actus satisfactorii verè dicendi sint actus divinæ Christi personæ ut naturam quam assumpsit terminantis et sustentantis.

Instabis 3º: Persona divina seipsam subijcere non potest; ergo fictitius est ille valor quem ex infinitate personæ Christi sese humiliantis, submittentis, et offerentis, derivari volumus. Dist. ant.: Divina persona secundum se, et in propriâ naturâ seipsam subijcere non potest, concedo; in naturâ assumptâ, seu prout terminans naturam humanam, nego. Enimverò hæc Apostoli verba Philip. 2, v. 6 et seqq. *Qui cùm in formâ Dei esset... humiliavit semetipsum factus obediens usque ad mortem*, et alia ejusmodi benè multa quæ in Scripturis sæpè occurrunt, humiliationes, et obedientiam ad ipsum Christi suppositum referunt; quod suppositum ipsa est Verbi divini persona naturam humanam terminans. Atque id ipsum est in quo mirum in modum summa emicat Dei sapientia, ut, quod Filius divinus in suâ propriâ naturâ ad nos liberandos et Deum placandum exequi non poterat, illud noverit in naturâ assumptâ sine supremæ suæ majestatis immutatione et detrimento, perficere et exequi.

Obj. 2º: Ubi effectus procedit à duplici causâ, alterâ finitâ, alterâ infinitâ, effectus finitus est, ut patet in actionibus creaturarum ad quas Deus concurret; ergo, etsi satisfactiones Christi à personâ Verbi quæ infinita est accipiant dignitatem, cùm tamen à naturâ humanâ Christi quæ finitâ est producantur, sequitur earum valorem esse finitum. Dist. ant.: Ubi duæ causæ quarum una est finita, altera infinita, influunt physicè in eundem effectum, tunc effectus est finitus, concedo; si causa infinita influat moraliter in valorem actionis, et eatenus influat quatenus est suppositum naturæ actum elicientis, nego. Itaque in eo deficit paritas, quòd ubi agitur de effectibus physicis simul à Deo et creaturâ productis, necesse est ut effectus sequatur conditionem causæ finitæ quæ in eum totum physicè influit. Ratio est quia causa finita non potest producere nisi effectum finitum. At verò, ubi persona infinita influit moraliter in valorem operis satisfactorii elicit à naturâ finitâ quam sibi assumpsit, nihil vetat quominus ut suppositum summè dignum per hanc naturam agens, valorem influat infinitum, licet ille actus quatenus producit physicè et quantum ad entitatem finitus sit. Imò, hæc duo in satisfactoriis Christi operibus reverà concurrere, seu hæc opera esse

simul ratione entitatis finita, et valoris infiniti ex dictis manifestum est.

Obj. 3^o : Illa satisfactio non fuit æquivalens quam Deus liberè acceptavit ; atqui Christi satisfactionem Deus liberè acceptavit ; siquidem liberè consensit ut pœna à peccatoribus solvendo imparibus debita in Christum transferretur ; ergo, etc.

Distinguo maj., quam Deus liberè acceptavit seu potuit non acceptare positâ etiam substitutione Christi in locum nostrum, concedo ; antecedenter ad ejusmodi substitutionem, nego. Eo igitur sensu satisfactio Christi acceptance indiguit, quòd opus fuerit Deum liberè consentire ut Christus in locum nostrum ad satisfactionem exhibendam substitueretur. Nobis Deus potuisset pœnam quam debebamus infligere, nec nisi ex summâ misericordiâ voluit Christum sponsorem nostrum constitui, qui pro nobis solveret. At, posito decreto Christum loco nostro subrogandi, Deus non potuit exhibitas sibi à Christi satisfactiones posthabere, sed eas utpote æquivalentes et superabundantes ab illo acceptari omninò necesse fuit ; ergo, etc.

Obj. 4^o : Satisfactiones Christi superabundantes fuisse duplici potissimum ratione probavimus, quarum una est Christum ipsam suam personam, ut terminantem naturam quam assumpsit, ad satisfaciendum pro nobis Deo obtulisse ; atqui hæc ratio nulla est. Eâ enim supponitur oblationem personæ infinitæ esse valoris infiniti ; quod tamen admitti nequit, aliàs Beata Virgo, imò nos ipsi possemus pro genere humano satisfacere, Christum Dominum offerendo ; ergo, etc.

Nego min., ad probationem, distingo : Ratione à nobis allatâ supponitur oblationem personæ infinitæ ab hac ipsâ personâ spontè peractam, esse valoris infiniti, concedo ; secus, nego. Nuda personæ Christi oblatio, qualis à Beatâ Virgine peragi potuit et à nobis ipsis inter orandum fieri potest, nullam personæ Christi depressionem, humiliationem, et maculationem secum infert atque importat, nullum etiam in Christi personam dominium speciale includit ; quapropter nonnisi objectivè et extrinsecè infinita dici potest, intrinsecè verò et reipsâ poni debet finita. At verò, cùm Christus suam ipsam personam ut terminantem suam humanitatem Deo pro nobis in victimam obtulit, atque idcirco pœnis, opprobriis ac morti spontè subjecit, ille actus 1^o summam personæ illius infinitæ ut naturam humanam terminantis depressionem secum importabat ; 2^o exerceba-

tur vi dominii quod Christo Domino ut homini in seipsum competeat. Ergo in oblatione sui ipsius in victimam à Christo peractâ, quidquid ad valorem in genere satisfactionis summum et infinitum necessarium est, occurrit, illud contra deest in oblationibus illis Christi Domini quas unusquisque inter orandum exercere potest.

Obj. 5^o : Idem argumentum quo valor satisfactionum Christi probatur infinitus, probaret etiam singulos actus ejus satisfactorios fuisse infiniti valoris ; atqui posterius falsum est. Nam si unusquisque actus satisfactorius quem Christus elicit valore donatur infinito, ergo 1^o omnes actus ejus satisfactorii sunt æqualis valoris, siquidem non datur infinitum majus infinito ; sed absurdum foret æqualem valorem omnibus satisfactoriis actibus Christi attribuere : quis, v. c., tantam ad satisfaciendum vim adscribet alicui orationi Christi, quàm actibus amoris, sacrificii et subjectionis, quibus sese passionis doloribus et ipsi etiam neci objecit : quis totam actuum satisfactoriorum à Christo elicitorum collectionem non majori ad satisfaciendum virtute præditam existimabit, quàm unum tantum hujusce collectionis actum ? Ergo 2^o inutilis fuisset mors Christi : quippe quam non subisset nisi post jam à se elicitos infiniti valoris satisfactorios actus.

Nego min. Ad primam probationem, respondent multi valorem substantialem seu ex dignitate personæ satisfaciens petitem, unum eundemque inesse omnibus actibus Christi satisfactoriis, atque eos omnes hac ratione esse planè æquales. Negant verò id esse absurdum, nam, inquiunt, valor ex eodem infinito fonte scaturiens, nempe ex dignitate personæ infinitæ, infinitus sit, et semper æquè intensus necesse est. Argumenta autem quibus hæc satisfactoriorum actuum Christi impugnatur æqualitas, solùm ubi de valore ejusmodi actuum essentiali aut accidentali agitur, locum habere posse statuunt, atque ea ad valorem eorundem actuum personalem vetant referri. Nobis tamen videtur eos actus satisfactorios Christi quibus major involvebatur ejus personæ depressio, majorem ex hujusce personæ dignitate consequi debuisse valorem. Comparatione aliquâ liceat rem explicare : fingamus animo duo corpora cylindrica, inter se secundum crassitiem diversa, infinitè verò secundum longitudinem protensa ; evidens est duo illa corpora, etsi longitudine paria et perinde infinita, ita differre tamen à se invicem, ut infinitas longitudinis, ita

crassiori corpore, quantitati materiæ majori applicetur. V. g., si diametri crassitiei ejusmodi corporum sint ut unum et duo, infinitas longitudinis ut ex geometris liquet, in crassiori afficiet quadruplicem materiæ molem; ex quo sequitur corpus illud crassius etsi non longius altero, esse tamen ad illud ut quatuor ad unum, et æquivalere quatuor corporibus quæ minori corpori crassitie paria forent, et infinitè secundum longitudinem protensa. Simili quâdam ratione majorem valorem adscribimus actibus satisfactoriis quibus sese Christus coram Deo magis nostri causâ humiliavit. Nempe, etsi res ejusmodi subicere calculis nefas sit, attamen optimè concipitur valorem personalem et infinitum actûs alicujus satisfactorii, fuisse ad valorem similem alterius actûs, ut depressio et humiliatio Christi illo actu comprehensa, ad humiliationem altero actu inclusam se habebat. His verò præmissis sic in formâ: Distinguo: Ergo omnes actus satisfactorii à Christo elicitæ sunt æqualis valoris, quâ parte sunt ejus voluntariæ humiliationes, abstrahendo ab ejusmodi humiliationum gradu, concedo; quâ parte involvunt ejusdem voluntarias humiliationes majores vel minores, nego. Actibus quibus Christus ad compensandam injuriam Deo per peccata illatam, sese coram eo spontè humiliavit, ejusmodi, inquam, actibus secundum omnes illorum gradus applicatur valor ille infinitus qui ex ipsius personæ sese voluntariè propter Deum deprimentis oritur. Quapropter, etsi omnes illæ actiones valorem infinitum ex ejusmodi infinitate personæ satisfaciens consequantur, et sub eo respectu pares sint, attamen, habitâ ratione depressionis et humiliationis voluntariæ majoris vel minoris quam includunt, una earum potest pluribus aliis æquivalere, proindeque, etc.

Ad secundam probationem, nego sequelam. Non necessaria quidem fuit de se mors Christi, ut condigna satisfactio pro nobis ab ipso exhiberetur, cum una sanguinis ejus gutta, ut vidimus, nobis redimendis sufficere potuisset. Sed omninò necessaria fuit illa mors 1^o, juxta decreta Dei, qui multis sapientissimis de causis genus humanum nonnisi meritis mortis Christi salvare statuerat. *Si posuerit pro peccato animam suam*, inquit Isaias, 53, v. 10, *videbit semen longævum*. Hinc præceptum pro nobis moriendi Christo impositum, Isaiæ 53, v. 5 et 6, Joan. 10, v. 18, Philip. 2, v. 8. 2^o Necessaria fuit juxta intentionem Christi, qui, tum ut voluntati patris sese perfectius subiceret, tum ut

nobis majora daret amoris signa, nosque à vitio efficacius retraheret, et ad virtutem fortius alliceret, suâ morte voluit perfici et consummari negotium nostræ salutis, adeò ut eam solam per se obtulerit intentione satisfaciendi, cæteros verò actus suos per se independentes à morte suâ ad hunc finem dirigere noluerit. Quæ quidem ex Scripturis constant, redemptionem nostram, liberationem et salutem virtuti mortis Christi perpetuò alligantibus.

Obj. 6^o: Valor actionum Christi non est increatus, aliàs ab æterno existeret; sed quod non est increatum, creatum sit, ac proinde finitum, necesse est, ergo. Dist. min.: Quod non est increatum, creatum sit, etc., si sit ens physicum et entitate quâdam physicâ præditum, concedo; si sit tantum aliquid morale in relatione quâdam actionis ad dignitatem personæ agentis solum consistens, nego. Valor satisfactionum Christi nec creatus est nec increatus, quia solum ens physicum creari potest. Consistit verò ille valor in aliquo morali, id est in relatione quâdam actionis satisfactoriæ ad personæ satisfaciens dignitatem, quâ relatione datur fundamentum morali seu prudenti æstimationi actionis. Neque ejusmodi valor in genere moris à nobis hic fingitur ut Christi satisfactionum infinitati explicandæ usui nobis sit. Nam honestas et meritum actionum moralium, valor satisfactionum quas aliquando homines personis à se læsis seu proprio motu, seu juxta leges humanas impendunt, gravitas pariter vel levitas offensæ, hæc sunt totidem entia, si ita loqui fas est, moralia, in relationibus quibusdam posita justæ æstimationi fundamentum præbentibus.

Obj. 7^o: Si valor actionum Christi fuit infinitus, potentia Dei in ordine ad hunc valorem fuit exhausta; sed hoc absonum videtur; ergo, etc. Nego maj. 1^o Quia saltem numericè et extensive posset divina virtus ulterius progredi, si nempe mysterium ejusmodi denuò produceretur. 2^o Quia aliud est Dei potentiam esse exhaustam, aliud est nullum esse ulteriorem terminum possibilem qui attingi possit. Prius importaret privationem aliquam et defectum virtutis, quia supponeret dari terminum ulteriorem possibilem, quo potentia divina non posset pertingere. Posterius ejusmodi privationem non arguit, cum termini ulterioris possibilitatem neget. Ergo ex proposito argumento non sequitur potentiam Dei dici posse exhaustam, quemadmodum exhausta dici nequit scientia divina, eo quòd omne intelligibile

comprehendat, nec ulterior in eâ dari possit progressus.

ARTICULUS II.

Utrum satisfactio Christi fuerit ex propriis et ex aliis indebitis.

Vasquesius, Dissert. 8, cap. 4 et 5, post Joannem Medinam et alios quosdam theologos, censet Christum neque *ex propriis* neque *ex aliis indebitis* satisfacisse. Atque defectu hujusce conditionis arbitratur ejus satisfactionem licet condignam et superabundantem, non fuisse tamen perfectam ex rigore justitiæ. Ratio quam affert hæc est, Christum per bona opera humanitatis suæ satisfacisse, hæc verò opera magis fuisse sub dominio Dei quàm Christi secundum humanitatem considerati.

Suarez Dissert. 4, sect. 6, negat quoque Christum satisfacisse *ex propriis*. Sed à mox expositâ sententiâ in hoc recedit quòd nihilominus existimet Christi satisfactionem ex rigore justitiæ fuisse perfectam. Ipse audiendus est ex discrimine inter satisfactionem et restitutionem agnoscendo suam sententiam confirmans: « Restitutio, inquit, versatur in rebus datis et acceptis, quia per eam reparatur damnum illatum alteri in bonis suis. Satisfactio autem versatur in actionibus, quia per eam intenditur injuriæ recompensatio. Hinc fit ut in restitutione multum pendeat æqualitas ex dominio quod restituens vel in alium transferre potest; ad satisfactionis verò æqualitatem, hoc non est per se necessarium, sed sufficit illud dominium quod est intrinsecum operi libero. Satisfactio enim non fit nisi per opus liberum cujus operans est dominus, quia ratio satisfactionis non consistit in translatione dominii alicujus rei, sed in hoc solum ut tantum reverentiæ et honoris impendatur, quantum injuriæ illatum fuit. Et ideò quòd Deus habuerit dominium actionum Christi non repugnat cum justitiâ perfectâ illius satisfactionis. » Ita Suarez de conditione *ex propriis* statuit. Conditionem verò *ex aliis indebitis*, eo sensu satisfactioni Christi adscribit, quòd titulo justitiæ Christus actus satisfactorios Deo impendere aliàs non teneretur; licet titulo gratitudinis, dependentiæ, etc., omnia sua ad Deum deberet referre. Ad perfectam porrò et ex rigore justitiæ accuratam satisfactionem sufficere contendit titulo justitiæ aliàs non deberi eum valorem qui ad satisfaciendum exhibetur. Cardinalis de Lugo, de Incarn. Dissert. 4, sect. 3, n. 24, et 29, impugnata post Vasquesium Sua-

resii sententiâ supponit Deum, tametsi omnes satisfactorios humanitatis Christi actus titulo dominii, religionis, obedientiæ, etc., potuit exposcere seu præcipere et exigere à Christo, reipsa tamen eos sibi his titulis vindicare noluisse. Unde colligit actibus satisfactoriis à Christo liberè exhibitis effectum ut Deus honorem perciperet, in quem 1º, antequàm à Christo sibi offerretur, nullum habeat dominium, quemque 2º Christus ipsi reverà nullo titulo debebat. Sic explicat Lugo Christi satisfactionem fuisse *ex propriis* et *ex aliis indebitis*. Gonetus, de Incarn. Dissert. 4, a. 4, § 4, conditiones *ex propriis* et *ex aliis indebitis*, Christi satisfactioni cum plerisque Thomistis adjudicat. Explicandæ verò conditionis *ex propriis* triplicem modum probabilem existimat. Primus est, in satisfactione non attendi translationem dominii, sed solum honoris actu libero exhibiti condignitatem, seu æqualitatem, proindeque illam satisfactionem esse *ex propriis* et ad rigorem justitiæ quæ et injuriam illatam compensat, et fit actu libero. Alter est, dominium Dei in actus satisfactorios esse dominium commune et ejusdem generis ac illud quod in cætera omnia ipsi extrinseca exercet. Christo autem per humanitatem agenti competit dominium speciale in actus satisfactorios, illud nempe dominium quod competit personæ in eos actus quos liberè elicit. Porrò, ut dominium generale et commune Dei in actus satisfactorios non impedit dominium speciale quod in eosdem habet Christus, ita non potest officere ne Christus, quatenus satisfacit actibus in quos habet dominium illud speciale, dicatur satisfacisse *ex propriis*. Tertius modus explicandi conditionem *ex propriis* Goneto probabilis visus, iste est, valorem satisfactionum Christi oriri ex dignitate personæ Christi quæ est independens. Quod attinet ad conditiones *ex aliis indebitis*, existimat Gonetus, § 5, hanc competere satisfactioni Christi, quia, etsi titulo gratitudinis, dependentiæ, religionis, etc., Christus hos actus Deo deberet, attamen non ii erant illi tituli, qui materiam ejusmodi actuum multiplicari postularent, nec proinde qui pluralitatem debitorum inducerent; quidquid igitur diversi ejusmodi tituli exigebant, illud à Christo iisdem actibus quibus satisfacit, potuisse exhiberi et præstari.

Turnelius, Witassius, etc., opinantur Christi satisfactiones fuisse *ex propriis*, quia, etsi earum entitas et valor objectivus et accidentaliter essent sub dominio totius SS. Trinitatis, attamen

men valor earum personalis, qui ad compensandam injuriam per peccatum illatam impensus est, totus à divinæ Christi personæ dignitate oriebatur, ac ideò erat solius Christi satisfaciens. Quid sentiamus aperiet sequens.

CONCLUSIO. Etsi ipse valor personalis satisfactionum Christi, potuerit exigi à Deo, et hoc ipso quo extitit, sub dominio totius SS. Trinitatis per se fuerit constitutus, et ad Deum saltem ut ad finem ultimum à Christo debuerit referri; attamen Christus Dominus quantum ad rigorem justitiæ requiritur, *ex propriis et ex aliis indebitis* satisfecisse dicendus est.

Probatur prima pars, nempe valorem etiam personalem, seu radicalem seu derivatum actionum Christi, hoc ipso quo extitit, sub dominio totius Trinitatis constitutum fuisse. Nam 1º ille valor quamvis in aliquo morali totus consistat, Deo tamen extrinsecus est, alioqui non potuisset ipsi in satisfactionem offerri. Sed quidquid est Deo extrinsecum sub ejus dominio sit necesse est; ergo. Nec reponas valorem ejusmodi ex Verbi ipsius personæ naturam humanam terminantis dignitate esse ortum. Nam quocumque modo et sub quocumque respectu ille valor à Deo Verbo profluat, nihilominus dominio divino subjicitur, hoc ipso quo Deo extrinsecus est. 2º Nonne Deus potuisset exigere ut Christus ejusmodi valorem ad hunc vel illum finem referret, huic vel illi homini applicaret? nonne ipsi ita statuenti Christus homo debuisset parere? Potuit igitur Deus, secundum sapientiæ suæ leges, de illius valoris usu pro arbitrio statuere; ergo, etc. 3º Impossibile fuit ut Christus naturâ impeccabilis, valorem personalem suarum satisfactionum ad Deum non referret; sed in eum valorem Deus profectò dominium habet, quem ad eum referri necesse est; ergo, etc. 4º Quidquid est sub dominio voluntatis creatæ Christi, illud dominio Dei seu totius SS. Trinitatis subjici necesse est; atqui valor personalis satisfactionum Christi est sub dominio speciali voluntatis creatæ Christi; siquidem actus satisfactorios solâ suâ voluntate creatâ elicit, et eorum valorem eâdem solâ voluntate obtulit; ergo, etc.

Probatur secunda pars nimirum valorem etiam personalem satisfactionum Christi debuisse ad Deum ut ad finem ultimum referri. Enimverò, quidquid est Deo extrinsecum, quidquid dominio voluntatis creatæ subjacet, necessariò ad Deum ut ad finem ultimum debet referri; atqui, ex modò dictis, valor etiam personalis satisfactionum Christi Deo extrinsecus

est, neque enim ejus est attributum aut proprietas, aut modus; dominio quoque voluntatis creatæ Christi seu dominio personæ Christi per voluntatem humanam operantis subjicitur, ut pariter dictum est; ergo, etc. Præterea vel ad Deum ut ultimum finem à Christo referri debuit ille valor, vel ad alium finem, vel ad nullum; atqui absurdè et impiè diceretur ejusmodi valorem à Christo per humanitatem operante potuisse referri ad ultimum finem à Deo diversum, vel etiam ad nullum finem; ergo, etc.

Probatur ex Scripturis tertia et quarta pars simul, Christum videlicet, quantum ad rigorem justitiæ requiritur, *ex propriis et aliis indebitis* satisfecisse. Enimverò, satisfactio Christi in Scripturis nominibus emptionis, redemptionis, solutionis, pretii, etc., designatur, ut videre est 1 Cor. 6 et 7, 1 Petri 1, etc., quæ vocabula æqualitatem rigorosæ justitiæ exprimendi vim habent. Ergo satisfactio Christi, quantum ad rigorem justitiæ requiritur, *ex propriis et aliis indebitis* fuisse dici debet.

Probatur præterea tertia pars seorsim, ex ratione theologicâ. Ut Christus de suo seu *ex propriis* quantum ad rigorem justitiæ requiritur, satisfecerit, sufficit 1º valorem satisfactionum ejus à propriâ ejus personâ provenisse; 2º ipsum habuisse in eundem valorem aliquod speciale dominium, illud scilicet quod actui libero in sui valorem est intrinsecum. Atqui hæc duo Christi satisfactionibus conveniunt; ergo, etc. Major evincitur, quia vel illa duo, ut Christi satisfactio juxta rigorem justitiæ sit *ex propriis*, sufficiunt; vel insuper requirunt Deo nullum competere in valorem personalem satisfactionum Christi dominium nisi quod ex earum liberâ oblatione percipit; atqui, ut satisfactio Christi juxta rigorem justitiæ sit *ex propriis*, istud postremum minimè necessarium est. Etenim in satisfactione non agitur de transferendo alicujus rei dominium, sed tantum de redditione honoris. Modò igitur honos et ejus valor à personâ satisfaciente solum proveniat, non ex donis illius cui satisfactio impenditur; modò præterea is honos exhibeatur liberè, et offensæ illatæ æquivalet; parum interest, utrum is honos nequeat existere, quin etiam præter ejus oblationem sibi factam, in illum habeat quoddam dominium persona cui satisfit. Certè quidem eatenus tantum honos in compensationem injuriæ cuilibet exhibitus, vim satisfaciendi habere concipitur, quatenus ex dignitate personæ se deprimentis consequi-

tur valorem, et voluntariè seu liberè ab eà offertur; non verò quatenùs hujusce honoris dominium in eum cui satisfit transfertur; nec quisquam ad ejusmodi translationem dominii honoris cogitaverit, cùm purus homo coram altero homine se demittit ut ipsi satisficiat. Honor actu libero personam honorandam respiciente redditur, non translatione dominii; proindeque quòd valor personalis satisfactionum Christi non possit esse, quin hoc ipso, etiam citra ejus oblationem, sub dominio Dei ut et cætera omnia ipsi extrinseca constituantur, illud ad satisfactionem ejus se habet per accidens, nec impedire potest quominùs ipsa sit *ex propriis* quantum ad rigorem justitiæ necesse est; ergo, etc.

Minor porrò facilis est probatu. Valorem enim satisfactionum Christi à solà ejus personà totum provenisse patet, quia satisfecit Christus valore satisfactoriorum actuum suorum personali; atqui is valor totus oritur à dignitate solius personæ Christi ut dictum est. Natura quidem humana et facultates quibus eos actus Christus elicit, dona etiam gratiæ quibus illa humanitas instruitur, denique entitas ipsa actuum satisfactoriorum, sunt à totà SS. Trinitate; quapropter valor tum essentialis tum accidentalis ejusmodi actuum, tanquàm munus à SS. Trinitate derivatum, etiam spectandus est. At alia est ratio valoris personalis. Is à dignitate personæ Filii Dei sese per humanam naturam ad satisfaciendum humiliantis et deprimentis totus reperitur, nullà ad id formaliter interveniente SS. Trinitatis operatione; ergo valor satisfactionum Christi ab ipso solo totus profectus est. Jam porrò Christum in ejusmodi valorem habuisse speciale aliquod dominium, nempe illud quod intrinsicum est actui libero, seu quod idem est, illum valorem ab ipso liberè fuisse in satisfactionem impensum, testantur sacræ litteræ in quibus libertas Christi disertè exprimitur. *Oblatus est*, inquit Isaias, 53, v. 7, *quia ipse voluit. Ego*, ait ipse Christus, Joan. 10, v. 18, *pono eam* (animam meam pro ovibus meis) *à me ipso, et potestatem habeo ponendi eam*. Verùm Dissertatione sequenti ex professo libertatem Christi Domini adstruemus et exponemus; ergo, etc.

Probatur quoque seorsim ex ratione theologica quarta conclusionis pars, nempe Christum, quantum rigori justitiæ necesse est, satisfecisse *ex aliàs indebitis*. Nam duplex tantum causa posset officere quominùs *ex aliàs indebitis* Christus satisfecisset. Prior est, si

valor ejus satisfactionum titulo justitiæ, aut saltem titulo gratitudinis, id est, propter dona accepta Deo fuisset debitus, et ejusmodi extinguendo debito totus consumeretur; altera est, si alii tituli, puta religionis, finis ultimi, etc., eundem valorem ad Deum referri exigentes, actuum seu officiorum multipliciter de se etiam postularent; seu si Christus valorem actuum suorum in satisfactionem offerendo, simul aliis ejusmodi titulis non satisfecisset. Atqui propter neutram ejusmodi causam Christi satisfactio dici potest non esse *ex aliàs indebitis*. Primò enim nec titulo justitiæ, nec titulo gratitudinis, uno verbo non propter dona sibi collata Christus debuit Deo valorem satisfactionum suarum; valor enim ille infinitus est; quæcumque verò Christus à Deo accepit, nempe tum humana Christi natura, tum gratiæ quibus hæc natura ornatur, tum ipsa unio hujus naturæ ad Verbum, non sunt dona in se infinita; humana quippe Christi natura finita est, et quæcumque dona Christo concessa utpote in ejus humanitate recepta, finita sunt; ergo, etc. Secundò Christus satisfactiones suas ad compensandam injuriam Deo per peccatum illatam exhibendo, simul ea necessariò explevit quæ religio et obedientia, tum ratio finis ultimi, quæ Deo inest, ab eo postulabant. Includunt enim in se actus satisfactorii à Christo elicit, et eorum valoris oblatio perfectissimam excellentiæ et dominii Dei testificationem et agnitionem; ergo, etc.

Obj. 1^o: Valor satisfactionum Christi oritur à personæ ejus dignitate, imò ejus personam ut partem pretii includit; atqui valor ortus à dignitate personæ Christi, et ejus personam ut pretii partem includens, non est sub dominio Dei seu totius Trinitatis, cùm persona Christi sit ipse unigenitus Dei Filius necessariò existens et à nullo pendens; ergo, etc. Dist. secundam partem maj.: Ejus personam ut partem pretii includit, id est, valorem humiliationum voluntariarum et oblationis illius personæ ut terminantis naturam humanam, concedo; includit ejus personam in se sumptam et ratione sui ipsius, nego. Valor actuum quibus Christus satisfecit, potuit Deo exhiberi seu persolvi; sed divina Christi persona in se sumpta non potuisset hocce modo exhiberi Deo et persolvi; ergo divina Christi persona in se sumpta non est pars pretii quod pro nobis oblatum est. Quo sensu ergo dicitur persona Christi fuisse pars satisfactionum ejus? eo scilicet quòd actus satisfactorii quos humanà suà naturà elicit,

nempe actus humiliationis, depressionis et oblationis sui ipsius, ex personæ illius dignitate summum consecuti sint valorem, quo, etsi entitate finiti, infinitæ tamen exhibendæ satisfactioni pares fuerunt. Cum ergo ille valor ex dignitate personæ Christi derivatus, divinæ ejus personæ in se sumptæ extrinsecus sit, liquet illum esse sub dominio Dei ut supra probatum est.

Obj. adversus tertiam partem : 1^o Actus satisfactorios Christus naturâ suâ humanâ summis gratiæ donis instructâ elicuit; ergo, cum natura humana Christi et ejus dona à totâ SS. Trinitate provenerint, cùmque ejusmodi actibus SS. Trinitas concurrerit, evidens est actus illos fuisse dona SS. Trinitatis; poindeque Christum *ex propriis* non satisfecisse. 2^o Saltem Christi satisfactionum valor ex unione hypostaticâ proveniebat; atqui unionem hypostaticam tota operata est Trinitas, ut alibi docuimus. 3^o Vel valor satisfactionum Christi dicetur oriri à personâ Christi ut divinâ, vel à personâ Christi ut naturam humanam terminante, id est vel à Christo ut Deo, vel à Christo ut homine. Si prius, ergo saltem non sibi ut Deo, nec proinde ipsi etiam Trinitati Christus satisfecit *ex propriis*; si à Christo ut homine, ergo valor ejus satisfactionum non erit infinitus, utpote ortus à Christo sub eâ ratione spectato sub quâ infinitus non est; ergo, etc.

Ad primum, dist. conseq. : Actus satisfactorii, quoad entitatem, fuerunt dona SS. Trinitatis, concedo; spectati quantum ad valorem, subdist., quantum ad valorem essentialem et accidentalem, petatum nempe ex objecto, fine gratiæ et intensione, concedo; quantum ad valorem personalem petatum ex personæ dignitate, nego. Solutio patet ex sæpius inculcatis. Ad secundum, dist. maj. : Valor satisfactionum Christi, ex unione hypostaticâ tanquàm à conditione prærequisitâ, proveniebat, concedo; tanquàm à vero et proximo fonte, nego. Christus satisfecit valore illo qui in actus à naturâ ejus humanâ elicitos idcirco difflebat, quòd propter unionem hypostaticam illi actus essent verè et propriè personæ Filii Dei per humanitatem operantis. Atqui ejusmodi actuum valor supponit quidem hypostaticam naturæ humanæ cum Verbo divino unionem, sed ex illâ unionem verè non manat, sed tantum ex dignitate personæ Verbi per humanitatem operantis; ergo, etc. Ad tertium, distingo etiam maj. : Valor satisfactionum Christi vel oritur à personâ Christi ut divinâ, vel à personâ ejusdem ut

terminante naturam humanam, si illud, *ut terminante naturam humanam*, significet tantum conditionem requisitam ut Verbum in actus satisfactorios valorem personalem influat, concedo; si significet non tantum ejusmodi conditionem, sed etiam principium formale hujusce valoris, nego. Origo seu fons et principium formale valoris actuum satisfactoriorum Christi, est ipsa ejus persona divina nempe Verbum divinum; non confert autem Verbum illum valorem, nisi suppositâ aliquâ conditione, nempe nisi positâ cum ipso hypostaticâ humanitatis hos actus elicientis unione. Atque eo sensu meritò dicitur eatenus influere in ejusmodi valorem, quatenus terminat et sibi physicè conjungit naturam humanam. Verum neque illa humanitas, neque dona quæcumque quibus ornatur, neque ipsa ejus unio cum Verbo, sed solum ipsum Verbum cui hæc natura unitur, est principium formale et verus fons valoris actuum quibus Christus pro nobis satisfecit.

ARTICULUS III.

De quartâ conditione satisfactionis Christi, nempe eam satisfactionem fuisse ad alterum.

Quidam, ut explicarent satisfactionem Christi fuisse *ad alterum*, docuerunt ipsum sibi ut Deo non satisfecisse, nec proinde toti SS. Trinitati, sed tantum Patri divino qui est persona ab ipso distincta. Vasquesio visum est Christi satisfactionibus hanc etiam conditionem abjudicandam esse, nempe eas non fuisse *ad alterum*, nec proinde ex justitiâ propriè; licet tamen, inquit, fuerint ex rigore dignitatis et meriti æquales, et in hoc servatus sit rigor justitiæ generalis ad quam non requiritur conditio illa *ad alterum*. Plerique sentiunt Christum toti satisfecisse SS. Trinitati, et satisfactionem ejus quâ parte sibi ut Deo satisfecit, quantum satis est, ad alterum fuisse.

CONCLUSIO. Christus toti SS. Trinitati satisfecisse dicendus est; et quidem quantum satis est ad alterum, etiam quâ parte sibi ut Deo satisfecit.

Probatur prima pars 1^o ex Scripturis juxta quas Christus nos *Deo reconciliasse* dicitur, ac proinde toti Trinitati quæ Deus est. 1 ad Timoth. 2, v. 5 : *Unus Deus, unus et mediator Dei et hominum homo Christus Jesus*. Ubi nomen *Deus*, utpote non restrictum, accipiendum est pro Deo trino in personis, seu pro SS. Trinitate; ergo Christus mediator est inter SS. Trinitatem et homines, proindeque, etc. 2^o Ex S. Augustino qui, lib. 15 de Trinit. cap. 11, n. 15, satis significat Christum non tantum

Patri, sed et sibi ac proinde toti Trinitati satisfecisse, dùm ita loquitur : *Quid est, reconciliari per mortem Filii ejus? Itane verò, cùm irasceretur nobis Deus Pater, vidit mortem Filii sui pro nobis et placatus est nobis? Numquid ergo Filius ejus usque adeò nobis jam placatus erat, ut pro nobis etiam dignaretur mori; Pater verò usque adeò adhuc irascebatur, ut nisi Filius pro nobis moreretur, non placaretur?* Et infra : *Omnia ergo simul et Pater et Filius et amborum Spiritus et pariter et concorditer operantur.* Clarius S. Fulgentius de Fide ad Petrum cap. 2, n. 23, *Reconciliati sumus, inquit, per solum Filium secundum carnem, sed non soli Filio secundum Divinitatem. Trinitas enim nos sibi reconciliavit per hoc quòd solum Verbum carnem ipsa Trinitas fecit.*

3° Ratione theologicâ evidenti. Iis SS. Trinitatis personis perinde ac Patri Christus satisfecisse dicendus est, quibus eadem est ac Patri majestas per peccatum læsa, quæ eadem voluntate ac Pater peccatoribus iratæ erant, quæ eadem misericordiâ eodemque actu cum Patre propter satisfactiones Christi peccata condonârunt; enimverò, si majestas Patris et Spiritûs sancti per peccatum læsa, eadem est ac majestas Filii, non potuit Christus injuriam majestati Patris ac Spiritûs sancti per peccatum illatam satisfactionibus suis compensare et resarcire, quin et suæ majestati simul satisfaceret. Atqui Filio et Spiritui sancto eadem est ac Patri majestas per peccatum læsa, eadem voluntate quâ Pater, in peccatores irati erant, uno eodemque actu, unâ eademque misericordiâ cum Patre delicta hominibus condonârunt; ergo, etc.

Probatur secunda pars, nempe Christum quâ parte sibi ut Deo satisfecit, quantum necesse est satisfecisse ad alterum. Nam ea satisfactio est sufficienter ad alterum, quæ est à personâ propter distinctionem naturarum, voluntatum et operationum virtualiter et æquivalenter distinctâ, et dominium distinctum habente. Enimverò, ubi persona satisfaciens propter naturæ, voluntatis et operationis diversitatem distinguitur virtualiter et æquivalenter à personâ cui satisfit, habetque bona propria et diversum dominium, tunc planè concipitur ejusmodi personam, quatenûs habet talem naturam, tale dominium, talia bona, posse secum quatenûs habet aliam naturam et aliud dominium legitimos inire contractus mutuam oblationem inducentes; et offerre sibi ipsi bona quæ ex se proveniunt sub uno respectu, ut à se ipsâ sub alio respectu, seu aliâ voluntate accipiantur et

grata habeantur. Cujus quidem rei exemplum aliquod imperfectum etiam in humanis haberi potest. Nam ponamus à magistratu supremo ex ærario publico fuisse extractam pecuniæ summam in communes usus, à singulis postmodum uniuscujusque facultatum habitâ ratione, ærario restituendam; nonne ejusmodi magistratus, ubi solvit postea partem quam ut privatus debet, tunc sibi ut personæ publicæ satisfacere intelligitur, quia duplex nomen sustinet? Ergo multò magis persona æquivalenter duplex, propter realem naturarum, voluntatum et actionum distinctionem, dicenda est sibi posse impendere satisfactionem quæ sit sufficienter ad alterum.

Atqui in Christo 1° persona est propter realem naturarum, voluntatum et actionum distinctionem æquivalenter duplex; etenim juxta fidem catholicam Dissert. 4, cap. 3 et 4, contra Eutychianos et Monothelitas assertam, natura divina et natura humana, sine ullâ confusione, in Christo conjunctæ sunt. Utrique ejusmodi naturæ sua est voluntas, sua et operatio, ita ut una ejus persona quæ est persona Verbi, per Divinitatem operetur quæ Divinitatis sunt, et per humanitatem quæ sunt humanitatis. 2° Duplex etiam est proinde in Christo dominium, aliud nempe sibi cum Patre et Spiritu sancto commune, quod divinâ suâ voluntate exercet, aliud quod sibi ut humanâ voluntate operanti competit. 3° Denique satisfecit Christus actibus humanâ suâ voluntate elicitis, et valore ex suâ personâ ut terminante naturam humanam, et per eam agente derivato; ergo, etc.

Totum illud ratiocinium confirmatur Oratione secretâ quæ feriâ 3 Paschatis, jamdudum legitur in Ecclesiâ Parisiensi. *Deus... propitiare supplicationibus nostris, ut interpellans pro nobis Pontifex summus, nos per id quo nostrî est similis reconciliet; et per id quo tibi (Deo Patri) est æqualis, absolvat Jesus Christus, Filius tuus Dominus noster.*

Dices 1° : Si Christus sibi ut alteri satisfecisset, deberet admitti in Christo alter et alter; atqui in eo consistebat Nestorii hæresis quòd in Christo alterum et alterum admitteret; ergo, etc. Dist. maj. : Deberet in Christo admitti alter et alter virtualiter, seu æquivalenter, concedo; realiter, nego. In eo erravit Nestorius quòd diceret in Christo duplicem esse realiter personam; ut verò satisfactio Christi, ut explicatum est, dicatur fuisse quantum satis est ad alterum, admittenda est duntaxat in eo persona unica, nempe persona Verbi Dei, quæ

propter naturarum, voluntatum et operationum Christi distinctionem, duplici æquivaleat.

Dices 2° : Multæ Christo ut homini injuriæ factæ sunt, v. g., cùm à Judæis rejectus est et cruci affixus; atqui Christus non potuit sibi satisfacere ut homini; ergo, etc. Concedo totum argumentum. Christus sibi ut homini non satisfecit, sed ut homo, injurias sibi ut homini factas, quatenus ejus humanitatem spectabant gratis condonavit. In quantum verò ejusmodi injuriæ erant offensæ Dei, Christus pro iis toti Trinitati, ac proinde etiam sibi ut Deo condignè satisfecit.

Dices 3° : Valor satisfactionum Christi ortus est à Christo ut Deo, non à Christo ut homine; atqui Christus ut homo non potuit sibi ut Deo satisfacere per eum valorem qui à se ut Deo tantum oriebatur; ergo, etc. Dist. maj. : Valor satisfactionum Christi ortus est à Christo ut Deo, id est ut à personâ divinâ terminante naturam humanam et per eam agente; non ortus est à Christo ut homine, id est ab humanitate Christi, concedo; ortus est à Christo ut Deo, id est ab ejus personâ ut terminante naturam divinam; non ortus est à Christo ut homine, id est, à personâ Christi ut terminante naturam humanam, seu à Christo ut tali homine, nego. Valor satisfactionum Christi oritur à divinâ ejus personâ quatenus terminat naturam humanam quâ actus satisfactorios elicuit, ac proinde ortus est à Christo ut hoc homine, seu ut est talis persona habens humanitatem. Nempe personalitas divina Verbi, prout concipitur terminans naturam assumptam, cum eâ constituere concipitur personam Christi ut agentis per naturam humanam, adeoque pro nobis satisfactorios actus producentis, tum eis valorem conferentis, quem ad compensandum Dei honorem peccato læsum obtulit. Cùm igitur infinitus valor satisfactionum Christi dicitur ortus ab ipso ut Deo, non ab ipso ut homine, sensus est non esse ortum ab ejus humanitate, sed à divinâ ejus personalitate humanam terminante naturam. Proindeque, etc.

ARTICULUS IV.

Utrum satisfactio Christi fuerit ad strictos juris apices?

Qui aliquas ex hactenus enumeratis conditionibus, Christi satisfactioni defuisse opinantur, ii consequenter negant ejus satisfactionem fuisse ad strictos juris apices. Contra verò qui illas condiciones satisfactioni Christi adscribunt, hanc etiam fuisse secundum justitiæ sum-

mun rigorem contendunt. Justitia autem de quâ hic agitur, est præsertim justitia commutativa, in quâ æqualitas rei ad rem maximè attenditur, vel etiam vindicativa in quâ poenæ gravitas, offensæ gravitati respondet.

CONCLUSIO. Satisfactio Christi fuit ad strictos justitiæ apices. Probatur 1° ex Scripturis, tum quia in iis ut jam observatum est, nominibus emptionis, redemptionis, solutionis, pretii, satisfactiones Christi designantur; quæ nomina ad æqualitatem justitiæ commutativæ propriam significandam nata sunt; tum quia Rom. 5, v. 25, Apostolus ait Christum à Deo *propositum* fuisse *propitiationem per fidem in sanguine ejus ad ostensionem justitiæ suæ*. Probatur 2° ex SS. Patribus. Huc recurrunt testimonia SS. Patrum superius, Dissert. V, cap. 5, adducta ad evincendum in hypothesis condignæ et accuratæ satisfactionis necessariam fuisse Incarnationem. Dùm enim aiunt SS. doctores ideò necesse fuisse à Christo nos redimi, quia à puro homine pretium sufficiens offerri non potuisset, planè supponunt Christum accuratè et secundum justitiam satisfecisse. Unum igitur aut alterum locum hic addere sufficiet. S. Augustinus, lib. 13 de Trinit. cap. 13, n. 17 : *Placuit Deo, inquit, ut propter eruendum hominem de diaboli potestate, non potentiâ diabolus, sed justitiâ vinceretur*. Et lib. 3 de libero arbitrio, cap. 10, n. 31, ait Christum *nihil ei (dæmoni) extorsisse violento dominatu, sed superasse eum lege justitiæ*. S. Leo, serm. 12 de Passione, cap. 2 : *Ad dominationem, ait, diaboli destruendam, magis usus est (Christus) justitiâ rationis, quàm potestate virtutis*. Probatur 3° ratione theologicâ. Nam Christus satisfecit juxta leges justitiæ vindicativæ et juxta leges justitiæ commutativæ. 1° Secundum leges justitiæ vindicativæ, siquidem exsolvit poenam valoris infiniti propter personæ suæ dignitatem; atqui poenam peccato debitam poena valoris infiniti abundè compensabat; non debetur enim peccato, nec potest infligi peccatori supplicium quod satisfactionibus infiniti valoris compensari et exæquari, imò superari nequeat; ergo, etc. 2° Satisfecit Christus secundum leges justitiæ commutativæ; in eo enim positæ sunt illæ leges quod ex propriis et ex aliis indebitis reddatur æquivalens; atqui Christus satisfaciens pro nobis, honorem, honori Deo per peccatum ablato non solum æquivalentem, sed etiam superabundantem, ex propriis et ex aliis indebitis reddidit, ut dictum est; ergo, etc.

Dices 1° : Nulla potest esse justitia hominis

ad Deum, cùm nulla possit esse æqualitas; ergo, etc.

Dist.: Nulla potest esse justitia hominis puri ad Deum, concedo; Hominis-Dei, nego. Idcirco nulla est justitia strictè dicta hominis ad Deum, 1° quia nihil potest offerre homo purus quod ex Deo non proveniat, et ipsi titulo rei acceptæ non debeat; 2° quia, ubi agitur de offensâ Deo illatâ, homo purus honorem ejusmodi offensæ compensandæ parem exhibere nequit. Sed ex dictis patet neutram illam rationem in Christo Homine-Deo locum habere; ergo, etc.

Instabis: Saltem non est justitia propriè dicta inter filium et patrem; atqui Christus est Filius Dei; ergo. Disting. majorem, si Filius non habeat bona sibi propria, concedo; si habeat, nego. Filius-familias est sub potestate patris et idcirco quantum ad bona quæ ejus patris sunt, eum inter et patrem nulla potest esse propriè dicta justitia. At si habet bona propria, ut sunt bona castrensia aut quasi castrensia, nihil impedit quominus ratione ejusmodi bonorum contrahat cum patre et veros justitiæ propriè dictæ actus erga eum exerceat. Porro, persona Christi ut terminans naturam humanam, habet dominium bonorum sibi propriorum, nempe valoris infiniti satisfactionum suarum ex personæ suæ dignitate provenientis, quem valorem ad compensandam injuriam per peccata nostra Deo illatam, nosque à pœnis quas debebamus liberandos impendit; ergo, etc.

Dices 2°: Satisfactio quæ fit ad strictos juris apices non indiget liberâ acceptatione: atqui satisfactio Christi indignit liberâ acceptatione. Ergo non fuit ad strictos juris apices. Negant minorem nonnulli theologi, censentes id exegisse dignitatem victimæ loco nostro se offerentis, ut preces ejus non possent non exaudiri, atque eò referunt illud Apostoli Hebr. 5, v. 7: *Exauditus est pro suâ reverentiâ*. Verùm is locus solùm significat orationes et satisfactiones Christi ex personæ ejus dignitate maximum consecutas esse valorem, atque Deum ad ejusmodi valorem respexisse, cùm secundum vota Christi nobis delicta condonavit. Quapropter juxta ea quæ passim superiùs dicta sunt, distingo majorem: Satisfactio, quæ est ad strictos juris apices, non indiget liberâ acceptatione, si agatur de restitutione rerum, concedo; si agatur de restitutione honoris et de pœnis luendis, subdistinguo: In hypothesi quòd satisfactio ad strictos juris apices ab ipso

reo exhibeatur, concedo; si ab altero loco rei nego. Honoris læsi restitutio et pœnæ ob peccatum debitæ ab ipso sonte exigi possunt; in quantum igitur ut Christus loco nostro satisfaceret et pœnas à nobis debitas lueret, consensit Deus, modumque ejus satisfactionum constituit et determinavit, in tantum liberè ejus satisfactiones pro nobis acceptasse dicendus est. Cæterum, posito decreto quo Christus sponsor noster factus est, jam non potuerunt non acceptari à Deo quas ipse obtulit satisfactiones.

Dissertatio ix.

DE INCARNATIONIS PROPRIETATIBUS.

De nonnullis mysterii Incarnationis proprietatibus jam non uno in loco disseruimus prout methodus nobis id postulare visa est. Hic inquiremus, 1° de merito Christi; 2° de donis animæ et corporis ipsi concessis, et de defectibus ab ipso assumptis. In duo igitur capita hanc dissertationem partiemur. Alia verò quæ ad varios Christi titulos et officia attinent et mysterium Incarnationis etiam consequuntur, opportuniùs deinde specialibus dissertationibus tractabuntur.

CAPUT PRIMUM.

De merito Christi.

In memoriam revocanda est notio meriti de condigno quam supra tradidimus: quæstio enim circa ejusmodi meritum tota versatur. Quæritur autem 1°, utrum Christus verè et propriè meruerit; 2° quo tempore; 3° per quos actus; 4° quibus personis; 5° quid tandem meruerit.

CONCLUSIO I. Christus verè et propriè meruit. Probatur propositio, quæ fidei est, 1° ex Scripturis. Nempe iis omnibus locis in quibus Christus dicitur *nos redemisse sanguinis sui pretio*, *nos Deo reconciliasse*, *exauditum esse pro suâ reverentiâ*, etc.; easdem enim actiones quibus pro nobis Christus satisfecit, meritorias etiam fuisse evidentissimum est. Probatur 2° ex traditione. Innumera afferri possent conciliorum, summorum pontificum et SS. Patrum testimonia. In re verò facili et ab omnibus Christianis admissâ satis sit annotare, à concilio Tridentino, sess. 6, cap. 7, totius antiquitatis doctrinam et fidem his verbis exhiberi. *Meritoria autem* (causa justificationis est) *dilectissimus unigenitus suus Dominus noster Jesus Christus; qui cùm essemus inimici, propter nimiam charitatem quâ dilexit nos, suâ sanctissimâ passione in ligno*

crucis nobis justificationem meruit, et pro nobis Deo Patri satisfacit. Vide etiam cap. 14, canone autem 10 : Si quis dixerit homines sine Christi justitiâ per quam nobis meruit, justificari, ... anathema sit. Probatur 3^o ratione theologicâ. Nam in Christo omnes conditiones ad meritum de condigno requisitæ concurrunt; nempe in opere libertas, ut deinde explicabimus et ostendamus, in agente dignitas summa et sanctitas, et ex parte Dei pactum et promissio : Si posuerit pro peccato animam suam, ait Isaias, 53, v. 10, videbit semen longævum, etc.; ergo.

CONCLUSIO II. A primo conceptionis suæ instanti Christus mereri cœpit. Probatur ex Apostolo Hebr. 10, v. 5 : *Ingrediens (Christus) mundum dicit : Hostiam et oblationem noluisti; corpus autem aptâsti mihi : holocaustomata pro peccato non tibi placuerunt. Tunc dixi : Ecce venio, in capite libri scriptum est de me : Ut faciam, Deus, voluntatem tuam.* Ex hoc loco patet Christum, ubi primùm ingressus est mundum, id est à primo sui secundum humanitatem ortu, sese per actum perfectissimum charitatis in victimam pro redemptionem generis humani obtulisse; atqui actu ejusmodi procul dubio meruit; ergo, etc.

CONCLUSIO III. Christus omnibus et solis actionibus humanitati propriis et liberis meruit. Probatur prima pars, nempe Christum meruisse solis actionibus suæ humanitatis, seu eum per actiones Divinitatis suæ non meruisse. Enimverò, Christus ut Deus, seu ut operans per Divinitatem suam, non habet superiorem à quo dona impetret et mercedem accipiat; atqui is mereri non potest qui non habet superiorem, à quo dona impetret et mercedem accipiat; cùm ratio meriti in ratione ad dona impetranda et mercedem assequendam tota consistat; ergo, etc. Probatur secunda pars, Christum scilicet omnibus actibus liberis ab humanitate suâ productis meruisse. Etenim in cunctis ejusmodi actibus ea omnia concurrerant quæ ad meritum de condigno constituendum necessaria sunt; nempe aderat in opere libertas, tantaque in agente dignitas et sanctitas ut ex eâ meritum summum in ejus actiones diffunderet, et ipse à Deo pro suâ reverentiâ exauditus in Scripturis perhibeatur. Probatur tertia pars, videlicet Christum solis humanitatis suæ actibus liberis meruisse, seu eum non meruisse iis actibus necessariis amoris quos ut fruens visione intuitivâ producebat. Ratio est, ut observat sanctus Thomas, quòd ad meritum libertas requiratur.

CONCLUSIO IV. Christus ea omnia sibi meruit dona, quæ ex unionem hypostaticâ non necessario nexa erant, quæque idcirco à primo ortu non est consecutus, ut gloriam corporis, nominis exaltationem, etc. De hoc argumento jam diximus sup., Dissert. VII, cap. 2. Consule.

CONCLUSIO V. Christus omnibus hominibus salutem æternam et media ad eam consequendam verè sufficientia promeruit. Probatur ex iis omnibus Scripturæ locis in quibus Christus salvator, redemptor et mediator omnium et pro omnibus mortuus dicitur; quibus locis consonant innumera conciliorum et SS. Patrum, inprimis S. Augustini testimonia. Verùm ad hunc locum accurata illius argumenti tractatio non pertinet. De quo theologi, ubi de voluntate Dei salvandi homines et in tractatu de Gratiâ commodiùs disserunt.

CONCLUSIO VI. Christus saltem aliquem gratiæ gradum Angelis bonis meruit. Pro dæmonibus autem nec olim affixus, nec aliquando affigendus est cruci. Pariter neque pro hominibus ut damnatis, neque pro astris passus est. Probatur prima pars, Christum nempe saltem aliquem gratiæ gradum Angelis bonis esse promeritum. Nam juxta Scripturas, Coloss. 2, v. 10, Christus est Angelorum caput; omninò autem necessarium videtur ad rationem capitis moralis ut influat in membra, iisque bona communicet; ergo si non primarias, saltem secundarias quasdam angelis bonis gratias Christus promeritus est. Probatur secunda pars, scilicet Christum pro dæmonibus passum et crucifixum non fuisse; quæ quidem pars est de fide adversus antiquissimos quosdam hæreticos à Tertull. lib. de carne Christi, cap. 14, memoratos, tum adversus Originem cui errorem oppositum aliqui veteres affingunt, denique adversus Didymum Alexandrinum, idem dogma in commentariis suis ad primam Epistolam S. Petri cap. 3 obrudentem. Probatur, inquam, 1^o ex iis Scripturæ locis in quibus Christus significatur propter solos homines redimendos venisse et mortuus esse. 2 Cor. 5, v. 14, dicuntur *mortui* in Adamo ii omnes pro quibus mortuus est Christus. Si unus, inquit Apostolus, pro omnibus mortuus est, ergo omnes mortui sunt. 1 Tim. 2, v. 6, Christus nuncupatur unus mediator, sed Dei et hominum. Ibid. cap. 4, v. 10, appellatur salvator, sed omnium hominum, maxime fidelium; Hebr. 2, v. 14, dicitur carni et sanguini participasse, quòd ii pro quibus liberandis venerat, carni et sanguini communicarent. Quapropter, versu 16 :

Nusquàm enim, ait S. Paulus, *Angelos apprehendit, sed semen Abrahamæ apprehendit; unde debuit per omnia fratribus similari*, etc. 2º Eadem pars evincitur iis testimoniis et argumentis quæ fixam esse conditionem dæmonum, et sententiam in eos latam non revocandam ostendunt. Matth. 25, v. 41, 2 Petri 2, v. 4, Judæ 6, etc., de quibus consuli possunt theologi, ubi de pœnarum æternitate verba faciunt. 3º Eandem conclusionis partem adstruit SS. Patrum auctoritas qui errorem quem refellimus constanter rejecere, atque ut indubitatum semper ponunt homines lapsos, non dæmones à Christo fuisse erectos. Vide Tertull. de carne Christi, cap. 14; S. Augustinum, in Expositione Epistolæ ad Galatas, et in Enchiridio, cap. 61; S. Gregor. Magnum, lib. 9 et 12, Moral., etc. Addo in symbolo Christum *propter nos homines et propter nostram salutem descendisse de cælis* perhiberi, nullam verò fieri dæmonum mentionem.

Probatur tertia pars conclusionis, quæ pariter ad fidem attinet adversus plures Origenistas, nempe Christum nusquàm passurum nec in superis cruci affigendum pro dæmonibus. Quod evidenter demonstratur, 1º quia juxta S. Paulum, Rom. 6, v. 9, *Christus resurgens ex mortuis, jam non moritur, mors illi ultra non dominabitur*; 2º quia fide constat nusquàm esse revocandam sententiam adversus dæmones latam; 3º quia Ecclesia hoc dogma condemnavit, cum Epistolam Justiniani ad Menam in quâ dicitur anathema iis qui Christum pro dæmonibus aliquando crucifigendum, eosque et homines damnatos pœnis tandem eripiendos tenuerint, seculo VI suscepit et amplexa est. Vide t. 6 conc. Labb. p. 679. 4º Quia hanc doctrinam, Christum nempe pro dæmonibus aliquando cruci affigendum, ut impiam et sacrilegam detestati sunt SS. Patres. Videlicet Theophilus Alexandrinus, in Epist. Paschali 2, ubi hunc etiam errorem affligit Origeni; S. Hieronymus, in Epistolâ ad Avitum; Hincmarus, lib. de Prædestinatione; S. Bernardus, Serm. 44 in Cantic.

Probatur quarta pars quæ etiam de fide est adversus Origenistas; nempe Christum non esse mortuum pro hominibus damnatis ut damnatis, ac proinde ab eo, cum ad inferos descendit, nullos impios aut infideles inde fuisse eductos. Enimverò 1º ubi sacræ Scripturæ descensum Christi ad inferos commemorant, de solorum justorum liberatione mentionem faciunt. Zachar. 9, v. 11 et 12: Tu

quoque in sanguine testamenti tui emisisti vinctos tuos de lacu, in quo non est aqua. Convertimini ad munitionem vincti spei. Eccli. 24, v. 45: *Pene-trabo omnes inferiores partes terræ, et inspicient omnes dormientes, et illuminabo omnes sperantes in Domino*. Nec obstat locus 1 Petri 3, v. 19 et 20, in quo Christus dicitur *his qui in carcere erant spiritibus prædicasse; qui increduli fuerant aliquando quando expectabant Dei patientiam in diebus Noe*. Nam hæc intelligenda sunt de iis, qui, cum increduli fuissent dum fabricabatur arca, resipuerunt tamen ubi diluvium coepit, et antequàm aquis præfocarentur; quos proinde Christus ad inferos descendens liberare potuit. Vel potius illæ voces, *spiritibus qui in carcere erant*, accipiendæ sunt de hominibus qui in servitute peccatorum erant, quibus Christus per Apostolos prædicavit, quique aliquando increduli fuerant instar eorum qui in diebus Noe vivebant. 2º Eò referendum est istud celebre Osee nomine Christi loquentis vaticinium: *De manu mortis liberabo eos; de morte redimam eos; ero mors tua, ô mors; morsus tuus ero, inferne*. Quem textum dilucidè et ad mentem cæterorum doctorum S. Greg. Magnus lib. Moral. 12, cap. 11, sic interpretatur. *Quod occidimus, agimus ut penitus non sit; ex eo autem quod mordemus, partem abstrahimus, partemque relinquimus. Quia ergo (Christus) in electis suis funditus mortem occidit, mors mortis extitit; quia verò ex inferno partem abstulit partemque reliquit, non occidit penitus, sed momordit infernum*. 3º Pœnas inferni nullum finem esse habituras, atque ab eis nusquàm liberandos esse homines damnatos, fides catholica docet, et multis sacræ Scripturæ et traditionis testimoniis manifestè adstruitur, ubi de ejusmodi pœnarum æternitate theologi agunt; ergo, etc. 4º Philastrius Brixien-sis, hæresi 74, S. Augustinus lib. de hæres. n. 79, Gregor. Magnus, loco mox citato, et Homil. 22 in Evangel., Beda, in Epist. 1 S. Petri, eorum, qui Christum ab inferis alios quàm fideles eduxisse putant, sententiam hæresibus accensere non dubitant. Sanctus verò Irenæus, lib. 4, cap. 39, S. Ambrosius, in Psal. 118, S. Epiphanius, Hæresi 69, S. Chrysostomus apud Nicetam ad Orationem S. Greg. Nazianzeni 42, S. Petrus Chrysologus, Serm. 123, etc., descensum Christi ad inferos solis justis profuisse disertissimè docent. 5º Denique constat ex libris de tenendâ veritate et de tribus epistolis, qui Ecclesiæ Lugdunensi adscribi solent, tum ex Tractato Prudentii Tricassini ad archiepiscopum Se-

nonensem, et ex synodo Valentinâ, cap. 4; constat, inquam, ex his monumentis; simul cum libro Hincmari, archiep. Remensis de prædestinatione, collatis, hanc nono seculo fuisse totius Ecclesiæ Gallicanæ fidem, Christum pro hominibus damnatis ut damnatis mortuum non esse. Namque ex ejusmodi instrumentis patet capitula Carisiaca quæ Hincmarus adversus Gotescalcum Prædestinarianismi à se convictum statuerat, Ecclesiæ Lugdunensi, Prudentio et Patribus Valentinis idcirco displicuisse, quia inprimis judicabantur favere dogmati Origenis de morte à Christo pro hominibus damnatis toleratâ. Laborabant verò ii præsules errore facti, variis orto ex causis, quarum expositio ad hunc locum non attinet. Perversa quâ de agitur doctrina capitulis Carisiacis non continetur, eamque abjicit et sibi perperam attribui conqueritur Hincmarus, libro laudato.

Probatur etiam adversus Origenem quinta pars conclusionis, nempe Christum non esse passum pro astris; tum quia supponit error ille Origenis astra esse animata, quod falsum est; tum quia juxta Scripturas Christus pro solis hominibus redimendis passus est; tum quia synodus V hunc errorem, Christum esse passum pro astris, condemnavit decreto quod laudat Nicephorus, lib. 17, cap. 28; tum denique quia idem error à Patribus rejectus et notatus, nempe à Theophilo Alexandrino *Epist. Paschali* 1 et 2, à S. Hieronymo, *Epistolâ ad Pammachium* et *Epistolâ ad Avitum*, ab Orosio, in *Commonitorio* ad S. Augustinum, et à S. Augustino, in *Opere adversus Priscillianistas et Origenistas*.

CAPUT II.

De perfectionibus et donis animæ et corporis Christo adscribendis, necnon de assumptis ab eo defectibus.

PERFECTIONIS nomine hic intelligimus modum aliquem naturæ congruentem, quem ipsi melius est habere quam non habere. Defectus autem non accipiendus est pro merâ perfectionis carentiâ aut negatione; quippe indubitatum est, et, ex dictis supra ubi de communicatione idiomatum in abstracto adversus Lutheranos, liquidò constat humanam Christi naturam, quantiscumque donis ponatur exornata necessariò tamen esse finitam et certis limitibus circumscribi. Defectus igitur, ut eò loci accipitur, est privatio perfectionis quæ posset in naturâ inesse, quæque eam ornaret, ipsisque per se congrueret. Jam patet quam ob

causam de perfectionibus humanitatis Christi et de defectibus ejusdem naturæ quos assumere dignatus est, simul disserendum censuerimus. Scilicet perfectio et defectus ita opponuntur, ut ex unius explicatione alterius natura magis innotescat, atque unum Christo non possit vindicari quin ab ipso alterum hoc ipso excludatur.

In quinque articulos caput istud dividendum est. In I, exponentur perfectiones Christi ratione intellectûs, an scilicet in eo scientia fuerit omnis defectûs expers? etc. In II, perfectio humanitatis Christi quantum ad voluntatem consideratæ expendetur. Hic de sanctitate, de impeccantiâ, etc., Christi Domini disseremus. In III, agemus de libertate Christi. In IV, quæ perfectiones aut defectus competant Christo ratione facultatis sentiendi et appetitûs sensitivi, investigabimus, ubi de passibilitate Christi et doloribus, necnon an in eo fuerint passiones et quomodò? In IV articulo quæ ad perfectiones et defectus corporis à Christo assumpti pertinent tractabuntur.

ARTICULUS PRIMUS.

De perfectione Christi hominis ratione intellectûs, seu de scientiâ Christo concessâ.

GENERALISSIMA scientiæ divisio est, in scientiam increatam quâ unico actu simplicissimo Christus omnia ut Deus comprehendit, et in scientiam creatam, quæ ipsi ut homini ratione humanitatis seu intellectûs sui creati secundum fidem adscribenda est.

De istâ posteriore impræsentiarum duntaxat agimus. Quæstio verò est de tempore vitæ mortalis Christi, an scilicet 1º Christus homo à primâ humanitatis suæ in utero Virginis formatione scientiam perfectam habuerit, et ab omni defectu immunem. 2º An ejusmodi scientia habuerit pro objecto Deum ipsum intuitivè visum, et ea omnia quæ Deus novit. 3º An multiplex in eo fuerit scientia. De quibus sigillatim agemus.

1º *An à primo ortu Christus habuerit scientiam creatam ab omni defectu immunem.* — Observandum 1º, defectus oppositos scientiæ esse ignorantiam, errorem, dubitationem, incertitudinem seu formidinem errandi. Ignorantia autem alia est privativa, alia negativa. Ignorantia privativa quæ sola propriè et simpliciter ignorantia appellatur, est ignoratio rerum quarum notitia conditioni, dignitati et officio personæ necessaria aut saltem congrua est. Ignorantia negativa, quæ propriè ignorantia non dicitur,

sed potius nescientia, ut aiunt, est ignorantio rerum quarum notitia ad ejusmodi dignitatem, conditionem et munia personæ nihil attinet.

Controversia præsens intelligenda est de scientiâ excludente præsertim ignorantiam positivam. Nam de negativâ, an nempe Christus aliqua possibilia ad suam dignitatem et munus nihil contingentia nesciverit, dicemus articulo sequenti. Quæstio igitur est an scientia Christi ut hominis fuerit omnis erroris, incertitudinis, dubitationis et obscuritatis expers, et ad ea omnia sese à primo ejus ortu extenderit, quæ personæ ejus dignitas, mediatoris et redemptoris officium, necnon capitis, id est omnimodæ gratiæ et sapientiæ fontis munus, ac tandem partes judicis futuri seculi ab eo sciri postulabant.

Observandum 2º, multos circa ejusmodi quæstionem errasse. Gnostici et Valentiniani, teste S. Irenæo, cap. 16 et 17, Christum infantem aliis infantibus ignorantia similem putaverunt, ipsi rationis usum abjudicârunt, atque ejus cognitiones aliquando incertas et ignorantia mixtas fuisse contenderunt. Ex S. Athanasio, Orat. 4 contra Arianos et ex aliis multis, colligitur ignorantiam ab Arianis fuisse Christo Domino afflictam, sed eorum error ad hunc locum non spectat; non enim Christo ut homini, cui mentem detrahebant, sed ipsimet Verbo quod loco mentis in Christo fuisse opinati sunt, hujusmodi ignorantiam impegere, ut ejus Divinitatem et Patri divino consubstantialitatem impugnent.

Proclive fuit ut Nestorius, qui Christum hominem nonnisi morali nexu cum Deo Verbo conjungi statuebat, plurimum ignorantium et aliquem in rebus addiscendis profectum ipsi adscriberet. Et reverà is fuit unus ex ejus erroribus, teste S. Cyrillo Alex., lib. 3 adversus ipsum. Eadem fuerat Theodori Mopsuesteni, Nestorianæ hæreseos præformatoris, sententia, quod ex concilio generali V, collat. 8, cap. 12, colligitur, et ex Leontio Bizantino, lib. 3 in Nestorium, disertè habetur. In illum quoque errorem Leporius, Nestorii discipulus, incidit, ut ex libello ejus retractationis perspicuum est. Ad eundem etiam scopulum allisise Felicem Urgelitanum scribit Agobardus, Lugdunensis episcopus, in libro quem adversus ejus errores conscripsit.

Mirum verò quosdam Eutychianos ignorantiam Christo attribuisse. Quippe illud dogma minimè consentaneum est eorum hæresi juxta quam humana Christi natura ab ejus Divinitate

absorpta est. Fuere tamen ex Eutychianorum Severianorum sectâ nonnulli, qui, duce Themistio quodam diacono, à quo Themistiani nuncupati sunt, Christum plura ignorasse ac præsertim extremum judicii diem opinabantur. De quibus vide Eulogium apud Photium, Bibl. codice 230. II, ab ignorantia illâ quam Christo tribuebant, Agnoetarum nomen sortiti sunt. Agnoetas, propter eorum doctrinæ cum Eutychianismo repugnantiam, Eutychianos non fuisse, sed potius Nestorianis affines censet S. Gregorius Magnus, lib. 10 Ep. 39, aliàs lib. 8 Epist. 42. Eisdem Arianis Verbo ignorantiam adscribentibus accensendos putat Nicephorus, lib. 18, cap. 50. Sed reverà ex Eutychianis prodire, ac videntur ii Eutychianis annumerandi, qui duas Christi naturas in unam compingebant ex utràque compositam.

Lutherus, Calvinus, et ex eorum asseclis complurimi senserunt ultimum judicii diem fuisse ignotum Christo. Grotius, in caput 13 S. Marci, Christum nonnisi post resurrectionem suam omni scientiâ donatum fuisse tradit, ut et *omni potestate in cælo et in terrâ*. Atque hanc scribit fuisse veterum doctorum mentem.

Dissimulandum non est non paucos è veteribus posse videri, ubi eorum scopus et verba non satis attenduntur, certam ultimi judicii cognitionem Christo ut homini abjudicasse; de quo postea dicemus. Leontius, lib. de Sectis, Act. 10, de sanctis illis doctoribus ita judicat: *Sciendum*, inquit, *complures ex Patribus, ac propemodum universos videri dicere quòd ignoret*.

CONCLUSIO. In Christo fuit à primo ortu perfecta omnium scientia, adeò ut ei nec error, nec incertitudo aut dubitatio, nec ulla vera et positiva ignorantia, nec profectus sapientiæ et scientiæ attribui possit.

Probatur 1º ex Scripturis. Illam Christus homo scientiam à primo ortu habuit, quam ante mortem et resurrectionem suam et propter unionem hypostaticam consecutus est; siquidem hoc ipso quo ejus extitit humanitas, statim conjuncta fuit hypostaticè Verbo divino, ut alibi fide esse certum docuimus, Atqui, juxta Scripturas, ante mortem suam et resurrectionem, ac propter unionem hypostaticam, Christus homo perfectam omnium scientiam consecutus est, adeò ut nec error, nec incertitudo, etc., ei attribui potuerint. Isaia 11, v. 2, de Christo hæc prænuntiantur: *Requiescet super eum Spiritus Domini, spiritus sapientiæ*

et intellectus, spiritus scientiæ et pietatis. Quibus magnificis verbis scientia eximia et perfecta profectò significatur. Quòd autem hæc etiam ad tempus mortalis vitæ Christi, et ad primum etiam ortum ipsius referenda sint, patet 1º, quia eò loci v. 4, agitur de Christi nativitate, et v. 3 et sequentibus, de ejus judicio, exaltatione et conversione Gentium, etc., adeò ut adducta ex v. 2 Prophetiâ, cum absolutè pronuntietur, non possit ad unum tempus magis quàm ad aliud restringi. Patet 2º maxime quia ejusdem Isaïæ cap. 61, v. 4, apertè significatur Spiritum Domini requievisse super Christum hominem eò quòd humanitas ejus sit uncta à Domino, id est juxta sacrarum litterarum loquendi morem, unita hypostaticè Verbo divino. *Spiritus Domini super me*, inquit Propheta nomine Christi loquens, *eò quòd unxerit Dominus me; ad annuntiandum mansuetis misit me, ut mederer contritis corde*, etc., quam prophetiam ad seipsum Christus ipse transfert et applicat Lucæ 4, v. 21; ergo, etc. Joan. 1, v. 14: *Verbum caro factum est et habitavit in nobis; et vidimus gloriam ejus, gloriam quasi unigeniti à Patre, plenum gratiæ et veritatis*, græcè in nominandi casu, πλήρης χάριτος καὶ ἀληθείας. Ubi observandum non constare quidem eruditis an ad *Verbum* seu λόγος referri debeat latina vox *plenum*, et græca πλήρης, an ad *unigenitum*, vel aliud. Ipsa vis ac sensus verborum exigit ut vel voci *unigeniti*, jungatur, quasi πλήρους seu pleni legeretur; vel voci *Verbum*, seu λόγος, his nempe: *Et vidimus gloriam ejus, gloriam quasi unigeniti à Patre*, intra parenthesim interclusis, adeò ut iis sublatis, superesset: *Verbum caro factum est, et habitavit in nobis plenum gratiæ et veritatis*. Priorem interpretationem, quam sequitur Arabs interpres, suam quoque facit Petavius, lib. 2, c. 4, n. 4, ubi observat nihil obstare diversitatem casuum annotatam; quia non inusitatum est in Scripturis ut per enallagen rectus casus cum obliquis construatur, uti videre est in Vulgatâ, Eph. 3, v. 16, et in græco textu Apocal. 1, v. 4 et 5. Posterior verò communior est, et hæc ratione quæ nobis videtur optima, præsertim fundatur, enallagem eò loci sine necessitate non fingendam ac eâ sublatâ sensum haberi obvium et apertum. Utralibet autem ejusmodi opinio eligatur, evidens est Christum ut hominem seu Verbum caro factum et ut habitans in nobis, dici plenum gratiæ et veritatis. Quod etiam ex eo maxime apparet, quòd ubi v. 13 actum est de Christo ut homine, addatur v. 16: *Et de ple-*

nitudine ejus nos omnes accepimus. Itaque, juxta S. Joannem, Christus homo habitavit cum hominibus et ante mortem suam visus est in terris plenus gratiæ et veritatis. Porro, qui plenus est veritatis, profectò scientiam habet perfectam nec ullius rei ignorantia laborat; ergo Christus homo etiam ante mortem et resurrectionem suam, dum in terris cum hominibus conversatus est, perfectâ scientiâ polluit. Cumque hæc plenitudo sapientiæ et veritatis ipsi attribuat ut unigenito Patris, atque ab ortu fuerit Patris unigenitus, sequitur plenam et perfectam scientiam ipsi ab ortu fuisse concessam. Joan. 3, v. 34, de Christo sic loquitur Joannes Baptista: *Quem misit Deus, verba Dei loquitur; non enim ad mensuram dat Deus spiritum.* Igitur ex S. Joanne Baptistâ Christus homo ob eximiam suam missionem non ad mensuram à Deo spiritum accepit; atqui ad mensuram accepisset, nisi in eo esset plenitudo scientiæ; ergo, etc. Coloss. 2, v. 3: *In quo (Christo) sunt omnes thesauri sapientiæ et scientiæ absconditi.* Nullum dubium esse potest quin hæc plenam et perfectam scientiam Christo esse adscribendam demonstrent. Hæc eadem verò ad Christum etiam in terris conversantem, et à primo suo ortu pertinere, planè colligendum videtur ex eo quòd juxta alia Scripturæ loca jam allata, etiam in primo suo ortu plenus fuerit gratiâ et veritate, et Spiritum Domini, spiritum sapientiæ et intellectus, spiritum scientiæ et pietatis habuerit in se requiescentem. Hebr. 10, v. 5: *Ingressus (Christus) mundum dicit: Hostiam et oblationem nolui, corpus autem aptâsti mihi: holocaustomata pro peccato non tibi placuerunt. Tunc dixi: Ecce venio... ut faciam, Deus, voluntatem tuam.* Etsi ex hoc textu non confirmetur tota conclusio à nobis posita, saltem invictè revincitur stoliditas Gnosticorum et Valentinianorum, juxta quos Christus infans rationis usu instar aliorum infantium caruerat. Ingressus enim Christi in mundum est primus ortus ejus; si ergo ingrediens mundum hæc cogitaverit quæ ipsi attribuit Apostolus, sequitur tam insanam quàm impiam fuisse ejusmodi hæreticorum mentem.

Probatur 2º auctoritate synodi V generalis, quæ collat. 3, cap. 12, adversus Theodorum Mopsuestenum ita definit: *Si quis defendit impium Theodorum Mopsuestenum, qui dixit... Christum... à deterioribus paulatim recedentem, et sic ex profectu operum melioratum... talis anathema sit.* Probatur 3º ex retractatione quam

à Leporio præsules Africani exegerunt, ubi sic legitur. « Nunc non solum dicere non præsumo, verum etiam priorem anathematizo prolatam in hac parte sententiam; quia dici non licet, etiam secundum hominem ignorasse Dominum Prophetarum. » Probatur 4° ex S. Gregorio Magno, qui lib. 10, Epist. 39, aliàs lib. 8, Epist. 42, hæreseos accusat Agnoetas, quod ultimum iudicii diem Christo fuisse cognitum negarent. Probatur 5° ex aliis Patribus. Origenes, Comment. in Matth., ad illa Christi verba c. 13, v. 51: *Intellexistis hæc omnia?* Sic habet: « Qui novit quæ sunt in cordibus hominum Christus Jesus... non ignorans interrogat, sed quoniam semel assumpserat hominem, utitur omnibus quæ sunt hominis, quorum unum illud est interrogare. Nec mirandum, si id facit servator, cum ipse etiam omnium Deus, moribus hominum sese accommodans, perinde ac si quis homo morem gerat filio suo percunctetur, velut in hoc: *Adam ubi es?* Et: *Ubi est Abel frater tuus?* » Ibi Origenes ponit nihil Christum latuisse, etiam intimas cordium cogitationes, ac simul eximiam tradit regulam quorundam exponendorum Scripturæ locorum quæ vulgò opponuntur. S. Greg. Naz., Orat. 20: « Ut ætate, inquit, ita et sapientiâ proficiebat (Christus); non quod hæc in eo incrementum caperent; quid enim eo quod à principio perfectum erat, perfectius esse possit? sed quod hæc paulatim detegerentur et elucescerent. » S. Joan. Chrysost., Serm. in Lazarum, docet Christum, etsi postulaverit ubi Lazarus esset positus, non tamen id ignorasse, sed humano more locutum esse; ubi supponit omnia ei fuisse cognita. S. doctoris hæc verba sunt: « Ignoravit, ais, Christus, ô Judæe, quia dixit: *Ubi posuistis eum?* Itaque ignoravit etiam in paradiso Pater, ubi absconditus esset Adam? Circuibat enim quasi eum in paradiso quærens, ac dicens: *Adam, ubi es?* quasi diceret: *Ubi absconditus es?* » S. Ambrosius, lib. 5 de Fide, cap. 48, n. 222: « Multò magis arbitror, ait, quia Filius, qui cum hominibus conversatus est, et hominem egit, et carnem suscepit, nostrum assumpsit affectum; ut nostrâ ignorance nescire se diceret, non quia ipse aliquid nescierit... Nihil ergo fuit quod ignoraverit Dei Filius; nihil enim fuit quod ignoraverit Pater. » Vide etiam Serm. in Psal. 21. S. Hieronymus, Epist. ad Damasum: « Nullus homo, inquit, excepto eo qui ob nostram salutem carnem est dignatus induere, plenam habuit scientiam et certissimam veritatem. » S. Augustinus, lib. 2 de

Peccat. meritis et remiss. cap. 29: « Quam planè ignorantiam, ait, nullo modo crediderim fuisse in infante illo, in quo Verbum caro factum est ut habitaret in nobis, nec ullam ipsius animi infirmitatem. in Christo parvulo fuerim suspicatus, quam videmus in parvulis. » S. Cyril. Alexandr., lib. 3 contra Nestorium, pronuntiat planè *stultum esse* quod is hæreticus objiciebat, incrementum quoddam sapientiæ Christo accessisse; « credimus enim, inquit, ex ipso ventre, atque utero virgineo ipsum Emmanuel, cum Deus esset, hominem prodiisse plenum procul dubio sapientiâ et gratiâ, quæ illi naturaliter inerat. Quodnam igitur is incrementum susciperet, in quo sunt omnes thesauri sapientiæ? » S. Fulgentius, Ruspensis episcopus ad Ferrandum respondens, scientiam Christi hominis ita effert, ut ipsum velit nihil eorum ignorasse quæ Deo cognita sunt, et plenam Divinitatis notitiam habuisse, p. 253 et seqq. S. Maximus, in Dialogo cum Pyrrho, eum censet ad Nestorianam labem accedere, qui Dominum addiscendo profecisse dixerit. Eulogius, Alexandrinus patriarcha apud Photium, codice 230, n. 10: « Quicumque, inquit, vel Divinitati ipsius (Christi), vel humanitati ignorantiam adscribet, nunquam certissimæ temeritatis crimen effugiet. » Nota verò Eulogium illius operis ex quo hæc extracta sunt, conscribendi mandatum à romano pontifice Gregorio Magno, quem eâ de re Palæstini sciscitati fuerant, accepisse; eundemque pontificem maximum, Epist. 35, lib. 10, ejusmodi approbasse librum, et utriusque Ecclesiæ Patrum traditioni consentaneum declarasse. S. Joan. Damasc., lib. 3 de Ort. cap. 22: « Si caro à primo statim ortu verè Deo unita est, imò potius in ipso extitit, et identitatem secundum hypostasim cum eo habuit, qui fieri potuit ut non omnibus prorsus sapientiæ gratiæque dotibus affluerit? »

Alia multa adhuc afferri possent SS. doctorum testimonia, quorum plura apud Thomasinum, lib. 7, legere est. Quæ porrò fuerit mens eorum veterum qui hîc opponi possunt, mox exponemus. Interim manifestum est quàm malè à Grotio et ab aliis quibusdam definiatur plerosque veteres ignorantiam Christo attribuisse.

Probatur 6° unanimi omnium theologorum consensu, à quibus propositio de quâ agitur tanquàm dogma certum et inconcussum meritò statuitur. Probatur 7° ratione theologicâ. Illud attribuendum est Christo homini à primo or-

tu, ad quod naturam humanam elevari non repugnat, cujusque concessio à primo ortu, non modò finibus Incarnationis non erat oppositum, sed potiùs maximè consentaneum. Enimverò nemo non videt Hominis-Dei dignitati et filiationi naturali id fuisse debitum. Atqui 1º, non repugnat naturam humanam à Deo elevari ad eam de quâ quæstio est scientiam; nec enim infinitus intellectus ejusmodi scientiæ recipiendæ necessarius est. 2º Finibus Incarnationis contraria non erat ejusmodi scientiæ à primo ortu concessio. Quippe nec libertas, nec passibilitas, nec mortalitas ejusmodi dono Christo homini adimuntur. 3º Finibus Incarnationis valdè consentaneum fuit hanc scientiam Christo homini à primo ortu concedi, tum ut quæ sibi mandata fuerant, accuratiùs exequeretur, tum ut summis illis sapientiæ indiciis summam sibi auctoritatem conciliaret, ac se purum hominem non esse, sed Hominem-Deum ostenderet; ergo, etc.

SOLVUNTUR OBJECTIONES. Objicies 1º: Christus ignoravit ultimi judicii diem; ipse enim Matth. 24, v. 36, sic loquitur: *De die autem illà et horà nemo scit, neque Angeli cælorum, nisi solus Pater*. Et expressiùs adhuc Marci 13, v. 31: *De die autem illo vel horà nemo scit, neque Angeli in cælo, neque Filius, nisi Pater*; ergo, etc. Dist. ant.: Christus ultimi judicii diem ignoravit, ut Dei legatus et internuntius, seu illum non ideò cognovit quia erat Dei legatus, concedo; ignoravit ut Homo-Deus, ut judex futurus vivorum et mortuorum, nego. Qui personam aliquam gerit et sustinet, secundum quam non modò non cognoscit quod à se quæritur, sed etiam illius non manifestandi mandatum habet; is, etsi rem sub alià ratione noverit, potest tamen aliquando respondere à se eam nesciri; ubi nempe ipsà quam sustinet personà satis admonentur cauti auditores de vero responsionis sensu. Sic, v. g., sacerdos qui coram judice testimonium ferre de quodam crimine cogeretur, cujus auctorem ut confessor tantum cognovisset, non ut testis, deberet respondere se penitus esse illius rei insecum. Sic legatus alicujus principis de ejus negotiis censeretur ignorare ut legatus, quidquid is princeps in mandatorum suorum libello noluit comprehendere, et ab ipso manifestari prohibuit. Cum igitur Christus locis laudatis, prophetæ, internuntii et legati à Deo missi partes sustineret; ex eo quòd dixerit à se ignorari judicii diem, non sequitur quòd illum reverà sub omni respectu, et etiam ut judex

futurus nesciverit, sed tantum consequens est, ipsi secundum personam quam tunc gerebat, ejusmodi diem non fuisse cognitum, illiusque manifestandi facultatem non esse ipsi à Patre concessam. Nec metuendum fuit ne discipuli ejusmodi responsione Christi deciperentur; quippe eum esse *Filium Dei vivi*, adeòque omni scientià cumulatam aliàs cognoscebant, atque ab eo tunc geri personam legati et internuntii perspiciebant; quapropter dubium esse non potest quin ejusmodi verbis Christi quoddam mysterium latens significari intellexerint; non verò iis designari absolutà et omnimodà diei judicii ignoratione ipsum laborasse.

Obj. 2º: Lucæ 2, v. ultimo, Jesus dicitur *profecisse scientià et ætate gratià apud Deum et homines*. Ubi observa eum ut ætate, ita diei scientià profecisse, et quidem apud Deum, quibus verbis progressus veri sanè significatur; ergo, etc. Respondeo triplicem esse hujusce loci interpretationem nostræ conclusioni minimè adversam. Prima ad ipsum Verbum seu ad Christum ut Deum, ejusmodi textum refert, adeò ut sensus sit, Verbum, quâ proportionem humanitas ab eo assumpta crescebat, majores per eam sapientiæ suæ effectus produxisse, sicque suam paulatim sapientiam magis explicasse et divinitatem suam ampliùs expressisse. Ita S. Ath. Orat. 3, aliàs 4, contra Arianos, n. 53, et S. Greg. Naz. Epist. 4 ad Cledonium, criminationes Apollinaris propulsans. Juxta alteram interpretationem, allatus S. Lucæ locus de Christo homine majora in dies sapientiæ suæ summæ indicia dante intelligendus est; adeò ut ejus sapientia reverà in se non creverit, sed tantum sese manifestaverit per gradus secundum diversa ætatis ejus incrementa, et prout divinatorum consiliorum ratio et Incarnationis œconomia exigebant. « Dominus nihil fecit, inquit S. Th. parte 3, q. 12, a. 3 ad 5, quod non congrueret ejus ætati; et ideò audiendis doctrinæ sermonibus non accommodavit aurem suam, nisi illo tempore quo poterat etiam per viam experientiæ talem scientiæ gradum attingisse. » Hunc Evangelii locum sit explicant S. Greg. Naz., Orat. 20, superiùs laudatà, S. Cyrillus Alex., lib. 3 contra Nestorium, S. Greg. Magnus, Hom. 2 in Ezechiel, S. Joan. Damasc. lib. 3 de fide orthodox. cap. 22, S. Bernardus, Homil. 2 de Laudibus B. Mariæ Virginis. Tertia interpretatio est, Christum reipsà profecisse secundum scientiam quam acquisitam et experimentalem vocant, non quòd nova quædam et sibi ante

ignota didicerit, sed quòd multa jam sibi per scientiam infusam cognita, rursus novo modo, nempe experiendo secundum varia ætatis suæ incrementa didicerit. Hanc interpretationem tradit et eximiè explicat S. Thomas p. 3, q. 12, a. 2, atque eandem videntur secuti sancti Ambrosius, Epiphanius, necnon Theodoretus adversus Apollinaristas; de quibus Patribus postea. Omitto interpretationem metaphoricam S. Greg. Naz. Orat. 36, et S. Joan. Damasc. loco mox laudato, juxta quam Christus dicitur profecisse, quia hominum qui ejus membra sunt, in sapientiâ et virtute progressus, suum proprium profectum esse ducit.

Instabis: Nisi Christus reverà in sapientiâ profecisset, non potuisset dici sapientiâ proficere *apud Deum*; ergo, etc. Nego ant. Cùm Christus dicitur profecisse sapientiâ et ætate *apud Deum*, sensus est eum modum quo Christus proficiebat, fuisse cognitum Deo. Non minùs autem innotuit Deo profectus Christi in majori ostensione et explicatione sapientiæ suæ consistens, quàm innotescere potuisset profectus in acquirendis gradibus sapientiæ positus; ergo, etc.

Obj. 3^o: Christus, Joan. 11, v. 17, ubi Lazarus esset positus inquit, et cap. 21, quasi dubitans ter interrogat Petrum: *Petre, amas me?* sed ejusmodi inquisitio et interrogatio sunt signa ignorationis; ergo. Præterea, Matth. 8, admiratus est centurionis fidem; admiratio autem ex ignoratione nascitur. Deinde Luc 22: *Apparuit illi (Christo) Angelus de caelo confortans eum.* Atqui, si omnia novisset, non indignuisset confortari ab Angelo, seu sibi suggeri ab ipso nova patientiæ et consolationis motiva. Denique, Heb. 4, v. 15, Christus nobis in omnibus similis significatur excepto peccato; ergo, etc.

Ad primum, nego consequentiam. Ejusmodi interrogationes, ut Origines et S. Chrysost. mox laudati observant, humanæ sunt loquendi rationes, quas Christus usurpavit ut se hominem proderet, et more hominum loqueretur, non verò ullius rei ignorantiam indicant. Hinc interrogationi Domini sui respondens S. Petrus loco laudato: *Domine, inquit, tu omnia nôsti; tu scis quia amo te.* Ad secundum eadem fere est responsio. Dicitur admirari, non tantum qui ad rei ante ignotæ conspectum attonitus est et quasi obstupefactus; sed etiam qui pretium ejus licet sibi antea cognitum, mirificè laudat, et ut eximium commendat. Atque hoc posteriori sensu Christus admiratus est centu-

rionis fidem. *Mirando laudabat*, inquit S. August., lib. 1 contra advers. Leg. et Proph., cap. 7. Ad tertium, hæ voces, *confortans eum*, non significant ab Angelo motiva patientiæ et consolationis fuisse Christo suggesta, sed duntaxat ei Angelum ministrasse in eo agone quem pati voluit, tum ut suæ humanitatis certa argumenta præberet; ea enim est nostræ naturæ appendix, ut mortem quodam instinctu refugiamus; tum ut nimios mortis timores vincendi nobis gratiam promereretur. Eisdem sacri textus voces S. Epiphanius, Hæresi 69, n. 60, vult accipi de laudibus ab Angelo Christo datis ob eximiam ejus fortitudinem. Ad ultimum, ubi Christus nobis dicitur similis fuisse *absque peccato*, id est excepto peccato, non solum peccatum propriè dictum, sed etiam ea quæ ita ex peccato consequuntur, ut ad illud ducant, excipi debent; cujusmodi sunt ignorantia et concupiscentia.

Obj. 4^o: S. Irenæus, lib. 2, cap. 49, sic habet: *Si igitur scientiam diei illius (judicii) Filius non erubuit referre ad Patrem, et dixit quod verum est; neque nos erubescamus, quæ sunt in quæstionibus majora secundum nos reservare Deo*; ergo, juxta S. doctorem, Christus non cognovit diem judicii. Ita Grotius, in caput 15 S. Marci, operum suorum t. 2, part. 1, pag. 323, ubi addit testimonium jam supra laudatum Leontii aientis *multos Patrum*, imò *ferè omnes videri dicere Christum ignorasse.*

Respondeo non hanc videri esse S. Irenæi mentem quam ipsi Grotius affingit. Intelligi potest S. doctor eo dixisse sensu Christum diei judicii notitiam ad Patrem retulisse, non quòd ipse Christus hunc diem nesciverit; sed quòd à Patre ejusmodi cognitionem acceperit, ut et cætera omnia quæ habet non tantum ut homo, sed etiam ut Deus. Hæc expositio, ut evangelicæ doctrinæ, ita et S. Irenæi de Verbi divini generatione menti planè consentanea. Præterea verò vix potest concipi quomodo S. doctor, qui Gnosticos impietatis accusat quòd Christo Filio Dei ignorantiam adscribebant, suæ doctrinæ immemor loco objecto inscientiam diei judicii eidem Christo impegisset. Ad Leontium quod attinet, is à vero aberravit, ut ex testimoniis veterum inter probationes allatis perspicuum est. Sapientiùs longè ac veriùs Eulogius Alexandrinus, apud Photium, cod. 230, quædam proponit principia exponendis ejusmodi veterum, ac præsertim S. Greg. Theologi placitis idonea. Ac deinde sic concludit n. 30: « Quòd si qui ex Patribus

ignorantiam in Salvatore ex parte humanitatis admiserunt, id tamen non ut dogma sanxerunt, sed Arianorum insaniam repressuri, (qui omnia quæ in Christo erant humana ad Unigeniti divinitatem transtulerunt, ut increatum Dei Verbum creaturam ostenderent), rectius hæc de humanitate Christi dici posse existimârunt, quàm humana ab illis Arianis ad divinitatem trahi. »

Obj. 5^o : Arianis Christi divinitatem ex eo quòd diem iudicii ignoraverit impugnantibus, respondent SS. Patres ejusmodi ignorantiam Christo ut homini adscribendam, non Verbo. Ita S. Athanasius, Orat. 3, aliàs 4, in Arianos, n. 45 et seq., S. Greg. Naz., Orat. 36, S. Basil., Epist. 38, S. Hil., lib. 9, de Trinitate, S. Cyrill. Alex., lib. 22 Thesauri; ergo, etc. Dist. ant.: Respondent hanc ignorantiam deputandam Christo ut homini, hoc est ejus humanitati in se consideratæ secundum ea quæ ex se habet, abstrahendo ab unione hypostaticâ, concedo; Christo ut homini, ita ut ejus humanitas ut conjuncta hypostaticè Verbo hanc notitiam à Deo non acceperit, subdistinguo: Idque non tradunt ut dogma, sed ut opinionem solvendæ Arianorum objectioni idoneam, concedo; tradunt ut dogma certum, nego. Itaque 1^o, natura humana in Christo, ut Eulogius, loco mox citato, S. Greg. Magnus, lib. 10 Epist. 36, aliàs 8, Epist. 42, et S. Joan. Damascenus observant, potest duplici ratione spectari, nempe vel in se, secundum ea quæ ex se habet, abstrahendo ab unione hypostaticâ, et à donis quæ propter hanc unionem consequitur, vel ut unita Verbo, et idcirco donis eximiis et præcellentissimis, ut decebat, ornata. Certum est naturam humanam Christi priori modo spectatam, seu à se ipsâ, non habere, quemadmodum iidem Patres advertunt, plenam omnium rerum notitiam; à seipsâ enim natura humana ignorans est. Sub secundo igitur tantum respectu, nempe ut Verbo unita, humanitas Christi cognitione omnium perfectâ pollet, ac inprimis diei iudicii. Duplicem illum humanæ Christi naturæ respectum S. Gregorius Magnus, loco laudato sic uno verbo exprimit: *Quod (Christus) in ipsâ (humanitate suâ) novit non ex ipsâ novit*. Porro Eulogius, ubi supra, n. 10, hoc ipso sensu vult à S. Gregorio Nazianz. esse dictum: *Scit quidem (Christus) ut Deus, nescit verò ut homo*. Id est scit quidem etiam secundum humanitatem prout in Verbo subsistit, unamque cum eo personam constituit, nescit verò secundum humanitatem puram et simplicem, seu, præcisè secun-

dum ea quæ ex seipsâ habet consideratam. Non aliam autem S. Gregorii Theologi loco objecto esse mentem confirmant verba quæ ex ejus Orat. 20, inter probandam conclusionem retulimus, in quibus Christum ut hominem potuisse sapientiâ proficere idcirco negat, quòd à principio perfectus fuerit. Eodem modo intelligendus est S. Cyrillus, lib. 22 Thesauri, tum quia duplicem hanc humanitatis Christi considerandæ rationem ab eo mutuatus est Eulogius, tum quia, lib. 3 contra Nestorium, conceptis verbis omnem profectum in sapientiâ Christo ut homini abjudicat, quòd in eo essent ab utero omnes thesauri sapientiæ. Verba S. doctoris à nobis superius relata sunt.

2^o Ubi aliqua sententia in scriptis quorundam veterum aliquando deprehenditur, diligenter observandum est utrum ut dogma certum tradatur, an verò tantum ut explicatio solvendis hæreticorum objectionibus utilis. Si prius, tunc ejusmodi sententia spectanda est ut propria doctrina illius doctoris apud quem legitur, ac magnum ex ejus testimonio deducitur veritatis illius doctrinæ argumentum. Si posterius, jam hoc unum ex hujusce sententiæ usu colligi potest, eam non improbabilem iis qui illâ sic usi sunt visam esse, atque tunc nondum fuisse iudicio Ecclesiæ proscriptam (1). Jam autem retulimus censuisse Eulogium, si qui ex Patribus ignorantiam aliquam Christo ratione humanitatis affixerunt, hoc dogma non sanxisse, sed hæc expositionem adhibuisse ut Arianorum obstinationem frangerent, qui divinitatis Verbi impugnandæ causâ, ad illud transferebant quæcumque de Christo ut homine sunt dicta. Quàm merito autem hæc ab Eulogio pronuntiata fuerint, juvat exemplo S. Athanasii comprobare. Hic, Orat. 3, aliàs 4, in Arianos, n. 57, ad argumentum quod adversus Verbi divinitatem Arian. ex iis locis deducebant in quibus Christus sciscitatus esse legitur, respondet primum ejusmodi interrogationes à Christo usurpatas fuisse ut humano more loqueretur, iisque nullam ignorantiam denotari, quod et

(1) Aiunt doct. Benedictini in notâ ad Orat. 5 S. Ath. contra Arianos, pag. 593, sententiam (quâ Christo ut homini quorundam ignorantia affingitur et aliquis in scientiâ profectus) in nomine videri olim damnatam fuisse nisi cum alio errore conjunctam. Et reverâ, ex S. Ambrosio, lib. 5 de Fide, cap. 18, n. 221 et 222, perspicuè colligitur hanc suâ ætate fuisse quorundam Catholicorum mentem, Christum aliqua ignorasse; quam sententiam etiam non approbet S. doctor, minimè tamen ut errorem jam damnatum rejicit.

quibusdam adductis Scripturæ locis planè demonstrat. Deinde verò subjungit : *Quòd si in eo quòd (Christus) interrogare dicitur, velint insistere, audiant nullam in Divinitate ignorantiam esse, sed proprium esse carnis ignorare.* Tum testimonia ab Ariani objecta de Christo ut homine intelligenda esse ostendit. Numero autem 55, postquàm Lucæ locum, *Proficiebat ætate et sapientiâ, etc.*, exposuit de majori divinitatis Verbi explicatione et ostensione, ait, *Quòd si rixari velint (Ariani) in eo quòd VERBUM CARO FACTUM Jesus sit appellatus, ad eumque illud dictum, PROFICIEBAT, referant, audiant neque eâ re imminui paternam lucem, quæ Filius Dei est.* Quod probat quia inde tantùm sequeretur Verbum ut in carne assumptâ passum est, ita in carne seu in humanitate profecisse.

Obj. ultimò : S. Epiph. Hæres. 77, n. 26 et 30, p. 1020 et 1024, S. Ambrosius, de incarnat. cap. 7, n. 72, Theodoretus, lib. 5 Hæreticarum fabularum, cap. 13, t. 4, p. 284, Apollinaristas qui mentem Christo detrahebant ac mentis creatæ loco Verbum esse statuebant, refellunt, quia secundum S. Lucam, cap. 2, Christus in sapientiâ profecit. Nam is profectus, inquit, in Verbum ipsum ratione naturæ divinæ cadere non potest; ergo mens Christo fuit quæ sapientiâ crescere et progredi potuerit. Ubi patet agi de vero et reali in sapientiâ et notitiâ incremento; ergo, etc.

Respondeo cum doctiss. Benedictinis in notâ ad locum objectum S. Ambrosii, hos SS. doctores non absurdè posse explicari de profectu in eo genere scientiæ quod theologi hîc appellant scientiam acquisitam et experimentalem, quâ nempe Christus novo modo, experienciâ scilicet, quotidiano et ipso usu ea cognoscebat quæ jam ipsi per scientiam infusam erant nota. Fundamentum hujusce responsionis est 1º, quia qualiscumque in sapientiâ profectus, etiam ille experimentalis, refellendis Apollinaristis et dogmati catholico in eos stabiliendo sufficebat. Solâ enim mente humanâ potuit Christus etiam in hoc sciendi modo proficere, et quodlibet incrementum à Verbi divinitate perinde excluditur. 2º Quia mirum videri non debet à sanctis doctoribus non esse disertè assignatam naturam illius scientiæ in quâ aiebant Christum esse progressum. Nempe nihil ad eorum scopum, ut dictum est, referebat, modum et speciem ejusmodi incrementi determinare; satis ipsis erat Christum aliquatenus et qualicumque ratione in sapientiâ profecisse. 3º S. Ambrosius, qui loco objecto Apollinaristas ex hoc pro-

fectu Christi pro virili impugnat, alibi tamen nempe lib. 5 de Fide cap. 18, n. 222, clarè significat sibi non probari eorum sententiam quæ Christum secundum humanitatem aliqua ignorasse profitebantur. Et Sermone in Psal. 21 (si tamen ipse auctor est hujus sermonis), docet sapientiam Christi ut hominis *desuper contextam*, hoc est, cœlitus totam simul infusam fuisse, non verò instar humanæ sapientiæ *assutam*, hoc est non paulatim addiscendo acquisitam. Hæc porrò cum iis quæ S. Ambrosius loco objecto tradit, satius videtur ope allatæ distinctionis conciliare, quàm cum Petavio, lib. 11, cap. 4, variationis accusare S. doctorem.

2º De objecto scientiæ Christi. — Quæritur 1º, an anima Christi à primo ortu Deum intuitivè cognoverit; 2º an viderit omnia præsentia, præterita et in perpetuam æternitatem futura; 3º an omnia etiam possibilia perspecta habuerit. Circa primum, omnes consentiunt theologi animam Christi visione Dei intuitivâ à primo ortu esse potitam, sed non comprehensivâ. Quomodò autem Christus non potuerit intellectu suo creato videre Deum comprehensivè, variis modis explicant, secundum varias quas singuli de Dei incomprehensibilitate respectu cujuslibet intellectus creati tenent sententias; quarum expositio ad hunc locum non pertinet. Circa secundum, S. Thomas, Scotus et alii scholæ magistri, quos Petavius sequitur lib. 11 de Incarnat. cap. 3, unanimiter censent Christum ea omnia ab ortu cognovisse quæ Deus suâ visionis scientiâ attingit, id est, omnia præterita, præsentia, et in perpetuum futura. Circa tertium, variant opiniones. S. Fulgentius in Responsione ad Ferrandum diaconum, Hugo à S. Victore in lib. *Utrum anima Christi æqualem cum Divinitate scientiam habuerit*, Petrus Pictaviensis et alii affirmant Christi animam nihil latere eorum quæ Deus novit, ac proinde non tantùm ea quæ ad scientiam divinam visionis referuntur, sed etiam quæ ad scientiam simplicis intelligentiæ pertinent, nempe omnia possibilia, ab intellectu creato Christi clarè perspicere. Discrimen tamen ponunt scientiam Dei inter et scientiam Christi; nempe observant S. Fulgentius, Petrus Pictaviensis et alii, scientiam Dei esse ipsum Deum, ipsique esse necessariam et essentialem; scientiam autem quâ Christi anima donata est, non esse ejusmodi animæ essentialem, sed ipsi fuisse à Deo concessam. Addunt non pauci animam Christi, etsi ea omnia quæ Deus perspicit, co-

gnoscat extensive, non tamen ea cognoscere tam intensive, id est cognitione quæ entitate suâ adæquet scientiæ divinæ perfectionem. Quæ ratio vix differt ab eâ quam S. Fulgentius adhibuit. Eandem S. Fulgentii et aliorum opinionem novâ ratione explicat Thomassinus. Nempe, juxta eum, anima Christi novit quidem ea omnia quæ Deus seu scientiâ visionis, seu scientiâ simplicis intelligentiæ perspicit, sed tamen genere cognitionis inferiori et specificè diverso. Ut enim, inquit, modus cognoscendi per sensus differt specificè à modo quo eadem objecta cognoscimus per intellectum, ita cognitio divina alterius generis et longè superioris est ab eâ quâ anima Christi eadem ac ipse objecta apprehendit.

Plerique theologi post S. Thomam, tertiâ parte, q. 10, a. 2, in corpore, S. Bonav. in 3 dist. 14, et Scotum in eandem distinctionem qu. 2, censent omnium possibilium cognitionem non esse Christo concessam, neque ideò ipsum dici posse quidquam nescire, quia ejusmodi possibilium cognitio nec ad ejus conditionem et dignitatem, nec ad munia ejusdem et officia ullum respectum habent. Plenam igitur Christo scientiam adscribunt eorum omnium quæ Deus scientiâ visionis attingit, atque eo sensu intelligendi sunt cùm aiunt à Christo omnia cognosci, id est omnia quæ verè entia sunt, nam possibilia nonnisi improprie entia appellantur. Statuunt verò non omnia à Christo perspicì quæ ad scientiam divinam simplicis intelligentiæ pertinent. Si Christus comprehenderet quæcumque potest Deus, comprehenderet *divinam virtutem*, inquit S. Thomas loco citato, *et per consequens divinam essentiam*. Cæterum, plurium possibilium notitiam Christo esse impertitam omnes concedunt; nec sanè ullum dubium esse potest quin Christus ea quæ voluerit, possibilia statim cognoscat. Petavius, loco jam laudato, conjicit sanctum Fulgentium fortè explicari posse de cognitione eorum omnium quæ Deus scientiâ visionis perspicit, quippe cùm cætera non sint, nec fuerint, nec futura sint, cùmque ubi dicimus *omnia*, ea potissimum intelligamus quæ simpliciter extra sunt, hoc est entia quæ sunt actu, non verò entia secundum quid et potentiâ tantum, nempe possibilia; sequitur S. Fulgentium ubi docuit Christo plenam fuisse *omnium* scientiam, fortè de solis existentibus aut præteritis vel futuris, non de merè possibilibus esse locutum. Quidquid sit,

CONCLUSIO I. Anima Christi à primo ortu suo

Deum vidit intuitivè, et quidem clariùs quâlibet aliâ creaturâ; sed non comprehensivè.

Probatur prima pars 1^o iis Scripturæ locis quibus modò probavimus Christum à primo ortu plenâ rerum scientiâ fuisse ornatum. Nam ex ejusmodi testimoniis Christus ab ortu plenus fuit veritatis, et thesauros sapientiæ et scientiæ in se reconditos habuit; atqui dictus non fuisset plenus veritatis, et thesauris sapientiæ et scientiæ cumulatus, si visione Dei intuitivâ caruisset, ut colligere est ex eo quòd qui visione intuitivâ nondum fruitur, dicatur ab Apostolo *cognoscere tantum ex parte, videre per speculum in ænigmate, peregrinati à Domino, et per fidem ambulare non per speciem*. Sic enim loquitur 1 Cor. 13, v. 9 et 10: *Ex parte enim cognoscimus, et ex parte prophetamus; cum autem venerit quod perfectum est, evacuabitur quod ex parte est; et v. 12: Videmus nunc per speculum in ænigmate; tunc autem cognoscam sicut et cognitus sum; et 2 Cor. 5, v. 6, et 7: Dim sumus in corpore, peregrinamur à Domino, per fidem enim ambulamus et non per speciem; ergo, etc.* Eòdem referri possunt quædam alia Scripturæ loca; Joan. 8, v. 55: *Scio eum* (Deum), ait Christus, *et sermonem ejus servo*. Ubi agitur de Christo ut sermonem Dei observante, ac proinde de eo ut homine. Ibid. cap. 1, v. 18: *Deum nemo vidit unquam. Unigenitus Filius qui est in sinu Patris ipse enarravit*. Christus ut prædicans et Prophetam agens est Christus ut homo. Ergo cùm unigenitus seu Christus enarrans seu prædicans ibi dicatur in sinu Patris, videtur significari ipsum ut hominem per visionem claram et intuitivam esse in sinu Patris.

Probatur 2^o ex SS. Patribus quorum testimonia supra etiam adduximus. Ii perfectam omnium cognitionem adscribunt Christo, noluntque ullum in sapientiâ verum et realem profectum ipsi absolutè attribui, quia nempe, ut ait S. Gregorius Theologus, *à principio perfectus, perfectior esse non potuit*. Atqui plena scientia, atque impossibilitas in scientiâ proficiendi Christo ut homini attribui non potuissent, si, etc. Non omittendum S. Augustini testimonium in quo expressè et nominatim de visione Dei intuitivâ disserens S. doctor, hanc Christo in terris degenti attribuire videtur. Libro igitur 83 Quæstionum, q. 65, in allegoricâ quâdam resurrectionis Lazari expositione, sudarium quo facies illius è monumento exeuntis tecta erat, figurasse docet obscuram illam visionem quâ nunc *per speculum in ænigmate*

Deum cognoscimus. Tum addit Christum præcipiendo illud sudarium auferri, significare voluisse quòd post hanc vitam auferentur omnia vèlamenta, ut facie ad faciem videamus. Deinde eà occasione observans linteamina et sudarium quibus Christi corpus involutum est, ab ipso esse in monumento relictà, juxta eamdem allegoriam concludit eum inter et cæteros homines magnum intercessisse discrimen, et ipsum solum in carne nihil latuisse. « Quantum autem, ait, intersit inter hominem, quem Dei sapientia gestabat, per quem liberati sumus, et cæteros homines, hinc intelligitur, quòd Lazarus nisi exiens non solvitur; id est, etiam renata anima, nisi resolutione corporis libera ab omni peccato, et ignorantia esse non potest, quamdiù per speculum et in ænigmate videt Dominum. Illius autem linteamina, et sudarium qui peccatum non fecit, et nihil ignoravit, in monumento inventa sunt. Ipse solus in carne, non tantum in monumento non est oppressus, ut aliquod peccatum in eo inveniretur; sed nec linteis implicatus, ut eum aliquid lateret aut ab itinere retardaret. »

Observat Petavius, lib. 11, cap. 4, n. 5 et 6, alia quædam Patrum testimonia à Suare, disp. 25, sect. 1, et ab aliis quibusdam hic laudari, quæ ad rem non pertinent.

Probatur 3^o consensu unanimi theologorum qui omnes ut certum et indubitatum ponunt Christi animam à primo ortu fruitam esse visione Dei intuitivâ.

Probatur 4^o ratione theologicâ, quam affert S. Thomas, p. 3, q. 9, a. 2, nempe cum homines per Christi humanitatem ad beatitudinis finem perducantur, ut legitur Heb. 2, oportuisse ut beata cognitio quæ in visione Dei consistit, excellentissimè Christo homini ab ortu conveniret. Præterea omnis perfectio in animâ Christi possibilis, et finem Incarnationis, nempe satisfactionem ab ipso pro nobis exhibitam non impediens, censeri debet ab ortu Christo concessa; atqui visio intuitiva Dei in animâ Christi fuit ab ortu possibilis, ut manifestum est; non autem impedire potuit ne Christus pro nobis satisfaceret, si quidem cap. 3 ostendimus passiones voluntariè susceptas et ex liberâ tantum voluntate per aliquod tempus perseverantes, posse ex Dei potentiâ absolutâ stare etiam cum illâ beatitudine quæ ex visione Dei intuitivâ diffluit; ergo.

Probatur secunda pars, nempe animam Christi clariùs videre Deum, quàm alia quælibet creatura; 1^o ex Scripturis. Eph. 1, v. 20,

Deus dicitur constituisse Christum ad dexteram suam in cælestibus; supra omnem principatum et potestatem, et virtutem, et dominationem, et omne nomen, quod nominatur non solum in hoc seculo, sed etiam in futuro. Atqui in cælesti regno, ut ait S. Thomas, hic q. 10, a. 4, tantò aliquis est superior, quantò perfectius cognoscit Deum; ergo. Probatur 2^o, quia humanitas Christi, utpote Verbo perfectissimè conjuncta, nempe in personæ unitatem, debuit proinde clariori ac perfectiori quàm cæteræ creaturæ visione Dei donari. Nec dicas naturam Angelorum esse perfectiorem naturâ humanâ, ac proinde Angelos, utpote perfectiori intellectu donatos, debere perfectiùs Christo Deum cognoscere. Nam hic non agitur de cognitione naturali, siquidem visio intuitiva Dei menti cuilibet creaturæ sibi relictæ impossibilis est; sed quæstio est de ordine gratiæ in quo Christus perfectissimus est et longè Angelos superat; ergo.

Probatur tertia pars, quia fide constat, ut alibi demonstrant theologi, Deum menti finitæ esse incomprehensibilem; atqui mens Christi quantiscumque donis ornetur, finita tamen est; etc. Hinc merito in concilio Basileensi, sess. 22, inter alias plures damnata fuit ista propositio Augustini de Roma: *Anima Christi videt Deum tam clarè et intentè quàm Deus videt seipsum.*

Quæres an de fide sit Christum ab ortu ac tempore vitæ suæ mortalis, visione Dei intuitivâ secundum animam esse potitum? Respondeo à quibusdam theologis pronuntiari illud esse de fide. Sed hæc opinio falsa est, siquidem dogma visionis intuitivæ, ut fatentur Suarez De Incarn. disp. 25, sect. 1, Petavius, lib. 11, c. 4, n. 8, et alii, neque in Scripturis, neque apud SS. Patres clarè et dilucidè expressum legitur, sed tantum ex generalioribus Patrum et Scripturarum dictis discurrendo infertur et colligitur. Censent tamen Suarez et Petavius locis citatis, hanc doctrinam esse ita certam ut adversa sententia sit erronea et hæresi proxima. Sed durior adhuc videtur hæc censura, nec satis firmo nixa fundamento. Satis sit ergo, propositioni quâ Christum visione intuitivâ ab ortu esse fruitum negaretur, notam falsitatis et temeritatis cum Turnelio et aliis pluribus inurere, quia hanc notam meretur omnis propositio quam ut certò falsam omnes theologi unanimiter respuunt.

CONCLUSIO II. Animæ Christi concessa est ab ortu cognitio omnium præsentium, præteritorum et per totam æternitatem futurorum, non verò omnium possibilem.

Probatur prima pars, 1^o quia, ex supra dictis et comprobatis, Christus plenam omnium ad sua membra et dignitatem pertinentium cognitionem à primo ortu habuit; atqui status, dignitas et munera Christi hominis ad omnia præterita, presentia et in perpetuam æternitatem futura relationem dicunt. Quippe Ephes. 1, v. 21, *constitutus est supra... omne nomen quod nominatur, non solum in hoc seculo, sed etiam in futuro. Et omnia (Deus) subiecit sub pedibus ejus*. Tum eò loci, tum alibi significatur esse Angelorum atque hominum *Caput*. Ad Christum omnia referri dicuntur, 1 Cor. 3, v. 13, Christus autem ad Deum. Coloss. 1, v. 20: *Reconciliata sunt omnia in ipsum.... sive quæ in terris, sive quæ in cælis sunt*. Fide constat eum satisfecisse pro omnium peccatis, propter ejus merita omnes conferri gratias, eundem constitutum esse vivorum et mortuorum judicem, etc.; ergo, etc. 2^o In Scripturis Christus dicitur simpliciter veritatis plenus, et thesauris sapientiæ et scientiæ cumulatus; pluresque è sanctis jam laudatis Patribus ipsi simpliciter attribuunt plenam omnium scientiam; atqui hæc intelligenda sunt saltem de iis omnibus quæ reverà existunt, aut extiterunt, aut extitura sunt in rerum naturâ; nam vox *omnia*, saltem universa entia actualia complectitur: omnesque thesauri scientiæ saltem significant notitiam eorum omnium quæ conditâ rerum universitate continentur; ergo, etc.

Probatur secunda pars, nempe non omnia possibilea cognosci ab animâ Christi. Nam 1^o si anima Christi quæ Deum videt intuitivè, ut probatum est, et præterea omnium futurorum, præsentium, futurorum plenam habet notitiam, polleret quoque omnium possibileum notitiâ, jam ejus scientia tam latè pateret, quàm scientia Dei, nullusque in Deo esset respectus qui ipsam lateret; atqui id falsum, 1^o quia impossibile est ab animâ Christi quæ finita est, tot ejusmodi objecta infinita ita attingi ut nihil eam lateat; 2^o quia anima Christi non potest Deum comprehendere; atqui Deum comprehenderet qui eum sic videret ut nihil lateret videntem; ipsa est definitio comprehensionis quam affert S. Augustinus. Vel, ut ratiocinatur divus Thomas hic q. 10, art. 2, in corpore, si cognosceret anima Christi in Verbo quæcumque sunt in potentiâ divinâ, *hoc esset comprehendere omnia quæ potest Deus facere, quod esset comprehendere divinam virtutem et per consequens divinam essentiam*. Frustra autem finguntur gradus varii intensiois, aut diversa species

perceptionis. Quæcumque sit intensio, entitas aut species alicujus perceptionis puræ, certè ea perceptio comprehensiva est, si objectum, et quidquid est in objecto, et omnis virtus objecti per eam ita attingantur, ut nihil in iis prorsus sit quod percipientem fugiat. Sed de eo alibi uberius theologi disputant ubi de incomprehensibilitate Dei et visione ejus beatis mentibus concessâ.

3^o *De speciebus scientiæ Christi*. — Theologi solent dividere scientiam Christi in beatificam, infusam, et acquisitam seu experimentalem. Beatifica ea est, quâ anima ejus videt Deum intuitivè, quâque simul in Deo tanquàm in medio, ut aiunt, seu in Verbo perspicit aliqua possibilea et creaturas existentes. Scientia infusa est ea quam Christus à Deo infusione accepit, ut cognosceret omnia quæ ad se et sua munia contingebant. Scientia infusa duplex est, alia infusa, per se nempe, quâ omnia mysteria et res supernaturales Christus clarè cognovit; alia infusa per accidens, quâ cognoscit ea quorum homo purus naturalem posset cognitionem acquirere. Scientia acquisita seu experimentalis est ea, quâ Christus novo modo, nempe experiendo, cognoscit multa quæ jam antea per scientiam infusam cognoscebat. V. g., antequàm pateretur, dolorum naturam et vim cognoscebat, eandem verò, patiando, cognovit novâ ratione, nempe experientiâ; nova autem hæc ratio cognoscendi appellatur scientia experimentalis. Facile perspicitur omnes has scientias in Christo admittendas, quia harum omnium habuit facultates quas ad actum reduci Christi perfectio postulavit.

ARTICULUS II.

De perfectione humanitatis Christi quantum ad voluntatem considerata.

MULTA hic expendenda occurrunt: 1^o quæ gratiæ Christo collatæ fuerint; 2^o an donis Spiritûs sancti cumulatus fuerit; 3^o quæ in eo fuerint virtutes; 4^o quæ et quanta fuerit Christi secundum humanitatem sanctitas; 5^o in quo reponenda sit ejus libertas, et quomodo eum ejus impeccantiâ conciliari possit.

1^o *De gratiis Christo homini concessis*. — Duplex generatim distinguitur gratia, alia gratum faciens, alia gratis data. Hæc non tam in commodum accipientis confertur, quàm ad utilitatem aliorum; ut donum miraculorum. Gratia gratum faciens vel eum cui tribuitur, formaliter sanctificat, vel saltem ad ejus sanctificationem conducit. Dividitur hic in substantialem

et accidentalem. Substantialis est ipsa unio hypostatica, quâ natura humana Christi Verbo divino in personæ unitatem conjungitur. Accidentalis est ea quæ ex hypostaticâ unione in Christi humanitatem derivatur, et habitualis est vel actualis. Humanitati Christi inesse gratiam substantialem, seu eam hypostaticè uniri Verbo divino, satis superque demonstratum liquet ex dictis Dissertatione quartâ, cap. 2, adversus Nestorium. De gratiâ igitur accidentali, seu habituali, seu actuali, impræsentiarum superest ut disseramus.

CONCLUSIO I. Christus habuit gratiam habitualement et actualem, sine iis tamen imperfectionibus quas in nobis gratia actualis supponit.

Probatur prima pars ex Scripturis. Joan. 1, v. 14: *Verbum caro factum est et habitavit in nobis.... plenum gratiæ et veritatis*. Ibid. v. 16: *De plenitudine ejus nos omnes accepimus*. Et cap. 3, v. 34: *Non enim ad mensuram dat (ei) Deus spiritum*. Ex quibus locis patet in Christo fuisse plenitudinem gratiæ; ergo, etc. Ratio theologica idem manifestè adstruit: nam Christo necessaria fuit gratia, tum ut ejus humanitas formâ justitiæ inhærentis instrueretur, tum ut ejus voluntas in ratione causæ supernaturalis constitueretur, et posset ea opera efficere naturam humanam sibi relictam longè superantia quæ Christus humanitate suâ produxit.

Probatur secunda pars, nempe gratiam in Christo fuisse sine iis imperfectionibus quas in nobis supponit. Nam gratia nobis datur tum ad depellendam è mentibus nostris ignorantiam, tum ad concupiscentiam quâ ad peccandum impellimur, vincendam; atqui propter hos fines gratia non fuit Christo collata, siquidem nec ignorantia, ut articulo præcedenti probatum est, nec concupiscentiâ uti mox dicemus, laboravit; ergo, etc.

CONCLUSIO II. Omnibus gratiis gratis datis politus est Christus ut homo. Probatur, quia ejusmodi gratiæ ex Apostolo, 1 Cor. 12, sunt sermo sapientiæ, gratia sanitarum, operatio virtutum, prophetia, discretio spirituum. Sed ex evangelicâ historiâ constat Christum omnibus ejusmodi gratiis fuisse præcellenter præditum; ergo, etc.

Quæres 1º, an gratia Christi fuerit infinita? Respondeo negativè. Nam quidquid in subjecto inhæsionis finito recipitur, illud necessario finitum est; atqui gratiæ Christo collatæ, in ejus humanitate quæ finita est, receptæ sunt; ergo, etc.

Quæres 2º, an Christus ut homo et ut per

humanitatem agens, produxerit physicè miracula, an verò moraliter tantum. Respondeo certum esse 1º, Christum ut hominem fuisse saltem causam moralem miraculorum quæ patravit. Nam causa moralis ea est quæ agentem movet et impellit ad effectum producendum; atqui eæ saltem fuerunt Christi hominis partes in patrandis miraculis, ut merito desideriorum suorum certò et infallibiliter moveret Deum ad miracula efficienda; ergo, etc. Certum est 2º, Christum ut hominem dicendum esse causam physicam miraculi in eorum systemate qui causas físicas secundas volunt esse duntaxat causas occasionales à Deo institutas ut secundum aliquem ordinem constantem et uniformem operaretur. Nam causa occasionalis ea est ad cujus præsentiam semper et infallibiliter in iisdem circumstantiis vi legis à Deo constitutæ effectus producit; atqui, ubi Christus ut homo volebat miraculum produci, constat illud semper fuisse à Deo productum; quippe semper *exaudiebatur* Christus *pro suâ reverentiâ*; ergo, etc. Certum est 3º, Christum in miraculosos effectus magis influxisse, quàm causæ occasionales in effectus suos influerent. Nam causa occasionalis nullam per se habet vim movendi et impellendi agentem ad effectum producendum; et idcirco tantum ad ejus præsentiam effectus producit, quia ad ejusmodi præsentiam Deus hunc producere decrevit; atqui non tantum ad præsentiam actûs voluntatis humanæ Christi de quodam patrando miraculo, seu ubi aderat ejusmodi actus, hoc ipso Deus illud operabatur; sed præterea in ejusmodi actu inerat, ut dictum est, saltem vis movendi Dei ad effectum miraculosum producendum; ergo in effectus miraculosos Christus magis influxit, quàm in suos effectus causa merè occasionalis influeret.

Utrum verò in systemate eorum qui vim aliquam propriam physicam, à Deo dependentem, causis physicis secundis assignant, quod systema theologi solent tenere; utrum, inquam, in eâ opinione Christus ut homo dicendus sit causa physica miraculorum, quæstio est hinc et inde in scholis maximè agitata, quæ nobis videtur certò solvi non posse; quanquàm partem affirmantem ut probabiliorem habeamus. Et quidem certò solvi non potest; natura enim vis illius physicæ quæ causis secundis tribuitur, non satis perspicuè innotescit, ut possimus esse certi hanc circa miracula virtutem in humanitate Christi, seu in ejus animâ per voluntatem operante esse possibilem. Pars autem

affirmans probabilior est. Nam si causæ secundæ quâdam vi physicâ sibi propriâ polleant, sanè probabilius similem potentiam circa miracula producenda, potuisse à Deo animæ Christi concedi, ut et vulgò existimant hanc Angelis concedi posse, imò et in quibusdam occasionibus fortè concessam fuisse. Porro, quis, admissâ hujusce virtutis, in animâ Christi, possibilitate, eandem dotem negaverit fuisse ab ortu ipsi concessam? ergo, etc.

2° *An dona Spiritûs sancti Christo collata sint.* — Naturam donorum Spiritûs sancti, prout à virtutibus moralibus distinguuntur, explicat S. Thomas 1-2, q. 68, a. 1. Hic satis sit annotare ejusmodi dona ad gratiam habituales referri, iis perfici hominem seu animæ potentias in iis quæ per Spiritum sanctum operatur, ac tandem illa esse septem numero, nempe dona sapientiæ et intellectûs, consilii et fortitudinis, scientiæ, pietatis et timoris Domini.

CONCLUSIO. In Christo fuere dona Spiritûs sancti sed iis imperfectionibus mixta non erant quibuscum in nobis deprehenduntur. Probatur prima pars ex Isaïæ c. 41, v. 2, ubi omnia recensentur Spiritûs sancti dona, et Christo concedenda pronuntiantur. *Requiescet*, inquit Propheta, *super eum* (florem egressum de radice Jesse) *Spiritus Domini, spiritus sapientiæ et intellectûs, spiritus consilii et fortitudinis, spiritus scientiæ et pietatis; et replebit eum spiritus timoris Domini.* Is textus de solo Christo intelligi posse antecedentia et consequentia manifestum faciunt. Et reverà de Christo exponitur à S. Irenæo. lib. 3 contra hæres. cap. 3, à Tertull., lib. advers. Judæos, cap. 9, à S. Hieronymo in Isaïam, et ab aliis. Probatur secunda pars, quia dona Spiritûs sancti in nobis admixta reperiuntur defectibus qui cum Christi perfectione stare non possent. Nempe, v. g., donum consilii in nobis sæpè supponit animum ancipitem et per aliquod tempus deliberantem; donum timoris cum salutis nostræ incertitudine conjunctus est, etc. Atqui hæ imperfectiones in Christo non possunt admitti; donum igitur consilii in eo nihil aliud est quàm rectum de agendis judicium, nullus ipsi alius timor Domini adscribendus quàm qui ex charitate et reverentiâ seu obsequio nascitur, etc.

3° *De virtutibus Christo attribuendis.* — Virtutes aliæ sunt infusæ, aliæ acquisitæ, aliæ theologicæ, aliæ morales.

CONCLUSIO. Fuere in Christo omnes virtutes tum infusæ, tum acquisitæ, theologicæ et mo-

rales, cum ejus perfectione non pugnantes. Probatur, quia propter unionem hypostaticam necesse fuit ut Christi humanitas omnibus virtutum numeris esset absoluta et cumulata. Dictum est autem, in eo inesse virtutes cum ejus perfectione non pugnantes, 1° quia fides et spes ipsi non tribuendæ, utpote quæ cum visione intuitivâ quâ ab ortu fructus est, consistere non possunt. Sola ergo ex virtutibus theologicis Christo convenit charitas. 2° Quia virtutes morales, quæ in nobis opponuntur motibus concupiscentiæ, et in iis reprimendis et coercendis occupantur, Christo etiam adscribi nequeunt, siquidem in eo nulli erant motus concupiscentiæ, nullus peccati fomes. Pœnitentia pariter, prout est dolor de peccatis propriis, in Christo summè sancto et omnis noxæ experti locum habere non potuit. 3° Quia non eo sensu Christus virtutes habuit acquisitæ, quòd aliquas actuum repetitione comparaverit; sed tantum quòd eas virtutes quas alii frequenti actuum repetitione acquirunt, ipse (ubi suæ perfectioni non repugnabant) ab ortu sibi à Deo infusas habuerit.

4° *Quæ et quanta fuerit Christi sanctitas.* — Ex dictis liquet Christi humanitatem fuisse summè sanctam, 1° ratione unionis hypostaticæ, quâ Verbo divino substantialiter conjungitur; 2° ratione gratiæ habitualis, et charitatis excellentissimæ, donorumque et virtutum perfectissimarum. Quæstio nunc est an Christus fuerit ita sanctus, ut nec peccaverit, nec peccare potuerit, et nequidem ipsi fuerit peccandi fomes; tum undenam repetenda sit illa ejus impeccantia; denique an ea semper operatus fuerit quæ erant optima et Deo magis placita.

Notandum autem eò desipuisse quosdam decimi sexti seculi hæreticos de quibus Hosius lib. 1 de Hæresibus, ut Christo in cruce pendenti impatientiæ et desperationis motus attribuerent.

CONCLUSIO I. Christus Dominus nec peccavit, nec peccare potuit. Probatur 1° ex Scripturis. Joan. 8, v. 46: *Quis ex vobis arguet me de peccato?* 2 Cor. 5, v. 21: *Eum* (Christum) *qui non noverat peccatum, pro nobis peccatum fecit* (Deus). Hebr. 4, v. 15: *Tentatum per omnia pro similitudine absque peccato.* Ibid. c. 7, v. 26: *Talis decebat ut nobis esset Pontifex sanctus, innocens, impollutus, segregatus à peccatoribus et excelsior cælis factus; qui non habet necessitatem quotidie, quemadmodum sacerdotes, prius pro suis delictis hostias offerre, etc.* 1 Pe-

tri 1, v. 8 : *Non corruptibilibus auro et argento redempti estis, sed pretioso sanguine quasi Agni immaculati Christi et incontaminati.* 1 Joan. 3, v. 5 : *Ille apparuit ut peccata nostra tolleret, et peccatum in eo non est.* Clara sunt hæc testimonia, iisque omne peccatum à Christo ita excluditur, ut manifestum sit ab ipso quoque peccandi potentiam iisdem removeri. Et verò numquid is peccavit, aut peccare potuit, qui non solum sanctus et justus simpliciter et eximio modo in Scripturis dicitur, sed et ipsa justitia et sanctitas? Atqui Christus in Scripturis non tantum sanctus et justus simpliciter et eximio modo, sed etiam ipsa justitia et sanctitas appellatur. Vide Psalm. 4, v. 4; Psal. 15, v. 5; Isaïæ 12, v. 6, cap. 45, v. 8, cap. 51, v. 5, cap. 53, v. 11, cap. 62, v. 1; Jerem. 23, v. 5 et 6, cap. 33, v. 15; Malach. 2, v. 2; Daniel. 9, v. 24; Zach. 9, v. 9; Marci 1, v. 24; Lucæ 1, v. 35; Act. 3, v. 14, cap. 7, v. 5, cap. 22, v. 14; Apocal. 3, v. 7; ergo, etc.

Probatur 2º ex concilio Later., sub Martino I, cap. 5; ex S. Leone, in Epistolâ ad Flavian., approbatâ à concilio Chalcedonensi nec non ex aliis pluribus sacris synodis, quæ ubi Christo attribuunt physicos et naturales quosdam defectus, monere curant, ab ipso assumptos non esse defectus morales seu culpabiles humanitatis.

Probatur 3º ex SS. Patribus. S. Hippolytus, episcopus et martyr, apud Theodoretum, Dialogo I, postquam docuit arcam quæ ex lignis putredine non obnoxiiis erat confecta, fuisse figuram Christi qui à peccati putredine alienus erat, addit eundem Christum « ex lignis putrefactioni non obnoxiiis secundum hominem, hoc est, ex Virgine et Spiritu sancto, intus et foris tanquam purissimo Verbi Dei auro circumtectum fuisse. » Origenes, lib. 2 de Principiis, cap. 6, n. 7, allatâ similitudine massæ ferri, quæ, si semper in igne esset posita, « et omnibus suis poris, omnibusque venis ignem reciperet, » non posset, dum sic igne perpetuo pervaderetur, « frigus aliquando recipere; hoc ergo modo, inquit, etiam illa anima (Christi) quæ quasi ferrum in igne, sic semper in Verbo, semper in sapientiâ, semper in Deo posita est, omne quod agit, quod intelligit, quod sentit, Deus est; et ideò nec convertibilis aut mutabilis dici potest, quæ inconvertibilitatem ex Verbi Dei unitate indesinenter ignitâ possedit. » Vide et n. 6, ibid. Julianus Pomerius, de Vitâ contemplativâ, lib. 3, cap. 31, n. 2 :

« Sine peccato, inquit, conceptus (Christus) et natus, non solum non peccavit, sed etiam peccare non potuit. »

Operosum non esset innumera alia sanctorum Doctorum congerere testimonia, omnes enim hæc de re perfectè consentiunt. Vide S. Dionysium Alex., in Epistolâ ad Paulum Samosatenum; S. Athanas., lib. 1 de Incarn. contra Apollinaristas, et Orat. 2, aliàs 1, adv. Arianos; S. Greg. Naz., Orat. 36, n. 46, cujus verba laudantur act. 17 synodi VI generalis; S. Hil., lib. 10 de Trin.; S. Ambr., lib. de Incarn. cap. 7; S. Hier., in Epistolâ ad Ctesiphontem; S. August., lib. de pecc. mer. et remiss. cap. 11, lib. de Correp. et Grat. cap. 11, lib. de Prædest. sanctorum, cap. 15, et Enchirid., cap. 36 et 40; S. Cyrillus Alex., Dial. 6 de Trinitate, et alios plurimos.

Probatur 4º ratione theologicâ. 1º Indecens fuisset et planè Deo indignum et turpe, ut Deus Verbum naturâ à se assumptâ et sibi in personæ unitatem conjunctâ peccâset, sicque, rebellando in se ipsum, sibi odiosus factus esset, et pœnas æternas meruisset. 2º Quam sibi Deus Verbum hypostaticè conjunxit naturam, hanc sui juris speciali modo ipse fecit, huic summâ ratione seipsum communicavit, eam omnibus donis et perfectionibus quæ in illâ inesse possunt ornat ac cumulat, ejus omnes regit volitiones et operationes utpote quas propter idiomatum communicationem sibi propriè vindicat; ergo non tantum hæc naturâ non peccavit, sed nec peccare potuit.

Dices 1º : Ut Deus Verbum, etsi impassibilis in propriâ naturâ potuit tamen in naturâ assumptâ pati, quid repugnat eundem etsi naturâ suâ sanctum in naturâ assumptâ peccâsse? Ita Durandus. Nego. conseq. Latum est discrimen inter defectus physicos qui necessariae sunt naturæ assumptæ appendices, aut ad nostram redemptionem fuerunt requisiti, et defectus morales, nempe vitia et peccata, quæ hominum redemptioni nocuissent, Deo summè odiosa sunt, et severè ab eo puniuntur, quæque nullam à Verbi personâ potuissent dignitatem consequi.

Dices 2º : Christus in cruce pendens, hæc verba protulit : *Deus meus, Deus meus, ut quid dereliquisti me?* Atqui hæc verba impatientiam et desperationem sonant; ergo, etc. Nego min. Evidentissimum est his verbis Christum duntaxat exprimere, ac Patri piè exhibere dolorum suum acerbiter. Cum enim ait se dere-

lictum, sensus planè est, se omni divino auxilio quo passiones suæ leniri potuissent, fuisse destitutum. Quapropter tam insulsum quàm impium est ibi velle quædam desperationis vestigia reperire.

CONCLUSIO II. Anima Christi ex hypostaticâ suâ cum Verbo unione id habuit ut peccare non posset. Probatur 1^o, quia juxta Scripturas eximia gratiæ dona quibus humanitas Christi cumulata est, ex hypostaticâ ejus unione cum Verbo divino ortum duxerunt. *Spiritus Domini super me*, inquit nomine Christi Isaias 61, v. 1, *è quòd unxerit Dominus me*.

Probatur 2^o ex SS. Patribus. Jam attulimus modò sancti Hippolyti, Origenis et Juliani Pomerii testimonia, quibus manifestum fit eos Christi impeccantiam ex ejus cum Verbo unione deduxisse. Consentit S. Dionysius Alex., in Epistolâ ad Paulum Samosatenum: *Nisi*, inquit *fuisset Christus idem qui erat Deus Verbum, non poterat esse alienus à potestate peccandi*. Audis rationem propter quam Christo impossibile fuit peccatum, ex eo repeti à S. doctore quòd idem erat seu eadem persona ac Deus Verbum; ergo, etc. S. Athanasius, lib. 1 de Incarn. adversus Apollinarium, cùm contenderent Apollinaristæ, ut ipse refert n. 2, Christo non fuisse mentem, quia si habuisset mentem humanam, peccâisset, respondet, n. 14, eos in Manichæismum incidere dùm volunt *peccatum esse ex naturâ*, seu naturæ humanæ esse essentielle, et ab ipsis inquit, num Salvator timere debuerit, *ne et ipse peccati particeps esset, si, cùm Deus sit, perfectus homo fieret?* Deinde, num. sequenti, ait Deum Verbum sibi ipsi restaurâsse naturam humanam *incapacem diabolicæ perversionis et inventionis peccati*. Vide etiam alios Patres mox laudatos.

Probatur 3^o ratione theologicâ in confirmationem primæ conclusionis jam allatâ. Ostendimus enim quòd in ipsam Dei naturam peccatum refunderetur, si quod admitteretur à naturâ quam persona divina sibi in unitatem hypostaseos devinxisset. Quia nempe natura sic assumpta, propria fit personæ assumptis et in physicum jus ejus transit; adeò ut omnes actus ab illâ naturâ elicti, verè sint ejusmodi personæ; quæ proinde eos debet ut suos regere.

Ex his colliges impossibile prorsus fuisse ullum à Christo peccatum admitti, nec ullam circa peccatum committendum agnosci posse in eo libertatem aut potentiam. Nam, etsi

anima ab eo assumpta, de se, præscindendo ab unione hypostaticâ, et à donis sibi collatis peccato obnoxia fuisset, attamen sanctitate illâ substantiali quam ex unione hypostaticâ ad Verbum consecuta est, tum perfectione cognitionis, et ubertate charitatis quæ ex eadem unione in eam dimanarunt ita ad bonum determinata est, ut nullum ipsi liberum malè agendi et peccandi arbitrium relictum sit.

CONCLUSIO III. Non fuit in Christo peccati fomes. Probatur. Peccati fomes seu concupiscentia consistit in motibus indeliberatis, qui, nobis etiam invitis, perseverant, et quibus ad peccandum impellimur; atqui repugnat in animâ Christi fuisse ejusmodi motus, 1^o quia eadem ferè rationes quibus evincitur Christum fuisse impeccabilem, ostendunt pariter maximè indecens et incongruum fuisse ut ejusmodi motibus sancta ejus anima obnoxia esset. Quis enim non videt nihil inordinati, nihil rationem antevertentis et ad peccatum inclinantis consistere posse cum eâ perfectione quam animæ Christi tribuendam esse probavimus? 2^o Quia S. August. ita certum et fide indubitatum credidit nullam Christo homini attribuendam esse concupiscentiam, ut secus sentienti anathema dicere non dubitaverit. *Quisquis*, inquit, *Op. imp. lib. 4, non 47, credit carnem Christi contra Spiritum concupisse, anathema sit*. 3^o Quia is defectus non est Christo attribuendus, qui in Adamo innocente non fuit, quemque ut Christus posset pro nobis satisfacere ab ipso assumi non exigebant Incarnationis fines; atqui concupiscentia, seu motus de quibus loquimur, nulli fuere in Adamo innocente, ut theologi probant ubi de naturâ innocenti disserunt. Præterea manifestum est ejusmodi motibus Christum non indiguisset ut finem Incarnationis consequeretur, nempe ut pro nobis satisfaceret et promereret; ergò, etc.

Dices: Christus à dæmone tentatus est, Matth. 4, v. 1; atqui tentationes sunt motus concupiscentiæ; ergo, etc. Dist.: Christus tentatus est tentatione extrinsecâ, concedo; tentatione intrinsecâ, nego. Tentatio extrinseca consistit in suggestionem et ostensionem seu propositionem objecti vetiti; tentatio verò interna in motibus ad ejusmodi objectum prosequendum impellentibus. Christus, ut nos erudiret, ad modum vincendi tentationes etiam internas exemplo suo nos doceret, permisit quidem à dæmone sibi suggeri et proponi quædam illicita perpetranda; at ejusmodi tentatio

nec rationem prævertit, nec in motibus in voluntate excitatis et ad peccatum impellentibus posita fuit. Nam 1º, in hujusce tentationis historiâ, Matth. 4, nihil aliud continetur, quàm propositio mera objecti vetiti et rationum ad illud prosequendum impellentium; Christus ejusmodi propositione quovis modo commotus et allectus non exhibetur. 2º Dotes et tituli quæ in Scripturis attribuuntur Christo Domino planum faciunt ejusmodi loca in quibus tentatus dicitur, esse de suggestionibus exterioribus intelligenda. Vide S. Greg. magnum, Hom. 16, in Evang. habitâ in bas. S. Joan. Later. Dom. 1 quadrag., ubi hæc dilucidè et accuratè exponit.

Dices 2º: Oratio quam Christus in horto effudit Matth. 26, v. 59: *Pater mi, si possibile est, transeat à me calix iste*, eum tunc fuisse commotum et tentatione turbatum satis ostendunt; quapropter ad se reversus petitionem hanc suam correxit, et sese Patris voluntati subjecit, addens: *Verumtamen, non sicut ego volo, sed sicut tu*. Ita Calvinus. Nego ant. Hæc verba: *Pater mi, si possibile est, transeat à me calix iste*, vel ut refert alter Evangelista, *Pater, si vis, transfer calicem hunc à me*, 1º nihil inordinati expriment; siquidem solum significant desiderium calicis dolorum non bibendi, si id Deo beneplacitum fuisset; ergo stultè ex eo arguitur Christum fuisse tentatum aut peccato obnoxium. 2º Ejusmodi desiderium erat animæ sentientis, et ad affectum ejus naturalem pertinebat, qui affectus naturalis dolores et mortem refugiens nihil mali et inordinati continet. 3º Ejusmodi motus affectus naturalis, in Christo non fuere indeliberati, ut aliquando dicemus, art. 5, nec rationis advertentiam prævenerunt, sed sapientibus de causis eos in se excitari voluit Christus tum ad nostram institutionem, tum ut majora patiendo charitatem suam erga nos magis declararet, seseque verum esse hominem clariùs nos doceret. Hinc meritò S. Justinus, in Dialog. cum Tryphone, ait Christum hæc suâ oratione et desiderio naturali implevisse Davidis oraculum, Psal. 21, v. 2: *Clamabo per diem et non exaudies, et nocte, et non ad insipientiam mihi*. Licet enim Christus non exauditus fuerit, cùm ejusmodi conditionalem emisit orationem, hæc tamen ipsi non est imputata ad insipientiam, quia nempe nonnisi ex summâ sapientiâ et perfectâ ratione profecta est.

CONCLUSIO IV. Christus ea semper egit quæ perfectissima et Patri magis placita erant. Pro-

batur, quia Christus hoc ipsum verbis conceptis attestatur Joan. 8, v. 29, his verbis: *Quæ placita sunt ei (Patri) facio semper*. Christus igitur non modò nunquàm peccavit, sed etiam inter varia bona quæ operari potuit, semper illud elegit quod habitâ suî statûs, et omnium circumstantiarum ratione erat optimum, et non præceptis tantum, sed et consiliis divinis maximè consentaneum.

Impeccantiam tamen Christi inter et ejus ad optimum et perfectissimum determinationem, maximum discrimen intercedebat. Nam ipsi nulla erat indifferentia, nulla libertas ad peccatum, nempe ejus voluntas necessariò determinata erat ad bonum in communi. At verò, si ex bonis singularibus, semper optimum eligebat, hæc ejus determinatio seu electio erat libera, et eatenus ex unione hypostaticâ concipi debet ortum duxisse, quatenus propter ejusmodi unionem concipitur humanitati Christus debuisse concedi auxilia seu dona quibus certò et infallibiliter, etsi liberè, ad perfectissimum eligendum, semper determinaretur.

ARTICULUS III.

De Libertate Christi.

Libertas est indifferentia activa ad agendum vel non agendum, seu ea est vis quâ voluntas unum potest eligere præ alio. Libertas duplex, alia contrarietatis, quæ bonum et malum respicit, et definitur potestas benè agendi vel peccandi; alia contradictionis, quæ circa bonum duntaxat operandum versatur, et describi potest facultas hoc vel illud bonum operandi, præceptique hoc vel illo modo, ex hujus vel illius virtutis motivo, in his vel illis circumstantiis adimplendi.

Observandum autem duplicis generis præcepta ad Christum ut hominem, dùm mortalem vitam egit, attinuisse. Nempe 1º, ea quæ legis naturalis sunt, seu negativa, ut falsum non esse proferendum; seu positiva, ut Deum esse colendum; 2º ea quæ ipsi lege divinâ positivâ fuere imposita, ut mandatum mortis cruentæ pro hominibus subeundæ.

In utroque ejusmodi præceptorum genere, rei præceptæ substantia ab ejus circumstantiis secerni debet. Substantia præcepti illud ipsum est quod sub præceptum cadit, seu quod imperatur, adeò ut eo non impleto violetur præceptum. Nomine circumstantiarum præcepti comprehenduntur quæcumque rei imperatæ executionem comitantur, et vario sese modo sine præcepti violatione habere possunt. Cujus-

modi sunt intensio major vel minor actûs quo præceptum perficitur, relatio actûs ejusdem ad hunc vel illum finem proximum bonum, motivum hujus vel illius virtutis, circumstantiæ temporis, etc. Poni enim potest singula illa non esse determinata et speciatim assignata per præceptum; v. g., præceptum necis pro redimendis hominibus oppetendæ Christo potuit imponi, quin ipsi ea omnia præscriberetur speciatim quæ ad mortis genus, horam, motivum et finem contingebant.

Quæstio est an circa præcepta legis naturalis, seu in se, seu quantum ad circumstantias spectata Christus liber fuerit? an præsertim circa mortem pro nobis tolerandam? tum quâ ratione libertas ipsi adscribenda cum ejus impeccabilitate stare possit? Quidam theologi, libertatis Christi cum ejus impeccantiâ conciliandæ difficultate superati, eum immunem tantum à coactione fuisse docuerunt, non à necessitate simplici, sicque, servato libertatis Christi nomine, hanc tamen reverà à medio sustulerunt. Refert hanc sententiam S. Thomas in 3 dist. 18, a. 2 ad 5, secundâ illius solutione. Suarez, disp. 37, sect. 2, testis est nonnullos suâ ætate eandem doctrinam propugnasse, quam tamen ipse omninò falsam et improbabilem pronuntiat. Hujusce sententiæ defensores cogebantur dicere libertatem à necessitate ad meritum necessariò et per se non esse requisitam, seu aliquem dari posse statum in quo ad merendum hæc immunitas non esset necessaria. Id enim manifestè sequitur ex eo quòd Christo, quem meruisse fide constat, solam attribuerent à coactione libertatem.

In aliud extremum abiit Suarez loco mox citato, sect. 2 et 3; non tantum enim statuit Christum circa multa, ipsamque mortem subeundam fuisse verè liberum, seu immunem à necessitate; sed præterea contendit ipsi fuisse ejusmodi libertatem etiam circa præcepta legis naturalis, quantum ad substantiam spectata, proindeque attribuit Christo libertatem aliquam contrarietatis et *aliquo modo potentiam physicam non faciendi* quod præceptum erat, *vel etiam aliud faciendi*; eum nihilominus ait, *simpliciter loquendo non potuisse peccare, nec habuisse potentiam peccandi*, quia, etsi liberè et citra necessitatem à peccato abstinuerit; attamen gratiæ congruæ quibus ejus voluntas humana semper ad bonum dirigebatur, ipsi naturaliter, seu vi unionis hypostaticæ erant debitæ, et propterea juxta prædefinitiones

divinas huic destinatæ et concessæ. Quapropter verosensu et simpliciter pronuntiandum censet peccatum fuisse impossibile Christo, quamvis ejus voluntas humana ad illud vitandum nec coacta, nec necessitata fuerit.

Vera et communis theologorum doctrina est Christum circa multa fuisse verè liberum, seu immunem à quâcumque verâ necessitate; ita tamen ut nulla peccandi potentia, nulla contrarietatis libertas ipsi possit tribui. Quod egregiè et breviter S. Thomas, p. 3, q. 18, a. 4 ad 3, exprimit his verbis: *Voluntas Christi, licet sit determinata ad bonum, non tamen ad hoc vel illud bonum.*

Quotquot autem ita statuunt, tenentur sentire quod consequens est, nempe Christo nullam fuisse libertatem circa substantiam præceptorum legis naturalis, sed tantum circa eorum circumstantias; quod quidem ita explicant plurimi ut velint Christum fuisse liberum circa ipsam actuum substantiam quibus Christus legis naturalis præcepta implevit. Namque præcepta legis naturalis, inquirunt, vel sunt negativa, vel affirmativa. Ad negativa observanda nullus requiritur actus positivus, sed sufficit mera actûs vetiti carentia. Proindeque, ubi Christus ea implevit actu positivo, non officit ejus impeccabilitas quominus ejusmodi actus fuerit liber. Præcepta autem affirmativa obligant quidem ad actus positivos, sed non pro singulis instantibus, non cum omnibus circumstantiis, id est, cum tali intensione, ex hoc vel illo motivo, etc. Quocirca, in ejusmodi actibus eliciendis voluntas Christi, etsi impeccabilis, aliquâ tamen ratione mansit indifferens; nempe, vel in eo instanti quo actum præceptum eliciebat, eum poterat non elicere, vel non tali aut tali modo, vel non ex tali motivo; quo tamen motivo immutato mutatur substantia actûs. Unde sequitur, etsi Christus non potuerit præcepta legis naturalis quantum ad substantiam infringere, ab eo tamen nullos ad illa observanda productos fuisse actus speciales, à quibus eo instanti quo eos producebat abstinere non potuisset. Hæc de libertate Christi circa legem naturalem implendam plures theologi, quæ plerorumque aliorum doctrinæ planè consentanea sunt.

Quod porrò ad mortem quam pro nobis Christus pati debuit, attinet, eadem non ita consentiunt. Nonnulli opinati sunt nullum de morte pro hominibus subeundâ Christo fuisse à Deo verum et propriè dictum mandatum impositum, sed duntaxat mandatum latiori sensu

acceptum pro superioris directione qui sub peccato quidem obligare possit, non tamen hocce modo obliget. Petavius, Victoria, Lorca. Alii quidem mandatum mortis tolerandæ Christo datum agnoscunt, sed illud aiunt non nisi sub conditione acceptationis Christi constitutum, atque ejus vim donec acceptaretur, decernunt fuisse suspensam. Alii existimant ad Christi libertatem satis esse, sublato moriendi præcepto, Christum potuisse non elicere actum quo illud mandatum executus est; rati necessitatem quæ est in sensu composito præcepti libertati non nocere. Gonet. Alii, quos secutus est Vasquez in tertiam partem, dissert. 74, sentiunt Christum fuisse liberum circa circumstantias præcepti sibi impositi de morte pro hominibus ferendâ, non verò circa ipsammet hujusce præcepti substantiam. Nempe, de Christi libertate circa positivum moriendi præceptum, ii perinde ratiocinantur ac de præceptis legis naturalis diximus eosdem et alios plures theologos ratiocinari. Alii denique volunt Christum potuisse à Patre suo dispensationem de ejusmodi præcepto postulare, atque eâ ratione faciliè intelligi 1º verum et propriè dictum fuisse illud præceptum; 2º Christum, sine ullo impeccantiæ suæ detrimento, verè et propriè fuisse in eo adimplendo liberum.

CONCLUSIO I. Christus in multis ac præsertim in subeundâ morte fuit liber, seu immunis non tantùm à coactione, sed etiam à simplici necessitate. Probatur 1º ex Scripturis, Isaïæ 7, v. 14: *Ecce virgo concipiet et pariet filium, et vocabitur nomen ejus Emmanuel. Butyrum et mel comedet, ut sciat reprobare malum et eligere bonum.* Ubi electio tribuitur Christo; atqui electio est actus facultatis liberæ; ergo, etc. Atque ita hunc locum interpretantur SS. Basilii et Hieronymus ad hunc locum, S. Augustinus, lib. 8, de *Genesi ad litteram* cap. 14, S. Thomas hic q. 18, a. 4, in argum. *Sed contra.* Ejusdem Isaïæ 53, v. 7: *Oblatus est quia ipse voluit.* Quæ de voluntate Christi humanâ accipi debere apertum est ex contextûs serie. His verò Christum liberâ voluntate se obtulisse significari patet, quia ejusmodi loquendi modus ille ipse est quo actiones vel passionibus liberæ in sacris litteris designari assolent. Joan. 10, v. 17 et 18: *Ego pono animam meam... Nemo tollit eam à me, sed ego pono eam à me ipso, et potestatem habeo ponendi eam... hoc mandatum accepi à Patre meo.* Hic iterùm agitur de Christo ut homine, ipsique disertè adscribitur facultas à

seipso ponendi animam suam, id est plena de nece tolerandâ libertas. Adde omnia Evangelii loca in quibus electio Christo attribuitur Luc 6, v. 13, Joan. 6, v. 71, c. 13, v. 18, c. 15, v. 19. Jam autem observavimus electionem esse actum libertatis. Ubi adverte cum S. Thomâ hic q. 18, a. 4, ad primum, his non adversari S. Joan. Damascenum, cùm lib. 3 de fide orth. cap. 14, electionem Christo abjudicat; siquidem electionem ibi sumit is S. doctor prout ejus nomine importatur dubitatio, uti accidit in naturâ ignorante; non verò loquitur de electione acceptâ tantùm pro assumptione unius relicto altero.

Probatur 2º ex sanctis Patribus, quorum hæc est constans doctrina, Christum potuisse non pati quæ passus est, atque in ejus arbitrio fuisse non mori si voluisset. Vide Origen., Tract. 35 in Joan. et lib. 2 Periarchon, cap. 6; S. Basilium, L. de Spiritu sancto, cap. 8; S. Hier. ad illud Isaïæ 53, v. 7: *Oblatus est quia ipse voluit*; S. Chrysost., Hom. 59 in Joan. tum Hom. 57 in Epist. ad Rom., ad istud S. Pauli capitis 15, v. 3: *Etenim Christus non sibi placuit, sed sicut scriptum est, impropria exprobantium tibi ceciderunt super me*; tum etiam Homil. 28 in Epist. ad Hebr., ad versiculum 3 capitis 12; S. Aug., lib. 4 de Trinit. cap. 13, et Tract. 109 in Joannem; Theodoret. ad vers. 3 capitis 12 Epist. ad Hebr.; Theoph. tum ad eundem locum, tum ad v. 3, c. 15 Epist. ad Rom.; S. Greg. Magnum, lib. 24 *Moral.*, cap. 2; S. Joannem Damasc., lib. 3 de Fide, cap. 13, 14 et 15; S. Ansel. lib. *Cur Deus homo*; S. Th. p. 3, q. 18, a. 1 et 4, necnon ad caput 10 S. Joan. ad 15 Epistolæ ad Rom. et ad 12 Epist. ad Hebræos.

Probatur 3º duplici ratione theologicâ. Prior plura continet; scilicet juxta Scripturas 1º imposita fuere Christo præcepta, Joan. 10, v. 18; 2º ipse ejusmodi præceptis morem gessit, seu obediens fuit, Philip. 2, v. 8; 3º suâ obedientiâ meruit et pro nobis satisfecit. Atqui præceptum, obedientia et meritum in eo nullum possunt locum habere, in quo nulla libertas; nemo enim præcipit alteri actum à quo ille abstinere non potest, nemo ejusmodi actui necessario meritum obedientiæ attribuit, nemo denique præmio dignum putat opus quodcumque, nisi ex liberâ voluntate profectum. Hinc SS. Patres, ubi de nostrâ libertate disputant, hanc potissimùm inde colligunt quòd præcepti, obedientiæ, præmii et meriti simul capaces, de quo vide Feuarentium in notis ad

caput 71 libri 4 S. Irenæi contra Hæreses. Et verò, nonne ab Innoc. X, plaudente universâ Ecclesiâ, ut hæretica damnata est tertia Jansenii propositio : *Ad merendum et demerendum in statu naturæ lapsæ non requiritur libertas à necessitate, sed sufficit libertas à coactione*? Scio responderi posse ibi agi de statu naturæ lapsæ. Sed quis non videat, eam libertatem quæ in statu naturæ lapsæ ad merendum aut demerendum requiritur, à fortiori necessariam esse ad merendum in statu naturæ integræ, aut in alio quolibet perfectiori? Ergo cum Christus obedientiâ suâ meruerit, necesse est ut in eâ exhibendâ, non tantum à coactione, sed etiam à necessitate fuerit liber.

Secunda ratio ex eo petitur quòd concilia et SS. Patres generatim proprietates omnes naturæ humanæ et propriam ejus operationem Christo homini adscribant; atqui una è proprietatibus naturæ humanæ est liberum arbitrium, atque inter operationes ejusdem naturæ, maximè ipsi convenit operatio libera; ergo, etc.

CONCLUSIO II. Nec circa substantiam præcepti naturalis, nec circa substantiam præcepti divini à quo dispensationem petere non poterat, Christo libertas tribuenda; fuit verò liber circa ejusmodi præceptorum circumstantias, ac proinde circa ipsam actuum positivorum quibus ejusmodi præcepta implebat substantiam. Atque hoc modo concipitur ipsi fuisse ejusmodi præceptorum observatione libertatem ad merendum sufficientem, quæ cum ejus impeccantiâ perfectè consonat.

Quinque sunt conclusionis partes.

Probatur prima pars, nempe Christum liberum non fuisse circa substantiam præcepti naturalis, neque circa substantiam præcepti divini à quo dispensationem postulare non potuisset. Nam libertas circa substantiam ejusmodi præceptorum, idem fuisset, ex dictis, ac libertas ea violandi et infringendi; atqui non fuit Christo libertas violandi et infringendi præcepta, siquidem, ut articulo præcedenti demonstravimus, peccare non potuit; ergo, etc.

Probatur secunda pars, Christum scilicet fuisse liberum circa ejusmodi præceptorum circumstantias; nam circumstantiæ præceptorum sunt, ut diximus, intensio actuum quibus observantur, motivum hujus vel illius virtutis propter quod illi actus eliciuntur, tempus, seu instans temporis, quo iidem actus præceptis conformes, producuntur. Præterea verò, illud

circumstantiis præceptorum negativorum accensendum est, quòd actu aliquo positivo impleantur; namque, ut jam advertimus, varias referendo theologorum opiniones, ad observationem præcepti negativi, per se non requiritur ullus actus positivus, sed sufficit actus prohibiti carentia. Cum ergo actuum quibus præcepta affirmativa adimplentur, nec intensio sit præscripta, nec instans temporis præcisè fixum et determinatum, nec plerumque motivum hujus vel illius virtutis constitutum, cumque nulla lex præceptum negativum, actu positivo impleri jubeat, planum est impeccantiam Christi non officere quominus statuatur liber circa ejusmodi intensionem et tempus, et plerumque motivum actuum quibus præcepta affirmativa implebat, necnon circa actus positivos quibus negativa præcepta observavit, ac proinde circa circumstantias præceptorum tum legis naturalis, tum etiam legis divinæ positivæ à quâ dispensationem petere non poterat.

Probatur tertia pars, ex eo videlicet quòd Christus hoc modo circa præceptorum legis naturalis circumstantias fuerit liber, sequi eum etiam circa actuum positivorum, quibus illam legem implevit, substantiam liberum fuisse. Nam 1º, quod attinet ad actus positivos quibus præcepta negativa observavit, nulla est difficultas, quippe cum ejusmodi actus planè potuerit omittere non violatis illis præceptis, quæ, ut dictum est, nullos actus positivos exigunt, sed meram actuum vetitorum carentiam. 2º Quantum ad alia præcepta, patet eum qui circa actus suos hoc vel illo temporis instanti, et plerumque ex hoc vel illo virtutis motivo producendos liber est, dicendum quoque circa ejusmodi actuum substantiam liberum. Nam actus virtuosus substantia seu essentia mutatur et in aliam speciem transit, secundum diversitatem variarum virtutum ex quorum motivis elicitur; proindeque si, ubi ad præceptum implendum suffecisset operari ex talis virtutis motivo, Christus non tantum ex hujus motivo virtutis, sed etiam ex alio virtutis adhuc nobilioris et præstantioris egisset, quis dubitat ejusmodi actum fuisse alterius naturæ et speciei ab eo qui ex motivo virtutis tantum inferioris productus fuisset, adeoque Christum si ita operando fuerit liber, fuisse liberum circa substantiam actus sui? Pariter statim atque Christus circa actum, v. g., charitatis hoc vel illo instanti temporis producendum, liber concipitur, cum nullum dubium esse possit quin utpote perfectissima semper operans, con-

stanter antecesserit in ejusmodi actibus eliciendis tempus quo nullæ ampliùs moræ in præcepto implendo locum habere potuissent, imò, cum longè frequentiores actus ejusmodi elicerit quàm præcepti observationi necesse erat, nemo non videt consequens esse illos omnes actus Christi fuisse ex integro liberos; ergo, etc.

Probatur quarta pars, nimirum libertatem Christi circa actus quibus legis naturalis præcepta implevit, ope distinctionis et explicationis mox adhibitæ cum ejus impeccantiâ conciliari. Nam ut Christus, etsi impeccabilis, concipiatur actibus liberis implevisse legem, sufficit, 1º, actus positivos quibus præcepta negativa implevit, non fuisse imperatos, ac proinde ejus libero arbitrio, sine ullâ ipsius impeccantiæ læsione permissos et relictos, 1º actus qui ad præcepta affirmativa adimplenda requiruntur, ab eo semper productos fuisse et perfectiùs, et citiùs, et frequentiùs, et ex motivo, ubi fieri poterat, præcellentiori, quàm ad præceptum non infringendum necesse erat. Atqui, positâ distinctione quæ secundâ et tertiâ conclusionis nostrâ parte continetur et explicatur, 1º actus positivi quibus Christus præcepta negativa implevit non erant imperati; 2º actus qui ad præcepta affirmativa observanda requiruntur, ab eo semper producti sunt et perfectiùs, et citiùs, et frequentiùs, et ex motivo, ubi id fieri poterat, nobiliori et præcellentiori quàm vitandæ præcepti violationi necesse fuisset; ergo.

Probatur quinta pars, nempe libertatem quam Christo adscribimus, ipsi satis fuisse ad merendum. Etenim, si quid impediret, quominus libertas Christi sic explicata, ipsi ad merendum satisfuisset, maximè quia ad merendum observando præceptum, necesse fuisset ut illud transgredi et infringere potuisset; atqui constat ad merendum observatione præcepti necesse non fuisse ut Christus illud infringere posset; nam 1º, potentia violandi præcepti, seu peccandi, non est perfectio liberi arbitrii, sed defectus, ut notat S. August., Enchirid. c. 4, de Civit. Dei, l. 22, c. 3, de Præd. SS. c. 15, proindeque ejusmodi potentia minimè necessaria est ad meritum, quod inter proprietates liberi arbitrii perfectivas nemo non annumeraverit. 2º Ex actibus quibus Christus legem naturalem implevit, alii planè omitti potuissent præcepto non violato, ii scilicet quibus præcepta negativa observabat; alii, etsi non potuissent omnes omitti citra peccatum, tunc tamen sine peccato

non tantum potuissent, quotiescumque producti sunt, adhuc aliquantum differri, sed etiam minus frequenter fieri; omnes autem erant boni et perfecti, et ex præstantiori motivo quàm ad legem implendam plerumque necesse fuisset, producti. Atqui manifestum est omnes ejusmodi actus Christi, etsi violandi præcepti seu peccandi potentia et libertas ipsi non fuerit, satis tamen fuisse liberos ad meritum; ergo, etc.

CONCLUSIO III. Christus accepit à Patre verum moriendi præceptum nec eo sensu conditionatum, quòd vis ejus à liberâ Christi acceptione penderet. Christus tamen circa hujusmodi præcepti substantiam liber fuisse dicendus est, quia hujus implendi dispensationem à Deo petere ipsi erat licitum.

Probatur prima pars, Christum scilicet à Patre verum moriendi præceptum accepisse. Joan. 18, v. 17 et 18: *Ego pono animam meam ut iterum sumam eam. Nemo tollit eam à me: sed ego pono eam à meipso, et potestatem habeo ponendi eam; et potestatem habeo iterum sumendi eam; hoc mandatum accepi à Patre meo.* Ibid. cap. 14, v. 21: *Sicut mandatum dedit mihi Pater, sic facio.* Rom. 5, v. 19: *Sicut per inobedientiam unius hominis (Adami scilicet) peccatores constituti sunt multi; ita et per unius (nempe Jesu Christi) obeditionem, justi constituentur multi.* Hæc obedientia Christi ad ejus mortem spectat quâ nos redemit juxta Scripturas. Propriè dicta autem fuit obedientia, sicut inobedientia Adæ vera fuit inobedientia; proinde eâ supponitur verum et propriè dictum mandatum. Philipp. 2, v. 8: *Humiliavit (Christus) semetipsum factus obediens usque ad mortem, mortem autem crucis.*

Probatur secunda pars, illud videlicet præceptum non eo sensu conditionatum fuisse, quòd ejus vis à liberâ Christi Domini acceptione penderet. Enimverò mandatum eo sensu conditionatum, nullum omninò esset. Qui enim vult ut alter quidquam faciat, si ipse consenserit, dici potest proponere vel consulere rem faciendam, non verò imperare. Præceptum propriè dictum obligationem consentiendi subdito imponit; ergo vis ejusmodi præcepti consensum subditi antecedit, proindeque, etc.

Probatur tertia pars, nimirum circa hujusmodi præcepti substantiam Christum fuisse liberum, seu facultatem non subeundæ mortis Christo factam fuisse. Id perspicuè significatur tum Isaïæ 53, v. 7, ubi de Christo dicitur: *Oblatus esse quia ipse voluit*; tum Joan. 10, v. 18, omisi fuissent cum eliciebantur, quippe cum

ubi Christus ipse de seipso : *Nemo tollit eam* (animam meam) *à me ; sed ego pono eam à meipso, et potestatem habeo ponendi eam ;* tum à sanctis Patribus qui locis conclusione I laudatis disertè asserunt penès Christum fuisse ut mortem non subiret.

Probatur quarta pars, nempe eatenùs Christum fuisse liberum circa mortem tolerandam, quatenùs fas ipsi fuit petere et obtinere hujusce mandati dispensationem ; ut enim hoc modo explicetur libertas Christi, sufficit 1^o, ipsum reverà potuisse hanc dispensationem petere et obtinere ; 2^o hâc facultate Christo concessâ non destrui rationem veri et propriè dicti mandati Christo impositi ; 3^o hâc viâ libertatem et impeccantiam Christi conciliari.

Atqui 1^o Christo facultas fuit ut peteret et obtineret præcepti de morte subeundâ dispensationem. Nam sic loquitur Matth. 26, v. 53 : *An putas quia non possum rogare Patrem meum, et exhibebit mihi modò plusquàm duodecim legiones Angelorum ?* Quibus verbis denotatur Christum potuisse preces ad Patrem dirigere, sicque impetrare ut sibi liceret non mori ; ergo potuit petere et obtinere dispensationem. 2^o Facultas petendæ et obtinendæ ejusmodi dispensationis Christo concessa, non impedit quominùs verum moriendi mandatum ipsi impositum fuerit ; nam illud mandatum est propriè dictum quo tenetur subditus, nisi postulet et impetret dispensationem ; tantùm abest ut facultas petendæ dispensationis veri præcepti rationem destruat, ut potiùs nullus possit esse dispensationi postulandæ locus, ubi præceptum aut mandatum nullum est. 3^o Hâc viâ Christi libertas cum ejus impeccabilitate conciliatur ; siquidem ille concipitur fuisse simul et impeccabilis, et circa mortem oppetendam liber, licet à Deo præceptum mortis oppetendæ accepisset, qui licitè potuit à Deo petere illius mandati dispensationem, nec illam postulavit ; atqui in hypothesi de quâ agimus, Christus licitè potuisset ejusmodi præcepti dispensationem à Deo petere et obtinere ; nec illam postulavit ; ergo, etc.

Dices 1^o : Mandatum à quo Christus potuisset dispensationem petere et obtinere, merè fuisset conditionatum, et ab ejus acceptance pendens ; atqui, probando secundam præsentis conclusionis partem, diximus mandatum hocce modo conditionatum et à liberâ mandatarii acceptance pendens non esse verum et propriè dictum ; ergo, etc. Nego maj. Disparitas est quòd ubi Christus dicitur accepisse mandatum moriendi suâ acceptance pendens, tunc

nulla concipitur vis inesse mandato antequàm acceptetur, nec ulla obligatio per illud imposita. At verò, ubi datur mandatum cum facultate dispensationem petendi ; rem præceptam exsequi tenetur subditus, donec dispensationem obtinuerit ; vimque suam ejusmodi mandatum antecederet ad acceptance exeret, nempe ad faciendam rem præceptam primariò obligat, vel saltem ad dispensationem petendam et obtinendam ; ergo, etc.

Dices 2^o : Christus perfectâ illâ scientiâ quam illi tribuendam esse docuimus, noverat suam mortem esse prædictam à Prophetis ; ergo non potuit petere dispensationem à morte subeundâ ; non potuit enim velle efficere ut Prophetarum oraculis exitus non responderet ; ergo, etc. Dist. ant. : Noverat suam mortem esse prædictam à Prophetis consequenter ad liberam suam moriendi voluntatem quam futuram esse viderant, concedo ; antecederet, nego. Ut scientia Dei non facit, sed supponit res futuras, ita et vaticinia Prophetarum. Christus igitur noverat ejusmodi vaticinia non posse suæ libertati nocere, quippe quæ liberum ejus exercitium futurum supponebant.

Instabis : Etsi Prophetarum oracula de se nullam potuerint inferre necessitatem actionibus Christi ; attamen perfecta ejusmodi oraculorum notitia quâ Christus præditus fuit, ejus libertati necessariò nocuit ; quia non potuit illud velle Christus quod Prophetarum oraculis adversari noverat, nisi posset velle eorum oracula esse falsa ; non potuit autem velle oracula prophetarum falsa fieri, quin peccaret ; proindeque cùm impeccabilis fuerit, non potuit velle non mori, siquidem ejus mors prædicta fuerat à Prophetis. Ergo dispensationem præcepti sibi impositi de morte subeundâ petere et obtinere non potuit.

Respondeo 1^o illo argumento non nostrum duntaxat impeti systema, sed etiam aliud quodlibet, eo excepto juxta quod Christus circa mortem subeundam fuisset tantùm liber à coactione non à necessitate ; quam opinionem minimè defendi posse probatum est. 2^o Dist. : Non potuit Christus vi suppositionis consequentis illud velle quod Prophetarum oraculis, ad suam mortem attinentibus, erat oppositum ; concedo ; vi et suppositionis antecedentis, nego. Cùm oracula Prophetarum ad mortem Christi attinentia, hanc sui oblationem futuram esse liberam supponerent, ut dictum est, siquidem Prophetiæ objectum suum supponunt non faciunt ; evidens est omnem impotentiam ortam

sive ex ejusmodi oraculis, sive ex eorum notitiâ et perfectâ cognitione, non fluxisse nisi ex suppositione mortem Christi liberè et spontè ab ipso volitam consequente. Atqui impotentiaquæ ex suppositione determinationem voluntatis liberam consequente oritur libertatem non tollit; ergo, etc. Fatemur itaque cognitionem quam habuit Christus rerum de se prædictarum, ipsi fuisse motivum neci cruentæ sese tradendi ac dispensationis præcepti sibi impositi non postulandæ. Hinc capite 26 Matth. mox laudato, postquàm sibi factam esse facultatem petendi à Patre auxilii et mortis vitandæ significavit, continenter addit, v. 54: *Quomodò ergo implebuntur Scripturæ, quia sic oportet fieri?* Verùm negamus ejusmodi motivum fuisse necessitans, quia illo ipso motivo Christum liberè sese in arâ crucis pro nobis oblatum esse supponebatur.

ARTICULUS IV.

De perfectionibus et defectibus à Christo assumptis ratione facultatis sentientis et appetitûs sensitivi.

QUESTIO est 1^o, an Christus obnoxius fuerit dolori sensibili; 2^o an ex voluntate tantum, non verò ex necessitate naturæ quam assumpsit, doloribus subjectus fuerit; id est, an naturâ suâ Christus fuerit à dolore immunis; adeò ut miraculo opus fuerit ad naturalem suspendendam impassibilitatem, et locum dandum passioni et morti quam propter nostram salutem tulit; 3^o quodnam fuerit discrimen inter modum quo Christus doloribus subjectus fuit, et rationem quâ iisdem subjacemus; 4^o an in Christo fuerint motus appetitûs sensitivi, seu passiones, et quomodò.

Circa primum, observandum est 1^o, dolores quibus natura humana subjacet alios esse totius naturæ communes, ut sunt sitis, fames, defatigatio, et omnes sensationes ingratae quæ læsionem corporis consequuntur; alios esse speciales, qui ex singularibus causis, seu certâ quâdam causarum secundarum dispositione nascuntur, ut ii quos experimur in morbis. Agitur hic de doloribus prioris generis, seu totius naturæ communibus, non verò de aliis quos à Christo removendos esse omnes fatentur. Observandum 2^o, plures è veteribus hæreticis Christum verè esse passum negasse, qui Phantasiastæ dicti sunt, eo quòd verum et solidum corpus Christo detraherent. Ita Basilides, Cerdon, Marcion, etc., de quibus vide Tertul., lib. de Carne Christi, et lib. de Præscrip. cap.

51. In eundem errorem, sed aliâ de causâ necesse fuit, ut S. Athan. notat, prolabi Apollinaristas, qui mente et animâ Christum spoliarent. Videntur etiam humanas affectiones et dolores Christo abjudicasse, ipsique duntaxat apparentes tribuisse ii Eutychis discipuli qui duce Juliano Halicarnassensi, Incorrupticolæ dicti sunt, eò quòd Christi corpus, utpote unius cum Verbo naturæ, incorruptibile seu impassibile dicerent; de quibus liberatus, Breviarii cap. 49.

Circa secundum mota est olim controversia inter Philippum abbatem Bonæ Spei, ex Ordine Præmonstratensi et Joannem Præpositum; cujus quidem controversiæ Hunaldus ab utroque arbiter selectus est. Philippus igitur in Epistolis de sententiâ S. Hilarii contendebat Christum tum propter naturæ suæ humanæ unionem ad Verbum, tum propter suam à peccato immunitatem et ex Virgine nativitatem, nullo pacto fuisse doloribus et infirmitatibus naturaliter subjectum; sed tantum ex miraculo quod ut nos redimeret operari voluit. Eadem est doctrina Hugonis à S. Victore, lib. 2 de Sacramentis, et tribuitur etiam S. Clementi Alex., lib. 6 Stromatum, S. Hilario, lib. 10 de S. Trin. Leoni magno, in Domin. 4 quadrag., quibusdam Catholicis apud Leontium, lib. 2 contra Eutychianos, S. August., Tract. 31, 49 et 60 in Joan. Ex adverso Joannes Præpositus, cui Hunaldus suffragatus est, docebat naturam à Christo assumptam, utpote nostræ *per omnia similem absque peccato*, nativâ suâ conditione doloribus cæterisque infirmitatibus subjacuisse, quam sententiam videntur tenere S. August., lib. 2 de peccat. merit. cap. 29, Boetius de duabus naturis, Leontinus, lib. 2, S. Bernardus, Serm. 1 de Epiph.

Circa tertium una est omnium Catholicorum sententia dolores Christi diversos fuisse à nostris, causâ, necessitate, et effectui, id est non à peccato ortos esse, non rationis advertentiam et voluntatis consensum anteveruisse, non invito Christo perseverasse, nec ipsum perturbasse, et cæco impetu commovisse.

Circa quartum notanda est ista propositio, inter viginti tres quas Innocentius XII anno 1699 proscripsit: *Inferior Christi pars in cruce non communicavit superiori suas involuntarias perturbationes.*

CONCLUSIO I. Christus dolori et communibus naturæ humanæ infirmitatibus obnoxius fuit.

Propositio est de fide. Probatur ex Scripturis. Isaias 1, v. 6, prophetico spiritu de Christo

sic loquitur : *A plantâ pedis usque ad verticem non est in eo sanitas*; cap. 55, v. 2 et 3 : *Vidimus eum... virum dolorum et scientem infirmitatem*. Et v. 4 : *Verè languores nostros ipse tulit, et dolores nostros ipse portavit; et nos putavimus eum quasi leprosum, et percussum à Deo et humiliatum. Ipse autem vulneratus est propter iniquitates nostras, attritus est propter scelera nostra*. Psal. 21, v. 18, David de eodem hæc pronuntiat : *Foderunt manus meas et pedes meos, dimmeraverunt omnia ossa mea*. Matth. 4, v. 2, Christus dicitur *esuriisse*. Luc. 19, v. 41 : *Flevit super Jerusalem*. Joan. 4, v. 6 : *Fatigatus ex itinere, sedebat supra fontem*. Joan 11, v. 35 et 35 : *Infremuit spiritu... et lacrymatus est*. Joan. 19, v. 28 : *Sitivit*. Matth. 26, v. 37 : *Cæpit contristari et mæstus esse*. Marci 14, v. 33 et 34 : *Cæpit pavere et tædere, et ait illis (discipulis) : Tristis est anima mea usque ad mortem*. Tandem ex quatuor Evangelistis constat acerbissimos cruciatus Christum esse passum, sive cùm flagellis cæsus est, sive cùm affixus cruci. Quos quidem dolores prævidens et considerans, tantum in se permisit inde timorem nasci, ut sudore sanguinis perfusus fuerit, Luc. 22, v. 44; ergo, etc.

CONCLUSIO II. Christus ex naturali carnis suæ conditione, non ex voluntate tantum, dolores expertus est. Seu, ut Christus pateretur, necesse quidem fuit, quemadmodum dicemus, ut ipse dolore affici consentiret; sed posito hoc consensu, naturaliter passus est ac citra miraculum.

Probatur 1º ex Scripturis, juxta quas Christus assumpsit naturam nostræ similem. Hebr. 2, 17 : *Debit (Christus) per omnia fratribus similari, ut misericors fieret et fidelis Pontifex ad Deum, ut repropitiaret delicta populi*. Jam de eo dictum fuerat v. 14 : *Quia ergo pueri communicaverunt carni et sanguini, et ipse similiter participavit eisdem*. Et cap. 4, v. 15 : *Non habemus Pontificem qui non possit compati infirmitatibus nostris; tentatum autem per omnia pro similitudine, absque peccato*. Probatur 2º ratione theologicâ : Christus assumpsit carnem et naturam, operi nostræ redemptionis producendo et consummando accommodatam; ergo assumpsit naturam dolori et infirmitatibus communibus subjectam; quæ scilicet, ubi ipse consentiret, dolores nostræ redemptioni perficiendæ necessarios, citra miraculum posset pati.

CONCLUSIO III. Dolores et infirmitates quibus Christus subjacuit, nec ex peccato oriebantur, nec, ipso invito, in eo excitabantur aut perse-

verabant; nec demùm eum conturbabant aut cæco impetu commovebant.

Probatur prima pars, quia Christus fuit sanctissimus et ab omni maculâ peccati, naturâ suâ immunis, ut alibi probatum est. Proindeque nostrî duntaxat causâ assumpsit dolores et infirmitates humanas, non verò ut peccati alicujus sibi proprii pœnas daret. Probatur secunda pars 1º ex Scripturis, juxta quas Christus voluntariè passus et mortuus est : Isaïæ 53, v. 7 : *Oblatus est quia ipse voluit*. Et Joan. 10, v. 17 : *Nemo tollit eam (animam meam) à me; sed ego pono eam à meipso, et potestatem habeo... iterum sumendi eam*. Porro eadem esse debuit ratio aliorum dolorum et infirmitatum, ac dolorum ipsius mortis. Nam ut mors per peccatum introivit in mundum, ita et alii dolores; quemadmodum igitur Christus mortuus est *quia voluit*, ita et passus est *quia voluit*; proindeque, etc. 2º Ex SS. Patribus. *Esurivit Jesus*, inquit S. Augustinus, Tract. 49 in Joan., n. 18, *verum est, sed quia voluit; dormivit Jesus, verum est, sed quia voluit; contristatus est Jesus, verum est, sed quia voluit... In illius potestate erat, sic vel sic affici, vel non affici*. 3º Ex duplici ratione theologicâ. Prior hujusmodi est : Dolores et infirmitates in præsentî rerum ordine oriuntur ex peccato; atqui Christus fuit à peccato immunis; ergo dolores pati invitus non debuit, sed tantum voluntariè et liberè, adeò ut non sine ejus nutu excitarentur, et ad ejus arbitrium perseverarent. Altera : Christo homini ea attribui debet perfectio quæ in ejus humanitate recipi potuit, quæque cum Incarnationis finibus, nempe redemptione nostrâ non pugnat; atqui dolores Christi non prævertisse ejus voluntatis nutum, nec eo invito perseverâsse perfectio est in ejus humanitate possibilis ut patet; idem verò Incarnationis finibus officere non potuisse perinde manifestum est; ergo, etc. Probatur tertia pars, nempe dolores Christi eum non perturbâsse, nec cæco impetu commovisse. Nam dolores qui rationis advertentiam et voluntatis nutum non anteverunt, quique nonnisi pro arbitrio patientis perseverant, non possunt eum turbare, et cæco impetu commovere; atqui tales fuere dolores Christi ex probatis; ergo, etc. Hinc, ut modò dicemus, nulli fuere in Christo affectus etiam sensibiles, nisi deliberati, et placidi, quos ad nutum suum ille regeret atque moderaretur.

CONCLUSIO IV. In Christo fuere passiones ordinatæ, demptis imperfectionibus quæ eas in nobis comitantur, et exceptâ desperatione,

Probat. Nam passiones sunt motus appetitûs sentientis, id est voluntatis humanæ prout versatur circa bonum sensibile appetendum, vel malum sensibile fugiendum, ut amor et odium, desiderium et fuga, gaudium et tristitia quæ ad appetitum concupiscibilem referri solent; tum spes et desperatio, audacia et timor quæ ad appetitum irascibilem. Atqui ejusmodi motus ordinati Christo adscribendi sunt. Siquidem 1º, nonnulli eorum Christo conceptis verbis attribuantur in Scripturis, ut ira, tristitia et timor, Matth. 26, v. 37 et 38; Marc. 14, v. 33 et 34; Luc 22, v. 44. 2º Ii motus sunt actus et perfectiones animæ connaturales, prout ipsa bonum sensibile spectat, et præterea nec unioni hypostaticæ, nec perfectissimæ sanctitati repugnant; ergo. 3º Iidem motus seu effectus sensibiles finibus Incarnationis necessarii fuere, aut saltem utiles, tum ut Christus humano modo in terris conversari videretur, tum ut ejusmodi affectus in se aliquando ipse excitans, et sese majoribus doloribus et angustiis nostri causa traderet (vide Luc 22, v. 43 et 44), et suum amorem vehementius exprimeret, et doctrinam suam ampliùs inculcaret, et variarum virtutum exempla nobis daret; ergo, etc.

Dictum est *Excepta desperatione*, quia desperatio peccatum ac deordinationem formaliter includit, quapropter, cum nullo pacto ordinata esse possit, in Christum cadere non potest. Dictum est præterea, *Demptis imperfectionibus quæ illas affectiones in nobis comitantur*. Passiones enim quas experimur triplici imperfectione laborant: 1º earum motus in nobis sine nobis excitantur, atque etiam, nobis invitis quandoque perseverant; 2º nos sæpè conturbant et commovent; 3º aliquando ad peccandum inclinant; atqui hæc tria à Christo removenda. Tertium quidem, quippe cum in eo non fuerit peccati fomes seu concupiscentia ut articulo præcedenti diximus. Primum quoque, nam 1º, ad rationis nutum imperatas et rectas fuisse in Christo omnes appetitûs sensitivi affectiones Scriptura clarè innuit, cum Joan. 11, v. 13, Christus dicitur *turbasse semetipsum*. Hæc enim verba perspicuè significant motum seu affectum sensibilem de quo ibi sermo est, fuisse voluntarium et à ratione imperatum. 2º Idem SS. Patres unanimiter docent. Ergo *tristis fuit Christus*, ait S. Augustinus in Psal. 93, *prorsus tristis fuit, sed voluntate suscipiens tristitiam, quomodo voluntate suscipiens carnem*. Et 49 in Joan., n. 18: *Turbaris tu nolens, turbatus est Christus quia voluit... contristatus est Christus...*

quia voluit... In illius potestate erat, sic vel sic affici, vel non affici. Et Tract. 60: *Quando turbatur (Christus) qui non turbaretur nisi volens, eum consolatur qui turbatur et nolens*. Et S. Joann. Damasc., lib. 3, cap. 20, t. 1, p. 245: *Neque enim coactum quid in eo (Christo) conspicitur, sed omnia voluntaria*. Volens enim fame, volens siti, volens metu, volens morte affectus est. 3º Innocentius XII, inter varias propositiones excerptas ex libro cui titulus, *Placita Sanctorum*; hanc numero 23 proscripsit: *Inferior Christi pars in cruce non communicavit inferiori suas INVOLUNTARIAS perturbationes*. 4º Denique nullos in Christo motus, nullas in ejus appetitu sensibili affectiones excitatas fuisse aut perseverasse, nisi ad ejus nutum, perfectio est in humanâ Christi in terris degentis naturâ planè possibilis, nec finibus Incarnationis nociva; ergo, etc.

Jam verò quod attinet ad secundum, nempe passiones in Christo ita ordinatas et placidas fuisse ut eum non turbarent, hoc inde patet quòd ut diximus ad rationis nutum has Christus semper moderaretur; ergo, etc.

SOLVUNTUR OBJECTIONES. — Obj. adversus primam conclusionem. Supra ex Scripturis et ex traditione nobis visi sumus colligere Christum à primo ortu visione Dei intuitivâ, ac proinde summâ beatitudine esse fruitum; atqui impossibile est eum doloribus acerbissimis subjacere qui visione intuitivâ Dei et supremâ beatitudine fruitur; ergo, etc.

Dist. min.: Impossibile est eum doloribus acerbissimis subjacere qui intuitivâ Dei visione et supremâ beatitudine completâ et adæquatâ fruitur, concedo; qui inadæquatâ, animam tantum prout circa insensibilia et spiritualia versatur afficiente, subdistinguo: Si dolores illi seussensationes ingratæ sint necessariæ concedo; si liberæ sint, seu non sine voluntatis nutu excitentur, et non nisi pro ejusdem nutu perseverent, nego. In animâ Christi, ut in cæteris animabus humanis, duplex distinguenda est pars, seu respectus, inferior nempe et superior. Nomine partis superioris intelligitur ipsa anima prout versatur circa res spirituales seu eas intelligendo, seu eas amando, seu ex earum intellectione et amore gaudium percipiendo. Pars inferior animæ est eadem anima prout versatur circa res sensibiles, seu prout habet facultatem sentiendi et appetitum sensitivum. Jam verò contendimus 1º animam Christi potuisse esse beatam secundum partem superiorem, id est intellectu puro apprehende-

re Deum intuitivè, amore præcellenti ipsi adhærere et ex hac possessione Dei, maximum, spirituale gaudium percipere, quin ideirco ea esset beata secundum partem inferiorem, id est, quin haberet sensationes gratas, et ejus appetitus sensitivus modo jucundo afficeretur. Imò verò non dubitamus quin eadem Christi anima secundum partem superiorem beata, potuerit simul sensationes ingratas experiri et voluntariè turbari et tristis esse; modò tamen ponatur ejusmodi sensationes ingratas seu dolores ab eâ non fuisse, renitente voluntate, toleratos, seu quod in idem recidit, eos non-nisi secundum voluntatis nutum coëpisse et perseverâsse. Enimverò, licet anima sit simplex, potest tamen simul diversimodè affici, ut experiëntiâ constat; quid quòd non rarò evenit ut simulet jucundo et ingrato modo afficiatur? Quæ cum ita sint, quid, quæso, repugnat quamdam animam tantâ capacitâ quantam à creatore suo recipere potest, donatam, dum secundum aliquas suâ facultates felicitate potitur, secundum alias doloribus voluntariè et propter summam aliquam et eximiam causam susceptis subjacere? Quonam argumento demonstrarent adversarii dolores illos sensibiles consentiente voluntate excitatos et perseverantes, non posse cum felicitate spirituali consistere? Nonne potiùs manifestum et indubitatum videtur neminem iis verè infelicem reddi quæ liberè et spontanè parti incipit et tolerare pergit? ergo, etc.

Obj. 2^o adversus eandem conclusionem, auctoritatem S. Clementis Alex. qui, lib. 6 Stromatum, ita loquitur: « In salvatore corpus, ut corpus, necessaria postulare ministeria ut permaneat, fuerit ridiculum. Comedebat enim non propter corpus quod sanctâ virtute continebatur; sed ne eis qui unâ cum eo versabantur, in mentem veniret de eo aliter sentire, sicut certè postea quidem existimârunt eum apparuisse visione et phantasmate. Ipse autem, ut semel dicam, passionis erat expers, ut quem nullus subiret motus affectionis, neque voluptas, neque dolor. » Ergo juxta S. doctorem nulli dolori Christus fuit obnoxius.

Dist. conseq. : Christus nulli dolori invitus fuit obnoxius, concedo; sponte suâ, nego. Duo suadent S. doctorem esse intelligendum de doloribus et affectionibus rationis et voluntatis nutum prævertentibus et invitâ voluntate permanentibus, quas meritò excludit à Christo. Nam 1^o, hac interpretatione positâ, attingit scopum suum, nempe Christum et œconomiam et

ut fines Incarnationis assequeretur, non ex necessitate manducâsse. 2^o Aliis in locis expressè tradit aut supponit Christum passionis dolores pro nostrâ salute sustinuisse. Cæterum non diffitemur sanctum Clementem Alexand. secundæ nostræ conclusioni quæ liberæ scholarum disputationi relinqui potest, eo loci adversari. Sed non contradicit primæ quæ ad fidem pertinet.

Objicies 3^o, adversus eandem primam conclusionis partem, hæc sancti Hilarii verba, lib. 10 de Trinitate, n. 23 : « Homo Jesus Christus, Unigenitus Deus, per carnem et Verbum ut hominis filius, ita et Dei Filius hominem verum secundum similitudinem nostri hominis, non deficiens à se Deo, sumpsit; in quo, quamvis aut ictus incideret, aut vulnus descenderet, aut nodi concurrerent, aut suspensio elevaret, afferrent quidem hæc impetum passionis, non tamen dolorem passionis inferrent; ut telum aliquod aut aquam perforans, aut ignem compungens, aut æra vulnerans, omnes quidem has passiones naturæ suæ infert, ut foret, ut vulneret, ut compungat, sed naturam suam in hæc passio illata non retinet, dum in naturâ non est vel aquam forari, vel pungi ignem, vel aerem vulnerari, quamvis naturæ teli sit et vulnerare, et compungere, et forare. Passus quidem est Dominus Jesus Christus, dum cæditur, dum suspenditur, dum crucifigitur, dum moritur; sed in corpus Domini irruens passio non fuit passio; nec tamen naturam passionis exeruit, dum pœnali ministerio desæviit, et virtus corporis sine sensu pœnæ, vim pœnæ in se desævientis excepit. Habuerit sanè illud Domini corpus doloris nostri naturam, si corpus nostrum id naturæ habet ut calcet undas, et super fluctus eat, et non degravetur ingressu, neque aquæ insistentibus vestigiis cedant, penetret etiam solida, nec clausæ domûs obstaculis arceatur. » Hactenùs S. doctor, ex quibus istud conficitur argumentum : Ille omnem doloris sensum à Christo removet, qui ait varia passionis ejus supplicia attulisse quidem *impetum passionis*, non tamen *dolorem passionis intulisse*; quemadmodum telum aquam perforans, aut ignem compungens, aut æra vulnerans, in eis nec foramen, nec punctionem, nec vulnus producit, quippe quibus recipiendis ejusmodi elementorum natura apta non est. Atqui ita S. Hilarius; ergo, etc.

Respondeo 1^o, quocumque modo accipiat is textus, quem alii (1) in sensum catho-

(1) Lanfrancus, Epist. 50, Philippus, abbas

licum inflectere conantur, alii (1) etiam ex Orthodoxis ab omni pronuntiant benignâ interpretatione alienum; constare tamen et indubitatum esse nostram conclusionem tanti doctoris suffragio non destitui. Nimirum, si in testimonio objecto, S. Hilarius doctrinæ quam asserimus adversetur, planè dicendus est sententiam ibi à se traditam postea revocasse et rejecisse; siquidem Commentario suo, seu Tractatibus in Psalmos, post libros de Trinitate conscriptis, veros Christo dolores disertissimè, omnibus fatentibus, adscribit. « Ut absolutissimum, inquit Tractatu in Psal. 53, n. 7, nobis humanæ humilitatis (Christus) esset exemplum omnia quæ hominum sunt, et oravit et passus est. Et ex communi nostrâ infirmitate salutem sibi est deprecatus à Patre, ut nativitatem (hoc est naturam) cum ipsis infirmitatis nostræ iniisse intelligeretur officiis. Hinc illud est quòd esurivit, sitivit, dormivit, lassatus fuit, impiorum cœtus fugit, mœstus fuit, flevit, et passus et mortuus est. » Et num. 8 : « Potentes animam ejus exquirunt, quæ frequenter in Evangelio tristis et mœsta est. » In Psal. 54, n. 6 : « Potens non mori etiam timorem in se mortis ingruentem non renuit. » In Psal. 68, n. 1 : « Universarum itaque passionum humanarum sorte perfunctus, secundum susceptas infirmitates nostras loquitur; et dolet ipse quidem extra necessitatem et timoris positus et doloris. Sed his se tamen quæ suscepit accommodans; ut qui carnis nostræ homo natus esset, et dolorum nostrorum querelis, et infirmitatis nostræ precatione loqueretur. » Num. 23 : « Percussus est Dominus, peccata nostra suscipiens, et pro nobis dolens..... hunc igitur ita à Deo percussum persecuti sunt, super dolorem percussione hujus addentes. Pro nobis enim secundum Prophetam dolet. » Num. 23 : « Pauper est (Christus).... Dolens est,... sed

Bonæ Spei, contra Joannem Præpositum, Hernaldus, quem Philippus ille et Joannes controversiæ arbitrum elegerant, Petrus Lombardus lib. 3 Sentent. S. Thomas, p. 3, q. 15, et in 3 Sent. S. Bonaventura, in 3 Dist. 16, q. 1, doctissimi Benedictini in notis ad hunc S. Hilarii locum, Turnelius Witassius, Grandini editor, etc.

(1) Claudianus Mamertus, lib. 2 de statu animæ, cap. 9, Joannes Præpositus, in litteris ad Philippum, Bonæ Spei abbatem, inter opera hujus Philipp. excusis pag. 93 ed. Duac. 1621, Guillelmus Paris. apud S. Bonav., loco mox citato, Baronius ad an. 563, Bellarminus, lib. 4 de Christi animâ, c. 4, Erasmus, Petavius, etc., quibus adde Berengarium apud Lanfrancum, Epistolâ 50, Sculterum, etc.

hunc pauperem et dolentem salus ea quæ vultus Dei est, suscepit. » In Psal. 139, 11 : Gerens (Christus) hominis Deique naturam, habebat (inter orandum) et ex hominis infirmitate trepidationis affectum, et ex conscientia divinitatis fiduciam securitatis. »

2º Distinguo maj. : Ille omnem doloris sensum removet à Christo ut Deo qui, etc., concedo; à Christo ut homine, subdistinguo : Omnem doloris sensum nostris doloribus similem, nempe indeliberatum, necessarium, et menti dominantem, concedo; omnem doloris sensum quemcumque, etiam eum qui esset deliberatus, et liber, nec menti dominans, nego. Itaque Christus, ut observat ipse S. Hilarius, initio textus objecti, est simul Deus et homo; ratione autem divinitatis suæ passionibus et dolori obnoxius esse nequit, siquidem, ut ait idem S. doctor, Verbum *non deficiens à se Deo* humanitatem *sumpsit*. Si ergo aliqua pati potuit Christus, nonnisi ratione humanitatis suæ. Sensus porrò doloris generatim nihil illud est quàm sensatio ingrata, et duplex concipi potest; alter nostris similis doloribus, ac proinde indeliberatus, id est rationis advertentiam et voluntatis consensum prævertens : necessarius, id est, invitos afficiens et invito subjecto perseverans; tandem menti dominans, id est ejus operationes impediens, eam perturbans et è sede suâ dejiciens, alter his vitiis carens, qui sit deliberatus et liber mentique non domineatur, id est, qui nonnisi ad rationis et voluntatis liberæ nutum nascatur et perseveret, ac nullam perturbationem, languorem aut impedimentum afferat menti. Constat ex dictis indeliberationem, dominium, et necessitatem dolorum à Christo etiam ut homine penitus excludenda, atque eam fuisse unionis hypostaticæ indolem ut exegerit posterioris tantum generis dolores Christo homini potuisse inferri. Jam verò contendimus sanctum Hilarium in obscuro et difficili textu qui objectus est, non alio sensu intelligendum esse quàm de omni dolore Divinitati abjudicando, necnon de indeliberato, necessario, et menti dominante dolore ab ejusdem humanitate propter unionem hypostaticam removendo.

Probamus hanc esse genuinam ejusmodi loci interpretationem, 1º quia ejus scopo consentanea est; 2º quia ejusdem verbis potest accommodari; 3º quia illam adhiberi postulat constans et alibi sæpè expressa S. Doctoris sententia.

Ac 1º quidem sancti Hilarii scopo consenta-

nea est illa interpretatio. Enimverò disputabat adversùs Arianos, qui Christum non esse naturâ Deum sibi videbantur evincere, quòd doloribus passionis obnoxius fuerit. Quam quidem objectionem S. doctor ut pro more suo, eo solutionis genere dilueret quod nihil adversariis respondendum relinquit, duo præstare debuit. 1° Ipsi observandum fuit juxta fidem catholicam Christum esse simul Deum Verbum et hominem, atque Verbum sine ulla sui imminutione, seu ut ipse loquitur *non deficiens à se Deo*, hominem esse factum, proindeque ipsum, dùm passus est Christus, nullâ doloris specie in divinâ suâ naturâ fuisse affectum. 2° Ne reponerent Ariani dolores illos quos expertus est Christus, si verus naturâ Deus fuisset, non potuisse in ipsum ratione humanitatis cadere, oportuit ab illo ostendi inter passionem humanitati Christi illatas, et eas quæ nobis inferuntur maximum intercessisse discrimen, nempe Christum nonnisi deliberatè, voluntariè et liberè esse passum, dolores ejus etiam ingruentibus ictibus, nonnisi ad ejus nutum cœpisse, et perseverâsse, ac denique iis mentem ipsius nullâ ratione turbatam et perterritam fuisse, nec à sede suâ dejectam. Porro, ut hæc duo diluendæ Arianorum objectioni erant necessaria, ita etiam sufficiebant. Nec sanè causam Ecclesiæ juvisset S. Hilarius, imò eam prodidisset, si præterea immunitatem omnis cujuscumque doloris etiam deliberati, liberi, nec menti dominantis Christo voluisset attribuere. Nam præterquàm quòd ejusmodi doctrina Scripturis adversa est, nemo non videt solâ ratione duce et posito Incarnationis mysterio, multò magis repugnâsse Homini-Deo ut nihil passus, species et apparentias passionis doloris indueret, quàm ut veros doloris sensus, loco nostro satisfaciendi causâ, in suâ humanitate produci pro nutu suo et liberâ voluntate, et citra omnem suæ mentis perturbationem permetteret. Ergo allata explicatio scopo sancti Hilarii consentanea est.

2° Hæc ipsa interpretatio ejus verbis potest accommodari. Nam 1°, nihil obstat quominus major pars loci allati, ipsaque comparatio teli aquam perforantis, aera vulnerantis, etc., ad Christum ut Deum referantur. *Virtus corporis*, quæ, ut habet S. Hilarius, *sine sensu pænæ, vim pænæ in se desævientis accepit*, intelligi potest ipsa Christi divinitas conjuncta corpori, illudque sustentans et roborans. 2° Eadem comparatio ex telo desumpta, necnon alia quibus hanc ad suum institutum S. doctor trans-

fert et applicat, aptè etiam usurpari potuerunt, ut dolores Christi alterius naturæ fuisse à nostris doloribus ostenderetur, præsertim verò, eos ad Christi mentem non pervenisse, seu ejustranquillitati et paci non offecisse. 3° Hinc mentem suam statim ampliùs explicans ita pergit : *Habuerit sanè illud corpus Domini doloris nostri naturam, si corpus nostrum id naturæ habet ut calcet undas*, etc. Ubi Christo abjudicatur tantum doloris nostri natura, non verò dolor quilibet et quocumque sensu verus et realis, et à vitiis et defectibus dolorum nostrorum alienus. Hinc 4°, colligit S. Hilarius immunitatem à doloribus de quibus agit, Christo esse attribuendam ex eo quòd habuerit corpus *originis suæ proprium, neque ex vitiis humanæ conceptionis existens*. Nempe infirmitates et dolores indeliberati, necessarii, et menti dominantes quibus subjacemus, ex vitio originis nostræ et ex carne peccati contrahuntur; ergo, inquit S. doctor, Christus ex immaculatâ Virgine, Spiritu sancto operante conceptus, ejusmodi doloribus obnoxius esse non debuit. Quod argumentum à Christo removet solum dolores nostris doloribus similes. Vide etiam n. 23, versus finem, et n. 35 et 47. Hinc tandem, n. 27, 52, 55, 36, 45, et in cap. 51 S. Matth. adversùs eosdem Arianos agens, ostendit trepidationem et metum mortis Christo non posse adscribi, eum impavidum fuisse, et ad necem cruentam ut ad triumphum et ad finem tristitiæ et luctûs properâsse; ergo, etc.

3° Eamdem interpretationem adhiberi postulat constans alibi sæpiùs expressa S. doctoris sententia. Nempe multa modò attulimus perspicua in hanc rem testimonia ex commentario ejus in Psalmos desumpta, ubi inprimis notandum est duplicem doloris speciem distingui à S. doctore; alterum necessarium et formidini conjunctum, quem excludit à Christo; alterum spontè et sine ullâ mentis perturbatione nostri causa susceptum, quem ipsi juxta Scripturas attribuit. *Dolet ipse quidem*, inquit in Psalm. 68, n. 1, *extra necessitatem et timoris positus et doloris*. Uno verbo in hoc commentario perspicuè eam tradit doctrinam, quam volumus ab eo obscuriùs exprimi lib. 1 de Trin. imò non absimili modo quandoque illic loquitur, etsi iis additis quæ omnem ambiguitatem remonent. Vid. Tract. in Psal. 68 et 139. Ait Petavius, lib. 10 de Incarn. cap. 5, sanctum Hilarium in commentario suo in Psalmos revocâsse errorem in quem incautè inciderat

Arianorum objecta in libris de Trinitate solvens, sed 1^o, à se ullam sententiam retractari ne minimum indigitat S. doctor in hoc suo commentario, proindeque nisi evidentissimum sit non posse emolliiri quæ ex libro ejus 10 de Trinitate objecta sunt, censendus est nihil retractasse, sed ejusdem semper fuisse sententiæ, quam clariùs in Psalmos scribendo exposuit. 2^o In libris ipsis de Trinitate non obscurè S. Hilarius veros dolores à Christo toleratos fuisse significat, lib. 3, n. 10 : *A cunis, inquit, et infantiâ, usque ad consummatum venerat (Christus) virum, per somnum, famem, sitim, lassitudinem, lacrymas, hominem egerat.* Libro ipso 10, n. 36, Christum tristitiâ affectum fuisse supponit; n. 48, ait : *Secundum hominem pro nobis (Christum) infirma omnia passum*; n. 56, eum *flevisse et doluisse*; n. 67, eundem tolerasse, *quæ homines pati possunt*; ergo, etc.

ARTICULUS V.

De perfectionibus et defectibus à Christo assumptis ratione corporis.

Fueritne passibile, mortale et corruptibile alterationi et morbis obnoxium corpus Christi? Num illud ex matre Virgine Christus traxerit? Numquid formâ decorum et egregium fuerit? En quæstiones hic expendendæ. Circa primum erravere tum qui Christo phantasticum corpus duntaxat tribuere, tum qui illi *spirituale nescio quod corpus*, ut Tertullianus loquitur, ex sideris et aeris partibus compactum adscripserunt. De quibus Dissert. 4, cap. 1, jam diximus. Circa secundum, an scilicet Maria in cujus sinu, ut Dissert. 4 probatum est, Christus carnem assumpsit, Virgo fuerit tum ante partum, tum in partu, tum etiam post partum; erravere primis Ecclesiæ seculis Cerinthus (1) Carpocrates (2) et alii, quibus visum est Christum esse purum hominem, more cæterorum hominum ex Mariâ et Josepho prognatum. Ubi tamen notandum non eos omnes hæreticos qui olim Christum purum esse hominem prædicarunt, inficiatos esse ipsum ex Virgine ortum duxisse. Vide Eusebium, lib. 3 Hist. eccl. cap. 27, pag. 99, de Ebionitis Theodoretum, lib. 2 Hæreticorum fabul. cap. 7, p. 221, de Elcesæis, etc. Jovianus, quarto seculo, agnovit quidem matrem Christi antequàm conciperet Virginem fuisse, sed eam voluit violato virgi-

nitatis claustro et more cæterarum mulierum partum in lucem emisisse. Nonnulli de quibus Origenes, Homil. 7 in Lucam commenti sunt Mariam nato Christo plures ex Josepho viro suo filios habuisse; qui in Evangelio fratres Christi nominantur. Idem sensit Apollinaris, teste S. Epiphanio, hæresi 77 et 78. Refert S. Joannes Damascenus, lib. 4, cap. 15, et refellit insulsum quorundam figmentum, qui statuebant corpus Christi ne in lucem prodians virginitatis claustrum rumperet, per B. Mariæ latus exivisse. Circa tertium, Patrum et theologorum non sunt unanimes sententiæ ut statim dicemus.

CONCLUSIO I. Christi corpus fuit passibile et mortale, uno verbo communes naturæ humanæ defectus habuit, si excipias corruptionem seu putredinem triduo mortis. Non autem ipsi fuere defectus speciales, ut morbi, etc. Probatur prima, pars nempe corpus Christi fuisse passibile et mortale et defectus naturæ humanæ communes habuisse. Etenim 1^o, ex dictis sæpiùs præsertim, Dissert. 4, cap. 1, Christus verum et solidum corpus nostroque simile assumpsit, Heb. 2, v. 17 : *Debit (Christus) per omnia fratribus similari*; ergo habuit defectus naturæ humanæ communes. 2^o Ille habuit corpus passibile et mortale, qui esuriit, fatigatus est, sitivit, sudore perfusus est, dolores passionis sustinuit, ac tandem in cruce mortuus est; atqui hæc omnia conveniunt Christo ut jam diximus articulo præcedenti inter probationes conclusionis primæ; ergo, etc.

Probatur secunda pars, nempe corpus Christi triduo mortis non fuisse corruptioni seu putredini obnoxium. Nam 1^o, id prædictum fuerat à Prophetâ, Psalmo 15, v. 10, his verbis : *Non dabis sanctum tuum videre corruptionem.* Quod quidem oraculum triduo mortis adimpletum fuisse testis est S. Petrus, Act. 2, v. 27. 2^o Nec redemptioni nostræ necessaria aut utilis fuisset illa corporis Christi post mortem corruptio; nec Verbum divinum decuisset ut corpus quod ipsi erat conjunctum, putreficeret, et corrumperetur.

Probatur tertia pars, nempe speciales defectus qui ex certâ causarum secundarum dispositione, organorum infirmitate, malâ corporis constitutione oriuntur, v. g., morbos esse Christo abjudicandos. Nam tribuenda est Christo, ut sæpè diximus, ea perfectio quæ in ejus humanitate inesse potuit, et cujus privatio fini ad quem venerat, non fuisset necessa-

(1) Vid. S. Iren. lib. 4 adv. Hæres. cap. 25, S. Epiph. Hæresi 28, Theodoretum, lib. 2 Hæret. fabul. cap. 5.

(2) Theodoret. lib. 1 Hæret. fabul. cap. 5.

ria ; atqui manifestum est defectus ejusmodi speciales fini ad quem Christus venerat, non fuisse necessarios ; nec minùs constat perfectionem iis oppositam in humanitate Christi inesse potuisse ; ergo.

CONCLUSIO II. Christus ex Mariâ Virgine carnem, operante Spiritu sancto, assumpsit, illæsâ illius virginitate, sive ante partum, sive in partu, sive post partum.

Propositio est de fide. Probatur prima pars, nempe beatam Mariam ante partum virginem fuisse, illæsâque ejus virginitate, Verbum operante Spiritu sancto in eâ carnem sumpsisse. Isaias cap. 7, v. 14, magnum illud prodigium prædixit : *Ecce Virgo concipiet et pariet filium, et vocabitur nomen ejus Emmanuel*. De quo oraculo vide quæ diximus Dissert. 2. Hujus autem Prophetiæ eventum S. Matthæus, cap. 1, v. 18 et seq., sic edisserit : *Cum esset desponsata mater ejus (Christi) Maria Joseph, antequàm convenirent, inventa est in utero habens de Spiritu Sancto... Angelus Domini apparuit in somnis ei (Joseph) dicens : Joseph, fili David, noli timere accipere Mariam conjugem tuam ; quod enim in eâ natum est, de Spiritu Sancto est. Pariet autem filium, et vocabis nomen ejus Jesum... Hoc autem totum factum est, ut adimpleretur quod dictum est à Domino per Prophetam dicentem : Ecce Virgo in utero habebit et pariet filium ; et vocabunt nomen ejus Emmanuel, quod est interpretatum, nobiscum Deus*. Et S. Lucas 1, v. 26 : *Missus est Angelus Gabriel à Deo in civitatem Galileæ cui nomen Nazareth, ad Virginem desponsatam viro cui nomen erat Joseph, de domo David, et nomen Virginis Maria ; et ingressus Angelus ad eam, dixit : Ave, gratiâ plena, Dominus tecum, benedicta tu in mulieribus. Quæ cum audisset, turbata est in sermone ejus et cogitabat qualis esset ista salutatio ; et ait Angelus : Ne timeas, Maria ; invenisti enim gratiam apud Deum. Ecce concipies et paries filium, et vocabis nomen ejus Jesum... Dixit autem Maria ad Angelum : Quomodò fiet istud, quoniam virum non cognosco ? Et respondens Angelus, dixit ei : Spiritus sanctus superveniet inte, et virtus Altissimi obumbrabit tibi*. Ergo Christi caro, illæsâ Mariæ virginitate, in hujus Beatæ Virginis utero, Spiritu sancto mirabiliter operante formata est, proindeque ante partum Mater Christi Virgo permansit.

Si quæras in quo posita fuerit mira illa sancti Spiritûs operatio, respondeo hanc in eo fuisse sitam, ut quæcumque ad conceptum et organisationem corporis humani operandum

secundùm leges naturales formaliter requiruntur et successivè fiunt, hæc in instanti fierent concurrente Beatâ Mariâ quantum ad ea quæ sui sexûs erant. Et quidem id effecit Spiritus sanctus in instanti, cum constet à primo ortu animam Christi fuisse unitam ejus corpori, et tum animam tum corpus ejus unita fuisse Verbo, vide quæ superiùs dicta sunt Dissert. 4, cap. 2, art. 2. Id autem Spiritus sanctus effecit concurrente Beatâ Mariâ quantum ad ea quæ sui sexûs erant, aliàs dici non posset concepisse Christum, nec mater Dei secundùm carnem ; ergo, etc.

Probatur secunda pars, nempe matrem Christi fuisse Virginem in partu. Nam 1º, ut in Scripturis dicitur Virgo concepisse Christum, ita et dicitur Virgo peperisse. Isaiæ 7, v. 14 : *Ecce Virgo concipiet et pariet filium*. Matth. 1, v. 25 : *Virgo in utero habebit et pariet filium*. Luc. 1, v. 31 : *Ecce concipies in utero, et paries filium* ; ergo, etc.

2º Ex Symbolis, in quibus Jesum Christum non tantùm ex Virgine conceptum, sed et ex Virgine natum confitemur. Unde S. Augustinus in Enchiridio, cap. 34 : *Quo (Christo) inquit, si, vel nascente, corrumperetur ejus (Mariæ) integritas, non jam ille de Virgine nasceretur ; eumque falsò, quod absit, natum de Virgine Mariâ tota confiteretur Ecclesia*. Adde Jovinianum et quotquot Christum ex Mariâ, reserato virginitatis claustro natum asseruerunt, semper ab Ecclesiâ ut hæreticos esse habitos. Vide Epistolam 7 S. Ambrosii ad Siricium, summum pontificem, quæ synodica est concilii Mediolanensis in quo Jovinianus condemnatus est.

3º Ex traditione SS. Patrum, quorum longam seriem hic exhibet Petavius, lib. 14, cap. 3, 5 et 6. Unum aut alterum appellabimus. S. August. Epist. 157, aliàs 3, ad Volus. : *Ipsa virtus, inquit, per inviolatæ Matris virgineæ viscera membra infantis eduxit, quæ postea per clausa ostia membra juvenis introduxit*. S. Leo, Serm. 1, de Nativ. : *Meritò igitur, ait, virgineæ integritati nihil corruptionis intulit partus salutis, quia custodia fuit pudoris editio veritatis*.

4º Ex ratione theologicâ : nam possibile fuit et deenit Christum ex Virgine concipi et nasci. Possibile quidem fuit Christum de Virgine concipi ; nam nonne evidentissimum est Deum per seipsum illud efficere posse in hominis conceptu, quod vi legum naturæ à se institutarum, quotidie efficit. Potuit pariter Christus nasci ex Virgine ; quemadmodum enim à mortuis

Redivivus è sepulcro egressus est nec revoluto lapide quo ostium monumenti claudebatur, nec fractis sigillis quæ ad idem ostium principes Judæorum apposuerant, quemadmodum, clausis januis, in cubiculum ubi Apostoli erant congregati, introivit; ita illibato virginittis clauetro è Mariæ Virginis sinu egredi potuit. Jam porrò Christum decuisse ut ex Virgine conciperetur et nasceretur facile probant sancti Patres pluribus argumentis. Nam 1° conveniens fuit præter consuetum naturæ ordinem, et mirabili ratione Deum-Hominem concipi et nasci; unde Isaias 53, v. 8: *Generationem ejus, inquit, quis enarrabit?* 2° Maximè consentaneum fuit ut Christus redemptor et salvator, qui nos renovandi causâ venit, non ut cæteri homines, sed novo quodam modo nasceretur et in mundum prodiret. 3° Necesse fuit in omnibus Christi mysteriis ejus Divinitatem simul et humanitatem exprimi et declarari. Si more cæterorum Christus natus fuisset, nihil in ejus nativitate eum esse Deum ostendisset. At ex Virgine nascens infinitam suæ Divinitatis potentiam et virtutem comprobavit.

Probatur tertia pars, nempe Mariam mansisse virginem etiam post partum, nec ullos ex Josepho filios suscepisse; 1° ex Scripturis Luc. 1, v. 34, ubi Beatam Mariam votum virginittis emisisse clarè indigitatur his verbis: *Quomodo fiet istud, quoniam virum non cognosco?* Atqui dubium nullum esse potest, quin Maria quam Angelus gratiâ plenam appellat, hoc votum servaverit; ergo, etc. 2° Ex concilio Chalcedonensi generali IV, quod in allocutione ad Marcianum imperatorem asserit, *virginitatem* (Beatæ Mariæ à Christo) *sacratam esse etiam post partum, utrumque ejus fuisse integritate obsignatum, ut nullis injuriis deinde pateret.* 3° Ex SS. Patribus. Origenes, Hom. 7 in Lucam: *In tantam, ait, nescio quis prorupit insaniam, ut assereret negatam fuisse Mariam à salvatore, eò quòd post nativitatem illius juncta fuerit Joseph.* S. Basilius, Homiliâ in sanctam Christi generationem, aliàs 25: *Christi amantes, inquit, audire non sustinent, quòd Deipara aliquando desierit esse Virgo.* S. Epiphanius, hæresi 78, n. 9, eos hæreticis accenset, qui Mariam post Christum natum, cum Josepho consuetudinem habuisse dicerent; eosdem *Antidicomarianitas* nuncupat, multisque argumentis refellit, præsertim quia ad suam usque ætatem nemo nisi præposito Virginis nomine beatam Mariam nominarat. S. Ambrosius, libro

de Instit. Virginis, cap. 6, n. 45: *Non deficit, inquit, virginittis magistra; nec fieri poterat, ut quæ Deum portaverat, portandum hominem arbitraretur; nec Joseph, vir justus, in hanc prorupisset amentiam, ut Matri Domini concubitu corporeo misceretur.* S. Hieronymus, lib. contra Helvidium, sic habet: *Natum esse Deum de Virgine credimus, quia legimus: Mariam nupsisse post partum credimus, quia non legimus.* Et toto hoc in libro ex professo probat B. Mariam semper ac perpetuò Virginem mansisse. Commentario autem in caput 44 Ezech. v. 2: *Pulchrè, inquit, quidam clausam portam, per quam solus Dominus Deus Israel ingreditur, Mariam Virginem intelligunt, quæ et ante partum et post partum Virgo permansit.* S. August., Tract. 10 in Joan.: *Unde fratres Domino, inquit? Num Maria iterum peperit? Absit, inde cœpit dignitas Virginum, illa femina mater esse potuit, mulier esse non potuit.*

Innumera alia proferri possent similia testimonia; sufficiat annotare in Symbolis, in conciliis, et apud sanctos Patres beatam Mariam perpetuò ac simpliciter et constanter Virginem nuncupari, nunquàm verò vel minimùm innuì eam post partum cum Josepho viro suo carnaliter habitasse. Imò votum virginittis ab eâ emissum fuisse, et illibatè servatum docent SS. doctores, atque ut *amentiam* et *blasphemiam*, ut *hæresim* habent eorum sententiam qui læsæ virginittis post partum Mariam accusare ausi sunt.

SOLVUNTUR OBJECTIONES. — Obj. adversus secundam conclusionis partem. S. Lucas 2, v. 22, hæc habet: *Postquàm impleti sunt dies purgationis Mariæ secundum legem Moysi, tulerunt illum in Jerusalem, ut sisterent eum Domino, sicut scriptum est in lege Domini: Quia omne masculinum adaperiens vulvam, sanctum Domino vocabitur.* Ex hoc testimonio olim inferebant Tertullianus, lib. de Carne Christi, cap. 23, et Origenes, Homil. 4 in Lucam, Christum ex Beatâ Virgine violato virginittis clauetro natum esse. Ergo Beata Maria non fuit Virgo in partu. Nego conseq.: Significat duntaxat S. Lucas illud quod lege præscriptum fuerat de omni masculino primogenito, à Christo Domino fuisse adimpletum, non quòd natus esset cæterorum more, sed tantum quia œconomia Incarnationis postulabat ut ipse secundum ritum lege præscriptum Deo in templo offerretur. Quòd si verba legis de quâ agitur, hocce modo premere et ad Christum transferre liceret, consequens foret nequidem ex matre ante

partum et in conceptu virgine, Christum esse natum, cum de matribus communibus, quæ via ordinariâ et suscepto semine concipiunt, lex purificationis manifestè lata sit. Cum igitur hic manifestè fallantur Tertullianus et Origenes, nullum in iis deserendis piaculum esse potest.

Obj. adversus secundam conclusionis partem cum Helvidio, Matth. 1, v. 18 : *Cum esset desponsata mater ejus Maria Joseph, antequàm convenirent, inventa est in utero habens de Spiritu sancto*. Ubi hæc particula *antequàm*, indigitat eos postea convenisse; ergo. Nego ant. Nam vel illa verba *antequàm convenirent* explicaveris de cohabitatione domicilii, et contractu matrimonii, vel de cohabitatione thori. Si primum, quod fortè indicat anxietas Joseph de accipiendâ Mariâ in conjugem, v. 19 et 20 significata, jam nulla in argumento allato difficultas. Sin autem de habitatione thori illa verba interpreteris, dicendum erit cum S. Hieronymo S. Matthæum ibi significasse Mariam cum Joseph ante Christi conceptum non convenisse, quod unum eo loci intererat exprimi; non verò ab eo indicari quid postea contigerit, quia id ad scopum ejus nihil attinebat; malè autem inferri eos convenisse postea, eo quòd antea non convenisse dicantur; quemadmodum si diceretur : Helvidius antequàm poenitentiam ageret, morte præventus fuit, ridiculè quis inde concluderet : Ergo postea poenitentiam egit.

Obj. adversus eandem tertiam partem 1° : S. Matth. ibid. v. 25 : *Et non cognoscebat eam*, inquit, *donec peperit filium suum primogenitum*. Ergo postea eam cognovit. 2° Christus ibi dicitur primogenitus; ergo alios habuit Maria filios. 3° Plures fratres Christo assignantur Matth. 13, v. 55, Jacobus scilicet, et Joseph, et Simon et Judas; ergo, etc.

Ad primum, nego consequentiam. Particula *donec* ibi tantum demonstrat tempus antea elapsum, non verò supponit, post præteritum tempus quod connctat, rem quæ antea facta non fuerat, tunc fieri cœpisse. Nec hanc vocis *donec* ideò excogitamus notionem ut propositæ objectioni respondeamus. Nam in Scripturis non semel accipitur eo ipso sensu quem ei tribuimus; Isaïæ 22, v. 14 : *Si dimittatur iniquitas hæc, donec moriamini*; quis inde colliget iniquitatem de quâ ibi agitur, post obitum peccatoris ipsi condonandam? Psal. 109, v. 1 et 2 : *Sede à dextris meis, donec ponam inimicos tuos scabellum pedum tuorum*. Ad quæ

respiciens Apostolus, 1 Cor. 15, v. 25 : *Oportet illum (Christum) regnare, ait, donec ponat inimicos sub pedibus ejus*. An inde sequitur Christum ad dexteram Patris non amplius sessurum, aut regnum ejus destruendum postquam sub ejus pedibus inimici ipsius positi fuerint? Ergo, etc.

Ad secundum, primogenitus ille dicitur ante quem nullus est genitus, seu alii postea generentur et nascantur, sive nulli. Vide Exodi 15, v. 2, et Numer. 18, v. 16.

Ad tertium, consanguinei et consobrini Christi loco allato dicuntur ejus fratres, juxta Scripturæ morem, Gen. 15, v. 8, et cap. 29, v. 15.

CONCLUSIO III. An Christus eleganti et venustâ specie fuerit necne, certò definiri non potest. Probabilius est eum communi et mediocri formâ donatum fuisse, quæ nec oculos alliceret, nec offenderet.

Probatur prima pars, quia de eâ quæstione silent Scripturæ, et in varias scinduntur sententias sancti Ecclesiæ doctores. Silent Scripturæ. Nam iste locus Psaltis Regii : *Speciosus formâ præ filiis hominum; diffusa est gratia in labiis tuis*; ad animæ decorem seu virtutes, gratiam, sapientiam, doctrinam, et varii generis spiritualia dona meritò refertur à SS. Patribus, et interpretibus. Vide S. Basilium, S. Chrysostomum, et Theodoretum ad Psal. 44, S. Aug. ad eundem Psalm. et Tractatu 9 in Epistolam 1 S. Joan., S. Hieronymum Epistolâ ad Principiam. Testimonia verò Isaïæ deformitatem corporis Christi spectantia, cap. 52, v. 14 : *Inglorius erit inter viros aspectus ejus*, et c. 53, v. 2 et 3 : *Non est species ei, neque decor*, etc., hæc testimonia de tempore passionis Christi intelligenda sunt, non de tempore ejus vitæ mortalis. Nihil igitur nec de Christi deformitate, nec de ejus formæ venustate ex Scripturis colligi potest.

De hoc etiam argumento variæ sunt opiniones SS. Patrum. Nam Tertullianus, lib. de Carne Christi, cap. 9, S. Clemens Alex. lib. 5 *Pedagogi*, cap. 1, et lib. 6 *Stromatum*, pag. 496, Origenes, lib. 6 contra Celsum, S. Cyril. Alex. Glaphyrorum in Exodum lib. 1, t. 1, pag. 250, Christo elegantem et decoram speciem non attribuunt. Contra verò S. Joannes Chrys. Hom. 28 in Matth., ait Christum fuisse visu gratiosissimum, et S. Hieronymus, in caput 22 S. Matth. docet *igneum quiddam atque sidereum radiasse ex oculis Christi, et Divinitatis majestatem luxisse in ejus facie*. Similia habet

in cap. 9 S. Matth. et in Epist. ad Principiam.

Probatur secunda pars, nempe Christum eâ fuisse vultûs et corporis specie quæ nec pulchritudine nimîa oculos attraheret, nec turpi offenderet deformitate. 1^o Enim hæc fuisse videtur sententia Origenis laudato lib. 6 contra Celsum, ubi ait Christum *nec suprà modum decorâ specie, nec excellenti pulchritudine fuisse*. Et ad eundem sensum inflecti possunt S. Clemens Alex., lib. 6 Stromatum, pag. 496, S. Cyril. Alex., loco suprà citato. 2^o Non decuisset ut corpus Christi utpote speciali Spiritûs sancti operatione conformatum, insigniter esset deforme, seu defectu proportionis membrorum, seu vilitate et turpitudine vultûs. Pariter finibus Incarnationis consentaneum non fuisset Christum eo decore ac vultûs venustate donari quæ in admirationem homines rapuisset. Nam Christus venerat ut contemptum rerum sensibilibus animis nostris instillaret. Hinc, ut notat S. Cyrillus Alex., Giaphyr. in Exod. 4, *carnis gloriationes nemo adscripserit Christo, neque in gloriam ipsius censuerit*. Ergo origini, conditioni et muniis Christi dùm in terris conversatus est, valdè fuit accommodatum ut mediocri et communi esset specie et conformatione; proindeque, etc.

Dissertatio x.

DE VARIIS CHRISTI TITULIS ET OFFICIIS.

Agitur hic de pluribus aliis consequentibus incarnationem Christi; nempe, de ejus sacerdotio, mediatione, et intercessionem, tum de ipso ut capite Ecclesiæ, atque utrum dici possit servus, et Filius Dei adoptivus.

CAPUT PRIMUM.

An et quomodò Christus sacerdos fuerit?

Naturam sacerdotii ac præcipua sacerdotum munera describit sanctus Paulus in Epistolâ suâ ad Hebræos, cap. 5, v. 4, his verbis: *Omnis pontifex ex hominibus assumptus pro hominibus constituitur in iis quæ sunt ad Deum, ut offerat dona et sacrificia pro peccatis*. Et c. 8, v. 3: *Omnis pontifex ad offerendum munera et hostias constituitur*. Sacerdos igitur verè et propriè ille dicitur, qui auctoritate legitimâ ad offerendum Deo pro hominibus sacrificium propriè dictum deputatus est. Ad sacerdotem quidem attinet ex Scripturis, ut Dei legem doceat, ut preces populi ad Deum perferat, at-

que ipse pro eo deprecetur et oret; sed præcipuum ejus munus quo propriè constituitur sacerdos, in oblatione sacrificii propriè dicti est positum. Sacrificium autem propriè dictum, est oblatio alicujus rei sensibilis à legitimo ministro Deo facta, cum hujusce rei immutatione. His præmissis, sit

CONCLUSIO I. Christus fuit verè et propriè sacerdos. Probatur 1^o ex Scripturis: Psal. 109, v. 4, hæc leguntur: *Tu es sacerdos in æternum secundum ordinem Melchisedech*; quæ de Christo esse dicta tum hujusce Psalmi contextus, tum auctoritas Apostoli illa verba Hebr. 5, v. 6 et 10, et cap. 7, v. 17, Christo applicantis, indubitatum faciunt. Hebr. v. 4, 14: *Habentes ergo pontificem magnum, qui penetravit cælos, teneamus confessionem*. Ibid. 5, v. 4, 4 et 5: *Omnis pontifex ex hominibus assumptus, pro hominibus constituitur in iis quæ sunt ad Deum, ut offerat dona et sacrificia pro peccatis... nec quisquam sumit sibi honorem, sed qui vocatus est à Deo tanquàm Aaron*. Sic et Christus non semetipsum clarificavit ut pontifex fieret; sed qui locutus est ad eum: *Filius meus es tu, ego hodiè genui te*. Vide etiam versus sequentes, tum caput 7, v. 11 et 26, cap. 8, v. 4, cap. 9, v. 11, 12, 26, cap. 10, v. 11, 12, 21.

Probatur 2^o ex traditione, ejus innumera in hanc rem facilè proferri possent instrumenta. Sufficiat unum S. Polycarpi Smyrnensis episcopi et Apostolorum discipuli testimonium ex oratione quam, martyrio vitam finiens fudit, desumptum. *De omnibus, inquebat, Patrem divinum alloquens, te laudo, te benedico, te glorifico per sempiternum pontificem Jesum Christum unigenitum tuum, per quem tibi unâ cum ipso in Spiritu sancto gloria nunc et in secula seculorum, amen*.

Probatur 3^o manifestâ ratione theologicâ. Ille enim verè et propriè est sacerdos, qui divinâ auctoritate in sacerdotem electus, omnia sacerdotii munia exercuit; atqui 1^o Christus in sacerdotem à Deo electus est; *Christus non semetipsum clarificavit ut pontifex fieret*; inquit Apostolus, Hebr. 5, v. 6; *sed qui locutus est ad eum: Filius meus es tu, ego hodiè genui te*. Et cap. 7, v. 20, observat idem Apostolus Christum cum jurejurando fuisse constitutum à Deo sacerdotem secundum ordinem Melchisedech. *Hic (Christus) autem, inquit, cum jurejurando (sacerdos factus est) per eum, qui dixit ad illum: Juravit Dominus, et non pœnitebit eum; tu es sacerdos in æternum*. Idem rursus habetur versu ultimo. 2^o Christus omnia sacerdotii mu-

nia implevit. Cœlestem enim et saluberrimam nobis doctrinam tradidit, ut ex toto Evangelio manifestum est; hominum preces ad Patrem pertulit, et pro iis orationes fudit, vide Joan. cap. 17, Hebr. 5, v. 7, etc. Denique pro nobis seipsum in victimam moriendo obtulit, Hebr. 10, v. 10, 12, 14, etc., *et semper vivens ad interpellandum pro nobis*, ut loquitur Apostolus, ibid. 7, v. 25, *èd quòd (versu 24) maneat in æternum, sempiternum habet sacerdotium*.

CONCLUSIO II. Christus ut homo, non verò ut Deus fuit sacerdos.

Probatur 1° his Apostoli verbis, Hebr. 4, v. 14 et 15 : *Habentes ergo pontificem magnum... Jesum filium Dei; teneamus confessionem. Non enim habemus pontificem, qui non possit compati infirmitatibus nostris; tentatum autem per omnia pro similitudine, absque peccato*. His clarè significatur Christum esse pontificem sub eo respectu sub quo potest compati infirmitatibus nostris, quòd per omnia tentatus fuerit absque peccato; atqui Christus tantum ut homo non ut Deus ideò potest compati infirmitatibus nostris, quòd tentatus fuerit per omnia, absque peccato; ergo, etc.

Probatur 2°, quia secundum eundem Apostolum, Christus ut sacerdos, semetipsum in victimam obtulit. *Talis enim decebat* inquit ibid. cap. 7, v. 26 et 27, *ut nobis esset pontifex... qui non habet necessitatem quotidie, quemadmodum sacerdotes, prius pro suis delictis hostias offerre, deinde pro populi; hoc enim fecit semel, seipsum offerendo*. Vide c. 9, v. 11, 12, 25, 26, et c. 10, v. 11, etc. Atqui Christus tantum ut homo, non ut Deus potuit seipsum pro nobis in victimam offerre; ergo, etc.

Probatur 3°, ratione theologicâ. Sacerdos ut sacerdos, seu quatenus offert victimam, inferior sit Deo cui victima offertur, necesse est; atqui Christus ut Deus non est inferior Deo, sed tantum ut homo; ergo, etc.

Dices : Christus ut homo fuit victima pro peccato; ergo non potuit ut homo esse sacerdos; alioqui fuisset sacerdos simul et victima, quod repugnat; quippe cum sacerdos victimam immolare seu destruere debeat; Christus autem sese non immolaverit seu occiderit; ergo, etc. Nego consequentiam. Ad primam probationem, nego repugnare Christum fuisse simul sacerdotem et victimam. Victima fuit pro nobis quatenus in arâ crucis loco nostro necatus est; sacerdos verò extitit quatenus ad satisfaciendum pro nobis, se ab impiis necari con-

sensit, ac mortis suæ pretium ut nos redimeret obtulit.

Ad secundam probationem, distingo : Christus non sese immolavit physicè, concedo; moraliter, quatenus liberè voluit vulnerari, occidi, permisitque ut ex plagis sibi inflictis mors consequeretur; nego. Necesse non est sacerdotem influere physicè in destructionem victimæ quam offert, sufficit si in ejusmodi destructionem influat moraliter.

CONCLUSIO III. Christus eatenus fuit sacerdos, quatenus divinâ voluntate ad sacrificium pro hominibus offerendum deputatus est.

Probatur, quia Christus ut homo suâ auctoritate seipsum non potuisset constituere sacerdotem ut sese in victimam pro reconciliandis hominibus offerret, siquidem ut supra dictum est, satisfactiones ejus, etsi valoris infiniti, eatenus tamen indiguerunt acceptione, quatenus Deus 1° liberè consensit ut ipse loco nostro satisfaceret; 2° statuit modum quo sibi vellet satisfieri. Multò minùs autem ab hominibus Christus sacerdotem constitui potuit; ergo à Deo solo sacerdotii honorem accepit. Quod etiam non semel disertè in Scripturis docetur, præsertim jam laudato capite 5 Epistolæ ad Hebræos, v. 4 et seq. : *Nec quisquam sumit sibi honorem, sed qui vocatur à Deo tanquam Aaron. Sic et Christus non semetipsum clarificavit ut Pontifex fieret; sed qui locutus est ad eum: Filium meus es tu, ego hodiè genui te. Quemadmodum et in alio loco dicit : Tu es sacerdos in æternum secundum ordinem Melchisedech*.

CONCLUSIO IV. Sacrificium Christi fuit latreuticum, eucharisticum, et impetratorium respectu tum Christi tum hominum; fuit etiam propitiatorium, sed respectu hominum duntaxat.

Probatur. Sacrificium Christi fuit 1° latreuticum, siquidem tum respectu Christi ut hominis, tum respectu nostri, fuit protestatio supremi Domini Dei, et perfectæ erga ipsum subjectionis. 2° Fuit eucharisticum, quia suo sacrificio Christus de collatis seu sibi seu hominibus beneficiis et donis gratias egit. 3° Fuit impetratorium, eo enim Christus nobis salutem promeruit et media ad illam conducentia : sibi verò, ut alibi diximus, meritis est gloriam corporis, nominis exaltationem, etc. 4° Fuit denique propitiatorium respectu nostri, cum, illud offerendo, Christus factus fuerit *propitiatio* pro peccatis nostris, atque ut ea nobis condonarentur obtinuerit. Verum non potuit respectu Christi esse propitiatorium, quando-

quidem ab omni peccato Christus naturâ erat immunis.

CONCLUSIO V. Christus non fuit sacerdos secundum ordinem Aaron, sed secundum ordinem Melchisedech.

Probatur 1^o, tum auctoritate Apostoli utrumque ex professo adstruentis capite 7 Epistolæ ad Hebræos; tum ex Psalmo 109, ubi Christus prædicatur futurus *sacerdos secundum ordinem Melchisedech*. Probatur 2^o, quia sacerdos secundum ordinem Aaron debuit esse ex tribu Levi, ut ex institutione sacerdotii veteris, Exod. c. 28 et 29, exploratum est. Atqui, inquit Apostolus, loco mox citato, v. 14 : *Manifestum est quòd ex Judâ ortus sit Dominus noster; in quâ tribu nihil de sacerdotibus Moyses locutus est;* ergo Christus non fuit sacerdos secundum ordinem Aaron.

Jam verò si Christus non fuerit sacerdos secundum ordinem Aaron, superest ut fuerit sacerdos secundum ordinem Melchisedech, maxime propter analogiam inter sacerdotium ejus et sacerdotium Melchisedech. Nam 1^o, ut observat Apostolus, loco mox laudato, nomen Melchisedech, idem est, ac rex justitiæ. 2^o Melchisedech, Genes. 14, dicitur rex Salem, quod significat regem pacis. 3^o Sacerdotium Melchisedech jure nativitatis non legitur acceptum, nec secundum ordinem generationis carnalis ad successores transmissum; imò nulla fit in Scripturis mentio nec patris, nec matris, nec genealogiæ Melchisedech. 4^o Neque etiam nativitas aut mors Melchisedech in Scripturis memorantur. 5^o Melchisedech legitur sumpsisse decimas ab Abrahamo, ex quo egressus est ipse Levi cui aliæ tribus decimas solvebant. 6^o Denique legitur ipsi etiam Abrahamo benedixisse, ac proinde ei superior extitisse. Verum de omnibus hisce Melchisedech characteribus, ipsum audiamus disserentem Apostolum. « Hic, » inquit capite laudato, v. 1 et sequentibus, « Melchisedech rex Salem, sacerdos Dei summi » qui obviavit Abrahamæ..... et benedixit ei, cui « et decimas oranium divisit Abraham; primùm » quidem qui interpretatur rex justitiæ; deinde « autem et rex Salem, quod est rex pacis, sine » patre, sine matre, sine genealogiâ, neque « initium dierum, neque finem vitæ habens, » assimilatus autem Filio Dei, manet sacerdos « in perpetuum, intuemini autem quantus sit » hic, cui et decimas dedit de præcipuis Abraham patriarcha..... Cujus..... generatio non « annumeratur in eis (filiis Levi), decimas » sumpsit ab Abraham, et hunc qui habebat

« repromissiones benedixit. Sine ullâ autem » contradictione, quod minus est, à meliore » benedicatur. » Hæc Apostolus. Ex quibus liquet Melchisedech fuisse figuram maximè idoneam Christi Domini supremi sacerdotis, qui verè est rex justitiæ et rex pacis, qui sacerdotium habet longè præstantius levitico, qui illud à Deo non à carnali successione accepit, qui *eò quòd vivat in æternum, sempiternum habet sacerdotium*, qui ipsius Abrahamæ Dominus est, ipsique benedixit, seu sanctificationis et salutis ejus causas attulit; ergo, etc. Alia est adhuc similitudo maxima Christum inter et Melchisedech, quam Apostolus loco allato prætermisit, quia ad scopum ejus non attinebat. Hæc in eo consistit quòd Melchisedech sacrificium panis et vini obtulerit, sub quorum speciebus sacrificium corporis et sanguinis sui incruentum nomine suo in Ecclesiâ à sacerdotibus novæ legis offerri Christus Dominus instituit.

CONCLUSIO ULTIMA. Christi sacerdotium æternum est. Probatur ex Apostolo qui laudato capite 7 Epistolæ ad Hebræos hoc dogma sic inculcat et exponit : « Alii quidem plures » facti sunt sacerdotes, idcirco quòd morte » prohiberentur permanere; hic autem eò » quòd maneat in æternum, sempiternum habet sacerdotium. Unde et salvare in perpetuum potest accedentes per semetipsum ad Deum; semper vivens ad interpellandum pro nobis. Talis enim decebat ut nobis esset pontifex, sanctus, innocens, impollutus, segregatus à peccatoribus, et excelsior cælis » factus; qui non habet necessitatem quotidie, » quemadmodum sacerdotes, prius pro suis » delictis hostias offerre, deinde pro populi, » hoc enim fecit semel, seipsum offerendo; » capit. 9, v. 24 et seqq.: « Jesus introivit... in » ipsum cælum ut appareat nunc vultui Dei » pro nobis; neque (necesse est) ut sæpè » offerat semetipsum, quemadmodum pontifex » intrat in sancta per singulos annos in sanguine alieno: alioquin oportebat eum frequenter pati ab origine mundi; nunc autem » semel in consummatione seculorum ad destitutionem peccati per hostiam suam apparuit.... semel oblatus est ad multorum » exhaurienda peccata. » Et capite 10, v. 12 et 14 : « Hic (Christus) unam pro peccatis » offerens hostiam, in sempiternum sedet in » dexterâ Dei.... Unâ enim ablatione consummavit in sempiternum sanctificatos. » Ex his patet sempiternum esse sacerdotium Christi, quòd semper ipse vivens, virtutem sacrificii

cruenti quòd semel in cruce obtulit, quodque unâ vice offerri satis erat, perpetuò exhibeat Deo *interpellans pro nobis*, et *apparens vultui Dei pro nobis*. Nempe, ut canit Ecclesia Parisiensis in prosâ dici Ascensionis Domini: *Patri monstrat assiduè, quæ dura tulit vulnera: Et sic pacis perpetuæ nobis exorat fœdera*. Nec dicas inde minui vim sacrificii à Christo semel in cruce oblatis. Siquidem omnis valor intercessionis et oblationis Christi in cœlis ex sacrificio virtutis infinitæ quod semel in arâ crucis obtulit, derivatur. Et reverà, quidquid Christus in vitâ suâ mortali egit, quidquid moriendo exhibuit, quidquid ubicumque præsens est, seu in cœlis, seu in ipso altaris sacramento in quo aliâ ratione existit, præstat, illud habendum est ut continuatio unius intercessionis, uniusque obedientiæ et sacrificii quod vivens auspicatus est, moriens consummavit, quodque redivivus, in cœlis et in mysteriis jugiter renovat, ut ejus virtutem nobis perpetuò applicet.

CAPUT II.

Utrum Christus sit pro nobis mediator et intercessor, et quomodò?

CONCLUSIO I. Christus Dei et hominum perfectus mediator est. Probatur 1^o ex Apostolo, 1 ad Timot. 1, v. 5: *Unus enim Deus, unus et mediator Dei et hominum homo Christus Jesus; qui dedit semetipsum redemptionem pro omnibus*. Probatur 2^o, quia omnibus perfecti mediatoris officiis functus est Christus Dominus. 1^o Enim Deum inter et homines interpret fuit et inter-nuntius, unde Malach. 3 dicitur *Angelus testamenti*. 2^o Arbitri partes egit, si quidem Deum nobis reddidit propitium, obtinuitque ut cum hominibus, si certas condiciones implerent, non secundum omnem justitiæ rigorem ageret. 3^o Apud Deum intercessit, oravit enim pro hominibus dum degebat in terris, et etiamnum in cœlis orat, ut modò dicemus. 4^o Quod homines non poterant solvere, sponsor eorum factus, ipse persolvit, seipsum in redemptionem pro nobis offerens, ut nos liberaret, et pro nobis satisfaceret; ergo, quæcumque ad perfecti mediatoris munus attinent, Christus executus est, proindeque, etc.

CONCLUSIO II. Christus est hominum mediator quatenus homo Deus, ita tamen ut omnia mediatoris munia quatenus homo impleverit. Probatur. Nam Christus solum ut Deus, non potuit esse mediator, siquidem per naturam divinam non potuit exercere mediatoris functiones. Neque etiam ut homo tantum et solâ

suâ naturâ humanâ potuit esse mediator; impar enim fuit ejusmodi natura ad eum actionibus Christi valorem tribuendum qui exhibendæ Deo satisfactioni et vicibus mediatoris exercendis necessarius erat. Superest igitur Christum, quatenus Hominem-Deum, fuisse mediatorem; ita tamen ut per naturam humanam omnes actus ad mediatoris munia pertinentes elicuerit; solusque iis necessarius valor à Deo Verbo, ut alibi explicatum est, in illas operationes dimanaverit.

CONCLUSIO III. Christus etiamnum pro nobis orat in cœlis. Probatur 1^o ex Scripturis, Rom. 8, v. 34: *Christus Jesus.... qui est ad dexteram Dei, qui etiam interpellat pro nobis*. Hebr. 7, v. 25: *Salvare in perpetuum potest* (Christus) *accedentes per semetipsum ad Deum, semper vivens ad interpellandum pro nobis*. Ibid. cap. 9, v. 24: *Jesus introivit.... in ipsum cœlum, ut appareat nunc vultui Dei pro nobis*. 1 Joan. 2, v. 1 et 2: *Si quis peccaverit, advocatum habemus apud Patrem, Jesum Christum justum; et ipse est propitiatio pro peccatis nostris*. Probatur 2^o ratione theologicâ. Nullum dubium esse potest quin Christus ut homo etiamnum velit bona hominibus, pro quibus *animam suam posuit*; atqui planum est ejusmodi desideria sanctæ humanitatis Christi esse totidem orationes; ergo, etc.

Non meretur autem Christus ejusmodi orationibus quia non est in statu viæ. Idcirco porrò eum non precamur ut pro nobis oret, sed ut misereatur nostri, quia ad ipsum preces nostras secundum eum respectum dirigimus, sub quo majorem excellentiam et perfectionem habet.

CAPUT III.

An et quomodò Christus sit Ecclesiæ et Angelorum caput?

CONCLUSIO I. Christus est caput Ecclesiæ seu fidelium cœtus. Probatur 1^o ex Scripturis. Ephes. 1, v. 22 et 23: *Ipsium (Christum Deum) dedit caput supra omnem Ecclesiam, quæ est corpus ipsius, et plenitudo ejus qui omnia in omnibus adimpletur*. Ibid. 5, v. 23: *Christus caput est Ecclesiæ; ipse salvator corporis ejus*. Coloss. 1, v. 18: *Ipse (Christus) est caput corporis Ecclesiæ, qui est principium, primogenitus ex mortuis; ut sit in omnibus ipse primatum tenens*. Probatur 2^o ex ratione theologicâ. In tribus consistit capitis morales genuina et perfecta notio, quòd nempe is qui aliorum caput dicitur, illis sit conjunctus, hos dignitate et potestate supereminet, et ipsis communicet vitam seu bona eorum conditioni necessaria. Atqui Christus 1^o

est conjunctus Ecclesiæ, quippe quæ cum ut regem suum, Deum suum et servatorem agnoscit, quamque ipse ut sponsam dilectam quam sanguine suo acquisivit, et ut corpus suum mysticum habet. 2^o Christus utpote Filius Dei unigenitus incarnatus, fideles dignitate et potestate infinitè superat, atque etiam ut homo omnem potestatem in cælo et in terrâ accipit, et in nomine ejus omne genu flectendum est, cælestium, terrestrium et infernorum. 3^o Bona necessaria ac vitam fidelibus communicat, siquidem ab eo media saluti necessaria, justificatio et salus ut à causâ meritoriâ in fideles derivantur. *De plenitudine ejus*, inquit S. Joan. cap. 1, v. 16, *nos omnes accepimus*; et ut habet Apostolus, Eph. 4, v. 15 et 16, *necesse est ut crescamus in illo per omnia, qui est caput Christus; ex quo totum corpus compactum et connexum per omnem juncturam subministrationis, secundum operationem uniuscujusque membri, augmentum corporis facit in ædificationem suâ in charitate.*

CONCLUSIO II. Christus ut homo, Angelorum etiam dicendum est caput. Probatur 1^o ex Scripturis. Ephes. 1, v. 20 et seq. : *Operatus est (Deus virtutem) in Christo suscitans illum à mortuis, et constituens ad dexteram suam in cælestibus, supra omnem principatum, et potestatem, et virtutem, et dominationem; et omne nomen quod nominatur non solum in hoc seculo, sed etiam in futuro. Et omnia subjecit sub pedibus ejus.* Et Coloss. 2, v. 10, Christus conceptis verbis dicitur *Caput omnis principatus et potestatis*. Probatur 2^o, quia cum Christus dignitate et potestate Angelos antecellat, cum fide constet Angelos ipsi submitti, et cultum ei debitum impendere, Philip. 2, v. 6, Hebr. 1, v. 6, etc.; cum denique Christus Dominus Angelis gratias saltem secundarias meruerit, ut capite I hujus Disputationis advertimus, et ex Eph. 5, v. 10, et ex pluribus Patribus habetur, planum est ipsi competere quæcumque capiti Angelorum constituendo necessaria sunt; ergo, etc.

Quæres an dona quæ Christus fidelibus ut eorum caput communicat, ab eo oriantur ut à causâ physicâ, vel ut à causâ morali? Respondeo de fide esse Christum esse causam moralem et meritoriam omnium gratiarum et donorum quæ in ordine ad finem Incarnationis consequendum, hominibus largiuntur, vel etiam ante Christum natum concessæ sunt. An verò sancta Christi humanitas non tantum quamdiu in terris extitit, sed etiamnum in cœlis phy-

sico et verè activo influxu gratias distribuat et conferat, quæstio est relicta scholarum disputationi. Scotistæ, quos sequitur Vasquez, contendunt Christum esse duntaxat moralem gratiarum causam. Thomistæ vulgò sentiunt eum esse causam physicam saltem gratiarum quas Deus à peractâ Incarnatione largitur, ita Gonetus. Quidam, referente eodem Goneto, voluerunt etiam gratias ante Incarnationem collatas, ortum à Christo ut à causâ physicâ duxisse. Malebranchius, in tractatu de naturâ et gratiâ, in colloquiis de relig. et metaphysicâ, et aliis in locis, censet Christum esse causam occasionalem distributionis gratiæ; in cujus systemate illud præsertim respuendum videtur, quòd velit ex hujuscemodi causæ occasionalis limitatione, seu ex eo quòd anima Christi necessariò sit finita et limitata, repetendam esse præcipuam rationem cur Deus secundum vias generales agens, tot concedat hominibus gratias quibus prævidit eos non esse consensuros.

De eâ quæstione idem dicemus quod supra docuimus de potestate Christi in miraculis patrandis. Si causas secundas extra se physicè agere non repugnat, non video cur animæ Christi quæ per contactum non agit ut corpora, negaretur potestas physica conferendi et distribuendi gratias quas Deus ut causa efficiens prima ab Incarnatione peractâ confert. Etenim, in systemate activitatis veræ et physicæ causis secundis attribuendæ, quid obstaret quominus anima Christi ad illud activitatis et potentiæ genus respectu gratiarum conferendarum et distribuendarum elevaretur? ergo, etc.

CAPUT IV.

An Christus possit dici Dei servus.

Nomen servi propriè acceptum duplici modo, strictè scilicet et latè sumi potest. Strictè servus est persona non ingenua, quæ alieni juris est, non sui, quæque nullum per se jus habet ad domini hæreditatem. Servus latiori, sed propriâ tamen significatione, ille est qui alterius voluntati est subjectus, et ipsi in omnibus obtemperare debet.

CONCLUSIO. Christus proprio, sed latiori sensu servus Dei dicendus est, non verò strictâ significatione. Probatur prima pars, 1^o ex Scripturis, in quibus sæpè Christus servus Dei nuncupatur. Vide Isaïæ 42, v. 1 : *Ecce servus meus, suscipiam eum.* Quæ verba ad Christum applicat S. Matth. 12, v. 28; rursus Isaïæ 49, v. 5, et cap. 53, v. 11, Act. Apost. 13, v. 47.

2° Ex iis ipsis Patribus qui contra Arianos vel contra Felicem et Elipandum pugnârunt, SS. Athanas., Oratione 2, olim 3, contra Arianos, S. Greg. Naz. Orat. 36, S. Greg. Nyss. Opusculo de Fide, ad Simplicium, S. Ambr. lib. 5 de Fide, et in Epist. ad Sabinum, Eucherius et Beatus hic presbyter, alter episcopus Hispani contra Elipandum, etc. 3° Ratione theologicâ. Nam Christus ut homo in Scripturis dicitur obediens, subjectus divinæ voluntati; atqui pari ratione dicendus est servus in eâ significatione de quâ nunc agimus; ergo, etc.

Probatur secunda pars, nempe Christum non posse dici servum stricto sensu. Nam servus stricto sensu est persona non ingenua, alieni juris, et ad hæreditatem nullum per se jus habens; atqui hujusmodi persona non est Christus ut homo, qui contra Filius est naturalis, et ad hæreditatem naturâ habet jus, ut docet fides. Hinc Apost. Hebr. 1, quantum Christus Angelis præcellat ostendens, observat eum esse Filium Dei, Angelos verò duntaxat servos in ministerium missos. Hinc plurimi à S. Patribus simpliciter pronuntiârunt Christum nullo pacto servum appellari posse, licet acceperit formam servi, id est naturam humanam quæ per se serva est. Ita sanctus Dionysius Alexandrin., in Epistolâ ad Paulum Samosatenum, et in Responsione ad quæstionem 7 ejusdem; Theodoretus, Dialogo 2 contra Apoll., et in Refutatione anathematismi 6; S. Joan. Damasc., lib. 3 de Fide Orthod., cap. 21; Adrianus I., in Epistolâ ad episcopos hispanos; concilium Francofordiense, in Synodicâ, Alcuinus, lib. 5, etc., qui omnes nomen servi secundum strictam et in jure usitatam significationem urgentes, meritò censuerunt Christum, utpote Filium naturalem, nequaquam dicendum esse servum.

CAPUT V.

Utrum Christus ut homo, sit Filius Dei naturalis, ita ut dici nequeat filius adoptionis.

Filius naturalis ille dicitur, qui verè genitus est ab eo cujus appellatur filius, quique proinde vi nativitatis suæ in hæreditatem naturale jus habet. Filius verò adoptivus est persona extranea, id est, à patre adoptante non genita, quam ex benevolentia ille in filium suscipit, ut ei jus in hæreditatem suam benignè impertiat. *Adoptivus*, inquit Paulinus Aquileiensis in libro *Sacro-Syllabo*, quem synodus Francofordiensis approbavit, *dici non potest nisi is qui alienus est*

ab eo à quo dicitur adoptatus, et gratis ei adoptio tribuitur. Quoniam non ex debito, sed ex indulgentiâ tantummodò adoptio præstatur. Fide constat Deo Patri esse Filium naturalem, ejusdem secum naturæ et substantiæ, nempe Verbum divinum, secundam SS. Trinitatis personam; cujus generatio, ut nec mente attingi, nec sermone explicari potest, ita vera est, propriè dicta et omnis imperfectionis expers. Pariter constat esse Deo filios adoptivos, nempe homines justos, qui hoc nomine sæpè insigniuntur in Scripturis. Rom. 8, v. 15: *Accepistis spiritum adoptionis filiorum, in quo clamamus, Abba, Pater*; Galat. 4, v. 5, *ut adoptionem filiorum reciperemus*; Ephes. 1, v. 5: *Qui prædestinavit nos in adoptionem filiorum*; 1 Joan. 3, v. 1: *Videte qualem charitatem dedit nobis Pater, ut filii Dei nominemur et simus*; et alibi sæpè. Inter adoptionem autem quæ fit à Deo, et eam quæ fit ab homine, triplex maximè notandum est discrimen, 1° quem Deus adoptat, ab eo ortus est, non quidem per generationem, sed per creationem; quem homo adoptat ab eo nec genitus est, nec effectus; 2° Deus non tantum volendo adoptat, sed etiam in eo quem eligit, aliquid physici efficiendo, quo filius adoptivus formaliter adoptatus constituitur; gratiam enim sanctificantem in eo producit quæ est adoptionis divinæ forma. Homo adoptans nihil physici confert, quo adoptio constituitur. 3° Hæreditas filiis Dei adoptivis promissa, hujus naturæ est, ut possit ab omnibus sine divisione haberi quin ideirò à Deo possideri desinat; Dei enim ipsius est cognitio et amor; hinc justis possunt esse Dei hæredes, etiamsi Deus æternum vivat. Hæreditas verò hominis adoptantis, utpote in bonis finitis sita, non potest simul à pluribus sine divisione indivisim haberi, proindeque nonnisi post mortem adoptantis, potest adoptivus jus illud exercere, quod in ejus hæreditatem sibi adoptione concessum est.

De fide etiam est, ut ex statutis contra Nestorium Dissert. 4, cap. 2, art. 2, liquet, unicam esse in Christo personam, nempe personam Verbi Dei, quia physicè et hypostaticè seu personaliter ipsi unita est humanitas quam assumpsit. Quæ quidem persona cum juxta fidem, naturalissit Filius Dei, sequitur secundum eandem fidem Christum hominem appellandum esse Filium Dei naturalem, atque, saltem vi communicationis idiomatum, demonstrato Christo dicendum esse: *Hic homo est Filius Dei naturalis*; quod idem sonat ac: *Persona quæ*

habet hanc humanitatem est Filius Dei naturalis.

Quæstio præsens ad Christum ut hominem attinet, an scilicet etiam sub eo respectu dicendus sit Filius Dei naturalis, an verò adoptivus dici debeat, aut saltem possit.

Eâ de re versùs octavi seculi finem duo erravêre Hispani præsules, Felix et Elipandus, hic Toleti, ille Orgellis, vel ut alii leguntur, Urgellæ episcopus. « Ii, inquit Petavius lib. 4 de Incarn. cap. 22, n. 1, Christum Deum hominemque confessi, totidem quot naturæ sunt, in eo filios esse docuerunt, alterum naturalem qui est Deus et Verbum; alterum adoptivum qui est homo. » Is error, qui postea ampliùs erit exponendus, appellari solet hæresis Felicianâ, à mox memorato Felice Urgellensi qui ejus auctor extitit. Namque, ut narrat Eginhardus ad ann. 792: « Felix...., ab Elipando Toleti episcopo, per litteras consultus, quid de humanitate Salvatoris Dei et Domini nostri J. C. sentire deberet, utrum secundùm quod homo est, proprius, an adoptivus filii Deus credendus esse ac dicendus; valdè incautè atque inconsideratè contra antiquam catholicæ Ecclesiæ doctrinam, adoptivum non solàm pronuntiavit, sed etiam scriptis ad memoratum episcopum libris pertinacissimè pravitatem opinionis suæ defendere curavit. »

In disquisitionem adducta et proscripta fuit ea hæresis in pluribus conciliis, 1° in synodo Foro Juliensi anno 791, in quâ præside Paulino, Aquileiensi patriarchâ, definitum est, tacitis tamen Felicis et Elipandi nominibus, Christum esse proprium Dei Filium, non adoptivum; atque duos in eo non esse filios; 2° in synodo Ratisbonæ habitâ anno 792, ubi coram Carolo Magnò qui eâ in urbe hiemaverat, erroris convictus est Felix. Hic verò inde Romam ad summum pontificem ductus, ibi præsentè Adriano Sedem S. Petri tunc occupante, suam ipse hæresim condemnavit et ejuravit. 3° In concilio Francofordiensi, quod biennio post, nempe anno 794, Carolus Magnus, ad quem Elipandus erroris sui tuendi causâ scripserat, contra eum necnon contra Felicem qui ad vomitum redierat, ex omnibus ditionis suæ provinciis congregari curavit. Celebris et numerosa extitit illa synodus, etsi ejus acta diù latuerint, donec à Surio, anno 1567, in utilitatem publicam ederentur. Ei præfuit romanus pontifex per legatos suos, Theophylactum et Stephanum episcopos, eidem Carolus Magnus voluit interesse. Epistola Elipandi ad Carolum regem,

Epistola Adriani ad Gallæciæ et Hispaniarum episcopos, et liber Sacrosyllabus Paulini Aquileiensis medio in concilio lecta sunt. Tum Patres unanimi consensu hæresim Felicianam proscripsêre. Felicem quoque anathemate percusserunt; qui Lugdunum in perpetuum amandatus, ibi, teste Adone in chronico, pertinax in hæresi vitam finivit. Fervidus ejusdem erroris sectator Elipandus, magistri sui obstinationem non imitatus est et catholicus obiit.

Adversùs duos præsules Hispanos pro fide catholicâ scriptis certârunt complures eruditi, inprimis Paulinus Aquileiensis qui præter laudatum librum Sacrosyllabum alios plures libros in Felicem et Elipandum vulgavit; Flaccus Albinus Alcuinus, qui occasione hujusce hæreseos è Britannîâ à Carolo Magno accersitus, ipsi semper charissimus extitit; Etherius, episcopus Uxamensis, et Beatus Presbyter ambo Hispani; Agobardus, Lugdunensis episcopus, etc., quorum opera eâ de re etiamnum habentur.

Jam verò cùm in exponendâ Felicis et Elipandi mente et in assignando dogmate contra eos à synodo Francofordiensi definito theologi non sint unanimes, cùm præterea in explicandâ naturali Christi ut hominis filiatione non nihil dissentiant, tria videntur hic sigillatim investiganda. Primum ad quæstionem facti spectat, quid nempesenserint duo Hispani præsules, an in eos ab Ecclesiâ statutum fuerit Christum ut hominem nullo sensu dici posse filium adoptivum. Secundum quæstionem juris complectitur, utrum scilicet Christus ut homo sit Filius Dei naturalis, adeò ut nullâ ratione in ipsum quadret adoptivi filii Dei nuncupatio. Tertium ad jus quoque attinet, quo nempe sensu intelligi debeat Christum ut hominem esse Filium Dei naturalem.

ARTICULUS PRIMUS.

*De genuinâ Felicis et Elipandi circa Christi filietatem sentiendi, et de errore in eis proscrip-
pto.*

Suarez, disput. 49 de Incarn. sect. 5, post Surium Valentiam quæst. 20, Baronium ad ann. 783 et 794, et alios complures quos laudat, à Felice et Elipando opinatur Christum in duas personas duosque filios divisum fuisse, quorum unus, nempe Deus Verbum, esset Dei Filius naturalis, alter videlicet hic homo, non esset naturalis Filius Dei, sed adoptivus tantùm. « Existimo, inquit, Felicianam hæresim in hoc

positam fuisse, quòd credidit, Christum hominem eodem proasus modo fuisse filium adoptivum, quo sunt alii homines justì; ita quamvis in eo filiationis genere singularem habuerit excellentiam et dignitatem, non tamen transcenderit illud genus adoptionis quo nos per gratiam adoptamur, neque aliter homo ille Christus fuerit conjunctus Filio Dei naturali, quàm hoc genere adoptionis. » Nihil aliud idem theologus ab Adriano pontifice et à concilio Francofordiensi condemnatum existimat, quàm ejusmodi dogma, à Nestoriano reverà ne latum unguem distans, nisi penès aliquem loquendi modum. Ut verò suam hanc sententiam confirmet Suarez, observat à quibusdam theologis dictum esse Christum ut hominem posse secundum humanitatem filium adoptivum dici, imò id assertivè à Durando positum, nec tamen eis fuisse idcirco notam erroris inustam. Deinde multa profert tum concilii, tum Adriani, tum aliorum eà de re scriptorum testimonia, quibus id sibi videtur efficere quod contendit. Suarez sequitur Frassenius ac ferè contrahit dissert. 2, art. 2, sect. 1, quæst. 2, p. 158 et sequentibus. Opinionem hanc falsam omninò esse pronuntiat Vasquesius, disput. 89, c. 6 et 8, eique è diametro oppositam sententiam invexit quam plures amplexi sunt, nempe hanc propositionem: Christus ut homo etiam reduplicativè, et secundum humanitatem, est filius adoptivus, in Felice et Elipando fuisse damnatam, adeò ut sensus quo Durandus hanc propositionem docuit, quove nonnulli insignes theologi hanc posse sustineri senserunt, planè hæreticus sit, et contractoria propositionis ejusdem ad fidem pertineat. Præcipua ratio Vasquesii hæc est, 1º duos ejusmodi episcopos solùm dixisse Christum secundum humanitatem seu secundum carnem esse filium Dei adoptivum, ut ex eorum mente refert Adrianus papa, in Epistolâ supra laudatâ; 2º ex confessione fidei Elipandi quæ in libro Etherii et Beati legitur, apparere unicam in Christo personam ab Elipando admissam fuisse.

Duas ejusmodi extremas inter sententias, mediâ quâdam viâ incedit cardinalis Lugo disput. 31, sect. 1, de Incarn.: « Ego non existimo, inquit, eundem omninò sensum esse quem intendunt aliqui auctores catholici in illâ reduplicatione, et quam intendebant hæretici. Nam hæretici volebant loquendo de Christo homine, ut condistinguitur à Deo (id est ut est persona naturam humanam terminans), esse filium adoptivum; Catholici verò, etiam

loquentes de Christo homine, concedunt esse filium naturalem, sed addunt esse adoptivum secundum quid; seu secundum humanitatem. Cæterum, adhuc censeo juxta mentem concilii et Adriani debere negari istam reduplicativam, quia tota ratio concilii fundatur in eo quòd adoptio includat extraneitatem personæ, quod non reperitur in Christo; ex hoc autem fit neque secundum humanitatem esse filium adoptivum, quia non est persona extranea, nec habet negationem requisitam ad filiationem adoptivam. » Hactenùs cardinalis de Lugo. His satis consona sunt sed magis explicata quæ Petavius de eodem argumento decernit. Is 1º duos in Christo filios, alium naturalem, nempe Deum Verbum, alterum adoptivum, videlicet Christum quàm hominem à Felice et Elipando fuisse discretos docet. 2º Observat tamen non idcirco ejusmodi episcopos credidisse suas in Christo inesse personas. 3º Tum propter argumenta plurima à se adducta, cum maximè ob latam in Felicem et Elipandum definitionem, judicat hanc propositionem: Christus, quatenùs homo, est filius adoptivus, esse *temerariam et errori proximam, si non hæreticam omninò*. 4º Demùm ibidem notat propositionem eandem *quamvis subtili et argutâ vocis interpretatione consequi hoc possit, ut quæ inest in nomine, nulla in re ipsâ sit offensio*, attamen vel ipso loquendi genere esse damnandam. Ubi clarè innuit inter ejusmodi sententiam prout aliquo subtili sensu à quibusdam scholasticis defenditur, et errorem ab Ecclesiâ in Felice et Elipando damnatum nonnihil discriminis à se agnosci.

CONCLUSIO. Certum est hæresim Felicianam unitati personæ in Christo immediatè et formaliter, vel saltem mediatè et indirectè fuisse oppositam. Probabilius vero quòd non fuerit opposita nisi mediatè. Ea tamen non debet cum subtili quorundam scholasticorum opinionione confundi; quamvis hæc opinio menti quoque concilii Francofordiensis aliàs repugnet.

Probatur prima pars, nempe hæresim Felicianam mediatè vel immediatè oppositam fuisse unitati personæ adversùs Nestorium definitæ, atque id esse certum et indubitatum. Etenim 1º, Adrianus, S. pontifex, Patres concilii, Paulinus Aquileiensis, in libro Sacrosyllabo, duobus episcopis Hispanis objiciunt eorum sententiam in Nestorianismum incidere, à Nestorio originem ducere, et in ipso jam fuisse damnatam. Vide tom. 7 conc. Labb. col. 1020, 1027, et præsertim 1044; vide etiam Suarez. locolau-

dato. Atque ejusmodi accusationem ipsis intentatam, idemque argumentum in illos presum videre est in omnibus scriptis contra eos editis. Atqui, nisi errore suo vel immediatè, vel saltem mediatè unitati personæ in Christo repugnassent, in eos illata non fuisset illa accusatio, nec ejusmodi argumento potuissent revinci; ergo, etc. 2º Omnes consentiunt duos filios in Christo, unum naturalem, nempe Deum Verbum, alterum duntaxat adoptivum, nempe Christum ut hominem, à Felice et Elipando fuisse distinctos et divisos; atqui illa distinctio saltem mediatè repugnat unitati personæ; si enim Christus ut homo seu ut hic homo, dici non posset filius naturalis, sed tantum adoptivus, sequeretur personam Christi ut hominis seu personam terminantem et ultimò substantantem naturam humanam non esse Filium naturalem, sed adoptivum duntaxat. Porro, persona illa, si non sit Filius naturalis, sed adoptivus tantum, ergo non potest esse eadem ac persona Dei Verbi, ut filiatio naturalis Dei Patris necessariò competit; ergo duorum filiorum in Christo distinctio à Felice excogitata, mediatè saltem repugnat unitati personæ ac cum eâ stare et cohærere nequaquam potest.

Probatur secunda pars, nempe probabilius esse quòd Felicianæ hæresis unitati personæ in Christo solum mediatè, non formaliter opposita fuerit; adeò ut Felix et Elipandus non tantum duas in Christo personas conceptis verbis non dixerint, uti facilè Suarez, Frassenius et alii fatentur; sed etiam sibi ex quâdam caligine mentis fortè visi fuerint unitatem personæ in Christo intactam relinquere; probatur, inquam, 1º, quia si directè, immediatè et formaliter unitatem personæ in Christo Felix et Elipandus impugnassent, ejusmodi unitatem propugnare et adversus eos stabilire curassent, qui in illos decertarunt; sed qui contra Felicem et Elipandum decertarunt, unitatem personæ in Christo non curarunt probare, imò ut certum et ab adversariis non negatum posuerunt non posse illud dogma sustineri, utpote in Nestorio damnatum; ergo, etc.

2º Habetur apud Etherium et Beatum supra laudatos confessio fidei Elipandi, in qua Christus dicitur *Homo interior in unâ eademque Dei et hominis personâ agglomeratus, atque carnis vestimento indutus*. En unitas personæ Christo disertè ab Elipando attributa. Frustra repōnit Frassenius Elipandum Nestorii vafritiem imitatum, impropriè accepisse personæ nomen ut fucum faceret et accusationem hæreseos de-

clinaret. Namque, licet Nestorius, post Theodorum Mopsuestenum, personæ unitatem sumpserit moraliter, et pro communione honoris et dignitatis; attamen idem contigisse Elipando sine aliquo probabili momento conjicere non licet. Præterea, non ab Elipando concinnata est confessio fidei quam ejus nomine inscribunt Etherius et Beatus. Ipsi ejusmodi confessionem contextuere, ut genuinam Elipandi doctrinam exprimerent, et manifestam facerent. Quis autem suspicatus fuerit eos, ex industriâ et lectore non monito, voces erroribus Elipandi quos refutabant, oblegendis et imminuendis magis idoneas selegisse?

3º Si Felix et Elipandus idem planè docuissent quod Nestorius, imò, si ipsi essent opinati se cum eo planè consentire, profectò non sperassent futurum ut in concilio Francofordiensi sua sententia approbaretur, nec illud concilium quo res decideretur, Elipandus ad Carolum Magnum scribens postulare ausus esset. Hinc fateri cogitur Suarez « Elipandum non apertè fuisse professum errorem Nestorii; ideòque ausum fuisse judicium et approbationem concilii postulare; aut enim, inquit, quid ad errorem suum consequeretur non intelligebat, quod credibile est; aut quæ solet esse hæreticorum audacia, sperabat fore ut eâ simulatione alios deciperet. »

Dices: Sigebertus in Chronico ad annum 793, sic loquitur: « Felicianæ hæresis condemnatur, et in præsentia Adriani papæ ab ipso Felice auctore abdicatur. Hæc hæresis asserebat Filium Dei in divinâ naturâ verum Deum esse, in humanâ verò adoptivum, unam personam Dei et hominis dividens in duas personas, scilicet veri filii et adoptivi. » Respondeo Sigebertum dum ait in duas personas Christum fuisse à Felice divisum, magis exposuisse quid ex Felicianâ hæresi reverà consequeretur, quàm quid ejusmodi erroris conceptu formali et immediato contineretur et involveretur; de cætero, auctoritati Sigeberti qui nonnisi pluribus seculis ab exortâ illâ hæresi scripsit, anteponendum esse testimonium Etheri et Beati, auctorum coætaneorum, qui ejusmodi errorem quo tempore grassabatur confutarunt, et concilio Francofordiensi interfuerunt.

Probatur tertia pars, nempe cum subtili quâdam nonnullorum scholasticorum opinione jam memoratâ non confundendum Felicis et Elipandi errorem. Nam Felix et Elipandus, ut docuimus, etsi unam in Christo personam

confiterentur, attamen non tantum Christo quatenus homini *reduplicativè*, seu ratione humanitatis, sed etiam ipsi quâ homini *specificativè* ut aiunt, seu quatenus est persona naturam humanam, non divinam terminans, et eâ ratione distinguitur à Deo, adscribendam putabant adoptionem. Hinc simpliciter et absolute pronuntiabant Christum hominem non esse Filium Dei proprium et naturalem, sed solummodò filium adoptivum; quæ quidem in Christo duplicis ejusmodi filietatis discretio, ut deinde videbitur, tum Scripturis sacris et traditioni, tum primis et necessariis fidei adversus Nestorium definitæ consecrariis planè adversatur. Durandus verò et alii, de quibus agimus, scholastici, non tantum statuunt, unam in Christo Verbi Dei personam admittendam, sed et simpliciter et absolute docent, quod inde sequitur, Christum nempe ut hominem, esse dicendum filium Dei proprium et naturalem, nec negant, demonstrato Christo, veram fore hanc propositionem: Hic homo est proprius et naturalis Dei Filius. Id ergo unum censent, Christum ut hominem, etsi proprius sit et naturalis filius, utpote persona Verbi humanitatem terminans, tamen sub aliquo respectu et secundum quid, ratione scilicet humanitatis gratiâ sanctificante ornata, dicendum esse aut saltem dici posse filium Dei adoptivum. Nempe, cum gratia sanctificans in hominibus justis sit adoptionis forma, arbitrati sunt eundem effectum formalem ipsi in Christo competere; cumque ea quæ naturæ insunt, de supposito prædicari possint in concreto, existimârunt, si adoptionis forma humanitati Christi inhæreat, sequi Christum hominem, licet aliàs verè et simpliciter Filium Dei naturalem, posse tamen aliquâ ratione appellari adoptivum. Ubi apparet ejusmodi theologos non tam contra dogma revelatum et ab Ecclesiâ definitum peccasse, quàm adversus genuinam adoptionis notionem ejus conceptu formali non cogitârunt extraneitatem personæ includi; ergo, etc.

Probatur quarta pars, nempe ejusmodi subtilem quorundam scholasticorum opinionem à concilii mente esse alienam; nam juxta concilium ille non potest dici filius adoptivus qui est filius naturalis, seu qui non est persona extranea, quia scilicet personæ extraneitas est forma negativa, ad formalem rationem adoptionis constituendam requisita; atqui, juxta opinionem de quâ agimus, Christus, etsi Filius naturalis et minimè extraneus, dici tamen potest adoptivus propter gratiam sanctificantem

quâ ejus humanitas ornata est; ergo, etc. Propter hanc et alias causas, infra rejiciemus ejusmodi loquendi modum: Christus, quatenus homo, potest secundum quid et ratione humanitatis, dici Filius adoptivus.

ARTICULUS II.

An sensu Felicis et Elipandi, an alio quolibet in Christum ut hominem quadrare possit adoptiva filii Dei nuncupatio.

CONCLUSIO. Christus ut homo est Filius Dei naturalis non adoptivus, nec ullo sensu vero et probando Filius Dei adoptivus dici potest.

Probatur prima pars, quæ ad fidem attinet, nempe Christum ut hominem, esse Filium Dei naturalem; nam ille est Filius Dei naturalis, non adoptivus, qui in Scripturis appellatur Filius Dei unigenitus, siquidem multi sunt filii ejus adoptivi; qui dicitur Filius Dei verus et proprius; atqui, juxta Scripturas, Christus etiam ut homo, est Filius Dei unigenitus, Filius Dei verus et proprius;.. Christus ut homo est Filius Dei unigenitus secundum Script. Joan. 1, v. 14: *Verbum caro factum est, et habitavit in nobis, et vidimus gloriam ejus, gloriam quasi unigeniti à Patre.* Ubi Verbum caro factum, id est, Christus ut homo, appellatur *Unigenitus à Patre.* Ibidem, v. 18: *Deum nemo vidit unquam. Unigenitus Filius, qui est in sinu Patris, ipse enarravit;* hic iterum agitur de Christo ut homine, nempe cum ut homo prædicaverit et divina enarraverit. Ibid. cap. 3, v. 16: *Sic Deus dilexit mundum, ut Filium suum unigenitum daret, ut omnis qui credit in eum non pereat, sed habeat vitam æternam.* Quo in loco etiam Christus homo appellatur Unigenitus, si quidem ut homo à Deo pro nobis traditus est. Ibid. v. 17, et 18: *Misit Deus Filium suum in mundum.... qui credit in eum non judicatur; qui autem non credit jam judicatus est; quia non credit in nomine unigeniti Filii Dei.* 1 Joan. 4, v. 9: *In hoc apparuit charitas Dei in nobis, quoniam Filium suum unigenitum misit Deus in mundum, ut vivamus per eum.* 2° Christus ut homo, in Scripturis dicitur Filius Dei verus. Nam Christum quem viderat, ac proinde ut hominem appellat S. Joan. verum Filium Dei: *Et scimus, inquit, 1 Epist. cap. 3, v. 20, quoniam Filius Dei venit, et dedit nobis sensum, ut cognoscamus verum Deum, et simus in vero Filio ejus. Hic est verus Deus et vita æterna.* 3° Christus ut homo, est Filius Dei proprius; Rom. 8, v. 32: *Qui (Deus) proprio Filio suo non pepercit, sed pro nobis omnibus tradidit illum.* 4° Nunquam in

Scripturis Christus ut homo nuncupatur filius adoptivus; imò verò hoc observandum est; nunquàm Deum in Scripturis eodem modo et communi vocabulo patrem nostrum dici et Patrem Christi; ergo, etc.

Probatur 2° ex traditione, 1° auctoritate Symbolorum fidei; in Symbolo Apostolorum legitur : *Credo in unum Deum, Patrem omnipotentem et in Jesum Christum Filium ejus unicum Dominum nostrum, qui conceptus est de Spiritu sancto*, etc. Ubi Christus, qui conceptus est de Spiritu sancto, etc., ac proinde etiam Christus homo, dicitur Filius Dei unicus. In Symbolo Constantinopolitano : *Credo in unum Deum, Patrem omnipotentem.... et in unum Dominum Jesum Christum Filium Dei unigenitum, et ex Patre natum ante omnia secula, Deum de Deo*, etc. *Qui propter nos homines et propter nostram salutem descendit de cœlis, et incarnatus est.... natus.... crucifixus*, etc.

2° Auctoritate concilii Francofordiensis et Adriani papæ, à quibus adversùs Felicem et Elipandum, ut modò diximus, definitum est Christum esse Filium Dei naturalem, non adoptivum. 3° Auctoritate Ecclesiarum Hispaniæ, à quarum fide recessisse Felicem et Elipandum evidentissimum sit ex suffragio Hildephonsi et Justi, quorum prior ante Elipandum Toletanæ Ecclesiæ, alter ante Felicem Urgellitanæ præfuit. Iste in Cantica scribens : *Quis, inquit, erit similis Deo inter filios Dei; illi adoptione, hic (Christus) naturâ est Filius et ideò nullus in sanctis, vel in universo genere hominum, quamlibet filii vocabulo censeatur, Christo similis reperitur*. Et Hildephonsus, lib. de Virginitate S. Mariæ, de Christo loquens, ait *nullum esse per quem (à Deo) adoptaretur, si non esset proprius (Filius Dei)*. Deinde *non est adoptivus filius, inquit, sed adoptator, ut ita dicam, cæterorum*. Et paulò post : *At verò Christus non adoptivus, sed proprius Dei Filius, in plenitudine temporum venit, missus à Patre, natus de muliere, qui solus non eguit.... renasci, quoniam proprius Dei Filius.... A patre genitus, ipse ex naturâ suâ in se habuit, et non aliunde, ut proprius esset Dei Filius*.

4° Auctoritate SS. Patrum tum græcorum, tum latinorum, quorum permulta testimonia longo ordine referunt Petavius, lib. 7, cap. 2 et 3, et Thomass. toto ferè libro 8.

Probatur 5° ex rationibus theologicis. Prima est illum esse Filium Dei naturalem non adoptivum, qui est persona verè et propriè à Deo Patre genita; atqui ipse Christus ut est talis

homo, est persona verè et propriè à Deo Patre genita, cum Christus homo, ipsum sit Dei *Verbum caro factum*, ipse Dei Filius, *qui cum in formâ Dei esset,.... exinanivit semetipsum formam servi accipiens et habitu inventus ut homo*. Enimverò non est in Christo persona duplex, sed una tantùm. Eadem est igitur Christi ut hominis persona ac Christi ut Dei; Discrimen quidem maximum intercedit Christum ut Deum inter et Christum ut hominem, sed illud discrimen ad naturas spectat, non ad personam; ergo, cùm persona Christi ut Dei, sit Filius Dei naturalis, non adoptivus, necesse est ut idem etiam attribuaturs illi personæ, cùm attenditur eâ terminari et sustentari naturam quam assumpsit. Secunda. Ille non potest adoptari qui non est extraneus, seu cui ratio divinæ filietatis propriæ et naturalis reverà competit. Cùm enim filius adoptivus sit persona extranea ut ex jure, et ex ideâ omnium constat, planum est filietatem naturalem cum adoptionis titulo non posse compati. Atqui Christus etiam ut hic homo, seu ut talis persona terminans naturam assumptam, non est Deo Patri extraneus, seu ipsi ratio divinæ filietatis propriæ et naturalis verè competit; nam personalitas Filii divini ejus filietatem seu à Patre generationem reverà includit, imò eâ constituitur; cùm igitur Christus ut hic homo, sit persona Filii divini ut terminans naturam humanam, planum est, etc. Tertia. Ille est Filius Dei naturalis quem verè Deus generat; atqui Deus Pater verè generat Christum etiam ut hominem; Christus enim ut homo, est Filius Dei Patris naturam humanam sibi habens personaliter unitam; atqui Deus Pater generat Filium suum etiam cum eo respectu consideratum, siquidem ab æterno et jugiter Deus Pater Filium suum generat, non enim transitoria est Filii divini generatio, sed jugis et semper eadem, unde psalmo 2, Deus Filium unigenitum sic alloquitur : *Ego hodiè genui te*. Ergo, quemadmodum Filius Dei ante Incarnationem genitus est carnem nondum sibi habens personaliter unitam, ita, ubi primùm carnem assumpsit, genitus est, ac semper gignitur sibi propriam et personaliter unitam habens naturam humanam; ergo, etc. Quarta. Si Christus ut homo, esset Filius adoptivus, cùm Beata Virgo Christum secundum carnem solùm genuerit, dicenda igitur esset solùm mater Filii Dei adoptivi; atqui Beata Virgo non est dicenda solùm mater Filii Dei adoptivi, siquidem juxta definitionem concilii Ephesini, verè mater Dei nun-

cupari debet, eo quòd Christum ut hominem genuerit; ergo, etc. Quinta. Pater et mater communes, meritò et dicuntur filiorum suorum pater et mater, licet sola prolis suæ caro ab eis oriatur, anima verò creetur à Deo, ut simul cum corpore in sinu matris quantum satis est organis instructo, jungatur; quare ergo Pater æternus non diceretur verè Pater Christi ut hominis, statim atque concipitur personalitatem Christi ut hominis ab eo verà generatione manare, naturam verò humanam ejusmodi personalitati propriè physicè et hypostaticè conjungi?

Probatur secunda pars, nempe Christum nullo sensu etiam expressâ mentione factâ humanitatis, posse appellari adoptivum Dei filium. Nam quocumque sensu sumatur nomen filii adoptivi, semper significabit personam extraneam, seu cui filietas naturalis non competit; quâcumque verò ratione consideretur Christus, etiamsi mentio fieret expressa humanitatis cum quâvis reduplicatione et abstractione, nunquàm dici poterit persona extranea seu carens naturali filietate respectu Dei Patris; siquidem habet hanc filietatem; nulla autem reduplicatio aut abstractio vim habet immutandi objecti; ergo, etc. Et verò nomen filii spectat personam, non naturam; ergo titulus filii adoptivi spectat etiam personam, non naturam, abstrahendo à personâ; ergo, cùm persona Christi hominis sit Filius Dei naturalis, quâcumque in ejus humanitate forma aut gratia recipiatur, ea efficere non potest ut Christus appelletur Filius adoptivus.

Quæres 1^o, quânam notâ theologicâ debeat hæc propositio affici: Christus secundum humanitatem, seu ratione gratiæ sanctificantis in ejus humanitatem receptæ dicendus est, vel dici potest filius adoptivus? Respondeo hanc propositionem, etsi in theologis à quibus proata est, possit aliquo modo excusari, eò quòd scilicet non circa dogma ipsum, sed potius circa loquendi modum et veram adoptivi filii significationem errarent; attamen in se sumptam et secundum id quod per se sonat, esse temerariam et erroneam; 1^o quia, licet cum illâ reduplicatione à concilio Francofordiensi damnata fuerit, attamen eâdem ratione refellitur, ut jam observavimus, quâ concilium adversus Felicianam hæresim usum est; 2^o quia nec in Scripturis nec in totâ traditione ullum occurrit ejusmodi propositionis fundamentum, imò verò tum Scripturæ tum S. Patres non aliam Christo perpetuò adscribunt filietatem

Dei quàm propriam et naturalem; 3^o quia rationes modò allatæ demonstrant non posse quovis sensu dici Christum hominem esse filium adoptivum, quin per se ex hac propositione sequatur eum sub eodem respectu non esse filium proprium et naturalem, ac proinde duas in illo esse personas; quorum prius Felicianam, aliud Nestorianam hæresim comprehendit et exhibet.

Addo propositionem eandem etiam prout à Durando intelligitur, esse ipso dicendi genere proscribendam; quia juxta axioma tritum in scholis: *Ex verbis inordinatè prolatis incurritur hæresis*. Et ut pulchrè habet S. Augustinus, lib. 10 de Civit. Dei, cap. 23: *Nobis ad certam regulam loqui fas est, ne verborum licentia etiam de rebus quæ his significantur, impiam gignat opinionem*.

Quæres 2^o, an igitur Christus secundum humanitatem reduplicativè seu ratione humanitatis dicendus sit Filius Dei naturalis? Respondeo, si ita intelligatur reduplicatio illa, ut significetur Christum propter humanitatem assumptam esse filium naturalem, adeò ut ex ejus humanitate oriatur vel constituatur ratio formalis Filii naturalis quæ Christo competit, tunc propositionem ejusmodi futuram esse falsam et hæreticam, ut patet. Si sensus reduplicationis foret, ipsam Christi humanitatem propter unionem suam cum Verbo hypostaticam esse Filium Dei naturalem, perinde esset hæretica propositio, quâ exhiberentur in Christo duo Filii Dei naturales, puta Verbum divinum Filium Dei æternum, et humanitatem Christi unitam quæ perperam diceretur Dei Filius naturalis.

Inde tamen non sequitur sub illo igitur respectu Christum aut ejus humanitatem unitam dici posse saltem secundum quid filium Dei adoptivum; nam ut filietas naturalis et propria naturam in se et abstrahendo à personalitate consideratam non spectat, ita nec adoptiva; utraque ad personam contingit; proindeque, cùm natura humana Christi in se sumpta non sit persona, sequitur Christum ratione humanitatis reduplicativè, ut hic sumitur, consideratum, neque adoptivum, neque naturalem Dei filium esse dicendum; licet simpliciter Christus homo, Christus ut homo, Christus secundum humanitatem dici debeat Filius Dei proprius et naturalis, ut probatum est.

ARTICULUS III.

Quo sensu intelligendum sit Christum ut hominem esse Filium Dei naturalem.

FUERE theologi quos nimia subtilitas eò deduxit ut Christum quà hominem dicerent duplici titulo Filium Dei naturalem; uno, quia est Filius Dei æternus consubstantialis Patri æterno primæ personæ, à quâ per generationem æternam, jugem et immutabilem procedit; altero, quia gratia sanctificans eximia et jus ad hæreditatem æternam Christo ut homini, positâ unione hypostaticâ, debentur, et unionem illam necessariò et naturaliter consequuntur. Sub hoc respectu Christum dicunt esse filium totius Trinitatis. Ita Suarez, disp. 49 in 3 partem S. Thomæ sect. 1, Vasquesius, in eadem partem, tomo 1, disp. 89, cap. 14, de Rhodes, tomo 2 Disputationis theologiæ scholasticæ ad tertiam partem S. Thomæ, disp. 4, aliique. Hi porrò filiationem illam temporalem habent ut minùs propriam et analogicam tantùm comparatè ad primam, ut subtilem opinionem quæ in scholis agitare fas est, sed fidelibus non proponendam ne offendantur. *Hæc consideratio, inquit Suarez, nimis est philosophica, multùmque habet de nostræ rationis præcisione. Ac consideratione..... secundum rem, verè non est in Christo alia filiatio præterquàm æterna.*

Multò longiùs progressi sunt Harduinus, commentario in novum Testamentum, et Berruyer, secundâ et tertiâ parte Historiæ populi Dei, dùm censent ipsam Christi humanitatem, cùm personæ uni divinæ hypostaticè unita sit in personæ unitatem, dicendam esse in recto filium Dei unius et veri in tribus personis subsistentis, eandemque sanctissimam humanitatem Christi ita unitam, perpetuum esse directè et in recto sanctarum Scripturarum præsertim novi Testamenti objectum. De quo novo dogmate sermonem habebimus totâ dissertatione sequenti.

Cùm verò Berruyer, tomo octavo secundæ partis Historiæ populi Dei, dissertationes latinas complectente, hanc infra paginam 38, notam apponat: «Vide in hoc argumentum Suarez, Vasquesium, Lessium, Grandamicum, Meratium, Theophilum Raynaldum, Mendosam, Arriagam, Becanum, de Rhodes, et plures alios de scholâ theologos. Vide Maldonatum, Toleum, pluresque alios interpretes;» quo significare voluit eorum theologorum eâ de re doctrinam suâ ita esse saltem in præcipuis similem

ut eorum auctoritate protegatur et tutus sit; idcirco non abs re erit jam enumerari multa eaque gravissima in quibus Berruyerismus ab illorum opinione differt. Octo ejusmodi differentias in suâ præcellenti adversùs Berruyerum Determinatione annotat sacra facultas parisiensis, ejus verbis utemur.

I. Inquit ad propositionem LXIII: «Ilis non consentit auctor, cùm ait humanitatem Jesus Christi esse in recto Filium hunc Dei naturalem, seu in hanc humanitatem in recto cadere hanc denominationem *Filius naturalis* Dei. Dicunt ipsum Jesum Christum, seu personam Jesus Christi esse triplici modo Filium naturalem; nempe 1^o Filium naturalem Dei ab æterno, propter generationem suam æternam à Deo Patre primâ personâ. 2^o Filium naturalem Beatæ Mariæ Virginis ex quâ secundum humanitatem suam natus est; 3^o eundem reduplicativè ut hunc hominem, seu secundum suam humanitatem Verbo hypostaticè unitam, et propter hanc unionem Filium esse naturalem Dei in tribus personis subsistentis. Triplicem hanc filietatem adjudicant personæ Jesu Christi; neque enim Jesum Christum definiunt cum auctore, humanitatem Christi sanctissimam personæ uni divinæ hypostaticè unitam cui humanitati in recto conveniant quæcumque de Jesu Christo in Scripturis prædicantur.» II. «Hinc Jesum Christum sciscunt dici non posse absolutè Filium Dei qui in tribus personis subsistit, sed tantùm cum his determinationibus et reduplicationibus, quatenùs homo, seu secundum humanitatem suam. Ita Suarez, in 3 partem S. Thomæ, disp. 49, sect. 1, Vasquesius in eadem partem T. 1, disp. 89, cap. 14, aliique.» III. «Hinc etiam nunquàm dicunt, quod edixit auctor post Harduinum, nempe humanitatem Christi esse *instar suppositi*; quæ voces, ubi agitur de naturâ intelligente, idem sonat ac, *instar personæ*; neque volunt, ubi Christus loquitur in Scripturis, ipsam ejus humanitatem esse intelligendam de seipsâ loquentem et dicentem, *Ego*; neque demùm illa multa effutiunt, quibus auctor omnes proprios personæ characteres adscribit Christi humanitati in recto.» IV. «Hinc quoque nullo in loco aiunt humanitatem Christi unitam *Deum esse æqualem Deo*; quemadmodum de individuo naturæ assumptæ, ut loquitur Harduinus, seu de humanitate Christi individuâ et in atomo, personæ uni divinæ substantialiter conjunctâ, ut auctor loquitur, hic et ille perhibent.» V. «Neque etiam filia-

tionem divinam temporalem quam Christo ut homini, præposterè, ut modò videbimus, asserunt, illi unquam æquiparant filiationi ejus æternæ, ut filiationem ejusmodi temporalem asserunt æquè esse propriam, nullâ ratione analogicam, ab omni præcisione mentis alienam et in se realem et absolutam. *Hæc consideratio, inquit Suarez, ibidem, nimis est philosophica et scholastica, multumque habet de nostræ rationis præcisione et consideratione... secundum rem verè non est in Christo alia filiatio præterquam æterna. Altera est Christi filiatio, naturalis quidem et vera, inquit de Rhodes tomo II, dissert. ad tertiam partem sancti Thomæ, dissert. 4, quæst. 2, § 1, loquens de Christi filiatione divinâ temporali, sed minùs propria et analogica tantum filiatio comparativè ad primam; non enim fundatur in generatione sicut prior, sed aliquo intrinseco constitutivo et connaturali, per quod jus habeatur ad hæreditatem, nempe visionem intuitivam. Quapropter Vasquesius aiebat, ubi supra, sectione 8, produci hanc filiationem non per generationem naturalem quâ communicatur natura, sed per generationem gratiæ. Cæterum, non nescimus apud ejusmodi theologos scholasticos, varias esse de hoc argumento differentias tenues, quæ magis ad loquendi modum quàm ad rem ipsam attinent. Singulos prosequi longum foret et otiosum.* » VI. « Hi omnes theologî suam hanc opinionem habent ut meram et subtilem opinionem, in scholis agitari licitam et in eis solis ferè tractandam, quæ si, ut se habet, et nudè fidelibus explicaretur, eos offendere nata esset; vide Suarez loco citato. Auctor verò multò pejorem sententiam quam tradit, audet proponere ut fide explicitâ credendam, cujus fides est æquè necessaria, ac fides in mysterium trium in Deo personarum, quarum prima Pater, secunda Filius, tertia Spiritus sanctus, et à quovis Christiano ex quodam sensu fidei et quasi religionis instinctu intellecta in formâ Baptismi, in precibus plerisque Ecclesiæ, in glorificationibus, in verbis signi crucis comitibus, in benedictionibus, in omni cultûs christiani exercitio. » VII. « Adorandam et cultu latriæ supremo prosequendam esse directè et in recto humanitatem Christi unitam ex suâ doctrinâ sequi auctor perspexit et reipsâ docuit. Idipsum ex Vasquesii et Suarez opinione sequi cum objecisset paulò post eorum mortem Basilius Poncius ex Augustinianorum familiâ theologus, ita respondit Theophilus Raynaudus, de Attributis Christi, tom. II, sect. 3, cap. 4, qui unus est

ex laudatis ab auctore scriptoribus : *Fatendum est dari peculiarem adorationem respondentem filiationi naturali temporariæ, quâ Christus ob sanctificationem substantialem est honore et adoratione dignus, non quidem adoratione supremâ latriæ, sed tamen adoratione quæ in nullam puram creaturam potest cadere.* » VIII. « Eisdem theologî pro certo et indubitato statuunt omnia Scripturæ loca in quibus Christus appellatur *Filius Dei*, uno duntaxat aut altero exceptis, esse exponenda de filiatione Jesu Christi æternâ ex substantiâ Patris. Auctor verò omnia et singula ejusmodi loca sumit sensu ab illâ filiatione disjuncto, solamque filiationem divinam Christi temporalem universis et singulis expressam agnoscit. Frustra ergo et infideliter auctor annotatione seu appellatione, de quâ agitur, voluit sese exhibere ut habentem in auctoribus illis per fugium aliquod tutum. Nempe hi nimium ab illo distant, quàm ut suam doctrinam illorum opinionioni non multum absimilem judicaret. » Hactenus sacra facultas, quæ addit à recto deviasse theologos de quibus sermo est, quâ parte eorum sententia perverso auctoris dogmati affinis est, illudque efficit adducto contextu doctissimi Petavii adversus Suarez et Vasquesium eâ de re accuratè et eruditè disputantis.

Dico : Christus ut hic homo, est naturalis Filius Dei, quatenus est Filius Dei Patris æternus; nec alio sensu, quæcumque adhibeatur reduplicatio, dici potest Filius Dei naturalis.

Pars prima iis omnibus asseritur, quibus dogma catholicum adversus Nestorianos, supra constitutum est. Et verò Christus ut hic homo, est Christus prout est persona habens hanc humanitatem sibi hypostaticè conjunctam. Hæc verò persona est Filius Dei æternus, qui nihil de suo amisit aut amittit, cum hanc naturam humanam sibi substantialiter conjunctam in personæ unitatem, habere incepit, pergitque; qui ab æterno jugi, necessariâ et immutabili generatione à Deo Patre procedit sive ante unionem, sive in ipso unionis instanti, sive post unionem peractam. Ergo Christus, ut homo, est naturalis Filius Dei, quatenus est Filius Dei Patris æternus.

Probatur secunda pars iisdem momentis. Nam in quâcumque reduplicatione adhibendâ, vel abstrahetur à personâ Christi, vel ab illâ non abstrahetur. Si non fiat in reduplicatione præcisio à personâ Christi, adeoque reduplicationis seu restrictionis conceptus hanc personam in recto includat, tunc sensus illius pro-

positionis, Christus ut est homo, seu ut est hic homo, semper erit iste : Christus, ut est persona habens hanc humanitatem sibi hypostaticè conjunctam, quæ persona juxta fidem catholicam omnibus symbolis consignatam, est ipse Filius Dei æternus. Fietne reduplicatio hoc modo? Christus secundum hanc suam humanitatem consideratus; redibit idem sensus; nam hæc propositio idem sonat ac ista : Christus, prout est persona considerata secundum hanc humanitatem sibi hypostaticè copulatam; habetur proinde idem fundamentum ipsum appellandi propriè æternum et naturalem Dei Patris Filium.

Sin autem in reduplicatione præscindatur à personâ Christi, aut saltem personam Christi in recto non includat conceptus reduplicativus, v. g., si dicatur : Christus est Filius Dei ratione humanitatis suæ præcisè in se sumptæ, vel etiam ratione humanitatis prout unitæ Verbo et in recto consideratæ, dum consideratur Verbum solummodò in obliquo et, ut aiunt, connotativè, tunc propositio erit falsa et regulæ fidei contraria. Nimirum Christus, ratione humanitatis suæ in se præcisè sumptæ, aut etiam humanitatis suæ ut unitæ Verbo, si humanitas in recto spectetur et Verbum solummodò in obliquo, non est Filius Dei, quemadmodum homo ratione animæ suæ figuratus non est, neque ratione corporis sui est capax cogitandi. Sensus propositionis hujus, adhibitâ eâ reduplicatione explicitâ, is esset : Humanitas Christi Verbo unita hypostaticè, Filius Dei est; quæ locutiones à regulâ fidei abhorrent, neque à theologis quos nunc refellimus, admittuntur. Hi, ne videantur duos in Christo Dei Filios dicere, volunt in ipsamet unicam Christi personam, Verbum Dei æternum, cadere et appellationem propriam naturalis et æterni Filii Dei et appellationem, quam invehunt, et quam respuimus, temporalis et naturalis Filii Dei, trini in personis. Adeoque in reduplicationibus de Christo ut homine, quæ juxta ipsos isti posteriori appellationi locum præbent, nolunt à Christi personâ in recto, abstractionem fieri.

Ratione autem humanitatis suæ Christus est filius hominis, filius Beatæ Mariæ Virginis matris Christi, ac proinde matris Dei. *Est ergo fides recta*, ait Symbolum, quod sub S. Athanasii nomine circumfertur, *est fides recta, ut credamus et confiteamur, quia Dominus noster Jesus Christus Dei Filius, Deus est et homo. Deus est ex substantiâ Patris ante secula genitus, et*

homo est ex substantiâ matris in seculo natus. Sedulò attendenda hic sunt nomina concreta, quæ personam in recto important, et ab abstractis secernenda, atque servandæ regulæ Scripturis, traditioni et ipsi mysterio consentaneæ, quas tradidimus, ubi de communicatione idiomatum. Homo Christus Jesus dicendus est Filius Dei æternus, quia homo Christus Jesus idem est ac persona cui hæc humanitas physicè et hypostaticè unitur, et quæ nominatur Jesus Christus. Idem verè dici non posset de naturâ Christi humanâ in abstracto consideratâ, etiamsi spectaretur ut unita.

Neque etiam humanitas Christi ullo modo continet rationem seu fundamentum cur Christus sit naturalis Filius Dei. Filietas naturalis secum importat similitudinem naturæ, adeoque in divinis consubstantialitatem et unitatem naturæ, cum unicuique sit Deus. Christus verò, ratione humanitatis suæ, non est similis naturâ Deo, non est ipsi consubstantialis, sed est similis substantiâ cum Virgine Deiparâ, quæ eum genuit secundum humanitatem. Ergo, quæcumque restrictio et reduplicatio adhibeatur, Christus ut hic homo, nequit alio sensu naturalis Filius Dei appellari, quàm quia est Filius æternus Dei Patris æterni. Præterea, si Christus ut homo est alio modo naturalis Filius Dei quàm propter generationem æternam; ergo in Christo duplex esset Dei Filius naturalis, quod dogma errore Felicis et Elipandî pejus foret. « Est enim tolerabilius, inquit Petavius lib. VII de Incarnatione, cap. 5, n. 8, duos filios ita statuere, ut alter propter Divinitatem et æternam generationem naturalis sit Dei Filius; alter ob communem cum cæteris hominibus naturam et creatam sanctitatem adoptivus habeatur, quàm duos ponere naturales Dei Filios, suâ quemque ratione et formâ constantes. Quòd si quis idcirco filios non esse duos naturales objicit, quòd una utrumque personâ sustineat; filii verò proprietas personam non naturam sequatur, uti S. Thomas affirmat, nihil efficit. Siquidem nec illi qui Christum naturalem simul et adoptivum Dei Filium esse putârunt, tam hispani episcopi in Francofordiensi synodo damnati, quàm qui illos secuti sunt scholastici, duas in Christo personas inesse crediderunt, et illos tamen Adrianus, Paulus Aquileiensis, Alcuinus, ac tota ipsa Francofordiensis synodus, non alio genere argumentandi validius oppugnârunt, quàm ut ex illorum opinionem consequens esse monstrarent, duos in Christo inesse filios. Hoc autem non

alio sensu interpretari voluerunt, nisi duas esse proprietates filii sive filietates, quæ in eandem personam caderent, quæ quidem complexo, sive, ut vocant, concreto etiam vocabulo filii usurpari possent. Ut enim passim antiqui hominem assumptum à Deo pro humanitate dicunt, et duo in Christo distinguenda, Deum et hominem, ac similia quædam proferri solent; ita duos filios nominari non tantoperè prohibuissent, nec huic locutioni intercessissent iidem illi veteres, alium esse Dei Filium, alium hominis, et ab illo diversum, sicut illic formas duas divinam et humanam, ita hic *filietates* duas, sive formas relativas eidem Christo tribuendas putâssent. Quæ res indicio est unicam ab illis causam filietatemque fuisse constitutam, quâ Christus Dei Filius haberetur; nec magis adoptivam illorum auctoritate damnatam, quàm naturalem alteram et ab æternâ filii proprietate distinctam. »

His adde : Si Christus est naturalis Filius Dei aliâ ratione quàm propter suam divinitatem et generationem æternam; tunc illud quod fundabit aliam filiationem, nempe eam quæ temporalis est et repetitur ex sanctitate, quæ ipsi ut homini, est naturalis propter unionem, illud, inquam, erit opus totius Trinitatis; adeoque Christus, ut hic homo, diceretur naturalis Filius totius Trinitatis, Filius sui, Filius Spiritûs sancti, ad quod universi adstupescerent et horrescerent fideles, dogmatis hujus novitate permoti. Hinc, ut vidimus, illi theologi opinionem suam sinunt quidem tractari in scholis, sed nolunt explicari fidelibus, quos perturbare nata esset. Ergo rejicienda.

Objicit Vasquesius : Si naturam humanam assumeret Spiritus sanctus, tunc diceretur secundum humanitatem naturalis Filius Dei, nec tamen propter filiationem æternam quam non habet. Ergo. Nego antecedens. Si Spiritus sanctus homo fieret, non aliam huic homini proprietatem quàm suam communicaret, adeoque hic homo non esset Pater, nec Filius, sed Spiritus sanctus, id est, esset persona Spiritûs sancti habens hanc humanitatem sibi hypostaticè unitam. Similiter, si Pater incarnaretur, Pater homo factus, quatenus homo, non esset Filius, sed Pater. Scilicet, quemadmodum, hic homo in concreto vi communicationis idiomatum ex unione hypostaticâ nexæ dicitur omnipotens, omniscius, æternus, etc., ab omnipotentiâ divinâ, omniscientiâ et æternitate, quia hic homo, idem ac persona divina hanc habens humanam naturam; ita et hic

homo Christus dicendus Filius Dei æternus, quia est persona æterni Filii Dei hanc humanitatem habens. Proinde, si Pater factus fuisset homo, hic homo fuisset Pater, non Filius, nec ullo modo appellari potuisset Filius Dei. « Atque ut etiam auctoritate pugnemus, ait Petavius loco citato, n. 9, huc illa Patrum advocanda est ratio quam in secundo libro proposuimus, cur solum Filium hominem fieri decuerit. Hanc enim complures illorum afferunt, ut qui Dei jam Filius erat, hominis esset filius, nec filii appellatio multiplicaretur; dùm alius esset Dei Filius, nempe Verbum, alius hominis filius, non Dei : ut puta Pater, aut Spiritus sanctus. Ita Fulgentius, Gennadius, Joannes Damascenus, Anselmus, Bernardus, Paulus Aquileiensis, Hugo Victorinus, Magister Sententiarum, ibidem laudati; qui omnes eo tanquàm certo fundamento nituntur, neque Patrem, neque Spiritum sanctum, si homines fierent, Dei Filios futuros, idque esse peculiare Verbo. Cujus sanè ratiocinationis, ubi ab divinâ Filii proprietate desciveris, nullam causam comminisci aliam poteris. »

Objicies secundò cum eodem : Christus, ut est hic homo, seu secundum humanitatem suam spectatus, est Dei naturalis Filius, et tamen sub illo respectu non procedit à Patre per generationem æternam. Neque enim, ut est hic homo seu secundum suam humanitatem consideratus, procedit à Patre ad similitudinem naturæ. Ergo Christus, ut homo, aliter est Filius Dei naturalis, quàm propter generationem æternam; ergo Christus, ut homo, est Dei Filius naturalis, quia ipsi naturalia sunt sanctitas et hæreditas æterna. Dist. : Christus, ut homo, non procedit à Patre per generationem æternam, quantum ad humanitatem suam, concedo; Christus, ut homo, non est persona procedens à Patre per generationem æternam et habens hanc humanitatem sibi hypostaticè unitam, nego. Ubi Christus spectatur ut homo, ut hic homo, spectatur ut persona habens hanc humanitatem sibi hypostaticè unitam. Hæc persona autem nihil de suo amisit, cum humanitatem assumpsit, et post ejusmodi unionem, pergit à Deo Patre actione immanenti, necessariâ et immutabili, modo ineffabili generari. Ergo Christus etiam consideratus ut homo istud includit quòd sit persona à Deo Patre genita, quod sit Filius Dei æternus.

Inst. : Si res ita se habet, Christus, ut homo, erit Filius per formam relativam, per filietatem extrinsecam naturæ ejus humanæ. Quam enim

habet Christus filiationem æternam in ejus humanitate non recipitur.

Nego ant. : Id enim cui naturæ Christi humana intrinsecè et substantialiter ita unitur, ut in eo solo habeat rationem personæ, malè dicitur illi humanitati extrinsecum; atqui divinæ et æternæ Christi filiationi seu Filio æterno Dei, humanitas Christi ita intimo et substantiali nexu conjungitur, ut in eâ solâ filiatione, in solo filio Dei æterno habeat rationem suppositi et personæ. Hinc cùm Christus homo aiebat : *Ego*, sensus hujus vocis is erat : Mea persona habens humanitatem istam; quæ, si ampliùs declarentur, exponendo quæ esset persona Christi, hunc sensum exhibent : *Ego, Filius Dei æternus*, cui hæc humanitas hypostaticè unitur, et per hanc humanitatem assumptam loquens, agens. Atque non aliâ ratione intelligi potest illud, v. g., Christi Judæos alloquentis : *Ego et Pater unum sumus*. Id est : mea persona est Dei Patris Filius ipsi consubstantialis.

Ad probat. Fateor filiationem Christi æternam in ejus humanitate non recipi tanquàm in subjecto inhæsionis. Quomodò proprietas divina reciperetur, tanquàm in hujus generis subjecto, in humanitate quæ natura finita est? Sed non propterea est extrinseca humanitati Christi quæ ita arcè ipsi conjungitur, ut eâ compleatur in genere subsistendi. Quemadmodum vi hujusce unionis fit ut homo Christus propriè dicatur et dici debeat Deus, omnipotens, Creator, etc., quia homo Christus idem sonat ac persona habens humanitatem Christi, quæ persona est etiam habens Divinitatem, est omnipotens, est creator, etc.; ita vi ejusdem unionis, homo Christus dicendus est Filius Dei æternus, cùm persona eadem ipse sit Filius Dei æternus; adeoque reduplicatio quæcumque adhibeatur, modò, ut dictum est, à personâ Christi non abstrahatur, hæ voces, Christus ut homo, ut hic homo, aut aliâ quâvis ratione ejusmodi spectatus, significabunt Christum ut est Filius Dei æternus homo factus, ut est loquens, agens, patiens, etc., per humanitatem à se assumptam. Jam observavimus quòd si fieret reduplicatio, in quâ abstraheretur à personâ Christi, tunc consideraretur humanitas in se sumpta, vel ita spectaretur tanquàm unita, ut conciperetur in recto, Verbum verò, cui uniretur, spectaretur solummodò in obliquo et connotativè; quibus positis, sensus propositionis de Christo ratione humanitatis naturali Filio Dei, is esset : Humanitas Christi in se

spectata, vel humanitas Christi unita hypostaticè Verbo est naturalis Dei Filius; quod simul advertimus esse falsum et fidei regulæ adversum, nec à theologis quos impugnamus, admissum. Qui verò illud propugnarent, in Bertruyerismum eâ de re inciderent dissertatione sequenti confutandum.

Objicies ultimò : Adrianus, romanus pontifex, hæc Dei verba de Christo Matth. 3, 17 : *hic est Filius meus dilectus, in quo mihi benè complacui*; totius Trinitatis vocem fuisse affirmat: adeoque Christum putavit esse Filium totius Trinitatis. Eatenùs porrò Filius totius Trinitatis non est, quatenùs per generationem æternam à Patre solo procedit. Ergo aliâ ratione Dei in personis trini Filius est naturalis secundum humanitatem à se assumptam, nempe generatione gratiæ factâ in tempore.

Nego Maj. Falsum est ab Adriano papâ hæc verba : *Tu es Filius meus dilectus, in quo mihi benè complacui*, haberi ut vocem totius Trinitatis. Id unum significat ille pontifex, ex complacentiâ Patris æterni circa Jesum Christum Filium suum clarè perspicui in illo eodem solius Dei Patris Filio non solum Patrem, sed et alias etiam Trinitatis personas sibi complacuisse. *Hanc* Adriani fuisse mentem, inquit Petavius, loco citato, n. 14, *facile, id quod mihi usu venit, animadvertet*, qui locum illum attentius legerit, non raptim cursimque peragraverit, ut solent aliis rebus occupati. Quod ad generationem gratiæ memoratam à Vasquesio, seu actionem totius Trinitatis, quâ Christo ut homini collatæ sunt tum sanctitas ipsi debita et connaturalis propter unionem humanitatis suæ hypostaticam Verbo Dei, tum possessio hæreditatis in visione Dei intuitivâ sitæ, planum est eâ non posse produci naturalem Dei filium. Vox *naturalis*, ad Filium addita, naturæ ac substantiæ communionem, non verò gratiæ solum et hæreditariæ possessionis communicationem significat. Atque tum Scripturis, tum toti retrò antiquitati, tum etiam sensui vocum usitato repugnat ut Filius naturalis dicatur effectus seu terminus generationis gratiæ. Ejusmodi generatio gratiæ quâ produceretur Filius naturalis omnibus ignota fuit Patribus, qui gratiâ Filium distinguebant à Filio naturali, quique dùm prædicabant Christum esse Filium Dei naturalem per generationem æternam, minimè patiebantur eum gratiâ Filium ullo sensu nuncupari.

Dissertatio xi.

DE NOVA FILIATIONE DIVINA AB HARDUINO ET BERRYERO INVENTA ET SANCTISSIMÆ CHRISTI HUMANITATI VERBO FILIO DEI ÆTERNO HYPOSTATICÈ UNITÆ AB IIS ATTRIBUTA.

Harduinus, qui meritò dictus est *orbis litterati portentum, venerandæ antiquitatis cultor et destructor*, inter varii generis errores quos in *commentario suo in novum Testamentum*, opere posthumo, Amstelodami anno 1741, apud Henricum du Sauzet edito, profert, istum sæpissimè obtrudit, Jesum Christum appellari in Scripturis Filium Dei, non quia reverà Filius Dei est æternus factus homo in tempore, sed propter unionem humanitatis suæ hypostaticam personæ uni divinæ; ita ut Jesus Christus, Filius Dei, ipsa sit ejus humanitas completa in genere subsistendi personâ unâ divinâ; quæ humanitas sic completa, propter unionem sui hypostaticam personæ uni divinæ, sit reverà et appelletur in sacris litteris verus et naturalis Filius Dei in tribus personis subsistentis. Huic commento tenaciter adhæsit fidelis ipsius discipulus Berruyer in *Historiâ gallicè scriptâ, populi Dei, parte secundâ, quæ tempora à natiuitate Christi usque ad Synagogæ finem elapsa complectitur*, Hagæ (Parisiis) 1753, tum in *tertiâ parte, seu in Paraphrasi litterali Epistolarum ab Apostolis scriptarum*, Amstelodami (Lugduni) 1759.

Utrumque natum in *populi seductionem potius quàm instructionem* declaravit summus pontifex Clemens XIII, in condemnatione tertiæ partis *Historiæ populi Dei*. *Ab utroque*, inquit, *sacrarum litterarum expositionis obtentu parantur incautis offendicula, et veritati catholicæ aut præjudicium infertur, aut aufertur præsidium quo potissimum roboratur.*

Exponendum primò in quo consistat error Harduini et Berruyeri de Humanitate Christi vero et naturali Filio Dei; secundò idem error est confutandus.

CAPUT PRIMUM.

Expositio erroris Harduini et Berruyeri de attributâ naturæ humanæ Christi, quatenus Verbo unitæ, verà et naturali filiatione divinâ.

Error ejusmodi spectari potest in se, tum relativè ad Scripturas, tum denique in ordine ad traditionem et usum Christianorum.

ARTICULUS PRIMUS.

Error Harduini et Berruyeri in se spectatus exponitur.

Profitentur magister et discipulus à se agnoscere et adorari Deum unum in tribus personis, Patre, Filio et Spiritu sancto subsistentem. Aiunt secundam personam, nempe Filium Dei Patris æternum, seu Verbum Dei in plenitudine temporum incarnatum fuisse, seu habere hanc quam assumpsit humanitatem sanctissimam sibi hypostaticè unitam in personæ unitatem. Unicam perhibent à se admitti personam in Christo, nempe personam Verbi divini, quod est Filius æternus Patris æterni, qui prima est sanctissimæ Trinitatis persona. At, dùm hæc credi jubent, iisdem multiplici ratione, ut videbitur, detrahunt, dùm Jesum Christum, id est humanitatem Christi sanctissimam, primo conceptionis suæ instanti unitam substantialiter personæ uni divinæ in personæ unitatem, statuunt esse, secundum veram et germanam generationis et filiationis notionem, verum et naturalem Filium Dei unius in tribus personis subsistentis, factum in plenitudine temporum. Audiatur Berruyerus. « Secundum veram et germanam, » inquit parte 2 *Historiæ populi Dei*, tomo 8, quo continentur dissertationes latinæ, edit. in-12 an. 1753, quæst. 2, pag. 48: « Secundum veram et germanam generationis filiationisque rationem, in propositione cujus subjectum et prædicatum in recto est sanctissima Christi humanitas completa Verbo in genere subsistendi, Jesus Christus Dominus noster verè dici potest et debet naturalis Filius Dei, Dei, inquam, ut vox illa, *Deus*, supponit pro Deo uno et vero, subsistente in tribus personis, agente ad extra, et per actionem transcurrentem et liberam uniente humanitatem Christi sanctissimam primo conceptionis suæ instanti, cum personâ unâ divinâ, in unitatem personæ. »

Ibi tria significantur, unum est, subjectum et attributum illius propositionis in quâ Jesus Christus dicitur naturalis Filius Dei, *esse in recto humanitatem Christi sanctissimam completam Verbo in genere subsistendi*. Quo obtruditur notio illa Jesu Christi quam ab Harduino accepit. Alterum est *Jesum Christum juxta illam eandem notionem, id est, humanitatem Christi sanctissimam completam Verbo in genere subsistendi, dici posse et debere Filium Dei naturalem, idque secundum veram et germanam generationis filiationisque rationem*. Tertium est, *Jesum Christum secundum eandem notionem*

intellectum, seu humanitatem ejus sanctissimam, esse *Filium Dei naturalem*, ut vox illa, Deus, supponit, pro uno Deo et vero subsistente in tribus personis, agente ad extra, et per actionem transeuntem et liberam uniente humanitatem Christi sanctissimam primo conceptionis suæ instanti cum personâ unâ divinâ. His præcipua Harduini et Berruyerî de illo argumento thesis continetur. Cæteris hanc evolvunt et explicant, munire conantur probationibus, et excolunt. «Memineris primò, qui legis hæc, addit Berruyerus, ibid, pag. 49, 50 et 51, longè aliud esse secundum prædicationem logicam, si dixeris : *Jesus Christus est Filius Dei, quia persona divina, in quâ (1) subsistit, est ab æterno Filius per actionem Dei Patris ad intra immanentem et necessariam*; aliud si dixeris : *Jesus Christus est Filius Dei, quia sanctissima ejus humanitas in genere subsistendi completur per actionem transeuntem et liberam Dei unius et veri, unientis sanctissimam Christi humanitatem primo conceptionis suæ instanti, unione physicâ, cum personâ una divinâ in unitatem personæ*. Utraque propositio vera, pergit, pro diverso prædicandi modo et pro distinctâ ratione fundandi. Prima habet pro subjecto et prædicato personam ipsam divinam in quâ subsistit humanitas, habet pro fundamento generationem æternam.... Secunda propositio habet pro subjecto et prædicato, ipsam Christi humanitatem completam in genere subsistendi, habet pro fundamento generationem temporalem, sive actionem Dei unius transeuntem et liberam, quâ humanitas Christi primo conceptionis suæ instanti conjungitur physicè personæ uni divinæ in unitatem personæ. Prima propositio supponit et complectitur personæ unitæ non divinitatem tantum, sed et æternam in divinis generationem. Secunda propositio personæ unitæ Divinitatem supponit quidem necessariò et complectitur, ab æternâ ejusdem generatione et modo producendi in divinis abstrahit. In primâ propositione vox illa, *Filius Dei*, prædicatur realiter et in recto de Verbo, Filio Patris æterno. In secundâ vox illa, *Filius Dei*, prædicatur et realiter in recto de humanitate completâ in genere subsistendi, per divinæ, cui unitur, personæ subsistentiam; quamvis propositio utraque de Jesu Christo in concreto verificetur. In primâ propositione, cogitatur primò et imme-

diatè attingitur Verbum, seu persona divina in quâ subsistit humanitas; persona, inquam, divina, quæ in se ipsâ non videtur oculis, sed fide creditur. In secundâ propositione cogitatur primò et immediatè attingitur humanitas sanctissima completa in genere subsistendi, per divinæ, cui unitur, personæ subsistentiam; humanitas, inquam, quæ auribus auditur, oculis conspicitur, cujus consortium plerisque novi Testamenti scriptoribus permissum est, cujus imago omnium menti obversabatur, dum scriberent, et nostrum.... subit animum, dum eorum de Jesu Christo Domino nostro et Filio Dei scripta legimus. »

Non poterat disertius significari 1°, præter eam Domini nostri Jesu Christi notionem quæ Symbolis exhibetur, nempe ipsum esse Filium Dei Patris æternum propter nos homines et propter nostram salutem in temporum plenitudine hominem factum, aliam esse admittendam juxta Berruyerum, in eo positam quod Jesus Christus sit ipsa Christi humanitas physicè unita personæ uni divinæ in personæ unitatem; 2° præter æternam filiationem divinam Jesu Christo competentem juxta priorem notionem, aliam quoque esse in eo agnoscendam, quæ sit ipsius humanitatis Christi completæ in genere subsistendi, et fundetur in actione Dei unius transeunte, et liberâ, quâ humanitas illa primo conceptionis suæ instanti conjuncta est physicè personæ uni divinæ in personæ unitatem.

Ergone Jesus Christus dicendus est *Filius Trinitatis, Filius suæ ipsius, Filius Spiritus sancti*? non ausus est id effutire Berruyerus.

« Adverte secundò, inquit, quòd, etsi ponatur Jesum Christum dici et esse Filium Dei naturalem propter actionem Dei ad extra, quæ humanitatem hypostaticè conjungit personæ uni divinæ, non inde sequatur quòd Jesus Christus dici debeat *Filius Trinitatis, Filius suæ ipsius, Filius Spiritus sancti*; Ratio à priori est, quòd actiones ad extra Dei unius, etsi in sensu reali sint trium æqualiter et indivisè personarum, non prædicantur tamen de tribus personis, Patre, Verbo et Spiritu sancto, aut de aliquâ illarum divisim, sed de Deo simpliciter, ut unus est in naturâ. Sic non dicitur quòd Pater, Verbum et Spiritus sanctus mundum creaverint, quamvis tres reverà personæ eandem posuerint ad extra creandi actionem. Quoniam autem non à tribus personis agentibus, quatenus sunt à se invicem distinctæ, sed quatenus unus sunt naturâ Deus, peracta est mundi

(1) Si vox, *Jesus Christus*, accipiatur uti accipienda est, pro Filio Dei facto homine, dici nequit subsistere in personâ divinâ, sed dicendus est persona divina.

creatio, ideò Deus simpliciter dicitur mundi creator. Non est ergo secundum legitimam prædicandi rationem Jesus Christus, sive Trinitatis, sive trium personarum, sive sui ipsius, sive spiritus sancti Filius; verum Filius naturalis et est et propriè dicitur Dei unius in tribus personis subsistentis quidem, sed secundum naturam spectati et ad extra agentis. »

Ut faciliùs intelligatur quid ibi velit Berruyer, attendendum ad ea quæ ab ipso clariùs enuntiantur in unâ è suis defensionibus cui titulus : *Défense de la seconde partie de l'Histoire du Peuple de Dieu contre les calomnies d'un libelle intitulé : Projet d'instruction pastorale*. Avenione, 1755, in-12, pag. 17. *Veritas est fidei*, inquit, *in Trinitate personas, ut personas, non agere ad extra. Omnia opera extra Deum, omnes actiones ad extra sunt à Deo uno subsistente in tribus personis*. In symbolo tamen Nicæno legitur Patrem esse factorem cæli et terræ; per Filium omnia facta esse, et Spiritum sanctum esse vivificantem et locutum per Prophetas. Sed de refellendis erroribus Berruyeri nondum agitur.

Aliâ adhuc utitur viâ ut filiationem illam temporalem humanitatis Christi, non referat ad Trinitatem aut ad Filium aut ad Spiritum sanctum; nimirum sic loquitur ibid. pag. 52 et 53 : « Rectè, sed per appropriationem, ut aiunt, Deus Pater, sive prima persona dicitur Pater Jesu Christi, Hominis-Dei, Dei et Filii, quemadmodum rectè dicimus : *Credo in Deum Patrem omnipotentem, factorem cæli et terræ*, quia actio uniens, sicut et actio creans, est actus omnipotentis, cujus attributi actiones Patri, sive primæ personæ per appropriationem tribuuntur, et sic frequenter Jesus Christus Homo-Deus, Dei Filius in toto Evangelio vocem hanc, *Pater*, usurpat. »

Adverte obiter quantum profecerit Berruyerus in legendis Harduini magistri sui commentariis! Frequenter, inquit, Jesus Christus Deum appellat Patrem in Evangelio, non quia ipse est Filius Dei Patris æternus pro nobis homo factus, sed per appropriationem. Verum plura ejus interpretationum specimina magis adhuc perversa deinde afferentur.

Verum conceditne Berruyerus, quæ allatis ejus dictis consentanea planè sunt, nempe filiationem Jesu Christi temporalem de quo agitur, cadere in ejus humanitatem, ac proinde duos esse in Christo Filios Dei. Primum expressis verbis docet, alterum non item. Fatetur tantum Jesum Christum duplici ratione esse Filium Dei,

« Per actionem, ait pag. 54 et 55, unientem... fit ut secunda è personis divinis, quæ priùs erat Filius Dei, propter generationem æternam, sub aliâ ratione denominetur in tempore Filius Dei propter generationem temporalem, sive actionem Dei ad extra, quâ humanitas Christi unita est hypostaticè personæ uni divinæ; denominatione, inquam, cadente in humanitatem, quia unita est Verbo, sed Verbi propriâ, quia denominationes sicut actiones et passionis sunt suppositorum. » Adverte, quod fatetur, nempe denominationem naturalis Filii Dei quam ob prætersam generationem divinam temporalem Christo attribuit, *cadere in humanitatem Christi*, id est, ut antea dixerat, *directè et in recto* prædicari de humanitate Christi Verbo completâ, ita ut secundum omnem sermonis proprietatem dicendum sit : Humanitas Christi Verbo completa in genere subsistendi, est Filius Dei naturalis in tempore factus. Adverte etiam hanc eandem Christi humanitatem personâ unâ divinâ in genere subsistendi completam appellari ab ipso Jesum Christum; ita ut eam Jesu Christi notionem obtrudat, ut usitatissimam. Cogita demum nomen Jesu Christi esse nomen personæ, quemadmodum nomina Pauli, Petri et alia ejusmodi personas designant, adeoque, cum humanitas Christi Verbo in genere substitendi completa, à Berruyero directè et in recto appelletur Jesus Christus, consequens est ab eo illi humanitati sic spectatæ attribui quidquid est personæ, solo nomine excepto; et colliges quàm falsum sit, positâ ejus doctrinâ, quàm principiis à se perpetuò inculcatis repugnet quod addit, denominationem Filii Dei, de quâ agitur, licet cadat in humanitatem Christi, esse tamen *Verbi propriam, quia denominationes et passionis sunt suppositorum*. Verissimum quidem est axioma quod hic laudat, *denominationes, etc., esse suppositorum*; sed eo non efficiet denominationem quæ cadit in humanitatem Verbo unitam, quatenus illa humanitas directè et in recto consideratur, esse Verbo propriam, ita ut de Verbo propriè prædicari debeat. Cum itaque humanitas Verbo unita et Verbum ipsum sint duo tam distincta quàm Deus à naturâ creatâ distinguitur, patet à Berruyero non admitti tantum secundam Trinitatis personam esse duplici ratione *Filium Dei*, sed ab ipso reverà prædicari in Christo binos Filios Dei, unum æternum, nempe Verbum, alterum in tempore factum, nempe humanitatem Christi Verbo completam in genere subsistendi.

Perspexit Berruyerius corollarium aliquod è doctrinâ suâ consequens, posse scilicet credi explicitè Jesum Christum esse Filium Dei naturalem, quin plures in Deo cogitentur esse personæ. « Appellatio, Filii Dei, inquit, pag. 76, 77 et 78, de quâ quæstio nostra instituta est, quatenus per nomen illud, *Filius Dei*, præcisè intelligitur homo factus in tempore Deo Filius per unionem physicam et hypostaticam humanitatis suæ cum personâ divinâ, non equidem complectitur in se explicitè, nec in notione suâ formaliter includit duo alia fidei dogmata quæ nos omnes verè Christiani credimus, et per quorum fidem in Baptismo sumus Christiani; sed quamvis ab illis in conceptu suo abstrahat, adeò tamen ea non excludit ut ad eorum fidem proximè disponat. Ea sunt, primum: Deum unum et verum subsistere in tribus personis divinis, realiter inter se distinctis, eandem habentibus et terminantibus naturam divinam. Secundum, è tribus personis divinis secundam, quæ Verbum est, produci à primâ, quæ Pater est, per viam generationis æternæ et immanentis; unde prima est ab æterno Deus Pater, secunda ab æterno Deus Filius. Fateor istâ dogmata duo non includi formaliter et explicitè in notione Filii Dei, qualis à nobis describitur aut definitur. Nam si Deus nobis non esset cognitus et revelatus, quàm eodem modo quo, testante cum plerisque optimæ notæ doctoribus catholicis, Bellarmino, revelatus erat et cognitus Judæis, id est, sub notione Dei unius omnipotentis, creatoris, judicis, remuneratoris, vindicis, patris homines adoptantis et sibi intuitu meritorum Messiae Filii sui reconciliantis, non ideò minùs credi posset et oporteret revelanti Deo Jesum Christum esse verum naturalemque Dei Filium, per veram et physicam unionem sanctissimæ suæ humanitatis cum Deo sic cognito et revelato in unitatem personæ. »

En ergo Filius Dei verus et naturalis cujus denominatio cadit in Christi humanitatem personâ unâ divinâ completam, qui ita distinguitur à Filio Dei æterno, ut quidquid ad sinceram ejus notionem pertinet, ab eo credi possit qui planè ignorat plures esse in Deo personas, quarum una sit Deus Pater, altera Deus Filius. Cæterum, nec Bellarminus, neque alii optimæ notæ theologi catholici sentiunt quæ ipsis inscitè vel infideliter adscribit Berruyerius. Sed hæc ad hunc locum non spectant. Legatur Bellarminus libro secundo de Christo, capite 6.

Aliud corollarium deducit Berruyerius, quod

Beatæ Mariæ Virgini Deiparæ honorificum existimat. « Inde concludas, ait, pag. 55, Mariam Virginem et matrem Dei, quæ nihil contuli Verbo, ut sit æternus et naturalis Dei Filius ante Incarnationem, aliquid de suo contulisse, ut dicatur, sub novâ ratione, Filius Dei naturalis, jam ab ipso suo conceptu in sinu et de sanguine Virginis. Unde concludas... quòd ipsa Virgo mater quæ unico titulo mater est Dei sive Deipara, quia Deum hominem factum verè concepit et peperit, gemino titulo diceretur et esset mater Filii Dei. 1º quia concepit ac genuit Verbum quod est ab æterno Filius Dei Patris; 2º quia concepit de suo semine et sanguine humanitatem sanctissimam, in quam, propter unionem suam hypostaticam cum personâ unâ divinâ, cadit ista denominatio; *Filius Dei*. »

Ita quidem benè concluditur. At conclusio illa ab errore deducta, noceret ipsi titulo Deiparæ qui beatæ Virgini debitus est. Etenim humanitas, in quam, juxta Berruyerum, cadit illud nomen, *Filius Dei*, et quæ, juxta eundem, directè et in recto appellanda est Jesus-Christus, suppositi seu personæ profectò vices gerit, quo posito induceretur Nestorianismus, titulo Deiparæ, beatæ Mariæ Virginis attribuendo infensissimus.

Neque existimes, cum eò loci observamus, quod jam supra annotatum est, nempe humanitatem Christi sanctissimam juxta Berruyerum *suppositi seu personæ* vices gerere, à nobis ipsi affingi quidem quod verbis æquivalentibus significârit, sed tamen hoc ipsum ab eo nunquàm fuisse conceptis terminis dictum. Scilicet, non modò sententiam, quam illi attribuimus perpetuò, ut vidimus, declarat, sed et vocem ipsam alicubi adhibet magistrum suum Harduinum imitatus. Pag. 109, explicans aut potius ad pravum sensum suum detorquens illud Apostoli, Rom. 1, 3: *De Filio suo qui factus est ei (Deo) ex semine David secundum carnem*; hæc habet: « Verba, ut jacent, in obvio et nativo sensu nullâ formidine interpretare de Jesu Christo Deo et homine, qui ex semine David per Mariam in Filium suum derivato, factus est in tempore Deo uni et vero Filius secundum carnem; intellige dictum INSTAR SUPPOSITI ET IN MASCLINO GENERE DE SANCTISSIMA CHRISTI HUMANITATE, quæ superveniente Spiritu sancto in Mariam, et virtute Altissimi ei obumbrante conjuncta est in tempore cum personâ unâ divinâ, unione reali, physicâ et substantiali in unitatem personæ et individuum societatem naturæ. » Ipsi præiverat magister ejus

Harduinus, *Commentariis in novum Testamentum*, annotatione ad versiculum 4 capitis 1 Epistolæ ad Romanos, paginâ 433, ubi sic loquitur : « Humanitatis nomine, non naturam humanam intelligimus sejunctam à donis habitualibus actualibusque gratiis ad agendum necessariis, sed individuum naturæ humanæ iisdem instructissimum et completum in ordine ad actus suæ naturæ, suoque muneri convenientes producendos; quod propterea in prædicatione logicâ INSTAR SUPPOSITI ET MASCULINO GENERE verè et propriè dicitur ab Apostolo : *Qui prædestinatus est, qui factus est.* »

Hinc Berruyerius multis in locis secundâ et tertiâ parte Historiæ populi Dei, asserere non dubitat Jesum Christum esse Filium Dei propter unionem humanitatis suæ hypostaticam cum personâ unâ divinâ. Quod, ut sonat, fidei contrarium est, quâ constat Jesum Christum idcirco esse Filium Dei, quia persona in quâ ejus humanitas subsistit, est Filius Dei æternus; in sensu autem Berruyeri significat Christi humanitatem personæ uni divinæ hypostaticè unitam, verum et naturalem esse Filium Dei, quia personæ uni divinæ hypostaticè conjuncta est; quod perinde fidei adversatur. Hinc etiam eò processit ut Jesum Christum, seu humanitatem ejus sanctissimam personæ uni divinæ unitam, statuerit fuisse hâc unione Deum, ita ut omnia jura Dei, natura ipsa Dei, omnia ejus attributa per hanc unionem effecta illi fuerint propria. Unum referre sufficiat eâ de re ejus dictum super versiculis 5, 6 et 7 capitis 2 Epistolæ ad Ephesios : *Hoc sentite in vobis*, ait Apostolus, *quod et in Christo Jesu, qui cum in formâ Dei esset, non rapinam arbitratus est, esse se æqualem Deo; sed semetipsum exinanivit*, etc.; hæc Apostoli verba Harduino duce ita commentatur Berruyerius : « Puisque vous portez le nom de Chrétiens, inquit, efforcez-vous de former dans vos cœurs les mêmes sentiments, dont fut toujours animé celui de Jésus-Christ votre modèle et votre maître; il était Dieu, vous le savez; l'union de sa sainte humanité avec une personne divine lui rendait propres tous les droits, comme la nature et tous les attributs de Dieu.... Avoir été fait égal à Dieu, dès le premier moment de sa conception, ce fut pour lui le comble de sa gloire; mais il ne s'en fit jamais une raison de violence, d'usurpation et de rapine. Bien loin d'en user de la sorte, lui qui était riche et qui avait, dans la dignité infinie de sa personne, un droit inaliénable sur toute la gloire de ce monde,

il s'est fait pauvre pour l'amour de vous. »

Concludam hunc articulum referendo summarium doctrinæ Berruyanæ quam exhibet unus ex ejus defensoribus : « Dans l'Incarnation, la communication de la nature divine se fait par le moyen de l'union hypostatique de la personne, qui n'étant nullement même *per mentem* distinguée de la nature, opère l'union réelle et physique des deux natures; mais sans confusion et sans mélange, jusqu'au point cependant d'opérer la communication des idiomes. Union réelle et effective, produite dans le temps par l'opération de Dieu et qui fait en Jésus-Christ de deux natures ainsi unies en unité de personne, un seul composé théandrique, un vrai Fils de Dieu. C'est ce qui autorise le P. Berruyer à dire que Jésus-Christ, ou même la nature humaine en Jésus-Christ, en tant qu'unie réellement et physiquement à la nature divine, a contracté avec Dieu une nature, subsistant en trois personnes, la relation ou dénomination de Fils de Dieu. Voilà l'exposé simple de deux dissertations. »

ARTICULUS II.

Error Harduini et Berruyeri circa filiationem divinam humanitati Christi ab iis attributam, relative ad Scripturarum interpretationem spectatus, exponitur.

Mobò expositas notiones Jesu Christi, et Jesu Christi Filii Dei ante Harduinum inauditas exhibet Berruyerius duce magistro, non tanquàm partum aliquem subtilioris cujusdam considerationis et præcisionis in aliquibus scholis natum, et scholis ejusmodi subtilitates plus æquo venantibus relinquendum; sed tanquàm planè necessarias ad litteralem et germanam intelligentiam librorum novi Testamenti, imò tanquàm semper in animo habendas et perpetuò substituendas quotiescumque in Scripturis seu novi seu veteris Testamenti mentio occurrit, quocumque modo, seu Jesu Christi, seu Jesu Christi Filii Dei : « Eo sensu, inquit, pag. 96, 97 et 98, intelligenda sunt omnia, aut ne quid nimis dixisse videar, ferè omnia, quæ de Jesu Christo Filio Dei à scriptoribus sacris in tertiâ personâ narrantur aut pronuntiantur; omnia aut ferè omnia quæ in illorum scriptis de se ipso Jesus Christus Filius Dei in primâ personâ loquens dixisse perhibetur. Historiam Domini nostri Jesu Christi scriptores sacri conscribendam susceperunt; historiam nempe hominis illius quem viderant secum conversantem. Hunc ipsum Dominum

suum proprio sibi nomine in sanctissimam ejus humanitatem personæ uni divinæ conjunctam cadente, Filium Dei, quemadmodum et *Jesum et Christum*, et *Dominum et Salvatorem* vocabant. Adeò ut ab ipsis sanctissima et sibi cognita Christi humanitas, quæ scribentium recurrebat memoriæ, semper aut ferè semper, in recto appellaretur, humanitas, inquam, Christi sanctissima ut est in genere subsistendi, per divinam personæ divinæ subsistentiam completa, et quæ, ut talis operationum omnium est principium elicivum, omnium passionum est subjectum immediatum; propositionum omnium denique objectum est in se et directè apprehensum; humanitas demùm sanctissima quæ personæ uni divinæ conjuncta in unitatem personæ recipit in se fundamentum relationis secundum quam dicitur Christus, Filius Dei... Si Jesum Christum Filium Dei, de se in Scripturis loquentem, vel scriptores sacros Jesu Christi Filii Dei dicta aut facta narrantes, non sic perpetuò intellexerimus, nos in historiâ evangelicâ, cæterisque novi Testamenti libris, hospites semper oportet esse et peregrinos. » Adverte hoc loquendi modo auctoris *omnia*, aut *ne quid nimis dixisse videar*, ferè *omnia*, non temperamentum, sed meram reticentiam exhiberi. Noluit Berruyer statim proferre apertè quæcumque cogitabat, deinde audentior factus, reverà nihil excipit. In hoc ipso ejus contextu versùs finem jam restrictè non ampliùs loquitur, vocabulum adhibet, *perpetuò*, sine ullâ circumscriptione. Paulò post medium, ait humanitatem sanctissimam personâ unâ divinâ in genere subsistendi completam, *propositionum omnium esse objectum in se et directè apprehensum*.

Si quis verò forsitan suspicetur nos in eo Berruyeri loco interpretando æquitati non satis consulere, ad sequentia attendat. « Jesus Christus Dominus noster, inquit quæst. 1, pag. 3, 4 et 5, in plenitudine temporum existens, ante promissus per Prophetas in Scripturis sanctis, qui factus est Deo Filius ex semine David secundum carnem, qui prædestinatus est Filius Dei; sive quod idem est, Jesus Christus Homo-Deus, vel humanitas illa Christi sanctissima primo conceptionis suæ instanti unita substantialiter personæ uni divinæ in unitatem personæ, objectum est in recto SINGULARUM propositionum, quæ sunt in novo præsertim Testamento, de Domino nostro Jesu Christo; vel cùm Christus de se ipso loquens inducitur; vel cùm de Christo Deus loquitur,

vel cùm scriptores sacri aliquid enuntiant de Christo proposito sibi scriptionum suarum argumento. Breviùs : Propositiones quæ sunt in Scripturis sanctis de Domino nostro Jesu Christo, de illo directè prædicantur, et in eo simpliciter verificantur secundum sanctissimam ejus humanitatem natam ex Virgine Mariâ naturæ divinæ substantialiter unitam, et Verbo divino completam in ratione personæ.

« Evangelium à Matthæo, à Marco, à Lucâ, à Joanne compositum, Evangelium est Jesu Christi Domini, Hominis-Dei. SEMPER, CONTINUÒ ET UBIQUE, illa sacrosancta Evangelia habent pro objecto, in recto, Jesum Christum Hominem-Deum, in tempore existentem, ab æterno prædestinatum, et factum in plenitudine temporum Deo Filium secundum carnem; qui Jesus Christus, Dominus noster, Homo-Deus, est compositum illud theandricum in tempore existens, sive humanitas illa Christi sanctissima, unita primo conceptionis suæ momento per actionem Dei transeuntem et liberam personæ uni divinæ in unitatem personæ.

« Hoc illud est, addit, objectum unicum ET PERPETUUM, quod propositum sibi habent Evangelistæ omnes, dùm historiam scribunt Domini nostri Jesu Christi (dùm ejus characteres), prærogativas, dicta, facta, passiones, institutaque litteris commendant....

« Quæ de Evangelistis dicimus transferenda sunt, pergit pag. 8, ad Petrum, Paulum, Joannem, Jacobum, Judam, Actuum auctorem, OMNES denique novi Testamenti scriptores, QUOTQUOT sunt, QUOTIESCUMQUE vel de Jesu Christo loquuntur, vel Christum de se ipso loquentem Deum inducunt. Quin et idem OMNINÒ censendum est de omnibus veteris Testamenti scriptoribus, quoties de futuro Messîâ, Jesu Christo prophetant. »

Liquet sanè ab eo disertius significari non potuisse nullum omninò in sacris litteris occurrere dictum de Jesu Christo et de Jesu Christo Filio Dei, quod non debeat intelligi directè et in recto de ejus humanitate sanctissimâ uni personæ divinæ hypostaticè unitâ in personæ unitatem. Itaque, cùm Berruyerus alibi ait, *omnia*, aut *ne quid nimis dixisse videar*, ferè *omnia*, ipsi animus non fuit ut ullam generatim à se pronuntiatam veram restrictionem adhiberet. Alibi iisdem vocibus alicui temperamento exprimendo idoneis etiam utitur, sed alio sensu. « Dico itaque, inquit ibid. pag. 18

et 19, propositiones ferè omnes quæ sunt de Jesu Christo in Scripturis sanctis novi præsertim Testamenti, habere pro objecto in recto Hominem-Deum, sive humanitatem Christi in Verbo subsistentem. Dico insuper omnes et singulas ejusmodi propositiones à Christo Dei Filio et à Deo Christi Patre et à scriptoribus sacris prolatas semper et ubique verificari directè et primò in Homine-Deo sive in humanitate Christi Divinitati unità et Verbo completà in ratione personæ, nisi, quando propositiones quæ habent pro subjecto in recto compositum illud theandricum, habent pro prædicato attributum aliquod quod vel naturæ divinæ, ut natura divina est, vel naturæ humanæ ut est natura humana, essentialiter convenit, v. g. : Jesus Christus est Deus, Jesus Christus est homo. Reliquæ, quotquot sunt, (et tales sunt ferè omnes), verificantur in Jesu Christo Homine-Deo, quia mixtæ sunt et resultant ex unione factà in tempore humanitatis Christi sanctissimæ cum personâ unâ divinâ in unitatem personæ : quod est scriptorum omnium novi Testamenti objectum in recto ferè perpetuum. Atque hæc esto simplex, obvia, naturalis, Scripturas interpretandi methodus, sumpta ex loquentium scribentiumve personarum fine et objecto.

Dixi vocem illam *ferè*, in illo loco ad aliud attinere quàm in contextu quem in isto articulo primum retulimus. Hic Berruyerius triplex genus propositionum distinguit quæ omnes, sine ullâ exceptione, habent juxta ipsum pro subjecto sanctissimam Jesu Christi humanitatem Verbo completam; aliquas solùm ex iis observat non habere pro prædicato eandem sanctissimam humanitatem ita consideratam, eas nimirùm quæ habent pro prædicato naturam divinam ut est natura divina, aut naturam humanam ut est natura humana, aut attributum aliquod *alterutri ejusmodi naturæ essentialiter conveniens*. V. g., cum dicitur in Scripturis : Jesus Christus est Deus, Jesus Christus est homo; humanitas Christi Verbo completa in genere subsistendi, est quidem ex ipso subjectum ejusmodi propositionum, sed non est earum prædicatum, seu attributum; nempe, cum dicitur : Jesus Christus est homo, sensus est : Natura Christi humana personæ uni divinæ hypostaticè unita, est vera natura humana. Tertiæ verò generis propositiones (et tales sunt ferè omnes) habent in recto pro subjecto et prædicato humanitatem Christi sanctissimam personæ uni divinæ unitam. V. g., Christus

passus est pro hominum salute, habet tam pro attributo quàm pro subjecto in recto humanitatem sic unitam. Nempe dici potest ex Berruyerio : Humanitas in personâ unâ divinâ subsistens, est passa pro hominum salute, vel est humanitas in Verbo subsistens passa pro hominum salute. Sic conciliantur quæ hic profert Berruyerius, cum iis quæ antea dixerat generalissimè de objecto propositionum quæ in Scripturis sacris de Jesu Christo leguntur, cum hoc solùm discrimine, quòd eò loci nomine objecti subjectum et prædicatum propositionis comprehendat; antea verò nomen objecti ab eo generalius fuerat acceptum, ita ut quod est subjectum propositionis, ejus objectum quoque ab eo diceretur.

Verùm inquires, quomodò Berruyerius hoc intelligit quod reverà ab ipso dicitur, subjectum propositionis de Jesu Christo, habentis pro prædicato attributum aliquod naturæ divinæ essentialiter conveniens, v. g., Jesus Christus est Deus, esse tamen compositum quod theandricum appellat, seu esse humanitatem Christi personâ unâ divinâ in genere subsistendi completam? Numquid ita desipuit, ut aliquo vero sensu cogitaverit dici posse : Humanitas Christi sic completa, est Deus? Quisquis sis, qui ad hæc adstupescas, Harduini deliriis non es assuetus. Specimen aliquod ejus commentorum oculis tuis subjiciendum est. Is in jam citato Commentario suo in novum Testamentum pag. 307, annotatione ad illud Joannis 14, 28 : *Pater major me est*, sic habet : « Loquitur in Christo Deo et homine individuum naturæ humanæ unitum personæ Verbi, ac Deum Patrem majorem se esse prædicat, æquale se ei hoc ipso dicto significat. Major enim non dicitur, nisi qui sit ejusdem ordinis cum eo cui opponitur.... Unus homo (dicitur) major altero, ætate, exempli gratiâ, nobilitate, dignitate aut potestate... major aut æqualis non dicitur nisi de duobus individuis ejusdem ordinis. Verbum non est propriè æquale Patri quia non est individuum distinctum à Patre, sed est unum cum Patre, quamvis sit suppositum realiter distinctum à Patre. Individuum autem quod est assumptum à Verbo habet Patrem se majorem, quia Pater Deus est per ipsam suam naturam, individuum autem assumptum Deus est tantum per hypostaticam unionem cum Verbo, quæ facit illud individuum æquale Deo, ut loquitur Apostolus Philipp. 2, 6. Sic illa vox : *Pater major me est*, probat Verbum esse unitum humanæ naturæ individuo, quod factum

est per illam unionem æquale Deo, quamvis subjectum Deo et Patri et majori, quippe Deo per naturam. »

Jam retulimus commentarium Berruyeri super versiculo 6 capitis 2 epistolæ ad Philipenses, quo patet ipsum magistro in omnibus adhærentem, sentire pariter Jesum Christum seu individuum naturæ humanæ Christi Verbo unitum, hâc unione consecutum esse omnia Dei jura, ejus naturam, omnia attributa, et factum esse æquale Deo. Aliæ ejusdem generis interpretationes ipsius deinde procul dubio occurrent.

Ergone, inquires, nullum existimat in Scripturis sa ris contineri testimonium quo Mystrium sanctissimæ Trinitatis et æterna generatio Verbi divini proponantur et comprobentur? Audiamus eum eâ de re disserentem : « Dominum Jesum Christum, inquit ibid. pag. 78, esse verum, naturalemque Dei Filium, secundum notionem quæ neutrum ex memoratis mysteriis (Trinitatis, nempe, personarum in Deo et æternæ generationis Verbi) includeret formaliter, hoc ipsum est profectò, quod Christus ipse credendum Judæis proponebat, et à Prophetis promissum asserebat, et miraculis suis verum esse comprobabat. Nam quid aliud intelligerent Judæi, cùm se Christus, homo ille, quem auribus audiebant, et conspiciebant oculis Filium Dei diceret, ac credi vellet, antequàm proposuisset explicitè credendum verum Deum et unum subsistere in tribus personis realiter distinctis, Patre, Verbo, et Spiritu sancto, quarum prima Pater est ab æterno, secunda ab æterno Filius. Eo sensu dixit Jesus Christus se, quem videbant, quem audiebant, quem interrogabant, quem poterant contrectare sui temporis Judæi, esse verum Dei Filium, quo sensu Messiam futurum esse Filium Dei debebant credere Scripturis prænuntiantibus, ante Christi adventum Israelitæ veteres quibus nondùm revelatum erat, Deum suum verum et unum subsistere in tribus personis realiter distinctis, quarum prima esset ab æterno Pater, secunda ab æterno Filius. »

Itaque juxta Berruyerum ex dictis Christi in Evangelio de duobus illis mysteriis nihil colligi potest. Sed universaliùs loquitur pag. 164 et 165, exponens quis fuerit publicæ Christi et Apostolorum prædicationis scopus : « Jesus Christus, dùm viveret, inquit..... id in se suscepit ut gentem suam ad poenitentiam hortaretur, moneret advenisse regnum Dei, imminere Jerosolymorum ruinam..... se verum esse

Messiam, legislatorem novum, Emmanuel, sive Filium Dei Patribus promissum..... persuaderet, atque adeò Christum illum, cui mysteria regni sui cœlestis singula Apostolis suis revelanti ac per eos promulganti credendum esset. Similiter Evangelistarum et Apostolorum, dùm scriberent aut prædicarent, finis primarius is erat, ut Jesum Christum Messiam esse probarent, qualiscumque, quantusque à Deo per Prophetas genti suæ fuerat ostensus (verum et naturalem Filium Dei) à Deo missum ut Mosaicæ legi finem imponeret, novum et perfectiorem cultum induceret, excellentiorem adoptionem, omnibus communem gentibus in se ipso efficeret..... unde, quemadmodum Christus de se ipso usurpare solitus erat, ita et Apostoli, dùm de Christo loquuntur et scribunt, semper in recto *virum illum* appellant, qui inter Judæos ex Mariâ Virgine natus, oculis eorum observatus fuerat, eos docuerat, coram eis miracula patrârat, ab ipsis passus fuerat, et occisus resurrexerat tertiâ die et cœlos conscenderat. *Virum hunc* primò et in recto, sicut dicunt *Dominum et Christum esse factum à Deo* Abraham, Deo Isaac, Deo Jacob, Deo Patrum suorum, affirmant *Filium* verum et naturalem..... Sic cæteri omnes Evangelistæ ac novi Testamenti scriptores. Hoc primum scilicet edocendi erant Judæi, ad mysteria trium in Deo uno personarum, Verbi ab æterno geniti, et cætera religionis christianæ dogmata, deinceps privatâ magistrorum suorum institutione, evehendi. »

Ex mente igitur Berruyeri, Christus de mysterio trium personarum in Deo quarum prima sit Pater æternus, altera Filius æternus, et de generatione æternâ Verbi, *dùm viveret*, nullam in suis sermonibus mentionem fecit, pariter Evangelistæ et Apostoli in scriptis suis et in prædicationibus de iisdem mysteriis ita siluerunt, ut duo illa mysteria et cætera religionis christianæ dogmata *privatæ institutioni* reservarent. Quàm dissimilis ille à sanctis Ecclesiæ doctoribus, qui adversùs varii generis hæreticos illa duo mysteria impugnantes decertârunt, totque Scripturarum sacrarum testimoniis eadem invictè demonstrârunt !

Ita obstinato animo apud se, Harduino duce, constituerat nomen, *Filii Dei*, aut etiam *Filii Dei Patris*, nullo in loco Scripturarum accipi ad significandum Filium æternum Dei Patris æterni primæ personæ, nullamque in iis fieri mentionem generationis æternæ Verbi divini, ut non erubuerit ista scribere pag. 105 :

« Joannes Evangelista, qui dicere poterat verè : *Filius Dei caro factus est*; quoniam Verbum, quod in tempore carnem assumpsit, est ab æterno Filius Patris, ab illâ loquendi formulâ abstinuit; ideò videlicet quòd eo quo scribebat tempore divinus Theologus, appellatio illa, *Filius*, secundum usum Christianorum communem, appellabat in recto sanctissimam Jesu Christi humanitatem per operationem Spiritus sancti transeuntem et liberam, personæ uni divinæ unione substantiali conjunctam in unitatem personæ et divinæ consortium naturæ; adeoque si diceret Joannes : *Filius Dei factus est caro*; dicere ex usu loquendi crederetur humanitas Christi, sive Christus-Homo factus est homo; quod quàm ineptum sit, et scriptore sacro indignum, nemo est qui non sentiat. »

Tempore igitur quo S. Joannes Evangelium scripsit, id est anno æræ vulgaris 96, ut sentiunt communiter chronologi, aut saltem juxta ipsum Berruyerum, pag. 150, paulò ante annum 70, is erat usus Christianorum ut vox, *Filius Dei*, significaret in recto sanctissimam Christi humanitatem personæ uni divinæ unitam, abstrahendo à Trinitate personarum in Deo quarum una sit Pater æternus, et secunda Filius æternus Patris æterni.

Fatendum tamen alicubi auctorem observasse, pag. 150, « mysterium trium in Deo uno personarum realiter inter se distinctarum, et eandem habentium naturam, satis exprimi capite quinto epistolæ primæ sancti Joannis versu 7, his verbis : *Tres sunt qui testimonium dant in cælo, Pater, Verbum et Spiritus sanctus, et hi tres unum sunt.* » Dicit quoque « secundæ personæ Divinitatem et Incarnationem benè his verbis declarari Joan. 1 : *Et Verbum erat apud Deum, et Deus erat Verbum..... et Verbum caro factum est.* » Verùm 1º, nihilominus existimat nullo in loco Scripturarum exprimi Verbum seu secundam personam esse Filium Dei. Cùm profitetur Verbum esse à Patre primâ personâ ab æterno genitum, non ideò illud dicit, quòd in Scripturis doceatur, sed quia id ipsum ex traditione et Ecclesiæ documentis accepit. 2º Duo illa testimonia leguntur, unum in Evangelio sancti Joannis, alterum in primâ ejusdem Epistolâ. *Scripta autem sunt hæc*, inquit,..... paulò ante ultimum Judaicæ gentis ex-cidium; quod contigit anno 70, imò, juxta communem ac certam chronologiam, nonnisi versus finem primi sæculi exarata sunt. Unde patet quàm serò, ex ejus sententiâ, hujusmodi mysteria in scriptis et quidem unius solum

Apostoli consignata fuerint. 3º Ita Berruyerus quæ versus illos sequuntur aut antecedunt, interpretatur, ut iis omnem adimat vim probandi seu mysterium trium in Deo uno personarum distinctarum, seu Divinitatem et Incarnationem Verbi. Enimverò vocibus, *Filius Dei*, quæ in eodem capite 5 sæpè occurrunt, nempe versibus 5, 9, 10, 11, 12, 13, 20, contendit significari in recto sanctissimam Christi humanitatem unitam, seu, ut ipse loqui amat, Hominem-Deum per hanc unionem factum Filium Dei unius, qui juxta fidem catholicam in tribus personis subsistit. Vult ergo ejusmodi versiculis significari Deum unum esse alio sensu Patrem Jesu Christi, quàm cùm Pater dicitur prima persona Trinitatis. Ergo dat ansam Socinianis jure ac meritò respondendi in versiculo septimo : *Tres sunt*, etc., nomen *Patris*, pariter intelligendum esse de Deo uno et eadem ratione considerato, quâ juxta ipsum est Pater Christi. Quo posito, nullius efficaciam redderetur versus septimus ad Trinitatem personarum in Deo comprobendam. Consule determinationem seu censuram sacræ Facultatis Parisiensis ad propositiones XLIII, et CXXXVIII.

Quod ad versiculos capitis 1 Evangelii sancti Joannis : *Verbum erat apud Deum et Deus erat Verbum..... et Verbum caro factum est*, eis perinde omne robur interpretatione suâ detrahit. Scilicet contra apertam Evangelistæ mentem vult subjectum primæ pericope versiculi primi, *in principio erat Verbum*, esse pronomen, ille quod referatur ad Jesum Christum in titulo memoratum. Adeò ut sensus sit, Evangelium Jesu Christi secundum Joannem. Ille (Jesus Christus) id est, ex ejus mente, humanitas Christi, personæ uni divinæ unita, *in principio erat Verbum, et Verbum erat apud Deum, et Deus erat Verbum*. En quod Christus seu humanitas Christi in personâ unâ subsistens, *erat in principio apud Deum*. Deinde nihil immutat quidem in vocibus : *et Verbum caro factum est*, sed ista, *et habitavit in nobis*, ex ejus sententiâ dicuntur in recto de humanitate Christi unitâ personæ uni divinæ, ut et reliquum versiculum decimum quartum. His verò et aliis commentis ita versiculos primos quatuordecim capitis 1 Evangelii secundum Joannem perturbat et contorquet, ut nonnisi sensus fidei novicos spirent. Videatur censura sacræ Facultatis Parisiensis ad propositionem LII.

ARTICULUS III.

Idem error Harduini et Berruyerii relativè ad traditionem consideratus explicatur.

Enarravimus articulo præcedenti juxta Berruyerum hunc fuisse Christianorum primo seculo et dùm viverent Apostoli, *usum communem, ut appellatio illa, Filius Dei, appellaret in recto sanctissimam Jesu Christi humanitatem, per operationem Spiritus sancti transeuntem et liberam, personæ uni divinæ unione substantiali conjunctam in unitatem personæ, et divinæ consortium naturæ*; atque hunc usum eo ævo ita fuisse apud Christianos receptum, ut Joannes dicere debuerit: *Verbum caro factum est*, non verò *Filius Dei factus est homo*; quia si dixisset: *Filius Dei factus est caro*, dicere ex usu loquendi creditus fuisset: *Humanitas Christi, sive Christus-Homo factus est homo*; quod quàm ineptum sit et Scripturæ sacræ indignum, nemo est qui non sentiat.

Inde verò quid in ordine ad traditionem ipsam circa eandem notionem Jesu Christi Filii Dei consequatur, jam exponendum venit. Utemur verbis sacræ Facultatis. « Hæc propositione (quæ est XLVI), magis ac magis, inquit, innotescit perversitas novi systematis auctoris. Si nomina, *Jesu Christi, Christi-Hominis et Filii Dei*, tum apud auctores sacros, tum secundum usum Christianorum primi seculi, nihil aliud significabant nisi humanitatem Christi sanctissimam personæ uni divinæ unitam; undenam ortum ducit ille ejusmodi vocum sensus, qui exprimitur in symbolis, in catechismis, in omnibus sanctorum Patrum scriptis; Undenam oritur ipsa fides catholica de Christo, quæ illis vocibus alligatur et transmittitur? Siquidem *fides ex auditu*, ut ait Apostolus. In fidei ergo Symbolo quod Apostolorum dicitur, quodque ab ipsis Ecclesia catholica accepit, hæc verba: *Credo... in Jesum Christum Filium ejus unicum, Dominum nostrum, qui conceptus est de Spiritu sancto, natus ex Mariâ Virgine, passus sub Pontio Pilato*, etc., hunc Apostolorum tempore habuerunt sensum: *Credo... in sanctissimam Jesu Christi humanitatem, per operationem Spiritus sancti transeuntem et liberam, personæ uni divinæ unione substantiali conjunctam in unitatem personæ et divinæ consortium naturæ; quæ humanitas hæc unione est facta in tempore Filii Dei unius et verè in tribus personis subsistentis; facta est etiam in tempore Dominus noster potestate accepta à Deo, concepta est de Spiritu sancto, nata ex Mariâ Virgine; passa sub Pontio Pilato*, etc. Cum verò illa ipsa humanitas ex

auctore, sit Filius Dei unius et verè in tribus personis subsistentis, necesse erit primum hujus Symboli articulum: *Credo in unum Deum Patrem omnipotentem*, Jesu Christi Domini nostri qui nempe sequente articulo dicitur *Filius ejus unicus*, intelligi non de Patre, primâ Trinitatis personâ, quæ ab æterno Verbum seu Filium generat, sed de Deo uno et verò in tribus personis subsistente. Quod verò deinde concipiendum erit ejusdem Symboli verbis significatum: *Credo in Spiritum sanctum*, qui post humanitatem Christi nominatur, nondum appellatâ, in recto secundâ, neque etiam distinctè primâ? Quis Christianus feret ad ejusmodi sensus blasphemos detorqueri ipsummet Symbolum quo à pueritiâ omnes primùm erudiuntur?

« Ad hæc, si nomina *Jesu Christi, Christi-Hominis, Filii Dei*, seculo quo Apostoli vixerunt, appellabant humanitatem Christi sanctissimam, etc.; si Symbolum Apostolorum secundum illum Christianorum communem usum accipiebatur; idem sanè usus perseverare debuit secundo seculo et posterioribus, donec tandem aboleretur penitus, nec ulla superesset ejusmodi usûs et significationis memoria. Proferatur ergo vel unum alicujus antiqui scriptoris secundi aut tertii seculi testimonium in quo indigitetur sensus ille quem mentibus lectorum instillare auctor satagit. Enarretur quandonam et quomodò tanta mutatio de sensu ipso Symboli omnibus ab infantiâ traditi et explicati contingere potuerit? Quas concertationes in Ecclesiâ innovatio illa excitaverit? Quæ concilia eâ de re habita sint? etc.

« Symbolum Nicænum nihil est aliud quàm ipsum Symbolum Apostolorum expositionibus auctum et illustratum necessariis adversus diversi generis hæreticos, præsertim Arianos. In hoc Symbolo dicitur, ut omnes nôrunt: *Credo in unum Deum, Patrem omnipotentem... et in unum Dominum Jesum Christum Filium Dei unigenitum, et ex Patre natum ante omnia secula, Deum de Deo, lumen de lumine, Deum verum de Deo vero; genitum non factum, consubstantialem Patri, per quem omnia facta sunt*. Hæc ita aperta sunt ut nemo putaverit ea ad sensum auctoris posse transferri. Aususne esset auctor accusare Patres Nicænos de immutato sensu quem suo Symbolo Apostoli expresserant, quem, iis docentibus, conceperant fideles primi seculi?

Cæterum, neque Symbolum Nicænum, neque illud quod nomine sancti Athanasii circumfertur, neque etiam Symbolum Apostolorum sensu

suo explicare Berruyerus tentavit. Verum aliâ viâ progreditur, ut suam Jesu Christi, Filii Dei notionem ad nos usque, traditione transmissam commemoret. Nimirum in formâ ipsâ Baptismi, in verbis signi crucis comitibus, in benedictionibus, in doxologiis, quibus Psalmi et hymni terminari solent, in clausulis quibus orationes Ecclesiae plerumque finiuntur, is sine hæsitatione contendit, et ut certum asserit voces Jesu Christi, Filii Dei esse intelligendas et ab omnibus Christianis eo intelligi sensu quem scriptoribus sacris ipsique Christo affingit. Cum autem ejusmodi interpretationum portenta omnem fidem superent, verba ipsius referenda sunt. Et primum de Baptismi formâ.

« Quæro, inquit pag. 150, 151, 155, 154, cur forma Baptismi cæterorumque sacramentorum nulla sit et invalida, si conferantur *in nomine Patris et Verbi et Spiritus sancti*, Verbi nomine nomini *Filii* subrogato? Ideò procul dubio quòd janua religionis christianæ non est unica fides mysterii contenti in tribus personis realiter distinctis, quæ sunt unus Deus; quarum prima *Pater* est ab æterno producens Verbum; secunda *Verbum* est ab æterno productum, sive generatum à Patre; tertia est *Spiritus sanctus* à Patre et Verbo, sive *Filio* ab æterno procedens; quod mysterium hætenus absconditum hominibus, à Jesu Christo Filio Dei primò revelatum est, et paulò post ab Apostolis explicitè traditum sponsæ Christi Ecclesiae, à quâ perpetuò et infallibiliter docente, illud accipimus.

« Ad christianam fidem accedentibus, necessaria pariter est fides in Jesum Christum... quæ fidei professio in eo consistit ut credamus corde et ore profiteamur, quia sanctissima Christi humanitas... Verbo Patris æterni Filii æterno... unione reali et substantiali in unitatem personæ et divinæ naturæ participationem, unita est in tempore, per transeuntem et liberam operationem Spiritus sancti... et per virtutem Altissimi... quæ operatio transiens et libera, sit vera generatio faciens *Deo Filium* verum et naturalem, Deo Abraham, Isaac et Jacob, Deo benedicto vivo et altissimo, fundansque realem et physicam relationem Patris ad Filium et Filii ad Patrem, inter Deum sub eâ reduplicatione cognitum, et Jesum habentem sanctissimam suam humanitatem, Verbi subsistentiâ completam... Hæc ergo et singula qui explicitè non credit et confitetur de Domino nostro Jesu Christo Filio Dei, nescio quid in Scripturis novi Testamenti videat...

« Atqui, pergit, fides illa quæ totum Jesum semel et simul repræsentat, in unâ voce, *Filius*, continetur... Non continetur autem in illâ voce, *Verbum*, nec eâ exprimitur, Verbum abstrahit à Filio qui *factus est* in tempore *Deo Filius ex semine David... secundum carnem*. Idem dici non potest de voce illâ, *Filius*. Non abstrahit vox illa à *Verbo*. Duo è contra in ore christiano de Verbo affirmat, et Verbum esse Deum, Filium ab æterno consubstantialem Patri, et Verbum fuisse in tempore hypostaticè unitum humanitati Christi sanctissimæ; quorum si alterutrum non poneretur, Christus sub allatâ notione dici non posset Filius Dei verus et naturalis; sed et præterea vox illa, *Filius*, importat in recto sanctissimam Christi humanitatem in genere subsistendi, per subsistentiam Verbi, completam. Hæc autem dogmata, cum æquè essentialiter pertineant ad fidem catholicam, et à quolibet viro christiano credi debeant explicitè, ideò de illis expressa fit mentio in formâ sacramentorum, ac præcipuè Baptismi, qui est cæterorum janua, et qui sub eâ enuntiatione conferendus est: *In nomine Patris, et Filii, et Spiritus sancti*; non autem, *Patris et Verbi et Spiritus sancti*; sub quâ posteriori formâ collatus Baptismus, profectò ut nullius valoris iteraretur. »

Obiter observa quòd progrediatur Berruyerus. Novam quam inducit Jesu Christi, Filii Dei notionem, non modò pronuntiat esse dogma fidei, sed et illius fidei necessitatem æquiparat necessitati fidei et sanctissimæ Trinitatis et generationis æternæ Verbi. Sed quod præcipuè ad nostrum institutum eò loci attinet istud est quod effutit: *Sed et præterea vox illa (Filius)*, in Baptismatis formâ *importat in recto sanctissimam Christi humanitatem in genere subsistendi subsistentiâ Verbi completam*. Ergo in illâ formâ loco vocis, *Filii*, substituenda est in recto humanitas illa Christi sic completa. Adeòque Pater in illâ formâ jam non erit prima Trinitatis persona, sed Deus unus et verus qui in tribus personis subsistit. Proinde formæ Baptismi ad sensum Berruyeri explicatæ is erit sensus: « In nomine Dei in tribus personis subsistentis qui uniendo in tempore humanitatem Verbo, factus est Pater; et humanitatis Christi Verbo conjunctæ in personæ unitatem, quæ humanitas est Filius; et Spiritus sancti. » Fatemur in hac formulâ ad mentem Berruyeri sic expositâ, à nobis nesciri quid nomine Spiritus sancti intelligat.

Sed videamus quid de clausulis orationum et

aliis memoratis statuatur. « Similiter, ait uno tenore pag. 154, 155, et eodem planè sensu intelligenda est vox illa, *Filius*, in Ecclesiæ usu communi et quotidiano : cum, verbi gratiâ, omnes orationes suas in hanc deducit clausulam : *Per Dominum nostrum Jesum Christum Filium tuum* ; cum Christianus quilibet doceatur signare se signo crucis sub illâ verborum formulâ : *In nomine Patris, et Filii, et Spiritûs sancti* ; in celebri et notissimo inter fideles glorificationis Cântico : *Gloria Patri, et Filio, et Spiritui sancto* ; in formulis quibus sacerdos, etiam divinum Christi corpus in manu gerens benedicit populo : *Benedicat vos omnipotens Deus, Pater, et Filius, et Spiritus sanctus* ; vel : *Benedictio Dei omnipotentis Patris, et Filii, et Spiritûs sancti, descendat super vos* ; et similibus. Quotus quisque enim est christianus etiam de plebe qui se signans signo crucis : *In nomine Patris et Filii et Spiritûs sancti*, non credat invocare se et tres in Deo uno personas, Patrem et Verbum et Spiritum sanctum, insuper et Jesum Christum, Filium Dei, salvatorem suum, sive sanctissimam Jesu Christi Domini nostri humanitatem personæ uni divinæ hypostaticè unitam ? Quis, dum à sacerdote sub illis formulis benedicitur non credit se benedici in nomine Jesu Christi Salvatoris sui, *facti Deo in tempore Filii, ex semine David secundum carnem* ? Usque adeò Christianis omnibus, ex quodam quasi naturali sensu fidei et religionis instinctu persuasum est, nomen illud, *Filius*, etiam nomini Patris et Spiritûs sancti conjunctum appellari in omni cultus Christiani exercitio sanctissimam Jesu Christi humanitatem, Verbo hypostaticè unitam, illamque designare in recto propriâ sibi appellatione, cum necessariâ tamen formali et individuâ annotatione personæ divinæ in quâ subsistit sanctissima hæc humanitas. Pater ergo quoties in prædicatione logicâ Christo Jesu Filio Dei opponitur, intelligendus est Deus unus et verus, in tribus personis subsistens, cui et nos adoptionis nostræ titulo... dicimus... *Pater noster, qui es in cælis*; Ephes. 1, 2 : *Gratia vobis et pax à Deo Patre nostro, et Domino Jesu Christo*. 3 : *Benedictus Deus et Pater Domini nostri Jesu Christi*,.. quæ si quis interpretari velit de Deo, Patre, ut est persona in divinis distincta et ab æterno Verbi Pater ; de Verbo, ut est ab æterno Patris Filius, de cujus nomine *Jesus Christus* dicatur Filius Dei, non autem de Deo uno in tribus personis subsistente et de humanitate Christi sanctissimâ

per Verbi subsistentiam in genere subsistendi completâ, mirum est quantum aberret à doctrinâ et instituto Apostoli loquente de Deo Patre Jesu Christi et nostro. »

Ignorat Berruyerius aut videri vult ignorare, juxta fidem, Deum Patrem primam personam dicendum esse à nobis Patrem nostrum, quo adoptati sumus ; quemadmodum et Pater noster quoque reverà dicendus est Deus unus in tribus personis subsistens. Sed de his postea. Satis impræsentiarum est annotari in omnibus formulis prædictis nomine, *Filius*, appellari secundum Berruyeri mentem, sanctissimam Jesu Christi humanitatem Verbo hypostaticè unitam, illamque designari in recto propriâ sibi appellatione nempe nomine illo, *Filius*, cum necessariâ tamen connotatione personæ divinæ in quâ subsistit hæc humanitas ; Patrem ergo in iisdem formulis in quibus apponitur Christo Jesu Filio Dei intelligendum esse Deum unum et verum in tribus personis subsistentem ; neque magis in hisce formulis nomine Patris esse intelligendum Patrem primam Trinitatis personam, et nomine Filii Verbum, seu Filium æternum, seu secundam personam, de cujus nomine Jesus Christus ibi dicatur Filius Dei, quàm in locis Apostoli quæ citat, et in quibus interpretandis mirum in modum ab Apostoli scopo juxta ejusdem Berruyeri sententiam, is aberraret, qui Patrem non acciperet de Deo uno in tribus personis subsistente, et Filium Dei de humanitate Christi sanctissimâ per Verbi subsistentiam in genere subsistendi completâ.

Itaque, cum orationes sic concluduntur : *Per Dominum nostrum Jesum Christum Filium tuum qui tecum vivit et regnat in unitate Spiritûs sancti Deus*, etc. ; ex Berruyero sensus est : Per humanitatem Christi personæ uni divinæ unitam, quæ humanitas per hanc unionem facta est in tempore, Filius Dei in tribus personis subsistentis, et quæ cum Deo uno et vero in tribus personis subsistente vivit et regnat in unitate Spiritûs sancti Deus per omnia secula seculorum. Cum fidelis se signans signo crucis ait : *In nomine Patris, et Filii et Spiritûs sancti*, sensus est : In nomine Dei in tribus personis subsistentis qui Pater est Christi quatenus ejus humanitatem Verbo univit, et sanctissimæ Christi humanitatis quæ per unionem suâ cum personâ unâ divinâ facta est Filius Dei, et Spiritûs sancti. Idem sonant formulæ Benedictio-nis, ut et glorificationis : *gloria Patri, et Filio, et Spiritui sancto*. Quibus positâs paraphrasibus et interpretationibus, jam diximus à nobis ignorari

quid possit Spiritus sancti nomine designari.

Non autem omittendum illas ex Berruyero in ejusmodi formulis acceptiones vocum *Patris* et *Filii*, communes esse *Christianis omnibus*, ad usum Ecclesiae quotidianum attinere, oriri ex quodam quasi naturali sensu fidei et religionis instinctu et in omni cultus christiani exercitio locum habere. Ergone etiam in Symbolis fidei? iis non ausus est distortas interpretationes suas ex professo et conceptis verbis accommodare, neque etiam Catechismis, quibus tamen si illae non congruant, sicuti eas non congruere compertum est, jam vel ex eo solo planum fit quantum à veritate aberret in explicandis his formulis, quas profectò fideles intelligunt juxta notiones *Dei Patris* et *Filii* quas è Symbolis et Catechismis hauriunt.

Si porrò inquiras, quid de conciliorum et sanctorum Patrum documentis circa illud idem statuatur? de iis silet ipso tomo octavo partis secundae Historiae Populi Dei dissertationes latinas complectente, in quibus juxta auctorem et ejus defensores evolvuntur et stabiliuntur maximi momenti principia ad opus integrum spectantia. Ibi quidem commemorat aliquando et rarissimè sanctos Patres, at solum ut eorum interpretationes circa Scripturarum quaedam loca refellat.

Quòd si alicubi de *Patrum dogmatibus* mentionem aliquam injiciat, ea dignosci jubet ex solà praesentis Ecclesiae docentis traditione quae docere non potest nisi quod à Patribus communi consensu est traditum, et quā solā quae fuerit Patrum fides, ut quae documenta, possumus sine litiogiosae criticae regulis consequi. « Inutilement, inquit tertiā parte, tomo IV, pag. 204 et 205, on a recours à ces règles d'une critique contentieuse, lorsqu'on a pour soi, sans critique et sans contention, le témoignage de la tradition de plus de dix-sept siècles, renfermé dans le seul témoignage de l'Eglise actuellement enseignante en matière d'Ecriture comme en matière de dogme; l'Eglise qui nous gouverne aujourd'hui ne peut enseigner que ce qu'enseignait avant elle l'Eglise du siècle précédent, et par une conséquence nécessaire, en remontant de la même sorte de siècle en siècle, elle nous donne aujourd'hui pour Ecriture canonique et pour ouvrage de saint Paul, ce qu'elle présentait comme tel à ses enfants dès son origine. Elle n'a reçu sur cet objet de son enseignement aucunes nouvelles connaissances, et ce n'est point sur des conjectures qu'elle nous instruit. »

Ad quam propositionem haec habet sacra Facultas Parisiensis (vide cens. prop. CCXL): *Haec propositio captiosa est, et miscet vera cum falsis.*

« Illud enim verum est, nimirum testimonium Ecclesiae praesentis de canonicitate librorum aut alicujus libri Scripturae sacrae sufficere ut illi libri habeantur ut sacri et canonici. Verum quoque istud est, scilicet testimonium traditionis uniformis per septem decim secula eo sensu includi in testimonio Ecclesiae praesentis, quòd nihil novi de Scripturis canonicis et fidei dogmatibus doceat Ecclesia quā hodiè instruimur. Ecclesia enim infallibilis est in docendo ea quae ad fidem et mores attinent; sibi proinde semper constans sit necesse est, neque à se ipsā unquam potest esse in his rebus discors et diversa. Verum quoque est Ecclesiam circa fidei doctrinam et librorum sacrorum canonicitatem non imbui cognitionibus novis, seu novis non illustrari revelationibus divinis. Verum est denique eam, dum nos docet, non inniti conjecturis.

« At vero falsum est inutiliter adhiberi critices regulas ad asserendam librorum sacrorum canonicitatem, minimèque sequitur earum usum esse inutilem ex eo quòd de illarum canonicitate habeatur Ecclesiae testimonium. Hae enim critices regulae inserviunt tum ad persuadendam hanc canonicitatem iis, qui nondum Ecclesiae auctoritatem infallibilem agnoscerent; tum ad confirmandos animos ipsorum fidelium, fovendamque ipsorum fidem et fiduciam, quam meritò collocant in auctoritate Ecclesiae; tum ad revincendos viā examinis ac discussionis eos qui Ecclesiae testimonio, seu judicio et documentis de hac canonicitate assentiri renuerent.

« Falsum etiam istud est, nempe testimonium Traditionis septemdecim seculorum, seu de dogmatibus, seu de canonicitate librorum sacrorum, esse solo testimonio Ecclesiae nunc docentis inclusum, eo sensu quòd supervacaneum sit et inutile investigari et perpendi quid contineatur traditione consignatā Patrum operibus, summorum pontificum decretis et rescriptis, ac conciliorum actis. Imò ex labore eruditorum, qui hanc, ut par est, scrutantur et expendunt, uberes percipiuntur fructus, magnaue provenit utilitas ad persuadendam, fovendam, defendendam et roborandam fidem.

« Falsum est hoc generatim ab auctore pronuntiatum, videlicet Ecclesiam universam à primā sui origine filiis suis pari consensione

et auctoritate tradidisse tanquam Scripturas canonicas, singulos illos libros sacros, quos ut tales nobis offert.... Ignoravitne auctor vulgarem illam librorum sacrorum distinctionem in libros *proto-canonicos* et *deutero-canonicos*?

« *Falsum est ea quæ de librorum sacrorum canonicitate, juxta severioris et accuratæ critices regulas statuuntur et docentur, non esse nisi conjecturas quibus Ecclesia non nititur. Imò constat sapientem critices usum in his rebus tractandis ab Ecclesiâ nedum reprobari, ut potius ab ipsâ nunquam neglectum, neque negligi potuisse, quotiescumque de libro quovis in canonem Scripturarum referendo actum est; certè in suis eâ de re definitionibus semper deprehenditur exactiores ejusmodi regulas secuta.* »

Quæ accuratè ac sapienter ad istam propositionem disseruit sacra Facultas, referre non piguit, ut perspiceretur faciliùs, quâ mente Berruyerius hic et aliis in locis ad unam præsentis Ecclesiæ traditionem seu documenta provocet. Vide etiam propositionem LXIV. Enimverò non immeritò conjicitur eum ita esse locutum, ut dum se Ecclesiæ obsequentissimum profiteretur, simul etiam novum dogma suum omnium seculorum traditioni esse consentaneum, pertenderet. Scilicet dicere non veretur, ut relatum est, secundum *communem Ecclesiæ usum*, in formulis universæ Ecclesiæ usitatissimis, in ipsâ Baptismi *formâ*, in *omni cultûs christiani exercitio*, voces Dei Patris et Filii intelligi juxta notiones quas inducere conatur. Si porrò istud tam verum esset quàm falsum est, non esset dubitandi locus, quin ipsi tota præsentis Ecclesiæ traditio unanimiter suffragaretur; adeoque posthabitis litigiosæ critices regulis, ipsi quoque faveret omnium præteritorum seculorum traditio.

Cùm verò post editam secundam Historiæ populi Dei partem, ob non secutam concilii Tridentini regulam de Scripturis interpretandis juxta unanimem sanctorum Patrum consensum criminaretur, istud responsum dedit: « Un théologien catholique, qui sait bien son catéchisme, je veux dire qui est instruit de la tradition de l'Église (présente), de ce qu'elle ordonne de croire et de ce qu'elle permet d'enseigner, s'il ne se départ point de cette infaillible tradition, ne s'écarte point aussi du consentement unanime des Pères, et en voici la raison: c'est que le consentement unanime des Pères n'est rien autre chose que l'enseignement commun ou uniforme de tous les pasteurs ca-

tholiques de tous les temps, unis à leur chef, joint à la croyance publique de toutes les ouailles soumises à leurs pasteurs. Enseignement et croyance de tous les siècles parvenue jusqu'au nôtre par la continuité du même enseignement et par la perpétuité de la même croyance, vivante encore et persévérante parmi nous. Quiconque donc n'interprète point la sainte Écriture contre les dogmes de la foi et contre les règles des mœurs, ne l'interprète point contre le sentiment unanime des Pères... Les auteurs ecclésiastiques considérés ainsi que je l'ai dit, sous le titre d'interprètes du sens littéral des Écritures, ce n'est pas sous ce titre que je les crois cités dans le décret du concile...

« Où est-il donc ce consentement unanime des Pères entre eux? Comment veut-on que je m'assure de leur concert et de leur unanimité?... Il faudrait un volume entier pour épuiser les impossibilités, les contradictions, les inconséquences, que renferme le sens que vous donnez au consentement unanime des Pères.

« Pourquoi voulez-vous que je me croie seul, quand j'ai avec moi la lettre originale ou du moins authentique de mon texte, jointe aux lumières que de longues combinaisons me fournissent pour son intelligence, surtout (annotetur illa vox, SURTOUT) surtout, quand inséparablement attaché aux dogmes de la tradition, je suis sûr de ne rien avancer qui soit contraire au consentement unanime des Pères et à l'édification chrétienne? »

Nullus novator pari jure non contenderit se solum non esse, cum loca Scripturarum sacrarum ad pravum suum dogma asserendum contorquet. Atque ex his patet à Berruyero ne unius quidem è sanctis Patribus afferri potuisse interpretationem alicujus librorum sacrorum loci, quæ notionibus quas obstrudit, patrocineretur.

Unum verò adjiciam, videlicet ipsum procul dubio non valdè fuisse sollicitum de iis, quæ in operibus sanctorum Patrum, aliisque veteribus monumentis ecclesiasticis poterant contineri, utpote quæ Harduinum imitatus jure existimatur suppositionis arguisse.

Græcos codices sacrorum librorum esse corruptos ab impiâ factione, decimo tertio seculo, effutiit Harduinus in *prolusione chronologiæ ex nummis restitutæ, de nummis Herodiadum, notâ II*, ad annum Christi octavum, et notâ III, ad annum Christi XCVIII; quod opusculum pri-

mâ vice typis mandatum est Parisiis anno 1695, ibidem in notâ I, ad annum Christi LI, obtrudit « ejusdam, ut habet, non semper inanis conjectoris sed nunc tamen plus justo fortassis suspiciosi, ingenioque nimium indulgentis conjecturam... Deprehendit ille, inquit, cœtum certorum hominum ante secula nescio quot extitisse, qui historiæ veteris concinnandæ partes suscepissent; qualem nunc habemus, cum nulla tunc extaret; sibi probè notam illorum ætatem atque officinam esse; atque in eam rem istis subsidio fuisse, Tullium, Plinium, Maronis Georgica, Flacci Sermones et Epistolas; nam hæc ille sola censet ex omni antiquitate sincera esse monumenta, præter inscriptiones admodum paucas... Addebat illis annalium architectis majori fuisse adjumento magnam nummorum antiquorum quam diligentissimè congegesserant suppellectilem, » etc.

Hæc arte primùm exponebat Harduinus propriam suam conjecturam, explorans quid de eâ sentirent eruditi. A superioribus verò ipsius suppressum est hoc opusculum quod malè audiebat, et exemplaria quantum fieri potuit subducta. Nihiloseciùs in *Chronologiâ suâ sacrâ veteris Testamenti*, editâ Parisiis anno 1697, idem Harduinus similia adhuc docet, et in græcos codices sacrarum Scripturarum longè fusiùs et ex instituto, non uno in loco, præsertim initio invehitur. Quapropter, promovente imprimis illustrissimo Bossuetio, tunc Meldensium episcopo, auctoritate regiâ opus extingui jussum, privilegio, quod concessum fuerat revocato. Dùm verò pararetur Amstelodami apud Joannem Ludovicum Delorme editio in-folio operum selectorum Harduini, quæ prodiit anno 1709, et duo illa scripta cum aliis ejusdem auctoris complectebatur, superiores auctoris, occasione inde acceptâ, declarationem vulgârunt quæ ad calcem Diariorum seu Commentariorum Trivoltientium anni 1708, mense decembri legitur, in quo agnoscunt *præcipuas in ejusmodi opera publicatus* (à D. de la Crose inter Protestantes erudito, in scripto cui titulus: *Vindiciæ veterum codicum contra Joannem Harduinum, societatis Jesu Patrem*, Roterodami 1708) *criminationes esse jure illatas*; aiunt *editionem illam Amstelodamensem invitâ se ipsâ fieri*, systema de veteribus codicibus, quod fatentur meritò attribui Harduino, abdicant penitus et condemnant, imprimis verò *tanquàm perniciosum* rejiciunt *paradoxum de suppositione textûs græci Scripturæ sacræ, operumque Patrum seu græcorum seu latinorum, aliorumve monumen-*

torum ecclesiasticorum quæ communiter in Ecclesiâ, ut vera agnoscuntur.

Ab iisdem coactus fuit Harduinus retractationem edere eodem in loco extantem, quâ *profitetur se sincerè subscribere prædictæ declarationi integræ superiorum, dammare se bonâ fide quidquid in operibus suis eâ declaratione damnetur, speciatimque à se dicta de factione impiâ quâ ab aliquot seculis pleraque opera ecclesiastica aut profana, hactenùs habita ut antiqua, fabricata essent.* Hæc ille, quem tamen certò constat nunquàm mutâsse sententiam, ut colligere est tum ex variis ejus operibus posthumis anno 1755 Amstelodami et Hagæ comitum publici juris factis, tum ex ejus Commentario in novum Testamentum, qui prodiit anno 1741, tum ex ejusdem colloquiis cum amicis suis conjunctissimis, et ex magnâ illâ mole operum manuscriptorum à se compositorum, quæ morti proximus commisit amico ut prælo mandarentur. Curis verò eminentissimi cardinalis de Fleury habentur in Bibliothecâ Regiâ, in cujus manuscriptorum catalogo impresso tituli illorum operum exhibentur. Legantur de Harduino Diaria Trivoltientia ad annum 1734, mensibus januario et februario et ad mensem novembrem anno 1761.

Hæc de stupendis Harduini circa antiquitatem paradoxis transcripta sunt ex notâ ad paginam 145 secundæ partis Determinationis, quam super libris Berruyeris edidit sacra Facultas.

Quid verò Berruyerus de antiquitate profanâ senserit non novimus; at, quod ad antiquitatem ecclesiasticam attinet, certum est ab ipso ea fuisse sancita ex quibus manifestè nexum est omnia monumenta traditionis ecclesiasticæ ad seculum usque decimum saltem aut undecimum totidem fuisse suppositos fœtus post secula illa editos. Enimverò de græci textûs suppositione Harduinum sequitur, uno excepto quòd eum non dicat ab impiâ factione confectum seculo decimo tertio; sed eundem à Græcis ipsis tunc fabricatum ponit, cum jam eorum Ecclesia multis erat infecta erroribus, adeoque postquàm schismate infausto ab Ecclesiâ latinâ divisi sunt; quod omnes nôrunt non incœpisse nisi post medium noni seculi, consummatum verò censendum non esse nisi undecimo seculo.

« Vous honorez hautement » (inquit in opusculo inscripto: *Réponse du P. Berruyer au libelle intitulé: Remarques, etc.*, tomo II *Défensionum* secundæ partis Historiæ populi Dei,

Nanceii edito anno 1759, pag. 222 et seqq. Vide etiam *Défense du P. Berruyer*, Avenione 1755, et Nanceii 1759) « vous honorez hautement votre grec, tel que nous l'avons aujourd'hui, du nom de texte original du nouveau Testament.

« Mais si je m'avisais de n'en pas convenir, si j'osais prétendre qu'on est bien fondé à regarder votre prétendu original comme une version de la Vulgate, faite sur la Vulgate même et fort postérieure à l'édition de la Vulgate, édition si ancienne qu'on ne peut en fixer l'époque et que votre grec n'était pas encore, lorsque celle-ci était déjà depuis bien des siècles le nouveau Testament de l'Église Romaine...

« Si j'étais assez hardi pour penser que c'est le très-ancien auteur de la Vulgate, qui, dès la naissance de l'Église de Jésus-Christ, a rassemblé tous les originaux, soit grecs, soit déjà latins des différentes parties du nouveau Testament, et qui en a fait une collection complète d'après les originaux, ou du moins sur les premières copies; que cette collection, dès les premiers siècles, a été reconnue par l'Église Romaine pour l'édition authentique; que dès lors sous l'autorité du Saint-Siège, elle a représenté comme elle représente encore aujourd'hui les véritables originaux, depuis surtout que par l'ordre du saint concile elle a été purgée des fautes de copistes, à quoi l'usage de tant de siècles l'avait nécessairement exposée, et que sa leçon est enfin inviolablement fixée, que c'est à ce titre qu'elle a seule auprès de tous les vrais fidèles le nom et les privilèges d'édition authentique.

« On n'ignore pas que les Grecs, jaloux de l'Église latine, ont fabriqué en leur langue un nouveau Testament à leur usage. On n'en détermine pas bien précisément le temps; c'est au moins lorsque leur Église était déjà infectée d'une multitude d'erreurs que leur version favorise. »

Quot in his et aliis à Berruyero in summum textus græci contemptum dictis contineantur errores severè condemnandi, quotque inde sequantur pernicioſa conſectaria, quibus nisi insulsæ essent assertiones ex quibus nexa sunt, concuteretur ipsamet revelationis christianæ certitudo, nostri non est instituti et loci hujus ostendere. Qui hæc clarè explicata legere voluerit, adeat jam sæpè laudatam Determinationem sacræ Facultatis ad propositiones LXV, LXVI, LXVII, et ad CCXXXVI, CCXXXVII et CCXXXVIII.

Unum verò duntaxat hic à nobis animadvertendum, sive seculo decimo tertio ab impiâ cohorte, ut voluit Harduinus, sive post nonum seculum à Græcis ipsis Ecclesiæ latinæ æmulis, uti Berruyerus statuit, confectus fuerit textus græcus, levissima est differentia quoad rem ipsam, et inde ex æquo consequitur omnia instrumenta græca quæ pro antiquis habentur, omnia græcorum Patrum scripta, in quibus laudatur is textus, qualis nunc est, esse totidem monumenta et scripta supposita; quod, si semel daretur, concedendum esset nihil saltem ante seculum decimum à Græcis esse scriptum quod religionem contingeret, et ad nos usque pervenerit; nullum ante idem seculum ex instrumentis græcis ad religionem spectantibus, nullam è lucubrationibus Patrum græcorum posse considerari ut monumentum genuinum aliquâ fide dignum. Unde, propter intimum inter græcam et latinam Ecclesiam ante separationem commercium, necessariò esset colligendum, neque etiam fidendum esse omnibus Latinorum scriptis, quæ tunc temporis edita existimantur.

Hinc nihil mirum quòd in *considerationibus super fide* (*Réflexions sur la foi*) ad unum archiepiscopum directis et imprimi cœptis simul atque typis mandata est pars tertia Historiæ populi Dei, nec tamen nisi anno 1760 divulgatis, Berruyerus omnes nervos contendat ut systema Harduini de suppositis traditionis monumentis periculosum non esse respectu fidei efficiat. Vide longiorem contextum ex illo opusculo excerptum in Censurâ sæpè laudatâ, ad propositiones 236, 237 et 238, p. 148 et 149 II partis.

Ibid. etiam legere est propositionem 239, quæ ex præfatione secundæ partis Historiæ populi Dei p. 30 et seqq., est desumpta, et quæ in Censurâ ostenditur magnam affinitatem habere cum iis quæ asserit Harduinus in uno ex suis operibus posthumis, anno 1733, Amstelodami et Hagæ comitum editis, cui titulus: *Athei detecti*. Ibi iste non modò recentiores multos, atheismi insulsè accusat, sed et opera quæ sancto Augustino meritò tribuuntur, propterea vitio atheismi infecta docet, quòd Deus in iis dicatur veritas, sapientia, aliisque ejusmodi nominibus abstractis designetur. Unde colligebat hæc opera non esse sancti Augustini. Quod quidem unum est ex principiis ab Harduino excogitatis ad omnem antiquitatem ecclesiasticam subvertendam; quodque propositio illa 139 Berruyeri *spirare* meritò pronuntiatur;

Hactenùs in iis exponendis, quæ ad novum Harduini et Berruyeris dogma pertinent, diutius versati sumus, quàm solemus hujusmodi rebus occupari. Verùm adeò portentosa hæc illorum est doctrina, ut, si brevioris ejus explanationem tradidissemus, nullaque ipsorum à nobis adducta fuissent testimonia, vix aliqui forsàn sibi persuadere potuissent, eos viam ita deviam esse secutos. Præterea alio de capite non inutilis expositio accurata ejusmodi perniciosi commenti; quippe quod exposuisse, jam procul dubio confutasse est.

Attamen evolvenda magisque doctrinam eandem fidei catholicæ exitialem faciunt.

CAPUT II.

Novum Harduini et Berruyeris dogma de Christi humanitate per unionem factà in tempore Filio Dei, confutatur.

Novum ejusmodi dogma tum in se, tum ratione præcipuarum ejus appendicum, duobus articulis primùm refellemus; deinde articulo tertio ostendendum erit quàm inania sint quæcumque illius stabiliendi causà ab ejus inventoribus prolata sunt.

ARTICULUS PRIMUS.

Reprobatur dogma idem in se spectatum, nempe humanitatem Christi sanctissimam personæ uni divinæ unitam Filium Dei esse naturalem.

Triplici modo hanc suam doctrinam obtrudunt Harduinus et Berruyerus. Nam 1º, cum Jesus Christus in Scripturis dicatur Filius Dei proprius, unigenitus et Filius Dei sine addito, tunc ambo ejus humanitatem esse Filium Dei significare censendi sunt, quando asserunt, quotiescumque in Scripturis de Jesu Christo aliquid enuntiatur, sive Christus de se ipso loquens inducatur, sive de Christo Deus, sive cum scriptores sacri aliquid prædicant de Christo, toties illud intelligendum esse dictum in recto de humanitate Christi sanctissimam personam uni divinæ hypostaticè unitam in personæ unitatem.

Alter modus quo eandem doctrinam exhibent, expressissimus est, et in eo consistit quòd conceptis verbis sæpè pronuntient humanitatem Christi sanctissimam, quatenus personæ uni divinæ in unitatem personæ est conjuncta, esse in recto Filium naturalem Dei unius et veri in tribus personis subsistentis, factum Deo sic considerato in tempore per actionem divinam liberam et transeuntem, quâ humanitas illa substantialiter unita est personæ uni divi-

næ; quæ actio uniens, juxta eosdem, est vera et propriè dicta generatio fundans propriè dictam rationem filiationis naturalis cadentis in humanitatem ita unitam in ordine ad Deum unum et verum qui in tribus personis subsistit, et relationem paternitatis Dei unius et veri ad Christi humanitatem unitam.

Tertius eorundem loquendi modus is est, Jesum Christum verè esse et simpliciter appellandum esse et reverà in Scripturis appellari Filium Dei unius et veri in tribus personis subsistentis naturalem, propter unionem suæ humanitatis physicam substantialem et hypostaticam personæ uni divinæ in unitatem personæ.

Secundum ex ejusmodi loquendi modis Berruyerus sæpissimè et potissimùm adhibet in secundâ è suis dissertationibus latinis tomo octavo secundæ partis Historiæ populi Dei, ubi novam hanc suam doctrinam ab Harduino acceptam ex instituto probat. Eundem offert etiam tertiâ parte tomo 4, pag. 244, ubi hæc leguntur: « La gloire de l'humanité du Christ subsistante dans une personne divine, et élevée par cette union adorable jusqu'à la dignité de Fils de Dieu, était de se voir assez grande pour satisfaire pleinement à la justice de Dieu, et pour seconder les vues de la miséricorde en faveur du salut des hommes.

Primo utitur præsertim in primâ dissertatione suâ latinâ ibidem, quâ viam parat ad secundam.

Tertium passim in dissertationibus et in toto opere usurpat, sed in secundâ et tertiâ parte Historiæ populi Dei gallicè scriptis longè frequentius quàm secundum; veritus haud dubiè ne offenderentur fideles, si in opere gallico ipsis frequenter et nudè obtruderetur Christi humanitatem, quia personæ uni divinæ substantialiter unita est, esse Filium Dei. Pro triplici porrò illâ loquendi ratione, triplex est conclusio statuenda.

CONCLUSIO I. Neque Jesus Christus dici potest in recto sanctissima ejus humanitas personæ uni divinæ hypostaticè unita in personæ unitatem; neque juxta hanc spuriam Jesu Christi notionem intelligenda sunt quæcumque enuntiantur de Jesu Christo in Scripturis, sive Christus de se ipso loquens inducatur, sive de Christo Deus, sive scriptores sacri aliquid dicant de Christo. Imò nullus est de Christo Scripturarum locus, qui juxta ejusmodi notionem intelligi debeat.

Tres sunt conclusionis partes, quæ omnes

facile ex iis probantur, quibus Dissertatione IV, capite II, articulo II, contra Nestorium fidem catholicam asseruimus de unâ in Christo personâ, nempe personâ Verbi, seu æterni Filii Dei Patris æterni. Verum, ut hæc eadem et alia in Harduinum et Berruyerum facile transferantur et contorqueantur, nihil opportunius et utilius visum est quàm verbis ipsis et maximis uti momentis, quæ adhibuit sacra Facultas in suâ Determinatione super partibus secundâ et tertiâ Historiæ populi Dei. Ex quibus perspicietur non modò rejiciendam esse novam doctrinam quâ magister et discipulus de Jesu Christo proponere audent, sed simul quænam ei inurendæ sint notæ.

Probatur itaque prima pars, videlicet quòd Jesus Christus dici nequeat in recto sanctissima Christi humanitas personæ uni divinæ hypostaticè unita in unitatem personæ. Nam 1^o hæc notio Jesu Christi *erronea est*. « Nomina enim personarum propria directè et immediatè personam designant, naturas verò non nisi quatenus ad personas attinent; hinc Petrus, v. g., perperam diceretur esse hoc corpus physicè unitum tali animæ, quippe Petrus cogitat, corpus verò ejus, etsi animæ unitum, non cogitat: nomine Petri immediatè significatur talis persona, hic homo constans tali animâ et tali corpore physicè unitis. Hoc principium certissimum est et indubitatum et in omni idiomate obtinet, Porro fides docet unicam esse in Christo personam, quæ ipsa est persona Filii Dei, Deo Patri æterno consubstantialis, duasque in eodem esse naturas, divinam nempe personæ Christi essentialem, et humanam, quam ipse in plenitudine temporum sibi hypostaticè univit. Cum ergo sacrum Jesu Christi nomen sit nomen proprium personæ, ex fide consequens est respuendam esse hanc ab auctore (post magistrum suum) traditam Jesu Christi notionem: Jesus Christus est idem ac ejus humanitas uni personæ divinæ substantialiter unita. Nulla est alia notio Jesu Christi legitima, præter istam aut æquivalentem: Jesus Christus est Filius Dei æternus pro nobis factus homo, seu est persona Filii Dei quæ hanc humanitatem sibi hypostaticè in tempore univit. »

2^o Eadem Jesu Christi notio ab Harduino et Berruyero in vecta verbo Dei scripto et tradito *apertè contraria est*. « Nempe notio Jesu Christi quam tradunt, opponitur apertè Scripturis sacris. Juxta Scripturas Christus est *Verbum caro factum*, seu Filius Dei æternus factus homo; non verò est humanitas Christi sanctissi-

ma unita hypostaticè uni personæ divinæ. Humanitas Christi, quamvis personæ uni divinæ substantialiter unita sit, quâ unione maximè perficitur, non tamen juxta Scripturas conversa est in naturam divinam; manet, juxta Scripturas, natura creata, dependens, etc., quæ, juxta easdem Scripturas, Filius Dei proprius, Filius Dei unigenitus, Deus summus, æqualis Deo nequaquàm dici potest. Atqui tamen Jesus Christus, secundum Scripturas, est Filius Dei proprius et unigenitus, est Deus summus, est æqualis Deo. Ergo Jesus Christus, secundum Scripturas, non est humanitas illa Christi sanctissima uni personæ divinæ substantialiter unita.

« Similiter opponitur universæ traditioni, apud quam nullum novæ hujus notionis reperire est vestigium; contra verò continuò deprehenditur asserta et exhibita notio Jesu Christi ex Scripturis hausta, quam modò exposuimus; quæ quidem sola potest censentire attributis tum divinis, tum humanis, Christo Domino à totâ traditione indesinenter adscriptis. Humanitas Christi unita substantialiter personæ uni divinæ, non potest dici Deus et homo, Filius ab æterno genitus, Patri consubstantialis, incarnatus et homo factus; id evidentissimum est ex regulis communicationis idiomatum, et fide certum. Atqui tamen hæc sunt, quæ traditione universâ prædicantur de Jesu Christo. *Hæc est fides catholica..... Hæc est fides recta..... Jesus Christus est Deus et homo.* Ita Symbolum quod sub nomine sancti Athanasii circumfertur: *Jesus Christus est Filius Dei unigenitus, ex Patre natus ante omnia secula, Deus de Deo, lumen de lumine, Deus verus de Deo vero, genitus non factus, consubstantialis Patri, incarnatus de Spiritu sancto ex Mariâ Virgine et homo factus, crucifixus, etc.* Verba sunt fidelibus notissima Symboli Nicæni, quod suum fecerunt omnia concilia œcumenica. Ergo apertè traditioni opponitur allata Jesu Christi notio: Jesus Christus est humanitas Christi sanctissima, uni personæ divinæ substantialiter unita in unitatem personæ.

3^o Eadem notio est *hæretica*. « Quod enim verbo Dei scripto et tradito apertè, directè et immediatè contradicit, id directè et immediatè opponitur dogmati fidei, quod Ecclesia ad credendum proponit, adeoque est hæreticum. »

Probatur secunda pars, scilicet quæcumque enuntiantur de Jesu Christo in Scripturis, sive Christus de se ipso loquens inducatur, sive de

Christo Deus, sive scriptores sacri aliquid dicant de Christo, non esse in recto intelligenda de sanctissimâ Christi humanitate personæ uni divinæ substantialiter unitâ in personæ unitatem. Enimverò assertum istud, omnia et singula quæ de Christo leguntur in Scripturis sive cum Christus de se ipso loquens inducitur, etc., dicta esse in recto de humanitate Christi personæ uni divinæ in personæ unitatem conjunctâ, 1^o *falsum est*. « Nimirum ne ulla quidem est, seu in novo seu in veteri Testamento de Domino nostro Jesu Christo propositio ejus objectum in recto sit humanitas illa Christi sanctissima primo conceptionis suæ instanti unita substantialiter personæ uni divinæ in unitatem personæ. Nulla est quæ directè prædicetur aut simpliciter verificetur secundum sanctissimam ejus humanitatem eadem ratione consideratam sive auctor sacer, quicumque sit, Christum de se ipso loquentem, aut de Christo Deum inducat, sive aliquid de Christo enuntiet. Una, juxta fidem Scripturis sacris directè expressam, est persona in Christo, et natura duplex, divina et humana; ergo nomen Christi, quod est nomen proprium personæ, ubique in litteris sacris significat immediatè et directè personam, quæ est persona æterni Filii Dei. Si dicatur natus, passus, mortuus, hæc directè prædicantur de ejus personâ divinâ secundum naturam humanam, quam sibi in tempore hypostaticè univit, et in eo simpliciter verificantur secundum ejusdem personam spectatam quantum ad eandem naturam humanam. Si dicatur omnipotens, æternus, æqualis Deo, hæc directè de ejus personâ prædicantur, quatenus ipsi essentialis est natura divina, et in eo simpliciter verificantur secundum personam et naturam ejus divinam. Ejusdem omnium propositionum objectum in recto est persona Christi divina secundum alterutram suam naturam, pro subiectâ, ut aiunt, materiâ. Ab hac regulâ generali quam analogia fidei et ratio præscribunt, nihil planè excipiendum, » etc.

Illud idem assertum 2^o *absonum est*. « Quid enim absonum magis quàm recedere in interpretandis Scripturis sacris de Domino nostro Jesu Christo, à regulâ obviâ, certissimâ, usitatissimâ, nullam exceptionem patiente, juxta quam nomina propria personarum designant propriè, immediatè, directè et in recto personas? »

Assertum idem 3^o *temerarium est*. « Siquidem, sine ullo fundamento, viam explicandi

Scripturas sacras de Domino nostro Jesu Christo aperit hactenùs inauditam, et ab interpretationibus sanctorum Patrum et conciliorum dissentaneam. »

4^o *Præsumptuosum est*, « cum prodant auctores, qui (vetante licet concilio Tridentino) suæ innixi prudentiæ, in rebus fidei Scripturam sacram ad sensus suos contorquent, ipsamque interpretari audent contra unanimem Patrum consensum. »

5^o *Erroneum est et fidei Divinitatis Christi exitiale*. « Namque ex ejusmodi asserto quod refellimus, sequitur loca omnia Scripturæ sacræ, quibus apertissimè Divinitas Jesu Christi declaratur, ita esse temperanda et explicanda, ut ea directè et simpliciter, seu ex integro verificentur secundum sanctissimam ejus humanitatem personæ uni divinæ substantialiter unitam in unitatem personæ; sequitur nulla ab Evangelistis et ab auctore sacro quocumque, Jesu Christo attribui characteres, prærogativas, etc., nisi quæ in recto et simpliciter attribui queant ejus humanitati sanctissimæ unitæ primo conceptionis suæ momento, per actionem Dei transeuntem et liberam, personæ uni divinæ in unitatem personæ; sequitur, v. g., ubi Apostolus Philipp. 2 ait : *Jesum Christum esse in formâ Dei et æqualem Deo*, genuinam illius loci paraphrasim esse eam quam tradit Berruyer (Hist. du peuple de Dieu, III^e partie, t. 3, p. 339) his verbis : *Avoir été fait égal à Dieu dès le premier instant de sa conception, ce fut pour lui (Jésus-Christ) le comble de sa gloire*; id est pro humanitate illâ personæ uni divinæ substantialiter unitæ; sequitur Nicænam synodum et alias œcumenicas, necnon universæ Ecclesiæ doctores et Patres aliam sibi Jesu Christi notionem efformasse ab eâ quam Scripturæ sacræ ipsis subministrabant, et quoties, in asserendâ Divinitate et æternâ generatione Christi adversus Arianos et cæteros ejusmodi dogmatum impugnatores, propositiones Scripturarum de Domino nostro Jesu Christo attulerunt, toties eos circa germanos horumce testimoniorum sensus esse allucinatos; quæ sanè nemo non perspicit quantum nocerent fidei Divinitatis Christi, nisi principium caducum, ex quo fluunt, facilè everteretur. »

Idem assertum 6^o *hæresi Arianorum et Socinianorum maximè favet*. Nempe ex eo necessariò nexum est concilia, Patres, theologos, uno verbo quotquot hactenùs asserendæ in ejusmodi hæreticos fidei catholice operam dederunt, minimè esse assecutos genuinam Domini

nostri Jesu Christi notionem quam tradunt auctores sacri, atque ad minimum ferè omnia Scripturarum testimonia quibus olim Ariani à sanctis doctoribus consultati sunt, et etiamnum Sociniani debellantur, intelligenda esse sensu Arianis et Socinianis eatenus saltem valdè accepto, quatenus inde fit ea totidem esse tela contra ipsos imbellia et sine ictu. »

7° Assertum de quo agitur *ad Nestorianismum* *conducit, adeoque iterum erroneum est.* « Nam juxta illud, humanitas Christi unita uni personæ divinæ in personæ unitatem, eaque sola, directè et in recto exprimitur in notione Jesu Christi, quæ in eo exhibetur ut vera et genuina, quippe cùm in eodem dicatur referre notionem secundum quam auctores sacri de Jesu Christo loquuntur. Quod autem solum exprimitur in recto in definitione legitimâ ejuscumque compositi quod persona est, illi indubitatum est immediatè convenire et adscribenda esse omnia jura, omnia attributa, omnes proprietates et characteres quibus persona constituitur et designatur; adeoque eò ducit assertum de quo agitur, ut omnia personæ jura, attributa, proprietates et characteres reverà et immediatè adscribantur naturæ illi humanæ Christi. *Ad Nestorianismum* ergo secundum quem, uti duplex in Christo natura divina et humana, ita etiam duplex persona, rectà concludunt. »

8° Demum *Nestorianâ tabe* idem assertum *infectum est.* Nullus est character certior personæ quàm posse de se ipso propriè loqui, et dicere : *Ego.* Id indubitatum est et omnibus compertum. Atqui natura humana personæ uni divinæ substantialiter unita in personæ unitatem, juxta assertum quod reprobamus, de se ipsâ loquitur, quippe juxta illud, Jesus Christus de se ipso loquens inducitur à scriptoribus sacris, apud quos Jesus Christus illa est humanitas Christi sanctissima personæ uni divinæ substantialiter unita in personæ unitatem. Ergo juxta illud assertum humanitas Christi unita substantialiter personæ uni divinæ est persona, duplexque in Christo persona est, uti Nestorius sentiebat.

« At, inquis, in hac ipsâ definitione Jesu Christi quam refellimus, inserta est professio unitatis personæ in Christo, eaque persona dicitur persona una divina. Ita quidem, sed quid inde? Nisi ut maximè, ejus inventores sibi non consentientes vera miscuisse falsis ad *Nestorianismum* *conducentibus et Nestorianâ tabe infectis?*

« Scilicet unicam esse in Christo personam, eamque divinam, professi sunt, ut sibi viderentur, aut saltem aliis, non recedere à fide catholicâ. A simul novandi studio abrepti humanitatem Christi, etiam dùm dicunt eam personæ uni divinæ unitam in personæ unitatem, exhibuerunt tanquàm personam, seu ei omnes characteres personæ adscripserunt; ergo, præter personam divinam, aliam admiserunt in Christo, nempe humanam, non quidem quoad nomen et conceptis verbis, sed quantum ad rem ipsam. Quapropter, sive sibi contraxerint, ut reverà sibi contradicunt, si nomen personæ unius in Christo, juxta legitimam illius vocis acceptionem usurpant; sive nomen personæ unius solum retinuerint, mutato sensu, et sic à contradictione sint liberi, manifestissimum est ab ipsis humanitatem Christi unitam repræsentari tanquàm personam, adeoque cùm aliam quoque in Christo admittant, Nestorianismi notam declinare non possunt.

« Et certè Nestorianismus in eo situs non est, quòd binæ in Christo personæ quantum ad nomen agnoscantur, sed quòd admittantur quoad rem. Nestorius ipse nunquàm dixit duplicem esse in Christo personam, Felixque et Elipandus unicam esse eamque divinam prædicabant. Jure tamen eorum doctrina damnata est tanquàm duplicem in Christo personam inducens, quia reverà de humanâ Christi naturâ ea asserebant, quæ propriè dictæ personæ characteres secum necessario importabant.

« Sed ut appareat quàm evidens sit, humanitatem Christi non potuisse de se ipsâ dicere : *Ego*, quin sit persona et hic notandum venit quàm vanum sit, quod in unâ è defensionibus sui gallicis (Avenione 1753, pag. 44, et Nanceii 1759) Berruyerius affert aut approbat afferri, ad explicandum quâ ratione, juxta suam sententiam, humanitas Christi non sit persona, quanquàm multis in locis Scripturarum ad ejus mentem intellectis, hæc ipsa humanitas Christi unita de se ipsâ loquatur et pronuntiet : *Ego*, Enimverò, cùm unus è characteribus soli personæ propriis ille sit, ut de se ipsâ verba faciens pronomen, *Ego*, usurpet, isque loquendi modus sit certum et notissimum personæ indicium, cùmque inde colligeretur Christi humanitatem, stando Berruyeri principiis, fore personam; respondit ipse aut saltem unus ex ejus defensoribus, ipso approbante, se huic humanitati tribuisse quidem, ut dicat : *Ego*. in neutro genere, non verò in masculino. Quo quidem effugio nihil magis inane est, atque in

re tam gravi illud protulisse nihil turpius. Nam 1^o, in omnibus Scripturæ locis in quibus Jesus Christus de se ipso loquens dicit, *Ego*, pronomen illud *Ego*, refertur ad Jesum antea memoratum, qui masculini generis est, et qui juxta Berruyerî mentem ibi idem est ac humanitas Christi unita. 2^o Vox quâ persona aliqua designatur, aliquando est neutrius generis et sæpè foeminini, adeoque non ex genere grammaticali, sed ex solâ proprietate sermonis æstimandum est, an pronomen *Ego* personam appellet. Dicimus ex *proprietate sermonis*, ex eo quòd aliquando per figuram, v. g., prosopopeiæ, poetis præsertim non insolitam, id quod persona non est, inducitur loquens ut persona. Quapropter, ut cognoscatur an apud scriptorem quemcumque dicens, *Ego*, sit persona, nihil interest sciri cujusnam sit generis. Unum duntaxat attendendum, an eâ ratione, oratio sit figurata, an vox propriè et sine figurâ sumatur; v. g., in hac phrasi: *Hoc mancipium ausum est dicere: Ego nolo exequi quod jubet herus*, pronomen, *Ego*, refertur ad hoc mancipium, quod est neutrius generis; intelligitur tamen certò significare personam, hoc ipso quòd ibi nulla sit figuratæ locutionis suspicio. Atqui quando Jesus de se ipso loquens à scriptoribus sacris refertur dixisse, *Ego*; ne ipse quidem Berruyerus ibi prosopopeiam aut quamecumque aliam figuram suspicabitur. 3^o Idem, tomo octavo partis secundæ Historiæ populi Dei; pag. 109, sermonem habens de versiculo 3 capitis Epistolæ ad Romanos: *De filio suo qui factus est ei ex semine David secundum carnem*; intellige, inquit, dicta *instar suppositi et in masculino genere de sanctissimâ Christi humanitate*, quæ... conjuncta est, etc. Similia in annotationibus ad illud caput effutierat Harduinus. Ergo sibi in antecessum interdixit responsionem, quam ad declinandum, quo premitur, firmissimum argumentum, in defensione suâ inaniter adhibuit. »

Probatur tertia pars, nimirum ne ullum quidem de Domino Jesu Christo extare in Scripturis locum, in quo nomini Jesu Christi humanitas ipsius unita personæ uni divinæ in recto substituenda sit. Ratio manifestissima jam allata est, nomen Jesu Christi est nomen personæ proprium adeoque personam ejus directè et immediatè semper designat. Ergo nunquam designat ejus humanitatem directè et in recto. Tam est absona idea Harduini et Berruyerî de tanto argumento, ut vix quidquam absurdius dici queat. Volunt scriptores sacros de Jesu

Christo ita esse locutos ut à nemine nisi mentis devix intelligi queant, si reipsâ crediderint unicam esse Christo personam nempe personam æterni Filii Dei Patris. Tunc nimirum, dum dicta de Christo in Scripturis noluerunt intelligi de ejus personâ, sed de ejus humanitate unitâ, similes fuere homini mente capto qui principis alicujus, v. g., Marci Aurelii historiam legens, cuncta quæ de eo dicuntur acciperet et vellet ab aliis accipi, non de persona hujus principis, sed de corpore ejus animæ ejusdem physicè unito, aut de animâ ipsius physicè unitâ ejus corpori; atque sibi videretur reperisse notionem Marci Aurelii accuratam, ejus intelligendæ historiæ, non modò utilem, sed omninò necessariam.

CONCLUSIO II. Sanctissima Christi humanitas personæ uni divinæ substantialiter et hypostaticè conjuncta in personæ unitatem, dici nequit in recto naturalis Filius Dei unius et veri in tribus personis subsistentis, agentis ad extra, et per actionem transeuntem et liberam unientem humanitatem Christi primo conceptionis suæ instanti cum personâ unâ divinâ.

Probatur 1^o, quia hæc propositio Berruyerî, quæ est XXI in Determinatione sacræ Facultatis: *secundum veram et germanam generationis, filiationisque rationem, in propositione cujus subjectum et prædicatum in recto est sanctissima Christi humanitas completa Verbo in genere subsistenti, Jesus Christus Dominus noster verè dici potest et debet naturalis Filius Dei, Dei, inquam, ut vox illa (Deus) supponit pro Deo et vero, subsistente in tribus personis, agente ad extra et per actionem transeuntem ac liberam uniente humanitatem Christi sanctissimam primo conceptionis suæ instanti cum personâ unâ divinâ, in unitatem personæ*. Hæc propositio, quatenus in eâ significatur sanctissimam Christi humanitatem personâ unâ divinâ completam in genere subsistenti, posse in recto et debere dici naturalem Filium Dei, 1^o est *falsa et erronea*. « Nam vera et germana generationis filiationisque naturalis ratio est, ut Filius sit Patri similis in naturâ. Hoc principium indubitatum est, nec ullam exceptionem patitur. Hinc naturalis Filius Dei, uti asserebant contra Arianos sancti Patres, debet esse Patri consubstantialis.

« Hunc fidei nostræ articulum, in Scripturâ et traditione consignatum, apertiùs declaravit Nicæna synodus prima generalis, juxta quam nullum aliud filiationis divinæ naturalis fundamentum est, quàm Patri consubstantialitas Sanctissima itaque Christi humanitas completa

Verbo in genere subsistendi, nec potest, nec dici debet verus et naturalis Filius Dei, nisi per unionem cum Verbo fiat naturâ Deo similis. Atqui, juxta fidem catholicam, sanctissima Christi humanitas, quantumlibet unione cum Verbo perficiatur, non est tamen naturâ Deo similis, est creata, est finita, est dependens, est passibilis, mortalis, mutationi obnoxia, etc., ipsaque ejus unio cum Verbo est quid productum in tempore. Ergo sincera fides christiana vetat ne sanctissima Christi humanitas Verbo hypostaticè unita, seu Verbo completa in genere subsistendi, dicatur in recto naturalis Filius Dei, secundum veram et germanam generationis filiationisque rationem. »

2° *Temeraria est.* « Neque enim ullibi reperitur, aut in Scripturis, aut apud sanctos Patres, ullum indicium hujusce veræ et germanæ filiationis divinæ temporalis, quæ in hac propositione tribuitur humanitati Christi, Verbo unitæ; quinimò, nulli sunt theologi, nec ii etiam quos laudat Berruyer, tanquam suorum tenaces principiorum, qui partim eundo quâ ipse ivit, tam miserè circa sanam Theologiam naufragaverint. » De ejusmodi theologis sermonem fecimus versùs finem dissertationis præcedentis, ibique jam ostendimus quantum à Berrueyro de hac ipsâ re differant.

3° *Est superstitiosa et scandalosa.* « Titulus enim qui soli Filio Dei unigenito et æterno convenit, nempe vera, germana et naturalis filiatio divina, dicitur in hac propositione, non tantum posse, sed et debere adscribi humanitati Christi sanctissimæ. Ultra modum ergo humanitatem Christi extollit, impellitque ad periculosa et pernicioosa in fide. Ergo superstitiosa est et scandalosa. »

4° *Nestorianismi est jure insimulanda.* « Nam ad declinandum Nestorianismum, non sufficit asserere unam esse in Christo personam, hancque personam esse divinam, et Christi humanitatem completam esse Verbo in genere subsistendi. Nestorius enim nunquam filios vel Christos duos, neque duas personas in Christo verbis professus est, tametsi reverà ita sentiret, atque illud ex ejus principiis et decretis esset necessariò consequens.

« Aliunde Felix et Elipandus Nestorianismi accusati sunt et ob hæreseos Nestorianæ crimen damnati in concilio Francofordiensi, licet Felix in suâ professione relatâ à Paulo Aquileiensi libro primo adversus eum, professus fuerit, *unum et eundem esse Dei et hominis Filium*, licet Felici et Elipando hoc unum obje-

cerit Adrianus summus pontifex, quòd dixerint, *Christum Filium Dei adoptivum posse nuncupari, non quidem propter humanam personam, sed propter humanitatem.* Quare ergo damnati? Quia humanitati tribuebant quod nonnisi personæ humanæ congruebat. Itaque, si propositione quam expendimus, sanctissimæ humanitati Christi, quæ dicitur completa Verbo in genere subsistendi, adscribantur characteres personæ proprii, propositio illa jure ac meritò Nestorianismi est insimulanda; hinc enim nascitur altera in Christo persona, eaque humana. Atqui res ita se habet, nam humanitas Christi in hac propositione asseritur esse subjectum et attributum in recto propositionis in quâ Jesus Christus verè dicitur naturalis Filius Dei. *Potest* quippe illa humanitas juxta auctorem *et debet dici naturalis Filius Dei secundum veram et germanam generationis, filiationisque rationem* Filii ergo duo in Christo, juxta hanc propositionem, distinguendi veniunt; *Filius æternus*, qui est Verbum ipsum, et Filius temporalis, qui est natura ipsa humana Christi, quæ dicitur Verbo completa in genere subsistendi. Porro humanitas, Christi, quamvis unita Verbo, et Verbum ipsum duo sunt realiter distincta, istud afficit filiatio æterna; illam filiatio temporalis. Duplex ergo filiatio in Christo realiter distincta, pro subjectorum realiter distinctorum conditione. Duo igitur realiter distincti Filii, natura quippe Christi humana, juxta propositionem, est verè Filius Dei, unitus quidem cum Filio æterno, sed realiter ab ipso distinctus. Jam verò si duo Filii in Christo, duæ sint personæ necessum est, Filius enim est attributum personæ, ut omnes fatentur. »

5° Dicitur potest *Nestorianismo pejor.* « Sic enim nervosè loquitur Petavius quosdam confutans qui Christum, ut est hic homo, volebant Filium naturalem constitui per filiationem temporalem ab æternâ distinctam: *Ego*, inquit, de Incarnat. lib. 7, c. 5, n. 8, illud ex adverso contendo non aliâ ratione Filium Dei naturalem esse Christum, ut est hic homo, quàm illâ ipsâ divinâ proprietate Filii; vel ut pressius insistam, nullam aliam esse vel formalem causam, quæ humanæ in Christo naturæ veri et naturalis Dei Filii conditionem tribuat, quàm divinam relationem, æternamve filietatem. Quod quidem omnibus illis probatur Scripturæ locis, et synodorum decretis et Patrum sententiis, quibus nonnisi unum esse Filium in utrâque naturâ supra demonstravimus. Hæc enim testimonia non tantum adoptivi Filii rationem intercludunt, ut-

pote ab naturali Filii proprietate diversam, sed multò magis, opinor, naturalis filietatis speciem alteram ab æternâ distinctam. Est enim tolerabilius et à catholicâ professione minùs alienum duos Filios ita statuere, ut alter propter Divinitatem et æternam generationem naturalis sit Dei Filius; alter ob communem cum cæteris hominibus naturam et creatam sanctitatem, adoptivus habeatur, quàm duos ponere naturales Dei Filios, suâ quemque ratione ac formâ naturali constantes. Hæc doctissimus Petavius contra theologos, qui (ut jam dictum est Dissertatione præcedenti) in errorem inciderant multò minùs gravem et periculosum doctrinâ quàm præsens propositio exhibet. Hæresi Nestorianâ solum dogma Incarnationis convellebatur. At propositione, de quâ agimus, Arianismus, Socinianismus, et Sabellianismus ita juvantur ut nullo jam argumento efficaci refelli possent. Quod jam ostendendum. »

6° *Impietatem Arianorum et Socinianorum juvat.* Admissâ enim propositione, de quâ agitur, ad probandam Christi Divinitatem et consubstantialitatem cum Patre, nonnisi jejunum et elumbe ducitur argumentum ex eo quòd Christus dicitur in Scripturis sine addito: *Filius Dei, Filius unigenitus, Filius Dei proprius*; quo tamen argumento, et merito quidem, maximè nisi sunt sancti Patres adversùs Arianos, utunturque hodiè theologi adversùs Socinianos. Scilicet probabant sancti Patres adversùs Arianos, et probant etiamnum theologi adversùs Socinianos Christi Divinitatem et consubstantialitatem cum Patre, eò quòd in Scripturis Christus dicatur sine addito: *Filius Dei, Filius Dei unigenitus, Filius Dei proprius*; quia n. turæ similitudo cum Patre, est de ratione filiationis propriè dictæ et naturalis; nempe inde sequitur in divinis consubstantialitatem esse Patri Filium, siquidem in divinis nulla dari potest naturæ similitudo quàm consubstantialitas. Jam verò nemo non videt hanc argumentationem omni efficacità destitui, si nomen naturalis Filii Dei verè et secundum suam veram et germanam significationem attribui possit et debeat in recto humanitati Christi sanctissimæ Verbo unitæ. Hæc attributione destruitur fundamentum sine quo ejusmodi argumentatio corrui. Nimirum eâ attributione negatur similitudinem naturæ esse de ratione verâ et germanâ filiationis naturalis, quippè cum natura humana Verbo unita non desinat esse natura humana, adeoque nec sit nec esse possit natura similis naturæ divinæ. » Ergo, etc.

Adde quòd textus supra dictos intelligi de filiatione per generationem æternam nihil cogit juxta auctorem. Unde ansa præbetur Socinianis deridendi Patres, qui, omni aliâ illorum textuum expositione rejectâ, eosdem constanter de filiatione per generationem æternam interpretati sunt.

7° *Favet Sabellianismo.* « Etenim si humanitas Christi unita personæ uni divinæ est verus et naturalis Filius Dei; ergo, quamvis unica esset in Deo persona, ut contendebant Sabelliani, posset tamen et deberet admitti verè et propriè et Deus Pater, qui esset sola persona divina, et Filius verus et naturalis Dei, qui Filius esset humanitas Christi unita soli illi personæ divinæ. Consecutio manifesta est, perspecta ab auctore et ab eo non semel concessa. Verum, datâ hæc absonâ hypothesi, jam nullius efficacix esse possunt contra Sabellianos loca Scripturæ sacræ, quibus in eos demonstrârunt sancti doctores Patrem et Filium duas esse in Deo personas. »

Probatur 2°, quia eadem propositio, quatenus hæc in eâ adjiciuntur, cum errore quem refellimus necessariò nexa, nempe Jesum Christum, seu sanctissimam Christi humanitatem verè esse Filium Dei naturalem, *ut vox illa (Deus) supponit pro Deo uno et vero, subsistente in tribus personis, agente ad extra et per actionem transeuntem et liberam uniente humanitatem Christi sanctissimam primo conceptionis suæ instanti cum personâ unâ divinâ, 1° est temeraria, erronea et perniciosa in fide, quam profanis vocum novitatibus perturbat.* « Nam, si obtineat assertio in hæc propositione contenta, dicendum erit, quidquid tandem (ut modò videbimus) effatire gestiat auctor ut consecarium illud removeat, Christum esse Filium Trinitatis, esse Filium sui ipsius, esse Filium Spiritûs sancti, quod quidem consecarium sancti Patres indignanter exceperunt, inter quos S. Fulgentius, Fragmento 52, ex libro de Invocatione Trinitatis: Quis... unquam tantæ reperiri posset insanix, inquit, qui auderet Jesum Christum totius Trinitatis Filium prædicare?... Jesus Christus... secundum carnem quidem opus est totius Trinitatis; secundum verò utramque nativitatem solius Dei Patris est Filius; quia idem solus unigenitus Deus, est temporaliter verus homo de Virgine procreatus, qui de solo Patre sine initio verus Deus est natus. Cui consonat S. Thomas his verbis: Christus est Filius Dei secundum rationem perfectam filiationis; unde debet... dici Filius Dei... solum ratione gene-

rationis æternæ, secundum quam est Filius Patris solius, et ideo nullo modo debet dici Christus Filius Spiritus sancti, nec etiam totius Trinitatis.»

Adeo à fide christianâ alienum putavit Berruyer dici Jesum Christum esse Filium Trinitatis, aut trium personarum, aut sui ipsius, aut Spiritus sancti, ut illud perneget inde sequi quod sit Filius Dei unius et veri in tribus personis subsistentis: « Ratio à priori est, inquit tomo 8 2 partis, pag. 51 et 52, quod actiones ad extra Dei unius, etsi in sensu reali sint trium æqualiter et indivisè personarum, non prædicantur tamen de tribus personis, Patre, Verbo et Spiritu sancto, aut de aliquâ illarum divisim, sed de Deo simpliciter ut unius est in naturâ.» In libello, cui titulus: *Défense de la seconde partie de l'Histoire du peuple de Dieu contre les calomnies*, etc., Avenione, 1755, pag. 17, et Nanceii, 1759, pag. 104, clarius mentem suam explicat et in hæc verba erumpit: « C'est une vérité de foi que dans la Trinité les personnes n'agissent point *ad extra*. Tous les ouvrages hors de Dieu, toutes les actions *ad extra*, sont de Dieu un subsistant en trois personnes; elles sont communes au Père, au Fils et au Saint-Esprit, parce que la nature divine qui les produit, leur est commune.»

Verum errorem sibi charissimum alio errore tueri nititur. « Idipsum, ait sacra Facultas ad propositionem XXIII, quod auctor asserere audet tanquam veritatem fidei, directè adversatur Symbolo Nicæno quo profitemur: *Patrem esse factorem cæli et terræ, omnia per Filium facta esse; et Spiritum sanctum esse vivificantem, cum Patre et Filiis simul adorari, locutum esse per Prophetas*. Nimirum, quemadmodum persona quævis intelligit et vult per suam naturam intelligentem, ita tres personæ divinæ et earum singulæ dicendæ sunt operari ad extra per naturam omnipotentem, quæ illis communis est et singulis earum essentialis. Quapropter non modò fidei Trinitatis, sed et, positâ illâ fide, rationi ipsi apertè repugnat dogma auctoris, nempe *personas divinas non operari ad extra*, quia natura divina, quæ actiones ad extra producit, est communis tribus illis personis. Imò, quia natura divina tribus personis divinis communis est, ideo tres personæ divinæ operantur ad extra per naturam divinam quæcumque extra Deum ab illâ naturâ producantur.»

Et verò, cum tribuerunt Patres et theologi actiones ad extra Deo simpliciter uni in naturâ, nunquam dixerunt tribui illas non debere per-

sonis divinis; imò, cum habuere Patres et theologi vindicandam Filii contra Arianos et Spiritus sancti contra Macedonianos Divinitatem, usi sunt et frequenter et appositè Scripturæ sacræ testimoniis, in quibus creatio, cæteræque omnipotentiae actiones tribuuntur Filio et Spiritui sancto; quod evincit putasse illos easdem omnipotentiae actiones prædicare debere de personis divinis, de Filio et Spiritu sancto.»

Itaque, cum actio uniens humanitatem Christi personæ uni divinæ, sit actio ad extra, quâ juxta Berruyerum producitur Filius Dei unius in tribus personis subsistentis; cum juxta ipsum eadem illa actio transiens et libera sit veri nominis generatio; cum denique secundum Scripturas, Symbolum fidei, et sanctos Patres hæc eadem actio sit totius Trinitatis, omniumque ac singularum personarum; sequitur quod, si Jesus Christus esset naturalis Filius Dei in tribus personis subsistentis, ipse quoque esset, velit nolit Berruyer, Filius totius Trinitatis, Filium trium personarum, Filius sui ipsius, Filius Spiritus sancti.

2º Supra dicta propositio, sub eodem respectu seu quantum ad secundam sui partem memoratam, *Nestorianismo est infecta*. « Exhibet enim in Christo Filium temporalem Dei unius in tribus personis subsistentis, quem Filium nemo non videt esse distinctum realiter à Filio æterno solius Dei Patris æterni. Duos ergo in Christo Filios auctor illâ propositionis parte prædicat æquivalentibus verbis; in quo sita fuit summa hæreseos Nestorii.»

3º *Arianismo favet atque Socinianismo*. « Nam hæc assertio: Humanitas Christi unita, verus est et naturalis Filius Dei in tribus personis subsistentis, favet maximè Arianis et Socinianis, ut jam dictum est, si in hac filiatione naturali desideretur similitudo in naturâ; atqui profectò desideratur, ut ostensum est. Præterea, si non desideretur illa similitudo in naturâ, quaternitas statim exurgeret in Deo. Nempe tres in Deo essent personæ, quibus addito Filio Dei in tribus personis subsistentis vero et naturali, in temporum plenitudine facto et distincto realiter à Filio Dei æterno, exurgeret manifestè quaternitas illa à Patribus reprobata et fidei adversa.»

4º *Favet Sabellianismo*, ut patet ex modò dictis versùs finem probationis primæ.

Probatur 5º prædicta conclusio secunda, quia frustra nititur Berruyer efficere quod,

licet statuat humanitatem Christi sanctissimam cum personæ uni divinæ hypostaticè unita sit, esse in recto naturalem Filium Dei in tribus personis subsistentis, inde tamen non sequitur duos esse in Christo Filios, sed tantum personam Christi, quæ ab æterno est Dei Filius, aliâ ratione in tempore factam esse Filium Dei in tribus personis subsistentis. Eum audiamus ibid. pag. 54 et 55 : *Per actionem unientem... fit ut secunda è personis divinis, quæ prius erat Filius Dei, propter generationem æternam, sub aliâ ratione denominetur in tempore Filius Dei, propter generationem temporalem, sive actionem Dei ad extra quâ humanitas Christi unita est hypostaticè personæ uni divinæ; denominatione, inquam, cadente in humanitatem, quia unita est Verbo, sed Verbi propriâ, quia denominationes sicut actiones et passionessunt suppositorum.*

His verbis rursus asseritur error quem rejicimus. Sed eò loci attendenda solummodo ista: *denominatione cadente in humanitatem, quia unita est Verbo, sed Verbi propriâ, quia denominationes sicut actiones et passionessunt suppositorum.* Expendendum utrum, positis principiis perpetuò à se inculcatis; positâ notione perversâ quam tradit Jesu Christi, nempe Jesus Christus idem est ac humanitas ejus sanctissima personæ uni divinæ hypostaticè unita; posito ejus errore de Jesu Christo facto in tempore Filio naturali Dei in tribus personis subsistentis, denominatione illâ temporalis Filii Dei ita *cadente in humanitatem* Christi, quia Verbo unita est, ut ipsa illa humanitas unita, in recto dicenda sit et in Scripturis dicatur temporalis Filius Dei; expendendum, inquam, utrum, his positis, eandem denominationem Filii Dei possit Berruyerius statuere *Verbi propriam, quia*, ut fert vulgare adagium, *denominationes sicut actiones et passionessunt suppositorum.* Atqui evidentissimum est ipsi non prodesse axioma illud aliàs verissimum, quod vel non intellexit, etsi sensum referat facilem et obvium, vel non protulit eò loci nisi ut fucum faceret. Scilicet quid ejusmodi axiomate: Denominationes, actiones, passionessunt suppositorum seu personarum; significatur? id unum nempe, quidquid est suppositi seu personæ sive sub uno, sive sub altero respectu, sive quatenus hanc naturam, vel illam aliam inter se physicè unitas habet, et quodcumque agat persona vel patiat per unam sui naturam, aut alteram, per unam sui facultatem et potentiam, aut per aliam, illud esse attribuendum supposito seu personæ, seu de illo esse prædicandum

directè, immediatè et in recto. Verbi gratiâ, Petrus est persona, quæ constat tali corpore et tali animâ physicè unitis; Petrus igitur dicendus habere tale corpus et tali animâ donari. Mens ejus intelligendi et volendi capax est, corpus ejus tali magnitudine et figurâ est præditum; Petrus ergo dicendus est intelligendi et volendi capax, et hâc magnitudine, atque hâc figurâ præditus. Corpus Petri movetur, læditur, etc., mens ejus hæc vel illa intelligit, desiderat, etc. Proinde Petrus enuntiatur, moveri, lædi, etc., hæc vel illa intelligens, etc. Nihil itaque usitatus in omni sermone, nihil facilius intellectu, quàm vulgare axioma, denominationes sicut actiones et passionessunt suppositorum aut personarum.

At si quis, spreto hoc alio principio: Nominibus propriis designari personas, insulsè vellet Petri nomine intelligendum in recto alterutram ejus naturam physicè alteri conjunctam, v. g., corpus ejus, ita ut Petri notio hæc esset: corpus Petri physicè ejus animæ unitum; jam omnia perturbarentur in sermone de Petro, quia multa prædicantur et prædicanda sunt de Petro, juxta omnium usum ita communem, ut in rerum ipsâ naturâ fundamentum habeat, quæ secundum illam novam Petri notionem præposterè invectam, Petro, id est, corpori Petri etiam ut unito ejus animæ non possunt attribui. Corpus enim Petri, v. g., non cogitat, non intelligit, non vult. Is porro qui notionem hanc spuriam Petri excogitaret, corpori Petri unito ejus animæ, jam proprium adscriberet personæ characterem, nempe illud designaret nomine proprio personæ. Si præterea ab illo vellet propriè dici, Ego, et cuncta quæ Petri sunt, ipsamque filii denominationem eidem attribui in recto, jam positis his insulsis hypothesibus, quis non videt ea quæ sunt ipsiusmet corporis Petri, quod instar suppositi spectaretur, jam personæ realis et veræ Petri non fore? Multò autem magis liquet, positis quæ de humanitate Christi statuit Berruyerius, titulum temporalis Filii Dei quem illi humanitati, quia personæ uni divinæ unita est, attribuit in recto, non posse adscribi personæ illi divinæ quæ in notione Jesu Christi Filii Dei, non appellatur nisi indirectè et in obliquo.

Probatur 4º, quia quocumque se vertant Harduinus et Berruyerius, si quæ filiatio divina caderet in humanitatem Christi, quia personæ divinæ unita est per actionem Dei ad extra, quæ veri nominis esset generatio, hæc filiatio non esset naturalis, sed adoptiva tantum, et

nonnisi Filium Dei adoptivum constitueret. Nam constitueret filium factum in tempore, cum ipsa esset in tempore producta, et afficeret humanitatem factam, creatam. Id non negant illi scriptores, imò perpetuò aiunt, Jesum Christum, quo nomine intelligunt ejus humanitatem in personâ unâ divinâ subsistentem, *factum esse in tempore Deo Filium ex semine David*. Atqui, Dei Filius, qui dicendus est factus, minimè naturalis est, sed tantum adoptivus. *Hæc est differentia*, inquit S. Thomas, parte 3, quæst. 23; art. 2, in corp., *inter Filium Dei adoptivum et naturalem, quod Filius Dei naturalis est genitus, non factus, Filius autem adoptivus est factus*.

Probatur 5^o ex his symboli Nicæni verbis, *genitum non factum*, dictis de Jesu Christo, Filio Dei unigenito. Nempe, juxta Harduini et Berruyerî doctrinam non debuissent dicere illius synodi Patres: *genitum, non factum*, sed, *Genitum, tum factum* Filium in plenitudine temporum.

Probatur 6^o quia *titulum Matris Dei seu æterni Filii Dei, Beatæ Mariæ Virginis verè debitum* eadem Harduini et Berruyerî assertio labefactat; nam, juxta hanc assertionem, cum Maria Virgo dicitur in Scripturis concepisse, habuisse in utero et peperisse Jesum Christum Filium Dei, sensus esset, eam esse matrem humanitatis Christi, quæ propter unionem sui hypostaticam personæ uni divinæ, vocanda esset in recto et esset reverà naturalis Filius Dei. Inde verò non consequetur eam esse Matrem Dei, seu æterni Filii Dei, nisi humanitas illa sic unita, dici debeat Deus, et æternus Dei Filius. Atqui illam humanitatem, etiam ut ita unitam dici Deum et Filium Dei æternum vetant regulæ communicationis idiomatum quas supra exposuimus et quæ ab omnibus admittuntur. « Sicque infeliciter evenit, ait sacra Facultas ad propositionem XXVI, ut qui Beatæ Mariæ Virginis honores ampliare gloriabatur auctor, nullo modo potuisset evincere Beatam Mariam Virginem esse verè Deiparam, eaque posuerit principia ex quibus consequens fit hunc ipsum titulum illi fuisse à Nestorio jure ademptum. »

Quàm rectè et planè ex adverso sic processere concilia et S. Ecclesiæ doctores! nempe ex Scripturis Beata Virgo est Mater Jesu Christi secundum carnem. Jesus Christus est Deus, est æternus Filius Dei homo factus; ergo Beata Virgo est Mater Dei, Mater est æterni Filii hominis facti, quantum ad humanitatem, quam pro salute nostrâ assumpsit, considerati.

CONCLUSIO III. Jesus Christus ex eo quòd

ejus humanitas sanctissima personæ uni divinæ in personæ unitatem hypostaticè conjuncta sit, non idcirco dicendus est naturalis Filius Dei in tribus personis subsistentis, seu (quod eodem redit et sexcenties à Berruyero post magistrum suum repetitur) non idcirco dici potest factus Deo in tribus personis subsistenti Filius naturalis ex semine David.

In mentem revocandum discrimen est quod, Harduini et Berruyerî doctrinam inter et quorundam theologorum placita quæ Dissertatione præcedenti exposuimus. Hi, adhibitis quibusdam præcisionibus mentis et reduplicationibus, dixerunt Christum ut est hic homo et secundum humanitatem suam posse dici aliquâ ratione Filium Dei naturalem propter sibi connaturalem sanctitatem et jus ad hæreditariam possessionem, in quo eos à veritate deviâsse ostensum est. Illi verò absolutè et simpliciter ac sine ullâ limitatione et restrictione pronuntiant Jesum Christum, propter unionem humanitatis suæ cum personâ unâ divinâ hypostaticam, esse factum in tempore Deo in tribus personis subsistenti Filium naturalem; atque non alio sensu eum dici in Scripturis Filium Dei, statuunt. Sic loqui amat Berruyerus in dissertationibus suis latinis. Sic parte II Historiæ populi Dei, tomo II, pag. 138, ait: « Marie savait que Jésus était véritablement Dieu, parce que la sainte humanité formée dans son sein et de son sang par l'opération du Saint-Esprit, avait été unie dès le premier instant de sa conception au Verbe de Dieu en unité de personne. » Et antea, pag. 40: « Les promesses s'accomplissent, et le Fils de Marie, en vertu de l'union substantielle du Verbe avec l'humanité, est appelé, ainsi que l'ange l'avait annoncé à Marie, et est en effet le Fils de Dieu. »

Sic tertiâ parte Historiæ populi Dei, tomo I, pag. 43 et 44: « Je dis, inquit, Notre-Seigneur Jésus-Christ, lequel a été fait le Fils de Dieu, lorsque au premier instant de sa conception miraculeuse, son humanité sainte, formée du sang de David, selon la chair, a été hypostatiquement unie à une personne divine. » Tom. II, pag. 119: « Jésus-Christ, en vertu de l'union hypostatique de la sainte humanité avec une personne divine... est le Fils unique de Dieu. » Tom. III, pag. 212: « Dieu a envoyé son fils unique Jésus-Christ, c'est l'homme de Dieu (erratum fortè est typographi, Berruyerus semper alibi dicit l'Homme-Dieu), Notre Sauveur, qui a été fait le Fils de Dieu, lorsque au premier instant de sa conception dans le sein

et du sang d'une Vierge, son humanité a été personnellement unie au Verbe de Dieu. » Tom. IV, p. 251 : « Approfondissez avec nous le Christ... que nous vous prêchons, grand par l'union de son humanité avec sa personne divine qui fait de lui un Homme-Dieu et le Fils unique de Dieu, »

Probatur conclusio 1^o ex Scripturis. Joan. 1, 14 : *Verbum caro factum est et habitavit in nobis, et vidimus gloriam ejus, gloriam quasi unigeniti à Patre, plenum gratiæ et veritatis.* Versibus 15, 16, 17 et 18. Joannes testimonium perhibet de ipso, et clamat dicens : *Hic erat quem dixi.... et de plenitudine ejus nos omnes accepimus.... quia lex per Moysen data est, gratia et veritas per Jesum Christum facta est; Deum nemo vidit unquam; unigenitus, qui est in sinu Patris, ipse enarravit.* Manifestissimum est 1^o Verbum, de quo initio capitis dictum est : *In principio erat Verbum, et Verbum erat apud Deum, et Deus erat Verbum,* esse ipsummet Verbum, quod versu 14 à sancto Joanne dicitur *caro factum* et habitasse in nobis secundum carnem à se assumptam. 2^o Illud idem Verbum carnem factum esse quoque eum *cujus* visa est gloria *quasi unigeniti à Patre.* Et vidimus, inquit Evangelista, *gloriam ejus* (Verbi carnis facti), *quasi unigeniti à Patre*, nec enim vox *ejus* ad aliud referri potest quam ad *Verbum carnem factum*, quod *habitavit in nobis.* 3^o Verbum idem *caro factum* *cujus* visa est gloria *quasi unigeniti à Patre*, ipsum est de quo *testimonium perhibere* Joannes Baptista deinde dicitur, est *Jesus Christus* uno tenore memoratus, qui etiam continuo appellatur *unigenitus qui est in sinu Patris.* Jesus Christus igitur est Verbum caro factum, *cujus* gloria est *quasi unigeniti*, ipse est *unigenitus qui est in sinu Patris*, seu ut dictum fuit de Verbo, qui est apud Patrem. Ergo Jesus Christus idcirco est unigenitus Dei Filius secundum Evangelium sancti Joannis, quia ipse est unigenitus in sinu Patris, seu quia est *Verbum caro factum*, quod est unigenitus Dei Filius. Ergo ratio, cur sit Filius Dei unicus repetenda non est ex eo quod humanitas ejus sanctissima personæ uni divinæ unita sit in personæ unitatem.

Vult Berruyer post Harduinum has voces versu 14 : *Et habitavit in nobis, et vidimus gloriam quasi unigeniti*, non referri ad *Verbum carnem factum*, sed ad Jesum Christum in titulo illius Evangelii memoratum : *Sanctum Jesu Christi Evangelium secundum Joannem.* Contendit in primâ pericope illius capitis : *In principio erat*

Verbum; supplendum esse nomen Jesu Christi, quasi diceretur : *Ille Jesus Christus, cujus scribo Evangelium, in principio erat Verbum.* Vult etiam versiculos 3, 4, 10, 11, 12, 13, intelligi de Jesu Christo, id est, ut ipse exponit, de humanitate Christi sanctissimâ (in recto), prout personæ uni divinæ hypostaticè unita est. Atque his ita sensum hujus contextûs sancti Joannis perturbat et pervertit, ut jam accipi nequeat nisi sensibus absonis et à veritate catholicâ alienis. Vide Determinationem sacræ Facultatis ad propositionem LII.

Hic sufficiat annotasse 1^o ipsismet principiis notissimis, quæ ad interpretandum quemque auctorem spectant, omnino postulari ut in versu 14 : *Et Verbum caro factum est, et habitavit in nobis, et vidimus gloriam ejus*, etc.; vox *habitavit*, intelligatur de Verbo carne facto, et pronomen, *ejus*, referatur ad Verbum et quidem immediatè, directè et in recto, atque, nisi id fiat, omnes legitimæ interpretationis regulas planè subverti necessum est. Vetant 2^o eadem leges ne subjectum, ut aiunt logici, seu nominativum, ut grammatici vocant, istius propositionis seu phrasidis, à quâ Evangelium S. Joannis incipit : *In principio erat Verbum*, repetatur à titulo; ita ut sensus sit (*Ille Jesus Christus*) *in principio erat Verbum.* Nam, præterquàm quod ibi Berruyer nomine Jesu Christi intelligit in recto humanitatem Christi unitam personæ uni divinæ, humanitas verò, licet Verbo unita, Verbum dici nequeat; hæc ejus explicatio in eo peccat quod phraseos per se sensum integrum exhibentis, accersat nominativum seu subjectum ab iis quæ præcedunt; quod veræ leges interpretandi non permittunt, quodque inprimis maximè absonum, ubi nihil præcedit quam ipse scripti titulus, in quo nomen accersitum nequidem reperitur in nominativo casu. 3^o Alii versus, quos de Jesu Christo, seu de ejus humanitate unitâ explicari jubet, ejusmodi explicationi repugnant; cum in iis dicantur, *omnia per ipsum*, nempe *Verbum facta*, ita ut *sine ipso factum sit nihil.* Omnia autem ab humanitate Christi unitâ creari non potuerunt. 4^o Paraphrasi seu commentario Berruyeri ita 14 primi versus Evangelii secundum Joannem perturbatè redduntur, ut omni quâ pollent efficaciam maximâ ad Arianos, Socinianos et Nestorianos refellendos, destituantur.

At, inquit, in ejusmodi versiculis non semel deprehenditur pronomen, *eum*, qui profectò ad Verbum referri nequit, quod est neutrius generis, benè verò convenit Jesu Christo. Apage

ineptias! Quis nescit Joannem græco idiomate esse usum; græcam verò vocem, Λόγος cui latina *Verbum*, respondet, esse masculini generis: vulgatum porrò interpretem, licet accuratum quoad rem ipsam, in hellenismos non infrequentes labi; adeoque toties ejusmodi hellenismos in editione nostrâ vulgatâ esse supponendos, quoties vis ipsa contextûs rerumque natura id postulant, uti eoloci contingit? Hasce locutiones observare solent explanatores nostri, neque illis ullo modo commoventur.

Epistolâ primâ sancti Joannis, capite 5, versu 20, de Jesu Christo hæc leguntur: *Et scimus quoniam Filius Dei venit et dedit nobis sensum, ut cognoscamus verum Deum et simus in vero Filio ejus. Hic est verus Deus.* Patet eò loci Jesum Christum verum Filium Dei, dici verum Deum. Atqui non est Deus verus, quia ejus humanitas sanctissima personæ uni divinæ hypostaticè unita est; sed quia ab æterno est à Deo Patre æterno genitus, quâ generatione necessariâ et jugi natura et omnia attributa Divinitatis ipsi communicantur; ergo non est verus Dei Filius, quia ejus sanctissima humanitas personæ uni divinæ in personæ unitatem est unita. Relege alia Scripturæ testimonia, quæ contra Nestorium allata sunt Dissertatione IV, cap. 11, art. 2.

Probatur 2^o ex Symbolis fidei. In Symbolo Nicæno et Constantinopolitano habetur: *Credo in unum Deum Patrem.... et in unum Dominum Jesum Christum Filium Dei unigenitum, et ex Patre natum ante omnia secula; Deum de Deo, lumen de lumine, Deum verum de Deo vero, genitum non factum, consubstantialem Patri, per quem omnia facta sunt, et incarnatus est de Spiritu sancto ex Mariâ Virgine, et homo factus est,* etc. En vera ratio disertè exposita cur Jesus Christus sit Filius Dei unicus; quia scilicet *est ex Deo Patre æterno natus ante omnia secula, est Deus de Deo, Deus verus de Deo vero, est genitus non factus*; ergo, juxta Symbolum ipsum fidei quod omnia et singula concilia deinde suum fecerunt, et ad cujus fidem omnes fideles instituuntur, Jesus Christus non est Filius Dei virtute unionis hypostaticæ humanitatis suæ cum personâ unâ divinâ, sed propter generationem suâ à Patre æternam. Notentur hæc Symboli verba: *genitum non factum*; contra, Berruyerius perpetuò repetit Jesum Christum esse Filium Deo in tribus personis subsistenti *factum in tempore.* Et reverà, si esset Filius Dei, virtute unionis, cum illa unio mirabilis

non facta sit nisi in tempore, proinde filiatio ejus divina esset in tempore facta, esset ergo *factus in tempore Filius Dei*, et mutanda esset professio fidei christianæ, juxta quam est *genitus, non factus.*

Similiter mutandum esset Symbolum, quod sancti Athanasii nomine inscribitur, in quo postquàm dictum est: *Filius à Patre solo est, non factus, non creatus, sed genitus*, additur de Jesu Christo: *Est ergo fides recta ut credamus et confiteamur, quia Dominus noster Jesus Christus Dei Filius, Deus est et homo. Deus est ex substantiâ Patris ante secula genitus; homo est ex substantiâ matris in seculo natus.* In eodem Symbolo præterea dicitur: *Unus Pater.... unus Filius.... unus Spiritus sanctus*; duplex verò Pater juxta Berruyerum, nempe Deus in tribus personis subsistens, et Pater æternus prima persona. Duplex quoque Filius in Christo seu duplex distincta realiter filiatio, nimirum generatio æterna Verbi in quo subsistit humanitas, et unio humanitatis Christi personæ uni divinæ, quâ unione secundum ejusdem Berruyeri sententiam verus et naturalis Dei Filius constitutus fuisset Christus, etiamsi persona cui unita est humanitas, fuisset Pater prima persona, aut Spiritus sanctus, aut etiamsi ignoraretur, an plures essent in Deo personæ, et utrum persona divina, cui unita est, sit Filius Dei Patris æternus. Supervacaneum foret congerere plurima conciliorum, romanorum pontificum, et sanctorum Patrum testimonia, quippe concilia, romani Pontifices et sancti Patres ad normam Symbolorum fidei locuti sunt et docuerunt, ac ne vel unus eorum proferri potest locus qui Harduini et Berruyeri commentis faveat.

Probatur 3^o, quia cum à Berruyero post Harduinum Jesus Christus dicitur factus in tempore Filius Dei unius et veri in tribus personis subsistentis, propterea quòd ejus humanitas in personæ unitatem hypostaticè conjuncta est personæ uni divinæ, vel nomine Jesu Christi intelligunt in recto humanitatem Christi personæ uni divinæ unitam, vel personam Jesu Christi cui illa humanitas hypostaticè unita est. Si prius, uti reverà se res habet et multoties ab iis declaratur, jam eorum assertio: Jesus Christus propter unionem humanitatis suæ cum persona unâ divinâ, est, vel factus est Filius Dei in tribus personis, subsistentis, idem significat ac si diceretur: Humanitas Christi propter ejusmodi unionem est Filius Dei, Tunc verò recurrunt omnes notæ inprimis Nestoria-

nismi et favoris Arianis et Socinianis præstiti, quibus illum errorem conclusionem secundâ affecimus, sacræ Facultatis Parisiensis determinationi adhærentes. Si posterius, id est, si in istâ assertionem: Jesus Christus est verus et naturalis Filius Dei propter unionem humanitatis suæ hypostaticam personæ uni divinæ, nomen Jesu Christi personam divinam designet; sensus assertionis ejusdem is erit: persona Jesu Christi est verus et naturalis Dei Filius propter unionem humanitatis suæ personæ uni divinæ, seu tunc facta est Filius Dei cum ejus humanitas personæ uni divinæ hypostaticè unita est. Ejusmodi autem assertio sic intellecta sensum offeret *absomum*, *blasphemum* et *hæreticum*. *Absomum* quidem, nam quid absurdius est quàm dici personam Jesu Christi quæ est Verbum, Filius Dei æternus, à Deo Patre genitus ante omnia secula, tunc factum esse Filium Dei, cum sanctissima ejus humanitas personæ uni divinæ conjuncta est, aut ab eâ unionem habuisse ut esset Filius Dei! *Blasphemum* pariter; nam dignitati personæ Christi detraberet is sensus, juxta quem ratio, cur sit Filius Dei, repeteretur ab unionem temporali, quasi antea Filius Dei persona illa non fuisset. Denique *hæreticum*, quia Symbolis fidei adversa foret illa assertio hoc sensu usurpata; quandoquidem filiatio divina illius personæ ab ejus generatione æternâ secundum illa symbola repeti debet. Adde quòd hæc nova filiatio attributa ipsi personæ Jesu Christi propter unionem humanitatis suæ hypostaticam personæ uni divinæ, esset planè distincta et omnino diversa à filiatione æternâ; adeoque, quantumvis diceretur naturalis, attamen Jesu Christo adscripta absolutè et simpliciter ac sine ullâ restrictione, ita ut ea sola attendatur, et Christum Filium Dei constituat independentem à filiatione æternâ, pejorem sensum exhibet ipsâ hæresi Felicis et Elipandi, quæ Nestorianismi nomine condemnata est.

ARTICULUS II.

Idem dogma novum Harduini et Berruyeris de Christi humanitate, propter unionem, Filio Dei, quantum ad appendices præcipuas consideratur et refellitur.

Appendices novi illius dogmatis Berruyeris et magistri ejus appellamus tum quæcumque ex illo nexa sunt, tanquàm necessaria corollaria, tum etiam quæ ad ejus integritatem his scriptoribus pertinere visa sunt. Sex verò septemve ejusmodi appendices numeramus; nempe quo

sensu intelligendum sit Jesum Christum in Scripturis dici Deum, æqualem Deo, unum cum Deo Patre, etc.; quo sensu sit Salvator, mediator et pontifex; quo sensu dicatur patrâsse miracula; an actiones quas per humanitatem suam elicuit Christus, à Verbo directæ fuerint; quis sensus vocis, *Filii*, in prædicatione Christi et Apostolorum, in formâ Baptismi, in doxologiis, in precibus Ecclesiæ, in Benedictionibus, in verbis signum crucis comitantibus; quæ sit certitudo novi dogmatis, quo sensu Christi humanitas adoranda cultu latriæ.

§ 1. De pravo sensu, quo juxta Harduinum et Berruyerum Jesus Christus est et in Scripturis dicitur *Deus et super omnia Deus benedictus in secula, unum cum Patre, æqualis Deo, immortalis, Creator*, etc.

Jesus Christus in Scripturis Deus et verus Deus appellatur; Joannis 20, 28, S. Thomas Apostolus Jesum alloquens, exclamat: *Domine meus et Deus meus*; quam fidei professionem Christus approbat. S. Joannes, Epistolæ suæ primæ v. 20, de Jesu Christo sermonem faciens, ait: *Et scimus quia Filius Dei venit; et dedit nobis sensum, ut cognoscamus Deum, et simus in vero Filio ejus, hic est verus Deus*. Dicitur *Deus super omnia*. Rom. 9, 5, hæc leguntur: *Ex quibus (patriarchis) est Christus secundum carnem qui est Deus benedictus in secula*. Dicitur *unum cum Patre*. Joan. 10, 38: *Ego et Pater inquit Christus, unum sumus*. Dicitur *æqualis Deo*; Joan v. 18: *Quærebant eum (Christum) Judæi interficere, quia Patrem suum dicebat Deum, æqualem se faciens Deo*. Quod sibi à Judæis falsò non imputatum responsione suâ Christus clarè ostendit versu sequenti dicens: *Quæcumque ille (Pater) fecerit, hæc et Filius similiter facit*. Philipp. 11, 5, 6 et 7: *Hoc sentite in vobis*, ait Apostolus, *quod et in Christo Jesu, qui cum in formâ Dei esset, non rapinam arbitratus est esse se æqualem Deo, sed exinanivit semetipsum, formam servi accipiens, et habitu inventus ut homo*. Quibus iterum significatur Christum esse Deum et Deo æqualem.

Hæc et alia testimonia, in quibus attributa et jura Dei et ipsamet creatio omnium attribuantur Christo, ipsi perfectè convenire intelliguntur juxta notionem ejus quam fides catholica suppeditat. Hæc omnia, scilicet, de personâ Jesu Christi prædicantur et in ipsam perfectè quadrant. Cum Jesus Christus sit Verbum caro factum, seu Filius Dei unigenitus

homo factus ; juxta omnem sermonis proprietatem dicendus est Deus , Deus verus , Deus super omnia , unum cum Patre , æqualis Deo , æternus , creator , etc.

At, si in omnibus Scripturæ propositionibus, in quibus sermo fit de Christo, nomine Jesu Christi, ut sciscit Berruyer, intelligenda est in recto sanctissima ejus humanitas personæ uni divinæ hypostaticè unita ; si illa ipsa humanitas unita, propter hanc unionem, denominetur in Scripturis Filius Dei unicus et proprius ; consequens est, ubi Christus etiam dicitur *Deus*, *Deus verus*, *æqualis Deo*, etc., subjectum ejusmodi propositionum, quod est Jesus Christus, idem quoque esse ac ejus humanitatem in recto personæ uni divinæ hypostaticè conjunctam, ita ut sensus sit : « humanitas Christi unita Divinitati et Verbo completa in ratione personæ, est Deus, est Deus verus, est super omnia Deus ; hæc humanitas sic unita et completa, et Pater Christi Deus unum sunt ; eadem humanitas eodem modo spectata, æqualis est Deo, est æterna, est creator, » etc. Atqui id ipsum non modò non dissimulant sequi ex suis assertionibus de Christo Scripturarum objecto et Filio Dei, sed et conceptis verbis docent. Jam retulimus locum Harduini, Commentario in novum Testamentum, pag. 307, ubi sic loquitur : *Individuum naturæ humanæ, quod est assumptum à Verbo, habet Patrem se majorem, quia Pater Deus est per naturam, individuum autem assumptum Deus est tantum per hypostaticam unionem cum Verbo, quæ facit illud individuum æquale Deo*, Philipp. 11, 6. Berruyer pariter *Hominem-Deum*, sive sanctissimam Christi humanitatem personæ uni divinæ unitam in tempore, in unitatem personæ, expressè significat in dissertationibus pag. 8, esse subjectum istarum propositionum, quæ de Jesu Christo in Scripturis leguntur : *Jesus Christus est Deus ; et super omnia benedictus in secula ; Christus et Pater Christi Deus unum sunt ; Christus est æqualis Deo, immortalis, creator*, etc. ; addit, *illas propositiones verificari in Homine-Deo* (id est, ut modo explicaverat, in sanctissimâ Christi humanitate personæ uni divinæ unitâ in tempore, in unitatem personæ), secundum suam naturam divinam nudè et simpliciter spectatam. Quæ explicatio coincidit cum illâ Harduini mox relatâ, quòd videlicet *individuum assumptum Deus est tantum per hypostaticam unionem cum Verbo, quæ facit illud individuum æquale Deo*. Videatur determinatio sacræ Facultatis ad propositiones VI et VII.

CONCLUSIO. Vi unionis hypostaticæ Christus aut ejus humanitas non sunt nec dici possunt Deus, aut Deus verus, Deus super omnia, æqualis Deo. Probatur ex iis quæ determinat sacra Facultas super Berruyeri propositione XCIV, cujus is est tenor ; III part., t. 3, pag. 559 : « Puisque vous portez le nom de Chrétiens, efforcez-vous de former dans vos cœurs les mêmes sentiments dont fut toujours animé celui de Jésus-Christ votre modèle et votre maître ; il était Dieu, vous le savez, l'union de sa sainte humanité avec une personne divine lui rendait propre tous les droits, comme la nature et tous les attributs de Dieu... Avoir été fait égal à Dieu, dès le premier moment de sa conception, ce fut pour lui le comble de sa gloire, mais il ne s'en fit jamais une raison de violence, d'usurpation et de rapine. Bien loin d'en user de la sorte, lui qui était riche et qui avait dans la dignité infinie de sa personne un droit inaliénable sur toute la gloire de ce monde, il s'est fait pauvre pour l'amour de vous. »

« Ita, inquit sacra Facultas, auctor commentatur hæc Apostoli verba Philipp. 2, 5, 6 et 7 ; *Hoc sentite in vobis quod et in Christo Jesu ; qui cum in formâ Dei esset, non rapinam arbitratus est esse se æqualem Deo ; sed semetipsum exinani-vit*, etc. » Deinde circa ejusmodi paraphrasim, seu propositionem sic pronuntiat. « *Propositio 1^o Est blasphema et hæretica*, quâ parte in eâ hæc leguntur : *Cumulata Jesu Christi gloria in eo sita fuit, quòd à primo conceptionis suæ instanti factus fuerit Deo æqualis*. » Nam vel ibi nomen Jesu Christi accipi debet, pro personâ Jesu Christi : hæc autem persona *sine blasphemiâ* et hæresi dici non potest facta fuisse æqualis Deo à momento quo Christus secundum carnem conceptus est. Nempe persona Jesu Christi, secundum fidem catholicam Scripturis, totâ traditione, ipsisque solemnibus fidei Symbolis et Catechismis expressam, est secunda sanctissimæ Trinitatis persona, Filius Dei Patris æternus, seu *Verbum* quod in tempore pro salute nostrâ *caro factum est*, cuique ab æterno et necessariò convenit essentia et natura divina, et perfecta cum Deo Patre æqualitas. Aliunde *blasphemum et hæreticum* foret dicere Jesum Christum seu personam Jesu Christi, Filium Dei æternum, secundum humanitatem quam pro nobis in tempore assumpsit, factum esse æqualem Deo, primo conceptionis suæ secundum carnem instanti. Dictum ejusmodi injuriosum esset Deo et fidei adversaretur :

æqualis Patri (Jesus Christus) *secundum divinitatem*, ait solum nomine sancti Athanasii inscriptum, *minor Patre secundum humanitatem*. Vel in eadem propositione accipitur nomen Jesu Christi sensu quem sæpè vidimus ab auctore attributum huicce eidem nomini *in singulis*, ut expressè loquitur, *propositionibus*, quæ sunt in novo præsertim Testamento, de Domino nostro Jesu Christo, vel cum Christus de se ipso loquens inducitur, vel cum de Christo Deus, vel cum scriptores sacri aliquid enuntiant de Christo proposito sibi suarum scripturarum argumento; scilicet eo sensu quod Jesus Christus dicatur esse in recto humanitas illa Christi sanctissima primo conceptionis suæ instanti unita substantialiter personæ uni divinæ. Si juxta hanc ab Harduino solo mutuatam, ipsique et auctori propriam, atque à nobis severissimè et meritò proscriptam notionem intelligatur in præsentī propositione nomen Jesu Christi, prout reipsa secundum auctoris mentem sumendum est, tunc ejusdem propositionis significatio, hæc erit: Cumulata gloria humanitatis unita substantialiter personæ uni divinæ, in eo sita est, quod hæc humanitas à primo conceptionis momento æqualis Deo facta fuerit. Qui sanè sensus est quoque blasphemus et hæreticus. Præterquàm quod enim ibi notio Jesu Christi perversa et nunquàm satis acerbè damnanda obtruditur, ille sensus majestati divinæ detrahit et fidem catholicam pessumdat, qui humanitatem Christi unitam substantialiter personæ uni divinæ, æqualem Deo facit. Christi humanitas sic unita, facta non est, juxta fidem, in primo conceptionis momento æqualis Deo; natura mansit creata et planè à Deo dependens, omninò distincta à Divinitate cui unitur substantialiter in personâ Verbi; atque uno verbo, tam infra Deum est posita, quàm à Deo vi naturæ suæ existente, omnipotente, et omnimodè perfecto distat natura creata, quantalibet perfectione insigniatur, et quocumque rerum nexu arctissimo et substantiali personæ uni divinæ conjungatur. Ita fides docet, sic et ipsa ratio. Frustra quis regeret æqualitatem de quâ auctor in istâ propositione, non esse æqualitatem physicam quâ unita Christi humanitas efficeretur naturâ Deus et æqualis Deo; sed tantum in eo consistere quod, ut Harduinus loquitur, *individuum naturæ humanæ assumptionem*, hæc assumptione factum sit Deus unione, et eatenus æquale Deo, quatenus impetrando et tanquàm causa moralis potest efficere quidquid omnipotentiâ physicâ Deus potest exequi.

Hæc verò expositione quam fatemur menti auctoris et ejus magistri consonam, potentia moralis, liberè à Deo concessa et constituta, et ab actione liberâ, quâ Deus Incarnationem operatus est, saltem omninò pendens, planè exæquaretur ac simpliciter et absolutè sine ullâ restrictione æqualis diceretur omnipotentiae Dei absolutæ et independenti. Sub hoc autem respectu considerata propositio, non modò absurda est, sed et fidem catholicam directè et immediatè impetit, ac supremam Dei Majestatem lædit, adeoque *blasphemia est et hæretica*. (Modò videbimus quantum fidei Divinitatis Christi sit exitialis.)

2º Illa propositio iterum *blasphemia est et hæretica*, quatenus in eâ habetur, *unionem sanctissimæ humanitatis Christi cum personâ unâ divinâ effecisse Christo propria omnia Dei jura, ejusque naturam et attributa*. Enimverò huc reddit distinctio inter genuinam Jesu Christi notionem et eam spuriam, quam auctor ab Harduino accepit. Juxta fidem catholicam Christus est *Verbum caro factum*, quod non habet ab humanitatis à se assumptæ unione cum personâ unâ divinâ, seu cum se ipso, quod sibi propria sint natura, attributa, et omnia jura Dei. Hæc omnia ipsius sunt necessariò et ab æterno, quia Dei Patris æterni æternus filius est, ipsi consubstantialis et naturâ Deus.

Quod si notio nominis Jesu Christi sæpius à nobis jure proscripta, eidem nomini eò loci, ad auctoris sententiam, substituat, adeoque sensus sit, unionem humanitatis Christi cum personâ unâ divinâ, huic humanitati unitæ reddidisse propria omnia Dei jura, attributa et naturam divinam; augebitur, non minuetur propositionis pravitas, obtrudetur notio Jesu Christi, quam docuimus esse erroneam, verbo Dei scripto et tradito apertè contrariam et hæreticam. Insuper non declinabuntur notæ *blasphemiarum et hæreseos* jam inustæ illi propositioni in se sumptæ. Blasphemiâ enim reus est et in hæresim labitur, qui naturæ Christi humanæ attribuit tanquàm propria naturam, attributa et omnia jura Dei. Hæc juxta fidem non conveniunt naturæ humanæ Christi *in recto*, quæ licet hypostaticè unita personæ uni divinæ, Deus non est nec appellari potest.

Objicietne aliquis auctoris apologista juxta regulas, quæ *communicationis idiomatum* à theologis appellantur, verè de Christo dici: *Deus est homo, et homo est Deus, attributa et natura et jura Dei sunt propria Christi hominis*, etc. At verò quid ista, quæ libenter amplectimur tan-

quàm catholicæ veritati congrua et fide certa, commune habent cum propositione quam perstringimus. Cùm juxta fidem catholicam ista de Christo enuntiantur : *Hic homo est Deus, habet sibi propria jura, attributa et naturam Dei*; nomine, *hujus hominis*, qui Christus est, non intelligitur in recto, secundùm eandem fidem catholicam, humanitas illa Christi sanctissima unita substantialiter personæ uni divinæ; apage abnormem et spuriam notionem soli auctori ejusque magistro Harduino arridentem; sed intelligitur persona ipsa quæ Christus est, quæ est secunda sanctissimæ Trinitatis persona, Filius Dei æternus, Verbum æternum, propter nos homines et propter nostram salutem in plenitudine temporum homo factum. Hæc autem persona, licet incarnata sit, Deus est, ipsique sunt propria omnia jura, attributa et natura Dei.

3° « *Repugnat illa propositio vi verborum sancti Pauli quorum exhibet corruptam paraphrasim. Hoc sentite in vobis, ait Apostolus, quod et in Christo Jesu, qui cùm in formâ Dei esset, non rapinam arbitratus est, esse se æqualem Deo; sed semetipsum exinanivit, formam servi accipiens, etc.* » Manifestissimum est ibi agi de personâ Jesu Christi, cùm sermo fiat de Jesu Christo qui in exemplum à Paulo proponitur. Ergo persona est Jesu Christi, de quâ dicitur quòd *in formâ Dei esset*, id est, haberet naturam Dei quòd *non rapinam arbitrata sit esse se æqualem Deo*; id est, non duxerit titulum immeritum à se usurpari, cùm ipsa, seu Christus, qui naturâ Deus est, se prædicavit esse æqualem Deo, quòd *sese exinaniverit, formam servi accipiens, etc.*, id est assumendo et sibi propriam faciendo naturam infinitè distantem à naturâ divinâ quæ sibi essentialis est, et quâ est Deo æqualis, tum per eandem assumptam à se naturam exercendo actiones summæ obedientiæ et humilitatis, quippe Christus factus est Patri æterno obediens usque ad mortem crucis. Hæc aperta sunt et obvia, atque fidem catholicam adversùs Arianos, Socinianos, Sabellianos, Nestorianos ex æquo stabiliunt et confirmant. Contra, auctor hæc eadem interpretatur sensu distorto, ut planum est, et eorundem, ut modò videbitur hæreticorum causam juvat.

Sed singulare Harduini delirium, quod auctor suum fecit, advertatur; ubi Apostolus habet : *Non rapinam arbitratus est, esse se æqualem Deo*; illi ambo legunt : *Non ejus rapinæ arbitratus est esse se æqualem*. Deinde commentantur ex eo quòd Christus esset Deo æqualis,

hunc sibi *occasionem* seu *rationem* rapinæ, seu rapiendi bona temporalia non esse arbitratum; sed vitam pauperem ab eo esse actam. At verò sanctus Paulus non ait *occasionem* aut *rationem* rapinæ, dicit, *rapinam*.

4° « *Adversatur regulæ interpretandi Scripturas sacras juxta consensum sanctorum Patrum*; » imò nemo hactenùs eum Apostoli locum hoc modo interpretatus fuerat, si Harduinum excipias.

3°. « *Causam Arianorum, Socinianorum, Sabellianorum, et Nestorianorum maxime juvat.* » 1° Enim eò tendit ut adversùs ejusmodi hæreticos inutilem reddat insignem illum Apostoli locum, qui contra illos feliciter à sanctis Ecclesiæ Patribus et à theologis urgetur, eo modo expositum quo eum interpretamur. 2° Si semel ponatur Christo, sive juxta auctorem, humanitati Christi unitæ fuisse propria omnia jura, attributa et naturam Dei, eumque à primo conceptionis instanti reddidisse æqualem Deo; Ariani, qui Verbum non esse æternum et Deum summum aiebant, jure colligent se perperam confutari à Catholicis seu nullum prorsùs esse argumentum ab illis ex eo ductum, quòd Verbo, seu Christo Filio Dei in Scripturis adscribantur tanquàm propria, jura et attributa Dei naturæque divina, ac absoluta cum Deo æqualitas.

Sociniani autem, juxta quos Christus non est nisi præco Dei sanctissimus et voluntate conjunctissimus, ab eo constitutus omnium summus Dominus, vicesque ejus ita gerens ut valeat postulando, et tanquàm causa moralis exequi quæcumque physicè potest Deus summus, Sociniani, inquam, jure contendunt, positâ auctoris paraphrasi, mirum non esse quòd idem Christus ob ejusmodi dotes sibi concessas, licet non sit Deus summus, nomine tamen Dei, nomine Filii Dei sine addito in Scripturis insigniatur, imò juribus, attributis, naturâ Dei, et æqualitate cum ipso pollens exhibeatur, utpote vi decreti Dei et potestatis sibi commissæ ea omnia valens efficere moraliter, quæ Deus per omnipotentem voluntatem.

Dicent Sabelliani humanitatem Christi sanctissimam esse arcissimo et substantiali vinculo conjunctam cum personâ illâ unicâ supremâ, quæ sola juxta ipsos Deus est. Addent humanitatem hanc ita unitam Christum esse Dei Filium, cui unio illa ita effecit propria omnia jura et attributa Dei et naturam divinam, quemque eadem unio ita reddidit Deo æqualem, ut reipsâ ipsa ejusmodi æqualitas, jura, natura et attributa de eo in sacris litteris prædicentur.

Demùm asserent Nestoriani humanitatem illam Christi ita erectam et exaltatam unione cum Verbo divino ut ipsi sint propria jura, attributa et natura Dei, posse proinde dicere: *Mea sunt Dei jura*, Dei attributa, Dei natura; quod si semel iis concederetur, jam neque ex Scripturis, neque ex fidei Symbolis, aliisque traditionis monumentis possent confutari. Præterea sequeretur ad eandem Christi humanitatem attinere ut propriè et sine metaphorâ dicat, *Ego*; quo loquendi modo nullus est alius certior et evidentior personæ character; inde concludendum

6° « Eâdem propositione Nestorianam tabem involvi. »

§ 2. *De pravo sensu, quo, secundum Berruyerum et magistrum, Christus reverà est et in Scripturis dicitur Dominus, Salvator, mediator, Pontifex, caput nostrum, sponsus Ecclesiæ, cognitor futurorum, secretorum cordis inspector, miraculorum effector, institutor sacramentorum, Spiritus sancti dator, etc.*

Hos aliosque ejusmodi titulos observat Berruyer attribui Christo propositionibus, quæ in singulis ferè sacrorum librorum paginis leguntur, atque simul disertè pronuntiat in illis omnibus propositionibus; *Christum appellari, ut est hæc numero humanitas in Verbo subsistens*. Ita tomo octavo secundæ partis, quæstione primâ, pag. 12, quòd verò ibi generaliter dicit, deinde inculcat et repetit de singulis; et probare conatur totâ illâ quæstione seu dissertatione primâ. Singula quæque illa prosecui et quantum à rectâ fide aberrant ostendere longum foret, et præterea minimè necesse est, cum stare nequeant, rejectâ et severè proscriptâ notione falsâ et absurdâ Jesu Christi quam ab Harduino hausit Berruyer et cui adeò obstinatè adhæret. Legi potest determinatio sacræ Facultatis parte primâ, sectione primâ, ad propositiones VI et VII, et undecim alias sequentes.

Sufficiat observare 1°, non tantum in dissertationibus suis latinis, sed etiam in ipsâ historîâ gallicè scriptâ Berruyer expressè tribuisse humanitati Christi in personâ unâ divinâ subsistenti dotes et titulos salvatoris et redemptoris. « La gloire de l'humanité de Christ, inquit parte tertiâ tomo 4, pag. 244, subsistante dans une personne divine, et élevée par cette union adorable jusqu'à la dignité de Fils de Dieu, était de se voir assez grande pour satisfaire pleinement à la justice de Dieu, et pour

seconder les vues de sa miséricorde en faveur du salut des hommes. » Et pag. 89 et 90 : « Il n'y a qu'un médiateur entre Dieu et les hommes; et ce médiateur unique c'est Jésus-Christ notre Seigneur, dont l'humanité sainte unie à une personne divine a offert à Dieu son Père des satisfactions plus que suffisantes pour réconcilier tous les hommes. » Rursus, paginâ 251 : « Étudiez.... le Christ que Dieu vous a donné.... grand jusque dans ses abaissements et dans ses souffrances, qui assurent pour toujours à son humanité récompensée et glorifiée, les titres inestimables de Sauveur des hommes, de modèle des Chrétiens et de Pontife de la nouvelle alliance. »

2° Observamus quadruplici modo facilitè demonstrari quàm pravè omnes illos titulos humanitati Christi personâ unâ divinâ in genere subsistendi completæ Berruyerus in recto attribuat; 1° quia illi tituli in Scripturis prædicantur de Jesu Christo. Ergo de ejus personâ, cum nomen Jesu Christi sit nomen proprium personæ et personam designet; persona autem Jesu Christi, secundum fidem catholicam, non sit humanitas ejus sanctissima personæ uni divinæ hypostaticè conjuncta, sed sit ipsummet *Verbum caro factum*, seu Filius Dei æternus pro nostrâ salute homo factus. 2° quia, juxta Symbolum Nicænum et Constantinopolitanum, Jesus Christus Dominus noster est *Filius Dei unigenitus, ex Patre natus ante omnia secula, Deus de Deo, lumen de lumine, Deus verus de Deo vero, genitus, non factus, consubstantialis Patri,...* qui propter nos homines et propter nostram salutem.... incarnatus, homo factus est; crucifixus etiam pro nobis, passus et sepultus; resurrexit tertiâ die.... venturus est judicare vivos et mortuos. Ipse est igitur Jesus Christus Filius Dei æternus, qui est *Dominus noster*, qui *homo factus est* propter nostram salutem; qui *crucifixus est pro nobis passus et sepultus est*, adeoque ipse Jesus Christus Filius Dei æternus est *Salvator ac redemptor noster*, atque *mediator unicus*. Est etiam *Judex*, cum *venturus sit judicare vivos et mortuos*. Est ergo pontifex, sponsus Ecclesiæ, caput fidelium, institutor sacramentorum, ipsique non humanitati ejus unitæ adscribendi in recto omnes dotes et characteres ex ejus titulo salvatoris et redemptoris derivantes. 3° Quemadmodum nomen Jesu Christi est nomen proprium personæ, quod personam designat; ita et de personâ immediatè dicitur quòd sit salvator, redemptor, mediator, pontifex. Hæc omnia nomina et ejusmodi alia personam di-

rectè indicant et afficiunt, non verò naturam quæ personæ esset unita et persona non esset : ergò, dùm hisce nominibus vult Berruyer post Harduinum insigniri in recto humanitatem Christi sanctissimam personæ uni divinæ unitam ; dùm hanc perhibent esse Jesum Christum, esse salvatorem, pontificem ac muniis omnibus pontificis etsalvatoris esse defunctam ; hanc humanitatem, licet personam non esse dicant, tamen ut personam reverà exhibent et ei attribuunt personæ characteres. Ergo Nestorianismum propinant. 4º Denique nemo non videt quantum Arianis et Socinianis faveant, dùm Scripturas de Jesu Christo salvatore, redemptore, pontifice, etc., explicant sensu doctrinæ et interpretationibus sanctorum Patrum et ipsimet symbolo Nicæno repugnante.

Id 3º observandum ducimus, quod Berruyerus ibid. p. 16 et 17 effutit de Christo sacramentorum institutore ; nimirum, *eo unicè sensu dici in Scripturis Jesum Christum sacramentorum institutorem, melioris Testamenti sponsorem et mediatorem*, quòd ea instituerit *humanitas ejus in personâ unâ divinâ subsistens auctoritate debitâ humanitati ejus humanæ, quia subsistit in personâ unâ divinâ*. Super quâ propositione, quæ XVIII in Determinatione collocatur, hæc notat sacra Facultas : « Hæc propositio, si hoc unum exprimeret, Jesum Christum seu personam Jesu Christi, *eo unicè sensu dici in Scripturis sacramenta instituisse*, quòd illa solùm instituerit auctoritate quâ pollebat ut homo ; quamque humanitas sua exercebat, non verò auctoritatē quâ valebat ut Deus, esset *falsa, temeraria, Scripturis divinis contraria et erronea*. Nam Jesus Christus ut homo, seu per humanitatem suam operans, habuit duntaxat potestatem ministerii principalis et excellentiæ in sacramentis instituendis. Soli autem Deo competit potestas, ut aiunt, auctoritatis et causæ principalis, seu potestas suprema et independens instituendi sacramenta, siquidem solus Deus potest signo alicui sensibili alligare vim conferendæ gratiæ. Cùm ergo fide certum sit Jesum Christum Deum esse et hominem, falsum est, temerarium, Scripturis sacris adversum et erroneum nullam agnoscere ejus Divinitatis, seu ipsius ut Dei, in sacramentorum institutione operationem.

« Verùm eamdem propositionem dicere *hæreticam* nihil vetat, si secundum genuinam suam significationem ita contrahatur : *unicus sensus quo in Scripturis Christus dicitur instituisse Sacramenta, is est, humanitatem Christi sanctissimam*

in personâ unâ divinâ subsistentem et in recto consideratam, ea instituisse juxta Scripturas. Nam posito hoc Scripturas explicandi modo, institutio sacramentorum directè, immediatè et in recto adscribitur enti creato et dependenti, quod fidei planè opponitur. »

Præterea, circa titulos mediatoris ac sponsoris novi Testamenti, adeoque circa valorem infinitum actionum et satisfactionum Christi, doctrinam obtrudit severissimè proscribendam ut modò videbitur.

Observandum 4º quantum à vero deviet Berruyer post Harduinum, cùm pag. 17 et 18, docet *actiones omnes et passiones Jesu Christi, hominis Dei, esse dignitatis, pretii, valoris et satisfactionis infinitæ.... quatenus eliciuntur effectivè à naturâ Jesu Christi humanâ, quæ humanitas Dei est, in personâ unâ divinâ subsistens*; atque Jesum Christum *eo unicè sensu dici in Scripturis mediatorem et salvatorem nostrum pro jure suo et pro meriti mensurâ superabundante*. Hæc propositione, quæ in Determinatione sacre Facultatis est XIV, idem effertur quod observatione præcedenti advertimus à Berruyero significatum, nempe, *eo unicè sensu Christum dici in Scripturis mediatorem et sponsorem novi Testamenti*, quòd ipsa sit ejus humanitas personâ unâ divinâ in genere subsistendi completa, cui in recto hi tituli adscribendi sunt.

Atqui, inquit sacra Facultas ad hanc propositionem XIV, « hæc propositio 1º duo continet quæ inter se non conveniunt. » Actionibus enim et passionibus Jesu Christi quibus pro nobis meruit et satisfecit, dignitas quidem, pretium et valor infinitus hæc propositione attribuuntur; at simul summi illius valoris pretii et dignitatis fundamentum penitus concutitur et rejicitur. Hæ quippe actiones et passiones hæc eadem propositione eatenus dicuntur esse dignitatis, pretii et valoris infiniti, quatenus natura Christi humana personæ uni divinæ substantialiter unita has elicit effectivè; adeò ut *eo unicè sensu Jesus Christus Homo-Deus dicatur in Scripturis salvator*. Atqui tamen valor summus actionum et passionum quibus Christus pro nobis meruit et satisfecit, inde reipsa oritur, juxta doctrinam in Ecclesiâ catholicâ indubitatam, quòd essent actiones et passiones personæ divinæ per naturam humanam à se assumptam operantis et patientis; nempe cùm Christus orabat, obediebat, sese humiliabat, patiebatur, etc., tunc persona divina, Filius scilicet divinus, Deus de Deo, æqualis et consubstantialis Patri, ut homo, seu per naturam humanam sibi uni-

tam operans, orabat, obediebat, sese humiliabat, patiebatur, atque *is unicus est sensus*, quo illæ actiones et passiones dignitatis infinitæ, pretii et valoris summi fuisse intelliguntur; *illo unico sensu* orationes, depressiones et passiones illæ concipiuntur à personâ; quæ verè Deus est et Deo æqualis, per naturam à se assumptam exhibitæ. Dùm ergo sensum hunc à scriptoribus sacris auctor removens, illum alium invehit, ex falsâ suâ et jam pluries damnatâ Jesu Christi notione consequentem, quo uno vult Jesum Christum, Hominem-Deum, esse salvatorem et mediatorem nostrum, illud ab eo decernitur, quod stare non potest cum summo pretio et valore actionum et passionum, quibus Christus meruit et satisfacit.

2° « *Repugnat illa propositio Symbolis fidei*, » juxta quæ Jesus Christus, Filius Dei unigenitus, æternus, Deus verus de Deo, etc., propter nos homines et propter nostram salutem homo factus, pro nobis passus est, crucifixus, mortuus. Adeoque juxta Symbola, non humanitas Christi unita Verbo, est salvator et mediator noster, quatenus produxit effectivè actiones et passiones quæ pretii sint summi propter hujus humanitatis unionem cum Verbo; sed ipsum est Verbum, ipse est Filius Dei æternus, qui naturâ humanâ à se assumptâ operans et patiens, omnia salvatoris munia obiit, actionesque elicuit et passiones toleravit, quæ propter sui dignitatem infinitam, pretii sunt et valoris summi.

3° « *Repugnat Scripturæ sacræ*. Philipp. 2, 5, 6, 7 et 8 : *Hoc sentite in vobis*, ait Apostolus, *quod et in Christo Jesu, qui cum in formâ Dei esset, non rapinam arbitratus est se esse æqualem Deo; sed exinanivit semetipsum, formam servi accipiens, in similitudinem hominum factus et habitu inventus ut homo. Humiliavit semetipsum, factus obediens usque ad mortem, mortem autem crucis*. Hæc tum per se, tum et juxta unanimem sanctorum Patrum et interpretum catholicorum consensionem, significant personam Jesu Christi, quæ in naturâ Dei est, æqualis Deo Patri, quæ semetipsam exinanivit formam servi accipiens, seu quæ naturam humanam infra Deum infinitè positam sibi hypostaticè conjunxit, eam ipsam esse personam quæ humiliavit semetipsam, et facta est obediens usque ad mortem, mortem autem crucis. Ea igitur est persona, nempe persona Filii Dei, quæ secundum humanitatem suam pro nobis se humiliavit, obedivit, passa est, cruci fuit affixa, quæ substituit partes salvatoris nostri, quæ

dignitate suâ summâ actiones et passiones, quarum sua humanitas fuit principium effectivum et subjectum, summè nobilitavit, eisque valorem et pretium infinitum contulit. Ergo, etc. Plurima alia Scripturæ testimonia omittimus. Nullum est quo contineatur unicus ille sensus quem Scripturis sacris auctor affingit.

4° Illa propositione *mysterium ineffabile redemptionis nostræ impetitur, eique impiè attentatur*, » ut ex dictis haecenus facillè est colligere; eâdemque *consensus sanctorum Patrum in interpretandis Scripturis apertè contemnitur*.

5° Observandum præterea judicium illud Berruyer *eo unice sensu in Scripturis Jesum Christum aut à se aut à scriptoribus sacris dici futurorum cognitorem, inspectorem secretorum cordis, mysteriorum revelatorem, quod futura omnia cognoverit, et cordium secreta inspexerit, et mysteria viderit in sinu Patris scientiâ infusâ... debitâ naturæ Christi humanæ, quia humanitas illa subsistit in personâ unâ divinâ, et humanitas Dei est*.

Ad quæ sacra Facultas super propositione XV hæc habet : « Hæc propositio, quæ etiam nexa est ex eâdem falsâ notione Jesu Christi ab auctore tradita : *Jesus Christus est humanitas Christi unita substantialiter personæ uni divinæ*, 1° falsa est et sacris litteris adversa. » Joan. 1, 18 : *Deum nemo vidit unquam... unigenitus Dei Filius, qui est in sinu Patris, ipse enarravit*; ubi ex toto antecedentium contextu liquet eum qui ibi dicitur unigenitus Dei Filius, esse Jesum Christum qui (juxta v. 14) est *Verbum caro factum*, quod (v. 2) *in principio erat apud Deum*, id est, in sinu Patris; quo etiam sensu Christus de se ipso ait Joan. 10, 38 : *Pater in me est, et ego in Patre*. Præposterâ ergo in propositione, de quâ agimus, explicantur hæc verba : *Unigenitus Dei Filius, qui est in sinu Patris, ipse enarravit*, de humanitate Christi ea enarrante quæ per scientiam infusam sibi, prout Verbo unita est, vidit in sinu Patris.

Pariter perperâm de solâ scientiâ infusâ humanitati Christi explicaretur is locus Joan. 2, 24 et 25 : *Jesus non credebat semetipsum eis eo quod ipse nosset omnes, et quia ei opus non erat ut quis testimonium perhiberet de homine, ipse enim sciebat quod esset in homine*; quæ ita generatim dicta adscribunt Christo characterem et titulum scrutatoris, cordium, qui character proprius est Dei juxta ipsas Scripturas Psalmo VII, 10 : *Scrutans corda et renes Deus*. Idem dicendum de iis testimoniis, in quibus Jesus Christus exhibetur ut cognitor futurorum omnium,

Non negamus tamen titulos futurorum cognitoris et cordis secretorum inspectoris, Christo ut homini, seu per humanitatem suam insipienti et cognoscenti competere. Sed non *eo unice sensu* hi tituli Christo ut homini congruunt, quòd ipse sit, ut auctori placet, natura humana Verbo unita, cui naturæ ob illam unionem debita sit scientia infusa, quâ futura prævideret et secreta cordis inspiceret. Christus est Filius Dei æternus, homo pro nobis factus in tempore, qui idcirco per ipsam naturam à se assumptam fuit cognitor futurorum et secretorum cordis inspector, quia ipsi erat propria natura divina, cui illi tituli necessariò conveniunt, et ex quâ notitiam secretorum cordis et futurorum natura Christi humana consequatur. Hinc patet discrimen iuter modum quo Christo homini tam futura quàm secreta cordium innotescebant, et rationem quâ hæc eadem Prophetis et puris hominibus aliquando fuere perspecta; his nempe non erat propria nec perpetuò insita hæc virtus, quam per intervalla temporum à Deo tanquàm à causâ sibi extraneâ quandoque recipiebant; Christus verò duabus naturis constans divinâ et humanâ in semetipso continebat omnem vim Divinitatis, et utrâque naturâ sine confusione agebat, cum cordis secreta et futura omnia intuebatur. Velle in locis Scripturæ sacræ, in quibus de operationibus per se et substantiâ supernaturalibus agitur, mentionem fieri solius humanitatis, idem est ac si negaretur apud Scripturas unquàm commemorari divinæ ejus naturæ operationes, quotiescumque de Christo operante in iis sermo sit.

2° *Opponitur interpretationi omnium sanctorum Patrum*, qui ex eo quòd Christus secreta cordis inspiceret et futura omnia cognosceret, et quæ sunt *in sinu Patris* videret, colligebant adversus Arianos ipsi Divinitatem et Patri æterno consubstantialitatem competere.

3° *Nestorianismo, Arianismo et Socinianismo favet*. Nam, si *eo unice sensu* Christus dicatur in Scripturis vidisse quæ sunt in sinu Patris, omnia futura cognovisse et secreta cordis inspexisse, quòd scientiâ infusâ suæ humanitati unitæ debitâ hæc præstaret, sequitur caduca esse argumenta quæ ex iis proprietatibus à sanctis doctoribus jure deducta sunt, ad ostendendam Christi Divinitatem et unam esse in Christo personam, nempe personam Verbi Dei; sequitur ab iis Scripturæ locis quibus, posito dogmate unionis substantialis naturæ divinæ et humanæ in Christo, unum ejus consecrarium

manifestissimum et immediatum maximè exprimitur, nempe concursus operationum utriusque naturæ in stupendis et vim naturæ humanæ per se excedentibus effectibus, hunc tamen sensum esse removendum, illumque solum esse iis locis adscribendum, quo naturæ divinæ efficientia in ejusmodi operibus non attenditur, non memoratur, proinde ac si nulla esset, atque una duntaxat Christi humanitas ejusmodi opera effecisset, quæ quantum Nestorianis, Arianis et Socinianis faveant, et ipsi mysterio *Verbi carnis facti* officiant faciliè intelligitur. Hinc

4° « Hanc eandem propositionem dicimus erroneam. »

Observandum venit 6° quod effutit Berruyer de Christo miraculorum effectore : « *Eo unice sensu*, ait pag. 13 et 14, dici miraculorum effectorem Jesum Christum, quòd ea effecerit potentiâ debitâ... naturæ Christi humanæ, quia humanitas illa humanitas Dei est, in personâ unâ divinâ subsistens. » Addit verò « potentiam miraculorum illam esse, quâ miracula quotiescumque vult voluntate absolutâ Christus effecit, non precariò... prece tamen, postulatione, aut quâcumque aliâ sive internâ sive exteriori significatione voluntatis suæ efficacis; quæ voluntas humana, cum voluntas sit personæ unius divinæ, non potest non statim perfici, et cum postulat efficaciter, non statim exaudiri. »

In Determinatione sacræ Facultatis circa illam propositionem, quæ est XVI, hæc sanciantur : « 1° *Falsa est*; quia Christus utpote Deus et homo patrabat miracula potentiâ physicâ, virtute omnipotenti, vi Divinitatis propriâ ipsique intrinsecâ, licet in iis patrandis partem aliquam habuerit humanitas, v. g., postulationibus, dictis, contactibus, » etc. 2° *Sacris Scripturis est apertè contraria*, huicque præsertim textui desumpto ex capite 5 sancti Joannis, v. 16 et sequentibus : *Persequebantur Judæi Jesum, qui hæc (miracula) faciebat in sabbato; Jesus autem respondit eis: Pater meus usque modò operatur et ego operor; propterea ergo magis quærebant eum Judæi interficere, quia non solum solvebat sabbatum, sed et Patrem suum dicebat Deum, æqualem se faciens Deo. Respondit itaque Jesus et dixit eis: Amen, amen dico vobis, non potest Filius à se facere quidquam, nisi quod viderit Patrem facientem, quæcumque enim ille fecerit, hæc et Filius similiter facit.* Quibus verbis manifestè Christus eandem sibi tribuit potentiam et operationem quâ pollet

Pater, potentiam ea omnia faciendi quæ facit Pater, potentiam quâ sit æqualis Patri; quod de solâ potentiâ physicâ potest intelligi. Potentia enim moralis quæ exercetur solum per preces efficaces et postulationes absolutas, dignasque statim exaudiri, quæcumque illa sit, nec similis, nec æqualis est Patris potentiæ, nec ad ea omnia extenditur quæ Pater operatur. 3° *Est sanctis Patribus, theologis et interpretibus catholicis adversa, favetque Arianis et Socinianis.* Quotquot enim è sanctis Patribus adversus Arianos, atque ex theologis et interpretibus adversus Socinianos, insurrexere, ii hoc usi sunt valido argumento ad probandam Christi Divinitatem, quòd eadem esset Patris et Filii potentia, potentia procul dubio physica, nam ex potentiâ morali ad probandam Christi Divinitatem, nonnisi manum et invalidum deductum fuisset argumentum. *Favet proinde illa propositio hostibus Divinitatis Christi.* 4° *Erronea est.* Nam, posito mysterio Incarnationis necesse est consequenter ea Scripturæ loca quæ ferunt Christum patrâsse miracula, accipi de operibus à Christo productis actione omnipotenti Divinitatis suæ, necnon humanitatis actione Verbo subordinatâ. 5° *Est hæretica,* quatenus scilicet disertè et absolutè asserit eo unicè sensu Jesum Christum dici miraculorum effectorem, quòd habeat potentiam ea certò impetrandi à Deo. Nam fide certum est Jesum Christum esse Deum et hominem, ipsique necessariò competere summam, independentem et physicam patrâsse miracula potentiam. 6° Denique unum adhuc observare liceat, nempe juxta Berruyerum illud Christi Joan. 16, 7: *Mittam eum (Spiritum sanctum) ad vos,* non debere intelligi de missione Spiritus sancti à Filio *pro ratione atque ordine processionis:* quam quæstionem temerè *satis subtilem scholæ quæstionem vocat;* sed de *postulatione efficaci,* quâ Christus seu humanitas personæ uni divinæ unita *rogabit Patrem* ut Spiritum sanctum mittat, et quæ *statim efficietur,* quia *postulatio illa erit humanitatis, quæ humanitas est in personâ unâ divinâ subsistens.* Quàm temeraria sit et vitiosa illa interpretatio nemo theologus non perspicit. At id in mentem revocemus, quod sæpè vidimus à Berruyero pronuntiatum; nempe Patrem Christi seu humanitatis in personâ unâ divinâ subsistentis esse Deum unum et verum in tribus personis subsistentem, nempe in Patre, Verbo et Spiritu sancto. Quomodò autem Pater eo sensu acceptus mittet Spiritum sanctum ad postula-

tionem Jesu Christi? Quis est ille Spiritus sanctus qui à Deo uno et vero in tribus personis subsistente, à totâ Trinitate, à se ipso mittetur? eritne aliud quàm donum aliquod creatum, meraque efficientia divina, ut commenti sunt Sociniani?

§ 3. *Expenditur et refellitur appendix tertia novi dogmatis, nempe naturam Christi humanam, in actibus per illam elicitis, minimè regi à Verbo.*

« Non completur, inquit Berruyerus, tomo 8 secundæ Partis pag. 22, per unionem Verbi hypostaticam eadem natura humana Christi in ratione principii actiones suas etiam supernaturales producentis. » Ibidem: « Ad complementum autem naturæ Christi humanæ in ratione principii agentis, et actiones suas sive physicè sive supernaturaliter producentis, Verbum nihil omninò confert. » *Défense de la seconde partie de l'Histoire du peuple de Dieu, Avenione 1755, pag. 30, 31, 32, Nanceii 1759, pag. 20, 21, 22:* « L'humanité, abstraction faite de telle ou telle personne divine ou humaine dans laquelle elle doit subsister, conserve son entendement, sa volonté et les autres facultés, qui n'ont pas besoin d'être mises en mouvement, ni déterminées par l'impression de la personne pour produire les actions, soit naturelles, soit surnaturelles; mais seulement du concours naturel ou surnaturel. Aidée de ce secours, la nature, comme nature, a en elle tout ce qui est nécessaire pour être le principe physique, le principe éliciteur de ses actions, ou le principe *quo.* » Ibid. edit. Aven. pag. 44, 45, et Nanc. pag. 29, 30: « La nature humaine, comme principe efficient de ses actions, sans avoir besoin de tenir de l'impression du Verbe, ses mouvements et ses déterminations, pouvait aussi dire: *Moi, ego,* au neutre, en ce sens qu'elle ne dépendait pas du Verbe comme principe qui la régit, qui la pousse, qui la détermine. » Ibid. edit. Aven. p. 49, Nanc. pag. 55. « Ce n'était point par l'union hypostatique, que l'humanité était constituée formellement impeccable; le Verbe n'influant par lui-même ni sur la volonté, ni sur les actions; c'était par des dons surnaturels dont cette union exigeait l'abondance et le choix. Ces dons étaient toujours efficaces, dit le P. B., et ils ne pouvaient pas l'être du moment que Dieu voulait que l'humanité fût hypostatiquement unie au Verbe; ils l'étaient *ex prævisione,* mais ils ne l'étaient pas moins pour assurer infailliblement l'impeccabilité de Jésus-Christ. »

De his dictis legatur determinatio sacræ Facultatis super propositionibus XIII, pag. 43 et 44 partis primæ, et proposit. CXIII, CXIV, CXV, pag. 18 et seqq. partis secundæ. Quatuor in iisdem occurrunt refellenda et proscribenda. Unum est quòd distinguitur inter actiones Christi naturales seu physicè productas, et actiones ejusdem supernaturales seu supernaturaliter productas. Nullam actionem indeliberatè, nullam nisi voluntariè et cum advertentiâ, nullam nisi influente gratiâ interiori, cujus ipsi inerat fons et plenitudo, et ex motivo perfecto et supernaturali Christus sanctissimâ suâ humanitate producebat, ac proinde nullam nisi supernaturalem. Verbum hanc humanitatem sibi hypostaticè unitam, adeòque ut suam regebat in omnibus et singulis quæ per ipsam eliciebantur. Si quæ ad vitæ animalis usum pertinent, à christiano, juxta sanctum Paulum, facienda sunt *in gloriam Dei*; quis dubitaverit, modò unicam in Christo Verbi Dei personam admittat, omnes actus Christi ut hominis fuisse meritorios, Deo acceptos, et supra vires naturæ humanæ sibi relictæ longè fuisse constitutos. Hinc ipse de se ipso loquens, Joan. 8, 29, aiebat : *Ego quæ placita sunt ei (Patri) facio semper*. Distinctio igitur prædicta *Christi ut hominis dignitati et excellentiæ derogat*, Nestorianismi est surculus, et ut erronea proscribi debet. Insuper *constanti sanctorum Patrum doctrinæ adversatur*, juxta quos « humanæ actiones omnes Christi deificatæ, divinæque fuerunt... sive quòd humana natura; auctore ac moderatore Deo, ita gubernabatur, nihil ut sine ipsius nutu prorsus ageret; verum eò maximè quòd agendi vim et potentiam ab divinâ personâ tanquàm à formâ determinante et perficiente et ultimum substantiæ complementum adhibente caperet, sine quo nec existeret in rerum naturâ, nec operari omninò potuisset. » Verba sunt doctissimi Petavii, quid eâ de re veteres Ecclesiæ doctores senserint, explicantis, lib. 8 de Incarnatione, capite 10.

Alterum igitur, quod in iisdem Berruyerî assertis gravi reprehensione dignum est, in eo consistit quòd contendat Verbum *nilhil omninò conferre* ad complementum naturæ Christi humanæ *in ratione principii agentis et actiones humanas producentis*; adeò ut hæc natura à Verbo non penderet tanquàm à principio quo regeretur, impelleretur et determinaretur. Illud verò easdem notas provocat. Fatetur ipse Berruyer, quod ad fidem attinet, nempe Christi humanitatem gratiâ sanctificante eximiâ ornatam, et gratiis

actualibus, iisque omnibus efficacibus indesinenter adjutam. A quo autem derivantur hæc gratiæ, quibus in ratione principii agentis et actiones suas producentis completur? A Deo sanè, à totâ Trinitate, à Patre, Filio et Spiritu sancto, qui per actionem tribus adorandis illis personis communem complent naturam humanam in ratione principii activi, eamque regunt, moderantur et determinant quantum ad singulos actus quos elicit. Hæc quoque fide certa sunt. At in istâ directione aliquid est speciale Verbo, nempe habet hanc humanitatem sibi hypostaticè unitam, et per eam agit ut suam. Ergo hanc complet, regit, moderatur et determinat ut suam; Pater verò et Spiritus sanctus eam non regunt ut suam, sed ut humanitatem à Verbo assumptam, ut humanitatem Verbi, per quam Verbum operatur. Hæc ex Incarnationis mysterio evidenter nexa sunt. Hinc omnes theologi et omnes sancti Patres qui de hac materiâ disserunt, unanimiter sentiunt naturam Christi humanam regi à Verbo ut suam in omnibus actibus, qui naturâ illâ eliciuntur, idque habent ut appendicem necessariam dogmatis de unicâ in Christo personâ, quæ est persona Verbi.

Tertium spectat ad impeccabilitatem Christi, quæ à Berruyerò et ejus defensore repetitur à gratiis *ex prævisione* efficacibus jugiter concessis Christi humanitati, ipsique debitis, quia hypostaticè unita est personæ uni divinæ. Verùm gratiæ quocumque modo efficaces non tollunt potestatem ad oppositum. Si ergo vi solâ ejusmodi gratiarum Christus peccati fuisset expers, potuisset tamen peccare. Deinde, si Verbum non regebat humanitatem ut suam, jam unioni hypostaticè inerat solùm virtus moralis ad gratis illas humanitati Christi conciliandas, quas sibimetipsi Christus non tribuebat. Ergo voluntas Christi fuisset peccandi capax, licet nunquàm peccâset. Atqui tamen non modò actus peccati, sed etiam omnis peccandi potentia est à Christo arcenda. In eo fuit quidem libertas contradictionis, id est, hoc vel illud benè agendi; sed non fuit libertas contrarietatis tam scilicet circa malum quàm circa bonum. Christus est Verbum homo sanctum. Si ergo Christus homo peccâset, Deus Verbum per humanitatem assumptam agens, peccâset; ergo si Christo homini inesset potentia peccandi, Verbum quatenus per humanitatem assumptam agere potest, posset peccare. Omnes sancti Ecclesiæ doctores unanimiter sciſcunt Christum nec peccâsse nec peccare

potuisse, de quibus consule Petavium lib. 11 de Incarnatione, capit. 10, 11 et 12. Ergo non sufficit omnem actum peccati à Christo removeri. *Falsum et temerarium, blasphemum, erroneum et hæresi saltem proximum est ipsi adscribi hunc defectum moralem, quòd nempe peccare potuerit.*

Quantum ad id contingit, quod enuntiatur ab apologistà, nimirum naturam Christi humanam potuisse dicere, *Ego*, in neutro genere. Quod jam satis superque confutavimus art. 1 hujus capituli inter probandam conclusionem primam.

§ 4. *De appendice quartâ novi dogmatis, nempe cum Christus et Apostoli de Filio Dei sermonem habuerunt, eos intelligendos esse in recto de humanitate Christi sanctissimâ personæ uni divinæ unitâ in unitatem personæ, et per hanc unionem naturali Filio Dei factâ in tempore, Dei, inquam, in tribus personis subsistentis.*

Non modò id sequitur ex Harduini et Berruyeris præcipuis placitis circa Scripturarum de Jesu Christo Filio Dei interpretationem, sed et expressissimis verbis illud Berruyerus docuit. Qui eò etiam progressus est ut, cum sanctus Joannes scribebat Evangelium, id est, ut putat, versùs annum 70 æræ vulgaris, tunc asserat usum Christianorum communem hunc fuisse, ut appellatio illa (Filius Dei) appellaret in recto sanctissimam Jesu Christi humanitatem... personæ uni divinæ unionem substantiali conjunctam in personæ unitatem... adeoque si diceret Joannes, Filius Dei factus est caro, dicere ex usu loquendi crederetur, humanitas Christi, sive Christus homo factus est homo.

Hanc propositionem, numero XLVI, sacra Facultas damnavit ut *falsam, temerariam, fidei perniciosam, traditionis eversivam, Apostolis et primi seculi fidelibus injuriosam, et perversissimæ explicationis Apostolici Symboli inductivam*. Legi potest quæ momentorum vis sacrum ordinem impulerit ad censuram ejusmodi ferendam. Nihil necesse est à nobis ea referri, cum ex dictis facilè colligi queant.

§ 5. *Appendix quinta: Eadem est juxta Berruyerum significatio vocis Filii in formâ Baptismi.*

Illud à Berruyero traditur tomo eodem octavo, pag. 153 et 154, et à sacrâ Facultate ad propositionem LVIII, pag. 202 prioris partis declaratur esse hæreticum. Enimverò eò reducitur explicatio formæ Baptismi quam Berruyerus invehit, in nomine Dei qui in tribus per-

sonis subsistit, et humanitatis Christi sanctissimæ hypostaticè unitæ Verbo Deo, Dei Filio æterno, et Spiritus sancti. Quis autem Catholicus explicationem ejusmodi non habuerit ut blasphemam et hæreticam? Sed quid Berruyerus in formâ Baptismi nomine Spiritus sancti designatum voluit? Quis esse potest Spiritus sanctus, qui memoratur post invocatum Deum in tribus personis subsistentem et invocatam humanitatem Verbo unitam? Quomodò Berruyerus ita interpretari autem formam ipsam Baptismi et Sacramentorum, contra mentem apertissimam omnium Catechismorum et Symbolorum et documenta manifestissima totius Ecclesiæ?

Attamen, si quemadmodum ipse modò confidentissimè asserebat, is fuit Christianorum primi seculi ab Apostolis institutorum usus, ut nomine Filii intelligerent humanitatem Christi, personæ uni divinæ substantialiter unitam; ad ejus sensum debuerunt intelligere formam Baptismi, et etiamnum à nobis intelligi deberet. Ita ab errore in errorem præcipitem se dedit. De his et 2 seqq. vide art. 3, cap. 1 dissert. hujus.

§ 6. *Appendix sexta: In clausulis orationum Ecclesiæ; Per Dominum nostrum Jesum Christum Filium, etc.; in verbis signum crucis comitantibus, scilicet: In nomine Patris, et Filii, et Spiritus sancti; in Benedictionibus; in glorificationibus; uno verbo, in omni cultus christiani exercitio, vox, Filius, juxta Berruyerum significat in recto humanitatem Christi personæ uni divinæ unitam in personæ unitatem.*

Ita Berruyerus docet expressissimè pag. 154, 155, 156 et 157, de quâ ejus propositione, quæ in Determinatione Facultatis LIX numeratur, ita statuit eadem sacra Facultas, « Hæc propositio in fideles et in omnem Ecclesiam est contumeliosa, christianam fidem et cultum christianum deprimit et subvertit, catholicam fidem prodit, blasphema est et hæretica. » Non difficulter menti occurrunt momenta quæ singulas ejusmodi censuras communiunt, et quæ legi possunt in ipsâ Determinatione, parte primâ, pag. 204 et seqq.

§ 7. *Appendix ultima: Juxta Berruyerum dogma ejus novum fide certum est, et ejus fidei necessitas tanta est, quanta necessitas fidei in Trinitatem, in Incarnationem Verbi et ejus æternam generationem.*

Cum dogma suum de humanitate Christi,

propter unionem hypostaticam, naturali Filio temporali Dei in tribus personis subsistentis, Berruyerus contendat ita clarè et perspicuè contineri in Scripturis, ut, *qui illud in sacris libris contentum non videat, is nihil in illis intelligere valeat*, consequens fuit ut dogma idem censeret ad fidem christianam attinere. Et reverà non modò dogmatis fide divinà credendi certitudinem illi adjudicat, sed præterea ejus fidei necessitatem æquiparat necessitati fidei in mysteria trium in Deo uno personarum generationisque æternæ et Incarnationis Verbi. Paginà 152, post commemoratam necessitatem fidei « *Mysterii contenti in tribus personis realiter distinctis, quæ sint unus Deus; quarum prima Pater est ab æterno producens Verbum; secunda Verbum est, ab æterno productum, sive generatum à Patre; tertia est Spiritus sanctus à Patre et Verbo sive Filio ab æterno procedens;* » continuò hæc addit: « *Ad christianam religionem accedentibus NECESSARIA PARITER est fides in Jesum Christum..... Quæ fidei christianæ professio in eo consistit ut credamus corde, et ore confiteamur, quia sanctissima Christi humanitas... Verbo Patris æterni Filio æterno... unionem reali et substantiali in unitatem personæ, et divinæ naturæ participationem, unita est in tempore per transeuntem et liberam operationem Spiritus sancti... et per virtutem Altissimi; quæ operatio transiens et libera, sit vera generatio faciens Deo Filium verum et naturalem, Deo, inquam, uni in tribus personis subsistenti..... fundansque realem et physicam relationem Patris ad Filium et Filii ad Patrem, inter Deum sub eâ reduplicatione cognitum, et inter Jesum habentem sanctissimam suam humanitatem Verbi subsistentiâ completam..... Hæc omnia et singula qui explicitè non credit et confitetur de Domino nostro Jesu Christo Filio Dei, nescio quid in Scripturis novi Testamenti videat....*

» Atqui fides illa quæ totum Jesum semel et simul repræsentat, in unâ voce (*Filius*) continetur... Non abstrahit vox illa à Verbo; duo è contra in ore christiano de Verbo affirmat, et Verbum esse Deum Filium ab æterno consubstantialem Patri, et Verbum fuisse in tempore hypostaticè unitum humanitati Christi sanctissimæ... sed et præterea vox illa (*Filius*) importat in recto sanctissimam Christi humanitatem, in genere subsistendi, per subsistentiam Verbi completam. Hæc autem dogmata, cum ÆQUE ESSENTIALITER PERTINEANT AD FIDEM CATHOLICAM, ET A QUOLIBET VIRO CATHOLICO CREDI DE-

BEANT EXPLICITÈ, ideò de illis expressa fit mentio in formâ sacramentorum, ac præcipuè Baptismi,... qui sub eâ enuntiatione conferendus est: *In nomine Patris, et Filii et Spiritus sancti*; non autem: *Patris et Verbi et Spiritus sancti.* »

Itaque juxta Berruyerum professio fidei quæ in eo consistit ut credamus sanctissimam Jesu Christi humanitatem Verbo completam Filium esse naturalem Dei in tribus personis subsistentis, pariter est necessaria ac fides trium personarum in Deo uno, quarum prima Pater sit, secunda Verbum, et tertia Spiritus sanctus: atque sanctissimam Christi humanitatem completam in genere subsistendi per subsistentiam Verbi esse in recto Filium, *æquè essentialiter* pertinet ad fidem catholicam, et à quolibet viro christiano tam credi debet *explicitè*, quàm dogmata Incarnationis, Divinitatis atque æternæ generationis Verbi. Quis verò non adstupescat, eâ percussus præsumptione et temeritate quâ Berruyerus novum dogma perversum et antea inauditum, quod hausit ab Harduino non modò fide credendum docet, sed à quolibet viro christiano esse explicitè credendum sancit, ac æquè essentialiter pertinere ad fidem catholicam ac dogmata Divinitatis, æternæ generationis et Incarnationis Verbi; adeò ut fides illius novi dogmatis æquiparetur fidei Trinitatis et pariter necessaria pronuntietur? *Blasphemam et hæreticam* esse hanc propositionem facile ostendit sacra Facultas, primâ parte, pag. 198 et seqq. ad propositionem LVIII.

Superest dicendum de adoratione quam vult Berruyerus tribui in recto humanitati Christi Verbo unitæ; sed materiæ ejusmodi tractationem remittendam ducimus ad Dissertationem ultimam, ubi cultus Christo debitus asseretur.

ARTICULUS III.

Ostenditur quàm inania sint quæ Berruyerus, ad stabiliendum novum dogma, post Harduinum profert.

PRÆCIPUAS solummodò ejus probationes expendere satis sit. Incipiemus ab iis rationibus quas theologicas appellat.

§ 1. *Expenduntur probationes quas, primo loco ponit Berruyerus et quas ex ratione theologica petitas vocat.*

« In iis, inquit, pag. 56, 57, 58, 59, quæ primo conceptionis Christi instanti peracta intelliguntur per actionem Dei ad extra transeuntem et liberam, plura sunt distinguenda.

Primum, formatio corporis Christi. Secundum, creatio animæ Christi humanæ, et cum corpore unio. Tertium, omnium donorum infusio. Quartum denique, unio physica, realis et substantialis humanitatis Christi cum personâ unâ divinâ. Si sisteret prædicta hæc Dei actio in primo suo et secundo effectū, fieri Deus intelligeretur Christi creator, seu Pater æquivocè. Si in tertio hæreret, effectū intelligeretur fieri Pater adoptivus. Sed quoniam actio illa unica et momentanea, transiens et libera Dei unius et veri ad extra agentis, ultimò terminatur ad substantialem humanitatis Christi cum personâ unâ divinâ unionem in unitatem personæ, et divinæ participationem naturæ; per illam actionem non denominatur Deus Christi creator aut æquivocè Pater; non etiam denominatur Christi Pater adoptivus. Restat ergo ut denominetur et sit Pater Christi verus et naturalis. Adeoque hæc unione physicâ et reali receptâ in humanitate Christi, Christus secundum suam sanctissimam humanitatem in genere subsistendi, est et dicitur verus, naturalisque Dei Filius; Dei, inquam, unius et veri in tribus personis subsistentis. »

Hæc est summa ratiocinii quod ibi fusè proponit et passim inculcat Berruyer. At verò nihil solidi continet. Eò reducitur integrum: Per actionem Dei ad extra, quâ humanitas Christi personæ uni divinæ hypostaticè unita est, non creatur hæc humanitas, nec produci- tur Filius adoptivus. Ergo hæc actio Dei unius et veri in tribus personis subsistentis, est vera et propriè dicta generatio, quâ produci- tur Filius naturalis Dei in tribus personis subsistentis. Ergo humanitas Christi personæ uni divinæ unita in personæ unitatem, dicenda est naturalis Filius Dei in tribus personis subsistentis. Ergone actio Dei ad extra transiens et libera, quæ non est creatio, nec adoptio, hoc ipso debet esse generatio vera et propriè dicta, quâ produciatur naturalis Dei Filius? Quo, quæso, fundamento hæc propositio tam confidenter à Berruyero asserta nititur? nullo prorsus, neque ullum ipse adducet. Terminus actionis unientis est quidem opus aliquod eximium et præcellentissimum, sed repugnat illud dici naturalem Dei Filium. Quid ita? Quia, ut jam non semel à nobis observatum est, et à sanctis Patribus contra Arianos inculcatum, naturalis Filius Dei ipsi debet esse naturâ similis, adeoque Deus, consubstantialis Patri. Ergo naturalis Filius Dei non potest generari extra Deum. Ergo actione Dei ad extra transeunte

et liberâ non potest produci; ergo ejusmodi actio nequit esse vera et propriè dicta generatio.

Frustra ait naturam Christi humanam uniri personæ uni divinæ, non modò in unitatem personæ, sed et in *participationem naturæ divinæ*. Si contendat naturæ Christi humanæ per unionem ita fuisse communicatam naturam divinam, ut hæc natura humana facta sit natura divina novâ ratione ultimò completa, reus est blasphemix et innovatæ hæreseos absurdæ Eutychetis. Sin autem profitetur, cum Ecclesiâ catholicâ, naturam Christi humanam Verbo substantialiter et hypostaticè unitam, et quantumlibet hæc unione perfectam, nihilominus esse planè diversam et distinctam à naturâ divinâ, ita ut semper manserit natura creata, finita et dependens; jam falsum erit Deum actione ad extra transeunte et liberâ uniente hanc Christi humanitatem Verbo, effecisse aliquem sibi similem, seu recens alicui in tempore communicasse totam essentiam suam cum suis attributis. Falsum proinde erit Deum, in tempore, actione illâ ad extra, transeunte et liberâ, uniente, factum fuisse Patrem verum et naturalem, aut ex eâ natum esse Filium verum et naturalem Dei in tribus personis subsistentis.

Altera probatio ejusdem generis quam profert Berruyer, pariter infirma est, licet, eam, ut demonstrationem, ostendet.

« Sic iterum, ait pag. 59 et 60, demonstratur.... Per actionem ad extra transeuntem et liberam Dei unius in tribus personis subsistentis, unientis sanctissimam Christi humanitatem primo conceptionis suæ momento, unione physicâ et reali, cum personâ unâ divinâ, in unitatem personæ et divinæ naturæ participationem, verè et physicè generatur compositum substantiale theandricum, Homo-Deus. Ergo actio illa est generatio ex parte Dei unius et veri; ergo illa actio ad extra inter Deum unum et verum in tribus personis subsistentem, et Jesum Christum secundum sanctissimam suam humanitatem in genere subsistendi Verbo completam, fundat relationem realem Patris ad Filium et Filii ad Patrem. »

Liquidum est totam hujusce prætensæ demonstrationis vim, si quam habet, repeti ab illâ unâ voce, *generatur*. Nempe in hoc dicto: *Per illam actionem Dei ad extra verè et physicè generatur compositum substantiale theandricum, Homo Deus*; si vox *generatur*, sumatur latè et impropriè, ut aliquando fit, et nihil aliud so-

net, quàm *producitur*, efficitur, jam in argumento proposito ne species quidem ulla apparebit probationis. Certum est quidem actione ad extra, transeunte et liberâ, actione Dei in tribus personis subsistentis, actione tribus personis communi, effectam fuisse unionem hypostaticam, productum esse Incarnationis mysterium. At inde consequi hanc actionem, si eâ tantum effectum sit, non propriè generatum compositum theandricum, esse veram et propriè dictam generationem ex parte Dei, etc., nemo non perspicit esse falsum. Itaque in ratiocinio, de quo agitur, vox, *generatur*, accipienda est pro significandâ genuinâ, germanâ et propriè dictâ generatione quâ emanet verus naturalisque Filius, Patri proinde naturâ similis. Hâc verò vocis, *generatur*, interpretatione positâ, ineptum semper manet argumentum Berruyerî. Asserit quidem sine hæsitatione, actione Dei ad extra, compositum theandricum, id est, ut ipse alibi explicat, humanitatem Christi personæ uni divinæ hypostaticè unitam, quam appellat Hominem-Deum, verè et physicè generari; sed id non probat, nec probare sategit; manifestè verò est falsum. Nulla enim est generatio propriè dicta, ubi non est ortus unius ab alio in similitudinem naturæ. Humanitas illa quamvis hypostaticè unita Verbo divino, natura tamen est humana, essentiam et proprietates necessarias naturæ humanæ retinet, non mutata est in naturam divinam à quâ tantum distat quantum natura creata et dependens dissita est à naturâ increatâ et independente. De his videre est Determinationem sacræ Facultatis ad propositiones XXVIII et XXIX.

§ 2. *Expenditur probatio quam Berruyerus repetit à versu 7 Psalmi 2.*

« Psalmi 2, 7 : *Dominus dixit ad me : Filius meus es tu; ego hodiè genui te*, vox illa Dei est, inquit pag. 61, 62, 63..... Dei unius et veri in tribus personis subsistentis;..... vox illa ad Christum..... dirigitur, prophetia est de Christo, qui, ibidem versibus 6 et 8, in tempore *constitutus est rex à Deo super Sion montem sanctum ejus*. Dicitur ergo ea vox de sanctissimâ Christi humanitate in genere subsistendi completâ per unionem suam realem cum personâ unâ divinâ in unitatem personæ. »

Negamus hanc vocem esse Dei in tribus personis subsistentis. Hæc vox Dei Patris est primæ sanctissimæ Trinitatis personæ, quæ *hodiè* : id est, perpetuò, jugiter, Verbum Filium suum

æternum et unicum generat. Ea vox quidem dirigitur ad Christum, sed admittenda non est spuria Christi notio, quâ tota nititur interpretatio, quam Berruyerus opponit. Christus Filius est Dei Patris æternus, qui pro nobis homo in tempore factus est. Ipse Christus seu Filius Dei æternus, homo factus, ibidem dicitur ut homo, *constitutus rex à Deo super Sion montem sanctum ejus*.

Dùm Berruyerus docet ipsam esse Christi humanitatem personæ uni divinæ unitam, quam hoc loco Deus alloquitur, et ad quam hæc verba dirigit in recto : *Filius meus es tu, ego hodiè genui te*; alterum in Christo invehit Filium Dei ab æterno Filio distinctum, Nestorii hæresim renovat, et Ecclesiæ validum eripit argumentum, quod sancti doctores ex illo Psalmi 2 versiculo deduxerunt ad Christi Divinitatem et æternam ejus generationem adversus utriusque illius dogmatis hostes evincendum.

« Verborum servetur proprietas, ait Bosuetius ad hunc locum, quæ à sanctis Patribus eâ de re dicta sunt contrahens; *Dominus*, enim *dixit ad me*, non ad alios, sed *ad me*, propriè et singulariter : *Filius meus es tu*. Tu, inquam, et non alius; ergo unicus, unigenitus et singularis; quod nunquàm eâ emphasi dictum de quopiam : *Ego hodiè genui te*; non ergo ascitus, non adoptatus, sed genitus; nec gratiâ, quod Angeli, quod homines, sed naturâ Filius..... non uno et certo die, si quamcumque diem dixeris, eo die Filius et gignitur et est genitus; neque quidquam dignius ad hæc non subtilia, sed sublimia ac divina exponenda, quàm illud *hodiè*, quo quippe fit ut Filii semper sit nova, semper vetus nativitas, nunquàm imperfecta, et velut in motu posita, sed semper absoluta perfectaque generatio, atque ipse Filius quotidiano, seu potius æterno et immutabili partu semper effusus, semper hodiè genitus. »

At, inquit Berruyerus, in Epistolâ ad Hebræos capite 1, v. 5, sanctus Paulus illud Psalmi secundi applicat *instanti Incarnationis Verbi*; quo *instanti secundum alteram prophetiam ab ipso allegatam, in quâ dicitur* : *Ego ero ei in Patrem et ipse erit mihi in Filium, cœpit Deus esse in tempore respectu Christi.... verè Pater...* ergo, etc. Verum adeò aliena est à mente Apostoli hæc interpretatio, ut ipsomet versiculo illo 5 capitis 1 Epistolæ ad Hebræos usi sint sancti Patres ad generationem Christi æternam contra Arianos asserendam. Consule Disserta-

tionem Bossuetii mox laudatam. Non modò nihil vetat ad instans Incarnationis Verbi referri illud Psalmi secundi : *Ego hodiè genui te*, intellectum, ut sonat, de generatione æternâ; ut potius hanc relationem necessario postulet, atque, positâ Incarnatione, secum importet generatio æterna Verbi. Nimirum hoc ipso instanti, eâdem actione Patris æterni, quâ Filius generatur ab æterno ante carnem assumptam, etiam genitus est carnem induens, ut et eâdem actione jugi, continuâ et immutabili in perpetuum jam gignitur caro factus.

Felicius verò non assequitur sensum verborum Dei in Nathanis vaticinio : *Ego ero ei (Messiæ) in Patrem, et ipse erit mihi in Filium*. Nihil aliud sancto Paulo interprete, et juxta analogiam fidei catholicæ ac vocum proprietatem prophetiâ ejusmodi significatur, nisi Messiam, quem Judæi expectabant, qui homo erat futurus et filius hominis, futurum tamen simul æternum Filium Dei Patris æterni. *Ero ei in Patrem et ipse erit mihi in Filium*; id est, is homo, Messias, erit ipse Filius meus unigenitus et æternus tunc temporis factus homo.

At, pergit Berruyer, pag. 64, 65, 66, *nec... strictim perstringenda, illa altera attributio versiculi : Filius meus es tu, etc., facta à Paulo instanti quo Deus... Jesum resuscitavit*. Hodiè, ait Paulus, id est, in ipso resurrectionis dominicæ instanti, resuscitans Jesum, sicut et in Psalmo secundo scriptum est; *Filius meus es tu, ego hodiè genui te*, Actor. 13, 33. Inde Berruyerus concludit Christi humanitatem unitam, non potuisse triduo mortis appellari Filium Dei, in tribus personis subsistentis, post resurrectionem verò debuisse rursus hoc nomine designari; atque hinc factum ut Deus in tribus personis subsistens hanc resurrectionem operando, denuò factus sit in tempore Pater Christi, et filium suum Jesum denuò in tempore generaverit. Verum, si ita est, unio physica animæ Christi cum ejus corpore restituta post triduum mortis, nova est igitur filiatio in humanitate Christi recepta, quæ humanitas jam erit Filius, non tantum ratione unionis hypostaticæ cum personâ unâ divinâ, sed etiam ratione resurrectionis suæ, seu restauratæ unionis physicæ inter animam suam et corpus. Quot in errores mens devia, à recto tramite semel abrepta, præceps labitur!

Verba Apostoli fideliter exhibita difficultatem nullam pariunt. In probationem resurrectionis Christi post prolatus eorum, à quibus *visus est*, testimonium, sic habet : *Hanc (repromissio-*

nem quam annuntiamus vobis, quæ facta est patribus nostris) Deus adimplevit filiis nostris, suscitans Jesum, sicut et in psalmo secundo scriptum est : Filius meus es tu, ego hodiè genui te. Planum est, ut hæc efferrentur à S. Paulo, necesse non fuisse resurrectionem Christi esse generationem ejus temporaneam; sed satis esse resurrectionem Christi connecti cum generatione ejus æternâ. Quæ connexio manifesta est; cum enim Christus esset Filius Dei æternus et naturalis, oportuit sanè eum, ut hominem, à morte quam pro nobis passus est, ad vitam et ad gloriam sibi naturalem revocari.

§ 3. *Expenduntur septem regulæ à Berruyero traditæ, juxta quas statuit ab accurato Scripturarum interprete vocem; Patris, relativè ad Christum esse accipiendam de Deo uno et vero in tribus personis subsistente, et proinde voces, Jesu Christi Filii, Dei de humanitate Christi sanctissimâ personæ uni divinæ unitâ.*

Eodem tomo 8 secundæ partis tam sæpè laudato, pag. 90 et seqq., septem Berruyerus explicat regulas, quibus efficere sibi videtur quoties in Scripturis Deus appellatur Pater Christi, et Christus dicitur Filius Dei, toties designari Deum in tribus personis subsistentem, adeoque Filium Deo in tribus personis subsistenti factum in tempore per unionem humanitatis Christi personæ uni divinæ. Singulas ejusmodi regulas referre et confutare operæ pretium est.

Prima Berruyeri regula exponitur et falsa demonstratur. — Prima hæc regula sic se habet : Tunc Deus Pater Christi non est in Scripturis prima persona ab æterno generans Verbum, sed intelligendus est Deus unus et verus qui in tribus personis subsistit : *Cum dicitur, verbi gratiâ, Deus cum aliquo epitheto, Pater Christi, sic Matth. 16, 16 : Tu es Christus Filius Dei vivi; Luc. 1, 32; 2 Petri 1, 3 : Filius (Dei) Altissimi; 2 Corinth. 1, 3 : Benedictus Deus Pater Domini nostri Jesu Christi. Joan. 8, 54 : Pater meus, ... quem vos dicitis, quia Deus vester est. 15, 1 : Pater meus agricola est; quæ proprietates non sunt notionales, sed cadunt in Deum unum et verum qui in tribus personis subsistit; in Deum, ut Deus est secundum naturam, non ut Pater est ab æterno generans Verbum, et persona prima ab aliis realiter distincta*. Hæc ille.

Ejusmodi regulæ falsitas facillimè demonstratur; quia primò fide constat epitheta, et alia ejusmodi quibus proprietates et attributa tribus personis communia exprimuntur, de-

bere prædicari de singulis personis et reipsa unicuique earum convenire, cum singulis natura divina insit. Hinc juxta Symbolum quod sancti Athanasii nomine inscribitur, *increated Pater, increatus Filius, increatus Spiritus sanctus... æternus Pater, æternus Filius, æternus Spiritus sanctus... omnipotens Pater, omnipotens Filius, omnipotens Spiritus sanctus... Deus Pater, Deus Filius, Deus Spiritus sanctus... Dominus Pater, Dominus Filius, Dominus Spiritus sanctus*. Similiter et pari ratione verè dici potest: Pater Altissimus, Filius Altissimus et Altissimus Spiritus sanctus; Pater vivus, Filius vivus, et vivus Spiritus sanctus; et alia ejusmodi efferrì possunt sine ullà exceptione de omni attributo Dei absoluto. Ergo etiam ubi Deus in Scripturis dicitur Pater Christi, cum aliquo epitheto communi singulis personis, inde non sequitur Deum Patrem in his locis memoratum, non esse primam sanctissimæ Trinitatis personam. Imò, cum Christus, juxta Scripturas, non aliâ ratione sit Filius Dei quàm propter generationem æternam Verbi, quo sanctissima ejus humanitas in genere subsistendi completur; ipsæmet Scripturæ exigunt de Patre Deo, primâ Trinitatis personâ, accipi omnia illa loca, in quibus, cum aliquo ejusmodi epitheto, Deus perhibetur Christi Pater. Atque is est sensus quo ejusmodi omnia testimonia interpretantur sancti Patres, ita ut ne unus quidem laudari possit, qui unquàm ab illo sensu recessisse deprehendatur.

Idem sensus habetur expressus in Symbolo Nicæno, quod recitando, unusquisque nostrum dicit: *Credo in unum Deum Patrem omnipotentem, factorem cæli et terræ, visibilium omnium et invisibilium*. Ibi autem memorari Deum primam personam, manifestum faciunt quæ sequuntur de *Filio ejus unigenito*. Attamen in eodem Symboli articulo Deo Patri adjiciuntur epitheta, quibus attributa divina designantur absoluta et tribus communia personis, nempe quòd sit *unus Deus, omnipotens*, quòd sit *factor cæli et terræ, visibilium et invisibilium*.

Rejicitur regula secunda. — Secunda Berruyerì regula hæc est: Nomen Dei Patris Jesu Christi significat Deum in tribus personis subsistentem, non primam sanctissimæ Trinitatis personam: « Cum Christus Filius Dei Patrem

« non ut Deus est persona ab aliis distincta,
« et ab æterno Verbum producens, sed ut est
« Deus unus et verus in tribus personis subsi-
« stens. »

Hæc regula non minùs vitiosa est quàm prima. Quod rei caput est, et in eâ præcipuè considerandum venit, in eo consistit quòd ponatur Christum, nonnisi à Deo uno et vero in tribus personis subsistente, non verò à Patre æterno primâ personâ, potuisse directè expostulare effectus qui à tribus personis producuntur. Id autem fidei catholicæ repugnat. Nam, juxta dogma fidei catholicæ certissimum, quisque homo potest, adeòque Christus potuit secundum veram et legitimam precandi legem, preces, ad postulandos effectus Deo extrinsecos, dirigere ad Patrem æternum, primam sanctissimæ Trinitatis personam. Id ipsum profitetur toto orbe diffusa Ecclesia catholica, apud quam nihil est usitatius et solemnius, quàm ut à Deo Patre æterno omnis generis gratias postulet per Dominum nostrum Jesum Christum Filium ejus unicum, qui cum Patre in unitate Spiritus sancti vivit et regnat. Quæ quidem consuetudo, à sacris litteris originem ducens, ubique et semper obtinuit; non quòd invocari nequeant directè seu tres personæ simul, seu Filius, seu Spiritus sanctus; directæ ejusmodi invocationes etiam vigent, licet minùs frequenter; sed quia Pater habetur ut totius Divinitatis fons et origo, atque in eo ut in unico Filii et Spiritus sancti principio, coluntur et continentur duæ illæ personæ ex eo procedentes, ipsique æquales et consubstantiales. « Pater, ait Bossuetius in sextâ Commonitione ad Protestantes, n. 40 et seqq., ut principium et fons Trinitatis, in se Filium et Spiritum sanctum multò perfectiùs continet quàm arbor fructum suum et sol radios omnes suos. Eo sensu Pater est totum, et quamvis Filius et Spiritus sanctus sint etiam reipsa totum, propriâ sibi ratione, quia in ente simplicissimo et indivisibili nulla partitio admitti potest; Pater tamen manet totum ratione sibi speciali et titulo principii, qui titulus, secundum nostrum loquendi modum, id unum in ipso est quod communicari nequeat. Hinc perspicitur virtus et efficacia unitatis, ad quam omne naturaliter reducitur, siquidem, ut advertit sanctus Athanasius, Deus non modò unus est unitate naturæ, sed etiam quia distinctio, quæ inter personas intercedit, ad unum principium revocatur, nempe ad Patrem, et sub illo respectu ad unitatem veram reducitur.... Naturæ scilicet divinæ fecunditas, per-

sonas multiplicando, ad solum denique Patrem refert Filium et Spiritum sanctum, qui à Patre procedunt, sicque omne deprehenditur primitus in Patre conclusum, uti dictum fuit; atque vi unitatis, quæ à perfectione separari non potest, infinitè declaratur.

Hæc sublimi theologiâ, intelligimus, pergit illustrissimus præsul, quid est cur in Scripturâ, et deinde apud sanctos doctores, qui suum ab ipsâ de mysteriis loquendi modum mutuati sunt, soleat Dei nomen soli Patri cum speciali attributione adscribi; quod quidem non ita fit, ut Filius et Spiritus sanctus excludantur, sed ex adverso tunc ambo inspiciuntur, prout origine continentur in Patre, qui eorum est principium; atque inde ortum ut preces et adoratio, omni ævo, juxta Ecclesiæ morem, plerumque directæ fuerint ad Patrem solum, per Filium, in unitate Spiritus sancti; non quòd nequeant personæ divinæ invocari directè, quandoquidem nos ipse Christus docuit invocare tres personas in Baptismo, quâ invocatione nulla est apud nos magis authentica, sed quia Spiritui sancto, qui Ecclesiæ preces dictat, placuit ut in perpetuam unitatis principii commendationem, invocatio plerumque dirigeretur ad Patrem, in quo Filius et Spiritus sanctus ut in suo principio simul adorantur, sicque adoratio ordini emanationum divinarum congrueret. Quocirca S. Paulus aiebat Ephes. 3, 14: *Flecto genua mea ad Patrem Domini nostri Jesu Christi*; ab illâ adoratione nec excludens Jesum Christum, *super omnia Deum benedictum*, Rom. 9, neque Spiritum sanctum, qui ab illis distrahi nequit, sed tum Filium, tum Spiritum sanctum in Patre inspectans, qui eorum est principium.

Regulam tertium esse falsam declaratur. — Eodem sensu intelligendum vult Berruyer Deum esse Patrem Jesu Christi, nempe Deum in tribus personis subsistentem, non verò primam Trinitatis personam, « cum Filius Dei, inquit, « opponitur simpliciter non Deo Patri primæ « personæ, sed Deo uni et vero in tribus personis subsistenti, ut sæpissimè in omnibus « novi Testamenti Scripturis. 1 Joan. 5, 9 : « *Quoniam hoc est testimonium Dei, quod majus « est, quoniam testificatus est de Filio suo.* Et 10 : « *Qui credit in Filium Dei, habet testimonium « Dei in se; qui non credit Filio, mendacem facit « eum; quia non credit in testimonium quod « testificatus est Deus, de Filio suo.* » Addit Berruyer in hunc sensum tres alios sequentes versiculos, in quibus etiam Christus dicitur

Filius Dei. Verùm negandum omninò est unquam in Scripturis Filium Dei opponi, non Deo Patri primæ personæ, sed Deo uni et vero in tribus personis subsistenti. Jesus Christus dicitur quidem non rarò in Scripturis *Filius Dei*, simpliciter, et sine ullo voci, *Dei*, addito epitheto, sed tunc falsissimum est nomine Dei intelligendum, non Patrem primam personam, sed Deum unum et verum in tribus personis subsistentem. Cum Jesus Christus in sacris litteris appellatur *Filius Dei*, hæc appellatio ipsi singularis est, et idem significat ac Filius Dei *unigenitus, proprius*, qui sæpè etiam *Deus, super omnia Deus, et verus Deus* nuncupatur, adeoque significat Filium Dei naturalem ab æterno in sinu Dei genitum. Ergo Dei nomine in iisdem locis Deus Pater prima persona designatur. Atque vel ex ipso capite 5 Epistolæ primæ sancti Joannis, quod Berruyer in exemplum affert, facilè ejus regula refellitur; quippe ex versu hujus capitis 20 manifestum est hanc esse falsam, et in ipsis versiculis, quos citat voces, *Filii Dei*, esse accipiendas de Filio Dei vero Deo, et proinde æterno Filio Dei Patris æterni. Sic legitur in illo capite, v. 20 : *Et scimus quoniam filius Dei venit, et dedit nobis sensum ut cognoscamus verum Deum, et simus in vero Filio ejus. Hic est verus Deus.* Liqueet eo loci Filium Dei esse accipiendum eodem sensu quo versibus 9, 10, 11, 12, 13, quos in exemplum Berruyer adducit. Sed *Filius Dei*, seu *verus Filius Dei veri* versu 20 est *verus Deus*; ergo pariter versibus 9 et sequentibus, qui dicitur *Filius Dei*, intelligendus est *verus Deus*, ac proinde naturalis Filius Dei, Filius naturâ, Filius habens divinitatem, consubstantialis Patri, Filius Dei ab æterno genitus; Filius igitur æternus Dei Patris æterni.

Jam notavimus alicubi hæc suâ regulâ seu expositione versuum 9, 10, etc., à Berruyero destrui, quod asseruerat de vi versiculi 7 : *Tres sunt qui testimonium dant in cælo, Pater, Verbum et Spiritus sanctus, et hi tres unum sunt*, ad probandum mysterium trium in Deo personarum. Enimverò, si versu 9 et sequentibus indicetur, ut contendit, Deum Patrem Jesu Christi esse Deum unum et verum prout in tribus personis subsistit; si idem, ut consequens est, statuatur de versu 5, ubi Jesus Christus etiam dicitur Filius Dei; nonne pronum erit et proclive versu 7, *Tres sunt*, etc., nomen Patris eodem sensu capi, pro Deo uno et vero, qui in tribus personis subsistit, non pro Patre primâ personâ? quo posito jam mysterium trium in Deo per-

sonarum, quarum prima Pater æternus, secunda Verbum ab æterno à Patre genitum, tertia Spiritus sanctus, nequaquam exprimeretur illo versu 7.

Falsitas regulæ quartæ ostenditur.—His verbis concipitur hæc regula : Deus Pater Christi non intelligendus est prima Trinitatis persona : « cum Dominus noster Jesus Christus homo Deus et Filius Dei dicitur *Primogenitus omnis creaturæ, Primogenitus in multis fratribus, Agnus occisus ab origine mundi, Sponsus et caput Ecclesiæ; Rex hominum et Angelorum; vivorum et mortuorum Judex, Sacerdos et Pontifex in æternum; Dominus Salvator, Jesus;* quæ nomina in recto immediatè non cadunt, ait, in Verbum, ut est æternus æterni Patris Filius; cadunt tamen in Dominum nostrum Jesum Christum ut est (per unionem humanitatis suæ cum personâ unâ divinâ) verus, naturalisque Dei Filius, et sanctissimæ ipsius humanitati.... debentur... ut est humanitas illa completa.... in genere subsistendi per unius personæ divinæ subsistentiam. »

Regula ejusmodi in antecessum confutata est, fundatur enim in notionibus spurii et Jesu Christi, et Jesu Christi Filii Dei, quas Berruyer ab Harduino accepit, quasque tot censuris inurendas demonstravimus. Licet ea omnia nomina solummodò convenirent Christo ut homini, attamen falsum esset ea immediatè et in recto cadere in eum ut Filium Dei temporalem, seu, in humanitatem ejus unitam personæ uni divinæ, aut, quod eodem recidit, *deberi* sanctissimæ ejus humanitati, ut est humanitas illa completa in genere subsistendi per unius divinæ personæ subsistentiam. Nomina enim ejusmodi totidem sunt nomina concreta. Quæ autem *in concreto* Christi ut homini adscribuntur, ea personæ Christo, Verbo scilicet divino, Filio Dei æterno, non quidem ut habenti Divinitatem, sed ut humanitatem sibi hypostaticè unitam habenti adscribuntur. Ita fert una ex regulis indubitatis communicationis idiomatum nexis ex unitate personæ in Christo quæ sit persona Verbi Dei; quas quidem sine notâ Nestorianismi nemo spernit.

Jam porrò de plerisque ejusmodi nominibus dictum est articulo præcedenti, paragrapho 2, ubi ostensum est ea non posse in recto attribui Christi humanitati unitæ.

Istud inprimis advertendum est Berruyorum regulâ hâc quartâ, ut et alibi perpetuò, à lege credendi constituta symbolis Nicæno et Constantinopolitano recedere in exponendis Scri-

pturis. Nam juxta hæc Symbola, non humanitas Christi in personâ unâ divinâ subsistens, sed ipse *Jesus Christus unigenitus Dei Filius, Deus de Deo, ante secula genitus, consubstantialis Patri est Dominus, est propter salutem nostram Incarnatus, natus, crucifixus pro nobis, mortuus, adeoque est Agnus occisus ab origine mundi, est Jesus, Salvator, Pontifex, Sacerdos, Sponsus, caput Ecclesiæ; juxta eadem Symbola venturus est cum gloriâ judicare vivos et mortuos, ergo est Judex.*

Cæterum, non modò nulla ejusmodi nomina cadunt directè et immediatè in humanitatem Christi uni personæ divinæ unitam, sed præterea eorum plura Christo ut Deo competunt secundum Scripturas. Nempe *Dominus* est non solum, quia *data est* ipsi ut homini *omnis potestas in cælo et in terrâ; sed etiam* quia, ut *Deus*, est omnium Dominus supremus et independens; est *Judex* hominum, tum ut Deus, tum ut homo; est *Primogenitus omnis creaturæ*, quia ante omnem creaturam est ab æterno genitus, etc.

In quintam Berruyeri regulam inquiritur.—Tunc ex Berruyero indigitatur Deus unus et verus, qui in tribus personis subsistit, non verò prima persona : « cum dicitur *Deus disse Filio omne judicium, potestatem in cælo et in terrâ; sessionem ad dexteram suam, etc.,* quæ omnia, inquit, dat Deus, ut unus et verus Deus facto sibi in tempore vero et naturali Dei Filio (id est, naturæ Christi humane quæ per unionem, juxta Berruyorum, facta est in tempore naturalis Filius Dei in tribus personis subsistentis); non dat Verbo æterno Filio suo, Deus, ut Verbi Pater est et persona prima à reliquis realiter distincta. »

Regulâ hâc suâ Berruyerus Symbolis fidei contradicere pergit, ut ex modò circa regulam præcedentem dictis patet quantum ad characteres *Judicis et Domini*. De sessione autem Jesu Christi *ad dexteram Patris* repugnantia ejusmodi perinde manifesta est. Nimirum in Symbolis Nicæno et Constantinopolitano ipse est *Jesus Christus Filius Dei unigenitus ante secula natus, genitus non factus, consubstantialis Patri, qui sedet ad dexteram Patris*. Hæc autem locutio metaphorica à Psalte regio psalmo 109, et ab Apostolo usurpata pluribus in locis : *Christus sedet à dexteram Patris*, significat Christum esse Filium Dei æternum, Deo naturâ æqualem, eundemque Filium Dei æternum, ut hominem factum in tempore, esse à Deo constitutum in

cælestibus, ut ait Apostolus Ephes. 1, 20, *supra omnem principatum et potestatem, et virtutem, et dominationem, et omne nomen quod nominatur non solum in hoc seculo, sed etiam in futuro.*

Æque pravum sensum refert ratio, quam addit Berruyer, nempe, *Hæc omnia* (potestatem, dominium, iudicium)... *non dat Verbo æterno Filio suo etiam ut homini facto in tempore Deus, ut Verbi Pater et persona ab reliquis distincta.* Nam fide constat quæcumque à Deo dantur Christo, in tempore, seu ut homini, hæc Verbo divino dari, non quidem ut Deo, sed ut homini, et quatenus in humanitate, quam sibi hypostaticè unitam habet, recipiuntur. Quæcumque verò Deus dat Christo, ut homini, hæc etiam ipsi dat Pater æternus, actione quidem communi cum Filio æterno et Spiritu sancto, cum agant per naturam divinam, quæ tribus communis est, sed tamen actione, quæ speciali modo Patris est, quemadmodum et speciali ratione est Filii et Spiritus sancti. Hinc, licet actione tribus communi creatus fuerit mundus, attamen in symbolo Constantinopolitano mox laudato Deus Pater dicitur *omnipotens, factor cæli et terræ, visibilibus omnium et invisibilibus*; per Filium unigenitum consubstantiali Patri dicuntur *omnia esse facta*, et similiter Spiritus sanctus dicitur *omnia vivificans, locutus per Prophetas*, et præterea *cum Patre et Filio simul adoratus*; adeoque cui ut supremo omnium creatori et conservatori, universa subjecta sunt. Omnis ergo actio Dei ad extra, et tribus personis est communis, et propterea etiam unicuique personæ, aliis non exclusis, tribuenda est.

Regula sexta expenditur. — « Cum Deus Jesus Christum appellat *Filium suum dilectum*, « *in quo sibi complacet*, et jubet eum ab omnibus audiri; dilectio illa, ait Berruyer, « et complacentia Dei sunt unius et veri in « tribus personis subsistentis, erga hominem « Jesum factum sibi in tempore verum naturalemque Filium, non Dei, ut prima est in divinis persona, erga Verbum quod ab æterno « producit. »

Verum eò loci memoratam complacentiam et dilectionem non esse Patris æterni, sed Dei unius et veri in tribus personis subsistentis, vel idcirco pertendit Berruyer, quod Deus Pater æternus non possit complacere sibi in Filio suo æterno, nec illum diligere; vel quod complacentiam divinam et amorem erga Verbum ut carne indutum, seu hominem factum,

sentiat ita esse attribuendam Deo uni et vero in tribus personis subsistenti, ut nonnisi de Deo sic spectato, non autem de Deo Patre æterno prædicari possit. Atqui, secundum fidem catholicam, Pater æternus amat Filium suum æternum et redamatur à Filio suo æterno, et secundum theologiam certissimam et omni ævo vigentem, ex illo utriusque amore mutuo, necessario, perfectissimo, æterno, continuo, immutabili et immanente, jugiter emanat Spiritus sanctus tertia sanctissimæ Trinitatis persona, quæ Patri et Filio æqualis est et consubstantialis. Fides quoque exigit, ut Pater æternus dicatur sibi complacere in Filio suo æterno unigenito ut incarnato, eumque diligere; non solum quia amor necessarius et complacentia Patris æterni erga Filium suum est immutabilis et ad instans Incarnationis et omnia subsequencia protenditur; sed etiam quia omnis proprietas, omnis actus ad extra, omnis operatio tribus divinis personis communis, uniuscujusque est etiam personæ divinæ, et de illâ debet prædicari ut patet ex Symbolo Constantinopolitano, cujus verba antea jam laudata, mox adversus regulam præcedentem allata sunt.

Deregula septimâ Berruyeri. — « Cum dicitur, « inquit, Jesus Christus Filius Dei verus et « naturalis, aut illis aut ab illis hominibus « quibus nondum expressè et explicitè declaratum est mysterium ab ipso Jesu Christo « Filio Dei suo tempore revelandum de tribus « in Deo uno personis inter se realiter distinctis; illi profectò homines Christum intelligere non poterant esse Filium Dei, nisi quia « sanctissima ejus humanitas personæ uni divinæ, sive cognito sibi Deo uno et vero « conjuncta fuerat unione reali, » etc.

Hæc regula duo complectitur, unum, Christi auditores penitus ignorasse mysterium trium in Deo personarum, quarum prima Pater æternus, secunda Filius ab æterno genitus, tertia Spiritus sanctus; adeoque, cum Christum se esse Filium Dei asserentem audiebant, non potuisse ejus verba intelligere de Filio Dei æterno facto homine, sed tantum de humanitate Christi unitâ Deo quem cognoscebant. Alterum est aliquos in Evangeliiis referri professos Christum esse Filium Dei, quibus idem mysterium Trinitatis pariter erat occultum, et qui proinde eodem sensu Christum Filium Dei appellabant. Illud investigandum paragrapho sequenti. De isto deinde paragrapho altero disseremus. Interim legi potest Determinatio sacræ

Facultatis super propositione XLIII; ad quam jam remisimus.

§ 4. *De probatione quam Berruyerus ex eo deducit, quòd auditoribus Christi esset ignotum mysterium trium in Deo personarum.*

« Dominum nostrum Jesum Christum esse verum naturalemque Dei Filium, inquit Berruyerus pag. 78, secundum notionem explicatam (eo nempe sensu, quòd in ejus humanitatem personæ uni divinæ unitam caderet in recto illa, filii Dei, appellatio, abstrahendo à Trinitate personarum in Deo et ab æternâ generatione Verbi), hoc ipsum est profectò, quod Christus ipse credendum Judæis proponebat, et à Prophetis promissum asserebat, et miraculis suis verum esse comprobabat. Nam quid aliud intelligerent Judæi, cum se Christus, homo ille, quem auribus audiebant et conspiciebant oculis, Filium Dei diceret et credi vellet, antequàm proposuisset explicitè credendum, verum Deum et unum subsistere in tribus personis realiter distinctis Patre, Verbo, et Spiritu sancto; quarum prima Pater est ab æterno, secunda ab æterno Filius... eo sensu dixit Jesus se quem videbant, quem audiebant, quem interrogabant, quem poterant contrectare sui temporis Judæi esse verum Dei Filium, quo sensu Messiam futurum esse Filium Dei debebant credere Scripturis prænuntiantibus, ante Christi adventum Israelitæ veteres; quibus nondum revelatum erat, Deum suum verum et unum subsistere in tribus personis realiter distinctis, quarum prima esset ab æterno Pater, secunda ab æterno Filius. »

Hæc ille qui eò progreditur, ut ne ullum verbum quidem in Evangeliiis et Apostolorum scriptis, atque ab ipso Christo, antequàm à mortuis resurgeret, sentiat dictum de Trinitatis mysterio et Filio Dei æterno, sed ad hæc et alia religionis christianæ *deinceps privatà magistrorum suorum institutione evehendos fideles* effutiat, ipsique Apostoli de iisdem ab ipso Christo instituti fuerint *in privatà scholâ* ab ipso *ex mortuis suscitato creatâ*, cum per dies quadraginta apparuit eis (vide pag. 160, 161, 162, 166, 167.)

Quàm dissimilis prætensus ille interpretes à sanctis Ecclesiæ doctoribus in exponendis Scripturis! Hi Divinitatem Christi ab æterno geniti ferè singulis novi Testamenti paginis expressam ostendebant. Ille verò Apostolis, Evangelistis, universis novi Testamenti scriptoribus, Christo ipsi attribuit Judæos erudiendi

ignotam hactenùs methodum juxta quam generatio Christi æterna in Scripturis siletur, non primùm, non palàm ipsis annuntiabatur, sed tantùm privatim et jam initiatis reservabatur, adeò ut præposterè concilia etiam œcumenica, Ecclesiæ doctores et theologi ex Scripturis argumenta protulerint ad prima fidei capita contra varios hæreticos asserenda.

Constat ex Evangelio Judæos, cum Christum, cujus missio divina tot miraculis monstrabatur, audiebant se Filium Dei esse annuntiantem, eum intellexisse à se dici Filium Dei, Deum, et Deo æqualem. Joan. 5, v. 18: *Propterea ergo, inquit Evangelista, magis querebant eum Judæi interficere, quia non solum solvebat sabbatum; sed et Patrem suum dicebat Deum, æqualem se faciens Deo.* His similia habentur alibi; quibus sese extricare aliter non potest Berruyerus, quàm humanitatem personæ uni divinæ unitam contendens dicendam esse Deo æqualem; quo nihil absurdius. Falsum ergo est auditores Christi non potuisse ex ejus dictis intelligere ipsum, etsi ut homo appareret, se tamen Filium Dei Patris æternum prædicare.

Ad suscipiendam autem fidem explicitam tam alti mysterii à Christo et Apostolis omnibus proponendam, Judæi, Deo ita providente, variis modis præparati fuerant, uti post sanctos Patres theologi advertunt. Vide Bellarminum, lib. 2 de Christo, capite 6. Mysterium Trinitatis personarum, quarum prima Pater est et secunda Filius, pluribus in locis veteris Testamenti non obscurè significatur, licet apertius in novo. Hisce locis efficaciter utuntur theologi post sanctos Patres ad mysterium illud persuadendum, nec ullum dubium esse potest quin fide hujusce mysterii explicitâ donati fuerint antiqui Patriarchæ et Prophetæ, necnon insigniores justi qui ab Adamo ad Christum usque omni ævo floruerunt. Neque defuit aliqua ejus notitia legisperitis. Ita docent sancti Patres et theologi. Et præterea, sine fide in Christum, in mysterium Incarnationis et redemptionis explicitâ aut saltem implicitâ revelationi innixâ, nemo unquàm potuit salvari. Ergo omni tempore credita sunt explicitè illa mysteria saltem à *majoribus*, ut ait S. Thomas, primâ secundæ quæst. 2, art. 7 et 8. Relegantur quæ diximus de hoc argumento dissertatione primâ.

Deinde verò cum Christus baptizatus est, priusquàm proinde sacrum ministerii sui mu-

nus exerceret, ecce aperti sunt cæli, ait S. Matthæus, 3, 16 et 17, et vidit Spiritum Dei descendentem sicut columbam et venientem super se, et ecce vox de cælis dicens : *Hic est Filius meus dilectus, in quo mihi complacui*. Idem referunt sanctus Marcus 1, 10 et 11, et S. Lucas 3, 21 et 22. Tres autem sanctissimæ Trinitatis personas ibi designari advertunt sancti Ecclesiæ doctores; Patrem videlicet, cujus vox audita est : *Filius*, cui testimonium Pater illà voce perhibet, *hic est Filius meus dilectus*; et Spiritum sanctum, qui descendit in columbæ speciem. Contigit verò illud prodigium, ait S. Lucas, *cùm baptizaretur omnis populus*, adeoque ibi tunc aderant multi qui viderunt quoque Spiritum descendentem et vocem audierunt. Denique prædicationi Christi præiverat testimonium sancti Joannis Baptistæ, qui ad parandam ipsi viam missus fuerat, quique Joan. 1, 32 et sequentibus refertur ita esse locutus : *Vidi Spiritum sanctum descendentem, quasi columbam de cælo, et mansit super eum, et ego nesciebam eum; sed qui misit me baptizare in aquâ, ille mihi dixit: Super quem videris Spiritum sanctum descendentem et manentem super eum, hic est qui baptizat in Spiritu sancto et ego vidi; et testimonium perhibui quia hic est Filius Dei*. Ergo ante prædicationem Christi, variis modis præculti fuerant et præparati animi Judæorum ad mysterium æterni Filii carnis facti pro suâ tenuitate intelligendum, cùm ipsis apertè declararetur. Unde non mirum quòd Christi verba de eo mysterio Judæi sensu vero acceperint, nec mirum quòd ejus fidem multi ex eis amplexi fuerint; stupenda solùm majoris numeri cæcitas, qui salutem sibi à tanto præcone annuntiatam et oblatam pertinaciter rejecit. Vide Determinationem sacræ Facultatis ad propos. XXVII et XL.

§ 5. De probatione quam Berruyer ex vocibus, Filii Dei, de Christo usurpatis ab aliquibus, qui nihil ut putat, audierant de generatione æternâ Verbi.

Matth. 16, 16, ait Berruyerus, pag. 157, respondens Simon Petrus dixit : *Tu es Christus Filius Dei vivi*. Joan. 6, 70 : *Et nos credidimus et cognovimus, quia tu es Christus Filius Dei*. Joan. 11, 27, ait Martha : *Ego credidi, quia tu es Filius Dei vivi qui in hunc mundum venisti*. Matth. 26, 63 : *Et princeps sacerdotum ait illi: Adjuro te per Deum vivum, ut dicas nobis, si tu es Christus Filius Dei*. 64 : *Dicit illi Jesus : Tu dixisti*. Matth. 27, 34 : *Centurio autem et qui*

cum illo erant, custodientes Jesum.... timuerunt valdè dicentes: Verè Filius Dei erat iste. Si Jesus Christus credi et dici Filius Dei non posset, nisi quatenus et in quantum creditur quia Verbum.... est ab æterno Filius Patris; dicendum profectò esset, neque Petrum in genuinâ suâ confessione, neque Martham, neque principem sacerdotum Caipham in suâ interrogatione, neque centurionem et eos qui cum ipso erant custodientes Jesum, homines romanos, in suâ exclamatione vidisse quidpiam et intellexisse. Deinde conatur efficere tunc temporis ipsismet Apostolis non fuisse revelatum mysterium Trinitatis et generationis æternæ Verbi, et inde concludit ipsammet confessionem sancti Petri esse intelligendam de Christo facto Filio Dei in tempore per unionem humanitatis suæ hypostaticam cum personâ unâ divinâ.

At, quod ad confessionem sancti Petri attinet Matthæi 16, cui altera omninò conformis est, si verum sit in eâ edendâ sanctum Petrum non vidisse quidpiam et intellexisse in hypothese quòd accipi nequeat nisi de Filio Dei æterno facto homine, sequeretur sanctos Ecclesiæ doctores, atque theologos et interpretes, qui omnes eam urgent adversus Arianos, ut expressam generationis æternæ Jesu Christi professionem, ei tribuisse sensum in quo sanctus Petrus non vidit quidpiam et intellexit, quamvis revelante Deo, ut ait ipse Christus, locutus fuerit.

Deinde verò attendatur vis vocum, quas sanctus Petrus adhibet. In binâ illâ confessione voces, *Filius Dei*, pronuntiantur cum articulo emphatico, absolutè, antonomasticè, ut aiunt; verum ergo et proprium atque unigenitum ac naturalem Dei Filium designant. Fatetur Berruyerus; at contendit hunc verum, proprium, unigenitum et naturalem Filium Dei esse humanitatem ipsam Christi, prout unita est personæ uni divinæ, quæ (humanitas) in recto ita appellatur Filius Dei; quo, ut sæpè à nobis ostensum est, nihil absurdius tum in se, tum in mente Berruyeri, qui unicam in Christo personam à se admitti profitetur, eamque ait reverà esse personam æterni Filii. Itaque, attentà vi verborum, non alio sensu confessio sancti Petri intelligenda est, quàm isto : *Tu es Filius Dei verus, proprius, unigenitus, naturalis; adeoque æternus, Patri Deo æqualis et consubstantialis*.

Neque argumentari licet ex eo quòd à sancto Petro tunc homine rudiori et mysterium Trinitatis ignorante, non potuisset altum genera-

tionis æternæ Christi mysterium attingi. Id quidem propriis viribus non valuisset. Sed quis negaverit eum potuisse divinâ revelatione ita illustrari ut fidem hanc consequeretur? Atqui illum à Deo Patre tanta illa esse edoctum, Christus ipse testis est : *Respondens autem Jesus, ait auctor sacer versu sequenti, dixit ei: Beatus es, Simon Barjona, quia caro et sanguis non revelavit tibi, sed Pater meus, qui in cœlis est.*

De confessione fidei quam emisit Martha, Joan. 11, 24 : *Tu es Christus Filius Dei vivi qui in hunc mundum venisti*; indubitatum est apud omnes interpretes catholicos non alium esse posse hujus sententiæ in se spectatæ sensum, quàm istum : *Tu es Filius Dei proprius ab æterno genitus, qui incarnatus es, ad homines docendos et salvandos.* Utrum verò Martha satis intellexerit sensum genuinum verborum quibus utebatur, quæstio est circa quam duplex est opinio. Aliqui cum S. Chrysostomo putant Martham, adhuc mente infirmâ, tunc credidisse quidem in Christum, sed nondum ut par erat. Alii cum pluribus è sanctis Patribus sentiunt eam à Christo edoctam, tanti mysterii intellectum pro captu suo esse assecutam, adeoque plenè confessam esse generationem æternam Christi in tempore carnis facti. Nemo verò interpretationi Berruyerî, aut rationi, quam affert, præivit.

Quando autem princeps sacerdotum, Matth. 26, 63, ita Jesum interrogavit : *Adjuro te per Deum vivum, ut dicas nobis si tu es Christus Filius Dei*, refert auctor sacer, v. 64, respondisse Jesum : *Tu dixisti*, nempe Divinitatis suæ et æternæ generationis prædicandæ occasionem Jesus Christus prætermittere noluit. Responsio verò debuit interrogationi congruere, ac proinde in hac principis sacerdotum interrogatione, vox, *Filius Dei*, accipienda est secundum genuinam et nativam suam vim, pro Filio Dei vero, proprio, unico, et ejusdem naturæ ac Deus Pater. Neque mirum illo sensu hanc interrogationem à Caiphâ, sacerdotum principe, fuisse factam Christo, etenim 1º, non ignotum omnino esse potuit sacerdotum principi mysterium trium in Deo personarum, cujus prima Pater esset ab æterno generans Filium, et secunda esset Verbum, seu Filius ab æterno genitus; siquidem legisperitis subobscurè illud mysterium ante adventum Christi cognitum fuisse pro certo habetur, et ex eo meritò colligitur, quòd in Scripturis veteris Testamenti mysterium illud deprehendatur adumbratum

et reipsâ revelatum, licet minùs distinctè quàm in novo Testamento. 2º Eundem etiam sacerdotum principem profectò non latuit Christum Judæis prædicasse se esse Filium Dei, quod à Judæis, ipsomet approbante Christo, intellectum fuerat eo sensu quòd Christus *se Filium Dei*, verum Deum, et æqualem Deo faceret; quapropter Jesum blasphemix non semel accusarant. Pronum est igitur Caipham, qui Christum quoque, ob hanc ejus responsionem, *tu dixisti*, blasphemix condemnat, eodem sensu quo ipsi, quorum pervaciam et incredulitatem imitabatur, accepisse istam vocem, *Filius Dei*.

De exclamatione centurionis eorumque militum, qui viso terræ motu et cæteris signis tempore mortis Christi peractis, *timuerunt valdè dicentes : Verè Filius Dei erat iste*, Matth. 27, hi sanè audierant Christum annuntiâsse Judæis se *esse Filium Dei*, atque significationem hujusce vocis ab ipsis acceperant Judæis, qui propterea petierunt Christum cruci affigi. Cum autem vidissent stupendis comprobari prodigiis eum esse à Deo missum et præconem fuisse veritatis; gratiâ divinâ illustrati exclamarunt : *Verè Filius Dei erat iste*. Has voces capiunt sancti Patres ut sonant, de Filio Dei vero, proprio, ac proinde genito ab æterno. Quòd si quis contenderet verba centurionis per se huic dogmati exprimendo nata, fortè tamen ab eo prolata non fuisse nisi secundum quamdam notionem Filii Dei confusam, et ad altum istud mysterium non pertinentem, is non adeò à nobis rejectam doctrinam Berruyerî amplecteretur.

Vide Determinationem sacræ Facultatis ad propositionem LX.

§ 6. De verbis Angeli ad Mariam Virginem apud Lucam.

« Lucæ 1, 31 : *Ecce concipies in utero, et paries Filium; hic erit magnus et Filius altissimi vocabitur.* 35 : *Spiritus sanctus superveniet in te, virtus Altissimi obumbrabit tibi, ideòque et quod nascetur ex te sanctum, vocabitur Filius Dei....* Pace, inquit Berruyerus, pag. 110 et 111, doctissimorum virorum (qui Filium Mariæ volunt ab Angelo dictum futurum esse Filium Dei æternum pro nobis humanitatem assumpturum), dixerim tres periodi evangelicæ vocolas, easque non otiosas, sed... ex industriâ selectas ab illis in interpretatione suâ expungi gratis, vel ad sensum non suum detorqueri. Prima vox est (*ideòque*) in quâ pro legitimo, sed et unico

denominationis (*Filii Dei*) fundamento ponitur actio transiens et libera Spiritus sancti in Mariam superventuri, et virtus Altissimi Virgini castissimæ in tempore obumbratura. Secunda vox (*et*) quæ addita voci (*ideòque*) emphasim quandam habet, notatque non solum Verbum, quod est ab æterno Filius Patris, sed nasciturum ex Mariâ Virgine Filium, novâ etiam ratione vocandum esse Filium Dei. Tertia vox (*quod*) quod nascetur ex te sanctum; quæ loquendi forma in neutro genere, secundum logicos omnes, imò et familiarem usum loquendi, non appellat in recto personam, sed humanitatem; et, ubi de Christo agitur, sanctissimam ejus humanitatem ex virgineo sanguine propagandam, donis ornandam omnibus, et personæ uni divinæ in tempore conjungendam. Quarta vox adjici potest (*sanctum*) quod plerique omnes rectè interpretantur unctum à Spiritu sancto et eximiè sanctificatum; et istud profectò epithetum in recto aptari Verbo non potest, Filio Patris æterni æterno; unicè in recto convenit sanctissimæ Christi humanitati ex Virgine nascituræ... certissimè ergo in humanitatem Christi Verbo Dei unitam hypostaticè, et propter hanc unionem, cadit. »

Verum nihil hâc argumentatione levius, ut verbis utar doctissimi Petavii simile ratiocinium Crelli de verbis iisdem angelicis refellens lib. 3 de Trinitate, cap. 6, n. 2. Et 1° quidem hâc interpretatione ipsa hæresis Nestorii obstruitur, à quâ tamen Berruyerius videri vult abhorrere. Enimverò, in eâ duplex in Christo Filius clarissimè distinguitur, nempe *Verbum*, quod est ab æterno Filius Patris, et temporalis Filius Dei ex Mariâ Virgine nascituri, qui à Filio æterno clariùs discriminari non poterat quàm hoc loquendi modo: *non solum Verbum*, seu non solus *Filius Dei æternus*, sed *Filius ex Mariâ Virgine nasciturus novâ etiam ratione vocandus est Filius Dei*. Præterea, is *Filius ex Mariâ Virgine nasciturus et futurus Filius Dei*, dicitur esse in recto humanitas personæ uni divinæ unita. Quæ humanitas à Verbo Filio Dei æterno infinitum differt.

2° Eadem interpretatio injuriosa est sanctis Ecclesiæ Patribus, theologisque et interpretibus catholicis; qui omnes pro certo habent dicta Angeli intelligenda esse de Filio Dei æterno in sinu beatæ Virginis operante Spiritu sancto et virtute Altissimi obumbrante incarnando, et ex eâ secundum carnem nascituro. Hos omnes accusat quòd *tres periodi voculas*, et illas *quidem non otiosas, sed de industriâ se-*

lectas, vel gratis interpretatione suâ expunxerint, vel ad sensum non suum detorserint.

3° Repugnat universæ traditioni. Nempe, ut ait illustrissimus Bossuetius in Richardum Simonem, *Instruction sur la version du nouveau Testament à Trevoux 1702*, tomo II operum in-4°, pag. 317, « omnis Filius est ejusdem naturæ ac Pater; repugnat eum esse verum Filium, qui alterius est essentiæ. Id ipsum in singulis ferè paginis scriptorum sancti Athanasii contra Arianos legitur, singulis lineis epistolæ synodicæ ejus prædecessoris sancti Alexandri et concilii Alexandrini ad omnes mundi episcopos deprehenditur. Principium est quo sancti Patres usi sunt ad probandum consubstantialitatem, ac proinde divinitatem Christi.... Qui ab illo sensu unico nominis hujus, *Filius Dei*, Christo in Scripturis absolute et per excellentiam attributi, ipsumque Filium Dei æternum significantis, vel unum excipit et abducit Evangelii locum, is fundamentum fidei evertit, ac seriem traditionis abruptit, atque unum testimonium eludendo, cætera magno cum periculo attentat. » Licet autem Berruyeri interpretatio, nonnihil ab expositione Richardi Simonis differat, attamen his illustrissimi præsulis dictis, quæ verissima esse multis congestis testimoniis facilè ostendi posset, illa perinde refellitur. Probant enim tam nefas esse, humanitatem Christi unitam dici in recto Filium Dei in Scripturis, uti Berruyerius contendit, quàm statui cum Richardo Simone, Filium Mariæ Virginis potuisse idcirco solum appellari ab Angelo Filium Dei, quia ex Virgine operante Deo conceptus est, etiamsi non esset Filius Dei Deus.

4° Repugnat sacro contextui. Expendamus verba Angeli, et singulas illas versùs 35 voculas quas Berruyerius contendit ab illis interpretibus *expunctas* aut *ad sensum non suum detortas*. Concedendum Berruyero, quod evidens est, scilicet nomen Filii Dei, versu 35, eodem sensu accipi quo 32. Illud autem versiculi 32: *Filius ille tuus vocabitur Filius Altissimi (sera le fils du Très-Haut)*, vel intelligendum est de Filio Dei æterno ejusdem naturæ ac Pater, ex Mariâ Virgine incarnando et secundum carnem nascituro, vel nullo in loco Scripturarum denominatio, Filii Dei, Christo attributa significat Filium Dei æternum. Nemo hactenus hanc propositionem negavit, adeò manifesta est. Atqui denominatione Filii Dei Christo in Scripturis attributâ significatur saltem pluribus in locis sacri contextus, *Filius*

Dei æternus, Deus de Deo, consubstantialis Patri. Propositionem istam Berruyerius negat quidem, Socinianis hæc in parte consentiens; verum opprimitur non modò totius traditionis auctoritate, ut mox ostensum est, sed et pondere argumentorum ex vocum Scripturæ vi et proprietate deductorum, quibus usi sunt Ecclesiæ doctores contra Sabellianos, Arianos et Nestorianos, quibusque utuntur theologi et interpretes omnes adversus Socinianos. Horumce momentorum summa hæc est: Filium sine addito et absolutè, Filium verum, proprium, unicum, unigenitum, esse Patri naturâ, seu essentiâ similem, adeòque Christum non posse ita dici Filium Dei, quin sit Filius Dei æternus et consubstantialis Patri. Ergo graviter erat Berruyerius, dùm inficiatur versu 32, his verbis absolutè pronuntiatis, *Filius Altissimi*, designari Filium Dei æternum, ac proinde agnoscere debuisset istis versùs 35, *Filius Dei*, eundem Filium Dei æternum designari. Etverò nomine *Filii Dei*, sic absolutè enuntiato exprimi Filium Dei, Deum verum, vel ipsi Judæi intellexerunt, cum se *Dei Filium* esse annuntiabat. Videantur cap. 5 Evangelii S. Joannis, v. 18, et sequenti, et caput 10, v. 35. Hoc igitur nomen à Christo sic pronuntiatum ejusmodi sensum animis vi suâ et proprietate ingenerabat, adeòque verba Angeli Christum Filium Dei æternum etiam commonstrabant.

Sed et ejusdem rei argumentum suppeditant vel ipsa Angeli verba in se spectata. Angelus ait Christum esse *Filium Altissimi, Filium Dei*, quemadmodum ibidem declarat eum esse Filium Davidis et Mariæ. Atqui Christus eo sensu erat, juxta Angelum, futurus Filius Mariæ et Davidis, quod ejusdem ac ipsi esset essentiæ, ipsisque naturâ et substantiâ similis seu consubstantialis. Ergo, etc. Admitteturne turpis et homine indigna æquivocatio in dictis Angeli?

Inania sunt et futilia quæ Socinianos imitatus notat Berruyerius de vocolâ *ideòque*, quasi verò eâ voce significaretur unicum fundamentum, propter quod sanctum ex Mariâ nasciturum, vocandum sit filius Dei, illud esset quod, Deo operante, virgo Maria ipsa conceptura esset. Particulam causalem, *ideòque*, ipsimet Sociniani fateri debent non esse eò loci ita urgendam, ut sola cujusque hominis conceptio ex Virgine per potentiam Dei absolutam sufficeret ad denominationem Filii Dei illi partui tribuendam. Non enim absolutè impossibile est non modò hominem purum, sed et hominem donis gratiæ eximiis et potestate admirabili

supra alias creaturas non ornatum nasci ex Virgine, si illud Deus per potentiam extraordinariam vellet effici. Tunc verò ejusmodi hominem aliis saltem multis gratiâ et potentiâ solùm parem, nollent propter solam nativitatem ex Virgine eo sensu dici Filium Dei, quemadmodum ipsi putant in Scripturis Filium Dei appellari. Concedant ergo ipsi, concedat etiam Berruyerius verba Angeli de miraculoso illo ex Virgine conceptu accipienda esse cum adjunctis, quibus manifestum fit ea ad solum Messiam per Prophetas promissum, ad solum Christum contingere. Quo posito, adjuncta ejusmodi inspicenda sunt, ex illis controversia dirimenda, neque jam ad subtilitatem dialecticam vox, *ideòque*, in verbis Angelicis exigenda, sed ad communem loquendi usum, juxta quem instar causæ et principii sæpè afferuntur quæ propriè loquendo causæ non sunt, sed quocumque modo cum ipsâ re sunt connexa. Cùm porrò is ordo rerum à Deo constitutus sit ut universi homines puri ex utroque sexu generentur, cùmque illud planè conveniens fuerit, ut, si Filius Dei homo fieret, ex Virgine nasceretur, consequens fuit ut qui in utero virginis, Deo miraculosè operante, erat concipiendus, intelligeretur futurus homine puro major, adeòque Filius Dei Deus, naturam humanam assumpturus.

Præterea, inscia non erat beata Virgo vaticinii, quod legitur Isaïæ VII, 14: *Ecce virgo concipiet et pariet Filium et vocabitur nomen ejus Emmanuel*; noverat hunc ipsum virginis Filium juxta eundem Isaïam 9, 6, *Deum fore admirabilem, fortem*; ad hanc Isaïæ prophetiam mentem ejus revocaverat Angelus vel initio suicum eâ colloquii, cùm de Jesu Filio Altissimi, futuro quoque Mariæ Filio dixerat: *Dabit illi Dominus Deus sedem David Patris ejus, et regnabit in domo Jacob in æternum, et regnû ejus non erit finis*; quæ omnia de Filio ex Virgine nascituro Isaïas 9, 7, vaticinatus fuerat. Attendendo autem, ut par est, ad hæc adjuncta, ad illud Isaïæ oraculum, sensus verborum Angeli is erit: Spiritus sanctus superveniet in te, et virtus Altissimi obumbrabit tibi, ut impleatur in te quod Isaïas prædixit de Emmanuele, de Deo cum hominibus, de puero Deo forti, admirabili ex virgine prodituro; ideòque et quod nascetur ex te sanctum vocabitur Filius Dei.

Nihil difficultatis habet vocula (et), quæ eodè refertur ac ista (*ideòque*), et cujus significatione determinatur! *Emphrasim quamdam habet addita voci* (*ideòque*); quid inde? hoc unum de tanto mysterio Angelum magni-

ficè esse locutum. Non magis premunt quæ de tertiâ voculâ : (*quod*) *quod nascetur ex te sanctum*, aggerit Berruyer. *Loquendi forma*, inquit, *in neutro genere non appellat in recto personam, sed naturam*. Id quidem sæpè verum, sed exceptiones fieri necesse est, nec rara sunt exempla, ubi voces neutrius generis personas designant. Eâ de re *ex subjectâ*, ut aiunt, *materiâ* dijudicandum. In versu autem 35, de quo agitur, antecedentia et consequentia manifestant hisce verbis Angeli, *quod nascetur ex te sanctum*, designari personam. Nam idem significant quod ista versûs 31, *concupies et paries Filium*. Cum autem mulier dicitur concipere et parere filium, nomine filii nemo negaverit, ne ipse quidem Berruyer, in recto designari personam non naturam. Pariter *quod nascetur ex Virgine sanctum*, idem sonat ac *Filius*, qui eodem versu 31, vocandus est *Jesus*. Atqui *Jesus* est nomen proprium personæ. Denique *quod nascetur sanctum*, versu 32, dicitur *Filius Altissimi*, et versu 35, *Filius Dei* : natura autem humana Christi, ut sæpè diximus, non potest nuncupari Dei Filius. Vox Filii in personam immediatè cadit. Non advertit Berruyer quòd, si vox neutrius generis non posset designare personam, ipsummet Verbum Dei non posset dici Filius Dei patris æternus, secunda sanctissimæ Trinitatis persona; quod tamen dogma fidei sæpè ipsemet profitetur. De cætero quod ex Mariâ erat nasciturum meritò *sanctum* ab Angelo nuncupatur; siquidem Jesus Christus Filius Mariæ, ut Filius Dei Deus, sanctitas est summa, sanctitas increata; et, ut homo Filius beatæ Virginis, est sanctitas modo eximio et soli Christo convenienti participata, quatenus scilicet humanitatem suam habet hypostaticè unitam Verbo. Hinc *sanctum* sine addito et antonomasticè nuncupari potuit.

Ex dictis faciliè colligitur quantum Arianis et Socinianis faveat interpretatio quam perstringimus. Nam si nominibus, *Filii Altissimi*, *Filii Dei*, ab Angelo attributis Christo apud Lucam 1, 32 et 35, intelligenda est in recto Christi humanitas personæ uni divinæ hypostaticè unita; sequitur cætera omnia Scripturarum loca, in quibus Christus dicitur *Filius Dei*, *verus Filius Dei*, *Filius Dei proprius*, *unigenitus*, quibus sancti Ecclesiæ doctores tam feliciter usi sunt ad refellendos Christi Divinitatis hostes, et quæ etiamnum à theologis catholicis jure usurpantur ad debellandos Socinianos, jam nullius esse efficacis, ut faciliè perspicitur ex sæpè demonstratis.

§ 7. *De tribus primis versiculis Epistolæ S. Pauli ad Romanos.*

« Roman. 1, 2, 3 : *Paulus servus Jesu Christi, vocatus Apostolus, segregatus in Evangelium Dei, quod ante promiserat per Prophetas suos, in Scripturis sanctis, de Filio suo, qui factus est ei ex semine David secundum carnem*... Verba, ait Berruyer, pag. 109, ut jacent, in obvio suo et nativo sensu, nullâ formidine interpretare de Jesu Christo Deo et homine, qui ex semine David per Mariam in Filium suum derivato, factus est in tempore Deo uni et vero Filius secundum carnem. Intellige dicta instar suppositi et in masculino genere de sanctissimâ Christi humanitate, quæ superveniente Spiritu sancto in Mariam, et virtute Altissimi ei obumbrante, conjuncta est in tempore cum personâ unâ divinâ, unionem reali, physicâ et substantiali in unitatem personæ et individuum societatem naturæ. »

Nodum in scirpo quærit Berruyer. Istud versu 3, *de Filio suo* (Dei) *qui factus est ei ex semine David*, nihil aliud significat nisi Filium Dei æternum (nullus enim est alius Filius Dei absolutè et per excellentiam dictus) factum esse hominem, eumque, ut hominem, ex Davide esse propagatum, seu Filium Dei secundum carnem, secundum naturam humanam quam assumpsit, esse natum, esse factum ex semine David, esse Filium Davidis. Scilicet, quemadmodum Joan. 1. *Verbum, quod erat in principio, quod erat apud Deum, quod erat Deus dicitur versu 14, caro factum (et Verbum caro factum est, et habitavit in nobis)*; ita S. Paulus ad Romanos scribens ait : *Filius Dei*, æternum qui ipsummet est Verbum, *factum esse in tempore Filium Davidis secundum carnem*.

Præposterè Berruyer ubique ponit ut certum et millies repetit quod minimè probat, nec ullo modo probare potuisset, nempe in hac sancti Pauli pericope, *de Filio suo* (Dei) *qui factus est ei ex semine David secundum carnem*, vocem Filii Dei esse attributum propositionis, quasi dictum esset : *Qui factus est ei Filius ex semine David secundum carnem*. Atqui id gratis et falsò confictum. In verbis illis Apostoli, ait sanctus Thomas, parte 3, quæst. 16, art. 7 ad 1, *hoc relativum, qui, quod refert personam Filii Dei, non debet intelligi ex parte prædicati, quasi aliquis existens ex semine David se u dùm carnem sit Filius Dei; sed debet intelligi ex parte subjecti, ut sit sensus, quòd Filius Dei factus est, scilicet homo, ad honorem Patris, existens ex semine David secundum carnem, ac si diceret;*

Filius Dei factus est habens carnem ex semine David ad honorem Dei. En obviuſ, naturalis et vocum ſimul proprietati et fidei regulæ congruus ſenſus illius loci. Unde apparet quantum à mente Apoſtoli diſtet Berruyerſi interpretatio, nomine, *Filii Dei*, humanitatem Chriſti intelligi jubentis, ſeu *maſculino genere* hominem Chriſtum, *qui, inquit, factus eſt ei* (Deo uni et vero in tribus perſonis ſubiſtenti) *nuper Filius, per actionem tranſeuntem et liberam, quâ ſanctiſſima humanitas conjuncta eſt perſonæ uni divinæ, etc.*

Neque feliciuſ Berruyerſus pronomen *ei* interpretatur de Deo in tribus perſonis ſubiſtente, Patre humanitatis Chriſti, quam per unionem ſui cum perſonâ unâ divinâ ſubſtantialem, ponit eſſe factam in tempore Filium Dei temporalem. Hæc interpretatio plurima ſecum importat falſa, illudque inprimis Filium Dei eſſe propoſitionis Apoſtoli prædicatum. Germanum huiuſce voculæ, *ei*, ſenſum expreſſit doctor Angelicuſ, dum illam ait idem ſonare ac *ad honorem Dei Patris*, in quo ut in ſuo principio, contineri et honorari Filium et Spiritum ſanctum meminſſe debet diligens Scripturarum interpres. Id enim alicui fieri verè dicitur, quod in ejus gloriam et honorem vergit, et ob eum ſinem peragitur. Nihil necesse eſt obſervari illud, *ei*, neque in græco extare, neque in pluribus olim exiſtiſſe vulgatæ verſionis exemplaribus, eumque locum ſine ullo pronomine à Tertulliano et à ſancto Ambroſio fuiſſe lectum; ſiquidem eo ſeu dempto, ſeu relicto, idem ſenſus habetur, neque ulla inde naſcitur difficultas. At, inquit Berruyerſus, pag. 3, nonniſi de filiatione divinâ humanitati Chriſti in perſonâ unâ divinâ ſubiſtenti attributâ in recto, intelligi poſſunt quæ continuo addit Apoſtoluſ verſu 4: *Qui prædeſtinatuſ eſt Dei Filiuſ in virtute ſecundum ſpiritum ſanctificationis ex reſurrectione mortuorum Jeſu Chriſti.*

Fallitur. Verbum Dei, ſeu Filiuſ Dei æternuſ, non potuit quidem ut Deuſ, prædeſtinari Filiuſ Dei; ſed Filiuſ Dei unicuſ, æternuſ, factuſ eſt in tempore ex ſemine David ſecundum carnem, ſeu factuſ eſt homo juxta propoſitum Dei æternuſ; cum nihil à Deo fiat in tempore, niſi quod ab æterno ipſe conſtituit. Ergo, cum factuſ eſt ut humanitas Chriſti Verbo ſeu Filio Dei æterno hypotaſticè uniretur in perſonæ unitatem; cum proinde factuſ eſt ut homo Jeſuſ Chriſtuſ, ſeu ut perſona Jeſu Chriſti quatenuſ homo, eſſet Filiuſ Dei; tantuſ opuſ præſcitum et prædeſtinatuſ ab

æterno fuiſſe necesse eſt. Atque hæc eſt ſancti Auguſtini lib. de Prædeſt. ſanctorum, cap. 15, n. 31, interpretatio ſolida et myſterio Incarnationis, atque fidei catholicæ planè conſentanea; quam ſequuntur S. Thomas, parte 3, quæſt. 24, art. 1: Corneliuſ à Lapide ad hunc locum; Petaviuſ, libro 11 de Incarnatione capitibus 13 et 14; Boſſuetiuſ in laudatâ inſtructione contra Richarduſ Simonem; etc.

Neque obijciatur pronomen relativuſ, *qui*, verſu 4, referri ad Filium Dei memoratuſ verſu 3, adeoque ex interpretatione iſtâ ſenſum hunc abſonum exoriri: *Æternuſ Dei Filiuſ prædeſtinatuſ eſt Filiuſ æternuſ Dei.* Illi objectioni occurrit S. Thomas hiſ verbis: *Prædeſtinatione*, ait ibidem, *attribuitur perſonæ Chriſti; non quidem ſecundum ſe, ſed ſecundum quod ſubiſtit in naturâ humanâ. Unde cum dixiſſet Apoſtoluſ: Qui factuſ eſt ei ex ſemine David ſecundum carnem, ſubjunct: Qui prædeſtinatuſ eſt Filiuſ Dei in virtute, ut daret intelligere quòd ſecundum hoc quòd factuſ eſt ex ſemine David ſecundum carnem, eſt prædeſtinatuſ Filiuſ Dei in virtute. Quamvis enim naturale ſit illi perſonæ ſecundum ſe conſideratæ, quod ſit Filiuſ Dei in virtute, non tamen eſt ei naturale ſecundum naturam ſecundum quam hoc ſibi convenit per gratiam unionis.... Antecellio quam importat illud participiuſ, prædeſtinatuſ, non refertur ad perſonam ſecundum ipſam, ſed ratione humanæ naturæ, quia ſcilicet perſona illa, eſto ab æterno fuerit Filiuſ Dei, hoc tamen non fuit ſemper, quòd ſubiſtens in naturâ humanâ fuerit Filiuſ Dei. Quod autem tradit S. doctor et ad Apoſtoluſ explicandum applicat; id ipſuſ eſt quod de Chriſti prædeſtinatione definivit ſynoduſ Toletana XI, canone I.*

Cæterum, qui interpretationem ejuſmodi, licet veriſſimam, difficulter intelligerent, poſſunt amplecti explicationem quæ eſt Origeniſ, S. Chryſoſtomi, Theodreti, aliorumque multorum apud Græcoſ, et cui adhæret Toletuſ et alii ex interpretibus latinis. *Quid ſibi vult*, inquit S. Chryſoſtomuſ, homilia 1 in Episto-lam ad Romanos, n. 2, *quid ſibi vult iſtud, definituſ ὁρισμενός, oſtenſuſ, declaratuſ, indicatuſ, confeluſ, omnium judicio et calculo, à Prophetiſ, ab inexpectato ortu ſecundum carnem, à potentiâ ſignorum, à Spiritu per quem ſanctificationem dedit, à reſurrectione quâ mortis tyrannidem ſolvit?* Itaque voce græcâ, quæ *definituſ* ſignificat, non cenſet idem exprimi ac voce *prædeſtinatuſ*, ſed idem quod *oſtenſuſ, declaratuſ, indicatuſ*; atque eodem ſenſu poſſe ipſam

accipi vocem *prædestinatus*, quam adhibet vulgatus interpres, opinatus est Cardinalis Toletus. Hoc autem posito, nulla manet vel minimæ difficultatis species.

Dùm verò Berruyerus novam et hactenùs inauditam profert interpretationem versuum 3 et 4 capitis primi Epistolæ ad Romanos, nemo sanè non perspexit ab eo propinari ipsum Nestorianismum, naturam Christi humanam *instar suppositi* esse decernendo, atque Arianorum et Socinianorum causam valdè juvari. Legatur Determinatio sacræ Facultatis ad propositionem XLVII.

Atque hæc satis sint de præcipuo Harduini et Berruyeri errore. Nos non latet quantum præterea à vero deviaverint circa novitatem cultûs à Jesu Christo instituti, circa discrimen novæ Filiorum Dei adoptionis à veteri, circa peccatum originale, de dogmatibus ad gratiam et prædestinationem spectantibus, aliisque magni momenti capitibus. Hæc verò, cùm ad præsentem de Incarnatione Verbi divini tractatum non pertineant, impræsentiarum omittere cogimur. Unum duntaxat recurret, ut jam monuimus, tractandum dissertatione sequenti, quod spectat ad adorationem, quam ambo, discipulus scilicet et magister, sciscunt humanitati Christi in recto, quia personæ uni divinæ unita est, exhibendam.

Dissertatio xij.

DE CULTU QUI CHRISTO DEBETUR.

CULTUS generatim definiri potest actus quo quis alterum veneratur propter ejus excellentiam. Cultus proinde includit 1° actum intellectûs, quo personæ illius quæ colitur, innotescit excellentia; 2° actum voluntatis, quo illi personæ propter ejus excellentiam veneratio exhibetur. Cultus dividitur 1° in interiorem et exteriorem. Cultus interior in actibus intellectûs et voluntatis quibus redditur, consistit. Cultus exterior situs est in actionibus externis quibus interiores ejusmodi actus manifestantur et exprimuntur. Actiones illæ sunt laus et honor. Laus definitur excellentiæ illius qui colitur testificatio verbis exhibita. Honor est testificatio ejusdem rei factis expressa. Cultus 2° dividitur in cultum latriæ et duliæ. Cultus latriæ ille est qui Deo in testimonium supremæ illius majestatis, summique illius in omnia domini exhibetur. Appellatur etiam cultus perfectæ subjectionis, quia eo cultu agnoscimus

nos à Deo ut à supremo Domino in omnibus pendere, ab eo nos omnia habere et sperare, nosque propter ejus excellentiam totos ipsi consecramus et devovemus. Nota autem, etiamsi adorationis nomen persæpè in Scripturis ad designandum solummodò cultum quemlibet generatim adhibeatur, usum tamen hodiè invaluisse, ut potissimum latriæ cultus eo designaretur.

Cultus duliæ est qui redditur servis Dei propter supernaturales dotes quas ipsis Deus largiri dignatus est. Duliæ cultus duplex distinguitur, alter qui duliæ nomen retinet et exhibetur sanctis, v. g., sancto Petro; alter qui, licet sit ejusdem omninò generis, ad superiorem tamen in eodem ordine gradum contingit, propter specialem illius, cui tribuitur, excellentiam. Sic se habet cultus qui Beatæ Virgini propter maternitatis divinæ dignitatem et specialia, quæ inde consecuta est, gratiæ dona, exhibetur, et dicitur cultus hyperduliæ.

Cultus 3° dividitur in cultum absolutum et cultum relativum. Absolutus ille est qui tribuitur propter excellentiam illi, cui redditur, inhærentem. Relativus alicui rei redditur propter excellentiam alterius ad quem specialem aliquam habitudinem dicit. Cultus absolutus redditur Deo, Christo et sanctis; relativus cruci et sanctorum imaginibus.

Observandum autem ejusmodi cultus diversos à se invicem sæpè vix posse per actus exteriores discerni. Namque eadem, v. g., genuflexio Deo ex sanctis exhibita, maximè diversos cultus designat, nempe respectu Dei significat cultum latriæ, respectu sancti cultum duliæ tantum, attamen eadem est actio exterior. Debet ergo cultuum diversitas ex affectu et intentione agentis æstimari, præsertim verò ex doctrinâ et intentione societatis seu Ecclesiæ in quâ illi actus frequentantur. Sacrificium tamen soli Deo offerri potest. Idem dicendum de iis laudibus quibus solus Deus posset celebrari.

Non quæritur eò loci, utrùm Christus ut Deus, supremo latriæ cultu sit adorandus. Quotquot enim fidem catholicam de Christi Divinitate ac æternâ ejus generatione profitentur, ei ut Deo deberi supremum latriæ cultum non dubitant.

Agitur de Christo ut homine, seu secundum suam humanitatem considerato, et quæritur, an Christo ut homini, ipsique ejus humanitati absolutus latriæ cultus exhibendus sit.

CAPUT UNICUM.

An Christo, ut homini, ipsique ejus humanitati debeat supremus patriæ cultus?

ADVERSUS aliquos veteres hæreticos hic ostendendum supremam adorationem patriæ deberi humanitati Christi propter Verbum cujus est hæc humanitas, ita ut una eademque adoratio patriæ Christo ut homini, ipsique ejus humanitati, cum ejus divinitate, et propter ejus Divinitatem impendenda sit.

Deinde refellendus error Berruyeri de adorandâ supremo patriæ cultu humanitate Christi in se directè et in recto spectatâ.

ARTICULUS PRIMUS.

Utrum Christus ut homo, unâ eâdemque supremâ adoratione cum ejus Divinitate sit colendus?

CIRCA adorationem patriæ Christo ut homini debitam propter Verbum, cui sanctissima ejus humanitas hypostaticè unita est, erraverunt primò quotquot dissertatione quartâ, capite 1, articulo primo memoravimus nonnisi fictum, umbratile et phantasticum Christo tribuisse corpus. 2º Apollinaristæ, qui Catholicis id exprobrabant, quòd Christum, ut hominem, eodem, quo ut Deum, colerent patriæ cultu, eosque propterea *hominicolas* appellabant. Quos vicissim Catholici nominabant *carnicolas*, quia Verbum contendebant carnem solam assumpsisse sine animâ rationali, cujus Christum esse expertem asserebant. Testes verò sunt sancti Athanasius et Epiphanius eosdem professos esse Christi carnem esse divinam et Verbo consubstantiali, adeoque esse Deum, Christoque non fuisse nisi simulacrum carnis. 3º Quemadmodum Nestorius binas in Christo personas, Verbum scilicet et hominem Verbo moraliter duntaxat conjunctum, reverà admittebat; ita et duas adorationes diversas sentire debuit Christo esse exhibendas, unam Verbo, quæ esset patriæ propriè dicta, alteram homini seu personæ humanæ Verbo moraliter conjunctæ. Attamen, ut nunquàm expressè pronuntiavit duplicem in Christo esse personam; pariter nunquàm conceptis verbis docuit duplicem ipsi adorationem deberi. Sed una quam profitebatur adoratio, duplicem re ipsâ involvebat, et quidem diversi generis; patriæ cultum Verbo asserebat, multò inferiorem verò reddebat Christo homini, cui omnes personæ à Verbo distinctæ characteres adscribebat.

CONCLUSIO. Christus ut homo, seu humanitas Christi ut conjuncta Verbo, unâ et eâdem adoratione cum ejus divinitate est colenda.

Probatur 1º ex Scripturis. Philip. 2, v. 6 et seqq. : *Qui cùm in formâ Dei esset, non rapinam arbitratus est, esse se æqualem Deo, sed semetipsum exinanivit formam servi accipiens, in similitudinem hominum factus, et habitu inventus ut homo. Humiliavit semetipsum factus obediens usque ad mortem, mortem autem crucis. Propter quod et Deus exaltavit illum, et donavit illi nomen, quod est super omne nomen; ut in nomine Jesu omne genu flectatur cælestium, terrestrium et infernorum; et omnis lingua confiteatur, quia Dominus Jesus Christus in gloriâ est Dei Patris.* Ubi disertè exprimitur summum cultum esse exhibendum Christo etiam ut homini. Hebr. 1, v. 6, Apostolus Christum Angelis superiorem esse ostendit, quia ipsi ut homini adoratio ab Angelis debetur : *Et cùm iterum, inquit, introducit primogenitum in orbem terræ, dicit : Et adorent* (græcè προσκυνήσατα) *eum omnes Angeli Dei.* Apocalypseos 5, v. 12 : *Dignus est Agnus qui occisus est, accipere, virtutem et divinitatem, et sapientiam, et fortitudinem, et honorem, et gloriam, et benedictionem.*

Probatur 2º ex conciliis. Synodus Alexandrina, è quâ sanctus Cyrillus suos 12 anathemismos contra Nestorium scripsit, definiit, anathematismo 8, unum honorem, unamque glorificationem Christo dependendam; atqui, nisi humanitas Christi conjuncta Verbo uno eodem adorationis cultu cum ejus Divinitate adoranda esset, jam duplex honor et glorificatio Christo reddi posset; ergo, etc. Synodus Chalcedonensis, in definitione fidei, hunc anathematismum octavum approbat. Synodus V generalis, can. 9, anathema in eum contorquet qui *non unâ adoratione Deum Verbum incarnatum cum ejus carne adorat.*

Idem statuit concilium Later. sub Martino I, sess. 4, can. 9, his verbis : *Si quis non unâ adoratione Deum Verbum incarnatum cum ejus carne adorat, juxta quod sanctæ Dei Ecclesiæ ab initio traditum est, talis anathema sit.*

Probatur 3º ex sanctis Patribus. S. Athanasius in Epistolâ ad Adelphium : « Rem creatam, inquit, non adoramus; absit. Ethnicorum enim et Arianorum est hujusmodi error. Sed rerum creatarum Dominum carnem factum, Dei Verbum adoramus. Etsi enim ipsa caro seorsum spectata, pars sit rerum creatarum, attamen Dei facta est corpus. Neque verò hujusmodi corpus à Verbo dividentes adoramus, neque cùm Verbum volumus adorare, ipsum à carne removemus. »

S. Ambrosius ad hæc verba Psal. 98 : *Ado-*

rate scabellum pedum ejus, quia sanctum est, lib. 3 de Spiritu sancto, cap. 11, aliàs 12, n. 79 :

« Per scabellum, inquit terra intelligitur; per terram autem Christi caro, quam hodiè in mysteriis adoramus, et quam Apostoli in Domino adorârunt; neque enim divisus est Christus, sed unus; neque cùm adoratur tanquàm Dei Filius, natus ex Virgine denegatur. »

S. August. ad eadem Psal. 98. verba : « Timeo, inquit, adorare terram, ne damnet qui fecit cœlum et terram; rursùs timeo non adorare scabellum pedum Domini mei.... Fluctuans converto me ad Christum quomodò sine impietate adoretur terra, sine impietate adoretur scabellum pedum ejus. Suscepit enim de terrâ terram; quia caro de terrâ est, et de carne Mariæ carnem accepit. Et quia in ipsâ carne hâc ambulavit, et ipsam carnem nobis manducandam ad salutem dedit; nemo autem illam carnem manducat nisi priùs adoraverit; inventum autem quemadmodùm adoretur tale scabellum pedum Domini, et non solùm non peccemus adorando, sed peccemus non adorando. »

Probatur 3^o ratione theologicâ. Humanitas Christi licet *seorsùm spectata*, ut aiebat modò laudatus S. Athanasius, *pars sit rerum creaturarum, attamen Dei corpus* est effecta; id est, reverà unitur hypostaticè et in personæ unitatem Verbo divino, in quo subsistit, adeò ut una sit cum ipso persona; atqui, natura quæ una est cum Deo Verbo persona, unâ eâdemque cum ipso adoratione sub hoc respectu colenda est, ergo, etc.

Et verò natura humana quæ Verbo Filio Dei æterno hypostaticè unita est, ita ut personâ Verbi æterni Filii Dei in genere subsistendi compleatur, uno eodemque supremo latriæ cultu adoranda est cum Verbo et propter Verbum, cui hypostaticè unitur. Etenim natura humana Christi Verbo sic unita, propriè est natura Verbi in quo subsistit, ita ut secundùm omnem sermonis proprietatem dicendum sit : Habens hanc naturam humanam est Deus, est Verbum, et Deus Verbum est hic homo seu habens hanc naturam humanam. Proinde, cùm adoratio propriè exhibeatur personæ, adorare hanc humanam naturam in se propter Verbum cui unitur, nihil aliud est quàm adorare Verbum incarnatum; quemadmodùm ait S. Thomas, parte 3, q. 25, a. 2 : *Adorare vestem regis, est adorare regem vestitum*. Atqui natura Christi humana sic est unita Verbo Filio Dei æterno; ergo.

Dices. Soli Deo cultus latriæ debetur; atqui humanitas Christi non est Deus; ergo, etc. Dist. min. humanitas Christi non est Deus, seu non est natura divina, concedo; non unitur Verbo in personæ unitatem, nec unam cum eo personam constituit, nego. Non adoramus humanam Christi naturam in se et seorsim à Verbo spectatam, sed tantùm prout ipsi conjungitur, et quatenus ejus personâ subsistit et terminatur; adeò ut adoratio quam Christo homini reddimus, sit adoratio ipsimet Deo Verbo exhibita prout naturam humanam terminat; seu quod eodem redit, exhibita personæ ex humanâ Christi naturâ et personâ Verbi quâ terminatur, si ita loqui fas est, coalescenti. Suprema latriæ adoratio exhibetur naturæ Christi humanæ, quia hæc natura humana est Verbi quod eam habet sibi hypostaticè conjunctam; exhibetur verò propter Verbum, cujus est illa natura humana, et quod supremo latriæ cultu est in se dignum et propter se.

Ergo, inquires, si spectaretur natura humana Christi ut separata, et solummodò ut donis gratiæ et gloriæ cumulata, sinerespectu ad Verbum, jam non deberetur ipsi cultus latriæ. Fatemur, quia puræ creaturæ non debetur is cultus. Sed hocce modo Christi humanitatem à Verbo separatam, dùm eum colimus, considerare nefas est, siquidem humana Christi natura spectari nequit ut separata à Verbo quin consideretur ut personâ merè humana. Hinc concilia quæ jubent eam unâ cum Verbo adorari, nihil de eâ statuunt ut sejunctâ à Verbo etiam per mentem tantùm.

ARTICULUS II.

Utrum humanitati Christi, in se directè et in recto consideratæ, supremus latriæ cultus exhiberi debeat aut etiam possit propter unionem hypostaticam, quâ fit ut in Verbo subsistat?

Cùm in Scripturis sæpè, ut ostensum est, significetur Jesum Christum esse adorandum, et quidem supremâ latriæ adoratione, Berruyerus consequenter ad suam Jesu Christi notionem, de quâ dissertatione præcedenti fusè dictum est, docuit humanitatem Christi esse directè et in recto adorandam et cultu latriæ prosequendam. Enimverò, si Jesus Christus, uti opinatur post Harduinum, ubique in Scripturis non esset nisi sanctissima ejus humanitas personæ uni divinæ hypostaticè unita, cùm secundùm easdem Scripturas cultus latriæ Jesu Christo debeatur, sequeretur re ipsâ humanam Christi naturam hypostaticè Verbo conjun-

ctam, supremo latriæ cultu esse in se directè et in recto adorandam, Verbo cui ipsa unitur, nonnisi in obliquo et connotativè considerato.

Atque id ipsum est quod docuit duabus propositionibus quæ in determinatione sacræ Facultatis exhibentur num. VIII et IX, quarum prior excerpta est ex tomo 8, secundæ partis Historiæ populi Dei, p. 18, et sic se habet: *Rectè intelligitur quomodo dicatur in se et directè adoranda sanctissima Jesu Christi humanitas, non ut est humanitas, nuda, sed quia est humanitas Dei in personâ unâ divinâ subsistens.* Posterior eodem tomo continetur, pag. 86, et hujusmodi est: *Sic considerata Domini nostri Jesu Christi sanctissima humanitas (nempe humanitas Christi personæ uni divinæ hypostaticè unita) est in se directè et in recto à Christianis omnibus adoranda et cultu latriæ prosequenda.*

CONCLUSIO. Sanctissima Christi humanitas Verbo hypostaticè unita, non est in se directè et in recto adoranda et cultu latriæ prosequenda.

Probat 1º, quia, si supremus latriæ cultus humanitati Christi unitæ Verbo esset in se directè et in recto exhibendus, tunc illa humanitas unita Verbo, objectum simul esset et motivum adorationis latriæ, hoc est non tantum adoraretur in se, sed etiam propter se, propter sibi propriam excellentiam. Id enim important voces *in se directè et in recto*, ut, ubi humanitas unita Verbo in se directè et in recto spectaretur ab adorante, non posset persona divina cui illa humanitas unitur, considerari simul in recto, sed tantum in obliquo, indirectè, et, ut aiunt, connotativè. Personam autem propter ejus excellentiam aliquid quod ejus est, adoratur, consideretur principaliter directè et in recto necesse est. *Honor adorationis*, inquit S. Thomas, p. 3, q. 25, art. 2, *proprie debetur hypostasi subsistenti.* Itaque error quem refellimus, in eo situs est, quod humanitas Christi unita Verbo dicatur propter hanc unionem, esse in se immediatè et ex integro terminus supremæ adorationis latriæ, et proinde ejus objectum et motivum. Atqui humanitas Christi unita Verbo, non potest esse objectum et motivum adorationis latriæ. Enimverò de illo supremo cultu duo tenenda sunt, tanquam ad fidem catholicam pertinentia; primò supremam hanc latriæ adorationem soli Deo, solis personis divinis esse impendendam *in se et propter se*, seu solum Deum esse simul obje-

ctum et motivum adorationis latriæ. 2º Humanitatem Christi Verbo divino hypostaticè unitam, adorandam esse quidem supremo cultu latriæ *in se*, sed non *propter se*, id est, eam esse objectum, sed non motivum supremi illius cultus. Carnem (Christi) *adoramus*, inquit sanctus Joannes Damascenus, libro 3 de Fide orthodoxâ cap. 8, *sed velut divinitati unitam, et quia duæ ejus naturæ ad unam Verbi Dei personam reducuntur, unamque subsistentiam. Carbonem tangere vereor ob ignem cum ligno conjunctum. Ambas Christi naturas ob unitam carnem Divinitatem adoro.* Atque id ipsum est, quod capite præcedenti tot Scripturarum, conciliorumque et sanctorum Patrum testimoniis comprobavimus.

Cum igitur humanitati Christi unitæ Verbo, in se directè et in recto considerata, non insit illa excellentia propter quam solam cultus latriæ absolutus exhiberi potest; sequitur humanitatem Christi etiam ut Verbo hypostaticè unitam, non esse in se directè et in recto adorandam et cultu latriæ prosequendam. Etverò, Verbum divinum est quidem cultu supremo latriæ adorandum, secundum id omne quod sibi naturâ et ab æterno proprium est, et secundum id omne quod pro salute nostrâ in tempore assumpsit; adeoque Jesus Christus est adorandus non modò in divinâ suâ naturâ, sed etiam in naturâ humanâ quam sibi hypostaticè univit. Hæc fide certa sunt, scripturisque et traditione perspicuè continentur. Christi igitur humanitati adorationem latriæ esse tribuendam nemo, salvâ fide catholicâ, potest inficiari. At consentit dogma illud catholicum de adoratione humanitatis Christi cum isto alio dogmate fidei: Supremum illud adorationis genus quod cultus latriæ absolutus nuncupatur, soli Deo licitè posse exhiberi; quæ consersio facillimè intelligitur, si attendatur ratio quâ Christi humanitas, juxta fidem est cultu latriæ adoranda, prout à conciliis, à sanctis Ecclesiæ doctoribus et à theologis explicatur. In eo consistit hæc ratio, quod eatenus, juxta fidem, humanitas Christi sit latriæ cultu prosequenda, quatenus est humanitas Verbi, in quo ipsa subsistit, et qui proinde, utpote Deo supremo, honor adorationis exhibetur quando adoratur ei conjuncta humanitas. Nimirum, cum adoratur corpus Christi, *ipsi Verbo, cujus corpus factum est*; adoratio adfertur, uti observat S. Athanasius contra Apollinaristas disputans; *debita ergo et divinâ*, inquit, *adoratione illud colitur: Deus enim est Verbum cujus corpus est proprium.* Idem

explicat S. Thomas, parte 3, q. 25, art. 1, in corpore : « Propriè, inquit, honor exhibetur « toti rei subsistenti (id est, personæ). Non « enim dicimus quòd manus hominis honora- « tur, sed quòd homo honoratur et si quando « contingat quòd dicatur honorari manus vel « pes alicujus, hoc non dicitur eâ ratione, « quòd hujusmodi partes secundùm se hono- « rentur, sed quia in istis partibus honoratur « totum, per quem etiam modum aliquis homo « potest honorari in aliquo exteriori, puta in « veste, vel in imagine. »

Ne igitur creatura cultu latriæ adoretur, quando sanctissima Christi humanitas quæ creata est, adoratur, cumque unica sit in Christo persona, nempe persona Verbi, sola expositio genuina dogmatis de cultu latriæ huic sanctissimæ humanitati debito, his verbis aut æquivalentibus dicendum est contineri : Humanitas Christi Verbo hypostaticè unita, ita colitur debitâ et divinâ adoratione, ut adoratio Verbo afferatur, cujus est hæc sanctissima humanitas. Ita catholicam eâ de re doctrinam exponit sanctus Athanasius, ut modò relatum est, cui concilia concinunt et alii Patres, quorum plura testimonia capite præcedenti adducta sunt. Atqui Verbo, cujus est hæc humanitas, exhiberi adorationem, cum adoratione divinâ afficitur humanitas, idem est ac Verbum, non verò humanitatem ei conjunctam adorari directè et in recto, cum humanitas adoratur. Ergò humanitas Christi, prout Verbo unitur, non est in se directè et in recto adoranda et à Christianis cultu latriæ prosequenda.

Probatur 2°. Synodus Alexandrina in quâ conditi sunt anathematismi sancti Cyrilli contra Nestorium, anathematismo 8, quem concilium Chalcedonense œcumenicum IV, in definitione fidei approbavit; synodus V generalis, canone 9; concilium Lateranense, sub Martino I, sess. 4, canone 9, definiunt unâ adoratione Verbum incarnatum cum ejus carne esse adorandum, et adversus eos qui duplicem Christo adorationem exhibendam dixerunt, unam Verbo, alteram carni, seu humanitati Christi, anathema contorquent. Atqui, si humanitas Christi sanctissima in Verbo subsistens, sit in se, directè et in recto adoranda, et à Christianis cultu latriæ prosequenda, jam duplex adoratio erit Christo exhibenda. Nam personam Christi, quæ est Verbum, Berruyerius sanè confitebitur esse in se directè, et in recto cultu latriæ adorandam. Cum proinde jubeat, ut eodem cultu adoretur etiam in se directè et in recto huma-

nitatis Christi Verbo substantialiter unita, sequitur planè non unam tantum, sed duas Christo esse exhibendas latriæ adorationes, quas concilia reprobant.

Certè quidem eo magis manifestum est illum in damnatum ab illis conciliis errorem incidisse, quòd re ipsâ illius erroris fundamentum, ut visum est dissertatione præcedenti, conatus sit adstruere, dum humanitatem Christi personæ uni divinæ hypostaticè unitam, et in se, in recto et directè consideratam sancit esse ipsummet Jesum Christum apud auctores sacros, et naturalem Dei in tribus personis subsistentis Filium in temporum plenitudine factum, adeoque hanc eandem humanitatem esse instar suppositi, ab eâ dici, *Ego*; quibus æquivalentibus verbis significat duas esse reverà in Christo personas, quamvis tamen in eo esse unicam profiteatur. Hinc.

Probatur 3°. Si natura humana Christi Verbo substantialiter unita, adoraretur in se, directè et in recto, hæc adoratio non exhiberetur Verbo, cujus est hæc humanitas, sed exhiberetur illi humanitati in se directè et in recto, prout habet relationem unionis ad Verbum. Porrò, juxta rationem, propriè exhibetur adoratio personæ, cum adoratur aliquid quod ad ipsam attinet. V. g., quando honoratur manus aut pes alicujus principis, ipse est princeps cui exhibetur is honor in hac vel illâ corporis ejus parte. Ergò, si humanitas Verbo unita adoraretur in se directè et in recto, sequeretur hanc adorationem propriè exhiberi personæ à Verbo distinctæ; adeoque duas esse in Christo personas, nempe personam Verbi et personam humanam. Ubi apparet ea quæ decernit Berruyerius de adoratione latriæ exhibendâ humanitati Christi in recto, esse connexa cum notione illâ spuria Jesu Christi, quam duce Harduino invenit, et Dissertatione præcedenti confutavimus.

Probatur 4°. Unica est in Christo persona, que est persona Verbi divini, quod humanitatem hanc in tempore sibi hypostaticè univit. Ita docet fides. Atqui, ut habet S. Thomas, *honor adorationis debetur hypostasi subsistenti*, seu personæ. Principium illud sanctus doctor probat ratione manifestâ, quam modò retulimus. Ergo, cum adoratur humanitas Christi conjuncta hypostaticè Verbo, propriè is honor exhibetur personæ Christi, id est, Verbo divino, adeò ut adorare naturam humanam Christi Verbo conjunctam, nihil aliud sit quàm adorare personam Verbi in attributis et perfectionibus naturæ illius humanæ quam assumpsit; et in

actionibus quas per eam elicit. Ergo natura Christi humana, Verbo unita, non est in se directè et in recto à Christianis cultu latriæ proseguenda.

Probatur 5^o Ut humanitati Christi in genere subsistendi personā unā divinā completæ deberetur in se directè et in recto adoratio latriæ, necesse foret, eā sic consideratā, contineri summam illam et independentem excellentiam propter quam solam, juxta fidem et rationem, absoluta latriæ adoratio Deo exhibenda est. Atqui humanitas Christi, prout personæ uni divinæ substantialiter unita, et in se directè et in recto considerata, hanc summam et independentem excellentiam in se neutiquām continet; quandoquidem fide certum est, sanctissimam Christi humanitatem, quamvis consideretur ut unita substantialiter Verbo, esse tamen creatam, et ipsam ejus unionem Verbo esse productam in tempore. Ergo ex fide consequens est sanctissimæ Christi humanitati prout unitæ hypostaticè personæ uni divinæ adorationem latriæ directè et in recto non esse exhibendam.

Probatur 6^o, quia nemo theologorum, nequidem inter eos, quos Berruyerius secundæ dissertationis suæ initio infideliter laudat tanquām sibi faventes, circa filiationem divinam temporalem quam humanitati Christi attribuit, unquām dixerit humanitatem Christi Verbo unitam, et in se, directè et in recto consideratam, supremo latriæ cultu à Christianis esse proseguendam. Qui subtilitatibus nimis eò adducti sunt, ut cogitarent humanitatem unitam posse ab adorante considerari directè et in recto, dūm Verbum proinde spectaretur duntaxat connotativè et in obliquo, de quibus aliquando sermonem fecimus, ii quidem statuunt Christi humanitatem propter excellentiam quam habet ab unione hypostaticā, posse adorari, sed solūm cultu dulciæ, seu hyperdulciæ, ei qui exhibetur Beatæ Virgini superiorem, quia gratia unionis, inquit, præstat maternitati divinæ. Nullus eorum voluit humanitati Christi sic spectatæ adorationem latriæ deberi, aut etiam posse reddi; adeò ut dogma novum quod refellimus, hæcenus reverà inauditum fuerit in Ecclesiā. Pariter, qui inquirunt quis cultus deberetur Christo, qui spectaretur solummodò quantum ad dona humanitati ejus concessa et gratiam unionis, ita ut ejusmodi humanitatis excellentia causa esset unica quæ tunc attenderetur et propter quam honor ipsi exhiberetur sine hæsitatione definiunt latriæ

cultum sub hoc respectu ipsi non posse impendi. Ergo doctrina quam refellimus, à theologis, uti et à Patribus et conciliis unanimiter rejicitur.

Atque ex his liquet cur sacra Facultas in determinatione suā ad propositiones VIII et IX, modò relatas, eas proscribat tanquām *erroneas et temerarias*.

Insuper easdem 1^o docet esse *superstitiosas et scandalosas*; quia iis jubentur omnes Christiani adorare et cultu latriæ prosegui in se directè et in recto humanitatem Christi Verbo unitam, quem iis nefas est illi humanitati sub illo respectu exhibere. 2^o Iisdem statuit *religionem christianam deprimi et labefactari*. Nempe præcipiunt cultum latriæ exhiberi humanitati Christi Verbo unitæ in se directè et in recto consideratæ; dūm tamen sub hoc respectu digna non est hoc cultu, qui soli Deo reddendus est. 3^o Easdam reprehendit quòd *Arianam et Socinianam impietatem juvent*. Juxta Scripturas, quarum testimonia præcedenti capite attulimus, omniumque seculorum fidem et usum, supremus latriæ cultus Jesu Christo est exhibendus. Inde olim contra Arianos effectum est, et etiamnum contra Socinianos evincitur Jesum Christum esse Deum supremum. Ad declinandam hujusce argumenti vim, Ariani Verbo, quod creaturam esse cæteris longè excellentiorem existimabant, nihilominus decernebant cultum latriæ. Plurimis inter Socinianos visum quoque est asserendam esse Jesu Christo, licet, ut putant, puro homini, eandem adorationem ac Deo summo, cujus, inquit, vices gerit, quemque potentiā eximiā, perfectionibusque et juribus sibi concessis perfectissimè repræsentat. Illos idololatriæ sancti Patres jure accusarunt. Hos ejusdem criminis coarguunt multi etiam ex ipsis Socinianis, necnon omnes cujusque generis Christiani. Ab Ariana et Sociniana impietate distant quidem propositiones duæ de quibus agitur. Ponunt enim humanitatem Christi sanctissimam personā unā divinā compleri in genere subsistendi. Id non fatebantur Ariani, quibus Verbum propriè non erat Deus, seu persona divina. Illud idem negant Sociniani, juxta quos natura humana Christi per se ultimo completa est, nec ulli personæ præexistenti substantialiter unita. Verum tamen utramque impietatem valdè juvant prædictæ propositiones, dūm humanam Christi naturam in genere subsistendi completam per subsistentiam personæ unius divinæ, decernunt à Christianis omnibus in se directè et in recto adorandam et cultu latriæ proseguendam.

Nempe, his admissis, jam ab accusatione idolatriæ absolvendum utrumque illud hæreticorum genus. Si enim humanitas Christi personæ uni divinæ substantialiter unita, quamvis, posita illâ unione, natura creata esse non desinat, est in se directè et in recto latriæ cultu adoranda, adeoque illo cultu absoluto proseguenda qui soli Deo debetur; jam, postpositis

terminis divinâ revelatione et ratione constitutis, nihil supererit quo prohibeantur Ariani et Sociniani, ne eundem cultum transferant creaturæ aut homini puro, tot donis, tot juribus, tamque excellenti potestate donato, ut possit illud omne exequi impetrando, quod supremâ suâ voluntate potest exequi Deus summus.

CARDINALIS GERDILII VITA.

Gerdilius Hyacinthus-Sigismondus Samoëns, Sabaudix vico, oriundus, anno post Christum 1718, vigesimâ junii die, natus est. Teneris ab annis haud dubia præstantis specimina præbuit ingenii, quo longævum illustreque vitæ curriculum peragens, eminuit. Barnabitarum qui tunc temporis Anecii collegio præerant, Ordinem amplexus, ac decimum quantum ætatis annum penè assecutus, suorum professorum, sese eorundem Instituto vovens, collega evasit. Ordinis præses eum, expletis disciplinæ rudimentis, Bononiam misere, qui ibi ad theologia studia incumberet. Veteres nec non recentiores linguas simul excoluit, operamque haud vanam in historiâ certisque scientiis posuit. Universâ Bononiæ potitus est existimatione, imprimis Lambertini urbis hujus tum archiepiscopi, posteaque Summi Pontificis sub nomine Benedicti XIV. Qui doctissimus vir, et à primo congressu, de adolescente Gerdilio apprime præsensit maximaque coniecit; in doctrinâ quidem suâ ei fiduciæ testimonium perhibuit, ejus consiliis usus de suo magno circa Sanctorum *Canonisationem* opere, eique nonnulla committens excerpta è gallicâ in latinam linguam transferenda. Peracto theologiæ cursu, Maceratam missus est Gerdilius, qui ibi philosophiam doceret. Haud multò post Casali præteriit, undè Taurinum accitus, ibi, in Academiâ, Philosophiæ, deinceps Theologiæ moralis cathedram occupaturus. Taurini archiepiscopus brevî spectatis Gerdili, ingenio et virtute, eum in consilium privatum conscientiæ admissum voluit, dum aliundè suus cum Ordo eò fiduciæ prosequeretur, quem scilicet Sabaudix Pedemontique collegiorum Provincialem. Aliquantò post, defuncto vitâ generali Congregationis præside, habita

est quæstio de Gerdilio, ut ei succederet. Benedictus verò XIV eum quasi indixit Emmanueli III, Sardinix regi, utpotè apûssimum præcæteris ad educandum erudiendumque nepotem suum pedemontanum principem. In aulâ Gerdilius haud secus ac in collegio se gessit: totum muneris sui officiis sese dedit, super vacuumque tempus nonnullis haud vanis operibus componendis impertiebatur. Successuum mercede, duplici abbatia donatus est. Tantum tamen abfuit, qui ditior fieret redditu, ut contrâ totum in educandis nepotibus, bonisque edendis operibus profuderit. In consistorio, 26 die aprilis 1773 habito, Summus Pontifex Clemens XIV eum in imo pectore præsignavit, laudativo hoc effato: *Notus orbi, viæ notus Urbî*. Quod simul ejus universam famam, eximiamque modestiam quasi depingit. Clementi tamen promoveri non datum; qui honos Pium VI manebat. Venerandus ille Pontifex Gerdilium Romam acciit, quæm S. Officii consultorem factum sacratum voluit Dibbonii episcopum, eumque sub titulo S. Cecilix cardinalem proclamavit, decimâ quintâ decembris die, anno 1777. Quo in dignitatis gradu, magno ad tuendas Ecclesiæ partes studio eminuit Gerdilius. Concilio de *Propagandâ* præfectus, propèque omnium Congregationum particeps factus, sacri in medio Collegii facis instar prælucebat. Cujus consilio, præcæteris, deferebatur gravissimis in rebus, semperque ad moderatam partem incumbebat, salva dum starent principia. Sic equidem sese habuit in negotio Pacti pontificis Pii VII cum primo consulè reipublicæ gallicæ Quam, 1793, galli, Româ potiti, Summam Pontificem abduxissent, Gerdilius properè tumultuosam urbem deseruit; utque itineris sumptibus suppeditaret, libros suos

vendere coactus est. Senas ubi advenit, infelicem ibi Pium VI extremâ laborantem inopiâ invenit. Cui nedum subvenire posset, eò contra ipse adductus erat, ut, in Pedemontium præteriturus, obsequiosa cardinalis Loranzanæ, Toleti archiepiscopi, oblata acciperet, nec non Despuig, Hispalensis archiepiscopi, postea cardinalis. Solitarius suæ Clusanæ abbatiæ in seminario degens, sæpè omnibus vitæ necessariis eguit; adversos autem casus mirandâ sustinuit patientiâ. Extincto Pio VI, sese in conclave Venetum contulit. Ineuntibus suffragiis primò maximus ei fuit favor; cardinalis autem Hertzan, Germaniæ Imperatoris minister, in conclavi, eum palàm exclusum clamavit, protestatus Franciscum I minimè Regi Sardiniae subditum eligi passurum. Romam novum Pontificem Pium VII comitatus, ibi ad pristina accessit munera. Profectam licet ætatem assecutus, firmâ tamen fruens valetudine, spem faciebat se adhuc aliquot annos luce usurum, quum, inopino implicitus morbo, supremum diem obiit, 12 aug. 1802.

Ferè omnium Europæ academiarum particeps, doctissimo cuique desiderio fuit. Magnificis funeribus indictis, ipse Summus Pontifex solemnem à se factam voluit expiationem. Pater Fontana Barnabitis præfectus, postea cardinalis, ejus olim usus amicitia, funebrem ei honorigeram orationem habuit, epitaphioque operâ suâ tumulo inscripto, elogium ejus in Arcadum academiâ proclamavit. Plurimâ Gerdilius elucubravît opera, quorum nonnulla sigillatim prælo excusa. Quæ collecta edidit P. Torelli, Bononiæ à 1784 ad 1791, 6 vol. in-4°. P. Fontana, juvante collegâ Scatti, novam iniit editionem, ejus prima 6 volumina vulgata, 1806. Quæ deinceps editio peracta. Hæc sunt opera quibus utraque constat editio: 1° *Introductio ad religionis studium, cum confutatione veterum, recentiorumque philosophorum de Ente supremo, de æternitate, etc.*: Quod opus benedicto XIV dicatum, atque comprobatum non tantum catholicis doctoribus, sed etiam plurimis protestantibus academix Berolini; 2° *Expositio signorum propriorum veræ religioni*, opus ex italicâ in gallicam linguam translatum à P. Livoy, Barnabita, Parisiis, 1770, 1 vol. in-8°; 3° *Dissertatio de origine moralis sensus, de existente Deo, de immaterialitate intelligentium substantiarum*, cum duabus *Dissertationibus de adolescentiæ studiis*; 4° *Consilium de constituendo seminario*, cum *Rudimentis theologicæ doctrinæ proprium ad usum*; 5° *Tractatus theologiæ et quatuor Dissertationes de Revela-*

tionis necessitate. In *Rudimentis* auctor refellit Baylium, *Systema naturæ et propugnatores antiquitatis Orbis*, etc. Quibus variis scriptis constant duo prima volumina Bononiæ editionis, italicè versa. Tertium, quartum et quintum, parsque sexti, operâ includunt gallicè scripta. Ibi reperire est; 1° *Tractatum de immaterialitate animæ, contra Lockium*; 2° *Confutatio em P. Malebranchii contra eundem philosophum*, Taurini 1747 et 1748, 2 vol. in-4°. Lockius, suo in *Tractatu de intellectu humano*, asserit, absque Revelatione, certum fieri nequire Deum materiæ facultatem cogitandi non impertitum, contendens id extrâ ejus potentiam non esse. Dubitationes anglici philosophi apprimè refellit Gerdilius in tractatibus suis: 1° *Tentamina demonstrationis mathematicæ contra æternam materiæ et motus existentiam*; 2° *Commentaria de absoluto infinito sub respectu magnitudinis, et de ordine in genere veri et pulchri*. Quæ commentaria inserta in tomo sexto *Miscellaneorum Taurinensium*, 1771; 3° *Tentamina de indole propriâ hominis et bruti animalis, etc.*; *Repugnantia Carthesii et Spinosæ principiorum*; 4° *Elucidatio de notione et divisibilitate geometricæ magnitudinis, in responsum D. Dupuis*, Taurini, 1741; 5° *Animadversiones de commentario D. Bequelin circa principium sufficientis rationis, et possibilitatem sive systema fortuiti casus*; 6° *Dissertatio de repugnantia attractionis et variarum ejusdem legum cum phænomenis, et de tubis capillaribus*, Parisiis, 1754, 1 vol. in-12. Quam sequitur dissertationem 1° *Commentarium de cohæsione*; 2° *Observationes de variis naturæ epochis, connexæ examini systematum de antiquitate Orbis*, utraque inserta in *Rudimentis theologicis*; 3° *Tractatus de singularibus præliis sive duellis*, Taurini, 1759; 4° *Sermones philosophici de homine relativè ad naturalem et sociale statum, subque legis imperio spectato*, Taurini, 1769, in-8°; iidem italicè conversi à Doctore Giudici, Lodi, 1782; 5° *De naturâ et de effectibus luxûs, cum examine argumentorum D. Melonis, auctoris Tentamenti politici de commercio*, Taurini, 1768, in-8°; 6° *Sermo de divinitate veræ religionis*; 7° *Animadversiones de theoricæ et praxi educationis, contra principia J.-J. Rousseau*, Taurini, 1765, in-8°. Quæ reperias in novâ editione, sub titulo: *Anti-Æmilius*; 8° *Observationes de imperatore Juliano*; 9° *Observationes de sexto libro Historiæ philosophicæ et Politicæ commercii in utrâque Indiâ*, à D. Raynal. Nonnulla latinè scripta sextum volumen complent, nempe, 1° *Oratio sub hoc titulo: Virtutem politicam*

ad optimum statum non minùs regno quàm rei-publicæ necessariam esse; 2° *Oratio altera de Causis academicarum disputationum in theologiam moralem inductarum*; quæ præ regiâ Taurini Societate habitæ sunt, una anno 1750, altera verò 1754; 3° *Disputatio de Religionis virtutisque politicæ conjunctione*; 4° *Elementorum morales prudentiæ specimen*. Ea sunt opera quibus constant bononiæ editionis sex prima volumina. Cardinalis della Somaglia prælo excudendum curavit septimum suo sumptu sub hoc titulo supplementi: *Opuscula ad hierarchicam Ecclesiæ constitutionem spectantia*, Parmæ, 1789, et Venetiis, 1790, in-8°. Sic constat: 1° *Confutazione di duellibelli contro il breve auctorem fidei di Pio VI in cui si condanna il libro di Eybel: Quid papa?* Romæ, 1789, 2 vol. in-8°; 2° *Apologia del detto breve*, Romæ, 1791 et 1792, in-4°; 3° *In commentarium à Justino Febronii in suam retractationem editum animadversiones*, Romæ, 1792, in-4°; 4° *In notas nonnullarum propositionum Synodi Pistoensis*, Romæ, 1795. Quæ quum notæ eò vergerent, ut in quibusdam Pistoensem synodum justificarent, eas refellendas curavit Gerdilius; 6° *Esamedei motivi dell'opposizione del vescovo di Noli* (Benedictus Solari) *alla pubblicazione della bolla che condanna le proposizioni estrette dal synodo di Pistoja*, Romæ, et Venetiis, 1802, in-12; 6° *Epistolæ pastorales*; 7° *Constitutiones Synodales*; 8° *Summa cursûs documentorum de origine, officiis, usuque supremæ potestatis*, Taurini, 1799, in-8°; 9° *Notæ de Religionis Poemate cardinalis de Bernis*, Parmæ, apud Bodini, 1795. Extincto

cardinale Gerdilio hæc supererant in capsâ manuscripta italica: 1° *Observazione sopra una lettera del vescovo di Noli*: quæ observationes eodem anno prælo excusæ 1802, Venetiis; 2° *Confutazione dei sistemi contrarii all'autorità della Chiesa circa il matrimonio*; 3° *Summa præcipuorum societatis ordinum*; 4° *Documenta de variis imperiorum magnitudinis casusque causis*; 5° *Consilia de optimis legendis seligendisque libris*; 6° *Tractatus historiæ naturalis* tribus constans generibus, metallico nempe, vegeto et animali; 7° *Tractatus de Primatu Romani Pontificis, de Gratiâ, de Legibus, de Actibus humanis, de Mutuo*; 8° *Dissertatio contra Puffendorf de usurâ*; 5 vol.; 9° *Cursus philosophiæ morales*.

Ex clarissimi cardinalis operibus constant auctoris immensa eruditionis varietas, ingenii ubertas, indefessusque ad utilia ardor. Nostro ævo inter alios scientiis excelluit religioni et Ecclesiæ utilissimis, quæque Clero maximo fuerunt decori. Totam vovit vitam ad tuendam alteram contra Deistas, et ad alterius doctrinæ, beneplacitisque Sacræ Sedis, contra reluctantes, propugnandum. Mirandum aliàs in controversiis exemplar, siquidem, licet principiis firmiter consulens, caritatem nedùm lædat, nevel minimum, adversarios refellendo, contumeliosum emittit verbum.

Vita hæc Gerdilii abbreviata est ex luculentâ ejusdem biographiâ quam D. Henrion mox adiurus *Dictionario historico* Felleri. Auctor vivens mortuum nunc peritâ manu recudit, sicque bonum ab utroque productum et producendum magis ac magis amplificat.

PROOEMIUM.

In editione Constitutionis Dogmaticæ Sanctissimi Domini Nostri Pii VI, cujus principium est: *Auctorem Fidei*, quæ typis Dusseldorpiensibus, ut ferunt solo apposito Romæ nomine, curante Felleri prodiit, clar. Editor sæpè jam, et diu de catholicâ Religione bene alioquin meritis, improviseo nescio quo consilio inductus, *Notulas* quasdam suas nonnullis propositionibus, *ad clariorem*, ut ultro sibi persuasit, *intelligentiam* adji-ciendas censuit. Quinque omninò sunt illæ numero: Ex his tres, quibus in perscrutandis censurarum *formulis* ita versatus est, ut eas ad sensum

Synodi Pistoriensis accommodare potius voluisse videatur, quàm, reprobatae per eas doctrinæ pravitatem agnoscere. Quo exitu facilè quisque intelliget, qui modò notas cum formulis contulerit. Nihil deprehendet in formulis, quod clariorem lucem desideret; nihil in notis, quod vel minimum lucis afferre valeat; nisi fortè proh dolor! quod ægrè Feller tulerit, à Pontifice in Dogmaticam suam Constitutionem totidem verbis ex Tridentino Canone translatum esse sacrum Dogma *Conversionis totius vinti in Sanguinem*, quas ille voces non reformidaverit

palàm edicere, *secundùm litteram falsitatis argui debere*. Quà tamen reprehensione, utpotè cum violatâ simul Canonis Tridentini et Sacri ab eo Dogmatis definiti sanctitate, conjunctâ, nil sanè afferri poterat ad Pontificii Decreti commendationem illustrius. Nec minùsalienum à pristino illo suo pleno pietatis sensu ergà Sedem Apostolicam, quod alio loco excidere sibi passus est, *meritò culpam piam precationem Sacrosanctæ individuae Trinitati, Crucifixi D. N. J. C. Humanitati*, etc. Solemni publicarum precum officio à Pontificibus adjunctam, diuturno jam pridem, ac frequenti per Orbem Ecclesiæ usu consecratam: quæ qui legat, vix oculis suis credere audeat, talia unquàm a Viro Catholico, et eo quidem pio religionis cultore scribi, et Apostolicæ Constitutioni opponi potuisse. Ut jam mirandum minùs videri debeat, eò usque illum progressum esse, ut ipsomet Pontificii Decreti mutilato contextu, veritus non sit Apostolicæ ipsius Constitutionis venerandam omnibus, plenoque mentis obsequio suscipiendam integritatem auderet facinore minuere: quo editioni suæ omnem prorsùs fidem abrogavit (1).

Nec tamen fas est credere, Virum clarissimum Pistoriensibus potius, quàm aut Tridentini Concilii, Sedisve Apostolicæ auctoritati, aut frequentatis per Ecclesiam moribus, et institutis suffragari voluisse. Hoc potius existi-

(1) Nisi æquius est cogitare (quod sanè malim) id errati indiligentiâ potius Librarii, vel Typographi accidisse, quàm datâ operâ Editoris tam sæpè, tam benè antea de Religione meriti.

mandum, arreptum eum flagrantiore illo studio, quò minùs cautè interdum pii alioquin religiosique viri per eas regiones ducuntur, concordia Catholicos inter et heterodoxos conciliandæ, faciliorem se præstitisse ad ea emollienda sibi Dogmata, sive Dogmatum vocabula, quæ dissidentium auribus duriora solent accidere, prout suo loco breviter indicaturi sumus. Cæterùm hæc subjectis animadversionibus quas *Fellerianæ notæ* prorsùs efflagitant perspectum iri confidimus, siquidem ea sana verborum forma est, quæ sit Ecclesiæ totius sensu comprobata, ita ex Patrum, Conciliorum, Pontificum sententiis contextas esse censurarum formulas, nihil in illis immutari, aut inverti queat, quin indè par quædam et respondens in aliquâ parte probatæ doctrinæ, vel disciplinæ perversio consequatur. Quod ut luculentius pateat, nec aliquid in perpendendis *Fellerianis notis* videamur subterfugere voluisse reticendo; operæ pretium duximus, animadversionibus nostris primùm damnatas Pistorienses propositiones cum censuris, deinde subjectas censuris Fellerianas notas omnium oculis expositas præponere.

Cæterùm minimè dissimulandum, quòd æquitatis ratio maximè postulat, valdèque pertinet ad meritam Felleri laudem, egregiis ab eo notis illam ipsam Apostolici Nuntii Epistolam illustratam esse, quibus ille præclarum suum Religionis, et Ecclesiasticæ disciplinæ tum et Supremæ Sedis Apostolicæ auctoritatis tuendæ, et vindicandæ studium luculenter testatum reliquit.

DE ADORANDA HUMANITATE CHRISTI, SYNODI PISTORIENSIS PROPOSITIO 61 DAMNATA.

De Fide, § Primus.

Propositio, quæ asserit, adorare directè humanitatem Christi, magis verò aliquam ejus partem ferè semper honorem divinum datum creaturæ.

Quatenùs per hoc verbum *directè* intendat reprobare adorationis cultum, quem fideles dirigunt ad humanitatem Christi, perinde ac si talis adoratio, quâ humanitas, ipsaque caro vi-

vifica Christi adoratur non quidem propter se, et tanquàm nuda caro, sed prout unita divinitati, foret honor divinus impertitus creaturæ, et non potius una, eademque adoratio, quâ verbum incarnatum cum propriâ ipsius carne adoratur. (Ex concil. C. P. V. Gen., cap. 9.)

Falsa, captiosa, pio ac debito cultui humanitati Christi à fidelibus præstito, ac præstando detrahens, et injuriosa.

NOTA FELLERI. — (Pag. XXXIII, Prop. LXI.) Difficile est scire quid Pistoïenses per vocem *directè* intelligant, cum nunquàm à divinitate Christi separetur humanitas, ne per mentem quidem, et intentionem fidelium. Adoratur indivisibiliter indivisibilis Christus, Deus et homo, undè meritò (si accuratio theologica spectetur) culpatur illa separatio in oratione, *sacrosanctæ et individue Trinitati, crucifixi Domini nostri humanitati*, etc. Quòd autem supponi videatur nudam carnem adorari, eò absurdus est quòd nequidem uniri Divinitati mera caro possit, cum nonnisi mediante animâ Verbum Dei corpus assumpserit.

ANIMADVERSIO.

§ I. *Exponitur ecclesiæ catholicæ sensus, de adorandâ humanitate Christi, ex PP. doctorumque sententiis depromptus.*

Ad rectum de Fellerianâ notâ instituendum examen, maximè pertinet ut toti disceptationi brevis præmittatur expositio catholicæ doctrinæ de adorandâ humanitate Christi. Atque hanc quidem depromendam duximus ex fonte, quem suspectum adversarii habere nequeant, et Parisiensis theologiæ scholæ censurâ contra Berruyeranos errores editâ, quam Camillus Blasius in suam de festo Cordis Jesu elucubrationem transtulit (not. in fin. cap. 30, p. 105): « Omnes theologi (verba sunt censorum) « unanimiter seiscunt tanquàm dogmata ad « catholicam fidem pertinentia, 1^o supremum « latriæ cultum soli Deo, solis personis divinis, « Patri, Filio et Spiritui sancto esse impen- « dendum, *in se et propter se*, seu solum Deum « esse simul objectum, et motivum adorationis « latriæ. 2^o Humanitatem Christi Verbo divino « unitam, adorandam esse quidem supremo « latriæ cultu *in se, sed non propter se*, id est « eam esse objectum, sed non motivum su- « premi illius cultûs. Nimirum, ut loquitur S. « Joan. Damasc. lib. 3 de Fid. orthod. cap. 8, « Carnem (Christi) adoramus, *sed velut Divini- « tati unitam, et quia due ejus naturæ ad unam « Verbi Dei personam reducuntur, unamque sub-*

sistentiam. Carbonem tangere vereor ob ignem « cum ligno conjunctum. Ambas Christi naturas « ob unitam carni Divinitatem adoro. » Notat porrò Blasius Damasceno à Parisiensibus ad- jungi « sanctos Thomam, Athanasium, alios- « que communiter Ecclesiæ Patres; quin et « Augustinum inter cæteros audiendum. »

Itaque Parisienses ex communi Patrum et Doctorum sensu docent, humanitatem Christi, prout unita est Divinitati, *objectum* esse adorationis latriæ *in se* quidem, *sed non propter se*. Atque hoc loco ante omnia sedulò advertendum, quòd quidem per sese perspicuum est, omnem quamcumque, et cujusvis generis actionem, vi suâ certo modo *dirigi* in id quod est ejus actionis objectum. Quippe hæc sunt ex naturâ rei connexæ, ut actio *dirigatur* in objectum, quod per actionem *atingitur*. Si ergo humanitas Christi objectum est adorationis latriæ, etsi non propter se, profectò fieri non potest, quin hæc adoratio dirigatur in eam ipsam humanitatem, quæ per illum adorationis cultum attingitur. Quod et illustrari potest similitudine ipsâ carbonis igniti, quam modò ex Damasceno à Parisiensibus allatam protulimus, in quo tangendo lignum directè attingitur, ita tamen, ut simul eodem actu ignis attingatur, quo totum est lignum comprehensum, atque id quidem, ut dixi, sedulò præmonendum fuit, ne diutius ludificari nos sinamus veteratoriâ ambiguitate verbi *directè*, quod insidiosè positum est in propositione synodi (1).

(1) Ne ad præsentis disceptationis statum obscurandum dubitatio aliqua fortè suboriat ex adoratione illâ hyperdulicæ, de quâ disputant etiam nunc theologi, quatenus, et quâ ratione tribui valeat humanitati Christi, sedulò notandum est, hanc adorationis rationem non aliter ab istis theologis admitti, nisi prout humanitas Christi, spectatur velut à divinitate sejuncta vel præcisa. Sic egregius S. Thomæ interpres Carolus Renatus Billuart (dissert. 23 de Adorat. Christi, etc., art. 3): « Dico 3^o Humanitas « secundum se sumpta, et ut per intellectum « præcisa à Verbo potest adorari cultu inferiori « ob perfectiones suas creatas, v. g., ob gratiam habitualement, etc. » Patet proinde nihil quæstionem hanc pertinere ad formulam censuræ, in quâ unicè et expressè agitur de adoratione præstandâ humanitati Christi pro suâ cum verbo hypostaticâ conjunctione. Porrò, sub hâc ratione adorationem latriæ humanitati Christi deberi, luculenter probat idem Billuart ex conciliis et Patribus. « Dico 2^o Eadem adoratione latriæ adoranda est Divinitas Christi « et ejus humanitas. » Profertque inter alia depromptam auctoritatem ex act. 5, 7, synodi: « Cum adoratur Christus, non separatur hu- « manitas à Divinitate, sed utraque ut unum

Sed jam paulò ampliùs hærendum in auctoritate Damasceni, antequàm ad superioris, inferiorisve memoriæ Patres ac doctores accedamus, ex quarum collectis testimoniis luculentior eniteat series, et continuatio traditionis. Itaque ad particulam textûs à Parisiensibus producti, quò clarior eluceat S. doctoris mens, et auctoritas, adnectendum est principium paragraphi, è quo illa est extracta particula : « Quapropter, inquit S. doctor, unus est Christus, Deus perfectus, et homo perfectus cui unam eandemque adorationem cum Patre et Spiritu, non exclusâ immaculatâ ejus carne, adhibemus. Neque enim adorandam esse carnem ejus negamus : quippe quæ adoratur in unâ Verbi personâ, quæ quidem ipsi persona et hypostasis facta est. Quâ in re non creaturæ servimus, non enim illam, ceu nudam carnem adoramus, sed velut Divinitati unitam... »

Major vis adhuc ex responso, quod S. doctor adhibet (lib. 4 de Fid. Orthodox. cap. 3) : « Adversus eos, qui ita objiciunt : Si duæ naturæ Christus est, aut creaturam colitis naturam creatam adorando, aut alteram naturam dictis adorandam, alteram non adorandam. » Scilicet præcipua hæc erat Apollinaristarum criminatione adversus Catholicos utramque in Christo naturam adorantes, ut scitè animadvertunt Maurini (Art. in loc. Ambr. mox pro-

« adoratur latrâ. » Quod subinde latius explicans ostendit, hanc adorationem ob hoc debere humanitati Christi, quia « humanitas constituit unum totum subsistens, idemque esse personale cum Verbo : ergo (concludit), una cum verbo partialiter terminat eandem, quæ ipsi defertur, adorationem latræ, » indeque colligit, « hanc adorationem humanitatis non debere dici relativam, sicut ea quæ defertur imagini Christi, sed propriam et absolutam, quia adoratur persona cujus est natura, totum cujus est pars, adeoque, ut dictum est, ipsa ut pars totus adorati terminat etiam adorationem, secundariò tamen et minùs principaliter, quia adoratur non propter seipsam, sed propter Verbum conjunctum, ad quod ideò primariò et principaliter terminatur adoratio. » Ex quibus liquet, quàm necesse fuerit occurrere offensionis periculo, ne fideles audientes humanitatem Christi directè adorari non posse, decepti ambiguitate hujus vocis à quâ Patres, ut mox dicetur, abstinuerunt, existimarent adorationem quæ debetur humanitati Christi, etiam prout est unita Verbo, genus esse potiùs adorationis ejuspiam relativæ qualis defertur imagini Christi, quàm adorationis absolutæ, quæ ad humanitatem quoque suo modo terminatur, secundariò scilicet et minùs principaliter, nec propter seipsam, sed propter Verbum in assumptâ humanitate subsistens.

ferendum) : « Apollinaristæ, inquit illi, ut impium suum dogma de unicâ in Christo naturâ statuerent, dictitabant, siquidem non unius, sed duplicis naturæ Christus esset, à catholicis unam adorari, alteram non adorari oportere. » Ita videlicet : Catholici humanam in Christo naturam adorabant, Apollinaristæ adorari oportere negabant : Videant adversarii, utris malint sese adjungere, Catholicis et adorantibus, an Apollinaristis adorari oportere negantibus.

Interim videamus ipsi, quâ ratione Apollinaristarum criminationem Damascenus diluat. Repetitâ nempe similitudine carbonis urentis non vi suâ, sed ignis, pergit : « Ad eundem quoque modum caro suapte quidem naturâ nequaquàm est adoranda, sed cum incarnato Verbo adoratur, non quidem propter seipsam, sed propter Deum Verbum, quod secundum hypostasim ipsi copulatum est. Neque enim fatemur nudam simplicem carnem adorari, verum Dei Carnem, sive Deum incarnatum (1). » Quibus verbis ita contexta est formula censuræ propos. 61 Pistoriensis, ut in eâ Damascenum facillè potuisset Fellerus agnoscere.

Quis jam tam ineptus notarum artifex (intelliget Fellerus quò hæc referantur), quis, inquam, tam ineptus fabulator, qui Damasceni dictum, in Carne Christi *Carnem Dei* adorari, sic pervertendum putet, quasi ex eo consequens esset : Igitur *Deus erit Caro*; indeque inferat Et quidem si *Caro non est Deus*, quo titulo adorari poterit? Quasi Christi Caro, etsi non est Deus, hoc ipso tamen quò hypostaticè Verbo unita est, non rectissimè dicatur et sit *Caro Dei*, eoque titulo rectissimè dixerit Damascenus, hanc non ut nudam simplicem carnem, et propter se, sed ut Carnem Christi adorari, quâ nempe adorandâ Deus incarnatus adoratur. Apage proinde istas falsi nominis scientiæ ineptias, contemnendas potiùs quàm seriò refutandas, nisi rudiorum, insipientiorumve offensioni et occurrendum esset.

(1) Damasceno in hac loquendi ratione præluxerant Athanas. L. 1 cont. Apollinar. n. 10 : « Non dictum est, Caro Verbum facta est, sed *Verbum Caro factum est*, quia *Verbi facta est Caro* ; tum et Leo M. serm. 14 de Passione c. 5 : « Cum incorporea sit substantia Dei, quomodo corporaliter in Christo habitat, nisi quia Caro nostri generis facta est *Caro Deitatis*? » Hospes necesse est sit in Patribus, si quem conturbet de Christo audire *Carnem Dei, Carnem Verbi, Carnem Deitatis*.

Jam ut ad antiquiores PP. accedamus, prima se nobis offert Athanasii Epistola ad episcopum Adelphium contra Arianos. Exponunt porro Maurini editores in suâ Promonitione, qui error esset Arianorum, quos hic S. Doctor oppugnat. Ili nimirum « Christi Corpus negabant esse adorandum; vel potius, ut videtur, negabant à Catholicis ritè posse adorari, qui nimirum crederent Verbum perfectam assumpsisse humanam naturam, Corpus scilicet, mentemque humanam... Idcirò autem hi lucifugæ se Verbum hominem factum rectè adorare arbitrabantur, quòd, ut vanè putabant, animæ locum Verbum ipsum obtinebat... Hoc ex errore alius videtur emanasse, eorum nempe qui Carnem Domini conjunctione cum Verbo increatam factam esse existimabant. Quippe illi adsui defensionem dictitabant: Nos rem creatam non adoramus, iidemque Catholicos appellabant ἀνθρωπολάτραις (hominicolas)... Cujus quidem erroris fundamentum hæc in epistolâ diruit sanctus Athanasius. » Idem proinde Ariani isti, quod superiores Apollinaristæ testimonium perhibent christianæ fidei, quâ imbuti Catholici et Christum duplicis naturæ esse, et utramque in Christo adorandam naturam profitebantur.

Horum porro Arianorum criminationem sic repellit Athanasius: « Rem creatam non adoramus... sed rerum creatarum Dominum carnem factum, Dei Verbum adoramus. Etsi enim ipsa caro seorsum spectata pars sit rerum creatarum, attamen *Dei facta est Corpus*. Neque verò hujusmodi Corpus à Verbo dividendes adoramus, neque cum Verbum volumus adorare, ipsum à Carne removeamus. » Quorum verborum vim commodè Juenius explanat (Inst. Theolog. P. 4, Dissert. 6 de Terminis incarn. q. 14, c. 4), hoc ferè modo: « Qui vetat, ne Christum adorans, humanitatem à Verbo dividat, vult sanè ut simul cum Verbo humanitas adoretur: Si enim adorans adorationis speciem humanitati exhiberet se, junctam ab eâ quam exhibet Verbo, humanitatem, saltem in suâ mente, à Verbo divideret; atqui divisionem vetat Athanasius: ergo vult ut latriæ adoratio ipsimet humanitati cum Verbo conjunctæ exhibetur. »

S. Cyrillus Alexandrinus (lib. de rectâ in Jesum Fide, ap. Labb. tom. 3 edit. Ven. Part. 1, continente quæ synodum Ephes. antecesserunt n. 6): « Alii turpe pudendum rati, si hominem adorare videantur, terrenamque

carnem summo honore afficiant, dum fœdo hoc inscitæ morbo, pravæque et adulterinæ religione laborant, Verbum ex Deo natum in ossium et nervorum carnisque naturam demutatum affirmant. » Notat Cyrillus eorum impietatem, qui Verbum in Carnis naturam mutatum affirmabant, ex fœdo inscitæ morbo, pravæque et adulterinæ religione ortum duxisse, quòd hominem adorare, terrenamque carnem honore summo afficere vererentur. Si fœdus hic fuit inscitæ morbus, si prava et adulterina religio; profectò pia, sincera plenaque sanctitatis religio in eo cultu inerat, quem illi respuebant, quo nempe catholica Ecclesia Christum hominem adorandum, humanamque adeò naturam, quâ assumendâ Verbum Caro factum est, honore summo in Christo efficiendam profitebatur. Quem cultum pergit Cyrillus comprobare n. 27, his verbis: « Arbitror enim Dei Verbum post assumptam semel carnem, ab humanæ naturæ conditionibus non esse penitus excludendum, neque humanitati rursùm, si, ut in Christo est, consideretur, gloriam quæ Deum decet non esse denegandam. » Quin etiam (Lib. ad Reginas ap. Labb. ibid.), quo loco superiorum Patrum testimonia recenset de rectâ Fide in Jesum, profert inprimis præclaram auctoritatem Athanasii ex lib. *de Incarnat. Verbi* illis planè sententiis congruentem, quas supra ex Athanasio ipso descripsimus. Hæc porro ejus verba sunt à Cyrillo prolata: « Si quis autem aliud ex divinis litteris docuerit... Aut ejusdem Domini Nostri Carnem, veluti nudi hominis minimè adorandam dixerit; hunc anathemate plectit sancta et catholica ecclesia... Hucusque B. Athanasius. » Ita Cyrillus anathemate à sanctâ catholicâ Ecclesiâ plectitur, qui Carnem Domini nostri velut nudi hominis carnem minimè adorandam dixerit. Ergo ex doctrinâ et fide Sanctæ Catholicæ Ecclesiæ firmiter credendum, Christum Dominum Nostrum non esse nudum hominem, ejusdemque adeò Carnem à Verbo assumptam velut carnem Verbo propriam in Christo esse omninò adorandam. Neque alius fuit Latinorum PP. sensus, inter quos recensendus inprimis magnus Ambrosius à quo notant Maurini editores (notâ supra indicatâ), quæstionem de adoratione Christi etiam secundum humanitatem non sine causâ (adversus Apollinaristas) paulò diligentius tractatam esse lib. 3 *de Spiritu S. C.* 11, cujus hæc verba sunt, n. 76: « Adorant autem (Angeli) non solum Divinitatem ejus, sed etiam scabellum pedum

« ejus, sicut scriptum est : *Et adorete scabellum pedum ejus*, quoniam Sanctum est. »
 Et n. 79 : « Videamus tamen ne terram illam adorandam dicat Propheta, quam Dominus Jesus in carnis assumptione suscepit. Itaque per scabellum pedum terra intelligitur ; per terram autem caro Christi, quam hodièque in mysteriis adoramus, et quam Apostoli in Domino Jesu, ut supra diximus, adorârunt. Neque enim divisus est Christus, sed unus ; neque cùm adoratur tanquàm Dei Filius natus ex Virgine denegatur. »

Idem in Psal. 118, serm. 5, num. 8 : « Caro Christi sine peccato est, quam perfidi contrectantes manus suas inquinaverunt ; sancti venerantes, pietatis odore flagrârunt. » Illud ergo Christi Corpus quod in passione subjectum fuit perfidorum manibus, à quibus est crudeliter dilaceratum, illud, inquam, idem corpus est, quod sancti piæ suæ venerationis *objectum* sibi fecere, cùm illud venerantes, veneratione certè à Verbi veneratione non divisâ, in sepulcro reposuerunt.

S. Augustinus, fidelissimus Ambrosii discipulus, ut eodem loco aiunt Maurini, in exponendo versu Psal. 98 : *Adorate scabellum pedum ejus*, « non solùm Ambrosianas sententias, sed et verba ipsa mutuatus est. » En verba Aug. Enarr. in Psal. 118, num. 9 : « Fluctuans convertome ad Christum, quia ipsum quæro hic, et invenio quomodò sine impietate adoretur terra, sine impietate adoretur scabellum pedum ejus. Suscepit enim de terrâ terram, quia caro de terrâ est, et de carne Mariæ Carnem accepit ; et quia in ipsâ Carne hic ambulavit, et ipsam Carnem nobis manducandam ad salutem dedit ; nemo autem illam Carnem manducat, nisi prius adoraverit ; inventum est quemadmodum adoretur tale scabellum Domini, et non solùm non peccemus adorando, sed peccemus non adorando. »

Profectò nomine scabelli perspicuum est Augustinum non Divinitatem, sed Carnem Christi designasse ; itidem perspicuum est, minimè in eo elaborandum, ut modus inveniat, per quem modum Divinitas sine impietate adoretur. Cùm ergo S. Augustinus per assumptam Carnem à Verbo ostendit inventum esse modum, quo sine impietate adoretur *scabellum pedum Domini*, manifestè loquitur de adoratione Carni exhibendâ, quam nomine scabelli apertissimè denotat. Idcirco autem illam dicit sine peccato adorari, imò non posse

non adorari sine peccato, quia est Caro quam Verbum suscepit, suamque suscipiendo effecit.

Quin etiam in serm. de verbis Domini dudum, et diu vulgato sub nomine Augustini, cujus extrema pars à Maurinis in Append. n. 246, rejecta est, velut auctoris incerti, quem tamen ut antiquum, atque adeò remotioris memoriæ idoneum testem proferre possumus ; in eo, inquam, sermone, n. 5, legitur : « Sed illi (Ariani) ad hoc replicabunt, et dicent : Quid quòd Carnem ejus, quam creaturam esse non negas, simul cum Divinitate adoras, atque ei non minùs quàm Divinitati deservis ? Ego Dominicam Carnem, imò perfectam in Christo humanitatem, propterea adoro, quòd à Divinitate suscepta, atque Deitati unita est ; ut non alium atque alium, sed unum eundemque Deum, et hominem Dei Filium esse confitear. »

S. Leo (Serm. 28, edit. Baller.) : « Unde utrique naturæ in suis proprietatibus permanenti tanta est unitatis facta communio, ut quid quid ibi est Dei, non sit ab humanitate disjunctum, quidquid autem est hominis, non sit à Deitate divisum. » En præclarè positum fundamentum adorationis, quæ debetur humanitati Christi. Quippe cùm quidquid est hominis in Christo non sit à Deitate divisum, et quidquid est Dei non sit ab humanitate disjunctum ; profectò cultus, qui humanitati defertur, prout est humanitas Christi, totum complectitur, quod in humanitate Christi nunquàm est à Deitate divisum, atque adeò Deitatem, quæ nec ipsa est unquàm ab humanitate disjuncta.

Succedunt propioris ætatis Doctores, S. Thomas P. 3, Q. 25, Art. 2, propositâ quæstione, *utrùm Humanitas Christi adoranda sit adoratione latriæ*, subjectis continuò more suo quæ in adversam partem facere videntur, hoc modo : *Videtur quòd Humanitas Christi non sit adoranda adoratione latriæ* ; suam dein sententiam promittit per verba : *Sed contra*, ubi argumento ducto ex auctoritate Damasceni, subjungit : « Sed Verbum incarnatum adoratur adoratione latriæ. Ergo et Corpus ejus, sive ejus humanitas. » Et in extremo articulo : « Et per hoc etiam patet responsio ad 2 et 3, quia adoratio latriæ non exhibetur humanitati Christi ratione sui ipsius, sed ratione Divinitatis cui unitur. »

Sylvius, præclarus D. Thomæ interpres, in eum S. Doctoris locum : « Quare simpliciter dicendum est Carnem et Animam Christi, sicut et membra Corporis ejus, adoranda

« esse adoratione latriæ, quæ quidem iis debetur ratione hypostasis Verbi Dei, à quâ, et in quâ sustentantur. »

Catechismus Romanus (de Sacram. Euchar. n. 8) : « Atque ad eundem modum hoc sacramentum adorandum esse, nimirum Corpus et Sanguinem domini intelligentes affirmamus. »

Jueninus (p. 4, dissert. 6, de Termino Incarn. c. 1) Patrum auctoritatibus, quas plures profert, singulis singulas argumentationes subijcit, quibus ad leges dialecticas adstricta Patrum sententia nitidius ac distinctius enodata pateat.

Præstantis vir doctrinæ card. Gotti (tractat. 7 de Euchar. Q. 3, dub. 5, § 3) : « Caro Christi supposititaliter Verbo unita, ubicumque sit, adoranda est. »

Joan. Clericatus, qui inter munia, quibus operam suam B. Gregorio card. Barbadigo præstitit, ac probavit, insigni Cleri Patavini Ecclesiasticorum Studiorum exercitationibus præfuit (de Sacrif. Missæ decis. 6, n. 29) : « Christus adorandus est adoratione latriæ, non solum ut Deus, sed etiam ut homo, quia Humanitas Christi ut unita Verbo includit ipsum Verbum, et dicit totum Christum. » Laudatque doctissimum Cardinalem de laureâ de Incarn. decis. 29, n. 68. Dictum sanè valdè accommodatum illustrandæ Basilii sententiæ, quâ Caro Christi (homil. 59, n. 4) ab eo dicta est *Caro Dei gestatrix*, tum et similitudini è Carbonè ignito à Damasceno depromptæ; quibus declaratur, quòd plurimum valet adversus obloquentium criminationes, adorationem, quæ tribuatur humanitati, de quâ verum sit dicere, *eam Verbum Divinum includere, et dicere totum Christum*, talem esse quæ non duplicem adorationem præ se ferat, sed unam eandemque adorationem, quâ Verbum ipsum incarnatum cum propriâ ipsius Carne adoratur; prout est can. 9 concilii generalis V expressè traditum (1).

§ 2. *Reprehensiones Fellerianæ dihuntur. Præcatio pio Ecclesiarum usu consecrata, Sacrosanctæ individuae Trinitati Crucifixi D. N. J. C. Humanitati, vindicatur.*

Hactenus præclare jacta sunt fundamenta defensionis nostræ adversus Fellerianas compellationes, quas tantò minùs metuendas nobis esse intelligimus, quantò pluribus, firmioribus-

(1) Non quasi Verbi immensitas carnis angustis, velut clausa teneatur, sed quòd tota ipsa Verbi persona in Carne sive humanitate hypostaticè sibi unita subsistat.

que Patrum ac Doctorum auctoritatibus causa nostra nititur. Fellerum tamen audiamus. Sic ille orditur : « Difficile est scire quid Pistojenses per vocem *directè* intelligant, eum nunquam à Divinitate Christi separetur humanitas, ne per mentem quidem et intentionem fidelium. »

Hæc ipsa de causâ providendum fuit, ut in hæc vocis ambiguitate prava significatio distinctè notaretur, quâ fideles decepti in hunc errorem inciderent, fieri non posse, ut adoratio dirigatur in humanitatem Christi, prout in nonnullis tamen publicis Ecclesiæ orationibus dirigitur, quin humanitas à Divinitate separetur, atque adeò tribuatur creaturæ honor soli Deo debitus. Qui error perspicuè in formulâ censuræ depulsus est, quâ declaratur adorationem, quâ humanitas, ipsaque Caro vivifica Christi adoratur non quidem *propter se*, sed prout unita est Divinitati, non esse honorem divinum impertitum creaturæ, sed unam, eandemque adorationem, quâ Verbum incarnatum cum propriâ ipsius Carne adoratur (1).

(1) Si adverbium *directè* vi suâ, et communi acceptione significaret *separatim*, *primariò*, *propter se*, rectè synodus dixisset adorationem latriæ *directè* tributam humanitati Christi, fore semper honorem divinum impertitum creaturæ. Verum non ea est nativa, communisve istius adverbii acceptio. Quippe hæc adverbia *directè*, *separatim*, *primariò*, disparatas omninò significationes præ se ferunt, ut patet ex lexicis, et usu communi. Neque verum est, id quod aliò dirigitur, semper sistere ac terminari in eo ad quod dirigitur; velut ictus lanceæ, qui dirigitur in latus, non semper sistit in latere, sed ad cor penetrat, in eoque terminatur. Itaque fieri potest ut adoratio *directè* tribuatur humanitati Christi, quin ei tribuatur *separatim* et *primariò* aut in eâ terminetur. Igitur qui generatim et universè statuit humanitatem Christi non posse *directè* adorari adoratione latriæ, hoc ipso generatim et universè excludit omnem modum, quo talis adoratio dirigi potest ad humanitatem Christi, etiam cum ad eam dirigitur non propter se, non separatim à Divinitate, sed ita dirigitur, ut tamen non in eâ terminetur, sed in Verbo, quod ei factum est subsistentia, ut loquitur Damascenus. Sublatâ proinde generatim quâcumque *directâ* adoratione latriæ humanitati Christi, hoc ipso tollitur omnis eidem exhibenda latriæ adoratio; nec enim intelligi aut fieri potest, ut qualiscumque Cultus exhibeatur, quin ad illum dirigatur, cui exhibetur, et eo modo dirigatur, quo modo exhibetur. Porro sine errore negari n. quit, quin adoratio latriæ exhibenda sit humanitati Christi, non quidem propter se, sed prout est unita Divinitati per hypostaticam unionem cum Verbo. Hinc etiam, quod sedulo notandum est, valdeque ad rem pertinet, in tam multis quas collegimus Patrum ac doctorum auctoritatibus,

Pergit Feller : « Adoratur indivisibiliter in-
« divisibilis Christus, Deus, et Homo. »

Utique sanè. Sed mirum Fellerum non vidi-
disse per adorationem quâ humanitas Christi
adoratur ut Verbo unita, non tolli quin Chris-
tus indivisè cum suâ humanitate adoretur,
quemadmodum ex verbis censuræ modò reci-
tatis apertissimè intelligitur.

Atque in hac quidem totâ disceptatione vi-
detur Feller in eo deceptus esse, quòd puta-
verit, siquidem duæ distinctæ naturæ adoren-
tur in Christo, duas consequenter adorationes
esse distinguendas. Quod secus est. *Ambas
Christi naturas*, inquit Damascenus, *ob unitam
carni divinitatem adoro* : Num propterea duas
illas adorationes induxisse putabimus? Absit;
attamen si ambæ Christi naturæ adorandæ
sunt, duo utique proposita sunt à S. doctore
adorationis objecta, Divinitas certè *in se, et
propter se*, humanitas *non propter se, sed ob
unitam Carni Divinitatem* : nec tamen inde se-
quitur duas esse distinguendas adorationes,
quippe cum vi unionis hypostaticæ *humanitas
includat ipsum Verbum*, ideòque quidquid est
Dei, nunquam sit ab hac humanitate disjunc-
tum; profectò inde fit ut quo actu per adora-
tionem humanitas attingitur per eundem planè
adorationis actum et ipsum Verbum attingatur,
quod nunquam est ab humanitate suâ divisum,
quemadmodum (si æquâ proportionem uti licet

semper quidem illi monent, cavendum ne ado-
ratio patriæ tribuatur humanitati Christi pro-
pter se, nunquam verò illam *directè* adorari non
posse. Ut proinde suspicione non careat novi-
tas hujus verbi *directè*, quod in hac materiâ
communi Patrum ac doctorum locutioni nullâ
necessitate substitutum est à synodo. Et reverà,
si non alius erat synodi, quàm qui semper fuit
Patrum et doctorum sensus de adoratione hu-
manitatis Christi, cur non et eundem in eo
explicando planum, dilucidum, expeditum
eòrum loquendi modum sibi etiam tenendum
censuit, à quo sine aliquo offensionis periculo
vix unquam receditur? Quamobrem animad-
versione indigebat propositio synodi, quæ ge-
neratim et universè negans, *directè* adorari
posse humanitatem Christi, per indetermina-
tam ambiguitatem illius verbi *directè*, in eam
fraudem fideles impellere facillè poterat, ut
existimarent nullo modo dirigi posse, nec adeò
exhiberi adorationem patriæ humanitati Christi,
etiam cum ad eam dirigitur, et eidem exhibe-
tur, prout est humanitas personæ Verbi in quâ
adoratio terminatur; quasi talis adoratio foret
honor divinus impertitus creaturæ, et non potius
una eademque adoratio, quâ persona ipsa Verbi
subsistens in humanitate assumptâ, simul cum
unitâ sibi humanitate adoratur; prout in for-
mulâ censuræ declaratum est ad normam ca-
nonis 9, concilii general. V.

ipsiusmet Damasceni similitudine carbonis
igniti), in carbone ignito lignum tangi non
potest, quin eodem actu tangatur ignis, quo
totum est lignum comprehensum.

Imò posito quòd cultus qui uni objecto præ-
statur, non aliter ei præstetur, nisi prout est
alteri objecto indivisè unitum, repugnat, ut ne
quidem per mentem divisus, concipiatur ho-
nor, qui totus in indivisâ illâ unione fundatur.
Et reverà quidem cum humanitas Christi non
possit intelligi sub hac ratione *humanitatis
Christi*, seu quatenus est humanitas Christi,
nisi simul intelligatur esse unita personæ Verbi,
profectò necesse est, ut cum sub hac ratione
humanitas adoratur, et ipsa persona Verbi
adoretur, quæ nisi simul cum suâ humanitate
adoraretur, nec intelligi posset humanitatem
adorari, ut est humanitas Christi (1). Demùm
et istud considerari potest : Quemadmodum
duæ naturæ, quæ distinguuntur in Christo,
nihil officiunt unitati personæ, ita nec quid-
quàm officit unitati adorationis, quòd duæ in
Christo naturæ adorentur, quæ in Christo,
ut loquitur Damascenus, *ad unam Verbi Dei
personam reducuntur*.

Pergit Feller : « Unde meritò, si accuratio
« theologica spectetur, culpatur illa separatio
« in Oratione, *sacrosanctæ et individue Trini-
« tati, crucifixi Domini nostri humanitati*, etc. »
Imò non excusandus Feller, qui separationem
adorationis humanitatis ab adoratione Divinita-
tis finxit sibi in eâ oratione, quæ cum dicit
humanitatem Christi, hoc ipso etiam dicit *perso-
nam Verbi*, sine quâ humanitas illa, nec esse,
nec intelligi posset ut humanitas Christi. Pe-
rinde ac si, ut vulgari comparatione utar, ar-

(1) Quod vulgari etiam nec prorsus ineptâ
comparatione, sensu similitudine illustrari potest.
Nam qui, v. gr., honorem deferri cuidam ho-
mini, non quidem prout certus quidam homo
est, sed prout est sacerdotali honore insigni-
tus, ei que caput submittit, ejusque manus
chrismate sacro delibatas osculatur, profectò
fieri non potest, ut in honore qui homini ei
deferitur, non comprehendatur ipsa sacerdo-
talis ordinis dignitas propter quam honor ille
deferitur; verumque adeò sit dicere, in honore
qui homini deferitur, ut sacerdos est, sacerdo-
talem dignitatem et personam honorari. Ad
eum modum, quantum fert similitudinis ratio,
nec per mentem intelligi potest, in adoratione
quæ deferitur humanitati Christi, non propter
se, sed propter personam Christi cui unita est,
non ipsam Christi personam adorari, propter
quam unicè adoratio patriæ humanitati defer-
tur, prout nempe humanitas est Christi, seu
personæ Verbi, quod in eâ subsistit, et à quo,
et in quo illa sustentatur.

gualur quis à personâ optimi regis honorem separare, quem regiæ potestati defert, quam rex sustinet. Sed de toto isto fictæ separationis crimine dictum jam satis. Cæterum distincta mentio, quæ in eâ oratione fit Trinitatis et humanitatis Christi crucifixi, eò spectat, ut post absolutum canonicarum officium distinctè recolantur, ac velut in recitantium mente defixa teneantur duo præcipua Fidei nostræ distincta mysteria, Sacrosanctæ nimirum Trinitatis et Incarnationis Christi Domini, beatæque passionis, quam pro generis humani salute in suâ humanitate sustinuit. Ex quo certè nulla talis inducitur separatio, qualem suspicatus est Fellerus.

Hoc porrò dolendum valdè, cl. virum non minimùm videri à pristino illo suo pleno pietatis in apostolicam Sedem obsequio descivisse, dùm affirmare non est veritus, *meritò culpari* (spectatâ videlicet accuratione theologicâ) orationem, quam non ignorat à summis pontificibus jam ab Leone X commendatam, gratiis spiritualibus auctam, à sacris ministris tam longo intervallo recitari consuetam, nullo reclamante, cujus aliqua fuerit in Ecclesiâ nominis auctoritas. Utinam ille meminisset sapientis moniti, quod in aliâ notâ descripsit ex Morino, Morinus traxit ab Augustino. Epist. 54: « Insolentissima est insania non modò disputare contra id, quod videmus universam Ecclesiam credere, sed etiam contra id quod videmus eam facere. »

Quòd si fictæ separationis illius nomine culpanda oratio *Sacrosanctæ*, pari jure et hæc erit culpanda, quæ in sacræ liturgiæ secretis non semel per annum recitari consuevit: *Unigeniti tui, Domine, nobis succurrat humanitas*: culpanda item invocatio cum latriæ cultu conjuncta, quæ fit à sacerdote sacram hostiam sive sumente, sive porrigente: *Corpus Domini nostri Jesu Christi custodiat animam meam, vel tuam in vitam æternam*. An hic etiam metuendum suspectæ separationis periculum? Absit. Satis hoc uno sese tuetur sacræ illius invocationis sanctitas, quòd in Christi Corpore, prout Corpus est Christi, Christus ipse invocatur. Cæterum, ad plenius cognoscendam vim efficientiæ, quam ex unione hypostaticâ cum Verbo ad salutem humani generis traxit Caro Christi, ut instrumentum divinitatis, consulendus S. Thomas 3 P., Q. 48, art. 6, et in 1 Thessal. c. 3, lect. 3.

§ III. *Effectum theologicum*: Verbum assumpsisse Corpus mediante Animâ, *præter rem à Fello productum*.

Concludit Feller: « Quòd autem supponi videatur *nudam Carnem adorari*, eò absurdius est, quòd nequidem uniri Divinitati mera Caro possit, cum nonnisi mediante animâ, Verbum Dei corpus assumpserit. » Primum, nescio quò referatur illud, quod *supponi* Fello visum est, *nudam carnem adorari*. Nulibi certò id supponitur in formulâ censuræ, in quâ contra potius verbis è Damasceno depromptis expressè declaratur, *nudam Carnem non adorari*. Nec mirum Fello videri debuit usurpata esse in Pontificiâ Sanctione verba Damasceni.

Deinde in eo quod sequitur, magnum quiddam Feller, viroque planè theologo dignum ostentare maluisse videtur, quàm quidquam afferre quod ad rem faceret. Illud nimirum proferret ex intimâ theologiâ depromptum, *Verbum Carnem assumpsisse, mediante Animâ*. Utinam verò non eum piguisset in ipsam quæstionem penitiùs intrare, non ipsum tantummodò quæstionis titulum inspicere: profectò ab omni ejus mentione abstinuisset, ne aut à quæstionis statu aberrare, aut extra propositum vagari videretur. Etenim quæro quid ille sibi finxerit à theologis intelligi per hæc verba, *mediante Animâ*? An fortè in conjunctione Verbi cum Carne Animam veluti glutinosum medium intercedere, per quod Caro jungatur cum Verbo, ita ut unio Verbi cum Carne non sit æquè immediata, atque unio est Verbi cum Animâ? Atque id quidem ad suum propositum aliquantùm facere posse videretur. Verùm non ea est in illâ versandâ quæstione theologorum mens, et sententia, qui contra in tali refutando errore consentiunt planissimè. Paucis proinde, quantum fieri poterit, exponenda nobis est tota hujusce quæstionis ratio. Theologi nempè in disputatione, quam instituunt de convenientiâ, modo et ordine incarnationis, inter cætera inquirunt, an, et quemadmodum dignum et congruens fuerit, Verbum Carnem assumere. Aiunt porrò Verbum in assumendo corpore, non corpus spectasse simpliciter ut caro est, sed cum vellet humanam naturam integram perfectamque assumere, ideò et corpus assumere voluisse non ut corpus merum, sed ut corpus humanum, pertinens videlicet ad integritatem constituendam humanæ naturæ; corpus autem non aliter humanum esse intelligitur, nisi ex ordine quem habet ad

animam. Hinc fit ut anima fuerit in ordine dignitatis et congruentiæ veluti causa media, propter quam Verbum voluerit corpus assumere. Neque tamen ex hoc sequitur non æquè hypostaticam, atque adeò immediatam Verbi unionem fuisse cum corpore assumpto, quàm fuerit cum Animâ. Ita scilicet, ex mente D. Thomæ Sylvius (in 3 P., Q. 6, art. 1, in responsione ad 3) inquit : « Observandum est, « Verbum esse immediatè unitum carni sicut « animæ, et independentè ab animæ infor- « matione, eò, quòd anima non sit medium « colligantiæ, id est per quod ista extrema, Ver- « bum et caro ligantur ad invicem, sicut duo « corpora junguntur ad invicem, interver- « niente glutino. Sed est medium congruentiæ, « id est ratione cujus congruum est aliqua duo « perducì ad unionem, sicut nobilitas et pul- « chritudo est medium congruentiæ, ut aliqua « mulier jungatur regi in matrimonium, quem- « admodum explicant Bonaventura et Richar- « dus, » etc.

Quin et ipse S. Thomas cùm sibi objecisset, ea, quæ per medium conjunguntur, tum separari cùm medium removetur, ideòquesi Verbum corpori unitum esset per medium animæ, futurum, ut separatâ animâ à corpore, separari quoque oportuisset Verbum ab ipso corpore, respondet : « Dicendum, quòd nihil prohibet « aliquid esse causam alicujus quantum ad ap- « titudinem, et congruitatem, quo tamen re- « moto illud non tollitur sicut si inter aliquos « amicitia causatur aliquo mediante, eo rece- « dente, adhuc amicitia remanet... et similiter « separatâ animâ remanet unio Verbi ad car- « nem » Et qu. 50, art. 2 ad. 2 : « Dicendum « quòd Verbum Dei dicitur unitum, carni, me- « diante animâ, in quantum caro per animam « pertinet ad humanam naturam, quam Filius « Dei assumere intendebat, non autem ita quòd « anima sit quasi medium ligans unita. Habet « autem caro ab animâ, quòd pertineat ad hu- « manam naturam, etiam postquàm anima se- « paratur ab eâ, in quantum scilicet in carne « mortuâ remanet ex divinâ ordinatione quidam « ordo ad resurrectionem. Et ideò non tollitur « unio Divinitatis ad carnem. »

Frustra igitur Feller hanc suam *mediantis animæ* mentionem in locum non suum injecit. Nihil juvat eum hæc alienæ quæstionis in alienam sedem coacta immigratio. Cùm enim ordo ille dignitatis, et congruentiæ (vel etiam necessitatis, ut alii volunt, de quo nil attinet hoc loco disputare), quo anima media intelligitur

inter Verbum et corpus, nil minuat de immediatâ hypostaticâ unione Verbi cum carne, nil quoque detrahit de fundamento, quo nititur cultus adorationis, qui debetur humanitati Christi non *propter se*, sed prout hypostaticè unita est Verbo divino, quemadmodum supra explicatum est.

Summa hæc esto, quam, etsi unâ eademque sententiâ comprehensam, sub triplici tamen expositionis aspectu, ac velut formâ uberioris, planiorisve declarationis gratiâ proponendam ducimus. Prima forma : humana natura in Christo vi unionis hypostaticæ subsistit, sive (ut loquitur S. Thomas 3 P. Q. 2, art. 2 ad. 2 et 3) *existit in personâ Verbi*, quæ facta est ei hypostasis, et subsistentia (Damasc.); ambæ proinde naturæ in Christo adorandæ, divina in se, et propter se, humana, non propter se, sed propter unitam carni Divinitatem. Tametsi verò ambæ naturæ adorentur, una tamen est adoratio, quatenus ambæ naturæ ad unam Verbi personam reducuntur (Damasc.). Quo fit ut persona ipsa Verbi adoretur in eâ naturâ, quæ non adoratur, nisi prout in Verbo subsistit : sitque adeò verum dicere : Cùm Caro Christi adoratur, ut est Caro Christi, id est Verbi Incarnati, non duas adorationes introduci per hoc, quòd Christus in duabus naturis adoretur, sed reverà unâ adoratione *Deum Verbum incarnatum cum propriâ ipsius Carne adorari*.

Altera forma : Duæ sunt veritates ex communi PP. sensu de adoratione Christi omnino profitendæ. 1º Cùm duæ sint in Christo naturæ, divina et humana, ambas in Christo esse adorandas, divinam propter se, humanam, non propter se, sed propter divinam, cui conjuncta est per unionem hypostaticam cum Verbo. 2º Cùm per hanc hypostaticam unionem humana natura subsistat, seu *existat* in Verbo, etsi ambæ naturæ in Christo adorentur, non propterea duas adorationes introduci, sed unam tantum, quatenus una eademque est persona Verbi, quæ subsistens in duabus naturis, adoratur in utrâque adoratâ naturâ. Quo fit, ut per adorationem utriusque naturæ in Christo, totus idem Christus Deus et Homo in suis ambabus naturis adoretur. Atque adeò cùm Caro Christi adoratur, prout est Caro Christi, Verbo hypostaticè unita, hoc ipsum intelligatur quod est à concilio generali V definitum, unâ eademque adoratione Verbum incarnatum cum propriâ ipsius Carne adorari. Utraque proinde veritas ad catholicæ doctrinæ integritatem de Incarnationis mysterio pertinet, ut humanam

naturam Verbo divino unitam in Christo, propter hanc ipsam unionem adorandam profiteamur. Et simul Christum totum in adorata sibi unita Humanitate, una eademque adoratione adoratum intelligamus. Cavendum proinde, ne dum unam veritatem retinere volumus, qua Christum totum Deum et Hominem adorandum profiteamur, alteram veritatem deseramus, qua Christi humanitatem una eademque adoratione cum Christo toto, Deo et Homine, adorandam profiteri debemus.

Tertia forma : Quisquis Christum adorat verum Deum et Hominem, vel comprehendit Humanitatem in adoratione patriæ, quam Christo exhibet Deo et Homini, vel eam non comprehendit. Si non comprehendit, cum tamen aliquod genus adorationis debeatur humanitati Christi, necesse est, ut in adoratione, quæ debetur Christo Deo et Homini, duæ separatim adorationes introducantur, una quæ tribuatur Christo ut Deo, altera quæ ipsi tribuatur ut Homini. Atque hoc ipsum est, quod can. 9, concilii generalis V reprobatur contra eos, qui

ex eo quod Christus dicatur *in duabus naturis adorari*, ex hoc duas adorationes introducunt, separatim Deo Verbo, et separatim Homini. Si ergo nulla separatio fieri potest, in adoratione patriæ, quæ debetur Christo Deo et Homini, necesse est ut humanitas comprehendatur in hac una adoratione patriæ quæ Christo debetur Deo, et Homini. Quippe si humanitas in ea non comprehenderetur, hæc ipsa patriæ adoratio separatim tribueretur Christo Deo Verbo, et alia inferior adoratio *separatim* Christo homini tribuenda esset. Si ergo humanitas comprehenditur in adoratione patriæ quæ debetur Christo Deo, et homini, verum est dicere, Humanitatem in Christo adorandam esse, Quia verò vi unionis hypostaticæ humanitas adoratur in unitate personæ Christi Dei et hominis, simul verum est dicere, personam ipsam Christi Dei et hominis, comprehendi in adoratione patriæ, quæ humanitati defertur, prout subsistit in unitate personæ ipsiusmet Christi Dei et hominis.

PROPOSITIO 65, DAMNATA.

DE CULTU SACRI CORDIS JESU.

(*De Orat.*, § 10. *Et Append.*, n° 32.)

LXIII. — Item in eo quod cultores Cordis Jesu hoc etiam nomine arguit, quod non advertant sanctissimam Carnem Christi, aut ejus partem aliquam, aut etiam humanitatem totam cum separatione, aut præcisione à Divinitate adorari non posse cultu patriæ.

Quasi fideles Cor Jesu adorarent cum separatione, vel præcisione à Divinitate, dum illud adorant, ut est Cor Jesu, Cor nempe personæ Verbi, cui inseparabiliter unitum est, ad eum modum quo exsangu Corpus Christi in triduo mortis sine separatione aut præcisione à Divinitate adorabile fuit in sepulcro.

Captiosa, in fideles cordis Christi cultores injuriosa.

NOTA FELLERI. — Pag. XXXIV. Propos. LXIII. Ad rudiorum intelligentiam addi fors posset, nullo modo adorari Cor Jesu quasi circumscriptivè et præcisivè à totalitate corporis, ut

quidam nuper Germanus insulsè scripsit, neque formaliter adeò et directè; id enim minimè licet de quacumque corporis parte, quia nullam determinatè et formaliter partem Verbum assumpsit, sed ipsam corporis totalitatem, et idipsum quidem mediante animâ. Porro Cor Jesu schema est seu symbolus, quo Christi erga nos charitas et infinita ipsius amabilitas exhibentur, ut nos vicissim in ejus amore incalescamus. Atque hæc est tota substantia ac mens illius devotionis, quæ vocatur *de Corde Jesu*, à quâ omnis adoratio Cordis Jesu materialiter aut formaliter sumpti (etsi huic quoque sua reverentia debeat uti omnibus ad Christum pertinentibus) omninò abest et abesse debet: quemadmodum summi pontifices Clemens XIII et Pius VI declaraverunt, et hic quidem conceptissimis verbis in suo ad Pistojensem episcopum rescripto. *Sancta Sedes modum jam*

turbis et questionibus imposuit, satisque declaravit, quò substantia illius devotionis ab omni certò superstitiosâ materialitate immunis, reverà spectet; ut in SYMBOLICA CORDIS IMAGINE immensam charitatem effusumque amorem divini Redemptoris nostri meditemur, atque veneremur.

ANIMADVERSIO.

§ 1. — *Reprehensio Felleri ex eo ducta, quòd Verbum nullam determinatè et formaliter corporis partem assumpserit, diluitur.*

Quæ superiore Animadversione dicta sunt, de adorandâ humanitate Christi, nullo negotio transferri valent in disceptationem, quæ superest de cultu sacri Cordis Jesu, de quo in propositione synodi duo præsertim occurrunt, quibus sua fuit adhibenda correctio. Unum quòd cultores Cordis Jesu generatim arguat, quasi non advertant, nec partem ullam humanitatis, nec totam ipsam humanitatem cum separatione aut præcisione à Divinitate adorari posse adoratione latriæ. Alterum quòd per hanc reprehensionem insinuet in omni adoratione Cordis Jesu hanc reprobata fieri separationem, aut præcisionem à Divinitate. Atque ad primam quidem partem quòd attinet, accusatio illa Synodi depulsa est in censurâ, velut in *fideles Cordis Christi cultores injuriosa*. In alterâ verò parte, quâ propositio notata est velut *captiosa*, depulsa itidem est, latens sub eâ reprehensione insinuatio, quâ fideles in hanc fraudem induci possent, ut existimarent Cor Jesu adorari cum separatione, aut præcisione à Divinitate, tum etiam cùm adoratur, ut est Cor Jesu, Cor nempe personæ Verbi, cui inseparabiliter unitum est. Quod, quàm alienum sit à communi Ecclesiæ sensu declaratum est insuper exemplo tridui mortis, quo Christi Corpus ab animâ et sanguine separatum semper tamen à Verbo indivisum, adorabile fuit in sepulcro. Quâ in moderatione censuræ nihil sanè se offert implexum, involutum, nihil quod uberius explicationis lucem requireret. Nisi fortè de Corde Christi durius fuit dicere, *Cor personæ Verbi*, quàm quod de Carne Christi passim dictum est à PP. *Carnem Dei, Corpus Verbi, Carnem Deitatis*? Aut etiam quod in sacris publicis precibus, tot seculis Ecclesiæ unâ voce per orbem celebrat, « et Dei manus pedesque stricta cingit fascia? »

Attamen audiendus Feller: « Ad rudiorum, inquit, intelligentiam addi fors posset, nullo modo adorari Cor Jesu quasi circumscriptivè et præcisivè à totalitate Corporis, ut quidam

« nuper Germanus insulsè scripsit, neque « formaliter adeò et directè, id enim minimè « licet de quâcumque Corporis parte, quia nullam determinatè et formaliter partem Verbum assumpsit, sed ipsam Corporis totalitatem, et id ipsum quidem mediante animâ. »

Nisi Feller notam notæ adjunxerit, vereor ut ad clariorem rudiorum intelligentiam multum profuerit insuetis illum verbis insusurrantem audire, minimè licere adorare *circumscriptivè et formaliter* partem ullam Corporis Christi, eò quòd Verbum nullam *determinatè et formaliter* corporis partem, sed *totalitatem* assumpserit, idque *mediante animâ*. Quin vereor ne quid ad clariorem dictorum suorum intelligentiam Felleri ipsi defuisse videatur. Certè quod hoc loco repetit de assumpto corpore *mediante animâ*, abundè supra declaratum est, quàm parùm effati hujusce vim, et sententiam ille assecutus sit, quàm parùm inde ad suam causam adjumenti consequi potuerit.

Quod porro attinet ad assumptas partes corporis *mediante toto*, hoc ipsum eodem sensu effertur à theologis, atque illud superiùs de assumpto corpore *mediante animâ*, nempe cùm Verbum perfectam humanam naturam vellet assumere, sicut corpus assumpsit in ordine ad animam, prout videlicet humanum est, ad integritatem pertinens humanæ naturæ ita èt cùm vellet corpus totum assumere, partes assumpsit (in ordine intentionis, ut theologî explicant) *mediante toto* (V. S. Th. 3 P., Q. 6, art. 5), scilicet propter ordinem quem habent ad totum constituendum. Nec id tamen obstat, quominus hypostatica fuerit unio Verbi cum singulis partibus, quæ cùm *maxima sit unio-num* (S. Th. 3 P., q. 2, art. 9), nulla sanè major magisve determinata intelligi potest.

Atque id quidem patet in triduo mortis quo partes humanæ naturæ separatæ sunt; nec tamen hæc obstitit separatio, quin Verbum hypostaticè atque adeò determinatè cum utraque parte separatâ, corpore videlicet, et animâ, unitum manserit, prout inferiùs ex communi, planèque certâ PP. sententiâ, imò et Ecclesiæ totius mente ac sensu demonstraturi sumus. Jam verò cùm per mortem nulla sit facta nova hypostatica unio, profectò, si post mortem Divinitas, vi unionis hypostaticæ cum Verbo, determinatè unita fuit cum corpore, singulisque corporis partibus, necesse est fieri illam eandem determinatam unionem cum corpore, suisque partibus ante separationem ab animâ præextitisse.

Ex hac hypostaticâ immediatâ unione Verbi cum singulis corporis partibus, hæc necessario profluit profitenda Catholica veritas, quam Sylvius his verbis annuntiat. *Carnem et Animam Christi, et membra Corporis ejus adoranda esse adoratione patriæ.* Quam veritatem totius Ecclesiæ sensu ita firmatam vel ipse Blasius intellexit, ut expressam ejus professionem edere non dubitaverit hoc inscripto titulo ad cap. 12 sui notissimi opusculi: « Cor Jesu propriè et per se sumptum ob hypostaticam unionem capax est adorationis patriæ. »

Verùm luculentius multò ejusdem veritatis, firmiusque testimonium ex longè graviori auctoritate ducitur, nempe ex solempni officio quinque plagarum Redemptoris, ubi (Orat. post comm.) sic orat sacerdos: *Ut qui vulnera Domini nostri Jesu Christi hodie devotè colimus.*

Quid porrò est vulnus lateris (ut in eo hæreamus, quod propiùs cor attingit), quid, inquam, vulnus est lateris, nisi latus ipsum vulneratum? En proinde cultus adorationis determinatè directus ad unam partem corporis in ipsâ *totalitate* cum cæteris partibus coexistentem (1).

Nisi ergo dicere volumus in hoc frequentando, celebrandoque officio Ecclesiam à pii cultûs ratione aberrare, fatendum omninò nihil officere partium cohærentiam in toto, quominus ad unam determinatè partem cultûs piè ritèque dirigi valeat, ut mox explicaturi sumus.

Itaque hæc sedulò notanda: Primùm, cum singularis pars, in quam adoratio dirigitur, non adoretur, nisi propter unionem hypostaticam cum personâ Verbi, profectò intelligitur in adoratione, quæ illi parti exhibetur, adorari personam ipsam Verbi, atque adeò Christum totum, cujus alia non est quàm Verbi persona.

(1) Nihil officit discrimen, quòd alicui placuit intercedere inter vulnera et Cor Christi, ex eo ductum, quod *vulnera nihil sunt aliud quàm ipsummet Corpus Christi in locis ex disjunctione carnis apertum.* Nam primò semper verum est, in adoratione vulneris partem ipsam vulneratam speciatim spectari et coli. Quemadmodum ergo sine separatione à toto spectatur et colitur latus ipsum apertum, quid vetat quin eodem modo spectetur cor in aperto latere contentum? Deinde, si ex regulâ fidei verum est dicere totum Christum (etsi non secundum totum) verè et propriè sepultum esse, prout § ult. declaratur, verum quoque est dicere, personam Christi verè adorabilem esse in quâcumque parte hypostaticè sibi unitâ, licet ab aliis separatâ, velut in corpore, quod in sepulcro separatum quidem fuit ab animâ et sanguine, sed tamen Verbo semper unitum.

Quo fit, ut cum Christus totus in eâ sui corporis parte adoretur, nullo pacto ab ejus partis adoratione, remota et exclusa intelligi debeat humanitatis totius adoratio. Et reverà, nemo unquàm reperietur pius cultor Cordis Jesu, qui dùm Cor Jesu adorat, ut est Cor Jesu, in eo adorationis cultu non intendat personam ipsam Christi, atque adeò Divinitatem ejus, totamque Sacrosanctam humanitatem comprehendere.

§ 11. — *De mysticâ significatione quæ in speciali cultu Cordis Jesu, aliisque similibus institutionibus recolenda proponitur.*

Deinde, adeorum eximendum scrupulum, qui vereri videntur, ne inducto semel determinato quopiam cultu erga singularem quampiam determinatam partem Corporis Christi, pari jure tot cultus inducendi sint pro uniuscujusque arbitrato, quot vel minimæ partes in Corpore Christi distingui possunt, quæ licentia facillè posset, ignarum præsertim vulgus, in supersticiosæ pravitatis vitium pertrahere, sedulò et hoc animadvertendum, nunquàm hanc datam esse privatis licentiam, privatum fictumque pro suo cujusque arbitrio cultum sibi adsciendi; verùm totam religiosi cultûs rationem ex Ecclesiæ sanctissimis præceptionibus et institutis pendere, quæ cum Spiritu Dei regatur, nihil sinit in suas institutiones obrepere, quod sit à pietatis spiritu sejunctum. Hinc fit, ut in specialibus festis illis, quæ ad specialem quamdam Christi Corporis partem referuntur, mysticam quamdam significationem spectet potissimum, quæ specialem afferat in speciali eo cultu defixam recordationem mysterii cujuspiam, insignisve cujusdam redemptionis beneficii.

Mystica ejusmodi significatio in quinque Plagarum cultu ex Chrysostomo deprompta (3 lect. 3 noct.) piè recolenda proponitur: « De latere sanguis, et aqua. Nolo tam facillè, auditor, transeas tanti secreta mysterii; restat enim mihi mystica atque secretalis oratio. Dixi Baptismatis symbolum, et mysteriorum aquam illam et sanguinem demonstrare... Ex latere igitur suo Christus ædificavit Ecclesiam.... » Unde apparet quemadmodum hoc singulari cultu erga sacrum latus apertum Christi excitari valeant fideles ad magni hujus mysterii plenam pietatis recolendam memoriam; quo Ecclesia ædificata prodiit à latere Christi, velut secundi Adæ dormientis.

Ad eundem modum, quod attinet ad cultum sacri Cordis Jesu, libentes agnoscimus rectè dictum à Fellerò: « Porro Cor Jesu schema

est, seu symbolus, quo Christi erga nos charitas, et infinita ipsius amabilitas exhibentur, ut nos vicissim in ejus amore incalcamus. » Rectè, inquam, et eò quidem rectius quòd Christus ipse piarum affectionum, quas nos ab ipso mutuari vult, sedem in ipso Corde suo demonstrarit: *Discite à me quia mitis sum, et humilis corde*. Quo patet, nil quoque rectius in eà institutione ab Ecclesià fieri potuisse quàm ut in hâc potissimum sede flagrantissimam Christi erga nos charitatem recolendam proponeret.

Ad extremum, notam suam Feller his verbis concludit: « Atque hæc est, inquit, tota substantia, et mens illius devotionis, quæ vocatur *de Corde Jesu*, à quâ omnis adoratio Cordis Jesu mater aliter aut formaliter sumpti (etsi huic quoque sua reverentia debeatur, uti omnibus ad Christum pertinentibus) omninò abest, et abesse debet: quemadmodum summi pontifices Clemens XIII, et Pius VI, declaraverunt, et hic quidem conceptissimis verbis in suo ad Pistojensem episcopum rescripto: *Sancta Sedes modum jam turbis, et questionibus imposuit, satisque declaravit, quòd substantia illius devotionis ab omni certè superstitionis materialitate immunis reverà spectet, ut in symbolicâ Cordis imagine immensam charitatem, effusumque amorem divini Redemptoris nostri meditemur, atque veneremur*.

Hoc loco, primùm quidem ultrò concedendum Fellerò, speciali probando cultu erga Cor Jesu, in id Pontifices potissimum intendisse, ut in symbolicâ Cordis imagine immensam Christi charitatem fideles meditarentur, atque venerarentur. Quod quidem quàm piè ab illis, quàm sanctè statutum sit, facile intellectu est ex his, quæ paulò ante dicta sunt de mysticâ significatione, quam ad specialem mysterii cuiuspiam aut beneficii Redemptionis memoriam recolendam in ejus generis institutionibus pontifices maximè propositam habuerunt. Et sanè cùm sacrum Cor Jesu duplici ratione spectari possit, vel ut corporea pars Carnis ejus, vel ut symbolum ejus in nos immensæ charitatis, profectò minùs erat causæ, cur sub priore aspectu specialis cultûs ratio pro eâ parte distingueretur, quæ in toto comprehenditur; at contra valdè ad pietatem conducebat, ut in eâ parte, quam Christus, ut dictum est, velut piarum suarum affectionum sedem demonstravit, tanquàm in aptissimo symbolo immensa ea charitas recoleretur, quâ ille dilexit nos, et

seipsum tradidit pro nobis. Non ergo in eo falluntur adversarii, quòd hanc dicant substantiam esse hujusce devotionis, prout est à pontificibus piè sanctèque probata, sed in eo quòd hoc ipsum pugnare velint cum adoratione, quæ ob hypostaticam unionem, ut Corpori toto, sic et singulis Corporis Christi partibus debetur, quâ sit ut in Corde Jesu adorando, ut est Cor Jesu, id est personæ Verbi, Verbum ipsum cum eâ parte corporis assumpti adoretur; et id quidem unâ eâdemque adoratione, ut in formulâ censuræ declaratum est.

Istud etiam verum certissimumque est, nihil antiquius, nihil optatius fuisse summis pontificibus, quàm ut, quemadmodum à cæteris omnibus, ita et ab speciali hâc devotione erga sacrum Cor Jesu illam sedulò propellerent *materialis et carnalis* devotionis invidiam, quam tot maledici clamatores in eam conferre non desistunt, quasi per illam merum et simplex musculosum carnis frustum fidelibus adorandum proponeretur; quâ in ferendâ calumniâ dùm pios Cordis Jesu cultores *Cordicolas* per contemptum appellant, non satis advertunt quàm ipsi sibi imprudentes inurant ignominie notam, vetere illâ renovandâ contumeliâ, quam in catholicos humanitatis Christi adoratores apollinaristæ velut ἀνθρωπολάτραις (*Homonicolas* per summam impudentiam conjicere non verebantur.

§ III. *Fellerus refellitur argumento ducto ex reverentiâ quam fatetur materiali quoque Cordi Christi deberi.*

Nec verò silentio prætereunda *Parenthesis* quam Feller in hanc extremam notæ suæ particulam inclusit, è quâ nemo theologus non facile valeat firmum adorationis latriæ, quæ Cordi Jesu, ut est Cor Jesu, debetur, argumentum ducere. Quippe factâ ibi expressâ mentione cordis Jesu *materialiter* aut *formaliter* sumpti, quatenus nempe Cor est carne compactum, ei tamen *materiali* Cordi concedit, imò affirmat *suam quoque reverentiam deberi*. Jam verò, cùm fide constet Cor istud materiale hypostaticè Verbo unitum esse, quæro ex Fellerò quam ille reverentiam ei Cordi, *ut suam*, deberi velit? Latriæne adorationem, an genus aliud inferius adoratione latriæ? Quis porrò catholicus ferre possit, si quis dicat, Cordi Christi, prout Divinitati unito (de quo uno sermo habetur in formulâ censuræ) non aliam reverentiam deberi, quàm quæ sit inferior adoratione latriæ? Restat igitur ut quisquis

fateatur materiale Cor Jesu, prout est Cor Jesu, hypostaticè esse Verbo unitum, ei quoque fatendum sit, si qua reverentia ei Cordi sic unito debetur, hanc reverentiam non aliam esse quàm quâ Verbum cum propriâ suâ Carne adoratur, quæ certò inferior esse nequit adoratione latriæ.

Frustra porrò quis objiceret agnitam tamen esse à sancto Thomâ (3 part. quæst. 25, art. 2) adorationem quamdam hyperdulæ, quæ humanitati Christi tribui valeat. Quippe S. doctor apertè loquitur *in hypothesi*, quâ humanitas Christi aut separata esset reapsè ab hypostasi Verbi, aut per mentem separata conciperetur. Ita ille dilucidè mentem suam explicat, resp. ad 1, ubi ad Glossæ textum quemdam in object. positum respondet : « Quòd Glossa illa non est sic intelligenda, quasi seorsum adoretur (adoratione hyperdulæ) caro Christi ab ejus Divinitate; hoc enim posset contingere solùm hoc modo, si esset alia hypostasis Dei et hominis. » Quem statum ritè notat sylvius, nec esse, neque unquàm futurum. Positâ porrò etiam fictâ per mentem hypothesi disjunctionis humanitatis à Divinitate, pergit S. Doctor : « Tunc sic intellectæ ut separatæ à Dei Verbo, deberetur sibi adoratio dulæ, non cujuscumque, puta quæ communiter exhibetur aliis creaturis, sed cujusdam excellentioris, quam hyperduliam vocant. » Missâ proinde omni aliâ supervacuâ quæstione de hoc hyperdulæ cultu, illud, quod unum ad rem pertinet, ex hoc ipso loco patet apertissimè hanc S. Doctoris, ut et omnium theologorum constantem semper fuisse mentem ac sententiam, genus hoc reverentiæ, quod hyperdulæ cultu continetur, estque adoratione latriæ inferius, nullum erga humanitatem Christi locum habere, nisi quatenus humanitas aut à Verbo reapsè divisa concipiatur, aut, ut paucio pinati sunt, abstractione factâ per mentem ab unione cum Verbo in sese duntaxat, ut humanitas est, spectetur.

Eligat proinde Feller de duobus utrum statuere malit de reverentiâ quam materiali quoque Cordi Christi, *ut suam*, deberi fatetur, prout est Divinitati unitum, tumque omnium Catholicorum consensu referenda hæc est ad cultum latriæ; tumque cum hæc locum habere nequeat, nisi per separationem aut qualemcumque abstractionem ab unione cum Verbo, hoc ipso inconsideratissimè vagari convincitur extra formulam censuræ, quæ tota vertitur in adoratione, quæ Cordi Jesu debetur, prout

est Cor Jesu, Cor proinde personæ, quæ non alia est quàm persona Verbi, cui sacrum illud Cor indivisâ prorsus atque inseparabili est unione conjunctum; eò proinde Fellerus adigitur ut ei fateri necesse sit, ritè positum esse in formulâ censuræ adorationem quæ Cordi Christi, prout est Verbo hypostaticè unitum, debetur, ad latriæ cultum referendam esse, nisi velit aut verba ipsa formulæ fœdè pervertere, aut à catholico sensu apertè desciscere.

§ IV. De indivisâ hypostaticâ unione Verbi cum Corpore ab animâ separato in triduo mortis.

Vix intelligi potest quid in hanc mentem Fellerum impulerit, ut ex apostolicâ constitutione veritus non sit particulam demere, quæ explanationis loco posita in superiore formulâ censuræ, sensum refert pietati non minùs quàm sanæ doctrinæ planè consentaneum his verbis : *Ad eum modum quo exsangue Corpus Christi in triduo mortis sine separatione aut præcisione à Divinitate adorabile fuit in sepulcro.* An fortè non satis illi certum exploratumque fuit, unionem Verbi cum Corpore in triduo mortis ita firmam constituisse, ut vi hujusce unionis Corpus Christi sine separatione aut præcisione à Divinitate unâ eademque adoratione, prout supra explicatum est, adorabile fuerit in sepulcro?

At primùm de permanente hypostaticâ unione verbi cum Corpore in triduo mortis, omnem ei scrupulum gravissima eximere debuerat auctoritas ex Catechismo romano petita in explanatione Symboli, quâ de singulis articulis sanâ verborum formâ ex constanti Ecclesiæ sensu depromptâ non minùs accuratè quàm nitidè expositâ traditur. Jam verò in Expositione, art. 4, n. 7, hæc de Christo mortuo et sepulto *constanter credenda et confitenda* doctrina proponitur : « Quare, cum Christum mortuum esse dicimus, id significamus, Animam à Corpore divisam esse; neque tamen concedimus Divinitatem sejunctam à Corpore; quin potius constanter credimus et profitemur, Animâ ejus à Corpore divisâ, Divinitatem tum Corpori in sepulcro, tum Animæ apud inferos conjunctam semper fuisse. » Et n. 10 : « Neque verò hoc solùm credimus Christi Corpus sepultum esse, sed illud præcipuè his verbis credendum proponitur, Deum sepultum esse, quemadmodum ex fidei catholicæ regulâ verissimè etiam dicimus Deum mortuum et ex Virgine natum esse; nam cum Divinitas nunquàm divisa fuerit à Corpore quod in sepulcro conditum

« est, rectè confitemur Deum sepultum esse. »

Eandem doctrinam ex eadem fidei regulâ haustam luculenter exponit S. Thomas (3 part. quæst. 50, art. 2) : « Ea quæ sunt humanæ naturæ non dicuntur de Filio Dei, nisi ratione unionis; sed de Filio Dei dicitur id quod convenit Corpori Christi post mortem, scilicet esse sepultum, ut patet in Symbolo fidei, ubi dicitur quod Filius Dei *conceptus est*, et natus ex Virgine, passus, mortuus, et *sepultus*. Ergo Corpus Christi non fuit in morte à Divinitate separatum. »

Haud mirum proinde, doctrinam ex ipsâmet regulâ fidei ductam communi Patrum traditione in Ecclesiâ perpetuò retentam esse, ac infidelium animis penitus defixam insedissee.

1^o Tertullianus certè (lib. de Carne Christi, c. 5), Marcionem impugnans : « Quid enim, inquit, indignius Deo? Quid magis erubescendum? Nasci, an mori?... Circumcidi, an suffigi? Educari, an sepeliri? In præsepe deponi, an in monumento recondi? » Qui dicit non magis Deo indignum fuisse in monumento recondi, quàm in præsepe deponi, profectò statuit, sic verum esse dicere, fuisse Deum in monumento reconditum, quemadmodum verum est dicere, Deum fuisse in præsepe depositum, sed ideò verè dicitur, Deum fuisse in præsepe depositum, quia non solum Corpus, sed Corpus Verbo unitum depositum fuit in præsepe; ergo, ut eodem etiam modo verum sit dicere, Deum fuisse in monumento reconditum, necesse est fateri, non Corpus tantum, sed Corpus Verbo unitum in monumento fuisse reconditum. Quin et paulò post idem Tertullianus subjicit, minimè pudendum esse fateri, Dei filium crucifixum, mortuum et sepultum; quid porrò pudendum in eo fuisset, sepultum fateri Corpus à Divinitate sejunctum?

2^o S. Athanasius (lib. 1, contra Apollinarium, n. 18), modum exponens quo Christus emisit spiritum : « Ita ut, inquit, expirationem nemo dixerit Deitatis transmigrationem, sed animæ discessum. » Quid significant hæc verba, *nemo dixerit*, nisi constantem planèque universalem Ecclesiæ sensum? Et lib. 2, n. 14 : « Cum Deitas neque Corpus in sepulcro dederet, neque ab animâ inferis separaretur. »

3^o S. Cyrillus Hierosolymitanus (catech. 13 de Christo crucifixo et sepulto, n. 55), super hæc verba Jeremiæ (Lament. c. 3, v. 53) : *Mortî dederunt in lacu vitam meam, et posuerunt lapidem super me*, Christum inducit sic loquentem : « Ego lapis angularis, electus, pretiosus

« intra lapidem condor ad modicum tempus, lapis offensionis Judæis et salutaris credentibus. » Et pergit : « Insitum est igitur lignum vitæ in terrâ, ut hæc, quæ maledicta fuerat, benedictionem consequeretur, et ut liberarentur mortui. » Corpus Christi conditum in monumento à Cyrillo dicitur *lignum vitæ insitum in terrâ*; quomodo porrò *lignum vitæ* nisi prout Verbo unitum? Quin et corpori huic, *intra lapidem condito*, ea tribuuntur quæ non nisi Christi personæ conveniunt, ut sit lapis angularis, electus, pretiosus. Personam igitur Christi cum Corpore conditam in sepulcro agnovit Cyrillus.

4^o S. Cyrillus Nyssenus (lib. 1 contra Eunomium, tom. 2, pag. 35, ut tradit Le Quien, notâ in Damasceni locum paulò post indicandum) : « Verbum à Corpore quod suscepit, sejunctum in morte non fuisse confirmat hoc effato quod hodièque perseverat : *Quod Verbum semel assumpsit, nunquàm dimisit.* » Verba recitat Le Quien S. doctoris : A neutro separata Deitas est, quocum semel contemperata fuit. Dein subjungit, à Gregorio, velut etiam à Damasceno explicatum esse « qui factum sit, ut, sejunctis per mortem Corpore et Animâ, una duntaxat hypostasis extiterit, scilicet *propter insertam utrique Verbi Deitatem.* Per Corpus enim quod erat in Corde terræ, superatum fuisse illum, cujus erat mortis imperium. » In Corpore itaque, quod erat in corde terræ, insertam uterque Pater hypostasim agnoscit, quâ ille superatus est, cujus erat mortis imperium.

5^o S. Cyrillus Alexandrinus (lib. de rectâ in Jesum fide, ad Theodosium ap. Labb. tom. 3 edit. Venet. inter acta ad partem 1 concilii Ephesini pertinentia, n. 21), super illud : *Quia neque derelictus est in inferno, neque caro ejus vidit corruptionem* : « Nec enim, inquit, fas est dicere, Carnem Verbo unitam aliquando potuisse corrumpi, aut divinam illam Animam intra inferi portas detineri. » Christi Carnis incorruptionem in sepulcro manifestè hic repetit Cyrillus ex ejus unione cum Verbo. Quin ejusdem unionis constantem perpetuitatem clarè jam satis indicaverat S. Pater n. 20 : « Quemadmodum ergo caro, inquit, postea quàm Verbi omnia vivificantis caro effecta est, mortis et corruptionis imperio superior evasit. » Ex eo nempe caro imperio mortis superior evasit, quòd semel caro effecta sit Verbi omnia vivificantis; quæ non semel tantum vivificanti Verbo unita esset, si posteaquàm

semel unita inde in morte separata, iterum in resurrectione unita fuisset.

6° S. Ambrosius (de Isaac et animâ, n. 31), loquens de expectatâ præsentiâ Christi Filii Dei : « Saliens quomodo venit ? Saltu quodam » venit in hunc mundum. Apud Patrem erat, « in Virginem venit, et ex Virgine in præsepe » transilivit. In præsepi erat, et fulgebat in « cœlo, descendit in Jordanem, ascendit in « crucem, descendit in tumulum, surrexit è « tumulo, et sedet ad Patris dexteram. » Ambrosius ad eundem modum loquitur de Filii Dei descensu in tumulum, atque de illius descensu è sinu Patris in Virginem, in præsepe, in Jordanem. Jam verò par non fuisset ratio descensus Christi Filii Dei in tumulum, nisi quemadmodum Filius ipse Dei cum Corpore fuit in præsepe, ita et idem Dei Filius fuisset cum corpore in tumulo. Eadem eisdem penè verbis repetit Ambrosius in Psal. 118, serm. 6, n. 6.

Idem (de benedictionibus Patriarcharum, n. 20) : « habes ergo incarnationem, accipe « passionem : *Recumbens*, inquit, *dormisti ut « leo*,.... sicut ipse ait : *Ego dormivi, et re- « quievi, et surrexi, quoniam Deus suscepit me,* « unde et Jacob ait : *Quis suscitabit eum?* Hoc est, « hoc est quem Dominus suscipiet. Quis est « alius qui resuscitet, nisi ipse se suâ Patris- « que resuscitet potestate? Video natum aucto- « ritate propriâ, video mortuum propriâ volun- « tate, video dormientem potestate propriâ. » Ad passionem refert Ambrosius dormitionem Christi. Idemque ab eo designatur dormiens in sepulcro, qui passus in cruce. Sed certè in cruce passus est Dei Filius in corpore sibi unito; ergo et in corpore sibi unito requievit in sepulcro. Quid porro quod Ambrosius *dormientem* illum declarat *potestate propriâ*? An Corporis à Divinitate sejuncti propria potestas esse potuit, quâ se suâ Patrisque potestate resuscitaret?

Idem (in Psal. 36. n. 36, super illud Joan. 31) : *Quod erat ab initio.... quod perspeximus, et manus nostræ scrutatæ sunt de Verbo vitæ, et vita apparuit* : « Caro ergo est quæ in Christo appa- « ruit, vel Christus in carne; ipse in omnibus « nostra vita est. Ipsius Divinitas vita est ipsius « passio vita est.... Ipsius mors vita est; ipsius « vulnus vita est; ipsius sanguis vita est; ipsius « sepultura vita est; ipsius resurrectio vita est... « Divisio facta est in ipso, vita est; sepul- « tura facta est in ipso, vita est. » Sicut ergo caro Christi vita est, quatenus conjuncta est ei Divinitas, eademque ratione passio vita est, et mors, et resurrectio, ita nec sepultura vita

dici potuit, nisi prout et Carni sepultæ Divinitas conjuncta erat. *Divisio* etiam quæ facta est animæ et corporis, et subsequuta sepultura, ideò vita, quia in divisione Divinitas, quæ vita est, nec ab animâ divisa est, nec à carne sepulta.

Nisi ergo volumus Ambrosium turpiter à se discrepantem inducere, quam ille dixit (exposit. evang. secund. Luc. lib. 10, n. 137) factam in morte Christi *secessionem divinitatis et corporis* prorsus intelligere cogimur *derelictionem*, quâ factum est ut spiritus emissionem Christus mortem obierit; quæ communis est hujus loci doctorum intelligentia cui et suam in eundem locum adscribunt Maurini editores : « Hanc, inquit, opinatus est Ambrosius, Di- « vinitatem contra manifestum Pauli testi- « monium secessisse à Christi Corpore vel ani- « mâ semel assumpsit? Respondent Petrus « Lombardus et S. Thomas, recessisse Divini- « tatem quoad effectum, id est protectionem « suam subtraxisse; etenim *si non cohibuisset « potentiam*, inquit ille, *sed exercuisset, non « moreretur Christus.* »

7° S. Augustinus (epist. 187 ad Dardanum, n. 5) : « Neque enim ipso die in cœlo futurus erat « homo Christus Jesus; sed in inferno secun- « dùm animam, in sepulcro autem secundùm « carnem. » Eodem modo tradit Augustinus Christum in sepulcro secundùm carnem fuisse, quo secundùm animam in inferno. Aut ergo ab utrâque parte sejuncta Divinitas fuisse censenda erit, aut cum utrâque pariter conjuncta. Quod si Divinitas ab utrâque parte recessisset, dirempta prorsus fuisset hypostatica unio Verbi cum humanitate totâ quâ peremptâ unione, Filius quidem Dei mansisset, Christus esse desiisset. Item (n. 7) : « Homo quippe Christus « illo die secundùm carnem in sepulcro, se- « cundùm animam in inferno futurus erat : « Deus verò idem ipse Christus ubique sem- « per. » Quomodo verò Christus secundùm animam Deus in inferno, et ipse idem Deus secundùm carnem in sepulcro, nisi quatenus unita mansit Divinitas et cum animâ in inferno, et cum corpore in sepulcro?

Luculentus multò etiam idem Augustinus (serm. 213 in traditione Symboli, n. 3) : « Cùm « enim dictum esset in Symbolo : *Qui con- « ceptus est de Spiritu sancto, natus ex Virgine « Mariâ*, jam quid pro nobis? *Passus est, se- « quitur, sub Pontio Pilato, crucifixus, mortuus « et sepultus.* Qui Filius Dei unicus Dominus « noster crucifixus, Filius Dei unicus Do-

« minus noster sepultus est. Homo crucifixus
 « est, homo sepultus; Deus non est mutatus,
 « Deus non est occisus, et tamen secundum
 « hominem occisus..... Solâ carne in sepulcro
 « jacebat, et tamen confiteris *Jesum Christum*
 « *Filium ejus unicum..... et sepultus*, qui Jesus
 « Christus, unicus Dei Filius, Dominus noster.
 « Sola caro jacet, et tu dicis: Dominus noster,
 « planè dico, quia vestem intueor, et vestitum
 « adoro..... » In carne sic jacente intuebatur
 Augustinus filium Dei vestitum, eumque adora-
 bat. Quomodò porrò Filius Dei carne ves-
 titus adorandus in sepulcro fuit, nisi quia in
 morte vestem illam non deseruerat, quam in
 Virgine assumpserat? Hinc et n. 4: « Non
 « contemnamus solam carnem; quando jacuit,
 « tunc nos emit. » Caro etiam cum sola ja-
 ceret, id est sine animâ tum adhuc tamen nos
 emit; quomodo emit, nisi quatenus in eâ carne
 Filius Dei erat, eâ ipsâ carne suâ vestitus?

Et serm. 214 (n. 7): « Dùm enim sit totus
 « Filius Dei unicus Dominus noster Jesus
 « Christus, Verbum et homo, atque, ut expres-
 « sius dicam, Verbum, Anima et Caro, ad to-
 « tum refertur quòd in solâ animâ tristis fuit
 « usque ad mortem quia Filius Dei unicus
 « Jesus Christus crucifixus est; ad totum re-
 « fertur quòd in solo homine crucifixus est,
 « quoniam Filius Dei unicus Jesus Christus
 « crucifixus est; ad totum refertur quòd in
 « solâ Carne sepultus est. » Porrò, quòd Chris-
 tus in solâ Carne sepultus est, non posset hoc
 ipsum ad totum referri, nisi Verbum Carni
 unitum mansisset, ut proinde verum esset di-
 cere, Christum totum sepultum esse, etsi non
 secundum totum, quemadmodum fidissimus
 Augustini interpres S. Thomas explicat, part. 3,
 quæst. 52, art. 3: « In morte autem Christi,
 « inquit, licet anima fuerit separata à Corpore,
 « neutrum tamen fuit separatum à Divinitate.
 « Et ideò in illo triduo mortis Christi dicendum
 « est quòd totus Christus fuit in sepulcro,
 « quia tota persona fuit ibi per Corpus sibi
 « unitum, et similiter totus fuit in inferno,
 « quia tota persona Christi ibi fuit ratione
 « Animæ sibi unitæ; totus etiam Christus tunc
 « erat ubique ratione divinæ naturæ..... » Et
 ad 1: « Et ideò per hoc quòd Corpus Christi
 « non fuit in inferno, non excluditur quin
 « totus Christus fuerit, sed ostenditur quòd
 « non fuit ibi totum, quod pertinet ad huma-
 « nam naturam. »

Idem Augustinus (De Civit. Dei lib. 22,
 cap. 17): « Sopor quippe ille viri, mors erat

« Christi, cujus exanimis in cruce pendentis
 « latus lanceâ perforatum est, atque inde san-
 « guis et aqua profluxit; quæ sacramenta esse
 « novimus, quibus ædificatur Ecclesia. » In
 mystico sopore Adami agnoscit Augustinus fi-
 guram mortis Christi, et quidem in eo statu,
 quo ex ejus latere lanceâ perforato profluxêre
 sanguis et aqua, sacramenta videlicet, quibus
 ædificatur Ecclesia. An verò ea vis fuisset mor-
 tui Corporis à Divinitate sejuncti, ut cum san-
 guine et aquâ ex ejus perforato latere manante
 sacramenta profluxisse dicerentur, quibus est
 Ecclesia ædificata? Profectò, si mysticus Ada-
 mi sopor figura fuit, ut Augustinus docet,
 soporis Christi, eo statu, quo exanime corpus
 ejus perforatum est lanceâ, plus quiddam in
 eo Corporis cernebat Augustinus quàm merum
 corpus mortuum, in quo prout à Divinitate dis-
 juncto nihil interesset quod mystico sopori
 Adami responderet; nempe ut figuræ in Adami
 sopore præmissæ, in sopore Christi mortui ve-
 ritas adimpleta intelligeretur.

8º Vigilius Tapsensis (lib. contra Felicianum
 Arianum in append. tom. 8 S. Augustini, cap.
 14, pag. 43): « Sic in sepulcro carnem suam
 « commoriendo non deseruit, sicut in utero
 « Virginis connascendo formavit. »

9º S. Fulgentius (lib. 3 ad Trasimundum,
 cap. 16): « Licet in Christi morte carnem mo-
 « rientem fuisset anima desertura, Divinitas
 « tamen Christi nec ab animâ, nec à carne
 « posset separari suscepta. »

10º Magistri sui sententiam hanc eandem
 Ferrandus diaconus (epist. ad Severum, n. 8,
 ad ann. 552) præclarè confirmat his verbis:
 « Totus Christus apud inferos fuit secundum
 « animam rationalem, sed non totum, quia
 « Caro ibi non fuit, cum quâ est totum. Totus
 « Christus in sepulcro fuit secundum Carnem,
 « sed non totum, quia anima ibi non fuit, cum
 « quâ est totum. Verbum tamen Dei, et cum
 « animâ sua apud Inferos et cum Carne suâ in
 « sepulcro fuit. »

11º Sedulius à Gelasio dictus vir venerabilis
 (carmine Paschali, lib. 5 ex accuratissimâ edi-
 tione Cl. Faustini Arevali, de Christi sepulturâ
 v. 295):

Ergo ubi depositi thesaurum Corporis amplum
 Nobilis accepit Domino locus ille jacente.

Et v. 309:

Posite custodes, monumento advolvite saxum:
 Quis poterit servare Deum....?

Deum agnoscebat Sedulius reconditum in
 monumento, quod amplum depositi Corporis

thesaurum acceperat; ergo et unitum ei Corpore Verbum.

Et quidem verbum in Christi mortē neuti-
quā secessisse à Corpore præclarè Sedulius
paulò ante significaverat, v. 261 :

Ergo ubi cuncta boni completa est passio Christi,
Ipse animam proprio dimisit Corpore sanctam,
Ipse iterū sumpturus eam, quia mortuus idem,
Idem virus erat, membris obeuntibus in se,
Non obeunte Deo.....

Membra obeuntia in se factam in morte Ani-
mæ discessionem à Corpore planè significant,
non tamen à separatis partibus *obeunte Deo*.

12° S. Leo M. (serm. 67 de Passione, cap. 7):
« Nam cum in Christo Dei et hominis una per-
« sona sit, nec ab eo potuerit relinqui à quo
« non poterat separari. » Et serm. 68, c. 1 :
« Cum in tantam unitatem Dei et hominis na-
« tura convenerit, ut nec supplicio potuerit di-
« rimi, nec morte sejungi. » Hæc scilicet ro-
manæ Sedis prædicatio, Petri perpetuò in eâ
sedentis ore, per quem disposuit Deus audire
gentes verbum Evangelii, et credere.

13° S. Ildephonsus (ex præclarâ collectione
SS. PP. Toletanorum, operâ eminentiss. de
Lorenzâ, lib. de Cognitione baptismi, c. 9) :
« Non enim fas est dicere Patrem et Spiritum de
« Virgine genitos, vel cruci suspensos, vel se-
« pulchrâ conclusos, quæ in solâ personâ Christi
« omnia congruenti et evidenti sunt dispensa-
« tione completa. » Personam Christi sepulturâ
conclusam fuisse agnovit Ildephonsus; quo ni-
hil significantius ad permanentem Verbi cum
sepulto Corpore unionem declarandam.

14° S. Joannes Damascenus (de Fide orthod.
lib. 3, c. 27) : « Quamvis igitur Christus, ut
« homo, mortem obierit, sanctaque ipsius Ani-
« ma ab immaculato Corpore distracta sit, Di-
« vinitas tamen à neutro, h. e. nec ab Animâ,
« nec à Corpore quoquo modo sejuncta est;
« neque propterea una persona in duas divisa
« fuit; siquidem et Corpus et Anima simul ab
« initio in verbi personâ existentiam habuerunt;
« ac licet in morte divisa sint, utrumque tamen
« unam Verbi personam quâ subsisteret, semper
« habuit. » Hæc Damascenus de Fide orthodoxâ.

Nihil in hisce plerisque auctoritatibus occur-
rit obscurum et involutum, quod ancipiti inter-
pretationi locum relinquat. Palàm ac nitidè
PP. et doctores gravissimi profitentur ita fir-
mam constitisse conjunctionem Verbi cum hu-
manâ naturâ, cum Corpore videlicet et Animâ,
ut neque per mortem dirempta sit. Atque ita
loquuntur non tam ut suam, quàm communem

voluisse videantur Ecclesiæ sententiam expromere. Frustra proinde quisquam paucas contra,
et quidem ambiguas dictiones objiciat, paucis
ex Patribus depromptas, quæ commodâ expli-
catione à theologis ad communem aliorum sen-
sum sic revocantur, ut sola quædam in verbis di-
screpantia, nullâ in re dissensio appareat. De Am-
brosio dictum est supra. Hilarius vindicant ipsi
Maurini. Major fortè difficultas in hâc Epipha-
nii sententiâ hæresi 69 : « Deitatem cum Animâ
in procinctu fuisse, ut sanctum Corpus desere-
ret. » Verum de illo sic doctus Le Quien (cit. loc.
Damasc.) : « Hic solus est Græcis quem ita cen-
suisse noverim, si Apollinarium excipias, » qui
tamen vindicari quoque non immeritò fortassè
posset, accuratiore quâdam allati loci cum aliis
institutâ collatione.

Firma proinde et rata consistat oportet Ca-
techismi romani ducta ex regulâ fidei senten-
tia, quicum ore uno consentiunt omnes quot-
quot Ecclesiâ totâ traduntur christianæ doctri-
næ institutiones, in quarum consensu totius
ipsius Ecclesiæ sensus maximè se prodit. Liceat
ex multis honoris causâ B. Alexandri Saulii
Corsicæ Apostoli catechismum proferre (1), de
quo bonus certè æstimator S. Franciscus Sale-
sius, rogatus ut christianas institutiones gregi
suo edere vellet, respondisse fertur, sic pridem
illam operam ab Aleriensi episcopo perfectam
et absolutam, ut nihil desiderandum superes-
set. Is porrò (in explanatione art. 4 Symboli),
proposito, ut moris erat, quæsito, an in Christi
morte separata sit persona Filii Dei ab humanâ
naturâ, planè respondet : Imò semper illam cum
Animâ et Carne Christi conjunctam mansisse;
rationemque affert ex S. Thomâ depromptam.

Ac ne alias institutiones, ex iis etiam de-
promptas, quas Pistoriensis synodus commen-
datione suâ dignas censuit, penitus neglexisse
videamur, in illâ ipsâ *universali institutione*, quam
supra memoravimus, eadem catholica veritas
liquidò asseritur (P. 1, c. 4, § 1) ; ibi quippe,
post ritè expositum « sensum quo dici potest
« Jesum Christum à Patre derelictum in suâ
« passione fuisse, » ad quæsitum, utrum Divi-
nitas perinde atque Anima in morte à Christi
Corpore separata fuerit, nitidè ac sine ullâ du-
bitatione respondet : « Divinitas ne punctum
« quidem temporis à primo incarnationis mo-
« mento sese ab humanitate disjunctit ; atque

(1) Hujus scilicet apostolici nominis decore
est ille insignitus, litteris quibus eum immor-
talis memoriæ pontifex Benedictus XIV in Bea-
torum numerum adscripsit.

« adeò post mortem conjuncta inseparabiliter
« fuit cum Animâ et Corpore, tametsi separatis
« inter se. »

In hoc ergo tam firmo, tam constanti universalis planè Ecclesiæ sensu, quisquis fateatur, ut fateri omninò debet, divinitatem in Christi morte conjunctam cum Corpore mansisse, verumque adeò esse *ad litteram*, Filium Dei, Verbum Patris sepultum fuisse, fateatur quoque necesse est, verum esse dicere, Christi Corpus exsangue sine separatione aut præcisione à Divinitate, prout nempe Verbo unitum, seu (quod eòdem recidit, ut supra ex-

plicatum est), Verbum ipsum cum Corpore sibi unito unâ eademque adoratione latriæ, quæ certè dividi non potest (ex concilio V generali) separatim Verbo, separatim naturæ ab eo assumptæ, adorabile fuisse in sepulcro. Ut proinde Fello viro catholico nil causæ fuerit, cur ex contextu pontificii decreti verba illa, pietati non minùs quàm veritati ex regulâ fidei ductæ planè consentaneâ ausu certè non ferendo sustulerit; nisi tota mutilationis hujusce culpa, prout ab initio prænotatum est, indiligentiæ potius librarii seu typographi, quàm Fello ipsi adscribenda sit.

INDEX.

Ludovici Legrand vita. Columna, 9. — Prefatio, 10. — Tractatus de Incarnatione Verbi divini, 11. — Dissertatio prima. De nomine, definitione et cognitione Incarnationis, *ibid.* — Caput primum. De nomine et definitione Incarnationis, 12. — Caput II. De cognitione possibilitatis mysterii Incarnationis, 15. — Articulus primus. Ostenditur Incarnationis possibilitatem non demonstrari positivè, 19. — Articulus II. Ostenditur mysterium Incarnationis demonstrari negativè, seu demonstrationibus non impugnari, 22. — Conclusio, 26. — Solvuntur objectiones, 31. — Articulus III. Ostenditur mysterii Incarnationis veritatem ex revelationis sensu nativo indagandam, posthabitis circà ejus possibilitatem rationis difficultatibus, 68. — Solvuntur objectiones, 76. — Corollarium, 81. — Caput III. Quibusnam mysterium Incarnationis seu futurum, seu peractum innotuerit? 82. — Articulus primus. Utrum Incarnatio Angelis bonis et malis fuerit nota? *Ibid.* — Conclusio prima, 85. — Conclusio II, 86. — Conclusio III, 92. — Articulus II. Utrum Adamo, Patriarchis, Prophetis et Judæis mysterium Incarnationis fuerit cognitum, 93. — Conclusio prima, *Ibid.* — Conclusio II, 95. — Conclusio III, *Ibid.* — Articulus III. Utrum Incarnationem futuram gentiles perspectam habuerint, 96. — Conclusio prima, *Ibid.* — Conclusio II, 97.

Dissertatio II. De existentia mysterii Incarnationis adversùs Judæos adstruenda, 99. — Caput primum. Messiam jamdudum advenisse contrà Judæos ex Prophetarum oraculis de-

monstratur, 100. — Articulus primus. De vaticinio Jacobi, *ibid.* — § 1. Utrum ex vaticinio Jacobi adversùs Judæos adstruatur jamdudum adventasse Messiam, 101. — Conclusio, 102. — 1^o Qui in vaticinio Jacobi prædicatur venturus, jamdudum venit, 103. Solvuntur objectiones, 115. — § 2. Nonnulla de Jacobæi oraculi exitu inter Theologos controversa discutiuntur, 131. — Variæ Theologorum opiniones, 135. — Quid nomine Judæ in vaticinio Jacobæo designetur? 137. — Solvuntur objectiones, 138. — Quid in vaticinio Jacobi significetur nomine Schebet. Conclusio I, 140. — Conclusio II, 151. De initio, continuatione ac cessatione scripti in tribu Juda. Conclusio I, 157. — Conclusio II, 158. — Conclusio III, 160. — Conclusio IV, 163. — Solvuntur objectiones, 178. — Quid alterâ vaticinii parte: Et dux de femore ejus, significetur, 185. — Articulus II. De insigni vaticinio Danielis, 9, v. 24 et seq., 189. — § 1. Ex Danielis vaticinio demonstratur Messiam jamdudum advenisse, 194. — Conclusio, 195. — Solvuntur objectiones Judæorum, 199. — De systemate Marshami, 212. — Conclusio, 214. — De Hypothesi Calmeti, 226. — Conclusio, 227. — § 2. De initio septuaginta hebdomadarum Danielis, 228. — Index chronologicus. Variis circà Danielis septimanas exponendis systematibus accommodatus, 230. — Utrum ab aliquâ prophetiâ ducendum sit septimanarum Danielis initium, 235. — Conclusio, 234. — An ab edicto Cyri septuaginta hebdomades computandæ sint? — Conclusio,

235. — Darius ille qui I Esdr. 4 templum perfici edixit, est-ne Darius Nothus à cujus anno 2 septimanæ putandæ sint? 238.—Conclusio, 239. — Solvuntur objectiones, 241. Utrùm ad annum secundum Darii Hystaspidis referendum sit initium Septimanarum Danielis? 251. — Conclusio. Decretum ab Artaxerxe Longimano Esdræ concessum sermone, est-ne à cujus exitu hebdomades ducentæ? Conclusio, 252. — Solvuntur objectiones, 255. — Arcessendum-ne sit septimanarum Danielis initium à litteris regiis, seu à rescripto quod Artaxerxes Longimanus Nehemiæ concessit? 260.—Conclusio I, 265. —Conclusio II, 267.—Solvuntur objectiones, 282. — Articulus III. De vaticiniis Aggæi et Malachiæ, 301. — Articulus IV. De aliis vaticiniis quibus Messiam venisse ostenditur.—Conclusio, 309. — Caput II. Ex Prophetarum oraculis contra Judæos evincitur Christum Jesum esse Messiam, 312. — Articulus primus. Vaticinia Jacobi, Danielis, Aggæi, etc., antè adducta, in Christo Domino completa ostenduntur. Conclusio I, 315. — Conclusio II, 316. — Conclusio III, 318. — Conclusio IV, 320. — Articulus II. De multis aliis oraculis in Christo ad eventum perductis, 321. — § 1 De vaticiniis Messiae nativatem et infantiam spectantibus. De genere Messiae. Conclusio, 322. — Solvuntur objectiones, 324. — De Messiae nativitate ex Virgine. Conclusio, 329. — De loco nativitatis Messiae, 336. — Conclusio, 337. — Solvuntur objectiones, 339. — De tempore nativitatis Messiae, 346. — De nomine Messiae imponendo aliisque ejus infantiae mysteriis, 350. — § 2. De vaticiniis ad Messiae vitam, ministerium, miracula aliasque ejus ministerii circumstantias attinentibus. Conclusio, 351.—§ 3. De Prophetarum et Evangelistarum circa Messiae passionem et mortem consensione. Conclusio, 355. — § 4. De vaticiniis quibus resurrectio et ascensio Messiae, necnon Spiritus sancti diffusio prædictæ sunt. Conclusio, 377.—§ 5. De sacerdotio, meditatione, Prophetæ titulo, divinitate et variis dotibus personæ Christi secundum Prophetas et novum Testamentum competentibus. Conclusio, 378. — § 6. De rebus maximis seu ad Judæos, seu ad gentiles attinentibus ex adventu Messiae juxta Prophetas nexis; ubi de Judæorum obæcatione, de gentium vocatione, de novâ lege à Messia sancientâ, de donis per ipsum con-

cessis et de ejus regno spirituali agitur. Quo loco Messiam à Judæis habendum Prophetæ prædixerint. Conclusio, 389. — Solvuntur objectiones, 392. — De novâ lege, quæ veteri legi, juxta Prophetas, substitui debuit. Conclusio, 395. — Solvuntur objectiones, 400. — De vocatione gentium ad fidem christianam. Conclusio, 408.—De Messiae regno spirituali, ubi simul de ejus donis et officiis juxta Prophetas, 415. — Conclusio, 417. — Solvuntur objectiones, 420. — Caput III. De variis aliis momentis et indiciis quibus Messiam venisse eumque esse Jesum Christum confirmatur, 432. — Primum momentum ex typis quibus olim Messias figuratus est, petitum. — Secundum momentum, ex Prophetiarum Messiae prænuntiarum cessatione. — Tertium momentum: Christus tunc venit cum Messias à Judæis expectabatur, 435. — Quartum momentum, ex multitudine Pseudo-Messiarum, à quibus, juxta Christi vaticinium, decepti sunt Judæi, 436. — Quintum momentum, ex statu dispersionis et captivitatis in quo Judæi detinentur, 437. — Sextum momentum: Judæi sibi conscii sunt tempora adventus Messiae à Prophetis præfixa, præterisse, 441. — Septimum momentum, ex miraculis Christi et Apostolorum, 443. — Octavum momentum, ex testimonio Josephi, 445. — An allatum Josephi testimonium genuinum sit? 446. — Conclusio, 447. — Solvuntur objectiones, 450.

Dissertatio III. Quomodo adversus gentiles efficiatur mysterium Incarnationis existere. — Caput primum.—Ex factis evangelicis, præsertim verò ex miraculis Christi et discipulorum ejus, hunc esse à Deo missum adstruitur, 457. — Factorum evangelicorum veritas demonstratur, 461. — Caput II. Ex resurrectione Christi speciale argumentum eruitur, 478. — Caput III. De miraculis quæ ab Apostolis eorumque discipulis ac primis fidelibus edita sunt, 485. — Caput IV. Christum esse à Deo missum ex ejus Religionis propagatione ostenditur, 485. — Caput V. Ex Prophetis adstruitur Christi missionem esse divinam, 488. — Conclusio, 491.

Dissertatio IV. Mysterium Incarnationis existere adversus hæreticos adstruitur, 494. — Caput primum. Adversus plurimos veteres hæreticos asseritur Christi natura humana. — Articulus 1. An Christo fuerit verum et solidum corpus? 495. — Conclusio, 496. — Articulus 2 An corpus Christi terrenum fue-

rit et ex Mariâ Virgine sumptum, 499. — Conclusio, 500. — Articulus 3. Utrum Christus habuerit animam et mentem humanam, 503. — Conclusio, 504. — Caput II. An sit unica in Christo persona, nempe persona Verbi, 507. — Articulus 1. De hæresi Nestorianâ, 508. — § 1. Utrum Nestorius eum tenuerit errorem propter quem damnatus est. Conclusio, 411. — § 2. De æquitate condemnationis Nestorii, ubi falsæ criminationes in sacram synodum Ephesinam et S. Cyrillum à quibusdam hæreticis structæ, diluuntur, 530. — Conclusio I, 531. — Solvuntur objectiones, 540. — Conclusio II, 543. — Solvuntur objectiones, 548. — Conclusio III, 562. — § 3. De agendi ratione et fide Joannis Antiocheni aliorumque qui Nestorio patrocinati sunt. Conclusio, 568. — Articulus 2. Adversus Nestorium dogma catholicum adstruitur. Conclusio I, 575. — Solvuntur objectiones, 584. — Conclusio II. Beata Virgo verè est Θεοτοκος, Deipara, 588. — Solvuntur objectiones, 592. — De celebri S. Chrysostomi testimonio ex Homil. ejus 3 in Epist ad Hebr., 595. — Caput III. Exponitur hæresis Eutychiana, et duas esse in Christo naturas ostenditur, 602. — Conclusio, 609. — Solvuntur objectiones, 616. — Caput IV. Contrà Monothelitas ostenditur duas esse in Christo voluntates et operationes. Ubi de facto Honorii, 621. — Conclusio, 626. — Solvuntur objectiones, 629. — De mente Honorii, et judicio quod de eo tulit synodus VI, 634. — Conclusio I, 638. — Conclusio II, 650. — Conclusio III, 658. — Conclusio ultima, 663.

Dissertatio V. De convenientiâ et necessitate Incarnationis, 666. — Caput primum. An absolutè necessaria fuerit Incarnatio, aut saltèm per se Deo conveniens extrinsecè. Conclusio, 667. — Caput II. Utrum Incarnatio in hypothesei creationis fuerit necessaria, 680. — Conclusio, 682. — Solvuntur objectiones, 689. — Caput III. Utrum in hypothesei lapsus generis humani necessaria fuerit, aut saltèm conveniens Incarnatio? Conclusio, 697. — Caput IV. De convenientiâ aut necessitate Incarnationis in hypothesei reparationis generis humani, 703. — Conclusio, 705. — Solvuntur objectiones, 712. — Caput V. Utrum in hypothesei condignæ satisfactionis pro peccato exhibendæ, simpliciter necessaria fuerit Incarnatio? 719. — Conclusio, 723.

Dissertatio VI. De naturâ Incarnationis, 738.

— Caput I. De Unione hypostaticâ in se spectatâ. Articulus 1. De usu et significatione vocum hypostaseos et Personæ. — 1° Ejusmodi vocabulorum usus et necessitas, 739. — 2° Quid vox personæ significet, 740. — De usu et significatione vocis ὑποστάσεως, ubi de ejus à substantiâ et naturâ discrimine, 749. — Articulus 2. In quo formaliter consistat Unio hypostatica, 759. — Conclusio, 766. — Solvuntur objectiones, 772. — Corollarium, 775. — Caput II. De extremis Unionis hypostaticæ. Articulus 1. De personâ assumente. 1° Uniuntur ne natura divina et natura humana in Christo; atque utrùm facta sit unio hypostatica in naturâ an verò in personâ. — Conclusio I. Conclusio II, 776. — 2° Utrum Pater et Spiritus sanctus incarnari potuerint? Articulus 2. De naturâ assumptâ, 779. — 1° An sola natura humana potuerit à Verbo assumi? — 2° Utrùm natura humana à Verbo assumpta propriam existentiam habeat, sitque individua et singularis? 780. — Conclusio, 781. — An Verbum assumpserit omnes naturæ humanæ partes? 782. — Conclusio I, 785. — Conclusio II, 784. — Conclusio III, 785. — Conclusio IV, 786. — Conclusio V, 788. — Caput III. De modo unionis hypostaticæ. Articulus 1. Utrum hypostatica unio sit naturalis, substantialis et omnium unionum maxima, 794. — Articulus 2. An natura humana Christi prius extiterit quàm uniretur Verbo. Conclusio, 795. — Articulus 3. Utrum Verbum divinum, mediante animâ, carnem assumpserit, 800. — Conclusio II, 801. — Conclusio III, 802. — Articulus 4. Utrùm unio hypostatica sit perpetua et indissolubilis, 804. — Conclusio I. Conclusio II, 806. — Conclusio III, 809. — Caput IV. De duobus unionis hypostaticæ consecrariis, nempe an compositio aliqua in Christo admittenda, et quæ communicatio idiomatum. Articulus 1. Utrùm Christus aliquâ ratione compositus doceri possit, et quomodò, 810. — Articulus 2. De communicatione idiomatum in Christo ratione personæ adversus Nestorianos, 815. — Regula I, 815. — Regula II, Regula III, 816. — Regula IV, 817. — Regula V, Regula VI, Regula ultima, 818. — De communicatione idiomatum in abstracto adversus Lutheranos, 832. — Conclusio, 835.

Dissertatio VII. De causis Incarnationis. Caput I. De causâ efficiente Incarnationis.

Conclusio, 858. — Caput II. De causâ meritiorâ Incarnationis, 859. — Conclusio I, Conclusio II, 840. — Conclusio III, 841. — Conclusio IV, 842. — Caput III. De causâ finali Incarnationis, 843. — Conclusio I, Conclusio II, 845.

Dissertatio VIII. De satisfactione Christi, 849.

— Caput I. De necessitate satisfactionis Christi, 850. — Conclusio, 851. — Caput II. De veritate satisfactionis Christi; an verè et propriè pro nobis satisfecerit, 855. — Conclusio. 1° Christus juxta Scripturas vas et sponsor hominum factus, debitum quod peccando contraxerant, passione et morte suâ extinxit, 857. — 2° Christus dato sanguinis sui pretio homines redemit et servavit, iisque salutis media promeruit et acquisivit, 866. — 3° Christus Dei et hominum eo sensu juxta Scripturas mediator est, quòd seipsum offerendo et sanguinis sui effusione iram divinam placaverit eosque Deo reconciliaverit, 868. — 4° Christus sacerdos simul et victima se in Hostiam piacularem pro nobis, seu loco nostro, neci cruentæ objecit, 869. — Caput III. An undequaque perfecta fuerit Christi satisfactio? 898. — Conclusio. Articulus 1. Ostenditur Christi satisfactionem fuisse æquivalentem et superabundantem, 899. — Conclusio, 900. — Solvuntur objectiones, 905. — Articulus 2. Utrùm satisfactio Christi fuerit ex propriis et ex alias indebitis, 913. — Conclusio. Articulus 3. De quartâ conditione satisfactionis Christi, nempe eam satisfactionem fuisse ad alterum. Conclusio, 920. — Articulus 4. Utrùm satisfactio Christi fuerit ad strictos juris apices? 925.

Dissertatio IX. De Incarnationis proprietatibus.

Caput I. De merito Christi. Conclusio I, 926. — Conclusio II, Conclusio III, 927. — Conclusio IV, Conclusio V, Conclusio VI, 928. — Caput II. De perfectionibus et donis animæ et corporis Christo adscribendis, necnon de assumptis ab eo defectibus, 951. Articulus 1. De perfectione Christi hominis ratione intellectûs, seu de scientiâ Christo concessâ. 1° An à primo ortu Christus habuerit scientiam creatam ab omni defectu immunem, 952. — Conclusio I, 954. — Solvuntur objectiones, 959. — 2° De objecto scientiæ Christi, 946. — Conclusio I, 947. — Conclusio II, 950. — 3° De speciebus scientiæ Christi. Articulus 2. De perfectione humanitatis Christi quantum ad voluntatem

consideratæ. 1° De gratiis Christo homini concessis, 952. — Conclusio I, Conclusio II, 953. — 2° An dona Spiritûs sancti Christo collatasint. Conclusio. 3° De virtutibus Christo attribuendis. Conclusio, 955. — 4° Quæ et quanta fuerit Christi sanctitas. Conclusio I, 956. — Conclusio II, 959. — Conclusio III, 960. — Conclusio IV, 961. — Articulus 3. De libertate Christi, 962. — Conclusio I, 963. — Conclusio II, 968. — Articulus 4. De perfectionibus et defectibus à Christo assumptis ratione facultatis sentientis et appetitûs sensitivi, 957. — Conclusio I, 974. — Conclusio II, Conclusio III, 975. — Conclusio IV, 976. — Solvuntur objectiones, 978. — Articulus 5. De perfectionibus et defectibus à Christo assumptis ratione corporis, 985. Conclusio I, 986. — Conclusio II, 987. — Solvuntur objectiones, 990. — Conclusio III, 992.

Dissertatio X. De variis Christi titulis et officiis.

Caput I. An et quomodò Christus sacerdos fuerit? 993. — Conclusio I, 994. — Conclusio II, 995. — Conclusio III, Conclusio IV, 996. — Conclusio V, 997. — Conclusio ultima, 998. — Caput II. Utrùm Christus sit pro nobis mediator et intercessor, et quomodò? Conclusio I, Conclusio II, 999. — Conclusio III. Caput III. An et quomodò Christus sit Ecclesiæ et Angelorum caput? Conclusio I, 1000. — Conclusio II, 1001. — Caput IV. An Christus possit dici Dei servus Conclusio, 1002. — Caput V. Utrùm Christus, ut homo, sit Filius Dei naturalis, ita ut dici nequeat filius adoptionis, 1003. — Articulus 1. De genuinâ Felicis et Elipandi circa Christi filietatem sententiâ, et de errore in eis proscripto, 1006. — Conclusio, 1008. — Articulus 2. An sensu Felicis et Elipandi, an alio quolibet in Christum ut hominem quadrare possit adoptiva filii Dei nuncupatio. Conclusio, 1012. — Articulus 3. Quo sensu intelligendum sit Christum ut hominem esse Filium Dei naturalem, 1017.

Dissertatio XI. De novâ filiatione divinâ ab Har-

duino et Berruyero inventâ et sanctissimæ Christi humanitati vero Filio Dei æterno hypostaticè unitæ abiis attributâ. Caput I. Expositio erroris Harduini et Berruyeri de attributâ naturæ humanæ Christi, quatenus Verbo unitæ, verâ et naturali filiatione divinâ, 1027. — Articulus 1. Error Harduini et Berruyeri in se spectatus exponitur, 1028. — Articulus 2. Error Harduini et Berruyeri

circa filiationem divinam humanitati abiiis attributam relativè ad Scripturarum interpretationem spectatus, exponitur, 1036. — Articulus 3. Idem error Harduini et Berruyerri relativè ad traditionem consideratus explicatur, 1045. — Caput II. Novum Harduini et Berruyerri dogma de Christi humanitate per unionem factâ in tempore Filio Dei, confutatur. Articulus 1. Reprobatur dogma idem in se spectatum, nempe humanitatem Christi sanctissimam personæ uni divinæ unitam Filium Dei esse naturalem, 1059. — Conclusio I, 1060. — Conclusio II, 1068. — Articulus 2. Idem dogma novum Harduini et Berruyerri de Christi humanitate, propter unionem, Filio Dei, quantum ad appendices præcipuas consideratur et refellitur, 1083. — § 1. De pravo sensu quo, juxta Harduinum et Berruyerum Jesus Christus est et in Scripturis dicitur *Deus et super omnia Deus benedictus in sæcula, unum cum Patre, æqualis Deo immortalis, Creator, etc., etc.*, 1084. — § 2. De pravo sensu quo, secundum Berruyerum et magistrum, Christus reverà est et in Scripturis dicitur Dominus, Salvator, mediator, Pontifex, caput nostrum, sponsus Ecclesiæ, cognitor futurorum, secretorum cordis inspector, miraculorum effector, institutor Sacramentorum, Spiritus sancti dator, etc., 1091. — 2º Opponitur interpretationi omnium sanctorum Patrum. 3º Nestorianismo, Arianismo et Socinianismo favet, 1097. — § 3. Expenditur et refellitur appendix tertia novi dogmatis, nempe naturam Christi humanam, in actibus per illam elicitis, minime regi à Verbo, 1100. — § 4. De appendice quartâ novi dogmatis, nempe cum Christus et Apostoli de Filio Dei sermonem habuerunt, eos intelligendos esse in recto de humanitate Christi sanctissimâ personæ uni divinæ unitâ in unitatem personæ, et per hanc unionem naturali Filio Dei factâ in tempore, Dei, inquam, in tribus personis subsistentis. — § 5. Appendix quinta : Eadem est juxta Berruyerum significatio vocis Filii in formâ Baptismi, 1103. — § 6. Appendix sexta : In clausulis orationum Ecclesiæ, per Dominum nostrum Jesum Christum, etc., etc. — § 7. Appendix ultima : Juxta Berruyerum dogma ejus novum fide certum est, et ejus fidei necessitas tanta est quanta necessitas fidei in Trinitatem, in Incarnationem Verbi et ejus æternam generationem, 1104. — Articulus 3. Ostenditur

quàm inania sint quæ Berruyerus ad stabiliendum novum dogma, post Harduinum profert. § 1. Expenduntur probationes quas primo loco ponit Berruyerus et quas ex *ratione theologicâ petitas* vocat, 1106. — § 2. Expenditur probatio quam Berruyerus repetit è versu 7 Psalm 2, 1109. — § 3. Expenduntur septem regulæ à Berruyero traditæ. Prima Berruyerri regula exponitur et falsa demonstratur, 1112. — Rejicitur regula secunda, 1113. — Regulam tertiam falsam esse declaratur, 1115. — Falsitas quartæ regulæ ostenditur, 1117. — In quintam Berruyerri regulam inquiritur, 1118. — Regula sexta expenditur, 1119. — De regulâ septima Berruyerri, 1120. — § 4. De probatione quam Berruyerus ex eo deducit, quòd auditoribus Christi esset ignotum mysterium trium in eo personarum, 1122. — § 5. De probatione quam Berruyerus ex vocibus, *Filii Dei*, de Christo usurpatis ab aliquibus, qui nihil ut putat, audierant de generatione æternâ Verbi, 1123. — § 6. De verbis Angeli ad Mariam Virginem apud Lucam, 1126. — § 7. De tribus primis versiculis Epistolæ S. Pauli ad Romanos, 1132.

Dissertatio XII. De cultu qui Christo debetur, 1135. — Caput primum. An Christo, ut homini, ipsique ejus humanitati debeatur supremus patriæ cultus? 1137. — Articulus primus. Utrùm Christus, ut homo, unâ eâdemque supremâ adoratione cum ejus divinitate sit colendus, *Ibid.* — Articulus 2. Utrùm humanitati Christi, in se directè et in recto considerata, supremus patriæ cultus exhiberi debeat aut etiam possit propter unionem hypostaticam quâ fit ut in Verbo subsistat? 1140.

Cardinalis Gerdilii vita, 1147. — Proœmium, 1151. — De adorandâ humanitate Christi, Synodi Pistoriensis Propositio 61 damnata, 1154. — De Fide. § 1. *Ibid.* — Animadversio. § 2. Exponitur Ecclesiæ catholicæ sensus de adorandâ humanitate Christi PP. Doctorumque sententiis depromptus, 1155. — § 3. Effatum theologicum: Verbum assumptisse corpus mediante animâ, præter rem à Fello productum, 1168. — Propositio 63, damnata. De cultu sacri Cordis Jesu, 1171. — Animadversio. § 1. Reprehensio Felleri ex eo ducta quòd Verbum nullam determinatè et formaliter coporis partem assumpsit, diluitur, 1173. — § 2. De mysteriâ significatione quæ in speciali cultu Cordis Jesu,

aliisque similibus institutionibus, recolenda proponitur, 1176. — § 3. Fellerus refellitur ex argumento ducto ex reverentiâ quam fatetur materiali quoque Cordi Christi deberi,

1178. — § 4. De indivisâ hypostaticâ unione Verbi cum corpore ab animâ separato in triduo mortis, 1180.

FINIS TOMI NONI.



tus. v. 9
6319

THE INSTITUTE OF MEDIAEVAL STUDIES
10 ELMSLEY PLACE
TORONTO 5, CANADA

6319.

